

近代中國史料叢刊第二十三輯
沈雲龍主編

退耕堂政書

徐世昌著

文海出版社印行

時盡香
得戎其
堂

10/12/23

退畊堂政書序

歿齋夫子當辛壬遞嬗之際退居多暇命幕僚陳閻毛祖模鄒致鈞向瑞彝盛孚泰等編訂退畊堂政書寫校既竟詔秉章爲之序秉章咕嗶小儒罔知典要念自從事夫子之門二十年來世變日亟政體日新證諸史冊所載覺世道之興衰人才之消長具有陰陽倚伏之數人之斡旋於其間者困心衡慮以求一當初不外乎通權達變以制其宜宜則通通則雖變亦常也不則窒窒則雖常猶變也我夫子由翰林出佐軍府留衛京師已在陽九百六之交迨以司業再遷而貳兵部值樞廷凡百政典議興議廢斟酌量損益悉預其難事之墨守常經者不以屬也旣立巡警部整飭羣倫納諸軌物遂以尙書出督東三省豐鎬舊地俗原樸僿安常蹈故積久不知其非敝者新之窳者斥之兵刑文教之鉅工商農穀之繁

分涂經畫百廢具舉各行省狃於所習矜矜然曰新政曰變法僉思奉承煇灼識所指歸不知夫子措治之初仍祇審其宜不宜耳安有若何爲新若何爲變之見存哉又以介處強鄰疆索交錯甌脫鈎稽之所係流人居食之所求靡不足以啟覬覦而生邊釁峻詞厚貌交相爲用國信旣昭國體以尊綢繆拮据之略傳播遐邇尤爲世重越二載入典郵傳旋晉參政卽端揆席而我夫子知名朝列則自甲午歲疏請召用張文襄始迨貳兵部裁革書吏人方慮其蟠結深固猝難驟去夫子先六官而爲之談笑從容不逾時而抉數百年之積弊且爲廣籌出路安其身家誦聲大作盈廷欣服後來之遺大投艱實又基於斯焉先有東三省政略一書凡在東之箋奏文告以類附列是編則哀舊日在官奏議函牘之全惟昔人編刻在官文字外吏奏牘暨京曹單銜陳奏者多入私集部

院堂上官則否以事皆隸於官署尙侍相率判諾非一人所得而專縱所屬稿亦不得列入私集以重體制今則國體既更曹部舊僚已漸遷易案牘之存或致遺闕我夫子謀猷入告無事不爲當時政要所關卽無事不爲掌故所託詎可湮置彙萃登列俾後之人有所考當亦言史事者之所取乎故別於集而曰政書甲寅八月嘉善受業弟子曹秉章

退耕堂政書總目

卷一

奏議

卷二

奏議

卷三

奏議

卷四

奏議

卷五

奏議

卷六

奏議

卷七

奏議

卷八

奏議

卷九

奏議

卷十

奏議

卷十一

奏議

卷十二

奏議

卷十三

奏議

卷十四

奏議

卷十五

奏議

卷十六

奏議

卷十七

奏議

卷十八

奏議

卷十九

奏議

卷二十

奏議

卷二十一

奏議

卷二十二

奏議

卷二十三

奏議

卷二十四

奏議

卷二十五

奏議

卷二十六

奏議

卷二十七

奏議

卷二十八

奏議

卷二十九

奏議

卷三十

卷三十一

奏議

卷三十二

奏議

卷三十三

說帖

條議

卷三十四

條議

卷三十五

函牘

卷三十六

函牘

卷三十七

函牘

卷三十八

函牘

卷三十九

函牘

卷四十

函牘

卷四十一

函牘

卷四十二

函牘

卷四十三

電文

卷四十四

電文

卷四十五

電文

卷四十六

電文

卷四十七

電文

卷四十八

電文

卷四十九

電文

卷五十

電文

卷五十一

電文

卷五十二

電文

卷五十三

電文

卷五十四

古今圖書集成

五

電文

卷五十五

電文

退耕堂政書卷一目錄

奏議一

請 召詢重臣以定大計摺

遵裁兵部書吏摺

請 飭新疆巡撫籌辦陸軍及陸軍小學堂摺

遵籌酌派兵隊前赴奉省摺

請調集各軍仿辦秋操摺

請 飭滇省營隊照章改編並抽練分防各營摺

遵議江督奏裁併防營籌辦徵兵摺

擬訂陸軍標旗及閱兵大臣旗式摺

請 飭湖南江蘇浙江三省將原認練兵經費仍按月如數

攤解摺

請 飭各省速行設立陸軍各學堂毋庸多派游學片

核議陝撫奏請更定軍制添練新軍片

核覆江督奏陳練兵籌款情形摺

核議豫撫奏請綠營馬匹就地購買片

覆奏陸軍三鎮考驗情形摺

退耕堂政書卷一

天津徐世昌

奏議一

請 召詢重臣以定大計摺

奏爲時局阡危請

召詢重臣以定大計恭摺仰祈

聖鑒事竊維倭人肇衅迫脅朝鮮我

皇上赫然震怒興師致討中外臣民咸謂以順討逆師無不克而
卒至朝鮮淪陷

盛京告警者以中外諸臣泄沓相仍未能備之於平日措之於臨
事也朝鮮之患不自今日始矣倭人久蓄窺伺之心從容布置於
十數年之前中國晏然而不加備迄事變一朝猝至蓋不待兵綏

相交而勝負成敗之數固可豫決矣今

皇上宵旰憂勞而在

廷諸臣束手無計又不能推賢進能上紓

君父之憂此所以躊躇四顧而不能已於言也今日之所急患無兵耳患無餉耳竊謂苟得其人則十萬之兵千萬之餉不日而可集苟不得其人則雖以數十年簡練之師求一戰而不足比者

命恭親王會辦軍務

命宋慶幫辦北洋

詔旨一下人心爲之一定士氣爲之一振然猶有慮者恭親王雖公忠體國籌策無遺無以輔之亦不能收指臂之效宋慶老成宿將勇略過人然使之獨當一面則有餘使之統籌全局則不足觀中外諸臣可與決大計者莫如湖廣總督張之洞其慮事之周任

事之勇求之今日已罕其匹而其大過人者尤有兩事一曰用人
二曰理財其在山西巡撫任內所識拔者若李秉衡馬丕瑤高崇
基皆卓著勳勞久邀

皇上聖鑒其督兩廣也虛心以待馮子材誠心以馭劉永福和衷
以處彭玉麐讓善均勞將士用命此其知人善任確有成效者也
當其莅粵之初適越法事棘海防報警之時瀕海六門口隘袤延
甚廣八達四通設防頗難周密張之洞悉心擘畫而又畛域無分
近資前敵遠協鄰省問軍餉則於粵是籌問軍火則於粵是取當
拮据萬狀之時揮霍肆應無不各如其意彭玉麐奏稱其實心任
事不遺餘力劉坤一奏稱其繫懷時局力任其難蓋猶第許其謀
國之忠抑未究其設施之密也卽以湖北近事而論開煤礦創鐵
政設織局於漢陽通電綫於澧州規模闊大需費浩繁使他人爲

之已有舉莫能勝之患然猶綽然如有餘力凡遇協撥餉項從無
宕欠此其於理財一事確有心得者也張之洞故嘗受業於胡林
翼規模志趣酷類其師於此兩事尤得林翼遺意至其講求西法
熟精洋務尤爲西洋各國所推服而其數遭彈劾幾爲清議所不
容亦由於此論者或咎其剛愎自用或笑其迂闊而遠於事情此
姑不足深辨試思爲今之計假令聚數十百人觀望周章雍容謙
退憂讒畏禍求免目前不愾則不愾矣不迂則不迂矣
朝廷將安用之方今四夷環逼倭事雖劇而中國所宜防者不止
一倭未然之患爲日方長正我

皇上勵精圖治之秋諸臣枕戈待旦之日除張之洞無足與議大
計者湖北雖長江要衝然尙居腹地非沿海巖疆可比伏求
皇上飛召張之洞兼程來京咨詢大計必能仰補

高深裨益時局非不知用人行政

朝廷自有權衡微末小臣豈容妄議顧念時局孔亟重勞

君父憂勤左右近臣一籌莫展是以效其款款之愚不敢避越職
言事之咎雖與張之洞同鄉夙未謀面且責以艱大之任處之憂
危之地亦無所用其避嫌所有時局阡危請

召詢重臣以定大計緣由理合恭摺呈由翰林院掌院學士代爲
奏進伏乞

皇上聖鑒

遵裁兵部書吏摺

奏爲遵

旨裁革書吏以肅部務而杜弊端恭摺具陳仰祈
聖鑒事竊自光緒二十六年以來迭奉

諭旨裁革書吏各部院咸遲遲未發者一則恐書吏盤踞太久不易驅除一則恐司員公事生疏致多貽悞因瞻顧而成遷就因遷就而成敷衍遂致有另募書手之名無裁革書吏之實部務仍無起色臣等奉

命整頓部務詳查部中積弊雖非一端若欲拔本塞源必自裁書吏爲始數月以來深權熟計裁吏之法略得要領敬爲我

皇太后

皇上陳之一冊稿提歸司堂書吏向據冊稿爲私產卽視規費爲私租欲去其私租非先清其私產不可因責令各司管股司員將本股文稿冊檔接收文簿逐件清出提歸司堂編號收儲嗣後辦事方有根據一寬司員公罪書吏慣技凡緊要稿件每祇呈烏佈較崇之員標畫烏佈稍次之員無從考求最繁之司所收文牘每

月有數千件之多今責以裁吏烏佈較崇者既恐精神不給烏佈稍次者又慮公事生疏遲回卻顧亦人之恆情然與其任書吏之把持事權長此下移絕無廓清之日不如寬司員以文法目前雖形竭蹶終有整理之期擬仰懇

恩施逾格暫免司員公罪三月惟索賄舞文私罪仍照例嚴參各司員必感激知奮稿皆自辦事必躬親公事生疏者三月之間亦可熟習諳練辦事日久人才自出一招考供事書吏既裁酌給筆帖式津貼責令寫稿漢員無烏佈願寫稿者亦酌給津貼如仍不敷卽照考供事例取具同鄉京官印結方准投考錄取後吏部立案役滿時給獎咨吏部赴選優者給予分發進身有階彼必自知顧惜軍機處外務部供事不聞有作弊者其明證也凡從前在署曾充經承者概不准考務盡根株一刪去繁文書吏舞弊往往藉

口公事未齊卽以遲延爲索費之地如武職引

見向有日期摺提頭片口奏排單大排單綠頭牌等件而每員又各有隨摺一分其所敘履歷皆與排單綠頭牌相同究屬繁複今擬略仿吏部辦法徑將滿漢字隨摺停辦其餘應刪事件再隨時酌量奏明裁減一釐定簡明章程例案參差書吏乃易上下其手裁書吏後擬先將選補輪次保案等第奏銷格式細加刪改務求簡明再行請

旨通飭一律遵照使外省咸曉然如是則准不如是則駁可省往返駁查之繁一酌予書吏出路向來書吏役滿勤慎無過准咨送吏部銓選今旣裁撤似宜稍示體恤凡勤慎無過者無論著役已滿著役未滿俱准咨吏部銓選其實有劣跡者雖役滿仍宜斥革不給獎咨選庶曲加體恤之中尙不致有濫冒之弊以上數端謹

撮大要

奏明辦理俟奉

旨後卽將經承各缺永遠裁撤並將各經承姓名榜示通衢以免招搖影射近查數月之內逐日到署各員均知勤奮辦理日行公事查點冊檔辰刻入署每至酉刻始散所有釐定簡明例章籌集公費各事宜容臣等督率各司員詳細擬定續行具

奏再臣等奉

命整理部務將及三月因事事務求實際不敢以空文塞責是以議覆稍遲合併聲明所有臣部書吏實行裁撤緣由理合恭摺具陳伏乞

皇太后

皇上聖鑒

請 飭新疆巡撫籌辦陸軍及陸軍小學堂摺

奏爲請

飭新疆撫臣設法籌辦陸軍及陸軍小學堂以重戎備而固邊防
恭摺仰祈

聖鑒事竊本年四月間准前任新疆巡撫潘效蘇電稱新疆係受
協省分常備續備兩軍以及巡警統計不滿二萬人分布彈壓勢
不能調集一處歸成鎮協依章操練又添出賠款四十萬支絀時
形力難遵照陸軍營制另募鎮協五月間又准電稱陸軍小學堂
自應准辦惟歸巡撫管轄者漢回纏頭布魯四種共百餘萬漢民
不及十分之一絕少讀書識字之人合格學生難得本省無利源
可開協餉解不足數經費尤難籌給各等語臣等查新疆外接強
鄰內屏關隴其地與烏里雅蘇台科布多西藏青海等處相連屬

洵中外之關鍵燕晉之藩籬經武整軍最爲急務惟兵力須恃財力而各省財力實有不齊是以臣等上年奏定練兵新章曾聲明如該省餉項支絀卽可照變通制略內按年編練之法辦理新疆如果籌款爲難不獨新軍步馬礮各隊固可酌減營數先行改編卽陸軍小學堂亦可縮減定額早爲開辦但能創立基礎再行量力擴充似亦得尺得寸逐漸經營之策今該撫臣以財力過絀遂舉練兵建學諸要政概從延置甚非所以重戎備固邊防也查從前大學士左宗棠當議建行省時曾謂恢拓舊城開濬利源可致富強卽該撫臣潘效蘇奏覆籌餉摺內亦有華稅會請開辦荒地尙多未闢等語是該省實有可興之利可籌之款但能設法振興事事核實當無有終年待哺無術自存之理考之前史歷代之崛起於西域者如西突厥西契丹及準噶爾等部類皆就地籌兵斂

餉以吞併鄰敵役屬番戎固未聞仰給於中夏近如雲南之邊瘠
吉林黑龍江之凋劫其能自籌兵食勉力經營者亦復時見章疏
是無論地方之貧困與否亦視當事者之規畫何如耳况新疆地
居邊遠籌款之難臣等亦早經計及故前次攤派練兵經費時已
奏准免其派解以紓邊力該省既不必分心兼顧卽無難一意專
營正宜及時綢繆於本省應辦練兵建學諸事出其全力勉爲籌
度以資整頓而救時艱似未可稍涉推諉視若緩圖致滋貽誤擬
請

飭下該省新任撫臣將籌餉各條內該省認辦之墾荒地權鹽利
查土藥等項及前經奏辦屯牧各事切實振興認真釐剔以裕餉
源其提稅餘一條雖前據奏稱已報繳盈餘毋庸委員徵收但新
疆南路各廳州縣於徵報各稅向多不實不盡仍應由該省撫臣

破除情面擬定整頓辦法用裨度支一俟辦有頭緒卽將該省陸軍如何編練陸軍小學堂如何建設並認辦各項每年實能增出若干原支兵餉改辦屯牧後實在節省若干詳細奏陳並咨報臣處以備考核又前因該省本年應輪派學生赴東就學振武學校迭次電催該前撫臣於七月間先後電咨覆稱漢民太少實無合格學生可以選送等語查該撫前次來電謂漢民居新民百萬中十分之一是尙有數萬之眾且各省開辦武備學堂遴選學生亦並未限定主籍客籍先就在省官民子弟考取該省漢民既有數萬文武官員子弟亦多似不致無可取材擬請一併飭令新任撫臣嗣後就地酌辦遵照選送以廣造就所有請飭新疆撫臣設法練兵建學各緣由謹恭摺具陳伏乞

皇太后

皇上聖鑒訓示

遵籌酌派兵隊前赴奉省摺

奏爲遵籌酌派兵隊前赴奉省情形恭摺仰祈

聖鑒事本年正月初九日准軍機處片交奉

旨趙爾巽電奏悉著練兵處王大臣妥籌辦理欽此遵查原奏內稱奉省兵力過單平時分防勦賊時有顧此失彼之虞本擬請調北洋勁旅藉資協助祇以議約未成不敢遽請現在匪蹤未盡降隊過多非懾以兵威難期靜鎮擬請

旨飭下袁世凱籌備大枝兵隊迅令來東以資屯駐等語臣等伏維奉省爲陪輔重地商務要衝當茲兵燹之餘亟應添駐重兵以資保衛而顧根本惟查日俄撤兵甫過第一期其兩國留兵尙各有數十萬若一時遽遣大軍逼紮恐操之過急易啟猜疑臣等正

在籌議間適臣世昌迭接該將軍來電據稱近日有巨匪苑五率黨數百在錦州朝陽間出沒滋擾現經奉軍圍在小紅螺山請速派礮隊往勦以免竄擾等語查小紅螺山逼近關外鐵路又與直境密邇該處既有土匪竊發自應選派兵隊乘機馳往臣等現擬於駐紮保定府之第三鎮內遴派協統徐占鳳督率步隊一標馬隊兩營礮隊一營由火車運往錦州一俟搜勦竣事卽令駐紮該處聽候調撥惟現在匪勢甚緊已由臣等電商就近先派駐紮永平府之第二標礮隊統帶鮑貴卿酌帶步馬礮共四隊乘火車馳往關外匪擾地方協同奉軍勦捕期速殄除仍俟第三鎮各營出關後卽令遄回永平以重操防至此後應如何添隊出關陸續前進之處再由臣等隨時查看情形奏明辦理所有遵籌酌派兵隊赴奉緣由謹繕摺具陳伏乞

皇太后

皇上聖鑒

請調集各軍仿辦秋操摺

奏爲現擬調集各軍仿辦秋操以習戰備而重戎政恭摺仰祈
聖鑒事竊維戰備必需豫立操法尤戒參差東西各國每於秋冬
間舉行大操詳求赴機應變之方實行政守戰陳之法使各軍部
勒如出一人通國營隊聯爲一氣故無不備不虞之患易收必克
必勝之功徵之經傳如周官四時治兵尤以冬閱爲重我
朝大閱大狩諸典亦以

木蘭秋獮爲特嚴皆期勵戎行習戰法協疾徐進退之節練心膽
耳目之用

列聖垂訓於策勵勇敢講求嚴翼者

殷殷誥誠至再至三誥戎奮武之規同符中外固萬世所當效法者也現陸軍編練各鎮分紮直東尙未會合操演自應參仿舉辦秋操以習戎備而驗實行擬於本年秋間調集各鎮分編兩軍除應酌令留營宿衛兼顧防務及現未成鎮者外以第四全鎮合之第二鎮內暫編為第四混成協及新成山東一鎮內暫編為第九混成協者為一軍作為南軍派統制王英楷暫充總統官以第三全鎮合之京旗陸軍內暫編為第一混成協及新成南苑一鎮內暫編為第十一混成協者為一軍作為北軍派統制段祺瑞暫充總統官先期指明齊集處所由各統制統領自行辦理各鎮協野操定於九月二十四日南軍馳抵交河逐漸北攻北軍馳抵高陽逐漸南禦自二十五至二十七等日在河間一帶會合大操並擬於二十八日舉行閱兵典禮事竣分飭各歸駐所此

次秋操事屬創舉內爲各省標準外繫列國觀瞻應否

欽派大員前往校閱卽由臣世昌臣鐵良屆時親赴操地督率
監視用昭鄭重之處伏候

聖裁現飭設立各處遴派人員豫先籌備分投經理應需用款由
臣處設法籌挪動支核實請銷經過地方併經出示曉諭庶本教
戰卽戎之義驗知方有勇之規以仰副

聖朝整軍經武建威銷萌之至意所有擬請調集各軍仿辦秋操
各緣由謹恭摺具陳伏乞

皇太后

皇上聖鑒訓示

請 飭滇省營隊照章改編並抽練分防各營摺

奏爲雲南駐省營隊擬令照章編改並將分防各營酌量抽練以

整戎行恭摺仰祈

聖鑒事竊准雲貴總督丁振鐸咨稱據善後局司道會同布政使陳燦等將光緒三十年冬季分現設各防營營名兵數暨督撫署親兵省標水軍提鎮親兵名數造冊詳請分咨相應咨送等因前來查原冊內開該省現設營隊祇樹字右前後三營開花礮隊工程隊各一哨及省標等兵駐紮省城此外五十一營俱分防各處惟所立營制均在未奉新章以前故每營官兵併計或三四百人或二百餘人且有自領百人獨當一路不以營名繫屬者若聽其散漫不思所以整齊之恐糅雜參差營伍終無起色本年四月間臣等詢據該督電稱法越鐵路縣長派營防護兼桂匪未靖沿途聯防騰餉無多現祇編練新軍步隊一標礮隊一營等語應由該督按照復電辦法先將駐省營隊遵照新章切實編改如法訓練

正言卷一
俾作諸軍模範其在防各營雖未能調集一處亦應換防抽練庶
可逐漸擴充前據陝甘總督崧蕃奏編練新軍一摺經臣等議復
令將駐省常備軍照新制編立並督飭在防營隊仿照改編一面
選派熟悉新操之員分赴防所教練仍輪流換防調省入操等因
另摺復奏在案滇省防軍自應酌量情形仿照辨理至冊載防營
名目錯雜紛歧擬令改正統名爲雲南巡防隊自第一營起依次
排列其零星隊伍並宜歸併成營縱使隨地分防制度總須一律
仍將舊立營制遵照新章逐漸編改俟編制相符再將某省防軍
字樣刪去以示區別現既改練新軍凡兵備參謀教練事宜須有
諳悉兵學之員專司贊畫應由該督加意遴選分別委派將來添
練至一協以上卽設立督練公所總司軍政以符定章綜計該省
所設兵勇額數共一萬五千餘人果使汰弱留強認真訓練輪流

換防逐漸編改再就原有餉項設法增籌酌中審定不難推廣成
鎮擬請飭下該督按照臣等所指各節悉心籌辦以一軍制而重
戎行所有滇省軍隊擬令照章編改並換防抽練緣由謹繕摺具
陳伏乞

皇太后

皇上聖鑒訓示

遵議江督奏裁併防營籌辦徵兵摺

奏爲遵

旨議奏恭摺仰祈

聖鑒事竊本年七月二十七日准軍機處鈔交署兩江總督周馥
奏裁併防營籌辦徵兵先練一鎮一摺奉

硃批練兵處兵部議奏欽此原奏內稱江南諸軍疲弊已久上年

十二月設立督練公所先將原有常備等軍編爲步隊八標馬隊礮隊工程隊各一營併擬增設輜重隊一營軍樂隊一隊悉照新章人數剔出餘兵編爲留防隊此外尙有新兵等各營旗哨均照新章一隊之制分編留防步隊三十六隊馬隊十隊以備彈壓緝捕之用老弱遣散五千餘人兵餉暫不募補留辦徵兵現計第一等標汰留歸併改辦徵兵已有四標再將馬礮各隊擴充卽成鎮原擬就所編八標立成兩鎮今江北專練一鎮蘇州防軍亦編一協同時舉辦力實未逮祇可先成一鎮所有應辦營房器械服裝戰馬等及勸辦徵兵統計明春當可完成其鎮協名目懇恩飭練兵處將現編常備一鎮及江北應練一鎮覈定鎮協標營名次俾有遵循一鎮薪餉暨開辦加籌要塞留防各餉需以舊餉抵算短數在二三百萬惟有悉心規畫另籌等語查江南襟控南

洋形勢最爲重要近年外伺日深經武整軍尤爲急務該督臣所擬籌辦徵兵編改營隊先成一鎮各節均有條理具見繫心戎備切實講求擬請悉照所擬辦理至應辦營壘軍裝等項應補練礮馬輜重等隊亦宜迅速辦竣俾得早日成軍惟所請覈定鎮協名次一節查奏定陸軍新章內開各省已練新軍由練兵處兵部會同奏請

簡派大員前往考驗擇營制操法一律合格者

欽定軍鎮協標號數等因今該省擬練一鎮尙未奏蒙

簡派大員考驗礙難飭定鎮協名次擬名爲暫編南洋陸軍第九鎮步隊名爲暫編第十七十八等協第三十三三十四三十五三十六等標馬礮工程輜重各隊俟補足後名爲暫編馬隊礮隊第九標工程隊輜重隊第九營統制以下關防皆刊暫充二字仍俟

練有成效

簡派考驗後再行奏請

欽定名次統制以次各官由臣處臣部奏咨補授官職發給劄付
另刊關防除去暫充字樣以符定制其江北擬練一鎮一併俟編
練就緒再定暫編鎮協等名次以昭畫一原奏又稱其餘原練四
標卽暫留作爲要塞守兵不再編鎮等語查該四標旣擬令分守
要隘與現編留防步馬等隊皆有防守緝捕之責自不能專意訓
練擬令一律改爲巡防隊編制可從其新餉章官名可仍其舊免
與陸軍相混俾符名實又原奏徵兵擬仿日本畫定管區酌分江
蘇所轄各府廳州爲江南江北蘇州所練二鎮一協之地係爲主
兵易以集練異籍難以相安起見應由該署督臣等察酌情形妥
爲辦理現在練兵籌餉皆關根本至計亦實相爲表裏以江南之

幅員遼濶一鎮之兵洵不足以資控制然非寬籌餉項又無資以
練重兵該署督臣究心軍政綜核素精必能開濬餉源蔚成勁旅
以仰副

朝廷修明戎備建威銷萌之至意除俟該省成軍日期及章制操
法奏咨到日由臣等核定是否合格隨時奏明外所有議奏緣由
謹會同繕摺具陳伏乞

皇太后

皇上聖鑒

擬訂陸軍標旗及閱兵大臣旗式摺

奏爲擬訂陸軍標旗及閱兵大臣旗式恭摺會陳仰祈

聖鑒事竊臣等上年奏定新軍章制標旗制略內載步馬各隊每
標應有標旗一面平時設專弁奉持之戰時標統擁以偕行進退

攻守視爲標準各國標旗向由國主頒發將士見之儀如謁君我亦宜略仿其意由練兵處擬定式樣請

旨頒發旗到軍中統將以下列隊虔迎敬謹供奉等語現在各省軍隊已按照奏定新章以次改編所有此項步馬隊標旗自應由臣處擬就式樣恭候

欽定以備頒發又臣等恭閱

大清會典內所載武備各圖如八旗自都統以至護軍校綠營自督撫以至什長莫不定有旗纛之制繪列簡編凡所以肅觀瞻而別等威者鉅典鴻規至爲詳備方今各省所練新軍一經編定均應奏請

簡員校閱所有

派出大臣體制較崇責任較重亦應請

旨頒發旗纛如古者大臣假節之例方足以振軍氣而壯國威臣等謹查照

皇朝禮器圖式內所載旗纛各營纛制參互考訂分別擬就陸軍標旗及閱兵大臣旗式繪具圖說恭呈

御覽如蒙

俞允卽由臣處恭照製備敬謹存儲其標旗一項俟各省步馬標考驗合格編定號數後隨時請

旨頒發一面札知該鎮派令各標掌旗官前來恭迓俟命下之日由練兵處堂官將該標標旗親授該員並授以軍中訓誡各辭令爲傳述旗到軍中該鎮應如何領受及平時應如何保存各事宜並由臣處按照奏定章程另擬詳細節目札飭遵照辦理至此項標旗係屬綢質將來行用年久如須更換卽由該鎮申報臣處隨

時奏明請

旨換給該鎮不得擅自更製以昭鄭重又標旗內空白之處係留備記載將來該標所得戰功惟無論功績如何均應由臣處考核詳實奏明註冊行知該鎮方准於旗面註載其閱兵大臣旗俟每屆

欽派大員閱兵時再由臣處咨送該大臣祇領行用一經差竣仍繳由臣處收藏以慎名器至各鎮標所隸各營其旗式亦應分別釐定俾各省不致紛歧容由臣等酌擬定式咨行各該督撫查照辦理所有擬訂陸軍標旗及閱兵大臣旗式緣由謹恭摺會陳伏乞

皇太后

皇上聖鑒再此摺係練兵處主稿會同兵部辦理合併聲明

請飭湖南江蘇浙江三省將原認練兵經費仍按月如數攤解摺

奏爲湖南江蘇浙江三省原認練兵經費請

飭照新章按月如數攤解以重餉需恭摺會陳仰祈

聖鑒事竊准軍機處先後鈔交湖南巡撫端方奏籌解本年春季分練兵經費一摺江蘇巡撫陸元鼎奏練兵經費認提銅圓餘利請展期批解一片均奉

硃批練兵處戶部知道欽此又內閣鈔出浙江巡撫聶緝槩奏練兵經費請按季報解一摺奉

硃批戶部知道欽此查核該撫臣等原奏端方則請於前署湖南撫臣陸元鼎認派練兵經費四十萬兩內由節省官捐煙酒田房等稅項下所籌之二十萬兩先解五萬兩作爲本年春季練兵經

正書卷一
費餘照京餉辦法按年分作四季批解其由銅圓餘利認解之二十萬兩奏稱俟開鑄有款再行提撥陸元鼎於前署江蘇撫臣端方認定每年以銅圓新廠盈餘六十萬兩撥作練兵經費一款則奏稱廠屋六月始能告竣機器裝配至速亦在九月原奏本年五月起應解練兵經費請展至九月按數批解聶緝槩則請將認解練兵經費之派提差缺等銀三十萬兩展緩按季報解於該撫上年奏明自認提解銅圓餘利六十萬兩一款奏稱廠屋尙難施工新機未能運到無論如何趕辦總須緩至秋間應俟新廠開鑄有款再行提解各等語臣等查練兵爲根本至計餉項爲計授要需歷來國勢之強弱皆視乎兵力餉力之盈絀刻下時事日棘倘兵餉無著而不加意籌維卽更無國權之可言溯自舉辦練兵以來迭經欽奉

嚴諭飭籌餉項原期多集鉅款即可多成勁旅保民固國全繫於此尤須京外司計諸臣力任其難勉爲措畫方能挽時局而濟餉需若如該撫等所奏是該三省上年所認解銅圓餘利一百四十萬之數皆不啻畫餅充飢實出臣等意計之外現核新軍已編兵數按之上年各省認解餉數卽均如期清解僅能勉敷開支今竟驟少一百四十萬之鉅月餉從何取給部庫從何籌墊是不特未練者無望擴充恐已成者必難支拄飢軍待哺大局堪虞臣等兵食攸司萬分焦灼且現因練兵經費關係重要本年五月間奏請將直隸等省應解常年經費釐定數目按十箇月攤解仰蒙恩准飭令各該督撫按照單開各節如數按期籌解在案查原單內有比較湖南認款派解者有比較蘇浙認款派解者今該撫等於上年認解銅圓盈餘一款江蘇則尙稱於本年九月報解湖南

浙江則並無報解之期且此項銀數江蘇湖南均係前署各該省撫臣所認定浙省更係該撫聶緝槩所自認倘皆任聽延緩必致派解省分紛紛效尤藉詞搪塞置奏定新章於不顧其何以懲延玩而免貽誤應請

旨飭令該湖南江蘇浙江三省仍按上年原奏認解數目設法籌措無論如何爲難均須遵照現定攤解辦法於應解者按月照解於未解者限三箇月內一律補解清訖不准絲毫短欠以清款目而濟要需倘或延踰短絀卽由臣處臣部查取該省藩司暨承辦道員職名按照短解京甘餉成案奏請交部議處其有心延誤設詞巧卸者准由臣處臣部查照原任大學士左宗棠奏劾前山西布政使林壽圖成案請

旨辦理至湖南銅圓廠及江蘇浙江銅圓新廠均於上年奏辦如

果尙未竣工開鑄承辦委員玩延貽誤咎亦難辭應由各該省先將該委員職名查送參處以示懲儆所有湖南江蘇浙江三省原認練兵經費請

飭照新章按月如數攤解各緣由謹繕摺會陳伏乞

皇太后

皇上聖鑒再此摺係練兵處主稿會同戶部辦理合併聲明

請 飭各省速行設立陸軍各學堂毋庸多派游學片

再查臣處未經訂定陸軍學生就學章程以前各省本有官費各生送往日本振武學校肄業者年來仍由各省督撫陸續派送自係爲廣植將材起見惟查陸軍學生現既由臣處按年考送且各省陸軍小學中學各堂業經奏請以次興辦此後造就有資有志之士不難就近肄業倘仍照常多派游學恐漫無限制致滋流弊

擬請嗣後各省如因急切需材不得已擬派學生出洋游學必須查選該生業在本國陸軍學堂入學有成者咨商臣處核准方可派往否則不得率派俾歸專一而免紛歧並請

飭下各省督撫臣將各該省應設各學堂趕緊開辦妥爲經理以期振興武學早日觀成用副

朝廷作育人才之至意謹附片具陳伏乞
聖鑒

核議陝撫奏請更定軍制添練新軍片

再本年五月初六日軍機處鈔交開缺陝西巡撫夏曾奏遵章更定軍制擬添練新軍一摺奉

硃批著曹鴻勛認真辦理欽此仰見

朝廷經武整軍實事求是之至意臣等復覈該撫原奏以陝省練

兵限於餉力未能遽合新制爲言查上年八月間臣處會同兵部奏定陸軍營制並另摺聲明各省形勢不同餉項豐吝亦異不必拘定一鎮或先練一協一標步隊總須趕練礮馬工輜宜緩宜急由各督撫體察情形隨時咨商酌覈辦理等因奏准通行在案今該撫擬於陝省原有常備步隊六旗馬隊一營礮隊兩哨外添練常備步隊兩旗馬隊一旗礮隊一哨意在逐漸推廣綜計現練擬練之常備軍約共二千餘人所支餉數約敷步隊一標馬礮隊各一營之用應照章改編切實訓練爲將來擴充基址倘舊有將官不敷派委新軍職掌則原設之常備軍尙可暫緩編改其新練之隊旣擬另選土著一切編制必須悉照新章不應沿用舊日旗哨名目且宜先從步隊練起庶免零星紛雜教育難施之弊至原奏內稱駐紮省外之防軍屯軍均名爲續備軍查軍隊命名之義其

按格選募訓練已成專備戰征者始名爲常備軍期滿退伍以備征調者始名爲續備軍該省之防軍屯軍旣係分紮巡防一切章程暫可仍舊應概名爲巡防軍免與將來退伍之續備軍相混又原奏內稱購辦新槍背囊衣靴等件一切並如東洋之式等語該軍需用新械等件應由該省分別購備惟軍服制度業經臣等奏請

欽定頒行爲通國畫一之式必須遵照製辦俾符定制以上各節係就該撫所奏情形復加詳覈擬請

飭下現任撫臣曹鴻勛欽遵前奉

諭旨認真辦理仍將籌辦事宜隨時咨報臣處以憑查考如蒙俞允卽由臣等咨行該撫遵照謹附片具陳伏乞

聖鑒訓示

核覆江督奏陳練兵籌款情形摺

奏爲核覆兩江督臣奏陳練兵籌款情形恭摺仰祈

聖鑒事本年六月二十二日准軍機處鈔交署兩江總督周馥奏江南水陸各營軍實不充餉需告匱現擬徐圖整理一摺奉

硃批練兵處知道欽此查原奏內稱整軍經武爲目前要圖擬照練兵處章程編練兩鎮再於淮徐就地徵兵訓練惟所需製配軍裝修理礮台改修練船等乃萬不可省之項現默計整頓鹽務可多收課釐以濟軍食清查稅釐務期費歸實用整頓銅圓各局可獲餘利其餘如籌賑彩票改歸官辦銀行鈔票擬招商辦或甫有萌芽或尙須審慎等語臣等查兩江爲南洋根本重地陸軍亟應照章編練力圖擴充水師亦宜設法整飭期收實濟合之製購修改諸務自必以籌款爲先江南地大物博舉凡鹽務稅釐銅圓等

項果能盡祛蠹弊經理得人，不難籌集鉅款，應請

旨飭下該署督臣嚴飭印委各員切實整頓，以裕餉源。至所稱銀行鈔票擬招商辦一節，臣等籌度再四，未便遽准。蓋歷來行用鈔票開設銀行，或以輔助國法，或以流通財貨，詳考古今，中外皆爲國家獨有利權，理應專歸官辦。銀行尙可招集商股，鈔票則斷無出自商人之理。若概交商辦，旣損國權，尤滋民累。原奏亦謂尙須審慎，應毋庸議。其所稱籌賑彩票改歸官辦之處，查近年各省舉辦彩票，多以利微害鉅，先後奏停。卽間有補苴無術，不得已而奏明開辦者，亦必先籌妥善辦法，慎擇經辦之人，方不致有擾地方。應令該署督臣詳酌妥籌，以昭慎重。又清江銅圓局係前漕督臣恩壽奏定籌借商本創辦，現在事經兩任，該局辦理實在情形及有無窒礙之處，應請

飭該署督臣妥速清查奏明辦理所有核覆兩江督臣練兵籌款各緣由謹恭摺具陳伏乞

皇太后

皇上聖鑒

核議豫撫奏請綠營馬匹就地購買片

再准河南巡撫陳夔龍咨鈔送本年七月初五日附奏綠營馬匹就地購買一片內稱本年奏請續裁綠營復將經制酌減偵探馬全裁所餘練軍及經制馬匹更屬無幾口外馬少價貴綠營馬價每匹實銀七兩有奇不敷甚鉅現綠兵疊裁已無馬兵擬懇

敕部立案將各標營應補倒缺馬匹從本年起令隨時就地購買以示體恤等語查定例綠營補買倒缺馬匹係因各省標營官馬均有定額大省多者至萬餘匹小省少者亦不下數千匹皆供戰

陣之用關繫較重恐弁兵之捏報倒缺玩視餽養也因有限定倒缺購補之例恐馬價之虛冒浮多也因有限定價值之例詳釋例意至爲周密惟現在綠營節次裁汰現存馬數已少該省現存馬匹原奏亦謂無幾併稱已無馬兵此項報缺馬匹無裨實用自可不必仍循舊例辦理且刻下銀值過賤馬價過貴無論邊外內地堪用馬匹斷非例價七兩有奇所能購買如原奏就地購買一節不過循支購馬之款仍無購馬之事徒供綠營官弁中飽而已當此整軍經武之時與其拘牽例文致糜採購之帑項何如卽裁虛額可省養馬之開支擬飭該省各標營自本年一起倒缺馬匹均卽裁汰所請就地購買之處應毋庸議原支乾銀草豆查報節存充餉各省綠營事同一律擬請

飭下各省嗣後凡綠營例報倒缺馬匹概行裁汰停其買補原支

乾銀等項按年一併查明節存移充練兵經費以節浮冗而裕餉源謹會同附片具陳伏乞

聖鑒

覆奏陸軍三鎮考驗情形摺

奏爲考驗陸軍事竣恭摺覆陳仰祈

聖鑒事竊臣等奉

命考驗北洋三鎮於上月二十一日

陛辭後卽東裝就道先至永平府之遷安縣次天津府之馬廠次保定府均按照章制操法分日考驗謹將三鎮情形爲我

皇太后

皇上縷晰陳之一兵馬額數各鎮額設步隊兩協馬礮隊各一標工程輜重隊各一營軍樂一隊共計軍官軍佐弁兵及司書夫役

人等一萬二千五百十二員名又遷安一鎮因出防照章加添戰馬馱馬車輛增設兵夫二百六十名保定一鎮因備出防加添車輛增設兵夫一百一十二名每鎮開點時齊集操場按步馬礮工輜結成長方陣式先行巡視一週然後按營排開列爲橫隊隊分前左右後督同隨帶人員分司其事依次點驗一營點畢趨集左方二營繼進軍官軍佐亦按鎮協標營另爲一行官員職任逐一詳詢兵丁年歲籍貫執業按排抽問應對均無錯誤其馬弁馬夫備補兵伙夫均按名點驗冊內註明患病及看守營房者則到營查點并詣醫院慰勞遷安馬隊第二營分駐永平撫甯小榆關赤峰堡棗村等處防務緊要未能調集則於途次抽驗所有三鎮人數均與額數相符各鎮騾馬額設二千二百一十四匹又遷安一鎮因出防增設五百三十四匹保定一鎮因備出防增設二百二十二

匹均一律驗明足額喂養亦甚合宜一軍械車輛遷安步槍馬槍陸路礮過山礮均於二十年購自日本槍枝口徑六密里五礮位口徑七生特五各鎮照尺用德國推起式所有槍式礮式全鎮一律馬廠步槍於二十九年購自德國口徑七密里九過山礮係甯鄂兩廠所造而鄂造居多口徑均五生特七陸路礮係英廠德廠所造口徑均七生特五馬槍與遷安同式保定馬槍係鄂廠及德廠所造口徑均七密里九陸路輕礮陸路重礮過山礮管退礮均德廠所造口徑七生特五馬克心機器礮係英廠所造口徑八密里二步槍與馬廠同式該兩鎮編制初定購械爲難其槍式礮式僅能使一標一營相同將來仍應逐漸備換俾全鎮劃一三鎮礮車藥車機振甚靈瞄準器具悉合新式槍身腔線機簧螺絲等項細件保存均尙得法尤以遷安一鎮爲優兵丁所用衣帶背包鞋

帽水壺食盒藥盒手槍軍刀雨具工具鞍轡囊褥隨營車輛鍋鑪
帳房一律修整工程隊搭橋之帆布船壳鐵船架及欄杆燈蓋句
繩樁纜電話具繪圖具過河船水旱雷炸藥電機鋤鎬鋸表尺
等件輜重隊輸運彈藥糧秣橋梁工作等項應用器具一切齊備
車輛亦渾堅適用遷安一鎮因出防照章增設隨營軍械分局凡
槍礮零件軍用各物均能自製合於新式該鎮正軍械長銳意考
求匠心獨運殊爲難得一兵房醫院遷安兵房每間進深九尺橫
寬一丈檐高七尺五寸住兵十五名容積稍狹該鎮係因出防照
行營規制趕造將來久駐續議擴充則室內空氣流通尤於衛生
有益各營隊均設倉庫存儲槍械等件保存之法尙知考究講堂
兼飯廳每隊一所以及廚房茶室均尙整備其永平分駐之兵房
廣狹相等遷安馬廐每所約長八丈高八尺深一丈三尺養馬五

十匹未能十分寬展所設雜具房頗爲合宜礮廠所存礮位擦抹甚潔醫院器具藥物尙屬完備馬廠兵房每間進深一丈四尺橫寬九尺五寸檐高八尺二寸住兵十五名容積寬綽地方爽塏保定兵房每間容積較大於遷安略小於馬廠住兵十五名尙形寬展所設飯廳兼講堂均每隊一區亦甚軒朗廚房茶室一律整潔倉庫馬廐礮廠則與遷安大略相同而保定礮廠格式較爲合法馬廠醫院房屋參用西式診室浴室藥房病房布置井井藥物器具一切齊備並設講堂一所俾初愈兵丁在院聽講保定一鎮就省城所設北洋軍醫局作爲醫院該局規制以地當省會美備宏敞非他鎮所能及各鎮正醫官均係天津軍醫學堂高等畢業生造詣精卓副醫官軍醫長亦由該學堂學生輪派更換以資歷練於衛生療治等事皆能細意研求一場操三鎮步隊所習正步便

步跑步轉法槍操靠攏教練散開教練增加法衝鋒法健捷整齊
進步有節馬隊所習行動間隊形變換停止間隊形變換衝鋒法
偵探法戰鬪教練嫻熟敏捷礮隊所習單礮教練數礮教練整列
變排戰鬪動作均能合法工程隊挖築溝壘分演水旱各雷輜重
隊載卸軍需等事皆有條理遷安馬廠各於灤河運河用鐵架蒙
帆布爲船駢列結成浮橋翼以鐵欄覆以木板措置甚爲周妥其
馬廠步隊所演一協教練指揮合度口令貫徹遷安礮隊推挽礮
車手法靈敏則各擅勝場一技藝遷安保定器械體操有平臺雙
杠鐵杠木馬跳繩諸式所習雙肘掛揚腳上掛腳上直豎倒下仰
卧橫跳直跳竿跳徒手跳等技趨捷可觀保定兼有鞦韆天橋跳
臺三式鞦韆爲坐挂肘挂法天橋爲武裝跑步緣繩上橋法跳臺
爲單棍跳下武裝跳下法尤覺輕迅靈健盡飛騰距躍之能事至

柔輒體操則三鎮一律身手均甚流利遷安馬技以三溝聯接各距十密達馬廠則兩溝聯接相距六密達並於兩溝之間築土埂一道馬兵礮兵爭先競進始則單騎相逐繼則並轡雙馳均能連躍而過間有墜者轉瞬卽騰蹕上馬鼓勇復前於騎兵性質似無遺憾保定馬技亦兩溝聯接每溝築土埂一道其馳騁超躍較前一鎮尤爲嫻熟馬廠各兵目測距離遠而一千密達近而二百密達合數者五分之一槍靶相距三百密達中靶者三分之二遷安馬廠演放開花礮各三十出遷安立靶在毛家窪地方相距一千四百密達中靶者五分之四馬廠立靶在下馬廠地方相距一千五百密達中靶者三分之二保定之馬克心機器礮每分鐘能發六百出此次在大楊莊地方演放距靶三百密達中靶者八分之五又管退礮在殷莊地方演放距靶一千五百密達中靶者十分

之九此礮係克魯伯廠新製礮床作長匣式礮身置於匣蓋演放時礮身匣蓋退後匣中機括縮而復伸仍將匣蓋及礮推還原處校準後即可連放省卻每次瞄改之煩且瞄準器具安於礮床左側亦不受礮身震力較諸各種快礮每分鐘出數可增一倍一野操遷安一鎮作爲南北兩軍在縣境會戰南軍不利向赤峰堡一路節節退守北軍追擊隊跟蹤急進騎兵先至丁莊地方遇南軍馬隊衝擊良久南軍退至赤峰山山脈東起西伏以山下斜坡及迤西土阜各置步兵爲左右拒伏身狙伺土阜左側之平岡置礮兵一隊互相犄角阜後西偏卽赤峰堡孔道地勢平衍南軍步馬礮隊全部聯合直抵東山之麓北軍於對山分置礮隊其步隊循山凹繞出張頭村之背鼓行而西馬隊分爲兩翼力攻南軍全部陣地兩軍相持兩時許士卒動作有法沈毅之氣久而弗衰馬廠

一鎮作爲東西兩軍各向馬廠地方進發中隔運河南北橫互西軍利在東據河岸而相距較遠東軍偵知急以帆布船駢列跨河爲橋先敵而濟行抵東西魏村之間馬隊交綏東軍小卻在後步隊遙以槍火助攻西軍馬隊退向丁莊其步隊亦至卽據西魏村礮隊在東南桃林步隊在村北村南總預備隊居後東軍據東魏村礮隊在東南小隄後步隊爲輔其餘各營聯集村北各對敵轟擊旣而東軍步隊伸向右翼西軍步隊伸向左翼陸續增加相持及午西軍遂以預備隊全數展開擴張戰線東軍亦大舉衝鋒直至兵刃旣接乃令停止保定一鎮亦作爲東西兩軍東軍由府城東南仙人橋抵府河北岸循行而西意在直據府城以遏西軍後路而西軍大隊已據河北之康莊扼守府城東面別遣步礮隊分據前面小康莊另置步隊於迤南子藥庫以爲右拒其時東軍步

隊已至大楊莊分三路西進礮隊在大楊莊西端兩軍礮線均向敵注射陸續轟發東軍步隊漸偪漸進西軍或伏踞堤凹或蔽身隴後相對狙擊彼此增加戰線愈拓愈開力戰旣酣東軍張兩翼齊進西軍奮起作包抄之勢反守爲攻是日風霾翳日諸軍動作如常具見操之有素以上考驗各事遷安一鎮成軍最早程度亦最優馬廠保定兩鎮同時成軍各有所長而自兵程度保定較勝其章制操法均一律合格至兵丁性質樸實堅強能耐勞苦無向日勇營舊習三鎮如一而遷安一鎮皆係本省鄉民尤有謹厚之風純靜之氣此又專選土著之明效也伏維

皇太后

皇上軫恤將士注重戎行臣等於每鎮點驗畢卽齊集官弁兵丁剴切宣示並曉以衛

國保家之義明恥教戰之由諸軍威激益加奮勵知方有勇當可
預期現三鎮編制既成考驗符合其鎮協標號數當如何編列應
請

飭下練兵處復核具奏恭候

欽定除將三鎮比較表及逐日詳記考驗各事另冊分咨練兵處
北洋大臣以備參酌並三鎮造具各項清冊圖表咨呈練兵處查
核外所有陸軍三鎮考驗情形謹繕摺覆奏伏乞
皇太后

皇上聖鑒訓示

退耕堂政書卷一

退耕堂政書卷二目錄

奏議二

陸軍學堂大員請 旨嘉獎片

遵議陝督奏就餉練兵驟難編改摺

議覆江督奏整頓滬廠擬派員匠出洋學習片

遵議御史王步瀛奏請推廣遣送學生出洋學習武備摺

遵議粵督奏將弁學堂第一次畢業摺

核覆粵督奏廣東改立陸軍中學堂辦法摺

擬訂貴冑學堂章程並擇地先行試辦摺

請 飭各省將防營改練之續備軍一律改名巡防隊片

核覆蘇撫奏編練新軍分別募遣摺

遵議新撫奏請停世襲兵改練新軍摺

正言卷一
核覆四品京堂鄭孝胥奏請限年趕造軍械片

核議御史王振聲奏請申明軍禮片

續擬陸軍人員任職等級及補官體制摺

請將神機營兵廠改建陸軍小學堂片

請開辦圍場屯墾事宜摺

退耕堂政書卷二

天津徐世昌

奏議二

陸軍學堂大員請 旨嘉獎片

再兵隊之進步視乎官長而官長之成就由於學堂保定向設北洋陸軍學堂一所內分數門曰速成學堂師範學堂將弁學堂小學堂經歷年規畫推廣學舍宏啟生徒薈萃綜計宗室八旗滿漢侍衛京旗常備軍本省營隊各學員以及鄰省將弁本省各省學生入堂肄業者除頭二班畢業學員發入各軍差遣暨回原省供差外現共有一千一百餘名臣等周歷講堂操場齋室詳視課程凡兵隊諸務洪纖畢舉諸生出操修業昕夕孜孜日有進益其尤者於小學堂教務小官長學問並能研究洵爲成效昭著竊維學

堂之與兵隊有最切要之關係堂中多一劬學之士卽軍中多一
訓練之才振武圖強實基於此該堂督辦二品銜分省補用道馮
國璋學識兼優勇於任事不辭勞怨鉅細躬親是以各堂學務蒸
蒸蒸日上臣等既經親歷考察不敢壅於

上聞合無仰懇

天恩一併傳

旨嘉獎出自

鴻施逾格其監督提調教習等員只由臣等擇尤分咨分別記功
以資勉勵所有陸軍學堂成效昭著督辦道員請

旨嘉獎緣由謹附片具陳伏乞

聖鑒訓示

遵議陝甘總督奏就餉練兵驟難遵照新章編改摺

奏爲遵

旨議覆恭摺會陳仰祈

聖鑒事本年六月十四日准軍機處鈔交調補閩浙總督陝甘總督崧蕃奏就餉練兵驟難遵照新章編改一摺奉

硃批練兵處兵部議奏欵此據原奏內稱甘肅防軍因餉絀裁併現在通省馬步不滿萬人大都扼要分紮不能團聚一處省城有防軍五營旗馬隊兩旗礮隊兩隊前經改爲常備軍照章習練此外陝西提督鄧增河州鎮羅平安各統帶五步一馬署甯夏鎮永明西甯鎮張行志各統帶三步一馬署甘州提督張永清肅州鎮柴洪山涼州鎮姚旺各帶步勇一旗馬隊二十騎安西協副將張其高馬隊三十騎前均改爲續備軍各擇要駐紮卽責成各提鎮就近抽練現在惟有將省城常備軍練就各營旗與各提鎮之續

備軍分別換防調省訓練遇有假汰募補土著所謂具體而微勉求相似等語查上年九月間該督奏編常備等軍當經臣等覈覆以所擬營制僅就現有各軍改爲常備續備等名目而於軍事實際尙多缺漏請

飭下該督按照新章編改等因奏准行知嗣復專電催詢各在案今該督續奏以就餉練兵驟難遵照新章編改爲言查臣等奏定陸軍變通制畧已計及各省餉項支絀驟難一律照編特詳載酌減續增之法該省所設常備軍數營合之分防各軍人數已在一協以上雖防軍扼要分紮未能調集一處但使各照新章依次編練規制既歸一律脈絡自可相聯惟該提鎮等所統皆當日舊部改編伊始不無參差隔閡之虞是在該督隨宜措置固不難逐漸合一原奏所擬分別換防調省訓練辦法尙屬合宜祇所稱勉求

相似等語未免意涉遷就軍事重要須得挈領提綱之道以立整齊畫一之規現定陸軍營制內載凡各省新軍練及一協以上者於省會設督練公所慎選兵學諳練人員考校舊日勇營妥籌變革等語應令照章設立慎選諳練兵學人員悉心討論先將駐省常備軍按照新制酌量編練以作諸軍模範並飭該提鎮等就所帶營隊仿照改編一面選派熟習新操之員分赴防所教練仍輪流換防調省人操其餘一切事宜均由該督率同督練公所各員隨時認真考察尤當激勸諸將講求新法爲國家籌遠大之圖萬不可故步自封以籌措艱難之餉分贍無教之兵致年復一年仍無進步至該省現設兵隊分立旗數乃新制所無防軍非常備軍退伍者可比亦不必沿用續備名目應令一併更正總之編練新軍務當力求實際擬請

飭下現任督臣升允按照所指各節遵照新章認真籌辦以副
朝廷整軍經武之至意所有遵

旨議覆緣由謹會同繕摺具陳伏乞

皇太后

皇上聖鑒訓示再此摺係練兵處主稿會同兵部辦理合併聲明
議覆江督奏整頓滬廠擬派員匠出洋學習片

再本年七月二十七日准軍機處鈔交署兩江督臣周馥奏整頓
滬廠擬派員匠出洋學習製造一片奉

硃批練兵處議奏欽此原奏內稱滬廠積弊甚深現已飭該局總
辦等力圖振作核實稽查裁汰冗濫如總辦不得力卽會同北洋
大臣遴員接辦歷年所製槍礮均非精品火藥比較洋製尤屬不
逮現延日本精製火藥師一名考驗舊藥並改製新藥之法一面

選派道員李經敘帶同學生員匠分詣各國名廠學習爰僱精製子彈鍊鋼工師來華選料製造兼教工匠擬於廠內設立工藝學堂教導藝徒分途併進程功較易各等語查滬廠積弊本深自應認真整頓刪汰冗濫將該總辦等隨時考察撤換以挽積習而重軍儲近來各國於子彈火藥等項莫不精求製造推陳出新以利軍用亦非酌派員匠前往學習無以探其精蘊而資仿效該署督臣所請整頓該廠及派員匠出洋僱洋師改製各節規畫尙屬周詳應卽照准惟各省從前招僱洋工師往往失之輕率致鮮成效擬請

飭下該署督臣轉飭該道李經敘精擇慎訂勿蹈前失至原奏擬於廠內設立工藝學堂一節殊與各省工藝學堂工藝局廠等名目相混且此項學堂係專爲教導製造軍械之用應名曰兵工學

堂俾符名實而示區別刻下兵學日新軍械尤重該廠每年糜款不貲製器不精幾等虛設臣鐵良業於本年春間查覆摺內詳細上陳該廠將來固須裁併目下亦斷不可任其窳廢應請

飭下該署督臣務須按照所奏認真辦理以期漸收實效款不虛糜上副

朝廷振興戎備綜覈名實之至意謹附片具陳伏乞
聖鑒

遵議御史王步瀛奏請推廣遣送學生出洋學習武備摺
奏爲遵

旨議覆恭摺仰祈

聖鑒事上年十一月初二日准軍機處鈔交御史王步瀛奏官送學生出洋學習武備宜推廣酌送自費一摺奉

旨練兵處議奏欽此據原奏內稱上年訂定章程日本海陸軍學校所有中國學生皆由練兵處攷驗資送方准入學惟各省武備學堂一時尙難展拓練兵處考驗資送學生亦以經費難籌有未能多送之勢似宜推廣章程凡京外人士有志學習海陸軍事願自備資斧前往日本及西洋諸國者考驗如格准其附送各國入堂肄業學成回國與官送學生一體錄用其未定章程以前有在外洋學習自費學生應令駐洋公使通行察驗報名存記俟其卒業并予錄用等語查臣處於光緒三十年奏准選派陸軍學生赴日本就學並聲明業經在日習武之自費生學業精勤者貼給旅費改爲官費生此後自費生卽行禁止學習陸軍等因誠以軍人之選必須慎重自定章以來除依期選送外並將一切事宜隨時與出使大臣楊樞函電商辦其自費學生內有查明學業精勤改

爲官費者有因積欠學費無力補繳而其程度尙合商令各該省分籌官款代償者蓋旅居異國需用頗鉅學期爲日方長自費原非易易倘仍開此例屆時資斧不繼聽其半途輟業則廢棄可惜全改官費勢難普及此不得不預爲審度者也日本海軍向無中國學生就學近與參謀本部再四相商始允收官費生入海城學校以七十名爲額現擬就在日學習商船自費生內改撥十五名其餘則按沿江沿海各省照額酌分每省或占二十餘名或四五名不等官費定額已患其少自費更無從附入此未能遽議推廣者也且學生初次出洋所習僅海陸軍普通之學須俟數年後撥入艦隊聯隊始有實在閱歷故日本維新之初均由本國海陸軍畢業學生內商由各國認可選送出洋徑入艦隊聯隊學習事半功倍立法最善擬請嗣後凡各省人士願自費學習陸軍者均先

在中國陸軍各學堂投考選定後繳費入堂肄業該堂可延聘東西教習授以普通各學統俟畢業後送京考驗屆時如願出洋再由臣處咨行出使大臣商明認可徑送聯隊學習如此變通辦理似育才較多而程效較捷其就學海軍一節現在官費甫議開辦自費應從緩議至從前畢業之陸軍自費生經臣處及各省軍隊延攬任用者已不乏人自三十年明定就學章程此後自應先儘此項官費畢業諸生錄用以示限制又原奏內稱今年選送學生各省送京人數本自無多及考驗剔退亦復不少宜將不合格式各條列表咨明各省派送時必須合格每省多派數人以備考錄倘經費有餘明年宜多加人數等語查學生資格載在定章早經咨明每遇選送之期復由臣處先期詳細指示咨令各省務須按格慎選上年送到學生經臣處考驗不及格剔退者三十六名緣

軍人體格最嚴未敢稍涉遷就以免到日本後不中程式不能入學至其所缺之額當時各省人士願學陸軍呈請考試出洋者甚多隨即選取合格者補足原數該御史疑剔退後遂致缺額不知定章內原有就近選補專條臣等固早經慮及也總之海陸軍學生爲

國家干城之選必須自設各項學堂廣加培植統俟學成再令出洋閱歷方爲正辦近因軍隊需人孔亟分班遣赴日本就學事屬權宜一兩年內各省學堂辦有成效卽擬將就學章程停止該御史所請多加人數之處亦應緩議再查作養將才須視兵數之多寡而編練軍隊又視餉力之厚薄現值整軍伊始餉源綦絀營數無多而育才之道不得不通盤籌畫量予限制俟將來物力豐阜營隊增多再由臣等隨時查看情形妥議推廣分別奏明辦理所

有遵議緣由是否有當謹繕摺覆陳伏乞

皇太后

皇上聖鑒訓示

遵議粵督奏將弁學堂第一次畢業摺

奏爲遵

旨議覆恭摺仰祈

聖鑒事本年八月二十五日准軍機處鈔交署理兩廣總督岑春煊奏創設隨營將弁學堂已經一次畢業開列章程課目一摺奉硃批練兵處議奏單併發欽此據原奏內稱去年四月開設隨營將弁學堂先選歸標及在營將弁目兵百名作爲第一班速成科學生續選士民合格者六十名作爲本科學生本年續選弁兵七十名作爲速成科復選士民八十名作爲本科速成科半年卒業

本科一年卒業教育課目以日本士官學校課目爲準第一班半年級學生已畢業試驗淘汰之外實得六十一名分別三等獎以頂戴發予文憑派赴新練軍隊充當營哨官長仍由學堂監視半年以來訓練成績尙能行其所知無背本末等語查臣處上年奏定陸軍學堂辦法自中學堂畢業至試充學習官以七年爲期卽近畿應設之速成學堂亦以二年畢業其各省在營官弁則設講武堂日兵則設學兵營俾得分別肄習誠以軍隊需材孔亟而學堂層累極多嚴其格所以宏造學人寬其途所以裁成將弁權宜之計與經久之規不容相混也今該督所設隨營將弁學堂分速成科本科兩項速成科選官弁日兵以半年畢業本科均選士民以一年畢業按原奏所稱發育體智學科實驗術科理解將校當守之矩律當服之義務當通曉之事勢悉使貫澈融會達於精深

而學期如此短促誠恐名實難副且各國官弁兵目分際甚嚴其學問則官長與弁目不同弁目與兵丁又異該學堂速成科合官弁目兵爲一班畢業後概充營哨官長程度豈能適合而入學之初階級懸殊期滿之後統歸一致尤與軍隊秩序大有違礙應俟各班學生期滿卽將所設隨營將弁學堂停辦仍令查照奏定陸軍學堂辦法設講武堂以教官弁設學兵營以教目兵各按奏定辦法內所載專條分別辦理並遵照奏定章程開辦陸軍小學堂考選合格學生按照正課學期分班肄業務求深造爲將來經久之規將一切籌辦詳細情形隨時奏報並咨明臣處以憑考核至原奏內稱畢業學生指名調京試驗一節查此次速成科官弁目兵肄習半年期滿自較在營未學者爲優而與各學堂數年畢業之學生未可相提並論既經獎給功牌頂戴派入軍隊卽令酌量

差遣所請調京試驗之處核與奏定章制不符應毋庸議所有遵旨議覆緣由謹繕摺具陳伏乞

皇太后

皇上聖鑒訓示

核覆粵督奏廣東改立陸軍中學堂辦法摺

奏爲核覆廣東省改立陸軍中學堂辦法恭摺會陳仰祈

聖鑒事竊准軍機處鈔交署兩廣總督岑春煊奏廣東武備學堂改爲兩廣陸軍中學堂並附設廣東陸軍小學堂一摺光緒三十一年九月二十日奉

硃批該衙門知道欽此據原奏內稱廣東武備學堂係於光緒二十八年經前督撫臣奏明設立現准練兵處咨送陸軍學堂辦法並陸軍小學堂章程先後到粵自應遵照辦理惟廣東武備學堂

現行章程係參仿日本中央幼年學校及士官學校辦法實具有陸軍中學堂之程度勢難改習小學之課程應遵照練兵處奏定各省本有中學堂仍准照舊設立一節將廣東武備學堂改爲兩廣陸軍中學堂專收兩廣及廣東駐防各陸軍小學堂畢業生並於堂內附設廣東陸軍小學堂一所等語查臣等前次奏定陸軍學堂辦法第七條內載直隸湖北陝西江蘇分設第一至第四陸軍中學堂四所第三中學堂收兩湖雲貴廣西並荊州駐防各小學堂畢業生第四中學堂收江蘇江西閩浙廣東暨駐防各小學堂畢業生又如各省本有中學堂仍准照舊設立但須由練兵處兵部委員考查程度是否與中學堂功課相符再行酌核辦理各等語今粵省以原設之廣東武備學堂改爲兩廣陸軍中學堂覈其辦法固與定章內之以廣東廣西學堂分隸第三第四兩學堂

者不符卽謂各省本有中學堂原准照設而以本有武備學堂改稱今名則一切程度功課必不能與本省中學堂定章所應有者適相符合陸軍學科關係最重一涉遷就流弊滋多殊非實事求是之道况此端一開倘各省均以原設武備學堂援案請改中學尤與奏定分設四處章制難期畫一該署督臣所請礙難照准至該堂學生旣據稱已有中學程度應令暫改爲速成學堂俾有區別仍卽趕辦小學堂立定基礎遞升中學以符名實併令該署督臣將現辦武備學堂規則課程繕具詳晰表冊咨送臣部以備查考原奏又稱附設陸軍小學堂一所悉遵定章辦理一節查陸軍小學堂係造就軍官初基尤須照章切實興辦方足以培根本而儲將材原奏雖稱附設所有課程規則亦必須一一符合定章方可望日起有功應由該署督臣督飭承辦各員認真經理務收實

效以期仰副

朝廷經武培材之至意所有核覆廣東省改立學堂辦法緣由謹繕摺具陳伏乞

皇太后

皇上聖鑒再此摺係練兵處主稿會同兵部辦理合併聲明

擬訂貴胄學堂章程并擇地先行試辦摺

奏爲擬訂貴胄學堂章程並擇地先行試辦以樹風聲

臣教育

恭摺會陳仰祈

聖鑒事竊查上年十二月間出使大臣梁誠片奏請選王公子弟入陸軍學堂肄習一案當經臣等議覆以現在更新軍制講求肄習允宜始自貴近擬請設立貴胄學堂一所專爲王公大臣子弟肄武之區其開辦章程俟擬定再行具奏等因奏蒙

俞允在案臣等謹悉心擬訂約分六大綱曰總則曰職掌曰規條
曰考試曰經費各依門類繫以子目附列課程表作爲試辦章程
暫擬就神機營舊署改建講堂學舍俾得尅期舉辦並懇

恩賞宏敞官所以爲逐漸擴充之地現擬各條內如有應行變通
修改之處開辦後察看情形隨時酌核具奏抑臣等更有請者講
求兵學乃圖強本務四方觀聽視貴族之趨嚮爲轉移溯維

開國之初底定寰宇總征討領禁衛者皆諸王貝勒及勳戚大臣
偉烈豐功光昭史冊現在

朝廷振興武備特設貴胄學堂此次籌議舉行必須名實相符方
足以收明效該王公大臣等近撫時艱遠懷先績亟應各遣子弟
投考入學勿懷觀望並宜父詔兄勉使其刻厲奮發以紹礪山帶
河之勩而備折衝禦侮之資擬請

特降明綸誠諭宣示俾知勸勵且令天下咸知勳華貴胄尙皆身
入學堂親習士伍則風聲所播薄海景從振尙武之精神儲干城
之材俊胥在是矣謹將所擬章程繕單呈

覽恭候

欽定奉

旨後卽由臣等咨行宗人府神機營及各部院衙門一體遵照所
有擬訂貴胄學堂章程並擇地試辦緣由謹繕摺會陳伏乞

皇太后

皇上聖鑒再此摺係練兵處主稿會同兵部辦理合併聲明

請 飭各省將防營改練之續備軍一律改名巡防隊片

再查奏定陸軍新制續備軍制略內開常備兵訓練三年期滿發
給憑照資遣回籍列爲續備軍月給減餉銀一兩等因是續備軍

正軍名一
二二
係常備軍訓練期滿退伍之兵斷未有不充常備而可強名爲續備者現各省續備軍就各防營裁改大凡防營未挑入常備及尙有駐防巡緝之責者則名之曰續備軍與現在奏定新制不符伏惟軍制最貴整齊名稱尤忌淆雜各省續備軍等營旣非由常備退伍自應亟議更改以符名實查臣處前經奏改陝西江西等省續備軍爲巡防隊均經欽奉

諭旨允准在案擬請

飭下各省嗣後除由常備退充續備仍照章辦理外凡由防營改練者一律改名爲巡防隊以符章制而免牽混謹會同附片具陳伏乞

聖鑒

核覆蘇撫奏編練新軍分別募遣摺

奏爲核覆蘇省編練新軍分別募遣情形恭摺仰祈

聖鑒事本年九月二十二日准軍機處鈔交江蘇巡撫陸元鼎奏編練新軍分別募遣一摺奉

硃批練兵處知道欽此原奏內稱定章招募分年退伍不得以異籍充數現准署兩江督臣周馥籌備徵兵鈔奏江以南常鎮兩府歸甯徵其歸蘇者僅蘇松太兩府一直隸州該三屬民氣柔弱不耐勞苦選募匪易現蘇省徵兵分定管區惟有先就蘇松太三屬按格選募萬一募不足數擬請變通仍就淮海一帶招選可作蘇省兵額原募兩營皖產之兵必須逐漸遣散湘籍勇丁亦須分起資遣等語查徵兵定章必須土著原以救招募客軍之失署督臣周馥以蘇松太劃爲巡撫徵兵之區與總督劃徵甯屬附近及江北提督劃徵淮屬附近者同一用意自來兵力強弱不限方隅全

視統馭得人教練得法卽如春秋兵爭吳稱強國漢晉之際三吳
兵旅亦雄視區夏近如咸豐同治年間浙江之湖州江蘇之蕩口
鎮皆附近蘇松之地均以鄉兵屢破悍賊前署江蘇巡撫劉郁膏
以上海等鄉團支持數年遂爲平寇之基尤其明證原奏趨重招
募淮海之兵其實淮安所屬遠在江北海州所屬則更在淮北與
隸皖籍者略同似未便令充蘇省之伍現兩江開練一鎮卽在常
鎮招募投効者頗稱踴躍蘇松與常鎮毗連風氣無殊自不得獨
謂民氣柔弱擬請

飭下該撫臣仍照周馥原奏分定管區設法募選以立日後徵兵
基礎期符現定章制至前募皖湘各兵應准分別遣散酌給資費
以示體恤所有核覆蘇省編練新軍各緣由謹繕摺具陳伏乞
皇太后

皇上聖鑒

遵議新撫奏請停辦世襲兵改練新軍摺

奏爲遵

旨議奏恭摺會陳仰祈

聖鑒事光緒三十一年十月二十日准軍機處鈔交護理甘肅新疆巡撫吳引孫奏請停辦世襲兵改練新軍一摺奉

硃批練兵處兵部議奏欽此原奏內稱前撫臣潘效蘇奏請創辦土著世襲兵招募纏回專事屯牧費帑不貲利未見而害已形現留存客勇及新募纏回約共一萬餘人以月給數錢數斗之銀糧致力於屯牧不可必之利更責以操防訓練其何能及矧纏回愚蠢漢裝回叵測皆未便使隸軍籍業經電商提鎮各道迅飭將世襲兵事宜一律停辦已募纏漢概令撤退現調續備左右前後四

營及駐省之中營屯聚一處選將領聘教習按照新章認真編練省城原有之左右兩翼馬隊城守協撫標中右各營旗暨礮隊亦悉令改練新法兵操餉項當按練兵制略就現有之餉審量增加務期豐儉得中各等語查已革撫臣潘效蘇前奏辦土著世襲兵係欲以屯牧寓兵仿前代兵農兼務之意現在火器日精兵學日進欲以屯牧之人禦精練之兵理無倖勝卽如唐之府兵明之屯衛皆歷時未久而兵至不可用田至不可籍始期兩利終無一得近如日本北海道屯田兵已改爲常備兵俄西伯利亞之屯牧土兵聞亦有改編之說原奏臚陳潘效蘇辦土著世襲兵各弊至於此極自應卽行停辦改練新軍以重戎備而收實效所擬按照新制編練各營旗務卽將已編新軍成有協標營隊若干詳晰奏咨以憑核辦新制並無教習名目義取官師合一期挽積習原奏擬

聘教習一節與新制不符應令遴擇明習陸軍操法者充補各營隊軍職刪除教習名目以歸畫一新制餉項原令按該省銀值之低昂物價之貴賤酌中審定原奏所擬辦法核與新制相符亦應將擬定各薪餉細數詳晰報明以備稽考至所請擬於舊設武備學堂內附設陸軍小學堂一節查臣處奏定陸軍小學堂章程咨行該省已久係爲造就初級軍官預儲將材而設斷非舊設武備學堂所能賅括該護撫臣卽應遵照飭定期限開辦陸軍小學俾資教育倘因陸軍需才孔亟祇可於小學堂之內附設速成科以收速效未可輕重倒置致紊定章所請附設小學於舊設武備學堂之處應毋庸議又原奏擬請於喀什噶爾等處速撥兵勇填紮量爲添募各節係爲慎固邊防起見應請照准再查屯牧爲該省利源所在亟應逐漸擴充原奏謂不得因世襲兵停辦視耕牧爲

緩圖者洵屬扼要之論擬飭令將該省墾牧各事就地妥籌設法推廣以興本利而厚民生該省地控邊要內衛秦蜀蒙藏外接強鄰經武整軍尤爲急務擬請

飭下新任撫臣聯魁及該護撫臣會同伊犁將軍長庚切實籌辦務臻妥善上副

朝廷綏邊衛民之至意所有遵旨議奏緣由謹恭摺會陳伏乞

皇太后

皇上聖鑒

核覆候補四品京堂鄭孝胥奏請限年趕造軍械片

再前准軍機處鈔交候補四品京堂鄭孝胥奏請限年趕造軍械一摺光緒三十一年十月十八日奉

硃批練兵處知道欽此查軍械爲練兵要需自應精製廣造以資利用前因上海製造局有移建之議當蒙

簡派臣鐵良前往江南等省周歷查勘旋將應否移建情形詳細覆奏經臣處會同政務處遵

旨議覆擬於湖北舊廠外添設南北兩廠分別撥款籌辦等因奏蒙

俞允在案今該京堂所陳各節覈其辦法大抵前奏中均經議及如原奏內稱全國軍械責成練兵處特舉勤能大員督辦一節查前奏以南北兩廠全在總辦得人非精諳槍學礮學體用兼備之員不足勝任請

飭下直隸兩江湖廣總督各舉所知二三員開列銜名出具考語由練兵處彙覈請

簡俟奉

旨後卽責成總辦之員將建廠各事宜詳細規畫稟承練兵處王大臣及該管總督尅期興辦是製造各局用人行政等項事宜業經聲明統歸臣處辦理該京堂所請特舉大員督辦之處應毋庸置議又原奏內稱籌款練才擇地各事限半年內妥議具奏一節查前奏擬以滬廠每年節存之七十萬兩撥作北廠開辦經費不敷之款估定後責成直隸山東河南山西陝西奉天吉林等省限五年內分別攤籌南廠則以江皖贛三省協濟之三十萬兩及銅圓一半餘利提作開辦經費估有不敷責成江蘇浙江四川兩湖兩廣等省亦按五年分成攤解是兩廠應需款項業經分別籌定現在雖銅圓餘利已不可恃然當此庫儲支絀之際實無他款可以提撥應仍遵前議設法辦理至製造各學理極精微選練人才

至爲要務前奏擬請俟南北兩廠開辦時隨廠各設學堂招集生徒延師教練應請屆時切實舉行惟選擇廠地一事除南廠設於湘東業經勘定基址外北廠擬設於直豫等省前經行知該督撫等各於境內選擇地址現准河南巡撫咨稱衛輝府道口鎮地方堪備建廠之用第地勢是否高廣土性是否堅實運道是否靈通必須事事合宜方能適用容由臣處派員覆勘詳確再行奏請欽定又原奏內稱限三年內將廠屋造成開工興辦一節查建廠爲一勞永逸之舉固不容因循以廢事尤未可草率以圖成上年湖廣督臣張之洞奏請移建新廠摺內擬以五年爲期委係估計工程之大小衡量財力之盈虛而因以定歲月之遲速惟現在建廠勢難再緩而所籌經費尙未齊全臣等惟有俟廠地一經擇定卽就日前財力先其所急陸續開辦以期早日工竣不致虛耗歲

時又原奏內稱每年造出之槍礮必須足供全國海軍陸軍百餘
萬人之用一節查出械之多寡視乎機器之大小此時海軍既未
興辦卽編成陸軍鎮數亦尙無多惟現當上緊編練之際自必日
增月盛臣等擬俟兩廠開辦卽按照各省應需軍械數目購置相
當機器源源製造寬爲儲備俾資應付如果將來餉力充裕所練
海陸各軍能如該京堂所稱百餘萬人之數自當隨時增置機器
逐漸擴充至此項槍礮爲殺敵致果之用關係甚重應如何實力
考驗博采眾長之處容由臣等督飭承辦各員悉心研究去弊改
良務期盡美盡善一律精純以仰副

朝廷慎重軍儲之至意所有覆核該京堂奏請限年造械緣由謹
附片具陳伏乞

聖鑒

核議御史王振聲奏請申明軍禮片

再准軍機處鈔交御史王振聲奏請申明軍禮力除輕侮弁兵積習一摺奉

旨練兵處知道欽此據原奏內稱京外官員一與軍事率多役使弁兵私宅門外每派守兵站街女眷車前亦令武弁引馬甚至官紳慶弔市肆開張亦借兵丁列隊前驅分班立守以壯觀瞻外省則督撫司道堂參將弁跪而謁見長官學使過境弁兵跪而送迎至於親軍戈什鞭鐙追隨奔走趨承相沿成習應請

旨飭下練兵處申明軍禮整飭營規等語臣等竊維國家之設兵也將以保民衛

國禦侮折衝必使之愛惜聲名激揚志氣乃能忠義奮發蔚爲節制之師自世俗重文輕武往往視若弁髦如奴隸頤指氣使驅

策從心不特妨礙操防亦且玷損軍政是以臣處上年奏定編練新軍章程於服役制略內載所有營員均另設護勇專供營中雜務概不准以私事役使正兵又本年奏定軍禮及奏定兵隊不准違例迎送各節先後奉

旨通飭遵行皆係爲革除積習鼓舞軍心起見今該御史所陳各節有爲臣處前奏所已及者亦有前奏所未及者自宜一體整頓以作士氣而飭戎行擬請嗣後除衙署公所外凡官紳私宅市肆開張概不准借用軍人守門其紅白等事或經地面官派巡警兵勇在場彈壓者不在斯例營中員弁非本管大員不准隨帶差遣並不得令與僕役爲伍私宅女眷出行不得以武弁引馬一切功牌獎劄翎頂概不准濫賞家丁以重名器似此明定限制俾人知重武兵氣日揚庶於整軍圖強之舉較有裨益如蒙

俞允卽由臣處通咨京外各衙門一體遵照謹附片具陳伏乞
聖鑒

續擬陸軍人員任職等級及補官體制摺

奏爲續擬陸軍人員任職等級及補官體制簡章分繕清單恭摺
會陳仰祈

聖鑒事竊臣等前擬定新軍官制一摺於光緒三十年十一月十
四日具奏奉

旨依議欽此欽遵在案伏思此次更定官制其宗旨要有二端一
以矯人情積輕之習使文武漸近同科一以挽營員越次之風使
名實不甚相遠故職秩視前稍異而限制亦視前較嚴古人設官
分職本屬相聯各國軍隊章程官與職亦分爲二大率以實授之
官任相當之職中國自軍興以來保舉冗濫或以記名提鎮降充

末弁或以候補千把驟膺統將官職既太懸殊名器不無淆雜今方整飭營伍宜以官配職俾無參差明定等級以舉其綱簡訂章程以張其目庶寓鼓舞變通之意於整齊畫一之中計軍官自正都統以下九級各任其職比類相從非由陸軍學成及曾帶新軍資格及三年通曉兵事者不得與於斯選除授補署各有限制既不令以闕冗充數亦不使以猥濫見輕至軍官之外經理儀械醫務法律等員是曰軍佐所司事務既要且繁必各有專門之學始能勝任與軍官事同一體其品秩官階亦應相似惟於官名之首冠以同字以示區別擬按現設軍職之大小分別授以同正參領以下各官惟不得管帶營隊界限既清庶可各專職業謹參酌中外陸軍官制章程訂爲陸軍軍官軍佐任職等級暨補官體制摘要章程分繕清單恭呈

御覽如蒙

俞允卽由臣處臣部分行各省軍一律遵照其陸軍各官補選詳細章程仍由臣等依次續擬奏請

欽定所有續擬陸軍人員任職等級及補官體制摘要章程緣由是否有當謹恭摺會陳伏乞

皇太后

皇上聖鑒訓示

請將神機營兵廠改建陸軍小學堂片

再前經臣處奏定在京師設立陸軍小學堂一區自應擇地建造查有前府園神機營之建字地子隊兵廠地勢宏闊足敷學堂之用該兵廠前經兵部奏准改建衙署嗣復蒙

恩賞給鑾儀衛基址以爲該部改造新署之地此處卽歸閒曠富

經臣處與兵部神機營咨商旋准咨覆允令接收改建惟該兵廠前擬建造衙署係兵部奏准之案今既商明改建學堂理合奏聞俟奉

旨後卽由臣處擇吉興修以期迅速落成早日開學謹附片具奏伏乞

聖鑒

請開辦圍場屯墾事宜摺

奏爲請

旨開辦圍場屯墾事宜以拓利源而裕兵食恭摺仰祈

聖鑒事竊維時局艱危度支匱乏欲籌生財之道惟有開墾邊界荒地庶足興自然之利益而爲八旗廣生養之謀查直隸承德府屬圍場廳地方荒地極多前經臣等派員前往查勘現據稟稱該

廳地段東西三百里南北二百餘里東面爲正白旗東南爲鑲白
正藍二旗正南迤西爲鑲藍旗西南爲鑲紅旗正西西北爲正紅
旗正北爲正黃旗東北爲鑲黃旗從前以圍紀名今則圍名概不
能舉惟以各旗之卡倫區畫段落廳境無地非山地皆在兩山之
間寬則地多隘則地少地經二次開放有全開者有大段已開僅
餘畸零者有開放及半者有已經開放餘地限隔於沙內者有僅
開一角及全數未開者綜計正藍鑲紅正紅正黃等旗可開之地
約有八千餘頃而鑲黃旗及稍西之正黃旗界所屬地畝尙有三
千餘頃惟地接興安大嶺荒寒不殖應在寬留圍座之數等語查
圍場各地從前本爲游牧之所近年來旣經陸續放墾若不一律
開辦恐任其荒廢勢不至盡歸私墾不止臣等公同商酌擬請以
現時編練之京旗陸軍俟期滿退伍後卽發往該處屯紮辦理墾

種庶土地不致曠棄而退伍者有此生業可不必另計謀生且此項旗兵得所安插薈萃一隅將來設遇戰事亦不難隨時調集似與古昔寓兵於農之意尙屬符合第此項屯墾所需籽種一切成本爲數頗鉅一旦另行籌措恐當此財力支絀之秋集款亦復不易因思圍場地方深林密箐材木甚多現亦一併查明約計大小松樹共有二百餘萬株若以此項營運變價既可免偷竊之弊卽以供開辦之資似屬一舉兩得惟事同創辦頭緒甚繁且承德府屬爲直隸總督與熱河都統兼轄之地臣等擬請旨特派大員督理其事庶足以昭鄭重而專責成如蒙俞允所有開辦一切事宜卽由承辦之大員詳細考訂妥擬章程奏明辦理臣等爲開拓利源起見所有請辦圍場屯墾事宜緣由是否有當理合恭摺具陳伏乞

皇太后

皇上聖鑒訓示

退耕堂政書卷二

文獻通考

三

The image shows a large, empty table with 11 vertical columns. The table is enclosed in a thick black border. The columns are separated by thin vertical lines. On the right side of the table, there is a small, dark, rectangular mark. The table is otherwise completely blank.

退耕堂政書卷三目錄

奏議三

遵議變通武備摺

遵設巡警部接收京城內外工巡局暨京師習藝所大概情形摺

擬訂京城冬防添設協巡探訪各隊暫行章程摺

擬訂巡警部暨內外城警察廳官制摺

附單

擬訂巡警部暨警察廳權限章程摺

附單

請飭各省將綠營兵弁挑改巡警摺

遵議黑龍江將軍請設偵探學習館摺

田原

退耕堂政書卷三

天津徐世昌

奏議三

遵議變通武備摺

奏爲遵

旨籌議變通武備章程謹將應辦各條舉其綱要恭摺會陳仰祈
聖鑒事本年六月十九日奉

上諭近來兵法日變器械日新嗣後八旗王公均當深求兵學修
明武備所有引見人員例應持弓者著毋庸持弓其出入扈從宮
禁守衛官兵所備軍械尤應變通盡善至挑取各項侍衛拔補內
外官員挑選滿漢兵丁應如何驗其學識試其膂力考其藝能之
處均著御前大臣會同兵部安定章程奏明辦理等因欽此仰見

正言卷二
一
朝廷振武圖強實事求是之至意欽服莫名伏維政因時而制宜
法以通而可久我

朝經武之規超越前古自

禁衛以及旗綠營制一切典章法度備極詳明祇以日久相沿寢
忘精意風會遞變莫守良規此皆官不知學兵失其教之所致也
比年迭奉

詔書敦飭各省練兵興學茲復

特降明綸剴切宣示俾知精研兵學自王公大臣始修明武備自
宮禁守衛始而親衛右職以至士伍亦必各求實際慎選於初大
哉

皇言立自強之根本振尙武之精神胥在是矣臣等紬繹

聖訓悉心參考先爲目前整頓之計並及將來經久之方舊制之

宜酌者不敢拘牽遷就稍涉模稜新法之宜興者務求通變化裁以期允當謹擬辦法分條開列恭候

聖明採擇施行

一東西各國自貴族以至國民皆有當兵年限今王公大臣子弟肄習兵學業經練兵處奏准開辦貴胄學堂並於章程內聲明其年長不合定格與充當差使之王公世爵雖礙難入堂受學而有志講求者俟開學後另訂專章奏請入堂聽講以示優遇等語應卽照章於學堂內設一貴胄講習所以便王公世爵隨時到堂研究兵學所有詳細章程仍由練兵處續擬具奏

一綠營引

見人員前經兵部奏准一律改習槍礮赴部時分期考驗惟京外各旗及東三省旗員王公門上護衛各項仍考驗騎射隨時帶領

今奉

明諭所有引

見人員著毋庸執弓擬請嗣後京外各旗及東三省旗員赴引均照綠營成案一律辦理儻考驗時施放不能如法發回原處勒限一年學習限滿仍不如法者革職至王公門上護衛等項卽由各王公揀選合例人員徑行咨送該旗帶領引

見毋庸考驗其各旗營比較箭枝挑補官兵等事應卽停罷又定例點驗旗員及兵丁軍械久成具文亦請一併停止

一恭遇

聖駕出入扈從各官應佩弓矢屬橐鞬者一律改爲佩刀前引之先後扈之次請以宿衛

禁廷之陸軍各執新式槍械由統領統帶等官恭率翊衛京城以

內應酌派步隊兩隊分列前後護衛京城以外應酌派步隊一營馬隊兩隊分列前後左右護衛遇有

謁

陵行圍差使屆時奏添隊數此外一切儀制仍照舊章敬謹預備其舊設之十五善射等員與各處弓箭匠役以及採取弓幹矢箭置備畫角海螺等項均卽裁撤

一守衛

宮禁爲親軍營前鋒營護軍營專責乃歷年旣久積習太深非改絃更張竊恐窳惰廢弛斷無起色恭溯

國初定制上三旗皆

天子所自將出任征討入供宿衛勩勩特隆漢之羽林依飛唐之龍武神策未能比擬萬一今欲名稱其實宜按新軍章程另行設

立扈衛軍於京外各旗及各省已編成鎮諸軍內慎擇品學兼優之官長操法純熟之兵丁調取編練出則扈從入則守衛歸御前大臣管轄此制既行天下材武之士皆知得與榮選益將爭自濯磨於軍隊觀感尤有裨益其一切編制應由練兵處會同臣等詳細籌議續行具奏

一親軍前鋒護軍等營官兵擬請

特派大臣分別考驗其年力富強之官員撥入陸軍學堂肄習仍給原俸體質精壯之兵丁分送各鎮陸軍挑選教練仍給原餉三年後或撥歸扈衛軍或回旗以應補缺分錢糧升補改補屆時核其程度分別辦理此外不合格者官員對品以旗員改補兵丁撥旗以馬甲坐補分年遞裁期以十年裁盡逐年騰出底餉由戶部節存以備編練扈衛軍之需舊設之撒袋弓箭應卽裁撤

一親軍前鋒護軍等營遞裁以後扈衛軍未經編設以前凡例載守衛

禁門傳籌啟閉稽察出入各差使應酌調現經編練之陸軍官兵與未經裁撤之親軍等營官兵一併輪值分定章程各專其責俾資遵守以免互相諉卸之弊仍由各該管大臣隨時認真稽查以昭慎密惟此項兵丁宿衛

禁廷關係綦重現仍用北洋留駐之陸軍一俟京旗陸軍調撥來京如何分派更換屆時再行奏明請

旨

一侍衛爲近

御差使品秩清嚴自

開國以來以宿衛材官出爲名將者指不勝屈現值振興武備尤

宜特重其選擬請嗣後挑取侍衛擇陸軍各鎮著有成績之軍官及在陸軍學堂優等畢業之滿漢世爵世職人員一體與選由各該管大臣出具切實考語咨送

御前大臣領侍衛內大臣公同考驗相符者帶領引

見請

旨補放仍仿古者番上宿衛之意以二年爲一班班滿之日軍官發回本鎮以應升之缺補用世爵世職發交練兵處以應升應補之軍職酌量補用頭班期滿咨取二班以次更代如有才能出眾勞績卓著者准由

御前大臣等奏留恭候

特恩擢升禁衛峻秩俾昭激勸現在當差之侍衛除貴胄已另設學堂應照章分別入堂及隨時講習外其餘均由該管大臣擇年

力富強資質聰明者咨送陸軍學堂肄習凡侍衛及親軍等營課程應由學堂將會典所載宿衛事宜及日本等國衛兵諸制擇要編輯作爲一科與各項科學並授肄習三年期滿回京當差升等補用其年齒已長不能受學之員仍令照舊供職惟不得挑升等第以示限制

一挑選旗兵擬一律改用槍枝並試以文字惟快槍係屬利器初習者稍有不慎恐致失誤且平日演習子彈所費尤屬不貲近來中國工匠類能仿造洋式氣槍瞄準命中與各式槍枝無異擬暫令各旗營就近購備在原設箭場演習遇挑補缺分時兵丁以發槍中數及識字多少爲比較均責成該管大臣秉公校閱按格挑補自奉

旨之日起卽將所出缺分扣留凡例應挑補各兵丁勒限三箇月

演習氣槍限滿卽行考驗各省駐防一律辦理嗣後擬由臣部參仿各國教練新兵及體育操快槍章程另定簡易妥善辦法咨令各旗營駐防遵行以收實效至各項漢兵擬暫照現行章制按格挑選惟募補係權宜之計往往有籍貫不清及逃亡之弊應請飭下練兵處妥議徵兵辦法奏明施行於軍事方有裨益

一定例旗員揀選月缺每年扣副將一缺參將二缺遊擊一缺都司三缺爲大揀補缺此外直隸山西陝西甘肅四川松潘一鎮遇有副參遊都守應用旗員缺出亦扣歸揀補爲小揀補缺均由兵部行文八旗侍衛處及鑾儀衛內務府步軍營等處咨取合例人員於次年二月內奏請

引簡派大臣會同兵部公同揀選取其騎射優嫻讀例明晰者帶領

見請

旨補授今既一律改習槍枝若仍舊舉行殊非畫一戎備之道擬請嗣後小揀補缺卽行停止將直隸等省向歸旗員揀補各缺均改爲題補之缺其大揀補事例臣部無庸先期扣缺暫歸外補其例應咨取人員由部發給執照送陸軍學堂肄習三年期滿由學堂將該員功課分數造具清冊分別等第咨回其程度合格者由部註冊遇有各省部推缺出屆時當釐定輪缺章程將此項人員擬選帶領引

見請

旨補授惟各處咨取人員向以五十五歲爲限今擬改爲四十歲爲限倘所學程度未能合格任缺勿濫此係暫行辦法俟綠營遞裁官缺遞減後卽行分別停止

一各項滿漢世爵世職奏准承襲後無論已否赴部帶引均應入陸軍學堂肄習其學科仿照侍衛及親軍等營咨送學堂章程辦理三年期滿擇其列入優等堪膺宿衛之選者咨送考驗倘學程精進能與陸軍學堂同班畢業卽照學員授職章程另行辦理凡未入學堂者雖已襲職祇准減半給俸不准補官以示區別如係世職佐領應於缺出時由本旗揀員暫署仍將應襲之員送學堂肄習年滿回旗再行請襲以上各條係就暫行之法及經久之規統計兼籌約舉綱要惟政關沿革事鉅且繁必須逐細研究庶可推行盡善應俟

命下之日由臣等通咨各該管大臣遵照辦理如有未盡事宜仍由臣等分別妥議隨時具奏以期詳妥所有臣等遵旨籌議變通武備章程緣由是否有當謹會同繕摺具陳伏乞

皇太后

皇上聖鑒訓示遵行

遵設巡警部接收京城內外工巡局暨京師習藝所大概情

形摺

奏爲遵

旨設立巡警部接收京城內外工巡事務暨京城習藝所大概情形恭摺仰祈

聖鑒事竊臣等於光緒三十一年九月初十日奉

上諭巡警關係緊要迭經諭令京師及各省一體舉辦自應專設衙門俾資統率著卽設立巡警部署兵部左侍郎徐世昌著補授該部尙書內閣學士毓朗著補授該部左侍郎直隸候補道趙秉鈞著賞給三品京堂署理該部右侍郎所有京城內外工巡事務

均歸管理以專責成其各省巡警並著該部督飭辦理該尙書等務卽悉心通籌力任勞怨嚴定章程隨時切實稽核期於內外清謐黎民乂安用副委任一切未盡事宜卽由該部妥議具奏欽此茲於九月二十日准管理工巡局事務臣那桐將文案卷宗已未審結各案收發款項帳摺及修路經費機器籌辦京師習藝所銀款並該所木質關防一顆巡捕及巡隊等各名冊軍裝槍械馬匹數目造冊移交復准管理外城工巡局事務臣那桐會辦臣壽耆臣張仁黼將外城工巡局案件卷宗收支銀錢款項帳目巡捕花名軍衣槍械等彙造清冊一併移送到部當卽派員分別檢查接收臣等伏維巡警路工最爲立國要政而習藝所亦與巡警有密切關繫現在專設巡警部爲各省統率自宜參仿各國辦法分別立法行政司法三項竭力通籌期於國政民風有裨實際惟現值

接收伊始地方公事未可刻延除暫行改刊內外城工巡局關防各一顆並督飭局員照舊辦理毋任疏懈部章官制暨警巡長捕等應守之各項詳細規則並由臣等悉心酌定隨時具奏請旨遵行外所有臣等接收內外城工巡事務緣由謹恭摺具陳伏乞

皇太后

皇上聖鑒訓示

擬訂京城冬防添設協巡探訪各隊暫行章程摺

奏爲京城冬防緊要巡捕單薄酌設協巡隊探訪隊分區巡防以期周密並擬訂暫行章程分繕清單恭摺仰祈

聖鑒事竊查京城內外城地面寬廣衢巷繁多內城巡捕原有二千七百名除消防隊專習救火法及各隊分任巡邏要差外站街

者僅止千名實嫌單薄外城自五城裁撤所餘練勇改爲巡捕者一千五百名均未教練以之改爲巡警不但不敷分布抑且難期得力計非大加增添斷不足以彈壓地面若候籌款募兵再行舉辦誠恐延曠日久致誤冬防臣等公同商明北洋大臣袁世凱將各鎮期滿退伍之續備兵酌調千名已於十月十八日到京改編爲協巡隊分左右兩路遴派候選道王治馨爲該隊統帶駐紮前三門外與原有巡捕劃區分防各專責成併增設探訪隊五隊專司探訪偵緝等事與巡兵相輔爲用均於十月一律編齊卽兼派該道王治馨爲監督以期聯絡一氣互相策應臣等一面擬訂暫行章程督飭該道認真經理一面再行設法籌款招募巡兵分起入學俾得粗通警法以備將來更番接替所有京城冬防緊要巡捕單薄酌設協巡隊探訪隊緣由並分繕暫行章程清單恭摺具

陳伏乞

皇太后

皇上聖鑒

擬訂巡警部暨內外城警察廳官制摺

附單

奏爲擬訂巡警部官制並變通工巡局舊章改設實缺恭摺仰祈
聖鑒事竊維各國警政精密整齊所以保全國之治安定人民之
秩序臣部奉

旨設立統率各省警務自應通籌全局先求合於現在中國政俗
之宜以漸規夫東西各邦公安之治今當創建伊始設官分職最
爲重要必使大小相維事權相屬乃能各專責成徐圖美備臣等
參酌外商兩部官制章程並考求各國警察規則挈綱要以綜其
成析科目以副其實擬設左右丞各一員左右參議各一員分設

五司十六科隸之以期統屬定而各有等差任使專而無由諉卸且京師地方遼闊從前工巡局辦事人員皆係兼差心力既分職非專界故數年以來一切規模尙未完密茲既設立專部且將整頓各省之警制京師爲首善之區自應先定額缺俾昭久遠擬請變通舊章改設額缺內外城各設廳丞一員參事知事各官分隸焉廳丞爲地方表率與各省警務同轄於臣部以一事權所有臣部司員及廳員額缺臣等公同商酌擬就官制章程謹分繕清單恭呈

御覽伏候

欽定再臣部新立事同草創如嗣有應行增減變通之處及部廳各員升轉廉俸一切詳細章程隨時由臣等酌量情形奏請辦理至警務事繁責重各國郡縣村町均設有警務專官自應酌擬各

省巡警官制以期與部廳內外相通考驗實績容由臣等續擬詳細規則另行奏陳所有臣部酌擬部廳官制緣由謹恭摺具陳伏乞

皇太后

皇上聖鑒訓示

附巡警部官制

一臣部擬設左右丞各一員位正三品統率各司佐臣等整理全國警政籌議警察制度設左右參議各一員位正四品分判各司事務稽核司員以下功過所有京外警章均歸丞參詳審覆核呈由臣等奏咨辦理

一歷考中外官制皆謂宜多設專理之官不宜多設總轄之官臣等詳加酌度丞參職掌頗皆近於總轄宜令各分責任

文獻卷三二奏議

十一

而郎中員外郎品秩略等同辦一事亦恐互相牽掣難於整理查日本各省所轄分局分署之長品秩皆略如京堂是以職業易舉臣部甫經設立自未便於一司設一京堂除左右丞已酌定職掌外左右參議擬仿唐以侍郎判分曹辦法擬設五司一所職掌以類相從分令左右參議管理以專責成凡所管之司一切稿件暨司員書記功過均由該參議核定考察呈由臣等辦理以重事權而杜牽礙嗣後警章陸續擬定部務日繁仍當添設參議以資分理統俟屆時由臣等察酌情形奏明辦理

一臣部擬設五司曰警政司曰警法司曰警保司曰警學司曰警務司司中應設各科分列於下

警政司

行政科

掌凡關於警衛保安風俗交通及一切行政警察事項須飭傳內外各廳及各省遵辦者均歸該科辦理并會同編輯科商訂一切行政警察章程

考績科

掌考核各省警官之能否及舉劾之事並各省警官選用記名及奏補事項又管理部廳各員一切升轉事宜

統計科

掌各省警務款項之考核部廳各處支發俸餉購辦物件及豫算決算列表之事其各司各科所辦警政分類統計每年編成總冊刊布

戶籍科

掌審定稽查戶口章程管理各省地方戶籍報告戶口統計
凡各省寺院僧道人數教民人數外國人入國籍者皆隸之
警法司

司法科

掌審定司法警察辦事章程凡司法警察官之配置及考核
成績與調查罪犯種類等事均歸核辦

國際科

掌審定國際警察事務規則調查各省租界警政情形與一
切交涉及繙譯事件

檢閱科

掌查閱報章書籍如有違報律出版律者隨時檢舉並管理
京外各報館書坊一切事宜會同商部學部分別辦理

調查科

掌調查各省政法民情及地方習慣風尚會同各司各科審定一切警章

警保司

保安科

掌凡豫防危害保持公安宣布應行告戒禁止之一切命令併查禁姦民棍徒結會拜盟扶乩等事

衛生科

掌考核醫學堂之設置醫生之考驗給憑並清道檢疫計畫及審定一切衛生保健章程

工築科

掌京城內外道路工程調查各省都會及商埠修路工程並

正書卷二
番訂京外各警廳房屋式樣與工廠戲館建築之檢查凡公私營造皆隸之

營業科

掌市中一切營業開張申報存案並審定鋪捐車捐各項捐章及市場紳董公所辦事章程將來京城內外所設電燈自來水市街鐵路均歸核准保護

警學司

課程科

掌審定各省巡警學堂章程考核警官學業之成績及給憑註冊等事

編輯科

掌編譯各國警察法規及各種警學專書

警務司

文牘科

掌辦緊要奏稿及關涉全部事體之文件並電報電話及報告機要事項其各司專件仍歸各該司辦理

庶務科

掌理部中一切雜項事務稽核部員廳員功過簿冊並考察司書生勤惰及約束夫役人等以時報告藉憑考核

以上各科皆就目前擇要設立嗣後如有增減改置之處當奏明辦理

一擬每司設郎中一員總理司事每科設員外郎一員主事一員辦理科務主事以下比照筆帖式設一二三等書記官位七八九品按司之繁簡酌設不定額缺臣部不用書吏更

擬設司書生若干員分別等次隨時酌派不定額數其額外候補主事繁司不得過四員簡司不得過二員

一擬設機務所凡開用印信收發文件接洽電話值日值宿遞摺等事皆隸之擬設七品小京官四員輪流管理

一擬比照商部顧問官之例設一三三四等採訪官如各省各埠有深通警務之員灼知其品行端謹辦事認真及著有成績者無論官紳由臣部分別派爲一三三四等採訪官以便偵訪要務俾消息靈通且可隨時考校各省警務以時報

告

一擬內外城各設一豫審廳歸臣部直轄除犯尋常違警罪可由各廳訊結外其刑事訴訟之案皆歸訊斷如遇徒流以上重大之件須先由豫審廳訊明情由再分別奏咨送交刑

部擬每廳各設正審官一員位正五品視郎中總理廳務陪
審官一員陪聽訟獄檢查官一員檢察證據協同審訊更附
設民事審判官每廳各一員專理錢債案件位皆從五品視
員外郎記事官每廳各三員臨時聽審繕稿位正六品視主
事再每廳置譯員三人須通法英日三國文字醫官二員其
司法警察巡長巡捕等員弁隨時酌定人數至地方裁判本
應歸刑部辦理惟現在新律未頒裁判章程未定內城工巡
局向設有發審處辦理詞訟外城係沿五城理訟之例亦辦
審判且詞訟係關係民事最重之件勢須隨到隨結不容稽
緩擬由臣部設立豫審廳俾案犯便於讞訊將來新律頒
行應如何變通之處屆時再行

奏明請

旨

一路工局仍擬照舊辦理逕歸臣部管轄不設專官俟將來路工告成應卽酌量歸併

一巡警學堂習藝所教養局消防隊等應統令逕歸臣部管轄惟如何派員經理及詳細章程再由臣部妥議具

奏請

旨

一無論部員廳員補缺後皆不得兼充各衙門差使以專責成

一現擬設各司郎中及內外城巡警廳丞均止一員責任較重設遇該郎中等請假及出事故恐致候員接署貽誤要公擬責成每司首科員外郎每廳首處參事官平時隨事參理

一切遇該郎中及廳丞有請假等事卽暫行代辦再候派員接署以重職務

附京都內外城警察廳官制

一原設內外城之兩總局擬俱改爲巡警廳曰內城巡警總廳外城巡警總廳總理內外城一切警務

一原設之內外城各分局擬俱改爲分廳內城擬設五廳曰內城中分廳內城東分廳內城南分廳內城西分廳外城擬設四廳曰外城東分廳外城南分廳外城西分廳外城北分廳各歸內外城巡警廳直轄

一原設之內外城監督擬俱改設廳丞位正四品視府丞
一廳丞以下擬每廳設參事官三員承廳丞指揮分理一切事務曰總務處參事官位正五品視郎中曰警務處參事官

日衛生處參事官位從五品視員外郎以下擬設六七品警官若干員分理庶務臨時酌定

一每分廳擬設廳知事一員位正五品視郎中總理分廳地面事務知事以下擬設六七品警官若干員臨時酌定

一分廳以下應按照地圖劃分區域每區擬設區長皆以八九品警官充之員數臨時酌定

一內外城巡警廳丞以下衙署公所擬酌定名稱內外城廳丞曰巡警總廳知事曰分廳各項警官曰巡警所各巡長曰巡警分所以示區別

一參事官應管各股分列於下

總務處

警事股

掌酌定所屬分廳及區所應設各項警官之額缺暨辦事細則並巡長巡捕之賞罰進退考核訓練稽查之事

機要股

掌管理印信電報電話各廳機要事件之報告及廳員升退派差請假事項

文牘股

掌各項公牘審議繕寫收發編存事項

支應股

掌收發一切款項及薪餉物件修築房屋置辦器具管束夫役等事

統計股

掌分類統計巡警廳所各項事項年終報部刊布全國以考

成績

警務處

護衛股

掌理警衛

鑾輿出入及恭備

道差並中外大員來往之須保護者所有臨時一切添設巡捕等事均歸辦理

治安股

掌督察街市及車站客店大眾集會並新聞紙出版暨商民刊布傳單告白等事所有一切保持治安預防危險潛察姦宄諸務皆隸之

交涉股

掌調查公使館員役及寓居內外城之各國官商教士等戶口並一切交涉繙譯

刑事股

掌督捕追贓搜查護送罪人司法警察服役事務及遺失物件之檢查

戶籍股

掌編纂稽核戶口總分冊籍及臨時逕行調查

營業股

掌考察保護一切市政及稽核路燈電綫電話等事

正俗股

掌稽查廟宇市場客店戲茶煙酒等館並娼優聚住處所一切賣技彈唱妨害風俗等事

交通股

掌車馬通行之督查道路橋梁危險之預防鐵路車站之檢查

建築股

掌調查衙署公所及民間建造之應准應駁並測繪警察分區地圖

衛生處

清道股

掌督察掃除道路通洩溝渠整理廁所應會同路工局辦理防疫股

掌檢查種痘預防獸疫並考查市脯飲食用具及瘞埋等事
醫學股

掌查核病院並檢查各種病情及死生人數之統計

醫務股

掌考查巡長巡捕及消防隊之體格檢查路途病倒及鬪殺傷者之急治藥物並消毒法稽查工廠衛生兼辦化分事務以上每股設長一員爲正六品警官視主事副二人爲正七八品警官視小京官及各部司務其工醫等股自須擇有專門之學者調充俾收實效

一分廳職掌可因各地面事務繁簡按照總廳職掌分類酌量增減

一不論警官巡長巡捕等凡在外場執事者均須一律服警制衣服在廳內則從其便

一分廳署屋宜在通衢必須軒敞並應定辦公一準時刻以

振精神而昭勤恪

擬定巡警部及警察廳權限章程摺

附單

奏爲酌擬臣部及擬設警察廳權限章程繕具清單恭摺仰祈
聖鑒事竊維行政之要職任貴有專司權限尤宜明晰從前大學
士臣那桐管理工巡局事務本係兼差故遇各部院衙門來往公
牘皆由局逕行咨覆現經改設廳丞轄於臣部若仍照舊章直接
辦理不但文牘滋繁且事權分屬窒礙必多擬請自臣部改設廳
丞後所有兩廳與各衙門來往公事統由臣部核轉分別咨行另
鑄廳印以昭信守局中舊有關防應候廳印鑄成開用後卽行繳
銷其部廳各員概不准兼各衙門差使俾專責任惟警察廳與地
面事事接近職務旣繁責成尤重所有各員容臣等慎加遴選隨
時察看陸續分別請

旨派署如能勝任再行請

旨補授以昭慎重而免貽誤至各缺未經補署以前擬先按應設
官員職務酌派差委各員試辦仍當隨時考覈分別去留無論已
未補署廳缺各員均須遵守部廳權限俾免分歧之弊所有臣等
酌擬權限章程繕具清單恭呈
御覽是否有當謹恭摺具陳伏乞

皇太后

皇上聖鑒

附巡警部及警察廳權限章程

- 一 巡警部係統管全國警政自應照部制辦理京城內外警察廳係專辦京城地面事務自應歸巡警部統轄以清界限
- 一 巡警部有督查之責內外城警察廳有地方之任自應各

設專官所有部員廳員不准兼攝以分權限而重責成

一內外城各設廳丞一員位正四品由部奏請補授

一內外城廳丞均歸部統轄辦理地面警務所有地面應行奏請事件均由部具奏惟條奏事件不關部務者仍准專摺具陳以符向來京堂體制其部丞參議亦仿此例

一凡總廳分廳七八品警官及巡長巡捕等之進退賞罰均由廳丞專辦後隨時報部其上五六品實官之須奏補者仍由部奏請補授

一凡地面尋常告示其事專關城內或城外者可專用廳示仍將告示底稿於發貼前兩日送部考覈其關京城地面全局及會銜各衙門告示須由部領銜閱定刊發

一以後廳丞所出公文可即用廳丞官銜另鑄廳印以昭信

守舊有關防應俟廳印鑄成後卽行撤銷與各衙門來往公牘均須由部核轉咨行不得由廳丞逕復以期劃一如有緊要公文各衙門逕行咨廳者准其迅速辦理一面申部辦結後仍由部咨復

一凡與各國使館交涉之事廳丞申部酌辦事關急速者由廳丞一面應付一面達部或請咨外務部以免遲誤事小者仍由廳辦理後報部備查

一凡分廳送總廳之公文俱用稟申廳丞送部之公文則用申隨時專行各司者可用咨片部交廳者則用劄

一俟內外城豫審廳設立之後其舊設之發審處應卽裁撤除詞訟成案之件歸豫審廳訊辦外其尋常違警罪可由分廳知事斷結

一 凡事關

蹕路警衛及地面整理與稽查一切事項均逕歸總廳或分廳管理仍由部隨時督察指導

一 巡警學堂習藝所教養局消防隊等統行歸部管轄如有改置添設應行商酌之處均准廳丞與議以收集益之效

請 飭各省將綠營兵弁挑改巡警摺

奏爲綠營疲弱擬請

旨飭下各省一律挑改巡警以收實用而節虛糜恭摺會陳仰祈聖鑒事竊臣等伏查光緒二十七年欽奉

諭旨飭練巡警軍各省多就綠營設法改編良以綠營舊制積久弊深類成虛冗且又餉多減折官擁虛名因時變通誠非得已比年以來有議改綠營爲巡警者如江蘇安徽江西福建雲南等省

是也有全裁綠營另辦巡警者如山西山東廣西等省是也有以綠營裁汰之餉練巡警者如湖北四川貴州江北等處是也他如直隸河南等省所裁之餉多改供新軍等項之用廣東所裁之餉則湊供賠款甘肅等省之巡警軍亦有由防營改名不盡綠營者辦法既多參差名稱復未劃一且有雖經具奏並未實行者於警察之規制餉章均有窒礙臣等公同商酌擬請

旨飭下各省督撫將現存綠營馬步戰守各兵挑選年力富強體量合格粗識文字別無嗜好者改編巡警餘悉裁汰不得以原有制兵改易巡警名目空文塞責仍蹈窳敝冗濫之習其每年騰出餉項儘數撥作巡警要需以昭核實至管帶此項巡警應暫由各省督撫慎選廉明武職暨粗通警察人員督率教練至綠營舊設官缺容俟臣等擬定各省巡警官制及一切行政詳細章程再行

具奏請

旨分別辦理惟巡警爲專門之學須由學堂出身綠營素無教育習成偷惰一旦改編巡警恐仍有名無實第以各行省地方遼闊所需巡捕甚多必欲得學堂人才則推廣須數年以後矧財力竭蹶籌款尤覺爲難如能以騰出綠營餉需移緩就急且可於各省會及商埠先設巡警學堂徵募士民肄業一面將由綠營挑選改編之警兵更番派入學堂教以淺近警法再逐漸分別汰留數年之間可徐臻美備現在各省所支綠營餉項每年尙不下數百萬計裁汰改編之後挹彼注茲化無用爲有用實於警政大有裨益如蒙

俞允卽由臣部咨行各省遵照辦理再此摺係巡警部主稿會同兵部恭摺具陳伏乞

皇太后

皇上聖鑒訓示

遵議黑龍江將軍請設偵探學習館摺

奏爲遵

旨會同議奏事據黑龍江將軍程德全奏請遵行新法擬請添設偵探學習館以收速效一摺光緒三十二年三月十五日奉

硃批刑部巡警部議奏欽此臣等按原奏內稱從來審理訟獄大抵以早結案少傳人爲第一切要之訣惟邇來刁健之風日盛一日茲擬亟救其弊非添設偵探不爲功雖近時辦理巡警已有偵探之意隱寓於中似無庸特立新名致多繁雜然欲速於收效必先專其責成擬於省城設偵探學習館一所訪聘西國之精於斯道者一二人充當教習略仿學堂規則選擇候補投効人員及本

地二十歲外中學已通之聰穎子弟入館肄業研究各國偵探專書所載案情並隨時詳譯醫學化學各理推廣洗冤之術定以三年爲期仍由奴才分別考取發給卒業文憑嚴立權限分撥各府廳州縣佐輔新政各等語臣等查偵探爲警察中之一事非巡警之外更有所謂偵探也該將軍歧而二之似猶未能深考東西各國檢洗屍傷之重輕分晰物類之真僞必延醫化專家以鑑定之偵探一事亦未足以盡其術且偵探雖設猶必有深明法律之審判官始能收效所謂法必詳定而後精功非倉猝所能就也該將軍當新政初行之日設館教學造就人材誠屬握要以圖惟其中本末次第未盡協宜應請

旨飭下該將軍詳考深究施之有序而後行之有功毋徒襲取新政之名藉一二端以塞其責其奏請設立偵探學習館之處姑令

暫行試辦仍將規則課本及開辦日期教員名籍學員額數先行報部查覈其應設專館講求法律醫化等學應令該將軍隨時興辦以臻完備所有臣等遵議緣由謹會摺具陳再此摺係巡警部主稿合併聲明伏乞

皇太后

皇上聖鑒訓示

退耕堂政書卷三

退耕堂政書卷四目錄

奏議四

酌擬清查京城戶籍大概辦法摺

請將內城工巡局巡捕操場修建巡警部衙署片

請以原領工巡局部發各款作為常年經費摺

京師開辦習藝所繕呈試辦章程摺

請疏濬三海水道摺

附單

更定警巡長捕等名稱片

撥用恆公府地址修建習藝所摺

遵議江督奏上海添設巡警援案開支經費摺

請將鑾儀衛衙門空閒房屋撥作巡警部公用摺

請飭纂訂報律摺

開辦高等巡警學堂摺

擬訂民政部職掌員缺摺

請飭各省將原認巡警經費仍如數解部摺

援案撥用空廢衙署摺

掛甲屯紳辦粥廠改爲教養局援案懇賞米石摺

推廣接修路工援案請撥部款摺

請先撥崇文門大石橋等處正路工料銀兩片

會核豫撫擬就裁節綠營餉項先練鐵路巡警摺

會核江蘇撫標制兵改練巡警摺

退耕堂政書卷四

天津徐世昌

奏議四

酌擬清查京城戶籍大概辦法摺

奏爲推行警政酌擬清查京城戶籍大概辦法恭摺具陳仰祈
聖鑒事竊查巡警爲內治根基民事總匯頭緒至繁要以清查戶
籍爲萬匯之樞紐溯維周之鄉遂在辨夫家漢之課最祇憑戶口
恭查

會典所列編審稽核之法亦極詳明誠以戶籍能清則地方盛衰
人民消長賦稅多寡奸宄有無皆不難周知其隱警政權輿實基
於此惟內地保甲之設施久成故事年終戶籍之報告亦等具文
若驟以各國查戶辦法繩之慮多窒礙且難實行臣等籌度再三

現在內外城巡警廳既經設立擬卽先從京城辦起以示準則當經督飭廳丞酌擬辦法先查戶而不計口必從簡易入手以期逐漸推行徐圖縝密如內外城街巷均令挨戶列號釘牌按號登冊於戶主則止問姓名籍貫於職業則但辨官商士民其有各項雜業者亦均分別註明遇有遷移來去各按號數添注如是則分區設官而責成專計戶畫區而界限晰再令警官等日執圖冊明查默識何者應限制何者應保護無論已見之事未發之端凡關治安皆易措置俟辦理有效人民咸知利益卽可由淺而深由疏而密再行詳核丁口周知財產彼時再定詳細章程頒行直省一體實行至王公以下二品大員以上府第住宅易於周知現擬暫緩清查俟將來詳核丁口之時另擬辦法以憑稽核總之警政爲內治之要圖查戶爲警政之關鍵果能切實推行不但宵小無從託

跡良善易於保衛卽教育風俗賦稅徵調諸大端亦皆以此爲基礎臣等創辦伊始不敢稍涉操切庶幾簡而易行徐臻完善倘仍有意存阻撓不服查問者無論何項人等准由臣部分別懲辦以重警政如蒙

俞允卽由臣等督飭內外廳丞妥慎辦理以仰副

朝廷設官衛民之至意所有酌擬先查京城戶籍大概辦法緣由謹恭摺具陳伏乞

皇太后

皇上聖鑒

請將內城工巡局巡捕操場修建巡警部衙署片

再現在推行部廳章程整飭京外警政臣部急須修建衙署以便辦公茲查從前內城工巡局有勾欄胡同巡捕操場一所勘度地

段以之修建衙署尙堪適用工程亦較減省已飭承修各員督匠
動工並咨商倉場侍郎酌將通州廢倉原有房料運京搭用以期
稍資節省其原請建署之宏仁等寺相連地方基址寬廣規模閎
闊約計修造工費較爲繁鉅擬留備撥作別項公所之用謹附片
具陳伏乞

聖鑒

請以原領工巡局部發各款作爲常年經費摺

奏爲奏明立案恭摺仰祈

聖鑒事竊查京城內外城巡警自臣部設立後迭經奏設協巡營
探訪隊添募巡捕以期周密所需款項較原有工巡局已增至二
十餘萬之多現又推行警政舉凡清查戶籍畫分區段酌增警官
警兵整頓巡警學堂設立醫院皆爲地面切要之事欲期事無不

舉尤非款項應手不辦臣等上年請撥膠海關六成洋稅暨商由各省協濟之款以之抵補新增各項萬不敷用而京城巡警上衛宮蹕下安商民惟當設法以擴充豈能因難而自畫臣等昕夕焦慮查原有支款在戶部支領者內城用款如工巡局於光緒二十七年八月起每月請領銀二萬五千兩點燈經費於二十七年七月起每月定爲准領銀一千兩警務學堂津貼於二十八年六月起每月領銀一千兩抽練巡餉於三十年正月起每月領銀二千五百兩增練巡隊經費於三十一年二月起每月領銀六千兩外城用款則每月巡餉路燈費教養局經費共領銀八千二百五十兩均由前管理工巡局肅親王善耆大學士那桐先後分別奏咨有案以上各款皆係月待撥用與軍餉之事關計授者無殊現計新籌之款旣未足抵所加則舊領之銀更少闕而不可一有不繼

貽誤匪輕現在內外城工巡局事務既歸臣部接管自應先將原領戶部各款奏明立案作爲臣部常年領款以重經費至舉辦分廳醫院整頓警學等新添用款應如何籌撥之處容由臣部隨時咨商戶部奏明辦理所有京城巡警請以原領工巡局部發各款奏明立案作爲常年領款各緣由謹恭摺具陳伏乞

皇太后

皇上聖鑒訓示

京師開辦習藝所繕呈試辦章程摺

奏爲京師開辦習藝所並酌擬試辦章程繕單具奏恭摺仰祈聖鑒事竊查接管卷內光緒三十一年七月前管理工巡局事務大學士那桐奏創設京師習藝所於神機營勝字隊操場舊基修築監舍工廠收取輕罪人犯並酌收貧民使作工藝派臣毓朗兼

監督該所事務嗣復奏明開辦並刊給木質關防自奉

命設立巡警部臣等復於奏定章程摺內聲明習藝所歸臣部管轄各等因均經欽奉

諭旨允准在案查習藝所之設重在懲罪囚以工作教貧旬以技能俾生悔過遷善之心皆有執業謀生之路創辦伊始並無前緒可尋舉凡釐定章程酌核辦法固貴參各國之成式尤必度時勢之所宜臣等當於二月間委派候選道前署內城廳丞朱啟鈞爲習藝所監督飭令體察情形悉心核議茲據開具試辦章程呈請具奏前來伏維周之圖土在聚罷民漢之弛刑兼隸將作皆分職任用嚴定責成我

朝定制徒流皆有應配役作貧苦小民亦有以工代贖之法管理則例及官員處分均極詳明良以恤囚養民均屬關繫至重京師

習藝所自奏設以來業經修建房舍粗具規模現於四月間開辦已經收養貧民人犯入所習藝外繫列邦之瞻聽內示各省之標準尤應明定章程以資循守雖限於經費將來尙待擴充而事屬創行立法必宜詳審現擬試辦章程約分數端一曰設所綱要凡遷入罪犯貧民及建設房舍之類皆隸之二曰員司職任凡權限所關選用人員各辦法皆隸之三曰籌給經費凡支給養廉糧餉等類皆隸之四曰看守規則凡檢察教練休息等類皆隸之五曰工藝製作凡製藝銷售及犯人貧民衣食賞罰之類皆隸之務期職業攸分而支用不濫鈐束有法而技藝日良冀以仰副

朝廷明刑弼教正德厚生之至意一俟經費略充再當設法推廣如有應行變通之處容隨時奏明辦理再該所現既徑隸臣部酌設員缺擬請

飭下禮部鑄造巡警部習藝所關防頒發鈐用以昭信守所有開辦習藝所並酌擬試辦章程繕單具奏各緣由謹恭摺具陳伏乞
皇太后

皇上聖鑒訓示

請疏濬 三海水道摺 附單

奏爲

三海上下游水道亟宜疏濬謹酌擬辦法核估用款繕具清單恭摺會陳仰祈

聖鑒事竊維修治溝渠莫先於

禁築疏通淤滯貴導其源流臣等恭查

三海水道發源於

玉泉山經南

御河橋出城河身甚曲原易淤塞近復年久失修遂致節節阻滯
河身淺窄來源難於暢行河底淤高尾閘艱於宣洩加以閘有滲
漏橋有圯廢溝多旁溢土多存積受病之深幾難著手於衛生一
事尤多窒礙自非詳加勘度分段施治不足以期清潔而利流行
臣等派員逐段詳細履勘擬於水之上游分兩段修理以清其源
水之下游分三段修理以暢其流惟

天安門外

御河地屬

禁垣爲

三海水道下游之關鍵亦復年久失修河底日高河流日滯必須
一律挑濬方可使上下游日見通暢擬請併案興修以資通利謹
繕具清單恭呈

御覽綜計此項工程六段延長將二十里疏治旣難工費尤鉅業飭廠商核實分估復經迭次核減約需銀二萬兩臣等公同商酌事關

三海水道實爲萬不可緩之工如蒙

俞允應請

飭下戶部撥銀二萬兩以便早日興辦實於要工有裨是否有當謹合詞恭摺具陳伏乞

皇太后

皇上聖鑒訓示再此摺係巡警部主稿會同內務府辦理合併聲明

附 三海水道分段修理辦法單

一上游第一段自德勝門水關至地安門西壓橋止查該處

水關爲河水入城要隘亟須添建水閘用資啟閉再南行經積水潭李廣橋三座橋一帶隄岸旣曲河身復淤亦應修濬其地安門外舊有響閘二道啟響閘則水入前海十刹海及地安橋啟西壓橋閘則水入

三海該處最關緊要惟年久失修間有滲漏尤宜修理完整
一上游第二段自西壓橋至

西三座門止查

西三座門馬路明溝內原有溝眼兩道俱通

三海每遇大雨眾水難免匯入擬將溝眼堵塞另開洩水溝一道引水北流直至地安門開通水竇導水入西壓橋溝內使內城西面之水趨注於此俾無泛溢之患

一下游第一段自地安門響閘至

堂子西邊水竇止查旣啟響閘水西北流則入前後海東流則循地安橋又折西南則由東壓橋入

皇城直至

堂子西邊出水竇入北

御河橋北路淤塞甚多亟應分別修治

一下游第二段自

南海東牆閘口至銀絲溝止查水由閘口東至織女橋折而南至銀絲溝石橋又東至長安門西牆外此段爲積年穢土淤墊河底寬不盈尺且有阻塞之處亟宜修復又銀絲溝石橋已圯橋上琉璃牆間有坍塌傾壓河身勢甚危險亦應修理

一下游第三段自飛龍橋迤東經牛郎橋菖蒲河折而南出

堂子西邊水竇至北

御河橋惟飛龍橋久已圯廢此段河身又節節淤滯亟應修濬

一下游水道之關鍵爲

天安門外之

御河長一百二十丈寬五丈三尺河內淤泥深逾二尺約計泥土一千三百九十餘方亟宜淘運淨盡橋石及河幫料石間有損壞之處亦應修補完好

更定警巡長捕等名稱片

再現在推行部廳章程整飭各省警政所有警巡長捕等名稱亦應詳爲核定以符名實而歸畫一查原設警巡係由各巡長挑充資勞較深多有成績擬請改名爲巡官以備挑充警官之用巡捕

之名與各督撫衙署文武巡捕差使及京城巡捕五營相混擬請改名曰巡警俾令顧名思義務盡所職卽爲挑選巡長之地至巡長名目應仍其舊各省巡警兵亦應統改名巡警酌設巡長巡官以爲造就警官基礎併宜慎其遴選重其品格不准地方文武與隸役一律看視庶隆作養而收實效惟此項巡警等係就肄習警學及辦理警務著有成績者而言此外概不得濫用新政各名以昭鄭重謹附片具陳伏乞

聖鑒

撥用恆公府地址修建習藝所摺

奏爲奏明立案事竊據署外城廳丞習藝所監督朱啟鈐申稱京師設立習藝所兼收無業貧民規模粗備功效已昭惜房舍無多容額甚少所收罪犯人等亦已滿數擬另設一工藝廠專爲貧民

習藝之用查有奉恩鎮國公毓恆府地基一段坐落在阜成門內瓜園地方基址寬闊以之創建工藝廠甚屬合宜申請奏明立案前來臣等查安民之術必儆惰游行行政所推首隆教養自臣部奏設習藝所以來罪犯貧民咸使入所習藝導其謀生之路杜其非法之行惟收犯日見繁多而廠舍不敷難期容納且無業之民與罪犯雜居習藝亦恐無以勵廉恥而端趨嚮正擬拓地添建以資推廣今查恆公府地址係與已革端郡王載漪府第毗連端王府地址已由商部奏請撥用恆公府地址事同一律荒廢可惜且基址寬宏距所較近於該處另行設立工廠甚屬相宜如蒙俞允卽由臣部轉飭該監督核實勘估剋期興築庶幾擴充工業化莠爲良而振懦頑之精神廣

國家之教育於地方治安大有裨益是否有當謹恭摺具陳伏乞

皇太后

皇上聖鑒

遵議江督奏上海添設巡警援案開支經費摺

奏爲遵

旨議奏恭摺會陳仰祈

聖鑒事本年七月二十一日內閣鈔出署兩江總督周馥奏上海添設巡警並援案開支經費一摺奉

硃批該部議奏欽此臣等按原奏內稱上海衝繁甲於他埠租界以內雖由工部局設立巡警租界以外則一無戒備上年前升道袁樹勛將向駐彼處之滬軍親兵改爲巡警分派城廂內外地廣兵少疏漏實多從前駐兵約有二千二百餘人嗣經陸續歸併裁撤僅餘兵夫五百六十名不及從前兵數之半不敷調撥現擬添

設巡警五百名其營制餉章照南北洋章程辦理等語查上海爲通商要埠巡警實內治根基現方奉

旨普設巡警以上海地方之大商務之繁輪船往來華洋雜處乃租界以外之巡兵僅此區區數百名原不足以資分撥而備緩急所請添設巡警五百名自應准其添辦惟上海巡警內保商民之治安外繫列邦之觀聽應由該省疆臣責成該關道認真舉辦加意巡防毋得有名無實致蹈舊日防軍習氣以重警政至營制餉章應暫准照南北洋巡警章程試辦俟本部定有劃一章程當再奏請通飭遵行又原奏內稱滬軍親兵現改巡警者每年約支銀一萬一二千兩撫標滬軍每年約支銀二萬數千兩向在關稅項下作正開支此次再添五百人約計每年應需餉銀二萬數千兩等語戶部查該處滬軍親兵現改巡警及撫標護軍等營薪餉每

年皆在關稅項下作正開支此次添辦巡警五百名自係爲保衛商民起見該督所請每年應需餉銀在於關稅項下動支自應准如所奏辦理仍令照滬軍舊章造冊歸於防軍案內按年報部核銷並令將起支餉銀日期專案報部以憑查核所有遵議緣由謹會同恭摺具陳伏乞

皇太后

皇上聖鑒

請將鑾儀衛衙門空閒房屋撥作巡警部公用摺

奏爲鑾儀衛衙門空閒房屋擬撥作巡警部公用恭摺會陳仰祈聖鑒事竊查西長安街路北向有儀慎親王舊第一所前於光緒三十年正月二十日蒙

恩賞作鑾儀衛衙門在案其西偏舊有空閒房院一所當時一併

正
三
年
各
臣
一
劃歸鑾儀衛署內因正院房屋寬大已可敷辦公之用原撥署旁西偏房院幾同閒置伏念巡警部應用局所及醫院學堂等處需房甚多且推廣警政尤以開通民智爲急務現准軍機處鈔交考查政治大臣戴鴻慈端方等奏請籌辦博物院萬牲園公園等項容由臣部另行妥籌次第興辦現擬先行擇覓房舍陳設書籍及各項器物圖冊准令官商士民人等時入游覽藉以啟滄新知擴充聞見惟必須地址稍爲寬展方足以新耳目而壯觀瞻臣部與鑾儀衛公同商酌該署既有空閒房院若稍加修葺移作開辦此項陳設之所尙堪敷用事關公益洵爲一舉兩便合無仰懇天恩俯准將鑾儀衛署旁空閒房院撥作巡警部公用於警政實有裨益是否有當謹恭摺會陳伏乞

皇太后

皇上聖鑒訓示再此摺係巡警部主稿會同鑾儀衛辦理合併聲明

請 飭纂訂報律摺

奏爲京外報館日多亟應纂訂報律以示限制恭摺仰祈

聖鑒事竊維啟發知識改良社會收效之速莫如報館東西各國報紙繁多然其呈報主筆也有制其納取證金也有法其違犯處分也有等是皆有報律以定其範圍故言論自由之說係在法律內之自由非謂逞其口說肆爲簧鼓也今中國風氣漸開京外報館時有增益是民智日進之梯階卽輿論得伸之先路苟能遵守法律自應逐漸推行惟中國向無報律主筆者則以無報律而習於詆排地方官則以無報律而不知處置在主張新學者既不願以舊律相繩而報館等每藉口於言論自由亦未必服從羈勒是

放縱之則違國法嚴禁之則遏新機致令開通民智之要端將成淆亂聽聞之慣習揆厥由來實由報律未定無所適從其咎亦不盡在報館也但報律爲法律之一端委曲繁重精密異常東西各國皆係立法之事現在

欽派大臣修訂法律所有議法之權自當歸併辦理以期畫一相應請

旨飭下修律大臣纂訂報律恭候

欽定務期內審情事外採良規覈定頒行允資遵守俾職司檢閱者有所折衷而各報館亦咸知守法實於啟牖新知多所裨益所有擬請纂訂報律緣由是否有當謹恭摺具陳伏乞

皇太后

皇上聖鑒訓示

開辦高等巡警學堂摺

奏爲陳明開辦高等巡警學堂情形恭摺仰祈

聖鑒事竊查臣部奏定章程內聲明巡警學堂歸臣部巡轄等因
欽奉

諭旨允准在案伏維保安之用警政爲先造就之方學程最要現
在整理內外城警政需用警官以下人材日多加以各省舉辦巡
警多因任使不敷或咨請調員前往或電請派人來學尤非亟設
高等學堂分科教授不足以宏啟迪而資應用當於四月間招集
京外人員及舉貢生監並原充各項巡警等共有六千餘人之多
分期考試遴選精通警學各員嚴加甄錄復由臣等校核計挑入
正取二百四十名副備取三百名將列在正取者先令入堂肄習
計分三科一曰正科授以高等警察及各項法律分六期畢業挑

取舉貢以下及巡警入之一曰簡易科授以簡易警察以應急需
二期畢業挑取各官員等入之一曰專科授以必修警察俾現在
有差各警員可及時來學分二期畢業凡各廳隊警官以下胥人
之就原有警務學堂房院酌加修葺應有堂舍亦均麤備名曰高
等巡警學堂延聘中外各科教習酌定課程以資講授查有二品
銜分省補用道唐家楨堪以派充該堂總理並派臣部警學司員
外郎熙棟總核該堂事宜提調以下各員均經揀派並酌設司書
生夫役名額其經費等項飭令核實動用摺節開支業於本月初
十日開辦惟京師首善之區學堂又爲各省標準現因款項支絀
僅就財力所能敷者辦理嗣後仍當籌增款項設法恢張以期成
材日眾學業日精內供京城選用外應各省取求用副
朝廷設立專官保衛元元之至意所有開辦高等巡警學堂緣由

理合恭摺具陳伏乞

皇太后

皇上聖鑒

援案撥用空廢衙署摺

奏爲援案撥用空廢衙署恭摺仰祈

聖鑒事竊據署內城廳丞裁缺鴻臚寺少卿榮勳申稱內城設立分廳辦理地方各事宜亟應建築衙署以崇體制而資辦公惟需款浩繁籌措非易節經租用民房究非經久之道查有鴻臚寺太僕寺衙門現經裁併署宇空閒若以改充廳署甚爲合宜申請奏明立案前來臣等維安民要術巡察宜周行政肇端觀瞻貴肅前次奏定巡警部章程內開分廳署屋宜在通衢必須軒敞等語誠以廳署重地理宜嚴肅整齊自今年夏間舉辦分廳分區以來事

務日繁祇以部款無多未能籌建署舍租用民房本係一時權宜實非經久之計擬俟經費稍充卽行勘覓地基徐圖添築今鴻臚太僕兩寺舊署旣據該廳丞等聲稱地址形勢曠廢可惜查太常寺舊署業經考察政治館王大臣奏明撥作該館編譯所之用仰邀

允准與此先後事同一律情形亦屬相符謹援案奏陳合無仰懇天恩俯准將裁撤鴻臚寺太僕寺兩衙署撥歸臣部以資辦公如蒙

俞允卽由臣部覆勘接收無事改作之勞兼節租借之費實於地方警政深有裨益是否有當謹恭摺具陳伏乞

皇太后

皇上聖鑒訓示

會議擬訂民政部職掌員缺摺

奏爲請

旨事九月二十日恭奉

懿旨巡警爲民政之一端著卽改爲民政部原擬各部院等衙門職掌事宜及員司各缺仍著該堂官自行覈議悉心妥籌會同軍機大臣奏明辦理等因欽此臣等當卽督飭各員悉心籌議竊維民治爲保邦之本設官乃熙績之原虞周司徒實掌邦籍魏晉民部皆列尙書責任之專關繫之重實中夏由來定制亦環球立國所同臣等前奏擬巡警部官制卽屢經聲明爲內治根基民事總匯所擬辦法已隱寓民政於中茲復欽奉

懿旨特改民政部仰見

朝廷講求內治綏靖民生之意臣等詳繹總司核定官制王大臣

奏定民政部官制參之各部官制通則綱目已具憑藉有資因就
原設巡警部分司職掌原有者量爲合併原無者分別增入如民
政之地方行政地方自治移民僑民暨戶部分入之保息賑救疆
理工部之營繕此皆爲巡警部原設司科所無者也各項警察行
政司法教練暨整飭風俗禮教戶籍保安營業工築衛生編譯等
項此皆爲原設司科所有者也此外一部總匯之事如原設考績
統計文牘庶務等科機務一所事項此應遵通則設承政廳以左
右丞督理之者也一部謀議之事及諮議審議章程等事原由各
司擬稿丞參覆核者此應照通則設參議廳以左右參議總核而
酌設參事以佐理之者也計應設各司按照原奏仍設五司一曰
民治二曰警政三曰疆理四曰營繕五曰衛生均已另定職掌而
將原設各司所分別歸併辦理現在創辦民政較之巡警部事務

倍增擬按各司繁簡酌設額缺巡警部原設郎中五缺員外郎主事各十六缺小京官四缺照七八九品筆帖式設一二三等書記官每司限以十缺今職掌既繁員缺自應改置擬參照原奏設郎中八缺參事二缺員外郎十八缺主事二十缺七品小京官九缺仍遵設八九品錄事將原設一二三等書記官裁撤其各司增設之七品小京官一缺兼可爲八九品錄事升轉之階臣等伏維更定官制全在綜核名實不在廣增員缺是以事務雖較從前爲多而員缺合計仍未敢多所增加將來民政推擴日廣綜領日繁員缺如有不敷仍當再行續請添設至民政原係包括巡警應有專司稽核之員查周禮本有司稽一官漢魏司徒各曹亦有督查專職京城警衛責任重要臣部現直轄各廳局堂所人員事務亦極紛繁前於巡警部創設之始曾設有稽查處爲稽查警衛

躡路及各廳局之用擬仍照前設立以重考核又查內外兩城巡警兩廳官制本與原設巡警部息息相通現臣部既經議定職掌嗣後京城巡警爲該兩廳專責亦應酌議變通擬將兩廳丞缺升爲從三品俾重事權部中既設參事該兩廳參事應改爲僉事並添設司法處以辦理司法警察現均酌按事宜改定各處官員名稱職掌品級以符名實而便升轉並推辦外防巡警移設分廳以期布置周密臣等公同商酌意見相同分繕清單進呈

御覽俟奉

旨允准後臣部卽遵照辦理並通行知照所有會議民政部衙門職掌員司各缺緣由謹繕摺具陳伏乞

皇太后

皇上聖鑒訓示

請 飭各省將原認巡警經費仍如數解部摺

奏爲請將各省原認巡警經費奏明通飭立案仍行如數解部支用恭摺具陳仰祈

聖鑒事竊維保民圖治特設專官立政任人必資財用臣部現經奉

旨設立將巡警併入舉凡內政執行之機關與夫立憲預備之基礎百端待理需款孔多上年創設巡警部之時卽以事繁用鉅迭經奏明籌指各款歸部撥用均蒙

允准現在巡警各政仍歸臣部管轄原有籌撥各省應解經費自應仍行解部支用以資挹注而濟要需查巡警部前經奏定指撥各款內計山東膠海關徵存洋稅項下銀二十萬兩榆關鐵路餘利項下銀五萬兩各省協濟如直隸江甯江蘇安徽江西山西河

南湖南湖北四川兩廣福建陝西甘肅雲南貴州等省共銀三十
三萬兩除八省膏捐溢額一項雖經認解尙無定數浙江一省尙
在咨商其餘已解未解之數及此外解濟巡警部各款嗣後統歸
臣部撥用仍隨時督飭所司各員核實樽節動用無任浮濫各省
如有遲延短欠等情擬卽分別奏催咨催期無貽誤至於此後推
行民政範圍較廣款項實有不敷尙須熟籌續撥的款俾免竭蹶
以期仰副

朝廷振興庶政鄭重度支之至意如蒙

俞允卽由臣部通飭各省欽遵辦理以資辦公而裨要政所有請
將巡警部前撥各款仍歸臣部動用緣由謹恭摺具陳伏乞

皇太后

皇上聖鑒訓示

掛甲屯紳辦粥廠改爲教養局援案懇 賞米石摺

奏爲掛甲屯紳辦粥廠改爲教養局援案籲懇

恩賞米石以惠窮黎恭摺仰祈

聖鑒事查掛甲屯舊設粥廠一處由紳士經辦於光緒二十九年九月三十日經巡城御史奏請

賞給該廠粟米三百石奉

旨允准歷經援照辦理在案現據該紳等呈稱上年五月間御史王振聲具

奏變通粥廠章程改設教養局所有京城內外各粥廠均應遵照辦理掛甲屯地方游民最多經紳等設法勸募添招股本本地貧民均令入局學習工藝局內一切章程仿照功德林普濟堂成案辦理請將每年

恩賞粟米三百石撥入教養局作爲長年接濟之需等情前來伏
維民爲邦本食爲民天歷年

朝廷撥發倉儲用濟民食已覺實惠均霑今更擴充辦法教養兼
施雖屬待哺嗷嗷實不虛糜廩粟合無仰懇

天恩准照成案賞給粟米三百石俾得及時賑放惠濟窮黎仍由
臣部嚴飭外城廳員隨時稽查以昭核實所有掛甲屯紳辦粥廠
改爲教養局援案請賞米石緣由理合恭摺具陳伏乞

皇太后

皇上聖鑒訓示

推廣接修路工援案借撥部款摺

奏爲推廣接修路工援案借撥部款以濟要需恭摺具陳仰祈
聖鑒事竊維考工之職營國特重夫經涂首善之區遵路尤資其

正直是興築路工一事非但觀瞻之所繫抑亦政策之宜先去年設立巡警部之時卽將工巡局併隸部中於京師內外城地面節經按段估修輪轂往來交稱便利惟是道里縣長需款甚鉅查光緒二十八年四月慶親王奕劻等會奏籌辦京師善後創設工巡整頓地面摺內聲明請

旨飭下戶部先行墊借銀二十萬兩陸續撥用將來卽在溝渠河道歲修工程項下按年扣還又光緒二十九年三月肅親王善耆具奏請領部撥款項興修路工摺內稱現經勘丈城內各段街道約計八十里有奇已非二十萬兩所能竣事統俟辦有頭緒再行請

旨添撥又光緒三十一年五月大學士那桐具奏路工續修待款懇

恩飭部援案墊撥摺內稱續勘豫定第四第五兩段工程懇請再行墊借銀二十萬兩仍於溝渠河道歲修工程項下按年扣還各等情均經先後奉

旨允准在案現在內城自第一段至第七段幹路均已陸續工竣復行展修枝路護國寺定府大街龍頭井南兵馬司勾欄胡同東堂子胡同等六處前次續領二十萬之款又復將次用罄臣等查阜成門內大街至西四牌樓爲

蹕路經行之要道地安門外大街東西壓橋

皇城根一帶爲東西交會之通衢又西長安街至西交民巷及皇城內各處幹路均應逐漸推廣次第接修擬卽飭令委員等續行測勘指明段落豫定工程以期早日竣事所需灰石沙輒一切物料必須預爲儲備若不籌定款項必至待料停工辦理難期妥

速合無仰懇

天恩飭下度支部再行墊借銀二十萬兩分次支領仍於溝渠河道歲修工程項下按年陸續扣還俾應急需如蒙

俞允卽由臣部行知度支部欽遵辦理所有內城接修路工待款孔殷援案請撥緣由理合恭摺具陳伏乞

皇太后

皇上聖鑒訓示

請先撥崇文門大石橋等處正路工料銀兩片

再外城路工分段修築前經大學士那桐奏請外城街道發款分段修路摺內聲明其餘各段陸續請款次第接修嗣因第一段由正陽門至永定門又以永定門內至天橋一段撙節騰款改修大柵欄珠寶市糧食店西河沿廊房頭條胡同紙巷子煤市街觀音

寺枝路八處共估銀四萬八千兩第二段由宣武門外大街至菜市口廣安門內大街至西珠市口二段共估銀四萬七千兩均經先後奏明請

旨飭下戶部照數發款欽遵辦理在案茲查崇文門石橋至蒜市口一段大石橋至東珠市口一段現在亟須接續修築又打磨廠爲外城迤東商賈輻湊之區必須推廣展修以期東西一律交通亦經飭令委員一併測勘興工合計共需工料薪水局用等項銀五萬兩並造橋開溝鑿井種樹等項約需銀八千餘兩尙屬覈實估計擬請

旨飭下度支部先行發給崇文門大石橋打磨廠三段現估正路工料薪水局用銀五萬兩以期卽日興辦至造橋開溝鑿井種樹等項銀兩俟工程過半復加詳覈實用若干再行咨明度支部續

請補領如蒙

俞允卽由臣部咨行度支部欽遵辦理以重工需謹附片陳明伏乞

聖鑒訓示

會核河南巡撫擬就裁節綠營餉項先練鐵路巡警摺

奏爲覈明具奏恭摺會陳仰祈

聖鑒事本年六月二十四日內閣鈔出河南巡撫張人駿奏擬就裁節綠營餉項先練鐵路巡警一摺奉

硃批該衙門知道單併發欽此按原奏內稱裁汰綠營以改辦巡警爲要歸招用警隊以防護鐵路爲先務豫省京漢幹路南北橫亘千有餘里枝路則中有汴洛北有道清軌轍縱橫華洋雜遝防範稍有未周誠恐別生事端查續裁綠營兵弁每歲共餘銀三萬

九千餘兩除酌留各官護兵餉銀三千六百餘兩外下餘銀三萬五千餘兩現擬招練鐵路巡警一營計設總巡官一員幫帶官一員巡弁巡長兵夫等全營五百九十餘員名每年需餉三萬五千九百餘兩除前項儘用外尙有不敷開辦伊始修蓋各站兵房及常年製造軍裝靴帽並一切活支各款爲數較鉅應由司庫挪移動用作正開銷成營之後飭令駐紮鄭州南北適中之地哨長目兵分派各站照料商旅等情查該省鐵路枝幹交錯爲中外商旅匯集之區加以地方四通八達伏莽叢多自應趕設鐵路巡警以密防範所請擬就續裁綠營餉項先練鐵路巡警一營之處擬請照准至巡警學問精深責成重要凡募充巡警者均應先令入學堂講習警察各法以培其資格派充巡警後又宜使知自重自愛以養其程度與往日軍營待遇勇役大相懸殊應查照臣部歷次

奏案令入學堂肄習警法併將統帶幫帶巡目巡兵等名目改名
警官巡官巡長巡警暨刪除護號兵各名目以符定章而重警政
原單開具總巡官等薪餉數目應暫准照支仍俟臣部奏定各省
巡警詳細章程頒行後行令遵辦至所稱修蓋各站兵房常年製
造軍裝靴帽並一切活支各款擬由司庫挪移應用一節度支部
查該省添練鐵路巡警修蓋兵房及製造軍裝靴帽等項皆係應
需之款撥用裁營薪餉尙有不敷自應准其由司庫暫爲挪用惟
必須於京協各餉查明無礙方可動用其常年修置實需數目及
一切活支之款並須力求搏節估需若干先行專案報部以憑覈
辦所有核明河南巡撫奏請擬就續裁綠營先練鐵路巡警緣由
謹會同繕摺具陳伏乞

皇太后

皇上聖鑒

會核江蘇撫標制兵改練巡警摺

奏爲核明會奏仰祈

聖鑒事七月初四日內閣鈔出江蘇巡撫陳夔龍奏撫標制兵改練巡警一片奉

硃批該衙門知道欽此按原奏內稱蘇城巡警正苦經費無出自應遵

旨卽將制兵改練以期周密臣標中軍城守兩營額設兵丁八百名伙夫八十名現經挑選兵丁二百七十名歸入巡警局教練站崗與原設巡兵四百二十三名合成七百名又裁兵一百二十三名伙夫四十名每月節出餉銀九百十六兩零與挑選各兵底餉一併撥歸巡警局作爲增餉及製辦衣服等項之用其餘兵丁四

百名伙夫四十名暫歸兩參將分帶作爲巡警左右隊歸督練公所節制分別派防城門衙署監庫並供軍令釘封火警彈壓幫帶及哨官等員卽行裁去以節糜費裁汰各兵酌給恩餉一月等語查臣部奏請

飭下各省裁汰綠營改辦巡警並挑選教練各辦法業經政務處會同兵部議准通飭遵行在案原奏挑選該省撫標兵丁二百七十名歸入巡警局教練站崗各節與臣部前奏辦法大致相符自應照准惟所稱餘兵四百名伙夫四十名作爲巡警左右隊歸督練公所節制辦法尙未允協督練公所係專爲編練陸軍之用向不兼轄巡警如竟照所奏辦理是兵警隸於一處於戎事有紛掣之嫌統轄非所專司於警政又有廢弛之慮且所指防城火警各事皆係巡警要政尤未便令歸督練公所節制致淆名實而生牽

礙擬請

飭下該撫將巡警左右隊兵丁按照臣部前奏認真挑選教練再由巡警局撥充城防等巡警之用以一事權仍將挑練合格各隊一律改名巡警毋庸再沿兵丁之稱以重警務至所稱派防衙署監庫及供軍令釘封等事亦關重要應由該省酌令巡警及巡防隊地方官等分別辦理以期各專責成原奏又稱巡警學堂現已設立應設法擴充等語查巡警學堂爲教練根本洵屬當務之急該省應卽將擴充辦法詳細咨報用備考核原奏又稱裁兵酌給恩餉各節度支部查蘇省撫標兵馬奏銷久未造報其中軍城守二營及原設巡兵四百二十三名前經戶部行查應俟聲覆至日再行核辦至現經挑選之二百七十名歸入巡警教練站崗各節旣經民政部照准應令將各兵底餉增餉及以後餉章卽行送部

立案並將裁汰兵丁所節餉銀除每月增餉外有無餘存暨製辦衣服等項共需銀若干報部查核其餘兵四百名作爲巡警左右隊歸督練公所節制一節旣經民政部駁令由巡警局撥充城防等巡警之用其營制餉章亦令一併送部立案裁汰兵丁酌給恩餉係照案辦理之事自應准其開支惟此項銀兩究係動用何年何款應令報部備查所有核明蘇省撫標制兵改練巡警各緣由謹會同繕摺具陳伏乞

皇太后

皇上聖鑒

退耕堂政書卷四

退耕堂政書卷五目錄

奏議五

密陳考查東三省情形摺

附考查奉天省情形單

退耕堂政書卷五

天津徐世昌

奏議五

密陳考查東三省情形摺

奏爲敬陳考查東三省詳細情形分別繕單恭摺具奏仰祈
聖鑒事竊臣等此次奉

命赴東三省查辦事件於請

訓後遵卽起程馳抵奉天恭謁

福陵

昭陵旋赴黑龍江吉林考查事竣回抵奉天卽赴

興京恭謁

永陵迭經電奏在案伏查東三省比歲以來疊遭變故創鉅痛深

爲二百餘年所未有臣等恭叩

山陵仰瞻

宮闕鬱葱未改鐘簴不驚楹桷重新垣墉無恙

祖

宗呵護之靈鄰好保持之雅皆非漢唐以後所敢望喜懼交集不覺淚下撫今思昔雖爲不幸中之大幸而因往推來則後患正未有艾竊維三省自咸豐間兩次議訂界約後疆域遞有變更而其幅幘之廣比諸日本全國尙大二倍且川流貫注運輸便捷適於商戰地脈沃饒水草繁衍宜於耕牧平原廣漠縱橫數千里便於馳騁利於用武加以興安長白諸山森林之多五金鑛產之富取之不盡用之不竭東西各國曰爲世界之寶庫稱爲中國第一富源蓋其自然之美利求諸宇內誠有罕與比倫者也臣等出關以

來周歷三省親見其土壤之膏腴山川之雄厚乃知開創之初
國家能以一隅之地制勝中夏固由植基深厚亦以先得地利之
故卽金之傾遼宋元之併天下亦莫不以是爲基礎乃自日俄戰
定兩強勢力分布南北一以哈爾濱爲中心一以旅順大連灣爲
根據囊括席捲視同固有名爲中國領土實則幾無我國容足之
地且其開拓展布有進無退恐不數年間而西則蔓延蒙古南則
逼處京畿均在意計之內蓋根本既定則以高屋建瓴之勢破竹
而下固地理形勝有以使之然也事勢至此猶不亟圖挽回之術
則此後大局益將無可措手而於千鈞一髮之餘爲亡羊補牢之
計又決非補苴罅漏更張一二細故所能爲功臣等竊觀今日三
省情形一切外交內治雖未嘗無彼善於此之處顧欲循是以爲
恢復之地則不待識者而知其有所不能試就臣等見聞所及撮

其要領敬爲我

皇太后

皇上縷晰陳之奉省屢經兵燹受禍最深自日兵入城以來事事藉口軍政出以強權甚至派憲兵至將軍署內捕人而印委各官之由日人喜怒更換者無論矣

宮闕之近且築小鐵路而撫順同江等處之因載煤運兵增築鐵路者更莫之能遏矣今軍政雖撤新派領事則自韓國調任隱以待韓者待奉將軍趙爾巽力爭合辦東清鐵路千山台煤鑛金州鹽灘及省城警察官吏派出所等事彼皆虛詞搪拒迄無成議凡鐵路由軍隊經營者遇我商旅率如奴隸偶失車票則執縛澆水盡情凌虐近日人欲開屠牛場我以警察阻之彼則以憲兵保護其他日官日商軍界學界之往來奉天者絡繹不絕省城日人商

旅寓居者八月間僅九百餘名現則驟增至二千餘名日貨無一有稅華貨無一不稅且再稅三稅是以日貨暢銷而華貨愈滯遼陽安東爲彼著意經營之地人數尤多附近鐵路各州縣之學堂往往逼延日本教習公私房舍占據者交還什無三四我欲增練兵隊初猶以尙未撤兵爲詞鴨綠江右岸木植原約合辦彼遽派員設廠意存獨占煙台等處煤礦則彼且視爲鐵路之附屬產勢將久據旅順大連灣街市皆易以日本新名使忘其舊各商埠旅館車站皆高懸日本國旗儼有反客爲主之勢計通省日兵有二萬數千人他如報社工師茶肆妓寮凡能名一藝執一技者亦胥出全力以謀我蓋自一抵新民而境界氣象迥然有中外之殊此尤臣等目擊心傷者至於內治奉省官吏向以情賄爲進取之階以釐稅爲自肥之地經將軍趙爾巽銳意整飭參劾至二十餘員

正書卷三十一
歲入釐稅增款至二百餘萬創辦清賦稅契等又增款至二百餘萬較之從前似有起色約計每年入款有八百數十萬之多然出款亦用至七百餘萬之鉅以現在應辦要政計之尙祇十分之一二加以現錢缺乏銀幣不敷遂致俄之盧布日之軍用手票正金銀行票所在暢行我雖設立官銀號以抵制之而資本僅六十萬兩斷不足以資周轉且因禁用過碼錢各商怨謗繁興而遼陽又以商出虛帖市面日壞補救乏術此財政圜法之交敝也省城巡警開辦未久尙有規模而各屬則以地捐鋪捐等充經費多至四百萬圓幾有民力過殫之苦至於學務統計省城學生有三千餘人外屬有一萬餘人創辦不爲不力而程度尙淺難遽收效至新軍未練雖有巡防馬步隊四十營而器械過雜降隊過多萬難得力剿捕之用轉以北洋派出之淮軍統領張勳等爲著效此外則

本省統領朱慶瀾尙間有剿匪之績耳實業如絲繭鑛產漁業之類皆聽民間習慣自辦而官未嘗提倡新法加意講求更無以開利源荒墾如圖什業圖達爾罕各蒙旗大段可墾之地有開辦者亦有正在擬辦者而皆苦於無民各屬葦塘山岡之私墾丈放者民間自私自利而不肯納之公家委員加價加費而不免失之操切墾務之難又如此民情則習尙樸實賦質勇敢自經兵革貧難者則多流而爲匪豪富者則多以堡防自衛幾有粵西民匪不分齊豫寨主稱豪之勢昌洮二府一州六縣皆置於哲里木盟科爾沁諸旗蒙古習於漢俗多築房舍以居火化以食亦有建學堂設防會者民蒙交訟則旗漢會審地租除新墾之札薩克圖郡王鎮國公旗外皆歸蒙旗自徵現郡王烏泰勾串俄人請其兵以自衛資其財利購其器械煽誘諸藩將爲腹心之患而昌圖洮南之間

有蒙荒三百餘里無官無兵尤爲逋逃淵藪全省旗丁列兵籍者二萬餘人實則與民無異所嗜者鴉片所憚者耕種故一切商業農業皆賴客民經營而旗民之生計日窘其官長又多肆意侵扣阻撓新政以致錮習未能盡化此奉天之情形也吉林庚子之役惟甯古塔三姓琿春等處曾受兵災而省城特稱完善乃至今城門仍有俄兵稽察街市亦由俄人站崗保衛之權幾不在我鐵路則自阿什河車站起至烏蘇里河交界止沿綫占地至五萬五千晌之多木植則由甯古塔附近之烏吉密至橫道河子又自磨刀口至綏芬廳之穆稜河一帶均擬歸鐵路公司護養斫伐鑛產則夾皮溝金鑛俄人逾限未採而駐吉之俄員仍欲干涉一面坡煤鑛俄據以供東清鐵路之用而我不能復松花江僅有俄輪來往而我無之凡吉省官吏之待俄事事以服從爲主義哈爾濱附近

之商民則有貪俄人之財喜其狎處幾與同化者俄之游匪我之馬賊亦以俄兵所駐我不能辦劫殺搶奪日甚一日商民有不得安居之勢其與日人交涉事件則自本年長春議開商埠遂有日副領事及日商四百餘人陸續前來吉長鐵路本省紳商原擬自辦而日人執前將軍長順改歸鐵路公司之議堅欲與我合辦迄未動工開埠地段則除甯古塔三姓琿春三處尙未籌議外其長春吉林哈爾濱均已勘定日人計較錙銖土民無利可貪故多怨日而頌俄商民言語之間則曰清國曰俄國曰日國幾不辨地屬何國民爲誰氏者至於內治自前將軍銘安設道府州縣已二十餘年久未整飭地闢人聚而民官無幾近年前將軍長順署將軍達桂又奏設延吉依蘭等府廳州縣九處然甯琿各城仍未專設民官該省轄境遼遠東南一帶郡縣過形疏闊新政無成效可言

而門丁書差姦欺朦混之弊則甚於奉黑地方裁判不講臣等蒞
吉未逾數日卽收呈至百數十起之多可爲地方官玩視民事之
證財政則地方入款以地糧釐捐合計有二百五十餘萬歲出亦
二百餘萬以兵餉練餉民官廉俸各款爲鉅數而按諸實際中飽
尙多如吉林道新城長春諸府及菸酒木稅局各差均視爲著名
優勝或謂百不報一或謂什不報一人言雖不盡確而以奉天新
民各府昔報斗秤捐數萬今收至二十餘萬者例之則其解額之
少得項之多可知又該省酒稅經將軍達桂於本年正月奏准加
徵制錢十六文合市錢三十二文而該局總理佐領豐年輒朦改
定章多立名目輾轉重徵加至數倍其中侵吞隱匿之弊又可想
見故有謂吉省財政如果澈底清釐當可增至數百萬者蓋非虛
語至錢幣則俄人盧布票到處通行該省永衡官帖局成本不充

濫發無節祇按二成付錢又兼偽帖充斥頗爲商民之累將軍達桂前議加鑄銀圓旋爲戶部所駁而俄人以現銀八十萬借鑄銀圓寶錠以濟商民之用而握操縱之權尤可慨歎軍政則制兵一萬二千餘人不歸營不應操不復行圍舊制幾同虛設所恃以防衛地方緝捕盜賊者則惟捕盜隊一萬五千四百餘人而募練馬隊必須槍馬自備應募者非豪富及素爲馬賊者幾不得與發餉皆用官帖每兩實領二千九百文衣裝火食均扣在內兵頗苦之其操法則以駐省之吉強右營爲差勝新軍則本年始練而官長皆以協佐領防禦等員對品遴充頗多年力就衰目不識丁之員故開辦未久而逃兵已多入營五月而尙不習步法學務則省城師範學堂甫經竣工尙未開學蒙小學堂雖有十餘處而程度過低成效尙寡其餘各屬更無可觀實業則如吉林琿春磐石綏芬

等處金礦不下數十處而皆未開闢蜂蜜山及濛江可墾荒地甚多而農民未招馬賊肆擾報種者尙屬寥寥此外如敦化東南之森林牡丹諸江之漁業該省官紳均未議辦民俗好訟睚眦小怨告訐不休又多嗜鴉片三姓琿春之間地植鴛粟者十居三四且自俄人通商以來習染奢靡前此勤儉之風爲之一變日俄之役俄人市牛馬草豆者惟吉林是資力田之家獲利頗厚八旗丁口實有二十四萬人數不爲不多而實業既不講求學堂又未推擴無論旗民平日皆以賭博爲事倖勝則惟供揮霍屢負則流爲竊盜故雖生齒之繁生計之富過於奉黑而智識之淺劣德性之淪溺亦較兩省爲甚此吉林之情形也黑龍江地本苦寒人口尤少自西比利亞鐵路告成全境已爲所橫貫庚子一役又無城不遭蹂躪現俄兵駐江境者尙有數萬人之多俄人在呼倫貝爾越墾

學者則目爲多事風氣梗塞新政阻滯較諸奉吉兩省尤多可慮
蓋由索倫各部地接鮮卑與俄人種類嗜好相近者多與內地風
氣過於隔別俄又餌以資財懾以威勢故幾於同化署將軍程德
全雖極意開通力祛畛域而札敦河等處開墾一事旣阻於副都
統蘇那穆策麟之異議省城附近所放荒地又撓於旗員之不便
臣等此次抵江該省旗員有請荒地免放熟地免糧者有以不放
荒爲保守至計者苦爲勸諭辨析再三終覺領悟者少財政則地
租雜項稅捐不及百萬舉辦一切輒苦無款近年辦理墾務收有
荒價四百餘萬留辦各項新政然非經久可恃之款其荒地現放
者則爲墨爾根之嫩江源布哈爾之納爾漠河此外青山黑山科
爾芬河依克明安公蒙界未放者不少大率荒段百萬晌數十萬
晌者所在多有數萬晌以下則視爲微末無經理者而以時候所

限禁令所拘皆苦有地土而無耕民由鐵路入江境至省七八百里除已墾各地及有站店外餘皆灌莽盈野汙萊彌望由省西北而興安嶺而呼倫貝爾而滿洲里則多係索倫等打牲游牧地段禁漢民前往止有商人並無民戶近年雖增設府廳州縣十三處皆在西南一隅迤北之愛琿墨爾根布特哈諸城祇有旗署並無民官治理日蔽新機日滯鄂爾順河之漁業以拘於俗禁而不能振興呼倫貝爾之鹽產以囿於蒙情而不能製運其錢幣則江省現錢缺乏銀圓稀少惟以俄之盧布交易署將軍程德全雖創設廣信公司通行紙幣而集款僅五十萬分行僅呼蘭巴彥綏化三處呼倫貝爾諸城皆未之及該處商民不特不能見中國現錢銀圓並他國銀圓亦無之自盧布外無可用者警務甫經開辦省城警兵巡兵約有數百人巡警學堂與總局同在一地至學務則以

江省文教未興旗民重在騎射漢籍惟知貿易向少書塾惟俄文
學堂早經奏設上年省城始有高等官立小學堂簡易師範科迭
經程德全勸諭官民興學然多視爲畏途鄙爲末務學生人數迄
未見增外城如呼蘭綏化均有學堂備數而已民情則旗丁習於
遊惰惟以補一甲兵進一領催爲生計自咸豐迄今欠餉已四百
餘萬不得不減額支放領全餉者歲不過十餘金領半餉者歲不
過數金生計之窘如此勞力營業尙不肯爲呼蘭等處漢民則直
隸山東人居多皆習耐勞苦間以耕作致富特自俄人築路以來
客工雲集道事竣失業則歸無川資留無衣食投入馬賊者往往
有之自非由官廣集客工使務農務不能挽救此黑龍江之情形
也由是觀之現在三省辦法雖有圖新循舊之殊行政用人亦復
互有得失而其不足以爲起衰之劑與救亡之策則一也何者國

家統治領土之法莫要於行政機關有指臂相使之效而我三省官制則以軍署爲之長官以州縣爲之僚佐夫以治兵之職而轄理民之官所務不同利害亦異隔閡旣甚牽掣斯多其終乃無一利之能興無一弊之不出所以數百年來有最良之殖民地而曾不能一收殖民之效觀俄人之於東海濱省日本之於遼東半島經營布置不遺餘力設官分職條理秩然而我猶因襲故常不知變計地廣而無民以實之則無惑乎狡焉思啟者之乘間而入矣欲謀行政之便捷圖實業之擴充則不可不以交通機關爲其命脈乃以三省面積之廣天產之饒而顧令交通大權操諸外人之手西比利亞鐵路橫貫北滿之約旣一誤於先東清鐵路直達旅順之約復再誤於後一縱一橫扼吭附背雖有合辦之名曾無半主之實日俄戰後形勢稍有變更而昔以全部交通之權專授諸

俄人者今則以南北一貫之路分授諸俄日臣等此次由新民東至奉天北抵黑龍江皆不得不仰息於日俄之汽車明明我之境內而俯仰周旋如適異國猶且不得不含恥茹痛強作感謝之辭彼有驕容我多愧色則直可謂國體全失矣若欲另籌他路以相抵制則中日原議又有不得修築並行幹路及有礙幹路利益之枝路之條贖還旣已無期補救亦多窒礙近聞俄人又將興修黑龍江東岸沿邊鐵路直欲以失諸南滿者收諸北滿而我並吉林長春間數百里之短路亦復遷就束縛無能爲役且鐵路一失而沿綫之森林鑛產均隨之以去血脈不通利權盡失要害之傷此爲最甚矣固圉之用國防爲亟日於旅大之軍備聞歲費千萬而不止俄於西比利亞之防隊猶存十餘萬而我則甯姓之礮台燬奉江之軍械燼矣欲練新軍則我無鉅款以擴充欲購新械則彼

尙設詞以限制卒之制兵如民防隊如盜三省新兵尙不能成一鎮之眾則邊衛全墮矣興舉百務全資財政俄修西比利亞鐵路糜款一千兆日招南滿鐵路之股一呼而集者五千萬圓非其魄力之果雄實由經理之得法而我則現錢匱矣銀圓停鑄矣銅圓限制矣舉三省萬里之廣北用俄鈔南行日幣以我實貨易彼虛楮官無抵制之法民有信用之心而我官商所發行之錢帖則真偽紛歧流弊錯出意在利國適以病民則財政又盡壞矣以外交之困難也如彼以內政之窳敗也又如此聽其放棄恐實去而名與俱亡稍事彌縫卽貌似而心仍不屬臣等使車所至刺戟在心仰思

締造之艱近鑒目前之患驚心動魄寢饋弗遑聞見旣詳不敢拘泥忌諱輒爲披瀝上陳伏維我

皇太后

皇上眷懷

列朝開闢之盛軌慨念目下局勢之艱危

省覽之餘亦必怒焉如擣特是積衰之故匪伊朝夕三省情形既爲臣等所親睹揆度時勢必須大加改革於用人行政諸大端破除成例以全國之人力財力注重東陲乃可望補救挽回於萬一臣載振臣世昌受

恩深重誠見事機至急誼無膜視考查所及不無一得之愚容當悉心酌擬詳細臚陳恭候

裁擇茲先將三省各項報告分繕清單恭呈

御覽除甯古塔伯都訥等處道路較遠應俟調查各員到日彙呈報告再行具奏外所有考查東三省詳細情形繕單具奏緣由謹

恭摺具陳伏乞

皇太后

皇上聖鑒訓示

附考查奉天省情形單

一交涉

奉天省城自庚子後俄人駐兵於此將軍以下迫於強權多有遷就雖設有交涉局祇供支應聽指受並無爭執磋商之權日兵初入一襲俄舊曾有派憲兵至軍署來執巡捕兵隊之事自軍政撤後省城始有保衛地方辦理交涉之權日人前築省城小鐵路業經買回其前之將軍衙署雖已交還而五部舊署等處盤踞如故統計省城現有日人二千餘總領事爲萩原守一係由韓國調任事無大小逕行照會將軍置

交涉局於不顧近以將軍飭停屠獸場之事至派日兵保護
又日商擬設商品展覽會我未之允而已行開會禮凡日官
日商軍界學界之謁見該將軍者幾於無日無之要求干請
事所恆有綜計交涉大端有四一曰鐵路現省城鐵路車站
凡東至新民北至孟家屯東南至營口安東者皆由東清鐵
路舊車站上車距城太遠商旅來往頗形不便將來奉新鐵
路收回之後似以改設車站於近城地方爲宜刻下南滿洲
鐵路仍歸日本兵隊鐵道提理部管理未歸公司一切管理
法皆未注意祇有二三等車搭客苦之奉新鐵路尙係軍用
輕便之路僅有三等車每日來往二次貨客填溢得價甚豐
惟先時不售票貨客已滿則得票較遲者概不得入偶有爭
擠則日人卽敲扑從之如御奴隸亟應早議商還該將軍會

電商外務部數次迄無頭緒安奉鐵路亦係軍用苛待之苦與奉新同此外同江築有輕便小鐵路撫順築有運煤鐵路而南滿洲鐵路按中日新約應照中俄借地造路各原約由中日合辦兩國各派總辦乃日本新頒南滿鐵路條規竟謂該公司爲日本所立並以鐵道及附屬事業充爲日本政府資本僅言日本政府所認股分以外之一萬萬圓可由中日兩國人民募集將原合同內我所應有之合辦權抹殺殆盡此權一失將來該路之用人行政監督考查諸端我固不能過問而附屬鐵路之森林鑛產及他項營業且隨之以去關係至爲重大趙爾巽擬有駁議咨外務部惟聞日本募得該路股本溢出原額已不啻什伯我不惟宜爭合辦之名且必能盡合辦資本之實方能於路政有益一曰木植中日新約

應設木植公司現尙未設日人遂到處伐木漫無界限本年正月輯安縣屬渾江羊魚頭臨江縣屬帽兒山頭道溝諸處竟有日人安設森廠卡倫派員經理木把凡入山砍木者必先赴該卡倫報明姓名住址做簿若干等情似宜由外務部與日人速議章程設立公司一面招集商股與之合辦至地界則日人據鴨綠右岸之約覬覦擴充實則一切界限應按山水分畫渾江森林與右岸尙隔帽兒諸山以地理言難任漫無限制此必宜定右岸之界限者也一曰鑛產最大者曰興仁之撫順曰遼陽之煙台日人皆視爲附屬鐵路之產業撫順千山台煤鑛於光緒二十七年經華商王承堯承辦後復添招華俄銀行股本與之合辦至三十一年爲日軍所占謂中有俄款應作戰利品現趙爾巽照會日總領事議令商

原處重立等語照會日總領事迄未見覆此必宜爭執者也
一曰開埠省城已在西關勘有地段除俄領事貝勒成闢到
數日卽去其餘到者惟英總領事福祿禮德總領事明思格
美總領事司戴德此外各國領事均尙未至英領事前商將
軍指定一租界美俄均未經營商務以美爲大上月有照會
買我鹽城煙靛之請將軍力拒未允日本則各項商鋪客寓
飯館妓寮浴室無一不具大連無關省城日貨極賤頗能暢
銷而華商遂愈形困敝此奉天交涉之大略也

一吏治

奉省幅員遼闊東接吉韓西屏畿甸南瀕大海北控諸邊近
年自蒙荒墾闢凡近奉省之科爾沁各旗內墾地商民皆歸
奉轄西北地境愈拓於前而原設民官較少凡旗署分駐之

城守尉以下及府縣佐貳皆得理受詞訟其距官較遠號稱鄉約者亦往往由商民推令經紀庶務裁判民刑治理利弊爲各省所未有近年迭經將軍增祺趙爾巽先後奏請添改府廳州縣二十五處漸救前此民少官多之弊又原設大官過多軍府五部互相牽掣吏治腐敗得官受賄視爲故常將軍趙爾巽蒞任後參劾二十餘人革除陋規免去攤款稍有吏治之可言其已革之弊如州縣官升調向由府尹主持致有受賄之事又每遇征收之時輒多更委名爲調劑實以賄成近已悉行改易餘如整理詞訟裁汰書役皆漸著成效奉天府及承德興仁兩縣案件最多月恆百餘起或數十起未結者甚鮮民間頗稱頌之海城縣所立學堂將近三百處爲通省冠其習藝所各項工藝凡學堂警察用品多就購焉此

其賢聲最著者惟協佐領間有侵吞旗丁口糧以自封殖而各官吏甚有援附外人以爲進身之階者蓋奉省迭遭兵燹人物凋敝投効者或係獲咎之員或捐一職銜以供差遣其奏調者又往往視爲畏途故不免有才難之歎官場向倚釐稅爲進項自將軍趙爾巽改章後如牛馬稅一項歷年報徵不及數萬今且收至四十餘萬悉索歸公理固應爾然而各府州縣每月僅領數百金該省請加道府養廉之奏政務處迄未議復支絀情形萬難持久以故賢者每思引退州縣各缺且有懸牌而不肯履任者是必變通辦法始可收得人之效至弊之中於州縣者莫甚於刑幕門丁大凡大缺延一幕友一歲率須一二千金皆彼此汲引把持公事牧令之不諳例案學識過淺者皆聽其指揮受其簸弄門丁則有假辦事

官之名張揚聲勢魚肉平民且有冠頂出入仍執臧獲之役者現雖迭經禁革迄未全除推究其原皆由地方官不習裁判不明治理所致此奉天吏治之大畧也

一 民情

奉省民風質實不尙奢侈馴樸是其本性惟懶惰不理生計但求自給決不肯勤力耕作故荒地甚多惟遼陽之民較他處爲刁健甲午一役遼陽以南蹂躪不堪庚子一役拳匪荼毒全省幾無完善之地省中四平街燒燬最慘日俄開釁奉垣以南遼陽以北生命財產損害不可勝計聞已酌加撫恤有調查損失詳細表冊可稽前此馬賊到處劫掠兵民與匪幾難辨識往往有從事耕種並執各項職業而爲馬賊者昌圖以北各居民不通馬賊不得安居有所謂綁票者往往三

五成羣擾害鄉里此等盜案層見疊出聞緝獲者甚少遼源
洮南之間蒙地數百里無官無兵尤爲逋逃淵藪民庶商旅
皆患苦之近自淮軍統領張勳移紮昌圖勦捕認真地方漸
臻安謐其餘各屬匪勢亦少戢於前惟土地豐饒最宜招墾
寄留之民均能自給然無棲止房舍且畏馬賊相率回籍是
以地沃民少不獨洮南一府三縣戶口無多卽昌圖興鳳海
龍所屬亦均苦於農少工少無以盡地利而興實業而安東
遼陽等處日本商民之紛至者有增無減幾有以我腴壤供
彼殖民之勢此移民之舉萬不可緩者也現在舉行各政收
稅稍繁統計奉省課稅有四十餘種名目民間頗以爲苦然
用款繁多無如何也至於旗務全省額設旗營官兵壯丁約
二萬餘員名此外尙有千丁名目專供採辦交進物品及打

牲捕魚捕鹿等差旗營官兵皆有隨缺地官員地畝之多寡視其缺分兵丁亦如之惟係招佃領種各官兵但收其租耳每田六畝歲可得銀一兩上下至兵餉月僅支銀一兩除折扣外所餘不過五六錢更爲協佐各員乾沒故管旗各官多殷實者近來旗民亦嗜鴉片所種之地多以四分之一種鴛粟惟旗民不能耕種多由客民分種而取其值又不兼營商業故商鋪皆係客籍以山西人爲最多旗民生計之苦至於此極推原其故固由各旗民拘守故步不能自食其力亦由協佐各員非但不能提倡且從而剋削之甚且阻撓新政罔顧大局是必改訂官制淨汰舊習旗民始有來蘇之望此奉天民情之大畧也

一 警務

奉省自前將軍增祺舉辦警察以來已歷數載有名無實規
則毫無加以籌款艱難馬賊充斥故歷任將軍皆未實行自
趙爾巽蒞任整頓地面擴充省城州縣警察雖未組織完全
尙屬規模粗具於省城設總局一分局七分區十四共設巡
警六百三十名皆統以巡目巡長巡弁巡官設總辦一員分
率各科各股其隸於總局者有衛生醫院有屠獸場有工程
隊其別於巡警者有備補隊其經費有鋪捐斗捐煙燈捐戲
捐妓捐人力車捐屠獸場捐每年入款約十三萬兩每年出
款約計四十五萬兩出入相較不敷甚鉅巡兵弁目多未識
字學生程度亦低且以戶口列入司法一科尤爲混雜近來
日人在城內設立警察派出所干預內政磋商罔應亟宜設
法阻止鄉鎮巡警募民爲兵以糧捐爲大宗巡長由鄉選舉

立法似尙公允而有以降匪充者有以劣紳謀舉者辦理尙未盡善又承興兩縣警察凡五局三十八區布置亦可謂周密然紳士之公正及擁厚資者皆畏馬賊不敢任事故聞有劣紳匪首充巡長者巡兵中亦雜有匪類鄉民養之冀使不爲患於本鄉然亦有不免者他如遼陽境內之巡長楊二虎等皆由馬賊受撫各有眾數百人勒捐鄉閭欺壓良懦時所不免至於此鄉巡警至彼鄉行劫亦時有所聞今夏五月南鄉巡警藉拏賭爲名扎傷人命根底不清時多滋擾固由於開辦之初教練不易士著之民招之罔應弊遂至此而推究其本又由鄉鎮巡警紳董旣無警察學問又無鄉官才具其强者遂以齊豫之圩主寨主自居轉爲民患弱者徒覬覦薪公之用垂涎捐項之多能收款者十無三四但綜計各屬巡

警餉項如地捐車捐鋪捐燈捐之類均勻牽算通省不下四百萬圓之多最重者蓋平西豐廣甯新民均在二十萬圓以上上海城鐵嶺海龍均在十萬圓以上復州寬甸懷仁昌圖康平彰武西安東平均在五萬圓以上此外有以中錢計者有以東錢計者有以銀計者大約至少者歲亦支數千圓巡警有專用馬巡者有參用步巡者多者有一千一百名少者有數十名率如內地團勇此奉天巡警之大畧也

一 財政

奉天向係受協省分歲入糧租雜稅至少自光緒元年以來
歷任將軍崇實依克唐阿增祺廷杰等先後奏辦東邊各荒
開墾東西流水養息牧大凌河及葦塘等處並辦各城斗秤
捐東邊各稅各項鹽釐期糧捐等計收入最多者年可二百

萬以上壬寅以後收數又絀自將軍趙爾巽到任整頓稅釐奏辦清賦稅契等事入款驟增今以財政局冊報三十一年八月至本年八月間所入計之則糧租等項收銀四十一萬七千九百二十七兩有奇東錢四十一萬九千六百零九串有奇各項斗秤煙酒鹽釐銷場蕩票期糧捐稅等項收銀三百九十八萬九千五百九十八兩有奇東錢二百一十萬零一千零零三串有奇大銀圓二千八百十二元有奇小銀圓九十四萬三千六百九十八圓有奇日幣十九萬六千四百九十八圓有奇各地三圍稅契荒價清賦收銀九十餘萬合以

欽工領款各省解到之官兵俸餉及開辦經費善後款內各項減平各營繳還協濟等款併前將軍增祺所移交糧餉處

戶部金銀庫所積存等項總計共收銀八百九十四萬七千餘兩然入款雖較往年大增而比歲興修

陵殿各工籌辦各項新政用款之鉅亦爲前此所未有今以各項出款計之一曰

欽工及

永陵

宮殿並各衙署工程等款支京平銀五萬兩市平銀四十萬零五千一百三十六兩有奇東錢十五萬零七百五十八串有奇小銀圓十九萬一千九百零一圓有奇日幣二千三百零二圓有奇一曰各營隊薪餉郵賞房租等款支市平銀二百一十六萬一千三百七十五兩有奇東錢八萬八千七百一十串有奇小銀圓十萬零七千零八十二圓有奇一曰八

旗官兵俸餉等款支市平銀三十六萬六千九百二十八兩
有奇東錢四十萬零五千六百四十八串有奇一曰學務經
費並游學等款支市平銀五十一萬六千五百五十三兩有
奇東錢八萬零八百八十六串小銀圓一千二百八十二圓
有奇一曰各署廉俸津貼並設治經費等款支市平銀二十
九萬六千八百一十一兩有奇一曰購製槍械軍衣等款支
市平銀二十二萬四千四百九十一兩有奇大銀圓三萬七
千圓小銀圓一萬一千九百三十圓有奇日幣十二萬四千
六百八十四圓有奇一曰購辦銅鉛機器等款支市平銀三
十萬零七百七十兩有奇日幣九萬八千圓一曰置備公用
房價等款支市平銀十一萬六千九百七十七兩有奇東錢
七萬三千五百串一曰添製

三陵各項器皿致送外賓等款支市平銀二十九萬九千三百八十七兩有奇東錢十五萬六千五百七十二串有奇小銀圓十三萬六千九百八十三圓有奇一曰各營捕盜賞犒各局所年節賞項軍署各司辦公等款支市平銀十五萬九千六百七十八兩有奇東錢五萬六千八百七十八串有奇小銀圓三萬五千六百九十八圓有奇一曰慶賀費施助日美各項善費協助上海漁業會費開辦商會經費解部各項雜款共支市平銀二十九萬八千零四十四兩有奇東錢十三萬三千七百九十三串有奇小銀圓十九萬四千零七十二圓有奇日幣二千七百一十七圓有奇一曰各局處薪津公費伙食等款支市平銀四十六萬七千八百六十兩有奇東錢六十萬零五千七百一十七串有奇一曰巡警衛生等

款支市平銀二十五萬五千六百六十一兩有奇小銀圓十五萬九千五百三十九圓有奇一曰官銀號資本銀六十萬兩一曰委員查事查匪會審案件查河查路各項川資車價等款共支市平銀七萬四千六百六十一兩有奇東錢一百九十八串有奇大銀圓一百八十七圓有奇小銀圓一萬五千一百八十圓有奇日幣四千三百零一圓有奇統共支銀六百五十九萬四千三百三十九兩有奇東錢大小銀圓及日幣約合銀七十九萬七千九百六十四兩有奇尙餘銀一百五十五萬三千餘兩是則奉省出入款項較諸從前均驟增數倍現又擬練新軍振興實業將來用款必更加多夫需用旣繁籌畫自不得不密而爬羅剔抉則向之以弊爲生者謗議浮言在所不免該將軍現正奏辦統捐冀紓商民之力

蓋亦有見於此根本重地振興固爲要務腴削亦非所宜理財者不重斂財而重生財必使無形之利多於有形乃爲遠謀至計苟非其人未可語此至奉天圍法最爲紛雜有現銀有帖銀有過鑪銀有中錢每千抵制錢五百有東錢每六千抵制錢一千有過碼錢卽商號買貨互易之虛錢有銅圓而市面盛行者則惟小銀圓外來錢幣俄有盧布日有軍用手票有正金銀圓上年趙爾巽創設官銀號發行圓幣冀以抵制手票而以司事者未究銀行之學祇能用內地習慣於銀行規模相去尙遠經理年餘雖獲利三萬餘兩而向之西號存放官款者爲該號所分並以公義社官禁過碼錢二事羣集謗於該號要之奉天欲收銀業之權斷非一尋常司事之才與官撥六十萬之款所能爲力特多一與錢鋪匯號競利

之官局而已但奉省自開設該號民間始見中國圓幣是宜設法改良擴充必有便商民流通市面爲主勿沾沾以得利爲能至於銅圓前將軍增祺奏以銅圓一枚當東錢一百文市面以爲不便本年趙爾巽改爲每十枚當銀圓一角正合十文之數商民皆信用之因有添機鼓鑄之議但東三省地面甚大斷非每日三十萬枚所能周轉向辦銅圓局委員經理多年迄無歸公餘利撤換以後漸有餘利可收此奉天財政之大畧也

一 學務

奉天文教較各省爲遜而學堂則開辦獨早光緒二十四年前將軍依克唐阿卽有創設學堂籌有專款之奏增祺繼之於庚子後重加提倡省城各屬聞風興起設立多處前署將

軍廷杰現任將軍趙爾巽前東三省學政李家駒皆夙以興學爲己任誘掖獎勸不遺餘力計省城官立者有奉天師範學堂測繪學堂實業學堂蒙文學堂第一至第九小學堂女子師範學堂各一所師範學堂係本年六月以簡易傳習初級三處歸併改設學生二百四十人較各學堂爲最多別有維城小學堂係上年趙爾巽奏設專教宗室子弟學生九十二人公立者有內務府小學堂同善小學堂半日學堂太清宮小學堂淑慎女小學堂此外尙有官立師範簡易科手工傳習所習藝所工場第一第二第三私塾改良社各路傳習所計教員及管理員共一百三十五人學生三千零四十九人官立者皆動公款公立者皆歸自籌自上年八月至本年八月學費併游學等費支自公家者用至五十餘萬兩奉省

學務可取者在民間風氣大開樂於就學不似江省之拘囿學生趨向純正聽受馴順亦無東南各省奇衰之習省城各學堂程度以中學堂爲最次省外各屬如鐵嶺綏中臣等經過之處學堂亦復不少學生歡迎分列尙均有精神步法可觀惟考查內容有亟須整頓者省城各學堂延請日本教習多人皆由軍政署官強薦無所事事終日游息其金復海蓋及沿鐵路之府縣十數蒙小學堂聞皆聘有日本教習學生漢字未識國文未通卽今日肄東文東語成材旣難流弊尤大其華教習由外省聘請者學問優長之士固亦有之然文理平常科學不講者亦在所不免學生人數雖多而簡科師範生程度太低卒業考試時多未及格初等小學原爲幼童而設然招生甚濫頗有年齡過長者雜廁其間決於教育無

補其用款則實業學堂師範學堂月支甚鉅不無浮糜之處
各屬學費間按畝攤派紳士中之假托開通希圖利己者時
有所聞民間至以興學爲口實要之奉省士子二百年來安
於渾樸本省原設鄉試中額三省僅有八名殊鮮利祿勸學
之方更無考據詞章之士就旗籍論則文不如武就漢民論
則讀不如耕本地難於取材初基有類綿蕞故雖以該將軍
學政等興學之勤而相期者恐成相反現在提學使張鶴齡
加以整理自可逐漸改良至各屬有師範學堂師範傳習所
者爲遼陽海城蓋平復州鐵嶺臨江甯遠綏中廣甯義州海
龍西豐西安新民鎮安昌圖懷仁奉化遼源鳳凰寬甸興京
懷德二十三處有半日學堂者爲鐵嶺東平昌圖寬甸四處
遼陽並設有八旗小學堂鐵嶺並設有女學堂昌圖並設有

蒙旗兩等小學堂其餘高等初等兩等小學堂則所在多有至多者海城至三百餘所鐵嶺義州均有三十餘所遼陽有十餘所其餘合計皆未及十所瘠苦之臨江輯安洮南開通則僅止一所本年奏設之法庫錦西等廳亦有稟設學堂者官立者居什之七公立者居什之三私立者者一二而已綜計學生一萬六千餘名此奉天學務之大畧也

一軍政

奉省軍政積弊最深自日俄戰起始改馬步數千人爲游擊隊派赴各路駐防此外尙有收撫添募者數千人和議既定日俄兩軍陸續撤退游匪蠶起各州縣兵力單薄難資勦捕將軍趙爾巽改編各營隊分爲八路共計馬步四十營分紮遼陽海龍新民錦州鐵嶺洮南東邊以及省城附近各屬又

有新安四營因招撫未久尙未歸併現駐彰武鎮安一帶又有本城及錦屬招募馬步兵四百八十名曰巡警備補隊又由北洋調撥步隊一營曰協巡隊又有馬步小隊二哨名目複雜頭緒紛繁器械旣屬參差操法亦未一律統率不一散漫無紀以奉省之大而軍隊之完全者絕少當經派員調查一切兵丁並無營壘民房寺院相率雜居以致無從約束操法以協巡隊馬步小隊巡警備補隊爲最優兵弁精神尙爲振作軍裝房舍亦尙整齊其各站舊營兵丁放哨差遣之時多演習操練之時少至於內務軍紀風紀精神勤務衛生及隊中一切應授之學術並應有之軍械器具一概缺如其器械新由日本德國購買六密里五口徑馬步槍四千枝分發中路六營及協巡備補與馬步小隊礮則僅有五生七格魯

森四尊附於小隊之內其餘各營所用槍械名色不一類多舊式無從辨別其招撫各營以張作霖馮麟閣馬德凱分統之三人皆以受撫來歸聞馮尙有才畧而馬軍亦尙精悍諸軍器械馬匹皆係自備入伍後亦不呈繳軍械但取餉於公家而已現擬新招各軍營哨官缺出由他營員弁拔補兵額缺出積至一營一哨卽另揀新兵充補以分其勢省城設陸軍學堂一所地勢尙屬寬闊於上年九月間招集學生一百五十名授以武備功課嗣以諸生年多逾格本年秋間點派九十餘名送往遷安入軍隊練習以備充當營哨官長之用其餘仍留學堂作爲速成班另招新生七十名按照奏定章程分科教育事同草創尙無造就程度之可言教育分置兩科學生劃分四隊堂內僅存舊式快槍儀器圖書諸多未備

正言卷五
三十一
操場則未設器具齋舍則自備鋪陳每月經費約需一千五六百兩此始基已具尙待擴充者也夫以奉天地方遼闊東南濱海西北與吉林蒙古處處可通風爲盜賊淵藪非有精兵三鎮不足控制又况強鄰逼處論權勢不論是非區區軍隊非防營捕營舊兵卽賊匪投誠斷不足以資鎮懾惟是日兵未撤多方牽制現在將軍趙爾巽借巡警軍爲名卽照陸軍操練暗爲布置必須撤兵以後方能擴充軍政大圖改良此奉天軍政之大畧也

一 實業

奉省商業北以同江開原鐵嶺西北以昌圖洮南東以新堡通化西南以新民錦州營口海城蓋平東南以鳳凰城安東爲薈萃之地其出口貨物除豆餅木材蕩茸絲繭皮張大宗

外並無自置土貨可以抵制洋貨者寬甸岫巖等州縣山多
柞樹藉以養蠶惟出繭而不能織綢且於縲絲之法多未講
究餘如錦州之皮岫巖之石皆極良之材料惜皆不能製造
商人性質不規遠大多便私圖卽間有商會之設毫無實際
庚子以後日本人之來奉省營業者坊店櫛比利析秋毫歐
美商人所不屑爲者彼皆夷然爲之較量錙銖不稍退讓礦
務自前任將軍依克唐阿奏請試辦十餘年來未睹成效卽
如阮毓昌之承辦通懷金礦陳廷森之承辦四道江煤鐵礦
僅向挖礦土人私收稅錢名曰抽分其錦州之大窩溝煤礦
海龍府杉松岡煤礦大台山之西營盤堡煤礦遼陽州之張
家溝煤礦禮王府圍場窩子峪煤礦義州之高力井子煤礦
甯遠州之夾山豬頭山金礦皆先後有商人稟請承辦均經

商部分別准駁行查在案此外官山民地鑛產甚多大抵稟請開鑛之人既鮮成本又無鑛學知識有淺嘗輒阻者有借事撞騙者卽有一二進步或爲官方所阻撓或爲馬賊所劫奪近者鳳凰城寬甸等處時時報有日人強開鑛審之事欲其開闢地利勢猶未能墾務一門以奉省幅員之大渾河太子河東西遼河之所灌溉平原彌望沃野千里最宜農業其已辦者東西流圍荒大凌河牧地盤蛇驛牧地二十二處歸公地錦州官莊地畝牛莊葦塘彰武縣養息牧地鳳凰岫巖安東寬甸四屬葦塘及山荒其蒙荒則已辦者爲鎮國公境界河南扎薩克圖王旗圖什業圖王旗未辦者爲鎮國公界河北郭爾羅斯輔國公旗達爾罕王旗等處及如錦州附近馬廠招人領墾約共四十八萬餘畝劃爲五段其最著者爲

天一墾務公司漸有成效然如東南境通化懷仁輯安臨江各處地盡可耕多未墾闢鄉民數里一家多半不成村落承墾之民半係山東山西直隸等籍春間襁負而來秋間捆載而去無房舍家室故不能久居雖有招墾之方終乏實邊之效推究其故一由賊匪過多農民依山築室荒僻之區稍有儲蓄馬賊得以乘之肆爲劫掠十室九空一由交通不便山無四達之路水無利濟之舟積穀不能出境商品無從輸入不通有無農業何由發達而鴨綠江右岸一帶任令韓民過江墾種實隱留異日之患至辦理墾務之員勤奮勞苦者固不乏人間有假托名氏包領大段抬價分售名爲報領實則轉賣於各員之手指膏腴爲瘠薄以山荒作平川其弊殆不能免航業則首推遼河營口爲遼河之尾閘自營口以上至

同江延長八百餘里舳艫相接同江爲遼河之最北端商業繁庶中間渾河太子河等水皆會遼河入海凡民船載運貨物輸出營口其費頗廉自營口開放以來遼河航業之興遂以日新月異現據調查民船有甯波海船江南沙船天津衛船等類輪船有招商怡和太古三公司內河小舟甚夥惟自田莊台以上水淺不能通巨航偶遇逆風或十餘日不能達且天寒早冰今年河之上流尤爲淤塞運輸不能暢旺坐令天然巨港未盡灌輸之利本年經將軍趙爾巽函達農部以遼河淤淺欲加修濬已先派員測量惟工鉅款多至今尙無頭緒方今日人經營滿洲鐵路尙未覬覦水運若不及早籌辦後將無及至於鹽務奉省西自甯遠東至岫巖沿海二千餘里有灘戶二千餘家皆以曬鹽爲業得鹽多寡全視天時

爲之又皆濱海細民無大資本自俄租旅順大連之後金州半島所有灘戶皆圈入之約中並未提及聽其征稅販賣吉林全食奉鹽黑龍江間有食蒙古鹽者統計遼東之鹽運往奉天內地及吉江兩省遼西之鹽由錦義運往蒙古各部落亦有運至韓境者自康熙三十年停止引課至光緒三年始議抽釐嗣後屢議加增二十三年以後收數漸旺可至三四十萬兩二十五年收至五十萬兩自經將軍趙爾巽嚴加整頓去年收至一百十萬兩今年至九月已收有九十餘萬兩查奉省鹽務與他省不同者由於無垣商岸商及引地之故蓋有商則必有私梟有引地則必有把持今奉省官收灘鹽轉賣商人自少諸弊惟灘場漫延將二千餘里收鹽不易稽查難周物價各處不一道路交通不便灘價不易定用人不

易得此其難也且金州劃入租界遼東半島處處皆可製鹽
日人若從事曬運由海參崴等處輸入則倒灌吉江之足患
現聞已集股十五萬釐立公司兼用新法製造雖由將軍照
會大島男爵立索租界鹽灘之管理權申明約章禁令未知
能否就緒以保利權此奉天實業之大略也

一 奉省重要各地分查情形

奉天境內商埠最繁而爲各國所注意者首推營口查營口
進款以東西兩關稅爲大宗進口貨除洋貨外以布疋五金
木器爲多數出口貨則有豆餅豆子豆油及藥材煙土蕩茸
等項其雜項捐稅如斗捐鋪捐民房捐車捐船板捐之類皆
有定額巡警則由北洋所調約二百餘名自日俄開戰商業
頓衰進口銀貨或爲日人所取或遇水雷沈沒損失甚鉅近

來沿海各口盜賊出沒搶劫民船商民愈困而日人擴張商務洋行林立居留日多現在甫經收還地方政治未及設施釐關各稅亦未結算必須提倡商會重定新章以圖補救惟營口雖爲通商大埠而遼河淤淺每年約須四個月停運封河以後不但商業阻滯卽居民亦多遷徙故疏通遼河尤爲興商之要務此營口之大略情形也其次則如安東鳳凰城大東溝等處皆爲重要之區聞安東鳳凰城大東溝三處各國已預定公共租界而我布置毫無未將商場租界與各國劃定日人戰事後強買之地如七道溝六道溝民地一萬餘畝作爲新市場築堤一道堤內之地約二千八百餘畝居民六千餘人其未給價者尙有四百餘畝屢經商民呈訴查此處係軍用地豈能認爲租界撤兵後應令交還再與各國劃

商租界至安東既已開埠亟應早設海關緣日商以未設海關任意販運不允上稅雖經東邊稅務總局飭令先行記帳俟設關後補稅而駐京日本公使與外務部約定設關以前不得徵稅循此不變不但失款甚鉅且日人貨本既輕利權獨攬華商將愈形困敝是亟宜挽救者也大東溝商務以木植爲大宗而日俄戰時商人所積木植爲日人所強取者價約一百五十萬圓該款至今未給嗣以日人隨時抽用木植漫無限制經稅務總局磋商以今年爲限許抽用四十萬聯現已給至二十五萬聯利源外溢於斯可見其東邊稅務總局設分局四曰沙河曰東溝曰趙掛溝曰長甸河現趙掛溝已分隸沙河長甸河則已裁撤矣鐵路則安東鳳凰城兩處車站日本用地過多亟宜限制其新市場本欲作爲專界又

早整頓商會則由省派員勸辦以原有之公議會爲基礎以東溝爲最發達安東次之鳳凰城則方有萌芽新定統捐章程一曰出產稅一曰銷場稅然日商尙未承認商民亦因之觀望故商會恆有懇請免捐者至東邊一帶防營爲奉天右路統領駐安東其餘分駐無定所巡警則安東大東溝鳳凰城一帶大率市上由商會僱人辦理鄉間則以鄉團輪班巡守市上警員衣服器械尙具鄉間則簡陋太甚學堂則安東設有初級小學堂一所鳳凰城設有官立學堂一所民智未開程度亦低安東學堂經費則有已放荒地三千餘畝鳳凰城學堂經費月僅三百餘兩大東溝則鄉間不願設學堂故尙未設立此安東鳳凰城大東溝之大略情形也其次則遼陽亦爲通商重鎮其地三遭兵燹最爲慘酷日人立有居留

民會車站附近之地任意侵占民間房屋亦有強踞者執商業者三百餘家輸入貨以花旗布土布煤油洋麪爲大宗而輸出品祇有農產數種本地巡警城內設總局一分區五並設巡警學堂一所太子河右岸設屠獸場又設養病院車站亦有巡警駐之鄉鎮巡警分四鄉爲七路各捐稅有斗捐牛馬捐堡防捐車捐等類商業不甚發達緣大亂之後元氣未復民間無大資本且爲日商所扼也現在該處最急者爲市面銀根空虛由於錢鋪向來多出虛帖積至數千百萬串之多地方官一年之中更至六任於整頓錢法禁用虛帖寬嚴不一倏行倏止以致本年十月間錢市鋪面驟然關閉多家官督商辦之公立銀行現已暫停掣動商界全局拖欠公私款項爲數甚鉅且有虧欠外人者該處爲日商注意經營之

地必須及早由官設法維持方免爲外人攫取利權把持商市鑛產則本溪湖一帶產煤最富惜無議及開採者前者馬賊肆劫商民苦之近派員勦平匪亂地方稍得安靜此遼陽之大略情形也其次如鐵嶺如同江如法庫門均爲中日新約訂明白開商埠之地查鐵嶺爲奉天商業中樞商務殷繁貨物雲集且西有遼河輸運極便出產以黃豆高粱藍靛爲大宗大麥小麥雜糧次之義州奉化等處之農產物品大抵聚集於此每至冬令大車運貨至營口者絡繹不絕然自日俄戰後販運過多而銷路日滯市面不無減色現計城內鋪戶大小共三百四十餘家而雜貨估衣等鋪實居三分之一商埠地段現擬在該縣西門外勘設計東西長二里許南北寬一里許現在已有日本工商三百餘戶約共一千四百餘

人城關內外日人強占民房共七八百間不給租價莫如之
何城內設有巡警總局一四鄉設分局三共有馬巡四十名
步巡一百二十名經費就地籌撥每月可得四千三百餘圓
惟辦理不盡得宜殊乏成效學堂則規模粗具就奉省論可
稱翹楚計設有師範傳習所中學堂高等小學堂第二兩等
小學堂民立第一初等小學堂半日學堂女子初等小學堂
共七處共有學生八百三十餘人除女學堂係由紳董捐資
辦理外其餘六處每年經費約需東錢二十餘萬串皆出諸
車捐糧用及煙膏捐三項近聞此款爲奉省財政局所提常
年經費頗有難乎爲繼之勢至同江亦因地瀕遼河水運利
便從前吉黑兩省及南北糧貨輸出輸入皆以此地爲總匯
中日新約訂明自開商埠現在地點尙未勘定該處本蒙旗

地方東北距昌圖府七十里西南距鐵嶺縣九十里自遼源
州以下經通江至營口計水程一千餘里五六月間舳艫相
望糧船最多故該處商務向稱繁盛共有商鋪一百七十四
家出口貨豆爲大宗雜糧次之進口貨洋布爲大宗洋線等
次之進口貨多寡輒視出口糧船爲比例緣客商運糧出口
則販貨而歸其營業以糧棧爲最大棧主皆山西巨富向有
二十二家今多歇業僅餘九家昔年積糧多至百餘萬石近
則不過十餘萬石彫敝情形已可概見推原其故蓋由東清
鐵道暢行哈爾濱大連灣未設稅關吉黑兩省進出口貨多
由大車轉輸成本較輕莫不就彼去此加以遼河淤淺航業
日衰而該處糧棧各商因期糧賠累與營口廣幫商家涉訟
經年案懸未結彼此客商均有裹足不前之勢遂致商家大

受影響現該處設有同江河捕同知一員專管河防捕務間有受該處訟牘事件致與昌圖府互相爭執所有警察由府委員辦理共有巡弁巡長巡目等十餘人巡士四十人每月由該處商會認捐二百圓爲經費此外有實業工場一所係由官辦招有技師兩人先從織染兩科入手近始開辦法庫門乃邊牆十一門之一地當蒙古衝要爲科爾沁札賚特杜爾伯特郭爾羅斯四部十旗之貢道街市南北廣三里東西袤六里市廛尙繁日本設有副領事署商埠地段擬在南街外勘設計南北廣六里許東西袤三里許地勢平坦並無民舍亦無外人預備之事南通新民山海關及營口北達遼源州伯都訥及齊齊哈爾爲陸運之直線道冬日大車絡繹途爲之塞惟近年鄭家屯新設遼源州治商務半爲所奪又值

日俄戰事上年三月日本駐兵三萬餘名今年正月撤軍政署六月兵始盡退商力彫敝元氣未復現在商務不及從前之半由蒙古進邊貨物牛羊馬疋皮毛煙靛雜糧等爲大宗由新民奉天出邊貨物食鹽洋廣雜貨布棉等爲大宗而本地土產輸出山海關營口者以黃豆豆餅葷蒜油芝蔴小麥高粱爲大宗現已設立商務分會並由會中商董集資設立商務半日學堂一所學生六十人此外有第一第二學堂警務學堂師範傳習所女學堂等四鄉設有蒙小學堂共十五所巡警則設總局一分局四共有馬巡二十名巡兵一百四十名四鄉巡警設分局六馬巡一百名步巡一百名衣帽槍械均尙整齊人亦精壯該處設有牛馬稅局及稅捐分局各一所每年可得稅釐十二三萬圓亦足徵該地商貨繁盛之

概此鐵嶺同江法庫門之大略情形也其次則新民亦爲新開商埠之地日人自乙巳駐兵於此以扼遼西咽喉其國人商鋪頗多又收車捐軍政未撤以前凡我客貨之由遼西至奉天者日兵尙須逐車查驗現日築輕便鐵路以通省城每日收票價一二千圓不等該處直走法庫遼源爲北達蒙部孔道東北達黑龍江捷道糧貨貿易最盛無城郭府街綿互十里巡警近千人學堂商會辦理均有可觀全境戶口自分設遼中縣後仍有二十萬之數斗秤捐上年七月至今年六月收至二十餘萬牛馬稅收數亦旺商埠地段業經勘定民殷土沃商貨輻輳洵爲全遼中權要害此新民之大略情形也

附查旅順大連灣情形

查旅順爲天然形勝水陸交通夙稱軍用要港而大連灣又爲之犄角商貨輻輳地便屯積日人自據旅大以來竭力經營現方修補港口沿岸各礮臺就俄人舊所規畫者逐漸擴充其於大連則又續造倉庫多處窺其用意若遇戰事將以旅順爲海軍根據地而以大連爲後路接濟材料食物之根據地平時則以大連爲招商存貨之碼頭戰守互用用心至爲深密且於旅大兩處均已設立民政署街市逐段分區亦標注番町字樣並由日本派來巡警以管理地方視其布置周密實有久假不歸之意至一切經營之費用修礮臺築碼頭均自行籌款而關於行政種種之費用皆取給於中國之居民有房屋捐潑水捐土地捐糞捐諸名目商民約有萬餘人鋪戶約二百餘家餘均小販苦工旣遭虐待更累重征兵

夔餘生何以自保不特此也日人積慮深沈規畫久遠卽其
旅大不收關稅一事其牽涉我關內外一帶之商務者尤爲
重大蓋營口捐稅極重奉天又將設統捐華商避重就輕必
由奉達遼直輸旅大而奉新營口以及關內外鐵路一帶商
務必因之日蹙雖此項鐵路行駛甚遲載貨亦少然大連旣
不設關又爲經年不凍之海口商民無知勢必羣趨於此卽
我之秦王島尙恐未足與敵據此以觀將來吉林迤西之商
務必趨重於大連則我於收回奉新鐵路以後必當酌減商
捐以相抵制此又商務之盈絀亟宜預籌者也

退耕堂政書卷五

退耕堂政書卷六目錄

奏議六

附考查吉林省情形單

附考查黑龍江省情形單

退耕堂政書卷六

天津徐世昌

奏議六

附考查吉林省情形單

一 交涉

吉林境內鐵路所經地方自阿什河車站起至俄國烏蘇里
交界止沿綫需用地畝總計五萬五千晌由將軍派道員杜
學瀛宋小濂與俄員在哈爾濱議定節略於本年九月十四
日簽押將來如何勻分尙無成議此俄人鐵路占地之大略
也本省森林於光緒三十年由前將軍富順與俄鐵路公司
商訂將甯古塔中間鐵路附近由烏吉密至橫道河子長二
百八十四華里廣七十華里又由磨刀口至穆稜河長九十

八華里廣七十華里凡此區域內木植均歸該公司護養砍伐照章繳費擬有護養山林草約十五條未經外交部覆准現此案與江省護養山林之案一併在哈爾濱重行提議日來甫經開議未知能否爭回此森林交涉之大略也本省鑛務則三姓所屬黑貝地方金鑛前經俄人開採糜用盧布二十萬旋因無效而罷又吉林所屬夾皮溝金鑛於光緒二十七年由將軍長順與俄外交部訂有草約允俄公司開採並發與執照旋經我外務部指駁而俄人又因戰事遷延未辦已逾執照所定期限俄使向外務部要求展限未准現駐吉俄員屢與將軍達桂理論尙未解決此鑛務交涉之大略也吉林省城至長春府鐵路於光緒二十八年由將軍長順奏請歸中國自辦經外務部議准並由戶部籌銀八十萬兩以

備開辦旋因俄人堅請復有改歸東清鐵路公司修造之奏日俄戰後迄未議及去年八月將軍達桂仍奏請自辦並請由北洋派員勘修而遷延至今復有緩辦之說蓋緣日本有與中國合辦之議外務部於此事正在磋商若果容日人干涉將來江省擬修哈爾濱至黑龍江省幹枝等路俄人亦將效尤滿洲全部之交通權將盡落外人之手而三省大局益不可問矣此吉長鐵路交涉之大略也中日條約指開商埠在吉省者有吉林長春甯古塔三姓琿春哈爾濱六處現長春已預備地段在城外西北隅頭道溝地方寬八百餘丈長一千二百餘丈吉林省城指定地段在城外東北隅錢家屯一帶地方哈爾濱則擬在松花江南阿什河西之王永昌屯地方以上三處均履勘繪圖擬有章程此外甯古塔三姓琿

春三處地段則尙未籌議此吉林預備開埠之大略也

一吏治

吉林地闊民聚富庶過於黑龍江遠甚從前司牧之官惟省城及西北一隅設有三廳光緒初年以來經前將軍銘安希元先後奏改官制增設吉林道暨府廳州縣各缺迨二十八年以後前將軍長順現任將軍達桂以轄境遼濶控治艱難又先後奏請增設濱江道暨府廳州縣各缺並奏明分別繁簡詳定廉俸修築城垣建置衙署酌定學額增設弁兵等事業經議准施行析疆置吏漸近周密然查本省幅幘東西徑距二千四百餘里南北徑距一千五百餘里東南至西北斜長二千餘里西南至東北斜長三千九百餘里以現制郡縣較之則三姓之東北甯古塔之東琿春之東南一帶地方建

置尙形疏闊除南境近接韓界外餘均與俄屬東海濱省處
處毗連較諸內地形勢尤爲重要設官分治良不容緩然增
置郡縣固爲當務之急而任非其人雖遍地設治仍鮮實效
就現在吉省吏治觀之一切新政初無成效可言而門丁書
差姦欺朦混之弊所在多有本年六月間雖經將軍達桂奏
請裁撤原設之課吏局行營發審局改爲法政館裁判所並
經籌擬辦法以爲整飭吏治之地而按其實際收效甚微卽
如裁判一節各地方往往有以戶田細故之爭延宕數年迄
未完結者臣等蒞吉未逾數日商民具呈投訴之案竟有百
數十起之多平日地方官之玩視民事概可想見此外省城
各局所率多粉飾敷衍有名無實而承辦各員侵吞中飽不
以爲異徵諸輿論驗諸案卷可議之處甚多積弊相承匪伊

朝夕三省之中吉林吏治之壞實爲最難收拾此吉林吏治之大略也

一 民情

吉林土壤沃衍天產富饒實東北最良之殖民地道光咸豐以來本省旗兵四出征勦土著無幾乃漸就京師八旗移丁屯墾圍荒稍闢燕齊豫晉之民或業商販或事耕鑿來者日眾以故滿漢雜居蕃殖遠出黑龍江之上旗人田地不升科客民來吉屯墾者率皆投入旗員名下充當佃戶歲納地租旗員生計較奉黑爲富厚卽兵丁亦不甚窘比年以來三省迭遭兵燹而吉林受禍最淺元氣未傷日俄之役俄人市牛馬草豆者惟吉林是資價皆倍昔民間頗有因之獲利者近來糧價騰貴較諸從前增至四五倍以上力田之家生計

轉裕惟俗嗜鴉片三姓琿春間地植鬻粟者十居三四又自俄人通商以來外品輸入奢風漸起前此勤儉之習爲之一變而學問智識亦無進步森林鑛產之利爲滿洲全部之冠若設法經營富力將未可量惟官吏旣不暇注意而民間亦絕無講求實業從事開發者坐令莫大利源委諸外人掌握事之可痛惜者莫此爲甚重以民俗刁健好訟嗜賭睚眦小怨告訐不休或飾辭誣控意存拖累而博徒旣眾流弊滋多勝則恣情揮霍不務生業負則始竊終奪流爲匪類故吉民生計雖較黑奉爲優而見識之低劣與德性之淪墮亦有過之無不及此吉林民情之大略也

一 警務

吉林警務自光緒三十一年撥捕盜隊千人名爲巡警隸屬

營務處總辦之下是爲創辦之始三十二年五月乃立總局分崗位設巡查九月復更新組織改易名目現計省城有總局一處分局八處巡兵六百四十名分隸八局又有消防隊六十名工程隊一百名其職員則總局有總辦幫辦提調副提調總巡官總稽查各一員每科有正副科員各一員檢事二員書記二員每分局有巡官巡弁各一員檢事書記各二員巡長副巡長巡目各四員其所謂檢事者原爲司事本年九月間改組之時襲用日本名詞易爲今名其實仍卽司事之類與日本檢事職掌絕異巡警經費月需九千餘金然無專款可恃需用時輒申請將軍指撥然後關領巡兵月餉六兩而實發僅四兩有奇巡官率係營伍或貼寫出身不諳警務巡兵識字者不及十分之一往往有私攜槍械制服逃亡

行劫者長官亦無如之何巡警學堂久有創辦之議前由北洋調來巡警畢業學生分任區官提調及教習然教習抵吉已三月學堂尙未開辦止受脩金而不授課此外工程消防各隊均有名無實工程隊每日工作名爲修築馬路實則揭去原鋪木板稍平地之凹凸敷以沙土而已消防隊無救火器械每遇火警輒徒手呼號甚或乘間行劫情形腐敗實出意料之外其餘各屬警務益無可言此吉林巡警之大略也

一 財政

吉省歲入之款從前報部止四十餘萬兩以充本省俸餉雜支尙不足二十餘萬兩自前將軍銘安設法整頓雖增至五十餘萬兩而光緒二十八年將軍長順奏設馬步四十營每年驟添練餉一百二十萬兩除部撥四十萬兩外餘悉歸

本省自籌乃創立籌餉捐收入漸增統計各種歲入租賦則有地丁地丁耗羨地租旗地升科等項約三十八萬八千餘兩捐稅則有七釐四釐九釐等捐煙酒木植牛馬等稅又有鹽捐煙燈捐車捐煤捐缸窰捐土產捐魚網捐洋藥捐洋藥稅蕩稅斗稅契稅三姓護江關稅票課當課等項約二百十二萬一千餘兩合計約二百五十一萬餘兩歲出以練餉爲大宗自去年以來所有部撥四十萬兩業經停止則此項已年需一百二十萬兩此外官兵俸餉及雜支等項約需六十餘萬兩民官廉俸各局征收費亦需數十萬兩大率以地丁地租額征煙酒稅木植稅牛馬稅土產稅七釐捐額徵燒鍋票課抵充俸餉以九釐捐七釐捐盈餘地租中五萬餘兩抵充練餉以斗捐專供民官廉俸及役食勇糧以四釐捐抵充

鑄錢以洋土藥捐稅及當課專供解部校其出入僅足相抵按諸實際則中飽尙多蓋吉林財政積弊已久各種稅租之經征或歸各地方官或歸餉捐局或歸吉林道或歸煙酒木稅局或歸依蘭府或歸山海稅局或歸新城府或歸洋藥捐輸局或歸蕩稅局或歸戶司局所繁雜全省無一綜核之機關重以經征員司蔑視定章自由聚斂種種弊竇隨之而生卽以煙酒稅一項而論本年正月將軍達桂奏准倣照直隸加抽菸酒稅章凡燒鍋售酒一斤加征制錢十六文合市錢三十二文除每年應納票課係充餉的款仍循舊制外其餘酒稅之繁概行蠲除乃該局總理佐領豐年以收稅僅按售酒斤數尙易取巧改由得酒數目論斤加征市錢三十二文其運赴各處向酒店販賣者由各該酒店仍遵舊章納稅燒

鍋自行設櫃賣酒者亦一律納稅食戶及各酒店有赴燒鍋買酒者亦一律納稅一斤之酒輾轉重征校以原奏稅則多至數倍循是推之其中侵吞隱匿之弊蓋有莫可究詰者風聞該佐領事事把持聲名甚劣人言藉藉實非無因此外各地方官每年報解牛馬木植額征稅項爲數甚微而其盈餘往往數十倍乃至百倍於額征囊括席捲盡以入己商民重困而庫入未嘗加增此其積弊雖不獨吉林一省爲然而以臣等聞見所及者言之則吉林實爲其尤最矣此吉林歲入歲出之大略情形也又查吉林國法之壞已達極點制錢匱乏垂數十年市間通用之錢狀類小環文字漫漶不復可辨商民苦之羣議認抽四釐捐爲鑄錢之費始設寶吉鑄錢局從事鼓鑄而虧折甚巨不久旋停此外有製造銀圓局每日

所鑄爲數無多且成色太低民間不能信用加以現銀缺乏而生銀之價貴於銀圓故旋鑄旋燬流行益稀實貨既缺外國紙幣乘間而入俄人盧布票到處流通地方官見俄帖盛行乃設永衡官帖局發行紙幣以相抵制而該局既無實在資本又任意濫發漫無限制大小官帖皆註明二成付錢而官帖小至一吊爲止一吊之帖亦復二成付錢則其餘八百文更無他帖可換商民受累情形略可推見加以官帖原版曾換四次前兩次之版聞已散失而後兩次之版均留存上海僞帖充斥誠不足怪似此辦理不待識者而知其非持久之策矣此吉林財政之大略也

一 學務

吉林庶富向視奉天黑龍江爲優興學宜易惟僻處東陲士

安僿陋求一能教授蒙小學生者已不易得其優者僅能依文訓義期無謬誤而已世家仕族子弟放馳已久畏受約束橫生浮議以故興舉一切殊未易言近年設立學務處置總辦提調等員總理全省學務然省城學堂已經開辦者僅關廂小學堂五所及蒙學堂七所其師範學堂雖早經奏辦而數月以來建造學舍延聘教習招募生徒荏苒至今尙未開學現查該學堂工程於今年秋季始行告竣大成殿講堂齋舍自修室儀器標本室食堂浴室規模粗具職員除監督外有總教習一員科學教習八員齋務監學勸學各一員文案司事各若干員堂內又附設師範傳習所學監養成所高等小學堂尋常小學堂初等實業學堂各一所每月額支經費銀二千七百餘兩其師範學生及實業學生擬由各府廳州

縣咨送小學生則取之各屬小學堂現在僅收師範生一百六十二名祇習體操尙未上課無由考其成績惟查學生程度略可分爲數等最上者能作明白曉暢文字凡十四五人最下者或不能解字義若一律以六個月卒業決其必無成效其小學堂蒙學堂十餘所均於去年開辦計東關西關南關北關中關小學堂各一所每所附設一蒙學堂又白山昌邑屯蒙學堂各一所皆有校長教員司書人等總計每月額支經費中錢七千三百餘串凡小學生一百十七人蒙學生四百零二人小學生免膳費寄宿與否聽便蒙學生不留膳不寄宿學堂功課名曰按照奏定章程實則因陋就簡略如內地義塾小學生已滿兩學期者稍能領略粗淺文義並能爲柔輒體操此外更無成績可言要之教員缺乏故草荆之

際合格甚難學生國文程度太低故教授之間程功不易學
事幼稚職由於此近師範學堂總教習頗知注重國文變通
教法用心甚善而本地紳士乃以本省學務差使畀諸奏調
人員爲嫌又以學堂約束較嚴師範生膳費較薄心滋不悅
輒謂外省人員把持學務羣相訾毀此雖無足重輕之言然
學界阻礙之多略可推見以上爲官立學校情形其民立者
據學務處表冊有蒙學堂七百三十餘所學生九千七百餘
人此外府廳州縣學堂官立者則長春府伊通州臨江州榆
樹縣各有師範傳習所一五常廳有中學堂二小學堂一雙
城廳有中學堂一高等初等小學堂各二綏芬廳有高等小
學堂及小學堂各一蒙學堂五伊通州有高等小學堂二初
等小學堂初等實業學堂各一臨江州榆樹縣各有小學堂

四蒙學堂八農安縣有小學堂蒙學堂各一磐石縣有高等初等小學堂各一蒙學堂二長壽縣有高等初等小學堂各一又小學堂一陶賴昭有蒙學堂三其民立者則長春府有蒙學堂三百六十六新城府三十賓州廳六十三綏芬廳四十延吉廳二十二伊通州八十五農安縣七十八磐石縣六長壽縣五十九各府廳州縣學生總計三千一百餘人其已經設立未經冊報者不與焉此吉林學務之大略也

一軍政

吉林軍制大別有三一制兵卽旗營二常備軍卽新練陸軍三捕盜隊卽原有練軍旗營額兵一萬二千有奇咸豐軍興應調出征傷亡頗衆嗣後休養生息漸復舊觀庚子之役靖邊軍受禍最烈雖非制兵然實由八旗子弟挑練而成吉林

馬隊最強現則兵額具存而不歸營不教操不能規復行圍舊制等於虛設其俸餉額支銀四十二萬五千兩有奇每年分兩次給領發八成實銀領錢者每兩按市錢以三千三百折給此外又有隨缺地或自行食租或支領租銀其丁口則省城最多凡十三萬二千一百八十有奇甯古塔三姓均在二萬以上琿春拉林均在一萬以上伯都訥阿勒楚喀雙城五常四邊門次之共二十四萬六百零其地畝共六十八萬一千零四十一晌零九畝水師營舊存船隻已廢兵額尙存三百餘名此制兵之情形也常備軍本年二月將軍達桂由通省內外各城領催前鋒披甲內挑選編練步隊一協於六月初一成軍駐紮省城東關外巴虎屯地方並設督練公所協統以下皆由旗員遴選而辦理未盡合法如兵丁年齒有

在三十歲以上者身格尙合惟多半吸食鴉片煙開辦以後逃亡甚多營隊排長未建營房便宜分住兵丁則僅習步法尙未能托槍能柔輦體操者僅五十人打靶擊劍等器具均未全備服裝亦未齊全新操場距營太遠往還會操虛擲時刻其最不合者則以協領充標統佐領充管帶隊長排長司務長皆以防禦驍騎校充之均非素習陸軍人員惟以官階對品遴配近雖稍稍更易然尙多年老頹唐不識字者每標之中僅恃教練官二三人勉強湊合查協標營隊各官長實目兵所奉爲標準敬畏命令甚於教習百倍所管官而不解訓練教育各法欲兵之精利必不可得此該省陸軍最大疵累亟須設法整理者也其稍有可取者則目兵質性誠敏易受教育每營營舍皆正方形全協依次叙列成一直綫各營

門內均能彼此通行所挑模範隊正副目識字而靈敏者共一百二十名每日操練二次內堂功課一次以備分任教育行之日久當可轉移全軍風氣其器械則全協共有六密里五口徑快槍五百枝薪餉皆照新軍章程隊官以上發八成排長十成目兵皆遲一月發給易啟賒墊之累查該省外接俄韓脅輔奉吉東夏全局此爲中權旗籍丁口素蕃兵隊自昔稱雄天下當此時艱日亟尤非精練陸軍無以固根本而資保障乃所練僅止一協兵力本嫌單弱加以一切辦法又未能處處合宜而官員兵丁囿於風氣多以改新操爲非入陸軍爲苦於振興武備慎固封疆之意尤爲乖戾此常備軍之情形也捕盜隊係就舊有練軍改編現計馬隊十七營步隊二十三營馬隊每營二百人步隊每營四百人共官弁兵

夫一萬五千四百餘員名歲需餉銀一百二十萬兩分爲十軍曰吉強駐延吉廳一帶曰吉勝駐燒鍋店缸窰其合木穆什河一帶曰吉興駐五常廳山河屯一帶曰吉安駐蜂蜜山長壽縣等處曰吉甯駐甯古塔琿春等處曰吉新駐伯都訥長春等處曰精銳左翼駐長春磐石等處曰精銳右翼駐敦化大新立屯等處此外尙有三姓一軍阿拉楚喀一軍均分駐本城及附近地方其槍械約有四十餘種極爲參差而營哨亦不畫一操法以駐省吉強右營之兵爲少勝而辦法不善亦有數端如招募馬隊必須自備槍馬故充者多係本地富豪藉當兵之名欺陵鄉里額數常有空缺發餉則皆用官帖每兩折錢三千三百文除扣平及領餉川資外實得二千九百文而衣裝包巾靴鞋火食均在其內頗苦不敷各營紀

律不整吸煙者十居六七間有出外騷擾聚眾鬪毆及馬賊投誠復有逃亡者該營亦聽其去留不甚追究查捕盜隊本爲保衛地方緝捕盜賊之用今積弊至此無怪乎地方不靖姦宄橫行也其外城各州縣有另行招募之馬步隊由商籌餉專爲保護市面或營或哨各處不同數目亦不一律此捕盜營之情形也至陸軍小學堂係本年正月奏設正額備補學生共一百二十名滿漢並取入學甫及一月附設將弁學堂由八旗世職官員內挑選一百員入堂肄習備陸軍官長之用房舍寬敞服裝整齊惟開辦未久操法生疏每年經費至七萬兩之多而教員僅具普通程度恐於教授將弁不宜此亦當遴擇整頓者也其要塞則琿春東南距俄境海參崴二百里西南近接韓界僅隔一圖們江三姓北接俄之伯利

南由松花江水路可通伯都訥之三公口自三公口陸路由
廓爾羅斯蒙界不千里可達奉天法庫門此二處爲全省扼
要之區前於三姓東之巴彥通地方琿春西南之外郎屯地
方均築礮台扼守庚子之役悉爲俄燬竟無完備守禦此吉
林軍政之大略也

一 實業

吉省田野墾闢物產豐饒雖製造工業尙未發達而天產物
品如豆類高粱蔴靛煙葉雜糧人蔘藥材等項均爲生貨大
宗豆油豆餅燒酒牛馬毛皮出產尤富故商務號爲發達商
業重要之地首推長春次則省垣長春綰轂南北商貨出入
實爲轉運門戶凡吉省土產輸出奉天營口山海關等處皆
薈萃於此而營口輸入品亦至此分運各地有過載行數十

家資本各數萬計闐闐殷闐貿易頗鉅省垣則踞水陸要區東至甯古塔北至伯都訥阿勒楚喀西達長春南瀕松花江春夏輪舶通行水運利便錢鋪典當行棧雜貨等爲四大行市厘櫛比商賈雲集他如哈爾濱阿什河均爲商貨輻輳之區然尙不如該兩處之繁盛現吉林長春哈爾濱甯古塔琿春三姓均係自開商埠地方將來各該處商務興旺更可預計惟商人智識尙淺情意渙散省垣近始設立商會僅舉總協理並未能照章切實辦理殊無成效可言此吉省商務之大略也鑛產五金皆備而金鑛爲最多俱在松花江南岸如磐石縣界內栗子溝金鑛黑石鎮銅鐵鉛鑛夾皮溝金鑛古董河納爾轟沿江兩岸砂金鑛吉林界柳樹川琿春界天寶山銀鑛附近頭二道溝金鑛圖們江鐵砂鑛琿春附近瓦岡

寨柳樹河砂金鑛甯古塔附近五虎嶺冷水泉小綏芬萬鹿
溝蜂蜜山砂金鑛三姓界黑貝老淺毛太平溝樺皮溝石門
子楸皮溝金鑛或已勘未開或開而無效加以私挖充斥官
辦則偷漏堪虞商辦則劫奪爲患故一時難望起色間有俄
人領照躋勘試辦者惟三姓一帶金鑛光緒二十一年經前
北洋大臣王文韶奏准開辦招集華股十萬兩設立公司派
道員宋春鰲經理頗著成效嗣因拳亂虧折暫停本年八月
間盛宣懷函達商部擬重集資本續辦派員赴吉履勘當經
商部轉咨吉林將軍在案又柳樹川銀鑛上年經前署將軍
富順派員辦理設有華豐鑛務公司天寶山銀鑛前已開辦
有年庚子後鑛務委員程光第與美商訂立合同稟准試採
嗣因美商迄未接手上年經富順飭將美商合同繳銷派員

查勘現在均未開辦本年三月間吉省奏設鑛政調察局派候補道王昌熾總辦局務將來能否清釐鑛產妥籌辦法尙難預計此吉省礦務之大略也各屬墾務自咸豐同治年間招墾迄光緒初年歷次所放各荒約一百萬晌此外已無大段荒地近年前將軍長順奏將通省旗民田地清丈升科兼放零星夾荒原爲籌餉起見省城設立荒務總局東西南北四路各委二員專辦吉林府屬清丈升科放荒事宜伯都訥雙城五常伊通賓州拉林延吉等處暨退搏拉法兩站均設分局其三姓甯古塔則歸副都統衙門辦理查吉省各屬額征原地統共一百一十萬二千六百餘晌現已清丈者祇五十六萬一千五百餘晌僅居其半計已共得浮多田地十一萬九千四百餘晌旗地升科者計共得五十六萬九千九百

餘晌其兼放零星夾荒計共得熟荒四千七百一十餘晌生荒三萬一千五百餘晌共收荒價二十五萬一千一百餘串惟舉報各荒多係田格溝畔壟角等隙地本爲旗民各戶原有業產或爲各鄉屯留廟會義塚公共畜牧之場錯雜畸零易滋轉轉遂致侵欺包套爭訟紛煩而承辦清丈各員暨鄉約練長因緣爲姦上下其手知多報少指熟爲生甚至數戶爭領一地局員輒視納賄多寡爲予奪不得賄雖繳價而仍乾沒之侵蝕弊混莫可究詰利歸中飽害貽良懦迭經控告有案苛擾已極而蜂蜜山及濛江原有大段荒地雖經設局開墾並未招徠農氓設法保護竟至匪賊肆擾至今領墾者寥寥此外澳利溝驛馬口青溝嶺老嶺岡等處南北延袤一二千里不等與三姓屬境大通臨江各州縣接壤膏腴彌望

均未勘辦此吉省墾務之大略也林業則東三省著名窩集四十有八吉林實占三分之二其面積之廣長白山一帶約五千方里小白山次之完達山又次之木植種類松柏榆柞檉櫟最多凡產木區域及運輸地方如吉林三姓阿勒楚喀甯古塔五常廳等處大抵藉松花江水運或由三姓拉林等河入江分輸伯都訥哈爾濱齊齊哈爾其琿春等處則南由圖們江輸出光緒二十三年曾經奏設木植公司專爲徵稅起見統計省城每年木稅徵額凡吉林三姓綏芬五常賓州雙城等處僅有四千九百四十餘兩收稅章程省城係照售價值百抽十各分局則視木料大小計算而俄人鐵路公司砍伐木植則止納樹價票費不收木稅省城四合川哈爾濱三姓均設有收票費處雖與俄人訂有砍木章程適成具文

我既不能經營保護坐令利源外溢殊可痛惜此吉林林業之大略也航業漁業則均與松花江關繫最鉅該江上游甚淺巨舶不能通行及至省城乃闊至二百丈能行小輪與載重數百石之船再向西北伯都訥哈爾濱暨三姓下江一帶則輪船巨舶暢行無阻下達黑龍江上溯齊齊哈爾川流交錯商貨賴以轉輸惟輪船皆係俄人營業且冬令凍沍於航業發達良多阻礙該江魚類甚繁當三四月解凍時羣聚而來充塞水際其中白魚最爲著名鱒魚大者長至七八尺及一丈以上鯉魚重或四五十斤鮭魚爲土人食品要需其皮可製衣鞋等物惟捕魚皆沿用舊法類係建柵兩岸沿澤之中水至魚入乃編柳爲簣以塞其口俟水涸捕之水量每一增減輒可得魚數萬將來果能講求捕魚醃法必可爲輸出

土貨之大宗此又吉省航業漁業之大略也

一吉省重要各地分查情形

吉省水陸要衝而爲最大之商埠者莫如哈爾濱俄人路線所經由齊齊哈爾過松花江達哈爾濱至阿拉楚喀遂於此處爲鐵路總站庚子以後俄人自劃界後強占擴充東西計十八華里南北計十三華里該埠地勢約分三段北段由江岸至秦家崗循正陽河莊有華俄商場兩處三省交涉局皆在商場之內租界之外曰傅家甸爲華商聚集之所凡巡警局釐捐稅務各局皆在焉中段由馬家溝河西迄賀家溝東迄新家店一帶凡俄國銀行官署各局無不備具南段則地皆平原商民稀少該處荒地初由工程總局預設街道分割地段陸續租賣不數年間竟成巨鎮故地價日漲昔之五六

百圓者今已至萬圓有奇此商埠之大略也鐵路據全埠之中心點初時轉運靈便貨物麇集自戰事既停長春以南之路屬於日人故加收南路之價以抵制之又將海參崴變爲免稅口岸以招徠東貨將來開爲商埠更可擴充利權此鐵路之大略也華商富戶多買地於秦家崗以糧店爲最大其餘廛室櫛比市肆殷闐租界內外共約華人八九萬人有商業公所以維持之凡在租界內營業者俄皆按年納捐其櫃台票分三等捐貨捐人極其煩重而租界外之傅家甸又設籌餉局有來貨捐賣貨捐煙捐木捐酒捐諸名目層層剝削視爲故常而俄人之下流社會凶犯逋逃及三省之馬賊悉聚於此往往界外馬賊勾通俄匪到處搶劫盜案纍纍中國官吏固不加意緝捕卽俄人亦多賄縱故居居民相戒夜無行

人此商務民情之大略也若交涉雖三省均設局於此而奉天局員早已調回江省局員與本埠俄人交涉甚少惟吉省所辦交涉以盜案爲多其餘若鐵路鑛務森林地畝率以因循遷就爲事且自總辦以下無一深通俄文者事事假手舌人恐非善計此又交涉之大略也若長春府爲鐵路之要衝商貨填溢皆由京津上海營口及奉錦廣甯各屬販運而至除行銷本地外兼轉運伯都訥哈爾濱及黑龍江呼蘭綏化兩府省城百貨皆仰給於此惟該處亦將開爲商埠官吏毫無預備且指空賣空弊端尤大巨商大賈以行市之漲落定賠賺之多寡斯真商界之蠹官長不申嚴禁反納規費此亟應改革者也捕盜營止募二百五十名餉由鋪商籌給惟缺額扣餉積習甚深盜案時聞扶同諱飾長勝營於今年五月

間撥兵百名命爲巡警月餉亦由鋪商籌給名目雖改敷衍猶昔表面內容皆無足取此軍務警務之大略也所最甚者今年改書院爲高等學堂開辦未久復易名師範中學堂忽以修改校舍爲詞將學生遣散而考其經費每晌地捐抽錢十文計該屬約四十餘萬晌經費可謂極充乃旋辦旋停借興學之名爲聚斂之計尤堪痛恨此長春府之大略情形也

附考查黑龍江省情形單

一 交涉

黑龍江西北東三面均與俄僅隔一江江左一帶俄人極意經營沿邊數千里屯堡相望星羅棋布駸駸有越畔之思呼倫貝爾西北邊已有俄人越界墾地聚居村屯三百餘戶愛琿左近俄人占地十二萬晌經將軍程德全詰問始允歸還

而松花江左岸六十四屯寬二百餘里長百餘里於庚子以前卽爲俄人占據將來能否索還正無把握又東清鐵路公司沿線按站購占土地大站數千畝小站數百畝自哈爾濱至滿洲里經交涉委員周冕與俄員訂立合同共賣出十九萬七千六百餘晌將軍程德全堅持不認會議六次僅得減至十二萬六千晌而地數如何勻分尙無成議此俄人侵占疆土之大略也江省內外興安嶺森林與長白山森林相較有過之無不及自咸豐八年中俄條約成立後外興安嶺已歸俄屬及光緒二十四年東清鐵路公司合同成立後而內興安嶺自呼倫貝爾至呼蘭所屬松花江岸千餘里間之森林亦准該公司自行採伐江省森林之利已坐失大半乃光緒三十年交涉委員周冕與俄員霍爾窪特訂立鐵路公

司伐木合同第一條甲項所指地段尙係沿路一線之地乙丙等項所指水路地段範圍已甚廣漠而第二條又稱江省所屬別處樹林地方該公司亦可砍伐木材則不啻舉全省森林委於俄人之手又且藉護養森林爲名而令華人伐木者均須向該公司領照權利損失至此已不留餘地現雖由將軍程德全派員磋商而成效如何殊不可必此江省森林交涉之大略也江省山川雄厚五金鑛產所在多有自庚子亂後漠河奇乾河觀音山都魯河等處均爲俄人占據都魯河觀音山經程德全先後收回漠河奇乾河亦據道勝銀行函允退交其漠河一處現由程德全電商北洋大臣派員接收此外呼倫貝爾達賚諾爾附近又有俄人開掘煤鑛亦係交涉委員周冕私允之件而俄人開鑛並不遵照合同納稅

此江省鑛務交涉之大略也庚子亂後俄人限制江省兵額全省只准有兵二千三百餘人其槍枝必有俄照始准帶用近來屢與商議漸可通融然終以俄兵未撤之故不能任我增兵運械此又江省兵事交涉之大略也按照中日條約江省應開商埠者有齊齊哈爾海拉爾愛琿滿洲里四處近外務部已與俄使商定將以上各處卽行開放現在齊齊哈爾商埠地段已擇定在南門外船套子地方東西約四五里南北約八九里其餘他處尙未指有地段此又江省豫備開埠之大略也

一吏治

江省屏障奉吉控馭蒙藩幅幘本極遼闊從前一切政務無論兵刑錢穀均歸旗署辦理原設民官僅有呼蘭綏化兩廳

近來荒蕪漸闢戶口日繁光緒三十年以後始經陸續於省城興東等處奏設道府同通州縣正佐各缺除黑龍江呼倫貝爾墨爾根三城尙未添設民官副都統以下均仍舊制外其齊齊哈爾呼蘭通肯布特哈副都統四缺業經奏明裁撤並經奏定設治專章十八條凡新設各署除去科房門簽名目改立承辦處遴選委員辦理庶務各該地方民刑案件除各旗繼嗣析產等事仍由協佐等官辦理外餘悉由各該府廳州縣審斷旗員不復干涉蒙旗地方亦歸新設各廳兼理所有民刑案件除未放荒段各處照舊辦理外其已放荒段地方凡在廳治界內者均由各廳辦理不准蒙員攙越惟事屬草創百端待理江省人材消乏所設各缺僅就本省現有暨投効各員或鄰省候補各員內遴選試署加以物力艱窘

一切應辦事宜均不能放手施行近將軍程德全倣照各省課吏館仕學館辦法就將軍衙門內設一法政肄習所所有本省候補投効人員不論旗籍民籍有差無差一律報名入所分科肄習業經奏明在案現在報名者聞有四十人左右尙未開辦有無成效誠難豫期此江省吏治之大略也

一民情

江省民風質樸而旗丁習於游惰其生計專恃各省協餉年額三十七萬有奇故彼等除補一甲兵晉一領催藉謀衣食之外更無他項營業耕織工作素不講求林鑛漁鹽益無顧問咸豐以前各省協餉由戶部關領初無拖欠情事厥後改由戶部指撥解至盛京再由盛京戶部發放而各省欠解協餉之額逐年加增計自咸豐迄今共欠四百餘萬兩積欠既

多放散不得不減領全餉者歲不過十餘金領半餉者歲不過數金該管各官又從而侵蝕之旗丁生計之窘至此已極而游惰之習猶牢不可破凡勞力事業均不肯爲間有從事牧獵耕作刈草熬城等事者爲數亦甚寥寥至由內地移來之民人則以直隸山東人爲多皆習勞耐苦從事耕種而放荒之地又復土厚脈腴終歲所得比諸內地往往事半功倍間有勤力耕作而致富者特自俄人修築鐵路以來募集各處窮民來充工役應募者甚多迨工事旣竣此項工人歸無川資留無衣食流離困苦之餘投入馬賊者往往有之比年馬賊之多未始不由於此此江省民情之大略也

一 警務

黑龍江自光緒三十年九月間改練軍爲巡警軍是爲有巡

警之始三十一年十一月始將省城原有之街道廳改爲巡警總局設總理會辦提調等員開局任事由巡警軍中挑選二百人爲警兵撥巡警軍一營之餉爲經費諸事因陋就簡尙無足觀計省城有總局一分區四除辦事各員不計外外有巡官巡弁巡長各五人巡目巡兵共二百人月需二千二百餘兩巡警識字者不過五分之一於警察要義全未通曉操法亦未講求現設巡警學堂一所卽附設總局之內定三箇月畢業有教習二人學員二十人學兵四十人規模狹小教法亦劣其課本於警察意義有誤解者此外習藝所一處有罪犯十五人僅習打繩織帶兩項屋宇係監獄舊式常年經費尙無的款省城以外各屬巡警尤爲簡陋不過就舊有鄉團畧加淘汰易爲巡警名目而已現計呼蘭綏化兩府海

倫大賚兩廳蘭西餘慶拜泉青岡四縣於去年十二月以後次第開辦其名目或分城廂巡警四鄉巡警或僅設城廂巡警額數多寡不等大率三百人以上五百人以下其經費或由鋪商公攤或由紳董籌辦或由農民抽捐均無定制此江省警政之大略也

一 財政

江省每年歲入除地租外有各項捐稅地租有大租有小租每地一晌年征大租六百文總計約二十萬兩小租當大租十分之一捐稅種類甚多有一成捐木稅山貨稅燈捐膏捐車捐鹽捐魚稅城稅田房稅煙釐斗秤課斗秤土捐及他項雜稅總計歲得七十五萬餘兩其歲出之款大租則盡數抵充官兵俸餉小租則以三成歸各府署辦公餘七成報解省

庫作爲各司處辦公之需各項捐稅則以一成捐充巡防軍
餉以木稅等充文案處薪水及勘查鑛務經費以車捐等充
繪圖處閱報處法政肄業所經費以田房稅正項充地方捕
盜營經費雜項充善後局及承辦人員辦公經費以煙釐等
捐正項充官兵俸餉雜項開支局員薪水等費以他項雜稅
充地方繁簡各缺津貼及各署承辦處民壯局經征局卡員
司薪水辦公運費等項就中官兵俸餉實爲歲出大宗約計
歲需四十萬兩從前賴有各省協濟以資發放近來各省協
餉積欠至四百餘萬兩迭經奏催每年解到三四萬六七萬
不等現在此項歲需除以大租二十萬兩煙釐等項約五萬
餘兩盡數抵充外其不足之額更無他項的款可恃今年雖
由荒價項下借銀十三萬兩抵充然終非經久可恃之款此

江省歲入歲出之大略情形也荒價一項係近年新增之入
 款據墾局出入表所列自開辦以來總計收入四百五十七
 萬餘兩除開支局費移送善後局分給扎賚特旗郭爾羅斯
 後旗杜爾伯特旗各蒙王外現淨存一百五十餘萬兩聞擬
 留爲辦理各項新政之用此江省荒價出入之大略也至江
 省貨幣則制錢缺乏銅圓亦罕見現銀無多銀圓間有來自
 吉林者市間以帖代錢以條代銀盧布票到處通行俗稱羌
 帖將軍程德全有鑒於此創設廣信公司仿照官銀號辦法
 疏通市面官發銀二十萬爲之倡由各商集成股本三十萬
 股東姓名注册不得轉賣外人又設分行於呼蘭巴彥綏化
 三處旋更推廣至奉吉繁盛之區所有條帖均由該公司印
 發自設該公司後商民頗樂與交易道勝銀行因之受損然

成本不過五十萬而所發紙幣已有一千四五百萬串之多似此任意濫發漫無限制流弊將不可勝言此又江省貨幣銀行之大略也

一學務

江省八旗子弟向以騎射爲惟一之學業年未弱冠卽令在官署充貼寫人謀補披甲其畧通文義能讀論語孟子者便爲成學之士此外移民來自直隸山東山西等省者大率從事貿易苦力亦無暇讀書故江省二百餘年以來向無所謂文學教育自俄羅斯人逐漸侵入交涉繁多光緒二十八年始奏設俄文學堂一所爲養成譯員之地名曰興育學堂是爲江省有學堂之始然此不過外國語學校而已至三十一年六月始於將軍衙門文案處內附設學務處以爲勸辦普

通教育之計草訂章程設法豫備至是年十二月學務處遂與文案處分立初設官立小學堂一所本年四月間改爲高等小學堂並於堂內附設一初級師範簡易科擴充校舍募集生徒增聘教員購置書籍規模粗具有監督一員教習五員其生徒則師範科六十人率係呼蘭巴彥綏化等處民人子弟間有吉林湖南山西地方客民本城土著竟無一人小學堂學生六十二人本城人居多核其成績均尙可觀近學務處又擬編撰本省鄉土誌鄉土歷史鄉土博物志充小學教科之用索觀所定目次甚爲詳備此外官立初等小學凡十所學生或二十人或三十人程度不一分班太多科目亦不完全各設學董一員教習一員率以本地或近省土人充之因陋就簡畧如內地義塾其興育學堂專爲養成譯材而

設科目除俄文外有國文圖書算術體操大率每日以半日之力專習俄文教以俄語初階俄文法程歷史輿圖公法條約等項有俄教習一員華教習三員學生二十人又有同文學社一所專習日本語言文字有社長兼教習一員學生三十人以上均係官立學堂其公立者有初等小學一所稱客籍學堂學生十人均係本省游宦人員子弟私立者有初等小學十四所統稱某家私塾實卽中等以上人家之家塾學生最多者三十名最少者七名科目除讀經習字外間課算術體操或間及歷史地理物理圖畫等項大率以一教習兼任之此省城學務之大略也至各屬學務則以綏化府較爲發達呼蘭府次之計綏化有官立高等小學一所初等小學二所半日學堂一所公立蒙學堂十四所私立蒙學堂三所

又有各鄉區蒙學堂若干所呼蘭有官立初等小學四所大
賚廳有官立初等小學二所公立一所海倫廳有官立初等
小學一所蘭西縣有官立兩等小學一所巴彥州木蘭縣合
辦初等小學一所此外餘慶縣有蒙學堂六所青岡縣有蒙
學堂十四所拜泉縣有初等小學一所墨爾根城有初等小
學堂蒙學堂各一所但據本省學務處表冊得其概要不能
知其程度之若何矣此江省各屬學務之大略也

一軍政

江省軍政大別有二一制兵卽旗營二防營制兵有滿洲有
漢軍有蒙古其來自內地編入軍籍者有水師營有屯丁有
站丁均受制於將軍副都統總管等官其官制一如京旗其
兵丁皆拔自本營閑散未披甲人等二百餘年來先後奉調

出征者四十餘次精銳略盡上氣漸燿陵夷至於今日雖有制兵一萬三千餘人而散漫竄惰無械無餉無教育訓練有兵之名無兵之實與近日所謂陸軍全不相涉至防營則有現在已成之軍隊有現在擴充之軍備其已成軍者卽巡防營原有鎮邊新練各軍庚子之變全行潰散經前將軍薩保收合餘燼得三千七百餘人改爲制軍其後章程屢更裁留不一至光緒三十年九月將軍達桂將通省制軍統改巡警八成馬步隊十營分中左右三軍駐紮各城三十一年三月將軍程德全以各處墾荒需兵彈壓添募馬步兩營分駐各荒段本年三月程德全又以受撫馬賊編成馬隊一營隸於中軍名副中營今統名爲巡防營全軍官長自統領至哨長一百五十五員兵夫自什長至伙夫四千七百八十八名共

四千九百四十三名月需餉二萬八千一百十二兩歲需餉三十三萬七千三百四十四兩各營槍械多半舊式種類繁雜一營之中多至十四五種間有新式槍械則營隊得之馬賊馬賊又得之俄人者也兵丁良莠不齊素無訓練不知軍紀爲何物各營出外勦匪經過地方不能無騷擾情事而賊輒得信先遁人謂軍中有與賊通者預縱之使去此積弊之最堪痛恨者也其現在擴充者有馬隊六百名新募巡防營二百名馬隊由各地制兵挑選計巴彥州二百名綏化呼蘭各一百名其餘二百名留作省城衛隊以備勦捕附近馬賊之用新募巡防營由省城制兵挑選擬爲將來改練常備軍之基礎總計本省軍政兵非不多餉非不費以制兵言則歲養一萬三千餘人以防營言亦歲養四千餘人而究其實際

曾不收一兵之用名實違異至此爲已極矣此江省軍政之
之大略也

一實業

江省地僻民稀商業從未發達就全省而論呼蘭綏化兩府
地處江省南境與吉林接壤且密邇哈爾濱並沿松花江岸
道路四通轉輸便捷東荒新墾各地客民麇集凡豆麥雜糧
牛羊馬匹輾轉運售愛琿海拉爾卜魁等處頗能獲利故商
務較爲繁盛次則省城亦爲薈萃之區該處商業以票莊洋
貨店錢店當商爲大宗其次則皮張鐵器綢緞藥材磁器等
鋪多係直隸山東山西人營業洋貨一項多由哈爾濱一帶
運來統計俄國貨物居多雜貨綢緞等則來自天津營口奉
天惟運到後除銷售本境外他處無可轉運行銷故商務難

期進步近日各商業雖經遵章設立商會然程度極低尙難
遽責成效此江省商務之大略也至於鑛務查江省山脈縱
橫鑛產素饒近年新辦各鑛務如金牛山懷驩洞馬鞍山朝
陽山四處煤鑛及吉拉林金鑛或派員經理或招商試辦均
經咨報有案此外漠河觀音山兩處金鑛前被俄人借躡苗
爲名私行占據現觀音山一處業經收回漠河一處已允交
還正由將軍程德全會商北洋大臣派員接收其都魯河發
畢拉河舊有金鑛庚子亂後多被俄人私採現已先後派員
前往勘辦設法先占地步上年商部奏請通飭各省清釐鑛
產當經程德全遴派委員前往北洋考求煤鑛辦法並擬按
照商部原奏情形派員周歷各處勘查各項鑛產預備將來
籌辦地步惟尙未舉行現聞俄人到處繪圖躡勘意存覬覦

殊爲可慮而產金各地復多金匪滋擾保護殊難周密均於
鑛政極有關礙此江省鑛務之大略也墾務則江省幅幘遼
闊原野平衍歷年奏准辦理開墾荒蕪漸闢從前省城設有
蒙荒省局並招墾總局嗣經前署將軍達桂等奏請將蒙荒
招墾兩局歸併一處名曰墾務總局專辦通省墾荒事宜並
於放墾各地設立行局如通肯巴拜扎賚特郭爾羅斯後旗
及該旗沿江杜爾伯特旗地及該旗沿江訥漠爾河甘井子
大磧子白楊木河墨爾根計十二處專辦各該處荒務他如
省城附郭荒地係歸墾務總局兼辦依克明安公荒地係歸
巴拜行局與拜泉縣合辦郭爾羅斯後旗城甸餘荒係歸該
處巡防局辦理郭爾羅斯鐵路兩旁荒地係歸鐵路交涉總
局兼辦湯旺河荒地係歸湯源縣辦理興東一帶荒地係歸

興東道籌辦以上各荒或開辦有年尙未完竣或甫經奏准正在規畫現今已盡放墾者僅郭爾羅斯後旗鐵路西南荒地暨扎賚特荒地兩處統計江省共放荒地三百萬畝收押租銀四百五十餘萬兩就江省疆域而論不過占十分之二三此外如布特哈呼倫貝爾墨爾根愛琿等處或尙未籌及或方始著手可墾荒地尙多而沿邊等處俄人越界私墾者正復不少尤宜設法清理至各處招徠墾戶類皆觀望不前推原其故實由馬賊充斥稍有蓄積往往慘遭劫掠所有農產物品以大麥小麥蕎麥藍靛煙草等爲大宗馬鈴薯羊草出產甚多足供畜牧所用農具肥料大抵陳陳相因一切農學新法尙難言及此江省墾務之大略也此外如林業如漁業如鹽業均爲振興實業之要務江省興安嶺一帶森林蔚

正書卷之二
三三
鬱富甲全省而愛理墨爾根布特哈湯旺河各處窩集彌望
所在皆是從前僅收採伐捐稅毫無經營自東清鐵路暢行
坐令外人採伐莫大利源半歸彼族殊堪痛惜至呼倫貝爾
河泡產魚極饒珠爾畢特暨巴產察罕等泡出鹽尤旺該處
居民迷信最深謂魚爲神物捕食懸爲厲禁且人多游牧風
氣樸陋更不知謀他項利益上年雖經將軍程德全派員查
勘屬實奏明由善後局借墊銀一萬兩並向江省廣信公司
息借市錢十萬串將魚鹽木植三項設局試辦揆其用意係
爲徵收稅項起見一切整頓提倡之法尙未易言此又江省
林業漁業鹽業之大略也

一江省重要各地分查情形

江省西北新約通商之地有二一爲呼倫貝爾一爲滿洲里

呼倫貝爾卽海拉爾在齊齊哈爾西北八百四十里民居有本城及西南二屯副都統自庚子之亂遷入南屯近始收回本城建公署於西門外其官制有街道廳以理旗漢人民訟訟有五總管分理索倫等旗務鎮守兵丁現有二百人居民合滿蒙漢有三千餘人商民二千餘人以山西人爲多無眷戶其財政有收稅局收蒙民木柴牲畜稅項每年約一萬數千串其土產有牛馬羊蘑菇之屬灰鼠貂皮極少其與俄人交涉者一曰鐵路俄人於去歲展開界地深挖濠溝副都統新署亦爲圈入再三磋商始行劃還有鐵路交涉分局華人

有出境入俄界者須由交涉局給照俄外部官簽字否則中途勒還並剝奪衣物攫取資斧車站市街頗闊大周圍七八里兵房警署教堂病院銀行機器局接棟連甍高入雲表停

車場房屋亦多一日實業呼倫湖土名北海貝爾湖土名南海產魚豐美俄人持鐵叉在鄂爾順河刺取不移時卽滿筐滿車遇土人給以銀錢一二枚卽不復阻止或恃強不理土人亦無如之何兩湖長百餘里貝爾湖之水由鄂爾順河匯入呼倫湖興辦漁業當以此河爲中權又呼倫貝爾城西南三百六十里有珠爾畢特湖向產食鹽俄人屢請給照製辦副都統未允呼倫貝爾自興安嶺以西山林稠密木植繁盛俄人任意砍伐沿鐵道者刊削罄盡前數年火車行駛俱燃木柴各車站房屋木料及日用炊薪全取於此至今仍深入各地斬伐由官給照亦未劃定地址限定株數一日商務全境俱用俄國盧布鈔票每一盧布之鈔票謂之一吊江省廣信公司之鈔幣以路遠無分局兌換商民不用俄人購該城

牛一頭平均約需銀五十兩土人深德俄人謂能買我牲畜且增價也一日墾地俄於額爾古訥河旁呼倫貝爾境內闢地二千餘晌聚居百餘戶種鈴麥以飼畜鐵路工人種蔬者亦納價於俄人而向鐵路公司道旁領地闢爲蔬圃以土人不許漢人種地故也該城內外有俄兵四百餘名此呼倫貝爾之大略也滿洲里爲俄人入江省首站在呼倫貝爾西北三百五十里其與俄人交涉者以商貨鑛產爲兩大端出口貨以茶爲大宗計每月汽車往西比里亞九次每次有貨車十輛每輛實茶二萬斤以外次則絲綢由山東人背負出境餘則日本磁器及牛馬羊之屬中國向未收稅無確數俄人已於前年設立稅關重徵華人之運貨出入彼境者我亦亟宜籌備抵制之法其鑛產則距滿洲里第二站扎賚訥爾煤

正言外
三
鑛之產額最豐地在車站之西南八里光緒二十八年爲鐵路公司所占每一日夜所出之煤約能裝車一百五十輛每年可出六十七萬五千噸可值二百七十萬圓鑛師密里耳稱可供北滿洲鐵路二百年所需地租稅項均未征收此應商明合辦者也該處俄人有一萬餘人兵有五百餘人設駐防統領鐵路巡警統領等官中俄兩國匪民出沒其地殺人之事無日無之江省所設交涉局僅有護勇八名不能防衛俄人警察力亦單薄似宜改設門道辦理交涉稅務另創警察以保治安車站之大興呼倫貝爾同中國商人在車站市街內租地構屋每一方沙仁縱橫六尺年納盧布一枚地租外又須房租開設店肆又須納費於俄官請領執照每一雜貨商店合計年須向俄人繳費七百數十盧布至該兩處情

形土人深惡漢人之來尺椽寸畝不稍假借而與俄人則貪其重貲懾其勢力幾有同化之勢此事之可慮者土人以游牧爲生自幼穉卽習牧豕牧羊之業無書塾無學堂識見之固陋風氣之頑野甲於各城尤非亟籌開通不可此分查江省要地之大略也

退耕堂政書卷六

退耕堂政書卷七目錄

奏議七

續陳分查甯古塔伯都訥蜂蜜山等處要地情形摺 附單

密陳通籌東三省全局摺

請 飭東三省將軍勤恤民隱片

請 飭奉天將軍澈查盤蛇驛等處墾務委員舞弊虐民片

路工經費分別報銷摺

京城戶籍查竣請卽詳查丁口摺

官醫院漸著成效設法推廣並將就醫人數繕單具陳摺

請 飭各省查報鄉社情形以重治本摺

釐定民政部及內外城巡警總分廳權限章程摺 附單

釐定內外城郊巡警總分廳區職掌員缺章程摺 附單

一ノ三ノ一

一

退耕堂政書卷七

天津徐世昌

奏議七

續陳分查甯古塔伯都訥蜂蜜山等處要地情形摺

附單

奏爲續陳分查甯古塔伯都訥蜂蜜山等處要地情形繕單具奏
恭摺仰祈

聖鑒事竊臣等前於奏陳考查東三省情形摺內聲明甯古塔等
處俟委員彙呈報告到日再行具奏在案茲該委員等業經查竣
回京將詳細情形呈報前來查甯古塔爲

發祥重地全吉中權自成豐年間議定界約之後內屏奉吉外接
強鄰形勢尤爲扼要伯都訥控馭蒙部路通三省實東夏之關鍵
水陸之襟喉近歲時局變遷該兩城皆爲俄兵來往屯駐之地蹂

躡至深元氣未復現雖軍隊漸撤而商埠又將次第議開自須詳察情形以資規畫而重根本至甯古塔附近之蜂蜜山地當中外之衝近年墾務創興外人窺伺關繫於吉東者日形重要現據該員等遵飭查報詳細情形理合一併繕單恭呈

御覽以副

朝廷眷顧東陲之至意所有續陳分查甯古塔等處詳細情形各緣由謹繕摺具陳伏乞

皇太后

皇上聖鑒

附分查甯古塔伯都訥蜂蜜山等處情形單

一甯古塔爲中日新約自開商埠之一西南至吉林八百里南至琿春五百五十里北至三姓六百二十五里東南至三岔

口卽綏芬廳五百四十里東北至蜂蜜山六百四十里爲吉林全省中權要害城方二里有半旗戶居民三萬餘人商賈繁盛 國初原設將軍駐此康熙二十五年始移吉林近年時勢變遷庚子之亂俄兵入境占據城垣蹂躪甚苦及日俄戰事起該城駐紮俄兵常在二千左右軍隊過境愈行橫暴統計先後被俄兵侵占衙署官房一百二十一間拆毀九十九間侵占旗民房屋三百三十四間焚燒者三千六百五十一間板棚一百三十五間迫令鋪商供給柴草木料及刀傷人民搶劫財物之案層疊迭出塗炭最甚現駐紮俄隊迭次撤退在該城之兵尙有三百人侵占房屋亦陸續交還與民間尙屬相安該城東境之松阿察河與凱瑚布圖河均與俄境東海濱省毗連附近之蜂蜜山三岔口均距俄人鐵路

至近與凱湖之西俄有地名紅土崖東面臨湖西南北三面
依山俄已設兵駐守極力經營其鐵路則自賓州界入甯古
塔西北境而東行經城北者爲哈爾濱至海參崴之幹路循
塔城東境松阿察河依烏雅蘇江而北者爲自海參崴至俄
伯力之支路而俄站之驛馬河雙城子皆爲俄宿兵防守之
處均時有交涉之事至地方情形該城左右翼十二旗有戶
七千六百七十有奇男婦人口三萬七百有奇生計困苦財
政有歸副都統徵收者如民戶熟地錢糧山海稅地藥捐土
藥稅四款係儘徵儘解燒鍋包納票錢及一筒燒鍋包納課
銀二款係抵充本地兵餉有歸綏芬廳徵收者如陳民地丁
錢糧新地大租田房稅當課稅各款亦係儘徵儘解木植牲
畜稅等款除解部一千八百兩外餘作辦公經費有歸餉捐

局徵收者如九釐捐七四釐捐等款除局支外就近撥充吉甯軍餉統計三十一年歲入銀一萬九千一百六十餘兩錢十萬零五千八百三十餘串軍政則駐防官兵總共一千四百九十四員名其撥充吉甯軍者計領催前鋒披甲共有六百三十五名實在營者僅敷各署輪班供差之用俸餉每年赴省共領四萬七千九百餘兩雖無欠缺不能餬口贍家一則由隨缺地雖有二萬三千一百四十四晌均非實有其地惟每年由省每晌折領銀一錢八分並不能有得地之實一則由旗民向無積蓄不能納價包領大段荒地認墾以厚其生一則由該處森林均距城數十里以外無車驟者不能獲樵蘇之利此旗兵生計之苦也捕盜營則有吉甯軍係三十年正月以原有練軍改名分中前左右四營中營爲馬隊餘

皆步隊隸一統領受本城副都統節制中營馬隊四哨與左營步隊八十名駐城內作爲巡警城外分駐遠近共二十五處零星雜處操法生疏右營撥駐琿春受琿春副都統節制營制餉章悉按吉省捕盜營編定兵丁除由塔城旗營挑撥外以本地及直隸山東漢民編募爲多其槍械共一千一百二十九桿種類參差子彈過少不如賊匪之精利每次斃匪一名始准報銷五粒以故剿匪棘手現俄人於東海濱屯駐重兵一因伯力與三姓相近一因海參崴與琿春相近甯古塔則北距三姓南距琿春道里適均爲兩城後路運輸接濟之地實中央聯絡之重鎮進足控扼海西退足捍衛吉林亟應豫籌防範厚集兵力塔城東南之三岔口四面皆山與俄接界居民一千三百餘戶由俄入塔境者必取道於此應於

三岔口屯駐重兵而於塔城東北六十里另駐兵隊爲三岔口之後應兼顧蜂蜜山之接濟此該城軍防應行措畫者也學務則該城地處邊隅風氣閉塞前由副都統會同綏芬廳在城內設立學務處就原有義學設小學堂一所學生十名尋常小學堂一所學生十五名蒙小學堂二所學生共五十三名經費則以原來發商生息之銀三千四百兩錢五千六百串撥充房舍則就舊有之義學稍事修改略備器具教員則仍用義塾之師課以認字誦讀嗣由北洋師範學堂調畢業生二員充當教習聚集各小學堂教員並招考十餘人設師範學堂一所授以師範學科經理無人諸多廢弛署綏芬廳同知方世立視爲具文並不加意提倡毫無進步日卽窳敗調來各生成有去志該城之學務如此總之該城爲吉林

重鎮向未設有文職大員一切吏治學務皆待經理於距城數百里之綏芬廳是以荒廢特甚此甯古塔之大略情形也一伯都訥城在松花江右岸城方六里有半距江岸半里許地處平原風沙瀰漫東西南北道路皆通計西北沿嫩江上流通齊齊哈爾東北沿松花江下流通哈爾濱呼蘭沿松花江上流直達吉林正東通阿拉楚喀西南經農安長春而達奉天又西南由蒙古草地經鄭家屯至法庫門由東南至郭爾羅斯前旗由北至郭爾羅斯後旗以上均係陸路地勢平坦無崎嶇險峻之虞惟蒙古各路土曠人稀行旅亦少其由伯都訥至長春一路因出入貨物皆取道於此故往來商賈絡繹不絕又該城爲松花嫩江兩大川會流之地松花江發源長白山經吉林至伯都訥與嫩江合流於距城西北七十里

之三岔口再向東北至哈爾濱經三姓達黑河口入黑龍江嫩江發源伊勒呼里山經墨爾根至齊齊哈爾亦下至三岔口與松花江合流該處江面最寬不過四里狹者僅里半江水至深不過一丈淺者僅五六尺夏秋江水盛漲小輪馳駛無礙江中各種船隻不一至大者喫水五尺載重二十四萬斤江流舒緩下水一點鐘約行十五里此該處地勢河流航路之大略也城中旗營白副都統以下共計官兵一千二百二十員名現在撥充吉新軍領催前鋒披甲共計一百零六名挑入吉林省城常備軍領催前鋒披甲共計四百八十名每年俸餉實發銀二萬七千二百三十五兩有奇按春秋兩季核放其官兵隨缺地咸豐十年奏准城東珠爾山地方荒地凡一萬九千七百九十二晌招佃墾種每年按晌收大小

租錢五百五十文冬季由副都統派員前往徵收年底散放官兵承領又光緒十九年奏准蘊黎場北界荒地一段南北長二十里東西寬四十三里其中已經墾熟者凡一萬七千四百八十餘晌作爲旗民產業又旗民原有納租磽薄沙熟地一萬四千四百餘晌查該城旗民現有一千八百三十七戶男女凡九千六百八十六名口除在營食俸餉者約一千二百餘人外其丁口不過八千餘人所有隨缺地旗荒不下五萬餘晌果能全由旗民自種不招佃民則生計何至拮据無如人僅仰食微薄之租稅狃於閒逸恥事田畝閒居坐廢是誠可惜至捕盜營名爲吉新軍係光緒三十年就該城原有練軍之頭起馬隊二起步隊暨吉勝新軍前營左營所改分中前左右四營左營係步隊餘均馬隊隸一統領駐紮伯

都訥一帶歸副都統節制營制餉章悉按全省捕盜營之制
 餉糈均按三千三百文發給其間約有兩哨係從前收撫之
 馬賊分置各隊尙受約束該軍駐紮本城者惟中營馬隊四
 哨左營步隊一哨共計官兵三百八十員名其餘官兵六百
 七十餘員名則分紮各處要隘計分防共十七處兵多者八
 十名少者二十名專司梭巡地面緝捕匪類軍械均係舊式
 有槍八十三桿凡十八種頗爲參差且向乏訓練故操法生
 疏紀律不張吉林通省捕盜營大略相同固不獨此一軍爲
 然也該城人口共計約三萬餘人庚子及日俄戰事該城受
 害較輕現在俄兵留駐者尙有二百八十餘名占民房五十
 九間皆納租價其前所侵占者均已交還城內駐副都統一
 員新城府知府一員管理旗民事宜所有捐稅係分由副都

統新城府餉捐局三處徵收如山海雜稅土藥捐土藥稅係由副都統辦理大租地丁錢糧額征菸酒木植牲畜雜稅田房稅等由新城府辦理九釐七四釐等捐鹽捐車捐燈捐菸酒稅係由餉捐局辦理每年總計收捐稅銀八萬三千五百有奇錢十七萬七千六百餘串他如學務向未議及自設新城府後試署知府陳作彥始籌創辦惟地瘠民貧款項無著嗣由鄉民爭訟理曲者准其報効學堂經費現已集有中錢五千串乃立師範傳習所一學生二十四人高等小學堂一學生三十人方始開學僅有教員一人經費不敷諸多竭蹶巡警亦由知府勸諭開辦每月由商家籌中錢一千五百串設巡弁巡長巡記各一員巡目六名巡勇五十名共計六十三員名以巡檢提調一切初次創辦弁兵多不識字諸未諳

習現僅試合站崗一切草創規模未具初無成效可言此伯都訥之大略情形也

一 蜂蜜山在甯古塔東北地與俄境接連土壤肥饒其地界東起撓力河入烏蘇里江口以至松阿察河入江處與俄劃江爲境西由甯古塔屬之下城子越哈達嶺至七星碓子沿松阿察河迤南至興凱湖東有亦字界牌越湖西有喀字界牌再偏南有拉字界牌至角頂子均連俄境由此沿黃窩集山至下城子與甯古塔爲境北由撓力河至烏蘇里江口處與三姓爲境東西斜長約七百里南北寬百里或三五百里不等該處距省一千四百餘里中互穆稜河東入烏蘇里江江對岸爲驛馬河卽俄人鐵道大站河以南原屬甯古塔河以北原屬三姓自招墾設局一切事宜悉由招墾總局稟承將

軍主之現蜂蜜山全境係招墾局勘定其山則峯巒接青
溝嶺在西形勢險要北倚大小奎頂諸山南峙蜂蜜山而七
虎林嶺阿爾哈諸山環抱於北其川則有穆稜河受全境諸
枝流之水自曲水柳河合流以下岸平水深船隻皆可通行
此外如撓力河長五百餘里七虎林河佈親河在穆稜撓力
兩河之間與撓力河均入松花江興凱湖之屬我國境者只
偏北一隅約二百里湖水東流入松阿察河滌洄六百餘里
以達烏蘇里江俄人常以小火輪懋遷於該湖西岸之俄鎮
紅土崖等處湖水甘美清深實產黃鱗俄人業漁者眾其道
路通俄境者以鐵路言之西則由穆稜站土名久安鎮赴東
清鐵路東則由驛馬河上烏蘇里鐵路可達海參崴以陸路
言之則由快別當地方以赴俄之紅土崖雙城子等處以水

路言之則由龍王廟地方附小火輪亦可至紅土崖雙城子及溯松阿察河入烏蘇里江以達各處其實業則林木以松樹爲最多山多近河伐運亦易木耳蘑菇產於山內蕩著產青溝嶺以南穀屬以麥豆爲大宗皮貨則豹貂狐獺皆持至海參崴雙城子銷售亦有赴甯古塔者礦產則穆稜河北七十里之涼水泉子產河金山內黃泥河開有金苗又黃泥河北滴道山有煤礦均未開辦其民戶則從前皆私墾零星散處由穆稜河東九十里之八面通至青溝嶺石頭河曲水柳河大小柞木台子三索通爐上下地營東南至龍王廟約七百餘里約有三四百戶其在鳳綿鎮者係朝鮮墾戶約四十餘家此現納價升科凡三千五百餘晌之居民也其餘不過各處流氓挖蕩著事漁獵之輩來去無定又無官以撫治之

等於化外自招墾設局領戶日眾計由光緒三十年至本年
六月止丈放穆稜河南生荒七萬餘晌河北生荒六萬餘晌
九月後又放生荒二萬餘晌多係直隸山東奉天吉林之民
領多者一二萬晌少者十晌百晌不等所添新戶甚多又有
哈爾濱商人稟准自行集股十萬兩名曰農工商公司在山
內黃泥河附近領荒數千晌以爲開設貨鋪兼營耕種之地
惟馬賊甚熾本年有緝墾務委員周正孚等傷吉甯軍統領
祥貴兩起重案其餘緝荒戶劫行旅之案層見迭出新總理
墾局委員有添兵之請實則以兵衛之尤須有官治之乃可
使盜風漸戢民治漸安查該處地面可設一府三縣一經設
官自有土地人民之責非招墾局之徒事羈縻者可同年而
語計該處墾務議辦於二十五年停於二十六年拳匪之亂

復興於二十八年。前將軍長順於是年奏派知府吳瞻菁設局於穆稜河。二十九年秋於龍王廟設農旺鎮分局。俄人抗阻將吳瞻菁押入海參崴。俄禁旋經釋回。三十一年春改設農旺鎮分局於鳳縉鎮。勘定城基二處。鎮基二十七處。迨秋間日俄和議告成。火車通順。四方領戶漸集。此所以有大放。河南北生熟荒十三萬七千餘晌之數。每晌合計收正價二串公費七百文。共收荒價中錢二十七萬餘串。總分局支銷頗鉅。二十九年招募綏邊軍一營。迨通省更定營制以綏邊營歸併吉安軍前營。只存三哨。現以左哨分駐下城子。亮子河。八面通三處。右哨後哨分駐穆稜河。蜂蜜山。久安鎮三處。共馬勇十五名。步勇一百八十名。兵力殊嫌單薄。民勇則有山內東中西三溝一百五十名。就墾事論該處固非添兵四

五營不足以資勦捕而保墾戶就兵防論則須多駐礮兵步兵於境內之快別當一帶而以枝兵分駐穆稜北口距驛馬河北四十里之處乃可抵制俄境紅土崖雙城子兵隊之勢則又非有重兵不可此該處必須駐兵之情形也又條陳該處墾務者有謂宜專移旗民有謂宜合招旗漢然以該處荒地二百萬畝計之似專移旗民恐永無開放完竣之日且俄人當日分界時本有強認至穆稜河割我蜂蜜山全境之議至今俄國墾種人民猶多逾界而至若一任荒棄必遂鄰國窺伺之謀固不如急設民官合招旗漢使土地早闢一日則邊備早實一日如以旗僕當示矜恤不妨多給招墾資遣之費以示優異猶勝於限定旗屯致令終荒之爲愈此蜂蜜山之大概情形也

密陳通籌東三省全局摺

奏爲遵議東三省切實辦法謹通籌全局瀝抒管見恭摺密陳仰
祈

聖鑒事竊臣載振臣世昌於上月二十二日將考查東三省詳細
情形繕單具奏仰蒙迭次

召見

訓諭周詳洞見癥結並令臣等將切實辦法次第上陳朝廷眷顧
根本之懷與慨念艱危之意至誠惻怛溢於言表凡有血氣無不
感動臣等承

命以來欽悚無已徬徨數日忘寢與餐深懼無以仰副

聖意惟念東三省事勢至急

朝廷焦慮於東三省者至深臣等又親奉

德音令籌補救若復拘牽忌諱知而不言或撫拾細故言而不盡
上負

聖明垂詢之意下負三省責望之心均非臣等之所敢出也伏念
東三省之安危存亡非僅一隅之安危存亡而已中國前途之興
替實以此爲樞紐向者列強虎視垂涎我土地之廣大沃饒而莫
敢先發自甲午一役我之實力暴露於天下俄人乃以其陰鷲之
術乘間要挾不費一兵不折一矢而收三省於掌握之中及日俄
戰定形勢一變北界隱屬之俄南界隱屬之日勢力所及範圍略
定歐美列強亦已明認默許不復視爲我有於此而欲謀挽回之
策實已左支右絀絕無把握可言然聽其淪胥則今日東陲已蹈
之覆轍卽異日全國前車之鑒况
發祥所自

陵寢在焉此而不保更將何以與天下相見故無論事勢如何爲難而終不得不出全力以爭之者亦勢之所不容已也臣等公同商榷一再籌思於無可如何之中爲姑盡心爲之舉竊謂居今日而言東事應興應革者何啻什百然總其大要不外兩言曰充實內力曰抵制外力而已充實內力之策不一端而徙民實邊爲其要義抵制外力之策亦不一端而籌畫交通爲其命脈夫興利殖產移民爲急有土無人則雖得沃壤無異石田國初以來東三省辦法專以保守蓄藏爲至計森林礦產封閉綦嚴內地人民移居有禁近雖稍稍開放招農墾地而奉天蒙荒尙多吉林山荒至廣江省荒地墾者什未二三一切地利韞藏未發者正復無限非大開例禁獎勵移民則其餘拓殖之方均爲無本願倡議移民阻撓者必且以旗丁生計爲詞羣相熒惑不知三省危局已如幕巢外

力侵入日新月異雖欲斤斤自守恐不旋踵而將無容足之區
目前之小利忘將來之大患爲計已愚且

國家撫有中夏垂三百年同爲臣民有何畛域乃人方合力以謀
我猶自區爲兩界以萬里地寶委諸他人譬諸大盜入室而子弟
猶復分門別戶各顧其私事之可痛孰甚於此此等積習三省皆
所不免而黑龍江爲尤甚官虞失權兵虞失利雷同附和併爲一
談實則三省制兵久與編民無異何如豁除界限一視同仁不立
旗漢之名但注所居之籍其旗丁原有之餉照例給發應得之官
酌量改用化其成見仍不奪其生計然後浮言可息而移民之策
可行一面卽改置郡縣增設民官俾流移有歸撫字有責庶幾人
煙所輳便成都邑孳生日久漸收捍衛之效所謂充實內力者此
也顧邊地遼濶聯絡之法全在交通若聲氣隔絕首尾不屬則雖

有眾民徒爲人役今東清鐵路之實權爲日俄分掌已非口舌所能爭然新民至奉天線路則贖回之權由我自主載在條約初無異言顧遷延至今尙未收贖此路距離雖短實爲京師達奉天之關鍵所係至重若遲疑不決則久假之後漸難與爭恐遼西一帶亦非我有而奉天與關內之聯絡斷矣此亟應收回者也長春至吉林線路去年中日會議定由中國自行籌築不敷之欸允向日本貸借約以半數爲度此路當日俄戰役以前俄人要求合辦已非一次今若參用日欸則俄人於黑龍江地方亦必指定路線起而效尤而滿洲全部之交通權且盡落於外人之手多讓一路卽不啻多割一地大錯旣成便無挽回之法竊謂會議止稱不敷之數允借日欸我若速行開辦悉數自籌苟無不敷自無所用其借貸縱有意外之爭論拒之固尙有詞此又亟應力爭者也此外自

齊齊哈爾至愛琿之路吉林經敦化至琿春之路哈爾濱至三姓之路皆枝中之幹爲吉黑兩省命脈所關非急起直追恐不轉瞬而他人又先我著鞭則事益棘手矣至於由新民北出一枝縱貫東蒙直達齊齊哈爾尤爲北滿第二幹路此路若成則南北銜接一氣足與東清鐵道彼此抗衡若謂中日會議錄載有中國允於東清鐵道附近不築並行幹路之語恐相抵觸則此路取道蒙境途徑較直旣非在該路附近又不得謂爲並行斷無所用其顧慮末途之贖此真最亟三省運命視爲轉移失今不圖後將無及所謂抵制外力者此也以上二端實爲今日維一之要圖稍知東事者幾於眾口一詞謂爲當務之急卽臣等熟思審慮亦以爲救亡之術舍此更無他途顧枝枝節節而爲之則一事未集而疑阻先乘議論未終而事機已失卒之曠日持久什無一成臣等此次奉

命赴東親歷三省觀趙爾巽之於奉天程德全之於黑龍江亦何嘗不苦心焦思力求振作然經年累月曾無成效之可期者非必事局之萬無可爲與其才力之果有未逮亦由種種阻礙種種牽掣有以使然何則興舉百務非財末由方今帑藏空虛計臣仰屋固無大宗的款可供經營三省之用而東南各省偏災時告民不聊生又屢經搜括脂膏殆盡自贍不暇遑論他顧故三省行政之費國庫補助旣已爲難卽內地協餉之清還亦終無日一切需用勢不得不就地自籌就三省物力而論果使經理得宜開發有效原未嘗不足以資周轉卽如奉天籌款一歲驟增數百萬江省興辦墾務節次收價亦至四百餘萬吉林財力之富冠絕三省說者謂振刷精神從事清理歲入當不下千萬以之剏辦一切雖未必舒轉自如而得尺得寸何遽不能收挹注之效然成例所囿窒礙

甚多邊地情形既與內地迥別而部臣成見牢不可破一經上聞輒令聽候部撥疆臣籌款本屬不易焦頭爛額所得無多而復以繩墨拘之使不得自由運用則疆臣孰肯以身爲怨府而爭此不可必得之數乎所以跋前疐後百無一效終乃冥心坐廢束手無爲臣等考查所及未嘗不咨嗟歎息於內外之隔膜有如此者財力旣絀則一切要政自難責效而用財最費者莫如練兵以三省幅幘之大新兵之數至少亦須六鎮方敷布置乃三省要害皆苦無兵吉省甫成一協奉省僅有一營又皆散漫冗弱毫無足觀雖其致此之由原因不一而無餉無械實爲最大之病根轉瞬日俄撤軍屆期我無接收之兵人有可藉之口貽誤大局豈復可言探本窮源實亦不能盡爲該省將軍咎也臣等以爲欲支持危局非化散爲整挈領提綱得人而理則其餘補苴之策均無可言何者

目下三省情形鐵路貫注商埠同開舉凡內政外交均有利害相因之勢若各分疆域各爲風氣無論勢渙力薄於控馭之方多所未便且彼此政策不能一致尤恐失外交之平衡卒之散漫支離同歸於盡故必聯合三省屬諸一人乃可收統一之效然就令得人而理而不破除文法專一事權亦無以盡人材之用明臣袁崇煥以文武之略經營遼左兩次督師未著功效其奏議有言以臣之力制全遼有餘調眾口不足一出國門便成萬里忌能妒功夫豈無人卽不以權力掣臣肘亦能以意見亂臣謀臣等每誦其言輒相慨歎殷鑒不遠可爲寒心方今東事之艱什倍曩昔禍在眉睫豈容再誤擬請特設東三省總督一員予以全權舉三省全部應辦之事悉以委之除外交事件關繫重要者仍令與外務部咨商辦理外其財政兵政及一切內治之事均令通籌總攬無所牽

制就三省要地分建行署俾不專駐一省得以隨時往來巡視其
總督之下應設奉天吉林黑龍江巡撫各一員專理三省民事吏
事仍受督臣節制其權限應略視內地各省巡撫爲輕不得與督
臣並行凡有奏件均須由督臣領銜方許入告所有三省用人行
政悉聽總督主持略如咸同間會國藩胡林翼之於東南各省然
後寬以時日責以效驗務令功罪皆有專歸內外各相協助以一
人之力總集羣策復以全國之力傾助一隅庶幾委任旣專精神
一振或可收效於萬一該督責任綦重體制較尊應否

特賞崇銜或

頒給欽符以示優異之處出自

聖裁非臣等所敢擅擬其應與應革各事宜卽如移民實邊融化
旗漢增置郡縣籌辦鐵路招練新軍及其餘推廣教育振興實業

開鑿鑛產撫綏藩部等宏綱細目均俟該省總督

簡放有人後責令因地因時熟籌妥辦現在客軍尙未盡撤凡所更張不無阻礙擬請先期切實豫備俟明年二月撤兵期屆然後明降

諭旨剋日施行以昭鄭重竊觀日俄現勢其駐東軍隊果能按期全撤與否誠不敢知但期限既滿則一切措置之權固已在我彼果如約辦理我自易於著手即使有意延宕而彼曲我直亦可爲所欲爲無所用其瞻徇矣惟豫備之法決不可托諸空言似此大舉非厚集財力豈能實行現在度支奇絀欲於咄嗟之間籌得鉅款良非易易臣等再四審度竊謂籌款之法除募集公債商借國債外殆無他策擬請妥速籌辦以赴事機臣等非敢率臆妄談輕變成法實見東事日迫後患方長國家存亡在此一舉且以臣等

此次奉

詔前往尤爲中外屬目之端東民歡迎羣有再見天日之望卽鄰邦揣測亦謂我創鉅痛深一朝覺悟必將有根本刷新之舉以收效桑榆者若但循例覆奏一無布置不特日俄兩國將疑我於三省已置度外益肆其進取之謀而東土士民亦竊疑

朝廷之意不我屬益生其解體之志則臣等此行非惟於三省無毫髮之補救而轉速其載胥及溺之禍也臣等憂憤所迫不暇擇言就東事而論所敢披瀝上陳者不過如此抑更有進者易稱正其本萬事理四方之紀在於中央股肱之疾由於心膂大本旣定則其餘枝葉之事一以貫之是故

朝廷之一舉一動實與地方休戚息息相關果使政教聿新百廢俱舉辦一事有一事之成績閱一時有一時之進步風聲所樹捷

於影響頽廢之習不禁自除東事雖危亦何至獨無起色若其浮
言一動大計旋搖瞻前顧後方進又退羣情疑惑不知
國家趨向之所在則豈直東事無幾希之望抑全國之治亂亦實
在不可知之數也方今

聖明在上

渙汗頒頒宣布立憲釐定官制勵精圖治之意可謂至矣然而數
月以來情勢屢變中外觀望妄相擬議其爲可慮蓋尙有倍蓰於
東事者竊維窮變通久理勢之常因革損益何代蔑有卽我
朝法制自開國迄今

列祖

列宗未嘗不因時遞改我

皇太后

皇上今日所創垂之大經卽爲後世子孫之成憲庸眾之見可與樂成難與慮始要在守定宗旨百折不回而後明效可期危局可保此尤臣等區區之愚所私憂過計者不覺因條陳東事而言之不厭其長也所有臣等遵議東三省切實辦法緣由謹恭摺密陳伏乞

皇太后

皇上聖鑒訓示

請飭東三省將軍勤恤民隱片

再東三省自甲午以後迭遭事變瘡痍未復民物彫殘情形最堪矜憫我

皇太后

皇上俯垂廬念

特命臣等前往查辦抵東伊始卽行刊布告示剴切曉諭各該省紳商士庶以及八旗軍民人等凡事關公益何利當興何弊當革皆准其具呈聽候覈奪冀有以宣播

德音樹循疾苦茲就臣等周歷三省商民呈控各案暨諮訪所得各端詳加考察如奉天安東等處近因墾務收價致有農民聚眾情事吉林奏加酒稅員司朦改定章再四重徵遂至商人紛紛呈控黑龍江開放荒地旗員輒謂不便羣相告訴意存尼阻他如田地清丈升科補繳荒價以及官銀號官帖局均爲裕

國便民之要政而往往利弊相乘怨謗蠶起推原其故或由官吏措施規畫未盡得宜或由劣員朦混把持藉圖私便加以官民之隔閡禁令之紛煩豪猾之誅求賊匪之肆擾哀我子遺何以堪此言之可爲太息臣等聞見較詳不忍膜視可否仰懇

天恩明降

諭旨飭下三省將軍等當茲兵燹之餘一切設施務以培養元氣固植根本爲第一要義如清賦爲裕徵之本計捐稅爲歲入之大宗乃或操切圖功易滋擾累脞削從事致病煩苛凡我商民旣苦此離又罹重斂致合理財之政轉爲病民之端他如銀錢匱乏賊匪縱橫困苦尤深補救乏術殊可慨歎方今生聚教訓百端待理規地方之治安貽人民之樂利一切新政亟應次第舉行非籌有的款不足以資整理但籌款一事尤貴得人必須體恤民艱方無流弊務使閭閻輸一分之貲財卽受一分之利益則民力雖有未逮而民情尙所樂從是全在各該省將軍等體察情形斟酌損益念民生之凋敝惜有限之脂膏力祛壅蔽嚴杜侵漁廣闢利源豫謀生計庶幾情誼旣通猜嫌悉泯三省商民共仰

軫恤生成之德自有急公奉上之忱民心日固積困可舒樂業安居漸臻富庶以期無負

朝廷聽念東陲勤恤民隱之至意臣等一得之愚是否有當謹附片具陳伏乞

聖鑒訓示

請 飭奉天將軍澈查盤蛇驛等處墾務委員舞弊虐民片再臣等由奉回京於上月十八日途經高山子地方突有商民三百餘人具呈迎訴當飭火車暫停收閱呈詞如盤蛇驛等二十二處民人李景隆張連輝等則以該處墾務委員藺祖榮任用私人顛倒地段有改熟作荒併以下地畝地概照上地收價及與富紳黃受臣等立居業公司名目將該民人熟地轉賣分肥逼令遷移掘墓等事如陸家窩鋪民人裴廣仲王佐均等則皆稱前領荒地

內有積水被鹺不堪耕種作爲公中牧養之地本年皆爲居業公
司轉賣漁利又孫家窩鋪二十四處民人及林升海等亦稱蘭祖
榮從中取利將上地改爲下地生田變作熟田奪該民人原地賣
與外戶黃平格等得銀數十萬兩又有高山子民人控盤蛇驛委
員王傳二姓帶隊勘丈除原有紅冊畝數外餘悉令分三等交價
不交力逼退契各等情查該省盤蛇驛等處丈放水衝涸復及滋
生荒地歷經前將軍增祺墾務大臣廷杰及趙爾巽等奏辦有案
該民人所控委員以熟作荒併巧立居業公司奪地漁利各節事
關墾務虛實均應澈究擬請

飭下該省將軍按照該民人所控各呈認真究辦勿稍徇縱以恤
民依而懲吏蠹至該省現辦內地墾務多係早經墾熟並未升科
之地現因飭令交價遂致弊端叢出人情驚疑原種者或以無力

呈繳有失地之虞牟利者又以重價請領生奪地之案安東等處之聚眾及該處民人之攔訴實皆坐此奉天吉林兩省因清賦呈控滋累者尙不止此數案竊查內地墾荒章程皆重在升科不重繳價近年屯衛繳價之事亦以民情不便仰蒙

聖恩酌從寬減現在東省荒地極多振興之本必以墾務爲要圖果使尺田片壤無處不耕有益於國計民生者自無涯量似不可因繳價之故使已墾者轉生事端未墾者亦多扞格於振興農業之本意乖戾實多擬併請

飭令各該省將軍酌議變通或令墾熟之戶將荒價分年認繳以宣

皇仁而示體恤之處出自

逾格鴻施除將原呈咨行該省外謹附片具陳伏乞

聖鑒

路工經費分別報銷摺

奏爲路工經費分別造冊奏銷以重庫款恭摺仰祈

聖鑒事竊准度支部咨稱本部奏請路工要款應查明城內外已成工段丈尺道里若干所用工料若干薪費若干種樹開井等項若干尙存工料銀兩若干截清界限分晰造冊奏銷以昭實用等因一摺於光緒三十二年十一月十四日具奏奉

旨依議欽此欽遵行知到部伏查臣部於光緒三十一年九月接收工巡局以後所有內城路工修至第三四段尙未完竣外城雖經勘驗估價亦未動工接管卷內大學士那桐奏撥內城工款有已請未領之銀十五萬兩嗣由臣部行知度支部分次支領外城變通原估做法分段修築先後共領款十二萬餘兩亦經臣部奏

咨有案後因領款將次告罄又於本年十月請撥內城二十萬兩外城五萬兩均已奉

旨允准本擬工程告竣分別奏銷以昭實用現在既經度支部奏奉

諭旨自應欽遵辦理查原奏內稱肅親王善耆奏撥工程款時核計每里修費三千餘兩尙恐不敷明溝鑿井均估計在內而工巡局咨覆則謂於每里五千餘兩之外另作開銷其詳細開支種樹開井薪工局用究需若干無從得悉等語當卽飭查去後茲據申稱京城路工前侍郎胡燏芬條陳每里約需銀三千餘兩係專指正中馬路僅寬一丈五尺而言並無兩旁明溝重車及人行各便道肅親王善耆奏撥工程款時亦有經營造司反覆勘核恐尙不敷之語至本局所辦馬路奏明做法正中之馬路寬二丈五六尺不等

加以明溝重車及人行便道牙石等工每里合銀五千餘兩而開
通舊溝沿路種樹隨工鑿井且多有起高墊窪之處並薪工局用
各項均須另作開銷曾經大學士那桐咨覆戶部有案茲特造具
詳細清冊凡道里之長短丈尺之廣狹土石之厚薄工料之多寡
以及開溝種樹鑿井雜工局費分類排列申請奏銷等因前來臣
等按冊鉤稽尙屬核實肅親王善耆前奏每里修費三千餘兩尙
恐不敷者自係專指正中馬路之寬一丈五尺者而言明溝暗井
不能估計在內亦顯然易見者也又原奏內稱自創設工巡局以
來每月由部支領經費等項四萬三千餘兩肅親王善耆原奏有
原設之街道局擬歸併工巡局以專責成是路工之薪工局費應
卽在工巡局內支給而工巡局咨覆又稱薪工局費另作開銷等
語查臣部每月撥案在度支部領款四萬三千七百五十兩其爲

內城撥用者街道經費二千一百兩路燈費一千兩巡警隊加餉八千五百兩原有巡警月俸一萬九千九百兩其爲外城撥用者巡警月餉七千六百五十兩土車棲流所等項四千兩路燈費四百兩教養局二百兩合內外城統計共四萬三千七百五十兩亦經大學士那桐奏咨有案自臣等接管後一切辦法逐漸擴充原領之數不敷甚巨皆於新籌款項內分勻撥補但核工巡局各項開支皆無路工局薪資局用一項查舊有之街道局爲潑灑甬路沿路點燈而設早經歸併工巡局內不另開支是肅親王善耆原奏所稱歸併工巡局者專指街道局而言與路工局不相干涉者也又原奏內稱外城路工合計共需工料及薪水局用等銀五萬兩合之造橋鑿井種樹等項約需銀八千餘兩兩項分估與內城辦法兩歧等語查內城辦法以正路明溝車馬人行便道爲一項

開溝種樹鑿井爲一項薪水局用爲一項而外城以薪水局用併於正路工料之內者蓋外城路工只設西局一所東局則歸併內城東路工局內略增局用薪工以期樽節故三項併爲兩項而前門外路工又以舊時甬道之石料多作面溝及石牙之用沿路種樹亦較內城爲少工料旣省用款自有不同此與內城辦法似涉兩歧之實在情形也又原奏內稱內城路工共請撥銀六十萬兩外城路工共請撥銀十七萬餘兩應飭局員截清界限等語查光緒二十九年肅親王善耆管理工巡局時置辦路工汽礮及各項器具用銀三萬八千餘兩大學士那桐接收後開辦第一段路工接修三四段尙未完竣三十一年九月臣等接收後自三四段至七段先後計修馬路三十八里有奇並各項開支用銀二十九萬八千九百餘兩現在籌備第八第九兩段物件共六萬二千三百

餘兩尙有已領未用之銀五萬兩已請未領之銀十五萬兩至外城十七萬餘兩計已成之路十二里有奇用銀十萬三千餘兩現在購買物料計銀一萬六千六百餘兩尙有已領未用者二萬兩已請未領者三萬八千兩此內外城先後請撥款項截清界限之實在情形也總之此項工程自肅親王善耆開辦後輾轉數年移交臣部經理一切尙屬得人臣等尤以修治道塗當今急務慎重庫款臣下所同故工料若何購辦薪費若何開支均時時督率委員認真稽核以期款不虛糜至物價有低昂則先後不能一致地勢有廣狹則內外未可強同既係核實報銷未便拘牽成式除將申報詳細清冊咨送度支部存案並俟內外城路工告竣後續行奏報外所有奏銷路工要款緣由謹恭摺具陳伏乞

皇太后

皇上聖鑒訓示

京城戶籍查竣請卽詳查丁口摺

奏爲清查京師戶籍現已報竣擬卽詳查丁口以重民政謹開單具陳仰祈

聖鑒事竊臣部前因推行警政酌擬清查京師戶籍大概辦法於光緒三十二年四月初二日具奏奉

旨依議欽此欽遵隨卽督飭內外廳丞妥慎辦理茲據申稱內外城所轄戶籍現已挨戶清查編號登冊內有一號一戶者爲正戶列入正戶之內者爲附戶內城正戶四萬五千三十五號附戶三萬四千九百八十八號共計八萬二千三十三戶外城正戶二萬五千四百三十八號附戶一萬八千三百二十九號共計四萬三千七百六十七戶內外城統計十二萬三千七百九十戶現已挨戶列

號釘牌按號登冊申報到部臣等竊維地方盛衰關乎生齒人民
眾寡貴在周知現臣部改爲民政舉凡教育風俗賦稅徵調諸要
政均當次第推行然無不以清查丁口爲入手辦法戶籍旣清自
應按照原奏再行詳查丁口惟事關創始尤極繁難自王公以至
庶人土著以逮客籍旣等級之各判當分別以實行如蒙

俞允卽由臣部擬定詳細章程先從京師辦起後再頒行直省及
通商口岸一體遵循以期仰副

朝廷安宅斯民之至意所有戶籍業已查竣續請詳查丁口緣由
開列清單恭摺具陳伏乞

皇太后

皇上聖鑒訓示

官醫院漸著成效設法推廣並將就醫人數繕單具陳摺

奏爲開辦官醫院漸著成效設法推廣並將就醫人數繕單具陳
恭摺仰祈

聖鑒事竊臣部創立官醫院內分中醫西醫兩所遴派司員充任
監督先立基礎再求推廣於上年九月初六日附片奏明在案查
該醫院設於錢糧胡同自開辦迄今凡五閱月就醫人數日見加
增共計約有三萬四千餘人之多考之輿論僉謂該監督等擇方
審慎用藥精良務體人情不染官習是以就醫愈眾全濟愈多受
診之人以辨證之明起疴之速且有登報誌謝者此醫院開辦漸
著成效之實在情形也伏維經訓審醫貴在善詳六氣史旌循績
亦稱診起多人近來新政推行衛生日重東西各國亦皆以設醫
院精醫學爲民政之始基該醫院既有效驗可觀該監督等亦均
實心任事克舉其職自宜設法推廣加意振興現設之院地屬內

城外城人民就治者頗苦不便擬再在外城相度適宜之地遴派
妥員經理務使澤溥祥和民無天札上副

朝廷子惠元元之至意應需款項容臣等續行籌畫另案奏明辦
理嗣後醫院就醫人數仍當按季奏報以重民命而體

皇仁所有開辦官醫院漸著成效設法推廣並將就醫人數繕單
具奏各緣由理合恭摺具陳伏乞

皇太后

皇上聖鑒

請 飭各省查報鄉社情形以重治本摺
奏爲請

飭各省查報鄉社情形以重治本恭摺仰祈

聖鑒事竊維天下之大皆民所積王道之行必始於鄉未有不注

意民治而能奏富強之效者也臣部現經更定職掌實爲內治根基民事總匯雖刻下各省民間智慧未開局於風氣地方自治一時未能驟行而各省鄉社辦法之善否卽爲地方治忽民生休戚所關欲議振興民政自以考求各省鄉社情形爲入手辦法恭查會典保正甲長鄉約等本懸之功令自咸豐同治以來地方多事舉凡辦防集捐供支兵差清理姦究諸事各牧令又無不藉鄉社之力於是邊腹各地名目紛立推擇各殊有曰鄉正鄉耆里正者有曰寨長圩長者有曰團總練總者有曰公正公直者有曰鎮董村董者有曰社首會首者羸雜離奇不可勝舉近年推行警政如奉天等省則各鄉社又多稱巡長等名此名目之不同也其經理之地有僅止一村者有多至數村數十村者邊遠州縣鄉保且有管至百十里者此地段廣狹之不同也其更代之法有一年一易

者有數年一易者有輪流充當者有由地方官劄諭派委者而以公眾推舉者爲多所遴用者或爲生貢或爲職銜軍功人員或爲平人地方官待遇之或貴如縉紳或賤如阜隸要之官民相通又皆以鄉社爲樞紐是以細故之裁判公用之科攤案證之傳質護田防盜之計畫新政舊章之頒布隱然以鄉社司之且有牧令倚以收賦稅集團練者大約如古之王烈田疇者固不乏人而猶貪虎冠爲地方之患者亦在所不免幾有爲者不善善者不爲之勢近年海口通商之處亦多有研究自治組織會所者較之舊時鄉社辦法已有進步然當綿蕞之初尤宜詳爲調查以期整齊而免流弊溯考比閭族黨本出周官亭里都鄉特推漢制東西各國辦自治行警政者亦胥由村長街長而始惟中國地大物博各省習慣既有不同卽辦法亦難強一自非研究詳審難期措置咸宜擬

請

飭下各省將所屬府廳州縣鄉社情形名目辦法按照摺內所指各節逐細查報以憑考核現在時勢日棘匪黨潛滋而欲修治本以遏亂萌則全在鄉社之經理得法親於民者乃能治民中外古今固無二致此臣等不敢不縷晰上陳者也所有請飭各省查報鄉社情形各緣由謹繕摺具陳伏乞

皇太后

皇上聖鑒

釐定民政部及內外城巡警總分廳權限章程摺

附單

奏爲釐定臣部及內外城巡警總分廳權限章程繕具清單恭摺仰祈

聖鑒事竊臣等於上年十二月奏擬原設巡警部及內外城巡警

總分廳權限章程欽奉

諭旨允准在案現臣部既經改設並經迭次奏准令該廳丞等專任京城警務臣部惟司督察所有應分權限一切自應詳細籌度重爲釐定方足以資遵守而免貽悞竊維漢之警署隸於諸卿唐之巡使直達端省凡權寄之重統率之加皆所以密考查而責實效現部廳改章伊始端緒紛繁該總廳有應酌爲變通者如專辦蹕路警衛整理地方於所轄境內有完全警察之權與各衙門文牘直接等是也有仍照奏定章程者如丞參准令照京堂奏事及分廳不得申部皆須稟總廳並巡警學堂習藝所教養局消防隊等皆歸部轄之類是也至考查民政宜派專官慎簡賢能預儲器使皆期事體之胥協以冀警務之有裨謹繕具清單恭呈御覽嗣後如有應行變通之處仍當隨時奏明辦理所有酌擬釐

定部廳權限章程緣由謹繕單奏陳伏乞

皇太后

皇上聖鑒

附民政部及巡警廳權限章程

一巡警爲民政之一端巡警部現旣改爲民政部範圍較廣所有全國警政自應仍歸民政部統管其京師警察事宜應責成內外城巡警總廳辦理受民政部考核

一部丞參議及內外廳丞准照京堂例專摺奏事惟關部廳應行奏請事件仍由臣部具奏以重職守

一臣部左右丞及參議均可隨時奏派考查各省民政事宜一各分廳以下應申部事件須由總廳轉申不得直接臣部以清權限

一部丞參議及內外城廳丞均由臣部開單奏保請

旨特簡僉事知事由臣部奏補其五六七品警官由廳申部
奏補八九品警官由廳丞申由臣部委用咨明吏部立案

一廳丞於所轄境內有完全執行警察事務之權案照奏定
章程及各項法律規則得發布巡警廳命令於管轄區域之
內其事關各署須會銜出示者仍由臣部領銜核定刊發

一總廳事須速辦者得與各衙門直接來往文牘其事關重
大者仍須報部酌核

一巡警總廳達各部公文用咨呈各部達廳公文仿照行文
順天府格式辦理

一凡分廳達總廳之公文俱用稟申廳丞達臣部之公文亦
用申其承政廳參議廳各司與內外總廳互相知會公事俱

用移文由臣部交廳者則用劄文

一 凡事關

蹕路警衛及地面整理與稽查一切事項由總廳管理仍歸臣部督察指揮

一 廳丞遇所屬各知事各區官之措置有違法令侵權限者得撤銷或停止之其廳丞有辦理未盡善者臣部亦有撤銷停止之權

一 廳丞得訂定本廳及各局所辦事規則

一 巡警學堂習藝所教養局消防隊協巡營探訪局官醫院路工局等既仍歸臣部管轄如有改置添設應行商酌之處均由臣部督飭內外廳丞酌核辦理

釐定內外城郊巡警總分廳區職掌員缺章程摺

附單

奏爲釐定內外城各廳界域職掌員缺章程繕具清單恭摺仰祈
聖鑒事竊臣等前於遵議臣部員司職掌摺內聲明內外城應併
設分廳推廣外坊警務暨變通總廳原設各官品位職掌各事宜
欽奉

諭旨允准在案伏維京師爲根本重地巡警尤治道所關現在改
章伊始事務日繁尤宜詳細推求逐一釐定方足以昭周密而資
整飭茲據內外城巡警總廳申送釐定界域職掌員缺章程前來
臣等詳加察核大端有三一曰劃分界域凡改隸原分內外城各
區及新推廣外坊擬設各廳界址屬之一曰申明職掌凡各總廳
改設總務司法行政衛生各處承辦事項歸併原設各股及內外
城坊各廳擬設總務等課分辦事項屬之一曰設立員缺凡總廳
各分廳各區應設正副管股幫管股正副課長課員正副區官各

差缺及選用警官擬設錄事等屬之溯考魏之衛曹備分治法唐之街使以別里坊各國京城巡警設官尤多蓋非劃清地面不足以專責成非設立官缺不足以資維繫職掌重在分明員數貴敷任使京師警政繫中外之視聽當綿蕞之初基雖具規模宜求進步臣等當督飭該廳丞等於已辦者務規精詳於當辦者力爲推廣庶有以副

朝廷講求民政又安元元之至意新設應補各缺臣等仍飭慎加遴選於試驗堪勝者查照臣部奏案分別請補任缺毋濫以重名器而飭警務嗣後章程如有應行變通之處仍宜隨時奏明辦理所有酌擬釐定內外城各廳界域職掌員缺章程繕單具奏各緣由謹恭摺具陳伏乞

皇太后

皇上聖鑒

附內外城郊巡警總分廳區職掌員缺章程

劃分區域

一原奏內城併爲三分廳外城併爲二分廳應將內城原設之二十六區外城原設之二十區均按照地線改隸各分廳管轄

一外郊擬設四分廳東以朝陽門東便門西以阜城門西便門兩門距離適中之地作爲南北界限北以安定門德勝門適中之地作爲左右分界曰北坊巡警左分廳北坊巡警右分廳屬內城總廳管轄南以永定門爲中線分爲左右曰南坊巡警左分廳南坊巡警右分廳屬外城總廳管轄

一南北坊分區應就五城原管地面分別區劃惟創辦伊始

籌款維艱舊址遼闊一時舉辦難周擬先從附近城廂地面酌設分區次第推廣隨時奏明立案其尙未設區之處仍暫由各該管衙門管理

一原奏內外城巡警總廳各分設總務處行政處司法處衛生處前由巡警部奏定該總廳所分之各股自應增析改併以專職守

一總務處掌一廳總匯之事凡承辦機要考核廳員支配長警編存文牘收發經費統計報告各事項皆屬焉原設之警事股機要股文牘股支應股統計股仍歸併該處辦理

一行政處掌辦理行政警察高等警察國際警察凡整飭風俗保護治安編查戶口稽核工程各事項皆屬焉原設之護衛股治安股交涉股戶籍股營業股正俗股交通股建築股

仍歸併該處辦理

一司法處掌辦理司法警察凡豫審人犯科罰違警捕送罪人偵探秘密各事項皆屬焉原設之刑事股卽歸併該處辦理

一衛生處掌辦理衛生警察凡清道防疫檢查食物屠宰考驗醫務藥料各事項皆屬焉原設之清道股防疫股醫學股醫務股仍歸併該處辦理

一該總廳四處以下分股事宜另由廳丞擬定詳細專章報部核辦仍隨時酌量事務繁簡增減分合以期合宜

一內外城郊各分廳每廳擬設四課曰總務課行政課司法課衛生課以總廳四處所管事項各依其類分配執行
設立員缺

一內外城巡警總廳廳丞僉事以下擬設正管股各二十員
副管股各二十員幫管股各二十員分隸各處執行各項事
務

一內外城各分廳知事以下擬設正課長各四員副課長各
四員課員各八員執行各項事務

一內城二十六區擬各設正區官一員副區官一員外城二
十區擬各設正區官一員副區官一員管理所轄地面事宜
一南北坊各分廳及所轄各區應設各員俟分廳設立界限
畫定後再行奏明辦理

一內外城總廳各處正副管股股員分廳各課正副課長課
員各區正副區官均分別職任事體以五品至九品警官充
之

一五品至九品警官不定額缺七品以上者奏補八品以下者委用咨部其應如何酌定大概數目以示限制之處擬俟外坊分廳奏定界域職掌員缺後再行奏明辦理

一各項警官應儘警務專門人才遴選任用如有不敷再以合宜人員分別借補

一內外城總廳行政司法衛生各僉事及分廳知事均視郎中五品警官視員外郎六品警官視主事七品警官視小京官仍參照巡警部歷次奏案辦理以定階級而便升轉

一內外城總廳擬各設八九品錄事各四員每分廳各設八九品錄事各二員由廳丞申部委用存案

一內外城總分廳區應設司書生各按事之繁簡由廳丞酌量委派

正書卷一
三十一
一以上各條皆就現時應辦事件酌擬嗣後如有增減改併之處應由內外城總廳廳丞會同申部奏明辦理

退耕堂政書卷七

退耕堂政書卷八目錄

奏議八

調取京外圖志表冊並請核議各省奏改郡縣摺

請脩明禮教以養民德摺

接收工部劃併事宜分別詳擬辦法摺

開辦京城車鋪捐日期並收捐等第數目摺

整飭保息善政並妥籌辦法摺

遵旨議奏並陳明京師巡警辦法摺

脩理京城街道溝渠由部自行籌款摺

請飭查各省社倉並妥籌辦法摺

請定大計而弭隱禍摺

請頒鑄關防印信以資鈐用摺

東事需款請先撥鎊餘摺

東三省當差候補各員不准藉詞他往片

擬定東三省職司官制及督撫辦事要綱摺

附單

退耕堂政書卷八

天津徐世昌

奏議八

調取京外圖志表冊並請核議各省奏改郡縣摺

奏爲調取京外圖志表冊藉資參考並請嗣後疆臣奏改郡縣均歸臣部核議恭摺具陳仰祈

聖鑒事竊維魏晉以來始設民部唐時改民爲戶相沿及今現經總核官制王大臣改奏戶部爲度支部專掌財政其規劃疆理等項歸入臣部則臣部新增之職掌卽周禮大司徒之職也上年十二月十七日臣等會同軍機大臣奏定臣部官制內設疆理一司以審議地方區劃核辦測繪圖志等項實於大司徒所掌以天下土地之圖周知九州地域廣輪之數及以土圭之法測土深正日

景以求地中之義符合伏維各省地勢今昔變遷不同而新政推行則府縣區域之增析裁併者亦所在多有非有新繪之圖新修之志不足以資考證臣部現正籌辦測繪學堂冀以廣儲此項人才爲將來測繪地圖之用惟造就尙需時日擬先調取京外邊腹各省原有之圖志以爲參核編輯之資其陸地形勢河海流域都圖村鎮商埠船塢等處以及荒熟林牧等地皆於疆域有重要之關繫而邊陲界限國境攸關尤宜注意考求方昭詳密應請飭下各將軍督撫大臣就近詳考疆域慎核界綫分別繪圖點說列表造冊隨時咨送臣部以備查核至於變通官制增改郡縣近日各疆臣參酌形勢奏奉

俞允者時有所聞嘗考漢晉之分郡國皆司徒上之臣部職司疆理應有稽核記載之責嗣後各疆臣如有奏改及新設府廳州縣

者應請

飭下臣部核議以昭鄭重土疆修明治本之意所有調取圖志表冊並請核議嗣後奏改郡縣緣由謹繕摺具陳伏乞

皇太后

皇上聖鑒

請修明禮教以養民德摺

奏爲修明禮教以養成民德恭摺具陳仰祈

聖鑒事竊維典禮肇自虞書而黎民於變齊禮著爲孔訓而民恥爲非自來民俗之盛衰實與禮教之隆替互爲消長恭讀

高宗純皇帝諭旨朕惟治民之道莫善於禮禮者所以總一海內整齊萬民漢唐以後雖粗備郊廟朝廷之儀而縉紳學士多未通曉至於閭閻車服宮室飲食嫁娶喪祭之紀皆未嘗辨其等威議

其度數應萃集歷代禮書本朝會典斟酌損益訂爲通禮一書著
王大臣會同禮部定議等因欽此其時上自王公下至草野家喻
戶曉幾於道一風同振古鑠今復乎尙已時移勢異精意寢微而
民間之所通行者豐殺不盡適宜損益莫衷一是相沿旣久習慣
尤多踵事增華貴賤同等標新領異中外紛歧雖日用服御之微
往往人各異製家各異俗紛紜舛謬歧之又歧實於風俗人心大
有關係推原其故非盡禮法之不明民風之不古也良由教民之
政未能推廣雖有禮法民之從也聽之民之違也聽之官吏不任
監督之責軌物等於具文臣部爲民事總匯之樞竊以爲有禮則
安無禮則危法令者治之具而非致治之本源是政與禮有互相
維繫之情實禮與民有須臾不離之勢卽素稱知禮之君子欲維
持此禮於不敝者亦不在徒擁虛名而在力求實踐惟率由典章

下逮黎庶修明廢墜責在禮臣擬請

旨飭下禮部將通禮一書凡關民人通用之禮如冠婚喪祭輿服之類或重爲申明或量爲修改或演爲論說以便宣講或編爲課本列入教科總期酌古準今揆情度勢畧加變通歸於簡易使天下之人咸曉然於

朝廷制禮之意專爲淑世牖民而設非徒以侈著述飾觀瞻也俟禮部釐定後卽由臣部頒行京外各直省責成地方官隨在監察逐漸推行而後禮教大興卽民政無不舉矣如蒙

俞允當由臣部行知禮部欽遵辦理是否有當伏乞

皇太后

皇上聖鑒訓示

接收工部劃併事宜分別詳擬辦法摺

奏爲臣部接收工部劃歸事宜分別詳擬辦法恭摺具陳仰祈
聖鑒事竊臣部前准農工商部咨稱光緒三十二年九月二十日
內閣奉

上諭欽奉

懿旨工部著併入商部改爲農工商部等因欽此當將工部一切
事宜分門別類劃歸各部執掌業經奏明欽奉

硃批依議欽此原奏聲明擬以工部所掌京外各項土木工程一
切營繕報銷事宜均歸民政部辦理其琉璃窰木倉一併移交等
因鈔奏知照前來臣部遵於光緒三十二年十二月二十日派員
前往接收並於是年十二月二十五日將接收日期附片具奏奉
旨知道了欽此臣等當卽督飭司員編查案卷詳擬辦法現已釐
訂就緒敬爲我

皇太后

皇上縷晰陳之一爲

壇

廟工程臣部有管理地面之責

壇

廟皆在京城地面擬請嗣後

壇

廟各工隨時修葺者無論工程鉅細皆查照原設工部定例由臣部敬謹遵辦一爲

陵寢另案工程舊例每年由該管大臣奏報一次統歸工部彙案次第奏請

簡派勘估承修大臣恭詣

兩陵敬謹估修此項工程用款向由度支部撥發覈銷儀行樹株亦由勘估大臣履勘惟往勘

陵工例由工部繕具侍郎銜名請

旨簡派勘估後復奏請

欽派大臣承修恭繹例意自係爲慎重工程起見近年派修

景陵 惠陵各工大臣鐵良鹿傳霖陳璧等卽係合勘估承修爲一事旣專責成亦節糜費辦法最爲合宜

兩陵另案工程約估止萬餘兩不及鐵良等所修工程之什一現當創改伊始自未便稍涉拘泥又查近來承修之員旣非勘估之員情形不熟意見不同輒於原估之外另議續估不但增加錢糧且恐易生流弊擬請援恭修惠陵各工成案自本年爲始

兩陵另案工程擬繕具臣部並咨取各部例應派修大臣銜名奏請

簡派勘估並任承修事宜以專責成如蒙

俞允卽由臣部遵照辦理奏請

簡派以重要工一爲

宮殿各工伏查接管卷內近數年

宮殿黏補工程工部均未承辦僅有

天安門內外修整工程數起而已農工商部原奏內本已陳明凡
關涉

內廷典禮供張概歸內務府辦理奉

旨允准工部原辦

宮殿各工事同一律擬請嗣後

大內宮殿各工及拔草句抵懸燈進匠等工均照農工商部奏案劃歸內務府之辦以免兩歧一爲城垣各工查京師城垣向由步軍統領衙門隨時報明由部勘修擬仍由該衙門照案辦理各省城垣完缺向由各省督撫將軍按年報部彙奏久成具文臣部重在循名責實擬嗣後各省城垣遇有修補建築者應令繪圖貼說造具細冊隨時報部以昭覈實一爲衙署倉廩營壘礮台監獄及駐防兵舍各工查京內文武衙署及各倉廩座牆垣監獄諸工向歸工部分別修理所有動用工料各款除欽派各工不計外均由度支部支領彙案奏銷其京外營壘礮台監獄各省駐防兵舍及察哈爾伊犁科布多等處兵房各工或有一年久坍塌因艱於籌款向由兵餉按成計算以爲修築之費隨時造冊咨部覈銷並不另給款項臣等擬合暫仍舊制俟各該管衙

門訂有專章再行分別辦理一爲道路橋梁各工及各省保存古蹟辦法查平治塗徑整理津梁本爲民政要事各省道路橋梁之因年久失修水衝石壓傾欹阻塞者所在皆有一遇霖潦郵驛商旅無不梗滯有礙交通爲害頗鉅其山河環複之處無論官道小徑山多險仄水無津渡淪溺顛踣之患尤爲困苦現旣統歸臣部經理自應設法整頓擬由臣部酌籌辦法另行具奏如遇

聖駕謁

陵及恭送

玉牒諸要差沿途經過之道路橋梁應照工部舊章由臣部劄飭經過各該州縣敬謹預備用款報部覈銷至保存古蹟事項工部向章取具各省保固甘結造冊報部按年彙奏亦成具文此事在各國民政內範圍頗廣擬飭各省將歷來防護前代陵廟暨保存

古蹟辦法詳細查明報部另行妥擬推廣章程奏明辦理一爲
皇木廠木倉琉璃窑等處查木倉琉璃窑向由工部設有監督按
年奏請更替今工部既已裁併原有各監督名目擬請一併撤裁
其應辦事宜歸臣部營繕司管理以一事權而節經費以上所擬
各條或酌籌變通期事理之悉協或審度裁併俾名實之咸符暫
仍舊制旨職掌尙待於變更續當推廣者考究必歸夫翔實以期
仰副

朝廷勸清權限明定責成之至意再臣等查工部舊案光緒三十
一年七月該部奏定新章所有各省工程銷案均照六釐銷費於
一月內依限解部歷經辦理在案現事隸臣部擬請

飭下各省將軍督撫仍照舊章依限報解以資辦公所有臣部接
收工部劃歸事宜分擬辦法各緣由是否有當理合恭摺具陳伏

乞

皇太后

皇上聖鑒訓示

開辦京城車鋪捐日期並收捐等第數目摺

奏爲開辦京城車鋪捐日期並收捐等第數目恭摺具陳仰祈
聖鑒事竊臣部前於三十二年十月二十三日具奏援案辦理車
鋪捐以補地方經費一摺奉

旨依議欽此欽遵在案查京師鋪戶於五城司坊未撤以前向有
地方雜費擬卽查照大學士那桐原奏令將原出之款化私爲公
稍加增益務使商民不擾市面相安以地方之款供地方之用爲
要旨茲據內外廳廳丞妥擬章程申請開辦前來伏維京城警政
亟宜推廣百廢待舉用款浩繁卽如修築馬路原以便商民之往

來期市厘之通利歷考前代如直道之築橋路之修皆廣役民夫
決不輕頒國帑現在

朝廷嘉惠商民已撥部款爲之修路將來潑灑修理等費若概用
庫款則度支力有不堪若聽其廢弛則前工卽同虛擲經塗九軌
爲商人出入所必由出餘力以佐公家卽不啻爲本人自謀利益
現辦內城醫院每月就醫人數已有七八千人之多外城卽擬續
開深虞經費不繼此外流氓乞丐皆擬宏教養之圖清道衛生皆
當謀擴充之法他如保育嬰穉贍恤孤貧何一非慈善之施卽何
一不需金錢之用該商鋪以昔日之陋規作此時之公益揆各國
地方之稅旣屬從同稽漢都商賈之徵亦有故事臣等詳加覆核
擬於內城立一工巡捐總局外城設一分局先責成內外廳廳丞
兼辦由臣部隨時考察以昭慎重俟京師各商會成立後再由該

會公舉公正紳士接辦以爲地方市政之基礎各鋪應列何等捐數若干先由兩廳查明由各鋪戶認定數目再由各商董復查是
否相宜如有不符准其更正至鋪捐擬酌按商鋪等差約分九等
一等十四圓二等十圓三等六圓四等五圓五等四圓六等三圓
七等二圓八等一圓九等半圓等第由商董認定則無抑勒之嫌
款項以少數爲衡則無煩苛之慮其有資本豐厚急公好義認捐
稍多者別爲等第不在此限其餘零星小販概不收捐以示體恤
至京城各項車輛均擬分別等差酌定捐數以爲養路等費補助
之用其有應給免票及應量予體恤者均擬酌給免票冀免阻礙
而便推行所收各捐儘數充作地方工巡慈善及各項公益之用
竝將每月出入各款榜示通衢以昭大信而杜弊端現擬飭於三
月初一日開辦由臣部隨時督察飭令妥慎經理總期輿情無拂

民政畢修以仰副

朝廷子惠元元振興市政之至意嗣後如有應行變通之處仍由臣部隨時奏明辦理所有報明開辦京城車鋪捐日期竝收捐等第數目各緣由謹恭摺具陳伏乞

皇太后

皇上聖鑒

整飭保息善政並妥籌辦法摺

奏爲整飭保息善政並妥籌辦法恭摺具陳仰祈

聖鑒事竊臣部會奏官制職掌章程內開民治司核辦保息事項查保息善政具詳周禮一書我

朝會典所載凡保息之政十有一而振斃獨養幼孤收羈窮安節
孝

綸音所播尤爲加意撫綏故養濟院育嬰堂棲流所及各項善堂善局均令有司經理擇紳民良善爲眾信服者董其事其有屋宇不修胥役侵漁等弊將該管官吏從嚴參劾定例綦嚴卽考之東西各國如救濟養育各院德義慈善等會其管理人之姓名與其經費之出入均隨時報告統計成書具見保息爲國家之要政古今無異中外相同近查各省善堂善局有分官辦紳辦者亦有官紳合辦者固不乏清潔自好熱心任事之人而官紳舞弊胥吏侵漁因之事多廢弛者亦在所不免若不認真整頓幾使

朝廷德澤浸衰寢廢而實惠不及於民擬請

旨飭下各省督撫嚴飭地方官會同各該處紳士查明善堂善局若干收養人數若干歲入歲出若干官費公費若干無論官辦紳辦俱註明管理人之姓名籍貫官階並辦法章程造冊咨部以憑

核辦抑臣等更有進者事積久則弊生道因時爲利用從前各項善堂善局率多重養輕教物力日絀生齒日繁勢必難以持久蓋聚此無數不耕不織非士非商之民紛然待哺於官吏不惟

國家財力不逮亦爲世界公理所無擬令各該省督撫責成地方官紳體察情形以育嬰堂附設蒙養學堂養濟院棲流所清節堂附設工藝廠統計原有經費妥爲辦理官紳有把持公產抗不服查者應卽從嚴參辦其急公好義著有成績者亦應酌予獎勵以爲地方任事者勸總期民有恆業款不虛糜庶無負

朝廷興養立教之至意所有整飭保息善政飭令造報並妥籌辦法緣由謹恭摺具陳伏乞

皇太后

皇上聖鑒訓示

遵 旨議奏並陳明京師巡警辦法摺

奏爲遵

旨議奏並陳明京師巡警辦法恭摺仰祈

聖鑒事二月十三日准軍機處鈔交御史江春霖奏警員權重秩
崇漫無限制請

飭妥訂升轉並處分章程一摺奉

旨民政部議奏欽此查原奏內稱請將原議修改民政部郎中及
各處僉事應升總務處僉事總務處僉事應升左右參議參議應升
廳丞廳丞應升部丞等語臣等恭讀歷次

上諭令預保丞參不得指名奏補則廳丞參議郎中參事總務處
僉事等官其登進之途皆在預保之列何得自議升轉指名奏補
若如所奏旣與

諭旨相背又與擇才之意不符等語查巡警部升轉章程業經具奏奉

旨依議在案現在巡警部改爲民政部而官制更改無多升轉章程自可無庸屢易擬請部中自參議參事郎中兩廳自廳丞僉事知事其應升之階悉由臣等考核隨時預保聽候

簡用其兩廳添設之五品警官旣作爲從五品視員外郎則與員外郎同其升轉以下各官請仍按當日奏定升轉章程辦理以免紛歧原奏謂緝捕不力五城司坊尙干嚴議廳區分轄地面尙或出有巨案除勒令該知事警官限緝盜犯外並著嚴定處分等語臣等查緝兇例有處分實則等於具文五城司坊未撤之時處分非不嚴也而搶劫竊賊之案層見迭出自舉辦巡警搶劫日少竊日稀且豫審廳審結之案月恆數百起臣部迭次奏交及咨送

法部之案皆有牘可稽該御史謂爲命盜之案迭見何所指也蓋緝兇處分不過勒限留緝重者至於革職抑知名爲勒限留緝其限內能獲案者百不一覩至於革職轉得置身事外而盜案終不能破是以外省州縣恆諱盜不報其有四參限滿者亦未聞照例彈劾誠繩之以例則幾無在缺之官若仍設法彌縫更於捕務何補臣等有鑒於此綜核名實期在力行廳員如有不職者重則劾治輕則罷斥不欲令以公罪處分轉將自解而塞責也卽如德姓被人殺害一案旣非劫盜更非警署鄰近方事之初臣等卽嚴飭該廳嚴密訪拏到處躡緝火車旅費已屬不資現已購覓眼線設法追求從此根究似已少有端倪若以公罪處分例之則轉可諉卸責任故原奏所請似應勿庸置議至原奏以燃燈築路爲虛糜以市場棄灰爲厲禁以禁令爲弁髦以升補爲捷徑臣等伏查京

城辦理工巡之始原因各國聯軍在境非保任治安不允交還地面於是前管理工巡局事務肅親王善耆大學士那桐等先後經營京城始有巡警馬路之築街燈之燃皆於此而肇基焉仰蒙聖恩撥款築路坦蕩之樂中外交頌至小販攤棚沿街擺設有礙交通故別設市場以整理之非征及賣菜也居民將不潔之物沿街拋棄殊於衛生不宜自應議罰此皆巡警應辦之事臣等蒞任以後日加推廣不避勞怨惟時時以乏款乏人爲慮奏定養廉支不及半警餉較練勇多者不過數圓樽節不爲不至現在亂黨莠民藏炸藥構反覆之說日有所聞設法偵緝用款不貲使京城仍如昔日之城坊則豈特命盜難防卽治亂亦未敢決今各國都城莫不街市華潔光明照耀原奏所謂比戶燃燈沿街築路者庶幾近之今內外城除大街外築路者十無一二臣等正以款項未裕

風氣未開恥不若人深爲引疚至鴉片爲近數十年致弱之原歷
奉

嚴諭飭禁巡警各廳爲地面專官豈敢弁髦

詔今是以傳知客店酒館無論官民人等一律停燈其各處煙館
亦限期歇業賭博本干例禁然不能過涉騷擾紙煙則本不能禁
臣等正擬請

旨辦理原奏謂民禁而官不問者亦未考核各廳辦事之實蹟也
至於借補者仍留原官則吏兵部定例皆如此臣部又奏准援商
部成案以原官在某缺行走則旗員丁憂回京當差者例皆如此
行走本非實官未補他缺不能去其原官也臣等於初設巡警部
之時一無憑藉調員本難薪俸又少若必欲按照例章補署於用
人殊多拘礙要之內外廳所辦之事無一不與民親又無一非姦

儉豪猾所不便處浩穰人海之區膺整理地方之重人言之至理有宜然是以唐之京兆宋之開封輒一歲而數易其尹未始不由於此臣等伏查振興之源貴核名實推廣之始最忌紛更警政爲內治興替所關竭力以赴尙慮百密之疏疑阻橫生必沮任事之氣設有貽誤咎將誰歸此臣等所不敢不詳析上陳者也所有遵旨議奏及陳明臣部巡警辦法各緣由謹恭摺具陳伏乞

皇太后

皇上聖鑒訓示

修理京城街道溝渠由部自行籌款摺

奏爲修理京師外城街道溝渠請由臣部自行籌款認真疏濬恭摺仰祈

聖鑒事竊查京師外城街道溝渠向由五城街道衙門於每年春

令修理所需經費由部撥給銀一千五百兩又添置運泥木桶銀六百六十一兩零作爲常年例款自五城街道衙門奉旨裁撤所有外城地面均歸臣部督飭外城巡警總廳管理去歲修溝經費會由臣部照案請領奉

旨允准飭部撥給在案現值修溝之期查外城天橋迤南營溝爲各街溝渠下流總匯年久失修淤塞特甚故街溝雖經上年修理而積水無所宣洩次年仍復淤塞現飭外城巡警總廳將營溝街溝認真疏濬並咨商步軍統領衙門一律妥籌辦理務使宣洩通暢穢水污泥不致淤塞實於衛生保路兩有裨益但此項工程浩大核計例領銀兩不敷甚鉅現在庫帑支絀何能例外加領擬由臣部設法自行籌撥以濟要需其常年例領銀兩應自本年卽行停止以重庫儲所有修理營溝經費請由臣部自行籌發緣由謹

恭摺具陳伏乞

皇太后

皇上聖鑒

請 飭查各省社倉並妥籌辦法摺

奏爲請

飭查各省社倉並妥籌辦法以重民食而維荒政恭摺仰祈

聖鑒事竊維民有九年之食王制首重蓋藏穀列六府之終虞書
聿垂訓典我

朝深仁厚澤於偏災上告則截漕頒帑迭沛

鴻慈於年穀屢豐則廣積倉儲防備饑歉凡民間立社義各倉者
多予以獎勵核其斂散皆所以儲豫不虞籌濟荒政也臣部前經
會奏員司職掌章程單內聲明民治司核辦保息荒政事項欲爲

經理保息荒政之計自以飭查社倉爲要務各省社倉辦法往往有派民納穀輸入城市者官督紳辦法非不良也而事一經官耗費滋甚或有刁衿猾吏窟穴其中盤踞把持據爲利藪縱啼飢已徧於四境而災狀不聞於有司輾轉欺朦溝中之瘠盡矣欲救其弊則以民間自相經理爲善圖各隨其俗之所宜並其村鎮之大小戶口之眾寡量爲儲蓄以備不虞經理之法擬由民間公舉社長爲總理而以殷實老成鄉評最優者二三人副之每歲上其穀數於地方官該地方官亦以因公下鄉召集其鄉之父老探詢所報穀數是否確實無庸逐處盤查以省煩擾其有侵蝕虧短眾論確著者亦得隨時查驗秉公追究其應如何建立倉廩設法保存因時抖晾以防霉壞或借給貧民種籽如何糴入春秋變賣換新如何可無虧耗經理社倉紳董如何給予津貼方能奏效各省情

形不同辦法原難一致近年各省積穀有按年按戶而捐者有履
畝而捐者有數年捐一次者遇有災賑有由領穀之戶歸還者有
另行捐辦者有災賑放盡不復勸積者亦有因辦鐵路諸務移穀
捐作他用者要皆關民命之本荒政之重臣部職司所在自應確
切查明以資考核擬請

飭下各省將軍督撫巡飭所屬府廳州縣將各該地方向來詳細
辦法稟由該管官吏轉行咨報臣部備案並由該地方官刊發淺
明圖說剴切勸諭廣爲存儲豐年則取其羨餘而納之荒年則量
其疾苦而貸之務期有備無患有利無弊以仰副

朝廷懷保小民俾無失所之至意所有請

旨飭查各省社倉緣由謹恭摺具陳伏乞

皇太后

皇上聖鑒訓示

請定大計而弭隱禍摺

奏爲時局阡危朝論龐雜宜定大計而弭隱禍恭摺密陳仰祈
聖鑒事竊時至今日外患迭乘內亂不靖英之於西藏俄目之於
東三省法之於雲南德之於山東幾視同占領之土地爲所欲爲
莫之敢抗彼將協以謀我故相仇之國亦有聯盟之說其餘如商
務之盈溢鐵路之干涉銀幣之流通徧於行省拊吭扼背吸髓敲
骨受制於人匪伊朝夕內地各省失養失教游民會匪到處充斥
設或暴發勢必不可收拾近復革命亂黨行爲詭秘防不勝防學
界肆爲劇談軍界潛滋異派他族又從而煽惑之岌岌之勢未有
甚於此時者也卽使部臣疆臣破除積習力戒因循共圖振作將
傾之厦猶懼不支然辦事之有無效力全視朝論爲轉移果能明

定宗旨眾議僉同應辦要政則提倡而決議之未善事宜則改正以補助之

朝廷握其大綱臣工殫其智慮合全國之才力毋破壞毋阻撓有前無卻尺寸必爭庶幾新政畢修次第就理時局雖危未必無挽回之一日若乃廷議紛紜莫衷一是

詔書甫下異議橫生政令初頒糾彈屢告抑思環球強國其社會之所研究臣民之所發明非殖民闢地之謀卽富國強兵之術凡以爲公計而非爲私計爲一國計而非爲一身計者併力經營不成不止今我以積弱之邦與之相較建言之人雖亦有關心時局者而於邊事之重外交之大養民殖財之源究鮮爲

朝廷詳其規畫考其利病冀可見諸實行其掎擊齟齬者則多在
某員遷轉之速某署支給之豐方寸所營囿於利祿朝論如斯毋

亦上厯

聖懷騰笑鄰國乎值存亡危急之秋而應之以敷衍因循之術將不旋踵而禍亂之來有不可思議者臣非敢故作危詞逆料將來之事變必出於此也臣請徵之往古宋明中葉非進士不得列侍從任經撫故趙葵以邊功爲相則尼之使引疾而歸邱民仰以舉人爲巡撫則蹙之於死地乃已寶慶萬厯之朝尙書而非白首者鮮矣其時朋黨旣興自鳴鯁直而不能使臨安不下燕都不亡宋不急淮蜀而爭道學明不急封疆而爭三案朝論紛囂卒以亡國然猶曰此前代之陳迹也我

列聖鑒於前代

垂訓方來乾隆十五年

高宗純皇帝諭旨恭閱

聖祖仁皇帝實錄有言路不可不開亦不可太雜明朝國事全爲言官所壞之論大哉

聖謨億萬年訓行之準仰見

列聖嚴戒舊習力黜浮議之意是以旗員升轉不用明例言路把持垂爲炯鑒皆以策羣材戡多難爲

宗社無窮計者旣深且遠中興諸臣如彭玉麟岑毓英劉坤一張樹聲劉典劉蓉蔣益澧等起於田間出於末秩者蓋指不勝屈左宗棠之奏曰干戈起則文法廢人才出則事功成誠慨乎其言之迨其後廷議紛雜自命清流如天津之案則咎曾國藩之優柔新疆之師則咎左宗棠之糜餉他如崇實劉錦棠之改官制丁寶楨之變鹽法皆致人言凡部臣疆臣不辦事則已否則必有劾之者其設同文館立學堂築鐵路則更舉朝非之又孰知當時之詆毀

皆今日之要圖急起直追已將無及卽甲午庚子而後尙有持迂
謬之空言泥偏執之陳見者禍亂相尋時局日迫前車之鑒厯厯
可循斯真可爲痛哭流涕者也夫國家屢經事變內政外交更難
措手事權財力日見消亡儻仍指歸不定聚訟盈廷朝令暮更方
進又退元氣愈漓外患迭至恐求如今日而不可得矣我

皇太后

皇上宵旰焦勞勤求治理大小臣工允宜仰遵

慈訓共濟時艱溯自

回鑾以來整飭之

詔屢下中外之人想望忻頌謂自上年預備立憲釐定官制方有
實行之望乃近今數月廷臣之言事者於用人則謂爲倖進於用
款則謂爲虛糜於章程法令則謂爲自私於因革損益則謂爲多

事窺其意欲以此爲揣摩嘗試而令當局者不辦事不用人不用款長此因循而後快故一令未終前後異轍大綱未舉疑阻紛乘由今而觀則昔之胡林翼諸臣用兵東南清漕糧創釐金用款不可數計在今日則必謂其苛索濫支矣湘淮各軍子弟親友擢爲大吏者無限在今日則必謂其任用私人矣新疆之改行省東三省之設民官在今日則必謂其擅更祖制矣當時諸臣設非

聖明主持安得展尺寸之效今朝論視昔紛雜更甚循是以往坐守者相安無事辦事者救過不遑固與我

皇太后

皇上振興政治之初心愈趨愈遠全國之大政亦將聽其委靡不振一旦有變何以應之是以意想空談關係最重萬一列強伺我

之疏懈而用其逼迫之政策匪黨瞰我之無備而生其暴動之機
智

國家大局何堪設想此臣所日夜憂恐而不敢不密陳者也伏願
我

皇太后

皇上速定大計凡有應興之政應革之事毅然力持於上廷臣言
事有裨時局者發交各部省酌行以助不遠其有挑剔細故阻撓
大計者亦應明斥其非以示天下責令部臣疆臣合力同心以進
於自強爲標準如此則宗旨既定京外從風積習爲之一振部臣
疆臣以任事之虛實定其功罪務使勇往者勵其進取觀望者絕
其遲回自不至百作百輟而事無一成矣我

皇太后

皇上睿謨深遠洞鑷羣情前此震撼危疑皆賴

神功默運於以定大難而弼丕基今處剝復之交羣言相淆危機
又兆轉移操縱別是明非登斯世於治安縣景運於悠久此又天
下有識之士所禱祝仰望於

聖人者也臣受

恩深重目擊時艱寢食俱廢用敢不避忌諱披瀝密陳伏乞

皇太后

皇上聖鑒訓示

請 頒鑄關防印信以資鈐用摺

奏爲請

頒鑄關防印信以資鈐用恭摺仰祈

聖鑒事竊臣蒙

恩補授東三省總督兼管三省將軍事務並授爲欽差大臣謹卽叩謝

天恩仰蒙

訓誨周詳莫名欽感現在籌議東三省職司官制部署緊要事宜及調用人員端緒繁重時有行移文件擬請

飭下禮部頒發欽差大臣關防以資鈐用至三省職司官制臣等酌按時勢體察該處情形重在去虛文責實事免隔閡期迅捷自以參用軍署兼仿京部爲合宜擬先刊刻奉天省吉林省黑龍江省木質關防各一顆備鈐發該三省文牘之用俟官制奏奉俞允後再請鑄發印信以垂經久而重職守再東三省旗務諸待整理臣現奉

旨兼管三省將軍事務並擬請

正書卷八
飭部頒鑄鎮守東三省將軍印信一顆交臣祇領到任後卽將該
三省原領將軍印信咨送查銷除咨禮部查照外所有請鑄發關
防印信各緣由謹恭摺具陳伏乞

皇太后

皇上聖鑒

東事需款請先撥鎊餘摺

奏爲東事需款過鉅懇

恩飭先撥的款以濟急需恭摺仰祈

聖鑒事竊維籌辦東事首以集款爲大端現在東省百廢待興如
籌辦移民開闢墾鑛振興林業鑄造銀銅幣設立建築公司舉辦
改制各事斷非先有數千百萬之款不能措手是用款較前必須
大增而東省自近年兵燹迭經民生困苦爲培固根本收拾人心

之計又非將零星苛細各捐酌爲蠲免無以下慰遺孑上體

皇仁是入款較前又必大減臣於迭次奏對業經詳切上陳仰蒙聖慈垂察合與樞部諸臣切實籌商現已與度支部商明以上海鎊價盈餘一款積存尙多除經部提用外尙可撥給銀三百萬兩擬卽先撥此數爲開辦之用此外不敷極鉅擬再由度支部籌撥數百萬方足應急如一時無可騰挪或議借國債數百萬由度支部商承外務部主持設法辦理募集公債爲各國舉辦要政要工所必需擬卽先向沿江沿海市埠暨外洋各處華民族居較多地方便爲勸辦惟一時難集多數擬無論國債公債並准令東三省督撫自行籌借由部擔任還款免致竭蹶貽誤卽如移民一事必先集數百萬之款始能酌議辦法也又修築鐵路爲挽回實權之本若議將應修各路同時並築以及廣開各礦尤非先向各國借

數千萬之款不辦現已由外務部籌商辦理俟有端緒再行奏明
請

旨現微臣到任在即自須先得的款方能布置一切惟有仰懇
天恩飭下度支部將商明先撥之鎊價盈餘銀三百萬兩發交應
用以便開辦而濟急需仍請將應籌各款源源籌辦以資接濟所
有懇撥的款各緣由謹恭摺具陳伏乞

皇太后

皇上聖鑒

東三省當差候補各員不准藉詞他往片

再現在辦理東事非羣策羣力無以收補救之效東省人才本少
自旗署外凡實缺當差各員多係歷任將軍設法羅致而來近今
各省風氣一遇督撫更替則所用得力人員率隨之他往或竟有

託故而去者以致接任者難於就地取材遂生情形隔閡作輟不恆之患東事萬棘尤與各省不同更宜得熟悉之員經理一切庶於外交內治免有舛誤臣方擬廣羅材俊分別請調以濟時艱未來者正須加意延攬原有者斷無任聽紛紛離省致誤要公之理其經手財政人員諸待調查關繫綦重尤未便令其離差擬請飭下該三省將軍凡當差候補各員皆令照常任事不准藉詞離省離差以資任使而昭慎重謹附片具陳伏乞

聖鑒

擬定東三省職司官制及督撫辦事要綱摺

附單

奏爲遵議東三省設立職司官制及督撫辦事要綱分繕清單恭摺具陳仰祈

聖鑒事竊臣等欽奉三月初八日

論旨東三省應如何分設職司之處著該督等妥議具奏等因欽此仰見

朝廷眷顧根本與時通變之至意欽悚莫名臣等遵卽詳細籌商參酌時勢稽中外之善制揆東省之所宜謹擬行省公署官制辦法敬爲我

皇太后

皇上陳之東三省爲我

朝根本重地歷來設官分職辦法本與內地省分不同各將軍衙署原設有戶禮兵刑工五司盛京以

陪都體制又設有五部府尹以資分理近來交涉日繁郡縣日闢舉凡財政軍政警務學務無不量添局所增派官員於是舊司新局紛列漸多旗署民官畛域顯判幾於漫無統紀浸就廢弛此疆

吏之擘畫京員之章奏中外人士之論議皆以改定東三省官制爲第一要務也前蒙

聖明鑒察特裁盛京五部及奉天府尹以一事權上年又於三省添設提學司以廣教育損益通變原以振興政治有裨地方臣等以爲欲祛散漫牽掣之弊則宜有總匯公署方能合一事權欲謀整齊修舉之規則必須分置廳司方能各專職業溯考各邊將軍大臣有仿京部設戶兵各司者有派部員佐理者本兼部體

欽定歷代職官表指明督撫爲行部盛京將軍原兼兵部尙書右都御史亦有部院之稱與晉唐都督府分設長史司馬各曹參軍及英之澳洲美之各省於總督府分設財政學務等官者相合擬於奉天吉林黑龍江三省每省各設行省公署以總督爲長官巡撫爲次官皆如各部堂官於行省公署內分設二廳一曰承宣廳

稟承督撫掌一省機要總匯考核用人各事一曰諮議廳掌議定
法令章制各事就原有局署酌量歸併分設七司一曰交涉二曰
旗務三曰民政四曰提學五曰度支六曰勸業七曰蒙務仿

國初將軍設參贊及出使大臣參贊之例設左右參贊各一員分
領承宣諮議兩廳事務交涉等七司各設司使一員總辦司事承
宣廳及各司均設分科每科設僉事及一二三等科員佐之諮議
廳不設官缺酌派議員副議員顧問員額外議員皆選明達政治
者充之以資研究此外陸軍關係綦重應另設督練處以擴軍政
司法分權宜預擬專設提法使以理刑法其官制另由臣等詳議
具奏他如劃分權限酌擬補署建立衙署籌支廉費皆屬更張之
要務卽爲圖治所宜先謹遵議章程繕具清單恭呈
御覽又東三省總督恭摺

論旨責成視各省爲重謹擬督撫辦事要綱六條一併繕單呈覽其道府以下官制亦擬酌定階級以期簡捷容俟到任後體察三省情形酌籌辦法再行具奏總之東事措置上關

國家之本計外爲環海所注觀臣等惟有竭盡愚忱悉心籌畫難行者不敢曲爲因仍相宜者必求規於詳備法無一成而不變道貴因時以制宜

國初直省官制至雍正中而大更近來邊省建置亦弛張之不一此第麤擬大綱其詳細章程及以後有應行酌議變通之處仍當隨時奏明辦理再三省旗務本歸將軍管理今改設督撫總督奉特恩兼管三省將軍事務則三省巡撫亦有分理旗務之責相應
 籲懇

天恩俯准將奉天吉林黑龍江三省巡撫皆兼副都統銜以便措

置而資坐鎮所有遵議東三省設立職司官制及辦事要綱各緣由分繕清單恭摺具陳伏乞

皇太后

皇上聖鑒再暫署黑龍江巡撫程德全現未在京是以未經列銜合併聲明

附東三省職司官制章程

一設立行省公署東三省向於將軍衙署分設各司將軍副都統每日率領司員於衙署辦事與京都辦法相合現在東省外交內治日以繁難自未便照各省分設督撫藩臬各署致令公牘轉多周折屬僚疲於稟謁甚或動相齟齬貽誤要公所關非淺擬以軍署各司合之現有各局並提學司總立一署仿前代行省行臺辦法名之曰奉天行省公署吉林黑

龍江如之以總督爲長官巡撫爲次官於公署內分設承宣
 諮議二廳交涉旗務民政提學度支勸業蒙務七司隸之各
 員逐日入署事則公商稿則會畫以期赴機迅速簡省繁文
 藉收整理地方之效

一酌定官品金元行省本有丞參等官明布政司卽元行中
 書省亦設有左右布政使左右參政等官

國初將軍經略皆設參贊現在出使大臣亦設有參贊員缺
 擬於行省公署內設左參贊右參贊各一員秩從二品以左
 參贊領承宣廳事右參贊領諮議廳事交涉旗務民政提學
 度支勸業蒙務七司擬均設司使一員總理一司事務參照
 各省提學鹽運等司及軍署原設各司協領品位酌按管理
 事務之繁次量分等差擬交涉旗務民政提學四司司使秩

正三品度支勸業蒙務三司可使秩從三品承宣廳及各司均就所管事務以類相從分設各科每科設僉事一員辦理科務首科僉事從四品各科僉事皆正五品其下設一等科員從五品二等科員正六品三等科員正七品分佐之交涉提學蒙務各司別設一二等譯官民政司別設一二等醫官提學司別設一二等編校官度支司別設一二等庫官勸業司別設一二等藝士凡列一等者品視二等科員二等者品視三等科員自僉事以下無論調用京外人員皆選有專門學業及材地相宜者遴充庶幾事有專責人用專長以精職業諮議廳擬設議員副議員顧問員額外議員以集討論政治之益均不定品位不拘本省實缺候補及京外官員士紳皆選明達政治熟於本省情形者充之督撫仍各設一二三

等秘書官無定員以辦秘密緊要事件

一釐定職掌行省公署承宣廳稟承督撫辦理一省機要總
匯事件考核用人及省內省外四品以下官員升調補署諮
議廳掌議一省法令章制研究本省利病應行損益各事交
涉司掌辦理外交各事以原有交涉等局改併旗務司掌辦
理旗署各事以軍署原有戶禮兵各司改併民政司掌辦理
民政巡警緝捕等事提學司掌辦理教育等事度支司掌辦
理財賦等事以原有財政釐稅等局改併勸業司掌辦理農
工商郵電航路墾鑛等事以農工商各局改併蒙務司掌辦
理蒙部各事奉天則轄科爾沁六旗吉林則轄郭爾羅斯前
旗黑龍江則轄郭爾羅斯後旗扎賚特杜爾伯特三旗承宣
廳及各司分科名目職掌由臣等到任後體察情形酌擬奏

咨辦理此外應設局所廠場學堂公司等皆以類相從附屬各司酌令司使以下人員或學有專長辦事得力者辦理合坐言起行爲一職以資實驗

一劃分權限舊時內地各省督撫同城往往意見參差僚屬遂分黨派互相傾軋最滋流弊而同城之駐防將軍副都統則鮮聞牽掣等弊蓋一則督撫各有關防各有公署故易於生隙一則將軍有印副都統無印辦事同在一署故無由啟爭也現擬以總督爲行省公署長官巡撫爲次官凡奏咨批札稿件廳司皆以次呈督撫核定總督在他省時日行公事皆呈撫核重要事件先呈撫核電商總督定奪督撫如京部尙書侍郎三省公事皆由督撫聯銜具奏至例行之事與迫不及待者如總督出省仿內地兼轄省分之例列總督前銜

由該省巡撫一面辦奏一面電商總督以期迅速而免貽誤
賀謝各摺仍循例專奏三省皆仿京部規制鑄行省公署堂
印文曰奉天省印吉林省印黑龍江省印凡道府以下印委
公事皆祇申行省公署一分由承宣廳分交各司核辦廳司
稿件經督撫核定後卽用省印行下如此省批詳之重疊移
咨之往復權限分明文牘簡捷似較內地辦法爲合宜其廳
司印信曰某省某廳印某省某司印皆如各部司印冠省名
於上由臣等到任後再行奏請

頒鑄

一專設督練處東三省練兵關係重要現在肅清土匪巡緝
地方又倚防軍之力擬另設督練處辦理開練新軍振興兵
學整頓防軍各事俟臣等到任後再行詳議奏明辦理

一專立司法東省治理更張伊始行政司法分權宜預擬仿
明巡按御史及

國朝鹽政之制於三省各設提法使一員秩正三品專管司
法行政兼理裁判事務別爲一署暫受督撫考核節制應設
高等裁判以下各官由臣等到任後督同

新簡提法使妥爲籌議奏明辦理

一議改各屬官制東三省民官情形新設知府皆無首縣其
府廳各官自新設東邊道哈爾濱道外大率逕歸將軍及駐
省道員管轄承轉本較內地爲少各屬幅員寬廣於治理不
便多須析置江省邊城率無民官增置更不容緩且動係通
商地方民官體制自須略爲加崇擬多置府廳合州爲三級
增設道監督之知府擬仿

國初雲南各省軍民府之制不設屬縣兼轄旗民與廳州皆隸於道以期與東省時勢相宜各外城副都統官階過大動多牽礙擬照江省裁撤呼蘭等處副都統之例酌擬裁撤改設兵備道員暨以下各官以重民治三省原設知縣本兼有理事通判銜擬均升爲廳治原有廳州或酌改爲府其直隸廳有屬縣者亦改之而升廳治爲府逕隸於道以省周折統俟臣等到任後詳細體察通盤籌度再行奏明辦理

一酌擬補署辦法左右參贊及提法使各司司使品秩較崇責任綦重擬照各省布按兩司辦法作爲

特簡之缺惟現在東事萬棘經營草創非慎選得力人員不足以資贊助擬均由臣等奏保堪勝人員請

旨簡放或先奏請試署以昭慎重僉事以下擬遴選勝任人

員皆先以本官試充原官大者作爲借署原官小者作爲試署俟一年後再行請補不勝任者另行撤換彙案奏咨

一設缺分別次第奉天規模頗具事務至繁擬請將左右參贊及各司司使卽行設立吉江兩省事務較簡擬先不備設俟查看情形隨時奏明辦理又奉吉兩省訟牘亦多裁判尤重擬於該兩省先設提法使員缺所有奉天驛巡道吉林分巡道原兼按察使銜擬均請裁去以一事權江省民戶較少控案無多俟臣等到任後再行酌核辦理

一建造衙署三省原有將軍衙署均極褊隘現議合立一署分別廳司必須相度形勢另行修建方足以昭嚴整而重要公督撫參贊司使均應酌建住署僉事以下照京部司員規制無須另建住署

一籌支廉費重祿勸士圖治之本現既議改立新制分設廳司自應寬給廉費東三省近年兵荒迭乘物價昂貴數倍內地尤非從優酌給無以祛蠹弊之源責整飭之效擬俟臣等到任後酌核該三省入款從優支給僉事以下亦按三省道府當差人員現支薪水之數量爲加給以勵廉隅

一吉江兩省擬移建省治查吉林將軍

國初本駐甯古塔黑龍江將軍本駐愛琿後移墨爾根皆以控扼邊要實較今省治偏在西南者爲合宜擬俟應修東省鐵路開有規模後仍擬以吉林省移治甯古塔黑龍江省移治墨爾根亦俟臣等到任後再行體察情形奏明辦理

附東三省督撫辦事要綱

一東三省爲全球注目之地措置得失動關大局外交內治

全賴仰稟

宸謨現京奉鐵路兩日可達三省皆有巡撫表率控馭查日俄兩國在東三省統兵大員皆時常回國面商進止漢晉刺史亦有乘輕車奏事京師之制擬嗣後三省如有應辦重要事件疑難待決者准令總督隨時赴

闕面奏機宜恭請

訓誨及與樞部各臣悉心商辦以期周妥而免貽誤

一奉天距京較近爲吉江兩省根本現各幹路枝路皆以該省城爲樞紐總督應建駐署於奉天以便控制吉江兩省應各建行署以符三省各建行臺之

旨俾得隨時周歷商同三省巡撫辦理外交內治一切重要事務三省巡撫亦可隨時前赴鄰省會商整頓及互有關涉

各事並周巡屬境以嚴考查

一東三省現設巡撫辦法應與內地殊別凡三省公署堂印應由總督佩帶總督在健省時則本省印信由巡撫佩帶回省則仍交之總督督撫每日率屬皆在公署辦事以便會商而去延滯如此則收相維相助之效而無內地督撫同城院司不和之弊於整頓東事裨益匪淺

一東三省總督現奉

旨兼管三省將軍事務臣世昌並蒙

特恩授爲欽差大臣現已請頒發關防改鑄印信凡三省旗務及關涉特別重要事件均應專用三省將軍印信暨欽差大臣關防奏咨以專責成

一東三省現在整頓一切事同創始得人爲先前大學士曾

國藩左宗棠於所轄用兵之省提鎮藩臬皆准保用臣世昌
蒙

特授欽差大臣仰見

朝廷鄭重東事之至意擬東三省三品以上大員無論舊有
新設皆准擇堪勝人員指名密保或會同該省撫臣奏保請
旨簡放或派員試署以收得人之效此外各項員缺擬皆准
變通補署布衣獲咎及丁憂人員才具出眾職事必需者亦
可擢用凡實缺當差人員有績效者或按邊俸升擢及按異
常勞績保獎均由東省督撫奏明辦理能明外交者尤宜不
次任用以重交涉三省實缺候補各員擬皆得通用如江省
新設各缺用吉奉人員之例遇有差缺均可互委不分畛域
以廣量材任職之路

一東三省地處邊要諸事草創若仍拘泥例章恐致諸多貽誤擬請嗣後東三省所有吏治損益財款出入及一切事項皆暫准酌量變通隨時隨事因地制宜分別奏咨核辦俟數年後籌辦漸有端倪再查看情形奏明辦理

退耕堂政書卷八

退耕堂政書卷九目錄

奏議九

密陳擬借洋款籌辦實業摺

奉省擬補員缺須加考驗摺

請飭嚴催各省關應解奉省餉項摺

請撥用北洋扣留德商槍彈片

密陳奉省重要情形及現籌辦法摺

請派署奉省司道各缺並遵旨增改官缺摺

勦獲積年著名匪目摺

吉省三十一年分洋土藥捐缺額銀兩請免賠補摺

請將奉省已練步礮各營併編訓練摺

查明奉天捐稅情形及被參各款摺

請將史念祖等議處片

奉省設立文報局裁撤驛站摺

裁缺驛丞及候補各員量予出路片

驛站裁撤郵符由部扣除片

黑龍江購辦火犁片

退耕堂政書卷九

天津徐世昌

奏議九

密陳擬借洋款籌辦實業摺

奏爲東省商疲民困圖法淆亂擬籌借洋款以恤民艱而興實業
恭摺密陳仰祈

聖鑒事竊查東三省地方久爲俄日所覬覦近復恢張權利均以
籌借外債爲力征經營之地浸灌轉輸駸駸不已而我之稅煩商
困財政艱難欲圖抵制之方幾無措手之處臣等履任以來詳加
考察事機至曠端緒勢如而尤以體恤商民培養根本爲至要比
年屢遭兵燹物力凋敝而煙酒斗秤牛馬蕩粟九釐七釐各稅已
屬不貲近因舉行新政遂加田畝店鋪車馬各項捐款零星煩雜

小民滋困必應量加裁減休息

皇仁而培元氣民心既固國本乃立惟東省本係受協省分入款不敷近如練兵開埠設巡警興學堂等事皆須一律實行雜稅既停無從挹注蘇商民之困無以濟財政之窮此亟宜設法者也圖法爲行政命脈所關必須實幣充足價值整齊乃有信用之效力今三省無現銀無洋圓無制錢銀洋概用虛幣卽小洋亦多票券銅圓鑄本無多又以合價過賤遂皆流入關內三省之官銀號成本過少虛幣纍纍而日俄之役俄之盧布日之軍用手票散布民間爲數甚鉅徒以我無現幣商民沿用至今幾有反客爲主之勢臣等前經奏撥鎊餘三百萬兩欲以廣鑄銀圓銅圓以圖補救然圖法未能釐定財政終歸失敗以三省行政之費用貨物之轉輸徒以圖法紊亂實幣銷亡行商者不便流通實本家無所儲蓄是

圖法一日不整商務終無發達之期此亟宜整飭者也三省實業繁多藏富於地不可枚舉然興一實業必需鉅款如森林鑛產魚鹽墾牧鐵路航業等自辦之區域甚多若不及時興舉外人擴張權利必漸大其範圍實業不興斷難自立此亟宜籌備者也是故欲治三省必先於整頓財政入手欲整頓財政必先以開拓銀行入手銀行者濟困之府生利之源整齊圖法之樞紐但非如各省之官銀號僅以數十萬之成本所能補苴拾者也三省財賦久絀斷無此大宗巨款若聽其失敗則商困於稅貨棄於地外人偪處何以待之再四籌商惟有息借洋款一法臣等前蒙召見卽以三省款項不敷必須另籌大宗借款仰承

皇太后

皇上垂念陪都

諭令與樞臣妥籌辦理今者親體三省現狀非此實無補救之法擬請與歐美各國籌商息借二三千萬兩或三四千萬兩卽用以開拓三省銀行凡內地之富商外洋之僑旅儲蓄匯兌便利靈通一面減免雜捐振興實業俾使圖法一律得以操縱貨產抵制灌輸而後移民築路屯墾諸政可以次第舉行譬諸一身血脈流通乃能膚革充盈疾病不作是銀行旣爲三省根本所繫則籌借洋款尤爲必要之需此臣等熟權時勢默察情形而不能不仰邀君父之主持以顧全大局者也如蒙

俞允臣等卽與外國銀行妥籌商辦至利息之多寡期限之遲速與夫分還之的款籌抵之辦法臣等必竭力與商冀以切實可行無失主權爲要義一俟議有端緒再當隨時咨商度支部奏明辦理所有擬請籌借洋款開設銀行各緣由謹恭摺密陳伏乞

皇太后

皇上聖鑒訓示

奉省擬補員缺須加考驗摺

奏爲擬補員缺須加考驗再請實授以澄仕途而昭慎重恭摺仰
祈

聖鑒事光緒三十三年四月二十二日准軍機處鈔交趙爾巽奏
遴員請補府廳州縣各缺一摺又奏請補佐雜各缺一摺奉
硃批著徐世昌酌核辦理單併發欽此仰見

朝廷量能授官不厭求詳之至意欽佩莫名伏思東省吏治廢弛
日久重以兵燹迭經民生凋敝非慎選賢良不足以綏靖地方培
養元氣臣抵任之初卽兢兢以澄敘官方甄別賢否爲當務之急
惟通省人員較多一時耳目所及誠恐未能周知且此次變通舊

制新添各缺尤須體察地方情形量材器使俾消除積習咸與惟
新庶足以副

朝廷望治之心而圖憲政始基之效查擬補各員既經趙爾巽悉
心遴選應不至有濫竽之弊特以臣視事日淺於各該員才具短
長操行廉否雖經臣會同撫臣逐日接見究未能一一深悉其底
蘊深恐地方重寄不盡得人致滋貽誤擬請俟臣會同撫臣詳加
考核各該員果能勝任再由臣等奏明請

旨補授似於吏治民生兩有裨益所有擬補員缺須加考驗緣由
謹恭摺具陳是否有當伏乞

皇太后

皇上聖鑒訓示

請 飭嚴催各省關應解奉省餉項摺

奏爲奉省旗兵困苦待餉孔殷請

旨飭部嚴催各省關應解奉省丁未年的餉並請催解歷年欠餉以應急需恭摺仰祈

聖鑒事竊查奉省應需丁未年的餉並各省關短解奉省歷年欠餉前於光緒三十二年十二月間經前任將軍趙爾巽奏請

飭部指撥嚴催嗣准部議於山東兩淮江蘇臨清關等處地丁鹽釐鹽課釐金常稅項下撥給奉省銀二十六萬兩並將歷年欠餉另文咨催等因遵照在案現在時屆半年僅據兩淮解到了未年俸餉銀四萬兩其餘各省不但至今未解且未接有報解之文上年部撥奉省丙午年的餉銀二十六萬兩亦僅據山東兩淮臨清關等處陸續解到銀十六萬兩尙欠銀十萬兩並自光緒四年起至三十一年止各省積欠奉省歷年俸餉共計銀一百七十五萬

七千三百餘兩屢經前戶部並前任將軍奏咨分催迄今絲毫未解奉省變亂之後八旗官兵生計奇窘專賴俸餉一項以資接濟而例定抵放制餉之款僅止餘租地丁糧貨稅捐燒鍋澆票等數項向本入不敷出加以兵燹頻仍偏災時見閭閻元氣未復糧貨稅捐徵收不旺地丁餘租逐年請緩本省財力異常拮据外省協餉又復新陳並欠以致本年春季內城官兵俸餉僅按三箇月敷衍放訖而外城去歲秋餉欠放過久勢難再緩現經臣等札飭財政局設法騰挪亦擬先按三箇月撥發以濟眉急情形已屬爲難所欠內城本年三箇月並外城全季春餉實再無款可以籌撥轉瞬秋餉又將屆期加以供應

三陵祭品一切要需尤爲刻不容緩倘有貽誤關係匪輕惟有仰懇

天恩俯賜飭部嚴催各省關勉顧大局無論如何爲難先將應解奉省丁未年的餉趕速清解丙午年欠餉籌解一半以應急需其餘一半並歷年欠餉亦卽源源籌解以免貽誤所有請催奉省丁未年的餉並短解歷年欠餉緣由理合開具積欠清單恭摺具陳伏乞

皇太后

皇上聖鑒

請撥用北洋扣留德商槍彈片

再整頓營務必以簡練軍實爲要三省舊有各營所用槍械頗多窳敗且須添練新軍需用槍枝甚多但添購之款亦復不易籌畫茲查有北洋扣留德商私運軍械一項計槍七千八百桿暨隨帶子彈存儲在津未經撥用若以之撥歸東省應用旣益操防又省

耗費洵屬一舉兩得臣等與直隸督臣咨商意見相同合無仰懇
天恩俯念東省練兵至爲重要准將此項槍枝撥作三省軍隊之
需於營務實有裨益謹附片具陳伏乞

聖鑒

密陳奉省重要情形及現籌辦法摺

奉爲密陳奉省重要情形及現籌辦法恭摺仰祈

聖鑒事竊臣等抵奉以來倏已兩月念內政之所以疲茶外交之
所以困難思有以挈領提綱爲入手之辦法及靜察時變默念安
危乃知圖存之策不在內政而在外交不在今日外交之棘手而
在孤立無助雖悉心規畫終無掣於危亡何以言之治國家者皆
以內政爲根本奉天內政之所苦不過商困於捐民困於匪旗丁
無生計官吏多雜流而已然苟得人以理之非不可爲之事也但

今之奉省無內政非外交無論其干預行政權也卽令商貨灌輸工藝寢盛而我之商民捐雖減而不免於困匪雖去而無以自存縱振刷精神力圖整頓章程雖善幾等具文形式雖存毫無實力是無以處外交則內政終歸失敗也奉省幾爲俄人所占據而日本以兵力奪之今雖撤兵歸地而擲無數之銀錢生命固未嘗須臾忘也故於交涉也尺寸必爭有進無退工商之輩較及錙銖卽如前將軍趙爾巽殫心抵制竭口舌之力曾不得稍占優勝彼挾全力而謀我以空言相抵庸有濟乎今東省開商埠十餘處則各國均有通商之利宜其相率偕來有保護身家財產之念而我正可聯絡友邦以平均其勢力乃惟日俄兩國注念於茲而英法德美諸邦一若未經措意視爲無足重輕之舉動則各國待我之心不知何若而日法協約內且有尊我自主之權之語昔朝鮮自立

各國認之及今日本之行爲無一國起而干涉者前車之鑒可爲
寒心此不在今日外交之棘手而在孤立無助難與圖存也昔俄
約未定之先人人知以開放爲保全之計我曾力挽美使相與維
持允爲開放今湖廣督臣張之洞亦主此議適爲言者所阻迄未
實行曾幾何時日人抵隙而乘實逼處此若再游移敷衍不實行
開放之政更將何以自存故欲保全東省地方必使成爲各國通
商之重鎮然欲招致外商而分其勢尤視我之財政虛實以爲衡
今東省財政空乏匯兌不便儲蓄無所外商之挾巨貲運貨物者
裹足不前而日俄慘淡經營恢張權利不盡入其掌握不止由此
觀之東省首以開設銀行爲整理財政入手之辦法斷然無疑矣
臣等前在京師卽以籌借外債爲言仰蒙
聖訓令與樞臣妥籌辦法抵任以後尤以情見勢絀非早設銀行

籌借國債不足有爲因奏請商借外款二三千萬兩或三四千萬兩以爲開設銀行之用荷蒙

皇太后

皇上洞見陪都重要時勢阡危必須寬籌的款故雖度支部以各省未可輕借外債奏准在前而

聖謨廣運曲予優容仍令臣等悉心斟酌必確有把握隨時奏明請

旨辦理聞

命之下欽感莫名伏思財政爲內政外交之機關而銀行爲財政之總匯顧必需此三四千萬巨款者非謂逐項用費於此提取也蓋有此資本則外款可以吸收虛楮可以信用幣制可以畫一商貨可以流通實業可以發達卽如森林路鑛之屬動需數百萬或

數千萬兩不但自辦之說託諸空言卽合辦亦無此財力然則交涉所力爭者無實力以濟其後又何益耶夫以三省路鑛森林之亟宜興辦者正復無限如由新民達洮南以至齊齊哈爾之幹路人人以爲宜修矣墨爾根甯古塔之支路亦應次第修築矣長吉之路則議定而未辦矣若以借債爲非盍亦思蘆漢津榆諸路皆借洋款爲之至今且食其利非明效大驗耶又如日於安奉沿路之鑛要求合辦俄於北滿洲沿路之鑛有已行開採而籌議未決者至森林之利日俄兩國競爭不已若不速爲籌辦必盡爲他人所有矣墾雖放而未開實無民也欲移民則必廣興工藝而爲之招凡若此者皆非巨款不可但今日籌借所取資卽他日利源之挹注非如興學練兵巡警爲行政之費去而不返者也昔俄之經營東省也用款至八千萬盧布日本之於滿洲鐵路乃借款至四

百萬鎊而我欲空拳徒手以相頡頏此坐斃之勢也是以東省之辦外交有特別之困難非可以內地例之東省之借國債乃關係乎安危亦非可以內地繩之部臣苟鑒於此且將爲東省日夕圖謀廣籌巨款爲保全根本之計何至以取攜旣便消耗無形之說相詆訕也且東省關係之重什倍於內地卽內地各省亦日日補苴罅漏之不遑豈宜獨委其責於督撫臣而已當此財力殫盡亦惟求濟於部臣視補助之多寡爲辦事之分寸如其無款可籌則仰屋同嗟在疆臣亦豈有點金之術實因際此時艱部庫空虛協款無著而臣等受任至重受

恩至深豈忍坐困強鄰一籌莫展故息借國債之舉熟思審處實出於無可如何固非敢以巨款爲孤注之一擲也但籌借之數必視三省之財力爲斷要當預計通籌三省力量所及能借若干萬

兩定以年限而無使愆期分以償還而豫儲的款然後確有把握不致臨時無據容俟合議會商籌借定有辦法再行奏明請旨辦理抑臣等更有進者曠觀今日時勢危迫萬分而東三省者尤全國存亡之關鍵也日法之約協盟甫定朝鮮卽相繼而亡歐洲各國方且贊成此舉今日俄之協約又成此後我滿洲之交涉必非如前數年牽掣猜忌之意見矣兩鄰交歡日暹於南俄暹於北度必有大興作於我之沿海沿邊以擴張其勢力者而我之邊備空虛財政疲困加以內地亂黨搖惑煽動乘機待發皖事一出各省震驚如不思防患之策圖存亡之方行憲政以遏亂萌開誠心以講交際而徒以拘墟庸昧之談出而疑阻必使不辦事不用錢粉飾欺蒙以苟安其祿位則致天下大亂之原卽在於此此尤臣等日夜焦思而不敢不直陳於

君上之前者也臣世昌在奉部署稍定卽當前往吉林黑龍江與兩省撫臣籌辦一切合併聲明所有奉省重要情形及現籌辦法緣由謹恭摺密陳伏乞

皇太后

皇上聖鑒訓示

請派署奉省司道各缺並遵 旨增改官缺摺

奏爲請派署司道各缺並遵

旨增改官缺以資治理恭摺具陳仰祈

聖鑒事光緒三十三年五月二十七日恭奉

懿旨各省按察使改爲提法司並增設巡警道勸業道缺裁撤分守分巡各道酌留兵備道著由東三省先行開辦如實有與各省情形不同者准由該督撫酌量變通奏明請旨等因欽此旋准考

察政治館將續訂直省官制咨行前來伏查原奏內開東三省根本重地經畫宜先此次官制辦法擬先從東三省入手除實與內地情形不同者應聽其量爲變通又清單第七條內開除東三省外各省均置三司各等語仰見

皇太后

皇上俯念東三省官制事同草創與內地情形不同准其酌量變通莫名欽佩臣等抵任以後詳加考察實以同署辦公混意見省承轉爲行政最善之法自應從東三省辦起所有三省督撫參贊以下各官臣等前次奏陳東三省行省官制章程請設交涉旗務民政提學度支勸業業務七司各設司使一員業經奉

旨允行在案現除旗務業務兩司本爲東省特別官制外其交涉民政提學度支各司各有專任均應仍遵前奏辦理至勸業有保

商之責巡警爲安民之官應遵照此次

懿旨將原奏之勸業司改爲勸業道並增設巡警道一缺其奉天分巡道亦遵卽裁撤惟巡警雖爲民政之一端而奉省巡警已普及於各屬鄉鎮允宜特設專官民政司以組織地方自治爲重要卽可劃出警務一門俾之分任奉省局所林立公牘紛雜權限混淆亟應挈領提綱與之更始故以上各官卽擬遵照原奏先行分別派員試署以爲開辦之基如有窒礙及增減之處再行隨時變通以臻美備茲查有奉天驛巡道陶大均心氣和平思慮周密堪以試署交涉司司使正紅旗滿洲印務參領恩志器識寬宏辦事妥慎堪以試署旗務司司使存記道調補奉天錦州府知府張元奇厚重閎通才堪大受堪以試署民政司司使奉天東邊道張錫鑾老成練達洞悉事情堪以試署度支司司使候選道黃開文勤

明耐事強幹有爲堪以試署勸業道在任候補道奉天府知府鄧
嘉縝樸誠廉正物望允孚堪以試署巡警道仍由臣等隨時察看
如能勝任再行請

旨簡授其蒙務一司尙未選有堪勝人員容續行奏請試署至各
廳司道以下各員容由臣等督率該廳司道擬定分科設缺章程
再行具奏其吉江兩省各司道應如何酌量設立之處俟臣世昌
行抵該省察看情形與該兩省撫臣會商籌設再行奏明請
旨辦理所有陳請派署司道各缺並遵

旨增改官缺緣由謹恭摺奏陳伏乞

皇太后

皇上聖鑒訓示

勦獲積年著名匪目摺

奏爲勦獲積年著名匪目恭摺奏

聞仰祈

聖鑒事竊查奉省比年以來鬍匪橫行最爲民害臣等抵任後訪聞有著名匪目杜立山卽杜天義與田玉本等各率黨羽盤據遼西幫掠勒贖飄忽無定庚子亂後該匪等各率黨羽千餘分幫剽劫官軍進勦列仗拒捕誘兵設伏屢爲所乘迨日俄起衅該匪等在戰綫以內任意恣睢燒殺姦淫無惡不作新民鎮安遼陽海城遼中廣甯彰武各處民物騷然控案山積田玉本名爲就撫而屢撫屢叛出沒無常杜立山則在匪巢堅築礮臺陰結死黨到處設卡以爲負固之計復藉巡警爲名廣購槍礮勒索居民實爲元惡大憝經前將軍趙爾巽飭巡防營務處嚴密訪拏臣等當復嚴飭派出營隊認真防勦務獲究辦去後茲據巡防營務處本任東

邊道張錫鑾等報稱該匪杜立山所部匪黨與積匪田玉本在小北河地方互鬪滋擾經右路統領張作霖帶領隊兵與丁憂知縣殷鴻壽等馳往該處乘其不備將田玉本在眾中擊斃並陣斃夥匪杜洛疙疸鄭澱才甯黑子等及餘匪數名我兵受傷二名陣亡一名旋將杜立山生擒至營卽在新民府地方會同該署知府沈金鑑訊明就地正法以昭炯戒並一面搜勦該匪巢穴起出軍械平除碉卡餘匪投誠現在地方安靜商民稱快等情並開單擇尤請獎前來臣等查該匪目杜立山田玉本等以積年巨匪屢與官軍接仗罪大惡極今兵不血刃渠魁授首不但遼西安枕卽他處匪徒亦當聞而知懼該統領等赴機迅速實屬異常奮勇自應准其擇尤請獎以昭激勸除在事出力之巡弁兵丁業由臣等酌賞銀二千兩並將傷亡兵丁分別查明照例撫卹外合無仰懇

天恩俯准將單開之藍翎游擊銜補用都司張作霖請免補都司以游擊儘先補用並請

賞換花翎候補知縣殷鴻壽請免補本班以同知直隸州補用並請

賞加四品銜儘先補用佐領依欽保請俟補佐領後以協領儘先卽補並請

賞戴藍翎藍翎五品頂戴儘先補用千總張景惠請免補千總以守備儘先補用五品頂戴儘先把總湯玉麟請免補把總以千總儘先補用以爲勦匪奮勉者勸出自

逾格鴻慈所有勦獲巨匪正法地方安靜並擇尤隨案請獎緣由謹恭摺具陳伏乞

皇太后

皇上聖鑒訓示

吉省三十一年分洋土藥捐缺額銀兩請免賠補摺

奏爲吉省徵收光緒三十一年分洋土藥捐缺額銀兩查明實因日俄戰事牽累請免賠補恭摺仰祈

聖鑒事竊准度支部咨議復吉林將軍奏吉省光緒三十一年分短收洋土藥捐銀兩懇免賠補一摺查該省土藥稅捐定額本自無多如謂戰事牽累商販不通而三十一年與三十年情事相同何以收數頓相懸絕若不責令如數分賠恐年復一年稅款將歸無著應否責令各該局員分攤賠繳擬請飭下新任東三省總督吉林巡撫破除情面詳細查明據實復奏俟復奏到日再行覈辦等因光緒三十三年五月初十日具奏奉

旨依議欽此欽遵鈔奏咨行前來臣等伏查吉林土藥稅捐原定

每年額徵銀二萬六千兩又加徵銀四千八百七十五兩零二共
應徵銀三萬八百七十五兩零光緒三十一年分通省僅徵銀一
萬四千三百九十二兩六錢七分五釐七毫五絲較之原額不敷
甚鉅當經前署將軍達桂據實奏報並聲明因日俄開戰農民逃
避商販裹足致難如額請免賠補旋奉部駁又經前署將軍達桂
以光緒三十一年分洋土藥捐銀兩實因日俄戰事牽累委非經
徵不力仍請免賠據實覆奏在案奉准前因遵卽派員確查去後
茲據委員查覆臣等復詳加考覈委因光緒三十一年日俄戰地
逼近吉林境內又半駐俄兵各要道防禦嚴密商販不通人民遷
避種者甚少是以收數大減較之三十年間日俄初戰之時戰地
距吉尙遠吉省雖受影響而農民尙可栽種道路並未梗塞者情
形迥不相同各局徵收短絀實係事出有因合無仰懇

正言名
天恩俯准免其賠繳出自

逾格鴻施至此後吉省各項稅捐臣等已嚴飭局員釐剔弊端認真整頓以期收數日有起色儻有不肖員司仍前弊混定卽嚴行參辦以重稅務是否有當合將查明光緒三十一年分吉省洋土藥捐短徵銀兩實因日俄戰事牽累請免賠繳緣由恭摺具陳伏乞

皇太后

皇上聖鑒訓示

奉省已練步礮各營隊併編訓練摺

奏爲擬將奉省已練步礮各營隊併編訓練以資擴充恭摺仰祈聖鑒事竊上年前任將軍趙爾巽以奉省戰事初平萑苻未靖請募練協巡隊二千人以補巡警之不足奏明奉

旨允准本年三月趙爾巽又奏請開練新軍二鎮經軍機處鈔交到臣各在案臣等到任後查趙爾巽擬練新軍二鎮係就已練之協巡等營作爲模範以期逐漸推廣計已練者協巡一營卽係請練之巡防隊礮隊一營作爲衛隊備補隊一營附屬巡警皆以陸軍新法教練協巡營官弁目兵多由北洋陸軍擇尤撥補其編制尤與陸軍無異當日假託其名分別募練原係一時權宜之計現值擴充軍政亟宜先行併編以歸畫一而資推廣又臣世昌前在巡警部任內因巡警創設防範難周奏設協巡隊左右兩路嗣內外城巡警徧立劃區分巡該隊防務旣減民政部又籌餉爲艱除陸續退伍外尙有六百餘名經臣等調撥來東改爲親軍營自五月分起該營餉項已劃由奉省支給該營目兵原係各鎮之續備軍操法精嫻現擬將奉省原有之協巡營備補隊礮衛隊暨此項

親軍營改編爲陸軍步隊一標礮隊一營以資訓練一切章制均遵照陸軍部奏定成案辦理其餉乾銀數及各項津貼等費就原支餉數平均計算尙可勉強敷用礮衛隊改編礮隊另編練衛隊二百名應需月支餉項暨各標營併編伊始應添換各項器械需用銀兩均請作正開銷除將編改清冊咨部備案外所有請將奉省已練步礮各營隊併編陸軍標營各緣由是否有當謹恭摺具陳伏乞

皇太后

皇上聖鑒訓示

查明奉天捐稅情形及被參各款摺

奏爲遵

旨查明奉天捐稅情形及被參各款據實覆陳仰祈

聖鑒事光緒三十三年三月十三日准軍機處字寄奉

上諭前據御史張世培奏奉天捐稅煩苛趙炳麟奏趙爾巽任用史念祖辦捐滋擾各摺片單著徐世昌按照所參各節確切查明據實具奏毋稍瞻徇原摺著鈔給閱看欽此當卽密札署奉天提法使吳鈞候選道陶仁榮等遴選幹員按照原參各款分途嚴密查訪務得實情去後茲據該司等先後逐款稟覆經臣詳細調查與該司等所覆無異證諸原參各節有傳聞失實者有確有證據者謹以考查所及爲我

皇太后

皇上縷晰陳之如御史張世培原奏謂將軍趙爾巽蒞任兩年毫無補救所請辦公之款不下數百萬兩又設財政局以史念祖爲總辦假就地籌款之名爲竭澤而漁之計統捐有稅落地有稅多

立名目展轉抽收一節查前將軍趙爾巽到任以來適值日兵未
撤地方擾亂該將軍請款一百萬兩爲籌辦善後創行新政之用
並無數百萬之多在任不及兩年收回地面撫卹災黎徧設學堂
廣興巡警各項新政次第舉行不可謂毫無補救奉天捐稅本極
紛繁名目之多漫無稽考如斗秤捐釐捐河口糧稅河防稅營口
八釐捐東邊糧貨山貨各稅沿海口船規湊掛各邊門門捐沿鐵
路火車稅之類紛紜龐雜歷任相沿自該將軍設財政局以總理
之將以上各名目一律裁併改爲統捐內分出產銷場兩稅出產
稅專收本省土產各貨值百抽一五銷場稅無論洋土雜貨值百
抽二並無落地稅名目惟煙酒土藥燈膏木植鹽釐牲畜車捐各
稅另定專章不在統捐之內曾經咨部有案查統捐稅則本較原
稅爲輕而商民反覺不便收數亦形短少比因上稅時估價未能

平允而沿途驗票不免留難臣現正考查情形設法整頓試辦合宜再行另案奏明辦理然該將軍改定統捐之意則固在整齊稅則以蘇民困非欲竭澤而漁也又原奏謂良懦者忍氣吞聲傾家敗產去年臘底大小千有餘家桀黠者挂洋牌合洋夥姦民勾結付之不見不聞營口向爲轉運糧貨之埠視大連灣較爲近便此時反多往大連不由營口豈非畏華官苛索致利權外溢一節查內地通商誠有姦民挂洋牌合洋夥之弊而奉天尙不甚多去冬因禁止過碼商家致有倒閉者然未聞大小千餘家之多至營口商務之壞一由於遼河淤淺輸運甚艱大連灣則水陸均便故商貨趨之一由於從前祇營口通商爲各貨必經之路商埠一開洋商行棧隨處皆是洋商除子口半稅外內地概不再徵華商完納統捐必須指定銷場若運往他處又須另稅一由於南滿洲鐵路

直達大連腳價輕減轉運便捷而關外鐵路從前僅至新民故各商皆趨赴大連固非華官苛索所致也原奏謂史念祖罔顧民艱秋毫必析婦人孺子同聲唾罵省人羣以二將軍呼之一節查史念祖自任財政局督辦各稅章程多出其手牛馬查圈等章誠有苛細之弊其派稅差每不關白將軍不肖委員見其勢傾一時以其曾任疆吏有以老帥稱之者惟未聞有二將軍之號至其單開各條皆係統捐及牛馬稅章程曾經咨部有案臣等現亦正在分別整頓如有病民之處卽當嚴行禁除以廣

皇仁此查明御史張世培原摺所參之實在情形也又如御史趙炳麟原奏謂奉省剪照斧照每年每照交課十千官給小照一紙趙爾巽用史念祖之策定清賦章程十七條及丈山丈灘諸章程欲將剪照斧照廢棄而地價賦則又過昂貴民懼其累致荒本業

趙爾巽又用史念祖之言強迫行之於是鳳凰廳鮑姓因不領地被委員魯姓迫以兵力幾釀民變一節查剪照一項光緒二十四年改由盛京戶部設局經征換用部照每地照費六錢三十一年戶局裁撤由省派員經營斧照向由盛京工部發給按年交費四十兩每木一料向例旗署經征及代工部並承領斧照之人共收錢七百五十文自木植歸併斗秤局之後旗署經征代收之項均卽停止查原辦山荒章程第七條內開將領有剪照斧照之山場限一月內儘原領戶呈驗原照交價升科並將原照概行撤銷如逾限不報或不願交價一概撤出局放等語然至今報領山荒者無多承繳剪照斧照者亦無多至山場地價章程照清賦遞減一等熟地上等每畝一兩五錢中等一兩下等五錢生荒上等每畝七錢五分中等五錢下等二錢五分仍加收一五經費賦則不論

生熟上等每畝完糧五分中等四分下等二分熟地當年起科荒地第四年起科原定之數尙非昂貴三十二年設鳳岫墾局丈放各屬山荒葦塘派已革廣東龍川縣知縣鄧景臨爲總辦十月間該總辦派豫字監繩委員魯繼曾在雪裏站丈放山荒居民觀望有鮑成順者爲該處大糧戶委員先至鮑處勸導鮑姓不服因而爭吵互相口角鮑姓兄弟復率眾至委員處辱罵該委員遂以聚眾抗丈等情稟請總局派兵彈壓總辦鄧景臨適在孤山其文案李姓電請將軍派兵往拏前將軍趙爾巽遂有嚴拏首要解散脅從之札鮑成順畏罪潛匿將其兄鮑成太拏獲監禁鄧景臨亦以辦理不善撤差該局歸鳳凰廳同知樊恩慶接辦本年正月復派員前往丈地鮑成順突帶多人將書役綁去七人意在換回伊兄樊恩慶聞報帶兵前抵該處忽聞槍聲中傷捕盜兵張其發身死

稟請將軍撥隊往勦鮑成順將綁去七人放回伊即逃避迄未捕獲案懸未結原奏謂岫巖州丈山委員鄧景福蕭鎮等勾通痞棍李寶貞勒索賂賂民人官价超論之亦被馬隊捕拏逼死其老婦一節查鳳岫壑局總辦係鄧景臨非鄧景福蕭鎮爲該局辦事委員該總辦設局後即勘丈葦塘招戶報領乃觀望多日無人認領始句出本地人李寶貞首先呈報李寶貞素無正業亦無葦塘竟捏報魁戶之塘怨讎之興實由於此該局復傳塘戶曹雙子江世奎到局適江世奎之妻張氏素患瘋病差傳之日張氏瘋病復發投井而死經鄉保往查報縣有案委非局差逼勒實以事出一時致有此謾訪之輿論眾口一詞岫屬宮家屯有會首宮超价因不肯報領送州收押旋即保釋並無官价超論之其人原奏所參或卽指此又原奏謂岫巖督銷委員馬晉卿亦以私索陋規致滋民

怨趙爾巽派朱慶瀾統兵捕拏將良民張福祥之子用槍擊斃朱慶瀾乘此詐贓掠去永耕長鋪戶錢萬餘串索得劉毓清錢三千串追兵隊過土龍遂拏滕姓等十四名誣爲抗官首要解省懲治一節查岫巖鹽釐委員通判王瑞高征收鹽釐暨加價兩項按該處錢價每石收三十七千維時加價初奉部文民間疑爲私征馬晉卿充該處督銷局灘總遇有鹽票不符動輒嚴罰致生民怨王瑞高因民間不願因又減收每石減至十三四千鄉民愈疑於是張福祥滕紀元陳洪亮等首先倡議每石祇按向章納釐九錢三分三釐聚集多人前往該局拉去鹽數百石王瑞高卽以聚眾抗捐拉鹽等情稟由前將軍派委同知廷瑞前往查辦適值滕紀元等復往拉鹽廷瑞勸導不散省城卽派統領朱慶瀾帶隊分別嚴拏解散朱慶瀾到岫飭令商會照章納捐眾戶皆散獨滕紀元張

福祥等尙欲聚眾抗捐朱慶瀾又派隊往捕至榛子山將張福祥
拏獲其子張三和見父被捕情急向兵奪槍該兵遂將其擊斃至
該隊往捕陳洪亮時陳洪亮適在其鄰居陳耀仁所開之永耕長
鋪內被獲時鋪內無人事後查點失去錢帖一萬一千吊當卽往
營呈報朱慶瀾卽查追出錢兩千六百六十千零二百文交該
鋪領回其餘錢帖詳詰陳耀仁據稱曾有本地匪人支取過一千
五百吊其餘所失之帖不敢指實朱統領實無索詐情事劉毓清
一事因南路馬隊營官馬得荃往拏滕紀元僱覓眼線回世隆在
劉毓清家將滕紀元捕獲回世隆因滕紀元在劉毓清家書寫盟
約遂帶至邵家店旋將劉毓清保釋應許回世隆三千吊經劉毓
清之弟劉毓章先後交付此事與朱慶瀾無涉陳耀仁劉毓清二
人均經派員訊明取供案無遁飾此查明御史趙炳麟所參各節

之實在情形也臣查前將軍趙爾巽值內外交困之時勵精圖治其裁五部府尹剔除中飽進款驟增至數百萬兩卽設財政局爲籌萃款項之區改統捐爲統一租稅之策亦出於事理之當然又如創辦新政卽學堂巡警兩項已普及於各屬用款旣多斯籌款更亟而奉天值凋敝之餘其取之於民者名目改而因啟猜疑其取之於官者中飽去而日生怨謗然經營規畫之苦心固可以共諒也該將軍素性坦白用人不疑而史念祖爲財政局督辦乃至營私自利罔恤人言實非該將軍所及料臣已派員查明另片具奏請

旨辦理至鳳岫墾局總辦鄧景臨始則聽委員魯繼曾之言請兵往拏致令鮑成順聚眾抗捕有綁去書役槍斃兵丁之事後復聽從委員蕭鎮句串李寶貞捏報塘地認領實屬昏瞶庸劣居心貪

鄙僅予撤差不足蔽辜委員魯繼曾倉皇請兵致釀巨案蕭鎮貪小嗜利任性妄爲亦屬咎無可辭鮑成順屢次聚眾抗違至今案懸未結仍飭令嚴拏歸案訊結以儆刁風岫巖一案通判王瑞高加減任意不洽輿情縱令灘長馬晉卿嚴罰致滋民怨張福祥等抗捐拉鹽顯干例禁迨朱慶瀾率隊勸導猶圖抗拒實屬形同匪類其子張三和向兵奪槍致被擊斃與擅殺無辜者有間陳耀仁所失錢帖報營後卽追出二千數百吊則非該統領索詐已自可信且取有陳耀仁供詞爲證並據供稱該統領派哨官在明堂石一帶駐紮以防匪擾民賴以安是辦理尙無不合應請免其置議回世隆充當眼綫藉端訛詐不法已極應飭令嚴緝究辦營官馬得荃任用匪人索詐多贓毫無覺察亦屬咎有應得相應請旨將已革廣東龍川縣知縣鄧景臨勒令回籍永不叙用候選通

判署岫巖州知州王瑞高候選府經歷蕭鎮補用守備馬得荃一併卽行革職以示懲儆魯繼曾查無職官該局裁撤後久已離差應俟飭緝到日另行辦理所有查明奉天捐稅情形及被參各款緣由是否有當謹恭摺覆陳伏乞

皇太后

皇上聖鑒訓示

請將史念祖等議處片

再整理庶務要以財政爲總樞奉天財政局所有弊端有爲張世培趙炳麟等原參所未及者史念祖受前將軍趙爾巽信任委爲該局督辦乃剛愎專擅老而嗜利會辦葉景葵金遷等任意把持工於牟利鑽營蒙蔽寢成習尙臣受命之初卽奏請三省人員毋得紛紛乞退奉

旨允准咨行在案乃史念祖葉景葵金還等皆不候交代相率颺去以致總匯之地紛亂淆雜莫可稽考臣同撫臣唐紹儀抵任後悉心查訪嚴密鉤稽乃知該局情弊皆以督會辦爲領袖其所用各員如總文案任毓麟假公濟私不恤人言糧租所總理俞泰初賄賂公行頗滋物議稅務所總理現署東平縣知縣陳廷絜苛細搜剔貪黷無厭前稅務所主稿現充鹽務局提調周肇祥苛刻性成擅作威福清賦所總理孫賢濟舞弊罔利怨讟煩滋前主稿屠通駿貪鄙性成不知自愛庶務所主稿潘瀛利欲薰心不堪造就收支所委員全祿剋扣款項聲名狼籍庶務所總理田徵葵刻扣工程任意浮冒如協餉一款於該前將軍交卸啟行後始行登簿賑捐收款將舊簿內所存七釐經費八釐平餘等項另換新簿更改數目該局又將私虧之項悉數鎔銷彌縫迨按款核對旣無公

牘又無前將軍手諭者爲數甚鉅丈放東流圍荒寒葱頂子山荒一段侵蝕領戶款項購買軍火銅斤多取浮冒顯有不實不盡於是外城稅捐各局大半以利營求如蓋平鹽局委員張元龍鑽謀無恥海城稅局委員趙孚行止貪污復州稅局委員王炎性情卑鄙東平稅局委員曹自元浮收捐款賑捐核獎處委員張鴻鈞罔利營私新民稅局委員徐芝取巧鑽營其餘如安東鹽務委員兼商埠局提調徐龍遇事索賄民怨甚深營口稅務委員忠駿侵蝕巨款怨讟叢滋銀圓局總辦王曾俊吞蝕餘利蒙混取巧是該局曠比羣小政以賄成若不明示創懲何以儆官邪而清財政督辦史念祖身膺表率乃竟罔利貪污甘冒不韙葉景葵金還會辦財政挾其權利百弊叢生致令帳目淆雜款項錯亂是史念祖之措置乖方實葉景葵金還有以致之自應分別澈查以示懲儆相應

請

旨將二品銜軍機處存記留奉補用道葉景葵湖南候補道金還
卽行革職聽候歸案查辦分省補用道周肇祥候選道王曾俊分
省補用知府任毓麟留奉補用知府徐鼐留奉補用知府忠駿保
升知府留奉委用同知俞泰初分省補用直隸州知州全祿山西
候補知縣陳廷絜直隸候補知縣孫賢濟留奉補用知縣王炎候
選知縣張元龍分省補用知縣張鴻鈞署錦縣知縣湖南補用知
縣田徵葵候選知縣屠適駿江蘇候補府經歷趙孚江西試用巡
檢曹自元一併革職以爲貪污者戒已革順天武清縣知縣潘瀛
已革廣西候補知縣徐芝均勒令回籍永不敘用副都統銜記名
副都統史念祖應如何量予懲儆之處出自
聖裁葉景葵金還平日頗有才名卽任毓麟周肇祥等亦皆有辦

事之才如果案經查明深知愧奮未嘗不可棄瑕錄用擬請均交
臣察看時局艱危人才難得臣查辦此案就事論事悉心核定不
敢稍存成見其餘地方官吏及各局所委員如查有不能稱職者
再行據實糾參奏明請

旨辦理臣爲整飭官常起見是否有當謹附片具陳伏乞
聖鑒訓示

奉省設立文報局裁撤驛站摺

奏爲奉省設立文報局所有原設驛站擬請概行裁撤以節經費
恭摺仰祈

聖鑒事竊奉省設立文報總分各局情形業經前將軍趙爾巽附
片具

奏並聲明原設驛站應如何裁併之處現飭驛巡道確查另覈辦

理等因在案茲據該道陶大均詳稱遵查奉省原設二十九驛共計驛丞二十九員驛丁四千四百名額馬一千一百七十四匹現存馬二百一十六匹缺額馬九百五十八匹每年應領馬乾實銀一萬五千五百八十兩八錢買補馬價實銀二千五百三十四兩四錢現既設立文報總分各局遞送公文較前迅捷且近來恭送祭品車輛已改由承德縣雇備呈進

貢品以及各項差使亦均由火車行走此項驛站直同虛設自應全行裁撤以節經費所有原支馬乾各款應請截至光緒三十三年七月底止一律停支該款向經報部作正開銷應請截留以爲設立文報局之用仍於用後報部核銷現存馬匹飭令變價歸公其缺額馬匹委因頻年兵燹草料昂貴原領例定馬乾銀兩不能敷用無從購補且相沿已久不自今始現在裁撤驛站各驛丞均

係微末窮員倍形苦累責以賠繳力尤未逮擬請概予免追以示體恤其原有驛丁永免當差此後凡運送

祭品

貢品以及馳驛各差改歸火車行走或地方官應付所需車馬各價以及廩給均准核實開報請銷以免賠墊等情請

奏前來臣等覆核無異相應請

旨飭部查照立案施行所有奉省原設驛站擬請概行裁撤緣由理合恭摺具陳伏乞

皇太后

皇上聖鑒

裁缺驛丞及候補各員量予出路片

再奉省驛站現經臣等

奏請裁撤所有裁缺驛丞二十九員候補驛丞三十四員或現膺實缺而遽賦閒居或需次多年而序補絕望其情不無可憫似應量予出路以免向隅臣等一再籌商擬請將該員等歸部以驛丞及對品之典史等官銓選有願分發各省候補者並准其呈明辦理以示體恤是否有當理合附片具陳伏乞
聖鑒飭部議覆施行

驛站裁撤郵符由部扣除片

再前准兵部咨催造報光緒三十年及三十一年分郵符冊籍一案當經前任將軍趙爾巽以檢查前准

盛京兵部移交卷內並無三十年用過郵符案據實屬無憑造報惟查奉省恭進

貢品以及向歸馳驛行走各項差使現值鐵軌暢通均已改由火

車運送以期便捷無須發給勘合火牌故三十一年分亦無冊可造嗣後亦卽無須請領咨覆去後嗣准部咨以該將軍咨稱各節事屬變通舊例應由該將軍自行奏明以便本部年終奏銷郵符聲明扣除等因趙爾巽未及核辦卸事移交前來臣等查案相符現在驛站業經另摺奏請裁撤前項郵符更無所用自應由部扣除除咨陸軍部查照外理合附片陳明伏乞

聖鑒

黑龍江購辦火犁片

再農業爲江省要端惟邊地財政困難非官商合力振興無由濬利源而裨本計臣德全前飭本省瑞豐農務公司訂購火犁兩具曾於統籌應辦事宜摺內陳明在案現已由滬購運到江總計價銀共用二萬二千二百五十兩據該商等將原訂合同呈送察閱

當卽派員試驗尙屬合用自應由官認發價銀將火犁轉發該商等令其招集股本在訥謨爾河南段自行收價代墾一俟著有成效再將官本分年撥還並續行購置以期推廣辦理惟江省商力異常艱窘此次所需運費暨聘用洋匠等項爲數已屬不貲目前赴段開墾持久尤屬非易已由臣等檄派布特哈東路總管福齡就近督飭並隨時體察情形總期由官中極力維持庶新機不廢於半途而殖民可收夫成效除飭該公司妥訂章程咨部查核外理合附片具陳伏乞

聖鑒

退耕堂政書卷九

三十三

三十三

退耕堂政書卷十目錄

奏議十

黑龍江訥謨爾河荒務出力人員請照原奏核獎摺

通事王文渡就地正法片

吉林酒捐改徵片

奏陳官兵在吉林境內勦捕巨匪情形摺

查明大員被參各款據實覆陳摺

遵籌辦理蒙務情形摺

派員籌辦延吉邊務摺

密陳三省切要辦法四條摺

附單

酌擬奉省提法司衙門及各級審判廳檢察廳官制職掌員

缺摺

附單

退耕堂政書卷十

天津徐世昌

奏議十

黑龍江訥謨爾河荒務出力人員請照原奏核獎摺

奏爲訥謨爾河南段荒務出力人員前係遵章擬保謹陳明實在辦理情形請仍

飭部查照原奏核辦恭摺仰祈

聖鑒事竊查江省訥謨爾河南段荒務告竣前經臣德全於本年四月間遵照新章奏請獎叙欽奉

硃批該部議奏單併發欽此旋於七月初二日接准度支部咨稱究竟某員征收荒價若干每年增收租額若干原奏清單均未分晰聲叙核與新章不符又查該段荒地現在各領戶尙實欠押租

銀十四萬四千餘兩應令轉飭趕緊收齊並將某員征收荒價及
每年征收租額各若干分別造具細冊送部再行核辦奏明遵
旨行知前來臣等詳加查核在部臣不過力求核實期於脗合新
章惟當日原奏請獎各員均係恪遵政務處會奏保舉章程按數
核計擇尤列保但以限制過嚴其出力各員尙多向隅至必謂某
員經手征收荒價若干始爲分別擬獎此在言論固近於核實而
在理勢斷有所難行查征收荒價有由委員勸募者有由領戶代
交者雖有招徠之功僅供奔走之役且收數旣零星湊合人類更
凌雜不齊勢難按款辦理况查行局得力人員自總理幫辦提調
以次所有主稿收支清訟繪圖暨丈地各員以及得力各司書皆
屬著有勞勩此外則省城總局亦有總覈統計之責凡此皆辦荒
最爲得力之員亦皆勢難經手收款之員若必專按款項核辦則

得獎者未免偏優而見遺者反膺鉅任衡情酌理豈可謂平且收款多寡不齊核獎旣數難恰合細冊更無從造報此則要在疆臣遵章核實具保而無取多造冊籍徒增繁文者也至每年征收租額若干一節計訥謨河荒地每晌收押租銀一兩四錢以收銀五萬兩計之合七成實地計三萬五千七百餘晌每年應收大租錢二萬一千餘吊以合新章二千五百兩之數洵屬有贏無絀其收價二萬兩徵租一千兩者亦同此例至該處領戶欠交荒價十四萬四千餘兩自應催飭趕緊交齊臣德全前因該段荒地丈竣已久又兼堆放訥謨河北段近來收價漸不踴躍不能不稍示激勵

早額

鴻施蓋獎其旣竟之功正以策各局方新之氣應懇天恩飭部仍查照前奏核獎以彰前勞而責後效出自

逾格鴻慈所有陳明辦理荒務情形無從造具細冊仍請查照原奏核辦緣由理合恭摺具陳伏乞

皇太后

皇上聖鑒訓示

通事王文渡就地正法片

再江省自外兵駐境以來往往因不肖通事詐索不獲一言之頃竟自戕人生命毀人室家非盡法嚴懲何以雪沉寃而全善類查有通事王文渡上年隨俄隊道經蘭西縣唐栗泡地方因隊官瓦夫聶誤疑該處團練爲匪該通事不乘時急爲剖辯竟敢借勢向練總楊德索俄銀五百盧布洎楊德許爲張羅該通事猶慮其設辭誑已竟向俄人指練爲匪以致俄兵開槍將練勇擊斃四名復用刀砍傷十二名前據該縣稟報情形當經臣德全照會俄提督

暨鐵路公司查辦去後茲據試署安達廳通判翟文選購線派兵會同哈埠交涉局獲犯解省經交涉總局詳訊據供前情不諱呈請核辦前來臣等查王文渡特因詐財不遂竟敢唆使俄兵傷斃練勇多命實屬貪狼兇殘罪無可逭當經批飭就地正法以昭炯戒除咨法部查照外謹附片陳明伏乞

聖鑒

吉林酒捐改徵片

再吉林酒捐一項原奏每斤加徵制錢十六文本係仿照直隸章程辦理乃奉行不善輾轉取盈而前署將軍達桂又以事關軍餉復奏請再加一倍徵收該局乃抽收至四五倍中飽滋多遂致燒商歇業現此事既經查明亟應設法整頓以蘇商困查原奏所加制錢十六文數目尙屬公允本可仍照原案辦理但吉林錢賤銀

貴若照原數徵收必致驟形短絀現擬每斤改爲徵銀一分四釐與原數十六文不相上下祇徵燒商一次不再重徵除額徵報部之稅照舊完納外其餘如坐稅代食戶稅燒鍋扣留零銷稅酒鋪扣回代墊稅種種名目概行停止似於裕課便商均有裨益如蒙俞允卽擬通飭吉林試辦果能行之無礙再行體察三省情形另擬劃一章程奏明辦理謹附片具陳伏乞

聖鑒

奏陳官兵在吉林境內勦捕巨匪情形摺

奏爲官兵在吉林境內迭次勦捕巨匪情形恭摺仰祈

聖鑒事竊維東三省鬍匪蔓延日久剽掠橫行實爲地方巨害臣世昌抵任之初當將奉省著名巨匪杜立山等捕獲地方賴以安堵前經奏報在案繼經訪聞吉林東北一帶有大股鬍匪出入肆

行劫掠民不聊生各國商人咸以爲患當飭行營翼長張勳統率所部進駐吉林沿途搜捕並密偵賊巢所在爲逐漸廓清之計據該翼長先後呈報五六兩月在長春府擒獲張海臣一名在額木索擒獲李華山孫全勝袁得勝蔡得勝四名在甯古塔附近擒獲張得意王福興冷云一劉文琴吳起五名在孤家子北大溝擒獲劉蘭亭馬榮寶王玉香三名在鴨綠溝擒獲侯得山時登國二名皆係積年巨匪此次聞官軍進剿該匪等四出偵探往來勾結意圖負隅竇屬怙惡已極業經訊實飭予就地正法以昭炯戒嗣於七月間在甯屬七道溝遇鬍匪五六百人結隊持槍公然拒敵官軍奮勇前進自辰至未斃匪一百餘名生擒卅餘名燬其帳棚三十餘處奪回被綁日本人二名我軍小有傷亡餘匪力不能支四散奔潰該翼長分飭營隊四路兜截逃散之匪或因傷重斃命或

因被截無路相率勒斃又五十餘名此外穆林河一股尙有三百餘名在該處修築礮臺依險自固該翼長帶隊馳往匪黨已聞風遠颺業將所築礮臺牆壘悉數剗平別遣將弁在煙筒山雞爪頂斃匪七名燒斃四名生擒二名該處巢穴一概燬平在春秋嶺擊斃逸匪十一名八月間該翼長復整隊進剿在沙河二十餘里遇匪百餘名正在分取糧食該軍迎前奮擊斃匪二十餘名奪獲糧食二千餘斤追至山內老巢匪黨駭散焚燬匪寨四十餘處其分隊在四方頂羊碣子遇匪百餘名擊斃十名餘匪相率奔散該匪經此大創凶燄漸衰一時勢難復合惟三省地方寥濶伏莽尙多此剿彼竄飄忽無常計非淨絕根株閭閻不能安枕現仍嚴飭該翼長督飭兵隊分路布置防剿並用務期地方一律平靖上紓朝廷東顧之憂下解黎庶倒懸之阨至該翼長督率所部冒暑前

進山深林密艱險不辭卒能殄彼醜類張我軍威辦理尙屬得力
應俟將此項賊匪一律肅清後再行奏請獎叙以示鼓勵所有官
兵迭次捕剿巨匪情形謹詳細具陳伏乞

皇太后

皇上聖鑒

查明大員被參各款據實覆陳摺

奏爲遵

旨查明大員被參各款據實覆陳恭摺仰祈

聖鑒事光緒三十三年三月十三日准軍機處字寄奉

上諭御史趙啟霖奏大員徇私溺職著徐世昌按照所參各節確
切查明據實具奏毋稍瞻徇原摺著鈔給閱看等因欽此欽遵到
臣事關大員被參亟應澈查且吉林吏治之壞根柢甚深現當改

設行省尤非一意廓清難有起色遂卽密派署吉林提法使吳燾奏調直隸試用道謝鑒禮按照所指各節不動聲色逐一詳查並選派廉幹之員分往各處認真確查去後茲據該司道等查明逐細稟覆臣覆加詳核有爲原奏所已及者有爲原奏所未及者而吉省吏治之壞固已無可諱飾謹爲我

皇太后

皇上詳晰陳之如原奏謂重捐酒稅一節查原定燒鍋章程本照直隸辦法凡售酒一斤征收制錢十六文准令於原價之外照加發售乃前署將軍達桂信用菸酒木稅總理佐領豐年任意加抽至三四分之多民間譁傳謂爲輪捐販運因而窒滯燒鍋遂致停減臣去歲奉

命赴吉查辦事件吉省燒鍋合詞控訴當卽調查原案咨照該將

軍遵照奏案辦理以蘇商困豐年乃竟挾私逞忿不顧大局聳令該將軍顯違定章奏加一分於是有坐稅代食戶稅燒鍋扣留零銷稅酒鋪扣回代墊稅加以舊有額征報部之稅名目繁多商戶每有欠稅停燒之事原奏所謂必抽至四五而後已歸公者不及一分自係實在情形又原奏謂招墾積弊一節查吉省招墾放荒章程按照荒之肥瘠酌定價之多寡每晌上等九千九百文中等六千六百文下等三千三百文惟承領此項荒地以出錢多者爲准於交價時給發執照其出錢少者尙無預行交價之事自無所用其發還然外城分局之流弊則在賄託營謀如甲乙已賄通局中承領此地丙丁復用重賄強奪之每致激成上控之案且分局委員多係投効無籍之人差由賄得亦以賄敗及被控發畏罪潛逃無從追究各地戶以錢地兩空因而怨聲載道該總局不遵定

章任意舞弊實屬咎無可辭至承辦招墾之員果否因此致富原奏並未指明是何銜名一時驟難查晰又原奏謂鑄造錢幣任聽侵蝕一節查吉省寶吉鑄錢局係仿照京城寶泉等局定章每制錢一文重九分自三十年開辦鑄過數次三十一二兩年均已停鑄本年因將改設行省又復開鑄藉以掩飾耳目此項官錢絕少行使者類皆沙壳缺漏顯有偷減銅鉛情弊其經費則專收四釐捐款每年約有京錢三十餘萬千該局自開局至今僅鑄數次既非常年按月鼓鑄究竟某年鑄錢若干用銅若干用過經費若干無憑查核是該局之不實不盡可以想見又原奏謂吉省官場積弊一節查長春府一缺雖著名衝劇每歲進款以牲畜稅爲大宗往年祇約有京錢十數萬千因前年日俄構戰採買騾馬牲畜極多價值驟增數倍多在長春集場售買稅課頓增十倍爲從來所

未有似不得指爲定數其餘各缺大都以各項雜稅爲大宗稅多者缺優稅少者缺苦自上年菸酒木稅另設專員經徵悉數歸將軍衙門核收地方官祇經收牲畜等稅州縣各缺較前遠遜新設治之區且有苦累者至前署將軍達桂本爲本地旗籍與官紳交游最廣如佐領豐年候選知府于芾霖慣事招搖擅作威福皆爲該將軍同譚密交凡省城之官帖局菸酒木植稅局交涉局及戶司關於財政各差之總理皆豐年一人獨攬大權原奏所指于蔚霖當係于芾霖之誤于芾霖爲該署將軍所暱信與豐年廣置私人徧據要路且又經手公款違例取盈殊多侵蝕民間因有二將軍三將軍之目王乘風者查無其名惟有從前籌餉局提調候補府經歷王鴻遇把持局務積弊甚多僞造報銷以圖彌縫該署將軍於一年之中三次優保以酬其勞現聞知府保案奉駁以同知

候補官場以該員晉秩太驟輒以乘風目之原奏名雖不同按其劣跡當卽此人候選知府李吉甫官名世斌素善歌唱狎比優伶因與于芾霖交好得委木植公司會辦同知銜王丙葵卽王炳駟係依蘭府知府王嘉禾之子認于芾霖爲義父得委鹽捐局總辦兼交涉文案各要差此外夤緣奔競納賄招權比比皆是誠如原奏所謂該省吏治黑闇無與倫比者也其有爲原奏所未及者如豐年派充官帖局總理卽將官帖任意放借省內及府廳州縣城屯鎮集商鋪多至數百萬吊豐年私定辦法每吊先行坐扣一二百文不等再計月息一分二三釐至二分不等以七釐歸公餘利悉入私囊又放借之帖報明長期者不過十之五六有息入官下餘名爲浮借輪流倒換卽屬短期無息其實則終年恆有此浮借之數專爲豐年生息之資又銀圓廠軋出銀圓卽由該局會辦豐

年交慶源長錢鋪存放得利頗厚該錢鋪卽係豐年所開官款撥存自營私利總計吉林財政皆在豐年一人之手所得各款殊駭聽聞專擅貪污莫此爲甚前署吉林道余濬亦與該署將軍同譜至契自委充總文案用人行政獨攬大權卽如現署綏芬廳趙多第五常廳謝汝梅皆余之私人朋比爲奸工於舞弊又營務處督練公所兵備處課吏館均以余濬爲總辦故更換統領營哨各官及補署府廳州縣之權均屬之其尤劣者爲吉強軍統領胡殿甲該統領夤緣余濬之門得派陸軍學堂及教練處總辦又充吉強軍統領到防以來勾結鬍匪肆意騷擾統率無方幾至譁潰營哨官缺非其私人卽由賄得以致營務廢弛盜賊橫行余濬並信用提調隆魁委員桂全二人聲氣交通勾結爲患又文案委員王贊恩憑藉威勢遇事招搖此數人者爲該署將軍最信任之員而實

爲吉省官場之大蠹其餘如裁判所總理趙宗鎔承審委員劉本源杜玉衡審判案件贓款甚多候補道柳大年歷任雙城五常賓州伊通等處以招降鬍匪廣受匪贓爲事收降之後照舊搶劫匪不上報最荒謬者該員在署五常廳同知任內有張姓被賊搶去幼童一案該員因與德成當孫老磐會聚當王東陽有嫌輒勾串張姓赴該廳控告吉興軍所獲鬍匪爲孫老磐王東陽二人妄行保出且指爲所獲鬍匪卽搶張姓之正盜該員旣得張賄並可洩忿將孫老磐等送省經裁判所訊明係張姓捏控擬辦罪坐誣柳大年輒復致函豐年爲張姓求情荒謬昏瞶至於此極此又於原奏之外查明吉省官場情弊之實在情形也竊惟一省吏治之得失全視疆吏爲轉移吉林官場賄賂鑽營浸成風氣該署將軍副都統達桂貪婪無厭政以賄成綱紀蕩然惟利是視到任未久用

一豐年而財政銷亡用一余濬而吏政淆雜用一胡殿甲而軍政
疲敝以至全局紛擾無所措手實屬溺職辜恩有負委任應如何
予以懲儆之處出自

聖裁佐領豐年侵蝕巨款罔利營私前署吉林道余濬招權納賄
任用私人吉強軍統領胡殿甲驕蹇貪鄙毫無紀律候補道趙宗
鎔性頗殘忍受賄有據候選知府于芾霖遇事招搖貪黷無恥候
選知府李世斌狎比優伶工於奔競候補同知王鴻遇鑽營取巧
劣跡昭著候補道前五常廳同知柳大年誣良爲盜荒謬昏庸署
綏芬廳同知候補通判趙多第行止卑鄙不堪造就署五常廳同
知候補同知謝汝梅闖茸無能難膺民社候選知州王贊恩恃符
妄作倚勢陵人佐領隆魁趨炎附勢卑鄙性成已革奉天鳳凰廳
同知劉本源見利忘義不洽輿情候補通判杜玉衡聽斷乖張貪

得無厭驍騎校桂全庸陋齷齪貪利妄爲同知銜王炳駢聲名狼藉物議沸騰以上數員均屬不知自愛有玷官箴相應請

旨將佐領豐年卽行革職永不叙用所吞款項並交地方官嚴行押追前署吉林道余濬吉強軍統領都司胡殿甲候補道趙宗鎔均請革職永不叙用候補道柳大年擬請革職發往軍臺効力候選知府于芾霖擬請革職經手公款仍交地方官押追務令清繳候選知府李世斌候補同知王鴻遇佐領隆魁候補通判杜玉衡候選知州王贊恩驍騎校桂全均請卽行革職署綏芬廳同知候補通判趙多第署五常廳同知候補同知謝汝梅均請以縣丞歸部銓選同知銜王炳駢擬請革去虛銜驅逐出境已革鳳凰廳同知劉本源擬請永不叙用以示懲儆所有查明大員被參各款緣由謹恭摺覆陳伏乞

皇太后

皇上聖鑒訓示

遵籌辦理蒙務情形摺

奏爲遵

旨覆陳三省內蒙墾務情形並預籌辦法恭摺密陳仰祈

聖鑒事准軍機大臣字寄光緒三十三年五月二十八日奉

上諭錫光奏請派大員專辦內蒙墾務一摺著徐世昌查覆辦理原摺著鈔給閱看欽此仰見

朝廷軫念東陲興利實邊之至意欽佩莫名查三省墾務歷任將軍次第開闢垂四十年而較其面積尙不及十分之四初祇內地之官莊葦塘山荒等處繼乃推及於蒙旗如奉天所屬科爾沁六旗則有札薩克圖旗鎮國公旗近來達爾漢圖什業圖兩旗亦先

後奏請開放尙未竣事吉林則有郭爾羅斯前旗黑龍江則有郭爾羅斯後旗杜爾伯特旗札賚特旗凡歷年所開墾或已及全旗或量爲設治但經理者第以籌款爲主義故一經清丈放價便無餘事甚或欺弱蒙民侵吞款項繩丈則多寡不均放荒則肥磽任意纏訟互控輾轉紛紜莫可究詰而於墾務之興衰蒙情之向背地勢之險夷從未考究誠如原奏所謂籌備邊防之策茫乎無聞也今欲經營蒙地使之成部落謀生聚爲三省之聲援必以殖民爲入手而殖民尤以墾荒爲始基內蒙東四盟地除在直隸熱河界內及土默特各旗均早經開闢人民繁聚外其自潢河以北索岳爾濟山以南南北八九百里東西千餘里空曠荒蕪寸土未墾其隸於熱河者則爲昭烏達盟之巴林二鎮阿羅科爾沁一旗札魯特二旗隸於察哈爾者則爲錫林郭勒盟之烏珠穆沁二旗浩

齊特左翼一旗綜考其地允宜一氣招墾次第開通爲殖民之計
畫不僅如原奏所謂昭烏達科爾沁二盟之巴林達爾漢各旗宜
於開墾也論形勢則南爲京畿之屏蔽東北爲奉黑之後援棄此
不圖一旦有事日人渡遼河而西包圍山海關谷口俄人從海拉
爾而南東省腹背受敵且俄如不得逞志於奉天必將從海拉爾
築一鐵路以達蒙古進張家口而入腹地是不獨江省西北之邊
防可慮卽北京之鎖鑰盡失矣論土質則以巴林左右兩翼及阿
羅科爾沁一旗最爲腴美河流縱橫氣候和暖東西札魯特兩旗
間有砂磧然可耕之地十之七八烏珠穆沁兩旗地勢稍高氣候
較寒該二旗產馬之區畜牧最盛浩齊特左翼一旗沙土過多較
難種植至圖什業圖達爾漢二旗則逼近奉省與內地無異矣至
浩齊特與烏珠穆沁交界之處有鹽池一區周圍三十餘里每年

產鹽二十萬車向銷俄蒙鑛則到處皆有尙不止原奏所述也論
辦法西南宜從巴林辦起東北宜從圖什業圖辦起蓋因巴林與
赤峰相近潢河以南之住民可由此而北圖什業圖與洮南府相
近遼河以東之住民可以由此而南也墾務之宗旨在殖民固邊
而不在於籌款經營之始視人民所集設局以督理之繪其山川
區其道路編其戶民施建築以安其居給籽種以謀其業聯守望
以衛身產設公司以通有無每距數十里輒築廬浚井以便行旅
蒙民一律相待俾可自存暇則立學堂先使蒙漢言語相通而後
漸進於教育果能次第推廣十餘年後屹然重鎮矣
朝廷有鑒於此去歲曾命肅親王善耆周歷蒙境欲以墾荒之舉
爲實邊之謀相其陰陽識其險要惜乎回京以後事寢未行誠以
整頓之方需款太鉅轉運艱阻人力難施必須有探險之性具沈

毅之力聯合組織堅固不搖而又濟之以財賦之權委之以經畫之任如日本之北海道美之西亞路往事可鑒期於必成若原奏預算進款每年可得四萬餘兩者尙狃於籌款之見而未合全局以籌也且以蒙性愚魯土廣人稀俄民越墾從而煽誘近來日本亦多以游歷爲名從事測繪山川險夷鑛產顯伏莫不周知從前將軍且有給予護照以爲之先導者甚有與蒙民齟齬及被土匪格殺之事不數年間必將殖其人民恢其權利若不及時籌畫早爭先著則蒙民被其誘惑土地漸成租借根據既定我將無所藉手此開墾蒙荒爲今日籌邊殖民之至計而不可稍緩者也但地段荒遠費用浩繁必須廣籌鉅款預計成數乃可次第實行此開辦以前之計畫必應通盤合籌議定有著的款請旨遵行以期久遠惟茲事重大臣總制三邊勢難徧歷擬先派專

員分別詳勘妥籌辦理但該處周圍面積約有三千餘里有與熱河察哈爾毗連地方應否會同兩處都統合議籌辦相應請旨飭下熱河察哈爾兩都統先行分別派員查勘至三省所屬之各部旗除由臣體察情形派員履勘外一面咨商兩處都統妥籌興辦俟有端緒再行奏明請

旨辦理所有遵

旨查核並預籌大概辦法緣由謹恭摺密陳伏乞

皇太后

皇上聖鑒訓示

派員籌辦延吉邊務摺

奏爲日兵越占邊界事機危迫謹將特派專員馳往籌辦情形恭摺密陳仰祈

聖鑒事竊維吉林東邊延吉廳所屬地方與韓國接壤向以圖們江一水爲天然國界從前韓爲我屬韓民往往越界私墾居留日久儼成土著向係受我範圍歷經北洋大臣吉林將軍與韓國交涉有案自韓國歸日人保護之後越墾日多現在該地韓民據報有十餘萬人華民僅二萬餘人日人遂欲肆其西封益謀侵略私改舊日輿圖強立間島名目將延吉廳屬之和龍峪光霽峪等處劃入韓國境內並影射迤西相距六百餘里之夾皮溝以爲逐漸進占地步臣等抵任之初卽有所聞當派監督吳祿貞密往確查並帶員生測繪界圖嗣准外務部來文加派道員王崇文分投往查前月復准外務部文稱日本阿部代使以該處界務未經解決所有韓民應由彼派兵保護等語復飭吳祿貞確切調查旋據稟稱日人齋藤季治郎奉韓國統監伊藤博文之命駐紮延吉所屬

之六道溝現有日本兵隊及朝鮮巡兵約三百人乘馬百餘匹尙有兵隊陸續渡江由會甯運來之軍需軍械每日車輛多至五六十乘並預備建造房屋購買木料擬由六道溝至韓國咸鏡道之鍾城安設電綫嚴禁韓民納中國斗稅一切舉動大有強據延吉一帶視爲韓國土地之勢該地方官暨派出駐紮兵隊向前禁阻悍然不顧來函竟有此地萬難承認全係貴國領土之語又聞俄人派兵數千駐紮琿春附近窺伺我國如何對付日人將有乘機並進之意等情臣等當卽電飭吳祿貞並各員弁安輯居民相機因應並飭行營翼長張勳抽撥營隊速赴該處填紮以資鎮懾再電由外務部詰問日使催令撤兵迄今該處居民紛紛遷避似應商定彼兵先行撤回韓境再議會勘界務現在籌辦安設電綫考查舊日界址庶將來談判之時易於措手惟延吉一帶荒莽廣漠

彌望千里從前韓國本我屬邦仰荷

天朝覆庇不分畛域彼國人民越界耕種均已安居樂業並未定有區別辦法今日人以時局變遷交涉頗殊遂極意經營得尺則尺得寸則寸以謀擴張其權力將由和龍峪等處進規至夾皮溝縱橫幾逾千里並與奉天之臨江縣形勢毗連握吉奉兩省之鎖鑰駸駸有左提右挈之勢我若稍行退讓後患何堪設想臣等再四籌商非有長於交涉明達事變之才前往綜理邊務不足以固我防維息彼覬覦擬派前郵傳部右丞陳昭常督辦吉林邊務並派前練兵處監督吳祿貞爲幫辦該二員講習邊情研究公法必能措置裕如現經帶同測繪員生將該處地勢詳細調查以後會勘界務卽派該二員辦理較有裨益惟該處旗民雜處駐有兵隊事權不屬誠恐呼應不靈合無仰懇

天恩將陳昭常

賞給副都統銜吳祿貞本充練兵處監督當差有年著有勞績可
否

賞給陸軍正參領並加協都統銜以資統攝而期得力之處伏候
聖裁臣等爲捍衛邊陲慎固封守冀以保東土鴻溝之界杜強鄰
蠶食之謀冒昧瀆陳無任迫切屏營之至所有日兵越界並派員
辦理情形謹恭摺密陳伏乞

皇太后

皇上聖鑒訓示

密陳三省切要辦法四條摺

附單

奏爲遵籌東三省最切要辦法開具簡明清單恭摺密陳仰祈
聖鑒事竊臣此次奉

命入都迭蒙

召見渥承

溫諭勛以事機至迫

朝廷必爲主持無庸顧慮莫名欽感並令與樞臣部臣妥商辦理
仰見

深宮念時局之艱難策臣工以籌度宗旨既定乃能有所措施竊
維東省全勢早爲日俄侵略以入其勢力範圍之內欲圖保存必
增益各國之財力商業以平均其勢故擬先籌借國債設立銀行
爲入手之辦法三省路權皆在日俄掌握交通不便幾同絕地非
另闢一路斷不足以資策應故修新齊鐵路爲補救全局之要著
約開商埠實因鐵路附屬地皆已占去故現擬不限租界以商埠
爲開放之先聲但能受我範圍無失主權且藉以招致西商暗圖

抵制至聯合與國尤外交切要之圖苟能聯屬邦交則各國待我之政策必爲之一變而我乃得以保存以上四端實爲整頓三省最切要入手辦法謹摘要臚陳

御覽伏候

欽定然事變萬端機局危迫成敗利鈍未可逆覩臣惟有殫竭血誠設法圖維是必於無可收拾之中作萬一保存之想蓋東三省地方夙爲兩強逼處根據太深若不從以上四端入手更無希望之可言以臣軀材受

恩至渥苟能盡一分心力冀可收回一分利權則奮往直前勞謗皆所不計其餘若察吏安民軍政法律及蒙荒邊務諸要政端緒至繁必先將大端辦法稍有布置乃能從容整理次第振興惟是全局安危雖於東三省有重要之關繫而挈領提綱則全賴政府

協力合謀明定宗旨整齊

朝政屏息浮言將一切膚詞陳見圓融私利之習廓除淨盡出以公論行以實心銳意經營與民更始必使全國有振奮之精神強鄰息侵略之政策列邦無猜嫌之意見庶幾憲政可期挽回有術皆仰賴

皇太后

皇上主持於上內外大小臣工共濟時艱以圖補救者也所有籌商東三省切要辦法開單具奏緣由是否有當謹恭摺密陳伏乞皇太后

皇上聖鑒訓示

附遵籌東三省最切要辦法四條

一東三省界居兩強欲圖保存非借西人實力無以牽制欲

借西人實力非有財政總匯之區無以招致今擬先借國債
四千萬兩設立三省銀行首爲流通財政劃一銀幣次爲各
項商業代籌款項之總匯兼爲籌辦林礦漁墾工藝各項實
業發生之基但不得移作行政銷耗費用聘西人辦銀行有
聲望者爲顧問員至籌借辦法必應政府擔任明示各國以
國家實力整頓東省地方之真據一面由三省督撫約計每
年攤還多寡列一詳細各項的款表擬備按年攤還之用俟
籌有端緒仍隨時奏明請

旨批准並飭下度支部遵照如款不敷再可續借必使實力
充足外人財產日增各國各種商業亦日加增益乃可隱弭
外患力圖保存

一東三省南北滿洲鐵路橫亘直貫久爲腹心之患一旦有

事幾同絕地欲圖挽救之方惟有速修新齊鐵路今擬另借洋款先修由新民經洮南達齊齊哈爾之路以通南北之氣再籌款展修墨爾根愛琿甯古塔三姓各路斯脈絡貫注策應靈通查由新達洮雖與路約不肯難保日人不生枝節由洮達齊須過俄軌交涉亦不能免現此路已派員帶同工程師往勘俟勘定後如何築造需款若干將來如何展修及與日俄有無交涉屆時咨請外務部郵傳部協力主持此路若成將來興辦各項實業及移民實邊方有辦法

一甲午以後卽有開放三省之議迨兩強互爭時移事易習焉若忘今則名雖歸而實已去須從他人手中設法收回蓋內政實權已在外人範圍之內固不得視爲完全之領土也今約開商埠十六處但指定地名並無城外城內之別而沿

鐵路相宜地段均爲日俄占去其鐵路附屬地又有若干里
內不得收稅之議是以屢經履勘窒礙甚多今欲較兩強分
攬商權之計惟有實行開放多集各國人民商業以平均其
勢力今擬先於通商十六處辦起暫不指定租界以保定主
權不設界限爲定旨而以遵我警察權認我營業稅與之抵
換目前辦法他省不得援以爲例所訂章程不妨稍從寬大
不爭小利又必多集各國財產合辦生利之事多僱用各國
人員以增長其智力將來收回治外法權及目前抵制兩強
均以此爲基礎

一全球無孤立之國亦無與鄰國爲敵而不相聯屬者三省
安危繫於中國全局而北京尤恃三省爲屏蔽今欲整頓三
省孤立無助則傾撲隨之似宜先聯日俄卽英德法美諸邦

亦當開誠布公與之聯結必須有相關之痛癢有互換之利益應由外務部設法主持相機因應至欲聯某國必須派聲望素著之大臣駐於彼邦乃可與彼之政府直接而消息可以相通若尋常二等使臣難直達其政府卽言論亦多無效力是又在謀定後動仰承

宸斷者也蓋能聯與國斯東省可以保存而中國全局庶可支柱矣

酌擬奉省提法司衙門及各級審判廳檢察廳官制職掌員

缺摺

附單

奏爲酌擬奉省提法司衙門及各級審判廳檢察廳官制職掌並員司名缺分繕清單恭摺仰祈

聖鑒事竊臣等前於具奏東三省公署官制摺內陳明提法司別

正言卷一
爲一署應另擬官制以爲司法獨立之基礎等因在案嗣據法部大理院會奏京內外各級審判廳職掌各摺片奉

旨依議欽此欽遵咨行到奉臣等詳繹原奏之意大旨以審判分爲四等而皆設檢察官以檢查之取外國單獨合議制度分庭而治並詳及於各級官廳之職掌品位員數綱舉目張允爲外省準則又查續定外省官制內第言各省按察使改爲提法使該司官制以原設之經歷司獄等官改設臣等查奉省初設法官本無內地習慣若不先將該司職掌員缺酌擬試辦則各級官廳將無成立之期且司法關係極重此次特設專官期於獨立在各省爲改良在奉省爲草創尤宜參酌中外折衷至當以聳外邦之觀聽而樹內地之風聲臣等督飭署提法使吳鈞悉心核議於該司職掌則隱規部制而統系必使相聯於各廳職官則悉仿部章而變通

期於盡善誠以提法司管理一省司法上之行政而以審判之事專屬之各級審判廳以提法司監督之以期達於司法獨立之地位惟舊制有應暫存者如招解勘轉上控等件向來由縣遞詳至院雖層折太多尙寓矜慎庶獄之意現在司法機關未備各級審判廳未能編立而東省官制擬將廳州縣併爲一級尙未實行故此制未能遽廢又秋審爲各國法制所無而實中國刑事中特別大典應仍隸於刑事以存其舊其新制有應發起者如監獄爲司法行政大端日本司法省且設專局與民刑同今擬另列一科以待推廣又登記爲民事訴訟之根據目前雖暫不舉辦不可不存其名應卽隸於民事以符名實此組織提法司官制職掌之大凡也至審判廳爲司法獨立機關規制尤宜詳備惟體察奉省情形仍有尙須變通者查原奏直省地方審判廳於直隸廳州及散廳

州縣各設一廳推事長品級定爲從五其不言府治者以內地府治皆有縣合同城也今奉省除奉天錦州兩府設縣外其餘皆無附郭之縣其推事長品秩卽應依照各該地方官以四五六品爲差斯品位相埒無牽掣之患矣原奏京師地方審判廳豫審推事由廳丞於各廳推事中臨時派充不設專缺蓋因該廳推事額設二十四人足敷分布奉省地方審判廳推事至多不過十二人若由此中分出豫審二員則民刑均不敷二庭之數今擬另設豫審推事專辦重罪豫審事件斯責任專矣原奏各直省高等審判廳推事品級定爲正六地方審判廳推事定爲從六固與京師審判廳微示區別惟中缺五品一階升轉究有未便今奉省各府地方審判廳擬改爲廳丞升爲從四似宜於高等審判廳推事及各府地方審判廳推事中各設刑科長民科長一員品級升爲從五略

仿日本民刑部長之制斯各有統屬矣原奏於登記一條尙未議及惟登記爲民事訴訟之根據各國皆以屬之初級審判廳今亦擬仿照辦理至高等審判廳如一省祇設一處則距省寫遠者赴訴維艱應否設立分廳原奏亦未議及今擬於省城先設一處俟體察情形再行酌量分設以便就近審理上控訴訟其餘各級審判廳應如何先後設立統俟通省合籌奏明辦理此組織各級審判廳官制職掌之大凡也至於檢察廳以保護公安爲專職介於行政權審判權之間以劑其平今綜其職掌如調度司法警察搜查犯罪逮捕犯人提起公訴陳述證據詰被告執行處刑及不服審判宣告而上控者民事如婚姻嗣續家產等案皆檢察官職權所及今遵照部章於各級審判廳內均附設檢察廳專司檢察事宜均應服從上級檢察官之命令其對於審判有補助而無干

涉此組織各級檢察廳官制職掌之大凡也維是司法部分關係至重法律改良此爲緣起極其效力可以平熄亂黨收回法權奉省初立法庭外爲列邦所注目內爲各省所取資故凡建造廳衙斷不可安於簡陋任用法吏亦未便繩以常規用款用人不拘成例而後規模肇造氣象一新法令所頒中外受範此尤臣等心力所專注而不能不慎之於始者也所有酌擬奉省提法司衙門及各級審判檢察廳官制職掌員缺品位各緣由是否有當謹恭摺繕單具陳伏乞

皇太后

皇上聖鑒飭下法部大理院會議核覆施行

附提法司衙門官制職掌員缺品位單

第一條 提法司掌全省司法上之行政事務監督本省各

級審判廳及檢察廳

第二條 提法司總理全司事務監督僉事以下各員爲一司之長

第三條 提法司分設四科如左

一總務科 二刑事科 三民事科 四典獄科

第四條 總務科職掌如左

一掌關於考績事項凡本司及全省各級審判廳檢察廳典獄官吏之履歷請補陞降考試司書生調派檢察官司司法警察等項皆隸之

二掌關於文牘事項凡收發文件編纂存儲卷宗檔冊各項統計表冊報告及辦理不屬民刑各項特別公文函電專件等項皆隸之兼典守印信

正言卷一
三掌關於會計事項凡本司出入經費豫算決算稽核
各級審判廳經費訟費納贖收贖罰金充公贓物財產
罪犯作工成績販賣款項各事皆隸之兼管理本司雜
項事件及本司公置財產什物等項

第五條 刑事科職掌如左

一掌覆核全省死罪各犯奏咨案件及死罪人犯招解
勘轉事宜

二掌覆核全省軍流以下各犯內結外結案件及軍流
人犯招解勘轉事宜

三掌辦理秋審事件並

恩赦條款查辦減等留養事宜

第六條 民事科職掌如左

一掌承斷析產及婚姻等涉訟事件
二掌錢債房屋地畝契約及索取賠償等涉訟事件
三掌不動產商業船舶及其他各項登記事件

第七條 典獄科職掌如左

一掌全省監獄事件凡考察監獄改良及獄中賞罰制度核算囚糧報銷調查罪犯名冊稽查押犯月報及監犯病故報告等項皆隸之

一掌全省習藝所事件凡考察工作良否及所中管理賞罰制度稽核罪犯作工成績調查罪犯名冊稽查作工年限釋放及病故報告等項皆隸之

第八條 總務科置僉事一員承提法使之命綜核總務科各項事件兼整理要務

第九條 刑事科置僉事一員承提法使之命綜核刑事科各項事件

第十條 民事科置僉事一員承提法使之命綜核民事科各項事件

第十一條 典獄科置僉事一員承提法使之命綜核典獄科各項事件

第十二條 各科設一等科員一員二等科員一員三等科員二員承提法使之命受各該科僉事之指揮分理各該科事件並設正副司書官四員專司繕寫緊要文件承辦庶務附置司書生三十名幫同司書官分繕文件
提法司職官表

提法司

正三品

特簡

首科僉事 從四品 奏補

僉事 正五品 奏補

一等科員 從五品 奏補

二等科員 正六品 奏補

三等科員 正七品 奏補

正司書官 正八品 委用

副司書官 正九品 委用

各級審判廳官制職掌員缺品位單

一 高等審判廳

第一條 高等審判廳掌不服地方審判之上控案件為

第二審其由初級審判廳起訴者則以此廳為終審

第二條 高等審判廳置廳丞一員總司廳事調度本廳

文書卷之六

民刑推事長以下各員監督各級審判廳

第三條 高等審判廳分設刑科民科每科各置推事長一員推事五員仍合刑事民事各二庭每庭三人之數

第四條 民刑推事長總理各該科審判事務並調度本科一切事宜各推事分任各科審判事務

第五條 高等審判廳置典簿一員主簿二員錄事二員第六條 典簿掌辦理文牘會計一切庶務主簿掌錄供叙案承辦文牘督同錄事繕寫文牘錄事掌繕寫文牘承辦庶務

附置書記生不設額缺至多不得過二十名

二 地方審判廳

第一條 地方審判廳掌審判不屬初級審判廳之刑事

民事案件及不服初級審判廳判結而上控之案

第二條 地方審判廳置廳丞一員總司廳事調度本廳民刑推事長以下各員監督初級審判廳

第三條 地方審判廳自廳丞以下設官分職與高等審判廳同但新設各廳州縣人稀事簡者推事以下各員缺酌量核減

第四條 地方審判廳置豫審推事二員專司重罪豫審事簡者一員

第五條 地方審判廳設看守所置所官一員管理看守所歸地方檢察廳監督

三 初級審判廳

第一條 初級審判廳之審判權如左

一 刑事 凡違警罪及輕罪止於笞杖而改爲罰金者

二 民事 分二項

第一項 錢物不逾百元之爭訟

第二項 不論價值之多寡均可收理者如左

田產界址之爭訟

雇傭契約之爭訟

旅客與客店及運送商帳目之爭訟

第二條 初級審判廳置推事一員或二員總司廳事審判刑事民事如上項之案件

第三條 初級審判廳酌設書記生數名辦理案牘庶務

第四條 初級審判廳兼辦不動產商業船舶及其他各

項登記事項

高等審判廳職官表

廳丞 從四 請簡

刑科長 從五 奏補

民科長 從五 奏補

推事 正六 奏補

典簿 正七 奏補

主簿 正八 奏補

錄事 從九 委用

各府地方審判廳職官表

廳丞 從四 奏補

刑科長 從五 奏補

民科長 從五 奏補

女學全一奏議

推事 從六 奏補

典簿 從七 奏補

主簿 從八 奏補

所官 正九 委用

錄事 從九 委用

各廳州縣地方審判廳職官表

推事長 廳州 從五 縣正六 奏補

推事 從六 奏補

典簿 從七 奏補

主簿 從八 奏補

所官 正九 委用

錄事 從九 委用

初級審判廳職官表

推事 正七 奏補

附各級檢察廳官制職掌員缺品位單

第一條 高等檢察廳地方檢察廳各置檢察長一員總理各該審判廳檢察事務調度司法警察事宜初級檢察廳置檢察官一員專辦初級審判廳檢察事務

第二條 高等檢察廳置檢察官二員地方檢察廳置檢察官事繁者二員事簡者一員分任檢察事務

第三條 高等檢察廳地方檢察廳各置錄事一員並酌設書記生數名初級檢察廳酌設書記生數名辦理文牘庶務
第四條 地方檢察廳設醫師一名檢驗吏數名爲診治病犯及檢驗屍傷之用

高等檢察廳職官表

檢察長 從四 請簡

檢察官 正六 奏補

錄事 從九 委用

地方檢察廳職官表

檢察長 府從四 奏補 廳州從五 縣正六 奏補

檢察官 從六 奏補

錄事 從九 委用

初級檢察廳職官表

檢察官 正七 奏補

退耕堂政書卷十一目錄

奏議十一

奉省各屬新案交代款多糾葛擬請續展限期摺

黑龍江裁併各項官缺摺

黑龍江變通旗制每佐留兵片

黑龍江籌辦陸軍小學堂摺

奉天裁站驛丁請准與學堂考試片

調東陸軍添製裝服銀兩請作正開銷片

黑龍江應題命案擬請分別具奏片

黑龍江通克兩段未放公田飭地方官續放片

吉省旗戶地畝第八次升科摺

黑龍江呼蘭府屬屯站地畝丈竣摺

札旗荒務經費無從追繳片

恭修 宮殿工料銀兩在溢收賑款動支並請一切要工均按實銀核銷摺

光緒三十三年以前奉省奏銷援案免扣例限片

江省邊務緊要請撥東北邊防經費摺

江省巡防兵餉請 飭由部撥解片

統領吉祥革職發往軍臺片

擬請酌復遣犯舊例藉圖實邊摺

黑龍江派員試署司缺並陳變通情形摺

江省辦理交涉中立善後出力各員請獎摺

請撥奉天黑龍江戊申年的餉並催各省歷年欠餉摺

安東縣大東溝稅款仍留作奉省練餉及一切行政費用片

退耕堂政書卷十一

天津徐世昌

奏議十一

奉省各屬新案交代款多糾葛擬請續展限期摺

奏爲查明奉省各屬新案交代款多糾葛擬請續展限期以資清理恭摺仰祈

聖鑒事竊查奉省各府廳州縣交代初因庚子之變經前將軍增祺會同前府尹廷杰奏明將光緒二十六年以前未結各案一切款項剔歸善後清查案內辦理迨三十年日俄開戰道路阻滯各屬交代仍難依限結報復經該將軍府尹奏請免扣例限俾無貽誤嗣前將軍趙爾巽到任後奏裁府尹創設財政局管理通省財賦將驛巡道署原設之交代局歸併該局辦理當經該局查歷年

交代未結酌擬章程十條呈請該將軍奏定三十二年四月以前未結交代作爲舊案免扣例限其自閏四月初一日以後作爲新案一律統按例限結報並因守候部覆久未奉到復經該將軍奏咨展至上年八月三十日再行起限原爲逐款清釐力求整頓起見乃自臣等到任後奏改官制現在新設度支司專司財政據該司查明各屬交代動多逾限推原其故皆因各該屬倉庫存款兵燹時墊發餉項辦理賑撫互相糾纏清釐之難與平時交代迥不相同加以奉省向辦各案竟將外結攤捐抵充內結正雜要款辦理非法經該將軍飭查業將通省攤捐全行裁免以故向來列抵之款必須尋源溯委澈底根查方可結報縱祇一案之交代而牽涉至於數任逐款考核動輒需時又加各屬造送款冊墨守舊轍未能悉就範圍駁飭頻仍至再至三各屬道塗幅員遼遠往返輒

逾數月故展限後新案交代核報咨結者仍屬寥寥現計駁查逾限未結之案積至二十餘起若不設法通融不足以資整頓臣等悉心酌核擬請將度支司未設以前各府廳州縣未結交代援照三十一年閏四月以前舊案一律免扣例限責成該司隨時督飭務將先後積案逐漸清理次第結報其自度支司成立以後作爲新案交代概照例定期於初參兩箇月內結報俾資周展儻因歷任交案未清款多輻輳仍照前將軍奏定辦法准其截任結算以昭簡易而免糾纏除咨部立案外理合會同恭摺具陳伏乞

皇太后

皇上聖鑒飭部立案施行

黑龍江裁併各項官缺摺

奏爲裁併各項官缺俾歸整齊恭摺具陳仰祈

聖鑒事竊臣德全前將統籌善後各項事宜以及續行辦理情形業經先後奏明在案惟其中未盡事宜亦應次第籌辦以竟厥緒數月以來體察情形或爲前摺所未言及或照原奏尙須變通謹分條酌擬辦法爲我

皇太后

皇上縷晰陳之一原奏請將省城黑龍江墨爾根三城協佐校等官均照呼蘭通肯一律改爲滿蒙漢公缺業已遵照辦理惟查滿洲有防禦一階通省共二十八缺若仍作爲滿洲專缺多此一層陞階未免轉形向隅如作滿蒙漢公缺而通省驍騎校各有百餘勢必太形擁擠擬將防禦一階全行裁撤以歸畫一一原奏請將水師營裁撤該營丁戶擬附入漢軍佐內嗣又奏請將黑龍江墨爾根兩處官莊壯丁亦附入漢軍旗內各等因已飭分別辦理一

俟編撥就緒再行咨報陸軍部備案一原奏東西布特哈兩處官兵俟各該總管到任後查看情形辦理當經札飭去後旋據該城東路總管福齡西路總管常雲呈稱該城共九十二佐一佐甲兵十餘名或數名甚至有無兵之佐擬將東西兩路各留八佐共十六佐其餘七十六佐概行裁撤不分部落均作公缺等情前來當批飭照辦並飭將丁戶妥爲歸併化散爲整裁缺人員無論世襲輪管公中各缺旣經裁撤均令歸入學堂肄業果能勝任俟有相當缺出儘先補用一吉林駐紮江省之水師營四五六品官各一員以及水手等曾於原奏聲明如何歸併俟與吉林將軍會商辦理迄今年餘尙未咨覆當此整頓旗務之際勢難再緩該營四品等官以及水手等駐吉甚久與土著無異若再撥還江省不獨多費周折所費亦屬不貲擬將該營四品官改爲佐領六品官改爲

正書卷一
三
驍騎校並水手人等附入吉林漢軍旗內管理其五品官一缺卽請裁撤裁缺之員仍以對品之缺補用以昭公允所有裁併官缺緣由除咨陸軍部度支部查照外理合恭摺具陳伏乞

皇太后

皇上聖鑒訓示

黑龍江變通旗制每佐留兵片

再查去歲條陳善後摺內請將江省旗兵汰弱留強使一兵食二兵之餉大加整頓俾成勁旅嗣又遵照練兵處定章將江省旗兵改編巡防營各情業已迭次奏咨在案當經臣德全督飭各城仿照中左右三軍營制餉章趕緊挑練旋據各城已報起練者馬步七營零一哨第此項薪餉皆由各城旗俸餉內籌撥所有管帶哨官哨長悉令協佐領驍騎校兼充各營之兵仍照原奏由甲兵西

丹之內挑用入伍如或不敷再由土著內挑選常川演練力求實
際惟各該旗若不少留甲兵倘有差徭勢必無人應命擬於每佐
各留兵十二名共留甲兵二千零六十四名以充佐下之差如此
變通辦理庶於營務兩有裨益除俟各該城將所編各營官兵花
名細冊報到再行分咨度支陸軍兩部查照外理合附片具陳伏
乞

聖鑒

黑龍江籌辦陸軍小學堂摺

奏爲籌款開辦陸軍小學堂並按照地方情形增減額支款項恭
摺具陳仰祈

聖鑒事竊臣德全前因江省餉源萬絀擬先籌辦陸軍小學堂各
情業經於上年十二月間奏陳在案當經揀委管理員司及教員

人等飭於本年正月二十五日開學教授惟學堂經費用款浩繁卽額支一項按章統計每年亦須兩萬有奇其活支之款祇能隨時估價尙難預計定數均須籌有切實的款方能源源接濟查上年籌辦善後摺內奏裁官兵現計每年截出俸餉銀二十萬六千三百八十餘兩以之起練巡防馬步各隊七營零一哨參仿中左右三軍章程每年共需薪餉等項銀一十七萬一千一百餘兩淨餘銀二萬四千七百八十餘兩現在卽指此款作爲學堂經費茲據該堂將額支活支款項列表呈請立案前來臣等按照前練兵處奏定章程詳加確覈參以地方情形有宜略事加增者亦有宜大爲覈減者其應增者如學生火食夫役工價定章每月均係三兩江省百物昂貴若不於定章之外略事加增實不敷用擬將學生火食每名每月各加一兩五錢合之定章三兩共四兩五錢其

員司每月亦擬加給火食銀四兩五錢差弁號兵夫役每月擬各加給火食銀三兩五錢此按之地方情形不能不略事加增者也其應減者如總辦每月薪公二百兩監督一百兩提調七十兩文案四十兩收支三十兩司事二十四兩原章所定本屬不復但江省財力萬分艱窘所有現在各局處總辦每月不過八十兩法政監督不過六十兩提調四十兩文案三十兩收支二十四兩臣等因各員清苦異常欲爲加增每以限於財力而止今陸軍小學堂管理各員司薪公若照定章滿支不惟不足以昭公允且學堂之款籌之各城官兵尤宜撙節支用擬將總辦薪公每月照各局處章程定爲八十兩監督定爲六十兩提調定爲四十兩文案定爲三十兩收支定爲二十四兩司事定爲十八兩如此擬定再加火食四兩五錢已較他處爲優一俟江省財力大充或別經籌出鉅

款再行遵照定章補發此按之地方情形不能不大爲核減者也
以上二項僅就額支而言其餘教員薪水均請照章支給若活支
之款萬難預計確數惟有隨時督飭該堂總辦從省核實支用除
將該堂支款預算表覈定妥協咨送度支陸軍兩部查覈外所有
江省開辦陸軍小學堂並增減額支款項緣由是否有當理合恭
摺具陳伏乞

皇太后

皇上聖鑒訓示

奉天裁站驛丁請准與學堂考試片

再臣等前次

奏准裁撤奉省驛站所有各站驛丁永免當差其裁缺之驛丞復
經吏部議准以對品之典史分發各省補用茲查原編二十九站

驛丁歷年既久戶口滋繁向例不准考試現在科舉雖已停廢而考試各項學堂學生自與科舉章程事同一律此項驛丁既已免其當差若仍不得等於齊民予以出身普施教育勢必至流爲游手貽害閭閻合無仰懇

天恩俯准將奉省已裁之各站驛丁一律准入學堂並得與一切考試以宏造就出自

逾格鴻慈謹附片具陳伏乞

聖鑒訓示

調東陸軍添製裝服銀兩請作正開銷片

再前經奏調來東之陸軍第三鎮暨第一第二兩混成協業已次第出關扼要填紮前因東省百物昂貴已仰邀

恩准各加賞餉乾銀兩藉資騰飽凡在軍隊莫不感動歡呼同思

奮發惟東省地氣早寒雪虐風饕迥殊內地該兵隊邊塞遠戍較爲辛勞現計分駐各地如吉林長春甯古塔一帶半多支搭窩棚暫爲憩宿營房一切須俟春融方能修造瞬屆嚴冬異常寒苦自應另籌禦冬之件用示體恤擬按照第三鎮二十營第一第二兩混成協步隊十二營馬礮隊四營工程輜重隊各二隊並新改編之步隊一標礮隊一營各護號目兵等共二萬零一百五十二名每名添給皮帽一頂皮領一條皮袖頭一副皮套褲氈襪各一雙又步兵各添給皮鞋一雙馬兵各添給皮靴一雙並擬每營另添備大皮襖二十六件專爲寒夜巡哨之需統計以上所需按現在市價覈實預估共合湘平銀十三萬七百一十五兩二錢三分臣等查從前陸軍定章由公家籌給裝服每年每兵約需銀十四五兩今擬籌給禦冬各件作爲三年之用平均合算每年每兵約多

需銀二兩有零合之固成鉅款分之則爲數無多合無仰懇
天恩俯念關外氣候早寒該兵隊等遠戍辛勞准予酌量添備各
件以恤兵艱而裨戎政如蒙

俞允此項添製裝服銀兩應請作正開銷除分咨度支部陸軍部
立案外謹附片具陳伏乞

聖鑒訓示

黑龍江應題命案擬請分別具奏片

再黑龍江地屬極邊向以疏節闊目爲治一切規模未備故凡辦
理命盜案件多於定例稍有變通如盜案獲犯審實就地正法按
季彙奏原係因地制宜期歸簡捷至命案本有題奏及內外結之
分而刑司向來承辦除奏案外凡例應具題例應彙咨之案悉歸
專咨完結蓋因題本過繁彙咨則重費檢查故也現在東三省改

設行省刑司又歸併裁判處所有命案自應按照行省辦理查內省命案業經改題爲奏辦法早從簡略臣等擬請嗣後例應具題命案情重則專奏情輕則彙奏一面仍備錄供招咨部其人命擬杖之案暫歸外結年終彙咨以符定例是否有當謹附片陳明伏乞

聖鑒訓示

黑龍江通克兩段未放公田飭地方官續放片

再通肯克音兩段荒地上年遵照新章將所留公田一律出放其已放地畝並所收銀兩曾於該段報銷摺內彙入聲敘在案惟查通克兩段接整井核算共應得公田地五千四百晌除上年奏報地數摺內已放荒地不計外現尙餘公田地一千五百四十晌應卽轉飭地方官照章續放以歸簡易除咨部查核外謹附片陳明

伏乞

聖鑒

吉省旗戶地畝第八次升科摺

奏爲接辦吉省各屬旗戶地畝租賦現復續據報有成數作爲第八次開具清單報請升科以裕餉需恭摺具陳仰祈

聖鑒事竊查吉林於光緒二十八年春間奏請設局舉辦民田清賦旗地升科兼放零荒以裕餉需所有各屬旗戶原無錢糧之地陸續查報共扣實納租地四十九萬七千三百四十七晌八畝三分均自光緒三十一年起照章升科徵納租賦業經前署將軍達桂等先後七次開單奏報在案茲值東省改易官制之初臣等蒞任伊始當卽督飭司局趕緊清釐催報現據各屬旗戶續行報出原無錢糧應行升科地三萬三千五百五十三晌二畝遵照奏定

章程按七成覈扣共實有納租地二萬三千四百八十七晌二畝四分仍令自光緒三十一年起一律照章升科每晌交納大小租錢六百六十文每年共應徵大租錢一萬四千零九十二千三百四十四文由各旗署經徵抵餉仍遵光緒三十年七月部咨據實分晰開單報部免再造冊俾省繁牘其未清出之民田未經報明之旗地暨尙未勘清之零荒現仍嚴行督催認真次第清釐勘辦容俟積有成數再行陸續開單具報所有各旗戶續行查報應行升科扣實地畝應納大租錢文各數目作爲第八次開單奏報緣由除咨度支部查覈外謹分別繕具清單恭呈

御覽伏乞

皇太后

皇上聖鑒

黑龍江呼蘭府屬屯站地畝丈竣摺

奏爲呼蘭府屬屯站地畝分別丈竣謹將收進押租經費銀兩數目並升科年限恭摺具報仰祈

聖鑒事竊查臣德全於上年三月間覆陳籌辦江省善後摺內奏明擬將各城官屯一律裁撤所有屯丁改歸民籍派員前往清丈升科並請裁撤驛站將各站丁改歸民籍照屯地一律升科所有公牘擬先設立文報局以代驛傳等因欽奉

硃批允准在案惟江省屯站各處情形不同而地處膏腴人煙輻輳亟須整理者則以呼蘭府屬爲尤急旋經札委年滿屯官尙福條具辦法擬將屯站各丁自種之地照章升科毋庸交納押租其轉賣與民各地則均飭一律升科並令每晌交納押租銀一兩四錢照章隨征一五經費等情當經批准並派該員署理呼蘭屯官

事務會同該府知府李鴻桂設局勘辦並飭將呼蘭新安兩台站一並照章查報等因於光緒三十二年七月間報部亦在案茲據該員等呈稱除丈呼蘭屯丁自種地畝五萬二千七百一十五晌三畝一分八釐三毫呼蘭台站丁地六千九百四十晌一畝六分七釐均未征收押租外現計丈出呼蘭屯丁出賣與民地四萬二千七十九晌五畝八分台站丁出賣與民地一千八百三十七晌二畝四分二釐共地四萬三千九百一十六晌八畝二分計收進押租銀六萬一千四百八十三兩五錢四分八釐又收進經費銀九千二百二十二兩五錢三分二釐二毫其新安台站丁爭訟地畝請由呼蘭府判結具報等情呈請奏報前來臣等覆核無異惟查呼蘭台站丁地六千九百四十晌一畝六分七釐現在臣等正議變通全省驛站應俟文報局設後再與各台站地畝一律升科另

行奏明辦理其所丈屯丁自種地畝暨屯站各丁出賣與民地共計九萬六千六百三十二晌一畝三分八釐三毫業飭自光緒三十一年一律升科其餘各城屯站應俟分別丈明稟報到日再行陸續奏報除將此次毘連冊籍並收除各項專案咨部外所有呼蘭屯站地畝分別丈竣並收進押租經費銀兩數目暨升科年限各緣由理合恭摺具陳伏乞

皇太后

皇上聖鑒

札旗荒務經費無從追繳片

再准度支部咨稱江省冊報光緒二十八年六月起至三十年八月止所有丈放札賚特荒務發過經費銀五萬三千五百七十六兩零較定章計多支銀四萬五千九百餘兩應令轉飭刪除追繳

至添收一五經費後並應將原提每晌經費錢二百文撥歸正款報部抵餉等因前來查江省向放蒙荒每地一晌徵收押租錢四吊二百文其總行局辦公經費卽在國家與該旗所得之二吊一百文各提一百文作爲開支屆時如有不敷再由國家所餘之二吊文內酌量撥補業經前將軍恩澤等於光緒二十五年十二月請放札賚特蒙荒時奏明在案所有二十八年至三十年八月未收經費以先從前已支各款自應按照原案據實報部核銷前准該部咨駁萬不獲已乃於各處荒段所餘經費項下如數提還現在各段荒價太絀經費往往不敷茲復一再咨令刪除追繳詳查動支各款皆與從前本省辦理蒙荒成案相符且事隔數年人員早已星散所支款項皆在臣等未經到任以前追已無及繳更何從至三十年八月奏添一五經費後所有原提每晌經費錢二百

文其應歸國家之一百文厯經歸入押租正款之內並未另行提出其向歸蒙旗之一百文自應仍照本年二月臣等覆奏杜郭兩旗荒務經費原案懇乞留資挹注以歸劃一除咨部外謹附片具陳伏乞

聖鑒

恭修 宮殿工料銀兩在溢收賑款動支併請一切要工均按實銀核銷摺

奏爲恭修

宮殿工程第二次估需工料銀兩應在奉天溢收賑捐款內動支並請將奉省一切要工均按實銀核銷免照舊章折減懇恩飭部立案恭摺仰祈

聖鑒事竊臣等接准度支部咨開山東司案呈准奉天總督咨具

奏

陪都

宮殿原擬緩修各工現在體察情形仍應擇要興修一摺奉

硃批該部知道欽此抄錄原奏咨部並據民政部知照前來查抄奏內稱奉省現已開埠觀瞻所繫前項各工一律興修方爲得體其餘無關緊要者仍從緩議謹先約略估計需銀四十餘萬兩一面騰挪應付其應用各琉璃瓦向由京奉兩窯廠燒辦另案造報不在現估之內統俟工竣再行分別核實請銷等語應令查明此項銀兩在於何款動支並將此項工程銀兩按照奉省折減向章給發等因咨行到奉當卽轉飭遵照去後茲據欽工總局度支司會呈稱前項

宮殿工程估需銀四十餘萬兩曾於上年賑捐截數時經前將軍

趙爾巽電致度支部聲明奉天賑捐溢收銀三百萬兩請全數留
爲修理

宮殿城垣並練兵濬河等項要需之用嗣經部咨令照廣西辦法
如數存儲聽候部撥復經前將軍趙爾巽以奉省根本重地各項
地方要政實屬刻不容緩仍請全數留用電請軍機處代奏於光
緒三十二年十二月二十四日奉到電

旨著照所請度支部知道欽此欽遵在案今此項工款銀四十餘
萬兩擬請卽在溢收賑捐款內如數動支以應要需至部咨內稱
將工程銀兩按照奉省折減向章給發一節查從前折減章程流
弊滋多苟非浮冒價值必致偷減工程巧算牽合以符其數是以
前將軍趙爾巽奏覆前修

宮殿工程摺內稱但求實際不拘例文無非實事求是之意今第

正書卷一
十三
二次估修各工皆係再三考核摶節估計謹遵第一次原奏所稱切實籌辦總期得人而理若仍按折減向章發給不但已發之款無從收回卽未竣之工亦將停止勢必至自愛者遠颺巧黠者作僞殊非整飭庶務之道惟有據實呈明應將奉省一切工程概予裁免折減舊章均按實銀核銷等情請奏咨立案前來臣等覆查此次

宮殿工程計估需工料銀四十餘萬兩旣經前將軍臣趙爾巽奏奉電

旨允准有案自宜在奉天善後溢收賑捐款內如數動支以重要工至折減向章無非浮估價值折合牽算以符其數徒長浮僞之風並無節省之實誠有如該司局所稱者且近來工料昂貴數倍於前是以庚子之後恭修

陵寢及各項工程均經歷任將軍臣奏明發給實銀無不仰邀
俞允現在此項

宮殿工程均照實銀摺節估計應請仍照實銀核銷卽其餘各工
亦經臣等隨時批飭核實辦理若仍援折減舊章必至浮開數目
遷就彌縫徒蹈舊習合無仰懇

天恩俯准將奉省一切工程估需工料銀兩概予裁免折減舊章
均按實銀核銷並懇

飭部查照立案嗣後遇有應修各項要工均由臣等隨時隨事嚴
加考核實用實銷以期款不虛糜工歸實際除咨部查照外謹恭
摺具陳伏乞

皇太后

皇上聖鑒訓示

光緒三十三年以前奉省奏銷援案免扣例限片

再奉省地丁錢糧向係次年五月奏銷所有退地隨缺耗羨各項均係隨同地丁併案造送歷經辦理在案惟查奉天自庚子亂後卷據毀失款項輾轉又值日俄宣戰交涉事繁以致奏銷未能依限辦理經前將軍增祺府尹廷杰奏明將光緒二十九年以後奏銷暫免扣限俟日俄軍務平定卽行依限造報等因奏明在案迨三十一年時局平靖適值府尹五部裁撤經前將軍趙爾巽奏設財政局清查辦理通省奏銷因變章伊始事體繁難辦理諸多棘手僅將邊內舊有州縣三十年奏銷造送其三十年以後各年奏銷均未及造報此外如續設東平西安西豐彰武等縣並洮南府各屬積年動存款項從未造冊請銷推原其故皆因新設地方規模未備並無成章可考且有甫經升科者辦理未能就緒因之報

銷遲延臣等到任後奏改官制分設各司從前財政事宜積年奏銷悉由度支司逐一清釐第事非一年案非一處逐款考核輾轉駁詰動輒需時若不稍寬期限難期清結無遺臣等悉心酌核擬請將光緒三十三年以前積年奏銷仰懇

恩准援案免扣例限俾得逐漸清理次第造報以免叢脞掛漏之虞其三十四年以後奏銷仍行遵章依限辦理以昭慎重除咨部外是否有當理合附片具陳伏乞

聖鑒訓示

江省邊務緊要請撥東北邊防經費摺

奏爲江省邊務緊要亟宜趕速經營並請撥東北邊防經費以資應用恭摺密陳仰祈

聖鑒事竊維江省孤懸絕徼三面鄰俄談經濟者咸以經營邊線

爲要義蓋必先固藩籬而後可以興內政亦必先強肘腋而後可以衛本身譬圍棋然非預布遠著則外力侵入腹心受敵今之邊情何以異此臣世昌到東以來察度情形日以邊境空虛爲慮臣德全於光緒三十一年統籌善後及本年條陳應辦事宜兩摺內均將邊防大勢先後奏陳比復詳細籌商非指撥專款注重經營斷不足以鞏固邊陲請爲我

皇太后

皇上剴切陳之伏查江省沿邊一帶應分三路自臨江州北岸至科爾芬河一帶爲一路其東北之瓊瑋西北之呼倫貝爾則又分爲兩路計沿邊上下三千餘里與俄境僅隔一江自咸豐八年定約以來彼族極意經營沿江一帶屯堡相望密如鱗櫛近日俄人輪船任意往來其俄民越墾及關於伐木割草採鑛各事動則牽

涉外交計自呼倫貝爾起至松花江口止除瓊瑋一城外餘皆荒
落無人興安嶺以外居然別一境界非急圖抵制則人實我虛人
進我退人強我弱黑省爲各蒙及奉吉尾閭一受其害則東方大
勢岌危根本動搖矣此江省邊務關繫大局萬無可緩之實在情
形也今日防邊之策惟有從交通屯田二者爲著手之方現在亟
當組織吉江航業多造輪船行駛烏蘇黑龍松嫩各江藉以抵制
俄輪挽回利權至屯田一策或招民來江仿兵屯辦法編伍授田
並於沿邊分設卡倫計邊線延長三千餘里以每四十里一卡約
算計共將及百卡並擬於每屆五卡添設卡官一員其扼要處所
則酌設地方官以資治理必使本省邊線左右有人民以守其土
地有航業以便其交通兩岸邊堡隱然對峙則邊圉布置日形周
密矣臣等再四熟商今日治江之策邊務更難再緩除鐵路林礦

各事應另籌專款辦理外其專辦本省邊境一項自應指請的款以期經久查光緒十六年前將軍依克唐阿因籌練防軍奏定歲撥常年餉需六十八萬兩歷經部中就東北邊防經費劃撥在案自二十六年兵燹後部中卽未撥解此款現在邊務重要且以昔日邊防之款爲今日邊防之用挹注亦適得宜合無仰懇

天恩俯准飭下度支部無論如何爲難務將原撥江省東北邊防經費一款照舊按年撥給以重邊計出自

逾格鴻慈臣等明知部中計畫同一困難惟邊務方艱若無鉅款以資振興則江事更難措手區區呼籲之情伏冀

聖慈鑒察再自臨江州循烏蘇里江而南直達琿春均爲吉林邊界俟臣世昌抵吉後察度情形將來或兩省合辦或各省分辦再當奏明辦理除分咨查照外所有江省邊務緊要亟宜趕速經營

並請照撥經費緣由理合恭摺密陳伏乞

皇太后

皇上聖鑒訓示

江省巡防兵餉請飭由部撥解片

再江省財政向恃部撥及各省協濟爲度支自臣德全到江後整頓荒務推廣稅捐入款驟形暢旺然近年各處設官以及辦理新政各用款業經悉索無餘近日市面銀根奇絀荒價收項迥不如前不惟凡百新政推廣無資卽目前行政費亦將無所籌措臣世昌蒞江以來日與臣德全綜覈出入徒深焦慮查江省所有巡防餉需均由本省款項撥放以致行政經費支絀萬端竊維朝廷注重東圻邊省軍需必須由部撥款接濟乃足以資周轉臣等再四籌維現正計議分別用款之策除生利費應由臣等另行

奏明辦理外其兵餉邊務兩端均應由部中顧全大局力爲籌撥始可轉圜現在邊務一款已由臣等另摺奏陳合無仰懇

天恩俯准飭下度支部此後江省巡防兵餉卽由部中按年力任撥解騰出本省大租捐稅各款專作行政經費或尙可勉力支持如此則以地方之款供行政之用旣得本省騰挪之資借

天家之餉贍邊圉之軍尤勵國民袍澤之義倘再仍前挪墊則補瘡剜肉大患卽在目前臣等反覆籌量不得已而出此瀆請謹附片具陳伏乞

聖鑒訓示

統領吉祥革職發往軍台片

再據巡防中軍統領花翎二品銜協領吉祥報稱本年九月十三日夜間該軍副中營正兵張有才糾邀什長李長鈞等十人戕斃

營官宋桂山及哨長經鳳閣並搶去軍裝號衣馬匹等件同時叛去等情當經批飭該統領勒限嚴緝一面委派東三省行營營務處奏調直隸候補道倪嗣沖查辦去後茲據該道稟稱此案致變緣由叛兵張有才卽張天和原係江省著名巨盜於光緒三十二年十二月經統領吉祥收降本年九月間張有才復謀結夥出營搶掠被哨長經鳳閣查知回明管帶宋桂山告知統領吉祥請以軍法從事該統領遲疑不決僅令先交本哨看押不上刑具以致張有才挾讐反噬於是月十三日夜間勾結叛兵李長鈞等將管帶宋桂山哨長經鳳閣同時戕害並擊傷哨官康蘭培字識劉振綱攜帶槍馬號衣逃逸等情稟覆前來查統領吉祥明知叛兵張有才卽張天和係投誠鬚匪野性難馴平時並不嚴加管束迨至匪形已露經哨長舉發該統領又不立予根究僅交本哨散押致

釀戕官重案該叛兵等僅止十人以副中營全營兵力竟不能立時擒拏一任其從容逃脫現在時逾一月仍未弋獲一名種種辦理失宜該統領實難辭咎當此整頓營務之際似此庸劣將領未便稍事姑容相應請

旨將花翎二品銜協領吉祥卽行革職發往軍台効力贖罪以爲馭軍不嚴者戒管帶宋桂山哨長經鳳閣因公被戕情殊可憫可否仰懇

天恩飭部從優議卹並擊傷之哨長康蘭培字識劉振綱等一併發給卹賞銀兩之處出自逾格

鴻慈除飭各營一體嚴緝叛兵張有才卽張天和等十名務獲究辦並咨部查照外謹附片具陳伏乞

聖鑒訓示

擬請酌復遣犯舊例藉圖實邊摺

奏爲擬請酌復遣犯舊例藉圖實邊并妥籌變通辦法恭摺仰祈聖鑒事竊查遣犯一項與日本之無期流刑相仿泰西各國亦皆有之而尤以俄羅斯發遣之法爲最善攷俄國發遣一往西伯利亞一往高加索山均作無限苦工十年始准編入農籍並無釋回之文蓋因兩處皆地土荒寒居人稀少卽藉此以爲殖民之用立法命意具有深心迄今黑龍江左岸一帶凡屬俄地者屯戶較多居民櫛比其故半由於此江省幅幘太廣從前邊禁未開山荒未放旗屯聚族而處平民不容雜居是以罪犯發遣到江不得不留於各城安置歷年旣久麇聚過多節經嘉慶十七年奏准將遣犯分別改發減發致到配之犯陸續解回二十五年刑部又奏准停止發遣道光年間發遣官犯尙多常犯極少一時壅積爲之疏通

當時邊吏以鎮靜爲主義固未嘗計及實邊抑情勢有不得不然者也嗣咸豐二年酌復舊例給披甲爲奴者八條又因新疆遣犯壅滯改發黑龍江者十三條此外情節較重之犯應發新疆者亦酌量改發黑龍江同治四年刑部復因遣犯過多將應發黑龍江爲奴安置人犯改發各省駐防及極邊足四千里充軍九年修例時特指明十八條改發極邊煙瘴凡此成例類皆因時變通互爲消息臣等伏念以江省土地之廣人民之稀二百餘年間坐棄膏腴不謀生聚今則強鄰逼處他族潛滋就黑龍江左右兩岸觀之已不免有興廢之感爲目前計舍殖民實邊殆無他策現在雖極力籌畫實難見功因思發遣之犯每歲當復不少邇來籌邊之策與前旣已不同似不如另籌辦法卽將應遣人犯擇其情節稍輕者規復舊例仍發黑龍江其家屬願隨者聽之爲奴人犯改爲充

當苦工五年安置人犯則充當苦工一年均於到配時酌撥各地
方官嚴加管束俟年滿後察其人尙安靜酌撥邊境設官處所編
入農籍計口授田俾其墾種是

國家不費一錢數年之後增出邊氓當可漸期繁盛其實發煙瘴
及常赦所不原應發極邊各犯亦可一律辦理各犯所帶家屬悉
由官爲資送凡犯屬及押解員役經過沿江沿海乘坐輪船及關
內外火車均請免價以紓官力如此一轉移間內地可省解配之
勞邊疆可得殖民之益辦法似爲妥善或慮此輩凶悍性成置之
邊界深恐滋生事端不知近日常俄交通已久彼此尙屬相安且
該犯既有田畝可耕又復室家完聚自可化其囂凌之氣勉爲安
分之民卽間有梗法之徒亦不難隨時懲辦臣等爲省費實邊起
見籌計及此事關刑制未敢妄議更張相應請

旨飭下法部及修律大臣核議遵行所有擬請酌復遺犯舊例藉圖實邊各緣由是否有當理合恭摺具陳伏乞

皇太后

皇上聖鑒訓示

黑龍江派員試署司缺并陳變通情形摺

奏爲請設司缺派員試署并陳變通辦法情形恭摺仰祈

聖鑒事竊查江省幅員遼廓物產豐饒百廢待興得人而理臣世昌於本年十月二十日行抵齊齊哈爾省城與臣德全晤商辦法仍以設官分職明定責成爲目前之要務惟是江省土廣人稀天寒地僻自哈爾濱以北荒涼滿目有互數十百里不見居民者至一省所入歲不及五十萬近年舉辦各政皆恃荒價以爲挹注一切經營悉同草昧而員司俸糈微薄又不足以贍給賢材故論現

在情形不患有冗曠之官而苦無民可治至其難處又不獨無行政之費且恐無以養官此種艱難無論內地行省迥然不同卽揆諸奉吉兩省亦覺較難措手臣等再四籌酌惟有查照前奏官制量爲變通蓋旣不敢踵事增華致來虛位之誚尤不敢因陋就簡致無舉職之人查奉省司道各缺除交涉司江省事務本簡旗務蒙務二司尙須體察情形另籌辦法均請暫從緩設外民政爲地方自治之權輿提法有司法獨立之關係度支爲通省財政之樞紐自應一律增設與原有之提學共爲四司巡警則江省城鄉居民甚少擬不設道缺歸民政司兼辦並以從前之工司併入勸業在江省最爲切要而諸務並無萌芽擬亦不設道缺暫由提學司經理江省學務經該司張建勳苦心勸導粗具規模學業本屬相通使之盡心摩畫不難兼顧有餘提法司卽以現有之分巡道兼

正書卷十一
三
按察使銜裁改之度支司則以善後局及從前之戶司併入似此
變通辦理庶幾損益得宜以上各缺卽應派員試署茲查有軍機
處存記二品銜直隸候補道倪嗣沖器局閎通才猷練達堪以試
署民政部司使現在黑龍江分巡道兼按察使銜秋桐豫謹慎老
成熟諳律意堪以試署提法司司使二品銜候選道談國楫學識
開敏勤幹有爲堪以試署度支司司使仍由臣等察看如其果能
勝任再行請

旨簡授至參贊所領之承宣諮議兩廳事務江省原由文案處辦
理尙臻妥洽現在僉事科員議員等暫難添設擬酌設秘書官與
原有之委員分任其事並將從前之印務處併入其各司以下各
官亦均暫用委員以歸簡易所有請設司缺派員試署及變通辦
法各緣由理合恭摺具陳伏乞

皇太后

皇上聖鑒訓示

江省辦理交涉中立善後出力各員請獎摺

奏爲江省辦理交涉中立善後各案出力人員謹擇尤歸併請獎以昭激勸恭摺仰祈

聖鑒事竊維黑龍江僻處邊陲自強鄰駐兵於斯外交諸多棘手日俄宣戰辦理各事愈益艱窘而於亂後振興庶政撫插邊氓則尤爲難之又難者臣世昌上年奉差至江稔知江事艱棘籌辦非易臣德全在江數年日督各員相機措注艱苦同嘗敢將其時曲折情形謹爲我

聖明縷晰陳之伏查江省自庚子而後主權放失俄官駐省客隊未歸因應偶失機權國步卽虞隕墜以故爭鑛產則情商理喻議

占地則舌敝唇焦爭執瓊瑋一城磋商竟垂兩載中間鐵路交涉之難派員對待之難無一事不困心橫慮無一日不履險蹈危幸賴辦理各員應付悉合機宜邦交日臻輯睦此歷年從事交涉之績有足錄也自甲辰以來兩鄰競爭大隊來往徵兵輓粟絡繹於途凡關夫非理之要求皆視爲戰時之權利急則動多齟齬緩又國權莫保兼以馬賊縱橫鎮壓則兵單械絀鄰氛不靖貿遷則十室九空操縱機宜頗煩壁畫而各處籌辦人員多能維持大局奠定邊疆迨及兩鄰撤兵地方安謐其事爲臣僚所不忍言其功爲朝廷所當甄錄此近來籌辦中立之功不可沒也江省屢承兵亂瓊瑋一城鞠爲榛莽其呼倫貝爾及墨爾根布特哈各城向日民戶蕩析離居光緒二十九年尙蒙

特恩飭部撥給內帑迭經派員蒞赴各處辦理現在旗民各戶均

經復業惟各城皆僻處極邊苦寒異常當俄兵未退之時任事者不憚艱辛經營善後或冰雪馳驟無間冬春或案牘紛披不遑寢食加以上年瓊城秋潦爲災哀鴻徧地經臣德全派員散放米麪拯此劫後遺黎查戶分糧備極勞瘁此歷年辦理善後各員尤足念也竊查吏部新定洋務獎章每屆三年准照異常尋常請保北洋因籌辦中立經前督臣袁世凱奏准給獎又上年廣西辦理善後事宜亦經該省撫臣遵

旨從優保獎各在案江省歷辦交涉中立善後各案其事機之艱鉅百出邊陲之情勢萬難尤非各省所能比論臣等旣已深知辛苦未便沒其微勞且歸併請獎所保僅止三十餘員實屬毫無冒濫合無仰懇

天恩

正書卷十一
三三
特准照擬給獎以資鼓勵而策將來出自

逾格鴻施除飭取各員履歷分咨查照外所有江省辦理交涉中立善後彙案保獎各緣由理合繕單恭摺具陳伏乞

皇太后

皇上聖鑒訓示

請撥奉天黑龍江戊申年的餉並催各省歷年欠餉摺

奏爲請撥奉天黑龍江戊申年的餉並請催各省歷年欠餉以應急需恭摺仰祈

聖鑒事竊查東三省舊章每年請撥餉銀數逾百萬餘兩嗣經前署將軍崇實於光緒元年體察情形按照折扣章程通盤核計除本省應徵之款抵放外每年請實撥銀七十萬兩等因奏奉

上諭東三省爲根本重地現當整飭戎行之際著照所議自明年

爲始每年由部撥銀七十萬兩作爲東二省的餉此項銀兩仍著戶部於各省鹽關地丁項下指款奏撥令各省督撫如期籌解盛京戶部分別交納等因欽此歷經戶部奏撥在案無如各省均未按照部撥銀數常年籌解足額計自光緒元年起到三十二年止共積欠銀三百八十九萬五千一百七十餘兩上年部撥奉天黑龍江丁未年的餉銀四十萬零三千兩現在僅據山東兩淮等處先後解到銀十六萬兩又據臨清關報解銀二萬兩尙未到奉計復欠解銀二十二萬三千兩庚子以後三省物貴時艱民生重困八旗官兵生計尤絀專賴俸餉一項以資接濟而本省例定抵放制餉之款僅止地丁餘租糧貨稅捐等數項向本入不敷出加以兵燹頻仍偏災時見閭閻元氣未復租稅徵收不旺近又奏改官制舉行新政支用浩大財力異常拮据而應供

陵寢祭品應發官兵俸餉均屬歲有定額刻不容緩挪款應付羅掘俱窮專望各省協餉源源撥解以濟眉急乃各省不惟歷年積欠絲毫未解卽現年經部指撥之餉亦均解未及半以致春秋兩季俸餉每年僅放九箇月尙須挪移遷就放不及時此外雜支款項現均酌量停緩專待鄰餉發放轉瞬明春俸餉又將屆期除本省額徵儘數抵充外所虧亦屬甚鉅惟有仰懇

天恩嚴催各省關共體時艱勉顧大局將所欠歷年協餉迅速籌解以應急需至戊申年應請俸餉除吉林咨明以通省歲入各款足抵該省並打牲烏拉戊申年俸餉毋庸請撥外應請

飭部照章撥給奉省戊申年的餉二十六萬兩黑龍江的餉除應徵作抵外請撥十二萬九千兩仍分晰奉天黑龍江各款目以免牽混所有臣等請撥奉天黑龍江戊申年的餉並請催各省歷年

欠餉各緣由理合開具積欠清單恭摺具陳伏乞

皇太后

皇上聖鑒

安東縣大東溝稅款仍留作奉省練餉及一切行政費用片
再奉省進款向以稅捐爲大宗本年安東縣新設稅關大東溝分
關亦將開辦凡從前東邊稅局原徵洋土貨出入口稅均須改歸
關道徵收惟查此項稅捐本係抵發練餉要需當未開商埠以前
該捐局就地徵收藉資挹注今則開埠通商一切行政費用大倍
於前倘改歸關稅之後將該處原徵之款不歸本省之用則不但
新款別無可籌必致舊有之款以之抵充練餉者亦歸無著殊於
財政大有窒礙誠以安東東溝兩關徵收之款卽係東邊原徵之
稅捐與他處新改海關者不同如以一改關稅之名卽將奉省原

正書卷十一
有之款悉數改撥致奉省失此鉅款將諸事無從措手且該關開
設之初應需一切經費均係奉省籌撥尤應照案撥還以清款項
擬請自安東縣大東溝兩關開關之日起所有徵收稅款除撥還
籌墊經費外其餘各款仍留作奉省練餉及一切新政之用以濟
要需而免匱乏謹附片具陳伏乞

聖鑒飭部立案施行

退耕堂政書卷十二目錄

奏議十二

調東陸軍底餉明年擬請仍由原處照發摺

吉省邊務緊要請撥常年經費摺

吉省應行要政措施大概情形摺

吉省請設司道各缺派員試署摺

吉省增設府州縣員缺摺

吉省現辦邊務情形摺

吉省本年商業蕭條釐稅頓減片

密陳三省危迫情形並籌辦法摺

密陳借款辦法片

議設東三省督練處摺

援案清丈東流圍荒捐

變通鳳岫安寬四處葺塘山荒片

1911年

退耕堂政書卷十二

天津徐世昌

奏議十二

調東陸軍底餉明年擬請仍由原處照發摺

奏爲調東陸軍底餉明年擬請仍由原處照發以資騰飽恭摺仰
祈

聖鑒事竊臣等前於籌撥東省陸軍摺內聲明由陸軍部調撥第
三鎮全隊由第六鎮及二四五鎮抽撥步礮馬各隊立混成兩協
皆令赴東填紮聽候調遣餉項仍暫支原款俟一年後查看財力
能否設法再行奏明辦理等語奉

旨允准在案嗣准陸軍部將第三鎮暨第一混成協升任北洋大
臣袁世凱將第二混成協先後分撥到東當由臣等體察情形於

第三鎮及第一混成協分紮奉天之新民錦州昌圖及吉林省城並長春甯古塔一帶其第二混成協填駐奉天省城以期聯絡而資訓練查第三鎮暨第一混成協自本年六月分起所有原餉加餉及開拔運費等項銀兩由臣等派員分別赴部支領其第二混成協自本年五月分起所有原餉由北洋餉局支領又該協添設協統一員標統二員並協標所屬員弁等月餉暨全協加餉並開拔運費等項銀兩亦由度支部支領在案竊思臣等原奏本以此項陸軍既已調東填紮則所需餉項如果東省財力充裕自應歸臣等籌付是以擬俟一年後查看辦理卽陸軍部暨北洋大臣先後奏請亦有此項陸軍一鎮兩協暫支原款俟一年後責令該省自行籌付之語臣等到任後於東省各款詳細鉤稽常年出入之款不敷甚鉅卽欲籌辦各項生利之事亦非旦夕所能奏效而陸

軍餉項計授所關約計明年五六月後必無處籌此大宗的款且該軍等開拔運費除部撥外尙多不敷及現在添置皮衣建造營房等項用款已屬不貲均須由東省籌備則此項正餉加餉一時實無從籌措臣世昌前次到京曾將東省籌款爲難情形與管理陸軍部慶親王奕劻陸軍部尙書鐵良籌議已准將此項餉需仍中部撥發以濟軍食合無仰懇

天恩俯念東省邊防緊要鉅款難籌

飭下陸軍部及北洋大臣所有調東一鎮兩協正餉加餉暨第二混成協添設協標人員薪餉等項自明年五六月以後仍照常撥一俟財力稍充再行隨時奏請改歸東省籌撥辦理除咨行陸軍部及北洋大臣外所有調東陸軍仍請由原處撥發餉項緣由謹恭摺具陳伏乞

皇太后

皇上聖鑒訓示

吉省邊務緊要請撥常年經費摺

奏爲吉省邊務緊要請指撥常年經費以資應用恭摺密陳仰祈
聖鑒事竊查吉省現因延吉廳一帶地方日人有藉稱爲韓國間
島強事覬覦之意當經奏派專員前往該處辦理邊務業將先後
籌辦各情形另摺馳陳又因濛江樺甸兩處亦與韓境相接並有
越墾韓民雜居其中及東與俄國相接之蜂蜜山一帶地方西北
廓爾羅斯前旗之蒙荒均屬空虛深恐再啟外人窺伺之心致蹈
延吉覆轍特先擇要設治不動聲色派員前往辦理亦經將設治
辦法奏陳在案誠以吉省界在俄韓兩國之間邊境綿長處處皆
關緊要現因間島交涉與韓接者日人固有意擴張與俄鄰者俄

人亦復待時而動以彼兩國之對於三省皆不惜鉅萬併力經營
我之籌備宜如何分外周密是以臣等於延吉廳邊務一事乘機
因應惟恐後時一切費用亦不敢稍存顧惜惟是吉省款項現已
支絀萬分前將軍達桂因稅捐稍旺將各省協濟之餉已奏明停
撥臣等到任核減苛細捐輸又因日俄戰爭停後貨物滯銷銀錢
不能流轉今歲所收各稅業已大爲減色加以新改行省各政舉
行出項復銳增數倍實已難於支持此次邊務用款數已不貲本
年開辦之始截至年底爲止已由臣等竭力統籌勉強支撥至常
年經費至少需六十萬兩萬難再減吉省財力困難實在無可籌
撥然萬不能以無款之故置邊務於不問事機危迫刻不可緩臣
等再三籌畫焦急萬分惟有仰懇
天恩飭下度支部迅速籌出的款六十萬按年指撥以應要需此

正書卷一
二三
款專爲籌邊而設關係至重且屢經臣等核計無可再減之款一經指撥卽歸實用並懇

飭下部臣勿以空言核減應付其本年開辦由臣等籌給之款並准作正報銷以昭核實所有吉省邊務緊要請撥常年經費各緣由理合恭摺密陳伏乞

皇太后

皇上聖鑒訓示

吉省應行要政措施大概情形摺

奏爲吉省應行要政逐漸措施大概情形恭摺臚陳仰祈

聖鑒事竊維東三省爲我

朝龍興重地而吉林實扼其中樞甲午庚子以還兵燹頻經瘡痍未復外交日棘內政不修盜賊橫行民無安處時局危迫迥與昔

殊臣等承

命東來正值改設行省豫備立憲之際所有興革事宜皆經再三斟酌次第籌商既不敢更涉因循又未便稍鄰操切加以掃除痼弊一時難絕根株造就人才急切不能合用謹擇其措置難緩而程度尙可幾及者敬舉大凡爲我

皇太后

皇上纓旆陳之一日整飭吏治查從前吉省官吏皆由投効而來其在關內旣置散投閑之已久到吉後奔競鑽營遂無所不用其極惟利是圖焉論政治地方官吏相驗命案往往積至三四起而始行緊要文書動逾數十日而不報至於民間詞訟則不問理之是非先恃財爲運動卽家資耗散訟不得直亦將諉於人事已盡而無所悔官旣不知自愛門丁胥役益復助其餒而揚其波吏治

頽靡於斯爲極臣等到任之始卽派員分赴各屬嚴密訪查祇以積弊太深非大加懲創不足以儆將來之玩愒臣世昌曾於覆查御史趙炳麟所參案內據實奏劾頽風爲之一振並手訂整頓吏治章程二十五條檄飭全省府廳州縣實力施行通飭司道以下改幕僚爲文案裁門丁用收發概以委員派充盡祛壅遏蒙蔽之患行政機關庶幾捷速現在官吏漸知循分盡職較從前之漫無規則者已覺稍稍改觀矣一曰開通風氣邊地民風錮陋進化最遲旗民彼此不相習官民上下不相通至於國際問題之日迫地方團體之不堅守舊之紳民尙無此等警覺非亟謀提倡啟牖難以圖功臣等近設旗務調查處以爲融化滿漢之基設政治考查局以期周知中外之事設官書局以濬導文明設宣講所闡報社以增益民智府縣欲設議會必恃公民之組織則先由省設自治

會憲政講習所以啟迪之省會欲行新政必視輿論爲從違則選舉議員設會議所以裁決之將來民情固結士氣發揚通省紳民皆有政治思想則憲政發達或可權輿於此一日普興教育吉省襲石武遺風人多樸僿士民不能兼習詩書開通智識而官吏亦無適於時勢之人才自非普設學堂不足以資培養近年省城雖有學堂然創設未久不無缺陷各屬蒙小學堂亦經稟設派員往查大半因陋就簡未能脫私塾積習臣等以爲欲挽學風非先示以準則不可因設模範小學堂以備外屬取法欲厚民生非各與以本務不可因設實業學堂使之按類研求而且姆教傳自古初女學尤爲切要並設女學堂以豫備他日之家庭教育至原設之中學堂法政館屋宇狹隘規制不完上課諸生大半寄宿僦居疲於往返臣等以簡陋自安終非久計復爲之另行建築局勢益恢

極意經營規模略備但期各堂諸生潛心向學漸底完全他年教
育普及當有英才蔚起之日一曰振興實業查吉省物產豐饒而
財政不能加裕者則以實業不興之故卽如天寶山夾皮溝三姓
東溝黑背各鑛產蜂蜜山濛江各荒地皆爲利源所在無如辦理
不得其法歷久卒鮮成功至於他種地利亦復聽其湮塞貨棄於
地智者惜之臣等詳查博訪謹擇其確有利益者先行試辦且風
氣不開狃於北地無桑之說謂其不宜蠶織不知奉天海蓋等城
飼蠶卽用椽葉賓州三姓甯古塔琿春等處徧山椽櫟正可藉以
育蠶特氣候稍寒必以五月至八月爲蠶忙之候而居民竟相率
砍伐以爲爨材實覺可惜臣等因候選訓導許鵬翊試飼山蠶著
有成效特設立蠶業局令其覓僱工師購求蠶種勸諭居民入局
學習一體試辦將來倡興織業實爲北地新闢之利源若林業在

在吉省爲商品大宗長白山東南一帶叢崖絕巘古木陰森祇以樵採罕通遂爲萑苻藏匿之藪本地木商貨本微薄不能辦此巨業而外人遂覬覦其間非設局選擇砍伐是坐棄自然之利轉貽邊地之憂也臣等特派記名道宋春鰲由官帖局提款二百萬串創辦林業局用火鋸機器入山砍伐選成料片運省銷售日久人跡漸多盜蹤自絕興利除害計無逾此又查日本近年盛獎印刷之業所以新書報紙舉國風行吉省向無完備之書肆以致文化不開臣等以爲非提倡印刷不能有效特就官書局內兼辦印刷以爲倡導凡購運機器改築房舍現已規模略備而造紙一業並可相輔而行臣等前派農工商局局長主事胡宗瀛赴日本考查實業會令其購機一具用木質或麻料試辦造紙將來不特印刷官書取材甚便卽通省公牘紙張亦可由局刷印以歸一律而民

間所用之洋紙並可少遏其源費款無多用途極廣此尤輕而易舉者也一日慎重裁判上年

朝廷特命大臣修訂法律改良裁判特以司法爲獨立機關嗣奉法部咨會改良監獄益見哀矜民命無微不至伏念吉省疊遭兵禍子遺之民益宜矜恤臣等視事之初各屬訊案猶不免有私用非刑多傳鄰右濫行羈押以致斃命等事疊經嚴飭近漸革除惟不將裁判改良終非根本之治所慮者無精通法學人員一時難以舉辦因設審判講習所延訂中外法律專家按期授課使候補投効各員分班講習與法政學堂相輔而行俾養成司法人才以資分布一面卽組織省城高等審判廳分別民刑訴訟爲全省模範至監獄一事各屬頗有改良建築者惟是管理無人亟宜造就查定章法政大學原有警察監獄學一門故另設監獄一科附入

巡警學堂並飭提法司議定監獄改良辦法通飭仿行用符部議
一曰推廣警政吉省上年舉辦巡警逐漸整飭略有可觀然止限
於城市至於四鄉向由民間自設練會相沿日久流弊漸滋恒有
不孚眾望之人謀充練長捏遞保呈地方官衙門但收陋規不加
考察遽行派充遂致徒斂貲財而無守衛之實則練長非人之害
也甚至村鎮各自爲謀巡察疏懈猝遇賊至呼應不靈臣等查悉
此弊亟擬改練爲警而因仍已久改換甚難且亦難得合格警兵
爲之分佈惟有嚴飭各屬嗣後凡舉練長必取其能孚輿望且令
召集殷富之家投票公舉不得僅憑保呈爲據八月間吉林府西
南一帶紳民公舉精銳左翼統領誠明承辦西南山一帶鄉團已
稍有聯合一氣之意復爲另定章程略師巡警制度飭通省一律
仿辦並於城廂內外添設四鄉巡警按其轄境廣狹分區設局實

行保安政策爲之楷模此時因俗變通將來仍可隨時改換庶幾防匪衛民可以漸期周備一日勦捕盜匪吉省山巒復沓向爲盜匪巢穴加以防營廢弛兵燹以後日俄所招華隊同時遣散無地可歸勾結游民蜂聚爲患途搶綁票慘不忍言民知官不作主但以供給求安官以兵不能戰第恃招撫了事賊知官之必出於撫也益復恣肆而無所不爲姑息養奸毒痛無極臣等到任之始賊燄正熾幾於路斷行人猶有以招撫之說進者臣等知此等積匪非痛加勦戮難以肅清當卽嚴檄各營分途勦捕數月以來據東三省翼長所帶淮奉各營暨吉省各防軍在東山及西南山一帶跟蹤追勦先後共擒巨匪七百餘名其追捕所窮皆官軍素所未到之地其攻擊之烈爲積匪歷來未受之創往往賊困圍中裹傷絕食相與搯吭自盡以冀全尸狼籍情形殊爲可憫而各處地方

官拏獲匪犯均經隨時訊明立予正法地面漸形安謐可以仰慰宸廑現屆木落山空賊勢已衰此後當嚴密稽查實力防堵俾閭閻日就安謐一曰清釐財政吉省度支向稱困難近來試辦新政條目益繁出款已不可以數計而查核本年所入如酒稅一項業已奏明減收其七釐九釐各貨捐自上年俄兵退後鐵路工役各項皆停來貨既稀收數益形短絀且各局經徵委員原定薪水較薄每因日用不敷輒生他望向來侵蝕之弊未嘗不由此而生現當徹底清釐自宜酌加津貼俾能自贍一面調查各局近三年徵收確數嚴定比較使有準則庶可望其潔已奉公而從前隨意徵解分蝕虛報之弊可漸絕矣以上八條皆就現在已辦情形略陳大概爲治之道本無近功以吉省積習久深外憂相逼若不從速料理深恐難以圖全是以臣等數月以來講求政治則察吏不得

不嚴非諸弊盡除新政無從下手保乂民生則勦匪不可不亟非
擾害盡去實業無由發生至於收效之難易遲速均尙不敢豫計
惟有竭力盡心冀圖逐漸擴充所有添設之學堂局所容卽片摺
分別奏請立案其餘未盡事宜自當隨時體察情形再行詳細入
告除分咨各部查照外理合恭摺繕陳伏乞

皇太后

皇上聖鑒

吉省請設司道各缺派員試署摺

奏爲吉省請設司道各缺派員試署并酌量裁改各情形恭摺仰
祈

聖鑒事竊臣世昌於本年十一月初七日行抵吉林省城與臣家
寶接晤籌商一切并及官制辦法伏念吉省爲我

朝根本重地實居三省之中文化久開民生較富長春一府又縮南北要衝交通既繁形勢尤爲扼要比之江省各事俱有規模比之奉天地方亦尙爲完善徒以官吏不知整頓積弊叢滋現在外患已形不能不急圖治理現有提學提法兩司其吉林分巡道一缺自應遵照奏定外省官制裁撤此外應增設者吉省外交事件現在正關緊要將來吉長通行鐵道諸務更繁各國商民必且日多一日亟應設立專司經理以交涉局附入民政則以巡警局自治局及關於民政各項局所改設不更設巡警道缺度支則以所有財政各局及從前之戶司併設勸業道則以農工商鑛林業各局所併設從前之刑司裁歸提法司兼辦工司則分別併入民政司勸業道統計增設各缺合之原有兩司共爲五司一道庶可各專責成旗務暫不設司以從前兵司改設旗務處先行試辦蒙務

則仍須體察情形從緩辦理至吉林副都統一缺自改設行省以後事務頗簡與外城各副都統情形不同查黑龍江省城副都統缺早經奏請裁撤吉省事同一律相應請

旨裁撤俾昭核實所有新設各缺自應派員試署茲查有二品銜奏調分省補用道鄧邦述器識閎通才猷練達考查各國政治極有心得堪以試署交涉司司使二品銜軍機處存記代理吉林分巡道謝汝欽才識優長器局穩練久歷邊徼眾望允孚堪以試署民政司司使二品銜軍機處存記奏調分省補用道陳玉麟時務通達規畫精詳前在湖南四川籌辦要政均能潔已奉公卓著成效堪以試署度支司司使二品銜奏調直隸候補道徐鼎康心細才長安詳謹慎講求時務識議閎通堪以試署勸業道仍由臣等察看如能勝任再行請

旨簡授參贊所領之承宣諮議兩廳事務吉省亦由秘書官及文案處辦理均臻妥洽應如其舊而以從前之印務處併入司道以下各官先各設首科僉事一人餘暫緩設而以委員分任其事至省外各缺則以長春最爲緊要地居四達之衝中外輻輳交涉紛繁實與哈爾濱同一情形非有得力大員不足以資鎮攝應請先設吉林西路兵備道員缺駐紮長春責令辦理交涉一切事務俾專責成一俟奉

旨允准設缺後再行揀員試署其餘各路應設員缺容再體察地方情形陸續奏明辦理所有請設吉省司道各缺派員試署并酌量裁改各緣由理合恭摺具陳伏乞

皇太后

皇上聖鑒訓示

吉林增設府州縣員缺摺

奏爲吉省屬境遼廓擬請擇要增設府州縣員缺以固邊陲而資治理恭摺仰祈

聖鑒事竊惟吉林控馭蒙疆幅幘最廣從前人民稀少土地荒寒是以區域雖寬設官無幾近來生齒漸眾荒地亦須次第放墾加以地僻山深半爲盜賊逋逃之藪官旣鞭長莫及民更裹足不前而邊地空虛尤易啟人窺伺蓋昔之設治惟以衛民今則兼爲保土之計有刻不容緩者也茲查省城東北蜂蜜山一帶平原千里土盡膏腴光緒二十九年將軍長順奏准派員設局試辦招墾一時雖未報竣但能認真經理富庶自不難期其地東臨興凱湖一無屏蔽西距甯古塔城七百餘里兼顧難周擬請添設知府一員名曰蜜山府又省城之西廓爾羅斯前旗所放蒙荒地亦不少

其地爲長春洮南兩府要道擬於適中之長嶺子地方設知縣一員名曰長嶺縣又省城西南之濛江開辦墾務歷有年所東南與韓爲鄰居民多以入山營獵爲生風氣強悍幾爲教化所不及近則分編仁義禮智信五社民物亦漸蕃滋擬添知州一員名曰濛江州又東南爲樺皮甸子循頭二道江以及古銅河大沙河一帶依附長白山脈地勢遼濶擬請添設知縣一員名曰樺甸縣以上各缺均仿照奉天章程酌派設治委員先往試辦一切事件逕由該員直接司道辦理其州縣亦不歸府轄以省轉折原有墾局之處卽由該局委員相機布置統俟辦有端緒人地得宜再行奏請補授實官其應行刊發關防請鑄印信建葺城垣衙署核給廉俸津貼均由臣等酌量情形隨時奏咨辦理此外尙有應設之缺惟移居招墾因經費支絀一時尙難措置完密只可逐漸設施倘遇

實有迫不及待者再當隨時籌設所有此次請設各府州縣員缺合無仰懇

天恩飭下會議政務處吏部迅速核議施行除分咨外謹恭摺具陳伏乞

皇太后

皇上聖鑒

吉省現辦邊務情形摺

奏爲敬陳吉省現辦邊務情形恭摺仰祈

聖鑒事竊臣等於本年八月間曾因吉省延吉廳地方邊務喫緊派令副都統銜現署琿春副都統陳昭常爲督辦陸軍協都統銜正參領吳祿貞爲幫辦並將該處當時情勢奏明在案嗣該員等陸續行抵該處體察情形隨時稟報並由臣等隨事與樞臣部臣

籌商辦法一面督飭妥爲布置數月以來略有頭緒請爲

朝廷縷晰陳之查延吉廳設治爲時雖尙不久然長白山爲我
聖朝發祥之地史冊昭然此山現在廳治境中其爲

國家版圖自無疑義向歸琿春協領管轄光緒十一年始設招墾
分局十三年奏設通商總局於和龍峪並設分局於光霽峪兼理
越墾事宜蓋從前韓國係我藩屬壤地相接居民往來本可不分
畛域而所以設此局者一則使之有自由貿易之權一則使之有
安土忘歸之樂其所以爲韓民謀利益者實已無微不至近數年
中時局變遷邊情亦因而小異然越墾之眾久已相安從前韓民
旣不願照韓國之請一律引還此時我自不能因係韓國之民稍
存歧視該員等到後業經奉宣

朝廷德意并恐其受我官民欺壓於韓民聚集之區皆各設一派

正言卷之二
三三
辦處派委事務員在彼稽查彈壓訂立辦事章程俾其遵守韓民
初尙不免爲謠言所惑心懷疑貳近見我能實行保護處置和平
已無不鼓舞歡欣懷歸恐後日前竟有學生多人自請薙髮改裝
願歸約束之事感孚之情旣已如此則我之所以籌保護者更不
容緩現擬竭力籌畫先行清理戶口蓋越墾之民旣多戶籍斷難
稍混旣爲我民卽當服我政令清查能得要領便可悉泯猜疑保
衛地方巡警爲要原設警士多不諳警察學問且地廣人少分布
難周亟應責成該廳認真辦理而興學勸農諸要政亦卽次第興
舉以培其基至該廳原駐吉強軍一營雖經遵照陸軍部章程改
編巡防隊而人數較少遇有剿捕等事深恐不敷調遣尙當徐加
整頓俾益完密以上所陳皆現在籌辦延吉廳邊務之實在情形
也再查該廳所屬之天寶山一帶鑛產森林最爲豐富曾經前將

軍派委程光第開辦銀鑛嗣以貲本虧折將該員參革查追有案可稽是該員早已離差與此鑛毫不相涉乃該員因辦過此鑛知其有利可圖竟敢與人私訂合同復往招工開采經陳昭常等到彼查出實據立將該鑛封禁現該員業已畏罪潛逃正在飭拏懲辦臣等伏念吉省沿邊鑛山林立徒以官家辦理不甚經意遂致若輩從而生心如不及早自圖必有指爲放棄權利者實不啻授人以柄惟有一面嚴行禁止一面設法經營此又因與邊務重有關繫而不得不豫爲防範者也總之現在籌辦邊務仍不過保守權利整飭綱紀至於越墾之民本與齊氓無異但使地方諸務措置得宜則吾民安而越墾之民亦無不俱安卽不至損我權利也從前該廳以地面太廣經費不充布置未能周密現有陳昭常等在彼事事考察督飭該廳遇事整頓或可漸圖治理臣等有人民

正訓卷之二
一三三
之責無論事機若何艱難惟當併力圖維隨機策應以期仰副我
朝廷慎重邊圉之至意所有現辦吉省邊務各情形理合恭摺具
陳是否有當伏乞

皇太后

皇上聖鑒

吉省本年商業蕭條釐稅頓減片

再吉省經徵七釐捐向按各鋪商進貨置本抽取九釐等捐照賣
貨價值徵收雖經徵之法程各殊要占視商業之興替以爲收數
之盈絀且吉林邊瘠之區本無巨埠又無巨商大賈貿遷之術素
鮮講求故除長春雙城伯都訥阿勒楚喀等處市廛尙稱繁盛外
其瑯春甯姓各屬率皆僻處一隅山河阨塞販運維艱商業經營
由來不旺光緒三十年間日俄構兵道途斷運百貨因之匱乏迨

三十一年和局開議輟跡稍通商賈乘時趨運爭先恐後來貨漸多銷路亦暢兼之俄軍尙未撤退濱埠鐵路工役未停所有客軍餉需鐵路經費無不聚積於此來銀之源流旣廣各商之財貨自豐所以三十一二等年各項捐釐收數充溢實爲歷來所未有迨至客軍退撤工役停止銀之來源日見窒澀錢法卽不通順諸貨價值隨亦逐漸低減市商積存陳貨半受虧折本年夏間亢旱日久商業蕭條較前益甚以致春夏各季釐稅收數頓減此時已屆冬令仍無起色轉瞬歲除恐難如額徵解餉需攸關實深焦灼等情據餉捐總局總理留吉補用道張瀛稟請奏咨立案前來臣等覆查屬實除仍飭該總理等督同經徵人員嚴杜隱漏實力稽徵以濟餉需並咨部查照外理合附片具陳伏乞

聖鑒

密陳三省危迫情形並籌辦法摺

奏爲密陳東三省危迫情形並籌切要辦法恭摺仰祈

聖鑒事竊臣於本年十月十八日由奉起程前赴吉江兩省籌辦一切事件所有兩省應辦各事業與各該撫臣先後擇要奏陳並將起程及回奉日期電奏在案伏念東三省爲

陪都重地邊塞荒蕪人民寥落吏治廢弛財政銷亡寶藏彌望而利源不能闢疆理遼濶而道路不能通卽無外患已難自存加以強鄰逼處日夕經營擲金錢拚生命出全力以相頡頏時局至此更將從何措手然臣明知其難不敢因難苟安疊將危迫困難情形並借款築路等辦法瀝陳於

君父之前者臣豈不知借款之擔責任築路之起交涉哉誠以熟思審處舍此更無入手之方若其委蛇養望顧後瞻前掇拾補苴

以待時變固非東省之所能圖存亦豈

朝廷策勵之心與臣所以自待之志臣此次巡蒞兩省又復詳加體察並與三省撫臣互相討論其關於全局而不能不通籌並舉者用敢撮舉大綱爲我

皇太后

皇上剴切陳之查三省幅幘大於日本兩倍徒以交通失權外人相形見絀自東清鐵路分屬日俄橫亘直貫形隔勢絕新奉鐵路贖回以後津奉始有聯絡之機然日人之安奉鐵路又思改良撫順支路至今未撤俄人又擬於沿邊另築鐵路有囊括席捲之思現雖議築吉長鐵路齊昂輕便鐵路然仍與東清接軌其權不能盡自我操此外三省腹地應修之路甚多能皆逐漸修築使脈絡貫通或可稍資補救否則山徑阻深幾無人跡荆榛載道行旅不

通不但無鐵路無航路且無國路不但人不能至且信亦不能達
向來往漠河金廠者必須假道俄疆而我之內興安嶺山深箐密
道路未闢至可奇詫臣等當以非謀交通則三省皆爲絕地查從
前黑龍江將軍程德全曾有議築新齊鐵路之奏經郵傳部覆准
在案臣等到任後屢經籌議咸以此路爲最要厯經密派人員沿
途履勘並擬分三段辦理由新民至法庫門爲第一段由法至洮
南爲第二段由洮至齊齊哈爾爲第三段第以創辦伊始必須慎
密故擬先修第一段不日新齊鐵路卽以爲關內外展修之路其
工程做法及借款辦法皆已粗有規模迭經密商軍機處外務部
郵傳部迄今尙未定議又信息阻滯每至貽誤事機東省電綫向
不完全且多殘毀經臣等竭力設法於吉林東路則有額木索甯
古塔琿春延吉廳等處於吉林北路則有榆樹縣雙城廳阿什河

哈爾濱於黑龍江則有呼蘭府綏化府海倫廳齊齊哈爾等處一律添設電綫適值嚴冬倍歷艱苦現已一律竣事此後消息當可靈捷此外如修治道塗疏通河路尙擬明春擇要次第興辦民人來往貨物運輸此爲樞紐三省形勢皆處邊陲邊務之要岌岌可虞奉與韓接江與俄鄰而吉則介於俄韓之間吉省之延吉廳一帶韓民越墾日多向我約束今日本強立間島名目以保護韓民爲詞分派憲兵越界干預經外務部王大臣據理準情再三駁詰至地方應辦各事臣等先事預防幸未爲其所乘然尙未知作何結束此外如附近之濛江樺樹甸子及奉省之臨江通化韓民越墾雜居與延吉正復相同吉省之東蜂蜜山一帶則與俄相接祇隔興凱一湖俄人來者日多若江省呼倫貝爾所屬之額爾古訥河及哈拉爾河等處皆有俄人越界墾牧事畢歸屯無人禁

阻又如黑龍江岸一帶俄人皆於彼岸節節設屯生聚甚繁居民漸密而伐木刈草則均取給於我境然我之境內非但無官亦且無民非但無卡屯亦且無房舍如再有延吉之事鞭長莫及聽客所爲更將何所籌措是以前經奏請濛江蜂蜜山等處增設郡縣以期稍稍布置至黑龍江沿岸千餘里與俄接壤彼則居民相望我則曠土無垠若不及早經營後患何堪設想前在江省曾經具奏擬暫設屯卡及稍購船隻略爲部署爲移民實邊之初基然必視財力之盈絀定規模之廣狹臣又嘗考查三省戶口不但民籍寥落卽旗籍與昔年相較亦復大減東省本皆八旗世僕往年嚴封禁之令故漢民來者尙鮮何以旗民生齒不繁漸就凋敝根本所關至爲可慮是以有荒地而不能墾有實業而不能興神皋隩區漸歸荒棄皆無民之患也今欲實行開闢不獨造廬浚井耕犁

籽種均須籌給更必先謀交通以便來往廣行貨幣以劑盈虛乃能樂業安居不召自至戶口既充斯政策爲之一變是又亟應籌辦者也他若理蒙荒以綏藩服杜他族之覬覦興實業以保利權謀目前之抵制已歷經臣籌擬奏陳在案凡此皆內政之大綱而外交之先著也然能否次第興辦與將來有無效力仍視籌款之多寡爲衡臣言借款久矣而議者或慮籌還不易貽害無窮殊不知國帑如此空虛東事如此急迫不辦事則不能圖存不籌款則不能辦事臣固已熟籌審慮至再至三而料事必出於此也臣忝荷

聖恩當茲鉅任自維到任已逾半載而所擬要綱亟待籌辦者左支右絀尙無成議非但無以慰

兩宮之憂勤並無以副天下之責望撫衷循省昕夕徬徨幸賴

聖明主持於上准其陸續籌借奏明辦理臣惟有懍遵

諭旨設法籌借仍賴樞臣部臣實力相助以底於成乃能興辦前項各要政假以歲月合羣策羣力以圖之於三省或可稍有補救於大局或可共望治安若夫危詞莊論互相譏彈欲以尋常繩墨而治危急存亡之東三省則非臣之所敢知矣抑臣更有請者疆臣治事之能力全恃

朝廷以爲主持臣伏見

深宮宵旰焦勞孜孜求治而外省督撫辦事或不免多所瞻顧者則由於政府與各疆臣宗旨各異意見紛歧夫以今日時局正使內外諸臣協力同心猶懼不及於事若復多所瞻循加以揣摩更復何望臣竊見今日執政諸臣類皆公忠體國宏濟艱難若能立定宗旨泯去意見則孰敢不黽勉從事力圖自效一轉移間其效

捷於影響此又臣區區之愚不敢不敬貢於

朝廷者也所有東三省危迫情形並現籌切要辦法緣由謹恭摺
密陳伏乞

皇太后

皇上聖鑒訓示

密陳借款辦法片

再東三省地方爲日俄兩國之所經營日人之於南滿洲十六處
車站計費六百萬安奉鐵路計費三千萬改良南滿洲鐵路計費
八千萬而養兵費尙不在內俄人經營哈爾濱計費二千餘萬現
鐵路虧折每歲約一千六百萬而護路養兵建築等費又復歲糜
甚鉅彼兩國在我境內擲無限之巨貲急起直追日有進步而我
介於兩強欲圖抵制自非廣籌鉅款兼營並進恐日朘月削無所

底止然綜計三省財政幾不能供行政之費從前日俄用兵輸入之資財既多應用之貨品尤夥民間得此挹注頗有利益是以稅項驟增今苛稅既停止捐又減綜三省之財不能舉三省之事固不能不賴國家之全力以圖之如果國力充足能籌巨款以濟三省之急自無庸輕言借款無如部庫空虛司農仰屋卽協款一項亦屢催罔應官款既不足恃而閭閻生計艱窘民債又無可籌故不得已始有借款之請從前初創此議原由外務部軍機處電商歐美駐使探詢市價設法籌辦其後局面更易迨臣身膺艱鉅不能不再申前請但借款之合宜與否皆以鎊價漲落爲衡其扣頭成數出入尤鉅是以奉

命以來屢經籌議因英京市面近來借款不宜故未敢急遽舉辦夫以擬借外債之三四千萬兩卽使將來如數籌備欲以之抵制

強鄰充實內力尙恐甚難乃言者不察肆爲論說而朝士大夫亦有爲其搖惑而詆謀之者臣竊維借款一事日俄最爲注意蓋我多一分實力彼則少一分強權彼固逆料中國之財政必不能與之抵抗故得放手爲之深不願我之借鉅款以分其勢也保無在京散布淨言意圖反抗而我或至偏聽遷延不辦適墮其計彼獨何心甘受人愚臣惟有謹遵

諭旨設法竭力籌借俟有端倪再行奏明辦理如有再爲阻撓以聳觀聽者是不啻爲外人著力而忘己之疆隅日蹙此又臣鯁鯁過慮披瀝上陳以冀

聖明垂察者也謹附片密陳伏乞

聖鑒

議設三省督練處摺

奏爲議設東三省督練處以重軍政謹將試辦章程繕具清單恭摺會陳仰祈

聖鑒事竊臣等前於遵議東三省官制章程摺內聲明東省練兵關係重要擬另設督練處辦理開練新軍振興兵學整頓巡防各事奉

旨允准在案伏查舊制

盛京設兵部以掌兵籍而三省將軍以下各置兵司俸餉征調則胥隸於兵部法未嘗不善也積久弊生日就廢弛兵部前經奏請裁撤所存之兵司亦僅司旗營尺籍無關大計統計三省軍隊有八旗額兵有巡防營有捕盜營有護墾隊共馬步一百數十營土客並收操法不一其制則尙雜紛歧其勢則散漫惰窳臣等到任之始又奏撥陸軍一鎮兩混成協分駐要地自非有統管軍政之

區無以收整齊畫一之效竊維前練兵處兵部奏定陸軍章制內開督練處官制均按事之繁簡由督辦酌定人數奏咨立案思慮周密允宜取法又升任直隸督臣袁世凱於北洋設立督練公所仿照部章酌量變通亦經奉

旨允准在案今三省地方較北洋尤爲遼濶其事機之迫切軍政之頽敗則又過之亟宜參考形勢酌仿成規以期推擴而資整頓臣等到任後卽選擇熟悉兵事各員分別委充以爲開辦基礎現經重加會議釐定章程擬請設立東三省督練處經理新舊各軍事宜遵章以總督爲督辦三省巡撫爲會辦分置參議官兵備參謀教練三處總辦及幫辦提調文案等員俱如定制北洋大臣前曾奏請添設總參議以贊佐軍政現三省地廣兵多歸併徵募籌計檢校之事逐日增繁必須有資深望重之大員相助爲理故擬

仍設總參議一員奉省遼河口舊設兵輪現亦亟須整理松花黑龍二江亦擬擴充航政保護利權尤非有熟悉江防海防人員不辦定制督練公所應設省會地方東三省督練處爲統一三省軍政機關其勢不能三省並設專駐一省則又有偏重隔閡之慮擬請以總督所駐之區作爲東三省督練處餘由該處派員輪流駐紮稟承會辦就近辦理仍一面稟請督辦核奪庶幾如臂使指一氣相生原定員司本無額數而此次酌擬繁簡與北洋互有異同者亦正以此至既設三省督練處其吉林原設之督練處固應裁撤以一事權卽三省舊有之營務處亦應逐漸歸併惟各防營編制不同現經調防各處擬暫留營務處就近督率以資經理俟地方安堵編制改訂以後再行歸併辦理至三省本爲

豐鎬舊都士馬夙號精強近年日就凋敝尙擬汰弱留強挑入陸

軍同時練習以成勁旅藉以自固藩籬此又於該處成立之後所應行籌議者也惟是軍政一端爲人民之保障外交之後援三省頻遭兵燹逼處強鄰民貧而智不開兵多而餉日絀道路廣遠交通不便較內地尤難措手臣等惟有殫謀竭慮併力圖維以改良營制研求兵學爲始基以整一軍隊恢張國權爲主義以期仰副

皇太后

皇上睿念東陲力圖自強之至意其督練處已派在事各員薪水均參照北洋成案辦理因東省百物翔貴酌加津貼以資辦公如能勝任再行具奏至經費一項亦飭該員等預算俟核定後另行陳明此外未盡事宜及有應行變通之處隨時奏請施行再臣等現所擬係屬試辦章程俟陸軍部將督練處詳章奏准頒發後再

行遵照辦理又現在東三省陸軍已兩鎮有餘所有應設之東三省陸軍糧餉局業經照章設立三省軍械局就奉天原有之軍需局改設軍醫局以兵隊衛生關係緊要亦草創籌辦其餘如講武堂及測繪學堂現均次第開辦憲兵學堂亦正在籌設合併聲明所有議設東三省督練處試辦章程繕單會奏各緣由是否有當謹恭摺具陳伏乞

皇太后

皇上聖鑒訓示

援案清丈東流圍荒摺

奏爲援案清丈東流圍荒以正經界而祛積弊繕具章程清單恭摺仰祈

聖鑒事竊查奉屬東西流水圍荒地畝經前任將軍先後丈放分

設縣治惟原定放地辦法係聽民自擇並非挨段領墾以致餘贖夾荒任民侵占私墾在事人員又不免從中舞弊勾串折扣所在多有自光緒二十九年經墾務大臣廷杰將西流圍荒覆丈該圍弊竇爲之一清民間稱便惟東流圍地卽東平縣全境迄未覆丈其間侵欺隱占殆較西流爲尤甚近來私墾各戶互相競爭狡黠者肆意侵吞良懦者甘受欺壓紛紜聚訟糾葛滋多每願補繳地價以保永業據度支司酌擬試辦章程呈請覆丈前來臣等查丈放荒地本爲招徠農民使之安業若經界不正隱匿侵漁互相控告殊非整理農政之道況西流圍荒旣已覆丈頗洽輿情東流事同一律自應援案清丈以息紛爭但能一秉至公使墾占各戶不失原業補收地價免究私占民自樂從藉可集成鉅款實於裕課便民兩有裨益茲將試辦章程繕具清單恭呈

御覽俟

命下之日臣等卽派員設局次第試辦再查東流巴勒克圍樹川山荒前經廷杰撥補餘贖奏明封禁現查此項荒田多堪墾種未便任其曠廢應請一併丈放以厚民生而興地利除咨部立案外所有援案清丈東流圍荒繕單具奏緣由是否有當恭摺具陳伏乞

皇太后

皇上聖鑒

變通鳳岫安寬四處葦塘山荒片

再奉屬鳳凰岫巖安東寬甸等四處葦塘山荒曾經前將軍趙爾巽奏明派員丈放旋因承辦員司辦理不善以至觀望遲延虛糜局費臣等到任後察知情形又因青黃不接若按則收價民力實

有未逮隨飭停緩以恤民隱一面將辦理不善之鄧景臨等參革以示懲儆茲查安東葦塘徵稅甚微而隱占居其多數山荒私墾及曠廢者該四屬所在多有且均與朝鮮接壤從前每因越占迭起交涉當此開通商埠尤慮邊民愚頑私擅鬻售清界保權實未可視爲緩舉自宜趕緊接辦以興要政惟原定地價科則尙覺煩重自須略予變通以期便民易行臣等悉心酌核擬請將山荒私占種柞養蠶及開墾成熟者價分三等上等每畝改收庫平銀一兩中等六錢下等三錢生荒改爲上等每畝庫平銀五錢中等三錢下等一錢五分葦塘科則改爲二正一耗與別項糧銀徵數一律此外仍依前定章程辦理似此改減庶於裕課正界之中仍寓恤民之意嗣後如有應行變通之處再由臣等察酌辦理除派員接辦並咨部外理合附片具陳伏乞

聖鑒

退耕堂政書卷十二

退耕堂政書卷十三目錄

奏議十三

奉省盤蛇驛牧場河工完竣摺

陸軍第三鎮訓練期滿援案請獎摺

陸軍第三鎮第二營改編過山礮營片

營口碼頭風浪衝毀妥籌辦法片

開辦奉天各級審判廳大概情形摺

奉天被災地方情形較輕來春無庸接濟摺

查明東三省買空賣空各弊分別裁禁摺

吉省積欠部餉請全數補發摺

吉省土藥捐課儘徵儘解片

酌擬奉省各官養廉公費摺

請援案開採蜂蜜溝煤礦摺

續報江省推廣小學情形摺

小學堂注重實業片

黑龍江綽勒河荒務招墾片

補劾王馥德片

黑龍江訥謨爾河北段夾荒一律放竣摺

瓊瑋兵潰現已勦捕救平摺

吉林酒稅請照官價折銀徵收摺

退耕堂政書卷十三

天津徐世昌

奏議十三

奉省盤蛇驛牧場河工完竣摺

奏爲盤蛇驛牧場河工一律完竣分晰繪列圖表恭摺仰祈
聖鑒事竊查盤蛇驛牧場河工迭經前任將軍增祺趙爾巽先後
估修奏明立案現在全河一律工竣業經選派委員前往工次逐
段驗收此河分上中下三游上游自七台子起至蓮花泡北口止
計長七千零三十一丈中游自蓮花泡北口起至蓮花泡南口止
計長八千四百一十八丈二尺下游自蓮花泡南口起至六合順
海河止計長七千二百四十五丈總計三段共長二萬二千六百
九十四丈二尺查驗工程均與原估相符茲按上中下游全河身

正言卷十三
長開方里數並中游兩隄工程分晰列表敬謹繪具河圖恭呈
御覽除將初估續估土方價銀及員司薪費等款另行詳核造冊
奏報外謹恭摺具陳伏乞

皇太后

皇上聖鑒

陸軍第三鎮訓練期滿援案請獎摺

奏爲陸軍第三鎮訓練期滿懇請援案保獎以資鼓勵恭摺仰祈
聖鑒事竊查調東陸軍第三鎮自光緒三十年二月成軍以來將
及四載前於三十一年春間臣世昌在署兵部侍郎任內曾奉
命赴該鎮點驗覆

命時蒙

恩傳旨嘉獎嗣在河間彰德兩次秋操亦無貽悞今歲三月輪應

校閱之期適因應調赴東籌畫出關事宜未及奏請派員校閱已由陸軍部分別飭准退伍在案該鎮出關後填紮各要隘如吉林長春甯古塔一帶分段巡防互相策應正當冬防喫緊該軍隊擇要分布自未便紛紛調集校閱以分其勢查本年陸軍第一鎮因訓練三年期滿著有成效未經點驗校閱卽由陸軍部尙書臣鐵良奏請保獎仰蒙

俞允在案現第三鎮事同一律業已點驗在先委因開拔赴東未及校閱臣世昌此次巡閱吉江兩省順道查勘各防次其一切軍紀風紀均尙嚴整可觀且時越三年其中已有退伍者似未便獨令向隅合無仰懇

天恩俯准按照第一鎮成案辦理以獎成勞如蒙

俞允卽由臣等擇尤酌保不許稍涉冒濫以昭激勸而示限制所

有陸軍第三鎮訓練期滿援案請獎緣由是否有當謹合詞具陳
伏乞

皇太后

皇上聖鑒訓示

陸軍第三鎮第二營改編過山礮營片

再查陸軍定制每鎮設礮隊一標係陸路礮兩營過山礮一營此
次奏調第三鎮移駐東省初因關外山徑紛歧道路崎嶇之地居
多非有得力山礮不足以資震懾而利軍用當接收未開拔以前
卽商准北洋大臣將第三鎮礮標第二營克鹿卜陸路礮十八尊
繳存保定軍械局另換格魯森過山礮十八尊隨帶來東現已照
章改編完善計陸礮改編山礮其一切裝服器具車輛騾馬等項
除彼此價抵外尙不敷銀一萬二千兩有奇此外應添設管馱兵

喂養夫各十二名暨馱騾兩匹連加餉乾每月約另需銀一百三十兩查山礮定制係用馱馬此次擬改設馱騾取其強健有力宜於山路臣等爲因地制宜有利軍用起見除將現在改編應繳應添各項詳細列冊分咨度支部陸軍部查照立案外所有改編過山礮營緣由謹附片具陳伏乞

聖鑒

營口碼頭風浪衝毀妥籌辦法片

再營口爲東三省通商口岸華洋萃集外人貲財雄厚競各購地修建碼頭爲停泊商輪起卸貨物之地而中國商船反無停泊之處未免利權外溢該埠商情渙散鉅款難籌若非官爲提倡不足以資挽救而興公益前任將軍趙爾巽查悉情形於光緒三十二年飭營口稅局委員候補知府忠駿由英商達賴魏尼士等購回

地基四十餘畝創建華興公司碼頭一處用銀四萬餘兩又增建房屋倉庫修築隄岸用銀四萬餘兩規模頗稱完備工程亦尙堅固惟該碼頭值遼河灣曲之處水深岸陡易致傾圮復經趙爾巽飭委員忠駿添築內岸以資捍衛迨臣等到任後疊據接辦委員候補知府朱蓮溪呈報危險情形均飭加意培修毋令稍有損失茲據委員朱蓮溪呈報本年十月初一日夜間營口忽起大風海水沸涌巨浪奔騰商船民船損傷甚眾該碼頭適當其衝波濤蕩激以致毀損隄岸十餘丈近岸倉庫亦倒塌三十餘間時在昏夜事起倉猝實爲意料所不及更非人力所能施當將未冲隄岸房屋竭力搶護倖獲保全呈請核示等情前來臣等覆查屬實除仍飭委員朱蓮溪會同營口稅務司察看該碼頭情形趕緊妥籌辦法呈候酌核及將用過購地工料各銀兩另案造銷外所有營口

修建華興公司碼頭突被風浪衝毀現飭籌辦緣由謹附片陳明
伏乞

聖鑒訓示

開辦奉天各級審判廳大概情形摺

奏爲開辦各級審判廳謹陳大概情形恭摺仰祈

聖鑒事光緒三十三年五月二十七日奉

上諭各省按察使改爲提法使分設審判廳著由東三省先行試
辦等因欽此仰見我

皇太后

皇上勤求治理矜慎庶獄之至意臣等遵卽督飭署提法使吳鈞
體察奉省情形切實通籌次第規定於本年八月二十六日將酌
擬提法司衙門及各級審判官制職掌分繕清單具奏欽奉

諭旨交法部大理院議奏在案伏念中國刑事向由地方官裁判
惟職務甚繁往往聽斷不慎百弊叢滋今當改章之初獨設法廳
自應組織機關以期推廣况奉省爲

陪都重地尤當從速創辦樹厥風聲臣等謹按照法部奏准直省
各級審判廳官制並奏定京師高等以下各級審判試辦章程先
行試辦惟奉省地方遼闊舉行伊始普及維艱擬先於奉天省城
設立高等審判廳一廳於奉天府設立地方審判廳一廳於承德
興仁兩縣地方按巡警區域分設初級審判廳六廳各廳均附設
檢察廳俟辦有成效再行逐漸推廣應用廳署自應從新建築以
合制度但當此百度維新需款浩大又值隆冬不便興作擬暫借
宗府兩翼公所改設高等審判廳就奉天府發審局改設地方審
判廳其初級六廳均暫附設於城鄉各巡警局迨款項稍裕卽行

另建至於各廳管轄權限高等掌審理全省上訴案件惟各屬尙未徧設審判廳人民上控者向無已結未結之限制若不劃分界限則階級錯亂臨事必致紛歧今擬已設審判廳之處自應照章定級未設審判廳之處則凡上控各案已經該地方官訊結及應提審者概歸高等審理未經訊結及不應提審者由提法司分別批令該地方官秉公訊斷奉天府所屬共十二州縣距離過遠管轄難周今擬地方審判廳只審理承德興仁兩首縣地面民刑訴訟之不屬初級者一以爲將來府不轄縣之規畫一以爲人民赴訴之便利初級六廳各按本區域內受理該廳應管之事自各廳成立之日起凡屬承興兩縣管轄之處除行營發審係屬特別裁判暫仍其舊外其餘民事刑事案件悉歸審判廳管理奉天府承德興仁兩縣卽不收受訴訟其未結舊案在兩縣呈訴者歸地方

分期接收在奉天府上控係兩縣界內者亦歸地方接收其不屬兩縣者概歸高等接收遇有招解勘轉等件係審判廳之案卽由各該廳逕行解司解院不必由上級審判廳轉解係各州府縣之案仍照舊例辦理蓋造端不慎則難期次第推行管轄不明則必致事權凌亂以上分配廳位改設衙署明定區域劃清權限各辦法經該署司逐條妥擬呈明臣等復飭承宣諮議兩廳悉心核議始克就緒惟是司法機關處處與人民直接非得廉明精練之員不足以資倚畀故任用法官較之他項人員倍宜審慎臣等先於奏咨調奉各員內遴派四品銜記名繁缺知府民政部外城巡警總廳行政處僉事許世英試署高等審判廳廳丞丁憂民政部外城巡警總廳司法處僉事汪守珍試署高等檢察廳檢察長大理院詳讞處分核丁憂法部候補主事蕭文華試署地方審判廳推

事長民政部外城巡警總廳六品警官廖世經試署地方檢察廳
檢察長其許世英廖世經二員應請暫留原缺原俸以示體恤並
飭該署司隨時督同各該員等妥慎辦理此外有熟諳新舊法律
及於審判事理確有經驗者不分京外實缺及候補候選或係奏
咨調用或係留奉當差人員均經切實考察詳細甄擇由該署司
呈明臣等札委分派各廳以備任使至初級各廳檢察官卽分委
各巡警局之巡官暫行兼辦一可以節省經費一可以實資補助
部署既定遂於十二月初一日一律開辦茲據該署司轉呈前來
臣等伏查奉省地曠人稀易滋姦宄命盜重案層見疊出又風氣
不開民情頑僂間有不肖官吏利用其骫法行私之技倆恣爲姦
貪久則習若故常毫無顧忌案牘之積壓胥吏之騷擾更無論矣
此吏治因循民生困苦所由早在

聖明洞鑒茲值司法獨立實行之始種種積弊自應掃除廓清雖
成效未易驟期而精神已爲一振况奉省交通利便行一新政不
獨外人觀聽所係亦卽國權消長之機將來法律改良外可以範
圍列邦內可以鞏固憲政新設各廳當爲嚆矢開辦以後如該員
等果能勤慎盡職再行開列銜名請

旨簡授並分別奏請補署咨明吏部法部立案以昭慎重其有未
盡事宜仍由臣等督飭該署司率同該員等隨時斟酌以期妥善
除將各項章程規則咨明法部大理院外所有奉省各級審判廳
及附設檢察廳開辦大概情形理合恭摺具陳伏乞

皇太后

皇上聖鑒

奉天被災地方情形較輕來春無庸接濟摺

奏爲遵

旨查明奉天被災地方較輕來春無庸接濟恭摺陳仰祈
聖鑒事竊本年十月初七日承准軍機大臣字寄光緒二十三年
十月初三日奉

上諭本年順直各屬猝遭水患雲南久旱成災當經分別頒發帑
銀並由各該督撫等議賑議蠲妥爲撫恤其餘如湖南甘肅新疆
廣東陝西等省會報偏災亦經先後飭各該督撫等量爲賑濟小
民諒可不至失所惟念來春青黃不接之時民力未免拮据著傳
諭該督撫等體察情形如有應行接濟之處卽著認真查明據實
覆奏務於封印以前奏到候朕於新正降旨加恩此外各該省有
無被災地方應行調劑之處著該督撫等一體查明具奏前經降
旨諭令該督撫等痛除積習飭屬確查毋任豪強胥吏盤剝欺侵

正三十一三
該督撫等務當恪遵前旨實力奉行不得稍有捏飾以副朝廷實
惠及民之至意將此通諭知之欽此仰見

皇太后

皇上子惠黎元無微不至跪聆之下欽感莫名臣等查奉天全省
地方本年暘雨應時秋收尙稱豐稔惟海龍東平安廣彰武等一
府三縣本年被水被旱各有歉收情形較重業將租銀租錢另摺
奏懇

天恩准予分別蠲緩一面飭委候選道楊炤候選州同楊鳳書馳
赴災區查看民情妥爲安撫並由善後款內撥提銀兩交該委員
等酌量災情輕重分別撫恤隨帶籽種本銀給民補種晚禾各在
案惟該府縣等處被災各區旣經撥款賑濟已足紓民之困其未
經被災之各旗民地方陸續查報歲均中稔民食有資臣世昌此

次由吉旋奉巡視沿途經過地面與各屬呈報情形尙屬相符兼之入冬以來瑞雪霑足豐兆已可預占來歲春耕均可勿庸接濟除分咨查照外理合恭摺具奏伏乞

皇太后

皇上聖鑒

查明東三省買空賣空各弊分別裁禁摺

奏爲遵

旨查明東三省買空賣空各弊分別裁禁以除商累而肅官方恭摺會陳仰祈

聖鑒事光緒三十三年五月二十四日承准軍機大臣字寄奉

上諭有人奏東三省商人買空賣空及官場收受陋規各弊請飭嚴禁等語著徐世昌唐紹儀朱家寶程德全按照所陳各節確切

查明從嚴申禁毋稍徇庇原片著鈔給閱看欽此臣等當卽鈔錄原片選派熟悉商務人員分途前往奉天之通江口吉林之長春府黑龍江之呼蘭府等處按照原奏各節詳細確查去後茲據該員等先後覆稱查奉省向以豆糧爲出產大宗從前因客幫囤貨有先期定價到期成交之事買空賣空遂因之而起又恐有違例禁於各衙門攤送錢文此在期糧開禁以前難免無官場收受陋規情事至前任將軍增祺議以化私爲公於通江口等處奏設期糧捐局詎知一經開禁商市僧爭定空盤虧累鉅資紛紛聚訟市面爲之敗壞上年同江營口等處竟有糧商假手外人控諸日本軍政署釀成交涉案件本年營口商會又與鐵嶺糧商纏訟不已此查明同江口等處買空賣空及設局抽捐之實在情形也又查吉林長春府境期銀期豆期油皆有買空賣空情事自二十九

年各商創爲報効官銀之例視衙門大小爲差庚子以後全屬空盤去秋今春商鋪倒閉六十餘家敗象迭見上年和成興各鋪因期銀賠累互相纏訟株累五十九家之多而訊斷之官皆因報効官銀任意拖累非及時嚴禁不足以恤商艱此查明長春府等處買空賣空及收受陋規之實在情形也又查黑龍江呼蘭府等處尙無買空賣空情事上年長春糧商同和盛等向呼蘭同昌等店買麥二萬餘石確係現銀因糧色不齊交期參差控經地方官訊追斷結援照奏辦設治章程追欠之案概提二成爲辦公經費並非收受陋規此查明呼蘭府等處並無買空賣空及收受陋規之實在情形也臣等查奉省期糧捐局雖係奏明設立乃因善後需款爲一時權宜之計然自設局之第一年共捐銀十九萬三千餘兩其後每年僅收八九萬兩而富商大賈動輒虧折百萬貿易之

地幾同賭場言籌款則所入無多言商務則所虧無限自應嚴行禁止以挽澆風已於八月間飭將期糧各局概行裁撤未結案卷移交各該地方官訊結吉省之長春府以報効官銀之故任令買空賣空以致貽累商市尤屬不成政體已將該處期糧期銀期油及報効費一律禁絕從前訟案飭令地方官秉公斷結江省之呼蘭府等處既查明並無買空賣空及收受陋規等事應請毋庸置議仍飭隨時查察不准再有此項名目此外三省各府州縣雖查無前項情事仍通飭一律曉諭嚴禁以除積弊所有臣等遵旨查明東三省買空賣空各弊分別裁禁緣由謹合詞覆陳伏乞

皇太后

皇上聖鑒再此摺因輾轉詳查是以覆奏稍遲合併聲明

吉省積欠部餉請全數補發摺

奏爲吉省應領部餉積欠甚鉅擬請全數補發以資急用並請嗣後預季撥領俾免貽悞軍食恭摺仰祈

聖鑒事竊查吉林新舊捕盜各隊經前將軍長順於光緒二十九年七月間改照邊防營制量爲增減每年共需餉銀一百三十萬兩奏明由本省自籌一半餘由部庫按年撥發旋經戶部議覆僅允每年撥給二兩平銀四十萬兩分春秋兩季派員赴部請領其餘二十萬兩仍令自行籌補等因歷經遵照辦理在案是吉省原請之餉本未足數祇以部庫同一艱窘但凡在外有可墊之項無不勉爲設法又何敢過事催促上煩

宸厯惟餉項爲計口授食之需實有刻不容緩者茲查三十二年並三十三年兩年部餉共應領八十萬兩至今僅領到二十一萬餘兩各營譁潰堪虞雖經臣等移緩就急暫借他款先行撥放然

借撥之款均係指定要需輾轉騰挪已及一年之久更兼近年商賈蕭條稅捐減色舉辦一切新政用度浩大羅掘俱窮正苦籌無可籌緩無可緩自不得不仰給京餉藉以清償夙累合無仰懇天恩將吉省應領三十二年並三十三年餉銀共五十八萬九千二百七十八兩七分一毫二絲

飭下部庫全數補發並請自三十四年起按年預季撥領庶免貽悞軍食一面卽由臣等派員執持文領赴部請領俾得早日解回吉省以資騰飽而維大局所有吉省應領部餉待用甚急並請嗣後預季撥領各緣由理合恭摺具陳伏乞

皇太后

皇上聖鑒訓示

吉省土藥捐課儘徵儘解片

再吉省經徵土藥捐課向以二萬六千兩爲歲額嗣經光緒二十六年部中整頓稅釐咨令增加額數遂於原定章程外每百斤加徵銀六兩每年應加徵銀四千八百七十五兩共應徵銀三萬八百七十五兩當於二十七年九月間經前任將軍長順附片奏明扣至次年正月起一律遵章辦理在案惟臣等查自加徵此項捐課以來除二十八年尙稱勉敷額數其餘二十九三十及三十一二等年累次短收多未足額亦以地方所出僅有此數兼之頻年戰事驚擾四鄉農民遷徙流離卜居未定大田禾稼尙爾拋荒安有餘貲從事於此故卽以前事而論收數已無把握况比來疊奉諭旨實行戒煙嚴令遞年減種業經通飭各屬一體依限嚴禁是本年收數短縮固已無待贅陳現在綜覈春夏秋三季通省所報捐銀僅止七千一百餘兩日後種者愈稀販者愈寡年復一年來

正書卷十三
源日竭自未便再以常額相繩臣等惟有嚴飭各局委員實力稽徵期無侵隱儻有不肖員司任意弊混定卽嚴行參辦以重捐務合無仰懇

天恩嗣後准將此項捐課每至年終綜計通省實收捐數儘徵儘解據實奏報俾免賠補謹附片陳明伏乞

聖鑒飭部立案施行

酌擬奉省各官養廉公費摺

奏爲酌擬奉省各官養廉並酌定公費以勵廉隅而資整飭恭摺仰祈

聖鑒事竊查奉天自改設行省釐定官制以改舊日將軍之制惟是設官之意要在察吏安民整躬率屬欲其裁革陋規剔除中飽必使祿足代耕乃能趨事赴功廓清蠹弊從前東省官吏差缺所

入甚微遂至貪賂公行寢成風氣現值改章伊始萬不容再蹈前轍自應按照各省督撫司道以下各官所定養廉數目分別定擬以挽頽風惟奉省迭遭兵燹百物昂貴數倍內地臣等到任後嚴絕供應所有內地辦差各名目及一切陋規概行禁絕凡所取求皆歸自備若僅恃廉俸一項斷不敷用查各省凡官缺清苦者每於養廉外加給公費卽奉省地方官前將軍趙爾巽亦曾奏請酌加公費誠以邊遠之區物用翔貴欲責其操守謹嚴盡心民事不得不優給祿糈以贍其身家故於養廉外分別酌定公費此項養廉公費銀兩卽由度支司在正款內分別籌撥應請作正開銷公費一項遇閏照加應由署缺派差之日起支以示體恤至僉事科員等官現尙未定額數暫擬不定養廉先支公費此外府州縣以下各缺有支養廉者有支公費者辦理未能一律應俟通盤籌畫

酌核定擬再行奏明辦理至於吉江兩省應定養廉公費俟查明該兩省財政情形臣世昌隨時與兩省撫臣酌定再行具奏茲將酌擬養廉公費數目分繕清單恭呈

御覽合無仰懇

天恩俯如所請飭部立案施行所有酌擬各官養廉並酌定公費各緣由謹恭摺具陳伏乞

皇太后

皇上聖鑒

請援案開採蜂蜜溝煤鑛摺

奏爲援案開採蜂蜜溝煤鑛請

旨飭部立案以興利源恭摺仰祈

聖鑒事竊維奉省各鑛林立久爲外人垂涎非設法勸民自辦不

足以保利權而興鑛政前據鑛政調查局轉據商人高元品馬魁武等稟稱商等跣得

興京廳屬蜂蜜溝地方有煤鑛一區計地六方里共五千四百畝均係民地煤苗顯露其質甚佳實堪開採已向地主議定納租備集股本銀一萬兩存儲殷實商號聚豐厚遵章取具該號擔承銀一萬兩保結繪具圖說懇請轉詳逕領開鑛執照俾得興辦並稱該鑛地距

永陵七十里距金廠嶺

龍岡四十里當無關礙等情經該局派員會同

興京廳詳細查覆核與所稟情形相同呈請核辦前來臣等當以該鑛地雖經該局派員查覆於

陵脈無礙然不可不慎之又慎乃復咨行

正三十一
三
永陵守護大臣

興京副都統靈熙派員覆加詣勘去後茲准咨覆飭據廂白旗界官前往屬界北蜂蜜溝地方會同鄉牌勘明該商高元品等報領煤鑛之處是在蘇子河南距河約有二里北距金廠嶺

龍岡確有四十里西距

永陵實係七十里並查悉該處向未封禁卽於民間廬墓田園亦無妨礙取有鄉牌甘結爲據又閱該界官勘覆所繪詳圖山勢起伏雖似斷續相聯而中隔溝壕數道並無封禁案據等語臣等伏查撫順千山台煤鑛舊係封禁之地於光緒二十七年八月二十六日經前任將軍增祺轉據候選知縣翁壽等報領以千山台距福陵四十里無礙風脈奏請

弛禁開採並聲明其餘鑛廠除實有關風脈者仍舊封禁外如距

陵寢較遠無礙風脈之處亦可隨時奏請開辦各等因均經欽奉
硃批著照所請該部知道欽此欽遵在案茲該商高元品等稟辦
蜂蜜溝煤礦所距

永陵里數既經兩次勘明較於千山台煤礦相距

福陵幾逾一倍卽就金廠嶺

龍岡而論又實遠距四十里且該處向非封禁之地自係無礙風
脈可以開採並驗明該商高元品等所繳聚豐厚擔承股本銀一
萬兩保結委係殷實商號核與部發礦章第三十七條請領開礦
執照尙屬相符本可咨部給領俾資興辦惟該礦地雖距
陵寢較遠委無關礙然因山勢附連自宜奏明辦理庶於慎重
陵脈之間仍體推擴鑛政之意合無仰懇

天恩准予飭部立案並發給開鑛執照俾資開辦以擴利源除遵

正德元年一三
四
章將圖表保結照費一併咨送農工商部查照辦理外所有撥案
開採蜂蜜溝煤礦緣由謹恭摺具陳是否有當伏乞

皇太后

皇上聖鑒訓示

續報江省推廣小學情形摺

奏爲續報江省各屬推廣小學情形恭摺具陳仰祈

聖鑒事竊維江省僻處邊荒教育甫在萌芽創辦之初自以多立
小學爲基礎光緒三十一年十二月臣德全奏陳開辦學務大概
情形卽聲明注重小學以端始基上年九月復將省城外城籌辦
各學堂彙奏在案自本年提學使張建勳抵任後規畫全省學務
因勢利導力任艱難現據報稱呼蘭府綏化府巴彥州三處籌設
四鄉小學均已成立其餘慶木蘭青岡等縣上年均各於綏化巴

彥海倫等處附設學堂本年均經自立兩等初等小學又蘭西縣設立師範傳習所改良私塾七十處呼蘭府城亦設師範傳習所改良私塾四十處至省北瓊瑋墨爾根兩城各設初等小學一處東布特哈創設初級師範豫備科一處西布特哈創設初等小學一處省南肇州廳創辦公立初等小學十處多耐站委官創辦公立小學一處大賚廳添半日學堂一處塔城子創辦初等小學一處省西呼倫貝爾城創辦滿蒙文官學一處惟各處滿蒙漢言語不同未能強以定章現擬各城均先辦一處俟有成效再行徐圖推廣此近日各屬推廣學務實在情形也至來年擴充辦法現據各屬呈報計黑水廳議紳呈請就省城十區初等小學舊日用品移作廳屬四鄉小學並分畫十區呼蘭府議紳呈請就呼蘭四鄉小學四區之外再添十四區合爲十八區餘慶縣教員呈請添設

正書卷一三
四鄉初等小學十區蘭西縣教員呈請添設四鄉小學四區巴彥
州款項較優學額太少經學務公所核議擬添兩等小學十二區
綏化府四鄉小學原有五處擬再拓充五處總計明年應添設者
僅五十五處此明年各屬推廣學務情形也據提學使張建勳詳
請具奏前來臣等伏查江省辦理學務不必侈語精深而難於由
淺近而臻切實現經臣等督飭提學使隨時認真辦理總期宗旨
純正教科完備管理嚴肅庶仰副

皇太后

皇上興學育才至意除咨學部查照外所有續報江省各屬推廣
小學緣由理合恭摺具陳伏乞

皇太后

皇上聖鑒

小學堂注重實業片

再教育造端於初等民生莫重於實業江省物產豐阜腴壤雲連而農工商各實業學堂俱以款絀未能創興計惟將現設各小學注重各項實業庶可期發達而圖進步現擬將省城初等小學添購儀器標本加課實業以爲各屬倡導計北路小學擬注重工業分別製繅造紙並仿製學校用品各事以樹將來工藝之基南路小學地多隙圃宜於種植擬闢爲農業試驗場演習所以資農學實驗西路小學則擬注重商業備立他日商船及各項商業基礎等情據提學使張建勳呈報前來臣等伏查該司所籌洵爲本省擴張實業起見將來各該堂學生畢業應請遵照初等實業學堂章程獎勵以收實效至經費支絀臣等自當力爲籌措務期教育切實推廣款項仍不虛糜冀於邊省字務實有神益除咨學部農

工商部查照外謹附片具陳伏乞

聖鑒

黑龍江綽勒河荒務招墾片

再興安嶺附近綽勒河及洶爾河一帶僻鄰山麓林木鬱葱外人時存覬覦光緒三十一年十一月臣德全奏請將該處山林一律弛禁設法招墾奉

旨允行後遵經迭次派員前往試辦皆以深山窮谷界連蒙旗不但無戶可招且馬賊與索倫結連盤踞斷難深入旋又遴派熟悉情形之蒙員阜海進山勘辦並派已革中軍統領協領吉祥黑水廳同知鄭國華等撥隊隨往辦理復議減價招徠每晌僅收銀七錢始能逐漸就緒然其勘放之棘手招戶之艱難實爲從來所僅見刻幸陸續放竣計放毛荒四萬三千晌扣七成實地三萬一百

晌按每晌荒價銀七錢共收進押租銀二萬一千七十兩隨征一五經費銀三千一百六十兩五錢共征進銀二萬四千二百三十一兩五錢照章自光緒三十三年起限至三十八年升科據該員等造具圖冊呈請核奏前來臣等覆核無異謹繪具圖說咨送軍機處查核惟因此段荒地收款太微經費短絀所有設局一切用款計逾支銀二千二百三十一兩八錢已由臣等飭由他處節餘經費項下照數撥補應懇

天恩俯念此次勘放山荒經營之苦飭部准其劃抵以昭核實際除將清冊咨送度支部查照外謹附片具陳伏乞

聖鑒

補劾王馥德片

再吉林雙城廳人王鴻猷前因攬荒漁利控案纍纍經臣德全將

正書卷之三
其報捐之知府銜候選同知於上年四月間附片奏參革職歸案
訊辦乃該革員於被參後潛自來省到處賄託經墾務局黑水廳
先後舉發卽批交該廳看管未及訊明乘間脫逃赴京經臣德全
片奏請

旨飭拏旋准民政部拏獲電經臣德全派員接解回省發交墾務
局會同裁判處認真訊辦在案查江省放荒包攬大段之人向所
不免但使不侵官荒不涉訟事亦祇聽其自然獨該革員王鴻猷
與其族人王馥德夥領巴拜利貞二字荒段據報僅七十二井半
聞實有一百四十六井明係將未放官荒及他戶已領未墾之地
影射包套在內又毛荒以一千六百二十畝爲一井該革員等扣
實七成作爲全井轉賣與人又以所餘三成另賣牟利此控案所
以迭出而臣等不能不爲之深究也無如此案自本年四月間發

交該局處會審以後迭次提訊該革員王鴻猷一味狡展兩次呈遞親供先後互異且多飾詞飭交領荒賣荒各帳稱在同夥王馥德手內迨傳到王馥德究追又稱荒已轉賣帳已焚燒卽王鴻猷亦從而變易前詞連訊十餘次終未將原帳交出派員赴荒段查勘雖訪明地數浮多不啻倍蓰奈時已秋深冰雪在地難施繩弓買地各戶大半遠在隔省一時無從傳集現在王鴻猷在保患病三月迄未就痊王馥德亦以所獲餘利報捐知府銜候選同知特符狡展終無實供若不澈底究明誠恐將來訟獄滋豐愈無了日相應請

旨將知府銜候選同知王馥德暫行革職押候訊辦一俟明歲春融將此段荒地丈清並究朋其中糾葛原由再行分別奏明辦理謹附片具陳伏乞

聖鑒訓示

黑龍江訥謨爾河北段夾荒一律放竣摺

奏爲訥謨爾河北段暨續放南段夾荒一律完竣分別已收未收押租經費銀兩數目並升科年限恭摺具陳仰祈

聖鑒事竊照東布特哈屬境訥謨爾河北段荒地前經臣德全於南段報竣摺內聲明出放迭飭總管福齡督同員司趕速辦理并飭將南段夾荒一律勘放現據報稱自光緒三十三年正月初一開辦之日起至是年十一月底止共丈放北段毛荒六萬一千九百三十一晌五分又續放南段夾荒六萬八千九百三十晌七畝二共放毛荒一十三萬八百六十一晌七畝五分照章以七成折扣實地九萬一千六百三晌二畝二分五釐每晌押租銀按一兩四錢計算共應征銀一十二萬八千二百四十四兩五錢一分五

釐經費銀按一錢五分計算共應征銀一萬九千二百三十六兩六錢七分七釐二毫五絲但江省目前銀根奇絀領荒各戶未能如數呈交現銀刻僅收進押租銀五萬九千八百八十一兩一錢九分六毫八絲經費銀八千九百八十二兩一錢七分八釐六毫二忽其餘各領戶實欠押租銀六萬八千三百六十三兩三錢二分四釐三毫二絲經費銀一萬二百五十四兩四錢九分八釐六毫四絲八忽均係開具省城妥商期條懇請緩限呈交不得不權爲照准至此項荒地均係三十三年秋間丈竣各該地戶旣不能當年開墾自應於三十四年起限至三十九年升科以昭核實又遵照本省奏定設治章程劃留各處學田計毛荒四萬三千六百二十四晌以備招墾納租又勘丈拉哈博爾多喀迷尼喀依拉哈等四站熟地二萬一千二百六十八晌四畝七分八釐應俟丈量

報竣後再行分別升科等情呈請奏報前來臣等覆核無異惟查該段地處荒僻其招戶艱難勘丈棘手視南段尤甚所有出力各員應仍責成該總管將現款交齊再由臣等擇尤請獎以資激勵除飭酌留員司造具毘連細冊咨部外謹繪具現放荒地圖說恭呈

御覽其開支各項應俟另案咨報所有訥謨爾河北段並續放南段夾荒一律報竣暨分別已收未收押租經費並升科年限各緣由理合恭摺具陳伏乞

皇太后

皇上聖鑒

瓊瑋城兵潰現已勦捕救平摺

奏爲江省赴漠防兵在瓊戕官逃潰現已勦捕救平恭摺具陳仰

祈

聖鑒事竊維江省邊隅錯處民質雜糅自庚子後官軍逃散鬪匪
日益縱橫積患至今兵匪相參則勦賊難餉糈微薄則養兵難邊
荒苦寒則撫御難故就江省今日情形而論平時簡練兵卒措手
已屬維艱洎至變生不測雖幸崇朝殄滅殲除無遺然以本無教
育之兵置諸艱窘萬難之地雖由自取駢戮然臣等未嘗不明施
決罰而退滋餘痛也查本省自十月以來興東道赴托蘿山之兵
與右軍駐湯原縣之兵或因該道因公赴奉蓄意謀財或因哨官
約束過嚴激而生變均先後報有各結夥匪二三十人倡亂情事
興東一處並劫去官款俄幣九千餘圓官帖四百餘串均各奔三
姓一帶逃去迭經臣等電知吉林三姓副都統並飭駐紮巴彥州
之右軍統領巴英額派兵四路兜緝嗣接三姓副都統德勝來電

據稱派出三姓軍統領德魁等先後斃匪五名生擒共二十五名
又右軍統領巴英額報稱與東暨該營叛匪均經全數弋獲除由
三姓副都統訊明當時被脅情有可原者五名現經咨復研訊外
其餘各匪供認聚眾戕官持槍拒捕等情不諱業由臣等電飭就
地正法以昭炯戒堪以上紓

宸廑乃於十一月初十日又准署瓊瑋副都統姚福升電稱撥駐
漠河之中軍左營因久駐瓊城磋商俄輪載運尙未定議突於初
八夜間變生倉卒刺斃管帶恩車恆額哨長榮玉計逃潰什兵一
百八十餘名幫帶富德勝隨眾逃叛攜去毛瑟槍二百一十桿子
母二萬三千五百粒並將未發本年十二月餉銀搶去糾眾乘夜
四竄等情續又據署墨爾根副都統壽慶電稱匪蹤竄至喀爾塔
兒西站暨科葆爾等站沿途裹脅約二百餘人偪近墨城等因當

經臣等電知該署副都統相機堵剿並飭東布特哈總管福齡加
意嚴防又調向駐博爾多中軍右營管帶雙全出隊截擊嗣恐兵
力太單復由省加派奉軍統領瑞祿暨該軍管帶宮文彩添帶馬
隊三哨與雙全聯合期在攔截痛勦以消巨患先是臣等聞變預
計自瓊瑋而達省城沿途除站道外四無居民該匪等勢難駐足
逆料其不竄東荒冀結大股則必走戚家店越安達渡松花江竄
越吉林邊界以圖免禍爰電綏化海倫等處一律整備以防東荒
其戚家店一路則另派奉軍步隊前往要截復迭飭瑞祿雙全等
務須沿途聲息相通暗探賊蹤所至待其憊而掩擊之嗣據壽慶
報稱匪眾至墨爾根城經官軍迎擊陣斃數名得槍四桿續據探
報該匪竄洪霍爾吉屯因恐東荒兵隊較密旋又斜向省城西下
預爲過江之計又於托來屯與瑞祿相遇經官軍小挫其鋒至此

後瑞祿等已聯爲一路暗襲賊後以謀聚而殲旃之舉果於十一月二十一日晚間匪蹤竄至戚家店該匪等自恃連夜飛馳料官軍一時不能聚齊正入店憇息間適瑞祿雙全各隊均連夜追至遙見火光燭天知該匪必入店中因暗約合圍迨相距已近乘其不備開槍猛轟賊方驚起死鬪我軍乘勢奮擊槍刃交加斃匪甚夥且戰且縛因酣戰爲時過久風雪迷離餘匪潰圍分竄我軍乘勢追擊數十里計此役陣斃各匪八十餘名瑞祿一軍生擒十八名雙全一軍生擒十二名我兵陣亡三名共獲馬五十匹槍枝七十餘桿餘匪無多均拋棄槍馬分路零星四散臣等通飭所屬務期搜捕淨盡以靖餘孽現由各處防兵巡警陸續拏獲二十餘名獲馬三十餘匹槍十餘桿除訊明實係被脅各犯業經分別辦理外共計獲叛匪五十餘名均經訊明就地正法以警凶頑臣等伏

查此次瓊城兵潰雖由該營管帶平時恩威未能服人然該軍自八月間派赴漠河卽經奏明加餉並將本年全餉發交該管帶攜往以便隨時發給且現查該管帶已將餉銀發至冬月乃以營兵造言兵未赴漠仍須扣餉以致姦徒生心激成此變且推厥根由實又因俄輪載運事磋商未成各兵進止遲迴不免愈滋疑怨幸瑞祿等奮勇痛剿一鼓盪平尙屬辦理迅速已由臣等分別犒賞銀兩所有出力員弁應請隨時彙案請獎以昭激勸其墨城以北有無被擾民戶已派員前往查看撫輯所有該營現尙留瓊官兵七十餘員名業已趕調回省現正統籌遵照陸軍部新章改編各營惟江省將才難求餉源涸竭邊荒困苦尤甚計惟多募土著以清本源酌加餉乾以勵士氣慎擇將領以鎮軍心庶期戎政日趨嚴整漸臻完備除飭各軍暨所屬再行嚴密搜緝並將陣亡各兵

正三書卷之三
咨請議卹暨分咨查照外所有江省赴漢防兵在瓊戕官逃潰現
已勦捕紉平各緣由理合恭摺具陳伏乞

皇太后

皇上聖鑒訓示

吉林酒稅請照官價折銀徵收摺

奏爲吉林酒捐請照官價折銀徵收恭摺仰祈

聖鑒事竊吉林酒捐前因查有坐稅食戶稅零銷稅代墊稅等各
種名目稅額參差滋多流弊經臣世昌於上年八月間奏請每斤
改徵實銀一分四釐先行試辦本爲顧恤商艱起見茲據值年燒
商趙子餘杜景春等以商情困迫銀乏來源呈懇以銀折錢援照
前定官價每銀一兩按市錢三千三百文折核交納等情由菸酒
木稅局總辦候補道史菡稟請核辦前來臣等查吉林出入款項

向以錢爲本位自近年疊遭兵燹銀根奇絀價日昂貴每銀一兩換中錢在四千以外此次該值年燒商呈懇援照從前所定官價按三千三百文以銀折錢雖暗中不無虧折然商力不支亦屬實在情形似不得不稍事變通以示體恤合無仰懇

天恩准將吉林酒捐一項每兩按照官價三千三百文作價折算先行

飭部立案一面由臣等通飭遵辦庶於裕課便商兩有神益除咨部查照外理合恭摺陳明伏乞

皇太后

皇上聖鑒訓示

退耕堂政書卷十三

退耕堂政書卷十四目錄

奏議十四

江省續放甘井子夾荒並推放西布特哈荒務摺

遵議幣制畫一辦法摺

遵籌江省旗丁生計摺

蒙荒所提經費難歸正款片

遵擬江省裁缺人員補用辦法摺

裁缺文職請歸部選用片

遵議駐吉水師營官丁改補辦法片

依克明安公荒務竣事擇尤請獎摺

遵 旨查明營商倒閉及被參各節摺

官兵在吉剿匪出力各員擇尤保獎摺

陣亡驍騎校承銓之子巡官法芬佈擊匪出力請卹獎片

江省白楊木河荒務竣事請獎摺

江省創辦中學改定兩級師範學堂並推廣女學情形摺

江省擬定鐵路附近煤礦合同片

署琿春副都統陳昭常帶印駐延片

退耕堂政書卷十四

天津徐世昌

奏議十四

江省續放甘井子夾荒並推放西布特哈荒務摺

奏爲續放甘井子段零星夾荒暨推放西布特哈荒地各數並征進押租銀兩恭摺具陳仰祈

聖鑒事竊查光緒三十二年十二月間奏報甘井子荒地告竣摺內曾已聲明其餘零星夾荒擬俟明春再行招放當經臣德全酌留員司飭令迅速辦理並飭將西布特哈附近等處一律推放茲據報稱自三十二年十二月初一日接放之日起至三十三年十一月底止共放毛荒一萬七千七百八十五晌扣七成地一萬二千四百四十九晌五畝每晌仍按七錢收押租銀八千七百一十

正書卷十四
四兩六錢五分每兩隨征一五經費銀一千三百零七兩一錢九分七釐五毫照章自光緒三十四年起限至三十九年升科又查出熟地一萬四千一百六十九晌照章不收押租當年升科每晌按六百六十文計收進大小租錢九千三百五十一串五百四十五文其西布特哈境內已經放出之地數銀兩均在其內等情呈請奏報前來臣等覆核無異除飭造具毘連細冊咨部查照並將收除各款情形另片奏明外所有甘井子段續放夾荒並推放西布特哈荒地各緣由謹恭摺具陳伏乞

皇太后

皇上聖鑒

遵議幣制畫一辦法摺

奏爲遵議幣制畫一辦法敬陳管見恭摺仰祈

聖鑒事光緒三十三年十一月二十六日准軍機大臣電寄奉

旨現當整飭庶政幣制關係重要近來內外臣工有謂宜鑄一兩暨五錢重十足銀圓以爲主幣一錢暨五分重九成銀圓以爲輔幣者而主七錢二分之說者意在不用兩錢分釐名目祇須以枚計算與他國之幣相通二說相歧莫衷一是著各督撫體察該省官商軍民市鄉情形暨銀兩銀圓約計行用孰居多數何者宜存何者宜廢各抒所見限三月內據實電奏以憑核定等因欽此又於十二月初二日准軍機大臣電寄奉

旨前經降旨飭議幣制近日諸臣條議有謂若鑄十成一兩五錢兩種之銀圓其雜質工耗虧賠甚鉅宜減成鑄造以免虧折又有謂旣以一兩五錢兩種銀圓爲主幣必須十成足色官民出納方能簡易無弊交涉款項亦免折算受虧儘可搭鑄九成之一錢五

分兩種小圓以其所餘補主幣工耗之虧二說孰是著卽遵照前旨速卽併案議覆等因欽此臣等查中國向無一定幣制自墨圓侵入通商口岸暫行於東南各省所謂七錢二分者不過就分量輕重言之近來各省自造龍圓藉爲抵制其輕重仍仿墨圓此僅爲自造之龍圓而不得定爲國幣也中國向係用銀之國故一切田賦釐金官俸軍餉以及洋稅賠款無不准兩核算若以七錢二分折合膠葛虧累流弊滋多且新鑄銀幣斷不敷用則必不能盡廢生銀卽必不能廢去兩錢分釐名目若謂祇須以枚計算期與他國之幣相通則俄之盧布德之馬克法之佛郎美之託臘日本之金銀圓各不相同蓋一國貨幣自有制度豈能獨仿墨圓以爲準則况中國用銀之地究多於用圓之地其謂揆之通國生計程度未能盡合者亦殊不盡然故欲畫定幣制自應鑄一兩重之銀

圓以爲主幣五錢二錢一錢重之銀圓以爲輔幣至謂一兩五錢
兩種必須十足成色臣等竊以爲未可考各國幣制無十足成色
者大概皆以九成爲準有謂日本鑄造金圓凡值十圓者其金圓
重二錢二分二釐將銅料雜質二成扣除不計仍作足金二錢計
算今我鑄銀圓每一枚亦加入雜質三分共重庫平一兩零三分
殊不知日本之金圓其值銀十圓者均隨金鎊價值漲跌核計者
也所謂二錢二分二釐者亦就中國輕重之分量而衡之耳若中
國之銀圓明明分量一兩零三分而強名之曰十足一兩未免名
實不符令人淆惑至於工火虧耗賠累甚鉅人能言之無待縷述
雖國家畫一幣政不在目前小利然旣無當於各國幣制而中外
之信用與否亦全視國權之操縱爲衡若拘定鑄造十足勢必爲
中外各商隨鑄隨銷無從防範轉致擾亂幣政應按照各國鑄幣

正書卷一
三三
公式一切以九成成色爲準至五錢一種較一兩尤爲輕便亦宜多鑄其二錢暨一錢者似宜有所限制擬不得過大幣十分之一方能通行遞算不准抑勒至奉省官商軍民市鄉情形此間既無現銀又乏洋圓而一切用項仍是以銀計算合併聲明所有遵議幣制畫一辦法緣由是否有當理合恭摺具陳伏乞

皇太后

皇上聖鑒訓示

遵籌江省旗丁生計摺

奏爲詳陳江省旗丁生計情形並遵

旨酌籌辦法恭摺具陳仰祈

聖鑒事光緒三十三年八月二十日奉

上諭我朝以武功定天下從前各省分設駐防原爲綏靖疆域起

見迨承平既久習爲游惰坐耗口糧而生齒滋繁衣食艱窘徒恃累代豢養之恩不習四民謀生之業亟應另籌生計俾各自食其力著各省督撫會同各將軍都統等查明駐防旗丁數目計口授地一面仍將各項實業教育事宜勒限認真分別籌辦先由度支部迅籌實在的款以備撥發勿稍諉誤等因欽此仰見

皇太后

皇上化除畛域一視同仁之至意伏念

國家龍興遼瀋創定八旗兵制俸餉至鉅孳生日蕃江省旗丁尙武之風披靡全國豐功駿烈史不絕書自三省練軍而子弟習爲麻惰自庚子構亂而生計愈益艱難然江省旗人情形實有較內地迥乎不同者蓋內省駐防類皆聚處省城一隅旣多限於謀生遂相習爲游惰江省幅員廣濶從前漢民稀少八旗子弟分駐各

城計除省城將軍衙門及外城各署當差人員旅進旅退不事生業外其各處散居旗丁從事農業耕鑿相安者已不乏人又或恃牧獵爲生或倚樵薪度日率皆各執一藝足以自存其呼蘭老圈地墾至十餘萬晌東興鎮鐵山包兩處從前本係奏辦屯田此尤見豐鎬趙桓固無不能從事南畝者然此尙屬其自營生業者也近數年來臣德全於通肯墾務變章一事爲旗丁籌出款項五十餘萬東西布特哈則奏准酌提二成荒價爲辦理新政津貼官兵之需於省城附郭荒地凡旗丁已墾之地皆奏明撥給永遠爲業所有餘荒並減價先儘旗丁承領以勸農務至通省旗兵向多窳敗又經早於變通善後摺內將兵餉奏明改練巡防現又撥官兵津貼之款創修昂枝路凡此皆爲八旗久遠之謀實已早體聖明廣籌生計之意惟省城及各城當差人員暨無地旗戶非爲

廣籌恆業仍不足以期經久查江省地面尚多未闢閒荒應懇
天恩俯准按照各城情形酌撥地段並免收荒價以示體卹現擬
將嫩江迤西省屬未經放出之荒酌留數段作爲省城無地官兵
生業計每官一員撥地二方每兵一名撥地一方如有餘荒仍均
勻撥給無地散丁耕種並責成各該協佐督令限期墾闢以開地
之多寡定協佐之功過務收實效而後已其瓊瑋墨爾根兩城種
地旗戶甚夥應令各該城副都統分別查明有地無地各旗丁均
照省城一律辦理又東布特哈前已就荒價項下酌留二成應令
該處總管亦分別查明實係無地丁戶量與荒地以興農政西布
特哈仍應仿照辦理以歸畫一惟呼倫貝爾各旗丁素以牧養爲
生一時勢難責令耕種應請於該處寬留牧廠劃定房基責令築
室並合於畜牧一事講求孳息之法兼教以樹藝之道至東興鎮

正訓卷十四
鐵山包兩處本有屯田通肯則荒務早經辦竣且旗丁半皆地戶
腴壤尤多呼蘭則原有熟地均無庸另爲籌議其瓊瑋墨爾根呼
倫貝爾各城將來放荒收價時並請援照布特哈成案由荒價酌
提二成以爲辦理各項實業教育事宜之用以上各節均係查酌
情形或爲從前所已辦或爲現在所應籌總期於江省事勢適協
其宜於旗丁生計務求有濟不必多籌鉅款而實惠固已普霑矣
所有詳陳江省旗丁生計情形並遵
旨酌籌辦法各緣由理合恭摺具陳伏乞

皇太后

皇上聖鑒訓示

蒙荒所提經費難歸正款片

再准度支部咨稱黑龍江省丈放杜爾伯特蒙荒及郭爾羅斯後

旗餘荒報銷冊內所有局員薪工等項均應在一五經費內撙節動支其蒙旗押租內所提經費錢一百文仍應照數撥歸正款報部抵餉等因於上年十一月間先後咨行前來臣等伏查江省從前勘放蒙荒每晌共收押租錢四串二百文所需經費卽由二百文內動用往往因不敷開支多耗正款故臣德全於光緒三十一年會奏加收一五經費以補前款之不足而派員查勘設局放荒等事分頭辦理需用浩繁或地方磽瘠收價少而經費無多或荒段零星派員多而開支較鉅通盤籌算除將加收之一五經費撥充公用外惟有將舊日蒙旗每晌應得項下之一百文留資挹注臣等再三撙節猶苦不敷且以荒務原有之款備充荒務要需事竣仍須造冊報銷更不致稍涉虛糜所有度支部咨令照數報部抵餉一節勢難照辦應懇

正言身一四
天恩俯准仍將前款照舊辦理以資彌補除咨部查照外謹附片
具陳伏乞

聖鑒訓示

遵擬江省裁缺人員補用辦法摺

奏爲遵擬江省裁缺人員補用辦法並聲覆飭查各節恭摺具陳
仰祈

聖鑒事竊准陸軍部咨本部核議黑龍江裁併各項官缺及改併
水師營官制一摺於光緒三十三年十月十五日具奏奉

旨依議欽此欽遵等因咨行前來臣等伏查原奏內開裁缺防禦
各員應如何改用飭定妥章奏明辦理一節查所裁防禦人員如
有擬陪奏保曾經引

見記名者擬請仍歸原班儘先補用其無候補班次者遇有佐領

升階均應按資較俸開列在前以備錄用且所裁各員原俸並未
停止現均照常供職仍可量才委派各差自無慮其向隅原奏又
開水師營撥入漢軍丁戶暨各城官莊丁壯戶口並應一律改編
造冊報部一節查本省水師營現正改編漢軍應卽造冊送部其
官莊丁戶從前原奏本係一律改爲民籍僅瓊瑋墨爾根兩處現
尙未設民官應暫歸入漢軍辦理惟各城官莊地畝諸多膠轕該
兩處荒務尙無頭緒一俟清丈竣事卽當遵造細冊報部備查原
奏又開裁缺七十六佐領除公中佐領外一律改爲世職令卽妥
擬章程一節查裁缺人員無論世襲輪管各佐領自應遵照部議
一律改爲世職同裁缺公中佐領均歸入學堂肄業惟東西兩路
布特哈各留八佐均有整頓旗務約束兵丁之責此項裁缺人員
擬遇有佐領缺出擇其學有成就明習公事者開列在前儘先挑

補其年齒過長不能向學暨不通旗務者仍留原俸以資養贍庶於變通旗制之中仍寓體恤各員之意此後襲替世職人員應請先食原俸隨時歸入學堂肄業遇缺與應挑人員一體列驗惟所留之十六佐各員暨每佐所留甲兵除俸餉外別無進款實屬瘠苦異常均擬請一律發給全分俸餉俾資辦公而示優異至江省駐紮吉林之水師營官員丁戶等既經議准併入吉林水師營管理應否改爲佐領驍騎校之處應由臣世昌會同吉林撫臣通籌核議另案奏明辦理所有遵擬裁缺人員補用章程暨聲覆飭查各緣由理合恭摺具陳伏乞

皇太后

皇上聖鑒訓示

裁缺文職請歸部選用片

再江省改設各司變通辦理迭經臣等奏明將原有將軍衙門戶工各司暨印務處銀庫司分別歸併在案又刑司亦經奏明歸併裁判處辦理現在新設各司均已奏飭赴任刑事亦歸併裁判處辦理自應將從前各司處額缺陳明分別裁改俾昭整齊計共裁撤理刑員外郎一缺理刑主事一缺管檔主事一缺其銀庫主事一缺應查照東三省官制改爲度支司六品庫官容臣等另行派員試署又裁無品級筆帖式九缺九品筆帖式二缺額外筆帖式十七缺惟各員等從公有年現因改制裁缺擬請將所有裁缺各員均以對品分別歸部選用其各該員未改就以前仍請給予原俸如原有升階者並請按照升階辦理以示體卹除將各員履歷咨部查照外謹附片具陳伏乞

聖鑒

遵議駐吉水師營官丁改補辦法片

再查黑龍江省奏請裁併官缺摺內擬將駐吉水師營四品官一員改爲佐領六品官一員改爲驍騎校水手人等附入吉林漢軍旗內管理其五品官一員卽請裁撤經陸軍部核議以駐紮吉林之江省水師營官員丁戶等應請併入吉林水師營管理至應否改爲佐領驍騎校之處請

旨飭由臣等通籌核擬另案奏明辦理奉

旨依議欽此等因由部咨行到吉臣等遵查部議擬將駐吉水師營各員併入吉林以期劃歸一律自應遵照辦理惟吉林水師營原設總管一員四品官二員五品官二員六品官四員所補之缺向係推陞今以該裁員等歸併辦理誠恐驗補無期似非體恤之道擬請將該營裁缺四品官一員六品官一員暫由漢軍佐領驍

騎校先行轉補其五品官一員因漢軍向無防禦陞階應俟吉林水師營四品官缺出與該營五品官一體列選以廣出路而免向隅是否有當謹附片覆陳伏乞

聖鑒訓示

依克明安公荒務竣事擇尤請獎摺

奏爲續放依克明安公荒段銀地各數并劃界升科擇尤保獎各情形恭摺仰祈

聖鑒事竊查光緒三十二年七月間據依克明安公巴勒濟呢瑪呈請將原撥該公荒地四十餘萬畝除酌留生計外均卽按照蒙荒章程定價出放等情當飭巴拜行局照章辦理迨巴局荒務報竣仍飭由拜泉縣就近兼辦以省經費續因領戶日多該縣辦理設治事宜勢難兼顧改設專局另派花翎候選知府富安前往接

辦迭經奏咨在案茲據該行局呈稱該段毛荒共計四十五萬六千七百五十四晌八畝八分內除劃留該蒙旗生計地十萬零六千七百四十二晌二畝淨剩毛荒三十五萬零零一十二晌六畝八分內經巴拜行局放過克儉社一段計面積之數二十一萬三千一百二十四晌五畝業經隨時收價歸入巴拜段內奏報其餘荒地除不可墾地二萬五千二百八十八晌一畝八分又撤佃毛荒二萬零二百五十晌現在一時無人續領礙難久設專局經理轉滋糜費擬歸拜泉縣就近招放外共計續放毛荒九萬一千三百五十晌扣七成地六萬三千九百四十五晌每晌按二兩一錢計收進押租銀十三萬四千二百八十四兩五錢照章自三十四年起限至三十九年升科並將隨征一五經費銀二萬零一百四十二兩六錢七分五釐分別支用解省等情呈請奏報前來臣等

覆核無異惟查巴拜行局前放該公克儉社荒段所收地價應卽歸入此次押租項下照章核劈其撤佃餘荒一時旣無人續領自應飭由拜泉縣就近播放以節經費惟在事出力員司自上年秋間赴段勘丈葳功迅速不無微勞計此次收進荒價銀十三萬餘兩自應照章請獎以示鼓勵所有擬保知縣候選縣丞張家杭請俟知縣獎案核准得缺後以同知直隸州用府經歷職銜武雲峰單治平雙安均擬請以府經歷不論雙單月儘先選用附生張芾楊地博均擬請以縣丞不論雙單月儘先選用合無仰懇天恩俯准照擬給獎以資激勸之處出自
鴻慈逾格除將該段毘連及收除經費并各員履歷冊籍一俟造齊卽行咨部外所有續放依克明安公荒段銀地各數並劃界升科擇尤保獎各緣由理合恭摺具陳伏乞

皇太后

皇上聖鑒訓示

遵 旨查明營商倒閉及被參各節摺

奏爲遵

旨查明營商倒閉辦法情形及先後被參各節據實覆陳恭摺仰
祈

聖鑒事光緒三十三年十月十九日准軍機大臣字寄奉

上諭有人奏奸商倒騙鉅款牽動全局請旨懲辦嚴追各摺片著
徐世昌楊士驤專派大員馳往營口提訊粵商葉道廣嚴行追究
一面設法維持以安市面原摺片著鈔給閱看欽此十一月二十
一日又承准軍機大臣字寄奉

上諭有人奏地方官徇庇奸商商董營私舞弊請加懲警一摺著

楊士驤徐世昌按照所指各節確切查明秉公辦理毋稍瞻徇原摺著鈔給閱看欽此欽遵先後寄信前來查粵商葉道廣在營口所開東盛和號於上年十月初一日倒閉並連號五家全行停歇約計欠款四百餘萬兩全市震驚臣等於次日疊據署奉錦山海關道沈桐及營口商會電稟當卽飛飭該道將葉道廣嚴行管押並將該商產業查封備抵一面督同商會清釐債項以憑核辦迨奉

寄諭遵派奉天度支司使張錫鑾津海關道蔡紹基分馳前往會同該署道沈桐設法籌辦旋據稟稱葉道廣等五家共欠外債約有三百九十餘萬兩各號欠葉之款約有一百零七萬餘兩其產業契據多押在道勝銀行及戶部銀行已將葉道廣嚴押訊問並派兵看守其產業亦一併查封等情惟籌抵欠債尤須兼顧市面

當由臣等電商度支部戶部銀行允撥鉅款到營先行周轉臣士驥亦允助款項臣世昌已飭撥銅圓合二十五萬兩以期流轉營口得此接濟人心稍定至將來部行撥款葉產如何抵押債戶如何分攤均飭經該道竭力籌商總不出於勻借公攤兩項辦法祇以頭緒紛繁鉅款不撥辦法未定故臣等尙未具奏嗣奉二次寄諭臣等復會同檄飭直隸補用道陶湘奉天卽補道徐鏡第馳往營口按照原摺指參各節嚴密確查去後茲據覆稱當葉道廣倒閉之時經奉錦山海關道沈桐立飭將葉商等十餘人交商會看押繼復改交海防廳管押訊追並將該商捐戴銜翎詳請斥革嚴訊追比查無爐房全體赴商會報荒情事至津海關道蔡紹基於親鞫葉商時因供詞狡展立予重責訊究極嚴賄託一層詳加訪查實無其事東盛和各號帳簿等件於倒閉之初卽經商會總

理潘玉田協理李序園眼同眾債戶檢點清晰提至商會存儲每
遇查帳公同取閱並未逕假總協理之手亦無迫令宣布之言更
無當眾撕去五六頁之事至葉商官膏局股票係一萬五千圓因
潘玉田所開永茂油房倒欠數萬兩潘玉田欲以股票扣抵欠款
旋聞被控遂卽中止李序園所開西義順油坊已經六七年聯
號眾多照常交易亦並無倡爲緩期還債之說等情稟覆前來臣
等查該署道沈桐前後辦理東盛和倒閉之事實力追查設法補
救固已煞費經營逮臣世昌飭撥銅圓到營該道復隨同張錫鑾
蔡紹基等督飭商會欠戶人等妥籌抵押分還之法意見參差語
言龐雜屢議屢變又經該署道竭力籌維辦法雖未議定市面藉
以維持卽今開河在卽交易照常人心安謐亦可徵其辦事實心
絕少偏畸被參各節旣據查明失實津海關道蔡紹基於查辦此

案亦無不合情事商會總協理亦並非有意阻遏藉復私圖均應
無庸置議除俟籌定抵押分攤辦法再行具奏外所有查明營商
例閉情形及被參各節據實覆陳緣由謹恭摺會陳伏乞

皇太后

皇上聖鑒訓示再此摺係由臣世昌主稿會同臣士驤辦理合併
聲明

官兵在吉剿匪出力各員擇尤保獎摺

奏爲官兵在吉迭次剿捕巨匪謹將在事出力各員擇尤分別保
獎恭摺具陳仰祈

聖鑒事竊維東省鬍匪盤踞已久出沒靡常非時加懲剿無以銷
亂萌非優予獎敘無以鼓士氣上年經前任奉天將軍臣趙爾巽
奏請變通定章嗣後剿匪出力人員仍准隨時彙案辦理又因奉

北一帶剿匪迭獲勝仗將在事各員分別異常尋常奏請照擬給獎均蒙

恩准仰見

朝廷眷懷邊圉策勵戎行之至意欽感莫名臣等履任以來緝獲巨匪多名地方漸臻安謐復飭行營翼長張勳統率所部剿辦吉林大股鬍匪所有剿匪情形並請俟賊匪剿平論功行賞以獎微勞業經奏明在案該翼長等率師進剿自夏徂冬仰賴

天威士眾用命五六月間在長春府額木索甯古塔鴨綠溝孤家子北大溝等處地方擒獲各積年巨匪均已訊明辦理厥後剿獲巨匪陸續呈報計有九次七月間在甯屬七道溝遇匪五六百人聚集山巔彈如雨注我軍分道前進擊斃一百餘名生擒十餘名逃散之匪傷斃及自行勒斃者又五十餘名毀其帳棚三十餘處

奪回被綁日本人二名復進軍至穆林河將匪徒所築礮台牆壘
悉數剷平別遣將弁在煙筒山雞爪頂斃匪七名燒斃四名生擒
二名在春秋嶺擊斃逸匪十一名在巴離子焚燬木棚三十餘座
又八月間距沙河左近地方遇匪百餘名該軍迎前奮擊斃匪二
十餘名奪獲糧食二千餘斤追至山內老巢焚燬匪寨四十餘處
其分隊在四方頂羊碣子遇匪百餘名擊斃十名復在大青川上
掌山槍斃匪目一名生擒十餘名以上兩次剿匪情形已於前摺
擇要奏報嗣於九月間又在艾家窩棚地方陡遇大股悍匪該軍
四面圍攻自辰至未斃匪過半擊斃匪首佟老等四名該翼長又
親督軍隊冒雪攻破太馬溝其地逼近老巢牆壘櫛比我軍乘風
縱火燬其棚寨十餘處斃匪十七名生擒二名追至穆林河將近
俄界而還匪黨疊經痛剿凶燄漸衰於是防其奔竄密派得力兵

隊於巴籬子及哈爾濱車站一帶嚴行巡緝生擒悍目十九名奪獲快槍百枝復聞該匪巨股往來於細鱗河等處勢將遁入俄界遂用聲東擊西之計先派軍隊南下搜捕額木索一帶餘孽而親督重兵嚴密前進適遇該匪於窩棘棚內圍而攻之斃匪十五名負傷尤眾其逃向海參崴五站者又追擒二十六名回竄沙河老巢者亦經官兵追擊斃匪九名奪槍九枝此外在逃各匪經該軍派遣哨弁購綫密緝先獲匪首黃洛三於長春城內續獲匪首周老鴉土大鼈董好於長春府附近之燒鍋甸復擒獲悍匪劉鈺豺等三名先後訊明正法其潛留阿什河一帶之逸匪亦由該軍哨弁覓綫改裝偵悉巢穴所在勒隊圍捕匪黨持刀拒傷兵丁勢甚凶橫賴軍士奮勇前進生擒巨匪于萬黑等三名搜獲贓銀五百餘圓又追蹤起獲快槍四十八枝及洋刀子彈等件統計細鱗河

等處先後斃匪二十四名生擒七十三名自茲大股積匪固已漸次掃除該翼長復查悉已竄俄界之匪目王鐸李等常窺伺於海參崴細鱗河一帶乃令各軍前往會剿匪黨聞風奔散搜至細鱗河深巖之內擒獲巨匪占東洋等二十七名起獲快槍四十九枝仍派遣各軍駐紮細鱗河甯古塔帳房山橫道河七道河一面坡烏機密沙河等處分道窮搜以收遺燼復擒獲匪首韓菁刪等十四名奪獲快槍四十九枝他如達連河一帶亦經選派軍隊深入匪巢嚴密掩捕斃匪十五名生擒匪首大汪等十四名收撫降匪三十餘名救回被捉人民十一名奪獲快槍九十一枝巴籬子高台階一帶又由該軍哨弁擊斃匪目等六名生擒一名奪獲快槍九枝計前後九次呈報擊斃及生擒各匪共有八九百名之多辦理頗爲得手茲據該翼長呈報吉林東北大股鬍匪近已一律廓

清該軍員弁等悉力防剿已逾半年暑雨祁寒未遑輟息卒能犁庭掃穴奏此膚功實屬異常出力開具銜名清單呈請查照前案奏給獎敘又據呈稱奉邊首要各匪往來於大窪三道溝各處者爲一股麇聚於昌圖府東北一帶者爲一股蹂躪吉省紅石砬子等處者又爲一股經各營管帶聶汝康許蘭洲等會同剿捕擒斬首要各匪九十七名奪獲快槍八枝子彈二百餘顆馬三十四匹現在各股均已撲滅地方賴以敕本請將出力各員一併彙案奏保等因前來臣等查吉省疆域寥濶黠匪此擎彼竄習爲故常全賴各軍協力籌防乃能布置周密除吉興吉安吉甯精銳右翼四軍撥歸該翼長調遣所有員弁已據開單請獎外精銳左翼統領誠明督率官兵在西南山一帶先後與匪接仗十三次擒斃匪首張玉清等四十二名又訪獲鬍匪蕭紅等三十三名吉勝軍統領

毓麟駐防省城先後督飭弁兵在菸袋木溝等處與匪接仗七次擊斃巨匪壓五洋等二名生擒匪首張滌福及夥匪三十餘名護理三姓軍統領德魁自九月接護該軍卽親率兵隊赴姓邊楚山一帶堵緝江省叛匪未及浹旬一律剿散擒斃首要高作舟等四名餘黨二十餘名奪回槍械馬匹甚夥陸軍三鎮五協九標二營管帶官劉之潔駐紮磐石縣所部隊官排長等在阿口子各處先後捕獲巨匪田祥等并夥匪二十餘名均據先後呈報在案論其剿匪之功雖稍與吉興各軍有間而相機策應就地屯防亦不無微勞足錄竊思東省積匪多於各省而剿匪之事又較難於他省邊要各處人煙寥落林木阻深夏則瘴霧彌空冬則堅冰徧地匪徒因得嘯聚其間恣行劫掠迨官兵一至其弱者散居閭里無可窮追其黠者鋌走山林顯然對抗在軍士等隨時偵捕冒險進攻

其艱苦情形實不殊於前敵卽以近日匪勢論之東自綏芬以迄海參崴西自哈爾濱以迄長春府荏苒竊發何地無之其甚者私築礮臺牆壘以爲久遠之圖潛通異族奸商別有逋逃之藪深根固蒂剿撫兩難乃該翼長督率精兵奮勇進剿各軍統領亦能不分畛域協力分防半載之間竟將積年巨患掃除殆盡實非尋常剿匪之功可比所開請保各員經臣等一再覆核委係在事出力并無冒濫合無仰懇

天恩特予照准以彰

懋賞而勵軍心出自

鴻慈逾格除將應保千把各員弁並應卹陣亡各弁兵咨部分別核辦外所有奏保剿匪出力各員緣由理合分別異常尋常繕具清單恭摺具陳伏乞

皇太后

皇上聖鑒訓示

陣亡驍騎校承銓之子巡官法芬佈擊匪出力請卹獎片

再查第八巡警分局巡官法芬佈因其故父前鑲藍旗驍騎校承銓於光緒二十八年委帶雙城堡練軍馬隊剿捕海旺窩棚地方股匪與關茗芷等奮力接仗陣亡尙未具奏該員痛父心切嫉匪尤深誓以剿除鬍匪自任聞著名匪首常海綽號長樂積惡多年久未弋獲去年八月二十三日午後法芬佈偵知該匪匿於城外之張三屯當經密報總局飭率巡兵十餘名飛馳往捕詎該匪長樂連發快槍傷斃該員騎馬并洞穿其左腰等處受傷甚重該員猶奮力前往捕賊與之拚命抗拒以指揮刀力斫賊項卒將該匪擒獲正法人心爲之一快該員昇赴醫院療治彈傷時臣家寶親

往慰勞見該員裹傷卧牀猶復談笑自如深爲憫惻查該員以一附生在北洋巡警學堂畢業回省供職警局痛父殲賊手擒巨匪死生呼吸奮不顧身核其勞績實與戰功無異而出之文弱學生尤爲難得一門忠勇實可嘉矜當此創興警政之時需人孔急自應分別卹獎俾昭激勸合無仰懇

天恩飭部將承銓照驍騎校陣亡例准予議卹並將伊子法芬佈照難廕以知縣歸部選用出自

逾格鴻施除飭取履歷咨部查照外理合附片具陳伏乞
聖鑒訓示

江省白楊木河荒務竣事並請獎摺

奏爲白楊木河一帶荒務辦理完竣謹陳荒熟地畝暨銀錢兼收各數目並隨案擇尤保獎恭摺仰祈

聖鑒事竊查白楊木河一帶荒地經臣德全於三十一年秋間札派候補同知馬六舟前往履勘查得該段沙礫最多出放非易奏請每晌但收銀七錢外加一五經費以廣招徠繼因該處荒戶率皆土著貧民以錢易銀輒爲市商所抑勒以致續領之戶觀望不前復由臣德全奏請准令按照市行銀錢兼收以示體恤仰蒙聖慈允准各在案茲於上年秋間據報放出毛荒九萬五千一百三十二晌一畝五分六釐五毫八絲扣七成地六萬六千五百九十二晌五畝零九釐六毫零六忽應征押租銀四萬六千六百一十四兩七錢五分六釐七毫二絲四忽二微內除領戶欠交銀一千七百八十七兩零零六毫實征進銀四萬四千八百二十七兩七錢五分六釐一毫二絲四忽二微按照逐日銀行折收銀款十八萬五千一百五十六串三百二十八文每兩隨征一五經費

應征進銀六千九百九十二兩二錢一分三釐五毫零八忽六微
三纖內除領戶欠交銀二百六十八兩零五分零九絲實征進
銀六千七百二十四兩一錢六分三釐四毫一絲八忽六微三纖
折收錢款二萬七千七百七十三串四百四十八文此項尾欠現
已移交地方官照數追繳其出放地畝照章自三十四年起限至
三十一年升科又於三十三年查出熟地二千九百一十二晌七
畝八分五釐比及辦理竣事已屆隆冬應請自三十四年升科等
情呈請奏報前來臣等覆核無異性查該處地段逼近山林荒熟
零星勘丈極稱費手地脈磽薄招戶尤爲艱難現旣辦理竣事溯
其分勘各段頭緒棼如亂絲幸該員等卒使輾轉一清洵屬著有
微勞自應查照前政務處會奏墾務獎章辦理以昭激勸所有尤
爲出力之補用同知馬六舟擬請俟補缺後以知府用候選知縣

戴德芳擬請俟得缺後以同知直隸州補用合無仰懇
天恩俯准照擬給獎以資策勵之處出自

逾格鴻慈除將該段分繪各圖咨送軍機處查核並俟造具毘連
細冊及按照逐日銀行收款清冊暨各員履歷分別咨部查核外
所有白楊木河一帶荒務辦理完竣謹陳荒熟地畝暨銀錢兼收
各數並擇尤保獎各緣由理合恭摺具奏再該處放荒時臣等卽
一面札派委員前往該處招集民戶現在荒地勘丈完竣應卽改
爲巡防委員以資彈壓其額支經費自應另行核銷合併陳明伏
乞

皇太后

皇上聖鑒訓示

江省創辦中學改定兩級師範學堂並推廣女學情形摺

奏爲江省創辦中學及改定兩級師範學堂並推廣女學情形恭摺仰祈

聖鑒事竊查江省自振興學務以來民智日漸開通卽規畫宜日圖進步固不能躡等以求速尤不宜簡陋以自安蓋邊省教育之計畫固有不得不然者現計省城綏化呼蘭巴彥州文風較盛之地所辦高等小學爲時較久略具普通知識上年調齊分科考試升入中學查照新章飭令諸生自備膳費現因校舍未成暫借上年新修南路農業小學堂內開辦一俟春融卽擇農業小學堂東北空地按照中學校圖式建築以規久遠舊有黑水中學豫科同時歸併該中學本係俄文學堂改設由戶司歲支銀三千五百五十兩僅教學生一班不足五十人現中學堂已招足兩班百人經費亦應加倍歲支銀七千一百兩嗣後按年添招按年遞加至五

年以後卽毋庸增費再前年創辦初級師範簡易科計得一學期
畢業生五十人兩學期畢業生百人惟高等小學教員中學教員
現尙缺材亟應將簡易科停辦改名兩級師範學堂按章先辦選
科限定預科一年分科兩年合共三年畢業至女學爲家庭教育
之基前年省城創辦第一幼女學校上年接奉學部奏定女學堂
章程遵卽照章辦理各屬聞風興起皆申送女生入省肄業現在
呼蘭府設立第二幼女學校一區巴彥州設立第三幼女學校一
區蘭西縣設立第四幼女學校一區均經飭令第一幼女學校發
給章程教科書以資訓迪所有開辦經費均係各屬自行籌集等
情據提學使張建勳詳請奏咨立案前來臣等查省城中學堂原
爲各屬高等小學之升階及省城高等學堂之豫備除舊有俄文
學堂每年經費三千五百五十兩原由戶司發給現改由度支司

發給外其餘逐年增加經費應由廣信公司官股餘利項下如數撥付如有不敷之款再由度支司設法籌付以重學務並另撥開辦經費一千兩以爲購置教科書籍及操衣操帽之用迭經批示飭遵在案至兩級師範學堂先辦選科每班百人按照簡易科原支經費數目照舊由度支司提撥隨時添招新班再照此數遞加並於呼蘭巴彥蘭西等處就地籌款添辦女學尤爲造就師資豫培家庭教育起見均經隨時飭令照辦除咨明學部查照外理合恭摺具陳伏乞

皇太后

皇上聖鑒

江省擬定鐵路附近煤礦合同片

再查鐵路公司開採黑龍江煤礦合同前於光緒二十八年四月

經前署將軍薩保議訂奏奉

諭旨交外務部核議以鐵路附近煤礦漫無限制應令與俄員另議辦法並聲明三十里外公司不得與閩等因奉

旨依議行令遵辦在案嗣後屢經磋商未協三十二年春間道員宋小濂在外務部備議約顧問隨同該部與購地伐木兩事同時提議當已議有端倪是年秋間經外務部併交宋小濂在哈爾濱就近與公司商辦上年七月亦經議定簽押呈由省署用印其開鑛地段鐵路兩旁仍以各三十里爲定界內煤礦准鐵路公司開採華人亦得享在界內開鑛利益公司不得阻撓界外不得准公司擅開如願承辦須稟准華官照中國奏定鑛章與他項華洋人等一例煤稅前定每千斤納銀八分此次議加四分每千斤作爲一錢二分並於公司所開鑛廠派駐委員查核帳目以防漏稅如

此辦法鑛地既有限制不至任人把持煤稅又復增加可以隨我稽查較之前合同收回權利不少此事已閱數年應卽議結以免公司藉口侵擾據護理呼倫貝爾副都統存記道宋小濂咨請奏明前來臣等將所定合同詳加覆核委係實在情形除繕錄副本咨送外務部查核並鈔咨農工商部外理合附片陳明伏乞
聖鑒

署琿春副都統陳昭常帶印駐延片

再據署理琿春副都統陳昭常咨稱琿春旗民雜處風氣未開一切事宜均須及時整頓現在大策布盪漸有頭緒延吉交涉緊要未便久離擬卽帶印赴延暫行駐紮琿延相距伊邇近日電線已通消息更爲靈捷遇有重要事件仍可隨時馳回琿春辦理不致貽誤惟事係創舉應請代爲奏明等因前來臣等查琿春副都統

本有兼理邊務之責近來沿邊情勢與昔稍有不同自延吉事起
該副都統會同幫辦吳祿貞預籌布置相機因應諸臻妥協自應
准其帶印馳往延吉籌辦一切期無貽誤謹附片具陳伏乞
聖鑒

退耕堂政書卷十五目錄

奏議十五

改訂東省鐵路公司購木合同請獎摺

杜旗沿江荒務情形片

續商出放札賚特餘荒情形片

湯旺河辦荒人員請獎摺

鐵山包屯田安插完竣摺

江省另建罪犯習藝所片

遵旨薦舉人才摺

附單

吉江兩省各官廉費援照奉省減成給發摺

昌圖等府廉俸由海龍府升科地糧開支片

奉省土捐估徵行銷兩項加倍徵收片

郭爾羅斯後旗沿江荒務報竣摺

聲明郭旗荒務加價用款片

擬辦瓊瑋墾務大概情形摺

郭爾羅斯後旗鐵路兩旁荒務清釐報竣請獎摺

撥給郭旗沿江荒務公費片

旗奉吉江學堂領地請免繳價片

江省吉拉林設治片

設立奉天法政學堂摺

退耕堂政書卷十五

天津徐世昌

奏議十五

改訂東省鐵路公司購木合同請獎摺

奏爲改訂東省鐵路公司購木合同業經畫押用印並將在事出力人員擇尤保獎恭摺仰祈

聖鑒事竊查華俄道勝銀行承辦東省鐵路應需地畝木植因未定有專章該公司任意占用砍伐光緒二十九三十四年前辦鐵路交涉開復直隸委用道周冕與該公司擅立合同所有鐵路附近地畝共允給二十萬畝木植則陸路允給長六百里寬六十里其中本多無木之處名雖與木實以與地水路則共給二段一段係呼蘭諾敏兩河各至水源爲止長三百餘里寬一百餘里一段

係濃濃杖林兩河各至水源爲止長百六七十里寬七十餘里於我土地物產多所侵奪而呼蘭河一段尤爲我民生計所關適臣德全與前署將軍達桂先後到任知權利不可輕棄照會鐵路公司合同未經將軍用印應卽作廢另議時值日俄戰事方殷俄人恃強凌轍屢議未協三十一年秋間日俄戰結臣德全以江省關係重要奏派現護呼倫貝爾副都統存記道宋小濂赴都備外務部議約顧問並將周冕前後情形奏陳在案當經宋小濂隨同外務部先將兩項合同提議會商數次未能遽結三十二年七月經外務部指派宋小濂赴哈爾濱與鐵路公司總辦霍爾窪特就近會議該總辦堅欲就原合同商改不肯作廢經臣德全屢飭宋小濂據理力爭始將前合同擱置重新提議計自是年七月至上年七月經歲磋商會議至三十三次該總辦以前合同視爲已得權

利多方狡執經宋小濂殫竭心力舌敝唇焦乃將購地合同議定簽押送呈省署用印伐木合同亦同時議妥祇以地段尙未指明未卽簽押蓋緣鐵路公司以前定合同地段甚寬注意在呼蘭諾敏兩河必欲達其目的該二河處江省腹地大宗物產均出其間且木植爲人民生計所關斷難允許其呼蘭一河貫穿呼蘭綏化餘慶蘭西二府兩縣爲商民交通要道前年俄人在彼伐木已有攔綆不准華商通運之舉若將此河撥給公司勢將據我形勝扼我咽喉不僅攬我利權已也宋小濂心知其故無論公司如何要挾始終堅持未允該公司見事難如願置而不議者兩月適宋小濂經臣等奏明護理呼倫貝爾副都統亟須赴任臣等以事關重要未便遽易生手仍責成該道一手了結該道稟派向隨會議之鐵路交涉局提調候補同知直隸州知州張壽增在哈代議數月

以來心口交瘁幸得磋商就緒不惟呼蘭諾敏濃濃等河毫未撥給而地段亦減縮十分之九現已將伐木合同地段議定簽印綜計購地一案前合同允給二十萬晌此次改定十二萬六千晌減去七萬餘晌前合同官地每晌定價五盧布此次議加爲八盧布計鐵路占用江省官地不下八萬晌增出地價二十三萬餘盧布且訂明永不再展以杜後來覬覦並於車站附近留出華商便利足用地段又撥留交涉局華官廳基址使路界以內主權不至盡失伐木一案前合同陸路自慶吉斯汗至雅克什共十一車站長六百里寬六十里此次分爲二段各長三十里寬十里較前合同長減十分之九寬減十分之八有奇水路則前合同呼蘭諾敏二河長三百餘里寬一百餘里汶林濃濃二河長一百六七十里寬十餘里此次僅指汶林一河長五十里寬三十五里較前合同長

共減四百餘里寬共減百數十里復於各地段內派駐委員以便稽查并專條聲明將來

國家訂有護養林木章程公司亦須遵守其兩合同底稿由我先定雖用華俄文繕寫遇有辯論以華文爲準是皆前合同已失之權利力爲挽回者也伏念黑龍江交涉多在鐵路而鐵路交涉以購地伐木兩合同爲最要合京外之力經四年之久宋小濂兩次赴外務部請示機宜卒能就我範圍和平了結其間層累曲折幾歷困難非具有定見毅力未易臻此臣等將所定合同與前合同比較詳核并參以歷次所呈會議節略均屬實在情形查外務部新定辦理洋務獎勵章程各省交涉重案如磋商商約之類由該督撫大臣隨時請

旨辦理此次改訂鐵路購地伐木兩合同既重且難實不無微勞

足錄所有在事出力之護理呼倫貝爾副都統花翎二品銜存記
道宋小濂始終力任艱難雖據稱不敢仰邀議敘究未便沒其勞
勩惟其品秩較崇應如何獎勵之處出自

聖裁其隨帶各員司數年在公成績昭著而張壽增一員精通俄
文俄語無役不從嗣復派其代議尤爲異常出力擬均懇分別給
獎合無仰懇

天恩特准將候補同知直隸州知州張壽增免補本班以知府仍
留江補用並加三品銜知府用候選同知內閣中書王莘林免選
同知以知府儘先選用候補同知涂鳳書免補同知以知府仍留
江補用候選縣丞莊秉彝俟得缺後以知縣用府經歷職銜徐相
山舒崇剛廩生王用汝均以府經歷不論雙單月儘先選用縣丞
職銜康巖以縣丞不論雙單月儘先選用俾示鼓勵而昭激勸出

自

逾格鴻慈除將合同另繕副本並摘鈔會議節略暨前合同咨送外務部查核並將各員履歷咨明吏部外理合恭摺具陳伏乞
皇太后

皇上聖鑒訓示

杜旗沿江荒務情形片

再查杜爾伯特沿江一帶閒荒前於三十一年經臣德全奏明委派騎都尉慶恩爲行局總理帶領員司前往勘辦旋據稟報該旗閒荒除各站台與蒙古村屯外共勘有毛荒六萬餘晌並請將界連省屬夾荒一段劃歸該行局併放暨荒地分爲三等頭等價銀五兩一錢二等價銀二兩四錢三等價銀一兩四錢各節當經飭令遵照丈放各在案茲據該行局稟稱共放出毛荒五萬六千四

正言卷之三十一
百餘兩按三七折扣應收押租銀十一萬零七百餘兩內已收進銀二萬八千三百餘兩實欠在民銀八萬二千四百餘兩又應收一五經費銀一萬六千六百餘兩內已收進銀四千二百餘兩實欠在民銀一萬二千三百餘兩並於蒙荒內丈出熟地六百餘畝惟因該處設局伊始卽經股匪擾亂領戶旣逡巡卻顧上年復亢旱歉收加以銀錢奇絀地土瘠薄辦理極爲費手不得已變通緩限交價現僅放出此數而時日過久用款滋多薪工各費已用銀至一萬九千九百餘兩萬無可節除將所收經費抵用外現由押租項下墊撥將來如能放出餘荒或可藉資彌補等情稟請核辦前來臣等查該行局前歲甫經到段適匪蹤竄擾多耐站一帶慶恩單騎詣賊幾瀕於險又上年附省天時苦旱收成歉薄均經先後奏明有案是該段荒務棘手未能一律蕪事自屬實在情形現

既贖荒無多費用甚鉅業經飭令撤局並造冊呈送咨部備案惟該處地面荒濶馬賊時復竄擾已招之戶非有官爲保護墾闢仍屬無期且與多耐站相近緊逼嫩江界連蒙旗地勢極爲扼要尤非設官整理不足固圉安民現經臣等委派在任補用知縣綏化府經歷錫壽爲該處設治委員飭卽妥爲經營並督催各戶開墾以爲日後設治基礎仍令趕緊催收各戶欠價暨將餘荒隨時設法招放俾期此荒早日完結至該處設治區劃各事宜容俟臣等將通省官制統籌規定後另案奏明辦理謹附片具陳伏乞

聖鑒

續商出放札資特餘荒情形片

再查札資特蒙旗所屬望海迤南北及額勒根河迤南荒地上年春間曾經奏明派員前往勘辦嗣以行局甫經到段卽有該旗梅

楞綽克大賚聚眾槍斃辦荒蒙員哈豐阿之案當經一面奏報一面通行嚴緝維時若遽撤局旋省則該段荒務勢必中止故經臣等陳明仍飭該行局審慎辦理免致別生枝節迨至去冬十月間始准哲里木盟長派吉密吉特僧格前往會同辦理茲據該行局總理記名總管佐領依順保呈稱會勘該段荒地現已掘出大界惟其間原設廟宇大小八座又該旗蒙屯四十七處外旗蒙屯五十九處所有附近已墾熟地或應酌留生計抑應查明升科均須分別辦理其餘沙城溝窪不能墾闢之地均在現勘大界以內臨時仍須扣除並聲明自光緒三十三年四月開辦迄今共墊發局用薪工等項銀一萬餘兩俟本年春到段後再行酌定價目招戶出放各等情前來臣等覆核無異除飭取印圖并飭局趕緊赴段開辦仍將所支薪工等項造冊呈報再行咨部核銷並將地價定

妥續行咨報外所有現在商妥出放札賚特蒙旗餘荒大概情形
謹附片具陳伏乞

聖鑒

湯旺河辦荒人員請獎摺

奏爲湯旺河一帶荒務完竣謹將在事出力各員按照地數變通
請獎恭摺仰祈

聖鑒事竊維今日經營江省之策首以拓殖人民墾闢閒荒爲要
義願辦理荒務宗旨不外二端一曰籌款一曰實邊蓋附近繁盛
之區招戶較易收價非難而沿邊各荒人煙稀少收款彌復艱窘
故能籌款者自應以銀數爲考成而注重實邊未能收價者尤應
以地數爲標準情形既各有不同獎勵自難拘一格此臣等所爲
急求變通而冀臻允當者也伏查湯旺河一帶荒地居松花江下

游迤北密邇山林爲俄人輪舶來往必經之地內則盜賊充斥外則強鄰窺伺但使有人認墾卽於實邊大有裨益初不以收款多寡爲羸絀也曩經勘辦荒務大臣延茂前將軍恩澤壽山三次派員前往丈放皆以無人認墾事遂中寢彼時鐵路尙未貫通外人尙未深入及臣德全於光緒三十年在署副都統任內通盤籌畫知該處邊事日亟於是年秋會同前署將軍達桂派委候選知縣劉虞卿前往設局續行招放每晌定收押租銀七錢嗣因領戶多係貧民猶復望而裹足又將每晌實地改收經費中錢四百文以便推放奈該段僻處窮邊鬻匪時出滋擾招集彈壓措手維艱幸經在事各員設法前赴奉吉一帶竭力招徠領戶始漸次來集現據報稱共放出毛荒六十三萬餘晌收進經費錢二十五萬五千餘串計該處附近可墾之荒均已安插殆盡若非在事各員不畏

艱險不辭勞瘁斷難遽奏成功查前政務處議行墾務保獎章程收銀至五萬兩者准保異常勞績一員收銀至二萬兩者准保尋常勞績一員江省他處荒務告竣均經照章請獎荷蒙

恩准在案惟此段荒地本以實邊爲重此次招放又經奏明不收押租而勘放至六十萬晌辛勤逾三年有餘入款雖少而勞勩維均若必按照定章計銀核獎則能收地價之荒價愈高而獎愈優不能收價之荒勞雖多而獎益薄殊非平允之道但獎章漫無限制亦不足以示準則查江省放荒保獎歷屆奏案最低荒價每晌僅收銀七錢以所收之價按部章銀數核算計丈地七萬二千晌應獎異常一員丈地三萬晌應獎尋常一員此次湯旺河在事各員應卽準此按照地數變通辦理以昭公允其出力稍次各員業經一再汰除尙餘地數二十七萬餘晌均未核獎所有尤爲出力

正書卷十五
十一
之候選府經歷顧炎慶候選縣丞劉贊廷均擬請俟得缺後以知縣用裁缺八品筆帖式達哈蘇擬請以通判不論雙單月歸部選用補用府經歷金崇厚鮑震均擬請俟補缺後以知縣用府經歷職銜李惠德李暹榮愷附生鄭先資均擬請以府經歷不論雙單月儘先選用候選從九品沈松年擬請以主簿不論雙單月儘先選用監生姚其章文童劉鴻飛均擬請以巡檢不論雙單月儘先選用合無仰懇

天恩俯准照擬給獎以示鼓勵出自

鴻慈逾格再此後瓊瑋呼倫貝爾所有沿邊各荒勢難收價與湯旺河情形相同若請獎仍照部章則從公者恐均視爲畏途責效綦難擬請嗣後凡興安嶺以內各荒應仍照部章請獎其興安嶺以外不能收價各荒則仍照此次湯旺河獎章一律辦理以重邊

懇而資策勵除將各員履歷咨部查照外是否有當理合恭摺具陳伏乞

皇太后

皇上聖鑒訓示

鐵山包屯田安插完竣摺

奏爲鐵山包屯田現已安插竣事恭摺具陳仰祈

聖鑒事竊查光緒十八九年清丈呼蘭等處地畝奏准在北團林子所轄鐵山包地方安設屯田旗丁一千二百戶巴彥蘇蘇所轄之山林地方安設屯田旗丁六百戶如尙有餘再安設六百戶嗣於光緒二十一年間奉准部覆業經安置就緒旋值庚子變亂各旗丁轉徙流離逃亡殆盡迨二十八年起科之期逃亡皆未復業當經奏蒙

天恩容俟招安齊楚再行定限升科並將北團林子委協領員缺
改爲正印協領率屬移紮鐵山包仍飭大興屯墾各等因遵卽飭
局辦理去後茲據署理鐵山包協領事務佐領烏珍布報稱查照
原案按一千二百戶每戶授地一方計每戶四十五晌統計五萬
四千晌又於每戶一方內以十五晌歸各屯丁管業免其納租以
三十晌定限起科計免其納租地共一萬八千晌起科地三萬六
千晌并劃定界址東至金牛山懷驩洞大小馬鞍山南至大青山
橫頭山西至鐵山包河大呼蘭河北至依吉密河惟此段界內原
有舊占佃戶三十九名向隸綏化府屬餘慶縣所轄其應納官租
卽由該縣征收現查此項佃戶原占暨續領之地共撥予四十五
方等情繪具圖說呈請奏報前來臣等覆查是段屯田旣經該署
協領續行招戶現甫安插齊畢所有應納租地三萬六千晌自應

照章自三十四年起限至三十九年升科惟所有舊占佃戶向歸餘慶縣征租現既劃在屯田界內應否照舊辦理擬俟將原占暨續領各數目飭令查明分晰具報再行核辦謹將送到圖說恭呈御覽除飭造具毘連冊籍咨部查照並巴彥蘇蘇屯田應俟另案奏報外謹恭摺具陳伏乞

皇太后

皇上聖鑒

江省另建罪犯習藝所片

再江省前設罪犯習藝所一區本係就省城南門外租屋酌加修葺近來罰工人犯漸多房宇狹窄兼以各項工廠建築未備非擇地另修不足以昭整齊查東西列邦於獄制一切攷求綦詳舉凡建築管理教誨衛生罔不纖微周備江省新改行省固未能事事

求精然習藝本寓遷善之方故擇地務須合用修屋尤宜整潔茲經勘得省城東關外舊營房基址較爲寬敞卽就該處另建罪犯習藝所一處計大小房屋一百二十八間所有工廠監室材料庫成品室一一較前完整統共估價計市錢十萬零四千三百餘吊已於上年鳩工庀材現飭試署提法使秋桐豫督飭委員趕速認真修竣以便挪移而期經久所用錢款卽由一成捐項下支撥一俟工畢再行造冊核銷除咨度支民政兩部查照並繪圖咨送法部查核外謹附片具奏伏乞

聖鑒

遵

旨薦舉人才摺

附單

奏爲遵

旨薦舉人才繕單臚陳恭摺仰祈

聖鑒事竊前奉內閣鈔出

上諭朕欽奉

慈禧端佑康頤昭豫莊誠壽恭欽獻崇熙皇太后懿旨振興國勢必先簡拔人才朝廷側席求賢全賴內外臣工虛心訪薦著在京大學士各部院尙書侍郎都御史副都御史在外各省督撫率同藩學臬三司公同訪求詳慎甄擇不拘官階大小及有無官職如確知有才堪大用及各擅專長者切實薦舉以備任使等因欽此跪聆之下欽佩莫名臣惟治人治法自古相維顧法制大定之後庶政悉衷於成憲則任法重於任人法制創革之時百務待理於羣才則任人尤急於任法遐稽史籍旁覽環球定義昭然無可疑也我

皇太后

皇上於振新法度之時殷殷以延攬賢才爲先務採源知本日月
同明臣等奉

命以來虛衷博採竊以爲列強並峙相競以國力實相競以人才
而際此時艱孔亟宏濟攸資將欲全國上下同力一心共維時局
其決去壅蔽以固結於民心者則立法爲之其開布公誠以翕收
夫人望者則用人爲之人才奮興政治咸理所以宏

朝廷會歸之極而歷天下望治之懷者由斯道矣臣等率同參贊
各司加之蒐訪互相商榷敬舉以聞查有陳曾壽等十五員雖器
能不一顯晦或殊要之名實必期相符艱鉅或能分任其有官階
較崇已蒙擢用者不復具列臣等見聞淺隘何足以衡量當代之
才惟是撫時會之艱難比求賢於飢渴今旣以因材器使廣其裁
成復不以責備求全隘其登進將驚駘亦期十駕騏驥或至空羣

臣等所知豈遂足副

明揚盛典但徵求常格固不外行誼才學兩途伏維

聖明權衡在上用人無方以破格之招動天下之觀聽以詢考之實選天下之技能宏此甄陶互相砥礪英才教育蔚爲

國華他日者羣才奮興法制大備則又將合天下之人才成就範於成憲此尤臣等所日夕禱祀者也謹將各該員品學事實繕具清單恭呈

御覽所有遵

旨薦舉人才三省彙合繕單具奏緣由謹恭摺會陳伏乞

皇太后

皇上聖鑒

附單

計開

學部員外郎記名御史陳會壽湖北蘄水縣人才識淵通志
趣純正究心經世之學熟於古今沿革山川阨塞所著古今
戰事圖說極爲精審前赴日本考查教育洞澈本原力持增
進德育之旨深識遠見卓越時流在鄉在官粹然無間實爲
體用兼備之才

分省補用道鍾文耀廣東香山縣人美國耶路大學堂肄業
生前後充當出使美國隨員及小呂宋總領事聯絡華僑振
興商務交涉事件動合機宜嗣充招商局鐵路局差於船政
路政頗能實心整頓該員心術純正綜核精詳熟諳外交並
資幹濟實爲不可多得之員

翰林院庶吉士譚延闓湖南茶陵州人係已故閩浙總督譚

鍾麟之子究心時政利弊學有根柢力矯空談在本省辦理學務力戒浮囂監督師範博綜新舊學說軌之正道該員品端學正湘中士林同深推服允稱遠到之器

法部候補郎中署大理院推事董康江蘇武進縣人踐履篤實不驚虛名於經史掌故目錄金石之學賅貫博通尤專心法律之學於漢唐以來法律家言及東西律章法意靡不研求洞貫前充法律館提調刑律草案多經該員商推異同頗稱詳密該員在部歷十餘年任兼人之事口不言勞迥非時流所及

前署吉林長春府知府軍機處存記候補直隸州知州張鳳臺河南安陽縣人服官直隸歷委差缺所至有聲在東鹿縣任內辦理公債撫綏地方政成事舉百廢俱興實爲牧令之

冠所著公法提要簡明切當足資研究前委署長春府知府
諸事整飭漸改舊觀該員操守謹嚴才識通達實爲政界出
色之員

民政部郎中記名參議陸宗輿浙江海甯州人日本大學政
治經濟科畢業生前充進士館計學館法律學堂經濟學教
習融貫中西盡心指授該員整頓稅務創辦巡警具有條理
尤長於財政統計之學其於銀行幣制研究有素現充東省
鹽務局差搏節用款增進歲收成效昭著於財政實有心得
持躬廉謹尤爲過人

翰林院庶吉士宋書升山東濰縣人經術湛深學問淹博生
平淡於仕進於天文輿地金石厯算之學靡不研究在籍辦
理學務課程謹嚴士林翕服該員於中學根柢最深志行芳

潔可爲儒林表率

外務部主事曹汝霖江蘇上海縣人日本大學法科畢業生
前充法律學堂提調學說純正士論翕然深明國際公法之
學前議中俄條約頗資得力於交涉各事亦均因應得宜該
員才具優長學識深遠洵屬外交之選

留吉補用知府戚朝卿貴州修文縣人歷任直隸各州縣盡
心撫字政聲益宏成安爲畿南著名苦缺該員在任九年惟
以興利除弊爲務口不言貧其心地樸誠才猷練達不愧循
良之選

內閣中書張國淦湖北蒲圻縣人志趣堅卓文義優長於國
朝掌故歷史源流研求有素志切用時無計功謀利之見現
派充黑龍江秘書官任事最勤能耐勞苦於邊務時政極意

考求不同流俗

翰林院檢討金邦平安徽黟縣人日本大學政科畢業生才敏心細長於外交前充北洋大臣文案日俄之役編訂中立條規預議中日條約頗資得力該員在天津創辦地方自治秩序井然漸有成效尤於憲政編制考求有素洵爲傑出之才

翰林院編修郭則澐福建侯官縣人係署禮部左侍郎郭曾斡之子秉承家訓學有本原該員性質英敏考求國朝掌故及經世之學會保薦經濟特科現派充奉天秘書官襄理文件敏速詳贍輕重協宜充以閱歷可期遠到

民政部參事記名參議章宗祥浙江烏程縣人日本法科大學畢業生前充大學堂仕學館進士館法律教習造詣精深

持論純正嗣經編訂商律更在法律館修訂新律昌明法學
編譯起草條理秩然該員識度宏深學有心得洵爲法律專
門

保升道員度支部員外郎李煜瀛直隸高陽縣人係已故協
辦大學士李鴻藻之子志趣堅卓苦心向學少年深穩能知
大體現在法國農學專科肄業該員力求實業獨見其大深
明根本至計不涉近日囂浮之習學成必可致用

現署吉林賓州廳同知金永浙江錢塘縣人才識閎通能任
艱鉅前署直隸定州知州正值庚子之變接待客軍安撫民
教懲治土匪地方卒賴以安其開辦邯鄲小學堂改良安平
監獄聲譽尤美現署吉林賓州廳同知緝捕勤能不遺餘力
擒獲積年巨匪多名才具卓犖實有徵驗

正書卷之五
吉江兩省各官廉費按照奉省減成給發摺

奏爲吉江兩省各官廉費擬援照奉天成案暫行減成給發恭摺
仰祈

聖鑒事竊臣世昌前於上年十二月十九日具奏酌定奉省官員
養廉公費數目繕單陳請一摺奉

硃批著照所請該部知道欽此伏查吉林黑龍江兩省已於上年
奏設司道各缺並簡員請署奉

旨允准在案所有巡撫司道各官養廉公費應自到任之日始比
照奉省成案起支其僉事以下各官有未備設者應照現設官數
支給惟兩省款項未裕擬暫比照奉省所定數目減成支發其應
減成數由臣等體察情形分別覈定咨部立案一俟財力稍充再
行一律辦理所有吉江兩省各官廉費按照奉天成案減成給發

緣由謹恭摺會陳伏乞

皇太后

皇上聖鑒飭部立案施行

昌圖等府廉俸由海龍府升科地糧開支片

再奉省各道府廳州縣教佐各官應支俸工經制等款均由邊內外地糧正耗及升科地糧內開支惟昌圖府並所屬一州三縣正佐教職各官應支俸工經制等款因地屬蒙旗並無地糧可徵均由奉省稅捐款內支給與各屬辦理兩歧殊非整齊畫一之道現值清釐款項統一財政之際未便仍沿舊章致涉牽混查海龍府屬升科地糧除留支各官廉俸等款外尙有餘款可撥擬請自光緒三十四年正月起將奉省昌圖府並所屬一州三縣正佐各官應支俸工役食祭祀養廉等項銀兩均改由海龍府屬升科地糧

內開支以歸一律而便奏銷又洮南府並所屬各縣俸工經制等款向由徵起大租中錢內留支惟每年所徵租錢不敷支放下短之款亦請在於海龍府屬升科地糧內撥補屆時歸案造銷以清案款除咨部查照外理合附片陳明伏乞

聖鑒飭部立案施行

奉省土捐估徵行銷兩項加倍徵收片

再查禁煙一事迭奉

詔旨切實遵行栽種鴉粟亦經定限逐年遞減奉省地方種煙之戶向來較多臣等迭飭各該有司實力查禁現在民間已知煙之爲害種者日見減少體察情形似尙無須十年卽可禁絕惟種煙之利較糧食奚止倍蓰誠恐僻地愚民仍多貪利私種不若嚴定章程加重稅則使其無利可圖根源自絕似亦以徵爲禁之一道

也查奉省土藥稅章向分畝捐估徵土捐三項畝捐係種土之地每畝徵銀二錢估徵係每地一畝預估出土一斤徵銀四錢以發給印花爲憑然每畝出土不止一斤土捐係於成土後行銷各屬未貼印花者亦每斤徵銀四錢原定稅章本較各省土藥爲輕現擬將估徵行銷兩項均加一倍改爲各徵銀八錢已收估徵貼有印花者不收行銷其畝捐仍照舊章徵銀二錢此指本省土藥在本省行銷者而言至外來洋藥及本省土藥行銷外省者應均仍照向章辦理目下鸞粟佈種在卽民間若知加稅無可圖利卽可改種田禾似於實行禁煙之道不無裨益除通飭各屬及各稅捐局遵照外理合附片陳明伏乞

聖鑒

郭爾羅斯後旗沿江荒務報竣摺

奏爲續放郭爾羅斯後旗沿江荒地收進銀兩數目並躋留商埠現已一律告竣恭摺仰祈

聖鑒事竊查郭爾羅斯後旗松花江北岸一帶地方與吉林僅隔一水且爲商船必由之路亟宜開拓商埠墾闢餘荒以保利權而固疆圉經臣德全於三十二年春與該旗札薩克反覆磋商始允照辦當經奏派前署呼蘭裁缺副都統副都統銜花翎協領都爾蘇前往該旗沿江地方躋勘衝要處所以爲將來開埠基礎并將餘荒一律堆放又附片奏明照向章除每晌應收押租銀二兩一錢外另加收銀三兩以一半分給該蒙以一半充作學堂經費等因在案維時該協領尙未回省而領戶遞呈請領者紛至沓來極形踴躍不逾月而收進銀二十餘萬兩及是年秋間協領都爾蘇交卸回省尙未到段又續收銀三十餘萬兩計先後共收押租經

費銀六十餘萬兩當飭帶同局員赴段勘丈旋據報稱沿江一帶如澇洲信宿岡子并肇州廳城南臨留基地三段均堪留備將來擇要開埠之用其沿江附近地方除上年奏報經肇州廳同知崇綬放給該旗蓮花泡老虎背等九井外餘皆蕞頭沙窪實無餘荒可放遂商諸蒙員於該段迤北鐵道迤西光緒三十一年前主事慶山所放荒界毘連處踣出數十井掣簽出放眾領戶以并非沿江紛紛藉口呈懇退價節經反復開導許以段內所有城甸必於勘丈小界時分別辦理既經加價放荒自應曲體民情尤須無礙蒙屯生計總以蒙民兩得其平爲宗旨正核辦間適有人奏參都爾蘇放荒有漁利營私情弊奉

旨飭查經委員查明先行覆奏并陳明實不願領之戶業經發還荒價二十餘萬兩等語一面派委甘井子荒務行局總理花翎補

用知府何棫樸前往郭旗接辦并飭詳查沿江一帶是否有地可撥並將該協領前次踣留商準基址內應擇要劃留處所稟明核辦去後茲據報稱緊逼沿江一帶除蒙旗前領蓮花泡等處九井其餘皆係沙窪不可墾之地而眾領戶不知蒙旗領在前堅以沿江爲請不欲承領北段該總理復於蒙旗村屯附近周厯踣勘而眾台吉懇留生計情詞懇切未便強以所難經該總理一面商之領戶一面開導蒙員曉以大義無論如何爲難總宜另踣若干俾資分配磋商數月始據該旗派辦荒務之協理台吉丹畢札拉森商允眾蒙情願將前次價領沿江之蓮花泡老虎背等處九井退出俾資搭放復於該旗札薩克府附近三道岡子一帶及西段河神口子等處另撥九井以抵補蒙旗原領之數俾期平允彼時民間尙復觀望嗣據該蒙自願另行價領荒地兩萬九千餘晌卽

於應劈荒價內扣算以爲倡導現在均已商妥劃定加以民戶又復續領統計前後共放毛荒十三萬零一百七十九晌零一分零八毫扣七成地九萬一千一百二十五晌三畝零七釐五毫六絲每晌按二兩一錢共計收進押租銀十九萬一千三百六十三兩一錢四分五釐八毫七絲六忽又按每晌加收三兩共計收進銀二十七萬三千三百七十五兩九錢二分二釐六毫八絲二共銀四十六萬四千七百三十九兩零六分八釐五毫五絲六忽內除應劈給該蒙旗一半押租並加收銀亦照原奏劈分一半外淨贖公家應得一半押租暨加收銀共二十三萬二千三百六十九兩五錢三分四釐二毫七絲八忽又隨征一五經費銀六萬九千七百一十兩零八錢六分零二毫八絲三忽四微又由蒙旗應劈押租數內照章提取經費銀一萬一千零六十五兩二錢一分五釐

西書名一三
九毫一絲八忽統計公家收進押租經費等項銀三十一萬三千一百四十五兩六錢一分零四毫七絲九忽四微所放荒地應請自光緒三十四年起限至三十九年升科再上年放荒堆記現值雪融間有界限不明之處並請暫留原勘委員一起重驗堆界以免轉轄其前留三處商埠基址惟信宿岡子一處水陸交衝且東距新設之肇州廳東南距哈爾濱均可聯爲一氣堪以劃留餘均一律出放等情呈請奏報前來臣等覆核無異惟查該旗原領之蓮花泡等處九井前經奏報於三十三年起限至三十八年升科現在未經開墾又復改撥民戶自應與新撥蒙旗之三道岡子等處九井一律改自三十四年起限至三十九年升科以昭核實而示體恤除俟造具毘連冊籍暨收押租經費等項細冊再行咨部查核外所有續放郭爾羅斯後旗沿江餘荒井踣留商埠現已一

律告竣緣由理合繪具圖說恭呈

御覽再上年四月間臣德全查復協領都爾蘇參案摺內曾聲明俟勘明沿江餘荒多寡及撥給北荒肥瘠再行分別核辦如果營私漁利亦斷不曲爲徇庇等語現在屢經何械樸查明報稱沿江一帶實無餘荒可撥且該蒙已領之荒皆已退出搭放足見並無私結蒙旗劃留腴荒情事應請免其置議合併陳明伏乞

皇太后

皇上聖鑒

聲明郭旗荒務加價用款片

再此次勘放郭旗沿江荒地前經臣德全於光緒三十二年三月間奏明每晌加收經費銀三兩以一兩五錢分給蒙旗以一兩五錢專充學堂經費並聲明於訥謨爾河北岸劃留學田十萬晌卽

以此項經費銀兩購買開地機器派員督飭開墾招戶食租等因
陳明在案現在該段荒地業經放竣計共收此項經費銀二十七
萬三千三百七十五兩零除劈給蒙旗外下餘學堂經費銀十三
萬六千六百八十七兩零應卽遵照前奏留爲開墾學田之用惟
查訥謨爾河北段原擬撥留十萬晌嗣據該局總理福齡報稱除
將界內之沙石城窪勢難開墾各地扣出不計外僅劃留四萬三
千六百餘晌又上年曾在甘井子段躡留兩萬餘晌目前本省方
議推廣民治將來學田尙須廣爲劃留擬於他處放荒隨時再行
添撥以惠學子而宏教育至此次加收學堂經費銀兩卽責成提
學使張建勳派員先在甘訥兩段現留學田招戶墾闢樽節動支
務期款不虛糜地皆成熟庶於興學勸農交有裨益除咨部外謹
附片具陳伏乞

聖鑒

擬辦瓊瑋墾務大概情形摺

奏爲擬辦瓊瑋墾務大概情形恭摺仰祈

聖鑒事竊維庚子之變江省被難各地方以瓊瑋爲最甚所有江左各屯悉被俄人占據至今尙未交還招撫數年人民始漸復業其強有力者每戶占據地畝多或至三四百晌不等後歸之戶過返故廬往往不能得尺寸之地以自食而江左各屯先後歸業者亦均屬江右未能卽歸故土臣等撫念民依殊深焦慮現據該署副都統姚福升擬將江右各戶現在占管熟地統按各屯人數另爲區畫擬每人撥地二晌填給大照作爲永業以免輾轉此外生荒則參照本省奏定旗丁生計成案辦理並將江左各屯舊戶復業者暫在江右附近地方仍照此次定章分別劃撥以期安集其

沿江上下游餘荒則就近派員一律定價出放以免荒蕪等情擬具細章咨請核辦前來臣等詳加覆核尙屬妥協除將所擬章程咨部查照外所有辦理墾墾務大概情形理合恭摺具陳伏乞皇太后

皇上聖鑒

郭爾羅斯後旗鐵路兩旁荒務清釐報竣請獎摺

奏爲郭爾羅斯後旗鐵路兩旁荒務現已清釐竣事謹分別先後放荒銀地各數並隨案擇尤請獎恭摺仰祈

聖鑒事竊查郭爾羅斯後旗鐵路兩旁荒務前因鐵路交涉局總理直隸委川道周冕辦理軫轍其地數銀數迄未具報經臣德全於上年二月撤委接辦鐵路交涉事宜候補道宋小濂就近清理並派花翎分省補用同知直隸州知州張樾爲該行局提調赴段

辦理一切均經先後奏咨在案該行局正赴段清理間適據周冕報稱先後共放毛荒二十九萬五千一百三十七晌七畝三分四釐六毫每一千六百二十晌扣除公田地二十晌計地共三千六百四十三晌六畝七分六釐實收過荒價經費銀四十一萬八千九百二十七兩零四分五釐又收過二成荒價銀二萬一千八百二十七兩八錢四分四釐尙未撥地等情臣等當以該道辦理此荒與本省章程不符且款目多未分清礙難稽核乃飭該行局將周冕所報放出地數收進銀數確切查明並將原留公田一並出放其已經收過二成荒價者統按已收銀數分撥地畝並將所有該段荒地統照每晌二兩一錢及每兩外加一五經費奏定章程重行清理通按三七折扣其城荒較多地方並准照章分別量予酌扣以昭公允去後茲據該提調呈稱傳據各領戶所持條付詳

加查核周冕實收過押租經費銀四十四萬七千三百五十二兩
一錢零六釐六毫二絲六忽四微內有六千五百九十七兩二錢
一分七釐六毫三絲四忽六微八纖係屬該道漏報現將原留公
田一併收價作爲民業各民戶原指城荒按照定章量加折扣統
計前後實放出毛荒二十九萬零零五畝二分八釐八毫
五絲扣七成地二十萬零三千零四畝零一分零一毫九絲五
忽每畝押租按二兩一錢計應收進銀四十二萬六千三百零八
兩四錢二分一釐四毫零九忽五微內除周冕收過銀三十九萬
一千八百四十八兩九錢四分一釐九毫三絲六忽此次應收銀
三萬四千四百五十九兩四錢七分九釐四毫七絲三忽五微除
各領戶欠交銀一千七百三十二兩零九分六釐一毫七絲外實
收進銀三萬二千七百二十七兩三錢八分三釐三毫零三忽五

微又應收一五經費銀六萬三千九百四十六兩二錢六分三釐二毫一絲一忽四微二纖五沙內除周冕收過銀五萬五千五百零三兩一錢六分四釐六毫九絲零四微此次應收銀八千四百四十三兩零零九分八釐五毫二絲一忽零二纖五沙除各領戶欠交銀二百五十九兩八錢一分四釐四毫二絲五忽五微外實收進銀八千一百八十三兩二錢八分四釐零九絲五忽五微二纖五沙統計前後共實收過押租經費銀四十八萬八千二百六十二兩七錢七分四釐零二絲五忽四微二纖五沙現在清釐業經竣事所有先後放出荒地應請自三十四年起限至三十九年升科其領戶欠交銀兩應請轉飭就近地方官催收等情呈請奏報前來臣等查該段荒地前因周冕辦理情形未能劃一其收進押租或溢於章程之外所撥地數或不及原交之額頭緒紛繁誠

難措手現據該員等遵照定章酌中劃撥辦理尙屬得宜葢功尤爲迅速自應擇尤酌獎以資鼓勵所有尤爲出力之分省補用同知直隸州知州張懋擬請俟補缺後以知府用委用筆帖式成玉擬請以驍騎校補用合無仰懇

天恩俯准照擬給獎以策將來之處出自

逾格鴻慈除飭取各員履歷並毘連細冊暨該局開支各冊並繪具圖說咨部查核以及道員周冕經手用過各項銀兩另片奏請核銷其未收荒價飭由就近地方官催收外所有郭爾羅斯後旗鐵路兩旁荒務清釐竣事並先後放荒銀地各數暨隨案請獎各緣由理合恭摺具陳伏乞

皇太后

皇上聖鑒訓示

撥給郭旗沿江荒務公費片

再各蒙旗辦理荒務經費尙多由台吉眾丁等按戶分籌惟近日蒙情愈益艱苦昔年

盛京將軍增祺曾於變通札薩克圖荒務案內奏請於國家應得正款內提出銀一萬五千兩作爲該旗協理印務等辦公之用奉旨允准在案現在郭旗沿江荒務業經報竣其辦理棘手情形業經臣等於本月十二日另摺陳明蓋該處荒務爲日過久用費滋多且查該旗地上年亢旱異常其困苦情形尤屬可憫現已援照奉天成案飭由一五經費項下提銀四千兩發給該蒙俾示體恤合無仰懇

天恩俯賜照准以示

朝廷嘉惠蒙旗之至意除咨部外理合附片具陳伏乞

聖鑒

旗奉吉江學堂領地請免繳價片

再前據直隸布政使增韞函稱現與東三省官紳議在直隸建設旗奉吉江學堂擬派員前赴江省領荒開墾收租備作學堂經費並墾奏明免收荒價等情旋據派來領地委員候補府經歷楊澐生稟稱勘得西布特哈屬界根立河左右土脈膏腴願就承領荒地一萬晌作爲學田惟該處放荒章程向以二成押租撥給該旗生息作爲辦理新政之需自應仍查前放地價按二成照章繳納此外應交八成押租可否奏准免繳等語稟請核辦前來臣等查該布政使等創設旗奉吉江學堂原爲培養八旗三省人材起見所有在江認領學田一萬晌應交八成荒價似可免其繳納以宏朝廷興學育才之至意合無仰懇

天恩俯賜照准以廣教育而培邊才出自
鴻施除咨部查照外謹附片具奏伏乞

聖鑒訓示

黑龍江吉拉林設治片

再呼倫貝爾所屬吉拉林一帶地處邊遠逼近強鄰該處金鑛前
爲俄人占踞經臣德全委派千總龔泰山前往收回藉杜外人覬
覷現在彼處墾務木植等事均關緊要亟宜派員設治逐漸經營
以捍邊圉而固利權業經臣等於上年十一月間札委同知用候
補知縣卞調元帶同員司前往試辦一切設治事宜並接辦金鑛
等事其設治經費參照各處廳治章程每月支銀七百七十六兩
捕盜營餉津等項仍照設治章程發給以資彈壓迭經先後飭遵
各在案至通省沿邊各地方設官事宜容臣等體察情形再行通

籌奏明辦理除咨部查照外謹附片具陳伏乞

聖鑒

設立奉天法政學堂摺

奏爲遵

旨設立奉天法政學堂並實行考驗辦法以育人才而飭吏治恭摺仰祈

聖鑒事竊臣等前准憲政編查館咨會同吏部奏准考驗外官章程六條頒行各省限期設立法政學堂將各項官吏切實考驗等因咨行到奉竊維古者因事設官量能授職故長民者有績可考而入政者所學必優方今

朝廷預備立憲百務更新奉天逼處強鄰正值改設行省之始所有行政官吏自應竭力養成多方勸勉使之研究法治之原理以

爲推行新政之預備查奉省舊有法政學堂一區係於光緒三十一年就本省仕學館擴充更改錄取士紳入堂肄業所需經費由徵收稅捐項下動撥作正開銷經前任將軍趙爾巽奏明在案續將旗員仕學館歸併辦理綜共官費自費生四百名額計分五班其甲乙兩班五月內即可考試卒業現在遵照館章改定辦法訂立章程卽定名爲奉天法政學堂委奉天右參贊兼署左參贊錢能訓爲該堂正監督用資督率凡月選分發到省及原有候補人員自道府以下一律考試一次其應入學者概令入堂肄業惟奉天初改行省分發到省人員尙少向章准予投効沿襲旣久楚材晉用借助頗多以後此項投効人員亦應加以考試與到省人員一同入學俾宏造就以上各項入堂肄業人員稱爲學員不設定額其原有在堂肄業之士紳仍附入堂內稱爲學生官費生額定

二百名自費生不定額所授課程均以中外法律政治經濟之切於實用必需通曉者爲主藉儲辦理新政人材及添設各屬佐官鄉官之選分爲專科講習科兩科專科兩年卒業講習科一年卒業學員學生不必各自爲班第因其程度之淺深分科施教惟卒業時學員則照此次定章分別委用降黜學生則參酌從前各省法政學堂卒業給獎成案咨商學部辦理所需開辦暨常年經費仍由本省徵收稅捐項下動撥作正開銷如此辦理雖係以因爲創實兼顧並全一面並遵行考驗甄別本省官吏詳細辦法有缺人員自司道以至各府廳州縣正佐各官有差人員自省內外各局所以至各府廳州縣所差委者均按照定章切實考驗每三月彙覈一次俟年終彙齊開列事實分別等差咨部覈辦量加黜陟務期百爾成就陶成吏治日臻上理以仰副

朝廷興學培材綜覈名實之至意除將詳細辦法章程咨送憲政編查館暨吏學二部查照外所有遵辦奉天法政學堂並實行考驗本省官吏緣由理合恭摺具奏伏乞

皇太后

皇上聖鑒訓示

退耕堂政書卷十五

退耕堂政書卷十六目錄

奏議十六

奉省添設州判要缺並酌移州縣治所摺

吉省交代例限擬請分別變通辦理摺

三姓購買貂皮價值請銷片

會查營商倒欠各款擬定抵押分攤辦法摺

考查蒙務情形擬派大員督辦摺

擬設東三省憲兵學堂摺

測繪學堂擬照前定章程試辦片

設立吉江兩省電綫及推廣電話情形摺

吉省湯原大通兩縣江北地方擬改歸江省管轄摺

奉省設立農事演說會暨植物研究所摺

設立東三省講武堂摺

江省添設道府廳縣摺

附單

吉江兩省新收關稅儘數截留摺

奉省設立官牧場摺

奉省設立工藝傳習所暨造磚廠官紙局摺

續放洮兒河北蒙荒請歸入圖什業圖荒局丈放摺

請飭催各省關應解奉天戊申年的餉並歷年欠餉摺

設立東三省支應處摺

退耕堂政書卷十六

天津徐世昌

奏議十六

奉省添設州判要缺並酌移州縣治所摺

奏爲擬請添設州判要缺並酌移州縣治所以重交涉而裨地方
恭摺仰祈

聖鑒事竊查奉天復州地方西南兩面距海海中各島已爲外人
侵略殆盡惟距該州一百四十里之長興島巍然獨存該島四面
臨海東西約七十里南北約四十里住戶逾二千男女丁口逾一
萬五千雖地方稍薄物植不豐而鹽產森林漁業尙可自給地方
官向不過問視同甌脫何以圖存且從前遠近各島多係島民與
鄉約勾串貪得多金遂令外人乘隙占據今該島孤懸海外亟應

設官鎮撫冀免覬覦擬請添設州判一員卽在該島設治並將附近花椒島所屬興社一社之地劃歸管轄以一事權名曰長興州判卽由臣等慎選堪勝人員前往辦理至復州城治僻在西隅控制諸多不便查瓦房店地方近臨車站商賈駢至交涉日繁實爲復州全境之中權擬請將該州移駐瓦房店俾資策應而免貽誤應行建築衙署及移治各費用卽由臣等督飭覈實勘估撙節動用並准作正開銷又距奉省九十里之撫順地方日人敷設輕便鐵道商旅增益千金寨煤鑛利源日擴日人旅行僦居實繁有徒該處旣無民官愚民無知時滋事端亟應移治鎮撫以資約束而便交涉查奉省原設承德興仁兩縣同城設治殊近複贅擬請將興仁縣移駐撫順必與該地方有所裨益並擬改爲撫順縣知縣以符名實其建署一切費用亦由臣等督飭實估造銷惟該縣旣

經移駐撫順從前兩縣所定界址微有區分應另行勘明咨部立案至撫順原設之路記防禦防禦分員等缺本司催徵租賦緝捕盜賊之事今既移駐民官自應一併裁撤統歸地方官辦理以專責成所裁各缺仍准以對品相當之缺酌量補用合併陳明所有擬請添設州判要缺並酌移州縣治所以重交涉而裨地方緣由謹恭摺具陳伏乞

皇太后

皇上聖鑒訓示

吉省交代例限擬請分別變通辦理摺

奏爲吉省交代例限擬請分別新案舊案酌量變通辦理以期覈實恭摺仰祈

聖鑒事竊查吉省府廳州縣向辦交代祇扣正限兩月其二參限

期以及經管庫項倉儲多不照例扣展是以現任交卸各員幾忘其考成攸關結報每多逾限臣等自上年到任後屢經嚴檄督催勒限清結嗣因更定官制將原設經管交代之戶司吉林道先後裁撤添設度支司一缺綜理通省財政當經飭令該司接管交代卷冊逐件清理悉心稽核去後茲據試署度支使司度支使陳玉麟詳稱查定例各省州縣交代限兩箇月爲初參查明新舊官何任逾限罰俸一年二參仍予限兩箇月再逾卽行革職各等因查吉省歷辦交案素未能查照直省章程辦理代理人員無論爲日久暫亦不接算交代現旣改設行省自宜遵例奉行俾歸劃一第原管交代之戶司吉林道兩缺均經裁併而度支司係新設衙門一切勾稽款目調取卷宗頭緒紛繁未免輾轉需時又各屬造送冊籍類多不諳例章牽混舛錯遠道駁查動逾千里以外尤稽時

日緩之則漫無限制迫之則勢處爲難再三察核擬請量子變通將各屬交代凡在光緒三十三年以前者作爲舊案免予扣限由司勒令趕緊算清詳請咨結自三十四年正月初一日起作爲新案遵照定例初二參限一律核扣其代理之員如時至三箇月者亦令依限核算倘再遲逾定卽照例參處不稍寬貸至由司加結轉詳督撫出咨仍照部章扣限三箇月以重庫儲再府廳州縣遞送程途經前將軍咨部核准有案現仍准其按日扣除其新設各缺並由司按照程途擬定期限另案核咨等情詳請奏咨前來臣等查交代一事爲牧令最重考成催科之勤惰操守之貪廉均於是驗之吉省交代向未按照內地辦法以致軼轉遷延動逾例限現旣改設行省增添州縣斷難再聽其積習相沿任意懸宕該司爲通省財政總匯之區交代乃其專責刻當設官伊始所稱案牘

糾紛駁查需時尙屬目前實在情形詳擬各節均係爲整頓交案起見自應將各屬交代區分爲新舊兩案認真清釐其歸入新案者在此次申明定章以後扣限起參概不准絲毫展緩該管上司如仍有督催不力情事一併查照部章聲請議處至三十三年以前舊案旣經劃清界限應卽由該司加緊清算逐案結報查有虧挪人員卽行專案參辦以警疲延庶於窮變通久之中仍寓綜核名實之意除咨部查照外所有交代例限擬請分別新舊案酌量變通辦理緣由是否有當理合恭摺具陳伏乞

皇太后

皇上聖鑒敕部立案施行

三姓購買貂皮價值請銷片

再准署理三姓副都統德勝咨稱應進光緒三十三年分貢皮於

上年冬間派員分往產貂各山口守候購求並分向各皮行採買去後旋於本年二月間據稱自鐵路開辦以來山林屢經砍伐樹株頓稀產貂漸少更兼俄商不惜重價爭購以致皮價異常昂貴茲揀其毛色堪用者共購得一千四百六十張均勻牽算每張計需價銀十七兩七錢六分共銀二萬五千九百二十九兩六錢除前領到三十三年分貂皮價銀二萬五千兩零七兩七錢儘數開付外尙不敷銀九百二十一兩九錢當由購辦三十二年分貂皮贖存舊管銀內提用開付並趕覓良匠將皮張修整如法以備派員呈進惟此項貢皮每年所出多少價值有無增減均難豫料案查光緒二十九年分貢皮每張計需銀十九兩五錢曾經奏准照數開銷在案本屆所購貂皮每張計實需銀十七兩七錢六分較之前屆尙覺節省擬請照數准銷並請嗣後按年採買均准照隨

時市價俾免賠累等情咨請核奏前來臣等查吉省三姓地方爲向來產皮之區自鐵路大通取資林木參天窩集半付斧斤蹏迹失所憑依孳息因以頓減又俄商喜購紫貂不惜巨金商賈趨利性成市價頓昂較之往年實已增至倍蓰該副都統所陳各節共聞共見委係實在情形如仍照舊例開銷深恐市價懸殊艱於採買勢將有誤

上供且亦非實事求是之義至本屆請銷皮價較之二十九年分實已核減理合據情仰懇

天恩准如所請

敕部立案嗣後採買貂皮均准照市價並將本屆不敷銀兩一併准其照數核銷出自

鴻慈逾格除咨覆該副都統派員呈進外謹附片具陳伏乞

聖鑒

會查營商倒欠各款擬定抵押分攤辦法摺

奏爲查明營商倒閉虧欠各款擬定抵押分攤辦法恭摺奏

聞仰祈

聖鑒事竊照上年十月營口巨商東盛和等五號同時歇業虧累
巨萬羣情驚擾牽動全埠臣等得信後隨即飛飭署奉錦山海關
道沈桐督同商會調查帳款設法挽救以安市廩而維大局前於
查明沈桐原參各節覆奏摺內聲明俟籌定辦法再行具奏茲據
該署道先後稟稱督同商會總協理暨債務董事查明葉商所欠
華洋各銀行及各幫埠商款項共銀四百二十萬零四千餘兩俄
國羗帖一百二萬餘元日本鈔票二萬二千餘圓此項欠款之中
以道勝銀行押款一百一十七萬盧布一項爲數最鉅且係以產

抵押則欲清理債務當以議價取贖爲入手要義經與俄領事迭次磋商復帶同商會協理親赴天津道勝銀行面議舌敝唇焦始得以八十五萬盧布定議各幫債戶亦均全體認可嗣因交銀期迫商准戶部銀行墊款清交業於三月十三日產款兩項彼此交收葉商已抵押之產業悉經贖回其未經抵押之產業貨物及他人所欠葉商之款共估值銀二百六十萬兩復經公議先行抵借官款一百五十萬兩攤還各幫欠款所有葉商財產貨物統歸戶部銀行承受任憑變賣盈絀各商不問葉商所欠戶部銀行之款亦於公攤債款內照應攤之數收回惟出入之數兩兩比較不敷尙鉅查人欠葉商之款除人逃鋪閉無可追繳者不計外其有著各帳尙有四十餘萬兩俟追收到後先儘戶部銀行提銀二十萬兩以爲彌補餘仍歸各債戶勻攤其奉天前借銅圓值銀二十五

萬兩亦由戶部銀行承借分期歸還至上海錢業等莊被東盛和聯號廣德泰倒欠二十六萬兩前據稟請併入營債均攤應由營商集眾公議按照本埠債戶所得攤還之數酌減歸償稍示區別正金英德各行商亦有帶欠仍由各商妥議分別清償似此設法轉移各債戶約得三四成現款貿易可以流通戶部銀行雖出二百萬鉅貲歸墊仍有著落而洋商交涉之案華商互欠之帳可以掃除清釐等情前來臣等查東盛和倒閉之日眾商恐懼皆有保全成本之意紛紛提取存款銀根愈緊無可通融幾有停市之慮迭經臣等飭令該署道督同商會向各幫人等開誠布公一再籌議以葉商財產貨物暫時抵借官款清釐債務藉資周轉以爲維持市面之計人心始定照常貿易故時屆歲暮不聞續有報閉情事第產少債多不能不分成攤還該署道等所擬辦法似尙公允

籌墊悉有抵款債商咸無異言下以平市面之驚危上以慰宸衷之厯系除分行外所有查明營商倒閉虧欠各款擬定抵押分攤辦法緣由謹恭摺具陳伏乞

皇太后

皇上聖鑒訓示再此摺係由臣世昌主稿會同臣士驤辦理合併聲明

考查蒙務情形擬派大員督辦摺

奏爲考查蒙務情形並擬派大員督辦以鞏邊疆而固藩服恭摺仰祈

聖鑒事竊臣等前以東三省蒙務關繫緊要非詳細調查通盤籌畫派員專辦不足以通情僞而遏亂源當經歷將情形辦法擇要臚陳奉

上諭著廷杰誠勳按照所陳分別派員查勘仍著徐世昌咨商該都統等妥籌興辦原摺著鈔給廷杰誠勳閱看將此各諭令知之欽此查錫林郭勒昭烏達二盟旗分隸於察哈爾熱河已由該都統等酌度情形奏明辦理今就東三省所轄哲里木四部蒙旗詳細考查次第規畫誠以事機繁曠必當握要以圖責任鉅艱尤在擇人而理溯自東省開辦蒙荒以來科爾沁左翼前後二旗及中旗之東南逼近邊牆早經開闢人民風土漸就庶饒其設治者爲奉屬之昌圖遼源法庫康平奉化懷德等處至郭爾羅斯前旗東半部則爲吉省之長春農安長嶺等處所轄地人民繁聚地利漸興惟科爾沁右翼前後二旗雖已設有洮南靖安安廣開通等府縣而已放之荒率多未墾若科爾沁右翼中旗開局放荒招徠絕少他如江省之安達則爲杜爾伯特旗地大賚廳則爲札賚特旗

地肇州廳則爲郭爾羅斯後旗地大都距鐵路較近者設治墾荒略可漸期繁盛其餘則無官無民彌望平原委同草莽惟科爾沁左翼中旗轄境旣廣地亦膏腴實因彩和新甸荒地一段興訟多年任其蕪廢僅東南百數十里劃入遼源奉化境內者稍稍開放此外數百里荒漠無垠梗塞中部盜匪出沒商旅不前橫覽四部形勢之區思所以入手經營之處竊以整理蒙務必當聯絡其心志區分其疆理興工業以資生聚利運輸以通有無非如當日之僅收荒價也且以蒙性顛愚易受要挾近復聚會練兵互相勾結包庇蒙匪擅給軍儲又其甚者私借外債以土地物產作抵其對於我之官吏開土地則疑爲奪利理訴訟則不肯輸誠攜貳之乘匪伊朝夕若不及時布置陰與維持廣爲勸導不獨爲三省腹心之患且將爲外人利用之資臣等屢飭調查粗知概要必先據全

蒙要塞之地乃可立施行次第之基竊維洮南一府地勢高曠索岳爾濟山在其東北既可恃爲農林之資洮河一流貫注於松花江又有舟楫之利那金河都爾吉則產金沙野馬圖山則有煤鑛固哲里木北部之隩區也擬就其地設法經營逐漸展拓則北可趨齊齊哈爾以入江省東可由伯都訥以通吉林南可經遼源法庫而赴瀋陽西可取徑索岳爾濟山以越烏珠穆沁而達庫倫迤南渡潢河而西則可循建昌平泉舊道以至畿輔殆所謂適中之地而四達之衢也惟茲事重大頭緒繁多固東省之藩籬立蒙藩之根本自難視爲緩圖臣世昌總制三邊勢難遍歷非有才識明敏實心任事之大員得以代臣等宣布

朝廷恩威以實行其政策者未易膺茲重任查有開缺民政部外城巡警總廳廳丞朱啟鈐器識宏通心精力果開辦京師巡警成

效昭著前經臣等奏調來東委以考查各事盡心計畫動中肯綮臣等再四籌商意見相同擬派該員爲三省蒙務局督辦以資控馭如蒙

俞允臣等卽檄飭遵照辦理並刊刻木質關防俾資鈐用至該局甫經開辦責任頗重擬先以交通爲入手辦法查理藩部舊例各蒙地本設有台站並歲用定額今則台站漸就廢弛傳遞文件延緩逾時且形勢變遷須酌易路線以利運輸現擬分途設備次第推廣凡道理之區劃驛站之分設弁兵之支配皆由該督辦通盤籌畫稟由臣等酌核以次舉行惟地勢荒遠費用浩繁旣爲殖民固圉之謀卽須合全國之力以相貫注我

朝康熙乾隆時經營蒙古招撫賑卹動逾百萬日本之經營北海道也亦擲無限貲財良以開拓邊荒無惜鉅費但際此庫儲支絀

東省財力亦有未充臣等惟有悉心計畫勉力籌付冀得次第開
通期收實效所有支用各款再行隨時報部至該督辦遠駐蒙荒
一切事宜均由臣等飭遵其於各蒙王旗應如何文牘往還以資
接洽之處容俟審定行文公式由臣等札飭各蒙旗遵照辦理所
有考查蒙務情形並擬派大員督辦緣由謹合詞恭摺具陳伏乞
皇太后

皇上聖鑒訓示

擬設東三省憲兵學堂摺

奏爲擬設東三省憲兵學堂謹開具試辦章程恭摺仰祈

聖鑒事竊查臣等前於上年籌辦東三省督練處摺內聲明憲兵
學堂亦正籌辦等因在案誠以練兵之道固貴乎紀律之嚴明紀
律所存尤貴有隨時之糾察蓋無紀律則威令無自而伸無糾察

則紀律亦有時而墜此東西各國軍事警察之制所由設也中國新練軍隊教育既未嘗普及程度卽不免參差使無法律以相維持誠恐私怨睚眦不免血氣匹夫之勇而軍人之資格又非尋常警察所能干涉現在日俄兵隊之在我境內者均設有憲兵以爲糾察軍人實行保護之計而我尙無此項預備遇事無所遵循於軍事尤多缺陷臣等再四籌維自應設立憲兵主掌軍事警察凡關涉軍紀風紀職務服行隨事隨時皆得任其檢閱庶可以肅觀瞻而嚴節制惟是此項兵弁斷非僅諳操練未嘗學問之士所能自非籌立學堂不足以資造就臣等因於奉省舊有之練兵公所房屋修葺改設並遴選監督教習執事等員由調東第三鎮第一第二兩混成協暨奉天新編步隊一標附礮隊一營吉林原有步隊一協各營內挑選下級官長及優等目兵分爲正副兩課正課

定額二十名以下級官長充之名爲學員副課定額二百名以優等目兵充之名曰學兵各帶原薪原餉入堂肄業學期暫定一年畢業惟奉省現在百物昂貴日用維艱擬將學員月加津貼銀一兩五錢學兵月加津貼銀各一兩以示體卹而資鼓勵計開辦經費由臣等飭奉天度支司於京部協濟鎊餘項下共動用過實銀一萬七千六百三十一兩八錢應請作正開銷其額支活支常年經費約需銀三萬四千一百八十三兩擬由東三省鹽斤項下開支每屆年終奏報一次以昭核實據兵備處詳請奏咨前來臣等覆核無異除將開辦經費飭東三省陸軍糧餉局詳細造冊咨部核銷外所有擬設東三省憲兵學堂緣由謹合詞繕單恭摺具陳伏乞

皇太后

皇上聖鑒

測繪學堂擬照前定章程試辦片

再去年臣等奏設東三省督練處摺內曾經聲明開辦測繪學堂仰蒙

俞允在案時值部章尙未頒發東省亟需測繪人材特在奉天省城東門外購地建築學堂一所就調東陸軍各鎮協中選擇會充學兵者調入堂內授以測繪課程規模諸多草創迨陸軍部奏定章程咨行到奉自應遵照辦理惟查部定原章該堂學生須選收二十歲以下本省及駐防子弟定期三年畢業而東省現有學生既由學兵選取年齒勢難盡符且爲速成待用起見所定學期僅一年半亦與部章不合今若遽行更改既恐前功盡棄抑且收效需時東省地接強鄰幅員遼廓所有軍隊調遣界務糾紛設治畫

疆移民屯墾欲知山川險阻之要人民風土之宜自非明晰輿圖無從措手故需用測繪學生之處實較內地各省爲殷擬仍按照前定試辦章程俟此班學生畢業之後再行遵照部章辦理以資驅策而期統一至該堂開辦經費已飭由部撥協濟銜餘項下動用應准作正開銷常年經費擬由東三省鹽務稅捐項下騰挪指撥亦應實用實銷按期具報其吉林原有測繪學堂本定學生四十名人數既少程度不齊亦擬俟此班畢業後酌量歸併除將前定試辦章程咨部備查外謹附片具陳伏乞

聖鑒

設立吉江兩省電綫及推廣電話情形摺

奏爲設立吉江兩省電綫並籌修腹地綫路及推廣電話情形恭摺仰祈

聖鑒事竊維東三省電報自日俄戰後桿綫蕩然前年經督辦電政大臣升任直隸督臣袁世凱委派黃道開文來東籌議收設事宜始則格於日本軍隊之阻撓繼則限於商局撥款之棘手籌辦經年除將奉直之綫接通外其奉天至長春一路則全沿鐵道新設以與長春至吉林原桿綫相接然後奉吉之報始通鐵路界外俄軍電綫上年雖經購回然各路不相聯綴桿木亦半多殘毀臣等到任後以政治交涉日見繁多而邊防尤爲緊要延吉事起正值三省電務改歸官辦之際因電商郵傳部仍派黃道趕設吉林至延吉廳並黑龍江省兩路電綫不獨消息靈捷免誤事機且與購回之俄綫消息相通不致成爲廢棄所需款項由臣世昌電商吉江兩省撫臣籌撥應用彼時業經電明郵傳部在案現查吉林東路經甯古塔琿春以達延吉廳計綫路一千五百三十餘

里北路則由吉林所管之秀水甸地方接綫至榆樹縣經雙城廳阿什河以達哈爾濱計綫路三百八十餘里所用桿木電綫鈎碗及運腳工貲各費共估銀約在十九萬餘兩其由哈爾濱展修經呼蘭綏化兩府海倫廳以至齊齊哈爾路綫約八百餘里所用桿木電綫鈎碗及運腳工貲各費估銀約在十萬兩左右此次估價較之各省設綫之數雖未免稍多實緣年來百物昂貴車價工貲均非內地可比用款已飭其極力撙節而估算亦須從實統籌應俟該道造冊呈送由臣等核明再行另案奏咨報銷此擬籌辦三省要路電綫之情形也惟是此段綫路大半沿日俄鐵道而行所經各處亦多通商之埠而腹地則仍屬闕如三省地方旣經改爲行省匪獨外交之事日增卽增設民官籌辦防務暨勦辦鬍匪等事悉藉電信以收迅速之效况三省之大僅恃此一綫而不另備

他路以防維之倘其中一處有阻則全路不通機變之乘有非須
與可緩者是擴充三省電綫亦望治之一端而不可不亟爲籌辦
者也臣等公同商酌擬擇緊要地方先行推廣從新民府起經法
庫門遼源州洮南府以達齊齊哈爾共計約一千四百餘里估算
電桿電料及運費工費等項需銀約十四萬兩仍飭黃道派員履
勘道路籌備材料以便開工將來據實奏咨報銷此路告成不獨
與現有之路綫相輔而行可備緩急之用而遼源洮南一帶之距
省較遠者亦可免機務遲滯之虞此擬擴充三省腹地綫路之情
形也至電話一項亦交通利便之一三十二年經前任將軍臣趙
爾巽檄飭電報局在奉省城廂代爲辦理由官籌款支用惟當時
限於試辦僅就各官署局所安設未能推及於商家現在各商號
之請安設者頗不乏人祇以未及擴充不克應其所請遂有向日

本電話局租用者利權不免外溢應卽仿照京津電話章程徐圖推展以杜漏卮而慰商望所有設立吉江兩省電綫並籌修腹地綫路情形及推廣電話各緣由謹恭摺具陳伏乞

皇太后

皇上聖鑒飭部立案施行

吉省湯原大通兩縣江北地方擬改歸江省管轄摺

奏爲吉省湯原大通兩縣所屬江北地方擬改歸江省管轄以正經界而便統屬恭摺會陳仰祈

聖鑒事竊查吉林湯原縣地方原名湯旺河河東向隸江省光緒三十二年設湯原縣治河南地段亦歸縣轄又吉林大通縣設治於崇古爾庫站本在江省界內乾隆二十七年將江省江北地方撥歸吉林安設崇站光緒三十二年添設大通縣又吉林依蘭府

屬之插花地數十里亦在江省北岸臣等伏維行政之綱以正經
界爲始務設官之道以清權限爲首圖吉江兩省以松花江爲天
然界限從前江省民官過少壤地遼廓管理難周是以吉林奏設
湯原大通兩縣將江省之北岸劃入該兩縣界內定立封堆以爲
一時權宜之計現在江省新設之興東道已與湯原大通接壤自
應將江北地段仍歸江省爲該道所屬統以松花江爲限較之勘
定封堆界綫更自分明臣等再四籌商意見均同相應請

旨准將湯原大通兩縣所屬江北地段及依蘭府插花地之在江
省者仍歸江省管理至改隸以後該兩縣原在吉省之地及新歸
江省之地或附入他縣或勻撥另設縣治統由臣等派員勘定界
址體察民情再行奏咨辦理所有吉省兩縣江北地方仍歸江省
管理緣由謹恭摺會陳伏乞

皇太后

皇上聖鑒

奉省設立農事演說會暨植物研究所摺

奏爲奉省設立農事演說會暨植物研究所以資提倡而重農業
恭摺具陳仰祈

聖鑒事竊維萬物之生本乎土天下大利出於農我中華以農立
國夙爲列邦所稱羨東南各省講求有素獨奉天曠土尙多地有
餘力居民恃氣候之宜土地之廣墨守舊法迄少進步無論不能
與歐美諸國相比較卽較之東南各省一夫耕地收穫之多而此
曾不及其十之三四推厥原因皆由農不知學無從效法雖經派
有農學畢業諸生多方傳習幅員旣廣勢難徧及凡關於樹藝畜
牧及選種施肥諸務鄉曲耳目局於聞見幾不知若何改良若何

推廣臣等竊思方今東西各國講求農學蒸蒸日上研究之精著述之博洵足供採倣而資參考第奉省民智未啟草野旣少通人且動植專門學理精細又難猝喻非用淺近易明之說以相譬曉無以使之解非就切實可徵之事以相誘導難以冀其從茲經臣等督飭勸業道查照部章參倣新法就省城南門外地藏寺隙地設立農事演說會分派農學林學畢業生爲演說員輪班宣講蠶桑牧養耕植諸新法並將演說各端刊成白話官報分佈勸導又於西門外鐵道之東闢地一區開辦植物研究所試種棉麻蔬果花木等類考其長養培護之方俾資遊覽而便倣效均於本年四月間先後開辦一俟著有成效再行分飭各府州縣逐漸推廣多一法勸導自必多一分效驗蓋爲農學闢未有之新機卽爲農會樹普通之標準將來農業發達出產富饒旣可供全國之工料卽

以應全球之商戰宏溥利達之基或卽於此植之至所需選地建所及常年經費等項應請作正開銷由臣等核實另案造報所有奉省設立農事演說會暨植物研究所緣由除咨部查照外謹恭摺具陳伏乞

皇太后

皇上聖鑒

設立東三省講武堂摺

奏爲遵章設立東三省講武堂謹將暫行章程繕具清單恭摺會陳仰祈

聖鑒事竊查前練兵處兵部具奏陸軍學堂辦法第十三條內載各省應於省垣設立講武堂一處爲現在帶兵者研究武學之所等因臣等於上年十二月奏設東三省督練處摺內遵卽聲明開

辦講武堂等情仰蒙

俞允在案誠以兵事之進退恆視兵學爲轉移若平時將弁無合謀講學之區則臨時指揮鮮戮力同心之效東省陸軍除由關內調來一鎮兩混成協之外吉林原有步隊一協奉天續成步隊一標礮隊一營綜計大小官長爲數漸多其中學有淺深人由調集程度差等勢有不同若欲妥籌畫一之規舍創立講武堂無從入手况三省防軍新經編練各營將領尤少經諳兵學之人亦必宏其教育之方以爲他日改編之計臣等公同擬議東三省軍政貴乎統一而講武堂課程重在整齊必須三省合力經營方可易於收效故臣等於去年設立督練處時卽以奉天陸軍小學堂房舍勻借爲籌設三省講武堂之所酌聘教員分訂功課輪調各軍官長到堂講習兼酌調防營將士隨同授學以冀進步而示觀摩本

擬擇購局勢合宜之地另建房舍以規久遠嗣因地基價值與估
修房屋工料等費需款過鉅籌措維艱不得不暫事權宜遂將奉
天省城東門外日本退還營房重加修理並添造堂舍九十八間
共計三百八十八間暫作該堂開辦之地惟是講武堂各省雖多
設立而定章尙未頒行所有該堂經費課程必須釐定簡章暫行
遵守當此經費艱難百端待理雖不能盡求完備致涉鋪張亦不
敢從事因仍過從苟簡伏查講武堂由北洋首先遵章設立規模
有可取裁並陸軍部所定他項學堂章程亦可用爲比擬謹督飭
在事各員擬定東三省講武堂暫行章程三十六條繕具清單恭
呈

御覽惟是東省地居邊徼物力奇艱所有開辦以及常年各經費
難與內省相提並論計開辦一切購置器具圖書修造房屋約共

正書卷一
用瀋平銀六萬五千餘兩均係格外撙節省無可省之款此項銀兩業經臣等飭由奉天度支司於京部協濟鎊餘項下騰挪動用應准作正開銷其常年額支活支經費擬由三省共籌均按照學員額數暫仿天津講武堂辦法并體察東省物價情形分別辦理覈實具報其吉林講武堂已飭停辦以一事權再臣等所擬係屬暫行章程一俟陸軍部頒有定章再當遵照參覈更正又講武堂應行附設之學兵營現亦正在籌設之際合併陳明除開辦並常年各經費另造清冊分別咨部外所有遵設講武堂並酌擬章程繕單會奏各緣由謹恭摺具陳伏乞

皇太后

皇上聖鑒飭部立案施行

江省添設道府廳縣摺

附單

奏爲江省幅員遼闊亟應添設民官以資治理謹將酌擬增改道府廳縣辦法繕單具奏恭摺仰祈

聖鑒事竊查黑龍江省南障奉吉西控蒙藩外接鄰壤經緯縱橫幾及萬里

聖武龍興索倫巴爾虎鄂倫春諸部後先歸附率係打牲游牧聚處無常是以僅設駐防未立郡縣咸豐以後呼蘭等處屢議開荒內地僑民負耒而至加以外屯密布鄰柝相聞時勢變遷斷難墨守於是呼蘭綏化相繼設官近年又於省城及開墾三蒙旗並原設呼綏兩廳增設府廳州縣一十三處以爲綏邊撫民之計然合計全省地面民官所治僅及十之二三瓊瑋呼倫貝爾墨爾根布特哈四城所屬仍無郡縣方今瓊瑋商埠次第開通交涉煩重墨布兩城墾荒開鑛歷有年所黑龍江沿岸數千里皆與俄鄰彼則

屯守相望我則草萊未闢以無官故無民無民則形勢隔絕土地
荒蕪外啟他族侵越之謀內爲匪徒逋逃之藪是非增設郡縣充
實內力別無控制之方前代如遼金元皆於江省設立路府州縣
卽今各國亦咸於荒曠之區以殖民設邑爲至計臣世昌自三十
二年查事來江卽見邊衛過於空虛非增設民官不足以言拓殖
抵任以後屢與署撫臣程德全會商辦法此次復與署撫臣周樹
模體察情形通盤籌畫竊以實邊至計不得不先定規模籌款維
艱不得不略分次第現擬添設瓊瑋呼倫貝爾道員兩缺黑河滿
珠佛山嫩江知府四缺瓊瑋呼瑪漠河呼倫室韋蘿北武興訥河
布西甘南直隸廳同知十缺舒都烏雲車陸春源直隸廳通判四
缺諾敏鶴岡林甸通北鐵驪知縣五缺改設龍江海倫知府二缺
擬就開闢商埠之區及人戶較多形勢扼要者先行設立此外或

先派委員或暫緩設治俟地闢民聚經費有著再行陸續籌設其
新設各缺所轄之區除俟設治時詳審履勘劃清界限再行繪具
圖說奏明辦理外謹將詳細辦法繕具清單恭呈

御覽至墨爾根呼倫貝爾瓊琿副都統三缺自應按照上年原奏
卽行裁撤惟呼倫貝爾瓊琿兩處辦理交涉關稅事務責任較重
且有兼轄屬部之責今旣改設道員應請加參領銜以資控制其
擬設之黑河滿珠佛山等府缺擬查照上年原奏及吉林新設蜜
山府奏案辦理不領屬縣設治以後應如何明定廉費酌設佐吏
添撥兵隊建置署所屆時續行具奏此次添設各缺皆係邊疆重
要與內地情形不同非有熟悉邊情能耐勞苦之員難資得力如
蒙

俞允擬由臣等慎選堪勝人員隨時奏明請

正書卷一六
旨補授以裨地方總之江省情形實由人民過少以致百端廢弛
等於石田伏查雍正年間改諸邊爲郡縣而要塞以固嘉慶年間
於川陝置郡縣而亂端以平證之前史晉增東南郡縣則日臻富
庶明廢諸邊郡縣則寢至危亡得失之分關係甚鉅現擬增設江
省民官事機危迫已覺後時若再遲徊更屬無從措手此臣等不
敢不切實陳明者也所有酌擬增設江省民官各缺繕單具奏緣
由謹恭摺具陳伏乞

皇太后

皇上聖鑒飭下會議政務處核議施行

附單

計開

瓊瑋兵備道

加參領銜駐瓊瑋擬卽添設

黑河府知府 駐大河屯擬卽添設

璦琿直隸廳同知 駐璦琿擬卽添設

呼瑪直隸廳同知 駐西爾根卡倫擬緩設

漠河直隸廳同知 駐漠河擬緩設

以上歸璦琿道管轄

呼倫兵備道 加參領銜駐呼倫貝爾卽擬添設

滿珠府知府 駐滿洲里卽擬添設

呼倫直隸廳同知 駐呼倫貝爾卽擬添設

室韋直隸廳同知 駐吉拉林卽擬添設

舒都直隸廳通判 駐免渡河擬緩設

以上歸呼倫道管轄

佛山府 駐觀音山擬緩設

蘿北直隸廳同知

駐托蘿山北卽擬添設

烏雲直隸廳通判

駐烏雲河擬緩設

車陸直隸廳通判

駐車陸擬緩設

春源直隸廳通判

駐伊春呼蘭河源擬緩設

鶴岡縣知縣

駐鶴立岡卽擬添設

以上歸興東道管轄

龍江府知府

以黑水廳同知改卽擬改設

林甸縣知縣

駐大林家甸卽擬添設

嫩江府知府

駐墨爾根卽擬添設

諾敏縣知縣

駐諾敏河擬緩設

海倫府知府

以海倫廳同知改卽擬改設

通北縣知縣

駐通肯河北擬緩設

鐵驪縣知縣

駐鐵山包擬緩設

訥河直隸廳同知

駐東布特哈擬緩設

布西直隸廳同知

駐西布特哈卽擬添設

甘南直隸廳同知

駐富耐拉爾基卽擬添設

武興直隸廳同知

駐多耐站擬緩設

吉江兩省新收關稅儘數截留摺

奏爲吉江兩省財力萬窘新收關稅擬援案儘數截留以充經費
恭摺仰祈

聖鑒事竊查吉省之綏芬河江省之滿洲里已經設立稅關其長
春哈爾濱齊齊哈爾瑗瑋等處均係開埠之區現亦次第籌備設
關事宜按照各省關稅自應專款存儲報部候撥惟吉江兩省財
政久已竭蹶自協款欠解本省所有之款出入相抵不敷甚鉅近

又改設行省舉辦新政用款浩大數倍於前卽以邊務經費而論
兩省沿邊數千里從前毫無布置今擬稍稍整理凡屯戍移民開
路築室動需鉅款吉省固已無款可籌江省更成坐困之勢前經
奏請撥解邊防經費仰蒙

聖明俞允飭部撥給而所撥之款或僅解一年或撥不足數萬不
敷常年經費之用支細情形日甚一日惟一切行政亟須舉辦邊
務關係尤要不能爲無米之炊臣世昌前以安東大東溝關稅奏
請截留奉省仍作練餉之用經部覆奏准以兩關所收土貨入口
半稅及土貨出口正稅截留備用其所收洋貨正半兩稅及土貨
復進口半稅除撥還開辦經費仍截數存儲候撥等因奉省財力
艱窘已有不支若吉江兩省困難情形勢不能再爲分撥且各關
均係新設邊地苦寒商賈乏絕貨物稀少稅數微薄自在意中擬

請將所收關稅全數截留作爲兩省辦理新政及撥還邊務之用
如果將來收數暢旺足敷邊防經費則部撥款項亦可少紓如蒙
俞允臣等卽檄飭各關遵照辦理並仍將收數按結報部備案將
來提用關稅正款應請作正開銷以清款項所有兩省財力窘迫
擬援案將新收關稅儘數截留備用緣由謹恭摺會陳伏乞

皇太后

皇上聖鑒訓示

奉省設立官牧場摺

奏爲奉省設立官牧場推行牧政以闢利源恭摺仰祈

聖鑒事竊維物產之盛動植兼賅農業所關樹畜並重故書稱作
牧禮詳游牝班書貨殖傳謂五穀六畜靡不皆育近今東西各國
講求牧養浸致富強奉省地連蒙服土沃泉甘畜牧之宜夙有明

正書卷之二十一
三三
驗祇因民智未開孳育未能繁盛前督臣趙爾巽有鑒於此會就
新民府鎮安縣吳家屯地方價領官荒地六萬餘畝委員設廠購
有牛隻若干頭思從墾種入手兼種兼牧徐圖擴充原擬招商興
辦故命名曰牧養公司嗣因款難驟集先假官本以爲提倡臣等
到任後調查庶政知墾地需牛練軍資馬而實業中織造呢羽氈
毯尤非廣畜羊豕無以應用是振興牧政允爲東省至急之務臣
等公同商酌因將該公司改爲官辦添發資本督飭勸業道實力
整頓先後調派農業暨獸醫畢業生分理耕種地畝及調護牲畜
諸事現正闢地引泉佈植飼料並在高麗及庫嚕等處續購牛羊
佳種先行試畜研究其混血傳種之方俟荒田漸熟水草豐饒再
議養馬此後還當選購歐洲精壯牛馬羊隻以資支配冀種類改
良漸次得以推廣數年之後畜產肥碩興利有資觀感之餘自相

則倣彼時聽民自立公司亦屬並行不悖惟事既純用官本與公
司體例已殊自應改爲官牧場以符名實其一切開辦及常年經
費均請作正開銷除咨部查照外所有臣等設立官牧場推行牧
政緣由理合恭摺具陳伏乞

皇太后

皇上聖鑒

奉省設立工藝傳習所暨造磚廠官紙局摺

奏爲奉省設立工藝傳習所暨造磚廠官紙局以興實業而挽利
權恭摺仰祈

聖鑒事竊維通貨者商製貨者工是商以濟工之流通而工實應
商之販鬻奉天地大物博天產豐饒如柞繭之可織綢緞皮革之
可製器用絨毛之可爲氈毯樹皮之可造紙棉他若木植有林晶

玉有鑛皆足以供工之用而應商之需祇因民未考求徒使天成原料供他人造作貨成之後仍輾轉銷售於我國生出熟入一任其隱吸無窮之利於不覺此工業之不振而商權之所以並失也前將軍趙爾巽曾在省城東門外設立工藝傳習所爲勸工之計臣等次第考查見其規模粗備具有條理惟房屋狹隘應建廠舍尙待擴充因卽督飭勸業道就局南原置小河沿地方另行建房設局於去年十一月間工竣遷入該所原分雕漆金木織染彩印縫紉等工爲八廠迭經釐正改良添設玻璃毛氈刷印顧繡等工廠將原有之染雕金漆各工分附毯木等廠招有官費學徒六十名聘教習藝師傳授工藝兼教國文測算繪畫等科學分廠肄習現在風氣漸開備費投學者已紛至沓來擬俟藝成之後分派各府州縣輾轉傳習不數年後可期普徧復因建築繁多在西門外

設立造磚廠因紙張翔貴又在城中開設官紙局均已先後開辦凡應需買地建屋用人購料以及常年經費皆於鑄餘項下核實動用應請作正開銷蓋藝則熟而彌精人則久而漸廣將來參以理化逐漸推廣就本地之料製本地之貨商品既多商業自盛他日收效當非淺細除咨部查照外所有奉省設立工藝傳習所暨造磚廠官紙局各緣由謹恭摺具陳伏乞

皇太后

皇上聖鑒飭部立案施行

續放洮兒河北蒙荒請歸入圖什業圖荒局丈放摺

奏爲續放札薩克鎮國公旗洮兒河北蒙荒擬請歸入圖什業圖蒙荒行局一併丈放恭摺具陳仰祈

聖鑒事竊查哲里木盟札薩克鎮國公旗蒙荒經前任將軍臣增

祺於光緒三十年五月間奏請將該旗洮兒河南沿荒段丈放業
經報竣惟洮兒河北沿一帶地尙荒棄未議開放經前任將軍臣
趙爾巽派員前赴該旗會商迄未就緒臣等到任後曾據現辦圖
什業圖蒙荒行局以該公旗河北餘荒相距甚近呈請歸入該局
一併丈放當經批飭該局總辦湖北候補道毛祖模會同該旗妥
籌辦理去後茲據該札薩克鎮國公拉喜敏珠力並該道毛祖模
先後呈稱該札薩克公業與本旗協理官員及旗眾人等議妥擬
將洮兒河北沿南北長六十里西至札薩克多羅札薩克圖郡王
烏泰旗界東至札賚特札薩克多羅貝勒巴特嗎拉普丹旗界一
律續放內有廟陵墳墓並各台莊村屯仍照舊章留出界址並以
該旗現有辦公急需懇先借銀一萬五千兩俟收有地價再行歸
還等情請酌核奏咨前來臣等查殖民闢地固圍實邊均爲當務

之急該公旗洮兒河北荒地密邇洮南府治地上平行允稱沃壤
惟因蒙旗藉詞游牧久甘荒廢今該公旗願援照洮兒河南荒段
一體開放尙屬明於時勢自應及時勘丈招墾以闢地利而固藩
籬所請先行撥借銀一萬五千兩應准照數借給將來卽在該旗
應得地價項下提還歸款一面飭令該道毛祖模就近前往按照
該旗所議先行詳細履勘劃定界址此項荒務擬卽歸入現辦圖
什業圖蒙荒行局併案丈放以專責成如蒙
俞允恭候

命下卽援照前放洮兒河南沿荒段辦法妥擬章程分別奏咨立
案所有續放札薩克鎮國公旗洮兒河北蒙荒擬請歸入現辦圖
什業圖蒙荒行局一併丈放緣由理合恭摺具陳伏乞
皇太后

皇上聖鑒

請飭催各省關應解奉天戊申年的餉並歷年欠餉摺

奏爲奉省旗兵困苦待餉孔殷請

旨飭部嚴催各省關應解奉省戊申年的餉並歷年欠餉以應急需恭摺仰祈

聖鑒事竊查奉省應需戊申年的餉並各省關短解奉省歷年欠餉前於光緒三十三年十一月間經臣等奏請

飭部指撥嚴催嗣准部議於山東兩淮江蘇臨清關等處地丁鹽釐鹽課釐金常稅項下撥給奉省銀二十六萬兩並將歷年欠餉另案咨催等因行知遵照在案現在時逾半載僅據兩淮解到戊申年俸餉銀四萬兩山東解到戊申年俸餉銀二萬兩其餘各省不但至今未解且未接有報解之文上年部撥奉省丁未年的餉

銀二十六萬兩亦僅據山東兩淮臨清關等處陸續解到銀十六萬兩尙欠銀十萬兩並自光緒四年起至三十二年止各省積欠奉省歷年俸餉共計一百八十五萬七千三百餘兩屢經奏咨分催迄今絲毫未解查奉省變亂之後八旗官兵生計奇窘專賴俸餉一項以資接濟並無別項津貼而例定抵放制餉之款僅止餘租地丁糧貨稅捐燒鍋參票等數項向本入不敷出加以閭閻元氣未復稅捐徵不足額出款日益增多本省財力旣無法騰挪外省協餉又未克應時撥濟以致外城去年秋餉展緩限期與本年春季內外城俸餉至今均未開放官兵待領孔殷勢難再緩轉瞬本年秋餉又將屆期加以供應

三陵祭品一切要需尤爲刻不容緩倘有貽誤關係匪輕值此時艱款絀各省度支固同一爲難第

盛京爲根本重地俸餉乃計授要需况款係經部指定無須另籌
惟有仰懇

天恩俯准飭部嚴催各省關勉顧大局迅將應解奉省新陳餉銀
源源撥匯倘因一時難解力有未逮應將戊申年全餉並三十三
年欠款一半先行撥解以應急需其餘一半並歷年欠餉後再分
批籌解以資接濟而免貽誤所有請催奉省戊申年的餉並短解
歷年欠餉緣由理合開具積欠清單恭摺具陳伏乞

皇太后

皇上聖鑒

設立東三省支應處摺

奏爲三省公用款項擬專設處所籌撥支發以清界限恭摺會陳
仰祈

聖鑒事伏查東三省初經改設行省規模草創略有端倪而行政之費日益煩多既於三省分設度支司規畫一省之財政然有爲一省所專辦亦有爲三省所共同頭緒紛紜款目繁碎借墊籌還動生軃葛出入銷數必至紛歧是非別設機關不足以清界限臣等公同商酌擬於奉天省城設立東三省支應處派員總理三省公用款項凡非僅辦一省之事者一切動用之款統由該處支發如督練處軍械局轉運局等及蒙務邊務並其他非專隸一省之用款均責成該處經理其各處應用之款如有專款協濟者自應由該處收放列銷其並無專款之處應由三省合籌按照各省財力分成酌攤奉天五成吉林三成黑龍江二成隨時劃撥統交該處備用如或一時財力未逮卽擬在鎊餘項下實用實銷以資周轉而免貽誤所有該處出入各款及一切局用按季分報三省公

署每屆一年報部核銷一次似此眉目分明截然不混在三省公用款項既可清晰在部臣慎重度支亦易檢查並由臣等體察情形擇要設立支應分處以便轉輸除咨部查照外所有三省公用款項專設處所收發緣由理合恭摺會陳伏乞

皇太后

皇上聖鑒飭下度支部立案施行

退耕堂政書卷十七目錄

奏議十七

札薩克圖郡王烏泰私借俄債酌擬辦法請旨摺

黑龍江趙胡窩堡經歷請改隸巴彥州片

撥款改挑同江口河道摺

撥款疏濬海城縣三家子等處河道摺

奉省設立森林學堂暨種樹公所摺

奉省漁業公司改歸商辦另設官局保護摺

奉天漁業公司設立銷售場片

籌擬蒙務辦法要綱及分別籌款情形摺

籌辦奉天學務情形摺

奉省八旗官兵俸餉由旗租燒稅發放片

吉林裁缺主事等員請以對品分別歸部選用片
奉省設立禁煙查驗所摺

札賚特旗梅楞聚眾阻撓荒務戕害蒙員請 旨飭拏摺
江省建立圖書館摺

遵 旨覆陳勻定公費摺

遵 旨查覆陶鋪被參各節摺

退耕堂政書卷十七

天津徐世昌

奏議十七

札薩克圖郡王烏泰私借俄債酌擬辦法請 旨摺

奏爲札薩克圖郡王烏泰私借俄債以全旗地產作抵期屆事迫
謹酌擬辦法請

旨遵行恭摺仰祈

聖鑒事竊臣等於本年二月間接據洮南府知府孫葆璿稟稱風
聞札薩克圖郡王烏泰有私借俄債情事密向該旗蒙員來粲文
等詰問初猶推諉迨曉以利害始將該王借款係以全旗路鑛牲
畜爲質限期甚迫該王正在爲難等情和盤托出適該郡王因商
辦愛其撓荒務來府會晤面與申說乘機開導該王亦深悔悟願

將各路報効並北山後餘地三百里另議出放求

朝廷借款救助以期挽回所有兩次押借俄款字據二紙一併鈔錄稟請核辦前來臣等以事關重大當卽遴委奏派督辦蒙務前民政部外城總廳廳丞朱啟鈞會同孫葆瑨查辦去後茲據查明覆稱啟鈞抵洮據孫葆瑨稱前上稟後該郡王又鈔示俄員達聶爾來函內有欠據註明屆期失信可派員帶兵至王府查封產業之語與前鈔借據譯文歧出函邀該郡王到洮面詢確情接晤數次再三詰責該郡王悔懼之情見於詞色當將印據債單暨俄文原函呈驗緣該郡王以舊債虧累於三十年向俄國道勝銀行先後借盧布二十萬以四年爲限三十二年又向鐵路公司達聶爾借盧布九萬以一年爲限前任將軍趙爾巽聞之派員查詢該郡王並未據實說明已借俄款復由江省撥給銀六萬兩三十三年

路鑛牲畜與俄作抵該郡王亦祇云聽其要求而已種種情節支離文字歧誤受人愚弄茫乎不知其情可怒其愚可憫惟寶銀與盧布相去懸殊俟還款時與俄人確商辦理該旗前後已放荒地共五十三萬三千六百晌若俟一律升科該郡王歲可得三萬五千餘兩數已頗鉅惟連年荒旱民爲艱已放之地多未墾種本年已屆升科復經奏明展限三年該旗歲收之租仍祇取給於舊有熟地每年僅得銀二千餘兩其北山一帶踞札旗全界上游地質黑沙頗宜耕種野馬圖山有煤鑛前經乾安鎮照磨張篤福集貲探採投本無多淺開輒止該郡王稱歸流洮兒上游兩河之間地頗膏腴人戶亦少開放較易如果議放尙須派員前往勘驗以憑核辦該郡王冀求

國家貸款償債而以應分租賦抵息現歲入二千餘金不敷殊鉅

鑛產既未經開採鐵路之議洮南尙無成說迤北更須遲遲卽開
放北山亦恐須十年以後特各旗風氣鮮開咸思保守每議開放
戛乎其難如自該旗入手推行盡利未始非因勢利導之方現俄
人催索該旗之款勢已岌岌倘按約索抵後患何堪設想且來函
謂欠據內註明可派兵至王府查封產業無論印據是否自註旣
據俄人聲明其意實存叵測又函內有照會三省總督幫同究辦
之語則屆時國際交涉自所不免萬一實行其強硬手段或另生
枝節恐轉非此數十萬金所能議結現二限已屆轉瞬卽屆三限
豈容再緩如議還九萬一項則道勝之項亦斷難置之不理兩項
共約需銀四十萬兩所欠京債關係雖輕實爲此事媒孽奸商欺
弄蒙人積織成鉅最堪痛恨必須速籌了結永斷葛藤等因前來
當卽據情咨呈軍機處外務部查照在案臣等查該郡王烏泰不

顧利害擅借外債至數十萬兩之多並以全旗路鑛牲畜作抵荒
謬已極自應嚴加懲治惟推其致此之由始因該郡王龔爵纏訟
致有債累繼因開荒被控又借京債復由各債主盤剝重利積算
至今子過於母最多者幾至三十餘倍該郡王無可設措俄人遂
啗以重貲藉爲將來要挾之計但蒙旗雖屬藩封然論國際之法
則各札薩克應守藩屬之法律未嘗與各國明白宣示倘令操之
過蹙該郡王畏懼嚴譴乞援於俄則俄人或從中干預庇護一變
而爲國際交涉後事益難措手臣等再四思維惟有乘該郡王畏
罪輸誠之際爲急進干涉之謀所借俄債約共四十萬兩由
國家代爲歸還旣藉以固我主權且卽爲經營蒙藩入手之基礎
該郡王請以租賦路鑛及北山餘地作抵目前原不足恃爲抵款
然

國家撫綏藩服固圉實邊自必不詢其有無抵押計較子息而後代償也第需款數十萬兩亦未便虛擲巨貲毫無辦法且恐該郡王故智復萌因以爲利是寬其既往益不能不杜其將來此次撥給償款應一面照會有約各國嗣後不得與蒙藩自行交涉以合公法一面與該郡王約定援照廓爾羅斯前旗借款之案將該旗應分得之地租一併由公家徵收並將北山餘荒酌量出放卽以該價歸還墊款如此則行政租稅之權已盡操之在我一旗辦有成效他旗亦得知所懲勸自易就我範圍至代償之款擬由臣等咨商度支部向大清銀行支借銀四十萬兩將來卽以該旗租賦路鑛及開放北山荒地所有各項餘利先行盡數提還以歸墊全清之日爲止雖遲速固無把握而款項非無著落臣等明知部款支絀惟此事實關大局東省一時周轉爲難部臣體念時艱必能

挹彼注茲允爲借箸一俟與大清銀行借定的款臣等當派員先與道勝及達聶爾交涉將應還盧布一節磋商辦理其北山餘地亦卽陸續設法丈放以期早濬利源藉裕籌邊之至計至所欠京債利逾於本者重利盤剝本干例禁應請

旨飭下理藩部將該郡王印據分別追銷取結完案並將嗣後各蒙旗借京債者如債主違例盤剝一經發覺卽應取銷本利加等嚴懲纂入理藩部則例以儆效尤一面通飭各蒙旗一體遵照所有札薩克圖郡王烏泰私借俄債期屆勢迫各情形理合酌擬辦法奏明請

旨如蒙

俞允卽由臣等咨行各該衙門欽遵辦理除咨部外謹恭摺具陳伏乞

皇太后

皇上聖鑒訓示遵行

趙胡窩堡經歷請改隸巴彥州片

再查光緒三十年十一月間江省變通民治經前署將軍程德全奏准於呼蘭府屬之趙胡窩堡添設分防經歷一員逕歸該府管轄等因嗣以該府所屬之巴彥州轄境過狹於辦理學堂巡警等事恐多未便復經飭將該處租稅劃歸巴彥州徵收該處經歷卽由巴彥州管轄以期聯絡業經分別札飭遵照各在案惟該處分防經歷現旣劃歸巴彥州自應改爲分駐巴彥州州判以符名實如蒙

允准再由臣等揀員咨請補授並請

飭下禮部改鑄鈐記頒發俾昭信守至辦公經費等項仍照前設

經歷原案開支除分咨查照外理合附片具陳伏乞
聖鑒訓示

撥款改挑同江口河道摺

奏爲同江口改挑河道保衛商埠撥款興修恭摺具陳仰祈
聖鑒事竊查前據同江廳設治委員程學恂呈稱同江口踞遼河
上游爲南北水路要衝河身灣曲形如懸弧同江商埠適當其背
近日河流東徙去埠益近若不改挑河道夏秋盛漲全埠商民財
產漂沒實屬堪虞擬就水勢地勢裁灣取直改挑新河另於上游
添築順水壩逼水西行以保商埠惟同江口遼河東岸地屬博多
勒噶台親王旗遼河西岸地屬達爾罕王旗而挑挖新河須占用
西岸地址約三四十丈詳詢該西岸地址多係河淤概歸旗丁梁
萬福私產當由同江廳會同該管王旗傳梁萬福諭以公益所關

並經該廳邀同紳商就地籌款措交業主以償損失羣情悅服兩無異議懇卽速予撥款早日興工等情先後呈請前來查同江口河灣逼近商埠夏秋盛漲水勢奔騰異常危險亟應設法維持撥款興修以利交通而維商務當由臣等派員覆勘屬實一面分行博多勒噶台親王旗暨達爾罕王旗查照一面由度支司先行撥給工款銀二萬兩飭由同江口設治委員程學恂具領購集工料尅日興修務期涓滴到工不得絲毫糜費所有動用銀兩實數應俟工竣再行造報除分咨民政部度支部農工商部理藩部查照外所有改挑同江口河道保衛商埠撥款興修緣由理合恭摺具陳伏乞

皇太后

皇上聖鑒飭部立案施行

撥款疏濬海城縣三家子等處河道摺

奏爲海城縣三家子石佛寺等處河道淤塞撥款疏通以蘇民困
恭摺具陳仰祈

聖鑒事竊據署海城縣知縣陳藝呈稱縣屬西鄉地皆窪下東由
虎獐屯西至三家子南由大官屯北至青城子綿亘七十餘里寬
三十餘里可種之地約三十萬畝虎獐屯西接石橋子舊有河道
一處迤邐西至三家子順流繞入遼河嗣因年久河道淤塞水無
所洩每屆夏令山水暴漲遠近盡成澤國不保課賦由來已久村
眾歷年築壩堵水於事無濟且有刁民唆令洋商租買淤地開壩
放水時啟交涉擬請撥款疏濬以興水利而泯爭端等情據此臣
等當派分省補用道陳希賢前往勘驗屬實正在核辦間又據海
城縣知縣陳藝呈稱據石佛寺左近各屯聯名呈稱石佛寺青天

嘴等處連年水災淹沒耕田多至六七萬畝懇請一律開濬等情前來復經派員勘驗屬實臣等查三家子等屯與石佛寺接壤沿河一帶地盡可耕自應通盤籌畫爲一勞永逸之計雖籌款維艱而能使數十萬畝沮洳之地盡變膏腴其有裨於

國計民生良非淺鮮當經樽節估計除沿河順水各溝責令民間自行開挖以節虛糜外合計兩處河工約需銀二萬五千兩由葦塘荒價項下先行提撥飭令前海城縣知縣陳藝會同新任海城縣知縣高暄陽認真經理擇期興工一切工料務期核實開銷不得絲毫糜費至將來不敷銀兩並動用數目統俟工竣再行造報除分咨民政部度支部查照外所有海城縣三家子石佛寺等處河道淤塞撥款疏濬緣由謹恭摺具陳伏乞

皇太后

皇上聖鑒飭部立案施行

奉省設立森林學堂暨種樹公所摺

奏爲奉省設立森林學堂暨種樹公所所以興林政而闢利源恭摺
仰祈

聖鑒事竊維實業之興基於樹植因材而篤首重栽培所以周禮
設官場虞分職研求植物各就土宜入林取材尤禁非時厥制至
爲詳贍近者東西各國注重林政造林伐樹無不學有專門奉省
地廣山深土最宜木鴨綠渾江兩河之濱窩集駢列合抱良材交
柯而生加意講求實爲天成美利徒以民間不知封植任意摧殘
施不時之斧斤聽自然之消長取之不禁而培之無方勢必取用
易竭生材日耗此森林一業不可不亟籌整頓之方也臣等逐細
考查知種植之學在於實施教育導以先路疊經督飭勸業道派

員分赴各處切實調查凡舊有森林處所卽飭地方官妥爲培護
一面在省城東門外建房置圃按照各省中學堂規制設立森林
學堂學額三百名分五年招考足數學期亦定以五年以入堂之
先後按年次第畢業凡延聘中外教習與學生膳費概由官爲籌
給原額之外如有情殷嚮學者准其自費肄業以示體恤而廣造
就又於南門外闢地建園設立種樹公所延聘德國技師廣購中
外樹秧仿新法試種究其土物之宜爲將來推廣林業地步均於
本年三月間分別委員開辦凡調查川資暨延聘教師應需開辦
及常年經費應請作正開銷另案造報除分咨查照外所有奉省
設立森林學堂暨種樹公所各緣由謹恭摺具陳伏乞

皇太后

皇上聖鑒飭部立案施行

奉省漁業公司改歸商辦另設官局保護摺

奏爲奉省漁業公司改歸商辦另設官局專辦保護事宜以清權限而謀久遠恭摺具陳仰祈

聖鑒事竊查奉省漁業公司本係官商合辦於光緒三十二年間前任將軍趙爾巽准商部咨以該部頭等顧問官張謇呈請創立七省漁業總公司以保海權而擴實業令奉省酌核統籌等因嗣經查明奉省海岸綫延長千有餘里水產富饒不亞江浙爰將籌辦公司情形先以保護爲入手辦法具奏在案惟當時事屬創舉一切規章諸從簡略且商股旣未招足官款亦屬無多故以公私兼辦保護事宜本係勉立基礎爲徐圖擴充地步開辦將及一年稍著成效然以公司而任保護不惟事難兼顧而官商辦事同居一處多有凌躐之嫌嗣復因該公司協理孫繼堯舞弊虧折眾股

東稟請澈究前任將軍趙爾巽未及查辦卸篆臣等到任後派員查明追繳並重定章程將該公司改歸商辦另設漁業總局專任保護監督之責權限較爲分明當經派員前往妥辦局務復由眾股東公舉職商宋長濂接辦公司事務數月以來釐剔積弊減輕稅則將一切軆葛劃分清楚計從前孫繼堯冒濫侵蝕至九千餘圓之多公司股本亦虧折至四萬圓之譜舊有資本頗形單弱續擬添招股本十萬圓連原定之數共計三十萬圓俾資擴充實行改良批令照辦並將前頒奉天漁業公司兼辦保護事宜關防飭繳查銷另刊奉天漁業總局關防一顆札交該員啟用就營口設局專司保護劃清權限凡關於練兵徵稅購輪置械與夫講求緝捕辦理交涉諸事概歸官局辦理關於漁獵勤務術業進步股分集合營業改良等事均歸公司辦理其原有蓋復海營鳳安錦州

正書卷一
莊河五分局仍歸該總局管轄以一專權所有設局及常年經費照章仍由漁稅項下作正開銷另案造報並刊發奉天漁業有限公司圖記一顆發給該公司蓋用遵照部章應改註冊飭將前領部照呈繳咨銷以清原案從此漁業總局與公司權限分清既無牽混之弊自有振興之機認真經營當可推行久遠除將該公司呈繳前領部照暨應補繳註冊費及擬定股票息摺各式並改訂章程一併咨部查照外所有奉省漁業公司改歸商辦另設官局專辦保護事宜各緣由理合恭摺具陳伏乞
皇太后

皇上聖鑒飭部立案施行

奉天漁業公司設立銷售場片

再案查前據奉天漁業公司稟稱沿海各處魚行牙紀私抽秤用

每魚百斤計內外六成苛索過重大爲漁民之累前經稟准通飭裁禁暨將漁戶輸納各衙門陋規等弊一律革除淨盡改由公司調查出魚各要區設立銷售場減輕內外各二成辦公籌收秤用化私爲公將所收之款儲作建設水產商船學校暨研究製造陳列各所經費以備漁人網戶無論土著客籍凡有青年子弟志願向學者均可附入校所學習駕駛捕獵製造等各項魚業專科庶幾儲造多才精研新法用以廣收水利其開辦銷售場時卽由漁業總局派員入場監察一切以杜流弊而昭公信前於改定公司章程第十七條內亦已聲明另訂銷售場規則附入此項章程條內各在案等語並將擬定銷售場規則送由漁業總局核轉前來當經臣等詳加覆核尙屬切實可行批令該總局督飭妥爲辦理現在各場業已一律開辦既可掃除魚業之障礙又可藉興地方

正書卷一
十一
之公益將來此項收入儲積鉅款建設水產商船學校暨研究陳
列各所誠於奉省漁業前途大有裨益除將擬訂銷售場規則咨
部查核外所有奉省裁禁各處魚行牙紀改由公司設立銷售場
緣由謹附片陳明伏乞

聖鑒

籌擬蒙務辦法要綱及分別籌款情形摺

奏爲籌擬蒙務辦法要綱及分別籌款情形恭摺會陳仰祈

聖鑒事竊臣等前以哲里木盟蒙旗爲東省之要衝值他族之逼
處關係至爲重要奏派開缺民政部外城總廳廳丞朱啟鈞爲蒙
務局督辦奉

硃批著照所請該部知道欽此仰見

朝廷慎固邊陲撫綏藩服之至意欽感莫名伏維自來籌蒙之策

第主於羈縻弗絕而不欲干預其政令故懷之以德懾之以威已足以遙奉正朔鞏我版圖及至事變相尋爭產累年爲逋負逃亡之漸襲藩重典爲仇殺賄賂之媒因貪而貧因愚而弱遂至有田而不知耕有產而不能治外人以爲利用也又從而煽惑之濟之以軍械假之以錢財無形之患近在眉睫及今整理已等亡羊然或侈言歐美拓殖之功則人事旣未可驟施而財力亦萬難爲繼是必有切實措注之法基礎旣立乃可漸底於成臣等規畫全局審定指歸謹將辦法大綱爲我

皇太后

皇上擇要陳之夫籌畫大局者必先爭形勢之利便洮南一府旣爲哲里木北部之隩區而吉省之伯都訥亦當蒙邊之重鎮運輸之要津有松花江嫩江兩水所會流東北交錯此爲中權至於奉

省邊門爲蒙貨入關要道將來敷設鐵路開拓蒙旗則法庫門爲根據地彩和新甸及臥虎屯之蒙荒必須開辦入手措施當有依據則遼源州爲要點均擬分設機關互相策應斯大綱粗備矣言拓殖者必以交通爲首要蒙旗舊站廢弛不修方域又異今旣以洮南伯都訥法庫門遼源州等處分駐局所擬先於此數路分設驛站每五十里置驛長一員支配弁兵假以警務治理之權區畫方域建築旅舍站中之制附以郵車糧食轉輸文報傳遞皆其職務以次推廣普及全蒙斯築路移民之要政有所依據矣實邊之策在遷民而遷民之效在工築不有室廬何由安集查吉林府甯古塔三姓阿勒楚喀五常堡等地方產木之區凡數十處皆運至松花江而萃於伯都訥擬於該處設一工廠購機截鋸廣儲木材乘洮河水漲卽以運入蒙地各路之購造鐵道之興修價廉工省

便於取攜斯振業實民之要著也現放蒙荒僅顧收價之責成並無墾植之計畫豈能易游牧之性變爲膏腴擬仿普魯士之設開拓移民評議員會收買大農地分割爲小農地先擇新荒一段招致小農計口授地凡土質藝事悉教導之牛犁籽種土木工築均以官力維持標準旣立推行自易此墾務之權輿也行政機關最忌遲緩轉輸征調尤貴敏活擬於各該處先行安設電報而綫路所經宜循站道巡護之事卽以責之驛兵斯消息通矣蒙俗以貨易貨本無錢幣內地所販私鑄幾無價值其受制於羌帖手票者尤爲把持商價包攬債權擬於南北交通之區設立轉運公司爲各站旅店商棧之總部對於銀號有聯合之機對於各站有周轉之責期於接濟糧芻運輸貨物流通紙鈔抵制外幣亦殖業銀行之性質也他若分撥軍隊以防匪患添設官吏以衛民居敷設輕

軌以便運輸開辦實業以拓權利皆須次第舉辦擇要設施然此
第舉大綱就目前人力所能及者急起圖之若夫包舉之略拓殖
之謀則必以大支幹路爲起點若由奉直貫蒙旗以達江省指臂
靈通百事斯集今所計畫力倍功半循是漸進不及萬一然而開
辦之費約需二百萬經常之費約需八十萬徐圖推廣則更待籌
謀苟闢利源則易資周轉東省財力旣不能支庫帑匱乏內外一
致若以款絀之故姑置後圖是徒有經畫之名毫無實行之策恐
外人從而生心其於我籌辦蒙務之事調查旣清進取愈力藉煽
惑而行強迫因干涉而起齟齬貧弱貪愚之蒙旗不盡入外人之
範圍不止是從前熟視無睹者因仍至今幾不知危迫之情形有
如此也是故治蒙之策因他人之覬覦則不可緩知我國所注重
則尤不容緩時勢相逼有進無已度支雖匱理無中輟此固臣等

應擔之責任而尤爲

國家應挾全力以圖謀者也夫籌款之要不過數端一曰飭部撥就各省之財力指定數目爲東省蒙務經費一曰催欠餉各省所欠東省協餉按數速解以濟要需此在部臣疆臣互相維繫深知蒙旗關係重要勉任其難不至以無可籌撥爲解免然非臣等之所敢必也一曰籌借公債公債始行於北洋尙無流弊但必有相抵之的款以示信用一曰息借外債但能明定年限抵還之法藉以開通利源變更榛莽亦爲各國通行之慣例其餘零星籌集挹彼注茲無當於用蓋治蒙之策雖屬責在疆臣而樞部諸臣綜核大綱統籌財政卽論蒙情之危迫而代爲整理之度亦同此心期力圖維繫故僅就東省以合謀則力小而勢亦分合中外以籌議則任專而事易集可否請

正三十一
旨辦理若夫財政困難莫展一籌失可乘之機處相逼之勢進不能競爭以圖尺寸退不能空言以謀保存蒙藩離心形勢失據後患之來禍不旋踵此尤臣等所大懼日夕憂思而不敢不瀝陳於君父之前者也所有籌擬蒙務辦法要綱及分別籌款情形謹恭摺會陳伏乞

皇太后

皇上聖鑒訓示

籌辦奉省學務情形摺

奏爲籌辦奉省學務情形恭摺具陳仰祈

聖鑒事竊維奉省學術不興人才閒散日俄事平興學尤急前將軍臣趙爾巽於光緒三十一年設立學務處創辦各端會將大概情形具奏在案嗣蒙

簡放提學使設立學務公所繼續辦理計前後辦成師範學堂師範簡易科師範傳習所體操專修科格致測算專修科全省實業學堂全省中學堂各一所接收營口日本創辦之商業學堂一所維城小學堂蒙文學堂女子師範學堂各一所官立城鄉兩等小學堂十六所女小學堂藝徒學堂蒙養院各一所草創經營規模粗具臣等到任後督同提學使悉心考求迭加整頓或就其固有而量爲擴充或病其闕略而別爲設備年餘以來規畫略具惟奉省師資缺乏自以注重師範爲第一要義舊有師範學堂僅係初級本科卒業需時而全省校生程度漸高不可不預爲籌畫因遵照學部章程增辦優級選科就師範學堂增建校舍改爲兩級師範學堂卽於本科中挑取學行優美者照章授課已於去年年終畢業預科爲之添延教習增置儀器照學部選科章程辦理將來

成就當有可觀其本科學生仍取各處中學程度較高者補其缺額現在實有優級選科生一百五十名初級本科生一百五十名至舊設之簡易科傳習所命名雖殊功課相類卽爲之歸併一處姑先招集各鄉初等小學暨私塾教員令其補習一面調取各城文理清通之廩增附貢監肄業簡易科俾之培養新知以開風氣體操專修科除去冬畢業兩班外現仍遵章續辦爲之展延學期使圖畫算術諸科亦能兼任其格致測算專修科原係兩班分習查其課程則格致一班旣與實業學堂相類而測算一班又於陸軍附屬爲宜且此項專修科本非學部定章所有因將格致班生歸併實業學堂而測算班生則改入陸軍測繪學堂卽將該科裁撤庶使名實相符實業學堂自歸併格致專修科後生徒增盛大約足爲工業專門之前驅業於去冬畢業預科一班中學堂則因

各城立設較少升學者爭就省城現有生徒三百名去冬已爲增置校地一區俟籌有的款再議建築營口商業學堂亦於去冬加增校舍推廣名額並增設夜課使商家子弟得以暇時來校研求維城學堂係以舊有宗室覺羅官學歸併改辦臣等詳加考察親見肄業各生多有入學未久而文筆斐然者天潢貴胄磊落多才實深慶慰去秋卽爲之推廣名額增添教員今年更加築校舍業已落成計現在住校肄業者實有二百名之多將來按年增加可期普及蒙文學堂舊額止有一班臣等以蒙旗事務日益繁多而譯才乏絕較之歐美語文通達尤罕因於去年通飭蒙古各旗將王公台吉子弟選送來堂肄習漢文漢語兼授科學首由賓圖郡王選送其胞弟二等台吉瑞春及學生五名入堂肄業近據博多勒噶台親王選送台吉兩名學生四名其札薩克圖土默特均在

陸續選送不難漸開風氣其舊有校生亦多有漢文清通而蒙文漸次嫻熟者將來溯源藏焚決不至終古榛荒也其他官立兩等小學蒙養院藝徒學堂女子師範女子小學年餘以來增校增班生徒加多約一千五百人方言學堂臣等於去冬飭司籌設今春業已開校計現設日俄英文三科其德法諸科擬以次遞及前准學部來咨有將各省方言學堂改爲中學堂之議臣以奉省密邇強鄰而士子通習外國文者闕無一二交涉繁夥而外情不通殊爲長慮當經咨請免其改章以資深造想部臣體念時艱必當照准辦理奉省圖書缺乏運載維艱臣等於去年建築圖書館一所特派專司向南省書肆採購新舊書籍陳列駢羅備都人士之閱覽一面於教科各書寬爲儲備各城購置廉價代售課程畫一則隱杜偏衰采鑿易周則不虞固陋在公家所費不過運載之貲經

理之人耳以上各節臣等詳加計畫已得大端雖將來之開拓未可故步自封而久遠之規模已覺初基粗具案查前將軍臣趙爾巽於提學司呈辦各項學堂尙未專案奏咨實因初辦之初章程未臻完密恐有隨時變通之處現在飭司逐加整理隨時改良除將各項章程表冊分次咨部外其所需經費歷年已將學務公所各學堂暨游學各費按次造具細冊咨送學部均係實用實銷其從前奏准之一二成鹽釐暨牛馬稅溢收兩項通計不敷甚鉅自當於稅捐項下核實動支將來遞有擴充再爲隨時籌補此外府廳州縣中小各學並滿蒙漢各旗小學隨時督飭推廣現計有一千四百餘所生徒共四萬五千四百餘人均各屬各旗就地籌款公立除將表冊飭司填送學部查照立案外所有臣等現在籌辦奉省學務情形理合恭摺具陳伏乞

皇太后

皇上聖鑒

奉省八旗官兵俸餉由旗租燒稅發放片

再奉省應放內外八旗官兵俸餉向以本省各項旗租及旗署徵收之山貨釐捐牛馬雜稅等款內抵充嗣因旗署徵收稅款每多流弊經前任將軍趙爾巽先後改歸稅捐局稽徵光緒三十二年冬季又將全省稅務釐章整頓改辦統捐將從前原有山貨釐捐等名目一律刪除併入銷場稅內徵收以致奉省抵充制餉與抵充練餉之款無從分晰現值清釐款項之際自應畫清界限以便奏銷擬請自光緒三十四年正月起凡奉省應放內外城八旗官兵俸餉之款即以本省徵收之各項旗租燒鍋棧票各項帖稅店當稅漁船票稅山繭稅中江稅等款內盡數抵充每年不敷若干

援照歷辦舊章奏請

飭部在於各省關鹽釐地丁項下指款解奉協濟以足餉額惟近年各省關經部指撥協奉餉銀往往解未及半任催罔應奉省物貴時艱八旗官兵異常困苦勢難久待所有不敷之款擬先在於奉省徵起銷場稅款內如數墊撥俟各省關欠餉催解到奉再行撥還歸墊其餘各款概充本省練餉之用除咨部查照外理合附片陳明伏乞

聖鑒飭部立案施行

吉林裁缺主事等員請以對品分別歸部選用片

再吉省請設司道摺內曾經臣等奏明將前將軍衙門印務處併入公署文案處戶司改設度支司兵司改設旗務處刑司裁歸提法司工司分別併入民政司勸業道等因於上年十二月初六日

奉

旨允准在案現在新設各司道及旗務處均已派有妥員分任其事自應將從前額缺分別裁改俾昭畫一計裁撤印務處漢科房戶兵刑工四司額設管檔主事一缺理刑筆帖式二缺無品級筆帖式十二缺委筆帖式三十六缺其銀庫原係附屬戶司該司業已裁改度支司管理該庫額設主事一缺應查照東三省官制改爲度支司六品庫官派員試署該庫設有九品筆帖式二缺並查從前軍署內曾設承辦處筆帖式一缺辦理邊務交涉事宜光緒二十六年經前將軍長順飭令暫行併入交涉局交涉現已設立專司應請與銀庫一併裁改以上統計裁撤主事二缺理刑筆帖式二缺九品筆帖式二缺無品級筆帖式十三缺額委筆帖式三十八缺惟各該員等從公有年不無勞勩現因改制裁缺自應量

予出路擬請援照臣世昌等前次奏准江省裁撤各司主事筆帖式等缺歸部給予出路成案將各該員等均以對品分別歸部選用其未經改就以前仍請給予原俸如原有陞階者並請按照陞階辦理以示體恤此外尙有捐納及勞績保舉額外委筆帖式人員爲數甚多擬仍俟倉站邊門筆帖式缺出分別補放以資登進再上年銀庫筆帖式明和病故遺缺曾揀以補用筆帖式貢生委筆帖式德申補放未及送部適逢裁改應請作爲實缺合併聲明除將各員履歷咨部查覈外謹附片具陳伏乞

聖鑒

奉旨設立禁煙查驗所摺

奏爲奉省設立禁煙查驗所謹將辦法情形恭摺具陳仰祈
聖鑒事竊維禁煙一事爲

國家惟一之政令必應切實奉行乃能力振頹靡掃除痼疾故限制種煙者以清其本尤必嚴禁吸煙者以遏其流臣等迭次嚴飭所屬地方既於種煙之戶挨次清查列表填註頒發白話告示使編氓有所感悟又飭各屬設立戒煙所如瀋陽遼陽復州新民懷仁義州遼中鐵嶺等處均已次第設立冀以漸次廓清惟官吏爲齊民表率凡政界軍界學界各員尤應從實查驗俾無欺飾臣等於上年秋間已分發戒煙諭冊由臣等本身作則書名簽押飭各屬長官加結具保以昭慎重猶恐或有不實以致日久玩生恭奉

光緒三十四年三月初七日

諭旨於京師設立禁煙所特派禁煙王大臣專司其事期於切實施行奉省亦應照辦以嚴功令臣等因飭民政部司使張元奇詳議章程尅期設立茲已於五月二十八日擇地開辦禁煙查驗所臣

等卽檄飭該司使兼充總辦以專責成並派檢查員以司察核招待員以資照料其醫士之檢驗藥料之支配均經悉心考訂無少欠缺凡入所查驗之員分定班數視吸煙之淺深定期限之多寡由醫官檢查員公同具結始爲不吸之據其有自稱戒斷查驗不符卽將差缺開去仍勒限戒斷如有隱匿不報查驗得實再行奏參革職以示懲儆所中飯食服御由公家代備月餘以來頗覺整肅官場積習爲之一振嗣奉禁煙王大臣來咨頒發章程表式通飭遵照填註臣等詳加查閱現在奉省辦法與所頒章程大致相同所有表式自應逐項填註已飭民政部切實辦理該所應用額支活支各款均飭令樽節動用爲數無多應請作正開銷除先將章程咨送並按照表式填註再行咨覆禁煙王大臣外所有奉省設立禁煙查驗所辦法情形理合恭摺具陳伏乞

皇太后

皇上聖鑒

札賚特旗梅楞聚眾阻撓荒務戕害蒙員請 旨飭拏摺

奏爲札賚特旗梅楞聚眾阻撓荒務戕害蒙員請

旨飭拏以警效尤而維墾務恭摺仰祈

聖鑒事竊維開放蒙荒爲今日籌邊要策亦爲今日困難之端蓋蒙員錮蔽成風一聞招民放荒非故意阻撓卽百端抵抗持之過急輒慮變生然亦必激刺多端辦理失宜始聞釀成他故未有事未開辦而禍及同族如梅楞綽克大賚其人者查光緒二十九年至三十一年間前次辦理該旗荒務該梅楞卽橫生阻力多方爲難曾經捏控該旗札希魯克齊格綳額藉端謀利私放蒙荒是其處心積慮有意抗阻已可概見故此大續辦該旗荒務經臣德全

附片奏明後卽派員與該旗商明由署札薩克將前次來省商辦
荒務之梅楞哈豐阿委充蒙局總理并將綽克大賚委充幫辦以
弭隱患而安反側不意綽克大賚罔知悛改愈肆鴟張本年七月
初三四等日迭據續放札賚特荒務行局總理依順保幫辦阜海
等呈稱綽克大賚聚眾多人聲稱與哈豐阿爲難嗣據哈豐阿函
稱奉札薩克飭令先至綽克大賚家內商派蒙員差使綽克大賚
卽帶領蒙民台吉阻撓儻遇難請代白寃抑等語旋又據哈豐阿
之弟何蒙格先後到局報稱伊兄哈豐阿到綽克大賚家內不容
分說卽被用人看守並稱由綽克大賚倡首集眾至二百餘人乘
馬持械將哈豐阿擄掠隨行恣意凌虐於本月初二日擁至呼蘭
圖屯初三日眾台吉等竟將哈豐阿綁赴屯西二里許用快槍擊
斃並威嚇何蒙格令將尸身拉至王府並與省局驗看等情先後

呈報前來臣等伏查上年因前戶部咨詢該蒙荒務維時臣德全
咨調蒙員到省磋商一切適哈豐阿奉派來省與議不過僅允回
旗稟商卽此次承允放荒亦係該旗署札薩克來文允許非哈豐
阿所能擅專況此番展放蒙荒屢經省中派員往返磋商於生計
則允爲酌留於廟產則曲爲遷就總期彼此兼利曾何損於該蒙
且荒務甫經設局尙未開辦乃綽克大賚叵測成心蓄意抵抗竟
敢目無法紀聚眾持械槍斃辦荒蒙員現當

朝廷整理邊務正議開拓蒙荒之際非嚴拏懲辦不足以警將來
惟驟派多兵前往鎮攝又恐激成事端除批飭該處行局就近詳
查有無起衅別情並暫行持重辦理免生他虞相應請

旨飭下理藩部迅速嚴飭哲理木盟長並該旗署札薩克趕速將
該梅楞綽克大賚及此次網縛哈豐阿並下手擊斃之人一併嚴

拏解省以憑究辦而申國紀所有札賚特旗梅楞阻撓荒務戕害
辦荒蒙員請

旨飭拏緣由除一面咨行該旗嚴拏解案外謹恭摺具陳伏乞

皇太后

皇上聖鑒訓示

江省建立圖書館摺

奏爲江省擬建圖書館以廣庋藏而開風氣恭摺具陳仰祈

聖鑒事竊維時局日新政學遞變非博通古今之故則用有所窮
非並讀東西之書則才難應變近日歐美各邦競尙文化一國之
內藏書樓多至百數十所卷帙宏富建築精良於以盡圖籍之大
觀資學人之參考洵盛事也江省僻處邊隅罕沾文教城市之間
書坊絕少村塾之子論孟不知近日學務甫有萌芽鼓篋之士略

見海外譯書學堂課本經史三冊無可尋求若不設法提闡學風
購求古籍即使學堂漸立教課如程誠慮篤守方隅稍識粗淺之
新書不聞精深之義理根柢不固智識不完其影響於風俗政治
者所關甚鉅伏查學部奏定各省學務官制內稱圖書館亟須籌
設江省原有圖書館向僅租屋數椽市廛湫隘冊籍不全非擇地
另修無以廣儲藏而資披覽現於省城西關外勘得原有古廟基
址擬改建圖書館一區屋式略求寬敞並添修藏書樓檢發室閱
覽室以期完備一面派員廣購經史子集各種書籍並東西各國
圖書譯印精本其在京各衙門及各省官書局刻印各書擬即咨
由各處寄送以餉邊區並由臣等派委專員管理分別收儲詳定
規則聽人入館觀覽所冀積軸填委學理昌明國粹藉之保存人
才因而輩出似於補助教育啟發民智不無裨益現已派員鳩工

庀材所有建屋購書各款一俟事竣應請作正開銷除分咨外所有江省擬建圖書館緣由謹恭摺具奏伏乞
皇太后

皇上聖鑒

遵 旨覆陳勻定公費摺

奏爲遵

旨覆陳恭摺仰祈

聖鑒事竊承准軍機大臣字寄光緒三十四年五月三十日奉

上諭有人奏請勻定州縣公費以期久任而飭吏治一摺著各直
省督撫體察本省情形分別妥籌奏明辦理原摺著鈔給閱看欽
此遵

旨寄信前來具仰

正書卷一
三三
朝廷重祿勸士整飭官方之意臣等伏查我

朝廷重祿勸士整飭官方之意臣等伏查我
朝廷定鼎之初百官俸祿悉仍舊制繼以例定俸入太微於各直省
文官歲給薪菜燭炭心紅紙張案衣家具修宅銀各有差是爲外
省官吏公費之緣起雍正間復令各省將州縣火耗一項嚴行裁
汰酌留耗羨撥給督撫以至正雜各官藉資養廉著爲定額是爲
勻定外省官吏缺分之緣起仰見

列聖宏謨固無時不以重官祿恤民艱爲急務也惟內地各省治
理日繁要需日夥額定廉俸仍苦不敷其必需之費用不能不取
求於地方地方州縣遂或藉種種漏規爲彌補之計其取予大權
旣非公家所自操弊害所極誠有如原奏所稱疆吏而賢已不勝
調停委曲之煩疆吏而不賢則鑽營奔競瞻徇賄賂之弊罔不由
此而生者邇年江省新設民官力矯斯弊光緒三十一年奏定本

省設治章程所有新設道府同通州縣正雜各缺均參照吉奉新疆等省酌定廉俸銀各有差此外承辦處員司薪工及衙署人役工食亦均分別酌定並請俟整頓各項捐稅倘有贏餘再議酌加津貼至初年設治先行酌定辦公經費由荒價稅契項下開支一俟照章支給廉俸時卽行停止迭經先後奏准遵行在案嗣於三十一年因設治一年期滿正擬照章支給廉俸適奉釐定外省官制之

諭彼時因官制既有更張廉俸亦應統核又經續請仍照初年設治經費開支一俟釐定官制章程奏准頒發後再行欽遵辦理等情亦復奏奉

允准施行各在案臣等查江省道府廳縣各官當日奏定辦公經費本因官階秩級地方繁簡酌中擬定其陋規業已早經嚴禁其

款目俱由正款開支核與原奏所稱酌定公費俾爲州縣者祇知有國家頒給之公費不復知有本缺相沿之陋規等語適相符合惟江省比年百物奇昂原定地方各官公費因邊荒款絀定數太微未能垂爲定制臣等於本年五月奏請添設本省各缺欽奉硃批會議政務處議奏欽此擬俟議覆到江再由臣等統計本省財政一律另定養廉請

旨著爲定章其地方各官如敢收受陋規自當由臣等隨時嚴加參劾其恪守官常者應令久於其任俾有實惠及民臣等職司表率萬不敢稍有瞻徇致負

朝廷德意所有遵

旨覆陳緣由理合恭摺具陳伏乞

皇太后

皇上聖鑒

遵 旨查覆陶鏞被參各節摺

奏爲遵

旨查明前署綏中縣知縣留奉補用知府陶鏞被參各節據實覆
陳恭摺仰祈

聖鑒事竊於光緒三十四年六月初十日承准軍機大臣字寄光
緒三十四年六月初四日奉

上諭有人奏奉天前署綏中縣知縣陶鏞避過邀功草菅人命請
飭根究一摺著徐世昌調齊卷宗秉公查辦毋稍徇隱原摺鈔給
閱看欽此欽遵寄信前來遵卽檄飭提法司密派妥員前往將原
參各案卷宗全數調齊按照所指各節詳細查覆去後茲據該司
委署民事科一等科員留奉補用知縣趙炳燊馳往綏中調齊各

案卷宗確切查明稟請核辦復經該司因有應行查訊之王德勝一犯現在甯遠州寄禁札委署審判廳刑事庭長准補金州廳同知孫長青前往訊取供詞呈由該司核明呈覆前來謹就查明情形證以案牘逐加覆核如原奏所參前署綏中縣陶鏞在署任內有正法劉甸臣一案該犯與王德勝兩犯同時犯竊形跡可疑經巡警帶區究詰稟送到縣原稟尙在卷中陶鏞竟用非刑逼令該犯等頂認搶劫盧文翰家騾馬一案該犯等並未供認陶鏞卽將該卷提入密室僞謂經伊埋伏進兵始將該兩犯格獲並誣稱劉甸臣於臨拏時開槍拒捕傷兵各等語捏供捏押將劉甸臣稟請正法王德勝永遠監禁當時闔縣驚訝均謂劉甸臣係由巡警局緝獲陶令並未派兵亦未拒捕何得引爲此案正賊一節查綏中縣張安屯盧文翰家於光緒三十二年十一月十二日夜被劫維

時南鄉巡警局區長楊景餘等聽聞槍響跟踪追捕行至與張安屯相近之打雀莊南見有二人行走慌忙躲避正路楊景餘等攔阻盤詰言語支離當將二人帶至巡警區究詰據稱一名張德一名王德勝在張德身邊搜出腰別槍一桿王德勝身邊搜出掀把槍一桿送經該署縣陶鏞訊明張德本名劉甸臣前曾犯事獲案因供甚狡展卽經勘驗飭據捕盜營外委趙克銘追獲原贓騾馬傳主認領復迭次審訊始據劉甸臣供認聽從逸賊張承德夥同王德勝等行劫事主盧文翰家騾馬張承德等放槍拒傷事主伊與王德勝在外把風不諱陶鏞將劉甸臣稟請正法並謂王德勝一犯僅認在村外等候與劉甸臣供詞不符難保無避就情弊隨案聲請永遠監禁經前將軍趙爾巽批准照辦在案該犯前曾犯事獲案本非善類其所供行劫盧文翰家上盜情形與所劫贓數

均與事主報案相符初次所認供詞實係當堂自印指摹爲書役人等所共見其爲正盜無疑並無非刑逼令頂認情事惟王德勝一犯附卷之供實不可靠此次孫長青前往復訊該犯謂伊與劉甸臣途遇同行致被一併拏獲伊之撇把槍亦係劉甸臣交給令伊代爲攜帶伊實無與張承德等同夥搶劫情事係被劉甸臣誣扳前在綏中亦未承認等語至該犯等係由巡警局區長楊景餘等盤獲委無開放洋槍拒傷巡兵情事陶鏞稟請正法文內聲稱區長楊景餘等係伊調令捕拏並謂劉甸臣於臨拏時連放兩槍拒傷巡警實係自行裝點張大其詞爲巡警等請獎地步又原奏所參正法龐幗明一犯該犯係經巡董王希聖以水賊送縣是否水賊尙無確據而陶鏞一味刑逼令其頂認王希聖所開福盛隆被搶一案查王希聖平素武斷鄉曲素與龐幗明同里居住果係

搶鋪正賊王希聖豈有不稟請嚴辦之理乃僅謂係水賊並未連及該鋪被搶一字而陶鋪亦均捏供捏押鋪張具稟請准正法一節查光緒三十二年九月十六日夜上燈時分綏中縣前衛福盛隆糧鋪被賊捏稱買換銀圓闖門入室持槍嚇禁聲張劫去銀圓等物逃逸當經區董張維翰等報縣詣勘差緝旋據王希聖會同區長王鴻恩緝獲水賊龐幗明一名送縣陶鋪向其究詰該犯供認迭在沿海一帶搶劫並聽從逸賊程桂林等假裝買銀夥劫福盛隆糧鋪入室搜贓屬實復經陶鋪稟准正法該犯落膝初供確係自印手摹其所供行劫福盛隆糧鋪一案上盜情形厯厯如繪月口賊數亦與事主報案相符若非案內正盜斷不能言之如是之親切原參謂係逼令頂認當無其事況龐幗明係綏中縣剝黃溝人與王希聖居住之韓家屯相隔十里開設福盛隆糧鋪之前

正書卷一
三二
衛相隔二十里並非同里居住王希聖等送犯原稟本有龐幗明
在海內搶劫出沒無常之語其所以並未連及該鋪被劫一字者
當時並不知係該鋪被劫案內正賊又原奏所參龐幗明一案隨
稟請獎一員而劉甸臣一案隨稟請獎至十一員之多嗣於前年
十二月陶鏞聞有交卸署篆信息適值所請奏咨各獎奉准到縣
轉行始將所捏供招補行附卷然時在年終房書所呈堂單及照
謄供紙均繕具當時月分係十二月字樣陶鏞竟用硃筆將二字
改作大寫壹字並用紙毬偽作劉甸臣王德勝兩犯指押又用筆
塗作龐幗明指押於該犯供紙上附入卷中希圖掩飾彌縫以致
人心不平怨聲載道該本管錦州府知府孫壽昌頗有所聞屢行
查問而陶鏞恐露破綻遂於光緒三十三年十二月間會密遣伊
戚至綏中縣賄買房書希圖焚卷滅跡房書不允以致外間益爲

不平一節查龐幗明一案隨案請獎者係會同王希聖緝獲龐幗明之區長王鴻恩一名劉甸臣一案稟請給獎者係獲犯之巡警區長吳安邦楊景餘追獲盜賊之捕盜營外委趙克銘營兵沈蔭棠張承德任斌崔振國李榮辦理警務出力之課員周光藻書記員國慶區董王俊清共十一名均經前將軍趙爾巽酌給五六品功牌並無奏咨請獎之案房書所呈劉甸臣覆訊堂單實係十二月字樣由陶鋪用硃筆將二字改作大寫壹字龐幗明黏卷有供詞三紙所供情形大略相同劉甸臣黏卷有供詞兩紙王德勝僅有供詞一紙劉甸臣初次供內僅認聽糾夥劫得贓與王德勝在外把風至覆訊供詞始有臨拏拒捕之語劉甸臣與龐幗明初供均皆印有指摹其覆訊供詞與王德勝之供所印實非指摹是否用筆及紙球偽造不得而知察核覆訊供單顯係事後補行附卷

至劉甸臣龐幗明兩犯訪之輿論實爲案內正盜陶鏞將其正法
罰當其罪並無人心不平怨聲載道之事該管錦州府知府孫壽
昌亦無所聞此次委員趙炳燊提訊承辦書吏光緒三十三年十
二月間陶鏞亦無密遣伊戚至綏中縣賄買房書希圖焚卷滅跡
情事原參恐係傳聞之誤此查明陶鏞被參各款之實在情形也
臣覆查前署綏中縣知縣留奉補用知府陶鏞審辦劉甸臣龐幗
明兩案已確切查明並無枉濫察核各供亦均供認實係正盜無
疑但將該犯等覆訊以後並不令其當堂畫押事後用他物偽造
指摹將供單補行附卷而於王德勝一犯又不訊出實情輒因劉
甸臣供扳竟捏造供押稟請永遠監禁辦理已嫌草率且劉甸臣
王德勝兩名係由區長楊景餘等聽聞槍聲往查中途盤獲陶鏞
稟內謂伊聞信三路派兵追捕飛調楊景餘等兜拏並添入劉甸

臣放槍拒捕始行格獲等詞爲巡警捕盜營請獎至十一名之多尤屬任意鋪張殊非核實辦公之道其朦蔽取巧欺飾邀功實難辭咎應請將前署綏中縣知縣候補知府陶鏞卽行革職以肅官方至王德勝一犯雖於行劫盧文翰家一案堅不承認惟時已深夜該犯攜帶洋槍與劉甸臣同行情節究屬可疑據稱與劉甸臣係屬途遇洋槍亦係劉甸臣交給旁無質證難保無避就情事且該犯獲案將及一年並無一人具保其爲並非安分之徒可知自未便遽予省釋應飭現任綏中縣徐埏芝查訊明確另行擬辦劉甸臣等案內所發功牌卽予一併撤銷俾杜冒濫所有查明前署綏中縣知縣留奉補用知府陶鏞被參各情形謹恭摺覆奏伏乞皇太后

皇上聖鑒

退耕堂政書卷十七

退耕堂政書卷十七

退耕堂政書卷十八目錄

奏議十八

設立東三省陸軍軍醫局摺

奉省添設長白府治摺

吉省創辦蠶桑山蠶各局摺

吉省籌辦各項學堂情形摺

吉省建造方言學堂經費核銷片

吉省設立憲政調查局經費作正開銷片

吉省開辦各級審檢廳遴員試署摺

吉省公倉隙地建築兩級審檢各廳片

吉省創設實業學堂摺

吉省遵設法政學堂摺

吉省設檢驗傳習所作改爲檢驗吏摺

吉省煙酒稅課第二屆收支數目請銷摺

吉省木植稅款第二屆動存數目請銷摺

設立各屬視學官停止教職銓選摺

奉省軍需局改爲東三省軍械局片

籌擬恭迎 玉牒禮節暨應行預備事宜摺

附單

退耕堂政書卷十八

天津徐世昌

奏議十八

設立東三省陸軍軍醫局摺

奏爲奉省設立東三省陸軍軍醫局謹將籌辦情形恭摺具陳仰祈

聖鑒事竊維軍隊駐紮處所衛生一道最關緊要臣等前於奏設東三省督練處摺內曾聲明開辦軍醫局等情仰蒙

俞允在案查軍醫局定制凡一軍兩鎮卽應設立如鎮數加增局內員司亦遞照增設以敷用爲度調東陸軍第三鎮第一第二兩混成協新編奉天陸軍步隊一標附礮隊一營暨吉林原有之陸軍步隊一協合計已兩鎮有餘軍醫局事關要政未便視爲緩圖

勘得奉天省城西下窪地方去夏經日人退還之子藥庫地址平曠遠於市廛以之改設陸軍軍醫局尙屬相宜惟房間大半殘破自非重加修理不足以資應用而重衛生現在財政困難既未敢稍事鋪張亦未便過形狹隘統計改修堂舍房屋一百一十餘間一應工程尙無冒濫並照章設總辦官一員以董其成設軍醫馬醫司藥等官以分其責維時第二混成協附紮奉天省垣兵隊初到防次未及月設醫院凡目兵疑難病症爲隨營中醫不能療者卽送入該局醫治此外新編軍隊與同在省會之各局所學堂就近送診者頗多成效旣著規模卽不能不稍事擴充自應增設員司暨加給醫兵護兵等餉銀皆斟酌損益無敢允濫並附設醫學研究所一處以資討論計開辦一切購置器具修蓋房屋等費已用過實銀三萬二千七百九十兩經臣等飭由奉天度支司於部

撥協濟鏹餘項下動用應請准作正開銷其額支活支常年經費約需銀二萬三千二百餘兩將來卽歸入陸軍案內每屆年終奏報一次並於第一次銷案將該局用過開辦等費片由糧餉局詳造細數清冊咨報除將試辦章程分咨陸軍部度支部查照立案外所有設立東三省陸軍軍醫局緣由理合恭摺會陳伏乞

皇太后

皇上聖鑒

奉省添設長白府治摺

奏爲奉省東北邊境遼闊交涉日繁擬請添設府治以固邊防恭摺仰祈

聖鑒事竊奉省臨江縣上負長白山下界輯安北連吉林廣袤八九百里幅員遼闊治理難周故設治雖歷數年內力多未完實其

毗連吉林各處向爲鬍匪出沒之區岡巒互延界址錯雜捕務尤易推諉且該縣與朝鮮祇隔鴨綠一水自日俄戰爭以後韓民僑居日眾時生事端木植江防動滋交涉近來隔岸韓境日人設廠置屯日臻嚴密該縣轄界旣遠權望亦輕內外交乘治理必愈形竭蹶亟應添設府治以資控馭伏查長白山爲

聖武發祥之地尤應謀完全永固之基事機已屬後時籌辦豈容再緩自上年冬間迭經派員履勘擬劃臨江縣以東長生慶生二堡之地及吉林長白山北麓龍岡之後添設府治名曰長白駐於十八九道溝間之塔甸現已派員前往調查開通道路建築房舍籌辦一切略有端倪應請查照上年原奏及吉林新設蜜山府奏案不領屬縣將來地闢民聚應否再行添設縣治俟察看情形隨時籌辦設治以後應如何勘定界址酌設佐官明定廉費建築衙

署監獄添撥防兵續爲籌議再行奏咨立案至該府係邊疆重要情形與內地不同非諳練邊情勤奮耐苦之員斷難勝任如蒙俞允擬請由臣先派設治委員前往籌辦如能勝任再行奏請補署以裨地方所有奉省東北邊境遼闊擬請添設府治緣由理合繕摺具陳伏乞

皇太后

皇上聖鑒訓示飭下會議政務處核議施行

吉省創辦蠶桑山蠶各局摺

奏爲吉省創辦蠶桑已有明效並推廣飼養山蠶以闢利源恭摺具陳仰祈

聖鑒事竊查東三省夙號農國森林最富而桑株絕少蠶織亦未前聞臣等以爲江流環繞奧區上腴自係沃土宜桑不應以氣候

稍寒而異視之且與奉天壤地毗連奉屬海城蓋平等縣民間擅山蠶之利饒於耕耨吉林則椽榭成林被山緣嶺居民竟昧於放養坐棄利源官吏之倡導不先不能盡爲蚩蚩者咎也臣等上年奏報吉省應行要政逐漸措施摺內曾將試辦蠶業一節陳明在案旋於松花江南岸闢地一區設立蠶桑局查有前安徽南陵縣知縣傅毓湘誠樸耐勞久官南服於藝桑飼蠶諸法研究有素檄飭總司其事並令前赴浙江購運桑秧蠶種延聘杭州蠶學館畢業生偕來指授復於附近移植山桑藉資比較該處去省垣僅隔一江臣家寶於治事之暇時亦親往巡視又委員設立山蠶局並於省垣左近之歡喜嶺及伊通磐石等州縣椽榭最多處所擇地闢場購覓山蠶繭種雇工布放招集本地農戶演說參觀以資勸動均札由新設之勸業道管理考察茲據該道詳稱春融以來兩

局漸有頭緒蠶桑局新種桑秧八萬餘株交夏後得雨暢茂居然發葉抽條移植山桑均一律青蔥可愛由杭運到蠶種亦依法起眠上簇結繭抽絲除節候較南省稍遲外光色斤兩實與杭湖產絲無殊刻仍飭工人加意培壅修翦桑條並出示曉諭飭令各屬農民屆時領秧試種以期逐漸仿行其歡喜嶺伊通磐石等處放養山蠶本年結繭頗多色澤雖遜湖蠶然用以織綢堅韌耐久當與豫屬魯山黔屬遵義所產貨品無異現鄉民目覩利益紛紛乞領繭種以爲來年放養之地一面由局員增設繅場教授紡繅織染等工務使遠近觀摩愈推愈廣等情詳請

奏咨並呈送絲樣前來臣等詳加考驗益覺蠶桑之利率土皆同祇以提倡乏人遂致利源莫闢今該兩局於種育各事經理既尙合宜蠶桑局所出絲斤繭質亦可與南產相埒能致鄉民欣羨山

蠶工本尤輕推行益易爲力雖目下風氣甫開須借官力以示標準而民人見利必趨異日之擴充發達實可於此時基之委員傳毓湘苦志經營不辭勞瘁其功似不可沒應俟蠶業推廣後再行奏請從優獎勵以昭激勸至設場建屋置辦器具及常年需用經費均係覈實動支需款無多應請作正開銷由臣等片案造報除咨部查照並將絲樣附送陳列所外所有吉林試辦蠶桑已有明效現擬推廣緣由理合恭摺具陳伏乞

皇太后

皇上聖鑒

吉省籌辦各項學堂情形摺

奏爲籌辦吉省各項學堂大概情形恭摺仰祈

聖鑒事竊惟育材之道非一蹴所能造其極而故步自封則窮年

亦難求進境吉省地處邊疆開通較晚自光緒三十二年四月將崇文書院改設師範學堂先後考取學生二百名分完全簡易兩科肄業並附設高等初等兩等小學學生八十名是爲吉林開辦學堂之始然彼時寄宿無舍教員無人屢考屢散難得一學期卒業之生殊非所以育材也臣等抵任後以學務有陶鑄國民轉移風化之權經費雖極支絀而事關培育人材不得不併力經營勉爲措辦當卽籌建中學堂一百餘間定學額二百名並於各處分設兩等小學堂自第一至第十一邇來各學生亦頗知以就學爲榮惟教授管理之法諸未劃一又籌設模範兩等小學堂一所建屋五十餘間考選學生百名以樹小學之楷模外屬師資無人不免因陋就簡將上年師範簡易畢業生一百名飭司分派各屬暫充小學教員一面調查鄉鎮私塾隨發改良章程以謀教育之普

及又家庭爲育德之始基則女學宜亟圖也設女子師範學堂建校舍四十餘間定額四十名以女子初等小學百名附入肄業言文爲交通之利器則滿蒙文宜並重也設滿蒙中學堂就蒙旗官房改造校舍四十餘間定額四十名並咨會郭爾羅斯公選送該盟子弟來吉肄業綜計省垣年餘以來宣講所已設十餘處各堂學生已增至二千餘人其進德之猛實爲意料所不及此外如長春新城賓州雙城農安等屬均能爭自濯磨絃誦之風儼同內地卽簡僻如延吉依蘭綏芬臨江等處亦皆聞風興起不願自安固陋倘能寬以歲月奮興之機殆未可量臣等默察吉省情形開化較遲而進步較速蓋民氣之強有由來矣茲據提學使吳魯詳請具奏前來臣等覆查無異除各堂統計冊表均照章隨時造送咨部查核外所有創辦各項學堂大概情形理合恭摺具陳伏乞

皇太后

皇上聖鑒

吉省建造方言學堂經費核銷片

再吉省前因交涉日繁需才孔急非造就譯材不足以資任使經前署將軍達桂於上年四月間奏請設立外國語言學堂肄習歐亞方言飭派前翰林院編修貴鐸充當監督並聲明該堂薪資工食各項零費作正開銷等因奉

硃批該部知道欽此欽遵在案嗣因建築校舍經費不敷因就吉省舊有機器局空廢房廠修改設立並改名爲方言學堂計先後修理堂舍一百餘間應需工料錢四萬六千六百九十四吊九十九文又購買棹椅操衣鋪墊等錢一萬二千五百七十八吊七百元置備圖書儀器及教科書等錢三千七百二十七吊二百一十文

共用吉錢六萬三千吊合銀一萬三千六百九十五兩六錢五分二釐二毫當由該堂監督呈請提學使派員勘驗均係工堅料實實用實銷並無浮冒等情備具冊結詳請奏咨前來臣等覆覈無異除將詳細冊結咨部查照核銷外所有吉林改建方言學堂動支經費緣由理合附片具陳伏乞

聖鑒再前准學部咨行未設方言學堂省分不必再立等因查吉林省該學堂係於上年四月未奉部咨先已設立合併聲明

吉省設立憲政調查局經費作正開銷片

再准憲政編查館咨奏准飭各省設立憲政調查局由督撫派員經理等因咨行前來查吉林初設行省風氣未開文獻無徵有同草創而疆里扼塞籌備尤不容緩是調查一事以吉林爲最難亦以吉林爲最要固地勢使然矣臣等就省垣原設之政治考察局

改爲憲政調查局檄委奏調吉林差遣學部郎中馬濬年爲該局總辦開辦之初所有各科員股員自應慎選分任而邊地之才究難一一求備至局中辦事規則及一切組織機關編造表冊均經該總辦詳細擬議由臣等按照館章核定飭遵惟是調查項下有記錄實地兩方法吉省則各官署文牘向稱缺略卽昔賢紀載之有關掌故者尤較內地爲稀是欲搜集資料非注意實地調查殊無下手之方因於該局內附設編譯處並選集士紳常川擔任調查事務以廣報告而邊境人材銷乏求於政治素有研究並諳習編輯體例者殊不多覲則又非養成學員不足供橐筆之選因附設調查員養成所以資培育此皆因地制宜之不得不然者也所需經費現暫由餉捐項下借撥均飭令核實動支應請准作正開銷並刊給木質關防開局試辦除將所擬章程咨送憲政編查館

查照外理合附片具陳伏乞

聖鑒

吉省開辦各級審檢廳遊員試署摺

奏爲吉林開辦各級審判檢察廳遊員試署情形恭摺仰祈

聖鑒事竊光緒三十三年五月二十七日奉

上諭各省按察使改爲提法使分設審判廳著東三省先行試辦等因欽此仰見

朝廷於變通舊法之中仍寓審慎新章之意嗣經法部大理院以奏准京外各級審判檢察廳職掌事宜各摺片咨行到吉自應遵照辦理竊謂司法機關以保護社會公安爲專責明是非伸曲直事體本極重要亟宜與行政官分途辦事斯法權乃能獨立查此次部院奏定章程綱舉目張有條不紊當經札飭提法司吳燾參

酌本省情形悉心組織逐漸推行惟是吉林未設行省以前無綜核刑事專官牧令聽斷粗疎案件積壓百端待理非先行清釐積案大紓民困不足以端本源而邊地材乏法吏更少專家又非養成審判法員不足以供任使臣等抵任後一面督飭該司嚴定府廳州縣詞訟月報章程分別懲獎以警疲延就原設之裁判所改爲高等審判廳附設審判講習所飭令候補投効各員分班肄業本年三月遵章明定職權復籌設地方審判廳一所其初級審判廳原以吉林府轄境遼闊擬設四所現暫設兩廳將來再行推廣以上各廳均各附以檢察廳業已分別選賃官房民屋於本年五月初一日一律開辦其各屬應設之審判廳亦卽以次推行再查高等審判掌理全省上訴案件地方審判掌理吉林府轄境民刑訴訟之不屬初級者初級兩廳按照省城巡警區域劃分界址各

理其區內應理之事吉林一府現既設有法庭該府自應專任地方行政事宜以清權限其招解勘轉等件係審判廳之案卽由該廳逕行解司不必由上級審判廳勘轉吉林府所屬之伊通州敦化磐石兩縣均一律改與法司直接未設審判廳之處仍照向章辦理其秋審一項乃中國刑事中特別大典奉省已奏明仍存舊制吉省亦應照辦以歸劃一至於任用法吏非得精明幹練之員不足以資倚畀茲於奏調候補各員內遴派直隸候補知府戚朝卿試署高等審判廳廳丞候補道史菡試署高等檢察廳檢察長候補同知王炳文試署吉林府地方審判廳推事長候補同知李廷璐試署吉林府地方檢察廳檢察長其餘各廳員均經詳細甄擇由司呈請札委日後各該員果能稱職再行開列銜名分別請旨簡授並奏請補署以昭慎重又吉省監獄亦亟須改良現經該

司參照日本制度在新建司署之旁建造監獄一所足容罪犯百六十人擬即定名為吉林省獄並令佐班各員習監獄學分科教授學習管理事宜其各屬監獄亦均分飭設法修改以恤囹圄除將各項章程規則分別咨送法部大理院立案外所有吉林開辦各級審判檢察廳遴員試署情形理合恭摺具陳伏乞

皇太后

皇上聖鑒訓示

吉省公倉隙地建築兩級審檢各廳片

再吉林省垣設立各級審判檢察廳前因亟於開庭暫賃民居應用湫隘不敷自應籌款另建方符規制查省城巴爾虎門內有隙地一區係屬公倉官地當飭提法司會同旗務處丈撥去後旋據復稱丈得東自巴爾虎門內大道起西至永甯倉倉房止計長三

文書卷八 奏議

十二丈南自提法司署後面官道起北至城牆止計寬二十八丈足敷建造兩級審判檢察廳之用又迤西永甯倉倉房前面尙有隙地一段計南北寬七丈東西長二十二丈足敷建造地方審判廳看守所之用其隙地內有公倉管理人等住房八間擬卽代爲移建工費由司墊發併案報銷至原有倉房查明已敷建築暫不動用等語查公倉隙地旣合建築兩級審判檢察廳及看守所之用原係以公濟公自應丈撥且該地毘鄰司署併可就近監察已飭一律開工俟工竣後再行造報除咨民政法部立案外所有撥給公倉隙地建築省垣兩級審判檢察各廳緣由謹附片陳明伏乞

聖鑒

吉省創設實業學堂摺

奏爲吉省創設實業學堂以厚民生而圖本計恭摺仰祈
聖鑒事竊臣等前准農工商部咨行御史成昌奏准通飭各省推
廣實業學堂一摺並准學部咨行各省籌設中等初等各項實業
學堂等因仰見

朝廷務材勸農通商惠工之至意查吉省幅幘廣博土脈膏腴物
產之饒爲全球所注視祇以風氣樸僿提倡乏人以致利源莫闢
貨棄於地臣等抵東後默察吉省情形鐵軌交錯商埠競開同處
闐闐之中不能周知百貨之盛衰及異域之性情嗜好必無以操
其奇贏則商業宜亟講求也森林之富經數千年之磅礴鬱積以
供今日斧斤製造之需加以濩茸之珍皮毛之利轉輸及遠挹取
無窮則農業工業宜亟講求也據松花嫩江之流域浸潤灌輸魚
族之繁網罟之便外人臨淵生羨則航業水產宜亟講求也願論

形勢之爭競並駕已嫌其遲而劑財力之盈虛兼營實有不逮吉
省除吉林長春兩府賓州榆樹農安等廳縣尙稱繁盛外此外各
屬求其戶口蕃殖人知嚮學者殊不多觀邊瘠情形迥殊內地刻
欲振興實業惟有就省會地方首先設學以期樹厥風聲徐圖進
步臣等現在省垣東關外設實業學堂一所仍由提學司管理並
檄委候選道陳繼鳴爲該堂監督暫定學額一百六十名惟實業
待興甚亟自應遵照奏定章程變通考選先習豫科二年後再行
考驗擇其質性相近者分入農工商本科學習以資深造而期成
材其修業年限並卒業時獎勵均請比照中等實業學堂辦理該
堂開辦經費計建築營造並購置圖書標本器具等項共用銀五
萬九千餘兩常年經費每年約需銀五萬兩均由司陸續墊發一
俟籌有的款再行造冊報銷其餘各屬實業學堂容隨時督飭寬

籌經費分別設立除分咨農工商部學部立案外所有吉省創設
實業學堂緣由理合恭摺具陳伏乞

皇太后

皇上聖鑒

吉省遵設法政學堂摺

奏爲吉省遵設法政學堂分科講習將各項官員實行考驗以儲
眞才而裨吏治恭摺仰祈

聖鑒事竊臣等前准憲政編查館咨會商吏部奏准考驗外官章
程頒行各省設立法政學堂將各項官員切實考驗等因咨行到
吉竊維吏治之隆污視乎人才而人才之盛衰基於培養放任而
聽其自爲雖賢者亦漸趨頹廢萃處而課以治理卽中材亦日就
明強况復時局多虞萬端待理因應之繁雜措注之艱難紛至沓

來百倍曩昔非特闢葺拘迂殊無短長者不足以供任使即使勤於催科嫻於判牘昔人所稱爲循吏者但於新理未曾研究一置之盤根錯節之交立形顛蹶時易勢殊理固然也查吉省舊於將軍署內設課吏局飭令候補人員練習批判事等吏胥不足言法政也光緒三十二年冬間改設法政館暫假前將軍長順祠堂修葺開學考選速成科學員一百名官紳並收分主要附設兩學科限二年畢業規模略具惟學舍無多學員皆寄宿校外精神渙散非惟管轄無術不能示整齊畫一之規而往返需時亦難收講授觀摩之益因陋就簡非所以培材也臣等抵任後擇省垣德勝門外演武廳左近勘定地段估工建築共造成學舍一百二十一間定名爲法政學堂仍照章由提學使管理並檄委候補道錢宗昌爲該堂總理考選完全科學生每年定額八十名分豫科正科兩

級統限五年畢業現先習豫科應俟肄業年滿擇其合格者始准
陞入正科以資深造其原設之速成科截至本年冬間兩年期滿
畢業後卽行停辦吉省月選分發及投効人員並原有候補各員
自道府以下照章均令考試應行入學者一律送堂特開講習科
遵照館章定爲一年半畢業分別勸懲一切考驗甄別辦法均按
照定章參酌本省情形核實辦理庶於因地制宜之中仍寓澄清
仕途之意講習科學員卒業卽照此次章程分別委用降黜速成
完全兩科畢業應仿照各省學堂給獎成案核辦至前後動支經
費計開辦法政館共用銀六千七百餘兩嗣因建築法政學堂並
購置器具等項共用吉省官價銀六萬兩有零速成科額支每年
需官價銀三萬六千餘兩完全科豫科額支刻因赴考學員未能
截數無從豫算擬請隨時核支現均暫由度支司籌墊動用應准

正書卷一
三十一
作正開銷造冊具報除將詳細章程咨送憲政編查館暨吏學二部查照外所有遵設吉省法政學堂並實行考驗本省官吏緣由理合恭摺具陳伏乞

皇太后

皇上聖鑒

吉省設檢驗傳習所件作改爲檢驗吏摺

奏爲吉省擬設檢驗學習所改各屬原設件作爲檢驗吏並比照吏員給予出身俾資策勵恭摺仰祈

聖鑒事竊據吉林提法使吳燾詳稱刑事案內之檢驗於司法部中最爲重要使屍傷一舛案情卽不能確枉縱均所不免例載各州縣分別繁簡額設件作數名各給洗冤錄一部選明白刑書代爲逐細講解由該管府州隨時提考立法本極周詳惟是件作一

項舊例視爲賤役稍知自愛者每不屑爲衝繁之區求其諳爛文理者已屬絕無僅有至簡僻州縣尋常鬪毆事件報驗傷痕尙恐未能了然遇有開檢重案瞠目束手拖累益深殊非慎重民命之道現在吉省審判檢察各廳以次成立擬於高等審判廳內附設檢驗學習所一區調各屬識字件作並招考本省二十歲以上聰穎子弟若干名入所肄業除洗冤錄應行研究外附課生理剖解等學擇其普通淺近關係檢驗者派員逐日講解並陳列骨殖模型標本以資目驗定期一年畢業發給文憑分派各州縣承充件作改名爲檢驗吏優給工食並比照刑書一體給予出身以資鼓勵等語詳請奏咨立案前來臣等查折獄莫重於人命斷罪必準諸屍傷而鞫訊握要之機端自檢驗爲始蓋一切情狀罪名均可於堂訊時反覆研求虛心勘擬獨至驗傷填格勢須當場立辦設

或檢驗不明稍涉疑似則屍傷失實雖有明健之吏亦屬著手無從馴至屍親忿爭罪犯狡避積歲翻控釀成蒸檢鉅案者皆由無學之件作實生厲階亦重可慨已各國驗傷之學與大學醫科相表裏而月令瞻傷察創視折繫於決獄之前誠慎之也今該司擬請設所學習自係爲養成檢驗人才起見亟應從速開辦以期輔助刑事至所請給予出身一節查舊例件作與馬快同科均應禁錮卽子孫亦不准出仕揆諸庶人在官與士同祿之義實乖平允現雖改名爲檢驗吏然命名已異而執業則同深恐鄉黨自好者猶滋疑慮應募無人溯查前兩江總督沈葆楨曾奏請給予件作出身格於成例未經允行蓋彼時風氣未開一切均守舊制今則聖明在上闡澤旁敷凡屬含生負性之倫卽蠶戶惰民均邀咸與維新之

曠典矧件作本隸編氓又復効力公家奔走夙夜尤當解除禁錮一視同仁養其廉恥之原卽以廣其登進之路合無仰懇

天恩飭部核議准將檢驗吏卽原設件作照刑科吏員一體給予出身一洗從前禁錮積習行見庶獄無冤羣材知奮明刑弼教胥以此舉爲嚆矢矣除分咨吏法兩部外所有擬設檢驗學習所改原設件作爲檢驗吏並予出身緣由是否有當理合恭摺具陳伏乞

皇太后

皇上聖鑒訓示

吉省煙酒稅課第二屆收支數目請銷摺

奏爲吉省煙酒稅課改章加徵試辦又屆一年期滿謹將收支數目循案核銷恭摺仰祈

聖鑒事竊查吉林煙酒兩稅前因舉辦新政無款可籌經前署將軍達桂援照直隸章程參以吉省成法奏准加收以資挹注定章黃煙按照市價每千收稅市錢一百文燒酒則分製酒販酒兩項各納各稅每斤各收市錢三十二文以光緒三十二年四月初一日爲改章試辦之始連閏計算至三十三年三月底一年期滿收數較前溢增業經據實奏報並聲明在事出力人員擬請擇尤保獎在案嗣臣等到任察看地面商情困累已甚輾轉取盈未免竭澤而漁有失體恤商艱之道當經一再熟籌設法整頓將酒稅一項奏准自上年十月初一日起減爲每斤徵銀一分四釐祇徵燒商一次不再重徵每銀一兩仍按舊定官價折收市錢三千三百文其煙稅亦於十二月初一日起復經改定每斤收稅市錢三十二文亦統徵一次蠲除一切繁苛至外城運來絲煙黃酒爲數無

多仍照舊章值十抽一似此略予變通酌量核減在公家所損有限而商民受惠實深矣茲自光緒三十三年四月初一日起至三十四年三月底止又屆一年期滿統計通省總分各局共收煙稅市錢八十七萬七千一百九十九千零九十文酒稅市錢二百三十七萬七千三百九十五千四百二十七文兩項共徵收錢三百二十五萬四千五百五十四千五百一十七文照章扣提一成五經費淨計贖錢二百七十六萬六千三百七十一千三百四十七文內除遵照奏案劃撥原有三十三年四月起至三十四年三月底止無閏全年煙酒兩稅原額備抵戊申年俸餉銀五萬四千二百五十八兩照依市行易銀計共需錢三十萬零八千七百二十八千零二十文又先後撥給兵備處錢一百六十一萬一千六百五十三千五百九十文陸軍錢二十五萬二千四百九十五千五百

五十八文外實尙存錢五十九萬三千四百九十四千一百七十二文留備撥充常備軍餉項及各項新政之需歸入下屆報銷據度支司轉准煙酒木稅總局造具簡明清冊呈請核銷前來臣等覆核無異除將此案稽徵出力人員另行循案酌保並造具清冊咨部外所有改章加徵煙酒稅收支數目循案核銷緣由理合恭摺具陳伏乞

皇太后

皇上聖鑒飭部核銷施行

吉省木植稅款第二屆動存數目請銷摺

奏爲照案劃撥光緒三十三年四月初一日起至三十四年三月底止煙酒稅額並三十三年木植稅款動存數目循案核銷恭摺仰祈

聖鑒事竊查吉林煙酒木稅向由吉林將軍委員試辦上年改設行省卽歸公署經管溯自光緒四年經部奏准煙酒稅銀仍以二萬八千兩木稅銀仍以三千七百兩作爲定額所收稅款每年籌提辦公津貼銀八千兩內撥給將軍銀四千兩副都統銀二千兩吉林府知府銀一千兩琿春副都統銀一千兩以資津貼又光緒二十六年部議籌款六條案內煙酒兩項按照從前收數再加半倍抽收是爲續增之額歷經遵照辦理嗣因舉辦新政無款可籌仿照直隸加抽煙酒辦法參酌本省情形於光緒三十二年四月初一日起至三十三年三月底加徵試辦屆滿一年所收煙酒稅款及三十二年木稅收支數目業經奏報在案臣等到任因念商力艱難輾轉取盈致多流弊續經奏減酒稅徵銀折錢辦法每斤徵銀一分四釐按前定官價每兩合錢三千三百文釐訂簡章實

力經徵茲又一年期滿應卽循案造報除煙酒兩稅照改章所徵全數仍歸戶摺奏報以清眉目所有照案劃撥作爲三十三年四月初一日起無間至三十四年三月底止煙酒兩稅額銀五萬四千二百五十八兩內照章支給徵稅書役一成工食銀五千四百二十五兩八錢贍銀四萬八千八百三十二兩二錢又光緒三十三年委員抽收檄樑椽檁大小木植二萬零七百七十四根共計變價銀三千七百二十八兩照章支給徵稅書役一成工食銀三百七十二兩八錢計贍銀三千三百五十五兩二錢統計徵存煙酒木稅共銀五萬二千一百八十七兩四錢內有原定津貼辦公銀兩支給將軍副都統吉林府知府琿春副都統各衙門除吉林府琿春副都統衙門仍照舊支給外將軍副都統衙門現均裁撤此項銀兩應移作吉林公署辦公之用又由書役一成工食內扣

存六分減平銀三百四十七兩九錢一分六釐共贖銀四萬四千五百三十五兩三錢一分六釐如數存庫備抵戊申年官兵俸餉之需據度支司呈請核銷前來臣等覆核無異除咨部并將統收長徵煙酒稅款另行奏報外所有劃抵俸餉煙酒稅額及徵收木稅銀數照案分別核銷緣由謹恭摺具陳伏乞

皇太后

皇上聖鑒飭部核銷施行

設立各屬視學官停止教職銓選摺

奏爲遵

旨設立各府廳州縣視學官擬請停止教職銓選恭摺仰祈

聖鑒事竊查考察政治館續訂直省官制通則前經奏准通行並奉

上諭著由東三省先行試辦如實有與各省情形不同者准由該督撫酌量變通奏明請旨等因欽此欽遵在案臣等查直省官制通則清單內開各直隸州直隸廳及各州縣佐治官內有視學員一員掌理該地方教育事宜等語竊維東三省遠處東隅見聞較隘自非振興教育不足以濟民智而立治基臣等到任以來迭加提倡雖三省風氣通塞或殊而各屬次第振興除僻境邊隅生聚未蕃餘皆督飭籌辦惟事當草創教授管理各端未能整齊畫一地方紳董有勸導之義務無整飭之特權州縣官簿書旁午亦不能於學務一端特爲偏重自非設立視學員專其責成恐建設雖多未必能維持不敝惟查各屬原有教職現在科舉停止除典守文廟外幾於無所事事政治館原章內有各屬應設文廟奉祀官一員以教職改充一條自爲崇重祀典起見惟東三

省府廳州縣半係新設多有未經設學之處卽舊經設學及以後次第建築學宮者其事務亦極清簡視學員兼顧有餘又查東省地方偏瘠部選教職或不樂就往往延不到任致令員缺久懸其派署各員例須按班輪委又率經旬牌示奉檄無人似此特別情形不能不變通辦理查現在州縣一途已奉

諭旨停選凡以責名實之克副求人地之相宜也教職一缺有整飭士風教育地方之責念官守之攸關揆現今之情勢在各屬方亟需辦理學務之人視學一官尤未可闕焉不設擬請先將東三省教授教諭學正訓導遇有丁故降革出缺暨別項事故開缺等員停止銓選卽以其缺改設視學員其

文廟奉祀實止春秋二祭及平時典守事宜應責成該員一併敬謹供職由臣等遵照會議政務處考察政治館前後歷次議奏情

形飭提學使考選品學兼優熱心教育者酌量選充但期克稱職
守無論宗室覺羅旗漢各省教職本班及正途佐貳人員均得一
律酌予敘補至參用本省士紳之處擬仍遵章迴避本府其資格
則以舉貢生員學堂畢業者爲宜其考選則尤以國文經學爲重
並令入本省教育官練習所三月將學部頒發各項章程規制及
本省學務情形詳加研究查其確有心得再予派充以上各條均
經參照政治館學部章程擬辦如蒙
諭允應請

飭下吏部學部分別立案將來續設府廳州縣各治俟學務籌有
端倪均歸一律增設其舊有之教職各員由提學司詳加考驗擬
就各員中合格之選卽予改充如有不勝視學之任者酌量開缺
照品酌改他項官職仍將試辦情形隨時咨部查核所有臣等籌

設各屬視學員暨請停止教職銓選緣由是否有當理合恭摺具陳伏乞

皇太后

皇上聖鑒訓示

奉省軍需局改爲東三省軍械局片

再東三省軍械局就奉天原有之軍需局改設前於議設東三省督練處摺內曾經奏明

允准在案查前練兵處兵部奏定陸軍章制內開軍械局制係按一軍兩鎮擬定人數如鎮數增減則此項員司亦遞照增減等語思慮周詳立法至善今三省新軍則有奏調一鎮兩混成協奉天改編步隊一標礮隊一營吉林原練步隊一標舊軍則有巡防隊一百餘營以及捕盜護墾巡警等營隊所有需用軍火各項事宜

在在均關緊要亟應照章設立軍械局俾有專司而免貽誤惟是東三省現在情形雖係受治於一總督之下然三省各分疆界迥與內地一行省之制不同兼之鬍匪滋擾出沒無常軍隊散紮四方地面復極遼闊如專恃奉省一局實不足以資接濟自應查照部定鎮數增減員司亦遞照增減章程變通辦理當於上年十月初一日就奉天原有之軍需局改爲東三省軍械總局遴選精悉器械各學員司分別派委承辦新舊各軍軍械等事復在吉江兩省各設分局一處由總局派員輪流駐紮就近經理以期大小相維緩急足恃該總分局員司薪費均照定制開支兵目匠役仿照陸軍章程加給月餉以示體恤此項常年額支經費統由東三省支應處列款發給其附設修械司應需各費多寡未能預計應令合雜支活支各項款目按月核實逐細造報由支應處年終彙案

報部核銷除暫行章程咨報度支部陸軍部查核立案外謹附片具陳伏乞

聖鑒訓示

籌擬恭迎 玉牒禮節暨應行預備事宜摺 附單

奏爲籌擬恭迎

玉牒禮節暨一切應行預備事宜分繕清單恭摺仰祈聖鑒事竊臣前以

盛京

大內工程未竣本屆尊藏

盛京

玉牒擬請仍照歷屆到奉日期飭於十月間諏吉恭送並聲明奉省恭迎禮節自庚子後文卷散失稽考無從請

飭下禮部將舊有儀文先期咨送以便參照擬議等情於光緒三十四年四月二十五日具奏奉

硃批禮部知道欽此欽遵旋准禮部將上屆恭送尊藏禮儀原摺咨送前來當卽督同參贊司道敬謹擬伏查原摺內開

玉牒起行由直隸派綠營官兵恭送至山海關出關後

盛京將軍派滿洲官兵敬謹防護是直奉兩省一迎一送均斷自山海關此次奉省籌擬恭迎禮儀應卽以山海關外爲首站惟是盛京改設行省公署及各司道官制旣與從前軍署五部不同加以本屆

玉牒到奉改由火車復與舊日按站遊行迥非一致以此恭迎禮節及預備各物自不得不略事變通以重要差而崇大典且計期已迫用物甚繁尤不能不籌備於先時以免貽誤於臨事臣謹按

禮部則例參以現時情形酌擬大概辦法分繕清單恭呈

御覽除將籌擬各節咨行禮部查照並飭承辦各員將應備各物
卽時修造外理合繕單恭摺具陳伏乞

皇太后

皇上聖鑒飭下禮部從速核議施行

附恭迎

玉牒應行預備事宜單

一

玉牒出關經過奉天所屬各州縣該地方官應於本屬最初
入境之車站搭設綵牌坊一座高二丈二尺寬二丈飾以綵
綉月用長桿懸挂國旗二面

按舊章經過地方州縣各官例於入境處所用蘆蓆搭蓋

正書卷一
三二
小棚高寬均不及一丈，月立小木坊一架，書明縣界形式，卑隘甚不壯觀，因改設綵牌坊以昭隆重。

一
玉牒至新民府停宿，仍安奉於火車上，不照舊章搭蓋綵棚，月於火車站四圍敷設黃色木欄，高六尺，上飾綵綢，接連環繞，前後各闢一門，車入即閉，欄外四角各豎長桿，上繫汽油燈一盞，徹夜然明，以資防守。

按舊章至新民府停宿處，所地方官應用七層蘆蓆搭蓋綵棚，敬謹安奉，本屆改爲火車，既不便於車外搭棚，致礙軌道，復不便移請行箱下車，致費周折，因於火車站四圍敷設木欄，以便易於防護。

一奉天省城外車站建築綵棚一座，計二十五間，每間高二

丈三尺寬一丈一尺進深二丈六尺木柱鐵瓦上嵌脊獸中繪雲龍油飾黃色環繫綵綢地鋪花紋蒲蓆棚外四面圍設黃色木欄前闢三門左右後各闢一門正中懸挂國旗

按舊章奉天府先期用七層蘆蓆搭蓋綵棚作爲恭迎處所當時安奉旣虞危險事畢卽撤徒耗重資因改用木料在車站建築綵棚以昭慎重

一綵棚左旁另建瓦房十一間中爲跪請

聖安處所左右爲王大臣及本省官員更衣處所

一修造綵亭二十架高六尺四寸前後寬三尺七寸左右寬三尺三寸桿長八尺油飾黃色四圍繫綢中座墊氈黃檔則用黃色紅檔則用紅色絆繩及擡桿頭則一律分用黃布黃氈纏裹左旁門柱用紅紙粘籤標記號數依次排列於綵棚

內

一修造黃案六十四張用黃雲緞圍套設於省城車站綵棚者十二張高三尺長三尺寬二尺設於大內崇政殿者五十張高二尺七寸長二尺三寸寬三尺九寸五分由車站擡運五供及在

崇政殿陳列五供者各一張高三尺寬二尺長六尺

一新民府奉天省城兩處車站所設之木欄外各備木桶四隻內儲淨水另備激桶四隻以防火險

一綵亭前應備鼓樂奉省近無此項官役擬用軍樂隊以昭嚴肅

一擡夫穿用駕衣權以庫存舊衣渲染改作其靴帽鵬翎銅頂等項均一律從新購置

一綵棚與火車距離間鋪設棕氈一道以爲恭捧
玉牒經由及王大臣等行禮之用

一
玉牒入城經過之西邊門外攘門鼓樓鐘樓

東華門

大清門均懸鐙結綵

一白

東華門下馬牌起至

大清門

崇政殿東琉璃門

頤和殿

介祉宮

敬典閣門外止一律鋪設棕氈長一百二十五丈零二寸寬八尺其停放綵亭及行禮處所均加寬尺寸

一舊有金匱三十頂銅飾損失金漆剝落現經一律修理完整以空閒之金匱四頂備爲尊藏本屆

玉牒之用

一

盛京大內奏修工程除

鳳凰樓一時未能歲事其餘各工均限於

玉牒到奉以先一律竣工各

宮殿前需用之竹簾雨搭各項並應先期置備齊整

附恭迎

玉牒暨敬謹尊藏禮節單

玉牒至山海關先期由

盛京副都統帶協領一員旗務司司使帶科員一員旗兵各一名巡警長官一員帶警官四員巡警二十名到關祇候火車到時朝服跪接俟王大臣下車跪請

聖安次日隨車同行敬謹保護沿途經過地方該管官員各於所屬最初入境車站預建綵坊咸著朝服跪坊左迎送並派巡警會同鐵路巡警分段保護其鐵軌兩旁及附近通衢孔道均由奉省調派馬步巡防各營官兵擇要防護車過卽退新民府知府於火車停宿處預設木欄前後各闢一門車入停穩王大臣就車中行一跪三叩禮下車退出卽閉欄門欄外分派巡警兵隊周視巡防次日王大臣仍就車中行一跪三叩禮啟行至奉天城外先期由奉天府就車站建蓋綵

棚及奉省官員跪請

聖安王大臣更衣處所由旗務司恭備黃案分設於綵棚及崇政殿內另備綵亭排列於綵棚內黃案後東三省總督奉天巡撫預派正捧扶捧導引各官及軍樂隊屆時躬率左右參贊各司道等朝服在綵棚外跪迎車停由正扶捧官隨行提調纂修各官恭請

玉牒於綵棚內黃案上王大臣官員等向案前行一跪三叩禮禮畢更換蟒袍補褂俟督撫參贊司道等一律更換蟒袍補褂跪請

聖安後再由捧官隨同提調纂修各官恭請行箱安奉綵亭畢王大臣復行一跪三叩禮撤去黃案前引官導引入城督撫參贊司道等仍著朝服護送自車站綵棚至

東華門蹕路兩旁飭撥巡警依次侍立綵亭左右分派隨護官員並派軍隊前後隨行入西邊門外攘門經鐘鼓樓前入東華門

大清門至

崇政殿前停止由正扶捧官隨同提調纂修等官於亭前行一跪三叩禮就行箱內恭捧

玉牒安設

殿內黃案上王大臣官員等暨督撫以下各官均行三跪九叩禮後正扶捧官隨同提調纂修各官於

玉牒前行一跪三叩禮仍按次序用龍袱包畢再行一跪三叩禮退督撫等派巡警官率同巡警在

殿外晝夜守護候欽天監敬謹擇定吉期仍設綵亭於

崇政殿前王大臣官員咸蟒袍補服總督巡撫以下各官咸朝服屆吉時均詣黃案前行一跪三叩禮畢正扶捧官隨行提調纂修各官就黃案上恭捧

玉牒安設綵亭內行一跪三叩禮昇請

玉牒綵亭至

頤和殿琉璃門外停止王大臣官員及總督巡撫以下各官仍向綵亭前行一跪三叩禮正扶捧官隨同提調纂修各官恭捧

玉牒於

敬典閣金匱內敬謹尊藏王大臣官員及總督巡撫以下各官在

敬典閣前階下兩旁行三跪九叩禮禮畢各退

退耕堂政書卷十八

文獻卷十八 奏議

三

HAVERHILL

1871

退耕堂政書卷十九目錄

奏議十九

裁撤錦州副都統員缺摺

整頓黑牛館積弊並擬善後辦法摺

奉省設立調查局摺

江省種煙地畝擬請縮短期限一律禁絕摺

江省驛務廢弛變通整頓摺

江省呼蘭等處站丁地畝一律升科片

查明革員瑞祿縱匪失機請旨懲處摺

擬加駐漠官兵津貼片

江省設立諮議局籌辦處遴派官紳辦理摺

恭辦玉牒要差統由正款開銷摺

剿辦西北蒙邊悍匪獲勝摺

密陳籌辦延吉邊務情形摺

遵 旨查覆江省道府參案摺

遵 旨酌提備贈各國瓷器摺

退耕堂政書卷十九

天津徐世昌

奏議十九

裁撤錦州副都統員缺摺

奏爲錦州副都統員缺職務太簡積弊相仍擬請裁撤以裨旗務
恭摺仰祈

聖鑒事竊查現任錦州副都統秀昌前因降調前署錦州協領薩爾杭阿稟許多款經臣檄派署旗務司司使恩志前往確查業經附片奏明在案茲據逐款呈覆臣詳加核閱其所控隱匿庫款侵蝕官馬變價加徵草銀假冒公款驗照索費各節尙非無因其餘均屬誤會誣指屬員稟揭本管長官本干例禁所列各款亦未能盡實此端萬不可長應由臣隨時察看如有不安本分情事卽行

從嚴究辦其查明有因各節雖係該副都統咎由自作亦由歷任積弊相沿卽令另簡他員亦恐陋習難除積重莫返此蓋由於職務太簡積弊相仍之所致也案查錦州副都統所轄之錦州義州及甯遠州等四路八邊門地方民旗一切事宜向歸協領城守尉及府州縣等稟承將軍辦理自光緒二十八年三十二年先後將錦州官莊衙門大凌河牧羣衙門裁撤該副都統事務更簡不過尋常轉咨之件久無責任可言而廉俸旣薄其所恃以爲挹注者或不免索取規費苛擾旗丁今奉天改設行省釐定官制意在明定權限可專責成旣設旗務司以爲旗官之統屬而一切公事又皆萃於公署由督撫主持是該副都統旣無主管職務員缺幾同虛設若復長此積弊則於旗務終難整頓而旗民生計亦恐多所阻撓自應將錦州副都統員缺裁撤以祛積弊該副都統秀昌念

其事非一任似可不追既往應從寬免其置議仍照裁缺副都統成案辦理至裁缺以後應辦旗民各事仍均由協領府縣直接公署辦理以專責成如蒙

俞允卽由臣通飭遵照辦理所有錦州副都統員缺職務太簡積弊相仍擬請裁撤以裨旗務緣由謹恭摺具奏伏乞

皇太后

皇上聖鑒訓示

整頓黑牛館積弊並擬善後辦法摺

奏爲整頓黑牛館積弊並擬善後辦法恭摺仰祈

聖鑒事竊查奉天黑牛館共有三處在省城者二一曰黑牛館一曰乳牛館在

興京者一曰黑牛館原爲供

三陵祭祀需用牛羊而設向歸內務府管理該館設有值年及監收監放等差向以佐領驍騎校等官充之又有館達牛夫以供飼養牛羊之役所需餵料分部豆莊豆二項部豆發自戶部歸值年者領放莊豆出之莊頭歸監收監放領放分別由內務府慶豐會計兩司經轉嗣因豆石轉運不便挑剔過嚴改徵折色發給該館自購而弊竇從此滋矣黑牛館牛羊原有定額餵養費用係按日計口核算定章本屬周善惟因挑補維艱向未足額自遭庚子兵燹牛羊被搶一空陸續挑補更難滿足而該館每年仍照足數領取銷冊亦照足數開報其浮領之款卽歸值年監收監放館達牛夫及慶豐司會計司等處分用積弊相仍遂成慣例互相欺隱究詰無從茲據該館值年佐領銘盛以監收監放驍騎校韋紀維陳維藩尅扣餵養等情稟控當卽派員逐款嚴查詳細鉤核遂將該

館弊端和盤托出查侵吞官款律有明條該驍騎校韋紀維等身任館差宜如何潔己奉公以圖報稱乃不力加整頓仍復舊習相沿本應嚴懲以昭警戒惟此項弊端因仍已久韋紀維等亦第循舊辦理若僅懲治目前則已往者倖邀寬免既有同罪異罰之嫌若必澈底根究則歷任者不止一人復有瓜蔓株連之累擬由臣勒令韋紀維等將入己之款逐項算明限令全數繳出如限內清完免再置議倘再逾限卽行從嚴究辦所有光緒三十三年該館報銷等項卽令核實造報冊成再行奏銷至該館積弊太深若不改絃更張恐不足以善後應請將黑牛乳牛各館一律裁撤由臣遴派專員妥訂章程從新組織兼歸

三陵守護大臣管理以期掃除痼習慎重祭差俟議定新章後再行奏明立案所有整頓黑牛館積弊並擬善後辦法各緣由是否

正書卷十九
三
有當理合恭摺具陳伏乞

皇太后

皇上聖鑒訓示遵行

奉省設立調查局摺

奏爲奉省遵

旨設立調查局派員編纂法制統計事宜以備憲政參考恭摺仰
祈

聖鑒事光緒三十三年九月十六日奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨本日憲政
編查館奏請飭各省設立調查局各摺片各省民情風俗及一切
沿革習尙參差不齊現在該館開辦編制統計二局非有京外通

力合作辦法無以推行盡利著每省設立調查局一所由該管督撫遴選妥員按照此次奏定章程切實經理隨時調查各件咨覆該館等因欽此欽遵由憲政編查館咨鈔到臣竊維立法之始必觀其會通以規全局而後條理之劃一可期爲政之方必憑諸實驗以制時宜而後名實之綜覈有據是故周官三百六十屬月要歲會無非統計之書保正閭師皆負編查之責上而皇室之費用政府之經營下而民生日用之微動植纖悉之事莫不隨時報告按籍可稽旣已得失之周知乃可謀盈虛之酌劑卽今東西各國統計年鑑之作同此用意成效昭然奉省爲

豐鎬舊都規制崇闕而政俗尤爲複沓舉凡旗務蒙務邊務交涉各節紛躋迴逾他省調查更覺冗繁前經臣於試行奉省新官制時就諮議廳隸設編纂一科責以纂編法典統計報告之事籌辦

略。有端緒。茲奉

明諭。遵卽查照館章。於省城設立調查局一處。遴選熟悉政治各員。認真經理。查有奏調開缺山西道監察御史張瑞蔭。學識淹賅。器局深穩。堪以派充總辦。局中設科分股。劃清職掌。派員分理。各專責成。並刊刻木質關防一顆。文曰奉天全省調查局關防。頒發開用以資信守。將來調查所得門分類別。應由臣督飭各員按照各門填列表式。隨時咨報憲政編查館。並分咨各該部院查照辦理。庶於憲政前途有所依據。除咨報該館。並按照館章。通飭各府廳州縣分設統計處。外理合將奉天遵設調查局派員總辦。並刊發關防緣由。恭摺具陳。伏乞

皇太后

皇上聖鑒

江省種煙地畝擬請縮短期限一律禁絕摺

奏爲江省種煙地畝擬請縮短期限以期早日禁絕恭摺具陳仰
祈

聖鑒事竊查本年二月二十日欽奉

上諭責成各督撫按照奏定禁煙成案切實舉行並體察情形將
實在辦法先行奏聞欽此欽遵仰見

朝廷與民更始痛除痼疾之至意竊維禁煙之法必先減種減種
之策非有迅斷之精神則奉行易於懈弛非有直截之辦法則日
久仍涉因循臣等體察理勢審酌情形以爲少減不如多減緩減
不如急減遞減不如禁絕而江省人民寥落墾種之地多係初闢
之荒考察旣覺易周辦理較易措手且此關係國勢強弱又經
與友邦商允自應迅速舉辦痛斷根株爲拔木塞源之計詳查此

次部頒稽核章程有每年減少八分之一限至十年禁絕等語固
爲寬以限期不能不定明分數惟逐年查丈派員則需費不貲數
目畸零劃分則鉤稽匪易加以造冊籍則祇益繁文勘地畝則恐
滋紛擾此減種之難一也十年爲斷之說海內固已周知然罌粟
之種尙有留遺卽吸煙販煙之戶亦意存觀望曠日持久官吏之
稽察易疲民間之嘗試不免厚利旣屬可戀舊染因而難除此減
種之難二也查本年會議政務處議覆雲貴督臣錫良請縮短禁
煙期限一摺聲明舊章如禁絕在十年以內地方官得邀獎勵其
限期本不拘定十年總計江省土稅煙釐兩項上年僅收銀三萬
餘兩邊荒財政雖甚困難然爲

國家斷除鉅害自不宜惜此區區現經臣等飭民政度支兩司詳
細核議並訪諸所屬士紳僉謂非毅然禁絕不可倘日月稍涉遷

延卽辦理轉滋流弊所有江省種煙地畝自應

奏明請自明年正月爲始一律禁種悉令改種他項糧食由臣等
通飭各屬遵照如有違禁種煙者查出分別從嚴懲辦以警將來
其地方官辦理情形自當隨時詳查分別獎罰俾示懲勸至禁吸
禁賣各節屢經臣等嚴飭本省禁煙公所切實查驗並設法限制
販賣以冀同時禁絕所有江省種煙地畝擬請縮短期限緣由是
否有當理合恭摺具陳伏乞

皇太后

皇上聖鑒訓示

江省驛務廢弛變通整頓摺

奏爲江省驛務廢弛亟應變通辦理以資整頓恭摺具陳仰祈
聖鑒事竊於光緒三十二年閏四月二十五日准前兵部咨各省

驛站各項事宜亦應切實變通籌擬妥善章程奏咨核辦等因到
江查江省由茂興北至黑龍江城共設二十站東至呼蘭又設七
台分設筆帖式領催委官承辦驛務而於茂興墨爾根各設總站
官以領之由省至呼倫貝爾一路設十台向撥甲兵值班亦設筆
帖式領催等缺計官馬共五百三十二匹牛六百一十三條每年
共發倒斃牛馬價暨修理車費並廩給銀二萬四千兩有奇額丁
津貼京錢二萬三千六百吊零各站均遭兵燹驛政疲弊文報稽
遲幾於莫可究詰是以前署撫臣程德全於光緒三十二年覆奏
通籌善後摺內聲明由茂興至黑龍江城各站俟俄約定後妥訂
章程仿照俄站辦理其呼蘭各台酌量裁撤各站站丁改歸民籍
並設文報以代驛遞奏奉

諭旨允准在案竊謂交通爲行政之機關驛遞遲滯則機關不靈

現當改設行省一切新政均宜逐次擴張若仍任其玩愒因循貽誤事機所關非淺自非改絃更張破除痼習別無挽救之方而爲經久之策本應遵照前次奏報將茂興至黑龍江城一路改照俄站辦理惟該城與省城商埠均未開辦來往商民尙屬無多若照俄站辦理未免徒滋糜費其呼倫貝爾一路附近鐵路所有公文均由火車遞送原設各台幾同枝指擬將呼蘭等台一併裁撤至不通驛遞各屬並茂興等站一律改添文報局一切文牘往來責成經理卽以所裁各站應支款項留作常年經費如有不敷再由正款內另行酌撥先行派員試辦一俟就緒再行咨部立案所有變通驛站並設文報局緣由除咨陸軍部查照外理合恭摺具陳伏乞

皇太后

皇上聖鑒訓示

江省呼蘭等處站丁地畝一律升科片

再上年清丈呼蘭屯站地畝除屯丁自種地畝暨屯站各丁出賣民戶各地業經奏請升科外其餘站丁各地應俟變通本省驛站改設文報後再與各台站地畝一律升科等因奏奉

允准在案現在呼蘭府屬文報業經設立舊日呼蘭新安兩台站已同虛設所有該站丁地畝應卽自本年起科其餘本省各處站丁地畝現旣通行改設文報應俟各處次第勘丈竣事均卽於三十五年一律升科以符原案除俟各處丈竣另將毘連冊籍分咨查照外謹附片具陳伏乞

聖鑒

查明革員瑞祿縱匪失機請 旨懲處摺

奏爲查明革員縱匪失機請

旨懲處以肅軍紀恭摺仰祈

聖鑒事竊前因奉軍後路統領記名副都統瑞祿縱逸降匪白音大賚並拒傷哨長兵丁及民人李姓先行奏參革職並派雲南提督張勳馳往查辦奉

旨瑞祿縱逸巨匪敗壞軍律著卽行革職聽候查辦欽此欽遵在案茲據張勳覆稱瑞祿收撫匪首白音大賚並夥匪金保黑虎張鎮張義三臨沁金昌吳田寶白印保楊玉山銀寶來寶興烏欽包云吉巴衣等十五名意欲以匪誘匪嗣因奉文飭辦又擬令更衣就擒匪姪白印保知覺隨將手槍轟斃哨長任宗喜並旁觀之李姓一名白音大賚攜快槍乘隙潛逃戈什王海田勒馬追擒互相槍擊白音大賚詭作受傷狀王海田下馬捉拏而白音大賚已躍

登馬上鞭策飛馳幫帶張奎武督隊圍擒夥匪十三名於街中屯南正法在逃之首夥匪二名飄匿無蹤瑞祿痛恨戈什蕭東寅防範不嚴亦於營前正法尙無受賄之事又查瑞祿素少檢束挾妓宿娼時所不免此次先後駐紮江省扎薩克圖王屬蒙屯倉古把占道屯等處均實有行姦情事內有王姓婦女不知因何事夜哭外間遂有姦斃之疑該副都統敗壞軍規實不敢代爲之諱等情呈覆前來臣等查蒙匪白音大賚爲患多年迭派官軍屢次進剿窮追二千餘里迄未就擒此次該匪率十四人僞投瑞祿軍前乞降自應悉予正法以殄巨憝該統領以藉誘洩匪爲名致令縱逸並槍斃哨長任宗喜並民人李姓一名實屬敗壞軍律荒謬已極平日駐紮江防姦淫婦女其罪尤不容追若非嚴加懲處何以振軍紀而策將來相應請

旨將已革記名副都統瑞祿發往新疆效力贖罪以示懲儆所有查明革員縱匪失機請加懲處緣由謹恭摺具陳伏乞

皇太后

皇上聖鑒訓示

擬加駐漠官兵津貼片

再漠河金廠地方遼濶與俄境僅隔一江中外匪蹤出沒無常從前本由江省撥派練軍駐紮漠口原以鎮懾宵小慎重邊防現在漠廠已由北洋大臣派員接辦自應撥兵前往以資保衛前據該廠督理直隸候補道劉煥稟請撥駐重兵當經臣等將駐省巡防中軍左營步隊一營撥往漠口屯駐並飭歸該督理節制以一事權惟該廠地處極邊百物較省城尤爲翔貴所撥兵隊不能不量加津貼用示體恤現擬每兵每月加津貼銀四兩五錢官長亦按

照底餉遞加至所有開撥運費軍糧運費以及建築營壘添用醫官軍衣一切用費均嚴飭隨事撙節動支將來再行分別報部核銷除分咨查照外謹附片陳明伏乞

聖鑒再此次駐漠一營自本年八月初一日起已遵陸軍部新定巡防隊章程另行改編合併聲明

江省設立諮議局籌辦處遴派官紳辦理摺

奏爲設立諮議局籌辦處遴派官紳預備該局選舉事宜恭摺仰祈

聖鑒事竊查本年六月二十五日憲政編查館資政院王大臣等會奏各省諮議局及議員選舉各章程一摺欽奉諭旨著各省督撫迅速舉辦實力奉行自奉到章程之日起限一年內一律辦齊等因欽此仰見我

皇太后

皇上銳意維新俯察輿論之至意正在籌辦間續准憲政編查館咨開現在諮議局尙未成立各省應就省會地方先行設立該局籌辦處欽遵

諭旨選派公正明達官紳創辦其事等語咨行前來查諮議局爲采取輿論之所並爲資政院預備議員之階議院基礎實肇于此凡有守土之責者自應廣集思益共濟時艱唯是江省地廣人稀荒榛初闢八旗舊僕世尙武功編戶齊氓未開新智驟與商求治理難期盡合事情必須積歲月之研窮受見聞之濡染乃足以漸知體要用備咨諏其造端雖微其收效甚鉅現在創辦伊始頭緒紛繁經臣等於本省官紳中詳加遴選查有提學使張建勳調江補用道桂平均屬通達治理宅心正大堪以派委綜理其事除已

分別檄飭按照選舉區域選出議員再行遵照此次奏定章程辦理外其本省因仍旗制尙未設治地方應如何變通選舉之處及此外尙有變通未盡事宜並現辦章程容卽飭由該處分別擬議再由臣等咨明憲政編查館查核辦理至該處所需經費應請作正開銷所有遵

旨派員辦理諮議局籌辦處緣由除分咨外理合恭摺具陳伏乞皇太后

皇上聖鑒

恭辦 玉牒要差統由正款開銷摺

奏爲木屑恭迎

玉牒所需經費擬請統由正款開銷實銀不資民力恭摺仰祈聖鑒事竊木屑尊藏

盛京

玉牒前由臣等奏請展期來奉奉

硃批禮部知道欽此欽遵當將屆時恭迎禮節暨一切應備事宜敬謹議擬分繕摺單陳請

聖鑒伏查歷屆

玉牒來奉所有應需費用半資公款半取民間從前奉省民力尙稱殷厚承辦

牒差所費不貲稍取之民亦或以紓官家之力然不肖吏胥藉此苛歛飽其私囊者十之六七供之公家者十之二三小民何辜受此苦累自庚子亂後日俄交關元氣彫敝益不可支若仍故事奉行藉資民力微論閭閻困苦供應維艱且徒滋中飽於公家用款亦無裨益自應變通辦理以恤民艱現籌本屆恭迎

玉牒凡禮儀用物一切務求詳備以昭敬謹而示尊嚴至需用各款則嚴飭承辦各員力求樽節毋許稍有糜費將來差竣以後擬請將一切經費實用實銷統由正款開支實銀不復援照向章藉紓民力惟向來供應費用既多取諸民間遂亦不復奏報本屆不資民力並請將供應各款一併作正開銷以昭核實所有恭辦玉牒要差擬請統由正款開銷緣由是否有當理合恭摺具陳伏乞

皇太后

皇上聖鑒訓示

剿辦西北蒙邊悍匪獲勝摺

奏爲剿辦奉境西北蒙邊悍匪獲勝殲渠地方安謐恭摺具陳仰祈

聖鑒事竊維東三省盜風素熾兵燹之後降隊遣散伏莽尤多西北沿邊一帶地屬蒙疆徑路紛歧最爲盜賊出沒淵藪彰武邊境有蒙匪白音大賚本係巨盜六十三同黨自六十三授首以後兇燄稍戢上年五月間糾合巨盜捲毛生鐵子暨奉

旨交拏之匪犯巴塔爾倉等各集悍黨屢犯彰武縣境入秋後又有蒙匪套克套胎木牙什等糾合大股或千餘人或數百人竄踞洮南靖安境內謀爲不軌雖經地方官弁巡警員紳合力堵剿因眾寡不敵以致西北沿邊二千餘里幾無樂土經臣先後飛飭奉軍前路統領張作霖督飭營官蔡永鎮張作相張景惠馬朝斌所部馬步四營中路管帶馬龍潭所部馬隊一營後路幫統馮德麟所部馬步三營並派行營發審委員殷鴻壽馳往彰武洮南靖安等處分路進剿六月十二日官軍發至彰武猝擊賊於龍王廟屯

之西山頭賊眾望風驚竄十六日追抵沙力搭拉賊眾開槍迎拒勢極獷悍鏖戰移時羣向沙坨子一帶敗去二十日伏兵於九頭山前後夾擊賊大潰分兵連日窮追擊傷匪首捲毛生鐵子並斃匪黨多名奪獲子彈三千餘粒匪勢窮蹙竄往熱河經熱河都統派隊堵剿因復回竄奉邊官軍迎頭截擊連戰皆捷擊斃匪首巴塔爾倉一名擒斬匪黨無數十月十八日追至他里士哈拉哈貝子旗下賊回身死戰管帶李奎武身先士卒面受重傷哨長劉金堂奮勇直前立斃悍賊數名旋中槍陣歿李奎武裹創血戰管帶張海鵬抄出夾攻賊盡披靡捲毛生鐵子被兵擊散率黨數人潛匿鎮安縣屬三家子經分防縣丞方德明帶兵掩捕悉數格斃白音大賚糾殘黨數十人奔投東北扎薩克圖等旗而去維時另股蒙匪套克套胎木率其黨目塞吉嘎等由郭爾羅斯公旗界突出

山中復分其黨出踞景星鎮以爲犄角張作霖等帶兵深入本年正月十二日行至索倫山口賊憑卡抵拒開槍猛擊哨官張書麟奮勇搶山彈傷左臂哨長趙明德衝鋒繼進小腹受透子傷張作霖揮兵直上前仆後繼奪據山巔開礮俯擊斃賊數十賊見勢不敵越山而逃官軍追敗之於八林旗土門或吉之地蓋距洮南幾二千里矣所經之處冰雪載途人煙寥落套匪掠民而食又蒙戶圖利接濟換馬乘騎是以遠竄窮邊飄忽自如其兇狡如此而張作霖等提軍追剿往往馳逐竟日士未得飽甚或露宿寒林捧雪爲食兵弁中裂膚墜指者不下二十餘人其艱難又如此委員朱佩蘭賚銀犒師遇張作霖於綽爾河岸覲面幾不相識其艱苦情形可以想見二月二十六日追賊至西烏珠穆沁旗興安嶺下陣斃賊目劉金鎖並匪三十餘名自經此次痛剿套匪益遠匿不敢

復出彰武敗賊白音大賚勢窮投入舊後路統領營中致令縱逸業將該統領瑞祿先後奏請革職發往新疆在案白匪逃出後遂爲蒙匪牙什招留牙匪以刦殺起家儲備槍械久蓄異志見白套各匪被剿緊急招集黨羽定期襲取洮南靖安等處共圖起事臣飭張作霖提兵回剿六月二十八日馳至七十戶地方牙匪憑河恃險固守礮台白匪於東北要道設卡互爲聲援官軍四路進攻轟擊四時許先破白匪東北各卡直逼匪巢我兵陣亡三名受傷十二名管帶蔡永鎮內薄先登各營繼進遂破其巢擒獲匪首牙什擊斃賊目黑虎串地龍並餘匪三十餘名奪獲大旗二面槍械馬匹無算牙匪於訊供後因傷斃命白匪又復兔脫跟蹤緝七月初七日追至烏藍套力改地方山深路險隨懸重賞領同該處台吉色力布暨巡勇等入山搜尋先擊斃悍目白音包勒格等以

去其翼白音大賚中槍落馬始就擒獲身邊搜出藏佛番符等物該匪旋亦斃命人心爲之大快張作霖會同府縣出示解散脅從商民復業於是蒙邊一帶得以轉危爲安統計西北沿邊先後擊斃賊首白音大賚牙什捲毛生鐵子巴搭爾倉並悍目塞吉嘎蓋三省劉金鎖黑虎串地龍白音包勒格暨餘匪二百餘名此上年之夏至本年秋間張作霖等各軍在彰武並洮南屬境內外疊次剿匪獲勝殲渠之大概情形也伏查奉省界接蒙疆山荒地僻夏則瘴霧漫空冬則堅冰載道匪徒嘯聚劫掠橫行該統領張作霖等馳驅絕漠艱苦備嘗年餘之間將積年巨患殲除殆盡實非尋常剿匪之功可比合無仰懇

天恩俯准將在事尤爲出力之前路統領花翎補用守備遞補都司後以游擊儘先補用張作霖請免補守備都司各本班以游擊

儘先補用並

賞加副將銜第二營步隊管帶藍翎儘先都司蔡永鎮請免補都司以游擊儘先補用行營發審委員花翎四品銜補用同知直隸州殷鴻壽請免補同知直隸州以知府仍留奉省補用第三營馬隊管帶儘先千總張景惠請免補千總以守備儘先補用第一營馬隊管帶儘先外委張作相請免補把總以千總儘先補用第五營馬隊管帶藍翎都司銜馬朝斌請以千總儘先補用後路右營管帶花翎補用都司宮文彩請以游擊儘先補用其餘在事出力各員奔馳逐於冰天雪地之中効命於彈雨槍林之下不無微勞足錄並請擇尤保獎以資激勸而勵將來如蒙

俞允再由臣查明分別異常尋常出力續行開單呈

覽除應卹陣亡各弁兵咨部核辦外所有剿辦西北蒙邊悍匪獲

勝殲渠地方安謐情形理合恭摺具陳伏乞

皇太后

皇上聖鑒訓示

密陳籌辦延吉邊務情形摺

奏爲滙陳籌辦延吉邊務情形並宜早定辦法以正國界恭摺密

陳仰祈

聖鑒事竊查吉林南部與朝鮮北道向以圖們江源之紅丹水迄於鹿島海口爲天然國界光緒初元韓民越壑忽起土門豆滿之辨乃復派員會勘重定界址均以圖們江源爲斷但華員主以石乙水爲界韓員主以紅土山水爲界以致爭持未結然相距不過數十里白日人創爲間島之說詭言疆界未定無端越境侵我主權陽藉保護韓民之名陰爲占領土地之計臣世昌等於去歲八

月奏派臣昭常督辦邊務當卽偕同幫辦吳祿貞駐紮延吉內謀治安外籌因應昕宵罔暇竭蹶以圖現在辦理將及一年雖未明戢進取之心實已勉籌抵制之術而財力人力困難萬端若不早定辦法斷難久持謹將籌辦情形爲我

皇太后

皇上撮要陳之日人以保護韓僑爲詞倡言國界未定遂成國際交涉自以勘定界務爲最要臣等上稽史冊下考方輿詳查越壘之情形廣搜界務之證據於去秋派員溯圖們江西上以至長白山白山頂繪其國界專圖並於邊務處特設測繪科及測繪速成學堂分派測繪員於延吉全境及中俄中韓交界各處逐段測勘詳列圖說並將延吉疆域形勢及界務沿革輯爲一書以爲界務確實憑證卽異日會議勘界亦可藉資參考惟日人自越界以來

無理要求不勝枚舉其最重之交涉如天寶山銀鑛及一切鑛產之開採杉松背森林及一切山林之採伐對於越墾韓民之裁判及行政違禁器物之入口過江越境之稽查每生一事口舌之爭論動至數十次每出一案公文之辨駁輒至數千言彼則專恃強權我惟折以公理故雖百出詭計日夕圖謀尙未能於實際有所進取延吉轄地面積方四千餘里僅設廳治管理難周日人又多方盡惑韓民不納我國租稅不受官吏管治因於邊防重要之區及韓民繁盛之地如六道溝和龍峪光霽峪黑頂子銅佛寺帽兒山前稽查處外六道溝懷慶街馬牌娘娘庫等處分設派辦處十一所每所設辦事委員一人繙譯一人就近分理地方行政而以延吉廳總其成遇有韓人抗租及不受我國裁判者或以善言勸導或以國法懲治日人雖強爲干涉尙能受我法權延吉東西北

三面山嶺叢雜向爲鬍匪出沒之區南界圖們又多係韓民越墾日人時復煽動韓民藉端倡亂而朝鮮內地之義兵及寄居俄界之民黨又屢謀假道以與日人爲難臣等體察情形因於哈爾巴嶺以南圖們江以北長白山以東琿春及綏芬甸子以西將舊有巡防營四營擇要布置又撥陸軍第三鎮常備軍一營分駐延吉及圖們北岸嚴守國界又撥吉林陸軍一標駐紮琿春以重吉林南部之要塞故雖有鬍匪竊發無不隨時撲滅韓民懾我國威無敢蹈李範允倡叛之故轍日人藉口於越墾韓民受馬賊及我官民之陵虐越境之始已於邊防重要地方分設憲兵以冀攘我主權因於奉吉兩省巡警局內挑選警官警兵百餘名調至延吉卽以派辦處區域爲巡警區域嚴查匪類之潛藏密探日韓之動作遇有華韓人民爭執及韓民違抗禁令得隨時會同派辦處就近

辦理故日人雖設憲兵尙未能實行干預之計延吉廳治僅設小學一所而韓民之私設學塾者動受日人嗾使倡獨立自由之說冀以不受範圍因於延吉設學務公所復於廳街及琿春設兩等小學二所俾華韓子弟同受教育又於各鄉鎮分設初等小學及勸學所講習所韓民私立學校必由地方官驗明其章程課本亦須受學務公所之檢查韓民所立養正學堂已改爲官立小學學生數十人皆已薙髮易服傾心向化而教育可期普及矣凡此皆目前因應之急務倉猝圖謀未能完備而邊務之亟應籌備者猶有數端延吉沃甸荒原綿亘千里華民僅有萬戶而韓民已增至五萬餘戶計升科熟地不過十萬晌可墾之荒尙不至三十萬晌地利未闢賓主異勢因先於延吉廳北之三道灣一帶創辦屯田營一營用兵法部勒之逐漸推廣以謀拓殖延吉居吉林南部山

商歧出不便交通今日人於韓清津新開海港復於延吉交界之
會甯修有輕便鐵道商務實業之轉輸軍隊糧秣之運送瞬息可
達而我則道塗險阻內外睽隔因新招工程營一營專爲修理道
路之用先由吉林經敦化縣境以至延吉再由延吉東至琿春西
至北六道溝西北至娘娘庫東北至甯古塔逐段修理必使車馬
暢行雨潦無阻庶行政諸端皆可日趨便利延吉地方僻陋民戶
蕭條日人於六道溝廣買韓民產業修建公署鋪戶竭力經營而
我則辦公無公所軍隊無營房因於廳街修建邊務處公所於延
吉琿春各修營房三座並於分防各隊及派辦處所駐之區修建
公所營房七八處尙擬創修商鋪以廣招徠於以示
朝廷重視國界之意始能繫韓民內向之誠非徒外飾觀瞻而已
以上數端皆由臣等相度機宜勉籌應付明知勢力未足而尺寸

不敢假人明知財力萬難而布置不容稍緩明知人才消乏而駕馭惟恐或疏一年以來勉力圖維夙夜祇懼口舌辯難函電交馳實已智盡能疲才力俱困伏念

國家疆土尺寸必嚴其應竭力籌備無敢退讓者疆臣守土之責也若夫國際交涉亟應早爲解決毋使滋蔓者則實賴部臣之力非疆臣之所得預也當間島事起調查界務之證據對待日本之情形均隨時電達部臣與日本駐使及日政府辯論部臣內顧國權外全睦誼屢經磋商冀以漸就範圍而勘界問題屢催不復第恐日人以遷延爲計循是以往因應愈難財力旣不能久支人事幾無能爲役一時抵制豈爲萬全對待稍疏則乘間抵隙相持過激則恐成變端是勘界一日不決後患之來正未有艾臣等惟有與部臣合謀協力共任其難一面仍由外務部速催日政府早日

派員會勘解決此案問題明定國界各守範圍一面由臣等督率
幫辦傅良佐嚴飭派出各員隨時籌備維持現狀毋稍疏虞以爲
將來勘界之布置是尤仰賴

朝廷德威遠播力爲主持臣等稟承

謨訓得以保主權而固邦交此尤日夕兢兢而思有以善其後也
所有籌辦延吉邊務情形並宜早定辦法緣由謹恭摺密陳伏乞
皇太后

皇上聖鑒訓示

遵 旨查覆江省道府參案摺
奏爲遵

旨查明江省道府被參各節據實覆陳恭摺仰祈

聖鑒事竊准軍機大臣字寄光緒三十四年五月十三日奉

上諭有人奏黑龍江候補道宋小濂等盤踞要差浮開款目等語著徐世昌周樹模按照所參各節確切查明據實具奏毋稍徇隱原片著鈔給閱看欽此遵

旨寄信前來臣等當因事關奏參重案自應遴派大員確切查明以憑核辦旋派黑龍江提學司使張建勳按照所參各節調齊卷宗參考事實嚴密確查去後茲據該司逐款查覆據稱查閱原奏以道員宋小濂魁陞徐鼐霖等盤踞要差浮開款目而以墾務錢局及各項工程爲該道員等貪劣之據遵卽嚴密詳查廣徵輿論調核卷宗始知原參各節不盡無因而亦有傳聞失實者如原奏謂江省自設墾荒局以來均由宋小濂魁陞徐鼐霖主持其事又有多祿都爾蘇慶山常喜瑞麟表裏爲奸自占腴地包領轉售旗民商賈報領被駁郭爾羅斯巴拜依克明安荒地本係旗民舊領

收回丈放十倍其價各商所領三連票並不開明地畝銀兩僅以如數收齊四字印於票面其朦混可知一節查宋小濂以候選知州到江充文案處總理善後局會辦行總理事兼督察廣信公司三十三年正月奉派總辦哈爾濱鐵路交涉兼清理鐵路兩旁墾務嗣加派通判張樾赴段仍稟承該道辦理魁陞向充荒務局差由知府保升候補道於三十二年七月到江並未經手荒務惟徐鼐霖以奉省補用知縣於三十一年三月到江卽充文案處會辦兼墾務局會辦又曾接充總理中間補大賚通判升海倫同知皆未到任墾務是其專責多祿以分省試用同知到江充文案處會辦三十一年四月充善後局總理檢閱舊卷有該守訓斥局員手諭謂調閱各種帳目錯綜參互名目混淆不能盡解且未另易生手而前後任交代兩月餘尙未算清銀錢摺指不交出原帳發還

稽核等語似無與局員表裏爲奸之事是年七月奉委試署綏化府期滿補授因在任辦事竭蹶命盜案多起均未審結上年八月自請病假九月交卸亦未經手墾務協領都爾蘇充墾務局總理又曾承辦郭爾羅斯沿江放荒現任興東道慶山前辦理郭爾羅斯後旗鐵道迤西荒務及總理扎賚特蒙旗荒務直隸州知州常喜幫同協領瑞麟辦理通肯荒務瑞麟又專辦巴拜荒務行局雖各員辦事未盡妥善尙查無占地轉售實據惟訪聞魁陞曾領郭爾羅斯沿江二井地皆上腴據都爾蘇面稱荒價銀一萬四千兩如數收訖徐鼐霖曾領郭爾羅斯後旗荒地三井座落元字四段轉售二井係該員未入墾局時事又於充墾務局總理時領過訥謨爾河荒地三井有餘計荒價六千餘兩尙欠繳三千餘兩經已革總管福齡另案供明所謂自占腴地包領轉售當卽指此至謂

旗民商賈具呈報領均經徐鼐霖駁斥則係誤會卷查旗民領地間有被駁者係有人報領在先未便再准抑或有墳塋屋基等項違礙理應批駁至郭爾羅斯依克明安兩處俱係蒙荒並非旗民舊領之地巴拜係屬旗地奏明出放每晌收荒價銀二兩一錢郭爾羅斯依克明安所收荒價亦係二兩一錢並無十倍之價商民所領地照非不開明地畝但應納荒銀僅有如數收訖四字雖荒價具有定章既開地數自知銀數其中尙無弊混然究不如明填銀數較爲清醒無怪人言嘖嘖以爲朦混也原奏又謂江省奏設廣信公司攙行錢帖原屬便民官商股各以十萬爲本而入股者僅出空名以公司帖分開商鋪以致錢帖出至千餘萬之多而公司無現存之款財政統於善後局該局爲宋小濂魁陞徐鼐霖等把持以公司出帖之權高下其市價又挪動公款收買銀圓銷鎔

成塊展轉得利以致銀圓銀塊概行收盡惟以公司之帖行使民不能信一節查廣信公司初設係委協領吉祥爲總理福齡爲協理開辦之初攬使錢帖本屬便民乃該總理等濫行放帳凡商人入股者向公司借用款項超過原股三四倍至八九倍不等卽市面各店鋪借貸只要有人勾串說合便可挪用鉅款以致帳目愈放愈廣錢帖愈出愈多除外欠之款正在陸續催還外現存之款合錢尙三百九十餘萬吊之多謂無存款實係訛傳第從前放帳太多經手人難辭其責該總理吉祥協理福齡均已另案參革繼其後者亟應設法維持財政統於善後局該局初設係宋小濂主之後以魁陞爲督理徐鼐霖向未承辦公司之事出帖之權握於公司市價高下由公司與商會酌定非宋小濂等所能操縱至收買銀圓銷鎔成塊以圖厚利奸民市儈容有其事宋小濂等何敢

挪動公款悍然爲之江省土產無多商務不旺近年市面銀根甚緊銀根緊而銀價高向以錢帖三四吊易銀一兩今則五吊餘文尙難購得現銀然尙賴有公司錢帖展轉流通否則困難愈甚謂爲空帖太多價值低落則有之謂民間不能信用未免失實原奏又謂巡警一事按戶捐槍子若干枚每枚折算津錢一吊文令各戶交納適足擾民一節查江省舉辦巡警本城巡兵需用槍械由公家製備四鄉巡警令各屯長按戶捐錢爲購買槍枝之用嗣因各屯攤捐不公頗有騷擾情事雖不以槍子折錢而辦理實有不合已於上年十二月飭令停捐另行設法籌辦矣原奏又謂建造公園僅就舊有之官倉修葺用款不過五千七百兩浮銷二萬兩先賢祠修款僅用六千兩浮銷二萬兩商埠修造房屋一百五十間經魁陞招工包修每間估定九十五圓而徐鼐霖與魁陞商議

呈報奏銷部款每間核銀二百餘兩並勒逼工人具結其修黑水
廳衙署共用三萬七千餘兩而以八萬之數支銷其餘衙署學堂
之修建以少報多大率類此一節查公園係舊倉房基址向俄人
索回自應趕緊建築其房屋牆垣亭臺池榭俱係從新修造且栽
花種樹以及一切陳設器物通共用錢八萬八千九百餘兩按時
價合銀不及二萬兩尙係實用實銷如謂用款不過五千七百兩
差數太多何至浮冒若此先賢祠修造竣工共用錢六萬餘兩合
銀萬餘兩有冊可稽商埠局共建房屋二十六所計有二百零八
間經該局總理梁掌卿招工包修合計工料錢十九萬四千六百
吊招工時係在商埠局當眾投標事與魁陞無涉亦非每間估價
九十五圓更無徐鼐霖與魁陞商議奏銷之事詢諸工人並未勒
具甘結黑水廳衙署並巡檢衙門工程共用過錢三十萬零一千

餘帛不止用銀三萬七千餘兩皆鄭革丞國華經手之事與魁陞等無干自係傳聞失實至謂其餘衙署學堂之修建大率以少報多既未指明何處衙署何處學堂卽屬無從查核江省僻處邊陲百物翔貴與內地迥乎不同各項工程需款較鉅實非盡由浮冒此查明該道員等之被參實在情形也臣等查前署撫臣程德全蒞任之初適值變亂之後人才消乏物力耗亡於用人一端尤多困難卒能創立局所支持殘局其辦事苦心實堪共諒而事處萬棘不能處處圓融招人疑忌亦所不免卽如任用宋小濂魁陞徐鼐霖等雖未能盡滿人意而當時在江人員可用者祇有此數固較諸闕茸無能者猶勝一籌也謹就原參各節詳爲推究如宋小濂始充文案處善後局總理嗣往哈埠辦理鐵路交涉局仍兼文案處兼省城要政時賴參預及至護理呼倫貝爾副都統始開去

文案總理盤踞要差之說實由於此然既查無貪劣實迹未便苛以相繩且突小濂在江辦理交涉多年情形熟悉前經外務部飭令到京詢問交涉事宜事理明白才尙可用應請毋庸置議魁陞督理善後局正值荒價充足之時乃於通省歲入之款既未認真稽核剔出中飽復將局存各款濫放商家以致移交度支司各款大半虛懸其接管廣信公司明知虧累亦不加以整頓至於公私交困不可收拾雖該公司本無貲本濫發紙幣亦不自魁陞始然其辦理不善實難辭咎擬請將候選道員魁陞降一級選用以示懲儆徐鼐霖總理墾務歷有年所乃素有禁止局員領荒堂諭猶復自行領地以至貽人口實亦有不合惟查東省放荒全賴官商紳民集貲承領俾荒地易於墾種與內地官置產業不同未便禁止官場承領致於墾務有礙魁陞承領郭爾羅斯沿江二井徐鼐

霖承領郭爾羅斯後旗荒地三井又承領訥謨爾河荒地三井有餘應從寬免其置議惟徐鼐霖欠繳荒價三千餘兩應令勒限繳齊以清款項至邊地用人本難求備該員等雖無過人之才然變亂之後創辦各事具有苦心其未能力除積弊亦不必曲爲之諱宋小濂魁陞徐鼐霖三員均請交臣等隨時察看如果不知奮勉再由臣等據實糾參以警玩泄至多祿都爾蘇慶山常喜瑞麟等既據查明尙無占地轉售實據應一併免其置議臣等忝任邊疆夙夜祇懼於用人一端尤爲詳慎尙有不肖屬僚斷不敢稍事姑息溯查程德全當變亂殘破之餘猶能力任艱難保全大局亦賴有二三僚屬聊資臂助現在時會未平邊才難得尙卽過事吹求恐適以寒邊士之心無復與共艱難之任是又早在聖明洞鑒之中不敢不據實直陳者也所有查明江省道府各員

被參各節據實覆陳緣由是否有當謹恭摺具陳伏乞

皇太后

皇上聖鑒訓示

遵 旨酌提備贈各國瓷器摺

奏爲遵

旨酌提備贈各國瓷器恭摺仰祈

聖鑒事竊臣准專使美國大臣奉天巡撫唐紹儀咨開光緒三十四年八月初九日承准軍機處片開軍機大臣面奉

諭旨著唐紹儀在奉天宮內庫存瓷器酌提十件帶往各國以備分贈之用欽此相應傳知欽遵等因遵派分省補用道顏世清前往奉天敬謹酌提賚送來京以便帶往咨請轉飭所司一體欽遵辦理等因准此臣世昌遵卽派委署旗務司司使恩志會同補用

道顏世清親詣

大內敬謹挑選計由瓷器庫中選提康熙款五彩鶴鹿同春大圓花盆一件康熙款五彩松鶴綠海水邊大圓花盆一件康熙款五彩山水人物方花盆二件康熙款霽紅插花瓶二件雍正款白地五彩花瓶一件又由 翔鳳閣恭存廣甯行宮陳設內選提雍正款白地五彩花瓶一件

清甯宮陳設內選提乾隆款洋彩翠地錦上添花觀音瓶一件乾隆款磁胎畫瑤瑯白地山水瓶一件以上共提瓷器十件妥慎裝箱交由顏世清解交該大臣祇領攜往除咨總管內務府查照備案外所有遵

旨酌提庫存瓷器緣由理合恭摺具陳伏乞
皇太后

皇上聖鑒

政書卷十九

三三

退耕堂政書卷十九

退耕堂政書卷二十目錄

奏議

審明已革典史吳文煥婪贓玩法按律酌擬摺

開辦採木公司商借匯豐洋款摺

諮議廳擬設參事片

江省創辦屯墾摺

江省清丈海倫一帶浮多地畝片

尊藏 玉牒禮成摺

江省巡防隊遵照新章分別改編片

奉省擬設農官摺

改建奉省罪犯習藝所片

寶吉局歸併銀圓局搭鑄銅圓以維圜法摺

吉省各官廉費照奉天成案分別扣減摺

江省遷民實邊請免輪路川費以利進行摺

遵查蒙旗售荒得財抗不撥地各情形酌擬辦法請 旨摺

密陳派員調查邊界蒙旗情形摺

請撥吉省邊防經費摺

覆陳東省鹽務情形摺

查明奉省厯辦房捐情形並善後辦法摺

退耕堂政書卷二十

天津徐世昌

奏議二十

審明已革典史吳文煥婪贓玩法按律酌擬摺

奏爲審明已革典史吳文煥婪贓玩法按律從重酌擬以肅吏治
恭摺仰祈

聖鑒事竊查前據署新民府知府鄭葆琛呈報該府辦事官留奉
補用典史吳文煥詐贓受賄攜眷潛逃請予革職拏辦等情當經
臣批飭嚴緝去後嗣據探訪局將該典史拏獲發交提法司飭審
判廳審訊一面將該典史先行咨部斥革歸案審辦在案茲據高
等審判廳訊明擬議由司轉詳臣覆加確核緣吳文煥籍隸河南
光州報捐典史嗣又報捐雙月選用知縣尙未核准業因本案斥

革光緒三十二年投効來奉先經留奉委辦錦州漁業三十三年十月間經署新民府知府鄭葆琛將該典史派充該府署辦事官管理收發文件趙維新係新民府戶書是年十二月本街錢商因銀圓市價不齊稟請該府出示定價未經批准遂託商會總理劉殿選轉向吳文煥告稱此事有益於商無損於民懇其於鄭葆琛前代爲陳明以便復稟劉殿選向吳文煥告明前情吳文煥應允嗣眾錢商赴府具呈吳文煥當以有益於商無損於民似可批准之言向鄭葆琛婉說鄭葆琛隨即批准擬定示稿飭趙維新繕就送交吳文煥發出眾錢商當各湊集小洋六百圓送交吳文煥作爲酬謝並給趙維新小費錢二百千文嗣吳文煥因歲暮需款償債託趙維新向劉殿選並前商會總理靳錫九借得洋一千圓定期歸還復於該處零集公司私自來往摺內陸續多用錢一千八

百二十六千文未償吳文煥旋卽因事晉省未向鄭葆琛稟明經鄭葆琛查知各情稟請撤革緝拏由採訪局將吳文煥訪獲稟報由司轉交到廳革審據供前情不諱質之趙維新劉殿選並零集公司執事人趙惠廷靳錫九之子靳陞三供均相符再三研詰劉殿選供稱吳文煥託趙維新轉向分借洋一千圓伊等實係情願委非因案索詐亦無倚官挾勢情事現已悉數清償趙惠廷供稱吳文煥所欠零集公司借項實係彼此私交來往並非官款經前署知府鄭葆琛代還各等語應卽擬結查律載官吏有承行之事先不許財事過之後而受財事不枉斷者准不枉法論又不枉法贓各主者通算折半科罪無祿人一百二十兩以上罪止杖一百流三千里一兩以上至十兩杖七十無祿人減一等各等語此案已革補用典史吳文煥因該府錢商稟請示令銀圓定價託劉殿

正書卷二十一
選轉求該革員向該府代陳事前並未許財迨經該府批准出示
後該革員得受酬謝小洋六百圓訊係並不枉法查該革員所得
之贓折半科算係在一百二十兩以上自應按律問擬吳文煥合
依官吏有承行之事先不許財事過之後而受財事不枉斷者准
不枉法論無祿人一百二十兩以上罪止杖一百流三千里律擬
杖一百流三千里如能於一年限內將得贓全完本應照例免罪
惟奉省現正整頓吏治嚴飭各屬裁撤舊有門丁改委有職人員
充當辦事官原期痛除積弊乃創辦未久該革員竟敢敗壞良法
蹈襲前非若准予照例免罪實不足以儆效尤吳文煥應發往軍
台効力贖罪據供母老丁單不准查辦留養趙維新承書告示後
得受錢商小費錢二百千文按時價估計合銀二十兩零七錢八
分亦應按律問擬趙維新合依官吏事後受財不枉法贓通算折

半科罪一兩以上至十兩杖七十律係無祿人減一等擬杖六十仍革役亦不准完贓免罪應交習藝所工作二十日仍與吳文煥所得小洋六百圓均勒限追繳入官吳文煥所借劉殿選銀洋訊非挾勢業已如數清償所欠零集公司錢文並非官款亦已求限給還應毋庸議新街錢商稟請出示事後集資酬謝按律罪坐不應惟商鋪眾多紛傳必滋拖累應從寬免其置議劉殿選僅止聽受錢商囑託並無受賄及過錢情事應與無干之趙惠廷等均毋庸議該管知府鄭葆琛事先雖失於覺察事後聞知卽查明呈辦應免置議該革員捐照飭取另行咨銷等情由提法司吳鈞詳請奏咨前來除將原案咨部外所有審明已革典史吳文煥婪贓玩法從重酌擬緣由理合恭摺具陳伏乞

皇太后

皇上聖鑒

開辦採木公司商借匯豐洋款摺

奏爲開辦採木公司與部臣協商籌借匯豐洋款擬定合同恭摺
仰祈

聖鑒事竊奉省設立中日合辦採木公司其資本金應中日各出
洋圓一百五十萬圓奉省財力不充而公司自合同簽字後已於
九月初一日爲開辦之期亟須照驗現款勢難久待因思公司爲
商務性質有利可抵與尋常借款不同由專使大臣奉天巡撫臣
唐紹儀在京與外務部臣迭次籌商擬借匯豐洋款一百一十萬
兩由臣等商定合同底稿其分期攤還本利暨指定抵押之處經
臣詳細審定尙無窒礙並經部臣核准正擬專摺奏陳恭候
命下再與匯豐銀行簽字定議適奉度支部來電飭先由大連江

海兩關分撥銀五十萬兩作爲公司之款不足再行續籌等語以此振興商業之要圖部臣相與維持至可欽佩惟公司之款須一齊繳足是以先向匯豐籌商今部撥之款自應留辦他項要政如本溪湖與日本合辦煤礦須資本金五十萬圓又郵傳部咨行籌付日本電綫十萬日金均係目前急需之款卽擬以部撥之五十萬動用以免再與部臣籌付至與匯豐所訂合同已咨明外務部查核如蒙

俞允卽由臣遵照辦理所有與部臣協商擬借匯豐洋款作爲公司資本緣由謹恭摺具陳伏乞

皇太后

皇上聖鑒訓示

諮議廳擬設參事片

再查奏定東三省職司官制章程內開諮議廳設議員副議員顧問員額外議員均不定品位等語現在開辦已逾一年體察情形該廳掌議一省法令章制研究本省利弊應行損益各事實爲全省立法機關職務極爲重要應酌量添設實缺人員以資佐治今擬照承宣廳僉事品位設參事二員位從四品佐右參贊籌議一切事宜參事以下仍照章設置議員等員不定品位又該廳原未分科今籌辦統計及庶務事宜亦擬分設兩科以資任使謹附片具陳伏乞

聖鑒

江省創辦屯墾摺

奏爲江省創辦屯墾以興地利而固邊圉恭摺仰祈

聖鑒事竊維實邊之方必以闢地聚民爲先務自來策邊事者或

主徙民或主屯兵顧徙民則患其費多屯兵則患其食少求其兵農合一防守兼資舍屯墾無他道矣江省頻年招民墾荒迤東如綏化呼蘭海倫巴彥餘慶一帶洵臻繁庶然統計全省面積開放之荒尙不及十分之二放而已墾者亦不過十分之三其富商巨戶攬荒漁利久已習爲固然荒一入手高價居奇零星小戶無力分領積年累月終成蕪曠大段不能轉售因而拖欠官款以故放荒速而收價遲領地多而開地少阻礙墾務損害邊防職此之由臣等再四籌維非將墾荒辦法及時變通無以爲久大之計前據試署民政司使倪嗣冲呈請在本省創辦屯墾當令選定地段妥籌辦法嗣據覆稱省城西南嫩江西岸札賚特蒙旗所屬哈拉火燒地方爲江省蒙旗與奉天洮南各屬往來衝要本年春間曾經奏明會同該旗勘定出放擬請卽在該處指撥荒段招工開墾成

熟並建置廬舍以各鎮陸軍退伍兵丁自願就農者分年撥令到段每兵一丁授與熟地百畝其該段照章應劈蒙旗一半地價及墾地建房等費均由官家籌墊並每丁給予牛糧籽種費六十二兩自授地之年起每兵一人當年繳回租費銀三十一兩第二年繳回租費銀三十一兩第三年繳回租費銀六十二兩第四年繳回租費銀九十三兩卽由該處屯墾局填給大照作爲該丁永業於第五年照章升科先擬屯兵萬八於試辦之第二年起分年到段至第五年爲止其分起到段之前一年卽由試辦之第一年至第五年逐年招工墾地建房並至撤局之日止九年間經理屯墾局用之費共計需銀一百五十一萬九千二百八十八兩除自試辦之第二年至第九年止逐年收回五次到段退伍兵分年繳納租費銀二百一十七萬兩抵補各項用款外共計贏餘銀六十六

萬八百一十二兩其蒙旗應得一半地價卽由公家在贏餘銀兩項下提出算明撥付等情前來臣等詳核該署司使所擬辦法采
用屯田之策兼寓殖民之方於江省現在情形最爲適宜退伍兵
丁既有尺籍可稽分班到段整齊畫一以視客民倩人輾轉領荒
延不到段者不同利一以兵務農守望保衛之事是其所長自不
必另駐防營葺葺可期日靖利二授給熟地卽時耕種無匱乏之
虞且既定爲恆產卽可變作土民生齒日繁富庶可卜利三以官
力爲之開墾按丁授地按地配丁包攬大段之弊可免利四資費
出自公家數年之間其利自倍旣裨國帑亦厚民生利五有此五
利而無一害自應飭令該署司使先行試辦寬以歲月責其成功
行之有效再於沿邊一帶推廣舉行所有應需款項卽由臣等暫
向商家息借以備按期支用至此此外沿邊招徠民墾辦法現正詳

酌變通一俟議定再行奏明辦理除將逐年屯墾經費預算表咨部查照外所有江省試辦屯墾緣由理合恭摺具陳伏乞
皇太后

皇上聖鑒訓示

江省清丈海倫一帶浮多地畝片

再江省海倫廳一帶新荒初闢當時所放地畝往往積有浮多蓋由該處荒地陸續出放已近十稔上年變章收價亦未清丈浮多歲月既深寢致隱佔侵欺訟端百出民間深以爲苦臣等派員查酌情形僉謂該處農民皆因積年訟累牽連亟應早日清丈以保永業現經飭由度支司遴派妥員前往將該廳地畝擬定價目分別補收似於餉源不無小補一俟辦理就緒再行推及綏化青岡各屬俾正經界而順輿情除俟擬具章程另行咨部查照外謹附

片具陳伏乞

聖鑒訓示

尊藏 玉牒禮成摺

奏爲尊藏

玉牒敬謹成禮恭摺奏

聞仰祈

聖鑒事竊本屆尊藏

盛京

玉牒前經禮部奏准改由火車恭送至奉謹擇於十月初二日由京啟行初五日抵奉十一日尊藏等因咨行前來當經臣按照奏定恭迎禮節暨一切應行預備事宜分飭承辦各員敬謹籌備並知照

盛京副都統偕同旗務司司使巡警總局總辦率領巡警旗兵先期赴山海關恭迎初三日

玉牒火車抵關初四日抵新民府均由該副都統司使等沿途隨送敬謹防護初五日行抵

盛京城外車站臣率領參贊司道文武官員出郭跪接督飭正扶捧官恭請行箱入綵棚內安設綵亭導引入城至

崇政殿就行箱內恭請

玉牒暫奉於

殿內黃案上率領執事各官隨同王大臣敬謹行禮畢換用龍袱包裹依次列陳並派巡警長官飭警在

殿外晝夜守護周視巡防至十一日尊藏吉期臣偕同副都統率領參贊司道各官隨同王大臣就黃案前行禮恭捧

玉牒入

敬典閣內按照次序安度金匱敬謹尊藏仍隨同王大臣等督率在事各官行禮禮畢各退伏查此次

玉牒來奉計自山海關至奉天省城沿途地方文武各官暨在省城執事各員備辦一切事宜均能敬謹將事尙無貽誤除飭知內務府司員在

敬典閣外隨時敬謹防護外謹將尊藏禮成緣由恭摺具奏伏乞
皇太后

皇上聖鑒

江省巡防隊遵照新章分別改編片

再前准陸軍部奏定巡防隊新章行令各省按照改編等因咨行前來查江省營務亟待振興自須趕緊編練以修戎備惟統計舊

日額餉改編新制應裁兵數太多驟議實行似多窒礙現飭各營將隨時缺額暫不募補以爲逐漸淘汰之計並就原有駐省游擊馬隊一營又春間飭副將夏觀滋挑就步隊一營均照新章先行改併馬步礮各一營並加派統領各員作爲省城衛隊計尙餘馬隊兩哨現飭於十月底裁撤一哨其一哨前經撥歸清理鐵路兩旁荒務行局分駐各處正資彈壓未便遽裁又前奏撥駐漠河中軍右營一營計照新章改編一營尙餘步隊兩哨以一哨撥補衛隊照章改編其一哨目前駐紮安達廳一帶應與現歸清理鐵路兩旁荒務行局之馬隊一哨均暫照舊章開支俟通省各軍一律變通後再行奏明辦理除將各營哨前後起餉截餉日期并現支餉章分別咨部查核外理合附片具陳伏乞

聖鑒

奉省擬設農官摺

奏爲奉省擬請設立農官以興地利而廣甄拔恭摺具陳仰祈
聖鑒事竊查奉省沃野平原彌望千里素稱農國故所產向以糧
食爲大宗比年雨雪調勻幸登上稔特民間狃於故習農具不修
土宜不辨設有旱潦荒歉堪虞且他項貨產尙未十分發達全恃
糧食以資周轉必應公家提倡先事綢繆况荒墾日闢地浮於民
非由官設法勸導恐民力有時而窮地利終無由盡臣竊謂民以
食爲天養尤先於教中國向以農事爲重自后稷以農名官而土
訓司稼司澮諸官詳載於周禮以及漢有嗇夫唐有田正宋有農
師勞農勸相之職史不絕書卽日本之農務局亦且設有專官而
附以技師技手之屬詳考古今重農之典驗以奉省土地之宜自
應請設農官以資勸導且奉省自設農業試驗場以來講求種植

改良農具鄉民之來觀者日多頗知務農有學漸啟新知尤應及時推廣別設管理之員以冀實行之益又以田畷之官皆係鄉老之職奉省本多旗地而宗室覺羅八旗滿蒙漢子弟及在籍士紳近來頗多就學之人徒以成例所拘隘於登進若選擇此項人員作爲農官以資任使一以爲旗員廣任用之途一以爲旗丁授生計之學以本籍之人考求本地農事旣與他項職務不同而田產皆在本鄉則講求必力學成可以致用則鼓舞益多一舉而備數善胥由於此臣當飭諮議廳勸業道詳定章程覆加審核尙屬簡當易行此項農官皆直受勸業道之管轄而間接於農工商部尙奉省行之有效應卽推及於吉江兩省以興農利謹將議設農官章程繕具清單恭呈

御覽至森林礦產皆爲東省之優利現已分設學堂先從調查入

手將來應否另設專官容俟詳查明確再行另案奏明辦理除將農官章程咨部查核外所有奉省擬設農官以興地利而廣甄拔緣由謹恭摺具陳伏乞

皇上聖鑒訓示飭下農工商部核議施行

改建奉省罪犯習藝所片

再奉省罪犯習藝所係用刑部舊獄改造曾經前督臣趙爾巽在於善後賑捐款下撥給工料銀二萬一千兩並派員承修此項工程附片

奏明在案嗣該所工程修至十成之七適提法司吳鈞到任臣飭其親往查勘所估工程是否合式當以原估僅有工廠三排既無堅厚外牆不便看守又無罪犯宿舍仍屬聚於刑部舊獄之中舍宇傾欹房屋黑暗不特有礙衛生且有種種危險復因各級審判

廳成立審結之案較多收所人犯日形擁擠原估房屋亦不敷用由該司督飭前署奉天府知府管鳳龢另行規畫將舊有刑部司獄衙門地基圈入另又添購附近民房三所設法擴充擬於四面修築堅厚圍牆一百三十五丈改修扇面形監舍一百間可容住罪犯五百名又添修大工廠一座面積三千二百方尺及辦公樓講堂病房浴室看守宿舍儲貨等室共計一百九十七間將舊有習藝所人犯編成建築一科添募工師飭令自行承修覈實估計除拆存舊料相抵外尙應添撥購買民房並工料等銀二萬八千四百六十四兩六錢二分四釐七毫五絲臣札飭民政部司委員覆估相符當飭度支司如數撥給並飭俟工竣後併案造冊報銷至此項工程原估銀二萬一千兩續估銀二萬八千四百六十四兩六錢二分四釐七毫五絲先後共發給銀四萬九千四百六十四

兩六錢二分四釐七毫五絲前次係飭匠興修此次係添募工師由所犯自行工作所得工資餘利除酌給所犯外餘卽充其他所犯衣食之用每年所中領款較前節省一萬餘金從此樽節用款擴充工藝在所習藝人犯均可自食其力工藝既可期發達罪犯亦漸化善良公家經費日輕自足爲持久之計現在此項工程將次告竣據該司呈請奏咨立案前來臣覆查續估各工擴充房屋牆壁多處工料均屬堅實各犯習藝得有工資餘利足補食用不特公家每年費用較前節省實於感化罪犯改良舊習關係非鮮所有各款應請如數於正款內開支造報實用實銷除將原圖分咨民政部法部查照外理合附片陳明伏乞

聖鑒

寶吉局歸併銀圓局搭鑄銅圓以維圜法摺

奏爲吉省制錢缺乏銀價日昂擬將鑄錢之寶吉局歸併於銀圓局內搭鑄銅圓以維圜法恭摺仰祈

聖鑒事竊查吉林未設行省以前因制錢缺乏經前將軍希元奏設寶吉局鼓鑄制錢以資行使復由各商認繳四釐捐以爲鑄本開辦後每年僅鑄錢一二十萬千市面不敷周轉且鑄錢一千卽賠錢三四千文以四釐捐彌補外賠累仍復不貲屢經設法整頓因人工太貴苦無善策春間據署吉林度支司陳玉麟詳請將該局裁併銀圓局搭鑄銅圓以節糜費而便商民臣世昌等正擬據情入奏適奉

諭旨飭令各直省一律停鑄是以中止近來奉天湖南湖北四川雲南等省奏請開鑄銅圓雖先後經部議准然皆係因地制宜現在京畿長江一帶銅幣仍尙充斥何敢援例復請開鑄特吉省圜

法之壞實有與內地大不相同者謹將現時錢幣情形並擬變通辦法爲我

皇上縷晰陳之查吉省向少現錢專恃紙幣流通去歲改設行省來源既未加增用款日形竭蹶銀貴錢荒市面幾不可支持於是日俄紙幣乘機行使流灌市面以至貨價之高下利息之重輕操縱幾難自主臣世昌與調任撫臣朱家寶蒿目時艱亟籌治標之法特飭吉林官帖局隨時出借官帖以爲抵制於是商困得以稍蘇利權免至外溢惟此項官帖向章以二成付現雖係歷來辦法然發行過多現錢未盡充足是以本年入春以來現銀價值逐日增高計銀一兩卽易吉錢至五千六七百文商民貿易向以官帖爲本位與外省貿易交通又係以銀折算一轉移間受虧甚鉅臣昭常奉

命撫吉由延赴奉沿途經過綏芬廳甯古塔暨附近鐵道各州縣見其往來交通多用外國紙幣因而外幣愈昂官帖愈賤至民間則又以官帖與各行店私出執帖展轉行使銅圓制錢幾不見於市場小民日用所需極形不便是吉省苦銅圓之少與內地患銅圓之多適成相反到奉與臣世昌晤商整頓之策應先從錢法入手逮到任後卽出示曉諭將借出官帖到期陸續收回於是官帖漸少銀價漸平每兩跌至四千四五百不等此後若無切實辦法恐國幣日少外幣又增銀價縱可稍平而羗帖手票之價復形騰踊復經與臣世昌往返電商善後之策現銀既無來源外幣更難抵制欲紓目前之急惟有於銀圓局搭鑄銅圓以爲官帖輔助則銀價不期平而自平或可挽回於萬一寶吉局旣已歸併若仍鼓鑄制錢賠累伊於胡底奉天造幣分廠本可搭鑄無如遠隔千餘

里轉運維艱且須另籌成本現今財政困難別無閒款可以挹注
吉省銀圓局既無現銀鼓鑄若變通搭鑄銅圓毋庸另買機器另
派員司卽就原有工匠人役有銀鑄銀無銀鑄銅既可稍節糜費
亦可補救錢荒吉省銀錢均缺斷無沖行外省之病如蒙

俞允此項鑄本勿須另籌卽將原有四釐捐項購買銅筋不足之
數再由官帖局暫借紙幣以爲補助日後卽將鑄出銅圓歸還帖
本以爲應付官帖之豫備而官帖付錢成數擬請自開鑄銅圓之
日起向付二成者改爲增付四成以次遞加至十成爲止化虛爲
實民間自然信用則俄之羗帖日之手票均不至抬價居奇挽回
利權維持市面均有裨益關係大局實非淺鮮臣等意見相同所
有吉林省寶吉局歸併銀圓局擬請搭鑄銅圓緣由是否有當理
合恭摺具陳伏乞

皇上聖鑒訓示

吉省各官廉費照奉天成案分別扣減摺

奏爲吉省各官養廉公費擬照奉天成案分別扣減謹酌定數目
恭摺仰祈

聖鑒事竊吉江兩省各官養廉公費因財政困難自應體查情形
擬暫照奉天奏准成案酌量減成給發經臣世昌會同調任撫臣
朱家寶於本年三月間具奏奉

硃批該部知道欽此伏查奉天章程巡撫每年養廉銀一萬五千
兩公費銀三萬六千兩提法司交涉司度支司三缺最繁每年每
缺各支給養廉銀六千兩又各支公費銀一萬二千兩民政司每
年應支養廉銀五千兩提學司每年支養廉銀四千兩公費銀各
一萬二千兩勸業道每年養廉銀三千兩公費銀九千六百兩臣

昭常到任後與臣世昌體察吉省情形目前款項雖未充裕然養廉一項與奉天改設行省新設各缺品級既屬相同支放未便歧異擬照奉省新設各缺養廉數目一律支給仍核扣六分減平以符部章其應支公費吉省動用浩繁應仿照奉省支給數目按九成核發均從設缺到任之日一律起支以資辦公而示樽節所有擬定吉省各官養廉公費按照奉天成案分別核扣減平減成各緣由除咨部立案外理合會銜恭摺具陳伏乞
皇上聖鑒訓示

江省遷民實邊請免輪路川費以利遄行摺
奏爲遷民實邊籌備宜豫請

旨飭部寬免輪路川費以利遄行恭摺仰祈

聖鑒事竊維黑龍江土曠人稀籌邊務者恆以遷民爲切要之圖

近年內外臣工條奏多以移民實塞爲言臣德全本年奏陳應辦事宜亦經略陳綱要蓋人民寥落無論農業工商業皆屬無從振興目前放荒雖多墾荒仍少皆由平沙大漠絕少人蹤故也惟移民一策需款浩繁舉辦非易然江省若舍此不圖則整理更無下手之方臣等近日彼此熟商非移近省之民以實邊圉則地利未由大興非謀節費之法以通道途則辦理仍無實濟伏查內地各省近日輪路四通京漢一路已與京奉軌線相銜接而海上航路由煙臺而達營口取道尤便計赴江人民以直豫皖鄂及山東數省爲宜是由漢至奉火車及由東赴營商船皆爲赴江要路臣等刻正籌畫安插經費一俟妥商就緒應卽遣員繪圖遣赴各省設局辦理以廣招徠總期於遷民之中仍存便民之意惟輪路川資所需過鉅若由官籌給江省財力萬窘實難措此鉅資且移民墾

荒下利於邊卽上利於

國若以官中輪路爲之運送免其收價尤爲我

朝廷固圍興利之要策臣等現在酌籌辦法擬俟內地設局後隨時查有赴江人民確數卽由局員分給票照先期稟明郵傳部轉飭鐵路各總辦並招商總局驗明票照一律放行合無仰懇

天恩俯准飭下郵傳部遇有前項赴江人民准將所需路價輪船費概行豁免以利進行實於邊省殖民要政大有裨益其由奉至江一路應由臣等咨明外務部協力磋商辦理如有進者移民之議慮者恆謂小民安土重遷諸多不便臣等現擬分招民遷民兩等辦法先從招民墾荒入手一俟人知樂利不以徙邊爲苦則辦理更易經營如此則事輕易舉旣可曲順夫民心人盡知歸愈以充實夫邊境除分咨查照並俟擬定詳細章程再行奏明開辦外

所有預籌實邊請免輪路各費緣由理合恭摺具奏伏乞
皇太后

皇上聖鑒訓示

遵查蒙旗售荒得財抗不撥地各情形酌擬辦法請 旨摺
奏爲查覆蒙旗售荒得財抗不撥地一案並審明該蒙旗被控指
荒借欠各款謹酌擬辦法請

旨遵行恭摺仰祈

聖鑒事竊臣等承准軍機大臣字寄光緒三十三年十一月初三
日奉

上諭有人奏蒙古達爾汗親王那木濟勒色楞額售荒得財抗不撥
地迹近誑騙一摺著理藩部會同徐世昌唐紹儀按照所陳各節
確切查明據實具奏毋稍徇隱原摺著鈔給閱看欽此遵

旨寄信前來查原奏內稱達爾汗親王那木濟勒色楞前設福長地局招商墾荒商人張紹芝王銘韋升雲張殿元等五百餘家湊集荒價交該地局領有印照地圖蒙王狡賴延不丈撥商民財地兩空受害非淺各節前據該佃民王銘韋升雲等迭次以該蒙旗設局招墾伊等交價領有紅契久未撥給地段等情聯名呈控經前任將軍派員勘辦適其時吳玉祥呂長安亦各以該蒙旗指荒借債久不撥地等情前後具控該蒙旗因帳目不全無從質對始則稱該佃民等任意捏造繼則僅認王銘吳玉祥呂長安所控爲一案統共允償一款餘債悉不認還以致枝節橫生未能訊結茲旣奉

旨交查自應一併澈究臣部咨由臣世昌等就近派員赴該地局調查收價底冊查明此案始末卷宗及該局發出各項證據提集

人証詳究確情聲覆以便會同覆奏臣世昌等揀派輔國將軍遼陽城守尉宗室德裕奉天高等審判廳推事陶祖堯候補直隸州知州明哲前往確查去後茲據查明稟覆臣等詳加研核據王銘韋升雲張守田共稱光緒十一年間已故西北王署達爾汗王旗印務時福長地局招墾采哈新甸等處荒地伊王銘伊韋升雲伊張守田故父張紹芝招集五百餘戶湊得東錢四十九萬七千六百千先後交付局員三音吉雅等收訖定荒十萬八千畝發給地照七十三張二十五年間呈驗地照二十七張未經發還復因久不放荒屢次呈控種種耗費又用銀九萬四千餘兩均係各戶湊集業經存案又據已故民人吳玉祥抱告案發供稱光緒十一年間西北王借用吳玉祥東錢四十九萬七千三百六十千屢索未償十四年間西北王指采哈新甸荒地長六十里寬三十二里出

具蒙字印文借券至今未還屢次控催種種耗費又用東錢八十餘萬千均係指荒湊借曾經存案又據呂長安供稱光緒十二年間福長地局招墾伊領荒二萬晌陸續交過東錢十六萬千發給地照五十五張十八年因催放荒地局員又索去一萬兩立有合同一紙嗣以仍未放荒屢次控催種種耗費又用銀五萬四千餘兩均向親友湊集業經存案所領地照亂時遺失十五張餘與合同一併交案質之被告蒙員色汪東魯布安布合供稱光緒十一年間西北王署本旗印務時借用吳玉祥東錢四十九萬餘千指采哈新甸荒地作押出有印文借帖是年復設福長地局招墾王銘等先後交過東錢四十九萬七千六百千定荒十萬八千晌發給地照七十三張伊等祇經手收過三十二萬餘千餘款係三音吉雅等經手又十二年間呂長安等領荒二萬晌陸續交付三音

吉雅等東錢十六萬千發給地照五十五張伊等雖局內當差西
兆王諭令三音吉雅經理局務不合伊等辦事是以不知底細又
據該蒙旗出具押文稱本扎薩克王年未及歲時前署印西兆王
任內釀成此事所欠債目本旗向無底帳嗣由已故局員三音吉
雅家內抄出照根底冊及收價帳簿僅祇三本已屬殘缺不全民
佃索債原帳雖係早年在上衙門存卷清算此債若專靠佃民所
呈帳目詞出一面本難作准現既訊明王銘等領有地照爲憑吳
玉祥執有發給借帖印據呂長安復有地照及福長地局合同一
紙祇得體恤眾民不予深究卽以所允采哈新甸荒地長六十里
寬三十二里代西兆王抵還宿債無論債數多寡決不加增寸土
放荒後應徵地租請照章自行經徵以資辦公各等語臣等分勘
各供證諸案據該旗支借吳玉祥一款係以地作押王銘呂長安

兩案均以錢領荒確係三案各不相謀吳玉祥執有印文王銘呂
長安各領有地照核對照根底冊一一相符且各該原告交款帳
目早經存案確有可憑該蒙旗帳目不全曲在本旗更不能藉此
推諉指爲任意捏造今該蒙旗自知理屈已具押文並由該蒙旗
補具印文請以該王旗前允撥給之采哈新甸荒地代抵西兆王
所欠各債則佃民之債項旣已劃清各案不相牽混該蒙旗之抵
款亦經指定荒段卽可丈放自應卽予判決以清積牘第按原交
錢數給以原領地畝佃民固屬相宜而蒙旗損失太甚殊欠平允
且該旗係爲前署印西兆王代償積欠並非如原奏所稱該親王
那木濟勒色楞設局招墾誑騙得財茲以荒段了此三案已屬顧
全大局應請准如所請無論債目多寡儘以此荒了結此債不令
加增寸土查此項荒地長六十里寬三十二里按蒙荒章程十畝

爲晌以四十五晌開方計毛荒八萬六千四百晌按七成折扣得實荒六萬四百八十晌然土質不齊應約定爲上中下三則其上地每晌六兩六錢中地每晌四兩四錢下地二兩二錢俟委員會同蒙旗查明後方能得其價銀確數以現時地數約略計之可收價銀在二十八九萬兩上下俟委員丈放後除了此三案債務共計欠王銘吳玉祥呂長安各款連呂長安交銀一萬兩在內約合銀十二萬五千四百餘兩其餘之款查該民結訟至二十餘年不無廢時虧欠之累今該王旗旣經呈報以采哈新甸不增寸土了此債務俟官爲丈量清償原款外如有盈餘由臣世昌飭委按戶酌量分撥民人以資體恤並飭該委員暨該旗出示曉諭俾使周知以免承領人從中舞弊致使恩惠不能普被於民判決之後給予各該原告領款憑據持赴荒局照款核給地畝其前領福長地

局執照均卽追繳查銷倘有棍徒假名福長地局捏造假照希圖
誑騙應照例嚴行懲辦將假照與遺失各照悉予作廢似此酌量
判決該蒙旗宿欠旣已清結該親王那木濟勒色楞指撥荒地代
西兆王清償積欠將來升科以後該親王亦得享租賦之利該佃
民等債本旣全數收回耗費可酌予攤還從此各安生業永免拖
累如蒙

俞允應由臣等會商仍由臣世昌就近揀派廉幹妥員會同蒙旗
先儘采哈荒段丈放按方編號掣簽給領以期速竣而免弊竇至
放荒後應照蒙荒章程六年起租以恤民力並請如該旗所擬准
其照章自行經徵俾資辦公此次放荒原爲清釐旗債將來丈量
事竣再行照章報部核銷除照章加收一五經費外並應免加庫
平以惠眾佃至前署印西兆王指荒借欠久不撥地局員三音吉

正書卷二十一
雅總理局務不實不盡貽累民佃均有不合惟已早經物故應請
免其置議除由臣世昌飭令各該原告前往高等審判廳投案候
斷並分戶給據候撥餘款辦結後咨臣部先行備案俟地畝丈量
事竣再行咨部查照外所有遵查達爾汗王旗售荒得財抗不撥
地一案並審明該蒙旗被控指荒借欠各款緣由謹恭摺具陳伏
乞

皇上聖鑒訓示遵行再此摺係臣世昌等主稿會同臣部具奏臣
唐紹儀業經交卸故未列銜合併聲明

密陳派員調查邊界蒙旗情形摺

奏爲密陳迭次派員調查東省邊界蒙旗各情形以資籌備恭摺
仰祈

聖鑒事竊查三省幅員遼濶邊境空虛欲爲實邊之謀必先周知

其情勢從前道途多阻於邊地情況多未考察無事之時視同曠
土於山川形勢道路風俗曹然無聞及至事機猝發因應無方昧
於平時必至誤於臨事外交內政糾葛遂多自非多派幹員分履
調查列之圖說無以燭邊情而祛隱患臣等到任之始卽注意於
熟查疆界普闢蒙荒比年往復籌商陸續派遣舉凡蒙旗領地俄
韓邊隅形勢所關均經考察一以爲印證之資一以爲籌備之據
其最要者如吉江邊境密邇強俄輒多窺伺甚且別立俄文標記
界務時多蒙混疊經派員往查自滿洲里呼倫貝爾以下直至吉
林之三姓甯古塔琿春親歷邊界繪爲輿圖有界務未明之處亦
必別以標識而修闢道途徵搜形勝次第計畫藉圖措理又因穆
克登碑一事亦派員屢赴愛琿甯古塔蜂蜜山等處詳細調查旋
據報告或謂躬履其地無可究尋或謂確見此碑存立然碑界雖

存而方向易移卽於疆域大有變遷或由俄人私相遷移蓄謀侵越其交界封堆旋砌旋平者亦間有之又因沿邊各處交通不便信息阻滯旣於齊齊哈爾呼倫貝爾延吉等處添設電綫復於遼源洮南依次安設臨江長白亦在籌置並飭各員於沿路所經關於形勢人民之得失靡不詳爲報告以資印證韓民越墾介在奉吉之間情形偶疏交涉遂起因派員自琿春延吉以迄長白濛江臨江安東一帶嚴密考查詳其戶口里居之數查其自種代佃之分爲異日編定戶籍法之據其有無業及新來之戶亦詳加防範以泯枝節關於蒙旗之調查則派員由遼源入達爾汗王旗郭爾羅斯前旗圖什業圖王旗扎薩克圖王旗以抵洮南復分途派員由郭爾羅斯前旗抵伯都訥查看松嫩兩江合流之三江口又由哈爾濱循路綫尋洮兒河之月亮泡循岸測繪又由義州入東土

默特左旗入直隸境抵錫呼圖庫倫喇嘛牧地查看商情以期啟
牖蒙情經營藩服且各蒙旗地方日俄均派人調查測繪已歷有
年若不先事綢繆費於情形必至臨機貽誤也其關於邊務之調
查則分派各員由海參崴至百利以達海蘭泡及興凱湖完達山
一帶又由哈爾濱經黑河口折至墨爾根以達滿洲里又由延吉
沿圖門江經海蘭河以達琿春凡山川道路之險夷物產戶口之
多寡以及軍隊駐紮情形靡不詳爲考究以資籌措其間道路紛
歧情形複雜旣必寬以時日尤當資其費用經臣等分別酌給辦
公經費責令核實具報歷經照辦該員等分途四出調查目前之
籌備卽爲他日之經營實爲籌邊最要之事所需各費多係由臣
等酌量籌撥應請作正開銷核實造報以清款項所有調查東省
邊界蒙旗各情形緣由謹恭摺密陳伏乞

皇上聖鑒

請撥吉省邊防經費摺

奏爲吉省邊務緊要仍請

飭部續撥常年經費以資應用恭摺密陳仰祈

聖鑒事竊查吉省延吉廳一帶地方邊務重要前經奏派專員前往辦理又於上年奏請由部撥給常年經費六十萬兩奉

旨允准嗣經部臣議准指撥一次當卽陸續解到撥用所有該處辦理情形亦已隨時奏報各在案惟延吉一帶外人覬覦已久不惜鉅萬金錢經營布置肆意擴張若不預先籌備則放失政權益難措手此臣等上年所以有指撥常年經費之請併奏派專員前往籌辦迄今經年略有端緒一切費用正賴源源接濟以竟前功且該處幅員遼廓地利待闢應行舉辦之事甚多卽界務辦竣以

後亦應次第振興以規久遠核其常年用款首以開實業興屯墾
爲大宗他如測繪地面清查戶口添備軍餉平治道途創辦警察
建立學堂以及用人行政在在需款爲數甚鉅上年部撥之款轉
瞬一年屆滿業已將次用罄而各項要政經營擘畫甫具端倪若
功廢半途不特從前所費盡擲泥沙卽以後再欲整飭亦恐糜
費更多後時無及而吉省度支匱乏無款可籌臣等思維再四惟
有仰懇

天恩俯念邊陲重要

飭下度支部仍遵前

旨按年籌撥常年經費六十萬兩以應要需當此時事艱難庫款
支絀部臣統籌全局固不能不撙節度支惟邊防吃緊竭力整頓
猶恐失時何敢顧惜資財坐使前功廢棄至此項撥款專供籌邊

一項之用臣等切實核計已屬有絀無盈並懇

飭下部臣萬勿議減除上年部撥之款卽飭三省支應處造冊咨部核銷外所有吉省邊務緊要仍請續撥常年經費各緣由理合恭摺密陳伏乞

皇上聖鑒訓示

覆陳東省鹽務情形摺

奏爲覆陳東省鹽務情形並現籌辦法以維鹺政恭摺仰祈

聖鑒事光緒三十四年九月三十日承准軍機大臣字寄九月二十四日奉

上諭有人奏奉天沿海產鹽請妥訂官督商運章程等語著徐世昌體察情形酌核辦理原片著鈔給閱看欽此遵

旨寄信前來臣當札飭東三省鹽務總局通籌妥議按照原奏各

節分別詳查以憑核辦去後旋據該局督辦陸宗輿呈稱奉鹽向係就灘設局抽釐前將軍增祺任內奏辦督銷而未能實行誠如原奏所云惟原奏謂前將軍趙爾巽任內奏請就場徵稅將曬鹽運鹽銷鹽聯爲一氣由官主持合奉吉江三省而一之爲鹽歸官運之權輿至今年東三省總督徐世昌始准改爲官運於奉天設鹽務總局吉江二省各設官運局於營口設分局收買鹽斤由日本火車運北有販鹽者以私論以爲仿劉晏辦法爲利甚大豈知利少弊多一節查前將軍趙爾巽奏設東三省鹽務總局雖曾奏請官運迄未實行蓋因三省各自爲界不能由奉天將軍兼轄故不但不能行鹽政權於吉江而南有南滿鐵道私運充斥於吉省北有大宗外私由海參崴進灌於江省彼兩省官吏方以鹽政之權在奉天並未設法查禁於是私運之鹽徧及三省官課所入亦

且驟減至商運商銷本有此議去年奉飭招商迄無成說蓋奉省多係鹽坊小棧無鉅資可以運遠迥非內地鹽商可比今年三省督撫會議籌定官運辦法因於吉江兩省設立官運局而猶以金州租界鹽灘之交涉未定於南滿鐵道之私運時起齟齬不得已而爲扼要清本之計乃與該公司訂立合同令其減價裝運官鹽除官運票外不准再運私鹽沿途各站任我稽查然後吉江兩省官運方得有所入手至遼河惟夏秋可運需日甚久防私甚難較火車運費幾及兩倍卽未辦官運時商運之鹽亦已改用火車且糧食雜貨亦多由車運蓋遲速省費之殊自必有所趨重非因鹽歸車運而航業蕭條大車寥落也且吉江官運鉅資仍散於營口果能緝私得要官鹽暢銷荒灘日闢遼東西海岸七八州縣之居民獲利實非淺鮮而營口仍三省鹽務之總匯利民而非病民於

斯可信是原奏謂營口漸遜於大連乃港口凍否之關係而鹽務則於大連無涉也惟吉江兩省雖辦官運而運往之後仍發給本地商人配額銷售以期不奪本來之商利但官自爲運而商自爲銷各分界限無稍混淆原奏謂委用地方紳商爲員司者實係傳聞之誤又吉江辦理官運道路遙遠舟車之耗甚大且事在試辦盈虛未卜不能不稍寬限制因將所運鹽斤僅於例定每石六百四十斤之外吉省准再加滷耗八十斤江省准加一百四十斤以厚虧墊其實並無一石增至六七斗之數卽運至吉江後亦令平價銷售並無高價居奇之事謹按照原奏詳細聲覆前來臣查奉旨鹽務向以就灘設局徵收歷任將軍或請督銷或請官運皆未嘗有臣到任後首先規畫吉江兩省籌銷奉鹽辦法因東省無鉅款不能商運商銷於是有官運之議旣辦官運首在緝私因

於綏芬河稅關飭令嚴緝以絕東北海路之私運又以運路所經費輕爲要因金州鹽灘之交涉未定南滿鐵道之私運甚多於是與該公司訂立合同減價裝運且我有稽查各站之權並聲明不得私運而兩省官運費減私絕辦理方有端緒且未辦官運以前不但糧食雜貨均趨重於火車卽私鹽亦由鐵道私運是大車之減少航業之不繁非因官運之鹽而始然也將來營口爲鹽務總匯大利在民尤可想見且鹽歸官運仍係商銷卽於吉江商民亦無窒礙原奏所陳殆未知東省鹽務與內地情形迥不相同而三省官吏規畫之苦心固已兼顧統籌於利國便民兩有裨益也現在詳擬章程正在試辦如果行之無弊再行奏明立案以規久遠所有覆陳東省鹽務情形並現籌辦法緣由謹恭摺具陳伏乞皇上聖鑒訓示

查明奉省歷辦房捐情形並善後辦法摺

奏爲查明奉省歷辦房捐情形及妥籌善後辦法以釋疑阻而裨市政恭摺瀝陳仰祈

聖鑒事光緒三十四年九月十一日承准軍機大臣字寄九月初四日奉

上諭有人奏奉省房捐加倍重徵商民交困請飭酌量輕減一摺著徐世昌按照所陳各節查明情形據實覆奏原摺著鈔給閱看欽此遵

旨寄信前來臣當卽檄飭勸業道黃開文署巡警道鄧嘉禎會同嚴密查辦正在調查案據籌議辦法乃有公議會人等藉抗阻房捐爲名暗中唆使各鋪戶迫令罷市復經臣嚴切開導商民深知悔悟照常開市當將巡警局總辦王治馨商會總辦趙清璽一併

撤差一面嚴查公議會爲首滋事之人並檄派開缺民政部外城
巡警總廳廳丞奏派蒙務局督辦朱啟鈐嚴密查辦妥籌善後辦
法以維市政茲據各該員先後呈覆謹將辦理房捐抗拒情形及
籌議辦法爲我

皇上詳細陳之查奉天警察局始於光緒二十八年僅有警隊八
十名諸未完備經費在斗捐二成項下撥用迨日軍到瀋需辦防
疫衛生事宜前將軍廷杰飭商會籌借銀一萬兩並飭局籌辦鋪
捐由商會代收月繳一萬一千圓作爲警察衛生經費此爲開辦
鋪捐之始至前將軍趙爾巽整頓警察始立學堂以教巡兵釐定
警長等級酌增薪餉改警察局爲巡警局兼理路工衛生事宜各
局警長增至一千餘名歲支經費約在四十餘萬捐款不足由財
政局於釐稅局正項撥濟該局遂將衛生房鋪捐收回自辦以後

改刊執照銷去房字並據奏案聲明更正三十三年五月臣飭派候選道主治馨爲該局總辦適值馬路告成商埠開辦警務日漸推廣且自改設行省庶政畢舉民事殷繁用款更鉅適奉部文奉天巡警經費不准開支稅釐正款責令就地籌措而統計各項用款歲需五十餘萬該局所收捐項如鋪捐斗用捐膏捐人力車捐妓捐戲園捐屠場菜場等捐每年不過二五五六萬圓向來該局經費大率三成收之地方七成由前財政局及度支司撥款補助當飭該局於備補隊及雇用日員清道車輛分別裁減然出入相抵不敷甚鉅因飭令仿照天津章程分別等第籌辦以爲漸次騰出正款之計畫此奉天籌辦房捐之原委也至從前房鋪捐並列本係公議會經手刊發其時祇收鋪捐並未收及房捐故改由該局自辦以後卽將房字刪去且係前將軍趙爾巽任內之事當時

公議會屢次稟瀆懇減房捐節經趙爾巽批駁有案蓋執照雖係通用而商人祇繳鋪捐且所捐銀數較之未刪房字以前絲毫未增乃原奏仍摭拾公議會之緒論指爲重徵豈知此次出示籌辦房捐實與從前之鋪捐無涉旣非重徵自無所謂含混取巧此查明籌辦房捐並非重徵之實在情形也至公議會以款歸該局自辦曾在前將軍趙爾巽任內迭次與該局齟齬卽以執照銷去房字爲抵阻立論之據前商會總理孫百斛又經趙爾巽撤退是爲商會與該局反抗之始迨王治馨總辦局務奉飭籌辦房捐維時孫百斛函請該局收回房捐之命並要求宣示該局出入款目該局總辦措詞未當遂生意見由是蒂芥愈深多方運動肆意阻撓商會總理趙清璽始則於房捐滿口贊成繼則對於商民又不能宣布理由因於會場卽生反對並有不直該總理平日之所爲者

總會既失信用於商民各街分會如姚樹雁等亦不免各生意見眾難一開靡有決制遂釀成罷市之舉迭經臣嚴切曉諭業經開市如常此查明公議會抵抗之原委及會商與巡警總局辦理未善之情形也竊維籌辦房捐爲補助常年經費及節省公帑起見且各省均已舉辦自屬可行應卽明定章程分別等級宣示公布至該局出入用款已飭令統列預計表宣示周知以昭大信並核定以後常年經費無任耗濫至該局承辦委員其有不能得力者查有候選司務張翥聲名狼藉候補縣丞于鳳鳴不知檢束同知直隸州用留奉補用通判于奎恆行爲卑鄙物議沸騰均請卽行革職湖南警務畢業生鄭鑒奇縣丞職銜蘇炳樹辦事任性不洽輿情均請驅逐回籍蘇炳樹並革去縣丞職銜以示懲儆其孫百斛姚樹雁等遇事把持淆亂眾聽應請由臣隨時察看如有不安

本分情事再行分別懲處並應另定章程舊有公議會名目應卽
撤銷商會總理另行選舉並飭令另行選舉董事以符部章而資
整飭臣忝鎮三邊時以節用愛民爲念到任以後卽將紛瑣各捐
分別停止至房捐一項本爲補助警費正當辦法且奉省庶政殷
繁地方用款更鉅而兩強相較如工巡衛生等事自應加意擴張
以地方之款辦地方之事爲之撫集振興本地紳商共聞共見乃
公議會等與該局意見甚深積難已久故爲種種運動冀以破壞
成規臣於該局辦理不善之員業經分別嚴懲而商會不協眾望
公議會之肆意阻撓尤應革去俗習斷不容藉自治之名以撓亂
市政此尤爲積弊旣久之區非另籌辦法無以挽回風氣也所有
查明奉省歷辦房捐情形及妥籌善後辦法緣由謹恭摺覆陳伏
乞

皇上聖鑒

退耕堂政書卷二十

退耕堂政書卷二十一目錄

奏議二十一

奉省諮議局改爲諮議局籌辦處並設自治研究所摺

撫順縣治旗地由縣經徵片

創設吉林旗務處工廠並籌款情形摺

附單

調東陸軍底餉明年仍請由原處協撥摺

奉軍中前兩路改編陸軍步隊片

官兵在蜂蜜山一帶剿捕巨匪獲勝情形摺

籌設洮南驛站擬開達爾汗旗道路摺

裁撤海龍總管員缺並酌擬各官兵辦法摺

遵旨辦理代籌蒙旗借款還債摺

奉省各軍遵章改編巡防隊摺

請議卹覺羅鳳山片

前息借大清銀行節省銀兩仍留接濟各蒙旗片

查明嫩江水災並分別賑撫摺

辦理綏化府等處蠶桑片

遵旨開辦吉省諮議局籌辦處情形摺

吉林自治會改爲吉林府自治局並設研究所片

歸併奉天府各級審判廳並酌改廳名員缺摺

撫順地方審判檢察廳開辦情形摺

查覆錦州府屬官地清丈情形摺

退耕堂政書卷二十一

天津徐世昌

奏議二十一

奉省諮議局改爲諮議局籌辦處並設自治研究所摺

奏爲奉省原設諮議局改爲諮議局籌辦處並附設自治研究所情形恭摺仰祈

聖鑒事竊前准吏部咨開內閣鈔出光緒三十三年九月十三日奉

懿旨著各省督撫在省會速設諮議局慎選公正明達官紳創辦其事等因欽此欽遵咨行前來旋准憲政編查館及資政院先後咨催設立並候擬定詳細章程頒行等因當經臣妥爲計畫於上年冬間就奉天省城設立諮議局檄委民政司使張元奇爲局長

同時遴派大紳

盛京副都統多文會辦選舉事宜伏思諮議局有指陳通省利弊籌計地方治安之責奉省經前將軍趙爾巽奏設全省自治局內分考訂調查兩科又附設調查員養成會一所係選錄士紳肄業以預備實地調查之用與諮議局有直接之關係當經臣將原設自治局歸併該局辦理藉以節省虛糜統一責任惟查奉省情形不同內地滿蒙漢客籍土民歷來錯處兵燹以後戶口疆域之變遷尤屬茫無稽考若非調查確實將來議員之選舉必多困難因選派調查員養成會畢業學員一百零八名分赴各屬調查至本年六月竣事計得各項表冊地圖等共五千九百五十件業經飭令趕辦編輯務早成書旋准憲政編查館咨知業經會同資政院將諮議局章程奏

允頒發其現設之諮議局應改稱諮議局籌辦處等因並恭錄
諭旨印刷原奏清單頒行前來臣欽遵辦理立飭該局改爲諮議
局籌辦處以歸一律惟是諮議局爲預備立憲之機關而根本尤
在地方自治臣於本年夏間正在計畫適准民政部咨催將地方
自治研究所速爲籌辦遵卽札飭民政司使張元奇就該處舉辦
一面分飭各府廳州縣慎選端正明達士紳送省疊經考驗取錄
得學員一百八十名於八月初十日開學講求地方自治制度及
各國憲法議院法選舉法等以六箇月爲一學期限兩學期畢業
遣回各屬原籍推廣傳習務期風氣漸開人人知以盡義務爲己
責則邊氓之程度日進文明庶憲政之萌芽漸臻發達至籌辦處
應用經費業由度支司籌撥作正開銷除將簡章分別咨送憲政
編查館及資政院民政部外所有原設諮議局改爲諮議局籌辦

處並附設自治研究所緣由理合恭摺具陳伏乞
皇上聖鑒訓示

撫順縣治旗地由縣經徵片

再奉天原設之附省興仁縣治前經臣等奏請移至距省九十里
之撫順地方改名撫順縣卽將該處原設之路記防禦各員一併
裁撤催徵租賦緝捕盜賊等事統歸地方官辦理等因奉
旨允准在案查撫順四旗界內旗地有

興京倉草豆地有內倉及

興京倉米地又有餘租升科官兵隨缺各地現既改設縣治各項
旗地自應一律改爲民地遇有買賣卽照民地稅契其糧租科則
原多與民地不同第相沿已久擬仍暫照舊則徵收以免紛更草
豆地一項經前任將軍崇實奏定以六畝爲一日每日折徵東錢

一千一百二十文內以八百七十文交倉以二百五十文作爲旗界催徵經費擬請飭縣仍照舊則折徵以八百七十文歸公按照市價易銀留支該縣廉俸役食如有不敷再行請領其餘二百五十文以爲該縣辦公經費米地一項亦仍照舊章徵收本色所徵米石按年存儲遇有災歉提撥充賑惟內倉及

興京倉額徵撫順草豆米地既改由該縣經徵則額收較少將來興京倉應放米豆草束如有不敷應赴倉務局請領倉務局米不敷放卽由外城各倉提解餘租升科兩項地畝應徵制錢均仍照舊章按年批解司庫充餉以上四項統改歸民地奏銷案內分別造報隨缺地租一項應由該縣代催將租銀逕解各旗衙門核收並將已未完分數造送考成清冊彙案咨部至該縣廉俸役食定額擬請卽照興仁縣原定數目開支毋庸另行更定以歸簡易除

飭該縣將各項地畝接收清楚造冊詳請咨部並出示曉諭外理
合附片具陳伏乞

聖鑒訓示

創設吉林旗務處工廠並籌款情形摺

附單

奏爲籌畫旗人生計創設吉林旗務處工廠並恭陳籌款情形仰
祈

聖鑒事竊維處天演競爭之世非自立不克圖存際環球商戰之
場惟勸工方能足用吉省襟山帶江物產本富而旗人世蒙豢養
久昧營生迄今食指日繁俸糈有限謀生乏術坐致困窮欲籌補
救之方不得不振興工藝伏讀光緒三十三年八月二十日

諭旨籌畫旗人生計仍將各項實業教育事宜勒限認真籌辦等
因仰見

朝廷垂念旗丁至周且渥欽遵之下感激莫名允宜深體

廟謨認真籌辦以興實業而節虛糜茲據旗務處呈稱擬於迎恩門外水師營顏料庫舊址就其原有房屋酌量添改建爲工廠廠中一切用款均由通省各旗舊有之款暨官兵旗產酌量妥籌卽定名曰吉林旗務處工廠招集旗籍藝徒百六十名先分五科曰革工科專製軍警兩界應需靴鞋箱帶馬鞍提包等件曰金工科專製革工上所需銅鈎鐵片等類與革工科相輔而行曰織工科專製冬夏軍學警各界操衣布疋兼織腰帶鞘繩等件曰染工科專染本廠所出物品與織工科相輔而行曰紬工科購買縫紉機器就本廠所出布料製造成品與織工染工兩科相輔而行以上五科均先供軍警兩界及學堂之用所有製出物品卽隨時設所出售以廣銷路如能辦有成效再行添設他項工料續製商品以

臻完備其購置材料及運銷貨品於路過各處關卡擬仿照京師工藝局章程由本廠填照送驗免徵釐稅取天生之原料招土著之工徒延聘匠師教以藝術畢業後優給出身分別派往各處轉相傳受如有才藝出眾自出心裁造成特別用品應准照章立案分別專利請獎但使一人習有片長卽一人多一生路倚賴之性質既除立憲之資格自備十年以後必能普及全旗惟創辦之始籌款維艱通盤籌畫約計建築及開辦費需銀一萬五千兩五科成本一萬三千兩每年經常費七千兩倘有不敷設法籌補如有贏餘再當添設工科以爲擴充地步並開呈籌款情形三則呈請立案前來經臣等詳加覆核尙屬切要可行應准試辦查上年京師創設八旗工廠業經奏准開辦在案奉省近亦設立八旗工廠今吉林創設旗務處工廠事同一律合無籲懇

天恩飭部立案俾得及時開辦如蒙

俞允再將詳細章程建築圖表免稅照式分咨農工商部民政部
度支部陸軍部學部郵傳部查照所有籌設吉林旗務處工廠並
開辦籌款情形謹恭摺具陳伏乞

皇上聖鑒訓示

附創設吉林旗務處工廠籌款清單

一牛具銀

謹按此款前因旗丁生計維艱由庫撥銀三萬六千八百
三十三兩二錢五分專爲接濟全省旗兵之用名曰牛具
銀蓋卽寓兵於農之意每次開放每兵祇准借給銀二兩
仍由該兵應領餉內陸續扣還按年報部一次歷經遵辦
在案惟借支須由該管官具保因此弊竇叢生則是留此

一款徒供官吏市惠侵剝之具且貧者未必能借而借者決非眞貧辜負

皇仁遺累寒峻莫此爲甚現在該款自光緒三十二年報部後所放之數將次扣齊省城存儲度支司外城存各副都統衙門尙未動放擬請將牛具一款改撥旗務處工廠經費以歸實用第此係內結之款須由部核准查上年八月間欽奉

諭旨籌畫旗人生計准撥部款等因而該處工廠本爲籌畫旗人生計而設揆諸名義亦屬相符

二匠役銀

謹按此款前因各旗練習弓箭故設弓箭匠二百五十七名每名歲支工食銀十二兩共銀三千零八十四兩除每

兩由部章扣二錢又扣二分外實發銀二千四百一十七兩八錢五分六釐今弓箭業經廢除此項匠役不免虛設擬請將該工食銀每年二千四百一十七兩八錢五分六釐提充工廠經費其食餉之匠役擇其才堪造就者撥入工廠習學手藝庶幾款不虛糜人各有用一舉而數善備焉

三隨缺租地

謹按此款於光緒十八年經前將軍長順奏准以省城十旗水師營甯古塔阿勒楚喀琿春吉拉林烏拉五常堡伊通州額穆赫索羅等處官兵隨缺地十三萬九千八百六十四晌每晌給銀一錢八分除每兩由部章扣六分外實發銀二萬三千六百六十四兩九錢八分八釐八毫每年

隨秋季官兵俸餉一併核發俾資津貼等因歷經遵辦在案現因創設旗務處工廠經費困難當飭旗務處會同各旗協佐等再四籌商該各旗願將隨缺地租銀兩畫撥一半每年計銀一萬一千八百三十二兩四錢九分四釐四毫撥充工廠之用查此款原因旗署官兵生計艱窘畧資補助起見但按款攤分每名所得無幾若以一半撥作工廠經費則貧苦旗人漸能自食其力於箇人所損甚微於生計大有裨益且以旗人所得之財辦旗人應辦之事公誼私情兩無窒礙擬請將每年隨缺地租畫撥一半以充工廠經費其餘一半仍由各該旗按季支領以示體恤

調東陸軍底餉明年仍請由原處協撥摺

奏爲調東陸軍底餉屆期滿仍請由原處協撥以備軍實而裕

餉源恭摺仰祈

聖鑒事竊照前次奏明調撥陸軍第三鎮全隊暨抽撥第六鎮及二四五鎮步馬礮各隊立混成兩協來東擇要駐紮餉項等均准暫由原處協撥嗣以東省常年出入之款併計統籌不敷相抵於上年十一月間奏請將調東陸軍一鎮兩協正餉加餉暨第二混成協添設協標人員薪餉等項本年五六月以後仍照常由原處撥給欽奉

硃批著照所請該部知道欽此並經陸軍部奏明東省籌款爲難情形屬實除第二混成協應需軍餉由直隸酌核辦理外其第三鎮第一混成協餉項三十四年五月以後准再展撥一年一俟期滿卽由該省自籌等因奉

旨依議欽此由部咨行到東欽遵各在案臣等伏查該鎮協調東

駐紮原爲鞏固邊防起見所需軍餉轉瞬之間一年屆滿自應先
事預籌惟東省財力向稱支絀近年舉辦新政需款孔多出入相
抵不敷甚鉅而根本重地兩強逼處彼方不惜重貲日事經營且
邊氓艱苦又未便就地過事搜羅以兵力論剿匪防邊尙虞不足
以籌餉論左支右絀實屬無可籌措所有前項陸軍餉款關繫緊
要預計明年五月以後如改由東省自籌實在萬分爲難合無仰
懇

天恩俯念東陲邊防重要財力艱窘

飭下陸軍部北洋大臣准將調東一鎮兩協正餉加餉暨第二混
成協添設協標人員薪餉等項明年五月以後仍照常由原處協
撥以資接濟一俟財力稍充再行奏請改歸東省自籌除咨行陸
軍部北洋大臣查照外所有調東陸軍底餉仍請由原處協撥緣

由謹合詞恭摺具陳伏乞

皇上聖鑒訓示

奉軍中前兩路改編陸軍步隊片

再奉省各軍遵照新章改編巡防隊曾經奏明於奉軍舊中路舊前路內抽撥年力精壯嫻習操法之目兵編成陸軍步隊一標另行奏報又其所節奉軍餉項卽爲新編陸軍步隊一標經常各費及製備巡防隊軍裝車馬川資犒賞一切之用等因各在案查此項目兵業經照格調撥所有一切章制均經遵照陸軍部奏定成案改編成軍飭令在錦州常川駐紮以資鎮攝仍一面督飭認真訓練加意研求務使技藝嫻熟藉成勁旅其餉乾銀數及各項津貼等費卽由奉軍節餉項下自改編點驗相符之日起支至改編伊始應添各項器械需用銀兩均請作正開銷核實造報除將改

編清冊咨部備案外謹附片具陳伏乞

聖鑒

官兵在蜂蜜山一帶剿捕巨匪獲勝情形摺

奏爲官軍在蜂蜜山一帶剿捕巨匪迭次獲勝情形恭摺具陳仰
祈

聖鑒事竊維東省馬賊聚散無常上年迭經官軍剿捕大股悍匪
殲除雖多而邊境遼廓土曠人稀官軍駐紮較遠之處前次遁入
俄界餘匪又復出而嘯聚乘間滋擾燒搶民房擄去墾員墾戶劫
斃俄孩捉勒俄商盤踞蜂蜜山衛沙河青溝嶺一帶臣等當飭行
營翼長張勳揀調淮奉兩軍搭附日俄火車至一面坡由北而南
又飭兼統吉林中路統領孟恩遠揀調吉軍由南而北節節搜剿
兩路夾擊爲一律廓清之計據該翼長先後呈報本年五月在太

馬溝擒獲迭與中外官兵抗拒之匪首李藍旗在東北溝生擒匪黨尹玉刪孫長青奪獲被擄墾戶一名其派剿衛沙河兵隊搜至三道川遇匪好勝朱雙六等率領大股開槍拒敵官兵奮勇迎擊約三時許陣斃匪黨十名生擒悍目王幅先王勢猖餘匪向西南遁去奪獲槍九枝子彈二百粒旋與派往七站之隊會合追至呼蘭克道岔猝遇朱雙六洛二鍾老屋等合股約二百餘人官軍奪險分撲彈如雨注陣斃匪首朱雙六等六名奪獲槍十枝匪股入集堅壁拒守官軍乘風縱火立燬木巢五處取耳級十四枚尾追十里至東南溝內轟斃悍目梁老疙瘡等數十名生擒悍匪張蟾順一名匪目傻子東山負傷率眾逃逸是役也我兵小有損傷遂分兵三路躡追集合於卧虎溝訶悉悍賊訪友等帶隊數十名擁挾俄裔乍藏匿計我軍放槍圍擊陣殲訪友等四名槍傷數名奪

獲槍四枝我兵受傷三名追至海浪河雨水漲沖斃匪黨數名奪回俄商郭列一利喀當交俄商雪結士幫辦霸拉撓維持領去其圍逼蜂蜜山一帶之軍至小金山遇匪陣殲匪黨二名奪獲槍二枝背兜兩具又殲劉匪一名我兵受傷二名先後生擒悍匪曹大嘴子柳屏維吳受豚暨前劫俄商什里郭夫幼孩之匪首杜受信又計斃尹大箇子生擒十五閻王及久窟穴海參崴之著名巨匪張振海同時中路統領孟恩遠派步隊第四營在石頭河地方與賊鏖戰擊斃匪首頂上煙一名夥匪四名擊傷匪黨十數名奪獲軍械衣物焚燬賊巢糧草並救回民票八名又在穆稜河台馬溝等處先後救回墾局委員三員賊巢破後遺股竄入黑背荒溝口等處我軍追至左右夾擊陣殲匪黨六名奪得槍彈鉛條等項此外另股或分或合出沒不定淮奉兩軍復分七路搜剿當搜至

下城子窩集匪首孫當家與李三省合股約數百十名我軍扼要截擊生擒匪首孫當家悍匪呂狻峰曹得凌李瀉澆陣殲七名奪獲槍十枝並馬匹洋酒米麪背兜多件我兵受傷三名該匪夜附火車而遁隨齊俄護照追入海參崴潰匪正投入崑埠匪首滿堂紅姜搜山部下共謀劫奪孫匪當請巡撫福魯格添派兵士輪船掩其不備將二匪首滿堂紅姜搜山就島邊綁縛並生擒悍黨王停棧孫藕受唐薪三周十洛二余幅菁共六名道遇匪黨抗劫立即槍斃匪目四名餘匪駭遁又偵悉匪首王得一股竄伏泉眼河紮卡立柵我軍乘夜襲入分破卡柵三道陣斃匪首王得礮頭訾姓等十六名奪槍械米糧無算救回被擄鐵工喬魁一名我兵受傷六名歧路伏兵生擒悍匪趙得豺一名擊斃四名救回被擄張進寶一名又在五站炭窩陣殲匪目張厚巴張喉嚨等六名生擒

匪首滕洛管王九豺奪獲槍馬帳棚子彈多件由是東北各匪悉合股麇集於老松嶺大小烏蛇溝駱駝碛子南岡南湖頭等處作負嵎抗拒奔竄俄界之計匪首李三省聯合各股率悍黨三百餘人散伏於七十二頂子內官軍扼要設伏陣殲匪股前隊十六名奪獲槍八枝我軍陣亡一名餘匪竄南湖頭一帶沿路燒劫裹脅愈眾追至松窰溝匪迫居民爲前列用以自護官軍斜刺衝擊殲匪十一名匪棄居民潰竄伏兵四集兜殲匪黨二十五名生擒夥匪張乏一名我軍陣亡兵丁差弁各一名救回人票六十六名被脅裹居民男女百餘名口連日跟追先後斃匪十二名奪獲槍枝牛馬糧食衣物無數生擒積匪王蚊菁王幅呂瀟蚊甄禿子四名又於四平山擊斃匪首進豺等四名生擒匪目岡維五李老屋婁獠櫬三名餘匪與孟嘗涪劉鈺陵合股官軍由狼牙山會集於野

馬嶺時已夜深刃斃守卡匪三名匪眾驚亂適有被脅之劉占山等率黨十餘人願爲內應我軍奪隘直入陣殲匪黨十八名生擒匪首孟嘗涓劉鈺陵兵丁受傷四名搜獲大小槍十九枝擡槍一枝俄布里苗特格林輕機快礮一尊餘匪星散現在大股殄滅首要殲除地方較前安謐墾民漸次復業堪慰

宸厯惟李三省一名屢經痛創遠遁潛伏現正分道圍搜務期弋獲懲辦查該翼長等督飭將弁兵丁冒暑遄征不辭艱險或督率搜捕迅赴戎機或親冒鋒鏑力圖報効洵屬卓著勞勩應俟飭將在事出力各員及傷亡弁兵名數查明具報後再行擇尤保獎分別議卹以勵微勞而資激勸所有官兵迭次剿捕巨匪緣由理合恭摺具陳伏乞

皇上聖鑒

籌設洮南驛站擬開達爾汗旗道路摺

奏爲籌設洮南驛站擬請開闢達爾汗旗道路以利交通恭摺仰
祈

聖鑒事竊臣前將籌辦蒙務詳細綱要及分別籌款各情形疊次
奏陳在案伏以言拓殖者必以交通爲首要蒙旗舊站廢弛不修
方域又異無論荒僻之區荆榛未闢卽設治已久亦復形勢睽隔
道路不通查洮南一府爲哲里木之奧區亦三省之衝要乃自該
府至遼源州中間二百餘里均係達爾汗旗管界荒漠無垠村落
絕少裹糧乏術行旅維艱加以蒙丁蒙會以主陵客商貨往來轉
資盜賊派兵巡緝又苦駐紮寥落勞逸勢殊文報之稽延饋餉之
周折種種困難幾同絕域卽不經營藩服亦未可任其梗塞致礙
治權況目前籌辦蒙務尤應及早開通以資整飭前任將軍趙爾

巽屢議奏請開放因該旗吳玉祥一案多年纏訟未結因循不果今該案已由臣會同理藩部議結奉

旨允准蒙民遵守均無異言自可繼續開辦況現在推廣三省要路電綫由新民起經法庫遼源洮南以達齊齊哈爾大都經行蒙地其設在洮遼一段者業已次第敷設而站路不修巡護不密終虞梗阻臣再四思維非亟籌開放不能化除畛域卽不能便利交通查遼源州以北經卧虎屯至邊昭止凡爲達爾汗旗管界共計二百數十里應請一律開闢疏通官道置設驛站支配弁兵假以警務治理之權俾得實力巡護其沿路兩旁各劃十里從事墾放以資生聚庶洮遼聯合一氣永無阻隔之患裨益行政實匪淺鮮况當整理蒙務之際尤難視爲緩圖如蒙

俞允再由臣行知該王旗會同派員丈勘明確查照向章奏明辦

理以期實行所有籌設洮南驛站擬開闢達爾汗旗道路以利交通緣由謹恭摺具陳伏乞

皇上聖鑒訓示

裁撤海龍總管員缺並酌擬各官兵辦法摺

奏爲海龍總管員缺職務太簡裁歸地方官辦理並酌擬裁撤各官員兵丁辦法恭摺仰祈

聖鑒事竊查海龍旗署之設原以海龍爲鮮圍場地於光緒初年奏請丈放安插無業流民迤西大圍場卽東西流水今之東平西安西豐三縣地方彼時尙未開放恐附近居民入圍私墾或偷打牲畜乃設立總管一員專管四季巡圍緝捕盜賊並督催海龍徵收等事又設佐領二員按月巡圍培築封堆分管界段催收課賦又設防禦四員驍騎校四員管理各旗領催兵丁又設筆帖式一

一切事宜及官員兵丁應如何裁併統歸地方官辦理核議呈覆去後未及具奏移交到臣查奉天改設行省釐定官制意在明定權限各專責成海龍既改設府縣事權不專則百弊叢生况該總管既無主管職務員缺幾同虛設自應將海龍總管員缺裁撤以祛積弊惟該總管及所屬佐領防禦驍騎校筆帖式等皆係實缺人員合無仰懇

聖恩寬留出路照前將軍趙爾巽奏准歸併五部裁缺章程准其對品安插以免向隅至領催兵五百名係由八城六邊門額設制兵內隨帶底餉抽調而來在此戍守多年較之在原旗駐防已屬勤勞有加應准將該領催兵逕留在此以實邊荒不裁底餉俾得與各城邊路制兵一體霑沐

皇仁出自逾格

鴻施其盛軍之名目及加給之練餉悉飭裁撤以節虛糜所有該
總管衙門應辦旗民一切事宜及徵收地糧田房稅契均由海龍
府直接照章徵收以一事權除咨部並通飭各屬遵照外理合將
海龍總管員缺職務太簡裁歸地方官辦理併酌擬裁撤各官員
兵丁辦法緣由恭摺具陳伏乞

皇上聖鑒

遵 旨辦理代籌蒙旗借款還債摺

奏爲遵

旨辦理代籌蒙旗借款情形並妥訂善後條款以維治權恭摺仰
祈

聖鑒事竊臣前因查明札薩克圖郡王烏泰因積欠鉅債擅將全
旗地產押借俄款期滿被迫情形據實陳奏請於度支部准由大

清銀行息借銀四十萬兩抵還俄債並將京商違例重債一併查明豁免欽奉

硃批著照所請該部知道欽此仰見

朝廷撫綏藩服優恤無已之至意欽佩莫名惟查該郡王前呈借據底稿與俄員達聶爾索款函件譯文歧出疑竇甚多如以盧布寫作寶銀及按年計息又與本銀不合是其借款之初已隱受人愚必須切實核計以爲入手辦法至大清銀行息借之款雖由臣擔任而該郡王所指以租賦抵息尤不能稍涉含混所稱開放北山荒地爲還本大宗的款尤須分別勘丈酌擇地質膏腴招墾收價確有把握方足以籌還本息不至虛擲鉅款又查該郡王借款印據該旗協理等均未周知此次訂立借款合同凡該旗有責任人員自應隨同來奉隱作全旗人證俾將來實行整理可無阻撓

臣因札飭試署濱江關道施肇基先向俄公司查驗借款印據一面與度支部商訂銀行借款合同復札行該郡王率同協理台吉管旗章京等到奉面議辦法嗣該郡王到奉臣即宣佈

朝廷德威曉以國際之大有關係諭以寬典之不可倖邀該郡王頗知悔悟愧悚情形見諸詞色當派蒙務局督辦朱啟鈐與該王及蒙員等將善後切實整理之法詳訂條款並與大清銀行商立借款合同妥爲核辦維時施肇基與俄員持議未決誠恐聞知該王到奉俄員別生枝節又派朱啟鈐偕該王等赴哈爾濱會同該道與俄員相機磋商據該員等呈稱該道屢次照會俄領事令道勝銀行呈驗印據乃始則不允查驗繼且不認關道理處及朱啟鈐偕該王到哈始知該王所借俄債銀行不過應名實皆達聶爾一人主持聞我代爲籌還已備有四十萬銀兩的款故利與蒙

人直接以遂狡謀經朱啟鈴等再三磋商並告以該王私借外債以產作抵本干例禁卽作爲箇人私債

國家本不能代爲籌還此次准予代還實爲內恤蒙艱外全邦誼旣已查明原借兩款本係二十九萬盧布不能因譯文訛誤藉以牽混其印據載明之利息亦與原本不符此項息銀亦難承認俄人多方狡執屢議屢翻經朱啟鈴等堅持免息還盧之議據理力爭卒如前議了結當由施肇基另立二十九萬盧布付款議單換回蒙文印據註銷作廢並議定明年二月付款核計磋商利息較原據所載已減去十餘萬兩誠爲始願所不及惟息借銀行之款指定放荒籌抵應俟勘明地段另案奏請開辦並將所訂合同呈送蓋印擬請奏咨立案又據該郡王率同協理台吉等承認所擬善後辦法十五條呈懇分別奏咨立案各前來臣維札薩克圖地

方分隸洮南府靖安開通兩縣草萊初闢蒙漢雜居地方官治權
既多不完辦事又格於舊例於是奸民欺弄蒙民蒙戶仇視墾戶
耕鑿不相侔守望不相助此移民拓殖之功不能暢行於蒙地者
良由蒙旗對於地方官顯分界限耳今該郡王仰荷

恩施自應激發天良輸誠效順其呈請擴充地方官治權化除畛
域允宜亟予推行以資觀感蓋放荒招墾清丈徵收舉凡民政所
關蒙旗無從自理必須地方官實行整飭於蒙務始有裨益此尤
爲我利用之機非僅監理其財政擔保其借款已也其餘防制外
交尊重主權顧全蒙民生計摶節王府用度不外懍之以威懷之
以德俾易就我範圍並使全旗台壯人等咸曉然於

國家政令之所施無非保惠蒙藩之至計所擬辦法十五條由臣
詳加釐訂札飭該王旗及地方官共同遵守理合繕具清單恭呈

御覽飭下理藩部立案至大清銀行所訂合同本係四十萬兩今減至三十萬兩即足敷用自應將原合同改照三十萬兩訂定應由臣商同銀行並札飭該王改訂合同另行蓋印以昭信守除所餘銀十萬兩另行奏明請

旨辦理外所有代籌蒙旗借款還債情形並妥定善後條款各緣由謹繕單恭摺具陳伏乞

皇上聖鑒訓示

奏省各軍遵章改編巡防隊摺

奏爲奉省各軍遵照新章改編巡防隊以昭畫一而資整頓恭摺具陳仰祈

聖鑒事竊前准陸軍部咨奏定巡防隊暫行章程一摺奉

旨依議欽此欽遵咨行前來查奉天舊有軍隊自光緒三十二年

經前任將軍臣趙爾巽分別裁留挑練奉軍馬步四十營分駐八路另編新安軍四營盛軍二營先後奏明有案成軍後分路駐紮防剿尙稱得力惟值整飭戎行之際各省防練舊營漸已遵章改編奉省偪處強鄰拱衛

畿輔尤宜修明武備力求進步臣謹按照部頒奏定新章設法裁改先於奉軍舊中路舊前路內抽撥年力精壯嫻習新軍操法之目兵編成陸軍步隊一標另行奏報其餘按照奉省地勢劃分分中前左右後五路每路九營即以舊中路舊前路撥剩之兵並舊盛軍舊新安軍編成步隊五營馬隊四營隸一統領一幫統是爲中路又以舊左路舊右路舊副左路編成步隊四營馬隊五營隸一統領一幫統是爲前路又以舊副左路編剩之兵並舊副右路編成步隊五營馬隊四營隸一統領一幫統是爲左路又以舊左

路編剩之兵並舊後路舊副後路編成步隊五營馬隊四營隸一統領一幫統是爲右路又以舊副後路編剩之兵並舊新安軍編成步隊二營馬隊七營隸一統領一幫統是爲後路以上五路步隊二十一營馬隊二十四營馬步隊共四十五營統名曰奉天巡防隊所有官弁兵夫員數名數均照部章辦理較之舊有四十六營裁去一營舊有步隊以五百名爲一營馬隊以二百五十名爲一營者又裁去十分之三有零裁撤官弁分別考驗酌予差委裁撤什兵發給恩餉資遣回籍妥爲安置伏念奉省屢經兵燹伏莽未清緝捕巡防在在胥關緊要新軍成立需時又恐緩不濟急惟有先就舊有營隊整一規制用其所長輔新軍兵力之所不及此次編定巡防營隊自成營起餉後逐漸改按新軍操法訓練以爲改編新軍基礎將來添練一營新軍自減去一營舊隊是挹彼注

此而餉不必另籌亦除舊布新而兵皆歸實用矣至巡防隊應領薪公餉乾由臣查照奉軍舊章斟酌損益釐定畫一章程連同新編營制並統領幫統銜名分繕清單恭呈

御覽此項薪餉均自各路改編成營點驗相符之日起支未經裁併以前仍照舊章支收以昭核實其中統領員弁薪公數目雖較舊時加優然以奉省現時物價計之各營尙形竭蹶且統盤核計亦較奉軍原支餉數節省尙多應懇

天恩照准開支以恤兵艱而作士氣其所節奉軍餉項卽爲新編陸軍步隊一標經常各費及製備巡防隊軍裝車馬川資犒賞一切之用再有數餘悉歸入本省正款核實支銷所有奉省各軍遵照新章改編巡防隊緣由除咨部查照外理合敬繕清單恭摺具陳伏乞

皇上聖鑒訓示再奉省尙有河防營一營照部章第三條辦理暫仍其舊另行編列合併陳明

請議卹覺羅鳳山片

再查光緒二十六年間拳匪亂時奉省盜賊蜂起肆行擾害居民咸有戒心當時有住遼陽黑牛屯之覺羅鳳山慷慨慕義倡辦鄉團保護桑梓聯合鳳集堡等五十餘屯嚴定章程互相保衛地方賴以安謐二十八年六月有巨盜邢富玉黃二虎等嘯聚匪徒數百綁票劫舍勒捐巨萬經鳳山調集團丁邀同連牌各會稟請正紅正藍各旗界官葆真等同赴該處勦捕生擒巨盜邢富玉等二十餘名正法地方商民保全甚眾至今嘖嘖猶在人口二十九年八月盜首王海山率賊數百燒殺淫掠無所不至維時官兵單薄鳳山奉札會勇萬人至遼陽東北關門山一帶勦捕擒獲盜匪王

正法罪人斯得大寃稍伸惟念鳳山以覺羅天潢樸誠勇敢倡辦鄉團數年遠近倚庇保全無算祇以遭時不幸賊匪乘隙報復奸謀殘害致屍身漂沒慘酷已極其生前剿賊既有功於地方卽其爲賊殘害亦以保衛地方之故若任其湮沒不彰不惟於該處士民心有未安亦無以勵勇敢而昭激勸茲據在籍紳士內閣中書尹果等臚陳死事實蹟稟請奏懇議卹前來臣覆加查核無異合無仰懇

天恩俯賜飭部從優議卹俾彰忠義而慰幽魂除分咨查照外理合附片陳明伏乞

聖鑒

前息借大清銀行節省銀兩仍留接濟各蒙旗片

再現在各蒙旗困苦情形大都因債務受累以致私借外債動釀

交涉今札薩克圖郡王所欠外債公家爲之分別豁免籌還各蒙
旗深仰

朝廷優待藩封愈悔從前諱飾之非計頗有援案呈請接濟者如
圖什業圖王旗因迭遭事故虧累甚鉅已由臣酌量籌借於另案
奏明辦理而札賚特一旗亦因債累困苦墾請代籌經臣派員澈
查竊維各旗困累事異情同今欲代爲整理使之輸誠向順必有
以啟其慕服之心乃可藉爲利導之勢自宜一律代籌以昭公允
所有前向大清銀行籌借節省之十萬兩擬仍向大清銀行息借
另訂合同利息限期悉照前合同辦理專爲東三省籌備接濟蒙
旗之需由臣擔保蓋用東三省將軍印信其將來借給何旗仍取
具印文以所收荒價租賦抵償由臣隨時酌量情形辦理如以後
東省籌款稍裕仍應首先提還大清銀行以昭信實除咨部查照

外謹附片陳明伏乞

聖鑒訓示

查明嫩江水災並分別賑撫摺

奏爲查明嫩江水災並分別賑撫情形恭摺仰祈

聖鑒事竊查江省本年秋間連日大雨嫩江水勢暴漲沿江居民田禾廬舍多被淹沒當經臣等會同電奏欽奉

諭旨妥爲賑撫在案嗣據查明上游之墨爾根東西布特哈及下游之黑水廳大賚廳等處自八月下旬以後沿江水勢暴漲上下游各處地方以黑水廳屬各村屯受災爲最重所有沿岸民房及新建奉軍營房暨上年所修商埠隄壩橋梁並火磨牆垣門樓均被冲毀坍塌當經飭令該管地方官相度地勢酌量緩急將兩旁堤壩搶築增高以遏橫溢之勢並將各屯禾稼趕緊收穫捆移高

埠免致冲沒其被災民戶均令妥爲安輯免失棲止一面撥發銀
穀責成該管官吏趕辦急賑查明被災各戶核實散放以示撫恤
而廣

皇仁其杜旗沿江並甘井子等處荒段及札賚特旗現辦屯墾地
段咸被大水浸沒已趕速妥爲撫輯現在各處業經封凍墨爾根
及黑水廳等處轄境水勢均已先後退落如常惟大賚廳所屬地
勢卑下尙未一律消退來春青黃不接所有以上被災各區應如
何分別賑濟之處應俟屆時查看情形再行分別奏明辦理至此
次被水冲壞各工程將來自應另行修補分別報部以備稽核除
俟賑撫辦竣核明款目另行造銷並俟查明應行蠲免各處續行
奏報外所有查明各處水災量予賑撫大概情形理合恭摺具陳
伏乞

皇上聖鑒訓示

辦理綏化府等處蠶業片

再中國蠶業素稱美利江省地處寒帶土性磽确是以無人經營及此臣等迭次派員調查江省甘井子荒段之北山及綏化府之朝陽坡一帶土脈大率外燥內潤雖無柔桑足供蠶食而柞樹繁多彌望皆是飼養山蠶最屬相宜本年曾經有人試養呈到所結山繭有大至徑寸者如能設法創辦可與奉天之鳳凰廳蓋平等處所產相埒實爲邊地生利之一端當經遴派妥員先行試辦並往山東各處調查放養諸事以期行之有效惟事關初始所有購置蠶種招致工匠分割山場籌集款項均屬繁重現經督令該員等勉力籌備以冀春融林茂蠶事肇興并在綏化府就近設立蠶業公所練習飼養繅絲之法一面於柞樹多處劃出地段專爲放

養山蠶區域仍由公家分別撥款用資提倡以興蠶業而利邊氓
除咨部查照外理合附片具陳伏乞

聖鑒

遵 旨開辦吉省諮議局籌辦處情形摺

奏爲遵

旨開辦吉省諮議局籌辦處情形恭摺仰祈

聖鑒事竊於光緒三十三年九月十三日奉

懿旨著各省督撫在省會速設諮議局慎選公正明達官紳創辦
其事等因欽此又於三十四年六月二十四日奉

懿旨著各督撫迅速舉辦實力奉行限一年一律辦齊等因欽此
旋於七月間准憲政編查館咨以現設之諮議局應改爲諮議局
籌辦處各等因並將奏定章程清單選舉票式等件頒行前來臣

等伏思諮議局爲國會之先聲籌辦處卽省議會之基礎關係至重責任非輕吉林自改行省政教兼施疊次欽奉

諭旨羣情向化已咸殷望治之心草昧初開亦將覩日新之象自應照章舉辦因地制宜統籌兼顧以收速效臣等遵卽於吉省設立籌辦處札委試署民政司司使謝汝欽奏調直隸候補道顏世清總理其事當由臣等商定該處辦事及調查司選各規則並詳攷各屬實情劃分初選複選區域遴派通曉法政官紳分任該處諸事務現已於本年九月初一日開辦卽豫定明年八月一律竣事惟吉林遠處邊陲初更省治風氣初開地面荒僻其人士不僅少國民程度卽能具選舉知識者亦自無多其情形不僅與東南各省懸殊卽較之西北邊疆猶覺莫平莫及茲旣明奉一年欽限自未便於吉省獨請展緩再四籌議安定辦法以短促之時

期爲遠大之籌備雖或未能完善然亦無敢畏難次第舉行依限成立總期無負

朝廷勤求輿論勵精圖治之至意除將各項章程表冊分別咨送憲政編查館資政院民政部外所有開辦諮議局籌辦處緣由理合恭摺具陳伏乞

皇上聖鑒訓示

吉林自治會改爲吉林府自治局並設研究所片

再吉省在前將軍達桂任內曾經本地士紳呈請自立自治會一
所章程出諸私擬辦理未能合法前准民政部咨開各省自治局
未經奏咨立案應候部定章程頒發後再行遵辦等因自應卽飭
該會停辦以俟部章第念該會開辦已久一旦解散恐滋惶惑臣
等反覆籌商計惟有援照直隸奏准自治章程先從天津一府試

辦之例將原設自治會改爲吉林府自治局官紳合辦專事籌議
調查以爲異日實行自治之豫備及各地推行自治之規模暫歸
諮議局籌辦處一併經理俾一事權而便籌備更另設自治研究
所飭令各府廳州縣選送士紳入所分班講授俟畢業後遣回原
籍推廣傳習兼就地籌辦自治事宜並通飭各屬凡已立有自治
會名目者概改爲自治研究分所以歸一律均已先後斟酌改辦
依次施行理合附片具陳伏乞

聖鑒

歸併奉天府各級審判廳並酌改廳名員缺摺

奏爲歸併奉天府各級審判廳並改擬廳名員缺謹將辦理情形
恭摺具陳仰祈

聖鑒事竊奉天開辦各級審判廳暨分別擬補各廳員缺歷經具

奏在案伏查創辦伊始因省垣附郭原設承德興仁兩首縣未便劃分故設奉天府地方審判一廳初級六廳附設檢察廳按兩首縣轄境分別受理應管之訴訟自各廳成立試辦年餘成績尙有可稽商民靡不稱便正宜逐漸推廣以冀恢張法權近以興仁縣移駐撫順改爲撫順縣從前歸興仁所轄區域內一切訴訟自應改歸撫順管理已擬於撫順分設審判檢察各廳其初設之奉天府第二初級審判廳在撫順轄境以內亦卽劃歸管理而奉天府之第一第三第四第五第六各廳均屬承德區域該縣爲省城首邑地廣事繁就令五廳分治本不復贅特以百度維新需款浩大且各衝要商埠審判廳均未成立尙待擴充自非將初級各廳酌量裁併不足以節經費而規久遠當飭提法司吳鈞妥慎籌畫督同高等審判廳廳丞許世英署高等檢察廳檢察長汪守珍詳細

調查總以民不失便官以節款爲要茲據該司覆稱除第一初級
審判廳專收審省城之該管案件無庸歸併仍改名爲承德第一
初級審判廳外其餘四廳所轄屯堡之多且密以第四爲最第三
次之第六第五又次之案件之繁且難則第四第六相等第三次
之第五又次之度形勢之異宜按戶口之多寡應將第三第六併
爲一廳改名承德第二初級審判廳第四第五併爲一廳改名承
德第三初級審判廳各檢察廳附之至省城原設之奉天府地方
審判檢察廳亦應改名承德地方審判檢察廳不用府廳州縣字
樣一爲將來推廣時兩縣合設一廳之計畫一爲與行政部分有
所區別唯是廳名旣已變更斯官稱亦應改易所有原署奉天府
地方審判廳推事長蕭文華原補推事孫長青袁晟倪泰汪超與
簿羅鴻賓主簿許維瑜沈啟賢及原補奉天府地方檢察廳檢察

長廖世經檢察官蕭晉榮各缺均應改爲承德地方審判檢察廳
各缺原補奉天府第一初級審判檢察廳推事杜錫麟檢察官李
仙根應改爲承德第一初級審判檢察廳推事檢察官其原補奉
天府第六初級審判廳推事顏文海應改爲承德第二初級審判
廳推事原補奉天府第四初級審判廳推事姜可欽應改爲承德
第三初級審判廳推事以期名實相符至各初級檢察廳檢察官
向係委巡警局各巡官暫行兼辦原以發端之際各廳附設於鄉
鎮巡警局不得不爲一時權宜之計現在旣圖歸併規定務在周
詳允宜權限劃清以謀完全之獨立應請遴派妥員專司檢察事
務等情前來臣覆加考核規畫旣宜名實亦副應如所擬辦理除
將撫順地方初級各廳開辦情形另行具摺奏報並將併廳改名
辦法咨行法部備案外所有歸併奉天府各初級審判檢察廳並

請改廳名員缺各緣由理合恭摺具陳伏乞

皇上聖鑒

撫順地方審判檢察廳開辦情形摺

奏爲籌設撫順地方審判檢察廳謹將開辦情形恭摺具陳仰祈
聖鑒事竊臣上年具奏奉天省開辦高等審判檢察廳及設奉天
府地方初級各廳接收承德興仁兩首縣民刑訴訟爲奉天各州
縣試辦之先聲卽爲行政司法區分之創始嗣以興仁移駐撫順
改興仁縣爲撫順縣並將

興京廳迤西寫遠之地劃歸管轄特設民官行政旣具規模司法
亦宜布置第撫順商旅增益且去該縣八里之千金寨地方煤鑛
利源日見增擴若將民刑案件仍隸於原設之奉天府地方審判
廳審理微特管轄難週人民失便卽按之慎重法權講求交涉之

道亦覺非宜迭飭提法司使吳鈞詳細通籌督同高等審判廳廳丞許世英署高等檢察廳檢察長汪守珍調查集議據該司覆稱查撫順縣所轄地方遼闊而戶口之繁多商旅之發達道途之便利形勢之適宜以千金寨爲最撫順應設之地方審判檢察廳宜在該處建立惟時值沍寒不能工作而一切詞訟又急待受理擬在距撫順十二里塔峪地方租賃民房先行開辦撫順地方審判廳檢察廳附之該處原設有奉天府第二初級審判檢察廳現既劃歸界內卽作爲撫順第一初級審判檢察廳暫設一廳如將來實係事繁再行酌量加增所有各廳員缺擬由高等及奉天地方兩廳內撥員派署以資熟手而節經費原補之奉天府第二初級審判廳推事方瑛應改補撫順第一初級審判廳推事俾副名實各等情先後呈請前來臣覆加查核尙屬周妥當經批准照辦並

派高等審判廳庭長法部主事程繼先署理撫順地方審判廳推事長奉天府地方檢察廳檢察官蕭晉榮試署撫順地方檢察廳檢察長其餘各員均由該司於高等地方兩廳人員內分別撥委於十二月初一日開辦臣自當督飭該司隨時考察該員等如果始終勤奮克盡厥職再由臣開單出考咨行法部分別奏咨補授以昭慎重除咨法部備案外所有籌設撫順地方審判檢察廳開辦緣由理合恭摺具陳伏乞

皇上聖鑒訓示

查覆錦州府屬官地清丈情形摺

奏爲查覆錦州府屬官地清丈情形併籌擬辦法恭摺仰祈

聖鑒事竊本年十月初七日准軍機大臣字寄光緒三十四年九月三十日奉

上諭有人奏奉天錦州府屬官地請飭遵章清丈以祛積弊一摺著徐世昌按照所指各節查明情形妥籌辦理原摺著鈔給閱看欽此遵

旨寄信前來臣查原奏所陳以該墾局委員變則減丈及包庇佃戶兩節爲此案之關鍵當卽遴派咨調湖北候補道毛祖模前往嚴切查辦去後茲據查明稟覆據稱原奏謂錦州屬義州所設正字分局派委繩員丈放官地均住佃戶之家串通行賄竟有以上則變爲中則減丈畝數約十萬餘畝一節查官莊地畝繩員按地行繩原無定宿向由鄉保代覓住所不准攤錢供應違者准被害之戶指名控告經前任將軍趙爾巽出示曉諭在案歷查案牘該局開辦以來尙無此等被控之件旣住佃戶之家瓜李之嫌誠所難免惟必須確有見證始能澈究此次丈放官莊均係零星小段

土色不一其上中下各等則向由繩員隨時指定稍不詳察卽易混淆領地者偶不如意卽滋口實其謂以上則變爲中則減丈來因或由於此統計該州共丈得官莊上中下三等地二十二萬九千三百餘畝按照原額有增無減如謂減丈之數至十餘萬畝自非逐一清丈無從得其實在然偷減過多在事者當不妄謬至此又原奏所稱刁佃呈控爭領委員受賄包庇佃戶不准裁莊價領一節查卷內殷實莊頭不多覲見丈放官莊時均紛紛出具無力承領甘結讓歸佃領徧查案卷惟查有已裁莊頭許春聲一戶除自領及讓歸親丁佃戶分領一千一百餘畝外尙有承管小嶺子李錫匠溝等段一千八百餘畝呈請備價給領詎該佃戶共一百五十三名紛赴行局請放佃領以免流離失所該行局因佃戶較多情詞迫切准予分領亦是因事變通起見原奏所稱委員受賄

並未指實何地何人無從查詢等語臣查錦州墾務原派該府兼辦迄今已逾三年當時雖將丈放各段繪具圖說惟未將上中下各等則預行標定爲發放之根據段落繁雜本難悉得其平委員或上下其手亦難保其必無第旣查無此項控案無可憑以根究此時錦局已將歲事義州正字分局久經裁撤在事人員亦各分散卷宗圖冊均存於署據查丈放之數按照原額有增無減原奏謂減丈畝數約至十萬之多竟及總數之半揆諸情勢何能有此且未經指實浮多處所未便漫予抽查致滋小民之疑慮至繳價領地定章先儘莊頭各該莊頭之未價領者已查明除許春聲一戶外餘均出具無力承領甘結則承辦之員均係先儘莊頭並無裁莊價領可知再查該莊頭許春聲名下官地共三千餘畝爲數本鉅佃戶百餘人均係開始墾荒之刨山戶與佃種熟地者不同

再四赴局籲懇准伊等各領數畝以資存活情形實爲可憫故該行局俯順輿情爲之稟請分領訖佃戶等均係窮苦力役之人亦何有賄之可行且係稟准有案應請免其置議惟是丈放地畝包套影射等弊防不勝防不獨官莊爲然且不祇義州一處然非將旗民與官莊各地一律清丈終不能將種種弊端一廓而空故東流諸荒幾經籌畫仍不能不普行覆丈者職是故也此項官莊地畝將來仍應另行清丈妥籌詳細章程澈底清釐此疆彼界通盤核算圖冊照據均歸一律斯畝數不患其隱匿等則亦易於區分如此辦理經界旣正庶積弊於以盡除而紛擾亦可自息矣所有查覆錦州府屬官地清丈情形並籌擬辦法緣由謹恭摺具陳伏乞

皇上聖鑒

退耕堂政書卷二十一

政書

二十一

退耕堂政書卷二十二目錄

奏議二十二

奉省建築模範監獄工竣摺

奉省法律講習所期滿畢業大概情形摺

奉天開辦省城模範監獄大概情形摺

江省改糧捐爲糧稅片

江省沿邊卡兵糾潰分別懲辦情形片

江省變通沿邊墾務章程摺

附單

請撥江省常年經費摺

江省請緩免貢貂摺

江省地方官交代免扣例限片

倫城沿邊分設卡倫並酌設邊墾局摺

擬修訥海道路片

奉省設立貧民習藝所摺

吉省遵設禁烟公所並實行禁種禁吸情形摺

吉省設立文報局裁撤驛站監督片

吉省設治需款動用荒價作正開銷摺

退耕堂政書卷二十二

天津徐世昌

奏議二十二

奉省建築模範監獄工竣摺

奏爲遵設省城模範監獄建築工竣恭摺仰祈

聖鑒事竊查奉天省城原有府縣兩監因歲久失修經前將軍臣趙爾巽派員估修時值兵燹之後工料踴貴計擬造監房一百二十一間原估工料瀋平銀四萬八千五百九十八兩批准在案尙未動工適臣到任當經飭令提法司使吳鈞將此項工程切實覆估並將原圖悉心斟酌其有未能合法之處逐細簽註力求完善旋准法部咨行議覆修律大臣沈家本奏改良監獄摺內稱於各省及通商口岸先築模範監獄一所參酌東西洋辦法以爲後日

撤去領事裁判權及抵制租界監獄地步等語爰飭該司就擬建新監之地遵照奏定章程參酌奉省情形妥籌辦法並派委留學日本警監科畢業生林紹敏等前赴京津保鄂調查模範監獄習藝所等處規章以資仿辦自去秋以來疊據該司督同委員勘明地址推廣房舍監察工作考正名稱仍就前將軍趙爾巽任內所估之瀋平銀四萬八千餘兩除每兩照章核扣減平等項實發銀四萬五千三百六十兩零五錢三分二釐核實修造於原圖之外增加獄舍百餘間略仿日本巢鴨之規模與湖北模範監獄之構造綜閱該圖劃分五部第一部爲官舍自入大門分設鐵柵門衛內容分爲三段前段置收發處回事房犯屬休息所看守接待室中留坪院旁置清平水井中段設大樓一座下層置職員事務所來賓接待室上層置官舍會議所三層上置最高瞭望亭樓下兩

邊置員司室檢身室罪犯接見室正面置訊問所案牘室看守長室後段置非常門水龍器廠看守宿舍倉庫廚井附馬第二部爲雜居監係十字形式內分四翼各翼端設非常門每翼監房十間寬一丈深一丈五尺可容七八人計四十間約可容三百餘人夾道上架玻璃窗汽屋寬七尺各翼之中央建一圓亭看守駐於其下旁設燈室暗廁監東爲屏禁室以懲囚人之犯獄規者監西爲閤室以懲囚人之犯獄規情狀較重者監南置樓一座上爲訓授室書信處閱覽室下爲教誨室監北置檢查室設一門以入工場第三部爲分房監係扇面形式內分四翼監門在扇之柄左右置監察室中兩翼交角處置非常門每翼監房有十八間者有十六間者寬六尺深一丈一尺以其半用階級制由雜居間提入使三人居之其半用完全分房制使一人居之計可容百二十人夾道

上架玻璃窗汽屋寬八尺各翼之中央建一圓亭看守駐於其下兩旁隙地爲運動處第四部爲工場分東西兩區區寬五丈深三丈四面滿裝玻璃窗格前置柵欄上架玻璃窗汽屋寬七尺兩區中央爲運動場區北置倉庫水井附焉第五部爲女監及男囚病監分爲前後兩區以高牆隔之寬六丈深三丈八尺女監內置雜居房四間分房四間約可容三十人工工場病室俱備夾道上架玻璃窗汽屋寬八尺後院爲運動場前牆設接見處男囚病監置輕病室四間重病室四間約可容三十人另有看護室診察室醫務所夾道上架玻璃窗汽屋寬八尺監南牆際置傳染病室一所以

上五部統計地址南至北計長東面五十四丈七尺西面六十三丈三尺東至西計深南頭十六丈四尺中段十九丈五尺北頭十四丈五尺總計房舍大小二百餘間樓房二座附高亭一座圓亭

二座瞭望亭四座工場二區運動場三區水井三口內牆厚二尺高一丈週圍一百十六丈七尺外牆厚三尺高一丈四尺週圍一百四十九丈三尺內外牆頂密插鋼刺溝道一百六十丈以上各工均於本年九月一律完竣由該司呈請奏咨立案前來經臣派民政司使張元奇查核驗收尙屬工堅料實定名曰奉天省模範監獄署仍飭該司使吳鈞妥定章程擇日開辦竊維奉省逼近強鄰數罹兵劫農野之瘡痍待復訟獄之煩苦宜祛邇年以來中外視綫集注於斯非早設一較爲完全之監獄實不足以挽積弊而表法權該司使承辦此事悉心規劃所有一切房舍均能支配合式雖限於舊有地點而於原估之款加造工程節省鉅貲洵屬實心任事省城既有規模將來推設各屬以圖普及於監獄改良獲益誠非淺鮮所用原估府縣兩監經費扣除減平實銀四萬五千

三百九十兩零五錢三分二釐應准其作正開銷除飭造具詳細圖冊分咨民政部法部度支部查照暨開辦章程專案奏報外所有遵設奉天省城模範監獄建築工竣緣由謹恭摺具奏伏乞皇上聖鑒訓示

奉省法律講習所期滿畢業大概情形摺

奏爲奉省法律講習所期滿畢業謹陳大概情形恭摺仰祈

聖鑒事案查上年臣到任之初卽遵

旨籌設各級審判檢察廳以改良裁判顧念事體重大人才缺乏若平時無造就之術斯臨事少勝任之才當飭提法司使吳鈞籌辦法律講習所一處嚴定功課妥訂規章專收本省候補及來奉投効人員自同通州縣以下考取正額八十名旁聽二十名合計學員一百名於是年八月開辦入所授課限定一年畢業以造成

裁判人才爲宗旨所訂課程爲

大清律例法學通論憲法民法刑法商法國際公法國際私法民事訴訟法刑事訴訟法裁判構成法監獄學各門卽以該司使兼充督辦並遴選法部主事張志嘉魏元曠先後充當監督所有教員均選擇留學日本法政畢業生暨刑名專家分別講授自開辦之日起至本年十月止除去年暑假暨補習日期已照章學習期滿在所學員有因曠課犯規隨時開除者實存正額八十名旁聽十一名合共九十一名經該司使按照學科分門局試平日嚴定分數遵照部定高等學堂章程八十分以上爲最優等七十分以上爲優等五十分以上爲及格此次畢業考試合期考月考各分數統核平均計正額八十名得最優等六名優等十六名中等五十八名於本年十一月十九日發給畢業文憑其旁聽員因未及

格給予修業文憑自開辦以至畢業計用開辦經費銀一千二百九十九兩九錢七分房租銀六百三十五兩五錢每年額支活支平均計算用銀一千三百三十五兩一錢八分零以上各項共用銀二萬三千二百九十八兩四錢八分由該司使造具各該學員履歷畢業分數暨報銷等冊呈請奏咨前來經臣覆加查驗傳見畢業各員均尙諳曉法理堪備使用先後擇尤派赴各審判檢察廳實地練習俾收知行並進之效其開支各款均經按月核准尙屬核實應請准其作正開銷惟將來推廣審判此項人員尙不敷用仍應廣爲造就現在於省城法政學堂添設法律專科業飭該司使會同該堂監督妥商辦理所設法律講習所卽於畢業後停辦以節經費除將各學員履歷分數清冊咨送法部備案外所有奉省法律講習所期滿畢業緣由謹恭摺具陳伏乞

皇上聖鑒訓示

奉天開辦省城模範監獄大概情形摺

奏爲開辦奉天省城模範監獄謹陳大概情形恭摺仰祈
聖鑒事竊維監獄與審判二者相因而成未有監獄不良而審判
獨臻完善者蓋監獄與法庭裁判皆爲刑法機關而近世儒者每
以監獄之關係爲最重要誠以人民不能無作姦犯科之事國家
貴施以感化遷善之方法庭之裁判足以動一時之觀感而監獄
之實行懲勸可以使罪犯悔悟自新勉爲良善是以收效極遠立
於司法行政之間爲

國家至威至仁之地奉省僻在邊陲睽於文教從前民情之頑梗
吏治之因循現雖漸有轉移惟兵燹屢更姦宄滋甚黠者玩法以
自逞愚者報復而尋仇命盜之案倍徙內地以是各屬獄舍重犯

正書卷二十一
填滯牢頭獄卒因緣爲姦今旣改良審判自應首先改良監獄雖
一時未能普及各屬而省城模範監獄亟宜妥慎開辦以樹規模
當經督同提法司使吳鈞規定大概辦法謹爲我

皇上縷晰陳之一監獄分類各國獄制有拘置監有地方監有假
留監有集治監係查照囚人之性質犯罪之輕重而嚴其區別當
此財力未充之際勢難遽籌浩大之經費分建各種監獄又在法
律未改以前亦不能盡棄本國慣例而習他國制度自應變通辦
理將各種囚人分別收拘該監獄約可容罪犯四百餘就中設有
雜居監擬收已決之軍流徒犯監候待質人犯未決刑事輕罪犯
分房監擬收官犯死罪人犯及其他案情重大之犯女監專收已
決之重罪女犯並將承德縣原有監房重加修葺改爲假留監可
容百餘人專收招解人犯是合各種監獄於一處而於其內區分

之爲暫時權宜之計此監獄分類之大概情形也一分課任事囚人之分類既繁則管理愈應周密新監之罪情俱重則組織尤貴完全各國獄制雖不一律大約於典獄官外分三課兩所各課各所之下又分多員以專任之大略文牘會計屬於第一課戒護囚人屬於第二課庶務屬於第三課查天津保定章程係分設書記會計考工看守庶務教誨師醫官等職湖北則分案牘科守衛科工業科及教誨師醫官庶務等名茲擬參酌當地情形分設三課曰文牘課專理文書考績暨保管犯人物品銀錢之事曰守衛課專理看守戒護之事曰庶務課管理會計在未置考工專員以前並兼理工業之事每課置課長一員又設教誨所醫務所以訓養之每所置所長一員皆爲輔助管獄官之員係變通外國獄制折衷內地辦法酌量裁併如此而後責任乃專職務不紊以求漸除

往日簡率苛虐之習此分課任事之大概情形也一分別工作不論罪情之輕重一體拘苦不使就事固非政策然不辨囚人之性質概充工作以期收益亦礙刑章各國因刑名之區別定其業役之輕重多與囚人性質不相適合茲設模範監獄除情實死罪人犯官犯暨未決重犯尙待質訊者不令作工外其餘人犯由該管獄官擇授工作不以刑名之區別分定工作之種類惟以適於犯人之性質及其他日生計爲主其不便於監獄管理者禁之庶於課業之中仍不失執行刑罰之旨如裁縫織布木工印刷編製席帽柳條箱包等項皆爲預定之藝業俟明春和暖略籌工本卽行開辦此分別工作之大概情形也一酌擬懲罰囚犯脫逃之處分舊例甚爲嚴明茲設新監原期力除積弊昭示文明三木械繫旣舊獄相沿之刑具不能不斟酌去留以爲異日收回法權地步近

者改良審判廢止刑訊中外觀聽一新刑訊既廢則牢舍之拘繫亦應變通第恐獄員祇避處分酷守舊習將獄務永無廓清之一日謹擬創辦一年之內除實係賄縱囚人查有確據仍照舊例處分外遇有疏防脫逃人犯處分稍予從寬惟該看守部長仍應當其責任如係雜居監人犯則雜居監看守部長及看守人撤差勒緝其在分房監假留監及工場時亦如之庶足以廣

皇仁而肅刑憲此酌定懲罰之大略情形也一酌定員秩監獄事業之發達固因獄制完美尤賴獄吏善良苟得其人雖獄制不甚完全猶可因時補救第非正其品秩不足以勸良吏查外國典獄爲奏任官各課所長有奏任者有判任者卽看守亦受判任之待遇上年法部議准修律大臣沈家本改良監獄一摺有獄務人才與司法官吏同一重要官卑不足以彈壓應定各省正管獄官秩

五品副管獄官秩六品其餘分任義務及醫官書記等員由督撫量爲增置等語奉省新設模範監獄爲全省之表率現擬遵照奏定官制先設正管獄官一員副管獄官一員副管獄官暫從緩設惟各課長所長未定品秩仍不足以專責成而重職務擬請酌定課長秩八品所長秩九品均定爲咨補之缺此項獄員必須選會肄法政監獄學科性行敦善者充任其看守部長以下亦須教練畢業如奉公三年無過准其拔升所長課長及補各屬分監員缺如是則人才咸奮而獄事可望日新一籌撥經費獄用不敷難期經久計新設監獄暨歸併承德縣監合容五百餘人其常年經費分額支活支兩款獄員俸給看守俸給工役薪食等項屬於額支看守服裝囚犯衣糧及雜用等項屬於活支值此財政困難力求樽節計每歲所需亦在二萬金以外然薪俸皆從微薄工業資本

尙需戶籌查新監成立部定官制既有管獄專官所有奉天府司獄承德興仁兩縣典史皆爲虛職自應裁撤例定廉俸實銀及役食津貼歲合二千三百餘兩又舊支府縣監獄囚糧食米禁卒津貼押犯車價等項歲約六千五百兩均應撥歸新監提用其不敷之數歲不過萬餘金已由臣飭令度支司妥爲籌給應請於每屆年終造冊報部准其實用實銷以示體恤而規久遠以上各條爲改良奉省獄務起見略舉要綱以開各屬風氣經臣派委提法司典獄科一等科員日本法政大學專科畢業生揀選知縣蕭仲祁暫兼充正管獄官並刊發奉天省模範監獄木質關防一顆發交該員祇領開辦於十一月初一日起陸續將舊日承德縣監押人犯二百餘名一律提入新監仍飭該司使隨時督飭該員切實經理務期囹圄向化咸與維新以仰副

朝廷矜慎庶獄之至意除將各項章程規則咨送法部查核並將
建築工程另摺奏報外所有開辦奉天省城模範監獄緣由理合
恭摺具陳伏乞

皇上聖鑒飭下法部查核立案施行

江省改糧捐爲糧稅片

再查江省出產以糧食爲大宗向有糧捐一項照章每石徵中錢
六十文所徵捐項易錢爲銀以八成爲正款抵充俸餉以二成提
充辦公厯經照辦在案現在百端待舉需款孔殷自應以整頓稅
捐爲籌款入手辦法而糧捐實爲大宗每石僅徵中錢六十文固
已失之太輕且糧不分粗細似亦稍欠平允現經參酌情形將原
有糧捐改爲糧稅酌加變通按糧米之高下分爲二等上等每斗
徵中錢二十四文次等每斗徵中錢十二文所收稅款仍照向章

以錢易銀以八成作爲正款以二成作爲辦公隨案列銷已於本年八月間開徵試辦其舊有糧捐卽行停免雖此次所定稅則較前略增然仍取自買糧商人並非專出於民現已試辦數月民情均尙樂輸從此若能認真稽徵則歲收所入漸有增加似於餉糈不無小補據度支司詳請奏咨前來臣等覆核無異除糧稅章程咨部查核外理合附片陳明伏乞

聖鑒

江省沿邊卡兵糾潰分別懲辦情形片

再查上年臣世昌會同前署撫臣程德全奏請飭撥東北邊防經費摺內陳明擬於沿邊一帶分設卡倫等因旋據暫護呼倫貝爾副都統宋小濂咨稱擬於該城沿邊扼要處所安設卡倫募駐弁兵以資防守當經省署覆准暫行試辦俟安設齊楚再行詳細奏

咨立案去後茲據該護副都統於本年十月間先後咨報孟克西里卡倫什長張金鵬以沿邊差苦爲詞煽惑卡兵句結附近鐵路煤窰華工於九月十二日槍斃卡弁劉廣毅并該弁之叔劉廷舉逼脅卡書李耀衡工人丁西發等同時潰變竄至蒙旗烏珠爾地方又槍斃佐領布恆額及蒙人吉勒太二名當卽飛飭防營管帶興順督帶官兵進勦於烏蘭哈達山溝相遇登時將該犯張金鵬擊斃查該卡兵原設十一名句結及逼脅同行工人等共二十二名除此次共陣斃四名及在海拉爾河淹斃兩名又先被該叛兵自行擊斃一名外餘匪均經上下各卡先後拏獲解倫僅餘一名漏網詳加查訊實係該犯張金鵬藉口差苦起意糾潰卡兵藍沛雲王順沈芳宜趙奎武楊玉海及工人宋煥瘴宋現瘴均與同謀其卡書李耀衡工人賀海丁西發任煥文曹大盛郝春寶商人張

華堂倉猝被脅沿途並未搶劫各等情咨請核辦前來臣等查沿邊新設卡倫該犯張金鵬膽敢勾煽潰變戕害官弁卡兵藍沛雲等甘心從逆均屬不法除張金鵬等業已陣斃外藍沛雲等七名均飭正法以昭炯戒卡書李耀衡及工人丁西發等既係逼脅同行並未搶劫准予從寬分別拘禁現在孟克西里一卡業已另行妥選弁兵撥駐並令將其餘各卡認真整頓除將被戕官弁分別給卹逸匪一名嚴飭務獲究辦並俟將邊界各卡安設完竣另行奏咨外所有卡兵糾潰分別就獲懲辦暨沿邊安靖情形謹附片具陳伏乞

聖鑒

江省變通沿邊墾務章程摺

附單

奏爲江省沿邊荒務酌擬變通辦法以闢利源而固疆圉恭摺具

陳仰祈

聖鑒事竊維墾地殖民爲籌邊第一要義古人移民塞下近日東西各國率多於荒曠之區注意經營漸成繁庶如美之於西路俄之於西伯利亞日之於北海道皆由國家籌撥巨款盡力招徠敷設周備計謀深遠旣收廣土眾民之效兼爲開疆拓境之圖江省密邇強鄰地廣而荒啟人覬覦從前收價放荒多在蘇蘭林慶一帶以其地土旣屬上腴道途又非絕遠因而直東人滿之區奉吉有力之戶頻年麇集成邑成都至今江省以東荒爲隩區客民視遷地爲樂土近則荒段愈遠邊境愈寒小民負耒出疆道路之費倍增居止之地無著舉凡任輦車牛廬舍田器之屬繁費滋多若復照章收價勢必領戶裹足墾闢無期自非將沿邊各段荒務另訂招民辦法酌量變通不足以招致遠人發舒地利伏查江省沿

邊一帶自呼倫貝爾西境起越瓊瑋與東轄境皆與俄境毗連除現籌卡倫辦法另行奏明開辦及湯旺河業經開放外其餘曠地彌望榛蕪無人過問臣世昌上年奏陳遷民實邊請免輪路各費並陳明先從招民入手卽爲拓殖邊荒之計本年九月奏陳屯墾一摺亦聲明沿邊招墾辦法另行奏明辦理蓋勦辦兵屯籌款維艱開地有限自應另行遣員招民以爲兼營並進之舉現在審量沿邊情勢非改收經費以廣招徠恐民戶無由遠致非另訂獎章以示鼓勵恐員司不易激揚此外如減路費以利進行嚴限制以杜包攬選良農以慎安插速升科以促墾種暨其餘亟宜變通各節均經詳細酌核務期切實可行將來新設治地方所有荒務卽責成各該地方官兼辦不另設局所以省糜費謹擬江省沿邊招民墾荒章程五章共二十四條敬繕清單恭

呈

御覽如蒙

允准應懇

飭下各該省督撫遵照辦理其派往各省招待員司一切經費擬由本省各荒段餘存經費項下開支如有不敷卽飭司由正款動用按年報部列銷總期人民日臻蕃庶國界所在隱然鉅鎮庶足以仰副

朝廷固圉實邊之至意除將沿途輪路細章派員赴部議訂並劃定荒段暨將員司薪公數目續行咨部外所有江省沿邊荒務變通章程緣由繕單恭摺具陳伏乞
皇上聖鑒訓示

附黑龍江省沿邊招民墾荒章程

一來江墾戶攜有邊墾招待處執照者除由煙台至營口招商局輪船業經奏准減收船價外其由哈爾濱至松花黑龍兩江之官辦輪船及昂昂溪至齊齊哈爾之官辦鐵路均一律徵收半價其隨帶眷口概免收費以廣招徠

一招徠墾戶應於每年三月內到江以便及時開種各該省所屬及各處招待處均須明白勸諭預算程途日期以免先後參差致誤種作

第二章授地

一民戶赴段領墾者每晌徵收經費銀四錢以充各該處辦理墾務之用惟本省畢拉爾路土人向以牧獵爲生該處協領擬招民戶導引耕種應於民戶領地時暫行免收經費俟墾熟後仍照章補收以歸一律

一每戶領地以四十五晌爲限惟墾地公司認領荒地不在此例

一各戶所領地畝到段立予撥給但非墾熟升科後不得展界續領

一公司所領大段荒地非經墾熟後不得輾轉讓賣如於領地之後並不實行開墾但思轉販漁利坐令荒蕪不闢者一經查出確有販賣生荒情事立將所領地撤銷原繳經費概不退還

一凡領墾地畝除領地之本年不計外統於領墾後三年一律升科

一各戶領地除領墾之本年不計外均於第二年起勘查一次查明墾成熟地若干分別填給大照

一墾戶領墾之地至勘查年分其墾熟地畝在三分之二以上者其餘未墾生荒應准一律填入大照照章升科如墾熟地畝不及三分之二者應照已墾地畝數目填給大照其餘未墾生荒概行撤佃另放原繳經費概不發還

一凡報領荒地經營林業者查其已種樹木地方均照熟地一律升科

一前條所定墾地期限苟因天災事變迫不得已不能依限墾闢者准其呈候查明分別辦理

一墾戶報領荒地後應於四圍接界處開挖溝渠各於溝渠之旁排植適宜樹木以資引蓄而清界限

第三章資助

一墾戶到段開墾倘有青黃不接者准由就近官立銀行銀

號查覈實在墾種人口酌予貸助分期償還其貸助章程隨時另行酌定

第四章獎勵

一各該省所屬招送墾戶在五千人以上領地過六萬晌或二千五百人以上領地過三萬晌者准其呈請各該督撫咨報江省分別照異常尋常勞績請獎

一各處招待員有招徠不力者隨時由本省撤換

一各處荒段新設地方官及設治委員准於沿邊墾務案內積有異常勞績者儘先補授如設治三年其境內新增之戶尙不及二千五百人及新墾之地不及二萬晌者卽行撤換

一領荒地主獨力招募佃戶墾闢升科地至六百晌以上者擬請給予七品頂戴八百晌以上者擬請給予六品頂戴一

干响以上者擬請給予五品頂戴如本身職銜逾於應獎銜秩或不願得獎者准其移獎子弟親族

一凡創集公司招募佃戶墾闢荒地者其發起人准照前條給獎若發起人不止一人准照所墾地數平均分獎如該公司能闢地十萬响招民逾二萬人者查明分別奏請優獎以昭激勸

第五章附則

一本省各城及各省駐防無業旗丁資遣來江安插者免徵經費銀兩以示體恤其各鎮退伍兵丁由各該省資遣來江安插者或由本省招致辦理屯墾者其來江時統由各處招待處妥爲指導

一本章程之適用區域以沿邊興安嶺以外興東瓊瑋呼倫

貝爾等處所轄地方爲斷

一所有丈地發照折扣一切放荒章程悉照本省向章辦理
請撥江省常年經費摺

奏爲江省事繁款絀謹瀝陳困難情形懇

恩飭撥常年經費以濟要需而維邊局恭摺仰祈

聖鑒事竊維黑龍江地處極邊夙稱貧瘠從前置兵鎮守民事無
多自創設府州縣而政務繁興自改建行省而規制益備新政待
舉需用遂繁且野多未闢之荒地有蘊藏之寶農業鑛務悉待經
營其沿邊數千里迫近強鄰抵隙何虛疲於應接若不坐規百年
之計亟爲未雨之謀不惟地方無由振興亦恐邊事難於補救無
如財計空虛百端束手因循旣慮坐誤竭蹶無以圖功此臣等所
由日夕焦思不得不詳切上陳者也伏查江省從前歲入全恃部

省協款爲八旗官兵俸餉之需自前署撫臣程德全開辦荒務奏設道府廳縣一切支用各款遂以荒價爲大宗然荒價係暫時收入之款並非經久不涸之源故上年改設行省時疊經該前署撫臣將支絀情形上陳

宸聽自世昌奉

命總制三省臣樹模蒞任受事日念邊務之緊要庶政之殷繁杼軸告空補苴無術現在統算本省財政出入計部撥練餉邊防經費及本省捐稅大租稅契等項以積年歲入參考比較每歲不過共入八九十萬兩而現有官俸兵餉邊務及各局處各項驛站學堂每歲計應開支銀一百九十餘萬兩其各項活支及建築工程款項尙不在內加以本年奏請新設之道府廳縣各費通盤籌算每年將入款抵用外約尙需銀一百三四十萬兩毫無的款可指

比年庫儲乏竭發放各款全用紙幣周轉度支司挪借廣信公司紙幣積欠已至百萬兩以外均指荒價償還而腹地腴荒已盡領戶欠款難清度支司虛指荒價之名墾務局實無收進之款騰挪周轉會有窮時萬難恃爲持久之計臣等百計圖維開運官鹽舉辦屯墾清丈地畝浮多其收利均在三四年後不可以責近效而救目前且邊地苦寒不同內省之繁富人民新集尙待官吏之撫綏一切行政務存寬大不敢稍涉煩苛致成羅掘惟是增官設治修政籌邊均屬萬不可緩之事亦不得以帑項支絀安坐失時查吉林上年請撥常年邊防經費銀六十萬兩荷蒙特恩允准在案江省邊綫延長較吉邊尤關緊要而庫款奇絀較吉省尤爲枯窘非有的款接濟萬難措持再四熟思惟有奏懇天恩俯念邊事艱窘

特准飭下度支部自明年始除舊撥二十六萬兩外按年籌撥江
省實銀六十萬以三十萬兩作爲補助舊有各官及新設各官經
費以二十萬兩改發巡防兵餉以十萬兩合之上年部撥之十萬
兩專供沿邊卡倫要需此外所有不敷之數無論如何爲難皆由
臣等竭力設法籌補應用俟數年後諸事辦有端倪荒地逐漸升
科捐稅押租亦較現在稍形充裕卽將此款隨時奏請停撥庶於
國帑邊情可期兼顧臣等實因江省地處邊瘠施設萬難故不得
不切實陳明所有懇

恩飭撥江省常年經費緣由除咨部外謹恭摺瀝陳伏乞
皇上聖鑒訓示

江省請緩免貢貂摺

奏爲江省應進貢貂無從採捕籲懇緩免以恤兵艱恭摺仰祈

聖鑒事竊查本省貢貂向由布特哈墨爾根黑龍江呼倫貝爾等城各官兵按年入山採捕照額輸納以備

上供自近年各處招墾山荒榛蕪日闢山虞歲產日見星少蒐獵既窮購索匪易然以品關

御用黼冕是供歲獻有常豈容或曠該官兵等世承

恩豢誼亟輸將但十數年來因捕獵之綦難特購辦以足額其購買之價出自俸餉較之內地採辦騰貴轉爲過之而各省協濟之餉積欠夙屬虛懸迭次奏催會無一應故兵丁日形困苦供億實屬艱難歷經前任將軍據實瀝陳所有光緒二十四年短進貂貢暨二十六年應納貂貢均經先後欽奉
硃批飭令緩納自二十八年以後緩進之
諭年復一年是其艱苦情形已蒙

聖明洞鑒本年遭際大變迭告

國哀特布

綸音除祭品外悉予停罷仰見

聖懷篤孝敦崇節儉爲天下先竊維此項貢物旣非祭品合無仰
懇

天恩俯准暫行緩納一俟休養數年採捕確有把握再行遵依向
例貢納以廣

皇仁而示體恤出自

逾格鴻慈所有懇

恩緩免歲進貂貢緣由是否有當伏乞

皇上聖鑒訓示

江省地方官交代免扣例限片

再江省未設郡縣以前僅有呼蘭綏化二廳每年正供亦祇大租雜稅二項如遇交代向止冊報戶司存查並不咨部亦無期限從前邊地政事率皆簡略自近年陸續添設府廳州縣並改建行省以來正雜款目逐漸加增交代關係考成自應嚴行查核免滋弊竇惟是地方新闢州縣次第添設界址隨時勘劃清查熟地撥放生荒輾轉膠轉釐定實非易易又兼邊圉吏才難得若事事拘以成例勢必窒礙難行自應量爲變通擬請自宣統元年起遇有府廳州縣交代暫行免扣例限一律報部查核庶於權宜之中仍寓稽核之意俟數年後規模大定再行按例依限辦理並請將光緒三十四年以前各案交代免其補報以省繁牘理合附片陳明請旨飭部立案伏乞

聖鑒訓示

倫城沿邊分設卡倫並酌設邊墾局摺

奏爲呼倫貝爾沿邊轄境分設卡倫並於倫城及滿洲里設立邊墾總分各局以便統屬而資控馭謹將開支數目奏明立案恭摺仰祈

聖鑒事竊維黑龍江省毗連俄境邊線延長三四千里若非講求拓殖慎固封守則主權利權皆將隱被侵奪馴至無可挽回臣等往復籌維以爲闢地首在聚民防邊必先置戍惟是沿邊廣遠財計艱難設卡開荒勢難一時並舉擬擇定要區先行試辦以爲各邊之先聲然後以次擴充徐圖完密查呼倫貝爾所轄境內西北自達爾巴幹達呼山起東北至額爾古訥河口止彌望荒涼幾同甌脫而隔江俄境則屯鎮相望星羅碁布俄民時時越界採鑛墾地捕獵伐刈惟所欲爲無人過問審時度勢惟有於沿邊一帶安

設卡倫並酌立邊墾總分各局以資提挈庶爲鞏固邊疆聯絡聲息之道迭據暫護該城副都統宋小濂咨稱該城沿邊屬境現在約按每七十里設一卡倫並於每卡設卡弁一名卡兵三十名又每五卡設卡官一員每十卡設總卡官一員計沿邊一千五百餘里共設二十一卡一撥所有卡兵應令每卡以十名巡查邊境以二十名開墾荒田更番輪替庶期務農講武兩者交資將來所得糧食卽作爲該兵津貼俟力能自存再將所墾之田分給爲業酌量升科停餉留兵十名保護墾民其餘另招二十名再於中間隙地添設卡倫墾地以次遞加邊民可期日臻繁庶並令就近兼收木植羊草皮毛等稅以免利源外溢惟各卡散漫零星擬在滿洲里設立邊墾分局責令與吉拉林設治委員分段管理並於倫城設一邊墾總局綜核全境卡倫邊墾事宜節制滿洲里吉拉林兩

處以一事權計自本年先後開辦以來統計邊墾總局需過開辦費三千五百餘兩該局每月額支銀九百二十六兩又沿邊二十一卡一撥共需過開辦費三萬六千餘兩各卡撥每月額支銀五千零八十五兩每年額支軍衣等項銀一萬一千三百四十兩又滿洲里邊墾分局共需過開辦費四百餘兩該局每月額支銀七百四十兩至各局隨時活支應請實用實銷所有支款並請隨時酌量變通等情分別擬定章程咨請奏明前來臣等詳加覆核該城辦理卡倫暨設局等費係爲整理邊防斷難或緩節經覆准照辦並飭度支司卽由正款項下動支其瓊瑋興東西邊卡倫現已令其預籌開辦因邊款無著未敢驟議擴張應俟此次奏請撥款到日再行妥籌一律辦理再沿邊地處荒寒所有在事員司餉糈微薄一俟辦有成效擬懇

天恩准由臣等查明分別異常尋常勞績擇尤請獎以資策勵除將各項詳細章程暨起支日期咨部外所有開辦倫邊卡倫及邊墾總分各局大概情形並開支數目各緣由理合恭摺具陳伏乞皇上聖鑒訓示

擬修訥海道路片

再江省東北一帶荒地人煙稀少非開通道途無以謀墾闢而興地利前據署布特哈東路總管純德呈稱擬修由訥謨爾河段內直達海倫廳道路以便行旅等情當經臣等派員前往會勘覆奪現據覆稱計由訥河段內至海倫相距約三百八十餘里其間灌莽荒榛森林叢雜且時有達呼爾索倫種族借打牲爲名潛出劫掠自應趕修官道安設旅店以便交通惟查勘路線擬由訥段取東西南北直線越敖倫呼爾兩河逕達海倫廳境以期便捷並

擬於察霍勒爾屯修辦事公所一處請派員經理並添募兵丁三十名歸委員管轄分段常川駐紮俾資鎮懾計估算沿途修橋掘井添蓋公所兵房旅店等項約共需開辦銀一萬餘兩又常川派駐委員薪公暨兵丁餉項每年約共需額支銀四千數百餘兩呈請撥款開辦等情據民政司核覆請奏前來臣等覆查訥河段內腴荒甚多徒以道路未通以致商賈不便貿遷荒地難於開闢現在勘修此路能使數百里林深菁密之地一旦變爲坦途并分段駐兵以衛商民將東荒一帶與訥河一氣聯接貨物可輦運而至人民均負耒而來實於布墨各城墾務商務交有裨益所需各款已飭度支司由正款項下照撥以便早日開闢除將支用各項詳細數目開單咨部外所有擬修訥河至海倫一帶道路大概情形理合附片具陳伏乞

聖鑒訓示

奉省設立貧民習藝所摺

奏爲奉省設立貧民習藝所謹將辦理情形暨籌撥開辦常年各項經費恭摺具陳仰祈

聖鑒事竊維奉省民生彫敝盜匪充斥雖歷經勦辦漸就肅清而揆厥由來大半人無技能飢寒迫身遂至鋌而走險臣抵任後再四思維欲爲地方圖久安宜先爲貧民籌生計必期人有恆業國無游民始足以厚民生而謀富庶當檄飭奉天民政司使張元奇仿照京師五城教養局辦法詳擬章程先於省城設立貧民習藝所專收無業貧民審察材質所宜限年分科習藝藝成出所藉謀生理其貧民年歲自四十歲以下十三歲以上者皆爲及格一律招收暫定額數三百名所有應需之衣食宿舍均由公家備給以

示體恤並飭令該司剋期擇地興工業於上年十月十五日一律
工竣建築工廠及各項房屋以及採買材料購置機器延聘技師
等項開辦經費約需款四萬兩左右查京師五城教養局係將五
城粥廠經費改移辦理奉天省城向年冬季提撥官款三萬兩於
四關設廠施粥賑濟窮黎然只救饑餓於一時實非教養兼施之
道現已仿照京師辦法於光緒三十四年冬季一律停辦卽騰出
此款作爲貧民習藝所開辦經費不敷之款仍責成民政部設法
先行籌撥俟將來製成物品獲有餘力再行歸墊此後每年停辦
粥廠項下所支之三萬兩卽作爲貧民習藝所常年經費不另籌
款如果辦有成效再擬設法擴充以期普及除分咨民政部度支
部查照外所有奉省設立貧民習藝所大概情形及籌撥開辦常
年各項經費緣由理合恭摺具陳伏乞

皇上聖鑒飭部立案施行

吉省遵設禁煙公所並實行禁種禁吸情形摺

奏爲吉省遵設禁煙公所並實行禁種禁吸情形恭摺仰祈

聖鑒事竊自鴉片弛禁以來流毒遍於國境人民吸食靡然成風
旣隳志以戕身復耗財而辱國爲日旣久爲患益深何幸比年民
智漸開羣知其害會逢

朝廷銳志圖強迭奉

明詔告誡頻仍頒禁種禁吸之令爲強種強國之基屬在臣民同
深欽感臣等身膺疆寄與有考成敢不奉行惟謹以期早竟厥功
伏查吉省地處偏隅交通不便洋土向不行銷民間之吸煙者類
皆自種以故價值甚廉吸者愈眾尤以旗民爲多惡習相沿殊堪
痛恨自上年改設行省疊准政務處民政部禁煙大臣先後咨送

章程到吉當卽轉行嚴禁在案復經調任撫臣朱家寶先於省城設立禁煙總局一所檄委試署民政司司使謝汝欽爲督理各府廳州縣均設分局按照部章切實籌辦先從官場入手遴委妥員挨次清查無論曾否吸煙概令具結以憑查考其情形可疑巧爲掩飾各員但卽舉發隨卽送交該局查驗並由該局督同士紳另設禁煙公會一處廣購方藥多方勸戒以爲官局之助迨臣昭常到任以後復加審查以爲禁煙之要不外禁種禁吸二事禁種是在於民禁吸莫先於官欲祛其弊必清其源吉省旣無洋土攬銷但使種者禁絕根株則吸者自歸淘汰官吏本爲士民表率但使羣僚咸知矯勵則民間自動觀摩要非雷厲風行難言收效用將禁煙總局遵照新章改爲禁煙公所慎選員司經理其事舉凡前此辦法之未善者無不改良以期必當官則密其考查尤須杜其

隱匿除循例取具保結外加取聯名切結嚴申連坐之條民則定其期限亦必別其勸懲除遵章給照遞減外復填煙戶門牌俾動下流之恥至軍學兩界品格既高更宜整飭則由該管長官認真偵察但有犯者立予斥退不少姑容現在次第舉辦均已漸有頭緒而據各屬呈報其自本年正月爲始一律禁種者已有數處但能如此切實推行一年之後吉林全省當無更種鬻粟者矣臣等復思煙禁既有十年之限吸者一時尙難盡絕倘任民間自由購取仍屬漏卮漫無限制適准部咨有推廣牌照捐之議因更仿照川省辦法設立官膏專賣局責成民政度支兩司會同辦理凡經領照吸煙之人均令持照赴局購煙此外一概不准私相買賣不特寓禁於徵並得藉資經費設有不足再由臣等籌款彌補造冊報部作正開銷此皆吉省現辦禁煙之實在情形也第事屬創行

所定規章非經試辦未敢遽定是以奏報稍遲後此如有未盡事宜臣等自當悉心研究逐漸措施務使煙害早除於國於民胥臻幸福並以仰副

朝廷軫念民生咸與維新之至意除將各項詳細章程分咨禁煙大臣民政部度支部查照外所有吉省設立禁煙公所並實行禁種禁吸各緣由理合恭摺具陳伏乞

皇上聖鑒訓示

吉省設立文報局裁撤驛站監督片

再查吉省驛站向分南北兩路照章奏派監督二員分司其事均歸將軍衙門兵司管轄上年改建行省添設司道各官並裁戶兵刑工四司案內業經奏明將驛站一項歸民政部接管惟兩監督尙仍其舊原屬暫爲之所以期徐待改良經年以來臣等疊經考

查竊以吉省設站之初彼時外屬除五城各副都統外廳縣無多故僅擇其扼要所在安站置郵已敷轉遞現在地方日闢今昔異宜所有舊時設站處所未能遍及傳送紆回深虞不便雖經隨地安置馬撥及文報局以資補助究因性質不同諸多扞格况查奉江兩省驛路業已先後奏裁現辦文報局成效昭著吉省地處適中尤應仿照辦理庶歸統一而便聯絡茲經臣等一再籌商勢難再緩因於省城先設文報總局一所卽委試署民政司司使謝汝欽爲督辦刊給木質關防以資信守其舊有之關防處監督向係各旗協領兼差本非實缺應請先行裁撤所有全省驛遞事宜概歸該局管理何處應設分局何處應置馬撥均著體察情形次第籌辦其向有各站現皆暫不更動一俟某路文報已通卽將某路驛站裁撤予限半年一律竣事至於各站筆帖式暨各站丁人等

應作如何安置站地站馬之類應行如何清釐并飭該局調查明確由臣等妥核具奏其應動支經費銀兩並請卽由驛站額支俸餉項下作正開銷事關興革要政所有現時裁改情形先行奏報立案除分咨度支陸軍郵傳各部查照並將禮部舊頒烏拉金珠鄂佛羅等站監督銅製關防兩顆截角咨銷外理合附片具陳伏乞

聖鑒訓示

吉省設治需款動用荒價作正開銷摺

奏爲墾荒設治需款不貲請援案動用荒價作正開銷恭摺具陳仰祈

聖鑒事竊吉林東南北各邊境地方遼廓前以荒蕪未闢伏莽潛滋逼近強鄰時虞窺伺亟須墾荒設治乃足固圉綏民曾經前將

軍長順達桂在蜂蜜山濛江等處先後派員設局放荒招墾並於郭爾羅斯前旗添設蒙荒行局又於三姓地方設依蘭大通等府縣嗣經臣世昌調任撫臣朱家寶體察情形以蜂蜜山濛江及濛界等處生熟各荒業已放有成數分設蜜山府濛江州長嶺縣各治均經奏報在案惟查各地放荒開墾歷辦有年祇以秦李初開戶口稀少道路鮮交通之便村市無屯聚之所加之外警烽燧內迫萑苻已來者失望而去未至者裹足不前而主其事者斟酌情形量爲措置大都因財力單薄難以圖功稍加經營輒負重累歲月屢易印委疊更辦法旣苦多歧清釐亦未盡善是以閱時雖久成效闕如臣世昌與臣昭常督飭各員殫心籌畫自非妥籌辦法不足圖成尤非寬籌經費仍難謀始凡關於墾荒設治各事宜如城鎮署局倉獄驛站營房以及道路橋梁河渠等項則有建置費

募練兵勇巡警則有保衛費招徠墾戶則有移置費分立墾務設治各局則有一切開辦費及常年費綜此數端闕一不舉屢經預算核實摶節實非有大宗的款不克濟事無如吉林自改行省諸務繁與財政日困目前經常政費已苦不支似此特別巨款從何籌措惟是外瞻世局內審邊情及時妥籌已有萬難延緩之勢臣等再四思維與其因陋就簡日久無功曷若早事變通藉此補助明知籌邊大計殖民要圖事關全局斷非一省財力所能勝任特以創辦之始不得不力任其難但使本省有款可撥亦何敢另求指撥謹查光緒初年吉省添設道府州縣各缺修建城垣衙署等款皆於荒價項下動用作正開銷此次事同一律而時勢艱鉅則又過之擬請援照前案其蜜山府依蘭府濛江州大通縣長嶺縣等處凡屬招墾設治各要需除將可撥之款分別支銷外其有不

敷之處准於所收荒價項下如數動用報部核銷臣等自應認真
察核不敢稍涉浮冒如查有不實不盡卽當將在事各員分別參
處以昭核實所有臣等擬請將蜜山等處新設各府州縣墾荒設
治經費援案動用荒價作正開銷緣由除咨度支部外理合恭摺
具陳是否有當伏乞

皇上聖鑒訓示

皇朝通志卷二十二

皇朝通志卷二十二

退耕堂政書卷二十三目錄

奏議二十三

議覆三姓及黑龍江一帶荒地一時尙難招佃開墾摺

籌設東三省陸地測量總局摺

設立東三省軍學圖書館片

遵核奉天官制詳陳辦理情形摺

擬請改定錦新興鳳兩道與京一府片

查明東三省鹽務情形暨現在辦法摺

遵查陸軍協統王振畿參案摺

擬裁奉天巡警道添設洮昌臨長海兩道員缺摺

裁撤錦州副都統屬筆帖式援例改歸外用摺

裁撤鳳凰墾務局移交東邊道接辦片

東邊道各屬分設文報局裁撤馬步撥片

江省中學堂建築費立案片

密陳東省危迫情形並已辦籌辦各事宜摺

退耕堂政書卷二十三

天津徐世昌

奏議二十三

議覆三姓及黑龍江一帶荒地一時尙難招佃開墾摺
奏爲會議三姓及黑龍江一帶荒地招佃開墾一時尙難辦理情
形恭摺覆陳仰祈

聖鑒事竊臣等准軍機大臣字寄光緒三十四年七月十七日奉
上諭有人奏三姓及黑龍江一帶荒地甚多似可改爲招佃開墾
收租不取荒價又河套地方邊牆外通有種地佃戶地土肥沃請
飭勘放等語著徐世昌陳昭常信勤會同妥議具奏原片均著鈔
給閱看欽此遵

旨寄信前來臣世昌遵卽咨商臣昭常將三姓荒地佃墾各情會

正書卷二十三
同調查並咨黑龍江撫臣周樹模將黑龍江一帶情形詳查核覆
臣世昌與臣昭常按諸事實揆諸情理原奏所陳實多窒礙如所
稱招佃辦法意在招民開墾俟墾熟之後地歸旗丁民充佃戶照
此變通辦理果能邊荒之大利日闢旗丁之生計日充以與原奏
廣爲招徠俾增蕃殖之語相符則一舉而備數善計固莫良於此
惟細加體察行之於蕃殖之後或易爲功行之於招徠之初實難
爲力謹爲我

皇上縷晰陳之按三姓卽今依蘭府臨江州大通縣等處轄境所
有荒地業經該處副都統衙門暨該府州縣等次第開放大通縣
江北之地已奏明劃歸江省江以南餘地無多除臨江州所放之
荒不收荒價餘均照全省通行舊例每生荒一晌收地價中錢二
千文限以六年升科每熟地一晌交大小租中錢六百六十文以

如此至微之荒價極薄之糧賦歷辦多年猶難踴躍其江省呼蘭一帶從前安插京旗暨通肯等處本省旗丁原領地畝向係民代旗墾而呼蘭則因京旗旗丁不耐苦寒紛紛逃回故土其事遂寢通肯等處則雖本地旗丁尙以不能經營致釀轉徙民墾地尤較吉省爲難然實邊爲東省要務不能不力求進步而所恃以爲招徠者亦全在准爲世業耳原奏謂不取荒價招徠承墾每晌可收租銀一兩五六錢三倍於糧賦之數夫所免者僅一時極微之地價而納者乃每年三倍之地租旣無得產之望轉負重賦之累蚩蚩之氓誰肯出此其難一開荒邊地勞費百端不憚竭力以圖原爲爾田爾宅之計乃甫經成熟卽須以地授人耗費旣無從取償地主亦礙難酬報愚民何知大體尙不甘受此虧累更恐枝節橫生其難二墾民旣不能自承其業又須永擔重租怨尤所積加

以飢迫必將聚無數丁壯於極邊囂然不安其業鋌而走險急何能擇山深林密防不勝防不僅擾亂治安兼恐紛起交涉其難三且非特不利於佃戶也亦與旗丁實多有不利何者旗丁遠道而來受田認佃地界既不諳悉情意又不相孚朦混挾制皆在意中奸民乘機構煽勢必詞訟繁興甚或劣佃爲匪地主轉因而受累其難四至地主佃戶有不浹洽必或撤佃另招而民戶稀少招募非易另招無著則立見荒蕪仍招原佃則挾制益甚展轉相沿終貽困累其難五原奏謂旗丁遷徙始而收租久之農事漸習自行耕種似此體恤旗丁不知其害實甚查東省本地旗戶無不占有官荒而乃慵惰成習窮困日蹙皆因招佃而不自墾之故大凡辛勤乃爲立業之基而依賴實增游蕩之性其不能耐勞於前者決難望作苦於後必至不克自立生計終窮今本爲旗丁謀生詎可

更蹈此弊其難六綜此六端實鮮成效不特後日之蕃殖難期卽當開辦之初誠恐以此招佃佃戶未能應命而來以此開墾旗丁終無熟地可撥雖歲收租息較之糧額爲多而有名無實轉舉殖民實邊闢地興利及籌畫旗丁生計諸政策等諸空談將終無程效之一日臣等忝膺邊寄自不得不統籌兼顧因地制宜固未敢冒昧從事亦何敢漠視要公原奏旣爲安插旗丁起見應仍遵上年

明詔注重撥地自耕查現在三姓邊遠之區荒段尙屬不少江省亦正議出放瓊瑋興東呼倫貝爾各城邊荒若按旗丁計畝授田仿照雙城拉林各處辦法妥定章程准給牛具等費定立租額年限開墾成熟卽予管業不取荒價緩合升科並練旗營藉資保衛以期屯墾兼施似於墾荒實邊兩有裨益容俟臣等統籌就緒再

正言卷之二
行奏咨辦理惟茲事體大籌款維艱屆時更當奏請

飭部指撥的款以資安集其河套地方情形與吉江迥不相同應由督辦墾務兼署綏遠城將軍臣信勤自行妥擬具奏所有遵議三姓及黑龍江一帶招佃開墾一時尙難辦理緣由理合會同恭摺具陳伏乞

皇上聖鑒訓示

籌設東三省陸地測量總局摺

奏爲籌設東三省陸地測量總局以製輿圖而符部章恭摺具陳仰祈

聖鑒事竊查陸軍部前次奏定測繪全國軍用地圖辦法摺內聲明實地測量及製圖等事需款頗鉅在各省者應由各該督撫臣儘力籌辦等因在案伏思近世測量之學名雖沿自泰西實係仿

於上古考大禹用句股之法分配疆域爲治水之根基周禮設職方一官掌理地圖辨邦國之要害誠以天下形勢非輿圖不明而輿圖本原以測量爲要後世治軍行政亦悉本圖籍以經營是測量事宜關係綦重矧今日處武力相競之世輿地未能熟悉卽攻守無自運籌是以東西各國除所謂政治商業各地理外無不有軍用地圖用能策畫周詳指揮無誤究其軍用地圖之說自率由於測繪而來此各國陸地測量部所由設也中國土地遼闊從前於測繪一項未立專校致絕無精確地圖可資參考近年各省測繪學堂次第興立奉吉兩省於部章未頒之前在省會分設測繪學堂一所近將先後畢業該堂學生程度雖有不齊之慮而學成同爲致用之材惟東省遠在荒陲毗連鄰國界務之糾紛軍事之計畫屯田置戍何處爲扼要之區設治墾荒何處爲適宜之地尤

必實地測量始可參酌情形切實籌辦查南洋測繪學堂畢業學生業於上年奏准編成測量隊從事實測東省地域大於南洋形勢亦較爲重要亟應援案辦理設局編隊舉辦測繪事宜臣等擬將奉吉兩省畢業學生一百八十餘人暫編測量一隊略仿日本陸地測量部辦法設立陸地測量總局統籌測繪各事祇以人數無多幅員式廓不敷分配吉林界接韓俄尤關緊要擬先由吉林入手次江次奉斟酌緩急次第測量並由臣等隨時督飭此項測量人員遵守部章認真辦理惟是事體繁重統三省面積約三百三十餘萬方里當日本兩倍有奇彼自明治十四年經營以至今日歷三十年之久費數十萬之多已成之圖僅及全國之半東省雖兼程並進亦非倉猝所能竣功惟有嚴飭該局隊員生等勤奮將事以仰副

朝廷軫念邊疆之至意至開辦及常年各經費業經樽節預算開辦費約需銀六萬餘兩其常年額支活支雜支各費除測繪員生均按照前定章程由各營挑選應於各該營仍留底餉外約需銀六萬餘兩均擬由三省合籌分成攤撥交支應處支發動用以濟要需而免貽誤此項經費應請作正開銷此次經始測量東省土地荒寒山林叢雜跋涉艱難與內地情形迥異該局隊員生等如果忍耐艱苦辦有成效應請每屆三年擇尤奏咨保獎以資激勸
出自

逾格鴻慈如蒙

俞允臣等卽當欽遵辦理除將該總局暫行試辦章程咨部查照外所有籌設東三省陸地測量總局緣由謹合詞恭摺具陳伏乞皇上聖鑒訓示

設立東三省軍學圖書館片

再查東三省西北環山東南控海外則有日俄之覬覦內則爲京直之藩籬陸軍固待擴張海防亦應籌議將來陸海軍人日多一日自非推廣軍學不足以增進軍人之智識而作養其精神考之各國咸有陸海軍圖書館之設凡關於軍事學術國內外之圖籍無不蒐羅購置藉供軍人研究之需意美法良顯收成效東省亟應仿辦惟以經營伊始需款浩繁擬暫借用前陸軍小學堂東偏房屋先行開辦以立基礎其開辦及常年各經費均由軍界人等提倡捐集嗣後如果建築房舍添購圖書需費過多不敷支給自應酌撥官款以資補助而圖擴充據督練處參議參謀處總辦等呈請具奏前來臣等覆核無異除咨部立案外謹附片陳明伏乞聖鑒

遵核奉天官制詳陳辦理情形摺

奏爲遵

旨酌核奉天官制詳陳辦理情形恭摺據實覆陳仰祈

聖鑒事准軍機大臣字寄光緒三十四年十一月十六日奉

上諭有人奏奉天官制宜斟酌損益以節糜費一摺著徐世昌按照所陳各節體察情形酌核辦理原摺著鈔給閱看欽此欽遵寄信前來仰見

朝廷澄叙官方綜核名實之至意欽佩莫名竊維設官之道要有一定之職守權限乃無尸位之譏用人之方必先歷試其學識才能自免濫竽之誚詳閱原奏所述四端斟酌損益具有深意惟臣於改設行省奏定官制之時悉心研究詳加探討與原奏所陳有已慮及而無庸議裁者有官制本有而爲緩設之缺須求統一之

正書卷之三十三
方未便三省分設者有官制本無而爲後設之缺按諸事實應從
原奏議裁者有爲奉天官場習慣已經臣嚴予限制者如原奏謂
巡撫應裁一節查內省督撫不宜同城因無職務之責分疆各有
官署故遇事或有齟齬今總督統轄三邊巡撫主任塗境又皆同
署辦公權限旣明猜嫌悉泯總督之駐奉天實因目前交通之便
僅及瀋陽非經常制也若俟鐵路貫通政權敏捷則總督應駐三
省之中權以扼軍政財政外交之樞紐而專爲籌邊治蒙之計畫
其省內一切政令皆任之以巡撫是巡撫之不應裁非僅爲總督
之入覲

闕廷出巡邊塞將倚之代行職務也又以巡撫爲總督次官略如
京部之尙侍與往日之督撫同城者不同臣原定官制曾奏明規
仿京部是巡撫仍受總督之節制而各有所事旣不能以駢枝爲

嫌復何至以虛設見誚若議裁奉天巡撫則總督囿於一隅於吉
江兩省重要事件必至隔膜貽誤所辦者仍奉天巡撫之事機局
既滯而不通綱領亦偏而不備三省開創重要之政必至延擱不
辦又顯然以東清南滿鐵路界限劃境而治此中機括關係甚大
萬難裁撤此爲臣所慮及而無庸議裁者也原奏謂蒙務司應設
一節查原定官制本有奏設蒙務司之請臣到任後體察情形蒙
旗分隸三省生性顛愚匪庇匪人攜貳官府且受人煽惑爲所利
用欲進而干涉之則必有劃一之方實行之策若僅於奉省設蒙
務司則於吉江勢難兼顧若分設三省則事權不專政令歧出且
馭蒙之術在周知其情勢以德威變化其氣質以政教保障其生
產是必周歷蒙疆迎機而導非如他司之設常駐於省城僅以文
牘往還也臣因奏設三省蒙務局以朱啟鈴爲督辦去歲出法庫

邊門循遼源達洮南由齊齊哈爾折回奉省又分派人東至吉林
之新城派松嫩兩江西由朝陽赤峰沿新舊遼河等處循行一周
考察形勢風俗又於吉林分設蒙務處以資聯絡將來款充事舉
尙應移總局於蒙旗中央而分設於吉江扼要之地至原奏謂多
立蒙文學堂兼用漢文教習廣開蒙民風氣誠爲扼要之圖臣已
分飭學堂兼習蒙文並招致蒙王子弟入學以期教育普及此蒙
務必應統一而不宜分設司缺者也原奏謂民政司與巡警道應
歸併一節查奉省奏定官制本無巡警道之名良以警務卽在民
政範圍不當另有主任嗣因奉天巡警普及城鄉而警捐之複雜
警兵之凌亂將欲改良整頓似須另設專員又因外省官制皆添
設巡警道奉省警務最繁故奏請添設道缺但吉江兩省警務初
辦之時皆統轄於民政現在整理已將兩年且迭奉部章諸資遵

守則設民政司省分自不應再有道缺以清權限而免紛歧奉天巡警道一缺應照原奏裁撤歸併民政司辦理至巡警總局亦猶民政部之有兩廳爲執行警務機關勢難裁併或遵照部章改爲警務公所容臣體察情形改訂規則再行分別籌辦至奉省要塞之區爲治蒙防邊之最重者尙須添設員缺以資籌備應如何酌量增減之處統俟併案奏明請

旨辦理此巡警道一缺應從原奏議裁者也原奏謂雜項職銜應限制一節查奉省初無掣籤人員故投効習爲慣例臣到任後嚴加考核凡投効人員先須考試並遵照吏部憲政編查館所訂章程分別選入法政學堂肄業非正途及學堂卒業者不得錄用且須取有不吸鴉片煙甘結是限制不爲不嚴間有派科員委員者亦必試之以事果係才堪造就或奏請留奉以資器使蓋奉省投

効之原因有二一則未改行省以前諸事漫無稽考投効人員或辦墾務或充稅差偷漏舞弊飽則遠颺一則因新政繁興一技片長皆思有所表見臣於用人一事固不敢存求備之心以限制之法待中材以鼓舞之機振士氣然至一事之來尙有乏才之歎實未敢聽若輩之百計鑽營先委後捐以行其彌縫之術原奏謂奉省已不下數百員官冊具在可以覆按嗣後仍應嚴加考核期無冒濫此皆往年之習慣而厯經嚴予限制者也以上四端官制爲經久不渝之典用人係辦事最要之原自應審慎圖謀以期盡善臣現已蒙

恩量移京部卸任以前仍應擔負責任悉心經營愚慮所及不敢不據實陳覆所有遵

旨酌核奉天官制詳陳辦理情形緣由謹恭摺覆陳伏乞

庸再由直隸總督會銜辦理又從前奉省以臨江爲極東於安東縣設道規邊因名曰東邊道今奉省東拓長白一府而該道東境又劃臨江輯安通化三縣歸擬設之臨長海道治於是該道轄地正當奉省正南不宜仍名東邊擬卽定名爲興鳳等處分巡兵備道仍治安東以符名實該道員缺卽由奉省循章擇員保奏請旨簡補至

興京爲

發祥重地近復韓僑雜處交涉滋多內政外交均形重要擬請改升

興京直隸廳爲

興京府而與鳳凰直隸廳並受興鳳道管轄至

興京升府後應否畫分縣屬容後揆度情形酌量辦理如是則奉

省全屬各有管領道員而奉天一府則仍直接受督撫之監督爲行省公署中央機關權限明而責任專地方官制劃若畫一是否
有當謹附片具陳伏乞

聖鑒訓示一併飭下會議政務處核議施行

查明東三省鹽務情形暨現在辦法摺

奏爲查明東三省鹽務情形暨現在辦法恭摺覆陳仰祈

聖鑒事承准軍機大臣字寄光緒三十四年十二月初十日奉

上諭有人奏東三省鹽務改設官局弊竇太深請妥定章程一摺著徐世昌體察情形妥定辦法毋令不肖官吏蠹國殃民原摺著鈔給閱看欽此遵

旨寄信前來臣當卽札飭東三省鹽務局按照原奏各節確切查明詳晰開報以憑核辦茲據該局覆稱已遴派委員前往各該處

逐一查明如原奏內稱官運局引用失業之無賴鹽商爲員司常令偕同赴灘強硬買鹽且每當赴灘裝鹽之際員司夫役勢同搶劫照釐捐票開石數往往浮裝過半一節查吉江兩省官運局並無本地鹽商充當員司惟吉省官運局去夏開辦之初曾令營口向開鹽棧之張績廷代雇車船並無令其赴灘裝鹽之事嗣查出張績廷每雇車船間有私扣用錢情事致車船各戶嘖有煩言早經將其辭退至裝鹽之際員司夫役勢同搶劫一層詢之各灘戶僉稱官鹽局員司帶同大車下灘裝鹽當車輛畢集時或數十輛至百餘輛各車戶中有不耐久候爭先裝載事或有之如果勢同搶劫及浮裝過半灘戶等豈能隱忍不言又原奏內稱吉省當商運時每鹽一百斤售東錢六千五百文今官運增至十三千文江省當商運時每鹽一百斤售東錢十三千文今官運增至二十八

千上下扶同利歸中飽一節查近年商銷鹽價因時漲落本無一定現以奉天省城論之每百斤售東錢十二千上下則比吉省幾多一半較江省相仿如吉江兩省道路之遠運費之多卽商運時果係此數不特無利可沾尙須賠累孰樂爲之現據吉省電稱官鹽定價長春伊盤兩局每斤小洋三分三釐省倉四分二釐榆樹哈爾濱兩處四分五釐阿什河四分六釐甯古塔四分八釐與未開官運以前鹽價除甯古塔相埒餘皆有減民間樂購並無嫌貴之說江省電稱自去年十月起售鹽定價每石合市錢一百二十八千未開官運之先每石合市錢二百五六十千其價倍廉民間稱便均無勒售情事各等語原奏所言自屬傳聞失實又原奏內稱鹽局於例定斤數外吉省則加至八十斤之多江省則加至一百四十斤之多且於既售之後仍持舊票赴灘再裝新鹽不再報

稅江省官運局至有裝鹽一輪船全用舊票匿稅者現署蓋平縣知縣兼辦鹽釐與官運局通同舞弊抵換舊票不止一次一節查吉江兩省辦理官運道路遙遠舟車載運多有消耗且事在試辦盈虧未卜不能不稍寬限制因於原定官運章程按例定每石六百斤比照商運涵耗四十斤外吉省准加涵耗八十斤江省道路尤遠照吉省每石准多加涵耗六十斤期免公家虧累至抵換舊票一層查灘場於產鹽之時即將鹽數首報鹽釐分局而鹽局每月有呈報銷存鹽數清冊可稽此次調查蓋平各場售鹽之灘戶所有售與吉江兩省官鹽局之鹽數憑條並將營口補徵局所驗官鹽數目及蓋平鹽釐局發給運票與官運局收鹽各帳逐加詳查均尙符合自無以上情弊惟吉省開辦官運局之初由南滿洲鐵道火車運送以期迅速於火車裝運時起領運票外另備運單

輸送長春迨至去冬採用由吉黑來營之大車載運卽已不再另發運單所謂換票舞弊或因於此署蓋平縣姚煜平日辦事嚴正於辦理鹽務尤極認真不遂奸商之私怨毀之興或所難免然票數相符帳目具在其非通同作弊自屬可信又原奏內稱官運之初東三省鹽務總分局各員及天津商人王竹林均暗中集有股分一節查奉省鹽務就灘抽釐本無庸籌集股本至吉江兩省創辦官運均係由公家籌本並無集股之事亦無天津王竹林其人原奏所稱未免傳聞失實等情臣覆查東三省鹽務前雖屢議創辦督銷迄因經費支絀且無大本鉅商堪以擔任引課而南北滿鐵道及邊界口岸外鹽尤多侵灌防範稍疏利權卽不免外溢不得已仍行就灘徵釐分設吉江兩省官運局與南滿鐵道議定運價妥定稽查章程分起裝運且鹽雖官運仍係由商分銷旣據查

明赴灘裝載尙無私弊兩省售價加耗亦無畸輕畸重之處辦理情形尙無不合况鹽由官運無需商本自不至合股營私並可杜絕從前奸商等挾私罔利之弊雖從前運鹽之車近或無利可圖然鐵道通行以後前此商銷時卽已改裝火車並非因官運而始然現自改章以來鹽釐收數增至數倍成效實已昭著惟各該官運局創辦未久詳細章程容有未善自當逐漸整飭卽如大車赴灘裝鹽百十乘同時守候爭先恐後雖亦車戶之恆情然日久難免別滋事端亟宜飭其妥定章程另籌善法俾從前運鹽各車戶亦藉得圖謀生計務期鹺政振興商民交便以仰副朝廷興利除弊體恤小民之至意所有查明東三省鹽務情形並現在辦法緣由謹恭摺具奏伏乞

皇上聖鑒

遵查陸軍協統王振畿參案摺

奏爲遵

旨查明陸軍第一混成協協統王振畿被參各節並就原案審明核擬情形據實覆陳恭摺仰祈

聖鑒事竊承准軍機大臣字寄光緒三十四年八月十七日奉

上諭有人奏奉天協統王振畿縱容兵丁擾累村民致釀人命等語著徐世昌按照所參各節秉公查辦毋稍枉縱據實具奏原片著鈔給閱看欽此遵

旨寄信前來遵查此案前據第一混成協協統王振畿呈送護兵王簣川被槍轟傷身死一案當因案關營務發交行營發審處會同兵備處鄉鎮巡警總局提集人證訊明王簣川係被旗人程恆啟開放洋槍轟傷身死飭據提法司提審無異造冊解經臣覆勘

相符遵章彙案具奏在案奉准前因卽經飭委提法使吳鈞會同巡防營務處調核原案卷宗提同人證秉公確查訊辦去後茲據該司等會同調查奉天府地方檢察廳原驗卷宗並飭據前鄉鎮巡警總局總辦前直隸補用知府陳友璋將營兵先後兩次送局暨會同覆驗情形查覆一面移提第一混成協兵丁質訊旋准陸軍兵備處將兵丁王文山李貴榮卽李桂榮及業已責革趙銀亭鮑永興陳雲勝卽陳允勝查傳移解並傳同方長楊廷蘭等到案督同刑事科僉事魏倬行營發審處委員直隸補用直隸州知州鄭焯提犯質訊各供與原審大致相同覆經該司等逐款查明確核擬議呈請具奏前來臣等就原參各節並該司等現在查訊情形證以案牘復加查核如原參謂奉天城西馬門子屯居民程恆啟由上年經本村民公舉充當社長本年二月間突來不知姓名

五人兇橫異常自稱係常備軍既無軍衣又無憑照各持手槍強捉林姓大車村民疑係鬍匪冒充遂卽稟請巡警局遣派巡警將此五人拘獲轉送總局由該局總辦陳友璋訊明實係常備軍第二十四標協統王振畿部下兵丁隨卽解交該營以便懲治約束不料該協統王振畿袒庇兵丁概不究問一節查第一混成協第二十四標第二營步隊在新民府界西佛牛彙駐防程恆啟之弟程慶啟充當後馬門子方長與前馬門子林家台子聯會辦事光緒三十四年二月間第一混成協第二十四標第二營步隊護兵王簣川奉長官命令與兵丁鮑永興趙銀亭王文山陳雲勝卽陳允勝李貴榮卽李桂榮改變裝束帶同事主賈殿鈞訪拏鬍匪李文堂因覓得眼線胡永富探明李文堂蹤跡分路躡緝十三日王文山陳雲勝李貴榮與賈殿鈞胡永富五行至林家台子屯北

適林德文與姪由鄰村趕大車回歸王文山等向林德文聲稱係西佛牛彖防兵一齊上車令林德文拉送石佛寺有事林德文之姪因見未穿軍衣帶有小槍行跡可疑趕赴會上告知當經前馬門子方長楊廷蘭林家台子方長林德春與程慶啟領同會眾人等趕往攔住索看護照王文山等未經攜帶楊廷蘭等恐係假冒將其橛把槍三桿子母三十餘粒銀洋兩圓六角馬表六箇搜出卽用林德文大車拉送沙嶺堡巡警分局轉送鄉鎮巡警總局問明實係二十四標第二營步隊將槍枝子母銀洋馬表如數交還王文山等聲稱短少子母十七粒經鄉鎮巡警總局訊明楊廷蘭等實未扣留子母將王文山等送交陸軍兵備處交由該長官酌量懲辦該協統因該兵等探訪鬍匪已有蹤跡仍飭趕緊捕拏未及按法懲治遂有二十一日護兵王簣川被程恆啟槍斃之事此

查明起衅之實在情形也又如原參謂該兵丁因記恨該村民前日拘獲送局之嫌起意糾約本營兵丁攜帶洋槍器械往尋該村民鬪毆洩忿行至村口撞遇程恆啟之弟程慶啟當卽辱罵兇毆意圖致死適堡防巡警局聞信遣派巡警到場彈壓該兵丁膽敢開槍拒敵以致同夥兵丁王簣川誤中飛彈斃命一節查是月二十一日王簣川與鮑永興趙銀亭王文山陳雲勝將飭拿之鬚匪李文堂並田長祥二名捕獲並李文堂眷屬婦人一口小孩四名用大車兩輛拉送回防路經馬門子屯外趙銀亭王文山陳雲勝押同車輛在屯西看守王簣川因挾前次王文山等被楊廷蘭等送局之嫌遂以追要子母爲名起意尋衅與鮑永興分攜櫛把槍王簣川並攜木棒至前馬門子往找楊廷蘭未遇鮑永興復赴後馬門子尋獲程慶啟追要短少子母程慶啟分辯彼此口角鮑永

興將程慶啟揪住拉至前馬門子與王簀川會遇王簀川不容分說用木棍將程慶啟毆打致傷頭顱等處程慶啟順拾木棍還毆致傷王簀川額顱左太陽左肱肘左臀王簀川復用木棍將程慶啟胸膛等處毆傷昏暈倒地鮑永興因恐會眾趕來卽時走避堡防周福財聞信前往彈壓王簀川瞥見放槍威嚇周福財折回邀人適程恆啟由外回家聞知程慶啟被兵丁拉去毆打性命難保攜取防夜洋槍趕往途遇周福財邀令一同往救程恆啟見程慶啟受傷倒地不能動彈王簀川正舉槍向程慶啟開放程恆啟一時情急用洋槍嚇放致槍子穿入王簀川口內透過腦後並砂子轟傷頭面倒地先時鮑永興走出屯外向趙銀亭等告知情由一同進屯查看見程恆啟手持洋槍王簀川被傷倒地楊廷蘭亦與會眾等趕至將程慶啟抬回調治王簀川移時因傷殞命當時實

止堡防周福財一人聞信前往彈壓巡警局相距較遠並無派遣
巡警到場彈壓之事且王簣川因周福財前往彈壓開放手槍當
時鮑永興業已走避迨後舉槍向程慶啟開放正在扳機尙未發
出何來飛彈誤中此訊明王簣川被程恆啟槍斃之實在情形也
又如原參謂程恆啟遂卽隨同鄉耆具稟巡警分局轉稟總局飭
由審判廳推事長蕭文華當場檢驗屍身彈傷與兵丁所帶子彈
相符並由陳友璋審訊隨同滋事兵丁均各供認實因挾嫌洩忿
與已死之王簣川亦因誤中飛彈斃命並無兇手可指眾供確鑿
毫無疑義不料協統王振畿袒庇兵丁誤陷良民不顧原供原驗
朦請總督自帶醫件開棺復驗不准村人旁視囑令滋事兵丁趙
銀亭等誣指程恆啟及堡防周福財姜玉平等綁送鄉鎮總局由
王振畿自行借局審訊濫用非刑威逼程恆啟認爲正兇鍛鍊周

內定以絞監候罪名以致人心不平人言嘖嘖一節查方長楊廷
蘭等因兵丁王簀川被傷身死報由沙嶺堡巡警分局將該兵丁
趙銀亭等並被獲之李文堂等送交鄉鎮巡警總局經該總局以
趙銀亭等均係軍人未便審訊咨送陸軍兵備處歸案訊辦一面
由巡警分局移知第五初級檢察廳轉報奉天府地方檢察官蕭
晉榮詣驗王簀川委係被洋槍轟傷身死當時遍尋槍子無獲無
憑核對並驗明程慶啟傷痕飭醫調治取結呈報並由該協統呈
經臣批飭行營發審處會同兵備處鄉鎮巡警總局派員帶同醫
官並原驗件作覆驗集訊程恆啟供認不諱將程恆啟依因爭鬪
擅用洋槍施放殺人者以故殺論故殺者斬律擬斬監候遵照新
章改爲絞監候發交提法司吳鈞提訊無異照章造冊解經臣審
勘相符彙案具奏查呈報命案向由檢察廳驗明屍傷起訴原參

謂由審判廳推事長蕭文華檢驗想係傳聞之誤屍身彈傷原驗時因槍子無獲無憑核對檢獲王簣川所遺槓把槍驗有煙痕嗅有藥味致有兵丁開槍拒敵王簣川誤中飛彈斃命之謠行營發審處會訊時兵丁鮑永興等堅執並未放槍該犯程恆啟亦未據實供明今既審出實情既有周福財當場目擊可證又有檢察廳原驗卷宗可查應卽據實更正該巡警總辦陳友璋因趙銀亭等均係軍人並未審訊自無供認王簣川因誤中飛彈斃命之事該協統因兵丁斃命應由本營醫官檢驗呈明批飭行營發審處會同兵備處鄉鎮巡警總局派員帶同醫官並原驗件作覆驗係爲慎重人命起見確非朦混呈請至該兵丁趙銀亭等當場指程恆啟爲正兇訊係鮑永興向趙銀亭等告知情由一同往看見程恆啟手持洋槍王簣川被傷倒地故知程恆啟爲正兇並未有人囑

正言卷二十二
令誣指亦無將周福財姜玉平等綁送鄉鎮總局該協統亦未借局審訊更無濫用非刑逼認之事原辦將程恆啟擬絞監候罪名係屬遵照例章由斬改絞情罪相當何至人心不平人言嘖嘖此查明原辦此案之實在情形也覆查此案護兵王簣川因同營兵丁硬坐民人車輛被會眾送局竟敢挾嫌以追要子母爲名將程慶啟毆傷倒地堡防周福財前往彈壓復敢開放手槍追程恆啟往救又復舉槍向程慶啟開放原參謂該兵丁將程慶啟辱罵兇毆意圖致死不爲無因似此依勢欺凌實屬目無法紀程恆啟以救弟情急開槍致斃人命事犯在光緒三十四年十一月初九日恩詔以前雖係火器殺人不准援免但係兵丁挾嫌尋衅擾害民人情有可矜定案時因係彼此互毆未便照擅殺科斷然實在部議條款酌入緩決之列應請將該犯程恆啟於秋審時酌入緩決

兵丁王文山陳雲勝李貴榮外出辦案硬坐民人車輛致肇釁端已屬不合因會眾將其獲送王文山陳雲勝竟敢隨同王箕川復至該屯尋衅雖當時王文山陳雲勝並未進屯究未能諉爲不知鮑永興隨王箕川一同進屯將程慶啟拉出與王箕川毆打均屬干犯法規業經兵備處將王文山陳雲勝李貴榮擬以監禁與鮑永興一併責革現又恭逢

恩詔請免重科王箕川挾嫌尋衅兇毆傷人本干重典業已身死應毋庸議協統王振畿於兵丁出外辦案硬坐民人車輛經兵備處送交該營酌量懲辦之際該協統因其探有鬍匪蹤跡仍飭趕緊捕拏以致未及按法懲治復釀事端殊非該協統意料所及惟尙無縱容兵丁擾累村民情事應請免其置議除將程恆啟一犯核擬情形咨行法部大理院查核更正外所有查明協統王振畿

被參各節並就原案審明核擬緣由理合恭摺覆陳伏乞
皇上聖鑒訓示

擬裁奉天巡警道添設洮昌臨長海兩道員缺摺

奏爲酌擬裁併添設各道員缺以歸統一而重邊要恭摺仰祈
聖鑒事竊維邊省設官分職其要端有二一曰治內一曰對外奉
省之內政治安爲急奉省之外防蒙邊並重臣自前年到任之初
卽首以吏治因循民生彫敝爲念故奏定東三省官制於三省各
設民政司以爲行政機關而巡警職掌卽寓乎其中嗣因外省官
制皆普設巡警道缺奉天全省巡警業已遍設款目糾紛事務繁
雜調查整頓須有專員故亦請添設巡警道缺今整理已及兩年
均有端緒而與民政司權限複雜推行旣久漸覺未便且多一官
廳亦嫌糜費臣於遵

旨覆奏酌核奉天官制摺內曾以巡警道一缺應從原奏議裁蓋
民政司有筭理戶口之權無巡警則輿籍無從稽核有召集議會
之責無巡警則選舉無從調查奉省四鄉巡警率由地方組合而
監督地方自治職在民政司其中參互關係固如是之糾紛也夫
巡警本內政之一端不能離民政而獨立故民政部卽以巡警部
改設行政機關始爲完備今奉省民政旣設專官與內地省分不
同自不應再設巡警道缺以期統一擬請將奉天巡警道員缺卽
行裁撤所有職務統行歸併民政司兼管仍直受民政部考核與
各省巡警道無異至吉林黑龍江兩省警務本歸民政司直轄應
卽一律辦理此應行裁併者也至擬增設之缺查奉省北連蒙古
鄰於俄南界朝鮮迫於日非經營蒙古無以備俄而洮昌之間實
爲咽喉非鞏固東南無以拒日而臨長之衝實據要害均應特設

大員專任一面以爲對外之資臣體察情形通盤籌畫竊以洮南一府孤懸北荒南隔達爾汗王旗入昌圖府之遼源州始連奉境由遼源至洮必先經達爾汗王旗二百餘里始達洮界達爾汗王旗介於洮昌之間橫絕洮南通省之路實爲經營蒙古入手第一障礙南道梗塞則洮南以北之蒙荒終無開通之望近因清償該旗俄債經臣奏明以荒價作抵是該旗山荒正宜速籌開放而昌圖一府東界吉林又爲鬍匪麇集之地遼源實爲洮昌咽喉控兩府之極端對西北蒙地有高屋建瓴之勢擬請卽於昌圖府之遼源州添設道員一缺轄洮南昌圖兩府全屬名曰洮昌等處分巡兵備道該道界連蒙旗有兼轄屬部之責應比照江省新設道員成案兼管蒙旗事務以資控制又查奉省南邊防務之重要什百倍於曩昔上年經臣劃吉省南境奏設長白府歸奉管轄於是奉

省東南邊防更形喫重東西沿鴨綠江岸處處與韓毗連日人對岸經營著著進步彼則屯守相望我則勢孤援絕由長白至安東東邊道治且千有餘里日人趨利甚捷稍事遲廻赴機已遲而南沿江岸除塔甸已設長白府治外獨臨江最據要害擬請劃東邊道東境於

興京廳之臨江縣添設道員一缺轄長白一府海龍府全屬臨江輯安通化三縣名曰臨長海等處分巡兵備道蓋地處邊瘠必厚集其勢始可以謀進步兼轄海龍爲清盜計亦兼爲協邊計其與興京廳如何分界應俟設治時詳審履勘繪具圖說再行奏明辦理以上所請添設二道員缺一以籌蒙一以防邊實爲奉省南北屏障不可無專任大員以資坐鎮合無仰懇
天恩俯念東陲緊要事機危迫

允准添設期於大局有裨至於設治以後應如何明定廉費酌設
佐吏添撥兵隊建置署所統俟妥籌核定屆時續行具奏此次添
設道員均係沿邊要缺與內地情形不同並擬援照吉黑兩省新
設道員成案由督撫臣慎選堪勝人員奏請試署以裨地方總之
東事萬難欲圖挽救外之以殖民實邊爲重內之以吏治民生爲
急整理內政要在統一職以專而成權以分而敗故治內不在多
官經營邊備最忌空虛唐置八道而漠南靖明廢九邊而遼東失
故防外利用重鎮此臣自到任以來所日夜審慎圖維以迄今日
終不敢以交卸在邇規畫稍疏所應切實陳明於
聖主之前者也所有擬裁奉天巡警道添設洮昌道臨長海道兩
員缺緣由謹恭摺具陳伏乞

皇上聖鑒訓示飭下會議政務處核議施行

裁撤錦州副都統屬筆帖式援例改歸外用摺

奏爲錦州裁缺副都統所屬筆帖式等員缺擬請裁撤援例改歸外用以廣出路恭摺仰祈

聖鑒事竊臣前奏錦州副都統員缺職務太簡積弊相仍擬請裁撤以裨旗務奉

旨允准遵行在案查錦州副都統向轄錦義二州兼管大凌河牧地經徵事務及料理錦州莊糧事務衙門並設有印務筆帖式今副都統既經裁缺該筆帖式一無職務自應一併議裁其莊糧衙門設有主事筆帖式催長等缺自官莊丈放後無事可辦亦應併請裁撤惟該員等均係實缺食俸人員擬請援照本省前定五部裁缺章程辦理以廣出路按裁缺副都統衙門原設筆帖式二缺今祇一缺查係滿員擬照滿蒙筆帖式無論七八九品俱准保送

知縣之例請以知縣分省補用莊糧衙門原設委主事一缺今已呈請開缺筆帖式三缺催長三缺均係內務府人員食九品俸擬照漢軍九品筆帖式以州同州判縣丞補用之例請以州同州判縣丞分省補用至莊糧衙門又有食餉拜唐阿六名亦係內務府人擬卽仿照牧羣衙門裁缺牧丁改補甲兵辦法歸入錦州八旗作爲甲兵免致失所其餘應行整頓事宜均已由臣派員次第整理除將錦州副都統印信料理錦州莊糧事務關防二顆分別咨部繳銷外所有謹擬錦州裁缺副都統所屬筆帖式等員缺援例改歸外用緣由謹恭摺具陳伏乞

皇上聖鑒飭部核議施行

裁撤鳳凰墾務局移交東邊道接辦片

再鳳凰廳及所屬岫巖安東寬甸等處葦塘山荒於光緒三十三年

年三月奏准丈放嗣以委員辦理未善又值青黃不接隨飭停緩是年十一月復因邊民愚頑私擅鬻售事關清界保權經臣奏准派員設局接辦並以新設之莊河廳管界係由鳳岫兩處劃撥飭令一律辦理查鳳屬地方阻山濱海風氣本極刁橫民生亦實困苦故此次接辦之初卽飭將原定章程再四核減較東流各處收價數目爲輕該局總辦候選道陶仁榮開局以後督飭局員循章辦理已丈放十之八九亦均謹慎從公絕無溢收勒領等弊本擬俟放竣後將來換照繳價均可交地方官妥爲經理卽將局裁撤以節糜費不意去年十二月間忽有素不安分之伊景桂煽惑鄉民抗交荒價更復多方迫脅聚眾數百赴局滋事不服解勸以致有黑夜交鬪傷斃二命之事查聚眾抗官本干例禁然愚民無知情殊可憫已飭該道量予撫恤並札提法司令行核辦仍飭拏爲

首之伊景桂照例懲辦以儆刁風該局丈放之事將次完竣繳價期限不能不量予展緩以紓民力若仍照舊設局未免虛糜自應先將該局裁撤其繳單換照收價及善後各事均委東邊道就近辦理並將一切章程再行酌量議訂國課所關固未敢輕言裁減而民艱宜恤亦不可不予變通除分別札飭遵照並將該局開辦以後各項經費報部外所有裁撤鳳凰廳墾務局移交東邊道接辦緣由謹附片具陳伏乞

聖鑒

東邊道各屬分設文報局裁撤馬步撥片

再奉省未設文報局以前東邊所屬之安東寬甸通化懷仁各縣及海龍府均經奏設馬撥所需工食草料暨勻給買補倒馬等款向於地糧項下開支迨輯安臨江兩縣設治復援照添設步撥各

十處所需工食由稅捐項下開支然終以道遠撥稀遞送文牘仍多遲悞自前將軍趙爾巽於奉天省城設立文報總局遴派候選道董遇春總司其事臣到任後又復裁撤驛站推廣文報以利交通均經先後奏陳在案現在邊內各屬以及吉江兩省均已遍設支報分局接遞公文剋期可至成效昭然則東邊所屬各縣自應於宣統元年正月起概歸文報局設撥接辦以期一律而速郵傳其舊設馬步各撥均於光緒三十四年十二月底一律裁撤原支馬步撥各項經費均撥歸文報局常年經費項下列銷以昭核實除分別飭遵並咨部立案外理合附片具奏伏乞

聖鑒

江省中學堂建築費立案片

再江省上年就省城創辦中學堂係暫借南路農業小學堂開辦

並陳明仍於該堂東北隙地按照中學校圖式另行建築以規久
遠經臣世昌會同前署撫臣程德全奏明在案旋由提學使張建
勳踴得該堂東北蔬圃地方係現署興東道慶山舊業其地局勢
宏敞茂樹成圍於修建學校衛生光線一切最爲相宜嗣據該署
道慶山呈稱願以其地報効作爲學堂基址復經該司使調查日
本中學校圖式鳩工興修現屆春融亟應督飭趕緊修理惟該學
堂學生將來按班添足額數至五百人之多所有禮堂講堂教習
室自習室寢室體操場均須按人數計算規制務求其備用款自
必稍繁加以本省工料奇昂數倍內地疊據該司使會同民政司
繪圖切實估工共需江市平銀九萬八千餘兩實屬無可再減等
情詳請奏咨前來臣等覆查該司使所陳係爲擴充學務起見其
所估工料業經飭令再三刪減委屬核實當經批准飭由度支司

查照撥款一俟工竣再行詳細造冊報銷除將該學堂校舍草圖並估單分咨查照外理合附片具陳伏乞

聖鑒

密陳東省危迫情形並已辦籌辦各事宜摺

奏爲瀝陳東省危迫情形並已辦籌辦各事宜恭摺密陳仰祈

聖鑒事竊自日俄以東省爲拓殖之地竭力經營歲糜鉅款我擁領土之虛名彼攘主權之實利自路線劃爲南北遂成分據之形迨協約告成圖謀愈亟干涉內政擴充實權官吏莫敢誰何商民習爲慣例蓋在強鄰掌握之中者非一日矣

先朝注重邊陲毅然改革以臣庸昧銜

命東征時則客軍甫撤而鐵路巡警及護路兵相屬於道交通之權歸其驅使紙幣之用日以灌輸以附屬地爲殖民之區以資本

家作外府之寄相師相競惟力是圖而我則邊備空虛蒙情渙散
人才困乏財用消亡是不啻於已失之後欲從而挽回之全局皆
非從何入手臣焦心勞思勉擔鉅任以爲欲破兩強相持之局必
廣招歐美商民以均其勢欲召集各國商務而並以興東省實業
必先儲蓄大資本以爲之招欲抵制東清鐵路之利權而兼爲我
籌邊馭蒙之最要必別築幹路以爲全局之樞紐是以有開放商
埠之議有借外債設銀行之奏有別築新齊鐵路之計議錦洮鐵
路之規畫徒以事關大局非旦夕所能定議而此議一出歐美人
士咸樂聞之彼日俄從旁窺伺亦似知

朝廷銳意經營將大有動作於東土也因亦守和平主義以徐待
將來臣乃得及時稍稍布置韓俄接壤水陸交衝數千餘里俄於
黑龍江北岸設兵置屯星羅棋布歲移民數十萬日以保韓爲名

咸鏡屯營會甯設軌我則沿邊荒漠無人民無道路爰於呼倫貝爾愛琿興東所屬擬添設民官安設卡倫聯絡國防護衛行旅蜂窠山與俄相隔僅興凱一湖盜匪所叢私墾所集旣奏設蜜山府以資撫集而沃野千里宜招屯墾復設立墾局招集壯丁編繩地畝以爲實邊之基欲移民必先籌款乃輪車免價旣格於部議犯罪徒屬又准而未行因先於嫩江沿岸撥退伍兵丁從事開墾預算所需更番推廣以期地利日闢鴨綠江與韓爲界奉之臨江地處極邊韓僑雜錯爰奏設長白府駐塔甸以相策應塔甸與憲山隔江而治阻義兵竄擾之路開商民貿易之場日人乃知我實備也延吉爲邊務發生最大之端當日人潛師渡江不圖我已派員在彼狡謀爲之頓阻禁其續進之旅斷其已築之橋而我於地方行政倉猝立辦廣搜圖證以折其狡辯雖解決未終而能對待於

年餘之久且不能不認我國領土幸得先事圖謀故不蹈膠州之覆轍也琿春爲俄人必爭之地遲疑未發視延吉之結局何如因飭署琿春副都統早爲布置一去從前積弊凡開道路籌森林練軍隊修內政慎外交次第規畫或使無隙可乘惜限於財力莫由大加展布又於沿邊之區扼要之地添設電綫計六千餘里收回外人電綫三千餘里以通消息以保郵權且吉林一省必爲日俄競爭劇烈之場而我無直達之綫路以軍事言已爲死地是以臣到任後卽擬要求日人將京奉鐵路越過南滿設車站於奉天省城附近再擬籌接修經興京海龍直達吉林之幹路並展修至甯古塔琿春延吉沿邊各處我有居中控馭之實權而兩強之爭或可暫爲解釋此籌邊之崖略也哲里木盟旗爲東省之藩籬握全局之形勢乃爲外人誘惑假以貲財資以利器於游歷測繪則倍

極驩迎於開放交通則百端抗阻因設蒙務局以督理之還札薩克圖逋負之財而干涉內政結達爾罕王糾纏之案而開放開荒阻日人之私繪而我時施監察之策禁俄債之雄心而我代籌治生之款然兩強逼處已隱以洮兒河南北爲勢力之所區分俄借同教之說欲以聯絡盟長者壓制全旗日倡平等之說欲以嗾使愚蒙者自聯社會是非有大枝幹路開拓全盟烏足以破吞併之野心保屏藩於世守乃部臣猶本羈縻弗絕之舊旨襲生計有礙之浮言敷衍調停其何能淑臣因議設洮昌道專爲治蒙之計畫並飭蒙務局分往調查將全旗形勢風俗及外人之所注意詳列圖說以備實地之設施並招致蒙王子弟入我學校而法政學堂亦添入蒙語一門言語一通受範自易此籌蒙之情形也內政之繁不可殫述舉其概要厥有二端一曰去舊習官制定而積壓

請託之風絕薪津厚而苞苴培斂之習除禁期糧止查圈減車捐以蘇民困整稅務理鹽政廣紙幣以握財權剿鬍匪則東馳蒙部北入俄疆歷年之大懋殆盡添民官則外實邊疆內集商旅將來之地利可興爲八旗籌生計則以學堂植其基以農官課其績務使兵工商藝儕於齊民而不欲旗員以攤派爲固然旗丁以錢糧爲生業餘如裁書吏革陋規除會帳去捕盜營編巡防隊舊染咸除與民更始此其大較也一曰闢新機公署之設營房之建工程之所經營馬路之所築治凡以昭整肅規久遠也欲實業之發達必先爲實地之講求爰設森林學堂植物研究所農業試驗各場以資考究整飭松黑兩江之郵船調查長白琿春之林域鑛產之繁尤難殫數於本溪湖則允日合辦於漠河觀音山呼嗎爾河已開之鑛徒以用人未協款絀事廢已派鑛師測驗擬另行籌辦以

關利源於海龍之杉松岡遼陽之尾明山皆已派人試辦其餘若商民已開之鑛及續報開採者以奉省計之已有七十五區吉省佳鑛甚多金鑛之外近復試辦銅鑛江省甘河煤苗甚旺惜運路不易凡有商人呈請開鑛者皆由官往勘鑛場驗其資本而以時保護之至考求種植牧養之事開辦工藝陳列之場皆飭勸業道以次興舉節經奏陳在案謀新政之普及必使人民有同一之知識爰分派調查員赴各屬研究習慣以爲社會改良之預備設諮議局籌辦處辦理初選複選事宜事屬創舉紳商多有未諳則爲之支配區域演習原理自立審判廳不但無濫押積案之弊且開庭可以觀審判詞付之公布無需索留難民間稱便亟擬於商埠擇要推廣以助地方官之不逮其他若巡警若學堂若新舊軍隊靡不力求整飭以圖完備東省沃野平原素稱農國乃民間狃於

慣例不知發明種植又以禁止出口農失其利則不願勤穫北地多寒向不產麥以至美國麪粉入口甚多自棄其利而轉仰於人甚非計也臣因爲之多方勸導講求種植近始知種小麥收穫豐稔各國多請運售臣因弛小麥各糧粟出口之禁民間獲利甚豐從前黃豆及豆餅僅銷日本去年運售英國者甚多其他栗果瓜蔬樹株皆飭改良種植凡內地外洋所有者逐漸皆可布種是農業已立基礎成效昭然不但富民且可富國他日大利之興必基於此至於商務東省既無完全自關之商場又無經冬不凍之口岸營口一隅已爲大連所制臣因勘得錦屬之葫蘆島菊花島等處屢飭工程師履勘又囑招商局派輪行駛洵屬風迴水聚可作商場軍港之用若實地經營不但可奪外人已得之利權並可爲我國完全自關之口岸其次則修濬遼河以通航業遼河節節淤

滯運船阻遲而商務遂皆爲南滿鐵路所攫取臣因飭工程師將全河詳細履勘其修濬次第辦法則繪爲圖說同時並舉需款太鉅現擬擇要興修合官商之力以圖之凡所設施僅及十一或規模已具而未竟全功或基礎方萌而尙無效果果然而辦一事必須有一事之款三省經常之費出入恆不足相抵故尋常行政經費斷難移作別需而以上所籌辦者半爲特別之用溯自臣到東以來由度支部撥濟者則爲鎊餘三百萬部指各省協餉歷年積欠未能解足調東一鎮兩協之軍餉則爲陸軍部及北洋原撥之款由臣請撥者則爲延吉邊務經費六十萬兩在部臣知邊疆重要勉任其難厯籌鉅款已爲他省所無洵屬保全大局而不知東省應辦之事如此其多且迫也東省所用之款較日俄之所經營不及十分之一二也卽就臣已辦之事而統計所需已大溢於原撥

之數臣惟有移緩就急或挹注於鹽務及推廣紙幣以爲酌盈劑
虛之計畫今邊防經費未允續撥江省請款又格於部議而陸軍
一協之餉又須東省承擔過此以往或以無款之故停事不辦則
外人奮袂而起事機危迫卽在目前臣雖得卸仔肩尤恐新任督
臣以無米之炊當憂危之局將何以善其後也以上所陳第就臣
兩年以來籌辦之概畧言之然欲廣羅英雋厚集鉅資接續經營
於至危至迫之東三省則不在枝枝節節之布置而必由臣前說
以爲保存之能力蓋不破日俄競爭之局則其他行政無論如何
整飭如何擴充終必攬之以去東三省本爲從古爭戰之地今兩
強相逼戰無已時若欲破之必合全球之力易以爲大交涉商務
之場而我爲地主執牛耳以對待萬國共保和平以消千餘年之
戰禍而我之疆土可永永世守矣臣往者竊持此議沈思默會幹

運而措行之而日俄亦逐漸改爲和平主義凡所交涉未嘗顯以非禮相干運鹽則日車減價搜匪則俄軌通行於旅順之答拜不惜鉅費以表歡忱於吉江之巡行沿路恭迎以敦睦誼卽日於延吉界務俄於哈爾濱自治會其用意雖狡亦未明肆要求虛辭呵喝今則疑我或變宗旨前議未必實行因一變其對待之策知鐵路之未必築也則強指新法爲並行綫矣知我開放之不果行也則強攬哈埠以行政權矣知我實力不充旣延吉一隅亦無經費於是急思解決而要我以天寶山銀鑛及會甯鐵路直達吉林矣又其甚者近聞俄人廣運軍火礮彈調集軍隊悉聚於東海濱省以趨海參崴之後此必有陰謀密計不待黑龍江沿岸鐵路之告成而爲非常之舉動者日人知其然也因於韓境悉布重兵以待之現急改修安奉鐵路並擬造鴨綠江橋由韓之釜山可直達於

奉天與南滿大連兩路並峙數日之間日韓境內之兵即可畢達於東省彼之軍事之籌備至急且烈此皆由我無自主之能力故事變之來未知所極也臣待罪邊疆奉職無狀重負

先朝特達之知而於東省之大計畫卒以才力薄弱議而未行兩年來已辦之事僅止草創百端繁曠粗具條目而無補於根本之危亡中夜以思難安寢饋復荷

聖恩高厚量

簡京曹

矜恤之隆詎捐糜所能報稱獨念東省危迫情形見聞較確不敢諱飾於

君父之前非將開放借債築路諸大端實力經營幾無保存之希望及今舉辦已覺後時是全在

朝廷一意主持樞部諸臣合謀相濟俟新任督臣到任後全力貫注銳意以圖使東省危而復安以竟臣未達之志此又臣悽悽愚誠日以東事爲負疚雖當去位而不能已於言者也所有瀝陳東省危迫情形並已辦籌辦各事宜緣由謹恭摺密陳伏乞皇上聖鑒訓示

退耕堂政書卷二十三

退耕堂政書卷二十四目錄

奏議二十四

署三姓副都統德勝貪婪溺職據實糾參摺

瀝陳吉林財政困難懇飭部籌議摺

吉林遵章籌備憲政依限奏報摺

吉林設立稅務處統一稅捐摺

興東地方分設局卡並派工程員司摺

吉省添改民官酌裁旗缺摺

遵 旨陳明奉省辦理禁煙情形摺

覆陳籌辦達爾汗旗開通道路情形並請 旨允准勘放摺

附說略

退耕堂政書卷二十四

天津徐世昌

奏議二十四

署三姓副都統德勝貪婪溺職據實糾參摺

奏爲專闢大員貪婪溺職據實糾參恭摺仰祈

聖鑒事竊查三姓地處極邊距省窵遠臣世昌前因訪聞署理該處副都統協領德勝有包攬荒段私收稅課情事當卽會同調任撫臣朱家寶札派蜂蜜山招墾委員范熾泰就近前往密查旋據覆稱距三姓城東北二百里加木斯地方舊有官荒一段係副都統衙門官兵辦公隨缺地畝已於早年一律放竣該署副都統蒞任後藉口隨缺之地不敷所用遂將該處迤南官馬廠一帶生荒派員丈放乃於三道岡句心吉迤北先自捏造堂名包攬一萬晌

並於三姓左近稗子溝土龍山火龍溝新官地山咀子屯暨富克錦所屬之古必札拉等處置有荒地甚多統計不下一千餘方皆以賤價所得現在託人四處覓售每晌索價乃至數倍此該署副都統託名包攬大段官荒希圖漁利之實情也至私收稅課一節查松花江沿岸產木甚富商民入山砍木運至江口或三姓城者必須先赴副都統稅局報明候驗凡木無論大小粗細分配停勻不及十數者按照時價折錢值十抽一逾十數者不准折價則按木數十取其一起至枯枝蔓草柳條之類亦須照抽且不發給稅票木商爲之裹足居民爲之吞聲此該署副都統私收木稅重斂橫徵之實情也又查三姓每年例進貂皮二千六百餘張向歸副都統衙門承辦曾經奏明准照時價採買乃該署副都統竟藉挑選官皮爲名每年挑至四五千張之多每張僅給官價銀八兩左

右實較尋常市價減銀二十兩以至三十餘兩不等且復出有告示不准商人私相買賣祇准東來昌等皮莊二十餘家收買並須隨時前赴稅局報明註冊藉端抑價跡近壟斷更難保不無轉售牟利情事此該署副都統挑選官皮從中舞弊之實情也以上各節均該委員親詣該處稅局皮莊調查所得復經訪詢附近商民亦無異詞並將該署副都統所領荒地開具清摺連同所鈔告示等件稟復前來臣世昌與臣昭常復加攷察均屬實在情形事關大員貪婪溺職既經訪查得實曷敢瞻徇壅於上聞相應專摺列款糾參請

旨斥革並由臣等查明私徵濫收各款分別入官以昭法戒而儆貪邪除三姓副都統一缺已於裁旗添缺摺內奏請裁撤外此次所參各節如蒙

正書卷二十四
俞允所有三姓副都統員缺應請暫不派員接署該處旗務事宜
即由各旗協領管理直接行省公署遇有詞訟案件並令暫歸依
蘭府知府審理俟將來增設道缺後再行酌量歸併所有特參署
三姓副都統協領德勝貪婪溺職擬請斥革並請暫不派員接署
緣由理合恭摺具陳伏乞
皇上聖鑒訓示

瀝陳吉林財政困難懇飭部籌議摺

奏爲瀝陳吉林財政困難情形懇

恩飭部籌議以重根本而維大局恭摺仰祈

聖鑒事竊吉林地處東邊初改行省政繁費絀艱窘萬狀誠有非
就地籌款所能爲力者臣等未到東之先聞諸道路僉謂吉林富
饒甲於全國凡有經營無不克舉抵任後細加體察始知人言原

有可憑而實情殊不盡合蓋據地質物產而論吉省誠爲東省之最惟寶藏未洩地利未興苟不闢最大之利源其富庶終無可期也前此閉關而治一意休養出入相率自應綽有餘裕庚子亂後元氣大傷日俄戰罷局勢益變兩強競爭實逼處此稍再因循萬難自立其不能以昔日治吉之法行之今日諒在

聖明洞鑒之中是以昔日入款少而用足今日入款多而用不足昔日以吉財治吉而用足今日若仍以吉財治吉不僅其用不足而貽誤大局非淺鮮矣然使吉林今日財政無異常危迫之象猶得有所憑藉逐漸補苴無如病源已深其勢岌岌不可終日凡政務之已辦者皆將有累卵之危未辦者亦徒作畫餅之歎而一觀外勢之炎灼如火燎原又未嘗不驚心動魄寢饋難安旣不能守株以待又難於無米爲炊此臣等所以焦心危慮不能不拔瀝上

陳者也查吉省從前入款每年約共銀二百一二十萬兩其收入
款目曰大租卽地糧曰餉捐卽七四九釐捐曰田房稅曰菸酒木
稅曰山海稅曰斗稅曰葠藥稅曰木植票費曰官帖局三成餘利
曰戶部協餉以上各款以捐稅爲大宗而惟餉捐爲儘徵儘解其
他均係各衙門派員包額徵收經徵者除解足額款外悉歸中飽
前任將軍達桂臨卸任時始於請停協餉案內將加徵之菸酒木
稅款項提出而入款歲增五十餘萬兩自改行省設度支司後經
臣等將山海稅斗稅及各捐稅一律改爲儘徵儘解復飭將舊時
所有規費酌提入公而入款又歲增二十餘萬兩綜計每歲入款
約共銀二百七十八萬兩比舊額計加多七十萬兩有奇是爲今
昔歲入之比較又查從前出款每年約共銀二百餘萬兩收支相
抵儘可敷用自改省後需用浩繁除公署及五司各道本衙門公

費外其隸於各司道者則有省垣及各屬巡警費新設治各府州縣之補助費徵收稅務及其他關於理財費各項學堂及其他關於教育費各級審判檢察廳監獄及其他關於司法費設關開埠及其他關於交涉費墾務鑛務及其他關於實業費其不隸於各司道者則有軍政費邊務費旗務蒙務費交通費禁煙費籌辦諮議自治費此外尙有一切開辦費建築費及常年活支各費總上所列共每歲約支銀五百餘萬兩比舊額約加多三百餘萬兩是爲今昔歲出之比較就光緒三十四年出入核計不敷之數約銀二百二三十萬兩加之奉部停撥飭歸自籌之款則有延吉邊務費六十萬兩三省分攤陸軍混成一協原餉七十餘萬兩除本年預算之應興應革各要務尤須特別巨款者不計外合前併計不敷已共銀三百六七十萬兩矣吉林人民困苦比之內地瘠省猶

遠不逮今每歲入款已超過中省之額民力之竭可知再欲加籌此三百六七十萬兩竭蹶情形自可想見然本年苟不得此則將前功盡棄且邊務防務關係尤巨勢已急於燃眉款乃茫如捉影稍有蹉跌縱治臣等以溺職之罪其如貽誤大局何此財政困難之實情也然使情形雖極困難而基礎仍自穩固猶得隨時彌縫徐圖補救無如近來市面蕭條商民窮迫已極因流溯源不能不咎前此理財之疏以至於此也查從前吉省財政係由將軍衙門戶司綜筦厯任交代向少清查拉雜紛亂不可究詰而各稅捐等局又各立機關如省城之菸酒木稅向歸將軍衙門山海稅則歸副都統衙門斗稅則歸吉林道民稅則歸各地方官缺分之優腴在此財政之紊亂亦在此稅權不一名目孔多實歸公用十無二三以致商農並困百度未舉今雖力清積弊咸與維新但已免各

項淨收正額固自有限而欲議別籌捐款民困實有難堪再四熟思殊乏良策然此猶不過財政困難之一端耳其最爲危險最難整頓者則惟錢法一事曩歲雖曾設銀圓局鼓鑄銀圓而所鑄本屬無多繼設官帖局逐年增發漫無限制底貨日空遂成不換紙幣而官帖又決難通行外省以致現貨幾於絕跡市廛卽間有外來者轉瞬旋復輸出市面周轉全恃官帖官帖日多現貨日少現貨愈貴官帖愈賤近日銀錠一兩約值官帖五千有奇龍圓一圓約值官帖三千有奇小民所重在日用持不換紙幣則何所得食商貨必運自外省照如此銀價則所損實多是以百物翔貴民病莫蘇商業寢衰國計亦困卽就餉捐一項計之前歲收吉錢六七百萬串者已銳減至三四百萬串蕭條景況大概可知再越數年何堪設想且外幣勢力乘虛而入哈爾濱以東已成俄幣範圍延

吉一帶將爲日幣範圍長春等處則成日幣俄幣交爭之範圍去年以來日俄銀幣一圓均約換官帖四串有奇虧折情形實較英鎊尤劇長此侵蝕伊於胡底此誠吉林財政困難之最大原因也前將軍達桂任吉時去日俄戰事未久以理論之當極困憊乃奏稱本省財力已可足用請停協餉今又相隔數年自應更易爲力而臣等反極陳其難似覺可異豈知彼時俄人駐軍吉林雖地方被其蹂躪而由彼國運來軍餉何止千萬大都散布於此其所需米糧牛馬等物亦皆購自我境故當時以一窮民積有俄幣數十圓數百圓者不可勝計其衝要之府縣歲收民稅數十萬者亦間有之當時地面淨財旣如斯充斥加以任意發用官帖尙未覺有阻礙而一切政治皆仍舊貫又無特別繁費就彼一時而論安得不謂之富裕但未爲遠大計耳今則民間無源之淨財其涸已久

公家無本之官帖其害早見而創興要政需用孔急又數倍於曩時比較而觀財力之不得不困當可見矣臣昭常到任後與臣世昌反覆籌商既鑒前車而慎來軫卽撫現勢而規後圖凡關於整理財政之事靡不博訪周諮殫心竭慮特將從前將軍衙門所收菸酒木稅及原有捐稅各局之例規概行提出不敢稍留私利有負

國恩約歲增銀七八萬兩如田產稅契贏餘向歸各地方官飭酌提歸公約歲入十餘萬兩如吉省食鹽向皆運自外省飭興辦吉林官運局約歲入銀五十萬兩更飭度支司將省內外各稅捐局次第裁撤於省城設立稅務處各屬陸續設統捐局將所有稅捐一併徵收統計以上諸項約較前歲增銀八九十萬兩現仍力求擴充以期將來之進步並擬籌辦營業稅改良稅捐以爲商稅統

一之法凡現時進款之可籌較有把握者大都盡於此矣至補救錢法勢非速鑄現貨決難濟官帖之窮故臣等於去冬奏准搭鑄銅圓並飭於官帖局附設發行銀票處行使銀票銀圓票以昭信用而便商民且爲收回官帖之預備但計從前所發官帖已約在四千萬串以上至少亦須百餘萬兩現銀隨時鼓鑄方足以資周轉但此猶僅爲挽救現狀而言如欲永杜流弊非籌設官銀號不可因擬於省城設總銀號更於各屬之大市場及奉江兩省之通商各埠設分銀號蓋必有總銀號以便匯款存款則金融方能活潑而現貨庶不致溢出必有分銀號以便發款交款則銀號方有信用而紙幣庶易於通行如此則商民便利度支充裕相輔而行所關非細但更非預集三四百萬金未敢遽言興辦也以上所籌理財辦法蓋爲現時切要之圖而決無疑義者至久遠之計畫則

尙不在此夫吉省之土地非不饒也山川之蘊蓄非不富也惟其財多不見於地面其利不能拘於目前而欲闢利之大小必先以資本之多少定之亦人所盡知者苟今日各省能以其餘利助吉則異日必能以所得之利還助各省初非黔桂新疆等省之長賴協濟者可比也且日俄近於各地調查無不透澈若再昧焉不察外人勢必出其資本盡其手段事事起而代謀不但地利未能自保而國計且將不堪臣等職分所繫日夕憂危誠有不敢畏難自安者謹就臣等管見所及不能不及時籌辦而又非吉省財力所能籌辦者約畧陳之吉省土產最利實業曩者但知自保不求發達以致利棄於地外人因而生心於是飭勸業道調查鑛務林業試驗農事蠶桑及造紙印刷各工廠以爲商民先導約計歲須銀二三百萬兩吉省辦墾多年仍多荒地伏莽難除強鄰窺伺實邊

之策允爲要圖於是擬於東北各邊實行移民招墾屯田諸要政約計須籌銀四五十萬兩查琿春爲吉省東邊要塞由圖們江入海僅百餘里實爲東境天然商港屢經確查洵屬利便雖近海江岸已歸俄屬而援照公法實可通過早未計及殊爲失策於是擬開通琿春海港約計須銀五六十萬兩又吉省有松花圖們黑龍三江其經流皆在千里以外支河歧流分貫全省水利之美無過於此乃因向少舟楫輸運不通民氣閉塞良足興歎前於松花江試行官輪商民便焉於是擬統辦三江航路約預計銀四十萬兩是四者皆爲生利之事業苟有資本富國裕民悉具於此他如森林鑛產原爲吉林最大之財源尤須賴絕大之資本非專恃官款所能濟事現正擬設法招股募債以期逐漸興辦故不與前四端並論焉再者吉省向少民官治術疏闊邊荒土曠難保治安是不

可不速籌設治查奏定籌備憲政章程舉凡各級審判廳及全省蒙小學堂城鄉巡警均限於宣統七年內一律成立則司法學務警政不可不速議擴充又准陸軍部奏定各省練軍新制吉省應於兩年內自練陸軍一鎮則軍政亦不可不速謀推廣統計須款應在數百萬兩以上凡此雖同屬分利之事業而實爲國計民生之要圖是皆整理財政者之必統籌預計者也萬一經費無著不能不斟酌緩急而已辦之政斷難廢於半途邊防之重更難稍有讓步無已惟有將前所陳分利之事業暫緩然緩此則本省法政無計改良何以立憲政之規模而內治難振興矣又無已惟有將前所陳生利之事業暫緩然緩此則本省財源已無生路何以謀前途之希望而外力莫能抵禦矣又無已惟有將錢法積弊緩爲整理至緩此則不僅治內對外之舉均無力足以運籌而羣情惶

懼根本動搖現象已將不支恐由此全局盡隳雖以舉國之力無能挽矣況卽今年所籌辦者一切皆緩不求進步不謀補救而前所陳出入不敷之二百餘萬兩及部議停撥之數十萬兩乃雖欲緩之而不可得者亦將何以爲計耶臣等蒙昧實未能審擇緩急別所去取再四籌思莫知所可夫以南北洋之富庶其實力遠過吉林但因事關緊要尙不得不借助於各省以新疆之曠遠其地資遠遜吉林但因地當邊要遂不得不求濟於鄰疆而吉林爲國根本逼近強鄰省治初立凡百待舉其事之繁地之要較南北洋新疆若何當亦舉國所共知也臣等受恩深重具有天良苟力所能及何敢稍有推諉上煩廛慮特以其地尙當山林初啟之際其勢已處羣雄爭逐之衝其民旣納內地相當之賦其時又值元氣彫疲之餘無論撫綏不遑

未堪羅掘縱吉民盡効毀家之義勉抒報國之忱而欲恃一省有
限易盡之財源以抗兩強至偉極大之魄力成敗利鈍不待龜蓍
而可決矣臣等硜硜之愚旣恍於中外之大勢抵制乏術復迫於
吉省之財力籌措無方明知帑藏奇絀未敢呼籲司農視此大局
攸關又何敢因循坐誤合無仰懇

天恩垂念吉林關繫綦重財政異常困難應如何統籌全局綜核
財力不僅以尋常省分視吉之處
飭部妥議覆奏如蒙

逾格鴻慈

俯賜垂鑒俾臣等得以秉承

聖謨次第設施庶中外皆曉然於

上意之所注外強阻怯羣情奮興自足以期治理而鞏邊陲吉林

幸甚國家幸甚所有吉林財政困難情形懇

恩飭部籌議以重根本而維大局緣由謹披瀝上陳伏乞

皇上聖鑒訓示

吉林遵章籌備憲政依限奏報摺

奏爲遵章籌備憲政依限奏報第一年期成績並第二年期籌備情形恭摺仰祈

聖鑒事竊臣等承准憲政編查館咨開光緒三十四年十二月二十一日欽奉

諭旨憲政編查館會奏遵設專科考核議院未開以前逐年籌備事宜酌擬章程摺單各一件著依議欽此欽遵粘鈔原奏章程等件咨行前來仰見

朝廷注重憲政銳意期成之至意莫名欽服臣等遵查原奏考核

專科章程第三條內載九年籌備事宜責成內外臣工每屆六箇月將籌辦成績臚列奏聞並咨報憲政編查館查核應自光緒三十四年八月起至十二月底止爲第一屆以後每年六月底暨十二月底各爲一屆限每年二月八月內各具奏咨報一次等語又查原奏單開逐年籌備事宜第一年期督撫應辦者一項曰籌備諮議局第二年期督撫應辦者八項除關於資政院學部同辦事件應俟頒到章程課本再行籌辦外其餘六項曰舉辦諮議局選舉曰籌辦城鄉鎮地方自治設立自治研究所曰調查各省人戶總數曰調查各省歲出入總數曰籌辦各省省城及商埠等處各級審判廳曰府廳州縣巡警限年內粗具規模茲屆宣統元年二月第一屆奏報之期謹將第一年期已經籌備及第二年期應行籌備者敬爲我

正書卷二十四
二
皇上縷晰陳之查吉林諮議局籌辦處於上年九月初一日成立
遴派明達官紳總理其事並分設參議參事及各科員迭飭會議
一切籌辦事件其議決綱要如規定該處章程劃分初複選舉區
域揀派司選員並豫設司選員講習所妥分籌辦細目期限釐訂
調查方法酌定選舉經費等事宜皆經該處先後議決隨時稟核
施行以上係關於原奏單內籌備諮議局之事業經依限舉辦於
上年十二月十五日分別奏咨在案此則第一年期已經籌備者
也至第二年期應行籌備之件約可分爲現已籌備現正籌備先
期籌備三端所謂現已籌備者一諮議局選舉之辦法也吉省風
氣閉塞講演務須詳盡各屬轄地遼闊調查亦較煩雜因督飭各
司選員及各屬所添派之義務員隨時隨地廣爲演說復飭該處
查照館章妥定選舉調查各種表冊格式並編輯章程釋例通飭

遵辦至各府廳州縣之選舉經費酌定限制准予作正開銷其司
選員川資薪水則概由該處發給不得絲毫累及民間且查山東
設有諮議研究會湖北設有議員研究會而浙江紳士亦發起議
案預備會皆以創辦之初不能不爲因時之計吉省士紳之學識
經驗尤難與內地各省同日而語將來複選竣事被選議員之程
度既難合格且皆初次招集未經歷練於本省應議事件未必能
胥有成算亟應一面籌辦選舉一面豫備議案因責成該處參議
等員協同資望素著之紳士擔任組織俾關於本省應行調查研
究事件皆於先時豫備妥善庶他日議員齊集有所依據得以因
事籌議雖議員程度稍低而初次諮議局成立當不至全無成效
一創辦地方自治之籌畫也前准憲政編查館咨開地方自治籌
辦事宜歸諮議局籌辦處兼理當飭該處妥籌辦法卽將年前奏

明倣照天津辦法之吉林府自治局遵照憲政編查館原咨裁併該處經理就該處原定章程添設調查講習兩科凡調查地方固有團體及各本處習慣統歸調查科掌管以爲改辦自治之豫備凡全省自治之教育及白話報宣講所等事統歸講習科董率以爲開通民智之先導至吉林自治研究所已於上年十月設立曾經奏報有案原定學員名額按各屬分別勻配通飭備費選送由該所考驗錄取以八十人爲一班六箇月爲一學期現在頭班將屆期滿復飭各屬照章選送惟各屬通塞不一士紳資格難齊屆時猶恐選不足額因一面由該所在省招考以資變通一面通飭各屬自行籌設自治研究分所以期普及由是逐漸設施則異日地方自治之成立庶不至有名無實以上係關於原奏單內舉辦諮議局選舉及籌辦城鄉鎮地方自治設立自治研究所之各項

情形業於去冬今春次第籌辦已經施行者也所謂現正籌備者一人戶調查之期限也吉林地廣人稀或設治未久或甫經設治其距離省城最遠者且達二千里以外調查人戶總數自較內省爲難本年正月奉到部頒章程當卽通飭各屬遵章切實調查統限八月以前一律竣事不准稍涉敷衍以免臨時或有貽誤一歲出入調查之實行也吉省財政向極紊亂旣無藩司爲之總匯故管理極爲紛歧復以邊省率從便宜故冊籍多不如式自上年創設度支司清理一切備極煩難經臣等督飭該司精心稽核並擬定各項調查表式通飭各屬核實照填卽甫經設治之依蘭臨江大通濱江等處亦飭確查具報現已由該司將歲出入總數查有端緒以後豫算決算卽可有所依據而不至更有財政紊亂之弊矣以上係關於原奏單內調查人戶總數及歲出入總數之各項

情形現正籌備當可尅期無誤者也所謂先期籌備者一審判之機關也吉林自改省後卽將舊設之裁判所改爲高等審判廳嗣以審判既有專責急須早定階級因於省城增設各級審判廳以原有之高等審判廳房屋狹小改爲吉林府地方審判廳並設第一第二初級審判廳復另擇地段建設高等審判廳而於各廳均附設檢察廳又擇於省城內建造新式監獄一所吉林司法之模範於焉粗具至若長春府已開商埠地當衝要賓州廳發達較早地頗繁盛其地方審判廳已於上年秋間今年春間先後成立以外各屬亦皆已定議創設務期依限一律完備俾司法之事得以完全獨立一巡警之現狀也吉林省城經前將軍臣達桂奏設巡警學堂一所上年遵照民政部所頒章程改爲全省高等巡警學堂所有該堂屢屆畢業學員歷經派赴各屬分充巡警官弁教員

等職又於省城設巡警教練所並通飭各屬一體照章增設統計所轄府廳州縣共二十二屬除大通縣因劃界未定蜜山府濛江州長嶺縣甫經設治尙待籌辦外其餘各屬之城鄉鎮自三十二年以來皆已次第舉辦雖人數多寡不一而大致粗有可觀至若省城之巡警總局及西南鄉之鄉巡並賓州阿什河農安延吉琿春等處則俱已日臻進步漸著成效以上係關於原奏單內籌辦省城商埠各級審判廳及府廳州縣巡警規模之各項情形先期籌備以冀早臻完善者也凡上所陳其第一年期已經籌備者一項第二年期現已籌備者二項現正籌備者二項先期籌備者二項總計兩年期內共爲七項臣等遵章籌備之情形大概具此伏念吉省疆宇遼闊外逼俄日中控蒙藩且介居奉江之間尤三省扼要之所庚子以後民氣凋傷辦理一切新政厥有數難吉省人

民程度尙形幼稚在昔科舉之時應舉者已屬寥寥鄉舉里選尤爲曠古未聞此次創辦選舉及自治事宜固不得因邊遠省分稍從降格而綜計全省人數尙不及內省一大郡之多借才旣苦不能助長亦殊無術其難一吉省民戶客籍多而土著少或由流移而來或由招墾而至東邊一帶復有越墾韓民相與雜處其地則綿邈無垠其人則渾噩殊甚兼之道路不通所在阻隔冬春則冰雪載道夏秋則林箐障天調查一切諸多障礙其難二吉省財政奇窘雖屢經臣等釐剔中飽入款較前驟增乃出款則較前尤巨今庶政正多待理而出入已苦不敷揆度情勢與內省之不求開源但求節流者迥不相同臣等督同度支司殫心籌畫議定財政大綱凡屬節流事件無論新舊衙門局所稍有冗濫之員司費雖微而必加裁併凡屬開源事件果能裨益國計民生確可生利之

實業費雖鉅而必事創興事體固皆當務之急經費究同無米之炊其難三有此三難舉凡一切新政莫不受其影響動生窒礙惟是根本重地中外具瞻無論如何爲難決不敢稍有延誤所幸審判之規制畧定積牘日清巡警之數設粗完萑苻稍靖以後逐漸措施尙非全無憑藉臣等忝膺疆寄責無旁貸必期益加策勵努力圖成以仰贊

朝廷立憲之盛治所有依限奏報第一年期成績並第二年期籌備情形各緣由除分咨查照外理合恭摺具陳伏乞
皇上聖鑒訓示

吉林設立稅務處統一稅捐摺

奏爲吉林設立稅務處統一稅捐漸著成效懇
恩飭部立案恭摺仰祈

聖鑒事竊查吉林財政向極紊亂經徵一切釐捐稅項概係包徵額解收款無多其局所名目則有餉捐局山海稅局菸酒木稅局渡藥稅局官渡稅局木植公司各項其管理則有歸將軍衙門者有歸副都統衙門者有歸吉林道及地方官者局所林立員司冗多紛淆浮濫毫無統系殊與稅法原理相悖自改行省後設立度支司將所有稅捐局處均歸併該司管理始得有所筭攝臣昭常到任後詳加體察非設一稅務總匯之樞不足以節糜費而歸統一爰於光緒三十四年十月初一日飭該司設立吉林省稅務處將舊有捐稅各局所公司暨專供支應之糧餉處概行裁撤并歸稅務處經管該處內分設四所一稽徵所主稽核通省各局比較事宜一支應所主支發餉需及各衙門局所銀錢事宜一庶務所主全處票照薪津一應事宜一核銷所主統核全處案牘並報銷

事宜分別派委得力人員分任其事用人既少責成亦專從前局所七處月需薪水銀三千六百五十兩裁併後汰去幫辦提調以下四十一員月共節省銀二千零七十兩各局司巡以及一切局用活支等款月共節省銀三千餘兩合計每年節省銀六萬餘兩省外各局所歸併節省者尙不在內現在規制已定據試署度支司司使陳玉麟詳請具奏立案前來臣等覆核無異竊維政費端須撙節稅則尤戒紛歧固中外不易之理亦吉省當務之急臣等督飭該司殫心稽核不避勞怨現已將省城各局一律裁撤歸併稅務處綜理始基已立將來之整頓有資節省既多目前之成效漸著相應據實奏明立案以重稅務至省外各項捐稅分局已飭陸續併爲統稅以歸劃一容俟隨時體察各處情形再行分別辦理除將舊頒官護局銅質關防一顆咨部繳銷外所有吉林設立

稅務處統一稅捐漸著成效懇

恩飭部立案緣由理合恭摺具陳伏乞

皇上聖鑒訓示飭部施行

興東地方分設局卡並派工程員司摺

奏爲興東地方設立三段局卡並暫派工程各項員司以資建設而利交通恭摺仰祈

聖鑒事竊查興東道一缺就綏蘭海兵備道改設移駐內興安嶺迤東於光緒三十二年正月間經前署將軍程德全奏請以慶山試署奉

旨允准欽遵在案當飭該署道前往屬境週履巡視詳細查勘先以通道修署爲入手辦法旋據該署道呈報踴得託蘿山北與江東俄屯松由于對岸暨現在奏設蘿北廳地方水陸衝途形勢扼

要當經批令卽在該處修建衙署出放衙基以爲該道治所嗣又據呈稱該處所需食糧物料以及工匠均須取給於吉林之三姓此後招徠民戶亦非由三姓一線陸路開通不可查由三姓抵湯原縣尙有草道可通自湯原縣至現修興東道署五百餘里一片荒涼夙鮮人迹擬先分段設立局卡三處揀派員司酌修房屋以便住宿行旅兼資保護至修署築路各工採運糧料等物道遠事煩並請暫派工程轉運兩項員司專司其事以期早得竣工等情開單呈請核辦前來臣等查興東一隅沿江千有餘里與俄爲鄰境內土脈膏腴林鑛豐富此刻建官設治殖民實邊自以設署開道爲先務該署道所請沿途先設局卡三處並暫派工程轉運各員司皆關緊要已飭照辦至所用員司書差因地屬極邊諸物昂貴所需薪工川資自應從優支給其心紅辦公車船腳價等項並

正書卷一 四
二
飭核實動用均請作正開銷卽於奏撥興東經費內動支統俟署
工蕝事彙總奏報所派工程轉運兩項員司並俟工竣卽令裁撤
至沿途局卡俟後尙有應行添設之處再行隨時奏咨辦理除將
各員司名數暨開支章程咨部立案外所有興東地方設立三卡
並派工程轉運員司緣由理合恭摺具陳伏乞
皇上聖鑒

吉省添改民官酌裁旗缺摺

奏爲吉省壤地遼闊治理難周擬請援照江省成案添改民官酌
裁旗缺以資控制而固邊陲繕單具奏恭摺仰祈

聖鑒事竊查吉省地界俄韓土曠人少強鄰逼處盜匪潛滋邊務
防務在在胥關緊要從前旗民兼治綱紀未周往往一二千里設
一民官祇以草萊未闢政治簡略故得相安無事自鐵路通行外

地重在守土應以地方之衝要爲衡臣等悉心商酌擬於東南路設琿春兵備道一缺駐琿城辦理琿春延吉綏芬一帶邊務及東南沿邊兵備事宜並管理琿春等處關稅交涉於東北路設依蘭兵備道一缺駐三姓辦理依蘭蜜山臨江一帶邊務及東北沿邊兵備事宜並管理依蘭等處關稅交涉以上二缺責任繁重且有兼轄屬部之責應與前設之西路兵備道缺並請加參領銜以資控制至若府廳州縣各缺之宜妥籌整頓尤爲今日圖治之急務近邊要者招徠撫輯籌辦實賴賢能當繁難者敷政施教布置更須周密試就西路言之吉林府轄地最廣前分其西南之地增設濛江樺甸二州縣所屬尙周環千有餘里雖係省治所在而民官僅一知府治理實有難周擬更劃其東北各屯設一縣缺治舒蘭站名曰舒蘭縣伊通州接壤奉省亦屬西南要區擬陞改爲伊通

直隸州西北路逼近蒙界素稱繁要已設有新城府尙可控制其原屬之榆樹縣在吉省最爲富庶亦係要缺擬陞改爲直隸廳同知就北路言之雙城廳旗屯居多僑民亦衆鐵軌通行日益繁富殊非一撫民通判所能統轄擬陞改爲雙城府濱江廳原奏設於哈爾濱之商埠內仿營口廳之例專管該地交涉案件名爲江防同知後因俄人不認鮮能實行職務現所轄不足十里殊難成治擬劃雙城沿江之地以益該廳而改爲雙城府分防同知賓州廳當吉黑兩省交通之要衝開化尙早戶口頗蕃地面亦較雙城爲廣擬陞改爲賓州府其南境之阿勒楚喀商民繁盛爲賓州冠擬於其地增一縣治名曰阿城縣依蘭府原治三姓轄地之廣幾兩倍於吉林府雖人煙稀少求治尙難然不預爲措置終難逐漸振興擬於其南境之樺皮川增設一縣名曰樺川縣於其東境古勃

利州地增設一縣名曰勃利縣其原轄之大通縣向治江北今其地已劃歸江省擬移治於江南依蘭府西之方正泡地方臨江州北界黑龍江東界烏蘇里江居吉省之極東北邊防尤爲重要其地亦廣於吉林府僅設一州視等羈縻頗非注重邊界之道擬陞改爲臨江府於其西境增設一縣以富克錦巡檢陞改卽名曰富錦縣於其東境烏蘇里江附近增設處州意在綏撫邊境因名曰綏遠州就東路言之新設之蜜山府地處極東界烏蘇里江而接於俄境其地尤大於依蘭府而戶口則尤較稀少山野荒蕪伏莽潛滋今雖力興墾務而實邊分治斷非一知府數委員所能爲功因擬相度地勢於其東北饒力河之南設一縣名曰饒河縣於其北寶清河之西設一州名曰寶清州於其東南臨興凱湖設一縣名曰臨湖縣而府治則專轄湖之西北各地方其次位於省之正

東者則爲綏芬廳卽甯古塔副都統轄境縱橫約二千里原設治三岔口偏於極邊於行政殊多不便擬陞改爲綏芬府移治塔城片於三岔口設一分防通判以其地居甯古塔東境因名曰東甯廳其塔城東北原設有穆稜河知事並擬陞改爲穆稜縣就南路言之西自長白山東接琿春以抵俄境長千餘里南北亦三四百里不等僅設一延吉廳撫民同知政教安能普及且邊界交涉紛起因應尤難擬陞改爲延吉府仍治局子街而於琿城設一撫民同知分治蜜江站以東之地名曰琿春廳其原轄之和龍峪分防經歷治圖們江北一帶越壘地方關係尤要允宜改設正印以重邊地卽擬陞改爲和龍縣其延吉以北之旺清河流域荒原廣漠幾爲匪巢因擬於旺清河沿岸設一縣治並分綏芬府南境之地以附益之名曰旺清縣就中路言之五常廳廣袤五百餘里實當

全省中樞而民戶頗衆政事亦繁與府制相宜擬陞改爲五常府由省城至塔城及至延吉沿站八百餘里皆無官治盜匪出沒極礙交通擬於額穆索站設一縣治劃分敦化北隅綏芬西隅五常東南隅之地以成該縣區域名曰額穆縣以上添改各員缺謹分別改設添設綏設繕具清單恭呈

御覽至琿春三姓甯古塔伯都訥阿勒楚喀各地方旣皆添設民官足資鎮撫所有各該處副都統員缺毫無職任可言自應援照江省添設民官成案一併請

旨裁撤以一事權其旗戶案件地糧統歸地方官專理協領以下各缺應請暫仍舊制俾專管理各處旗務事件惟富克錦地方旣設有富錦縣則該處協領一缺擬請先行裁撤臣等審度時勢幾經籌議明知財力支絀何敢好爲紛更但念邊疆重要列強注目

安危係之若聽其空虛鞭長莫及一旦有事何以圖存故前歲所增之缺第爲先其所急此次統籌全局實不能不爲一勞永逸之謀如蒙

俞允單開各缺均係邊疆要缺與內地情形不同其改設各缺卽擬揀員奏補新設各缺則擬分別緩急派員試署或酌派設治委員先後分往試辦至一切劃界分治招墾設防事宜俟大致勘定再將四至圖冊分別奏咨並請將各廳州縣無論新設改設及原設者仍照前次奏定辦法逕由該員直接公署概不更歸府轄以省轉折而歸一致其應行刊發關防請鑄印信建葺城垣衙署核給廉俸公費及應否增設佐治等官並其餘未盡事宜均由臣等參照奉江兩省成案酌量本地情形陸續會商隨時奏咨辦理所有擬請添改民官酌裁旗缺繕單具奏緣由謹合詞恭摺具陳伏

乞

皇上聖鑒訓示飭下會議政務處核議施行

遵 旨陳明奉省辦理禁煙情形摺

奏爲遵

旨陳明奉省辦理禁煙情形恭摺仰祈

聖鑒事宣統元年二月二十四日奉

上諭禁煙一事乃今日自強實政教養大端於衛生足民興地利
塞漏卮各節皆有極大關係萬國屬目贊助同殷特是禁吸禁種
及籌款抵補洋土藥稅釐三事相爲表裏倘一端辦理不力則其
二端不免牽制觀望恐限滿仍難收效比年以來雖疊經禁煙大
臣暨各省督撫將沾染嗜好各官查驗參處然玩違欺飾者仍復
實繁有徒至各省種煙地畝初定章程本限十年遞減嗣據雲南

四川山西直隸黑龍江等省奏請該省於一年內全行禁種任事頗屬奮往惟究竟各省禁種是否一律認真地方官能否於禁種鴉片之外勸種有益衣食各項植物俾令小民樂從至此項稅釐關係軍餉太宗近據度支部奏請酌加各省鹽價以爲抵補此項稅釐之策當經允行惟鹽斤加價合計不過四五百萬不敷尙多朝廷求治維殷旣憤國民積弱之難振復慮友邦期望之難副言念及此宵旰憂焦特此再行申諭禁吸一事文武職官責之禁煙大臣及京外各衙門長官務須認真糾察不得徇情避怨各營兵夫各學堂師生責之該管長官尤須立即嚴行禁絕至於商民人等責之民政部暨各省督撫順天府尹及管理地方之將軍都統等亦須多訪良方設局施藥勵其廉恥酌採東西各國辦法設法減癮由少而無期於比戶可風而後已其禁種一事亦責之各省

督撫順天府尹及管理地方之將軍都統等酌量本省情形督飭所屬認真禁拔相其土宜改莠爲良定當考其成績優予獎擢並由民政部查核其抵補稅釐一事責之度支部悉心擘畫此時籌款誠艱要當權其利害輕重多方籌集迅速舉行京外各衙門接奉此旨後各將該衙門如何辦法自行切實覆奏等因欽此臣維鴉片流毒將近百年有官守者因而曠官有財產者因而廢業自非痛砭痼疾斷絕根株不足以振精神而強種族查奉天初改行省實缺候補人員無多其投効調用者皆經臣等嚴察有無嗜好始行分別差委是禁止奉天官吏吸煙較之內地尙易措手且地

爲

豐鎬舊都人民簡樸嗜好甚少土地荒曠煙畝寥寥其吸煙種煙之流毒於百姓者尙淺則察禁亦易爲功光緒三十三年五月臣

抵任之初首先整頓禁煙事宜督飭各廳司道詳籌辦法認真經理上年准禁煙大臣咨送查驗章程並頒發六項表式並經飭司於奉天省城擇地遵設官吏禁煙查驗所嚴定章程以求實際業於上年七月奏明在案所有旗漢實缺候補人員現經驗過共二百餘員猶恐酖毒宴安戒而復吸並嚴擬抽查復驗辦法但期痼習廓清不敢少避嫌怨至六項表式由臣率先填註以爲準則其餘參贊司道以次各屬通飭分別認真填註並取具切結以憑查考上年十二月業經列表造冊咨報禁煙大臣查核在案此外紳商士民之吸煙者經臣迭次嚴飭所屬剴切示諭藉資感悟又飭各屬設立戒煙所現在陸續具報設立者已有二十餘處均遵照上年民政部咨送戒煙中西藥方分別精製施濟冀以漸次滌除舊染咸與維新此奉天辦理禁吸之大概情形也禁種一節臣於

光緒三十三年十一月卽已擬定清查種煙畝數表式頒發各屬
通飭認真辦理以期實行遞年減種上年九月復准度支部咨奏
定禁種辦法摺內奉省應自宣統元年下半年起一律禁種惟查
奉省種煙地畝本屬無幾而下種時令又與各省不同各省大半
冬種春收奉省係春融下種秋後收割去歲接准部咨之時尙未
布種經臣出示曉諭自本年春令起一律禁種罌粟改種糧食木
棉藍靛等項如有違章偷種情弊一經查實從嚴懲罰通飭各地
方官屆時切實履勘並擬選派妥員分赴各屬嚴密抽查務期萌
芽淨絕毒障全消此奉省辦理禁種之大概情形也臣於此事嫉
惡本深矧屢奉

嚴詔爲國家唯一之政令凡在臣民咸宜警惕臣仍當隨時督率
各司道破除情面於禁吸禁種二者切實經理務使辦有成效上

不負

朝廷委任下不貽外人口實所有遵

旨陳明奉省禁煙情形緣由謹恭摺具陳伏乞

皇上聖鑒

覆陳籌辦達爾汗旗開通道路情形並請 旨允准勘放摺

奏爲遵

旨覆陳籌辦達爾汗旗開通道路情形並請

旨允准勘放以利交通而杜隱患恭摺仰祈

聖鑒事本年二月十五日准理藩部咨開本部具奏遵議徐世昌

籌設洮南驛站開闢達爾汗王旗道路覆奏一摺奉

旨依議欽此將原奏咨行到奉等因詳繹原奏大致以兩次向該

王札詢均以有關生計爲詞該部礙難懸斷因令臣行知該王旗

會同派員先將所擬開闢之路詳細履勘妥籌辦法按照該王所報各情切實查明究於蒙旗生計等項有無窒礙繪圖貼說再行奏明請

旨辦理等語伏查蒙旗外脅強鄰內安愚弱以言生計生計絕矣今該王猶以有關生計爲詞會亦思壯丁寥落牛馬不繁卽論游牧已無生計可言

朝廷撫綏藩服所代爲孽畫者何一非蒙民生計所關遠如西北各蒙特派大臣設局開墾錫林果勒昭烏達卓索圖等盟經察哈爾熱河都統奏請墾放招佃徵租蒙旗早已安享其成近如本盟各旗歷經奏明開放者十居其九近來墾務漸興蒙地牛馬之值歲有增益而放荒各旗王公則有歲租之進項台壯則除攤派之苛例生計淳興尤爲明效大驗今東三省經營蒙荒招徠墾戶不

惜歲糜

國家帑項安民設治亦冀以固邊圉而杜覬覦該旗荒境橫斷全盟尤爲交通障礙是以厯任將軍督撫屢以開放爲言若以一隅阻塞致隳前功將治內防外之機關益覺無從措手謹將蒙旗危險情形必須開通該旗之關係及該王阻撓欺誣之處爲我

皇上撮要陳之洮南一府爲哲里木奧區當東三省衝要前奏設一府三縣原以外扞牧圍內拊全盟今道路不通孤懸絕塞工商裹足俸餉虛糜久之則居戶逃亡以匏繫之官處甌脫之地其何能治蒙匪白音大來洵克套之亂出沒各旗合三省兵力跟蹤追剿士卒傷亡軍實銷耗窮經年之力僅得平定良以道路梗滯人煙寥落賊有所資我無所藉而勞逸之勢殊也若聽其隔絕萬一內孽潛滋客匪攔入進剿則艱於轉運分駐則無所據依此治內

之關係萬難延緩者也日俄兩國輒以誘惑蒙旗之手段浸爲干涉主義協謀所及隱以洮兒河南北爲界東清南滿路線已包繞全盟東南北三面日人之測繪隊徧科爾沁六旗匿居蒙屯與之相狎俄人則以鐵路之勢力據郭爾羅斯杜爾伯特札賚特各旗之門戶市易牲畜攬放利債而蒙旗於外人之利用則倍結驩心於朝廷之政令則多方抗拒況日人南滿枝路之計畫適在我驛站界線之中必將出遼源州而貫入該旗界內今道路不闢布置無從領土之權瞬爲外人所據則事後更難措手此防外之關係萬難延緩者也臣前設蒙務局遣員分道實地調查而於該旗設站置郵尤爲籌蒙之起點因累次遣人繪圖測量臣前次原奏所謂遼源州以北至邊昭止共計二百數十里並於沿路兩旁各劃十里從事墾放等語實已詳細履勘於該旗游牧生計毫無窒礙

界內並無蒙民已墾之地將來墾熟收租應按照各旗蒙荒章程
毋庸另籌辦法理合繕具圖說恭呈

御覽至該蒙王謂派放道路旗屬下人在是道者分爲東西兩段
天下豈有無路之地分爲兩段豈遂不能聚處無理阻撓莫此爲
甚該蒙王又謂閒散王貝勒貝子公台吉等屬下看守墳墓人等
游牧之所均有關係查達爾汗全旗牧地面積六十萬方里以所
據地勢而論橫斷哲里木全盟今所劃站道方廣不過百五十分
之一自卧虎屯以北地多沙礫委同棄地旣無水草亦非游牧必
需之地又查該旗有公主墳在遼河之西此路當遼河之東旣阻
河流毫無關礙所劃十里之中如果有台壯居處自當照章酌予
留界以示體恤且該地屬於閒散多羅郡王分地居多該閒散郡
王尙明大義自願出荒臣前派員往勘采哈新甸抵償一案時曾

以本府生計困難有指該旗白寺荒段及此項站荒報効之意因
本旗札薩克協理等有意阻撓不肯代出印文無由上達轉懇設
法出放前來臣以僅據該員一面之詞未便遽行人奏茲該札薩
克親王那木濟勒色楞尙以有礙閒散王公等屬下游牧爲言部
臣將該旗地圖詳查詢問該王亦未能逐一指明可見該王不察
閒散王公等艱苦不辨所管旗地方域始終惑於管旗蒙員錮蔽
抵塞之計肆意欺誣乃部臣旣無可如何奏請仍由臣行知該王
旗會同派員履勘該王必藉口於部文之未准率其協理章京等
百計阻撓又何益哉臣非謂開通該旗道路卽畢馭蒙之策也第
以外誘潛滋內勢隔絕於治內防外之關係必將以便利交通爲
人手辦法由是以觀無論生計如何亦當毅然爲之況開通以後
尙大有利益於生計乎且以各旗荒地皆已陸續開放獨該王旗

坐擁廣土尙斷斷於二百餘里有百利而無一害之驛站荒地使全盟大利

國家遠猷均束縛蒙混於有關生計之一語阻撓大計百喙難辭蒙王冥頑原無足責不過羈縻調停之術其弊至於牽動全局而生計亦終不能保良可歎也

國家體恤蒙藩無微不至當此強鄰逼處爲籌蒙計爲綏邊計皆以開放該旗爲全局樞紐惟有仰懇

聖明俯允勘放一面卽由臣札行該旗派員勘辦期於蒙務有裨所有覆陳籌辦達爾汗旗開通道路情形並請旨允准勘放緣由理合恭摺具陳伏乞

皇上聖鑒訓示

附開放達爾汗旗地段及關於哲里木十旗計畫說略

科爾沁左翼中旗卽達爾汗和碩親王旗牧地跨東西遼河東南至吉林邊牆西北盡內興安嶺地勢斜長面積約六十七萬方里占哲里木全盟十分之二道光元年援照長春之例開放東遼河近邊一帶荒地安插民墾初隸昌圖廳設八家鎮經歷分治之光緒三年設懷德縣治移經歷於康家屯並設奉化縣治於梨樹城六年以康家屯改設康平縣改經歷爲主簿分防鄭家屯二十八年以鄭家屯改設遼源州治移主簿於康平縣屬後新秋地方共計放荒設治區域寬廣約僅二百餘里此外廣漠無垠荒曠不治其地橫梗中部實爲全盟交通之障礙現擬開放由遼源州通洮南府站路一段以資聯貫歷前任將軍等商辦該王旗屢以有礙游牧爲詞其實蒙戶早經遷入西部及新遼河以南是以王府附近

蒙屯最多擬開站荒於該旗無甚防礙圖中另貼籤註陳明
科爾沁左翼前旗卽賓圖多羅郡王旗牧地當奉天法庫邊
門外其西境在

國初時獻爲養息牧場故本部幅員最狹地近邊牆早經招
墾除王府迤北地多沙磧留爲蒙壯遊牧外其南境一律墾
熟隸奉天康平縣法庫廳轄境

科爾沁左翼後旗卽博多勒噶合親王旗牧地當威遠堡邊
門外跨遼河兩岸地質多屬膏腴自嘉慶道光以來奏明放
荒漸次墾闢民物殷富風氣早已開通生計最饒實爲十旗
之冠初設昌圖廳通判尋改同知光緒三年前將軍崇厚奏
升爲府並設照磨於八面城迨康平遼源先後設治析西北
一帶蒙境隸之三十二年增設同知於通江口重河防也

科爾沁右翼中旗卽圖什業圖和碩親王旗牧地東界札薩克圖旗西界達爾汗旗其西北境留爲台壯遊牧東境於光緒三十一年經前將軍趙爾巽奏請放荒設局招墾現因達爾汗旗站道未開領戶不前尙未報竣已放之地酌設醴泉開化二鎮醴泉一帶土脈腴潤漸次墾闢擬設醴泉縣治經臣奏明遴派設治委員試辦一切事宜

科爾沁右翼前旗卽札薩克圖多羅郡王旗牧地西界圖什業圖旗東界鎮國公旗光緒二十八年將軍增祺奏請放荒三十年於洮兒河南設洮南府暨開通靖安二縣又設乾安鎮分駐照磨該府地當衝要適扼中權本爲三省之奧區亦卽蒙疆之重鎮殖民經武在所必爭日俄均勢之界綫共視洮南與長春遙遙相對是以外人游歷測繪絡繹而來該

旗郡王烏泰欠積俄債私立印據契約以全旗土地鑛產抵押經臣等覺查奏明代向大清銀行息借款三十萬兩派員與俄人磋商償還取消印據並由該王旗指明展放北山荒地收價抵補借款在案

科爾沁右翼後旗卽鎮國公旗牧地東界札賚特旗西界札薩克圖旗其洮兒河以南之地於光緒三十一年經前將軍增祺奏請放荒三十二年趙爾巽奏設安廣縣治隸洮南府三十四年經臣等奏請續放河北荒一百餘里尙未報竣公府由洮兒河南移居北部所留本旗台壯遊牧之地該公喇喜敏珠爾情殷報効素明大義又續請展放荒段由洮南赴齊齊哈爾大道迤南一帶西北自哈沙圖站起東北至阿勒坦克喀蘇特依站止約長四十里寬八十里此處係驛站要

正書卷二十四
道開墾之後可與札賚特已墾地方聯爲一氣

札賚特旗爲多羅貝勒牧地當嫩江右岸西界鎮國公旗南界郭爾羅斯公前旗北盡索倫圍場川隰交紛兼有農林漁澤之利惟緯度偏北氣候較寒而江河流域時有水患未免引爲缺憾其放荒區域洮兒河嫩江匯流之處爲一段綽爾河近岸爲一段瑚爾達河爲一段均經黑龍江將軍恩澤達桂等先後奏請開放光緒三十年達桂奏設大賚廳並設塔子城經歷景星鎮巡檢臣等又於嫩江沿岸哈拉和碩等地方興辦屯墾以資振興該旗台壯均居西北一帶卽嫩江沿岸亦尙有自留墾地其月亮泡之漁業爲本旗歲入大宗之款

杜爾伯特旗爲固山貝子牧地當嫩江左岸南界郭爾羅斯

公前旗東清鐵道貫其中部放荒區域均沿江岸經前黑龍江將軍達桂程德全等先後奏請開放三十二年程德全奏設安達廳並分省屬墾地袁益廳治其沿鐵道兩旁爲東清公司占用甚多經臣等改訂鐵路合同內議明限制租用地畝收回不少尙須與該旗另籌辦法從事墾闢以保治權並擬於鐵道迤南設武興廳迤北設林甸縣以綏輯之林甸逼近鐵道事務較重擬卽時建置武興墾闢無多暫請緩設均經奏准在案

郭爾羅斯前旗爲鎮國公牧地跨松花江兩岸乾隆年間始開邊禁借地養民嘉慶五年設長春理事通判旋改同知實爲蒙疆移民之始長春一屬租賦悉爲該公旗歲入歷百餘年民蒙相安風化文物等於內地光緒十四年吉林將軍希

元以長春爲吉奉孔道省城西北門戶奏請升廳爲府並分設農安縣治移原設照磨於朱家城子增設新安鎮主簿三十三年展放長嶺子荒經臣等奏設長嶺縣治現在荒務尙未告竣該處地接達爾汗旗未放荒界蒙匪越境竄擾墾戶行旅相率裹足此項站荒不開則蒙旗顯分畛域遇有剿捕事宜三省巡防軍隊疲於奔馳實不足以安輯地方而靖盜源

郭爾羅斯後旗爲輔國公牧地該旗嫩江界其西松花江繞其南東清鐵道經其東實爲水陸交通之地與哈爾濱僅隔一江舟車所至俄人踪跡最密從前敖漢旗喇嘛色丹巴勒珠爾因索債押荒一案句結俄商借款擅立公司在旗開墾經前黑龍江將軍程德全嚴參查辦去年始將俄人交涉議

結經臣等設法償還俄債十七萬盧布收回火犁取銷約據該旗債務輾轉甚多現正逐案清釐俾得防微杜漸其鐵路兩旁荒地及沿江各荒均經先後開放報竣並於光緒二十二年經程德全奏請設肇州廳又設肇東經歷分駐昌五城以資治理

退耕堂政書卷二十四

退耕堂政書卷二十五目錄

奏議二十五

奉省籌備立憲第一年期奏報成績摺

奉省各級審檢廳遵章退還司法巡警摺

酌擬江省續設道府廳縣設治章程摺

附單

江省四司分設各科薪津公費數目摺

畢拉爾路建修衙署片

甘井子辦理學田並養蠶情形片

清釐杜郭兩旗荒地界址動用薪工片

江省籌備立憲第一年期奏報成績摺

東省調用人員變通分發章程摺

裁撤奉天府縣司獄典史員缺片

建築奉天高等並承德地方各審檢廳衙署摺

奉省遵章籌指諮議局經費的款摺

遵 旨責成府州查禁苛捐苛罰及門丁改充委員等弊摺
興安嶺荒地改收經費片

江省附郭荒地分別撤佃以補官兵生計片

擬請分籌吉林邊務經費摺

奉省設立方言肄習所摺

創辦奉天八旗工藝廠摺

奉天設立農業講習所滿蒙文講習所片

錦州創設八旗工藝分廠片

退耕堂政書卷二十五

天津徐世昌

奏議二十五

奉省籌備立憲第一年期奏報成績摺

奏爲九年籌備事宜遵章臚列第一年期成績恭摺仰祈

聖鑒事竊准憲政編查館咨開光緒三十四年十二月十一日遵
旨奏設專科考核議院未開以前逐年應行籌備事宜酌擬章程
伏候

欽定一摺奉

旨依議欽此欽遵通行知照到奉謹按原奏考核專科章程第三
條內開九年籌備事宜責成內外臣工每屆六箇月將籌辦成績
臚列奏聞並咨報憲政編查館查核應自光緒三十四年八月起

至十二月底止爲第一屆以後每年六月暨十二月底各爲一屆
限每年二月內及八月內各具奏咨報一次等語現屆期限自應
欽遵辦理查憲政編查館原奏九年籌備事宜清單內載第一年
期督撫所應辦者爲籌辦諮議局一項奉省諮議局改爲籌辦處
並附設自治研究所一切組織情形業於上年十一月具奏奉
批該衙門知道欽此欽遵在案惟關外地廣人稀各州縣新設治
者居多蒙荒初闢土客雜處凡遇創辦新政動生疑阻臣因體察
情形於上年十一月間飭該處監理民政司使張元奇會同紳士
盛京副都統多文妥慎擬議刊刷奏定章程編撰白話告示徧發
城鄉村屯督令研究旋選本籍法政畢業學員及辦理新政素有
經歷之人員計十六人充當司選員分赴各屬協助選舉事宜同
時並飭該處附設之自治研究所學員一百八十名暨憲政講習

所學員一百名於年假限內各回原籍由各初選監督派充調查員詳查選舉人資格該學員等粗通法政熱心桑梓講演調查尙能悉心辦理又各屬地方苦瘠誠恐籌款爲難藉端攤派特仿直隸辦法於稅捐項下撥支經費以資應用計每初選區發給三百兩每複選區發給三十兩照章奉省應劃初選區四十五處複選區八處統共發銀一萬三千七百四十兩復將選舉應辦事項嚴立期限製成簡明表通飭各屬依限辦理無得稍有逾延惟是選舉雖有定章而各屬輒多疑義函電紛馳頭緒複雜均經該處徵引條文或援據憲政編查館電覆各省成案詳細解釋藉免歧誤而便遵循計自去臘開始調查至本年二月間陸續完竣造具初選舉人名冊呈送前來共得合格選舉五萬二千六百七十九名預計三月間可行初選舉四月可行複選舉九月以前諮議局必

能成立不至逾誤至建築諮議局亦應急爲籌備現在派員繪圖估工一俟解凍即可興工營造除將詳細情形咨報憲政編查館外所有遵章臚列第一年期籌備成績緣由謹恭摺具陳伏乞皇上聖鑒

奉省各級審檢廳遵章退還司法巡警摺

奏爲奉省各級審判檢察廳遵照部章退還司法巡警以專責成而收實效恭摺仰祈

聖鑒事竊臣於光緒三十三年十二月創設奉天省城各級審判檢察廳調普通巡警八十名隸於司法部分分布各廳遣用名曰司法巡警原係仿照京師審判檢察廳初時辦法本一時權宜之計嗣經法部民政部會奏司法警察章程京師審判檢察廳遂將司法部分所有巡警悉還警廳其關係司法警察事務統歸警官

擔任而審判廳法庭上所用之人祇另募庭丁以備任使於是警廳有完全之職權司法收助理之效用實爲正當不易之辦法茲據提法司吳鈞轉據高等審判廳廳丞許世英署高等檢察廳檢察長汪守珍呈稱審判廳爲預備立憲重要之圖按照年限添設不容遲緩若每廳必須專用司法巡警匪特款項支絀力難籌辦且所用人數有限亦決不能舉地面搜查逮捕之事並顧無遺誠不若警察之布滿城鄉耳目心力較爲周至是以司法巡警事務皆應以行政官廳任之毋庸於巡警中特標司法之名亦毋庸於司法中另立巡警一部此各國之成規部院之所由取則也查檢察一官有代表

國家保護公益之責職務甚繁廣土眾民決非少數之檢察所能盡其事故必以行政官廳爲補助自各廳撥用巡警以來巡警局

之巡官長警於此中權限職守未必盡人皆知或以爲司法既有專官則緝捕非復已事恐習焉不察將至行政官以放棄而溺職司法官因乏助而鮮功設不及時變通勢將兩受其害夫司法警察權本係法部監督而委任檢察廳以執行之檢察廳爲司法巡警之長官故有指揮巡警及印佐兵弁之權蓋檢察巡警實有息息相關之誼東三省試辦審判檢察各廳實爲各行省司法分立之先聲若以輔助之未良致使推行之寡效影響所及關係非輕揆諸法理徵之事實擬將各廳撥用巡警悉數還之警局而使各巡官長警遵照部章擔任司法警察事務受司法之委任承檢察之指揮庶畛域不分而訴訟易理所有對於巡警局辦事章程均遵照光緒三十三年法部民政部會同奏定章程辦理從前奉省咨部之檢察廳對於巡警局辦事簡章概行廢止等情呈請奏咨

前來臣竊維司法之權最尊故必完全獨立而後職權不撓司法之事至蹟又必有所協助而後實效乃獲該司使吳鈞呈請各情臣覆加查核按之各國辦法既屬從同揆之兩部定章亦皆符合應如所請辦理除分別咨部立案外所有遵照部章退還司法巡警緣由理合恭摺具陳伏乞

皇上聖鑒訓示

酌擬江省續設道府廳縣設治章程摺

附單

奏爲江省續設道府廳縣酌擬設治章程以擴新規而資治理恭摺仰祈

聖鑒事竊查上年江省奏請添設民官經會議政務處議覆照准並令將添設改設各缺應如何建署定俸置吏添兵之處詳細具奏等因奏奉

允准咨行前來伏維今日拓張民治自應仿照新定官制酌量地方情形因時變通庶冀行之有效江省邊荒初闢更張法制較易推行臣等謹按照新定直省官制及本省原定設治章程詳細酌擬辦法大要各道府廳縣均不設大使經歷巡檢等官裁舊有之丞辦處而設佐治員以分理庶政裁舊有之捕盜營民壯等名目而分設司法行政巡警以樹新政之基至現在設治各處人民本稀詞訟尙簡其各級審判廳均應暫緩設立仍於各府廳縣設審判員幫同地方官審理詞訟案件並於各道設司法股委員幫同各道核轉該管所屬地方各案件以期分理而歸詳慎其餘正佐各官養廉薪公等費亦均體察情形分別酌定除此添設改設各缺均應遵照辦理外其餘舊設各缺一俟新章實行無礙再行奏請一律照辦所有江省續設道府廳縣酌擬設治章程緣由除

分咨外理合繕單恭摺具陳伏乞
皇上聖鑒訓示

附黑龍江省設治章程

第一條 本省添設道府廳縣各缺原奏分別即設緩設業經會議政務處議准現在體察情形擬先就衝要之區設道府廳數缺其餘原議即設者容即陸續分派設治委員俟著有成效再行改歸實缺緩設各缺一併隨時酌量辦理

第二條 新設兵備道承本省督撫之命辦理交涉關稅調遣境內巡防各軍並考核所轄府廳州縣兼理旗蒙一切事務

第三條 新設知府同知通判知縣稟承本省督撫及本管兵備道或本管道府自理所轄地面其知府領有屬縣者並

正書卷二十一
五
考核所屬一切事務

第四條 本省原定設治章程各道府廳州縣設有承辦處并大使經歷巡檢等官此次新設各缺均擬仿照新定直省官制改設佐治員以資分理不再設承辦處并大使經歷巡檢等官

第五條 兵備道酌設佐治員如下一司法股員一員管理詞訟案件及關於司法行政上之事二財計股員一員管理歲出歲入及交通實業等事三文牘股員一員管理軍事交涉教育警務各文牘並文書收發等事

第六條 府廳縣酌設佐治員如下一審判員一員幫同地方官審理詞訟案件兼理一切文牘事宜二視學員兼勸業員一員稟承地方官管理全境教育及文廟祠祀並交通實

業等事三警務長兼典獄一員稟承地方官管理全境巡警
消防戶籍營繕衛生監獄等事四主計員一員稟承地方官
徵收地租捐稅兼管文書收發等事

第七條 新設道府廳縣各缺養廉公費應參酌本省舊設
各缺成例並比照現有司缺以次遞減擬定兵備道養廉銀
二千四百兩公費銀每月六百兩知府養廉銀二千兩公費
銀每月五百兩同知通判養廉銀一千六百兩公費銀每月
四百五十兩知縣養廉銀一千二百兩公費銀每月四百兩
第八條 新設道府廳縣佐治員薪水及雜役工食並紙筆
柴炭等費應參照舊有承辦處分別酌給以資辦公擬定兵
備道佐治員薪公等費銀每月六百兩各府廳縣佐治員薪
公等費銀每月五百兩

第九條 除此次擇要添設改設道府廳各缺外其續派設治委員應領廉費薪公均照以上定章折半發給至就近如有墾稅各局酌量令該局委員兼辦設治事宜應否仍照折半發給或再減數發給應查照該地方情形隨時酌定

第十條 以上各地方官養廉薪公等費均一併由正款項下開支

第十一條 各處設治地方應修衙署倉庫監獄各工程及鋪墊等費均准由正款項下實用實銷另由本省酌定辦法咨部備案如就地原有合宜房屋可以賃購修葺備用者先行酌量賃購開辦以節經費

第十二條 本省各屬舊設捕盜營民壯等名目擬一律改爲司法巡警其應需之款應比照捕盜營民壯定額發給准

由正款項下開支俟酌定劃一章程再行咨部備案

第十三條 各府廳縣各於所轄荒段內劃留學田招佃開墾免納地價以其歲入爲各屬提倡蒙養小學之用其劃留學田數目每府廳各留四千晌每縣各留三千晌

第十四條 凡設治地方所有關涉旗蒙與民人互控之案悉歸該管地方官直接審理旗員蒙員均照定例不准干預

第十五條 新設各缺皆係邊疆重要擬請隨時出缺由本省督撫揀選妥員奏請補授至應定何項缺分擬俟派員試署以後體察實在情形再行詳細分別奏咨辦理

第十六條 此次添設改設各缺均由本省暫行刊給木質關防俾資鈐用仍請

飭部撰擬字樣刊鑄關防印信照章頒發以資信守其現派

設治委員地方應俟補授實缺後續請頒發

第十七條 以上係暫行章程如有未盡事宜及尙有應行變通之處容再隨時奏咨辦理

江省四司分設各科薪津公費數目摺

奏爲江省四司以下分設各科月支薪水津貼及辦公經費數目恭摺具報仰祈

聖鑒事竊臣世昌會同前署撫臣程德全於光緒三十三年冬具奏江省分設民政提法提學度支四司將從前各局處裁撤歸併摺內聲明四司以下辦事各官暫用委員以歸簡易等因奏奉允准在案伏查江省地方初闢自改建郡縣政務較前益繁多係分歸各司管理原奏暫用委員並不設缺良以本省財政困難不得不量入爲出第既經奏明設司凡民政所筦如民治疆理警務

營繕各事宜提法如民事刑事典獄諸要政至提學司係經學部
奏設六課江省自應仿設六科度支則會計田賦俸餉稅務各端
事體均極繁重必須得人而理自不能不分科派員以專責成而
免貽誤計自上年夏間經臣等飭令各司按照執掌事務分別設
科并定科長正副科員名目科長月支薪津銀一百五十兩正科
員月支薪津銀八十兩副科員月支薪津銀各五十兩其司書副
司書月支薪水銀二十四兩十六兩十二兩不等業經次第酌定
名額數目綜計每司各科每月定額共應支薪津銀一千數百餘
兩至二千三百餘兩不等惟定章期於完全而經費必求樽節現
在所派各員均按各司事務繁簡酌量選用或以一科長兼管兩
科事務其非必需之員皆飭任缺勿濫俟將來事見增繁再行斟
酌添派仍按年查明現支員數核實造報以重公款至各司應用

正言卷二十一
各項聽差雜役柴炭燈油心紅紙張一切辦公等項亦經另行酌定計每司每月共需公費銀八百兩遇閏加增統於光緒三十四年五月一律起支飭由度支司按月照發所有動用各款自應奏明作正開銷除將開支細數清單咨部查照外所有江省四司以下各科月支薪水津貼及辦公經費數目理合恭摺具奏伏乞皇上聖鑒飭部立案

畢拉爾路建修衙署片

再前派試署興東道慶山兼署畢拉爾路協領并飭擇要趕修衙署以爲收撫鄂倫春計畫曾經奏明在案旋據該道踴得遜河占河滙流上游地方修築協領佐領各署形勢甚爲相宜惟該處盡屬荒山人跡罕至招工購料創建極難自應選派熟悉工程員司專事經理以期早日蒞事一俟工竣卽行裁撤等情呈請核辦前

來臣等覆加查核係屬實在情形均經隨時批令照辦所需各款應請作正開銷除將開支數目咨部外謹附片具陳伏乞聖鑒飭部立案

甘井子辦理學田並養蠶情形片

再江省地屬邊遠教育甫在萌芽欲宏教育非廣籌學費不爲功欲籌學費非多闢學田無實效前署撫臣程德全曾將甘井子學田兩萬餘畝派員招戶開墾以期成熟庶興學勸農交有裨益業於上年四月會同臣世昌片奏在案惟是邊地荒涼人跡稀少舉凡蓋房鑿井置備牛具以及招徠墾戶安插稽查彈壓勸撫無一事不需員管理即無一事不需款經營應用經費均已隨時飭司由郭旗荒務加收學堂經費項下發給一面嚴行考核計開辦以來招到直東奉吉農民已及百餘戶向來沙漠地方儼有原隰龍

鱗荷鋪成雲氣象本年復令於學田附近北山一帶放養山蠶以冀農蠶並舉不惟學費可日見擴充且於招徠民戶振興農業關係尤非淺鮮惟辦理墾荒人員倍極艱苦一切薪工又皆微薄擬俟成績大著由臣等慎擇一二員奏明獎勵以爲督耕興學者勸所支各款自應作正開銷除將開支章程咨部外理合附片具陳伏乞

聖鑒

清釐杜郭兩旗荒地界址動用薪工片

再江省所屬郭爾羅斯後旗與杜爾伯特蒙旗界址犬牙相錯近年出放荒地該兩旗蒙員未將舊界認清以致放地忽有展越現在該處荒戶所領地段多屬虛懸亟須趕速劃清以爲興墾便民之計前據該兩旗呈懇由省派員往勘以清界限等情當於上年

二月間揀派原文該兩旗荒地委員一起前往會勘嗣以蒙員到段參差不齊復加派肇州廳同知崇綬就近督飭俾得從速清釐現在該兩旗輾轉處所業將陸續勘竣所需薪工車價等項已飭由墾務局贖存經費項下撙節動用應請

飭部先行立案一俟勘辦竣事再行繪圖咨部造冊核銷除咨外理合附片陳明伏乞

聖鑒

江省籌備立憲第一年期奏報成績摺

奏爲九年籌備事宜謹將第一年期成績遵章具報恭摺仰祈聖鑒事竊准憲政編查館王大臣咨開光緒三十四年十二月二十一日欽奉

諭旨憲政編查館會奏遵設專科考核議院未開以前逐年籌備

事宣酌擬章程摺單各一件著依議欽此等因查原奏考核專科
章程內載九年籌備事宜責成內外臣工每屆六箇月將籌辦成
績臚列奏聞並咨報憲政編查館查核應自光緒三十四年八月
至十二月止爲第一屆以後每年六月底暨十二月底各爲一屆
限每年二月內及八月內各具奏咨報一次等語現屆本年二月
應行奏報第一年期成績謹將江省所已籌辦者臚舉大要敬爲
我

皇上陳之查江省諮議局籌辦處於上年九月遵章設立遴派本
省官紳預備選舉事宜業經奏明在案惟是選舉之要視人民程
度以爲準江省向係駐兵防守之地軍事爲多民政較少與內地
情形不同舊有兵丁隸屬各城者大率徒尙武功未遑文事其在
天資聰穎之士不過嫻熟弓馬諳習清文求其兼通漢文曉解政

法者殆不多覩至本省土著部落如索倫打虎爾巴爾虎鄂魯特種類不一各以游獵爲生渾噩自安俗猶太古其庫瑪爾托河等路鄂倫春又復山居野處語言嗜好迥異平民又如杜爾伯特札賚特郭爾羅斯後旗各地新知未啟故步自封變化感通尤爲不易至省城及東荒一帶爲全境開闢最早之區從前關內墾戶負耒東來不過村野農民相忘耕鑿近日創設學堂苦心教育文化雖然漸興民智終難驟進且選舉之事旣非舊日見聞所已經尤苦新布章程之繁密諄諄告語半屬茫然加以江省地面寥闊各處界址年久未曾勘分嗣於村落稠密扼要處所添設民官往往彼此經界轉轄一時未盡釐正兼以裁併屯站之地改隸各城遠近縱橫正待分晰是江省選舉一事匪惟選舉資格不易得相當之人卽選舉區域且未有確定之地祇以事關憲政未容置作緩

圖經臣等迭次督率該處總理趕緊籌辦旋派熟悉憲政人員爲該處顧問員籌商一切事宜當將本省各屬應行籌備各事體察本省情形酌定辦事期限表並調查選舉各細則通行各屬剋期舉辦又恐各屬初複選舉區辦理未能依限完竣復就本省通曉法政各員紳派爲各屬司選員幫同各初複選舉監督次第籌辦並於司選員未赴各屬之先將各項選舉章程及調查方法詳加研究免致解釋參差辦理歧誤迭經各該員分赴各屬會集紳董分投調查由臣等嚴飭定於本年閏二月初十日以前各將初選舉人名冊一律送省彙核以爲分配各屬議員名額之根據其區域之未晰者均經隨時酌定電飭遵辦至選舉日期仍參酌定章以次推算定於五月初一日一律舉行初選舉事務七月初一日舉行複選舉事務各初複選舉監督倘有故意玩延致誤以上期

限者屆時分別酌予處分以示懲儆至上年新設民官各地方舊屬旗員管轄者於未派委民官之先所有該管初複選舉事務均由該管長官分別照章辦理不得或有遺漏亦不得稍涉紛歧務令樸僿人民各具治安知識庶仰副

朝廷注重憲政與民更始之至意除分咨查照並將本年應行籌備各級審判廳清理財政暨地方自治各屬巡警等項事宜陸續另行具奏外所有江省遵章籌辦第一年期成績緣由理合恭摺具陳伏乞

皇上聖鑒訓示

東省調用人員變通分發章程摺

奏爲東省調用人員宜變通分發章程辦理以拔眞才而濟時局恭摺仰祈

聖鑒事竊准吏部咨開本部具奏酌擬考核調用人員切實辦法一摺奉

旨依議欽此將原奏咨行到奉等因查原奏內稱東三省新疆等處可否比照各省一律分發之處並請

飭下各該省督撫察看情形切實聲覆以臻完密等語臣等竊維用人之道必知其所長而後試以相當之事從前司道府縣皆無一定必需之資格而取士亦僅以普通之文字不得已以班次定補選以繁簡定缺分以掣籤配省分以到省之先後爲比較以本班之花樣爲遲速其意蓋在於杜取巧戒躐等而於本員之才識地方之治安則以責之督撫當無事之時苟且敷衍吏治日汚卽使朝任實缺暮列彈章不獨地方已受其害卽欲另委賢能格於種種之部例勢不得不委曲遷就以期合格是以有軍務河工省

分始有奏調之請原奏謂奏調固以矯舊制之失韙哉斯言然亦時會所迫出於事之不得已也今東三省初改行省亟應奮拔人才寬除文法而論者輒與內地省分相比夫東省之受制於兩強非一日矣繁盛之區外人雜處鐵路所至主權漸移干涉侵漁之政策相逼而來抵制肆應之機宜少縱卽逝是以各屬地方官吏概須略講外交試辦設治之官大率皆闕邊計此則三省缺分之實情有萬不能與內地並論者至若路鑛森林畜牧農墾大利所在尤啟戎心彼族以專門之才隨處布置強權之力肆意擴張是我已失之權利與夫未闢之富源既賴羣策羣力以爲對外之方自必博採旁搜冀獲得人之效故每有差缺不憚破除常例慎選賢能而勝任愉快者尙苦十不獲一所有奏調人員雖難求備而一才一藝要必因材器使以竟其長至於投效一途已經嚴定限

制認真考選曾將辦法奏明在案是三省用人一事以其責備甚重稱職極難需才固較內地爲殷而取才亦不得不較內地爲刻地勢時局實逼處此卽內地之軍務河工亦不足同日而語也今若比照各省一律分發則不問才智奚若皆可循例前來雖資格相符而得失之數殆與投效無異且投效如不合格尙可卽時擯斥此則紛紛到省勢難過事苛求揆之東省情形似於拔取真才之道尙有疏略今擬除奏調人員應照新章辦理投效人員照前次奏定限制辦法外所有分發一項事當創議之始擬請就三省地方情形略爲變通限定以兩項人員爲合格一爲舉貢考試授職之員一爲遊學及各省專門學堂畢業授職之員其他項人員概免分發庶幾新舊人才分途並進於振興內治鞏固主權可有裨益臣爲三省將來計爲

國家大局計實不敢遷就一時致滋貽誤總之我國考試官吏章程尙未大定故用人之法皆不免一偏之弊侈言破格恐開倖進之門而例案徒拘足以範庸流亦足以困才雋數十年上下因循人才缺乏其弊未嘗不由於是臣蒞東二載目覩外勢之伸張情形已極危迫以爲內政外交皆須廣儲專門人才寬除文法以爲策勵然後實力充足而外患可以少戢卽此變通辦法亦尙屬目前之計合無仰懇

天恩俯念三省地方重要

飭部採取臣議另定暫行分發專章以拔眞才而濟時局所有遵議變通分發情形緣由謹恭摺覆陳伏乞

皇上聖鑒訓示

裁撤奉天府縣司獄典史員缺片

再奉省開辦模範監獄及建築工竣各情形業經先後奏明奉旨允准行知在案伏查新監成立部定官制管獄既有專官該奉天府司獄承德興仁兩縣典史員缺均在議裁之列所有興仁縣典史則因興仁縣移設撫順推廣撫順地方審判廳業將該典史一缺先行奏裁現在承德縣舊有一切命盜雜犯均經移入新監該府司獄並醫學正科暨承德縣典史各員缺並無專責均同虛設自應查照奏案一併裁撤以省繁費至准補奉天府司獄劉柏承德縣典史楊裕民應各以對品相當之缺另行酌量補用除咨部立案並將該司獄典史文卷印信鈐記飭由該管府縣查明分別存案繳銷外理合附片陳明伏乞

聖鑒

建築奉天高等並承德地方各審檢廳衙署摺

奏爲奏報建築奉天省高等並承德地方各審判廳及檢察廳廳署情形恭摺仰祈

聖鑒事竊臣於光緒三十三年十二月間具奏開辦奉天各級審判檢察廳摺內聲明將來另行建築廳署當經奉

旨允准在案伏念吾國司法事宜甫謀分立東三省係陪都重地特奉

明諭先行試辦爲各行省樹厥風聲自應建築廳署以資辦公而規久遠惟東西各國法署規模均極壯麗誠以國權所在法律獨尊不得不特別經營期於完美用意至爲深遠奉省初設法庭固不必徒壯外觀亦不可過於簡陋茲據奉天提法司使吳鈞轉據高等審判廳廳丞許世英署高等檢察長汪守珍等呈稱高等據全省審判最上之階地方受理重要及不服初級之訴訟省會之

區廳署實未便終於遷就開辦借租之房屋既已狹小地勢又均非適中原係一時權宜於實事上殊形窒礙矧近來民刑案件日有增益必須添設法庭擴充房舍尤應先時豫備請予建築奉天省高等並現時承德地方兩審判檢察廳署等情當即批令相擇地址並飭民政司會同派員勘估工程擬繪圖樣旋據該司等擇定省城小南門內舊通濟倉地址及西首官有隙地一區約一百六十方丈足敷建築廳署之用並繪就平面圖樣上下二幅呈稱參照東西各國法署規制計新式樓房一座樓下四周分蓋羣房高等地方各占其半向北開兩廳公共正式大門非有要事概不輕啟東西兩面各開一大門爲高等地方兩廳平時訴訟及辦公人員出入之所內合外分俾一般人民知所區別而兩廳事務較易貫徹權限亦較易清釐地方看守所則另蓋於該地址西南缺

角所官醫官書記辦公住室緊相連接既於全局形勢利便又距離咫尺自無防範不周之虞此布置之總綱也樓上四隅分設民庭四庭樓下四隅分設刑庭四庭取其彼此各不相擾問官不至以紛繁淆亂視聽人民不至以錯雜變易情實且光綫極爲軒朗氣象亦頗整嚴每庭各設評議室並推事主簿錄事書記等辦公退休各室互相聯貫典簿所爲司法上一切行政之機關收案室爲訴訟人未入法庭之豫備均宜於樓下適中明著之地以便時時與人直接其兩廳長官辦公休息均在樓上坐南正面房間居中調度自易周密樓上東西兩旁卽分兩廳檢察官員辦公休息室樓上坐北正面設一會議室以爲兩廳或全體會議事件時之用樓下坐北正面設一大法庭以備大理院有借庭特審之案或兩廳遇極關重要案件人數太多者皆用之樓下坐南正面分爲

兩廳接待室又樓上兩廳各設儲卷室與推事主簿等辦公室相連既便於檢察復不患遺失樓下地方廳設豫審庭四庭亦卽在推事主簿等辦公室後取其秘密兩廳共於樓下設儲物室凡應保固之件悉隨時庋藏其中此樓房上下建築分配之大概情形也至樓下四周兩廳大門南北各設收發室寫狀室承發吏辦公室號房守衛室民刑事男女及特別待質室又擇圍牆外西南隙地分蓋書記承發吏住室茶役庭丁住室廚房茶爐餐室浴室廁所均各釐定秩序差別等級不求美觀但取適用此又樓下牆外羣房之粗爲籌畫者也以上各節經公同擬議按奉省最近各項物價約估工程數目計樓房上下共一百一十間樓下四周羣房連大門共三十四間看守所十八間所官醫官書記辦公住室共五間書記承發吏住室茶房庭丁住室共二十七間餐室共三大

間廚房茶爐浴室共十間各等廁所共十間又四周圍牆共一百五十丈坐北正式大門設鐵欄杆四十丈估計工價繪具圖說請核定施行等因前來經臣飭交民政司轉由工程局核實覆估極力撙節用公家舊存之大木料及鐵道所存枕木約可折價銀三千五百餘兩由省城罪犯習藝所承辦以犯人充作小工按平民工價酌減二成發給約可省銀二千四百餘兩用勸業道造磚廠所造之磚只給運費又可省銀七千四百餘兩統核全部工程實共需濬平銀三萬八千餘兩除折抵價款外公家共應發現銀二萬七千餘兩飭由度支司如數籌撥將來作正開銷已飭於上年十月開工現值春融解凍工作咸宜計夏末秋初可以蒞事將來法庭氣象煥然一新司法精神益爲振起促文明之進步謀國權之擴張固亦經營茲事時所深爲希冀者也除將圖式咨送法部

正書卷二十一
查照並俟工竣時將報銷冊咨部備案外所有建築奉天省高等
審判廳及檢察廳並承德地方審判廳及檢察廳廳署緣由理合
恭摺具陳伏乞

皇上聖鑒

奉省遵章籌指諮議局經費的款摺

奏爲遵章籌指諮議局經費的款以資應用恭摺仰祈

聖鑒事竊奉省諮議局籌辦處一切籌備情形業於臚列第一年
期成績摺內詳細奏陳在案惟是選舉告竣以後諮議局卽當成
立所有開局事宜均應預先籌畫謹按奏定諮議局章程第五十
三條內開諮議局經費由督撫籌指專款撥用其款目分議員旅
費議長副議長及常駐議員公費書記長以下薪金雜費預備費
五項第五十四條內開前條公費及薪費數目由督撫定之其旅

費雜費及預備費由諮議局會議預算數目呈請督撫核定等語查此項經費臣與該處人員公同核計極力撙節每年須銀二萬兩之譜當經飭令度支司預先籌定藉資應用茲據度支司呈覆請將此項經費在奉省徵收稅捐項下動支惟係動用正款例應先行奏咨立案以昭慎重而便報銷除將籌指情形咨報度支部外所有遵章籌指諮議局經費的款緣由謹恭摺具陳伏乞皇上聖鑒

遵 旨責成府州查禁苛捐苛罰及門丁改充委員等弊摺奏爲遵

旨責成府州查禁苛捐苛罰及任用門丁改充委員等弊並瀝陳奉省歷來辦理情形恭摺仰祈

聖鑒事承准軍機大臣字寄宣統元年二月十九日奉

上諭御史李浚奏禁止苛捐苛罰責成府州考察所屬及門丁報捐官職作爲委員一摺著各省督撫按照所陳各節認真整頓分別考覈查禁原摺著鈔給閱看欽此遵旨寄信前來仰見

朝廷勤求民隱澄叙官方之至意莫名欽悚當經嚴飭各州縣一體遵照並飭各廳司道府隨時認真考覈查禁勿稍徇容惟是奉省從前吏治不振積弊素深以賄賂而判訟獄以猥賤而廁仕途者誠不敢謂必無其事自改設行省以後經臣督飭各屬時行甄察重懲貪吏嚴禁蠹丁秕習漸已盪除官僚尙能謹飭謹就該御史奏陳各節證以東省歷來辦理情形爲我

皇上陳之查該御史原奏內稱地方官假公濟私不可究詰始則鋪戶捐富戶捐地畝捐牲畜捐甚至零星什物亦莫不有捐一節

查奉省富戶捐款從未徵收牲畜捐分省城外城兩項省城創於順治元年各外城創於順治十七年嗣由前任將軍臣趙爾巽奏裁監督衙門另行設局專徵臣蒞任後復改定章程併歸捐局兼辦所得捐款一律解歸度支司存用考其沿革由來久矣鋪戶捐係由前任將軍臣廷杰任內籌辦專作爲警察衛生經費地畝捐係由前任將軍臣趙爾巽任內籌辦專作爲巡警學堂經費均經奏明有案良由興辦新政需款浩繁不得不就地抽捐以資整理該御史所稱以地方之財辦地方之事又云取之於民者還之於民固已洞見及此是故論者但當考究夫設施之是否適當款項之有無虛糜至抽集稅捐以行新政固屬通行之辦法實亦不易之成規也此外各項雜稅從前名目紛繁臣下車之始卽仰體深宮愛民節用之懷於期糧等捐則實行裁革於車捐等項則酌

量減輕其餘糧貨各項捐款早經前將軍趙爾巽任內一律定爲統捐亦經嚴飭儘徵儘解涓滴歸公中飽悉除羣情頗洽而且收捐解款胥由委員經理聯單規制防弊綦嚴在委員且不得上下其手地方官吏更無從假公而濟私矣此奉省辦理稅捐之大略情形也原奏又稱捐之不已繼以苛罰罰之不已繼以枉法等語查奉省自審判廳成立之後所有訴訟費用均已訂立專章公布官民一體循守核其數目較之直隸各省尙爲微薄各屬之未設審判廳者前經臣釐定辦法通飭遵行將來推廣審判自當悉歸一律至罰金贖罪等項銀兩業由法部奏定有案奉省無論已設審判未設審判各屬現均遵照部章定額尙無任意苛罰之弊此項罰贖銀兩悉數撥歸罪犯習藝所充用作正開銷彙案報部以憑查核實與該御史所稱地方官所罰之款并不詳報上司者情

形迥有不同牧令爲親民之官責任綦重臣於所屬州縣各官接見則嚴加訓誡平時則密行考覈間有貪墨卑瑣之員或由該管道府隨時稟揭或由臣詳查屬實均經分別情節量予懲處重則立行參革輕則撤任究查兩載以來不敢謂東省吏治遽有起色而飢法營私以及彌縫掩飾上下相蒙之陋習固已逐漸廓清而掃除之欽承

明詔益當誠諭寮屬共砥廉隅此又奉省訟獄罰款之大略情形也至於門丁報捐官職作爲委員一節該御史原奏係專指東三省州縣而言臣查從前東省因仍舊習州縣衙署悉用門丁嗣因革除門丁積弊於是收發文件另委專員而有辦事官之名目改革之始或不免門丁等類易名納粟妄廁其間臣蒞任後察知門丁出身卑賤罔恤名譽假以仕籍益將恣睢凌亂其弊更甚於前

是以嚴飭各屬州縣一律改用委員其有需員襄理者經該牧令隨時稟請卽由省酌派前往並將所有辦事官名目實行革除現在州縣各員尙無敢以家丁私人濫司收發者設有此等罔上行私情事自應由臣遵

旨認真查禁分別參處驅逐以清弊竇而儆效尤所有覆陳整頓東省吏治情形緣由理合恭摺具奏伏乞
皇上聖鑒

興安嶺荒地改收經費片

再興安嶺迤東荒地前經奏設興東兵備道專司該處墾務並搜羅青山黑山零星各荒以興地利奉

旨允准在案旋據試署興東道慶山呈請將所放荒地每晌統收經費銀五錢嗣以嶺東之地與俄界僅隔一江地處極邊無人認

領復據該道請將嶺東每晌改收經費銀三錢嶺西仍收銀五錢現據報稱嶺西荒地已於三十三四等年共放出二萬零三百零三晌收進經費銀一萬零一百五十一兩五錢先後呈解到省其原派丈地委員一起開支薪工等項卽於收款內照章動用另案咨部核銷現在嶺西各荒因距該道所屬較遠勢難兼顧已飭由就近地方官辦理其本年出放嶺東各荒應卽遵照新定沿邊墾務章程每晌改收經費銀四錢以歸一律等情據墾務總局請奏前來臣等覆查無異除咨部外謹附片陳明伏乞

聖鑒

江省附郭荒地分別撤佃以補官兵生計片

再上年二月間臣世昌會同前署撫臣程德全奏陳酌籌本省旗丁生計摺內聲明將嫩江迤西省屬未經放出之荒酌留數段作

爲省城無地官兵生業奉

旨允准在案當於上年四月間飭由旗務處會同墾務局揀派丈地委員一起於江西一帶按照附郭放荒圖冊就尙未放出地段挨次踏勘旋據先後報稱共墾地兩萬二千餘畝其餘荒地非經旗屯挨領卽係沙窪碱甸不堪耕種惟省城官兵生計若按原奏所定地數照撥尙屬不敷甚鉅查各旗屯報領附郭荒地所交價銀不及三分之一迭經多方催繳終屬抗延現經臣等屢飭嚴定期限如再逾限不交卽行派員赴段查酌情形分別撤佃以補官兵生計之不足藉副

朝廷軫念旗僕至意所有勘查此項生計地畝員弁需用薪工車價等項已飭司由正款項下動用應請

飭部先行立案統俟劃撥竣事再行報部核銷除分咨查照並將

各城應撥地段分行一律妥爲辦理外謹附片具陳伏乞

聖鑒

擬請分籌吉林邊務經費摺

奏爲擬請分籌吉林邊務經費以重邊防而資籌備恭摺仰祈
聖鑒事竊查吉林延吉廳一帶地方邊務重要前經奏請飭部續
撥常年經費六十萬兩奉

旨度支部議奏欽此嗣經部臣以部庫支絀無款可撥議令就地
籌措等因奉

旨允准咨行到奉臣維地方行政之費用原應視地方入款之多
寡爲衡果使無款可籌卽可酌量停緩無如延吉一帶地方昔爲
邊疆要塞之地今且爲交涉競爭之場自間島事起用人行政極
意經營一年以來基礎漸立故其事雖未解決而主權未嘗稍讓

者固由於用人之效力亦全恃部撥之的款乃得實地籌備不託空言也今界務未知所決凡夙昔之所規畫者若以無款停辦竟棄前功則外人方極力經營攘取利權反客爲主實事上多一分布置交涉上增一層要挾則不得以省費之故爲敷衍一時計者亦勢使然也乃查原奏於延吉邊務重要之故亟應全力對待籌備情形皆未慮及第曰該省得此鉅款若將應辦事宜分別緩急次第舉辦樽節動支當可不虞竭蹶無如當日人渡江時盛氣無前實圖占領臣世昌適派吳祿貞前往調查與之相遇卽預籌布置因應之策及奏派臣昭常督辦邊務與幫辦吳祿貞昕夕圖維以爲欲杜隱謀當充實力於是分設派辦處支配憲兵調遣軍隊築市場開屯墾通道設學堂查戶口建造營房開闢實業徒以款項祇有此數故逐漸敷設未遑大舉而其效亦僅止於相抵是

前所設施並無緩急次第之可分亦無有不撙節動支之處原奏又謂東省由部歷次撥濟及籌撥移駐軍隊等款已有六七百萬之多查調東陸軍一鎮兩協該餉由陸軍部及北洋支發計授所關自難移作別用其他則爲鎊餘一款已將歷次動用分別請銷更無餘款可作邊務經費至以地方之款辦地方之事臣等自應勉爲籌措吉林沃野千里物產饒庶誠如部言所惜者無費本以經營之斯交通不便棄利於地耳至謂前任將軍達桂將各項稅捐略爲整頓歲入驟增至數十萬兩其時正當辛丑和約甫定之後地方凋敝甚於目前以區區稅捐辦理綽有餘裕等語實爲不知外間情勢之論當日俄用軍之時各輸巨貲以布散東省境內糧草貨物得利倍蓰而牛馬稅一項亦逾尋常十倍前長春府知府王昌熾於牛馬稅項下溢徵不報爲人所劾亦卽在此時是地

方雖駐外兵而商民交利勝於目前已革吉林將軍達桂於煙酒木植稅派豐年經理百弊叢滋又值外貨充盈商貨暢旺之時果使涓滴歸公當不止數十萬兩而部臣乃謂辦理綽有餘裕不知指辦理何事而達桂居官情形早在

聖明洞鑒之中如部臣舉以相比例未免令天下辦事之人寒心惟是部款支絀與吉省同一爲難自是實在情形而邊務經費交涉攸關又爲必不可省之款臣等再四籌商無論吉省如何爲難擬任籌邊經費三十萬兩其餘三十萬兩合無仰懇

天恩仍飭下度支部指撥的款以應要需並擬先籌辦一年俟界務解決或可省併辦理倘另籌有款亦卽奏請停撥總之延吉邊務至於今日萬無中輟之理蓋爲各國之所注目咸以經營與否

卜我

國家之是否重視領土臣世昌交卸在卽苟可息事省費豈不知庫款之爲難第以時會所乘

朝廷注重邊陲委臣等悉心籌畫若非接續興辦深恐主權一失解決尤難用是日夕焦思勉籌全局以期合力維持此臣世昌縷縷愚誠不敢有絲毫成見於其間當爲部臣所共諒而不得不披瀝籲懇於

君父之前者也所有擬請分籌吉林邊務經費緣由謹恭摺具陳伏乞

皇上聖鑒訓示

奉省設立方言肄習所摺

奏爲奉省設立方言肄習所造就吏才通達外情以資治理恭摺仰祈

聖鑒事竊維

陪都重地密邇強鄰交涉繁難甲於他省況日俄人之麇集東土者日眾彼方開設華語學校使中下社會人民皆能操吾國語言窺我政治上之能力侵我工商之生計而我士大夫筮仕此邦多不諳外國語言文字情勢隔閡未免相形見絀是涉獵方言尤爲奉省政治上第一要義所關至重未可闕如當與廳司籌商於省城舊有瀋陽書院前圖書館內開辦方言肄習所一區派奉天左參贊梁如浩右參贊錢能訓爲該所監督釐定規章酌籌經費選派教員以英日俄語言文字爲必修科凡在省充差以及候補人員均准各具願書報名入所肄習分甲乙兩班按日於夜間輪課甲班兩年畢業乙班三年畢業業於上年冬間開辦各教員均能熱心教育每當夜課聚集政界中人分班切實講求所有當差人

員既無誤日間應辦要公而焚膏繼晷又復增進智能免曠餘閒
勤求實學洵足以造就吏才有裨治理將來內政外交獲益良非
淺鮮現在興辦已及半年各學員皆知奮勉圖功日求進步較諸
他種校舍爲尤盛自宜永垂久遠以勵潛修茲據該監督呈請奏
咨前來除咨部立案外所有奉省設立方言肄習所緣由理合恭
摺具陳伏乞

皇上聖鑒

創辦奉天八旗工藝廠摺

奏爲創辦奉天八旗工藝廠以廣生計而興實業恭摺仰祈
聖鑒事竊奉省爲八旗根本之地滿漢雜處畛域不分唯旗人世
蒙豢養素乏恆業生計情形實較艱困今欲爲八旗籌生計自應
謹遵迭次

諭旨以實業教育爲重務養成自謀生活之力以漸去專恃俸餉之心爰飭旗務司創辦八旗工藝廠招集旗籍藝徒設額五百名分設木工鐵工陶工籐工漆工染工織工縫工毛工紙工十科附設講堂授以普通教育聘募工師分科傳習尤注重於建築一門蓋以邊荒一帶近辦屯墾亟待推廣將來工徒學成畢業派往各處隨地經營耕築並舉成聚成邑之效不難立睹以殖民行實邊之策卽以歸田爲出路之謀現已勘定省城東邊門內草場官地設廠試辦至應用開辦經費計新建廠屋講堂及宿舍等處共三百七十餘間需銀三萬餘兩購備各科材料成本及製辦器具等項需銀二萬餘兩擬以接管將軍舊署歷年積存辦公各款四萬餘兩提撥備用常年經費計薪水膳費及雜支等項每年需銀約二萬兩查有馬乾制錢生息木植變價生息及充公地租每年約

共合銀一萬八千兩向作馬乾操賞及辦公等用現均另款存儲擬卽儘數提撥如有不敷另行籌補一俟辦有成效再當隨時設法擴充務使八旗子弟人人皆能各執一業以爲謀生自立之基實於籌畫旗人生計裨益非淺據該司開具辦法呈請立案前來查臣等於上年奏設吉林旗務處工廠摺內曾經聲明奉天近亦創設八旗工廠茲據該司籌款設廠已飭其迅速興辦合無仰懇天恩飭部立案以垂久遠所有創辦奉天八旗工藝廠緣由謹恭摺具陳伏乞

皇上聖鑒訓示

奉天設立農業講習所滿蒙文講習所片

再臣等上年奏請設立農官一摺業由農工商部議復奉旨依議欽此欽遵在案查前奏農政廳職員以農科實業畢業生

爲合格其宗室覺羅滿蒙八旗子弟及在籍紳士均可充選一以爲旗員廣任用之途一以爲旗丁授生計之學惟農業事屬專門非學識經驗兩者兼全必不足以備應用而獲實益八旗各員世居本地人情風土固所夙知而於農事一門未必皆能深悉不先令其實習啟以新知又何能勝重任而致成效爰飭旗務司會同勸業道勸設農業講習所考取宗室覺羅八旗官紳人所肄習設額一百名限定一年畢業專授農業兼習法政以備改補農官之選又以奉省地處東邊滿蒙境界相接將來經營蒙荒一帶尤非熟習當地情形兼通滿漢文字者不辦因附設滿蒙文講習所設額六十名以滿蒙文爲專科仍注重農業墾牧等學以求實濟限一年同時畢業分別派辦旗蒙事務均於本年二月間開辦計需開辦常年經費合共八千餘兩現由各城旗倉徵收盈餘項下酌

提數成隨時撥用並由旗務司總理其事此項人員將來畢業考試自應分別等第酌量補用藉廣旗員出路除俟畢業後再將履歷分數清冊咨部備案外所有奉省勅設農業講習所滿蒙文講習所緣由理合附片具陳伏乞

聖鑒

錦州創設八旗工藝分廠片

再錦州義州及所屬甯遠州等四路九邊門向設八旗駐防戶口至繁生計尤絀不可不豫爲籌畫自上年副都統裁缺後臣等派員前往調查整頓以錦州地脈豐腴物產饒富交通便利於興辦實業最爲相宜擬於該城籌設工廠一處名曰錦州八旗工藝分廠專取旗丁入廠學習定額一百名先就本地所宜暫設鹽醃皮革等科與奉天八旗工藝廠聯合辦理計需開辦經費約九千餘

兩常年經費五千餘兩擬將裁缺副都統隨缺地租及應得旗倉
旗地盈餘津貼辦公等項分別撥用不敷之款隨時由省設法籌
補現已購定民房八十餘間於本年二月開辦所有章程均係參
照省城八旗工廠辦法合無仰懇
飭部一併立案以期經久謹附片具陳伏乞

聖鑒

退耕堂政書卷二十六目錄

奏議二十六

敬籌大計摺

江省遵設清理財政局摺

續陳江省第二年期籌備憲政情形摺

遵覆東省無庸添練土兵摺

設立營口新民各級審檢廳摺

奉省遵設清理財政局片

調東陸軍第一混成協常年餉項由奉天鹽釐款內應付摺

吉林設立農事試驗場摺

吉林度支司接收前戶司移交款項摺

吉省遵設清理財政局摺

吉江兩省劃撥大通縣地面改設縣治摺

籌設奉天高等學堂摺

奉省增改廳縣劃分疆界彙案具報摺

退耕堂政書卷二十六

天津徐世昌

奏議二十六

敬籌大計摺

奏爲時局阽危敬籌大計以備

采擇披瀝直陳恭摺仰祈

聖鑒事竊維中國近十餘年來民氣囂張強鄰環伺新舊雜進政
策屢變發端甚微爲禍至厲艱難困阻已非一端

先朝憂勤惕厲洞燭幾先

獨運宸謨兼資眾說

特頒預備立憲之詔以爲萬世根本之計至隆至盛不意去年十
月間先後痛遭

德宗景皇帝

孝欽顯皇后之喪薄海內外震驚失措幸賴

宗

社之靈恭承

孝欽顯皇后之命以我

皇上人繼大統主器有歸又命我監國攝政王行負屐之成規祇

率百僚夾輔

王室數月之內政令畢行

宮府晏安朝野翕服外人盡禮悉泯猜疑又復

屢頒詔旨一秉

成議定憲政敷設之次第戒臣工任事之因循籌辦海軍嚴禁鴉
片庶幾開百度維新之治立萬年不拔之基慰四海望治之心成

兩宮未竟之志官民上下靡不延頸跂踵而仰

繼述之隆規也獨是環顧時局人心俶擾言論紛靡或以趨附詆
誹爲心而不計事實之當否深恐忸忸覘覘咸以保持祿位觀望
徘徊而不復殫慮竭謀以圖進步當國勢積弱之際外人對待狎
侮愈深播弄愈烈財政空虛兵力單薄懲前毖後允宜開誠布公
明定宗旨合謀協力以與天下更始若復各懷私利與俗浮沈造
因雖微一旦釀成事變挽救已遲恐憲政未及實行而全局已不
堪設想臣獨居深念默觀危疑之局辦事之難悽悽孤忠難安緘
默用敢不避忌諱敬籌大計撮舉綱要爲我

皇上陳之一曰定國是以正人心外人窺伺之切臣民屬望之殷
大局安危皆始基於一二年中初政之得失今

朝廷預備立憲矢以必行似宗旨既定羣喙亦幾乎熄矣然朝臣

正言卷二十一
疆吏其精心籌畫者幾何言事者或無公理任事者將有戒心議論紛歧是非無定甚且外人蹈隙亦施其間諜之謀近復民氣不靖黨派紛紛匪徒煽惑一有藉口滋擾恆多是故無間執異議之主持則羣臣救過不遑而國家無事業無鎮定人心之作用則在下危言聳聽而天下多亂萌是皆國是不定有以致之也其在歷朝改元之季必有國之重臣嘉謨正論直陳天下安危大計者故得上下一心不歧所向今我

皇上踐阼之初利害得失之所在盈廷臣工孰不應披瀝直陳上備

睿擇豈可仍以揣測之私致淆觀聽况外患如此其逼迫內政如此其泯棼積弱之由較前更甚人心浮動見異思遷臣愚以爲慮於此時力挽時艱盡除成見速定政策與天下相見以誠凡一切

建言行事悉以立憲政體爲指歸非是者罷斥之不宜示人以不可測而必以剴切宣布取天下之人心趨於一途則百爾臣僚必將易其因循嘗試之舊習而殫力於功名四海之內見立憲之政將次第舉行也憬然從風禍慝不作反側之輩亦皆翻然爲我立憲之民而羣言得所折衷人心有所倚著孟子所謂定於一者是也否則條教屢頒虛文以應

朝廷之督責雖嚴而臣下之精神不屬下之與上無休戚之關係國之與家無聯合之組織卽日言立憲考其所爲乃適與立憲相背恐九年之中日出於崑陵恣肆而惑亂且未已焉國是既定則中外咸釋然於

朝旨之所在必使人人有急公奉

上之心而日出以寬廣和平以赴事功不以敷衍旦夕爲苟安之

計則邦本已固人心已安是爲初政最要之機括而繫全局安危者也一曰寬文法以攬人才人才之興不在爵祿權位之操縱而在寬其格以爲之招今世變亟矣若者爲外交專對之才若者爲邊疆要塞之才若者爲控馭藩部之才其他若財政若教育若法律若軍政若警察皆爲重要之端苟非其人弊乃日滋卽至農商工藝輪路電郵何一非專門之學故每辦一事必須有多數人才爲之謀畫輔助以期於成且中國幅員之廣治理之繁其需才也倍多而取才也無養成之方無任用之法乃復困之以資格限之以例章無智愚賢不肖胥納之於掣簽輪補之中用才者無兩全之道懷才者鮮自試之時而天下乃頽靡失敗於無形又其甚者詭異之士或別爲黨派以相炫惑且或甘爲外人所用良可歎也是故預備立憲之時代必廣攬人才以爲之基而人才奮發之原

則必弛去一切文法而行廣大之政令夫士生今日尙未受普通完全之教育斯全才不可多見亦惟量其器識策其事功毋以一眚而沒其長毋以求備而苛其責抗直者優容之疏闊者涵宥之有駕馭羣才之量甯使偏駁奇誕之彥下至一長一技皆思竭智程功於

君上之前而不使緘口廢事以生其惟恐獲罪之念斯拔一才而同類者思奮非同類者亦觀感而起憲政前途必有共擔責任而躋於實行之一日者迨至天下之士知

朝廷之兼容並包各出其智能以思效用也則爲之釐定官吏任用法及行政裁判法進退有方使仍受範於法律之內而今日用人之例則斷不宜施之於預備之時誠以九年之中新政繁興卽如選舉如審判如法律如統計調查督撫通行各屬地方官奉合

正書卷之二十一
駭汗不知所爲且有各項表式無從填註者強不知以爲知貽笑
尙小而貽害實大何莫非用人之舊例有以階之厲也又以督撫
者爲主持預備立憲之長官九年接續期限甚長非不稱職及不
通新政者自不宜屢爲更調以致政令不一無所適從昔者李鴻
章督直隸三十餘年內外安堵功業爛然近如張之洞督兩湖十
餘年新政淳興氣象一振久任之效前事可師矧爲推行憲政之
時不獨長官宜於久任卽地方官責有所歸非如昔日普通之吏
治亦不宜紛紛更換新舊交替之間意見雜出最足誤事是又官
場之習慣而爲辦事之障礙也臣愚以爲
初政頒行必以羅致人才爲首務尤必不拘一格而寬以待之天
地生材枉直並蓄

朝廷用才胞與同歸天下無不可用之人卽天下無不能成之事

誠以天地之量爲量

覆幬所被翁受宏施海內之士聞風興起皆願出其所學以供奔走斯全局之精神爲之一振而人才不可勝用矣一日通財政以劑國用生財之道愈通則愈暢理財之方愈節則愈審今中國歲入之數較從前爲倍增而需款急迫中外束手羅掘幾窮者何哉則以狃於量入爲出之說知蓄儲而不知流通胥天下之財而均以行政費耗之及出入之不足相抵則並廢其所辦之事若之何不窮且困也蓋財爲辦事之資國無事而不立辦事愈多則用財亦愈多而國亦愈強盛財不過爲辦事之籌算作記珠耳所以貴流通而不貴節嗇也今之理財者鑒於舊日之失於是明定年限截清舊款欲以預算決算之術整齊而規畫之於各省均設監理財政之官略仿會計檢查之意庶幾逐漸清釐疆吏無濫用之事

部臣有綜核之責實爲清釐財政應辦之一端然於目前理財之要恐仍無以濟其困耳理財之精意必以生財爲根本而使之周流通達於世界能散財乃能斂財斷非計較區區出入之數所能爲功也今所謂預算決算所謂會計檢查者則皆用財之事也全國歲入僅數千萬而已正使清釐得當不敷之款更將何所取償各省旣自顧不遑中央亦愛莫能助款不加增事仍坐廢矣今部臣亦苦心經畫百計籌維又時時羅致通達財政之員而討論之而有時仍不能達其志之所欲爲者實緣該署舊習深固一時未能盡除耳夫中國財權從前皆分寄於外省部臣第總核簿書例爲准駁而已溯自中興以來如軍務如邊防如河工如水旱偏災凡特別用項則皆令就地籌款及集有成數則又令聽候部撥督撫無可如何於是有內銷外銷之分亦且有不報部者每遇銷案

輒以舊例相繩而各省亦不憚委曲遷就以求合簿書鞅掌日從事於作偽之途如折減如扣平如銷費尙其事之顯見者也近數年來以銀價錢價消長之故外省州縣以虧累褫職及不敢到任者比比皆是凡向稱富庶之區亦多上下束手財政不修將成坐困督撫州縣皆爲

朝廷親民任事之官必須有以恤其隱而安其心寬其格以程其功今將以五年之內而清釐之則必去向例之所謂報銷者而以核實之法行之斷自宣統元年爲始欲盡去外銷名目則必劃清國家稅地方稅欲預算決算之實行則必熟權各省應辦之事當量出以爲入不當量入以爲出欲使財權集於中央則必擔任應用之款而不令各省自籌然此仍就用財言之而非理財之計畫也理財之計畫則當流通全國之財不當以區區數百萬存儲部

庫爲至計並當與各國之財互爲流通不當斷斷於一國出入之數中國經常入款不過地畝關稅釐捐鹽務數端整頓挹注有司之責而非理財之事也若銀行實業路鑛航電工廠之屬國家亟應出資本經營提倡爲天下先除與民爭利之陳言而令在官之有巨資者咸競爭於生利之事而毋爲外國銀行所吸收爲之定獎勵之條頒優異之賞此風一開南洋各島之華僑必有不忘祖國挾巨款而來營實業者如此則散全國之財於境內人工地利次第興舉不斤斤於搜藏有限之庫款而實力充足周轉自豪藏富在百姓大利仍在公家此流通全國之財之說也萬國交通利益互換我之財權不能出國境則種種虧損受害甚多往者我無幣制悉聽命於彼之鎊價折耗無窮今將規定幣制矣然用銀之國終不敵用金之國是雖虛定本位亦當以用金爲斷我無與各

國交通之銀行而我之內地各國銀行林立儲蓄匯兌遂隱以吸取財權今亦已設立銀行矣資本既微國內且未徧及更何論於分設各國是應極力擴充儲大資本設分行於歐美各巨鎮凡出股票便匯蓄通紙幣爭商業一切權利皆與各國平等而出入之勢均矣各國皆以借國債爲發達事業之原故凡行一大政興一大利往往借債爲之中國則以借債爲大可懼之事故非萬不得已莫敢言借債者不知以他國之財散於我之境內商民已蒙其利况以爲生利之母則將來所入必不止於此數抵押利息特一轉移間事耳此與各國之財互爲流通之說也今中國財力竭矣無耗費之款則行政無所挹注無營運之款則利源不能發生臣愚以爲宜通而不宜節者此也一日講信睦以聯外交自各國通商以來辦理交涉數十年士夫昧於條約之利鈍動輒失敗或以

剛強召侮或以隱忍貽羞今世界大同當事者亦稔知各國之政教禮俗及公法各項之學周旋壇坫較易爲功庚子以後外務部所辦各項交涉大政悉皆周詳審慎無大損失且有爭回權利者較從前之總理衙門時已判霄壤蓋已創鉅痛深漸知曩日之失矣然積弱之勢已成約文之誤難改故欲以商埠爲限制而土貨仍從其製造以雜居爲禁令而游歷乃遍於城鄉甚或一主教而干預政權一公司而拓殖地利揆其原因一由於閉拒太深及事變相尋而藩籬愈抉一由於敷衍畏事故主權漸失而侵越無窮也夫有約之國理應平等乃屏我於公法之外以法律不同之故竟無屬地之權以利益均霑之文遂成連橫之勢而日俄協約日美協約且倡言共保中國之和平因以知交涉之道過剛則猛摧過柔則濡進固貴有實力以盾其後尤必有宗旨以爲之先也今

皇上御宇之初正外人屬目之始凡興革之端必當注視全球以爲久大之規畫無使外人生輕視之心而謂我不足以有爲乃一變爲協商分割之計若夫事關國際必應有嚴肅之精神有正當之辦法有委婉操縱之詞令而尤要在洞識外間之情勢形狀不爲甘言危語所乘其或暴動之行爲非理之對待我固嚴戒官吏商民無稍侵犯而亦必嚴拒外人之嘗試方今萬國交通聘盟之酬答政策之平均互爲聲援亦互相防範孤立無助何以圖存惟是聯絡邦交尤以振興內治爲首要我之一舉一動各國皆環注於旁而以此卜我之能否常保和平維持睦誼日俄之於東三省英之於西藏及揚子江流域法之於雲南廣西德之於山東日之於閩浙熟謀深計莫敢先發者則欲觀我之內政何如倘其銳意經營合謀協力斯一變其侵略之主義而收均勢之效力未可知

也蓋國與國相對待同立於地球之上斷無一意孤行之事是內政者皆外交之後援也行一政發一令必目視全球合朝野上下之心思才力以貫注之而國基乃固即使一工一藝亦必有相師相競之功用而後有大同之治化嘗考泰西壤地狹小之國其政治良明工業繁盛亦卓然自立於強大之間而無有吞併之者可知講信修睦乃視我自治之能力以定其對待之方今我以人眾地廣東亞之大國

朝廷毅然定立憲之標準改良法律修明政教行之數年必可收修改條約之效果而此

初政頒行觀瞻所集臣愚以爲亟宜謀遠大之圖籌因應之策以銷其窺伺之心此又對外之至計而爲立國之最關重要者也凡此四端皆綜天下之全局計之其他或在憲政範圍以內或爲積

弊之應裁汰應更改者庶政萬端未遑殫述而要在鼓舞人心振刷志氣能使人人共擔責任斯功過皆有專歸而自無推諉因循之舉故事事必爭大局

溥寬洪如天之量定久遠不做之謀焚者而使之理危者而使之安偏敲紛擾者而使之正定是則立憲者事實上之精神而振起天下之人先後奔走以行此立憲者則在

朝廷總握大綱政從寬大王道蕩蕩遐邇同歸
初政之行關係

宗

社安危人民康樂固有如此之重且鉅者我

皇上仰承

遺憲締造艱難宜視爲開拓之時代不宜視爲守成之時代監國

攝政王綜理要綱萬邦所仰其負天下之任憂天下之心固必惕厲戰兢有臨深履薄之思而爲根本籌畫之計臣忝爲大臣同國憂辱邊疆待罪無補涓埃才識輅庸何知體要顧念時局日艱外強日逼

宵旰焦勞

付託至重全局之得失皆將於

初政基之此則臣愚戇之忱自忘淺陋而日思以芻蕘之獻披瀝於

聖主之前者也所有時局阡危敬籌大計以備採擇緣由謹恭摺具陳伏乞

皇上聖鑒

江省遵設清理財政局摺

奏爲黑龍江省遵設清理財政局謹將派員開辦情形恭摺具陳
仰祈

聖鑒事竊准度支部咨稱本部具奏遵

旨妥酌清理財政一摺光緒三十四年十二月二十日奉

上諭方今財政艱難內外交困必以廓清積弊確定預算爲先全
賴部臣疆臣和衷共濟各飭所屬共矢公忠按照所擬章程實力
奉行認真辦理等因欽此欽遵恭錄到江仰見我

皇上慎重度支力除積弊欽佩莫名旋准部咨奏定清理財政處
暨各省清理財政局章程行知前來竊維憲政之預備首在和眾
次則豐財蓋不和眾無以一天下之人心不豐財無以立萬事之
根本唯是欲求豐財必先理財周以冢宰制國用漢責郡國上計
書凡出入之有經實古今之通義苟財政或涉於紊亂卽百度無

望於修明方今民力維艱庫儲日絀司農徒爲仰屋之歎疆吏已苦竭澤之漁自非將全國財政設法清釐使部臣周知其盈虛內外悉除夫壅蔽何由立預算決算之準而爲裒多益寡之方此統一財權所以爲今日惟一之要圖也江省向稱邊瘠地未盡墾利未盡出歲入之款不出兩宗其一則大小地租及一切捐稅筦於度支司者也其一則放荒收價筦於墾務局者也綜計全省稅租所入不足以當江南一大郡荒價則早成弩末現計一年來所收止得三四萬兩其餘如鹽運屯墾均屬借款開辦須二三年後欠款償清乃有增入之數而邊防緊要新政繁多均屬竭蹶以圖其艱窘情形迭經臣等奏陳在案惟因款目之無多斯綜核較易爲力且以救貧之乏術故籌畫在所宜先茲奉

明諭周詳自應趕速欽遵辦理以光

盛治現於閏二月二十二日就本省公署前院遵設清理財政局
檄派試署度支使談國楫爲總辦墾務局總辦分省補用道何煜
爲會辦飭令並力籌維認真釐剔並刊刻木質關防一顆文曰黑
龍江全省清理財政局關防發交該局鈐用所用科長科員等差
先行擇要酌派數員俾資開辦俟正副監理官到江再行會同酌
核照章辦理至如何分年籌辦如何逐案報銷暨畫分稅項酌定
公費各事宜均卽次第遵章妥慎辦理所冀綱目備舉涓滴歸公
下以濟邊疆措畫之窮上以輔

聖世維新之治庶仰紓

宵旰憂勞於萬一除將局員職名並續擬辦事細則咨部外所有
江省遵設清理財政局緣由理合恭摺具奏伏乞

皇上聖鑒訓示

續陳江省第二年期籌備憲政情形摺

奏爲續陳第二年籌備憲政大概情形恭摺仰祈

聖鑒事竊查黑龍江省第一屆籌辦諮議局選舉各成績業於本年二月間專摺奏陳並聲明本年應行籌備各級審判廳清理財政暨地方自治各屬巡警等項事宜陸續另行具奏嗣復在省城設立清理財政局飭派專員照章清釐亦經具摺奏明在案其餘應辦各事亟應分別籌備次第進行以冀急起直追光輔

盛治謹爲我

皇上約略陳之伏查江省民氣樸僂訟事本稀舊有刑司顯典判決自近年改設行省析置民官理刑之事日增弼教之用彌亟光緒三十二年會奏請將刑司改設裁判處現在法律更新尤宜遵章預籌改辦其原有裁判處擬改設高等審判廳附設高等檢察

廳並於審判廳內設司法傳習所購儲圖籍選在省人員之明通者入所研究以備養成審判人才至地方審判廳則就龍江府及綏化呼蘭兩府人民繁庶之區先行開辦以樹風聲其瓊瑋呼倫兩處開埠尙未實行民刑之事較少暫由新設兩廳審判員辦理以歸簡易其餘新設治各處亦經奏明裁去經歷巡檢另設佐治員將來派員專司審判卽爲開廳之基礎現已飭司擬定章程限期舉辦此籌辦各級審判廳之大概情形也自治機關原以輔官制之不逮江省地方遼闊人民均四遠而來村落零星全資守望之助客民雜處宜有聯絡之方糾合同羣共謀公益較之內地尤爲難緩之圖惟是自治法理極爲紛繁研索未精轉滋流弊省城原有研究總會徒張空名殊乏實際現已更定規制嚴立範圍改爲自治研究所以符部章一面催飭各屬遴選士紳來省研究藉

資傳習至於自治之實施尤在戶口之明確江省各屬人戶總數
上年據民政司彙轉已經查有端倪現仍飭屬查照民政部新定
章程詳細調查期得編氓確數不准似向來虛填戶口視爲具文
以爲一切行政之根據此籌辦地方自治及調查人戶總數之大
概情形也江省巡警事宜原隸於民政司比年各屬創辦警務費
皆就地自籌祇以人習故常動生梗阻迭經飭屬多方勸導布置
經營省會之地自城市以及鄉鎮業經次第成立其外屬府廳州
縣亦皆一律舉辦可望漸次擴充惟施行警政必先講明警學若
以未經教育之人濫竽巡弁恐以衛民之事轉致擾民現於省城
設立高等警察學堂選各屬之秀良者肄習其中以爲將來警弁
之儲備並飭各屬酌設巡警教練所以冀警學普及至於新設民
官各處一俟派員後再行體察情形設法推廣此又籌備地方巡

警之大概情形也至頒布資政院選舉創設廳州縣簡易識字學塾均俟頒到章程課本再行分別籌辦臣等責任所在江省雖處邊荒程度遜於內地然辦理必須一致程功或免後時惟有淬厲精神督飭所司認真舉辦務切推行力戒粉飾庶以仰副

聖主發奮圖強之至意除俟屆限再將成績奏報外所有江省第一二年先期籌備各情形理合恭摺具陳伏乞

皇上聖鑒訓示

遵覆東省無庸添練士兵摺

奏爲遵籌東省練兵審度地方情形無庸添練士兵恭摺仰祈

聖鑒事竊准軍機大臣字寄光緒三十四年九月十一日奉

上諭有人奏東省練兵宜審度地方情形一摺著徐世昌按照所陳各節體察情形妥籌具奏原摺著鈔給閱看欽此遵

旨寄信前來臣遵卽咨商吉江兩省撫臣就三省地方實在情形暨各營兵隊防剿成績之所在與夫安民固圉之方正本清源之策詳加討論統籌熟計覺有不必多立名目徒事紛張之處謹爲我

皇上切實陳之如原奏所稱東三省土匪蔓延搶掠劫奪之風仍未盡息宜各練士兵一軍度地防守等語蓋以東省陸軍皆係抽調遠來於當地阨塞險要未能洞悉以之剿匪或難得力故擬別練士兵不知東省數年以前實稱盜藪下貽地方無窮之患上增朝廷東顧之憂剿撫兩難官民交困臣蒞任之始卽以除盜爲保民入手辦法先後飭令防陸各軍扼要分防相機剿辦兩年以來所謂大股積匪業經殲除殆盡近雖吉江邊遠之地不無零星餘孽而迭經嚴飭派出各軍認真搜捕似亦不難盡絕根株至其防

剿辦法向以陸軍爲鎮撫之基以防軍爲進剿之用東省防軍除由北洋調撥之淮軍九營外其餘均以原有營隊改編此項自兵概係土著雖間有客籍亦由直隸山東一帶早年遷徙而來舉凡地勢險夷林徑曲折均所詳悉卽調自關內之一鎮兩協邇來駐東旣久與本省巡防各營聯絡一氣撫綏彈壓頗稱得力近且通飭各鎮協標營分令學兵測繪輿圖以資軍用將來軍謀策畫鞏固國防當較防營尤有把握並迭飭各該鎮協標如有自兵缺出卽行就地徵補並由旗兵挑選實與原奏所請招練士兵之意名異而實同也惟以三省幅員之寥闊土地之荒寒邊圉之空虛道塗之阻塞其甫經設治之區草昧初開因陋就簡諸未完備卽警察教育二端爲民生風俗最有關係之事亦祇稍立規模寥落可數而林莽未闢深山廣野狐嘯狼嗥之地尤不可以道里計長此

不治縱使大股巨匪薙伐無遺而二三萌孽之潛滋暗長於其間者不敢曰遂無餘燼復燃之一日故目前之以兵弭盜無論如何竭力搜捕祇是治標而已現有兵力儘足治之毋庸更練士兵徒事紛歧而糜餉項若欲三省永無匪患必實行殖民實邊力謀拓闢使沿邊荒漠一律開墾村落稠密守望相助一面推擴警察嚴事編查境外匪徒無從混入境內游民咸歸耕作而後廣設學校澤以詩書數年之後當可以革頑梗而銷隱患臣兩載以來日夕兢兢淬智勗神思得一當以稍酬

高厚者卽在於此若曰但恃兵多便可莫安邊境實非臣所敢知也所有遵籌東省練兵審度地方情形無庸改練士兵緣由謹恭摺覆陳伏乞

皇上聖鑒

設立營口新民各級審判檢察廳摺

奏爲設立營口新民各級審判廳並檢察廳恭摺具陳仰祈
聖鑒事竊查光緒三十三年五月二十七日奉

上諭各省按察使改爲提法使分設審判廳著由東三省先行試
辦等因欽此臣遵於是年十二月籌設省城各級審判廳三十四
年十二月籌設撫順各級審判廳均附設檢察廳歷經奏明在案
伏查預備立憲年限本年籌辦各級審判省城而外先及商埠奉
省通商各埠以營口爲最繁該埠西臨渤海東據遼河北接南滿
鐵道西北連京奉鐵道舟車四達中外商民雲集訴訟煩難新民
一府雖開放較遲而地方寥廓戶口殷繁訟獄之多不亞省治法
庭之設均屬刻不容緩當經飭令提法司使吳鈞督同高等審判
廳廳丞許世英署高等檢察廳檢察長汪守珍迅速籌辦並分飭

奉錦山海關道周長齡新民府知府管鳳蘇各就地籌款以充各
廳經費不足則由公家設法補助茲據該司使呈稱擬於營口設
地方審判一廳初級審判一廳均附設檢察廳按照奏定章程分
級管理該廳府所轄境內人民訴訟其分配法官支給薪公均照
省垣酌量減少暫行租賃民房略加修葺法庭則務求整齊羣室
則僅取敷用業已組織就緒請卽派員定期開庭所有以前積案
查照奉天府審判廳成立時辦法暫由該廳府自行清理分期由
審判廳提收以免壅滯仍以三箇月收盡爲限等情呈請具奏前
來臣覆核無異當卽札委署撫順地方審判廳推事法部主事張
志嘉署理營口地方審判廳推事長委調署撫順地方檢察廳檢
察長蕭晉榮署理營口地方檢察廳檢察長委高等審判廳推事
陶祖堯署理新民地方審判廳推事長委署高等檢察廳檢察官

趙毓衡署理新民地方檢察廳檢察長其餘推事以下各員均由提法司於省城各廳當差及練習員內分別揀派前往任事以資熟手定於十五二十等日營口新民兩埠地方初級各廳一律開庭受理一切訴訟其署理各員由該司使隨時考核果能勝任再行呈請咨明法部分別奏咨補授至初級暫只一廳誠恐地曠事繁或形不便應俟將來察看情形再行酌增竊維司法分立內以保人民權利立憲政之始基外以弭各國譏評躋法權於統一不務求其名而貴成其效不僅肅其形式而必作其精神臣惟有督飭該司使慎選賢能勤加考察已立者力求進步不以一得自矜未立者亟圖擴充期以推行盡利務使法權鞏固積弊廓清以仰副我

皇上注重憲政之至意除咨部查照外所有設立營口新民各級

正三十一
審判廳並附設檢察廳緣由理合恭摺具陳伏乞
皇上聖鑒訓示

奉省設立清理財政局片

再准度支部咨遵

旨妥酌清理財政章程奏奉

諭旨咨行到奉當經轉行欽遵辦理在案嗣准將遵

旨妥議清理財政辦法暨奏定各省設立清理財政局辦事章程
先後行知前來竊維籌備憲政綱目紛繁而扼要之圖實莫先於
財政之清理蓋財政爲萬事之根本苟度支弗失於紊亂斯庶政
可望其修明中國各省財政向無統一機關每患紛雜奉省自設
立度支司以來財政已有匯歸之所然亦非設法清釐合全省收
支之款目計終歲出入之盈虛仍無以爲裒多益寡之方而立豫

算決算之準今奉部章飭令設局清理自應從速舉辦以仰副
朝廷慎重度支之至意現於三月初八日在省城設局開辦檄委
奉天度支司使張錫鑾爲總辦度支司僉事留奉委用道趙臣翼
省城稅捐局總辦補用道齊福田爲會辦並刊刻木質關防發交
該局鈐用以昭信守其餘科長科員等差並飭遴員派充一俟正
副監理官到奉卽按照部定章程辦理除咨部查照外所有奉省
設立清理財政局派委總會辦各員職名及開辦日期理合附片
具陳伏乞

聖鑒訓示

調東陸軍第一混成協常年餉項由奉天鹽釐款內應付摺
奏爲調東陸軍第一混成協常年正餉加餉擬由奉省鹽釐款內
騰挪應付以足餉額而資計授恭摺仰祈

聖鑒事竊臣前次以調東陸軍底餉瞬屆期滿奏請仍由原處協撥一摺於光緒三十四年十二月十一日奉旨陸軍部議奏欽此嗣經陸軍部議覆以東省調撥軍隊仍由原處協餉本係一時權宜之計此次期滿之後原擬騰出協餉爲補練軍隊之用惟據稱財力支絀尙屬實情若非量予變通勢必難於應付所有調赴各鎮協除第一混成協正餉加餉截至明年五月底止自六月起應由陸軍部收回備練軍隊不再協撥外其第二混成協暨添設協標人員薪餉自可准如所請仍暫由直隸照案撥給至第三鎮應需餉項亦擬再准接展一年俾得稍紓餉力在東省通盤計算明年止須自籌一協之餉措置諒不甚難等因奏奉諭旨允准欽遵咨行到奉臣伏查第一混成協每月約需正餉銀五萬一千兩加餉銀一萬兩二項併計每年共需正餉加餉銀七

十三萬二千兩爲數甚鉅奉省常年進款向只稅捐鹽釐荒價等項爲抵充本省練餉等用歷年以來儘敷拮据並無餘款可資分撥前將軍趙爾巽任內本有籌練新軍之議亦因餉項難措迄未實行臣到任以後雖將稅捐鹽釐二項切實調查整頓收數稍有起色惟時當兵燹以後民生重困商業彫敝司權政者但能於原有稅釐之中稍加釐剔不忍於原有稅釐之外再事徵求近年新政風行百端待理用款之多倍於疇昔區區溢收稅釐實不足以資挹注若議抽提鉅款撥放新軍一時更無從著手雖上年改編防營裁節餉項其中不無盈餘然通盤計算實不敷該協餉十分之一輾轉籌維殊尠良策在部臣綜核度支僅令自籌一協之餉本已格外通融在奉省庫儲艱窘驟增常年支出鉅款深恐久難爲繼惟旣欽奉

諭旨咨飭遵行時艱款絀京外皆然何敢一再瀆陳上煩

聖慮且軍糈爲計授所關撥發之期轉瞬卽屆不得不於無可設法之中預爲剗肉醫瘡之計俾免臨時貽誤查奉省鹽務經徵二四四八加價三項鹽釐向充本省練餉等用擬自本年六月起暫爲挪用作爲該陸軍第一混成協正餉加餉之需惟此項鹽釐每年所徵原無定額仍恐不敷撥放尙須隨時參酌另籌至原撥練餉各項本關緊要擬卽改由稅捐荒價項下支發不敷之數亦須體察情形酌量劃撥當於本省應用各款內分別緩急設法裁減以資彌補年終分案造銷此爲暫時挪款以應要需起見將來究以何種款項備抵陸軍餉糈仍應隨時妥籌奏咨辦理除分咨外理合恭摺具陳伏乞

皇上聖鑒飭部立案施行

吉省設立農事試驗場摺

奏爲吉省設立農事試驗場以課田功而興地利恭摺仰祈
聖鑒事竊維虞書命官獨詳教稼漢詔布令首重力田相沿數千
百年治法雖殊要其課吏之方莫不以勸相勞農視爲殿最臣等
幸逢

盛世忝領巖疆欲爲實邊固圉之圖宜行墾荒殖民之策然講求
地利責在有司而提倡首基端資省會查吉林夙稱農國厥壤最
腴地闊民稀安於固陋非特東西洋之新農學無所發明卽舊有
之刈穫耕耘亦未盡得其法遂以木棉水稻誘諸土性不宜果蔗
蠶桑謂爲天時所限地有棄利民鮮上農雖由智慧之不開抑亦
勸劭之未力也臣世昌與調任撫臣朱家寶及臣昭常相繼履任
籌議吉林實業允宜農事爲先生產旣豐原料始富隨在輔以工

藝蘄爲小民闢一生機當於上年三月間督飭勸業道在省城南
面松花江對岸勘出官地二十六晌添購民田十數晌設立農事
試驗場以爲農業模範既落成遴選監督管理全場農務延訂技
師分科治事曰園藝曰樹藝曰畜牧附以編輯調查庶務各課其
宗旨以啟導知識改良方法增殖物產爲的純從淺近著手積漸
進於深微開辦以來規模稍具場中附設傳習所俾技師兼充教
員招生徒四十名授以普通農學本年復闢東郊官地三十晌別
設支部耕作之際分令生徒躬秉耒耜實地練習以期適於有用
而不以空談學理爲長並擬定時邀集紳耆以至田間父老均可
入場研究觀摩爲組織農會之豫備卽將來旁及郡縣分場亦易
於推行期之數年邊境蚩氓漸習種植民勤其業吏修其職或可
於此基之惟是吉省遠在偏隅新政一興動需借材異地矧屬創

始用款尤繁值此財政窘難既不敢踵事增華又未便因陋就簡但期隨在核實自足樽節浮糜應請將開辦之初一切選地建場置械購料並經常臨時等費以及添設分場所需各款均准作正開銷其試驗場西偏另建實習工廠一所已經成立應俟妥擬章程再行專案具奏所有吉省設立農事試驗場緣由除將詳細規程分別咨部查照外理合恭摺具陳伏乞

皇上聖鑒

吉林度支司接收前戶司移交款項摺

奏爲吉林度支司接收前戶司移交款項銀錢數目恭摺仰祈聖鑒事竊吉省將軍衙門原設戶司管理通省民旗各署經徵租稅並支放一切款項於光緒三十三年十二月奏設度支司以戶司裁撤歸併經臣世昌會同調任撫臣朱家寶札飭遵照在案該

前戶司掌印廂藍旗滿洲協領英賢將經營各款截至光緒三十四年二月二十四日截止造冊移交即經飭度支司委員逐款盤接查自光緒三十三年改設行省以後出入款項核對相符其以前接收各款案卷佚脫款目參差且開有與報部歧出之處實屬漫無秩序案關庫儲未敢輕率從事復遴委句稽精核之員澈底清釐迭次反覆詳查均以案多不齊委難求其究竟臣照常到任後又復加派委員嚴密查究無如有卷之案尙可得其端倪無卷之案實屬無從懸揣節經飭由度支司移查前戶司窮詰原委亦祇稱歷交如此照舊接管他實無憑考據查吉省財政紊亂實在未設行省以前代遠年湮案牘不備又經日俄兵燹散佚尤多究厥由來匪伊朝夕似非掌印英賢一人之咎若必窮源竟委徒費時日無補於公何若懲前慎厥將來以核其實惟移交

冊內應存地丁俸餉各款銀二十三萬七千一百六十七兩三錢五分八釐零五絲二忽六微九纖七沙錢一百五十四萬二千三百八十四千八百六十六文按柱點收銀款尙屬相符其錢款除接收現錢外有移交執帖錢五十餘萬千因吉省尙少現幣沿用執帖其以執帖移交亦係向來習慣惟旣設度支司整理財政自應提存現款以歸核實迭經催令分期繳換現錢除陸續據解到庫外尙有執帖錢二十六萬八千四百五十三千一百九十二文尙未繳清現仍勒限嚴追務清款項至度支司接收各款間有與前屆奏銷冊數目不符者現在舉行新政財政尤宜劃一未便接續捏報已飭度支司按照實數接收支放分年辦理奏銷以去積弊茲據度支使陳玉麟將接收戶司移交實在銀錢款項及追換執帖提存現款各情呈請具奏立案前來臣等覆查無異當飭迅

將執帖錢款責成前戶司掌印英賢及庫官壽康等依限繳清如仍藉口延宕據實從嚴參追以昭懲儆除咨部查照外所有吉林度支司接收前戶司移交銀錢款項實在數目各緣由理合開單恭摺具陳伏乞

皇上聖鑒飭部立定施行

吉省遵設清理財政局摺

奏爲吉林省遵設清理財政局謹將開辦情形恭摺具陳仰祈聖鑒事竊准度支部咨稱本部具奏遵

旨妥慎斟酌清理財政一摺光緒三十四年十二月二十日奉上諭方今財政艱難內外交困必以廓清積弊確定預算爲先全賴部臣疆臣和衷共濟各飭所屬共矢公忠按照所擬章程實力奉行認真辦理等因欽此恭錄到吉仰見我

皇上慎重度支綜核名實采中央集權之制體疆臣措畫之艱內
外相維消除隔閡

聖謨深遠欽服莫名旋准部咨奏定清理財政處暨各省清理財
政局章程行知前來竊維成周制用掌於冢宰漢唐會計著爲專
書在古代制治保邦無不以財用爲急以今日環球通軌羣雄競
爭非富國不能圖強非自強不可立國然必須財權有所統一則
凡開源節流盈虛消息旣已綢繆於先事自無竭蹶於臨時此清
理財政誠爲今日當務之急也吉省地處邊遠政治簡陋先前一
切財政係由將軍衙門戶司綜筭歷任交代向少清查拉雜紛亂
由來已久而稅捐等局又各立機關不相統轄稅權歧出名目孔
多自改建行省設度支司後凡稅捐各項經臣等詳細調查一律
改爲儘徵儘解復飭將舊時所有規費酌提入公雖宿弊一清驟

增巨款而釐剔句稽亦復頗費心力迭經臣等於裁併稅務整頓釐捐及財政困難各摺先後瀝陳在案臣等尤以度支司綜核財政論機關則爲行政總要論職務則爲理財專官當茲清釐積弊之餘要籌統一財權之法因擬定表式分別種類逐項調查按年編制爲度支司報告書並於各款目下逐條說明以清眉目每屆一年編輯一次由該司督同科員照章辦理庶通省歲入歲出寓目瞭然實爲他日預算決算之基礎臣等用意亦與部臣現擬清理宗旨大概相同茲奉

明諭自應趕速欽遵辦理以重憲政現於三月十五日先就本省度支司衙署東偏原有房屋遵設清理財政局委派度支使陳玉麟爲總辦勸業道徐鼎康爲襄辦官帖局廣西補用道張璧封爲會辦飭令悉心籌畫認真清釐並刊木質關防一顆文曰吉林全

省清理財政局之關防發交該局鈐用以昭信守所有科長科員等差先行擇要酌派俟正副監理官到吉再行會同酌核辦理至如何分年籌辦如何逐案報銷暨劃分國家稅地方稅酌定公費各事宜均卽次第遵章妥慎辦理所冀條件事繫綱舉目張司農得按籍而稽

國庫無虛糜之款以輔

聖治而實邊陲除將局員職名並續擬辦事細則咨部外所有遵設清理財政局緣由理合恭摺具陳伏乞

皇上聖鑒訓示

吉江兩省劃撥大通縣地面改設縣治摺

奏爲吉江兩省劃撥大通縣地面分別改設縣治並委員接署以資治理謹合詞恭摺具陳仰祈

聖鑒事竊吉省大通縣原係跨江而治兼有松花江南北兩岸光緒三十四年五月經臣世昌調任撫臣朱家寶臣樹模於劃分吉江省界案內奏請將大通縣所屬江北地段撥歸江省管理至改隸以後該縣原在吉省之地及新歸江省之地或附入他縣或另設縣治由臣等體察情形再行奏咨辦理荷蒙

硃批著照所請該部知道欽此欽遵在案茲經臣等往復會商以大通縣原因江北之大通河得名現在北岸既歸江省則名稱宜仍其舊作爲江省新設之缺其壤地應否酌量增撥由臣樹模委員勘明另行辦理吉省舊有之大通縣應卽移駐南岸方正泡地方擬改名方正縣作爲吉省改設之缺該縣南岸舊管之地稍嫌褊小應於附近之賓州直隸廳長壽縣勻撥地段俾資治理其江省新設之大通縣先委留江補用知縣王廷元接署吉省改設之

方正縣卽委前署大通縣知縣榮善署理俾專責成俟奉
俞允應請

飭部頒發方正縣印一面由吉省刊刻木質關防先行發交鈐用
其大通縣印卽移交江省委署知縣王廷元接管以資信守所有
吉江兩省改設縣治各緣由除先行咨部立案俟分定界址劃撥
錢糧賦稅另行具奏分咨外謹合詞恭摺具陳伏乞
皇上聖鑒訓示

籌設奉天高等學堂摺

奏爲籌設高等學堂以廣甄陶而資鼓舞恭摺仰祈
聖鑒事竊查奏定學堂章程各省應設高等學堂一所爲中學之
升階大學之預備內地名言四五年前均經先後設立奉省爲
豐鎬舊都祇緣風氣晚開從前均注重於師範及中小各學迄今

正書二十一
三十一
高等學校尙屬闕如省城中學堂開辦已四年餘錦州府及鐵嶺縣亦各有中學堂一處一年內外卽有畢業升學之生若不將高等學堂預爲籌設示之標準不足以饜士林之望而堅嚮學之心况添建講堂宿舍購置科學器具標本訪聘高等教習至速非一年餘不能完備查上年正月間奉省會開辦方言學堂一所旋於四月間接准學部奏定章程各省方言學堂已奏咨有案者准照舊設立其未設方言學堂之省分應注重高等學堂及中學堂之各項課程不必再設方言學堂以一統系而免紛歧等語奉省方言學堂雖係成立在前惟學生名冊章程尙未奏咨有案事關畢業獎勵若不早定辦法學生之希望終虛臣悉心籌畫酌量變通卽將該堂改爲高等學堂原有學生按照學年程度分班並將中學堂已修業三年四年之學生一併撥入肄業補習中學功課接

續前資扣足五年考驗合格仍照中學請獎升爲高等嗣後中學堂畢業生日多即可源源升學此項辦法乃綢繆於事前之策與設預科而取巧者絕不相同况內地各行省均係大高中小各等學堂同時並設故間有躐等之弊奉省僻處東陲士風樸素只慮安於淺陋宜誘進乎高明情形旣已大殊建設詎宜再緩不得不略爲變通辦理以作士氣而育人才且查省城各兩等小學高等小學學生本年六月間已屆四年畢業者約三百餘人中學堂校址不甚寬宏必須另設中學以資升入今將中學甲乙各班學生撥入高等補習騰出空額即可爲高等小學畢業生升入之地一轉移間兩有裨益除飭提學司將一切設備事宜妥爲規畫酌擬章程呈送再行咨部查核外所有籌改高等學堂緣由理合恭摺具陳伏乞

皇上聖鑒訓示

奉省增改廳縣劃分疆界彙案具報摺

奏爲增改廳縣分割疆界彙案恭摺具陳仰祈

聖鑒事竊維奉省州縣自庚子以後增析已多然仍有邊郡廣袤夙爲連藪蒙荒新墾亟望民官或海島孤懸未定地方之管轄或商埠重要猶無行政之機關以及井地不均經界未正均應裒多益寡以垂久遠之經臣蒞東兩年悉心規畫謹將奉省增治改治並一切劃界事宜敬爲我

皇上縷晰陳之一曰海龍府析設廳治海龍東南與吉省濛江毗接森林叢密從前本係鮮圍間有山田當光緒四年全行放墾庚子變亂民居焚掠殆盡嗣廳升爲府西北設西豐西安東平等縣獨東南一帶猶多伏莽逃戶畏沮不歸臣擬於距府一百里之大

肚川設一直隸廳以資招撫查海龍共三十六社析其東南八社而以窩集河一統河爲府廳之界該廳全境在輝發江之南擬名曰輝南直隸廳卽擬遴員試辦此輝南廳設治之實在情形也一日洮南府添設縣治洮南東北本科爾沁右翼圖什業圖王蒙旗光緒三十二年始行丈放圈放之地縱四百二十里橫四十里曾於南北規定兩城基北曰醴泉南曰開化南段地瘠猶多未放北段地沃墾戶漸稠醴泉鎮在府東北一百八十里蒙疆僻遠劫奪時聞商民亟望設官以資衛護臣擬先於該鎮設一縣治卽名曰醴泉縣仍隸洮南府統屬業已派員試辦此醴泉縣設治之實在情形也一日營口改爲直隸廳奉省商埠以營口爲最輪軌四通該埠分屬海城蓋平自開口岸以來只有海防同知藉資彈壓近年各國領事麇集交涉益繁亟應設立審判廳以爲收回法權地

步惟該埠雖駐有海關一道而與民未親又分隸海城蓋平兩縣而距營皆遠臣擬改海防廳爲直隸廳不但新政便於設施且法官亦無虞孤立司法行政相輔而行裨益地方良非淺鮮惟該廳向無轄地擬析海蓋附近營口之地劃歸廳治海界自大石橋迤西北以達於盤山廳之大窪車站蓋界亦自大石橋迤西南以達於淤泥河海口海城全境共計十九鄉歸廳治者三鄉蓋平全境共計十七鄉歸廳治者一鄉該廳重在商埠轄地無取乎太多此營口廳改治之實在情形也一日鹿島收隸莊河廳查鹿島在鳳莊以南孤懸海中周圍可三十里土著約九十餘戶多仰漁業爲生前明崇禎初年卽有居民曾屬金州管轄嗣後聲教莫及海盜蹂躪靡所依歸舊年雖繪入鳳屬地圖從未編查戶口近聞常有外人來往注意經營倘不收隸版圖深恐竟同化外臣檄東邊道

就近查勘據稱該地人民均由大孤山積年轉徙大孤山者莊河廳所轄之巡檢分司也該島距鳳治二百里距莊治一百四十里而距大孤山僅二十五里擬卽收歸莊轄並飭該廳加意保護以杜外人覬覦之心此鹿島收隸莊河之實在情形也此外專爲劃界者則又有四一先辦設治而後清省界長白增設府治臣前已奏明在案該府爲邊防最要之地綿蕞經營西接臨江割治長生慶生二保東南地濱鴨綠天然水道界綫皆易分明惟北跨龍岡與吉林樺甸濛江接壤該地人煙稀少林莽叢深界限自來未清此時不釐正疆封以後管理地方轉恐互相推諉臣前後據試辦各員稟報復與吉林撫臣往返咨商擬由紅旗河經荒溝掌白河上下兩江口歷循湯河寶馬川抵三岔子之正岔定爲奉吉兩省之界南可樹長白之後盾北無礙濛樺之幅員此長白府與吉林

正書卷二十一
三
劃界之實在情形也一已經移治而更定縣界臣前奏准與仁移駐撫順並改縣名旋因距撫順八里之千金寨向有日人開採煤鑛事多交涉不能不設立審判廳復移縣駐千金寨地與撫順附近似可無庸易名惟撫順路記防禦各官已裁其舊管之正紅鑲藍各一旗鑲紅半旗地屬

與京者現距撫順較近擬劃歸撫順卽以旗界爲界其承德縣東從前析屬與仁者現距撫順較遠以附省數屯仍劃歸承德擬北自碾盤溝經白台子南至楊木林子定爲承撫兩縣新界此撫與承劃界之實在情形也一地勢不足劃西界以補東界臨江縣者濱鴨綠江之要區該縣以東長生慶生二保旣割屬長白左臂不足以展舒且全境皆山以之籌備邊防深虞棘手臣擬析通化以東德生一保劃歸臨江卽以保界爲界該保民稠地沃堪補臨境

之偏枯此臨通劃界之實在情形也一地勢不均劃東界以補西界錦西廳者本析錦縣西境而設地與熱河之朝陽接壤盜匪來去無常故設治之初注重邊防地畝之多寡肥磽未遑計及查錦縣升科之地幾二百萬畝而錦西廳升科之地纔三十餘萬畝廳境大半磽确近來創辦新政竭蹶異常臣擬割錦縣西偏地方縱約六十里橫約十五里劃歸錦西北自女兒河中循鐵路南順七里河以至海口定爲廳縣新界所割地段於錦縣無大妨損而裨益於錦西之處甚多此錦西廳錦縣劃界之實在情形也以上數端經臣督飭民政司張元奇或便道考查或派員勘劃臣覆加核奪莫不酌夫民情地勢之宜堪以正經界而垂久遠所有奉省增治改治並劃界各緣由除繪圖咨部外理合彙案具奏伏乞皇上聖鑒飭部立案施行

退耕堂政書卷二十六

退耕堂政書卷二十七目錄

奏議二十七

東三省憲兵畢業編隊摺

長白設治撥款片

遵旨核減擬保剿匪人員摺

奉天巡防隊薪餉請照原奏數目支給摺

遵章變通辦理東三省陸軍測繪學堂摺

整頓黑牛館清查款項報銷摺

移設黑牛館片

遵旨請獎延吉邊務出力各員摺

吉林開辦官運已著成效摺

吉省改編巡防隊並派大員督辦防剿摺

已革佐領豐年吞款監追片

遵議陝西設立鐵路公司選舉總理分別准駁摺

會議御史石長信奏請製造諸工量予實職摺

勘查洛潼路綫股資情形摺

驗收京門枝路工程情形摺

退耕堂政書卷二十七

天津徐世昌

奏議卷二十七

東三省憲兵畢業編隊摺

奏爲憲兵畢業編成憲兵隊以維軍紀而便糾察恭摺仰祈
聖鑒事竊臣等前奏設東三省憲兵學堂於光緒三十三年十月
開辦原定畢業期限一年經臣等督飭該堂監督等按照所定學
術各科認真教練復令展限三箇月補習功課實行演習軍事裁
判至上年年終爲止頭班畢業並以憲兵需用甚廣一班不敷分
布本年正月添招二班業將籌畫詳情咨部在案查三省現有陸
軍將及三鎮之數分途駐紮糾察宜周而介居兩強觀瞻所繫軍
紀尤當嚴整矧東省情勢迥殊設有兵力所不能及之處亦賴憲

兵以爲補助是此項憲兵隊益須早日編成於紀律既可維持於
外界兼資抵制當經參照部定陸軍警察隊章程先將此次頭班
畢業生二百餘名編爲憲兵四隊分派各處俟二班畢業後共擬
編成三營並仍暫名憲兵以便分駐邊要免招疑忌至現成四隊
所需薪公餉乾以及開辦雜支各經費爲數甚鉅擬暫爲設法籌
撥俟二班畢業學堂停辦卽以奏准原撥該堂常年經費銀三萬
四千一百八十餘兩作爲憲兵隊餉項底款不敷之數再行設法
另籌將來三營成立仍須籌定的款以期持久除將章制咨部查
照外所有編成憲兵隊緣由謹恭摺具奏伏乞

皇上聖鑒

長白設治撥款片

再前因奉天臨江縣迤東邊境遼闊請添設府治以固邊防而資

控馭業經奏明奉

旨允准在案遵卽遴派設治委員調奉同知李廷玉直隸州知州張鳳臺帶同通譯測繪暨其他辦事人員先後馳往籌辦陸續勘劃長臨府縣界址並奉吉兩省省界隨即招募工兵開山修路建置衙署市房學堂警局監獄以及關於鴨綠江航權應行備辦各事均已次第成立計用過開辦經費銀十餘萬兩尙有續修工程並籌備奉吉邊境擬設縣治應需費用合之文武員弁薪水津貼餉乾常年各款額支活支爲數亦鉅臣等查長白府治扼鴨綠江上游與日人極意經營之惠山鎮隔江對立非便利交通無以資鎮守非實行新政無以策治安地初闢則規模不宜苟簡民初聚則設備俱應代謀加以該境氣候多寒市商寥落際茲草萊初啟一切物料轉運工本皆屬昂貴其規畫設治情形不同故需用經

費亦難與他處相提並論雖值庫藏支絀之時止期款不虛糜斷
難借款廢事迭由臣等飭司撥定專款作正開銷分飭在事員司
趕緊興辦樽節動支一俟設治事竣再行核實造報細數除咨部
立案外謹附片具陳伏乞

聖鑒

遵 旨核減擬保剿匪人員摺

奏爲覆核剿辦蜂密山鬍匪及各路軍隊剿辦華俄巨匪出力文
職各員遵已刪減仍懇查照歷辦成案分別異常尋常給予獎勵
恭摺仰祈

聖鑒事竊臣等本年二月二十四日奏請將剿辦蜂密山一帶鬍
匪出力各員並各路軍隊剿辦華俄大股巨匪出力各員彙案獎
敘一摺於是月三十日奉

硃批該部議奏單二件并發欽此旋准吏部議覆引東省拏獲馬賊統按尋常勞績給獎舊案指飭此次擬保各員人數過多令核實刪減統按尋常勞績奏獎等因於閏二月二十二日具奏奉旨依議欽此欽遵知照前來臣等伏查東三省當海陸交衝拱衛神京爲根本重地鬻匪積年鴟張凶悍蔓延屢誅不盡爲害最烈不特民生荼毒擾亂治安往往牽涉外交生種種之困難從前俄人每以捕匪保商爲名陰行其侵略政策卽此次俄商郭列一利喀被擄勒贖羌帖七十萬俄人電致外務部噴有煩言迨經各路軍隊奪回則函電聲謝怵舞臚歡是其明證因思內訌不靖外患因以環生關係至爲重大與他省尋常剿匪迥焉不同況絕徼荒寒山林邃密艱險勞苦倍逾腹地實非優賞無以鼓在事之心而作方新之氣是以光緒三十三年正月前將軍臣趙爾巽奏請變

通定章嗣後凡有剿匪出力人員仍隨時彙案辦理旋因奉北一帶剿匪出力各員以異常勞績請獎者九十一員尋常五十二員臣等復於光緒三十四年三月十一月先後將吉省蒙邊各防營剿匪出力人員亦分別請獎異常八十六員及四十員尋常八十七員及三十三員均蒙

天恩奉

旨允准各在案凡屬在事人員同深感奮自此各路剿捕策勵益加暑雨祁寒窮搜罔懈或督率於前軍或轉運於後路往往逼臨匪穴及遇伏被圍該員等輒躬先士卒冒險衝鋒出入於槍林彈雨之中崎嶇於叢莽沙磧之徑其困憊險危之狀攻守剿捕之勞實與臨大敵無異計擒斬首要掃除巢穴較之光緒三十二三年之績爲尤多此次按照異常尋常分別請獎實係按照近年成案

而非此實無以激勵人才也至請獎人數過多之故則以此次自夏徂冬旁搜深入遠之至於海參崴埠以及黑龍江省之通肯地方上起遼錦中經哈濱下訖俄邊之五站一帶事兼三省縱橫數千里歷時數閱月剿捕數十起先後擒斬大股首夥五百餘名救回華俄商民二百四十餘人非若三十四年三月十一月請獎案內各就吉省或蒙邊一方面而言是以案多而人數亦眾此次請獎各員業經再四嚴核實已無稍冒濫第既經該部奏准核實刪減自不得不欽遵辦理茲謹再行勉爲刪減計共減去十七員又由異常改爲尋常者三員另繕清單恭呈

御覽伏乞

聖恩准如所請給獎出自

逾格鴻施至此次請獎武職員弁亦先經臣等切實刪汰悉屬論

功應獎之員可否仰懇

天恩飭下陸軍部准照原案單開原數分別給獎以仰體

聖明眷顧

陪都鼓舞羣才之至意所有覆核剿辦蜂蜜山鬍匪及各路軍隊
剿辦華俄巨匪出力文職各員遵已刪減仍懇查照歷辦成案分
別異常尋常給予獎勵各緣由謹恭摺覆陳伏乞

皇上聖鑒

奉天巡防隊薪餉請照原奏數目支給摺

奏爲奉天巡防隊將士苦累請照原奏數目支給薪餉以示體恤
而資整頓恭摺覆陳仰祈

聖鑒事竊准陸軍部咨宣統元年二月二十六日陸軍部會同度
支部具奏議覆奉省各軍遵照新章改編巡防隊一摺本日奉

旨依議欽此欽遵恭錄並鈔奏咨行前來仰見
朝廷重視邊防部臣慎籌

國帑之至意伏讀之下悚佩莫名伏維奉天爲根本重地整軍爲
目前要圖值屢經兵燹之餘乘物力艱難之會欲除軍人積弊必
使廩餼足以自給而後可執法以相繩欲作尙武精神必有重祿
以勸有功而後知感激以圖報此中因地因時宜輕宜重有不得
不酌量變通以求一當者請就部議爲我

皇上分晰陳之如部議奉天巡防隊劃分各路原奏祇云劃分五
路並未詳敘駐紮處所應將布置情形繪圖貼說咨部考核一節
查奉天比年以來盜匪尙形充斥每值防剿吃緊之際徵調頻仍
巡防區域朝夕時有更代擬俟剿匪事務稍鬆營隊各歸本路卽
將編配駐紮情形詳細繪具圖說咨部立案以資考證如部議諳

習新操舊軍編成步隊一標令將成軍日期及一切章程繕具清冊送部備查一節查新舊軍性質迥殊作用亦異前訓練成軍時已於光緒三十四年十二月十八日附片陳明在案自應聽候部示另案辦理如部議令將河防一營章程報部核定以重戎政一節查河防營與巡防隊本不相屬前於光緒三十二年創設河防之初是年十月二十三日業經前任將軍趙爾巽奏咨有案惟巡防隊既經改編河防營亦有應行更定之處擬俟議定章程另案奏咨辦理至如部議從前奉軍入路薪餉章程一切從優各路統領月支薪公銀二百五十兩各營步兵月支正餉四兩津貼一兩現在該省改訂餉章正兵支數已照陸軍章程減爲四兩五錢而統領支數轉照陸軍章程加爲五百兩其他支數大率比照陸軍支給財力有限協濟爲難該省未便任意開支行令核實釐定一

節查奉天舊章統領月支薪公銀二百五十兩步兵月支正餉四兩津貼一兩統領月支之數核之尋常物價實在不免賠累步兵月支五兩服裝均係自備亦屬苦累不堪統帥之所不足不能不攤之於兵營兵之所不足不能不擾之於民其勢使然積習已久現在既有陸軍部章程可循是以改定統領加爲五百兩月中所得亦不過僅足敷用營兵之減爲四兩五錢者並非薄於待兵特不欲使舊軍月支之數較諸新軍加多然服裝一切均由官中給發合而計之亦較從前爲優自上年遵章編併改定餉章以後營務頗有起色昔年積弊一洗而空其效固已彰彰可考至其他支數大率比照陸軍支給原以陸軍部所定章程於軍事界上斟酌盡善諸事援照辦理期與部章不背方今籌款維艱臣亦極思力加核減無如奉省百物昂貴又在防剿用兵之際使不先足其餉

精其何以勵將材而端兵習若謂任意開支致多糜費臣雖至愚何敢出此合無仰懇

天恩俯念奉天巡防隊將士苦累情形准照原定數目支給薪餉以示體恤一俟奉天物價稍平再行核實酌減俾免虛糜而符部議除咨部查照外理合恭摺覆陳伏乞

皇上聖鑒施行

遵章變通辦理東三省陸軍測繪學堂摺

奏爲遵章變通辦理東三省陸軍測繪學堂以資軍用恭摺具陳仰祈

聖鑒事竊臣等前因東省幅員遼廓極須預備測繪人材曾於上年陸軍部奏定測繪學堂章程未經頒發以前奉吉兩省各先試辦學堂一所業經附片奏明俟此班畢業後再行遵章辦理仰蒙

俞允在案本年二月各該堂內學期奉省扣足一年半吉省扣足二年均經先後嚴密考試舉行畢業暫編測量一隊除將各該堂分別停辦全堂職員應俟查照咨部章程擇尤另案奏請給獎以昭激勸外亟應遵照部章續行辦理以符定制查陸軍部原奏內稱此項學堂各省均應設立俾籌款既能分任收效亦可剋期計畫極爲完善惟是東三省情勢實與內地懸殊凡關於軍事之局處學堂均經公同合辦藉省經費現在陸軍測繪學堂事同一律因將吉省原有測繪學堂歸併奉省一處名曰東三省陸軍測繪學堂仍責成督練處參謀處總辦管雲臣總司其事以資熟手學生飭由三省考選自不能不變通部定額數酌量增加現分爲奉天八十名吉林四十八名黑龍江三十二名共計額設學生一百六十名業經照章於本年正月下旬招考第以開學之始應按原

定額數增收學生若干名俟甄別後分別去留以符原額其堂中經費業飭按照部定學生員司總數比例增減撙節動用惟該堂係合三省設立額設學生一百六十名幾及部章一省定額之倍各項經費自應以次遞增益以東省氣候苦寒百物翔貴其學生員司等並應酌加伙食津貼銀兩以協時宜而示體恤至該堂每年額支活支各款已飭由東三省支應處撥給均係實用實銷按期具報除咨部查照外所有遵章變通辦理東三省陸軍測繪學堂緣由謹合詞恭摺具奏伏乞

皇上聖鑒訓示

整頓黑牛館清查款項報銷摺

奏爲整頓黑牛館清查款項覈造報銷恭摺仰祈

聖鑒事竊臣等上年奏整頓黑牛館辦法摺內曾經聲明所有光

緒三十三年該館報銷等項應令覈實造報冊成再行奏銷並勒令原辦官韋紀維等將入己之款勒限追繳以清官款奏准照辦在案查該館光緒三十二年三十三年分兩屆報銷均尙未經造送當卽飭令一併造報並由旗務司派員按冊逐款詳查覈對應銷者銷應駁者駁不得稍有含混往返駁詰動需時日迄今始將清冊造成統計光緒三十二年分實銷錢六萬九千零零三千八百文應餘錢一萬五千八百四十九千八百五十五文光緒三十三年分實銷錢七萬一千四百七十九千三百六十六文應餘錢一萬五千四百五十五千六百四十七文合共應餘錢三萬一千三百零五千四百九十七文現計實存內務府欠交莊豆折錢一萬九千七百四十九千六百文又存牛館交出錢四千五百三十八千一百三十文計實虧錢七千零一十七千七百六十六文查係原辦官韋

紀維等私用當經飭令勒限清繳如再逾限不交卽行照例參處
惟查牛館歷辦報銷向係按照定額平均攤算循例辦理其實牛
羊向多缺額其數旣不足據草豆均係折價其數亦不足憑此次
造報係飭查照館中實存牛羊數目實餽草豆數目按口計日實
用實銷又以原派辦事官役向不另開薪費侵款冒支其弊皆由
此起遂將辦公津貼等項限定數目准其報銷以昭覈實雖與該
館舊辦銷冊體例不符而一係虛糜一係實用自不能強歸一致
茲據旗務司將覈造牛館報銷清冊二本呈送前來臣等覆覈無
誤合無仰懇

天恩准飭照銷弁著爲定例嗣後官牛場逐年銷冊均照此次辦
法造報應領部豆莊豆鹽草等項仍照歷年定額照領並擬定折
價畫一辦法以歸一律仍由旗務司隨時派員督覈辦理除造具

清冊二本咨送總管內務府查核外謹恭摺具陳伏乞

皇上聖鑒訓示

移設黑牛館片

再查黑牛館原爲牧養恭備

三陵祭用牛羊而設向分

盛京

興京兩館前旣奏准裁改從新組織擬請統改名稱曰官牛場仿照牧場新法辦理以資整頓惟省城黑牛館另有乳牛館現擬合併一處如分設大南邊門外及小河沿等處地窄而窪實不合用查

三陵本皆設有牛館勘得北邊門外距

昭陵偏東五里許有餘地二千數百畝如以就近擴作牛場並無

阻礙最爲相宜擬卽移設此處分建場屋應需款項卽由每年草
豆節省項下隨時籌撥仍與正款一併核實報銷以免虛糜而裨
實用謹附片具陳伏乞

聖鑒訓示

遵 旨請獎延吉邊務出力各員摺

奏爲遵

旨擇尤請獎辦理延吉邊務在事出力各員以昭激勸恭摺具陳
仰祈

聖鑒事竊臣等於閏二月間奏請將陸軍協都統銜正參領吳祿
貞升授爲陸軍協都統加副都統銜派委督辦延吉邊務並聲明
請將辦理邊務在事出力各員擇尤請獎以勵勤勞於本月十一
日奉

硃批著照所請該部知道欽此仰見

朝廷注意邊疆激勵人才之至意欽佩莫名伏查延吉邊務辦理大略情形曾於前年冬間奏陳在案茲距前次奏報爲時又逾一年邊務交涉事繁責重時生枝節經臣等督飭在事各員相機因應慎密籌維一切幸無隕越謹就辦理情形爲我

皇上撮要陳之延吉一隅爲

國家發祥重地長白山脈互於轄境版圖所屬毫無疑義自外人潛圖侵占於是捏造間島名目發生界務問題而二百年來邊疆要塞鞏衛

皇輿者幾成爲中韓紛議未定之領土彼族遂得挾其實力逞其野心著著進行罔有顧忌潛運兵械私設警察既已時有所聞又復架搭圖們江之浮橋修通會甯至六道溝之輕便鐵道以冀交

通便利以逞其拓土殖民之計其尤甚者會甯驛之新名標於木
柱龍井府之臆說題於門牌卽百草溝二道江綏芬甸子等處不
在界務問題之內者亦將增設分遣所以轄制之違理肆行非止
一端殆以爲界務未定卽可以惟所欲爲而於所稱維持現狀和
平者遂不免自相矛盾維時寰海內外亦幾但知有問島名目而
不知有我延吉廳之管轄矣臣等深知界務不定則軫轢不除而
欲清理界務又非實力抵制難期就範爰飭於延吉所屬各處分
設派辦處派委事務員隨時彈壓稽查互相策應布置旣定乃從
事於清查戶籍擴張警政募兵以行屯墾編隊以資巡防此外興
學勸農通商惠工諸要政亦皆權衡緩急次第具辦凡此皆經營
邊荒之創舉實則鞏固疆土之要圖也在事各員到差迄今頗能
體察情形妥爲經畫於韓民之潛懷疑貳也則仰宣

德意遇事力爲保護待以摯誠於是韓民感孚一應訴訟事件咸願歸我國官吏審判且多有請薙髮易服隸我版籍者柔遠招攜辦理頗多得法於外人之實力進行也則於主權所在國體所關率皆力與爭持不稍退讓其事情較爲重大者并由臣等隨時電達外務部據理交涉率皆屢經辨駁筆舌交疲始克磋商就緒其火狐狸溝私建房屋不服阻止一事輒爾先行開槍斃我憲兵巡警經臣等電飭和平交涉勿涉武力該員等頗能曉諭警弁堅持宗旨俾曲直昭著不致別滋事端措注尤臻妥洽復因解決界務有資佐證特派專員詳勘疆域精圖調查歷史沿革舉凡陳編所載舊案所存有足爲界務談判之助者皆經鈎稽蒐輯裒然成帙用使延吉之爲我

國領土益昭然若揭無可爲牽混侵越之計實於邊務大有關係

而且邊務未定又值韓兵李鍾元等於韓國慶源自擄率
 眾與日兵開戰鋒車相望風鶴時傳邊圉居民頗為震懼斯時邊
 防尤為喫緊既慮彼族乘機窺我地境復恐匪徒蠢動或韓黨潛
 入致啟藉口之端當經臣等分撥原駐陸軍現守光霽峪稽查慮
 涼水泉子等處要隘并調遣馬隊沿河校巡在事各員亦皆體辦
 防維夙夜靡懈艱苦情形不殊前敵以是韓黨之與國兵前後抵
 十餘戰敗兵四竄邊境屢期於措注外變之餘復有整飭戎行茲
 舉事變既多歧出因應頗極苦心現在界務問題提歸外務部會
 議辦理延吉屬於我地其軍事部亦為重大者其由引等詞知事
 國業經日人確認斯因邊務各員窮年累月悉心以以維韓之國
 茲而始有端緒者也較之各會邊務情形固為較善而昔年韓黨
 塔三姓揮春等處籌辦邊防各事恭維不惑今茲懇請各該員

等殫心措理悉協機宜明冒大暑兩祁寒周馳於窮邊荒徼用能
捍衛

龍興之重地抵制虎視之野心似不無微勞足錄現當邊務粗定
自應擇尤奏保藉以彰其成績卽以勵其將來茲由臣等查取職
名按照異常非常分別擬獎開單恭呈

御覽所有單開各員均經再三甄核委無冒濫合無仰懇

天恩俯念邊事重要准予照擬給獎用昭激勸之處出自逾格

鴻慈除將各員履歷咨部查核並將應行咨獎各員弁由臣等咨
部給獎外所有辦理延吉邊務在事出力各員擇尤請獎緣由理
合繕單恭摺具陳伏乞

皇上聖鑒訓示
吉林開辦官運已著成效摺

奏爲吉林開辦官運已著成效恭摺具陳仰祈

聖鑒事竊維東三省鹽務向係就灘徵課吉黑兩省食鹽皆由奉灘運往一稅之後任其所之自甲午以後俄國東清鐵道接軌吉省於是俄屬鹽斤由海參崴運入五站行銷吉省東北琿春延吉甯古塔阿什河哈爾濱各屬每年自五六千石漸加至三四萬石及日俄戰後旅順金州各鹽灘皆爲日佔日人廣闢鹽灘所出鹽斤由南滿洲鐵道運入吉省倒灌長春伊通磐石雙城五常各屬爲數尤鉅自是吉林全省居民大半購食洋鹽奉省鹽課日形減色前奉天將軍趙爾巽奏請設立東三省鹽務總局並議興辦官運以爲抵制外鹽恢復課額之策以造端閔大未及舉行臣世昌到任後以鹽政爲餉源所在奏派四品京堂陸宗輿爲三省鹽務督辦設立局所整剔鹽灘積弊一面籌畫官運挽回利權先從吉

江兩省試辦以立基礎而覘成效吉林一省官運委吉林度支司陳玉麟督辦設提調一員襄贊局務計自光緒三十四年三月間擬定章程七月卽行開運劃分吉林府及長農伊磐濛樺五常敦化雙城新榆賓長濱江甯古塔琿延各岸將運到官鹽招商認岸先後開秤試銷並設立吉林官運總局長春總倉吉林省倉暨各岸分局緝私局爲運銷機關於營口設立採運局爲採運灘鹽樞紐此吉省官運開創之情形也查未辦官運以前日俄兩國私鹽運屯鐵道附屬地界鹽課鹽捐皆不繳納吉省姦商知有鐵道界限華官交涉爲難私運華鹽亦爭趨鐵道希圖影射民車冬令運糧赴營口新民屯一帶售賣者以鹽運之利盡歸鐵道強半空載而返影響所及

國課民生兩受其病自官運定議後經臣等札飭綏芬稅關先行

禁止歲鹽非有三省督撫及官運局專照不得運入吉界而俄屬來鹽自此絕迹至南滿洲鐵道私鹽亦經官運局派員隨同東三省鹽務總局與南滿洲鐵道公司訂立專運合同每年官鹽以一半歸該鐵道裝載除官鹽外日鹽及華商私鹽均不得再入吉界運金減去十分之一鐵道界內奉吉兩省緝私人員得執行其職務於是吉省鹽岸始完全而無缺此吉林官運交涉之情形也當私鹽沖灌之時吉民所食半係無課私鹽其各村屯購存未食者不下數十萬石官運開創之始舊存私鹽若一律禁止售食恐鄉愚無知轉多缺望因遴選委員分道稽查除居民屯積自食者從寬免究外凡商鋪存積待價未售者酌量補徵鹽課爲開辦官運之資本並與東三省鹽務總局會訂章程每年由吉省認銷官鹽二十萬石應繳鹽課由吉省分季解繳東三省總局核收其餘所

得公利等項留爲吉浦辦理新政之需而奉省原派駐吉之補徵
緝私等局改歸吉省管轄除官運鹽斤外奉省民鹽不得再沖入
吉界此奉吉兩省分畫界限辦理之情形也奉省沿海各灘售鹽
向以正鹽六百斤例耗四十斤爲一石吉省官運鹽斤長途盤運
倉廩儲積均有消耗每石除例耗外另給加耗八十斤經吉世昌
於兩次覆陳東省鹽務情形請內奏明在案吉林官運局定章如
例耗不及八十斤所餘之鹽併入正鹽售賣一併歸公收發鹽斤
悉用東三省鹽務總局所辦官秤公平交易核定鹽價係料合課
釐運本離價及辦公緝私等費分次分岸辦理以照舊鹽價值較
廉民間爭利購食此官鹽出入本利會計之情形也吉省運鹽故
道向以邊車河船爲最多自汽車通行後水道淤塞食鹽自遼河
運通江口登岸入吉夏秋雨水稍涸運船阻滯經月不達久已視

爲迂途邊車冬令由吉運糧赴營口新民屯售賣者同車向載食鹽近歲車額自五千輛減至二千餘輛亦爲汽車攙奪所致官運開辦後冬令由營口採運局招僱民車發給腳價飭運官鹽俾不至空載而返邊車生計藉以不絕至鹽斤運至長春一律收入總倉轉運各岸或僱民車或附汽車每屆月終各岸收發鹽斤及收支款目一律呈報總局每季由總局結算一次以驗盈虧各岸鹽斤招商承銷先飭酌繳押岸銀兩遇有勒價病民之事卽以岸銀充公示罰岸商領鹽以後分招子店照局定商銷章程出售願購與否聽民自便毫無派銷勒售等弊近以官價不昂故民間雖有存鹽而銷路仍形踴躍此又官運商銷之情形也第鹽歸官運爲吉省商民素未經見之事是以開辦之始招商則觀望不前設局則鄉愚疑懼及辦理數月鹽價公平外私絕跡而各屬姦販向以

轉運洋鹽起家者一旦歇業不得不以全力相抵拒本地劣紳見承充岸商有利無害又復羣起攘奪百計阻撓甚至句引外人出頭干預串通商會藉口要求唆惑匪徒聚眾搶掠狡黠之情瞬息萬變加以愚民未諳鹽法載運私鹽視爲習慣創始之際旣未便按例嚴懲又不能聽其自便開導應付幾窮於術臣昭常到任後深知吉省舉辦官運實爲內裕

國課外保利權之要策內地如四川福建等省皆辦理官運數十年之久裨益稅課商民相安成效最著因督飭該督辦提調等任怨任勞終始堅持經營不懈綜計吉省官鹽自光緒三十四年七月開運九月開秤起截至宣統元年閏二月底止共計運銷課鹽六千八百餘萬斤除解繳奉省鹽課十三萬五千兩開除吉省原有鹽捐暨成本運費局用外淨得各項贏餘按照吉省官價銀核

正書卷之二
算約共五十餘萬兩留爲吉省新設司道各官養廉公費及預籌
添練陸軍一鎮之用現在各岸銷場次第成立外私運入鐵道界
內者亦疊次照約緝獲充公交涉尙稱妥協局用運費一切力求
樽節成本均歸核實官運商銷各項章程經數次刪改更訂諸臻
完密官鹽價廉色淨居民爭相購食並無阻礙成效已著自應將
一切辦理章程具摺奏陳籲懇

天恩准予飭部立案以期經久至此次吉省創辦官運關數百年
未見之利源增數十萬有著之巨款全恃官運局大小委員竭力
經營致收成效不無微勞足錄邊塞人才缺乏非恃

朝廷名器鼓勵無以策勉來茲合無仰懇

聖明准將開辦出力各員分別異常尋常勞績擇尤先行奏保以
資激勸嗣後每屆一年如果運銷及額並請准照徵收稅捐成案

核計盈餘銀數分別保獎之處出自

逾格鴻施除奉黑兩省官運俟辦有成效再行具奏外理合將吉林鹽務開辦官運已著成效緣由並繕具章程清摺恭摺具陳伏乞

皇上聖鑒飭部查照施行

吉省改編巡防隊並派大員督辦防剿摺

奏爲吉省遵章改編巡防隊並派大員督辦防剿成效漸著恭摺仰祈

聖鑒事竊吉省自光緒二十六年將邊防練軍盡行裁撤之後防地空虛匪徒充斥經前吉林將軍臣長順與俄員磋商募兵一萬三千人名曰捕盜隊計編馬隊一十七營步隊二十三營共成四十營分爲十軍每軍各以統領一員統之並設營務處以總其成

三十年三月編募就緒復經前署吉林將軍臣富順恭摺具奏奉
硃批該部知道欽此欽遵在案歷年沿襲無所更革迨至三十三年
改建行省適准陸軍部咨令各直省將未改新章之防練各軍
概改爲巡防隊以歸一律等因連同章程頒發前來伏查吉省地
曠人稀盜匪爲患已久巢穴無定股類紛歧此剿則彼竄甲滅而
乙生舊時兵力本不甚厚現議裁改更形單弱况近來設治之區
皆從前積盜之藪防地愈寬布置愈難周密若云擇要駐紮以之
分布繁盛地方尙難徧及而窮荒僻壤不免疏防若云整隊出巡
以之剿辦大股賊匪固屬可行而散寇逃俘必多漏網故頻年雖
屢有剿捕而匪氛卒未淨盡未始不原於此當茲改絃更張之際
懲前毖後亟宜妥細籌畫計非注重雕剿不能制飄忽之賊非合
力窮搜不能破竄匿之匪非分割汎地不能專將士之責尤非有

知兵大員統率控制不能收指臂之效經臣世昌與調任撫臣朱家寶再四籌議爰將舊有之捕盜隊馬步四十營裁減八營每營減去兩哨共留馬隊一十五營步隊一十七營統共三十二營遵照新章分爲中左右前後五路中路隸以馬步八營其餘四路各隸六營於三十四年三月初一日一律成軍每路分營每營分哨每哨分棚各劃地段以重防務巡邏周匝以重剿務雖不能節節布置完善總期聲氣聯絡疏而不漏並派記名提督孟恩遠督辦防剿事宜五路各營概歸調遣又將原有之營務處改名巡防營務處歸併督練分處俾與陸軍聯絡一氣以爲逐漸改良地步裁去員司五十餘人藉省經費此改編捕盜隊爲巡防隊及遴派督辦歸併營務處之情形也迨臣昭常抵任後其時改編甫定一切規制亟應整理用復詳加考察以期日有進步竊維弁兵以訓練

爲先軍律以嚴肅爲貴吉省舊有營規素不講求兵士類無教育
遇有缺額皆係隨時募補初不細加揀選身裁體格多不中程平
日駐防在外又不能常川操練一旦遇匪倉卒出戰卽能獲勝亦
出僥倖且軍律不嚴往往有逃叛情事以之禦侮緩急殊不足恃
若不加意整頓何以整肅戎行因遴委執法官一員專司糾察無
論陸防各軍但有違犯紀律者概交該員裁判有犯必懲不稍寬
假並以各軍截曠之餉募備補隊一營參照陸軍章程先期訓練
純熟隨時抽補以爲將來改歸陸軍地步現在試辦之初規模粗
具應俟著有成效再行專摺奏報立案復查五路之中惟中路防
地最廣其新設治之樺甸縣地方縱橫五百餘里山深林密伏莽
滋多前曾募有游擊隊二百名駐紮該處幫同防剿本係另成一
軍無所統屬因復添招編爲步隊一營隸於中路於去年十二月

初一日成軍連同五路各營共成三十三營併歸督辦節制以昭統一此設立陸防軍執法官並募備補隊暨添步隊一營之情形也現在吉省匪患雖較前收平惟全省幅幘寬廣其腹地山林初啟強半猶等藍筆沿邊千餘里則深邃僻遠無異鴻荒僅此巡防五路各營究嫌地廣兵單不敷分布設遇偏方告警抽調尤覺爲難且近來設治招墾以及林鑛諸實業逐日擴充在在須兵保護勢非有大枝游擊之師不足以供調遣而資鎮懾特以財力所限不得不就其力所能及先成此軍以策近效至於官兵員額前此捕盜隊四十營共有一萬五千四百八十五員名今巡防隊三十三營僅有八千二百四十九員名薪餉一項舊額年支銀一百零三萬八千兩今改巡防隊加以督辦防剿及營務處一切薪餉軍裝房租等項每年僅支銀七十七萬二千八百七十八兩有奇改

編以來已經一載不惟軍容煥然一新防務亦大有起色先後據各軍將領呈報與匪徒接仗大小五十四戰殄滅大股巨匪甚多生擒陣斬約以千計救出被擄人民八百餘名奪獲槍枝一百四十桿子彈三千餘顆往往以一哨之師或二三十名敵悍匪千百之眾殺敵致果輕命圖功實非尋常勞績可比况現編之隊較原有之額已去其半量兵力則前者多而今者少論地勢則前者狹而今者寬計餉糈則前者鉅而今者省卒能芟除羣盜保衛閭閻成績具存實難拚沒茲據營務處總辦協領穆隆阿督辦防剿事宜記名提督孟恩遠會同造具各項表冊呈請奏報前來臣等覆查無異惟念所有在事出力文武各員不辭艱險戮力行間不無微勞足錄若不量予獎敘何以鼓勵將來合無仰懇天恩准其擇尤分別異常尋常彙入吉省歷年剿辦大股賊匪會

經奏准保獎未及核辦各案內另摺請獎藉資激勸出自
逾格鴻施除將詳細戰績並各項表冊咨部查核外所有遵章改
編營隊並派大員督辦防剿現已經年成效漸著各緣由理合恭
摺具陳伏乞

皇上聖鑒訓示

已革佐領豐年吞款監追片

再查光緒三十三年八月十七日欽奉

上諭前據御史趙啟霖奏參署吉林將軍達桂徇私溺職各款當
經諭令徐世昌確查茲據查明覆奏佐領豐年侵蝕巨款罔利營
私著革職永不叙用所吞款項並交地方官嚴行押追等因欽此
當卽欽遵札飭吉林提法使吳燾將該革員豐年嚴行押追迭訊
該革員帳目糾紛供詞狡展抗延不交臣昭常到任後復經督飭

正德二十一年
認眞嚴追茲據吉林提法使吳憲詳稱遵飭札委署長春府知府
金永吉林府知府張熾並移會度支司札委試署僉事巴哈布會
同澈查訊追茲據該員等會銜稟稱遵經會同調檢各宗案卷除
菸酒木稅局銀圓局戶司銀庫等款或查無案卷或訊無費在憑
證外惟詳核官帖局卷宗印簿及各商號帳簿連日逐細查算由
局買銀一項計自光緒三十一二二三等年按照各商帳簿代官帖
局買銀二百六十八萬五千四百四十餘兩實祇收錢九百零三
萬八千三百七十八千有零而該局多出錢二十四萬一千六百
二十六千零又於銀圓加價時扣出十萬圓加價錢由萬千又列
支軋銀圓賠數錢六萬九千四百四十餘千又三十二年九月起
至三十三年三月止七箇月內陸續分存各商號執帖私行抵借
官帖錢一千一百三十九萬六千八百七十八千零至少以官息

七釐計無論長期短期統按一箇月核算應得息錢七萬九千七百七十八千有零共計以上侵吞公款錢五十一萬八百四十四千零毫無著落證據確鑿情弊顯然當卽提傳該革員豐年並當日經手之總掌櫃單祉純各商鋪執事人等集案質證逐加研訊據祉純供認所有局中買銀加數銀圓加價軋銀圓賠數並私存各商號執帖各款抵借局中官帖外出存放各項情弊委係實有其事惟伊充當官帖局掌櫃凡事皆由豐年主持等語質之該革員豐年則稱自光緒三十一年九月起至三十三年四月止局中買銀每兩加價數十文或一百文不等共計前後買銀加價餘錢三十四萬餘千銀圓加價時扣錢兩萬千軋銀圓賠數錢六萬九千餘千均係稟明達將軍成副憲辦理或提上或充賞除由伊總會辦等先後送至軍副各署錢三十餘萬千下餘之錢卽作總會

辦以下賞款至七箇月先後存放各商號執帖一千一百三十餘萬千並無息利等詞一味支吾迨詰以既稟明將軍有無公牘提賞各款有無明文暨分送軍副署之錢有無收據何以該局印簿並未註帳且由局出帖至一千一百三十餘萬豈有任聽浮存各商號至七箇月之久不取絲毫利息該革員復稱係屬買銀元之用究以購買銀兩二百六十餘萬出帖亦至九百餘萬千之多並未收存商家執帖何以購買銀圓獨用執帖存抵無此情理而單社純當舖質證亦稱並非買銀圓之用顯係私放漁利不問可知該革員始俯首無詞誠如原奏所稱該局放借之帖分別長期短期明雖無息實則終年恆有此浮借之數專爲生息漁利之資於斯益信是豐年侵吞巨款罔利營私之實在情形也查該革員充當官帖局會辦宜如何潔己奉公力圖報稱乃輒敢任意私放官

帖於買銀圓等各項公款種種弊混當時則罔利營私事後則飾詞誣賴實屬居心狡玩應將已革佐領豐年發交吉林府監追如再玩抗不交即將其家產查封入官以清公款而懲貪黷等情稟經提法司使吳燾詳覆前來臣等覆查無異除飭將該革員豐年嚴行監追如再玩抗不交應將其家產查封入官以重公款而儆官邪外所有遵

旨嚴追緣由謹附片具陳伏乞

聖鑒訓示

遵議陝西設立鐵路公司選舉總理分別准駁摺

奏爲遵議陝西設立鐵路公司選舉總理分別准駁恭摺仰祈
聖鑒事光緒三十四年十一月二十三日由軍機處片交陝西巡撫恩壽奏設立陝西鐵路公司一片奉

旨該部議奏欽此欽遵到部原奏內稱西潼鐵路前經奏歸商辦
委令開復山西候補道閻迺竹爲商辦西潼鐵路處總幹事茲認
股已足六十萬呈請奏咨立案查陝省應修鐵路東至潼關與洛
潼相接西至省城將來取道涇涼直達蘭州爲西北幹路之樞紐
自應據情代奏准其設立陝西鐵路有限公司並懇

飭部頒發關防擬卽遴舉山西候補道閻迺竹爲坐辦總理度支
部郎中晏安瀾爲駐京總理山西候補道劉昌晉吏部主事王文
海爲坐辦協理該員等資望夙著爲眾推許分任勸辦有裨路工
可否

飭部一併核議照章委派等語臣部查西潼路線尙在洛潼路線
之西必須並顧兼籌遂節推展前於覆陳勸查西潼路線股資大
概情形摺內業經聲明俟洛潼查勘到部議具奏嗣又於分年

籌備要政案內奏明洛潼西潼實爲西展之要道擬限令兩公司
自開辦之日起於三年內集股鳩工每年均獲淨益分之一報部
核明始得准其接續籌築屆時僅未及半卽由臣部籌措各款代
爲建築兩公司已集及續集之股本儘可併入作爲官辦商附僅
集股鳩工不逾年限惟稍有欠缺未與告成卽由臣部撥款資助
以竟全工作爲商辦官助一體以股舉相視均分利益仍俟勘路
委員將洛潼路線圖說呈核詳議具奏先後奏明各在案現在洛
潼路線股資既經查勘明確另案奏陳而西潼鐵路尙應准令單
日建築所舉總協理閻迺竹等既據秦樞查舉夙爭爲席推許各
無仰懇

天恩准將山西候補道閻迺竹派充該路坐辦總理度支部郎中
晏安瀾充駐京總理山西候補道劉昌晉吏部主事王文海充坐

辦協理所有集股鳩工各要端均應由該紳等遵照臣部奏定辦法從速籌備隨時呈部考核如果依限能於宣統五年告成自應援案奏請獎勵如曠日無功亦由臣部奏請裁撤另籌妥辦至該公司現祇招股六十萬兩專築西潼一段不敷尙鉅所請設立陝西鐵路有限公司並頒發關防之處礙難核准循名核實擬請飭令改爲西潼鐵路有限公司並援照洛潼等路成案由臣部刊給木質關防一顆文曰總理西潼鐵路事宜關防俾資鈐用如蒙俞允當再分別咨飭辦理所有遵議陝省設立鐵路公司分別准駁各緣由謹恭摺具陳伏乞

皇上聖鑒訓示

會議御史石長信奏請製造諸工量予實職摺

奏爲遵

旨會議具奏事本年閏二月二十六日軍機大臣欽奉

諭旨御史石長信奏請製造諸工量予實職一摺著該部議奏欽此欽遵並將該御史原奏鈔交到部查原奏內稱中國創設船廠機器局以來分造兵輪槍礮等件其初類僱洋人指授未嘗不欲內地工匠學其器而通其意久之自能運用庶幾一二傑出者足以強國而贍軍迄今傳習不廣國工終未一覩良由習尙使然所以勸工之道有未盡擬請仿周禮冬官之意酌古準今變通辦理凡陸軍郵傳農工商部各設小京官十數缺咨行各省督撫於船廠機器局等項內擇中國員匠技藝優嫻文理明白兼通東西洋語言者酌保數員榮以京秩其能配製火藥精通槍礮機關者卽隸陸軍部其能深悉電學鑛學或熟諳輪軌橋梁機括者卽隸郵傳部其能造汽船種田刈穀抽繭紡紗凡有利於民生食用者卽

隸農工商部各等諸農工商部查現在各國藝術競行新法新器
月異而歲不同近年中國講求實業雖已風氣漸開而實能發明
新理創製新器改良標異足挽利權者猶不多觀誠宜因勢利導
設法提倡獎勵優加俾資鼓舞臣部職重考工早經籌策及此是
以前後奏定華商辦理農工商爵賞章程十條獎勵華商公司二
十條獎給商勳章程八條並尋常工藝外獎辦法或錫以爵賞或
榮以卿銜或作爲臣部顧問官議員並加獎虛銜頂戴均分別等
差以定獎格是臣部於振興農工商業已多有獎勸之方今該御
史所請於部中各設小京官十數員咨行各省督撫凡員匠技藝
優嫻文理明白兼通東西洋語言者酌保數員榮以京秩各節查
臣部奏定官缺原設有藝師藝士等職均以得有專科畢業文憑
者由部差委試用有效分別奏留此項官缺本無定額一等藝師

秩正六品二等藝師秩正七品一等藝士秩正八品二等藝士秩正九品核與該御史請設之小京官情事正復相同惟此項藝師藝士定章係用專科畢業之人本有一定之格今原奏所請凡技藝優嫻文理明白兼通洋語者卽予以京秩範圍似屬稍寬且旣爲良匠用之於機局工廠或可優給薪水廣資傳習若均招納於部曹轉不易盡其所長擬請將藝師藝士等官量爲推廣除專門畢業人員仍照向章辦理外凡有員匠技藝精嫻實在某局廠公同任事有年著有成績並文理明白兼通洋語者應由各省督撫考驗屬實咨報臣部核明分別奏請給獎藝師藝士等職均無庸到部當差亦不必支給薪俸仍由各省在於各項機局工廠酌量任用俾收實效其有材能傑出者并參照獎給商勳章程核辦或原有職銜准其遞加一等給予獎勵似此變通推廣庶羣工獲邀

登進之榮名器亦無濫用之弊而因材器使觀感奮興更於實業前途多有裨益此隸於農工商部之各工籌擬獎給實職之辦法也郵傳部查船電路郵四政學有專科不獨技術一門含理深邃卽管理規則亦無不有特別專條斷非一粗淺工人所能通曉中國交通機關事屬創辦各局機廠正待擴充其留學四政者亦至近年始行遣派是以內地工匠閱歷無多海外諸生成材亦尠偶有畢業回國者無不隨時調用其卓有成效者如候選道詹天佑等亦經奏請獎勵在案查臣部奏定官制清單第十六條內開一二等藝師藝士均以得有專科文憑者由臣部考選分別奏補委用等語原爲提倡藝術鼓勵真材起見與該御史用意大致相同惟臣部官制係專用學生該御史所陳係擇保員匠竊維量能授官所以待士餼廩稱事所以勸工臣部所轄各廠匠役祇有按年

加薪之條並無奏保官職之事惟現在交通要政需才正殷專科
學生畢業尙少招賢自隗事有權宜不得不變通辦理除郵政一
門事屬管理無工匠之可言此外如輪電鐵路各局擬請由臣部
詳細飭查凡在事員匠船政則熟諳駕馭管輪電政則精研電汽
製造路政則嫻習機械建築卓著成績者考查屬實再行奏獎以
藝師藝士分別補用仍令在各局廠辦事以資熟手免至用學兩
歧此隸於郵傳部各工獎勵之辦法也除隸於陸軍部之各項兵
工已於六月十九日由該部自行議覆外所有議覆製造諸工量
予實職各緣由謹會同恭摺具陳伏乞

皇上聖鑒訓示遵行再此摺係農工商部主稿會同吏部郵傳部
辦理因往復咨商是以覆奏稍遲合併聲明

勘查洛潼路綫股資情形摺

奏爲覆陳勘查洛潼鐵路路綫股資大概情形恭摺仰祈
聖鑒事光緒三十四年五月二十七日奉

上諭鐵路爲交通大政利商賑災運兵轉餉以及開通風氣振興
實業胥賴乎此近年來各省官辦鐵路皆能剋期竣工成效昭著
而紳商集股請設各公司奏辦有年多無起色坐失大利尤礙交
通著郵傳部遴委妥員分往各路確實勘查各路工程應分幾年
告竣公司股本能否按年接濟一面妥擬辦法嚴定期限儻所集
股資不敷尙鉅或各存意見推諉誤工以致未能依限完竣卽由
該部會同該管督撫另籌辦理並將該省所舉承辦人員差使查
照商部歷次奏案分別撤銷等因欽此欽遵到部當經遵擬勘路
查款辦法先後選員奏派分往勘查四川漢鄂境川
漢西潼安徽江西等路大概情形分別奏陳各在案茲據前派洛

潼鐵路勘查委員臣部鐵路總局工程顧問員沙海昂汴洛鐵路
監工唐乃倉鐵路總局譯員林兆璠查款委員調部差遣翰林院
檢討陸夢熊鐵路總局科員周明泉等稟稱查洛潼一路該公司
原勘擬由澗河以南定綫現據該委員等稟稱近南一帶多有水
患且橫穿澗河橋梁土工所費甚鉅不如改由洛陽迤北起卽在
澗河以北定綫只循官道修造由洛陽至新安鐵塔山達鐵門鎮
雖橫穿河谷須造長橋向西須緣山徑然其工程尙屬平易再西
卽澗池及張茅鎮中多石山必須鑿通五處張茅鎮須造長橋渡
衢水趨陝州抵靈寶上坡至稠桑鑿洞循山嶺及電桿綫路通闕
鄉向盤豆溪下坡過青龍澗直抵潼關廳長一百三十四英里約
合華里三百六十七里估費約銀一千六百萬圓至其股資原擬
籌集本銀一千三百萬圓現已收到股票及鹽斤加價共三十餘

萬圓除開辦及第一次勘路共用銀一萬一千餘兩約合一萬六
七千圓外所存銀兩均放票莊生息各等情稟復前來查鐵路所
應注意者二腹地則在商業之交通邊境則在軍事之設備洛潼
一路東接汴洛西連西潼就商業論陝省物產甚多煤鐵石油尤
擅其勝就軍事論則由陝而甘而新疆延袤廣漠一旦有警運兵
轉餉關繫非輕考各國辦路成規舉凡主要綫路國家每不惜鉅
資力爲建築蓋以所費雖大而利賴實遠也現在西潼股本尙未
開收業經臣部奏陳有案而該路已收股本比較估費亦僅及五
十分之一倘不通盤籌畫剋日興工則坐誤事機其關於商業者
猶小關於國防者甚大臣部前奏酌擬西潼洛潼兩路辦法片內
聲明限令兩公司同時並舉三年告成每年均須有三分之一報
部核明方准接築屆時倘未及半或逾年限則應分別官辦商附

商辦官助各辦法奉

旨允准行知兩公司欽遵在案又臣部前奏分年籌備單內洛潼限宣統四年告成西潼限宣統五年告成仍應嚴令按期報告依限完竣臣部一面會同該管督撫切實督催隨時籌畫決不使一隅閉塞致礙全國交通此尤臣等夙夜兢兢冀以勉副

聖朝同軌之至意其餘各路俟續派各委員等報齊再由臣部陸續分別覆奏所有覆陳勘查洛潼鐵路路綫股資大概情形理合恭摺具陳伏乞

皇上聖鑒訓示

驗收京門枝路工程情形摺

奏爲驗收京門枝路工程情形恭摺仰祈

聖鑒事竊查西直門外起至京西門頭溝止運煤鐵路於光緒三

十二年六月由商部奏請歸併京張路工一氣興修作爲京張枝路奉

旨依議欽此嗣由京張路局總辦詹天佑等馳赴測勘路線連岔道約長五十三里估需銀六十三萬一千餘兩詳部核准由關內外鐵路餘利項下動撥各在案茲據京張路局詳稱該枝路業於去年年底完竣計路長四十七里又四分連岔道共長五十六里又八分除支用款項俟核明細數專案造報外應請遴員蒞工驗收等因到部當經臣部派主事唐德萱京漢路局養路總管補用知府李大受前往驗收現據該主事等覆稱奉派後卽乘京張火車開往門頭溝行程歷四十三分鐘左右核算每鐘可行五十餘里沿路鐵橋十二座木橋一座橋空自十尺至四十尺不等永定河大橋一道計八空每空鐵梁長百尺橋墩連基均用唐山自造

洋灰和石子製築工省料堅其餘涵洞三十八道積長一百十三尺車站站台機車房水櫃房辦公處所路員住房布置經營亦甚合法路綫多在平地祇有一處盤繞山峽幸僅里許尙覺無礙惟因繞避墳塋致正綫僅四十七里又四分而曲折之處共十八灣然全路安設諸法及一切製造均合華人使用與收回洋人承辦之路多須改良者不同等因前來伏查鐵路之設必枝幹互通而後運輸利便門頭溝一帶山北向產高煤從前專恃駝運腳價既昂銷路遂滯近日枝路一通開車以來運煤頗旺後來營業自可望有起色而該路工程安設亦皆布置妥貼臣部仍一面督飭該局總辦等認真經理隨時整頓總期上以裕國下以便民成一舉兩得之美至該枝路支用各項款目銀兩俟該路局造具清冊詳報到日再由臣部會同度支部覆核具奏所

正德名二二一
有驗收京門枝路工程情形理合恭摺具陳伏乞
皇上聖鑒

退耕堂政書卷二十七

退耕堂政書卷二十八目錄

奏議二十八

勘查同蒲路綫股資情形摺

購換電話新機摺

請給琉璃窖廢址建造電話局片

整頓京奉鐵路辦法摺

接管京漢鐵路後整頓情形暨籌擬擴充改良辦法摺

會查監司大員開鑛築路被控各款摺

崔廣沅父子請交地方官察看片

擬定吉長新奉鐵路借款細目合同摺

遵 旨議覆張光照條陳摺

展築張綏鐵路籌定辦法摺

遵 旨籌議錦齊鐵路事宜摺

遵 旨覆陳華商擬辦蒙古汽車未便議准摺
收還英商扣留路款贖回南票辦鑛合同摺

退耕堂政書卷二十八

天津徐世昌

奏議二十八

勘查同蒲路綫股資情形摺

奏爲覆陳勘查山西同蒲鐵路路綫股資大概情形恭摺仰祈
聖鑒事光緒三十四年五月二十六日奉

上諭近年來各省官辦鐵路皆能剋期竣工成效昭著而紳商集
股請設各公司奏辦有年多無起色坐失大利尤礙交通著郵傳
部遴委委員分往各路確實勘查妥擬辦法嚴定期限倘所集股
資不敷尙鉅或各存意見推諉誤工以致未能依期完竣卽由該
部會同該管督撫另籌辦理並將該省所舉承辦人員差使查照
商部歷次奏案分別撤銷等因欽此欽遵到部當卽遵擬勘路查

款辦法先行遴員奏派分往勘查並將已經勘過各路大概情形分別奏陳各在案茲據前派同蒲鐵路勘路委員臣部鐵路總局工程顧問員沙海昂汴洛鐵路監工唐乃倉鐵路總局譯員林兆璠查款委員調部差遣翰林院檢討陸夢熊鐵路總局科員周明泉等查得山西鐵路該省原擬由大同府起修至蒲州府止嗣後該公司因集股維艱自開辦以來共收股款銀二萬七千餘兩及撥用畝捐銀二十萬兩核計所差甚鉅遂擬先修太原府城起至汾州府之平遙縣一段亦已聘請工程司測勘現據該委員等將其原勘路綫詳加覆勘據稱由太原府城起向北接路應自城東卽行向北較城西地平更高若就城西定綫必須墊高地基地勢尙嫌狹小如向南出路直抵徐溝形勢甚順但地太低窪卽使造橋而河流遷徙無常各橋基址極難預定倘達徐溝不東繞太谷

卽抵祁縣固可縮路而省費然太谷地方富庶就營業論又不能舍此他適惟是太谷西北二門外恆有河患欲設車站不得不繞東南多一轉折由此又當向西以出祁縣而五馬河及支港諸水皆趨於祁應建涵洞極多其由祁縣至平遙縣一段跨道上嶺循電桿至混河均是高地原勘路線定在平遙城西與地利不甚相合尙須酌改其款項除歷年費用外現在所存僅有六萬九千餘兩等情稟復前來伏查該公司擬由太原先修平遙尙屬實事求是雖其原勘路線據該委員等覆勘有須斟酌之處然相度遷移猶非難事特該公司現存款項僅此六萬餘金尙不趕緊募籌卽此一段亦無告成之望應由臣部會同山西撫臣從嚴監督察看情形如果悠忽無成自應恪遵

諭旨將該公司分別撤銷另籌辦法其餘各路俟各委員等陸續

報齊再行覆奏所有覆陳勘查同蒲鐵路路綫股資大概情形理
合恭摺具陳伏乞

皇上聖鑒訓示

購換電話新機摺

奏爲購換電話新機以利交通恭摺仰祈

聖鑒事竊查北京電話於光緒三十年向丹商收回自辦原爲挽回利權開通風氣起見時以用戶無多購置機器僅敷五百家之用租賃民房權爲開辦近年用戶日增陸續敷設至一千五百餘家器小用多已形竭蹶而掛號未設者尙有一千餘戶勢非籌換新機改訂辦法無以爲擴充之具上年電政局總辦候選道周萬鵬本部司員吳炷靈前赴葡京萬國電政會經臣部飭令便道考查東西各國電話辦法以圖改良並令北京電話總局將東西各

洋行所開機件價單詳細比較呈候核奪去後旋據該局稟稱查那威電氣會社德國西門子會社莊孫斐利布會社英國費魯斯卑會社美國電氣會社及泰昌瑞記等洋行所開總局暨南分局需用交換新機價目各有不同經督飭洋工程司辻野朔次郎詳細比較以美國電氣會社爲最廉將各帳單彙呈核辦前來臣等查電話一項最便交通於官署商民均有關係亟應籌改完善以備供求當卽飭令電政局與美商詳細選訂機件磋商價目核減再四八折之外復扣九五所有回用使費一律刪除以歸核實現在議定總分兩局機器電纜話匣綫筒及裝設各項費用計實價銀二十八萬餘兩可敷六千家之用查核現在用戶情形可得三千家之數以月租五圓計之常年應收十八萬圓將來逐漸推廣約計二三年後尙可倍增此項電話本具營業性質子母相權實

在有盈無絀購機經費不至無著又北京電話原有總局一處分局四處現除總局照舊設立外其餘四分局擬擇一適中之地歸併一處以節糜費其購買機器改建房屋應用款項卽由臣部飭令電政局設法籌措分年由電話收費項下歸還以清款目除咨明度支部外所有購換電話新機以利交通緣由謹恭摺具陳伏乞

皇上聖鑒訓示

請給琉璃窖廢址建造電話局片

再現在京師電話改換新機歸併局所自宜擇一適中之地以便肆應查有琉璃窖廢窖地基甚大適當南城之中曾經學部順天府建立師範學堂中學堂及工藝局等數處此外餘地尙多足敷建造房屋之用擬請

恩准撥給該審餘地一隅俾得建造電話局於電務實有裨益謹
附片具陳伏乞

聖鑒訓示

整頓京奉鐵路辦法摺

奏爲整頓京奉鐵路劃分權限疏濬利源以節虛糜而收實效恭
摺仰祈

聖鑒事竊中國建築鐵路以京奉爲最先各路進款亦以京奉爲
最鉅該路機關複雜廠站繁多措置是否得宜於權限出入路款
盈虧關係至爲重要臣等督同鐵路總局局長梁士詒及該路總
辦楊士驄于煖年等悉心籌畫隨時切實整頓所有用人理財各
項現已漸就範圍謹將辦理情形爲我
皇上縷晰陳之一嚴核工程查工程一項用款浩繁最難稽考上

年九月臣部頒發工程限制章程飭令總工程司每年年終預算
下年應須修造工程開單稟呈核奪非經核准不得擅行興工其
因天災事故急須修築有出預算之外者應由工程司稟明總辦
核辦如預算在銀五百兩以上均須稟呈鐵路總局核准方准支
款至各工程司領款之時非經總辦批准不得向收支處支領倘
預算款項不敷應將續需之數稟請核示數月以來稽核漸臻嚴
密一嚴核購料鐵路出款以購料爲大宗該路機廠兼代他路製
造橋梁車輛等項用料尤鉅現經飭令於訂購之先由總工程司
暨管理廠務之華洋各員彼此研究明確其料價在銀一萬兩以
上及須訂立合同者均須稟請批准飭遵不得擅行訂購以重事
權一歸併職掌裁汰員司該路局內執事華洋員計分二十處名
目紛繁職權不一經飭併爲六處每處派總管一員督同員司經

理其事務較簡者卽行分別裁併計共裁去五十餘員兼差薪水並經一律停止一整頓唐山機廠查唐山機廠工匠眾多事務繁冗且與京津相距較遠稽查難周去年七月臣部添派美國機器專門畢業生候選道施肇祥充全國機器副總管常川駐廠幫同辦理隨時認真查察並將不急廠務暫行停止以節糜費一嚴定客票貨票規則車務積弊以客票貨票爲最多經飭該路車務處將客貨各票暨車守鎊房舞弊情形逐細考求訂立規則十二條通飭遵守凡各站票房鎊守車守通同舞弊以多報少以貴報賤私帶客貨漏填帳本遺失票據一律嚴定罰款其知情舉發者並酌量提賞以示勸懲一清理貨廠該路設立貨廠原爲便商儲貨起見從前各廠司事閒有需索小費積攔貨物情事經嚴飭禁革有陽奉陰違再蹈前弊者並卽立予懲辦一整飭車務用人查沿

路站长地位雖卑而與各商隨時接洽實爲要職本年二月經飭訂委派站长章程凡站长更調補充應由總辦主持車務總管不得專主其平日辦公勤惰應按季造册呈報聽候考覈黜陟並以此項人員皆有經手銀錢之責飭令一體覓具妥保簽單備案此年來整頓京奉鐵路用人行政之大畧情形也此外沿路巡警從前不甚得力現經實行訓練分段梭巡尙堪保護行旅長期免票暗虧進款流弊滋多去歲曾經奏明停止現各部省請發減價憑照亦已日漸減少又該路所開新邱煤礦成效未著用度不貲經飭暫停大舉而鐵路營業尤重開源此路自有南滿洲鐵路與之爭衡輸運頗形澀滯臣部昕夕籌思力圖擴充進款之策現計已辦到者數事一添開車輛該路由京至奉向無直達快車現每星期開行一次以便與南滿洲鐵路行車相接並於京津間每日加

開快車二次據該路車務處報告添開以後進款實有加增客商亦咸稱便一酌減運價各路貨物往往因車價過昂改由他運因飭該路凡大宗貨物均予減價以廣招徠一招商租地該路全綫頗多附屬之地荒廢可惜因飭勘丈明晰分別招商承租所得租價悉數歸公計每年進款可增十萬圓之譜一添修岔道鐵路岔道愈多則轉運愈旺現飭該路凡衝要處所商家請築岔道查於路務無礙均卽立予興工以便加收租款一聯絡軌道分攤票費京奉本與京漢京張連屬與南滿洲鐵路亦相接近彼此客貨可互爲遞送經飭擬訂聯絡辦法以便血脈貫通轉輸益捷每年分攤票貨亦可積少成多一代各路製造車輛橋梁查該路山海關唐山兩廠於製造車輛橋梁素稱合法京張廣九津浦及江蘇粵漢各路多由該廠代造臣部現飭該路加意延接並飭知各路如

遇有此項工作皆向該廠訂購將來此項利益當有把握一轉售各項車輛料件該路積存車輛機器等件頗多廢棄堪虞尤耗成本經多方向各路商酌陸續售出將售價全數歸公以資挹注其隨時剔換道木鐵板螺絲各項售出價值並飭按月呈報以憑考核此外沿路租挂告白賃設棧房修飭座位改良票式更定開行時刻等事均經隨時飭知籌辦要以便商益路爲主此又關於營業之整頓情形也至鐵路管理之法繁曠多端然究其會歸不外開源節流二事開源動需鉅款現在財政支絀祇能就力所能辦者竭力籌維並冀用款多省一分即可勻一分以辦他事故節流之舉尤不容緩據路局呈送徵信冊上年進款較前屆約多一百萬圓而用款反較前屆少七萬餘圓計前屆用款占進款百分之三十七分而上年用款僅占進款百分之二十八分實屬具有成

效臣世昌此次由藩來京曾特往山海關唐山塘沽天津各廠站局所考察一切嗣後臣等亦當不時親往查閱並督飭該路員司認真辦理毋得稍有疏忽以利交通而臻完備所有整頓京奉鐵路情形理合恭摺具陳伏乞
皇上聖鑒

接管京漢鐵路後整頓情形暨籌擬擴充改良辦法摺

奏爲陳明接管京漢鐵路整頓情形暨籌擬擴充改良各辦法恭摺仰祈

聖鑒事竊京漢鐵路前由比國公司代辦已閱十年近經清還比款收回自行管理外人方以接管之善否觀我辦事程度之高低以歲修工程行車管理諸大端有待於改良者尤切上年秋冬間迭飭鐵路總局局長梁士詒暨該路總辦鄭清濂等分別妥議逐

正言卷二十一
漸施行數月以來路務尙形起色茲謹將整頓情形及籌擬擴充改良各辦法爲我

皇上陳之查京漢路綫甚長分段管理用人甚夥洋員薪工尤鉅非裁汰歸併改用華員則糜費多而實利少從前原用洋工程司一員歲薪六萬佛郎另駐比洋員十三員經理撥款購料等事又各款核算文案管料洋員數十人薪工亦頗不貲接管以來業將總工程司及駐比十三人全行裁撤工程事務改歸養路處兼辦向設行車養路廠務三處分派華員充當總管其在歐洲撥款購料諸事改託銀行經理隨時雇人驗收材料全路大段亦經併三爲二計又遣散洋員三十名裁去監工棚頭等員役一百餘名通計歲省之數約銀十萬圓之譜其路工應用材料固爲必不可少之物亦爲歲出大宗從前分歸各款經管收發不無弊混現飭統

歸京局綜核於其動支料件隨時稽考卽訂購各料亦復相時購備免因急需之際而受抬價之虧各項所節浮費事在無形雖無確數可徵而日計不足月計或見有餘至於招徠商貨本爲營業要圖該路常年轉運貨物以煤炭糧食兩項爲數最鉅迭經核減運煤車價優給各項運貨回費又設商務專員與客商隨時接洽兼在京津鄂汴考察攬載是以運貨之數業已漸見增加計自接管以來至今凡五閱月通共進款五百一十萬餘圓較之上年此數月內所收約多七十餘萬圓倘能從此日起有功不特借款本利易於清還卽一切附麗該路事業無難逐漸推廣日臻完備此整頓京漢鐵路之大概情形也惟是理財之道本重開源營業之方應規遠大上陳各節僅就已辦者而言至於應辦諸事百緒千端猶以財力支絀未能同時並舉臣等通籌默計有必不容緩者

數事一曰添購車輛路線綿長二千餘里近以客貨日盛不敷周轉露積站旁客商時形缺望逆料日後貿易愈繁車輛必愈形缺乏自應從速添購現擬定購貨車二百輛以應急需其餘各項車輛隨時斟酌情形再行籌辦二曰建築旅館收管行李查該路沿途食宿地方湫隘敝陋行旅苦之現擬於各大站自行設立旅館分別等級酌收價資務令妥洽安舒以便過客又客商起卸行李紛紜擁擠不便殊多現擬仿照滬甯潮汕等路辦法由本路另設專員收管行李以免擾亂遺失三曰修繕軌道查沿途枕木朽敗者多行車深虞危險應即從速抽換又石渣攪土最傷枕木隄橋不護易於傾頽擬飭將全路石渣從新墊鋪並於河流衝要酌添隄壩庶免潰決之後耗費彌多四曰增設站所查京漢各站向無圍牆以致人眾紛雜一切規則無從實施上年已飭將北京一站

修築圍牆此外各大站亦應陸續修築又各大站應造鐵篷以蔽風雨設存車廠以保車輛添築岔道月台以敷轉運並飭分別辦理五曰籌辦轉運查各國鐵路皆多設轉運公司與鐵路相輔而行以廣招徠而資利便該路原有轉運公司十餘家筆路經營未臻妥善現擬設立運輸所一處攬載向來不附鐵路之貨物務以便益商務爲主俟辦有成效再行隨時推廣其餘若培養路員則洋員可期抽換清釐地畝則餘地可以分租添造枝路則貨物之運轉靈而進款豐推廣工廠則車輛之修理便而用費省以及廣種樹木以資取材剔售存料以免擱棄凡百興作皆爲來日取盈之資實卽目前節用之計前此規模缺略荏苒十稔若長此因陋就簡則墮壞冥冥不獨將來所費益鉅卽進款亦必致短絀路歸國有帑藏攸關臣等職司所在不敢僅顧目前自應督飭該路員

正書卷二十一
司切實施行力杜糜費以期蒸蒸日上並由臣等隨時親往該路
詳查一切藉臻周妥所有整頓京漢鐵路情形及籌擬擴充改良
各辦法緣由理合恭摺具陳伏乞

皇上聖鑒訓示

會查監司大員開鑛築路被控各款摺

奏爲遵

旨查明監司大員開鑛築路被控各款會同據實復陳恭摺仰祈
聖鑒事光緒三十四年十一月二十九日承准軍機大臣字寄奉
上諭都察院奏有人赴院呈稱監司大員開鑛築路藉勢營業侵
奪地方生計請飭查辦據情代奏一摺著農工商部郵傳部呂海
寰袁樹勛按照所陳各節會同秉公查明切實具奏毋稍徇隱原
呈均著抄給閱看欽此遵

旨寄信前來臣等當卽往復咨商分別遴派山東勸業道蕭應椿直隸候補道任鳳苞山東候補道楊耀林等先後馳往嶧縣會同親赴中興公司鑛廠及築路處所逐加查勘按照所控各款明查暗訪務得確情茲據該道等逐款呈覆或證諸卷宗或訪之輿論實均無所徇隱臣等復經切實考核如原呈內稱張運司蓮芬爲直隸候補道員於光緒二十四年稟請前直隸總督裕祿前直隸鑛務局督辦張翼會奏在山東嶧縣開辦華德中興煤鑛公司呈內聲明該鑛附近百里內不准用機器開採十里內不准用土法開採至所謂十里百里之數或爲四面或爲面積故意不定限制希圖朦混該運司自直隸調補山東兗州道後升任鹽運使仍兼管山東嶧縣鑛業嶧縣爲其所屬尤爲藉勢妄爲遂將其所謂十里者四面延長爲四十里百里者四面延長爲四百里謹按鑛務

正章第二十九條及三十條所定一鑛界每邊三百官尺至大亦不得過九百六十中畝今該公司之所侵越豈止倍蓰正章第十四條之地面權利業主准其自用謹按此條規定先准業主自行開採似非該公司之所能禁止正章第一款又云自宣布之日起當卽奉行乃該運司故援舊章以便私圖等語查嶧縣中興煤鑛公司係光緒六年經前北洋大臣李鴻章奏准派員開辦旋因資絀停工二十五年復經前北洋大臣裕祿會同前督辦直隸鑛務內閣侍讀學士張翼重行籌辦奏派張蓮芬爲公司總辦聲明該鑛附近百里內不得再用機器開採十里內不許民人用土法取煤東省紳民准其附股所擬辦法係按照前路鑛局定章辦理三十三年由部飭據山東鑛務議員朱鍾琪將該公司所佔鑛地繪具圖說詳細標註地名送部備核有案是該鑛地界早已明定限

制三十四年頒發鑛務正副新章所定鑛界與該公司奏案大小懸殊經山東鑛政調查局遵照新章第八款條陳東省華洋各鑛情形請示辦法農工商部當以從前專案奏准之鑛處所甚多所佔鑛界暫時均尙未改歸一律嶧鑛旣辦有成效自當量予維持咨行山東撫臣轉飭遵照在案是該公司所佔鑛地已遵章報部請示辦法並非故援舊章以便私圖不得謂爲朦混侵越再查新章第八款內載現在開鑛之鑛商與已經准領鑛地之人如以新章之某一款與其已得之權利有所損礙准其稟請咨部核奪如無侵奪妨損可以酌予通融等語嶧鑛爲業經奏准之案開辦在先著有成效若必繩以新章強令縮小地段實於其已得權利大有損礙且並無侵害妨損情事自應准予通融辦理以示維持揆與定章亦無不合至鑛務正章第十四款所載准業主自用係專

指地面而言其地腹開鑛權仍專歸鑛商並載明開鑛應辦事宜業主及他人均不得阻礙並無准業主自行開採之語原呈援引此條未將地面地腹分清係屬誤會又原呈內稱該公司低價格抵制民鑛擅威權封禁民鑛致使嶧境鑛商統歸歇業將全嶧民人自元迄今生活之利源均被該公司侵害該運司藉官經商已屬違例復背正章以營鑛業尤足病民等語查嶧縣煤鑛淺處均被前人採取咸豐以來從無採及深處者聞有紳民開辦小鑛資本微薄時作時輟二十七年有嶧商崔廣沅在小屯村用土法開鑛距中興公司鑛口在十里以內經農工商務局派員會縣丈明因與奏案不符詳經前撫臣批飭封禁二十三年崔廣澍崔毓挺稟請復開小屯煤鑛經升任撫臣楊士驥委員前往丈量小屯村確距公司鑛口七里有奇繪圖稟復是以未能照准三十四年六

月該紳又復具呈經臣樹勛察知其意圖朦准嚴行批駁其餘窰口亦因煤劣滯消先後停止是該縣民窰并非該公司所能擅權封禁至該公司井口十里以外照案仍准民人用土法採煤如安南成地方煤礦前有職商梁步海稟准領照開辦至今是嶧境礦商並未統歸歇業公司歷年所出之煤從前收價較廉近年銀價人工百物皆貴售價亦漸增加詢據土人聲稱公司售煤價廉之時且較民礦售價爲昂因公司煤質較佳人均樂購故民礦出煤不能相敵係屬實情並無低價抵制民礦之事該運司自接辦嶧礦以來與紳民交際極力和平公司交易悉按商規從未稍藉官勢公司井口上下日有人夫數千皆賴煤礦爲生計附近數十里村莊販煤煇焦分運售賣者所在多有自不得謂嶧民生活利源皆被該公司侵奪張蓮芬前以道員承辦嶧礦係奏明委派其後

調任充曹濟道升授運司係出自

特簡嗣由臣樹勛奏請開缺專充該礦總理是該運司疊經奏派更不得謂爲違例經商此查明中興公司礦務並無違章病民之實在情形也郵傳部查原呈內稱該運司於去年冬來嶧張貼告示謂自棗莊至台莊運路業經部准迨切實考查始知所謂部准者尙屬子虛等語查中興煤礦公司請修由台莊至棗莊運路係經前直隸督臣裕祿於籌辦山東嶧縣煤礦案內奏明准其建築復由升任山東撫臣楊士驤奏咨部核經臣部咨查該路路綫於津浦正線無妨批令該公司遵照奏案築造有案未可指爲子虛原呈又謂由韓莊建修校路直抵棗莊或由棗莊轉向韓莊既可轉輸該公司之煤復能與津浦聯絡一氣并可省公司修築之費等語臣部派員查勘該處形勢由韓莊至棗莊約九十里中間層

經嶂施工固難而該處運河復有八閘三灣節節淺阻若運煤至淮海一帶須由棗莊九十里至韓莊復由韓莊東折八十里至台莊方能通運路險運艱轉輸不便且該公司修築台棗之綫上路已墊十分之八鐵軌亦安設三十餘里一旦折回改綫耗折必多如以津浦鐵路轉運而言應由棗莊另築枝路五十餘里至臨城驛接軌較形利便將來擬由臣部斟酌情形妥籌辦理臣海寰查津浦路綫係循用津鎮原勘舊圖韓莊本爲正綫所經其由韓莊至棗莊原勘亦有此圖當時或以韓莊爲水陸通衢轉運便捷遂未再向他處另勘至中興公司由棗莊至台莊運路倡議在津鎮勘路之先奏准開辦又在津浦訂立合同之前蓋一則專爲運煤以供津浦本路之需一則專爲運煤至台莊由水路行銷江南徐淮等處爲用各殊而並行不悖迭經派員實勘韓棗一路施工

正三言文二二二
三三
不易與郵傳部所查情形相同現議由臨城驛幹路築至棗莊約
祇五十八里地多平坦一路鑛苗極旺中間經過之山家林煤鑛
中興公司業已開採如將津浦枝路改由臨城築至棗莊較由韓
莊爲宜應由臣海寰咨明郵傳部查核辦理原呈所稱由韓莊建
至棗莊或由棗莊轉向韓莊各辦法旣不便於公司又無益於津
浦義無可取應請毋庸置議又查台棗運路實與津浦路綫無妨
並據張蓮芬屢次來商請將此路按照原價收回改歸津浦築作
枝路臣海寰以此次借款不敷尙鉅未便遽行定議當經咨商郵
傳部議俟津浦路成後再行體察情形酌議辦理此臣海寰查明
嶧縣築路之大概情形也原呈又謂公司坐辦戴緒萬委員姚光
浚自訂賤價強買民地發掘墳墓剷除麥苗國課民食均受損害
等語臣樹勛查該公司購地築路係於光緒三十三年經前升任

撫臣楊士驤札委調補福山縣知縣姚光浚會同嶧縣知縣謝熾先期出示曉諭復邀集路線附近紳董公同議明按照該縣民價分等定購上地約給京錢一百二十千至一百四十千次地約給京錢八十千至六十千不等其路線所經之地內有崔姓梁姓地畝至今阻撓尙未買成決非自訂賤價強買民地可知其已購之地遇有墳墓路線不能繞越者願自行遷葬每塚給京錢十千外畀以棺無主者公司另置義地備棺遷埋遇有麥苗除地價外每畝給麥種京錢四千聽售主自行剷割附近紳民大率相安無事原呈所謂叱辱究治旣無控訴呈詞調查縣卷亦無案據他如該公司購地後向係隨時造冊送縣撥糧悉照民田一律完納似於國課無損計其運路自棗莊以達台莊長僅九十里佔地只二十餘頃無論地有肥磽卽使盡屬膏腴亦不至有妨民食此臣樹勛

正書卷二十一
十四
查明嶧鑛公司並無侵奪地方生計之實在情形也總之該運司經營嶧鑛計已十年上爲

國家開利源下爲嶧民廣生計實於東省大局裨益良多該鑛原係華德合股開辦上年經該運司設法議退洋股專集華股呈請銷去華德公司字樣尤足挽回利權東省鑛產已多入外人之手華商出色之鑛祇此嶧地一隅且煤質佳旺人競羨之誠宜厚集資本接築運路推廣採運藉以抵制洋煤銷路今既查明並無違背奏案部章且實無侵奪地方生計情事自未便因一夫攘臂聽其阻撓仍應由臣等轉飭該運司將開鑛築路事宜遵照奏准各案實力籌辦勿稍退阻以興鑛業惟該鑛經此番波折商情觀望集股更難擬由農工商部附以官股作爲官商合辦之鑛以竟全功其詳細辦法容另案奏明辦理所有遵

旨查明中興煤鑛公司被控各款謹會同恭摺據實覆陳伏乞
皇上聖鑒訓示

崔廣沅父子請交地方察看片

再查東省鑛產富於東南自膠澳訂約而附近鐵路三十里之權
失自五處採鑛合同簽押全省鑛產精華遂爲外人壟斷幾盡本
地紳商素鮮殷富於鑛學亦少研求幸嶧縣中興公司煤鑛開辦
在前頻年締造經營規模大備外入雖屢屢生心無從藉口在稍
明地方公益者方且共保護之不遑尙何忍爲淵毆魚任其同歸
於盡該公司所辦鐵路均係遵守奏咨各案嶧人俱無違言惟嶧
紳崔廣沅崔毓樞父子及其婿梁繼軫三人屢與公司爲難砌詞
妄控多方阻撓臣樹勛自去夏履任卽訪聞該紳等逞刁健訟鄉
評甚劣檢查檔案積贖累尺大率強詞奪理益信人言之不誣此

正書卷二十一
五
次派員查辦事關奏案該紳等果有屈抑儘可據理伸訴乃竟手書說帖索賠巨款要挾多端悉出情理之外意存破壞如見肺肝若任其肆意瀆控不休不但該公司將有解體之虞實於東省實業前途大有損礙臣等公同商酌非畧加懲戒不足以儆效尤應請

旨將該紳等交地方官隨時察看以後不准阻撓中興公司鑛路諸事如再妄行干預卽當從嚴參辦俾該公司得以一意經營不爲浮議所動以彌後患而竟全功是否有當謹會同附片具陳伏乞

聖鑒

擬訂吉長新奉鐵路借款細目合同摺

奏爲擬訂吉長新奉鐵路借款細目合同繕單恭摺具陳仰祈

聖鑒事光緒三十三年三月外務部與日使訂立新奉及吉長鐵路協約內稱應由兩國訂立各該鐵路借款合同等語嗣以協約辦法尙有應須更改之處經由臣部與日使重訂續約七條聲明借款細目合同彼此委員另行商訂於光緒三十四年十二月奏明奉

旨允准在案臣部當派京奉鐵路局提調知府盧祖華等與南滿洲鐵道會社委員開議復因該路關係奉吉兩省交通行政於利害所在不厭求詳經飭就近隨時稟商東三省吉林督撫臣並添派籍隸吉林之候補道員徐彙霖隨同參酌以資取盈而期周密計磋商迄六閱月會議至數十次往返爭持幾於筆舌俱瘁始克定議當議訂吉長鐵路借款細目合同十二條新奉鐵路借款細目合同十二條吉長鐵路借款以二十五年爲期行車進款應放

存長春或吉林之正金銀行但此款如係該行平日不收之貨幣則不存放該行該行亦不能援協約第三款令吉長路局照數補存又該行存款除開支及備還本息外聽候中國國家撥用新奉借款以十八年爲期每年應還本息按月劃出存放天津正金銀行等語以上各節爭執最烈者惟吉長行車進款存放正金銀行一事初議時日人要求凡進款皆須存放又必須日圓該銀行方可照存臣等以奉吉兩省向用龍圓及官帖小銀圓若必須日圓方允照存不特兌換折虧且於國幣流通殊行窒礙辯駁多次日人始允照現訂第六款辦法其餘各項如借款交與我國駐日使臣還款由我在大連或日本交付則何時匯兌由我自主正金不能操縱鎊價如合同內未盡事宜凡關於還本還利如由局長與南滿鐵路會社商酌則會社不能藉口更易其他各事如彼此爭

執公舉公正人判斷則可不牽入國際交涉均根據歷次所訂協約續約更求細密當先將合同草稿咨送外務部度支部查核旋准覆稱均屬妥協等因茲謹將兩路細目合同繕具清單恭呈御覽如蒙

俞允卽由臣部欽遵派原議委員與南滿洲鐵路會社委員簽押並咨行外務部照會日本使臣查照所有擬訂吉長新奉鐵路借款細目合同緣由理合恭摺具陳伏乞

皇上聖鑒訓示

遵 旨議覆張光照條陳摺

奏爲遵

旨議奏恭摺仰祈

聖鑒事本年四月二十五日軍機大臣欽奉

論旨都察院代表奏河南試用道張光照條陳交通事宜呈一件著
郵傳部議奏欽此欽遵由軍機處片交到部原呈計分郵電路船
四大綱三十二目一郵政內稱宜改管理之權一節查郵政爲臣
部職掌從前歸稅司代辦本屬權宜之計已屢經與稅務處商議
接收以期統一事權藉符名實又稱宜用歸併之法以郵政合於
電報一節查郵電合一東西各國辦法相同原以郵電兩事俱屬
通信合爲一局不獨用費可省抑且傳遞較靈應俟接收後察度
情形通盤籌畫期臻盡善又稱宜入郵政同盟會一節查郵會同
盟必機關完備彼此相需方能享同等之利益臣部對於此事深
爲注意前經派員於赴瑞典時便道考求現在提議接收一俟規
模成立卽當首先議及以期實行其郵便儲金一節內稱交通銀
行與政體不合宜併大清銀行等語查度支部奏定釐訂各種銀

行則例明定大清銀行爲中央銀行交通銀行爲殖業銀行權限極爲明晰泰西商業繁盛銀行林立譬如植木必須枝葉扶疏方足衛其根本是以殖業銀行愈夥則中央銀行愈形便利現在創辦伊始惟慮規模簡陋決無相妨至郵便儲金與中央殖業各銀行又自不同臣部擬籌議試辦亦與交通銀行並行不悖呈中語多牽混蓋未諳東西各國規制與度支部奏定則例之故二電政原呈內稱官電宜歸部辦電費不必再減材料設廠自製工程嚴除浮冒學堂亟宜推廣各節臣部或已奏陳有案或已明定章程均請毋庸置議其請裁電政局一節查日本通信省設有通信局復設有通信各官署所以爲行政綱紐中國報局二百四十餘處勢難事事與部直接其重要命令由部司之其奉命而分布一切之事由局任之且各報局所需各種材料非在水陸交通口岸調

度則轉運益形繁費電政一局礙難擬裁所稱推廣電綫一節查
臣部自收贖商電後兩年之中擴充綫路四千里近年東三省收
回外人佔用綫路三千餘里又添設綫路約七千里若照九年預
備奏案逐年分辦則數年以後全國可冀交通若同時並舉一時
實難有此財力又稱推廣電話不得免費電話電報宜歸一局兼
理等語查電話本無免費名目惟商辦時有報効官署之稱今改
歸官辦又因換用新機所費頗鉅以後無論官商均當一律收費
至電話電報合併一節兩項機器本自不同各處收發報事繁簡
又各互異其分支小局或有可以合併之處總局斷難兼顧現在
話局甫經創辦應俟推廣時體察情形分別辦理又稱各部省不
得濫用官電一節查官電章程凡蓋用紫花印信者按照一等半
價核收各衙門出差人員及大清銀行等處往往援案辦理嗣經

臣部核定出差各員直寄部電方准按照半價其與各處來往之電則照一等作四等例排發紅十字會及賑務報資均核實列支作爲善捐此外善舉名目概行停止實已綜核加嚴又稱學生薪水宜歸一律及停止保獎一節查學生派赴邊苦省分暨各衙門當差例有加五加二薪水前已札飭電局酌量裁減至保獎係由各部省自行奏請辦理其報生程度較淺者與他項專門實業不同並無由學生徑保部曹及府州縣之事至閱歷較深之報生已分別提升各局委員如實在得力仍擬調部差遣以昭鼓勵三路政原呈購地條內稱應分勘地發價爲兩事並由局發給委員三聯單等語核與各路辦法大致相符應毋庸議購料條內稱由總工程司訂購由分工程司指索及中國所有者不必購自外洋等語查各路材料由總工程司妥商總辦籌備從無停工待料之虞

至借款官辦各路合同多聲明該路需用材料須先儘中國工廠承辦本未嘗專用洋料又工程條內稱工頭由局招募繙譯由局酌派等語查各路包工俱先招人投標本不盡由工程司擇用包工合同亦由局妥定格式兼備華洋文以免欺朦繙譯人等本由局派至所稱工程司不得過問工價一節工程司有管理之責考究價值驗收工程其事本相銜接西國視爲工司分內之責勢難強離爲二又客票條內稱令買票者悉納大洋找以小洋每銀圓按十角計算等語查光緒三十三年八月臣部議覆御史葉芾棠整頓路弊摺內聲明通用小銀圓數在四角以下者一律收用各路通行章程亦定爲四角以下收零角四角以上收整圓其畸零之數多在運貨價內客票價值多係整角並無零分惟當與時消息未便任意增減若如所陳未免困商又運貨條內稱裁去零裝

躉裝名目一律十成收費等語查躉裝運貨雖比零裝稍輕並非概收八折若一律改收十成恐於攬運有礙欲計路款盈虧在於運貨之多不在運價之重客票且有來回減價與夫論年論月之例矧以大宗貨物常川運輸未可漫無等差或使商賈受虧裹足至運貨用三聯單各路久已遵行現復定章先報捐後運貨車站必查對捐局副單數目相符方准附運亦不致有偷漏之患又舊料條內稱更換道板剔換舊料應一併出售等語查臣部於光緒三十三年頒發各站整頓路政條款已飭分別變價歸公歷經各局造報有案向無侵蝕廢棄情事又薪水條內稱督辦以下優絀懸殊請歸平允一節查督辦鐵路大臣所用總辦提調均係自行奏派與部無涉責有重輕事有繁簡薪水多寡亦自不能強同又軌道條內稱吾國路軌均寬英尺六尺四寸而正太一路獨狹等

語查已辦各路均遵商部奏定章程兩軌距離寬英尺四尺八寸半從無寬至英尺六尺四寸者正太路因山路險阻估價過昂光緒二十九年經外務部奏准改用窄軌現全路告竣收款甚少入不敷出礙難折改其所用材料查無購用日本舊料之事殆係傳聞之訛又借款條內稱借款造路宜分兩事等語查從前借款各路工程司權限已列合同自難翻約去年臣部借款籌贖京漢一路合同內並未提出京漢二字外人縱欲干預無從藉口比之近訂合同較爲嚴密四船政原呈內稱招商局宜改歸商辦一節查招商局原爲官督商辦實係船政附庸自奉旨歸臣部管轄業經分別咨行欽遵在案嗣據各股東稟請援案組織董事會復經批飭遵照商律妥擬章程一俟呈報卽當詳細核議又稱開平公司宜設法收回一節查開平輪船附設於開平鑛務局本係專運煤

斤與臣部應轄航業性質不同未便議收致貽口實又稱宜提倡商民設立公司並補助資本一節查推廣航業必先造就管理駕馭等項人材而後可收實效若但於發明航業者予以利益設立公司者給以優獎而一切重要職位尙須借材異國仍難扼要臣部現於所轄學堂內議設船政專門似比空言提倡較有把握至所言酌提餘利捐款與補助資本兩端頗形矛盾論航船與郵政互益宜有補助之經而不盡關於資本論公司係商業性質但有提倡之義而不必計及輸將航路廣闊商貨流通利用厚生自有無形之利租稅暗增猶其餘事何必斤斤於餘利捐款自窒生機他如明定保護規條裁冗員節糜費各節臣部均已分別籌議船政一事關係遠大現在力雖未逮猶當努力籌維遠矚高瞻必期有當斯義一俟計畫妥定再行奏明辦理所有臣部遵

旨議奏緣由理合繕摺具陳伏乞
皇上聖鑒訓示

展築張綏鐵路籌定辦法摺

奏爲展築張綏鐵路籌定辦法恭摺仰祈

聖鑒事竊臣部前因京張鐵路將次竣工預籌展築張庫或張綏鐵路飭令京張路局就近察勘據覆張庫直綫貨物稀少不如先接展歸化綏遠城較爲利便等情業於光緒三十四年十一月奏派京張鐵路副工程司俞人鳳前往履勘奉

旨允准在案茲據該副工程司稟稱由張家口起抵歸化城計分四綫取道八岔溝出新平口經甯遠爲北綫取道大同出殺虎口經和林格爾廳爲南綫取道大同北折邊牆出得勝口達豐鎮接北綫之西段爲現擬之綫再由歸化城至河口卽託克託城爲枝

綫惟是八岔溝負山臨淵軌道依山而行山土鬆浮取以築基不甚適用新平口溝渠交錯橋工較多而鵝嶺壩高至二千八百餘尺腦包山尤形陡峻均須開山鑿洞過此山道坡度較高惟豐鎮地尙坦平卽由北而南自歸化城東至和林格爾土少沙多車馬視爲畏途一有大風路軌慮爲沙壓南抵朔平類皆疊嶂層巒循至大同山坡溝渠亦復不少惟由張家口順南綫東段抵大同北折邊牆出得勝口達豐鎮接北綫西段至於歸化展修河口如是變通一則不失大同運煤之利而南北糧食皆可兼運修養之費尙有把握二則同蒲路成可以接軌三則聚樂山較腦包山紅糖水溝較八岔溝枳兒嶺較鵝嶺工程難易迥殊若不圖甯遠之捷取道陶林石匣溝亦可繞越惟邊地早寒每歲施工祇六個月約計八年方能完竣等情并由京張總工程司詹天佑核報前來

正書卷二十一
臣等覆查該工程司所勘各綫尙屬詳細計北綫六百零八里估
需銀一千六百六十餘萬兩南綫七百一十里估需銀一千八百
四十餘萬兩現擬之綫六百八十九里估需銀一千六百零六萬
餘兩論路則比南綫爲短論費則比北綫爲輕加入河口枝路一
百四十一里估需銀一百五十萬兩左右共合銀一千七百五十
六萬餘兩自應就現擬之綫興築以上所估各款尙未計及利息
似此鉅數誠非咄嗟可辦然以八年攤計每年約需銀二百餘萬
兩臣等竊維殖民必籌及交通實邊卽所以固圉有路以供輸運
則物產之價值可增徵調之時期可速張綏一綫實於行軍理藩
政策極有關係卽使營業本金稍有短缺亦難置諸緩圖况就營
業而論由張家口而豐鎮而歸化而河口皆爲繁盛商埠近挹大
同陽高之煤炭雜糧遠萃庫倫甯夏之皮毛牲畜將來西北客貨

奔湊雲集獲利之巨可操勝算若使各路同時并興部款支絀勢難兼顧惟事關重要不得不極力籌濟藉備工需查京張工費係從京奉餘利除備付六箇月借款本息外餘款項下按年撥濟奏明遵辦現由京張展至張綏該路工費擬仍援案就京奉餘利項下分起提撥其不敷之款卽由京張路利撥用並飭令京張路局人員一手經理暫時定名張綏毋庸另行設局以節糜費而資熟手所有展築張綏鐵路辦法緣由理合恭摺具陳伏乞

皇上聖鑒訓示

遵 旨籌議錦齊鐵路事宜摺

奏爲遵

旨籌議恭摺密陳仰祈

聖鑒事本年四月二十五日東三省總督錫良附奏錦洮路事請

正書卷三十一
311
敕部籌款興修一片奉

硃批郵傳部議奏欽此欽遵由軍機處抄交到部查原奏內稱東省自日俄戰後鐵路爲兩鄰所分據上年郵傳部將瓊新一路奏定爲東幹路線嗣因新法一段磋商未協前督臣改議由錦州以至洮南此路若成尙可居中鼎立應請

敕下該部迅籌的款派員勘路急圖興修等語查三省地方遼遠外患日亟經營政策首在交通從前東清南滿兩約早失先機欲籌補救之方非再修極大幹路不足以固邊陲而消隱禍惟新法路案與日人內外磋商迄無成議計惟繞出新民之西徑由錦州經小庫倫以達洮南推展至齊齊哈爾改瓊新爲錦齊將來再由齊齊哈爾接展瓊琿於形勢尙無不合且錦州附近有葫蘆島不凍口岸將來接通枝路關作商港遼東轉運斯爲尾閭不獨鐵路

可分南滿之利權抑且航路可挽營口之損失內以聯絡三省外以策應蒙疆水陸兼籌實今日謀邊至計也惟此路綫長二千餘里成本既重餘利難期第經國必重遠圖斯營業不規近利臣等公同商酌竊以鐵道宗旨各有不同或期行政之靈通或在軍事之便利兼權得失審別輕重欲後效之可期當先務之爲急現擬與英商葆林公司商酌先行派人會同前往錦州一帶查勘路綫勘定之後再與英商酌議逐段包辦工程查臣部鐵路款項每歲出入兩不相抵曾經列表奏陳所有支絀情形早邀

聖明洞鑒至該督所稱迅撥的款一節經臣部函商度支部辦理亦復籌款維艱難資挹注而該路道長工鉅又不能置爲緩圖計惟借款興修則程功較有把握近來日人於東省鐵路屢啟干涉如果另借鉅款當將借債築路分爲兩事冀於路事不至有損主

權於邊事亦可藉資抵制未始非目前應變之策不僅因庫款支絀故也如蒙

俞允當由臣部與外務度支兩部隨時會商統籌以期補救於萬一一俟議有端緒再行奏明辦理愚昧之見是否有當謹恭摺密陳伏乞

皇上聖鑒訓示

遵 旨覆陳華商擬辦蒙古汽車未便議准摺

奏爲覆陳華商擬辦蒙古汽車未便議准情形恭摺仰祈

聖鑒事光緒三十三年十二月二十日軍機處片交察哈爾都統誠勳等奏華商趙宗詒創辦蒙古汽車公司懇請專利年限一摺奉

旨郵傳部議奏欽此欽遵到部并准該都統將該公司所擬章程

咨送前來臣部當以蒙古汽車事屬創舉由張至庫有無窒礙及原奏內所陳法義國人在口外賽車情形究屬如何電致庫倫大臣查覆并將該章程鈔咨核議旋准電覆汽車之行必須與外盟商議方免窒礙五月間有法紳議員乘電車到庫由哈回俄其車僅容三人甚爲便捷惟懼泥淖坎壈等語又三十四年三月四月間疊准咨覆據車盟署盟長等稱蒙人向以牧放牲畜度日汽車行走如飛恐於人畜有礙臣部以該車盟所呈窒礙之處仍守閉關主義似難施之振興新政之時咨由該大臣婉轉開導復准咨覆內盟風氣漸開外盟仍多渾噩加以圖車兩盟距庫遙遠筆墨往來詞意不達尤多扞格應俟眾蒙古與哲布尊丹巴呼圖克圖呈遞丹書克之期各札薩克來庫再行開導等情本年正月復准該大臣將圖車兩盟各王公札薩克及沙畢等會呈譯咨前來詳

查該呈所稱窒礙各節核與前次車盟署盟長等查覆情節大概相同臣等竊以從前鐵路初興無知愚民亦嘗阻撓疑懼屢經詳細開導咸憬然於大利所在悅服聽從使汽車果便開通蒙民雖愚或不致終於固執惟此項無軌之車便於短路實非有利長途偶然比賽自與營業不同非但不計盈虧初并不計利鈍隨帶修整機器工師預備極爲周到是以暢行無礙然亦祇偶一爲之不與鐵路火車相提並論且歐美各國此項車輛僅行於城市數十里間以代馬車迄未有以爲載客運貨之用者察哈爾至庫倫計程約三千里道經戈壁行車之預備難周修車之經費尤鉅更須節節設立行店以便住客貿易無多支持實非易易趙宗詒遽請創設公司以圖專利殆於以上情形均未深考擬請毋庸置議所有覆陳華商擬辦蒙古汽車未便議准緣由理合恭摺具陳伏乞

皇上聖鑒再此案因詳細調查且京庫相距遼遠文牘往還動需累月是以覆奏稍遲合併聲明

收還英商扣留路款贖回南票辦鑛合同摺

奏爲收還英商扣留路款贖回南票辦鑛合同謹將在英京了結訟案情形恭摺仰祈

聖鑒事竊查前督辦鐵路大臣胡燏棻於光緒二十四年與中英公司訂立關內外鐵路借款合同內載備款於女兒河造一枝路至南票出煤之處督辦鐵路大臣允自立合同之日起於三年內造成等語同日與中英公司訂立合辦南票煤鑛合同均經胡燏棻奏奏明奉

旨允准在案嗣與該公司聲明女兒河至南票枝路估需英金十五萬鎊卽於大借款內如數留存備用此中英公司扣留借款之

原因也其後合同所指各路均已造成惟以開辦南票煤礦煤質不佳虧折四萬餘鎊迄無成效飭令停採因之罷築枝路光緒三十三年二月臣部當與中英公司開議廢止辦鑛築路註銷合同所虧本金各認各帳該公司以爲中國不肯合辦則煤鑛當爲英商獨有不築枝路則違背借款合同卽扣留之十五萬鎊永遠不能提用辯駁經年迄未解決臣部以原訂辦鑛合同旣無年限亦無分折股分後鑛歸中國之明文若中英公司堅持自辦煤鑛及要求築造枝路則不獨令英商添一完全鑛權卽建築枝路而進不敷支亦必徒虧鉅本因督飭鐵路局長梁士詒與該公司代表濮蘭德迭次晤商相機操縱濮蘭德始則要求獨辦再則要求仍舊合辦均須建築枝路繼又要求另給他鑛反復曉諭仍要求賠還所虧二萬餘鎊旋議定補還該公司一萬四千五百鎊贖回煤

鑛自辦罷築枝路其扣留之借款十五萬鎊由中國自行提用該代表仍以此事違背借款合同若債東稟控恐受法庭鉅罰必須英國大理院判准方能結辦當經彼此另訂合同聲明罷築南票枝路其扣留借款英金十五萬鎊應由鐵路局提回作爲添購車輛機件修改已成鐵路之用三十四年二月經梁士詒與濮蘭德簽名蓋印延定律師控由英國大理院裁判自是以後英大理院諸多詰駁函電往來調查證據延閣一年旋又議定由中國駐英使臣函致該院聲明鐵路局長承認此次所訂合同之意義無論如何與債票擔保實無損礙等語亦經臣部咨行外務部電知照辦今年六月英大理院始判定將該借款撥項提出聽候鐵路局提用臣部旋將贖鑛之款由駐英使臣交與倫敦中英公司卽將南票合同送交駐英使臣注銷其存在駐京英使署之合同由外

務部照取註銷此兩年以來辦理此案之大概情形也竊維南票一鑛既經驗明煤質不佳卽應停辦煤鑛既停自無仍築枝路之理枝路不築則預備修理枝路之款自必移作他用事理本極分明徒以限於歷次所訂合同以致多所束縛中英公司因卽借此牽制若久懸不決將受累滋深茲幸悉心應付得以斬斷葛藤此後開鑛築路撥款一切均可自主所有酌給該公司款項爲拋棄利權之酬報衡之情理似尙公允自應照此了結除將另訂合同抄送外務部備案外所有收還英商扣留路款贖回南票辦鑛合同情形理合恭摺具陳伏乞

皇上聖鑒

退耕堂政書卷二十八

退耕堂政書卷二十九目錄

奏議二十九

驗收京張鐵路工程情形摺

整飭津浦鐵路情形摺

津浦鐵路指定隄頭地方設立天津總站片

籌還度支部贖路借款備撥海軍經費摺

遵議設立密雲電局摺

遵議東三省借款築路摺

郵傳部第二屆籌備憲政成績摺

會擬陸海軍鐵路運輸章程摺

吉長鐵路開工日期片

遵 旨派員查辦粵路弊混摺

湖北賑糶米捐請 飭仍照原案支付摺

請明定竊毀鐵路要件治罪專條及承緝處分摺

添設鐵路巡警片

請給發獎牌以勵勤能摺

汴洛鐵路裁併員司更定職掌摺

退耕堂政書卷二十九

天津徐世昌

奏議二十九

驗收京張鐵路工程情形摺

奏爲京張鐵路工竣開車謹將驗收工程情形恭摺仰祈

聖鑒事竊臣等前往張家口驗收京張鐵路工程於本年八月初二日附片奏明在案臣等遵於初六日率同該路總會辦詹天佑關冕鈞等馳赴該處逐段勘視行抵張家口後官商紳庶咸感戴朝廷眷顧邊陲爲民興業之深仁夾道歡呼異常鼓舞臣等復延見商會人等討論商務考求物產土宜爲擴充運銷之計並履勘雞鳴山煤鑛於初九日回京查該路起自豐台經都城至張家口光緒三十一年由前督辦臣袁世凱胡燏棻奏准興修聲明專用

華員經理計自三十一年九月開工至本年八月告成全路長凡三百五十七里連岔道計長四百四十九里有奇自豐台迤東柳村至南口長九十三里爲第一段自南口至岔道城長四十里爲第二段自岔道城至張家口長二百二十四里爲第三段南口岔道城之間崗巒重疊澗谷紛歧峭壁參天崎嶇險峻原勘以居庸關一帶阻隔官溝擬築大橋傍山直上穿越關城又因坡度過陡終慮行車出險嗣經再三勘測乃始定爲今綫削高填深循溝築隄開洞以通平原遠山以取彎道其斜度每三丈得一尺車行較穩又入達嶺山洞原擬由石佛寺洞向西北直行須鑿洞六千餘尺今改向東面斜行就青龍橋關峽設站洞工止三千五百八十八尺省費實多開洞之時南北兩面同時內攻復由山頂開井總工下鑿閱十八月始克竣事至今按圖循覽猶備見當時圖始之艱

過岔道城以北又有蛇腰灣老龍背鷓兒梁等處或傍山臨河或
徑紆壁峭不減第二段諸工之險綜計全路車站十四月台二十
八橋梁一百二十五涵洞二百一十山洞四計積長五千三百九
十七尺此外有水塔十一機車廠五鐵磨盤六養路工房八十三
工員辦公室十二與原估數目大致略同其餘天橋一抽水機房
一地磅二井十一煤台五料廠四工程車務廠務員役工匠及巡
警各住房八十六皆原估所未有又以南口爲適中之區於其地
設製造廠一材料廠一並設旅館以待行人均能布置完備結構
合法此該路工程之大概情形也至該路自逐段行車以來業置
有機車十九輛客車貨車料車凡三百二十輛視原估車輛之數
已有加增將來客貨暢通尙須陸續添置以期利便再此路爲我
國鐵路北幹之起點居庸關岔道城二處漢唐以來歷經百戰夙

稱天險鳩庀之初外人每謂華員不克勝任邇來士夫遠來看視
嘖嘖稱道僉謂青龍橋鷓兒梁九里寨三處省去洞工實爲絕技
原奏本定於光緒三十八年竣工嗣臣部恐閱時過久糜費鉅而
收效遲於光緒三十三年十二月奏請提前撥付鉅款加工建築
預計亦須明年始克告蕝仰荷

聖明主持於上調度款項併力經營得以從速集事在事員役工
匠同心協力剋期觀成且比年動工購料迭有加增而支出所需
尙在原估之內凡此數端皆非始願所及該路總辦道員詹天佑
總司工程學優識定經營締造獨任其難會辦道員關冕鈞辦理
購地行車管理規則各事精心毅力數載勤劬各段工程司暨執
事各員亦皆知此爲

國家完全自築之路卽爲我國工程司工業名譽所關奮勉圖終

創成鉅業均屬異常出力擬援照京奉京漢工竣奏獎成案仰懇
天恩俯准優給獎敘俾昭激勸以仰副

朝廷興業勸工之至意所有驗收京張鐵路工程緣由理合恭摺
具陳伏乞

皇上聖鑒訓示

整飭津浦鐵路情形摺

奏爲整飭津浦鐵路情形恭摺具陳仰祈

聖鑒事竊臣等奉

命辦理津浦鐵路事務當將接收關防日期並接辦情形奏明在
案臣等卽於七月初二日前往天津親赴北段路局詳細查勘臣
世昌於初三日回京臣雲沛於初四日由津啟程前往德州所有
沿路各段工程均經逐一履勘旋於十二日回京凡應行整頓事

項綜其大要厥惟審擇用人慎重款項督催工程稽核材料四大端而仍以用人爲最重苟得其人則人存政舉不求效而效自見苟非其人雖有良法美意亦未必見諸實行臣等再四思維當經遴派熟悉路政人員先行接收委令試辦如果勝任再行奏派該局總辦以昭慎重至該局所用員司得力者固不乏人而濫竽充數者亦復不可枚舉當將全局人員嚴行甄擇凡無關緊要之差使及聲名素劣辦事未能得力者概從淘汰計裁撤六十餘員其充當繙譯醫官繪圖測量電報電話各員亦經責成該局一體考驗如有程度較低不克勝任者立即擯斥另行考選此外如洋工程司等其薪水較優而責任較重者均各訂有合同計共七十二員其薪水無多責任較輕而並無合同者計共十四員從前輿論皆以雇用洋員太多動相詬病臣等體察情形訂有合同者未便

無故撤退未訂合同者即使全數革除節省亦復有限現經飭令該局轉飭總工程司將各洋員鐵路畢業文憑或會在他路辦事實有經驗確據彙送考核如有名實不符以及違背規則情事當分別酌核辦理此臣等嚴核用人之大略情形也全路撥用款項按照原定合同凡英德銀行所存金鎊項下係由督辦大臣知照銀行撥匯來華聽候支用其存在上海天津英德銀行銀兩項下係由南北兩局總辦出具支取憑單隨時撥用前督辦臣呂海寰亦曾先事預防飭由該兩局先行稟報方准支用以銀公司堅執合同未能切實辦理是以前北段總辦已革道員李德順任意撥款不知檢束自取咎戾致遭指摘臣等接辦以後即與英德兩銀行妥商凡南北兩局用款在一萬兩以上者非經督辦大臣核准知照銀行雖有憑單不能應付該銀行均各承認又查北局動用

款項向由總工程司開單送該局總辦簽字惟款目繁多帳單複雜路款由息借而來應如何詳加稽核以期徵實設立總核算員專司鈎稽各項單據分別准駁嚴防弊混另派妥員充當收支專司出納取具保單如有不實不盡情事卽由保人賠償似此嚴定限制此後當可無濫支之弊至於全路用款皆憑報告以爲徵信現飭由各該局先造預算清單再呈送月報季報分別門類造具表冊俾便預籌而資考核此臣等慎重款項之大略情形也全路工程按照合同限以四年告竣查開辦至今已經一年有半現在北段工程由天津以至德州沿途軌道雖未一律鋪竣而趕緊築造大約數月後可以開車增添進款德州至濟南一路土石各工均已逐段興修而濟南之灤口鎮工程車輛已能行駛刻正嚴切飭催以期迅速其濟南至嶧縣一路工程亦經飭令從速購地將

來卽以津德辦工人員移往濟嶧一路接續辦理南段工程由浦口以至滁州由滁州以至鳳陽劃分兩段土工業經完竣現正鋪設軌道惟今年春夏之交大雨時行水勢暴漲已成各工雖未大受損傷而第三四兩段土工不無因而遲滯現值秋令晴爽業已飭令趕辦一面仍派熟悉工程人員分赴南北兩段詳細察勘並飭查淮河橋工以備審核總之借款築路早一日告成卽少一日損失此整飭工程一事臣等不能不兢兢致意者也若材料一項所有訂購華洋兩項辦法均已載在合同惟未購以前自應預爲審察舉凡長窳不齊之品皆須按照工程酌用不得濫用賤料以致誤工亦不得故用貴料以致壓本經飭於兩月以前呈送料單非經核定之後不得擅自購用已購到之材料經理收發尤宜認真從前經收材料皆係洋員現已遴派華員總司其事所有一切

損失偷竊等弊嚴行禁絕至材料運往工次向係招商包運茲經派員考查船價雇船自運較商價可以節省一倍有餘嗣後卽統歸委員承辦庶期核實此臣等整飭材料之大略情形也以上四項皆爲路政大綱節經次第施行至於裁併濟南德州購地兩局並裁撤臨淮稽查分局以節糜費業經分飭辦理所有一切事宜皆由北段入手南段距京旣遠先於重要大端遙爲轄制俟北段布置就緒臣等再赴南段親自巡察按照北段辦法以次舉行藉期仰副

朝廷鄭重路政之至意再接管款項數目前督辦臣呂海寰以英德兩京帳冊未齊各段工程報告仍有往復查詢之處業已飭催算結應俟劃清數目知照後再行具奏合併聲明所有臣等整飭津浦鐵路情形理合恭摺具陳伏乞

皇上聖鑒訓示

津浦鐵路指定隄頭地方設立天津總站片

再津浦北段路工開辦年餘而天津總站地址迄未妥定從前所擬之南開地方因已革道員李德順藉便營私激成公憤經前督辦臣呂海寰擬改建於城北之趙家場臣等悉心籌畫竊以天津總站爲全路總匯之區設站之地關係全國交通必須得轉輸四達之宜不僅爲商市一隅之計除南開一處旣不相宜應毋庸置議外臣等當於八月初三日前往天津會同直隸督臣端方親赴城北趙家場及隄頭一帶逐加履勘查趙家場地勢低窪且難展拓現在該處旣未動工自可毋庸遷就隄頭地勢高曠距津北繁盛市場亦不甚遠與京奉鐵路新站較易接連交通旣屬合宜接軌亦可省費詢之熟悉路政華洋各員咸以該處設立總站最爲

利便臣等於此事本無成見第以全路扼要所在亦不敢曲徇人言當與督臣端方切實商確意見相同復證以紳商輿論亦無異議當經飭令北段路局卽就指定隄頭地方設立天津總站迅速圈定地址剋日興築以重要工謹附片具陳伏乞

聖鑒

籌還度支部贖路借款備撥海軍經費摺

奏爲擬定如期歸還度支部贖路借款以備撥充海軍經費恭摺具陳仰祈

聖鑒事竊准度支部咨稱本部奏籌撥海軍處經費一摺奉

諭旨著照該部現籌數目暫爲撥付等因欽此咨行遵照前來原摺內稱查有部庫供給郵傳部贖路項下規平銀五百萬兩應自宣統三年起至宣統七年止分年陸續歸還擬俟歸還後全數提

作海軍開辦經費等語查臣部因贖回京漢鐵路籌借度支部官款五百萬兩經於光緒三十四年九月間兩次奏陳奉

旨允准在案當時與度支部訂明係分五次歸還截至宣統七年清訖現在既經度支部奏明俟歸還後撥充海軍經費臣部自當竭力措集如期交付以應要需倘京漢餘利尙有不敷卽由他項設法挪撥統俟臨時斟酌情形再行妥籌辦理總期不誤原定期限爲主理合先行陳奏藉慰

宸廑所有覆奏如期歸還度支部借款備撥充海軍經費緣由謹恭摺具陳伏乞

皇上聖鑒

遵議設立密雲電局摺

奏爲遵

正書卷二十二
旨議奏事內閣鈔出密雲副都統德麟奏密雲滿城請接綫設立電報分局一摺宣統元年八月三十日奉

硃批郵傳部議奏欽此欽遵到部原奏內稱電報循密雲而過局設古北口距密城百里之遙每遇部署司局電報至該局譯訖折回又逆行百里始達密城求速反緩深恐貽誤軍機請

旨飭下北洋大臣派一電生攜帶機器來密添設枝綫電局等語臣等查古北口等處電綫係由北洋籌款設立專爲收發官報之需茲該副都統擬請在密雲滿城添接枝綫係爲迅遞官報慎重邊防起見自當照准辦理所有需用桿綫鉤料並修養經費爲數無多卽由北洋大臣核實開支歸併北洋官電案內報部核銷以昭劃一至該處應否設立分局或改爲報房以期樽節之處應由北洋官電局酌核情形辦理所有遵議緣由理合恭摺覆陳伏乞

皇上聖鑒訓示

遵議東三省借款築路摺

奏爲東三省借款築路遵

旨統籌全局妥議會陳恭摺仰祈

聖鑒事宣統元年八月二十日奉

旨錫良程德全電奏籌借外款修築鐵路等語著外務部度支部
郵傳部妥商該督撫統籌全局會同具奏欽此復於八月二十一
日准軍機處鈔交東三省總督錫良奉天巡撫程德全奏密籌東
三省大計籌借外債議築鐵路一摺奉

硃批仍著外務部度支部郵傳部會同該督撫妥議具奏單併發
欽此欽遵到部查該督撫原奏大意以東省日俄鐵路分據南北
非於兩國路綫之外別築一路不足以救危亡非借外人之財不

足以經營東省現與美國銀行代表司戴德商議借款約三四百萬鎊籌修錦洮至瓊瑋鐵路已簽立草合同該代表堅請政府承認業經列入條款並聲明以路作保等語伏維東三省爲

祖

宗發祥之地視各省腹地爲尤重更非尋常邊圉所可比擬又其土脈雄厚物產豐饒非但爲日俄所競爭抑且爲環球所集視而乃迭經創痛日卽阡危人逞狡啟之謀我成逼處之勢厝火滋患補牢已遲失今不圖後更無及且事以對鏡而易顯情以互證而愈明彼日俄兩國皆非富厚之邦也俄築西比利亞黑龍江等鐵路大都皆荒僻之區日築安奉鐵路亦不免虧本耗財之慮也然而俄借法款鉅萬日借英款也亦鉅萬相與投重資而不悔竭全力以經營彼於東省不過越國鄙遠之爲耳猶且不遺餘力如此

而謂我於根本重地顧可置爲緩圖乎該督撫等恪遵前次厚集洋債互均勢力之

諭旨而汲汲爲借款築路之計誠亦不得已之苦衷雖然款不妨借而籌借者必策其萬全路固當辦而應辦者非止此一事就東省全局而論倘置各種實業於不講舍一切利源於勿顧而謂此路一建卽足以興地利而固國防則有未敢遽信者矣臣等公同熟商竊以爲東省不借款則已如其借款則爲一隅計爲一端計何如爲全局計以東省地大物博所有森林鑛產屯墾工藝畜牧漁業等事皆爲本計要圖當與鐵路兼營併進使有鐵路而不興實業無論此路之有用與否而先無以爲養路之資使興實業而不修鐵路無論各業之發達與否而先無以爲輸貨之地然使欲興實業修鐵路而無銀行以立之基礎而握其樞紐則一切交通

貿易補助儲蓄其機關必不靈活卽事業皆莫能振興是開設銀
行並爲不可缺少之舉而綜是數者用宏財絀要皆非借款不爲
功顧借款尙易而所以籌還此款則難所以善用此款則尤難該
督撫於借款之先必先熟計某人可任以理財某人可倚以辦事
一事約需款幾何數事共需款幾何某項物產可暫資以抵押某
項事業可預操其贏餘某項進款可分還其本息至若干年而事
效大著又若干年而借款清償庶幾成算在胸然後再將借款合
同取益防損折衷至當斯有利無弊而借款亦何至爲舉世詬病
至該督撫原訂合同如路事由該公司經理公司由中英美三國
聯絡而成暨提餘利百分之十等款均侵損利權未便照准應請
敕下該督撫將原立草合同卽行作廢一面將臣等所指上項各
節通盤審計果能確有把握應需借款仍隨時咨商部臣妥籌辦

理以期內外協謀規畫盡善俾權利免致外溢事業漸見繁興盡地利而靡遺鞏國防於勿壞庶於挽扶危局或有當於萬一所有
遵

旨議覆緣由謹合詞恭摺密陳伏乞

皇上聖鑒訓示再此摺係外務部主稿會同度支部郵傳部辦理東三省總督錫良奉天巡撫程德全係原奏人員是以此次未與會銜合併陳明

郵傳部第二屆籌備憲政成績摺

奏爲遵章臚陳本部第二屆籌備憲政成績恭摺仰祈

聖鑒事竊查憲政編查館奏定考核章程內開九年籌備事宜責成內外臣工每屆六個月將籌辦成績臚列奏聞並咨館查核應自光緒三十四年八月起至十二月底止爲第一屆以後每年六

月至十二月底爲一屆限每年二月及八月內各具奏咨報一次等因臣部於本年閏二月十八日奏陳按年籌備要政情形經館核奏遵辦在案茲值第二屆奏報之期自應遵章臚陳以崇邦典伏維郵傳四政義主交通其事胥與國防民業相資其用卽與憲政進行相輔而其要不外轉移地形之險夷以度民居懋遷物產之盈虛以善民器厚生利用國力斯雄八表經營於焉基始此臣部之責也惟船路電郵各事皆刼建於臣部未設以前及今因時定制應擴充者旣極紛繁應補救者尤形複雜卽就擴充補救入手著效固屬非易就緒亦復甚難謹將本屆籌備成績分爲擴充補救二類更於二類中區爲著效就緒兩級爲我皇上縷晰陳之請先言補救臣部所轄現惟路電最繁路政一門凡屬從前借款建築之路其合同鮮不有權利外移之患東漢一

路自光緒三十四年清還比款歸部接管以後至宣統元年五月
行車進款乃增多七十餘萬圓而撙節洋員薪工各費歲計約十
萬圓是時京奉適更定路章乘而改良未及半年進款共增一百
萬圓用款反較減七萬餘圓之譜中英合辦南票煤礦合同已於
六月贖出將合同咨由駐英使臣註銷並將英商扣留備築運煤
枝路之借款十五萬鎊取回屢年交涉從此斷結卽新奉吉長兩
段上年臣部乘遵約與日本借款之便派員與日使訂議續約其
新奉之遼河東岸日本不委帳房又日本工程司仍歸京奉總辦
總工程司簡制以及吉長總工程司總帳房均歸中國委派等語
是協約實多挽回至電政本中央機要之權各國俱設爲專職中
國因開辦伊始商股占多以致歷年相承全視爲營業性質上年
臣部將全股收贖本年正月實減二成價目收費尙不致銳減三

月又奏裁局費歲計約五萬圓有奇開源節流交相裨益縱目前無大起色而權歸國有機括自更靈通臣等所謂籌備補救此其著效者也海通以來中國因應之方輒居人後近年力爭先著赴機已覺其遲夫中外梯航原期聯貫而郵傳四政列邦尤尙同盟上年臣部接准外務部來咨知葡萄牙大開萬國電會當卽札派候選道周萬鵬等前往聽講爲他年電政入會之初基又中葡公使司舊訂廣澳鐵路約文明著華葡合辦之條比較各路合同害實加甚旋葡商因華界歸華自築願將合約註銷臣部前據前太僕寺卿張振勳來咨隨咨請外務部照商葡使現正往還辯駁期於挽回利權臣等所謂籌備補救此其就緒者也請更言擴充蓋路電兩端雖異排虛躋實之功究同定綫程功之旨人力所舉其地亦靈查路政各工始則滬甯六百三十餘里告成繼則杭嘉一百

二十八里告成水陸交滎江南爲之增勝而新甯義溪及粵漢之
黃沙琶江凡告成於粵境者猶其次也若北方告成之綫論枝軌
旣有京師之門頭溝復有江省之昂昂溪而其犖犖大者邊地則
有京張腹地則有汴洛張家口號爲中原形勝居庸陜塞山谷阻
深駝馬皮毛充斥塞北此綫枝幹雖僅四百四十九里然以天下
奇險華人有其全功故當八月開車之時夾道驩呼一時稱盛從
此蒙疆朝軻暮達

皇都不惟邊民蕃殖可期而畿輔實收鞏固之效汴洛一綫計亦
四百餘里今雖橋工未竟兩岸早已通車將來展入潼關舉秦晉
貨鑛大宗可以截河而東卽現在並河南行而遵循京漢之塗亦
可輻輳於漢口若電綫一項非獨京保甯漢大修各役早經告蒞
其展設者於黔有貴陽興義之綫於湘有常德益陽之綫於贛有

饒州景德之綫於浙有桐鄉雙橋之綫於蘇皖有下關浦口之綫
有上海川沙之綫有太湖安慶之綫於直豫有保定信陽之綫有
信陽光州之綫有河南汝州之綫縱橫交迥密若蛛絲舊綫五萬
里外計又展長三千九百餘里一律完工臣等所謂籌備擴充此
其著效者也謹按軌綫全圖京張爲北幹經綫自京張更北抵庫
倫爲張庫自京張折西抵綏遠爲張綏其南幹經綫實爲京漢而
粵漢雖承其轅津浦則邈迤以緯之而自汴洛左聯閩海徐清右
聯洛潼西潼復成一東西大緯綫頃者粵漢案卷甫飭接收津浦
工程臣世昌等方督飭在事人員遵期啟築其東西緯綫之汴潼
一段業經部准豫紳議僱華員熟手充當工程司並派員查勘西
潼兼及於同蒲而前所派勘測開海徐清之員適於是時勘定惟
張庫北綫道出沙漠袤長二千餘里工艱款鉅議置綏圖已改計

先從張綏施工以取左右旁通之勢其餘如官辦之廣九商辦之杭嘉固已接築而前卽吉長延長正德各官路軌綫以及川漢豫陝蘇浙滇蜀安徽江西各商路之工款均經派員四出分別清查完訖各商路中以滇蜀川漢爲最險要滇蜀兩處業准各該督電稱所僱美國工程司多萊哈克二員已到川漢前曾奏准由該省聘定詹天佑等爲總工程司責令興造而此數月以內所有張怡福廣湘鄂暨陝境電綫同時大修祇以科布多緊接俄鄰其地又南爲鄂爾泰山所阻欲通聲氣須設一無綫電於新疆之綏來已由臣部飭令洋商呈驗電機驗妥卽行安設其近在京內之電話機器前曾奏請訂購各省所辦亦通飭將章程呈核俾歸一致以利推行而四政胥屬專門之學儲才宜亟故臣等於部轄各項學堂尤爲注意在上海者甫令增課船電兩科在唐山者早令注重

鐵路一項嗣因唐山路學僅有機械工程復於署旁籌設管理專科俾資行車之用業於京師暨津滬豫鄂粵五處分途招考共得生徒二百餘名一俟先後到齊冬間即可開學臣等所謂籌備擴充此其就緒者也此外如正太所借法款計本金籌費共法金四千零十萬佛郎依合同從明年起可以提前全數歸清臣等方昕夕圖之而開海徐清關係東南緯綫實爲重要臣等現與外務部度支部商酌籌辦其餘凡第三屆事項俱恪遵前奏籌備仍當隨時酌奪據實奏明以上情形第就路電而言若船郵兩門近正遵查八月間憲政編查館續奏責成臣部籌辦未盡事宜清單辦理竊以船政若招商一局不過船司應管各事中一子目耳部本中央行政當更務爲遠大目前所亟宜講求者一在採譯海外之航規以待修船律一在調查內港之艘數以推廣航權一在研究理

船廳舊章以張劃分權限之本一在闢建船學科新校以裕培養人才之源凡此數端業飭廳司議辦一面查考河流海綫並酌量提倡郵船以期逐漸推行俾擴航路郵政則臣等正與稅務司籌擬接收辦法咨商往復頭緒紛紜俟將全案移交再當遵照館章相機擘畫惟是臣部職掌範圍頗寬訂約旣牽涉外交借款更關係財政而轉輸得利尤在振興實業誠欲按年課績必得外務度支農工商各部通力合作始克奏濟物阜民之效而收體國經野之功至於陸海之如何溝通音報之如何徑捷技師之如何教育專律之如何頒行是則臣部專司責無旁貸臣等惟有仰承聖訓勉圖其難所有遵章臚陳本部第二屆籌備憲政成績各緣由除分咨查核外謹恭摺具陳伏乞

皇上聖鑒訓示

會擬陸海軍鐵路輸運章程摺

奏爲遵擬陸海軍鐵路輸運詳細章程恭摺仰祈

聖鑒事光緒三十四年十二月初五日郵傳部具奏變通鐵路免價減價辦法一摺附擬章程八條內開凡陸軍部與將來設立之海軍部暨各省督練處軍人或軍用物品因公來往輸運者應由陸軍部或該省督練處商由郵傳部發給憑照減收半價此項詳細章程應由臣部與陸軍部另行訂定等因奉

旨允准欽遵通行在案臣等自應遵照前奏詳擬章程以昭慎重而期遵守竊維鐵路之設所以利國便民者百端而大要以利於師行者爲最重是以東西各國官商鐵路皆有軍事輸送以及軍事供用之制大抵無事之日則減收賃率以優異之有事之時又儘先載運以便利之甚者軍務方殷凡調遣車輛敷設工程得便

宜屬於陸海軍之指揮亦所恆有蓋陸海軍爲立國之命脈無論官設私設之路苟無害於營業之常例與爲其力之所能勝則轉饒行軍皆有應盡之職而國家執中定制於鐵路應得之權利亦無不設法保全各國之制略皆如此惟中國鐵路方始萌芽其成立之始有官辦商辦借款代辦之不同統轄之機關旣殊則臨事之因應亦異臣等公同商酌官辦各路本屬休戚相關在理宜供軍用商路雖以營業爲主然果能於行車工程各款按費核給勿令過受損虧當無不急公圖效至若借款代辦各路其行車管理調度之法類多明定於原訂合同之中於未經清還借款以前自當仍按合同辦理節經派員互商詳細討論擬定章程二十條均按照上年原奏所陳衡之現在情形分別訂擬其憑照一項原訂由陸軍部或各省督練處商由郵傳部發給今改爲由陸軍部刊

刻鈐印頒給各省督練處領用於原奏稍有變通而事理益形周密臣等覆加察核皆屬可行恭候

命下卽由臣部欽遵辦理至現在之

禁衛軍軍諮處及將來設立之海軍部如需用鐵路運輸時亦擬援照此項章程辦理其所需減價憑照卽由

禁衛軍王大臣及軍諮處海軍部刊印發給以期迅赴戎機此外若海陸軍輪船輸運亦當定有專章俾資遵守臣等當隨時續議章程另行奏明立案所有遵議陸海軍鐵路輸運詳細章程緣由理合繕具清單會同具奏伏乞

皇上聖鑒訓示再此摺係由郵傳部主稿會同陸軍部辦理合併聲明

吉長鐵路開工日期片

再吉長鐵路借款細則合同前經奏明畫押奉

旨俞允在案臣部當卽欽遵咨照出使日本國大臣胡惟德按照合同在日本東京收款茲准該大臣咨稱所有吉長借款九三扣日金一百九十九萬九千五百圓業已如數收訖查該路路綫前經臣部派員勘定現借款辦妥自應從速興工以免虛糜利息適延僱之總工程司亦已到華訂立合同臣部當飭令該路總會辦將應行布置事宜速卽籌辦現准定期十二月二十日興工理合附片具陳伏乞

聖鑒

遵 旨派員查辦粵路弊混摺

奏爲遵

旨派員查辦粵路弊混以肅路政恭摺仰祈

聖鑒事宣統元年十月二十六日由內閣鈔出兩廣總督袁樹勛
奏粵路公舉查帳員現已查明弊混確據一摺本日奉

硃批著郵傳部切實查辦片併發欽此欽遵到部查臣部接管粵
漢鐵路迭准兩廣總督電稱粵路弊竇叢生現經王道秉恩澈查
均有確據一俟稟揭到部請嚴重主持以維路政等語當以鐵路
資本萬姓身家所寄路款一日不清股東一日受害豈容若輩任
意侵漁目前整頓之方自以清查帳目爲入手關鍵經於九月間
委派四品京堂林炳章員外郎梁用弧小京官張國鈞前往粵路
切實調查嗣於十月間准兩廣總督將委員王秉恩查明弊混稟
揭轉咨前來正在核辦間恭奉

批諭自當欽遵辦理茲再遴派臣部候補參議龍建章帶同道員
于煖年調部行走知縣張思仁工程顧問員沙海昂前往澈底嚴

3
225
查如果查有弊混應准提究倘該路辦事人員或有違抗隱匿情事卽由臣部嚴參歸案審辦庶幾可望剋日清理惟是積弊旣深斷非參辦一二人便可畢事此外善後一切事宜應由臣部實行監督籌擬辦法另行奏明辦理除咨明兩廣總督協同嚴辦外所有遵

旨派員查辦粵路緣由謹恭摺具陳伏乞
皇上聖鑒訓示

湖北賑糶米捐請 飭仍照原案支付摺

奏爲湖北賑糶米捐備還粵漢贖路本息暨充鐵路經費請
飭該省仍照原案支付以重要需恭摺仰祈

聖鑒事宣統元年十月十一日內閣鈔出湖廣總督陳夔龍附奏
請將鄂省一半米捐專款接濟賑糶一片奉

硃批該部知道欽此欽遵到部臣部查接管粵漢鐵路卷內該款
係於光緒三十年六月間由前任湖廣督臣張之洞札行兩湖賑
糶米捐局將鄂省應分之一半米捐盡數撥充該路各項經費嗣
於三十一年八月籌借英款贖回該路經該前督指定此項賑糶
米捐爲兩湖攤還本利之用於是年十二月二十七日遵
旨據實覆陳御史黃昌年所奏各節一摺將辦理情形奏明在案
原以該路關係重要亟待興工三省集款無期不得不移緩就急
自贖路以來鄂省粵漢一路償還英國借款本息及美國金圓小
票利息實爲最急之需此外鐵路局用學堂經費亦皆惟該款是
賴是以前任鄂督臣趙爾巽擬將該項米捐責由湖北官錢局專
款存儲除鐵路外不得挪供他用蓋深知此項捐款爲攤還本息
所關先事不早爲存儲臨時必張皇無措况原訂籌借英款合同

聲明儻每期應還借款本利屆時在香港不交香港度支院使卽可將湖廣總督前交漢口英總領事作保之金鎊釐金票在於湖北湖南廣東境內作爲完釐之用等語是事關清還洋款斷不能失信外人否則臨時款項無著外人必援引合同指釐金票以爲要挾卽美國金圓小票一項亦係每年支付二次必須指一的款屆期乃不延誤若懸空委之臣部恐亦無以釋

朝廷宵旰之憂勞况此路之急需與築當張之洞督辦該路時卽經奏明借款興修臣部接管以來籌商累月並無成議是築路之費尙在虛懸還款之資更屬無從籌措臣部又無他項的款可以騰挪而償付定期萬難逾限從前奏明預備清還洋債之款實未便再行挪作他用相應請

旨飭下湖廣總督將上項應行支付款目仍由湖北米捐項下接

續支給以符原案所有湖北賑糶米捐備還粵漢贖路本息暨充
鐵路經費請

飭該省仍照原案支付緣由理合恭摺具陳伏乞

皇上聖鑒訓示

請明定竊毀鐵路要件治罪專條及承緝處分摺

奏爲匪徒竊毀鐵路要件請明定治罪專條及承緝處分恭摺仰
祈

聖鑒事竊維鐵路之設上便軍國下利商民其行駛之利便專恃
軌件之完全故自鐵軌枕木以至道釘之類無論件數大小一有
缺失患卽隨之關係實非淺鮮第軌道綿長鄉野愚民每乘防範
不及之處任意竊毀官辦各路固已時有損缺商辦之路尤所難
免臣部每遇此項案件疊經咨行該管督撫嚴飭地方文武緝拏

追贓縱有一二獲案口供確鑿以無治罪明文僅予枷責了事而地方官吏亦因例無考成不免敷衍當此新律尙未實行設不暫照現行法律明定治罪專條與承緝處分何足以示創懲而資整頓查前大學士臣李鴻章於光緒十八年在直隸總督任內曾以匪徒竊毀電報桿綫請定治罪專條承緝處分並聲明電綫事同驛遞非尋常官物無關要事者比若照盜毀官物科罪計贓罪止杖責不足蔽辜卽商電桿綫皆係奏明設立亦應一體維持奏請部議嗣經刑部議以竊毀電報桿綫不論官電商電是竊是毀不計桿數均比依驛站馬夫遞交公文事關軍情機密沈匿例分別科罪追賠至聚眾拔毀逞凶拒捕情節重大者仍察看情形分別首從照土匪滋事從嚴重懲不得復拘常例其該管地方文武職官應得處分亦經吏部兵部會議分別按照定例比擬先後奏明

奉

旨依議欽此欽遵通行辦理在案竊以電報鐵路同爲國家要政而軌件被竊致出危險輕則毀棄貨物重必傷損人命似比竊毀電綫僅礙傳報受害尤多且有所竊雖微所害甚鉅亦非尋常盜毀官物計贓科罪之例足以比附相應請

旨飭下法部凡屬竊毀鐵路路軌枕木道釘及關於行車一切重要機件之罪犯暫照奏定竊毀電報桿綫比擬治罪專條定議通飭遵辦至失察及承緝之地方官應得處分分別重輕併請由吏部陸軍部從嚴議定俾有責成而杜後患惟現已修訂新律所有竊毀鐵路及電報輪船郵政機物等罪應由修律大臣訂入新律俟奏定頒行後再照新律辦理又商辦鐵路均係奏准建築其總協理各員亦皆由部奏派同屬王塗非一人私產可比應與官辦

各路一體保護臣等爲慎重路政起見是否有當伏乞

皇上聖鑒訓示

添設鐵路巡警片

再查鐵路章程應由本部專設巡警管理該路界內彈壓看守等事本與地方所設警兵有緝捕專責者權限攸分然鐵路巡警果能布置合宜防範周密則界內竊毀之案自可減少而地方緝捕之事亦不至因以加繁現在官辦各路所設巡警京奉一路係由北洋調派巡兵約共一千餘名其京漢一路南北兩段由直鄂兩省撥派練軍護軍巡防等隊中段則專賴汴省所設鐵路巡警營分站駐紮而該路專設之巡警祇有一百餘名其餘各路警兵多或百餘名少僅數十名且往往沿用彈壓巡查護勇等名目事權旣未歸一責任又復不專人少路長不敷分配推其因陋就簡之

由原爲節用省費之故不知鐵路機件價值昂貴遺失購補爲費已多儻或行車出險傷害人命損壞車輛則撫恤之費旣鉅修理之費尤繁臣等通盤計畫與其懲治於事後不如防護於事先是鐵路多設巡警費尙有限而保全路務利在無形得失相權其理甚顯擬卽察酌情形將此項護路巡警統籌添設並將彈壓巡查護勇等名目一律更正而符名實卽商辦已成之路亦當由臣部隨時體察商籌辦理務令路政益臻完密臣等思患預防並爲地方官吏輔助聯絡起見是否有當理合附片具陳伏乞

聖鑒

請給發獎牌以勵勤能摺

奏爲振興四政鼓勵勤能擬給獎牌以資激勸恭摺具陳仰祈聖鑒事竊臣部管轄船路電郵四政務在利便交通部員經營於

內尤賴各局所奉行於外庶可推行盡利因應咸宜現在路電總分局雇用機師匠首巡警領班報生司事一切人等名目繁夥職掌紛紜將來恢拓航權擴充郵政用人愈多考勤惰別賞罰乃臣部之責此輩既無出身又無官職議罰則輕者減薪重者斥退甚或按律懲治而議賞殊難保獎官階則其功未稱加添薪俸則其術易窮似宜別籌旌勸之方藉爲鼓舞之具臣等公同商酌擬參用各種功牌之例設第一級至第五級獎牌給予五品至九品頂戴並仿照民政部巡士肩章辦法製成服章書明等級遇有實心任事卓著勞績未便奏保官階者酌量賞給以示優異似於四政前途不無裨益臣部爲振興四政獎勵勤能起見是否有當謹繕摺具陳伏乞

皇上聖鑒訓示

汴洛鐵路裁併員司更定職掌摺

奏爲汴洛鐵路裁併華洋員司更定全路職掌以節糜費而維路政恭摺仰祈

聖鑒事竊查汴洛一路橫貫豫省實爲東西幹綫之中樞自光緒二十九年與比人借款修築原訂行車合同內載中國國家准中國鐵路總公司派委比公司將開封河南鐵路代爲調度經理行車生利等語是比公司隱有全權布置各事不免多用洋員雖迭次磋磨裁汰者仍屬無幾臣等籌思補救之方必須於工竣行車之初爲之悉予更張重行編制方能不露痕跡而隱收操縱之權當經督飭鐵路總局局長梁士詒與比公司通盤籌畫切實裁併並飭其周歷全路先將逐項人員分別部署一面督同總辦與總工程司磋商一面函知歐洲比公司設法議減現據議定華洋員

司裁減辦法計分五端一曰總務人員原有之購地正副彈壓總
繙譯通事醫官凡十九員留用三員二曰工程人員原有各段正
副管工監工繙譯繪圖收支核算凡四十二員留用十一員其現
尙趨修之洛河橋工所用各員工竣卽行全數裁撤三曰行車人
員車務本已較前加增因路綫不長將此項人員悉行裁去不設
車務總管等名目卽以洋總段長一員駐紮鄭州分設華段長三
員以資策應四曰廠務人員現設洋總段長一員車頭廠華匠首
四員五曰歐洲比公司人員議卽自西曆明年正月起將銀公司
總董工程司文案年俸減少裁去專門工程司一員約年省法金
一萬五千佛郎均經比公司覆允以上五項比較去年年底計裁
去洋員二十六名華員二十三名歲可省銀五萬二千餘兩當飭
照此定議伏查汴洛鐵路路短利微論開源則在隨時籌畫之得

正書卷二十九
三三
宜而節流先以裁汰洋員爲急務原訂合同華員事權本爲狹小
此次統籌全局更調員司尙能操縱在我而洋員所任之職大都
試拔華員以繼之是明爲裁節全路經費卽暗爲培植我國人才
於該路前途所關非淺臣等仍當督飭該局長等隨時選擢華員
以維護主權招徠商貨以開濬路利冀副
朝廷慎重路政之至意所有汴洛鐵路裁併員司更定職掌各緣
由理合恭摺具陳伏乞

皇上聖鑒

退耕堂政書卷二十九

退耕堂政書卷三十目錄

奏議三十

派員擬訂船路電郵四項專律摺

試辦交通研究所並整頓圖書通譯局摺

會議陝撫奏請籌辦延長油礦修築運路摺

推廣修理電綫並整頓情形摺

擬定輪船招商局查帳辦法摺

勘明開徐海清路綫籌擬興辦摺

遵議魯撫奏黃河培修隄岸擬請由路工項下撥款協濟摺

會議勘修蒙疆鐵路情形摺

津浦鐵路籌設天津車站情形摺

勘查福建潮汕新甯惠潮各路工款摺

會議北洋大臣奏請提撥京奉餘利銀兩免其扣除摺
遵設憲政籌備處摺

接收南滿洲日本電綫完竣擬請給予日員寶星摺
設立印刷處派員經理摺

會籌津浦鐵路由蚌埠渡淮仍建呆橋摺

退耕堂政書卷三十

天津徐世昌

奏議三十

派員擬訂船路電郵四項專律摺

奏爲派員擬訂船路電郵四項專律恭摺具陳仰祈

聖鑒事竊維行政必先立法近年新設各衙門如學部則有學堂章程農工商部則有商律公司律破產律民政部則有報律違警律均經先後奏准施行各在案臣部管理船路電郵四政職在交通謹就現在情形計之鐵路已成八千里而遠電報所達六萬里有奇郵政則都會郡城大半設立航業則長江內海漸次推行雖發達未敢驟言規模實已粗具祇以從前辦理茲事無論官商初始經營率多試辦規章法令付諸闕如以致各爲風氣勢同散沙

非有整齊之方難收劃一之效臣部前於第二屆籌備憲政摺內
兢兢以頒行專律引爲責成蓋實有見於此況此四事導源歐美
漸及亞東學理之深邃名稱之繁曠日異月新莫可殫究是以考
工之記已見軼於周官疇人之傳必取材於異域據環球大勢而
言航律以英爲通行路律以德比爲適用郵電之律以日美丹奧
四國較爲周詳執柯伐柯取則不遠惟是民風國體中外殊歸統
一單行東西異法溝通非易審別綦難非博採無以爲比較之資
非貫通無以爲折中之準臣等公同商酌先就游學畢業生中擇
其肄習法律學術尤長者派充起草員其有關於藝術之事則派
專科學生以爲之輔德文則以德國柏林大學肄業翰林院編修
施愚外務部主事法科舉人德國柏林大學畢業生法學博士馬
德潤等任之法文則以法部主事法政科進士巴黎法律大學畢

業生陳籙本部候補主事法國都郎製造學堂畢業生鄭誠等任之英文則以美國伊立諾大學畢業生法科學士胡貽穀法政科進士紐約科崙布大學畢業生項驥等任之日文則以河南候補直隸州知州甲辰科進士日本中央大學畢業生黃爲基大理院正六品推事癸巳科副貢日本西京法科大學畢業生曾夔進等任之先草路律次及郵電循序漸進以期於成船律則以吏部主事癸卯科進士英國林肯大法院畢業生王世澂候選州同美國頭等駕馭員李瑞棠本部主事庚子辛丑併科舉人英國阿斯和大學堂肄業福建船政學堂畢業生陳壽彭等專任之以大理院推事美國法律畢業生李方翰林院庶吉士法科進士美國哥倫比亞大學畢業生熊崇志農工商部員外郎法國商科畢業生水鈞韶湖北候補知府英國倫敦法政大學畢業生沈成鵠外務部

七品小京官法政科舉人日本法學院畢業生黎淵候選郎中德國璧利瑟大學畢業生經濟科博士周啟濂等爲參訂員並派法律館諮議官臣部記名丞參上行走前署右參議升缺升用參議廳僉事陳毅兼領該廳廳長總司纂核以專責成臣部奏定官制清單參議廳原有審訂章程之條所有修律事宜應統歸該廳辦理毋庸另設局所以昭簡易其路律一項現經臣等督同該僉事等籌維肇畫業已粗有端倪俟各該員律草編完卽責令該僉事發交各路局詳細簽注或逕派起草員參訂員等與各路局員當面討論仍彙歸該廳修訂總期當於情事務爲切實可行一俟草案告成由臣等詳加覆核後卽當隨時咨商法部及修律大臣會同奏請

欽定頒行俾資遵守所有擬訂船路電郵四項專律緣由謹恭摺

具陳伏乞

皇上聖鑒訓示

試辦交通研究所並整頓圖書通譯局摺

奏爲陳明試辦交通研究所並整頓圖書通譯局情形恭摺仰祈
聖鑒事竊臣部於光緒三十三年六月奏陳官制事宜摺內聲明
應行附設考工通譯各局所統由臣部體察情形陸續籌辦又是
年十一月奏設圖書通譯局先後欽奉

諭旨遵辦在案查臣部所轄船路電郵四政皆屬專門學問非精
加研究不能日起有功度支部設有財政研究所薈萃專門人員
由部臣擇重要事件飭令參合中外學理事理詳加討論於政學
均有裨益臣部規仿此意設立交通研究所督飭專門畢業各員
妥擬章程遵照試辦數月以來審議重要案件調查列國成規分

正書名二十一
三三
途辦理均尙能勤奮從事自應奏明立案以昭鄭重圖書通譯局
開辦將及二載本年四月間經臣等釐定職掌調用專門畢業學
生重加整頓期資實用並遴派翰林院侍講程明超兼充局所提
調該局所詳細規章容由臣等斟酌情形隨時修改以臻完善用
副

朝廷因時育材之至意所有試辦交通研究所並整頓圖書通譯
局緣由謹恭摺具陳伏乞

皇上聖鑒

會議陝西巡撫奏請籌辦延長油鑛修築運路摺

奏爲遵

旨議奏恭摺仰祈

聖鑒事光緒三十四年九月二十一日內閣鈔出陝西巡撫恩壽

奏籌辦延長石油鑛擬先由官力提倡專歸商辦懇請

飭部寬籌款項以維本計而順商情一摺奉

硃批該部議奏欽此欽遵到部查原奏內稱延長鑛產擅美全球以油質言光白煙微堪與歐美所產相敵以產地言一二百里內皆可開井現未多開者特因運路未通深慮積久停滯耗費工本故入手辦法當以博采廣銷力抵外貨爲主而尤以開通運路爲先前撫臣曹鴻勳試辦原議亦以築小鐵路爲上策再三審度似不若就原有車路舊基改建一輕便鐵道爲一勞永逸之計統計現有車路由延長至延安一百五十里由延安至西安七百二十里由西安至潼關二百九十里共程一千一百六十里若設輕便鐵路平均計算需款約在五六百萬兩以上現據陝省紳商士民聯名具稟請設立公司擔承自辦業經批令聽候遵行惟思經營

締造之初非有鉅款爲之輔助終無以資振奮而固根基仰懇
飭部籌撥巨款作爲股本助成商民自立之公司則人心咸知鼓
舞地利自可挽回等語並准該撫將估修輕便鐵路情形開具清
摺咨送到部臣等會同商議以築路經費已需銀五六百萬餘兩
若併鑛本計算總在千萬以外非確有充裕商股即使官力提倡
於先終恐後難爲計且旣曰專歸商辦復由部寬籌款項於事理
亦多窒礙因擬定兩種辦法如該省商股能照成本實在集至六
成以上卽可歸商辦理提撥部款若干作爲商辦官附如商股不
到六成以上必須由官提倡多撥部款自應由官辦理添收商股
作爲官辦商附函商該撫酌核并由郵傳部遴派諳練路工委員
薛啟昌洋員樂麥沙前往勘估旋據該委員等將勘估情形稟復
到部據情轉行該撫去後茲准該撫咨稱延長石油向歸官辦去

歲紳商等稟請招股商辦當卽據情出奏嗣後並未設局招股今大部豫估路款計需三四千餘萬圓之多陝省實無此財力等因前來郵傳部查延長石油鑛源最富該撫擬以修築輕便鐵路爲著手辦法自係爲開濬利源便利運輸起見現在陝省鐵路除西安至潼關一段業經奏准該省紳商設立公司籌辦外延長至西安一段計程約八百里左右據臣部委員勘估寬軌路工約需銀四千九百三十餘萬圓窄軌路工約需銀三千七百四十餘萬圓窄軌價目比之寬軌所省無多將來又不能與西潼洛潼路軌接連諸多不便自應以寬軌爲正辦窄軌一層應毋庸議惟該撫原估五六百萬兩之數係約畧言之逮該委員實地履勘其估價比該撫原估多至數倍陝省紳商如能分任若干成則設法圖維或尙易於集事乃一年以來該省商股絲毫未集與原奏專歸商辦

之說既屬不符卽臣等原擬商辦官附官辦商附兩種辦法亦成虛論且專待部款籌辦該路臣部如果財力有餘則振興實業展拓交通何敢稍分畛域惟是鐵路性質有二一爲政治關係一爲商業關係如邊塞孔道運兵輸賑移民墾荒利益在於無形故豫計營業雖或有虧而大局所關要不容以財政困難置諸度外至於附鑛之路原屬商業性質自應統計鑛產出井若干與沿途客貨之多寡比較所費工程成本行車經費能否相償豫權輕重乃可著手綜計延長一路成路之後車務用款每年約需銀九十餘萬圓按本還息每年約需銀三百二十餘萬圓共約需銀四百一十萬圓而豫計收入之款現時石油一項每日不過十餘噸他貨亦屬無幾每年運費至多不過六十餘萬圓出入相抵約虧銀三百五十餘萬圓是該路雖爲擴充油鑛起見而油鑛尙未擴充一

切養路之費已苦無著縱使目前勉爲籌畫終無以維持永久互收利用之功再四籌思惟有暫行緩辦俟將來該鑛漸次發達體察情形或官商合辦或由部籌款屆時再行奏明辦理農工商部查延長油鑛爲中國絕大利源將來逐漸擴充自非築路籌銷無以盡運輸之利惟現在該鑛尙未發達倘使籌款修路之後復須籌款養路賠累實在意中良以鑛井之開挖不多雖有路亦成虛設路線之銜接不遑雖佳鑛亦難暢銷應由該省巡撫體察情形暫爲目前籌銷之計俟財力稍裕出油較旺再議大舉以盡地利所有議復陝西延長油鑛修築運路線由謹恭摺具陳伏乞皇上聖鑒訓示再此摺係郵傳部主稿會同度支部農工商部辦理因派員測勘及往返咨商是以覆奏稍遲合併聲明

推廣修理電綫並整頓情形摺

奏爲推廣修理電綫並整頓情形恭摺仰祈

聖鑒事竊維電政爲交通最要機關東西各國均特設專部管理其事論者至以電綫之短長覘國勢之強弱我國家有鑒於此注重交通設立專部原期與各國政治並駕齊驅臣部職掌所在責無旁貸頻年規畫漸見進步謹將辦理情形爲我

皇上分晰陳之查電報首重綫路多展一處之電綫卽多通一處之消息外洋電綫布滿全國是以呼應靈通中國電報自光緒八年創辦以來已逾二十餘載綫路所布不過五萬餘里近則贛之廣饒萍泉豫之光汝許信皖之潁亳太湖蘇之宜荆浦口均已次第增設新綫一律通報而沿邊各省兩粵則有佛山至陽高及龍州東西路並柳邕之綫湘黔則有貴陽興義黃草壩洪江玉屏之綫山陝則有歸綏太原包頭運城三原涇陽之綫東三省爲根本

重地關繫交涉邊防則有奉天至臨江並輯安懷仁等縣又吉林至延吉廳秀甸至哈爾濱並展至齊齊哈爾復由齊齊哈爾展至奉天新民府之綫統計展長新綫一萬二千餘里增設局店報房一百餘處較之原有之綫路計增十分之二此推廣電報之實在情形也又查報務之發達全恃綫路之通暢綫路通則聲息自靈聲息靈則官商交益是以修理舊綫尤爲急務由京至漢由漢至粵五千餘里爲南北直接之幹綫張家口至恰克圖四千餘里爲中俄陸綫之孔道餘如山陝湘鄂閩贛或與商務相關或爲邊防所繫徒以年久失修傳報時形不暢現經大加修整次第竣工此後隨時巡修認真保護可期一律暢行無虞阻滯此修理綫路之實在情形也其餘整頓各節如裁併巡丁考核工程以期撙節淨費磋商日俄電約收回德俄軍綫以期挽回主權添用快機以捷

傳遞籌設電學以養通材凡此設施均爲振興商務便利行政起見惟是締造經營全資財力外洋辦理電政專主擴張經費悉由國家統籌是以措施較易中國電款僅恃報費一項補助旣乏良圖挹注更無他術非認真稽核逐漸擴充無以節虛浮而紓財力臣等惟有隨時考核實力推行酌內外財政之盈虛效尺寸涓埃之裨益以冀興利除弊宏此遠謨仰副朝廷整飭電政之至意所有近年推廣修理電報綫路並整頓辦理各緣由謹恭摺具陳伏乞
皇上聖鑒訓示

擬定輪船招商局查帳辦法摺

奏爲陳明輪船招商局歷年官督商辦情形並擬查帳辦法恭摺具陳仰祈

聖鑒事竊臣部於本年三月十五日准軍機處片交欽奉

諭旨嗣後招商局著歸郵傳部管轄以符名實所有路船郵電四項出入款目均著歸郵傳部切實考核按年奏銷並咨明度支部覆覈辦理欽此具見

朝廷慎重交通綜核名實之至意當經臣部恭錄

諭旨分別咨札欽遵辦理並於七月十一日將接收招商局日期具報在案伏思臣部爲輪路電郵四政之總匯無一不繫乎交通卽無一不關於財政當此清理度支之時自應嚴切鉤稽以昭核實查輪船招商局自同治十一年前北洋大臣直隸總督臣李鴻章奏明創設以來原定爲官督商辦維時僅有輪船三艘資本亦少迨光緒二年買併旗昌船棧後始大加擴充當因風氣初開商股難集暫借官帑補助責令照繳利息按年還本無論盈虧全歸

商認與官無涉迄今本銀早已還清純爲商股並無官款在內是以該局雖向係北洋監督而於一切進款每年除提餘利二成作爲商家報効北洋經費及上海實業學堂經費外餘或歸該局公積或作商股息金其歷年收支數目僅按月造具清冊年終刊刻總結帳略頒示股東一面呈報北洋大臣復核並不奏銷此歷年該局官督商辦一情形也現在該局既歸臣部管轄所有各事自應欽遵

諭旨酌量變通以求至當款項出入尤係商本攸關雖其中並無官款原可毋庸奏銷然旣名爲官督則非妥籌綜理之方亦難曲盡保護之責臣等公同商酌擬由臣部造具月報格式頒發總分各局飭將每月各局存本進款開支結總四項詳分子目造具清冊先由各埠分局具報上海招商總局再由總局按月按年彙總

呈報臣部由臣部詳加考核每屆年終將該局盈虧情形奏報一次並咨報度支部農工商部備案如蒙

俞允卽由臣部札飭招商總局遵照辦理至各股東應得利益應仍照章辦理以期保固商本擴充航權前由該商等稟請設立董事會條具章程業經臣部酌核批示試辦其餘關係船政一切規制向未完備容臣等體察情形隨時編輯再行奏明辦理所有招商局歷辦情形並酌擬查核帳目辦法各緣由是否有當理合恭摺具陳伏乞

皇上聖鑒訓示

勘明開徐海清路線籌擬與辦摺

奏爲勘明開徐海清路線籌擬及時興辦恭摺仰祈

聖鑒事竊臣部前因開徐海清路線關係重要於宣統元年三月

十九日奏派臣部路政司郎中阮惟和鐵路總局顧問官沙海昂
前往履勘奉

旨允准在案茲據該員等稟稱開徐海清路線利賴宏多一應應興
辦惟自開封達徐州其綫有二一由陳留杞縣睢州甯陵歸德碭
山循大道赴徐是爲南綫一由蘭封考城劉口循黃河故道赴徐
是爲北綫北綫經行之地高曠平行工費較省南綫所經城市繁
盛商貨較多且近傍城池於行政用軍均有裨益自徐州達海州
其綫有三一由徐州經邳州境以達海州是爲直綫一由徐州循
黃河故道東南至宿遷折向東北以達海州是爲弧綫一由徐州
經宿遷以抵清江折向北行以達海州是爲句絃綫三綫互較直
綫徑捷但清徐一段業經奏准江蘇鐵路公司承築則爲聯絡該
路起見自以徐清海一綫爲便等情稟復前來查開海路綫經前

商部尙書臣載振等建議籌辦臣部於上年閏三月十八日奏明
俟勘定後奏辦在案該路大概以開封爲起點以海州爲尾閭西
聯汴洛以達甘新爲中原東西一大緯綫陸路則與京漢津浦交
通水道則與各洋航路相接據控制海陸之形勢握操縱自我之
樞機經武興商皆觀實效卽現築之汴洛洛潼等路亦必恃此路
接通始可免賠折而期獲利茲擬開徐一段取道南綫以期近傍
城市徐海一段繞出清江以期與蘇路公司聯絡一氣綜計該路
工款開徐南綫五百六十里約需銀六百七十餘萬兩徐清海一
綫除徐清一段歸蘇路公司籌款修築外清海一段二百六十里
約需銀三百萬兩由海州通至海濱展築壑口一段暨經營商準
挖深海河約需銀二百八十餘萬兩連併預算一成意外費用約
共需銀一千四百萬兩左右所計用款比各路爲省預卜將來進

款可不亞於京漢京奉自應及時籌畫撥款建築且去秋江北被水災區遼闊賑濟飢民猝難徧及臣等業經飭令津浦路局先將徐州路工剋日興築以收工賑兼施之效而海贛沐清一帶災黎遠道就食猶恐弱者中道而踣强者嘯聚爲患是海清開工亦卽可以工代賑臣等前與度支部商議僉謂該路亟應修築未便因巨款難籌致令要政莫舉夙夜圖維祇有分段分年辦法庶免竭蹶惟臣部所恃京奉京漢兩路餘利挹注張綏吉長正太道清汴洛滬甯各路及一切指抵之款尙虞不敷現擬先由臣部斟酌緩急逐段開辦次第集款分年程工設有緩不濟急勢難停工待款之時當再與度支部妥切籌商務使路政易於觀成而財政亦不致有所窒礙以仰副

朝廷整飭交通之至意所有勘明開徐海清路線籌擬及時興辦

緣由是否有當謹恭摺具陳伏乞

皇上聖鑒訓示

遵議山東巡撫奏黃河培修隄岸擬請由路工項下撥款協

濟摺

奏爲遵議黃河培修隄岸礙難由路款協濟恭摺仰祈

聖鑒事內閣鈔出山東巡撫孫寶琦奏黃河建橋請由路工項下
分年協濟銀十萬兩培修隄岸一片宣統元年十二月三十日奉
硃批郵傳部議奏欽此欽遵到部當卽咨詢津浦鐵路大臣能否
於路工項下撥款協濟去後茲准覆稱津浦借款合同祇能按路
工撥用款項每月均由借款公司派洋員查帳簽字凡非路款所
需公司概不承認若將路款協濟隄工核與本路借款情形諸多
窒礙前於光緒三十四年九月前督辦大臣呂海寰會同山東巡

撫孫寶琦奏明擬將鐵橋附近隄壩另行勘估修培如款不敷用
或由鐵路局酌量協濟嗣又經呂海寰以東省橋工加寬加深增
費較鉅奏明治河經費局行籌措無庸借資路款各在案現在東
省擬請由本路協濟銀十萬兩分三年撥付款雖尙非甚鉅惟本
路用款必須按照合同辦理實難任便提撥且呂海寰孫寶琦前
爲通暢河流業將橋工加寬加深增費六十餘萬兩茲以河底加
深至五密達以外又須加增工款凡屬路工關係河流之處本路
自不能吝惜款項或致疏虞若於路工之外輕於撥用實屬礙難
辦理等因准此查津浦鐵路雖經收回自辦然動支用款不能不
按照合同辦理自係實在情形且光緒三十四年前督辦臣呂海
寰旣經奏明治河經費無庸借資路款此次修培隄岸祇可仍遵
奏案辦理未便將路工款項協濟以免枝節所有遵議協濟隄工

礙難辦理情形理合恭摺具陳伏乞

皇上聖鑒

會議勘修蒙疆鐵路情形摺

奏爲遵議勘修蒙疆鐵路情形恭摺會陳仰祈

聖鑒事宣統二年正月初六日准軍機處字寄本日奉

上諭阿穆爾靈圭奏整頓蒙疆宜先勘修鐵路一摺著郵傳部理藩部按照所奏各節體察情形妥議具奏原摺著鈔給閱旨欽此欽遵到部查原奏內稱蒙疆現勢惟修築鐵路實爲切要之圖向來建議經營蒙古者大抵注重於放荒招墾否則設官出治建立行省數省而已夫所謂於荒者必漸放漸進遲之數十年猶未必克觀成效苟有鐵路則鐵路所至之地卽墾戶所至之地若設官以治民必有民有業而後有官非有官乃始有民有業也今蒙旗

正書卷二十一
三
境內生計僅有畜牧一途是雖設官亦無所事事故經營荒地之政策必以鐵路爲本其他練兵設治勸農通商惠工興學則相因而起者竊計內外蒙古南北三四千里東西六七千里謂宜勘修縱橫幹路縱路南接張家口北經庫倫以達恰克圖橫路東起錦州灣迤北而西行經內蒙各旗其極西以綏遠爲終點或內外蒙分枝各行蓋內蒙以張家口爲東西來往之衝外蒙以庫倫爲四達交會之所此二處皆宜分道而西蒙古哲里木盟當日俄之衝情勢尤迫籌畫宜先若東起錦州灣海口趨朝陽經赤峰州承德府屬之京張鐵路以爲衡綫東首之第一段復自朝陽分枝北上經彰武邊門外達東西遼河交會之三江口過遼源州以至洮南再北至於齊齊哈爾此爲縱綫北首之第一段而尤爲今日必不可緩之圖或先築錦州灣接京張一段則裨益已非淺鮮等語郵

傳部查治蒙要政首在交通該蒙藩所奏宜築縱橫幹路洵爲切要之圖全蒙幅幘遼闊縱綫橫綫各延長數千里勢難同時並舉臣部上年議覆庫倫大臣延祉及肅親王善耆籌辦蒙古鐵路各摺曾經奏明俟京張路成擬展達庫倫以至恰克圖此卽原奏所稱之縱路也嗣飭令京張工程司前往察勘據稱張庫客貨較少修養爲難應先展築張綏臣部詳加考核張綏一段實卽原奏所稱內蒙之橫路由張家口分道而西也其收效實較張庫爲易業於去冬奏明開辦在案一俟張綏告成或勘築張庫或再展而西屆時當另行奏明辦理其由庫倫東西分展之橫路臣部前於規畫全國路軌摺內業經籌及更應俟張庫勘築之後再行酌辦至錦州灣西接京張一節查京奉一路由京師東北趨錦州以達奉天京張一路由京師西北迄張家口若由錦州開築西行迄張家

口是於京奉京張之弧綫外加一弦綫現在商務未暢恐於營業有妨至由錦州趨朝陽分枝北出達齊齊哈爾一節此卽錦瓊全綫之南段現在錦瓊正事籌畫應否繞至朝陽俟勘明酌議總之此項鐵路固爲開闢蒙荒之要圖而著手修築要視地方物產及財力之盈絀爲先後該蒙藩瞻懷邊服銳意振興臣部職在交通苟爲力所能勝無不黽勉圖成惟查原奏各節有爲臣部已經籌議者有因情形尙多阻礙者不能不分別緩急詳細陳明理藩部查蒙古鐵路原在臣部調查應辦事件之內該蒙藩原奏意在開墾實邊必利交通欲利交通則鐵路爲不可緩有鐵路而後百貨可集實業可興否則徒言籌蒙而廣漠無垠人皆裹足是不獨有合於殖民政策且於蒙古邊防大有裨益所籌全蒙路綫旣據郵傳部查明與該部所籌路綫大致相同其錦齊路綫亦包括於錦

瓊南段路線之內至應如何加添路線繞至朝陽經由地方隸於何旗應由該部於勘明錦齊路線時再行會同臣部奏明辦理所有遵議蒙疆勘修鐵路情形謹恭摺會陳伏乞

皇上聖鑒再此摺係郵傳部主稿會同理藩部辦理合併聲明

天津浦鐵路籌設天津車站情形摺

奏爲陳明天津浦鐵路籌設天津車站情形恭摺仰祈

聖鑒事竊臣等承准軍機處片交二月十三日欽奉

諭旨翰林院侍讀榮光奏天津浦路務應迅求利便一摺督辦天津浦鐵路大臣知道欽此欽遵知照前來當經飭令天津北段總局按照原奏各節詳細查明具復去後茲據呈稱遵查原奏所指八里台向北四五里建一枝路直抵津城西南隅左右相當之地立一車站道路直捷需費不過四五萬金需時不及一月即可完工等

語自係爲迅求利便起見惟八里台向北四五里至津城西南隅
卽係南開地方爲前總辦已革道員李德順議設總站之所前以
該處地畝爲各地產公司聞風圈購壟斷居奇車站之工築未興
市場之爭鬩已起經御史高潤生以舞弊營私激成公憤據實奏
參由前署直隸督臣那桐秉公澈查分別奏請嚴辦在案此南開
設站已議復輟之情形也上年八月間奉飭在隄頭地方設立天
津總站以期與京奉鐵路新站接軌當督率總工程司等詳細測
繪現經勘定由新開河起與京奉合站就隄頭渡越北繞河道由
小北圩門直趨楊柳青再渡運河至良王莊以接南行之路此現
在新勘車站路線之情形也陳唐莊軌綫地濱海河本係起卸材
料碼頭原非正路車站若由該處趨接南開舊綫誠如原奏所云
程功較速惟本路必與京奉接軌方能貫南北四省之轉輸收交

通之大利而南開地方欲與京奉銜接則紆繞維艱欲渡運河而南則塋墓纍纍取綫尤多梗阻至於天津商務市廛紛布並非羣萃一隅必欲圍繞郡城徧立車站不獨遷墳拆屋煩擾實多卽數站並立終不免有顧此失彼之慮爲商民計旣不能達完全之希望爲鐵路計則舍遠大之謀而斤斤於一時一地之爭持亦屬拘墟過甚現在津埠各商號雖亦有稟懇仍在南開地方改作枝路建築分站以便轉輸爲詞者然此節須俟全路告成後察看商務情形以爲規畫未便於總站未竣之先卽行施工各等語呈請核奏前來臣等查津浦一路必須與京奉接連方不背剏造之本意南開設站旣與接通京奉路軌有所窒礙另修枝路設立分站亦須俟路成之後體察該處商務是否發達與本路是否合宜詳細審酌方能定計且陳唐莊一綫俟津站通至良王莊以後材料轉

正三卷之二
運無多該綫應否遷拆將來亦須酌核辦理若竟接續展造似於
交通大局尙未通盤籌畫近據順直諮議局電稱有人謀於南開
立站爲私利不顧主權請拒絕等語是此事衡之輿情亦未悉協
隄頭設站係籌轉輸四達之宜不僅爲廬市一隅之計商民私心
但知顧己公家作用宜策萬全雖近年風氣日開各處紳商僉知
鐵路經過地方日見興旺紛紛要求設站以爲樂利之圖假使曲
爲遷就則衆願豈能盡償若復引避別圖則辦理益難措手臣等
惟有按照路政應行規畫六端籌議審定未便稍有瞻徇致誤大
局所有該待讀奏請南開設站一節應請無庸置議除飭局遵照
外謹恭摺具陳伏乞

皇上聖鑒

勘查福建潮汕新甯惠潮各路工款摺

奏爲覆陳勘查福建潮汕新甯惠潮鐵路路線股資大概情形恭摺具陳仰祈

聖鑒事光緒三十四年五月二十七日奉

上諭近來各省官辦鐵路皆能剋期竣工成效昭著而紳商集股請設各公司奏辦有年多無起色著郵傳部遴派委員分往各路確實勘查妥擬辦法嚴定期限倘所集股資不敷尙鉅或各存意見推諉誤工即將該省所舉人員差使分別撤銷等因欽此欽遵到部當卽遵擬勘路查款辦法先後奏派員司分往勘查並將已經勘過各路情形分別奏陳在案茲據勘查福建潮汕新甯惠潮四路委員調部差遣工程司胡棟朝臣部員外郎光祿寺主事蔡傳奎許沐鏜等稟稱福建全省鐵路原估共二千餘里現在先辦漳廈一綫計長九十里鋪軌通車者一餘里其餘或在築隄鋪軌或

正修造橋墩路綫平直工亦堅固卽機廠貨倉月台各項佈置亦
尙得宜該路款項計收到股本並糧鹽捐及利息一切進款共銀
一百三十七萬餘兩除支材料土工局用股息共銀一百三十四
萬四千餘兩外尙存銀二萬六千餘兩全路工程尙須籌款接濟
潮汕鐵路由汕頭至潮州府城計長八十五里於光緒三十三年
竣工汕頭車站尙屬齊整車輛亦頗適宜惟汽車形式頗舊建築
未盡合法股款實收銀三百二萬四千餘圓全路成本共支銀三
百十二萬三千餘圓遞年行車進款除養路經費外僅得官利一
釐左右新甯鐵路自新甯城至公益埠計長一百二十二里於宣
統元年竣工工程尙爲合格惟全路均用粗沙墊軌且路綫轉灣
太多弧綫過促未盡合宜全路股款實收銀二百七十四萬餘圓
全路成本共支銀二百五十一萬餘圓尙存銀二十二萬餘圓遞

年行車進款除養路經費外僅得官利二三釐至惠潮鐵路則據
創辦人裁缺太僕寺卿張振勳面稱因股東渙散事遂中止懇代
稟部撤銷等語稟請核辦前來查福建漳廈一路工艱費鉅款項
業將不繼已由公司稟商臣部暫行設法籌款接濟一面添募股
款以圖擴充潮汕最先竣工因路綫太短無利可圖業飭由潮州
府城展築意溪一段藉資展拓其未合宜之工程一併飭令陸續
修改務臻完善新甯餘款尙存二十餘萬圓現合添招股款由公
益埠展至新會城一帶俾便交通而維路利惠潮一路前經張振
勳呈請籌款專由商辦現既集股不甚踴躍該路亦非交通幹綫
自應遵

旨將原案撤銷暫行緩辦以副

朝廷慎重路政實事求是之至意所有勘查福建潮汕新甯惠潮

四路路綫股資大概情形理合恭摺具陳伏乞

皇上聖鑒

會議北洋大臣奏請提撥京奉餘利銀兩免其扣除摺

奏爲遵

旨議奏恭摺會陳仰祈

聖鑒事宣統元年十二月二十日內閣鈔出直隸總督陳夔龍奏
奉撥京奉鐵路餘利銀兩免其扣除一片本日奉

硃批該部議奏欽此欽遵分行到部原奏內稱北洋每年撥補北
洋防費及學堂經費等款無不恃鐵路二成餘利資爲挹注此次
陸軍二四兩鎮三十三年分不敷餉項部議由京奉行車進款提
撥應用仍由北洋應得二成餘利內扣除不但北洋防費不敷更
鉅卽護路巡警暨學務新政一切用款必致盡皆無著惟有籲懇

敕免扣除照舊隨時撥解等語查鐵路餘利於光緒三十四年九月間恭奉

諭旨作爲預備擴充路線之需歷經欽遵辦理在案京奉遞年餘利向恃爲挹注正太汴洛道清滬甯吉長京張張綏各路之資近又奏明籌辦開海鐵路次第集款亦藉此爲接濟陸續動撥實已無復盈餘是以前署直隸督臣那桐於二四兩鎮不敷餉需奏請由部籌撥原摺內卽將從前動用鐵路餘利現在難於提撥情由聲敘明晰嗣經臣部與度支部往返咨商委曲設法籌所以移緩就急暫濟目前始擬由二成餘利項內先行撥解俟路帳結算之時仍如數扣除經度支部奏明立案誠知京奉餘利止有此數斷不能於預算之外驟加支出巨額今該督遽請免其扣除似未悉前此臣部籌商暫時挪撥之苦心於歷次奏案亦未符合應請無

庸置議所有遵

旨議奏北洋提撥京奉餘利未便免其扣除緣由理合恭摺會陳
伏乞

皇上聖鑒訓示再此摺係郵傳部主稿會同度支部辦理合併聲
明

遵設憲政籌備處摺

奏爲遵設憲政籌備處恭摺仰祈

聖鑒事宜統元年十二月二十日欽奉

諭旨憲政編查館奏請飭京外各衙門設立憲政籌備處並將十
月十三日

上諭恭書懸挂一摺著依議欽此欽遵咨鈔到部查原奏內稱擬
令京外各衙門一律設立籌備處並聲明從前所已設者由各該

衙門改易今名各節竊維預備立憲頭緒紛繁自非專設辦事之地無以提挈綱要况臣部所司交通各事與憲政進行之遲速均屬息息相關尤應急起直追方足以利推行而期進步臣部原設憲政研究所由臣等督率丞參以下各員隨時規畫所有九年籌備事宜暨第二屆籌備成績第三年籌備實情迭經奏咨在案茲奉

明旨自應遵照憲政館所奏改爲憲政籌備處以昭畫一凡臣部所轄各項交通事宜已辦者應如何考查成績未辦者應如何督令程功關於預算者應如何稽覈盈虛以時酌劑關於核議者應如何研究利弊以慎推行仍由臣等責成丞參等督同該處員司認真經理並遵將上年十月間欽奉

上諭恭書懸挂藉資惕厲總期九年以內漸臻美善以冀仰副

朝廷立憲求治之至意再憲政研究所原派各員向未支薪應仍照舊辦理合併聲明除將該處員名咨館查核外所有臣部遵設憲政籌備處緣由謹恭摺具陳伏乞

皇上聖鑒訓示

接收南滿洲日本電綫完竣擬請給予日員寶星摺

奏爲接收南滿洲日本電綫完竣擬請撥案給予日員寶星繕具清單恭摺仰祈

聖鑒事竊查上年九月間臣部派電政局總辦候選道周萬鵬在日本東京與日員議訂接收南滿洲電綫合同業於是年十二月奏明奉

旨允准在案查合同第九款內載凡日本所造南滿洲鐵路界外電綫應於合同施行之時全數交與中國等語臣部當卽飭由電

政局派東三省電報總管魏鴻鈞上海電政局總管洋員畢德生前往接收茲准東三省總督咨稱該委員等自本年正月二十日在大連灣地方與日員會議接收辦法所有日本應交回中國各綫分日按段接收歷時三月始克竣事計長春昌圖開原鐵嶺新民奉天遼陽營口安東南尖等共十處綫路六百餘里業經一律妥收鐵路界外之日本電局均卽日裁撤至善後設局借綫各事宜皆已妥籌辦理此次日本政府所派交綫各日員辦事和衷諸臻妥協開單咨請援案奏請

賞給寶星等因前來查上年與德國訂立青煙滬電綫合同曾由臣部奏請

賞給德員寶星仰蒙

俞允在案此次事同一律而頭緒繁重交接軫轉則又過之自應

正書卷三十一
援案給予寶星以敦睦誼謹分別等第繕具清單恭呈
御覽籲懇

恩施如蒙

俞允卽由臣部咨明外務部欽遵辦理所有擬請

賞給洋員寶星緣由謹恭摺具陳伏乞

皇上聖鑒訓示

設立即印刷處派員經理摺

奏爲本部設立即印刷處並派員經理俾專責成恭摺仰祈

聖鑒事竊維印刷之事雖近商業而東西各國往往董於有司者
蓋上以謀文牘之整齊下以防契約之詐僞實於行政極有關係
是以水印暗花杜弊之方日密電胎銅板鏤刻之術日精近年如
度支部及湖北四川江南河南江西等省先後奏設印刷局均經

奉

旨允行各在案現在臣部修訂專律編纂案卷以及譯述外國典籍長篇巨帙已有成書從前交商印行式樣未能一律且有應接不暇之勢而船路電郵各局需用印刷等件又或取諸歐洲每年支銷爲數甚鉅是發交商局既患紛歧取辦外洋復慮溢支更有甚者近年京奉鐵路竟有手持偽造車票攬入旅客希圖弊混情事雖經查出而講張爲幻後患宜防尤不得不籌杜絕之法臣等公同商酌已就衙署東隅舊有房屋重加修葺作爲臣部印刷處所有部內一切印刷之件及外局每年需用船票車票郵票收發電紙貨單冊籍文牘帳簿封套信紙碼單各件概歸該所承辦以昭畫一而杜漏卮京外衙門以及商民等如有書籍單票等件願交該所印行者應准一律按照市價代爲辦理藉圖擴張惟事屬

正書卷三十一
三三
創舉非有辦事結實之員不足以資管理查有江蘇候補道章邦直篤實老成熟悉商務堪以派充該所總辦業經臣等札飭該員到所任事並發給成本銀兩購買德國最新機器現已陸續購妥運京應用技手藝徒正在招集一俟辦理見有餘利再行酌扣本銀所有本部設立即印刷處並派員經理緣由理合恭摺具陳伏乞皇上聖鑒

會籌津浦鐵路由蚌埠渡淮仍建呆橋摺

奏爲會籌津浦鐵路由蚌埠渡淮仍應建築呆橋以期穩固恭摺仰祈

聖鑒事宣統元年六月十五日准軍機處片交兩江總督端方會同安徽巡撫岑家寶具奏淮河建造轉橋一片六月十三日奉硃批著督辦津浦鐵路大臣會商該省督撫籌辦欽此當經前督

辦津浦鐵路大臣呂海寰孫寶琦欽遵咨會前兩江督臣端方及臣家寶遴派妥員會同南段總辦暨總工程司等詳加勘度妥爲籌議再行公同核定未及核辦移交前來臣世昌臣雲沛接辦之後揀派南段總稽查安徽候補道劉樹屏前往逐細履勘詳擬辦法茲據復稱全淮往來船隻除小販雜幫及不專在淮河來往各船多係後頭桅呆橋活橋均無關礙惟運鹽之糧頭及艚子船約數二千艘終歲在淮河之內一律係前頭桅起落較艱前在懷遠會會同地方官招集衆船面試眠桅豎桅時刻以兩船夾一船兩桅提一桅自始至終祇一點五分鐘之久曾經具結在案又據總工程司德紀函稱活橋開機必在河中央積水最深之處以便水退時船隻亦可暢行而當水漲溜急之際船隻過此狹窄之橋門最易與橋墩衝撞並據德紀面稱活橋啟閉時刻將來軌道四通

車行漸多每日祇開一二次每次不過三十分鐘爲時至暫倘值風逆溜急往來船隻亦不能盡數渡橋况活橋以數百萬鈞重量之橋懸之於尺寸之鐵昔昔而啟之昔昔而閉之萬一有沙石纖屑梗於其中或將閉而機軸偶有空礙或雖閉而軌綫畧有差池此時來軫方道瞬息已至其爲禍之烈曷可勝言今呆橋惟不便於商船苟有以變通之使不便者悉歸於便則商情自然悅服查得蚌浦上游距橋里許有塘堰數百丈約容船百餘艘大可圍成船塢以爲泊船卸貨之處其下游雖無天成船塢而人工亦易爲力若上下游各建船塢一座並各安置起重機一具以爲眠桅暨桅之用實可以便利商船之行駛特行召集地方紳董及各船戶將所擬辦法告之眾船戶歡聲雷動交口稱便等語旋據臨淮紳商學界公稟稱興利貴知大小避害宜識重輕商船起桅之不利

第全體中之一條目耳鹽船起桅之不利又條目中一子目耳而火車載貨之安危關係且十數省且億兆人應請審定利害仍造呆橋又據皖紳周學銘等公稟稱活橋工鉅費重任股還債四省同此擔荷今用呆橋而省費實爲紳等至願各等情先後稟請前來臣等查原奏內稱津浦鐵路勘由鳳陽府之蚌埠渡淮議建呆橋以通軌道淮河向無橋座故船桅皆永豎而不下今若建造呆橋則民船行經是處必須卸去貨物乃能下桅而過廢時失利與航業商情均有不便審度情勢或建造轉橋方爲便利等語詳考原奏之意不過以建造呆橋則帆船往來卸貨下桅不免遲滯船戶視爲不便第以徇船商之意見遽改活橋無論建築費鉅養路之費亦必驟增而火車日日行駛其上啟閉頻仍設或軌道稍致參差機器偶一鈍滯必致輪轅飛出連及多車其關於身命財產

之損失至重且鉅昔京奉之灤河橋其先已定活橋之議嗣因慮有危險卒改呆橋是其明證且活橋開機之處必在河之中流橋門既狹水流自急船隻易與橋墩相撞損壞堪虞兼之啟閉時刻每日二次均不過三十分鐘往來船隻必不能盡數暢行則守候開機仍多耽擱是改建活橋於行船無幾微之利而徒貽鐵路以無窮之害也今據該委員等查酌情形擬於橋之上下游各建船塢一座每塢安置起重機器一具俾船戶卸貨安桅均得歸於便利該紳商等亦均以審定利害仍應建設呆橋聯名呈請臣等以事體重要迭經往返商推均以所擬辦法商船無阻滯之虞路工收堅穩之效自應將蚌埠鐵路渡淮仍建呆橋以爲久遠之計除將所擬建塢設機各項會同札飭妥辦稟候核定外所有會籌津浦鐵路由蚌埠渡淮仍應建築呆橋各緣由謹合詞恭摺具陳是

否有當伏乞

皇上聖鑒訓示再此摺係由臣世昌臣雲沛主稿會同臣人駿臣家寶辦理合併聲明

退耕堂政書卷三十

三十三

二

退耕堂政書卷三十一目錄

奏議三十一

郵傳部第三屆籌備憲政成績摺

津浦鐵路北段料車已抵德州並全路工程進步情形摺

津浦鐵路黃河橋工加深增費片

擬定各省大小輪船公司註冊給照章程摺

津浦鐵路工款不敷並工程喫緊情形摺

議結京漢贖路交涉情形摺

會奏查明浙路公司擬造江橋被參各節並籌擬辦法摺

開辦交通官報片

創設交通傳習所開辦情形摺

遵 旨查明津浦鐵路勘線設站緣由並呈圖說摺

編訂第一次交通統計表暨纂輯四政概略進呈摺
展設廣東潮嘉電綫摺

退耕堂政書卷三十一

天津徐世昌

奏議三十一

郵傳部第三屆籌備憲政成績摺

奏爲遵章臚陳本部第三屆籌備憲政成績恭摺仰祈

聖鑒事竊查憲政編查館奏定考核章程內開九年籌備事宜責成內外臣工每屆六箇月將籌備成績臚列奏聞並咨館查核限每年二月及八月內各具奏咨報一次等因所有臣部九年籌備事宜暨第二屆籌備成績迭經奏咨在案茲值第三屆奏報之期自應遵章臚陳以崇邦憲伏維臣部之職郵其主名今所謂郵僅指函件而言非廣義也蓋必函電交資郵體始備尤必軌航互運郵用乃靈美國路章明言鐵路代郵路而起英人船務原令商船

輔郵船而行是知船路兩端戰時賴濟軍輸暇時藉營商業而在
朝廷經畫區宇之道實以郵遞爲其本謀故郵政一門臣等自第
二屆籌備時已屢議收接今雖郵政局仍暫由稅務處經營臣等
實以該局借用外洋人才終非久計因於交通傳習所內增設郵
電學科令其兼肄英法語文並揀派德法文學生前赴奧都令習
郵便儲金以爲將來部處交遞之計而所以輔成郵體之電政暨
所以分效郵用之船路二事臣等昕夕籌度總期按年恢拓以收
漸被暨訖之全功請先言電政電以空中通信爲用卽空中之郵
遞也臣部接管以來東自黑吉西自山陝南自粵桂黔湘以及贛
豫皖蘇等境計於舊綫五萬餘里外共展新綫一萬二千餘里上
年十二月間業經另案奏陳而其中有爲第二屆成績奏報後所
新增者於蘇則仲興震澤於豫則懷慶武陟於晉則牛杜運城於

陝則西安涇陽於滇則碧寨阿迷於黔則貴陽玉屏其黔湘界內更自玉屏東達於洪江飛度所經計展長千數百里而信保之移桿西瀘廬壽之修綫猶其次也近年空中事業日異月新歐美各邦於電綫交互之中更有翼艇球船相屬於霄漢臣部前准上海實業學堂監督咨呈學生王繩善新撰飛空考略一書經臣等批獎存查旋准駐法使臣咨送留法學生周緯所著航空學一書亦經臣部轉咨陸軍部酌核辦理誠以航空航海爲交通天地之機英人素以航海稱雄尙慮敵用飛航奪其霸業法人則航海航空兩會方在力圖溝通我國船政初萌固不必遽籌及此然船政旣與有關係亦應預爲提倡且船政一門前曾派員赴滬調查航海事宜今正議訂輪船公司註冊給照章程一俟擬成當卽奏咨宣布而統轄江海內外各船之法仍於新修航律內規定劃一冀臻

於全但輪船之設立公司其事多與農工商部相因而理船廳稽
查船關則於稅務處更多牽涉均應亟分權限方免臨時掣肘至
培養船員一層原議於上海船學專科外建一商船學校於吳淞
之海濱嗣准海軍大臣咨開道員李厚祐願將甯波城外中學一
區報效爲商船學堂轉請核辦俟派員查勘明確再行相度形勢
俾與上海吳淞兩校相輔而成惟中國地處亞洲雖云襟帶瀛寰
而版籍號稱大陸以故鐵路一政視船政尤爲要圖自京漢贖回
京張告蕝以來南幹經綫旣以粵漢籌辦爲最繁東幹經綫復以
京奉展築爲最要而京奉東迤乃有錦瓊承其轅軌若緯綫則近
有張綏以通南北遠有川漢以達西南而首銜東幹尾銜南幹仍
貫輸於腹地者則有津浦以絡南北其與津浦相錯兼銜南幹橫
出之汴洛而從腹地遙取邊勢者則又有開徐清海以綰東西凡

此經緯縱橫實關規畫大計皆部責也錦瓊一路自上年外務度支兩部與臣部會奏准由東三省借款籌辦京奉一路由臣等責令鐵路局長梁士詒督同委員與日本領事往復籌商已訂明由我建設天橋飛跨南滿鐵道而過以直抵瀋陽城根雖該領事尙以要求聯絡南滿爲詞臣等飭令再四磋商仍力持未允吉長則自去冬開工後勘定長春車站早已分頭購地而屬於吉林之兩段正月間覆勘適完查汴洛原訂行車合同比公司實隱有布置全權臣等乘工竣通車之初督飭梁士詒商同該公司切實改良因裁汰華洋員司共四十九名歲省經費銀至五萬二千餘兩從前所失權利自此遂多挽回其洛河橋工現方換墩打樁亦限令四月內外如期告竣至汴洛斜地爲開海徐清之綫徐清一段會奏准由江蘇公司承造而部所自辦者開徐凡五百六十里清海

凡二百六十里臣等業飭津浦路局先從徐州啟築謀爲該綫經始並派郎中阮惟和充該路總辦令於開封海州分頭並築以匯於徐清海州近有水災並擬先辦土工期於賑務有裨祇以工款浩繁有緩不濟急之虞會奏明屆時當與度支部籌商辦法津浦經臣世昌臣雲沛分飭履勘督令剋日程功北段從天津陳唐莊至德州四百七十里之間客車業經暢駛南段則浦淞二百里沮洳之地土方亦一律築成此外西北則張綏之洋河橋墩旣歲挖築之役西南則川漢之彝陵山道甫施縋鑿之工其在東南廣九購地已齊近且飭令總辦魏瀚會同英國香港總督委員商議九龍接軌之事新甯則經部准總理陳宜禧等從公益埠展築枝軌俾達新會縣城以上數端均據現辦各路情形爲言而路律條文擬暫別職司工程廠務車務公司爲五門合之自成一書分之仍

爲五種已責令僉事陳毅等趕緊修輯期早觀成俟車務草案修完當卽咨商各部館奏請

欽定頒行俾資遵守凡茲經畫皆仰秉

聖朝體國經野之謨以預張中原長駕遠馭之勢臣等所兢兢昕夕竭百慮以圖一當者固無逾於此也所有遵章臚陳本部第三屆籌備成績各緣由除分咨查核外謹恭摺具陳伏乞

皇上聖鑒訓示

津浦鐵路北段料車已抵德州並全路工程進步情形摺

奏爲津浦鐵路北段料車已抵德州並全路工程進步情形恭摺具陳仰祈

聖鑒事竊維津浦鐵路全綫縣長二千一百餘里原定合同限以四年告竣造端伊始卽定分段興修之策南北兩段先後開工分

途並進原冀期短工速庶可早日告成臣等自上年接辦以來所有兩段路線地址尙未購齊土方各工甫事填築其沿路橋梁涵洞站房水塔或始定基礎或尙未興工當以程限所關迭經督飭在事華洋員司趨期興作北段開工較早惟天津總站至良王莊之六十餘里規定未久現正購地興工其自天津陳唐莊材料碼頭起以達山東德州計長四百零六里有奇共設二十四站軌道均已一律接通於正月閒試行機車按里計時每一點鐘可行八十里驗其馬力速率與各路行車比例尙無不及隨即一面調派熟悉車務人員籌備行車事宜一面飭令總工程司逐站切實細勘務令堅實庶無危險自三月初二日起擬定每次工程料車酌帶二三等客車卽於是日附售客貨各票津德二處間日各開工程票車一次星期各開快車一次惟道里較短客貨無多然逐日

比較進款遞見增加將來全路開通營業可期發達此由津至德
行駛料車之情形也至德州以南距黃河北岸計程二百餘里土
道業已築成惟沿路橋梁涵洞七十餘座程功不易現正切實督
催約至本年冬閒可以告竣其黃河南岸至濟南城外計程十二
里業經行車輸運料物濟南至泰安一綫亦已通至沙河全段通
車之路按里平均計算已逾三分之一溯自光緒三十四年六月
開工距今共二十閱月若就路工而論四年之期似可不致逾限
其泰安以南工程已飭接續經營節節前進此北段工程進步之
情形也又查南段工程計分三大段上年因雨水太多土工坍塌
本年春閒時遭水浸第一段開山工程本極浩大業已逐漸開通
近以路基被水復經多募工役趕緊修補預計興修後兩月內如
無大雨土工軌道應可竣事所有浦口至滁州一段屆時當可行

車第二段近臨淮關一帶河水暴漲土隄下陷業飭加工培補以後若水勢較平無礙工作約計本年秋後當可通車此南段頭二段被水補修及工程預計之情形也第三段購地安設電綫兩事業已辦竣其土工橋梁涵洞亦經次第興辦臣等仍當極力督催務期南北兩段路工均能依照預定程限早日告成俾進款日增藉可稍輕債累以仰副

朝廷振興路政之至意所有津浦北段料車已抵德州並全路工程進步情形理合恭摺具陳伏乞

皇上聖鑒

津浦鐵路黃河橋工加深增費片

再津浦鐵路北段在山東濟南府屬濼口上游建造鐵橋徑渡黃河業經前督辦臣呂海寰將會同勘定造橋地方並黃河橋空加

寬派員核實勘估情形先後奏明在案臣等於上年接辦後檢閱卷宗備知東省官紳以河身豎柱中洪溜急橋空若不加寬難免險患當經分別酌繪三圖以第一圖有礙河流第二圖糜費過鉅議定按第三圖辦理計加寬各費約增至六十餘萬兩之多先後知照德國橋梁公司妥爲辦理迨上年八月間復派熟悉工程人員前往查勘據稱橋墩工程用鑽試探已逾原估深度五密達之多計合營造尺一丈五尺有零尙未到底將來耗費恐非意料所及等語嗣由德國橋梁公司臚列陸地中洪橋柱加深之尺寸及預備添修雙軌之地位並工程度架之艱鉅機廠雜項之增多以至墩基鐵架之加寬分條索加價值當派郵傳部候補丞參詹天佑會同北段局員逐條磋商分別駁減並飭將應行節省各工酌量核辦去後旋據呈稱該公司所開工價係按照原訂合同比例

增加現查加深五密達之全橋估價單共德銀一千一百十四萬餘馬克較之前奏加寬數目計多二百九十餘萬馬克約合銀九十餘萬兩詳核所開工程材料尺寸逐項分計其預備雙軌一項橋既加寬本有雙軌地位卽預備添修爲數無幾且可爲將來展修雙軌之用似宜允其照辦此外加深尺寸等項查合同載明若按原估尺寸再有加深應將所加若干照原價逐項計算實屬無從商減但此係約數以後實行到工應用各項工料倘可節省卽應照數核減並派專員前往督飭監視凡全橋所用工料隨時記載以憑核算而防偷減又查黃河水勢春夏之交河汛陡漲難以施工一經遷延動輒半載應請迅速核定飭遵前來臣等查黃河橋工關係重大自前督辦臣呂海寰及東省官商注重無損於河有益於路之見再四酌核始經定議現在鑽驗河底照原估尺寸

深度加增一丈五尺有零實爲從前預算之所不及該處河身寬闊水流湍急所有橋墩必須深入河底方能堅實若苟且惜費日後萬一傾圮再行重建損失何可數計此不得不格外審慎者也故雖津浦工款已屬不敷惟加深一款關係全橋工程除嚴核工料外別無酌減之處臣等再四熟籌倘工程分外堅固款項不致虛糜且能早日告成增加進款實與路政大有裨益擬飭承辦各員按照估單隨時設法節省並駐工監視以期核實仍趕緊督催無任延誤以期仰副朝廷慎重路工之至意所有黃河橋工加深增費緣由謹附片具陳是否有當伏乞

皇上聖鑒訓示

擬定各省大小輪船公司註冊給照章程摺

奏爲謹擬各省大小輪船公司註冊給照章程以資遵守而重交通恭摺仰祈

聖鑒事竊維航業之興無論外海內河官商船舶同爲國權所繫未可漫無稽考自南北洋設立輪船招商局至近年內省開埠以來人人皆知航行之利各省商民間風興起創辦輪船公司所在多有惟疆域睽隔情形不同商船辦法亦遂因之互異且往往逕自開行並不稟呈到部散漫紛紜略無綱紀既未能聯絡商情力任保護之責設有轉轉更恐礙及主權臣部總司航政責任攸關自非籌定劃一之方不足以憑稽核而資整頓當經臣等公同商酌督飭司員擬定大小輪船公司註冊給照章程二十條凡各省創立大小輪船公司必呈由臣部核定章程准其立案註冊後各該公司赴部先領執照持赴各海關呈驗由關發給船牌照章完

納船鈔其從前各省業經設立之大小輪船公司均應補領以歸一律隨由臣部分別咨札先行試辦在案現在已逾三月各省輪船公司呈請領照頗形踴躍是商民既稱便利而航政亦有初基謹將章程繕具清單恭呈

御覽如蒙

俞允卽由臣部分別通行欽遵辦理所有擬定輪船公司註冊給照章程緣由恭摺具呈伏乞

皇上聖鑒

津浦鐵路工款不敷並工程喫緊情形摺

奏爲臚陳津浦鐵路工款不敷並現在工程喫緊情形恭摺仰祈聖鑒事竊查津浦鐵路延長二千一百餘里前於光緒三十三年十二月由前軍機大臣袁世凱張之洞前外務部右侍郎梁敦彥

與德英兩公司議借英金五百萬鎊訂立合同嗣於光緒三十四年六月由前督辦大臣呂海寰勘定路線次第興工所有全路應行規畫大端業將布置就緒上年六月臣等奉

命接辦以華洋各帳均待清釐當經飭令南北兩局接續辦工以防延誤一面飭將交替後實存之款並應辦工程實需之款督同總工程司詳細勘估除存款外不敷若干核實具報旋據先後開送估單前來臣等詳加復核所有不敷款項雖係約計實皆要需謹分別爲我

皇上陳之竊查光緒二十五年前工部左侍郎許景澄與德英公司訂立津鎮鐵路草合同內開南北兩段共長一千八百餘里估計約借英金七百四十萬鎊嗣於光緒二十八年直隸督臣袁世凱與該公司商訂正合同由該公司預估約需英金八百萬鎊

未及定議至光緒三十三年始行訂立津浦鐵路正合同內開由天津至嶧縣由嶧縣至南京對岸之浦口約長二千一百七十里較原擬路線計加增三百餘里之多預估工款約英金九百萬鎊其時以直隸山東江蘇安徽四省京官呈請奏明白辦因奏設四省公司招集路股預備贖路並聲明如借款不敷應在四省公司路股內陸續撥用是以向該公司借款時祇借英金五百萬鎊預留四省公司路股接濟地步此津浦鐵路原借款五百萬鎊之實在情形也至所借之五百萬鎊按南北兩段分攤計南段共借一百八十五萬鎊北段共借三百十五萬鎊按九三扣共實得四百六十五萬鎊又按照合同先付抵還餘利二十萬鎊又扣存四年內借款之利息一百萬鎊並購料之五釐行用約十萬鎊共一百三十萬鎊計實在到工者祇三百三十餘萬鎊而已現查南北兩

段所開全路應需款項估單計南段實需銀二千四百六十餘萬兩北段實需銀四千七百五十餘萬兩除原借款悉數撥付外實在不敷銀三千二百六十餘萬兩約合英金四百十餘萬鎊均係實數售票價值漲落無定折中估擬約在九四五扣之譜此項折虧計二十六萬四千鎊再存留二年利息及還利費用共四十八萬一千二百鎊應共借虛數英金四百八十萬鎊方能符合預估實數之用現在工款結至西七月底業已用罄無存臣等祇得暫行息借津滬銀行零款以應要需俾免停工此津浦鐵路預估續借之實在情形也北段工程已達德州以南約需兩月可抵濟南近以秋雨連綿水勢日漲軌道便橋雖有冲毀尙無大礙至濟南以南各段購地將次告竣土工逐段開築其最後之滕嶧一段亦經迅速布置剋日興工以期南段造成時可以接通軌路又黃河

橋工近以秋汎泛溢修造極難經飭安速趕辦尙能照常工作南
段則五月初料車已達滁州以客貨有限進款不敷支銷未便行
駛客車經飭將臨淮關一段迅速趕築每日工程除原有工人外
每一小段各添募千餘人以爲早日通車之計惟上月安徽境內
固鎮一帶大雨時行水災甚鉅冲塌路基漂失道木不無阻礙現
在水勢漸退業已飭催加意趕築毋任再有延誤其固鎮以北宿
徐一帶土工修築已及一半蚌埠橋工墩基亦已次第興造此次
雨水尙無損壞兩段工程實均在喫緊之時萬不能因工款無餘
暫行停止經由臣等商明度支部並面詢四省公司以路股集款
無多不敷應付祇得按照合同接續借款俾應急需仍督飭兩段
認真樽節安速辦工藉免虛糜而期速效以仰副
朝廷講求路政之至意除將商議續借款合同另行具奏辦理外

所有津浦鐵路工款不敷並現在工程喫緊情形理合恭摺具陳
伏乞

皇上聖鑒

議結京漢贖路交涉情形摺

奏爲恭報議結京漢贖路交涉情形恭摺仰祈

聖鑒事竊京漢鐵路前向比國公司贖回迭經臣部將辦理情形
分別奏明並於宣統元年二月十八日臣部彙陳收撥路款摺內
將截至光緒三十四年十二月底止贖路撥用一款一並附陳在
案查該路與比公司爭執之款甚多比公司頗擬藉此延緩交路
之期經臣部往復駁議始定光緒三十四年十二月初十日先行
交收將未了各款隨時議結計彼此爭執最烈者爲大賠款擔保
款項一事先是庚子之役京漢鐵路因歸比公司管理遂亦於大

賠款內得有賠償款項經督辦大臣盛宣懷與比公司議撥該款
爲修復路工之用又以大賠款係分三十九年清交緩不濟急復
商由此政府先行墊出整款嗣後按年扣還並由盛宣懷給與比
公司憑函聲明將來大賠款如有停止核減之時卽以該路餘利
八成作保如贖路後中國則另尋一擔保之項用保此整款將來
偶有之虧失等語比公司因此遂要求贖路後仍將京漢各權利
爲此款擔保臣部以路經贖回斷無留此枝節以自束縛之理力
拒不允又該路本有公積一款比公司復擬分提二成臣部以有
背合同未經許可同時臣部亦要求該公司數款以爲操縱彼此
爭辯多次未能解決不得已照合同第二十六款辦法歸外務部
與比國駐京使臣公斷酌由外務部與該使臣斷結查照大賠款
三十九年內攤算京漢鐵路應得之款最多之年約計二百十四

萬佛郎由中國照數存儲上海華比銀行以爲大賠款整款之擔保至大賠款付清爲止此項存款該銀行仍照通例給回利息盛宣懷所給比公司憑函卽行廢止因比公司辦事多年鐵路亦得餘利另行給與酬費公積一款則比公司不得索分絲毫臣部要求該公司數事亦卽通融了結由外務部將議結文件咨照前來贖路交涉全案至此悉行結束至所撥各款如還比公司借款一項大賠款整款擔保一項及暫借各項應還本息等數均經逐款核計掃數清結連暫時押款兩項在內贖路款項實支英金三百七十六萬磅支銀一千三百七十一萬八千五百七十八兩六錢二釐兩共約合銀四千六百五萬兩之譜成本較前略爲加重惟此後每年可省去分與借款公司之二成餘利約三十餘萬兩又收管理一切主權則全路之規畫佈置杼機在我所有通商惠工

之策可以次第施行卽僅以所收利益而論亦非少數惟該路本爲交通要綫前歸比人管理因靳惜費用以冀多分餘利致令設備時有未周非力求擴充不足以收美利臣雲沛歷次往返躬親巡視亦確見該路遺利尙鉅當爲詳求疏濬濬導之法但諸事非款不舉逆計數年之內如果款項應手凡百計畫得以逐漸設施將來收效必可勝於今日至贖路借用各款本息應由該路行車進款按期歸還並照例按年提存公積銀兩以備意外之需應均作爲定案永遠不許移用以昭慎重至贖路款項應由臣部於收撥各路款項總帳內另行詳細奏陳所有奏報議結京漢贖路交涉情形除咨明外務度支兩部外謹恭摺具奏伏乞

皇上聖鑒

會奏查明浙路公司擬造江橋被參各節并籌擬辦法摺

奏爲遵

旨查明浙路公司擬造江橋被參各節並籌擬辦法會同據實覆
陳恭摺仰祈

聖鑒事宣統元年十二月二十日承准軍機大臣字寄奉

上諭有人奏浙路公司偏信洋工程司錢塘江橋不宜水利並不
宜橋工一摺著郵傳部會同增韞詳細查勘水利橋工有無窒礙
妥籌辦法據實具奏原摺著抄給閱看欽此遵

旨寄信前來臣等遵卽往復電商分別遴派郵傳部郎中周嵩堯
浙江勸業道董元亮候補道衛興武等會同馳赴該處按照所參
各節詳細履勘茲據該郎中等將查勘該處水利橋工各款稟覆
前來臣等切實詳核按以沿江地勢考之該處輿情謹將實在情
形爲我

皇上縷晰陳之如原奏稱錢塘江面南岸積沙七八里不知者誤會江面僅二三里橋工易成坍塌靡常積沙邨則橋工隨流而去一節查錢塘江面西南行約八里爲徐村又一里許卽爲該洋工程司所擬造橋之所該處近岸爲老礮台山對面爲鮎魚嘴江面約寬三千餘尺潮長時或至四千餘尺不等水深約三十餘尺江邊一帶半係鬆沙每當春夏間水流湍急江濱積沙隨潮刷盪此處若築鉅橋沙土鬆浮易致傾圮洵係實情又原奏稱錢塘江仰承福建安徽兩省大山之水與夫金衢嚴紹處五府大小山水來源數千里且有海潮頂託往往倒灌更以橋墩橫互其閒水益無從宣洩一節查錢塘江水發源於閩皖邊界諸山中經金衢嚴紹處五府合大小眾流奔赴而下錢塘江口寬徑僅二三里每遇海潮頂託上游山水不能直瀉下游海水逆灌而入故年來紹屬之

山陰會稽蕭山各縣潦患頻仍其上游富陽諸暨等處輒因下流壅閉泛濫爲災若於江面互以橋墩將上受山水之衝下受海潮之激橋墩固易搖動且水以激而橫流所有圩隄必遭損壞沿江州縣倒灌堪虞水利橋工兩相妨礙亦非過慮原奏又稱公司偏聽洋工程司專顧營業不顧水利一節查洋工程司富爾德前擬於錢塘江面造橋以便接聯對岸蕭山等處之路該公司亦以錢江水利與濱江州縣關係甚鉅未敢遽爾動工臣等委員履勘時與之再三考究該公司亦謂路不可不速通橋不可不緩造將來路成後營業發達上游各州縣圩隄修築完備宣洩得宜而後始可相機建造是其審慎籌維尙無偏聽原奏指爲專顧營業不顧水利未免言之過激原奏又稱該路過江暫用輪渡一節查江濱一帶旣不便造橋致滋水患而該路現已由湖墅造至江干將來

展築蕭山各處自應設法通過對岸以便交通原奏所稱暫用小輪渡江等語事屬可行總之水勢必期疏洩鐵路亦貴聯通該路由江干東越紹甯實爲浙東要綫第過江之路未通則設橋自非急務臣等酌度現在形勢應飭令該公司於江干兩岸建造浮碼頭多備大駁船躉裝客貨詳定章程報部核准並酌量購置小火輪拖帶駁船渡江此往彼來使火車一到江濱駁卸入船轉拖徑渡水道既無阻礙轉運亦見靈通庶因時制宜不憂偏廢至建橋一節應俟該路全通商業發達之後再行相度地勢妥籌辦理所有遵

旨查明浙路築橋被參各款並籌擬辦法緣由是否有當謹恭摺會陳伏乞

皇上聖鑒訓示再此摺係郵傳部主稿會同浙江巡撫臣增韞辦

正書卷二十一
理因派員會勘並往返咨商覆奏稍遲合併聲明

開辦交通官報片

再各國交通衙門無不發行官報日刊以布號今年鑑以示成績
臣部於上年七月倣照試辦名曰交通官報月出一冊委奏調游
學畢業生王祖邨經理其事數月以來銷行漸暢今年已改爲月
出二冊於誘掖民智發達事業不無裨益查京外各衙門辦理官
報均經奏明立案臣部事同一律謹附片具陳伏乞

聖鑒

創設交通傳習所開辦情形摺

奏爲創設交通傳習所謹將開辦大概情形恭摺具陳仰祈
聖鑒事竊臣部所轄四政其事則利在交通其理則根諸學問按
日本遞信省所轄有商船學校有東京郵便電報學校有鐵道廳

講習所教育既廣人才遂多理固然也中國交通事業展發最遲
蓄艾三年宜在今日查臣部所辦學校鐵路則唐山路鑛學堂電
報則上海電政學堂路電合辦者則上海高等實業學堂臣等受
事以來如擴充專科附設中學購置儀器增建工廠講堂各事締
造經營不敢稍留餘力惟查各該學堂雖有路電兩門屬於路者
則偏重機械工程屬於電者則專注汽機按報大抵技術之事業
已粗備管理之事尙付闕如而近來鐵路如滬甯汴洛道清京張
廣九各處均已次第通車京漢一路又經贖回自辦電報則東三
省贛皖蘇豫兩粵湘黔山陝等處展綫至一萬二千里有餘郵政
從前本無學堂現與稅務處正議接收籌備尤不宜緩所隸之事
日廣所需之人亦日多是非廣育英才必有供不應求之勢臣等
公同商酌已於臣部署後創立交通傳習所以培養管理人材爲

主與唐山上海各學堂專習技術者並行不悖各盡其用所分科目有二曰鐵路科曰郵電科鐵路科分爲兩班高等班三年畢業簡易班一年畢業另設津浦簡易班功課相同爲兼習德文以備津浦路局之用郵電科亦分設兩班高等班二年半畢業簡易班一年半畢業畢業後各按程度酌派差委凡該所現在之生徒卽將來各局員司所自出職務固分高下學問自有淺深營蒯絲麻務求兩備鐵路科學生已於上年冬季授課郵電科現甫招考准三月開一律入堂共計生徒六百餘人概不供膳給宿以節糜費郵電合爲一科者蓋以郵電二事均爲通信機關東西各國往往以郵政與電報電話合爲一局經費旣省運用亦靈是習電術者必嫻郵政規章學郵政者須具電術知識以備將來郵電合併所習所用舉措裕如又查貸款各路或用英文或用法文幾成習慣

郵政自稅司代辦以來其高級管理員大半借材異地通行文牘亦以英文爲多是以該所鐵路班分招英法文已優之學生入學分授科學並令英文生兼習法文法文生亦並習英文以收互用之效而郵電班亦招英文程度已高者兼習法文俾易接洽必事情不虞隔閡斯權利可漸收回實主客交遞之機關亦政學溝通之至計凡此數端皆爲路政電政郵政各局所他日致用起見與尋常設一普通學堂博取出身希得學位者事有不同用意亦復迥別臨淵羨魚不如結網出門合轍端在造車總期於實業多培一班之人材卽爲國家多保一分之利權所需款項除購買民房建築工料等銀數業於宣統元年二月十八日奏銷並添建房屋開辦經費續用款三萬餘兩外預算常年經費約需銀八萬兩從前臣部辦學款項均係由鐵路公費項下支銷歷經附片陳明在

案現在臣部學務力求擴張派遣出洋學生名數亦漸推廣鐵路公費已不敷用業由京漢京奉兩路餘利項下酌量撥支至商船學校必須附近海岸練習風濤教授之地不能合爲一處已於江蘇之吳淞浙江之甯波兩處派員履勘另案奏明辦理所有臣部創設交通傳習所大概情形緣由理合恭摺具陳伏乞
皇上聖鑒

遵 旨查明津浦鐵路勘綫設站緣由並呈圖說摺
奏爲遵

旨查明據實覆陳恭摺仰祈

聖鑒事宣統二年四月二十二日承准軍機大臣字寄奉

上諭有人奏維持路政全局一摺著郵傳部按照所參各節是否屬實查明具奏原摺著鈔給閱看欽此欽遵寄信前來臣世昌適

查勘山東路工歸途道出天津於該處商民具稟懇予設站節經
剴切開導仍一面分別澈查諮訪以資核辦復由臣焜瀛臣雲沛
於五月初三日赴津會同督臣陳夔龍前往該處逐段履勘並嚴
密覆查謹將規畫路政大端及查明原奏津浦鐵路請設南開分
站詳晰情形爲我

皇上披瀝陳之竊維路政要旨厥有兩端一曰國防一曰營業就
國防而論所有運兵運餉運賑各項均宜取用腹地自保主權設
遇有事之秋轉運得以自由不致有劫持之患就營業而論建築
鐵路以利便商賈而能增加進款爲要著故各國鐵路每就市場
相距之遠近爲設站之準率總使原有商貨可以轉輪營業而遠
來商貨復因利乘便爭相趨附路務商務兩得輔助卽兩見振興
津浦鐵路南通滬甯顧盼江海北聯京奉銜接巖關將來江浙各

路輸運北省以及東北各路輸運南省皆以津浦路爲樞紐於國防營業兩端均能扼其要領此全路交通之利便也若天津一處灌輸之利則總站由新開河起與京奉合站就隄頭渡越北河繞道小北圩門直趨楊柳青再渡運河至良王莊以接南行之路商貨之由城廂運往者仍至京奉新站其由租界運往者仍至京奉老站均能裝載津浦車輛既可控馭全路使貿易增盛兼可越避租界俾利權得以自保且天津南市所有華洋出口入口貨物羣集租界城北次之城東又次之京奉新站爲已闢之市場漸能吸收租界商務於該處設站兼謀合軌實係斟酌至當而可推行盡利也陳唐莊一站地濱海河本爲暫時運料而設一俟總站告成卽當酌量遷撤南開設站一事係因前督辦臣呂海寰與前直隸督臣楊士驤曾親往隄頭趙家場一帶逐段履勘相度規畫設立

總站處所雖未議定而商民耳目所屬實已無不周知乃已革道員李德順先已暗串地販夥設公司在津城西南隅南開地方預購地畝以爲壟斷居奇之計營謀既定遂宣言即在該處設站並擬由陳唐莊取道八里台直達南開以致合郡驚訝眾議紛紜激成公憤旋經奏參於上年七月閒由督辦大臣會同前督臣端方復往履勘徧徵輿論體察情形以南開地處窪下居民無多設站決不合宜定議仍在隄頭一帶建設總站奏奉

俞旨遵行在案茲原奏內稱國家建設鐵路原以利商便民若不顧商民竟如該局所復謂眾願不能盡償恐中外古今無此政體該處爲商務要地乃謂俟路成後斟酌商務是否發達而轉置目前於不問則該路之所謂交通者究何所指似應基礎商市期旁達於無窮安得以陸海通衢而忽置之等語查津城西南隅本無

商市地生鹽鹼種植毫無前經督辦大臣奏明俟路成後察看該處商務是否發達與本路是否合宜再行酌量籌議自是正當辦法若就目前而論斷無躐次混施之理所謂商務要地陸海通衢或就津郡大勢而言若專指南開則未免意存朦混況附路設站有過站止站之不同過站爲路綫經過之處關係尙輕至止站則路綫已盡百端蒼萃假就已廢之八里台一路接續展修則於租界逐節毘連他國必有干涉上次德使派參贊來部又英德駐津領事赴局要求分設兩枝綫以達租界均經臣等婉言謝卻若因此而再有所請勢難始終拒絕將來南開一站英德租界又各一站合之總站則四站並立析爲四枝竇主不分利權誰屬原奏又謂津埠商民困難已達極點各商負洋債至一千萬有奇專恃該路刻卽交通以期振興而圖補救若舍近求遠恐新商之發達尙

未有期舊商之隳頽已可逆料千百戶身家性命急切待援何忍深拒固閉必吝此數里之地不爲一通等語查津郡歷年商務因洋員虧蝕以致積欠銀行一千餘萬金皆係貨商南開設站與否與該商等勢同秦越若指全體商業而言則此路一成仍由京奉原站輸運貨物實爲舊商增添營業總站之外暫不另設他站卽無新商之可言蓋所謂新商舊商暨千百戶性命身家亟切待援者祇此販賣地皮之輩而已所指之數里之地卽陳唐莊枝路由八里台直達南開舊址將來應在遷撤之內者否則路站斷無舍近求遠以息貸折扣而來之金錢作紆折不中繩尺之計畫也原摺又謂該局所復於糜款費時諸要端及商民所利便者皆置不一答輒以革道李德順南開廢站爲口實並將順直諮議局之電不加審查拉雜以陳以實其不能挽回之據又云原不沿用李德

順舊勘路綫不妨偏西另擇善地等語查糜款費時原無可諱然推原其故首在於李德順之營私欲廢隄頭趙家場一帶已勘之地橫生阻窒不在於後來之廢南開也南開旣無商業且自西南隅折趨城北經過西圩牆勢甚屈曲路軌必須裁灣取直方可暢行斷難循牆前進而圩牆內外墳墓極多遷移購買種種爲難是地勢又不合宜今若仍廢隄頭而用南開不但糜款費時之更甚益令地畝得遂其欲則當日參辦李德順果何爲乎該原奏謂不沿用李德順舊勘路綫而上次奏稱由八里台向北四五里者非李德順舊勘之綫而何尤可異者李德順主用南開該原奏上次稱爲西南隅今又稱偏西另擇善地輾轉影射必欲爲李德順恢復大利不知是何居心查順直諮議局上年致津浦鐵路總局之電文內卽有近有人謀在南開地方設站爲私利不顧主權之語

是諮議局早燭李德順之姦而思有以破之幸路局審查在先不然曠矣原奏又謂總站現定隄頭從楊柳青行繞七十餘里非二年後不能接良王莊等語並以督辦大臣前奏數站並立不免顧此失彼一語爲不知路務之尤謂京奉老龍頭一站爲各國租界交錯之區尙不設站西南隅全係民地與租界毫不相涉歷舉京奉各車站以證其說查津浦總站由新開河繞楊柳青以達良王莊土工均已築成現正趕辦橋工預計本年冬閒即可通車無須俟至二年之久京奉各車站建築之始亦係以次漸進並非同時並舉且當鐵路初辦之初風氣未開復經變亂移步換形未可援爲正則其老龍頭一站當租界孔道以致津郡菁華全被吸取嗣雖設立新站以爲補救然外溢之利已非一時所能挽回京奉已誤於前津浦豈可再誤該原奏於此形勢利害之際毫不加察必

欲積非成是意果何居臣部再查南開地方自洋人漢納根設立大廣公司購地二十頃轉售於曹嘉祥張蔚東所開華興公司之後又有易興公司大業公司達道公司有餘堂三省堂各家先後在彼購地半屬李德順黨徒捏名架買經前署直隸督臣那桐奏明在案地販姦商既不能償其壟斷罔利之心資本虧蝕又不得不多方營謀以圖徼幸津郡商民近來來部呈請設立南開分站者亦實繁有徒聞皆有所指使肆行運動忌憚毫無所陳情節按之該原奏所稱詞意相同乃仍行一再瀆奏斷斷不已不顧國家大局之公益而惟於夥販地皮之姦商場力爭執飾詞聳聽是否受人請託無從懸揣所奏各節既經逐一查明委係失實應請仍照疊次查勘原案在隄頭設立總站一俟落成卽將陳唐莊站裁撤此後南開一帶如果商務漸興再由督辦大臣察核情形酌量

辦理所有查明津浦鐵路勘綫設站緣由理合恭摺據實具陳並
將津浦全路銜接滬甯京奉路綫簡明圖說暨天津津浦總站路
綫圖說各一分恭呈

御覽伏乞

皇上聖鑒訓示

編訂第一次交通統計表暨纂輯四政概略進呈摺

奏爲編訂臣部第一次交通統計表暨纂輯四政沿革概略一律
成書謹分繕六冊進呈

御覽恭摺仰祈

聖鑒事光緒三十三年九月十六日內閣奉

上諭朕欽奉

懿旨本日憲政編查館奏請飭各省設立調查局各部院設立統

計處由該管堂官派定專員照該館所定表式詳細臚列按期咨報以備刊成統計年鑑之用等因欽此欽遵由憲政編查館咨行到部遵於三十四年七月間在署設立統計處遴派員司擬訂該處分科職掌辦事章程併統計表式送館查核於是年十二月二十二日奏明在案竊維統計一事所以挈領提綱能於事理繁曠條目紛糾之中使之釐然不紊臣部專主交通凡營業盛衰運輸消長工程進步之遲速款項出納之盈虛千緒萬端日新月異尤非薈萃列表參觀互勘無以爲考鏡之資茲事體大必須有精明幹練之員專司其事特派臣部丞參上行走四品京堂林炳章總辦一切率同正副各課員遵照館例以光緒三十三年爲創辦之期分類鈎稽縱橫貫串或內稽檔卷擷其精華或外發查填綜其條目隨時稟承臣等示之準則計成總分各表三百九十九件中

屬總務之表凡八閣署之設官行政理財與學悉屬焉船政之表凡五十三各省之官輪商輪航綫沙綫悉詳焉路政之表凡百五十四各路之資本路綫工程里數悉列焉電政之表凡百五十各局之電報電話陸綫海綫悉載焉郵政之表凡三十四各界之收發信件擴充局所悉記焉蓋先羅總表以萃其會歸後繫分表藉知其底蘊而又恐事屬專門雖經類別條分究難尋源竟委特將各項辦理情形有關於交涉財政用人營業者按類撮要編以沿革概略先令各項源流瞭若指掌而後按事尋表卽表徵數旣端緒之可尋俾推行之有準庶於交通前途可期進步而促改良現在第一次統計各表及沿革概略辦理完竣除將原表刷印咨送憲政編查館暨有關交通各衙門局所外謹繕具黃冊進呈御覽嗣後仍當廣續辦理遞年進呈以副

聖主注重交通興利便民之至意所有編訂臣部第一次統計表暨沿革概略緣由理合恭摺具陳伏乞

皇上聖鑒

展設廣東潮嘉電綫摺

奏爲展設廣東潮州至嘉應州各屬電綫派員勘估興修恭摺仰祈

聖鑒事竊查廣東嘉應州轄有四縣爲閩贛往來孔道該處向未通電遇有要務動多濡滯自應展設電綫以利交通飭據電政局總辦候選道周萬鵬稟稱嘉應屬之興甯縣物產甚富松口圩商賈輻輳而鎮平平遠兩縣又與福建汀州江西贛州交界現已派員勘估計由潮州府城經松口圩小河口展設至嘉應州城復由嘉應州城分東西兩路東至小河口經鎮平分設至平遠縣城西

經官塘分設至興甯縣城計應造雙綫五十五里單綫七百九十八里共綫路八百五十三里於嘉應州設一子局興甯鎮平平遠及松口圩等四處各設報房應需木桿電料運費工資并工程器具設局機料暨薪水川資伙食各項統共估計洋銀四萬五千三百五十餘圓並據稱將來可由平遠與贛州接綫於閩粵電務尤有裨益等情繕具清單圖說呈請核辦到部臣等查核所稟勘估各節尙無浮冒除飭熟悉工程人員購備料件樽節辦理所需經費卽在電政局報費內陸續撥用工竣核實報銷外應請飭下兩廣總督轉行經過各該地方官妥爲照料保護以重工程所有展設潮州至嘉應州各屬電綫派員勘估興修情形理合恭摺具陳伏乞

皇上聖鑒

退耕堂政書卷三十一

退耕堂政書卷三十二目錄

奏議三十二

遵查粵路弊混情形摺

商路違章私借外債擅訂合同請飭查禁摺

展設安徽蕪湖至甯國及徽州屯溪電綫摺

派員赴奧肄習郵政片

津浦鐵路與德英兩公司擬議續借款項合同摺

津浦路工過半並預籌進步情形摺

請釐定全國鐵路軌制以昭畫一摺

津浦鐵路淮河橋工告成並南北兩段工程進步情形摺

遵旨會議浦口商埠事宜摺

奏懇收回成命摺

退耕堂政書卷三十二

天津徐世昌

奏議三十二

遵查粵路弊混情形摺

奏爲遵查粵路弊混情形恭摺仰祈

聖鑒事宣統元年十月署兩廣總督袁樹勛奏粵路弊混一摺奉
硃批著郵傳部切實查辦片併發欽此又十一月給事中陳慶桂
奏粵路迭起風潮請飭部整理一摺奉

旨著郵傳部議奏欽此欽遵鈔咨到部遵經奏派候補參議龍建
章等前往澈查在案茲據該員等查覆前來證以臣部舊案謹將
該路實在情形爲我

皇上縷晰陳之袁樹勛原摺內稱總理梁誠月薪二千兩總工程

司鄺孫謀月薪一千二百兩查帳喫緊梁誠輒自晉京又原片內稱梁誠電開黃沙地價藉端掩飾周麟述地價未清各節查月薪多寡由董事會決定似難指爲罪名梁誠充當總理有年於工款地畝漫無稽查固屬疏於綜核惟該員在美助贖全路會著微勞光緒三十三年臣部接准粵督電開董事鄺甘泉股東李十朋等稟稱梁誠爭回贖路功在人心眾商悅服懇令總理路事經部奏准飭遵該員嗣知黨派糾紛辦事孔棘於三十四年及宣統元年閒迭求辭退經前督辦大臣覆電慰留該員仍分電請選總理旋復電稱力疾赴京咨由粵督札派協理代辦總理事務是其去志久決非因避查起意且早經開去差使應請毋庸置議周麟述係購地坐辦於路綫所經絕不履勘購地數目亦不稽考至有停工待地之事購成地畝或以少報多或價未清付而司事陳卓廷侵

吞地價尤爲謬妄周麟述於離差後乘總理去粵補支薪水銀五千兩亦屬濫支均應追罰又原摺內稱粵路每里費銀五萬七千餘兩叔伯塘修復旋傾平石迄未定綫養路費任意支用及鄺孫謀要結金莢胡舜琴利用洋工程司各節查粵路自丙午年開辦起至己酉第五段通車止頭五段百四十五里用銀六百零二萬五千二百餘圓每里勻攤四萬一千三百餘圓核與梁誠電稱每里二萬暨鄺孫謀面稱每里二萬六千或二萬九千圓數目不符實因土方異價及重修橋洞所致而源潭港江十七里之內叔伯塘路基被水重築逾月旋毀該段係聯生公司承攬原可責令賠修乃鄺孫謀謂爲收路在先致難追詰若韶州北抵平石百餘里爲達湘界之路該員迄未往勘致路費無從預籌而養路費與工程司款項同列一單混雜不清均屬措施失當該員係專門學生

出身惟身任總工程司預算未精包工多失以致延工糜款雖其咎不盡在該員究屬未能盡職應卽撤差以示懲儆至胡舜琴測量地畝按圖不符洋工程司諧亞開山造橋工多謬誤金茨遇有稟揭動斥荒謬俱屬非是現諧亞金茨均經離差胡舜琴應卽議罰所有丈量事務卽飭購地委員兼辦以節糜費又原摺內稱公司帳目紛紜收支不定圓毫相混存放無息圓水錯誤存款漏記及原片內稱二期股銀虛收八十餘萬各節查該公司各帳銀錢歸收支所管理工程歸支應處管理餘歸公司帳房管理出入既非一處簿據更極參差弊混易滋良由於此其戊申年結舊存大圓九十六萬有零刊冊未注大圓惟仍將水銀登帳列作進款尙非乾沒其暫借簿內丙午至己酉存放之款計五十二萬餘圓確係不計息銀而新泰厚圓水係收支所戊申十月支帳查出後認

爲誤支收回又匯豐萬國兩銀行已經展借之款既誤爲已還渣打銀行連同息銀加借之款復忘記補入另有萬國銀行一款亦由該行聲明錯誤雖經前查帳員赴號核對符合究屬疏忽至二期股銀一項查粵路向章無論何處收股均交善堂核收給票轉交公司入帳故凡重收之款不得不再行列支茲所支代滬分局交各善堂銀三十八萬六千餘兩及所支各善堂收條未對數銀十三萬八千餘兩例應列支尙非舛誤其所支佛滬港未匯到銀三十三萬二千兩一項僅憑函報收帳係因開收股款故作虛數以爲招徠起見亦無他弊金葵周麟述梁玉堂郭道三等收股遲交查無圖利確證郭道三借用公司款項認有利息均毋庸議惟查收支所總管杜榮光與港店廣萬祥虛存路款鉅萬坐耗息項存揭各款宕誤滋謬而且溢支單水圓水幾及萬圓均應分別追

罰又原摺內稱梁財朱商賢串造僞單領銀周辛源等未能覺察
朱琴叔重支價銀朱培林虧去公款衛章甫等亦有虧空各節查
梁財卽盧譽結伊弟盧譽錦由工程帳房朱商賢串造生利號單
冒領二千四百餘圓先後朋分雖朱商賢款由伊叔繳還仍應從
重議罰盧譽結盧譽錦應照例議結周辛垣等查無串弊情事然
黃兆之旣管工程總帳未能詳核月報又工程正支應員尤輝廷
未能細審圖章致得肆意姦騙周辛垣亦復帳目紊亂均屬有負
責任應飭罰薪而許才之總管貨倉短欠極鉅應罰令賠償朱琴
叔卽朱崇德曾充公司繙譯其改譯洋廠名目爲聖德勃爲閑倫
爲閑色格爲山博業經重支入己舉發後雖由該員及其家屬先
後繳還仍應嚴行議罰朱培林充頭段支應員告退時截存銀萬
餘兩陸續繳清當時是否逃去無從究詰查支應簿內衛章甫黃

際唐沈伯銘欠款自千餘兩至二百圓不等鄺君質雖無欠項然
曾有勒扣情事應卽撤差而衛章甫且曾剋扣石子瓦筒鉅價勒
索酬謝此外如陳賡平侵吞馬價李耀祥冒領石價梁麗文黃詠
道虧欠私逃均應罰追又陳慶桂原摺內稱議權應嚴限制選票
應定雙舉大股東宜加保全並粵路應專責勸業道辦理及裁撤
督辦分局各節查會場人眾滋擾誠如原奏所慮本年臣部會商
粵督訂章以百股爲一權千股以上遞減不及一權者准其聯合
並仿各國投函之例准股東填票封存屆期監拆四月間該路開
選照此辦法安靜異常其二期股銀未交者已聲明不許與選惟
決議權以千股或二千股爲額須再酌定票選之法本極公允一
票一舉與一票雙舉初無大異但近人鮮顧公益往往期前有租
票串舉之弊現在改章無論總協理董事經股東票舉後鈔取前

列二十名送部分別奏委不以票數多寡爲定所謂一舉雙舉更屬無關得失惟此章係暫因股東彼此攻擊而設下屆仍須再爲酌奪蓋粵路公司有四大股東會者係千股以上之股東組織而成有共濟會者係萃合眾小股東組織而成兩會之中其出預路事者不過數人而公司實爲共濟會所攻擊其始未嘗非因維持起見久之彼此積成意氣轆轤實從此而生現在大股東張少棠蕭禮堂郭道三等擬更組織一股東會無分大小俾免畛域至監督職權極關重要勸業道既兼管農工商及交通各項責令專理粵路自屬爲難應特設監督一員常川親到公司並會同勸業道隨時查察方昭妥慎其原設督辦駐粵分局或酌予裁撤或量改監督事關全局應歸另案辦理又原摺內稱黃景棠初次得協理把持公司經前督臣岑春煊責令辭退又串改選票被選與李煜

蔡等狼狽爲姦未遂告退復聯絡共濟會希圖被選一節查前協理黃景棠第二次被選係上海股東代表譚吉堂所舉其票原寫李煜棻名改爲黃景棠謂其私串不爲無因李煜棻李戒欺是否串通黃景棠狼狽爲姦查無確證惟羅少翹與黃景棠夥開報館破壞路事實屬有據黃景棠旣爲紳界不齒應永遠不許復任粵路職務以後如仍查有播弄情事再由臣部嚴行糾參李煜棻充當行車坐辦信任總管陳竹泉於工程濫發免票迭經呈訐應併議罰此外如書記歐陽詩頌串通報館漏洩公事播弄風潮殊屬不合羅少翹歐陽詩頌應交地方官嚴加管束隨時察看以上議罰各員朱商賢朱崇德杜榮光許才之周麟述衛章甫李耀祥等侵虧勒扣情罪較重應由部咨行該省地方官查取有無職官先行革斥立予罰追以儆效尤其餘除黃景棠應永遠不許復任路

務外所有胡舜琴陳卓廷黃際唐沈伯銘鄺君質陳賡平梁麗文黃詠道羅少翹歐陽詩頌陳竹泉黃兆之尤輝廷周景恆各員名或應罰追或應罰薪或應撤差或應管束均卽分別辦理俾示薄懲惟粵路要害祇在黨派之紛爭黨見不消無論總理何人終不免因調停而生混淆致釀員役從中舞弄之弊欲救其失惟有由部實行監督並責令新任總協理於歸併處所裁減員薪各事切實施行庶款項工程易昭核實而該路全局可以日有起色所有遵查粵路弊混各緣由是否有當謹恭摺具陳伏乞
皇上聖鑒訓示

商路違章私借外債擅訂合同請飭查禁摺

奏爲商路違章私借外債擅訂合同請
飭迅速查禁以維路政恭摺仰祈

聖鑒事竊維鐵路一事上繫

朝權下關民業故自幹綫暨枝綫之涉及國防者應由國家籌建
其他枝綫若純係商人營業之爲按諸各國路例亦有准以商股
承辦之條惟商辦宗旨原藉商力之有餘以輔國力之不足股本
純資商業卽地方公款亦無牽入之理其不得擅借外款可知國
家經始路政於郵傳部未立以前疊由各省呈請商部奏設公司
集股籌辦訂定章程極嚴極備其大要規定按期激股依限程工
不得以絲毫外股外款屢入致失保護主權提倡商業之本意上
年潮汕路款牽涉日股在內由臣部派員澈查迅卽責令追股幸
未別生事端乃近聞蘇路公司以股本未齊又有私向外國銀行
借款情事且聞其所擅訂之約於抵押購料各節尤多損失查該
路於光緒三十二年經商部奏設公司擬具章程由部核准批飭

遵行其章程內本載有專集華股凡非中國人資本一概不收等語揆之商辦路例尙屬相符何以此次忽有僭越之舉臣部會據該省旅京股紳函請行查迄今未據公司呈報其敢於執持之故未必不以商借商還與公家無涉爲辭不知路政爲附土權純係國有與他項貿易營業由商自主者事例絕不相侔倘擅收外款一經失敗仍必浸成交涉貽害國家臣部職任攸關不敢膜視應請

旨飭下兩江總督江蘇巡撫迅速查禁以免將來輻輳實於路政有裨所有訪聞蘇路私借外債請飭查禁緣由謹恭摺具陳伏乞

皇上聖鑒訓示

展設安徽蕪湖至甯國府及徽州屯溪電綫摺

奏爲展設安徽蕪湖至甯國府及徽州屯溪電綫派員勘估興修
恭摺仰祈

聖鑒事竊臣部推廣各省電綫所有安徽省之潁州亳州太湖六安等處業已陸續添設先後奏陳在案上年冬間准安徽巡撫朱家寶咨稱甯國府及徽州之屯溪商務均稱繁盛向未設立電報消息難通據諮議局呈明推廣電綫議案飭據勸業道查明甯國徽州物產殷富屯溪尤爲商務薈萃之區請分籌展設以利交通至設綫經費仍照潁亳成案部省各半攤認等因當經臣部札飭電政局總辦候選道周萬鵬派員前往詳細勘估茲據稟稱查由蕪湖展至甯國府以達徽州之屯溪共綫路四百八十里於甯國府設一子局屯溪暫設報房應需木桿綫料運費工資并工程器具設局機料暨薪水川資伙食各項統共估洋二萬八千五百五

圓九角六分二釐繕具清單圖說並請核辦到部臣等查核所稟
勘估各節尙無浮冒除飭熟悉工程人員購備料件樽節辦理所
需經費咨行安徽巡撫將應攤一半經費先行撥解以資應用外
餘款由電政局報費內撥用工竣核實報銷至工程開辦之時應
由安徽巡撫轉行經過各該地方官妥爲照料保護以重工程恭
候

命下由臣部分咨遵照辦理所有展設蕪湖至甯國府及徽州屯
溪電綫派員勘估興修情形理合恭摺具陳伏乞

皇上聖鑒訓示

派員赴奧肄習郵政片

再查奧國郵政及郵便儲金規制精詳寰球推重上年冬間由臣
部咨行出使奧國大臣雷補同商允奧外部招待學生入局練習

郵政及郵便儲金俾資應用並准該大臣咨稱此項學生以能通
德文者易於教授旋由臣部考選德文譯學館畢業生分省補用
知縣馮農陸軍部主事龍紘慈內閣中書謝世瑾民政部七品小
京官陳履祥農工商部七品小京官陳廷驥霍澍霖福建高等學
堂預科畢業生鄭義琛大學堂預科畢業生分省補用通判李景
言陸軍部筆帖式孟錫祉福州鶴齡書院畢業生林文瀚南洋方
言學堂肄業生沈承需等十一名法文生譯學館畢業大理院七
品小京官陳伯年福建高等學堂預科畢業生余翔麟漢口法文
書院畢業生錢春祺京師法文學堂畢業生魯彥本等四名另有
唐文啟唐榮漢黃國俊三名向在德國留學劉世尊一名向在法
國留學均令就近赴奧聽講並以英國財政學堂畢業生保用知
縣徐秀鈞派充學長業於四月間帶同該生等前往現在已抵奧

京一同肄習共二十名除來往川資及治裝各費外全年學費約合銀三萬一千兩該款在各路餘利項下湊撥開支預定二年畢業回國後歸部酌用其已有職官之各該生應請援照定章准予免扣資俸恭候。

命下由臣部分咨各衙門欽遵辦理所有派員赴奧肄習郵政緣由理合附片具陳伏乞

聖鑒

津浦鐵路與德英兩公司擬議續借款項合同摺

奏爲津浦鐵路續借洋款與德英兩公司擬議合同恭摺具陳仰祈

聖鑒事竊查原訂津浦鐵路借款合同第十五款內載設若建造鐵路時借款進項並生發之利息除付借款利息外不敷修造鐵

路以及裝配所需其不敷之數先由中國款項提付以免延誤建造工程如仍有不敷之數則向銀行續借洋款其利息並條款仍照現時之合同辦理各等語現在路款不敷計北段應借虛數英金三百三十萬鎊南段應借虛數英金一百五十萬鎊共英金四百八十萬鎊業經另行奏陳此項續借洋款既經聲明仍按原合同辦理自應循案照辦惟查原借款合同按年應還本息附表載明自第十一年還本之日起每年還本二次其應還之息仍按每年還本總數全年計算並未將上半年已還之本減去利息當向英德兩公司聲明以上半年已還之本斷無下半年仍行納息之理再四磋商終以原借款合同附表早經簽定未能更改此次續借款合同附表應按照債票所載每年付息二次還本一次俾免虧蝕利息又查原合同第九款所指作保之直隸等省釐稅每年關平

銀三百八十萬兩係按應還本息最多之年數目指定確數惟借款期內除第十一年外均不及此數所有指定作保銀兩應按每年應還本息之數核實計算所有餘款作爲二次抵押但餘款不敷續借應行抵押之用且續借第十一年還本之時亦無原借抵押餘款經臣等商明度支部另向直隸山東江蘇安徽等省指定虛抵作保之款計續借應還本息最多之年每年共三百六十萬兩最少之年除原借抵押餘款外每年祇十二萬兩惟數目複雜祇能在合同內聲明頭次抵押餘款作爲二次抵押至續借最多之年另補抵押等語以歸簡易並備用每年字樣以免購票人或
有疑慮仍由該公司另行備函列表聲明所有原借款並續借款按照最多之年數目逐年所餘之款聽憑中國作爲別項抵押之用於合同簽字時送交備案以爲憑信所有該公司所開餘款除

督撫查照所有擬議津浦鐵路續借款合同緣由謹恭摺具陳伏
乞

皇上聖鑒訓示

津浦路工過半並預籌進步情形摺

奏爲恭報津浦鐵路工程過半並預籌進步情形恭摺具陳仰祈
聖鑒事竊津浦全路約長二千一百七十里北段自天津至嶧縣
約長一千三百餘里南段自浦口至嶧縣約長七百餘里原定合
同限以四年告竣自光緒三十四年六月開工至本年十二月計
已二年有半初開辦時因事牽掣稍延時期嗣經臣等督飭在事
各員認真興築本年八月間北段行車通至德州南段行車通至
滁州曾經奏明在案茲據南北兩段稟報前來所有已成之路及
已辦之工按全路規畫情形統計實已過半請爲我

皇上分晰陳之北段工程共分十段每段約一百三四十里不等首段起於天津上年八月間奏明在隄頭地方修築總站隄頭至楊柳青以北河橋工爲最鉅先鋪軌道本年十月橋工告成十一月與京奉合軌是爲北段首站至原定第一段至第四段係由陳唐莊起至德州止此四段工程已於本年三月試行料車搭客運貨至八月間所有未完各工亦均修竣第五段由德州起至黃河北岸止經淤黃河及馬頰徒駭莽牛諸河橋梁較多而禹城以南平沙瀰漫磚石缺少又值本年夏漲暴發馬頰河便橋冲毀運料維艱當飭將黃河北岸險要各工暫用便橋便道以利進行九月直達濟南十月行駛客車其應行建築之正路工程仍以次補修限明年夏間一律告竣第六段由黃河南岸起至泰安府止山徑崎嶇開築匪易經飭加工趕辦至十一月軌道橋河石工先後報

竣試行料車尙屬穩固卽於十二月售票搭客增收進款第七第八兩段由泰安府起至兗州之鄒縣止迭以繞避曲阜及改修濟甯路綫懸議年餘開工較後泰安以南之泮河汶河泗河各橋工未易建造而汶泗兩橋尤爲艱鉅現在橋梁材料先已訂購土工石工分投舉辦地畝業經購齊電報業已通達仍嚴促興修不令稍有延滯第九第十兩段由鄒縣以南起至嶧縣利國驛止該兩段居北段之末道里較短已飭併爲一段於德州通車後卽將前四段之工程司擇其得力者調往開辦七八月閒趁運河水漲之時將應用材料先由水道分運濟甯韓莊免得冬令河凍陸運遲緩多所糜費又黃河橋爲北段最鉅工程建造辦法迭次更變現照第三圖施工計全橋分十二孔其中洪最鉅之孔長一百六十六米達約營造尺五十丈本年初汛業將兩岸橋臺及第五至第十

一各橋墩基一律築成其第一第三第四各橋墩業已打樁直達河底第二墩工程尤險現值冰汎嚴寒凌隨溜落衝撞木架氣櫃少側一俟春融冰解倘氣櫃無甚妨礙依次加工當能如期告竣此北段工程情形也南段分三總段每段計長二百三四十里不等第一段由浦口起至明光止現由第一段至第二段之臨淮關土工軌道以及開山橋工均已報竣間有無礙行車之未完工程隨時陸續修補飭令於年內試行料車搭客運貨以期早收進款仍嚴飭工程司隨時照料並培修沿途路基以防危險第二段由明光起至宿州止除自明光至臨淮關業已通車外其臨淮以北之蚌埠固鎮兩處工程已及八成惟淝河淮河之間以夏秋水災至今尙未蕺事查水勢暴漲時湧出路面極高之處約四五尺現在固鎮宿州已成之工仍須加高一尺至五尺不等所有已鋪之

鋼軌枕木均應撬起下實以土俾日後可無淹沒之虞惟橋基加
高工程較難措手業飭在事人員妥慎經理仍嚴行勒限毋任延
緩第三段由宿州起至利國驛止其由宿州至徐州之一百三十
餘里土工業經告成鋪軌過半其由徐州至利國驛之七十餘里
土工甫及七成因積水尙多未能一律修築該處爲南路未段施
工稍後且地勢較坦無須提前趕造至於淮河鐵橋工程之鉅亦
幾與北段黃河橋相埒該橋共分九孔每孔寬二百尺前以紳民
爭建活橋諸多險礙且需款較鉅現仍建築呆橋計南岸橋臺及
第一第三第七第八各橋墩已經築竣第二橋墩正築地基第四
橋墩現用氣櫃將達石底第五橋墩水內地基已經築成第六橋
墩氣櫃尙欠丈餘未至石底北岸橋臺尙欠二成南北兩端之第
一孔均已釘架橋梁全橋工作實逾六七飭趁明年夏令以前水

勢較緩加工趕築以期早日觀成此南段工程情形也綜核全路已經行車路綫由天津至泰安共德里四百一十啟羅邁當計長八百二十里加以陳唐莊至良王莊運邁共德里二十四啟羅邁當計長四十八里由浦口至臨淮關共英里九十邁爾計長二百七十里統計一千一百三十八里岔道運道皆不在內已成路綫實已過半未成之路僅一千零三十餘里北段之七八九十各段經飭剋期催趕預計泰安以南來年春閒火車當達大汶口泮河橋工亦可同時告成自兗州至利國驛預擬南段車路約在明年冬閒可抵韓莊均飭令兼營並進不得有誤接軌時期惟泗河汶河兩橋水勢無定積沙亦深橋度雖較黃河爲短而修築同一費手已飭格外加工建築以冀南北接軌後可以暢行無阻又黃河橋工本年與橋梁公司訂明以西一千九百十二年六月修成卽

按合同四年告竣之期現經昕夕兼營所有已成工程尙爲堅穩明歲伏汛苟非暴漲當可於限期內全行竣事其全段之橋梁涵洞電報等工已成者十得六七車站房屋緊要各站已飭從速修蓋凡有可以稍緩之處應隨時酌量情形以次辦理此預籌北段明年工程進步之時期也至南段由臨淮至蚌埠四十五里現以龍子河地方雨水浸灌土性鬆浮隨築隨陷尙未修成勒限於年內報竣蚌埠至固鎮七十五里淝淮間之未完工程迭經飭催限於明正竣事固鎮至宿州八十餘里現正培高路基約計年內料車當可通行由宿州至利國驛已成土方約十之七八惟大小橋梁三十三處尙未施工一律飭催務於明年冬間全段通車直接北段淮河橋梁就現在已成各工預計當在明年夏季報竣其全段之橋梁涵洞亦已十得六七電報工程早於本年六月蒞事車

站房屋亦飭仿照北段辦法陸續舉辦此預籌南段明年工程進步之時期也又查南北兩段辦公洋員多駐鄉僻處所距城市較遠近年以來水災迭見饑民麇聚盜賊漸多迭經電商該管督撫派兵保護而本年三月德工程司閻龍在小寨子地方被盜搶劫驚嚇致病要求恤賞尙未議結以致各段洋員咸有戒心不敢前往工次恐誤路工兼啟交涉臣等現飭南北兩段仿各路成案自行招募馬步巡警照料工程以資防護至北段自三月行駛客車按月比較道里漸長進款漸旺計至年底約及三十萬圓明正南段行車所得進款亦必日增月盛若能照所擬明冬南北接軌之期裝運客貨可早得半年進款即可少受半年損失及時計畫蓋有不容稍緩者况正續借款資本較重臣等接辦以前大局已定無可更變兼值積弊之後極力釐剔補救已遲惟有切實撙節路

工則求其堅固房屋則無專鋪張工款則嚴切稽考購料則務求核實工員有不得力者卽隨時撤換每修竣工程一段卽隨時酌汰員役洋員合同期滿後工程稍減亦卽以次遣撤務於借款有所節省卽可稍輕外債之擔負規畫必期諸久遠稽覈不厭其精詳以期仰副

朝廷慎重路工實事求是之至意此尤臣等惓惓於心而不敢稍有疏忽者也所有津浦鐵路工程過半並預籌進步情形緣由理合恭摺具陳伏乞

皇上聖鑒

請釐定全國鐵路軌制以昭畫一摺

奏爲鐵路推行日廣擬請釐定全國軌制以昭畫一恭摺仰祈聖鑒事竊維肇域之基功昭同軌置郵之法事起傳車以鐵路代

驛道而興他軌制不克整齊卽車制終多扞格政關統一實非細故當我國初路之初原係借款興築其制各依所借款國之工程師而定迄未著有通章以是津榆則制取於英蘆漢則制取於法治至續建之正太汴洛株萍道清滬甯京張及現建之廣九吉長張綏津浦粵漢川漢等路所有軌式軌量靡不互相參差卽驗收鋼軌章程亦復淆雜紛歧莫衷一是長此不予釐正將來各省路線接通必有此路車輛不能駛於彼路軌轍者爲行軍起見徵調固慮不靈卽爲通商設謀運輸亦虞多阻與其日後改正必至鉅款虛糜不如及早圖維猶足收無形之益查現在各路定造之軌有英式者有美式者有法武者其重量則有六十鎊至八十五鎊或二十八啟羅至四十一啟羅不等惟川漢預定軌式及京奉滬甯津浦南段同用英國軌式每碼大半八十五鎊所差無幾均經

英國工程會審慎核定尤以川漢預定之式爲最適宜至製軌之鋼西國通行原有貝色麻多麻馬丁三種論價則貝多賤而馬丁貴論質則馬丁純而貝多脆近年各國新廠用品早舍貝多兩種專用馬丁而我國尙沿襲西人舊製指索貝色麻鋼者誠大誤也現在漢陽鐵廠不惜工本已將鍊鋼爐悉改馬丁出數亦十倍於昔俾得供應各路所求以保全本國利權而塞絕大漏卮以上各端經臣部飭令漢陽鐵廠總辦李維格切實具覆並據呈送各種圖樣前來復經臣等督同部員及中外各工程司逐細研究灼見情形如此茲值奉

詔明定鐵路政策之際擬請將幹枝各軌均按照川漢所訂之英式爲定式而鋼質皆取馬丁不得紛歧攙雜重量則幹軌定爲八十五磅枝軌定爲七十五磅其岔軌及附屬如魚尾片狗頭釘螺

絲拴等件各視其軌式軌量爲率凡從前各路軌制擬於將來修理之際逐漸改歸一律俟奉

諭旨卽由臣部頒發圖式分別通行庶幾九道同塵允就馳驅之範萬方合轍益宏坦蕩之規除車制歸入路律廠務編入驗軌章程俟規訂完全再行奏定外所有擬請釐定全國鐵路軌制以昭劃一緣由謹恭摺具陳伏乞

皇上聖鑒訓示

津浦鐵路淮河橋工告成並南北兩段工程進步情形摺

奏爲恭報津浦鐵路南段淮河橋工告成並南北兩段工程進步情形恭摺具陳仰祈

聖鑒事竊維鐵路工程橋梁爲鉅津浦全路橋工除北段黃河之外則以南段淮河爲最著查淮河水底多係泥沙惟蚌埠係屬石

底經前督辦臣飭在該處建橋以期鞏固嗣以地方紳商恐建橋有礙航路呈請建築活橋復經臣等派員偕同該紳商等實地履勘詳細考查終以活橋危險諸多窒礙決議仍建呆橋另於上下游修築船塢並安設拔桅起重機器以便舟楫往來之用於宣統元年十月開會同兩江督臣安徽撫臣奏明在案隨即以是年十二月興工至本年四月十六日計十有六月全橋一律告成除南北兩岸橋翅不計外橋身計長一千八百七十六英尺中列九孔每孔各長二百英尺分築橋墩八座墩頂各厚九英尺半墩之東西兩側面作半圓形以分水勢每墩由頂向下高度自五十五英尺至一百十尺不等均各深至河底石面基礎極爲穩固各墩均以硬質水泥製成以花崗石爲頂亦均堅實耐久原估工款約需洋銀一百一十萬圓左右經飭華洋各員於工堅料實之中仍復

力求撙節俾免虛糜現計全橋工料各費較原估數目約可節省十餘萬圓尙屬核實告成之後飭由該局總辦率同總工程司乘車往來驗試砥平穩固完善異常上游船塢業經修竣下游並無風浪之險暫緩動工拔桅起重機兩具亦經安置妥貼派員會同官紳用船試驗往來無礙均稱便利此淮河橋工一切詳細情形也至南北兩段路工上年十二月已將工程過半並預籌進步情形奏報在案本年正月以來南段工程自車通臨淮關後由臨淮關至徐州一段預計淮河橋工告成之期趕速築路鋪軌期於橋成後即可行車嗣以雨水時行稍有阻滯現於本年六月一律通行自浦口以達徐州計長六百餘里運料行車尙無阻礙惟新建路基須隨時加以培墊方能堅穩約計秋初當可搭售客票以裕進款全段土工均已完竣填築石渣亦經及半開山石工已成十

之八九本年七月間約可全行蒞事橋梁涵洞原定共五百一十餘孔合英尺一萬八千五百餘尺因固鎮至宿州一帶地勢低下易遭水患特就向來澳水之處加添一百十九孔合英尺一千九百餘尺此係爲保衛地方起見工費不免稍增現計固鎮以南橋梁涵洞均已落成固鎮至徐州以北橋梁建造已有五成若無雨水愆期預計八月間亦當報竣再全段車站計浦鎮至蚌埠共十五處已完工者十三處由蚌埠至徐州車站共十一處現已次第加工趕造俾與路工同時進行惟浦口一站爲本路南端總匯之所濱臨大江南接滬甯實占水陸交通最勝之形勢路成以後出入商貨咸以此爲集散之場地本荒洲處於窪下所有本路車站廠房碼頭岔道應用地畝須加填築先經臣等飭於沿江一帶陸續圈定四百丈以爲布置一切之需將來是否敷用尙難預定查

此項地畝本係金陵商埠局官地嗣以該處紳商籌辦市場任意居奇不願照章領價據南局稟稱始則每畝索價萬金繼復議抵公債臣等以國家幹路應用地畝厯辦有案未便遷就當經咨明兩江督臣飭令勸業道分別曉諭鐵路圈用地畝不得列入抵押公債之內以杜軫轆並飭經辦人員剴切勸導一面將已圈地畝迅速填築免誤要工復查該處車站於交通營業關係極大不得不預爲規畫此項鐵路需用地畝僅爲敷設車站之用自應按照各路定章辦理將來如有不敷仍應儘由國家照章佔用應俟南局與該處官紳商辦後再行隨時奏明辦理又查北段工程自上年通車泰安後經飭加緊趕辦努力進行惟泰安山路崎嶇施工不易現由泰安至曲阜業已通車約一百三十里由曲阜至兗州約三十餘里預計鋪軌墊路約本月中告竣至全段土方除滕縣

以北路基一律告成外祇餘滕縣至韓莊一段計一百十里業經加工趕造橋梁涵洞黃河以北均已完竣惟黃河橋梁爲全路第一鉅工計墩基泥水各工已成十分之七橋梁鐵工已成十分之二預定竣工限內如無意外險阻可望蒞事其濟南以南較大之橋如泮河大汶河兩處均於六月初間修竣泗河橋現正修築墩基成功當在十月此外應設橋梁所餘無幾其建築需時者仍先設便道以濟目前轉運料物免誤南北通軌之期又滕縣至韓莊段內橋梁涵洞已造成者計一百六十座未完者尙有三座內惟運河橋爲將來銜接南段要道橋墩築成鐵架運到預計竣工需時有限至全段車站房屋濟南以北均已造成各該站建設規模在宣統元年六月以前早經規定臣等接辦後經飭於濟南以南一律改換形式祇求堅樸適用藉節工款惟北段天津總站爲全

路起點要區自上年與京奉合站後所有機車廠房轉盤水塔等項要工現已過半而擴充西站吸收客貨與津郡市場及全路營業最有關係亟應加意籌辦該站應行圈用地畝開通馬路添修臨河岔道均關緊要業飭分別妥籌認真舉辦以爲全路營業發達之基礎以上南北兩段工程進步情形綜計南段路長六百六十餘里現通車者已六百里約居全段十分之九北段路長一千三百餘里現通車者九百餘里約居全段十分之七倘次第進行別無阻滯約計年內外南北兩段可以一律通車按照原定四年工期不至逾限堪以上紓

宸厯臣等仍當督飭在事員司始終奮勉將未完各工切實趕辦並以本路負擔極重尤應格外節省以輕成本至於全路現辦情形行車節節增進已由工程時期漸入營業時期應行籌辦各端

又不專在工程一事業飭預籌養路車務一切用人行政事宜務期詳備以裨路務總期程功愈速進款日增藉以仰副

朝廷注重路工實事求是之至意所有津浦鐵路淮河橋工告成並工程進步情形各緣由理合恭摺具陳伏乞

皇上聖鑒

遵 旨會議浦口商埠事宜摺

奏爲遵

旨會議浦口商埠事宜恭摺覆陳仰祈

聖鑒事本年六月初十日兩江總督張人駿奏浦口商埠宜區別通商口岸擬就市場局擴充辦理並懇准募公債一摺奉

硃批內閣會議具奏欽此原奏稱浦口地方爲津浦鐵路南段車站起點三月間准外務部咨准英使朱邇典照稱津浦鐵路明年

可成似已屆設法籌備浦口開設通商口岸之時諄勸貴政府將此事酌核並將開爲通商口岸之意早日宣布等語咨行查照核復等因伏念津浦路成以後浦口縮轂中原控扼天塹關於商事猶小關於軍事至重該地距南岸下關僅隔一水下關商業尙未盛興若再將浦口開放恐礙及下關商業而國防主權患更有伏於無形者飭由司道會商士紳詳細討論僉謂開闢商埠顧慮孔多不如就浦口市場局擴充推廣隨商同在籍翰林院侍讀學士黃思永等酌擬辦法四端一興辦市場公債應請官爲募集將來由市場分期償還一清查業戶洲地浦口公家財產僅有地畝一項亟待抵押公債應趕爲核實清查一規定官紳權限市場除仿地方自治辦法而行政一方面應請官爲監督一規定市場地段照從前規畫商埠成案按冊列原數指定地段以便經營並擬具

募債章程經司道等核明該市場局創辦輪渡修造駁岸已節節
進行現議放手擴充豫籌大宗款項尤以募集公債爲入手不易
辦法一二年內市場規模粗備商旅聞風而至洋商載客運貨可
援續議內港行輪修改章程附件所載租賃碼頭棧房之例辦理
際此治外法權尙未收回長江腹地無取多開口岸此項公債出
於士紳請募爲振興商業之用與定章亦尙相符等語臣等查該
督原奏以浦口介居內地不主開放但就已有之市場局擴充而
以地畝抵借公債爲著手其宗旨係爲防流弊保主權起見未始
非老成持重之心惟事關全局者宜合通盤以籌計而不可徒圍
一隅道在因時者須隨大勢爲變通而不必自封故步就常情論
通商口岸宜於沿海沿邊而不宜於腹地自是對外一定之方針
然如浦口之扼水陸要衝握南北樞紐軌道旣達商務日繁其情

勢似又當別論浦口爲津浦路站南段起點該路延袤二千餘里其出海口岸北有天津中有青島南則浦口天津尙限於北河之封凍青島尙多一膠濟之運費地勢商情均不如浦口之占勝利將來數省貨物轉徙出入咸以此爲集散之區若無絕大商埠必不足以資容納况該路係借款興築工費浩繁若不預置商場爲懋遷計將商業滯路利薄債款無所取償非但有害鐵路營業且影響及於國家財政大局所繫詎等細微夫開放所以顧慮者慮事權或歸外人掌握耳不知自開商埠究非約開口岸之比果使詳定規則政自我操俾洋商悉就範圍卽主權奚虞侵損英使之請開放不過意存敦勸原聽我自爲宣布然可見外人視綫已集於此正宜急起自圖及時布置不但有裨路利商業並可豫杜外人要求至軍事之轉輸其關係在路權不在埠政商埠之性質原

與國防無涉既非關爲軍港自不妨互市通商且長江流域早已
開通更何必於浦口獨守閉關主義若謂有礙下關商業不知金
陵一關出口貨少下關形勝又遜浦口浦口經理得宜則浸灌挹
注下關或因以振興否則壅遏蔽塞下關愈難於發達此其事理
至明固皆無庸深慮卻顧者也今該督不主開放擬就市場局擴
充推廣亦尙不失逐漸進行之義應請照准但不必預定與通商
口岸有如何之區別以便將來揆度時宜仍可相機操縱惟是擴
充市場實卽隱爲商埠立之基礎一切部署事體繁鉅非僅地方
自治之力所能賅舉必應由官家綜攬先爲之劃分區域審定界
址何處宜設行棧何處宜築碼頭何處宜置稅關局所以及疏通
沿江之水利航綫闢治全境之道路市廛與其他種種工程建造
之事業靡不精心擘畫毅力經營乃能籌計無遺措施悉當而商

場內之衛生警察審判等事尤爲國家重要權責所寄更應官爲主政而非紳民所可越俎誠能準此辦理市場日臻蕃盛地方立見勃興然後可以言開放亦可以不開放其有洋商願受屢營業者不妨與定專章俾資遵守或卽如原奏所援內港行輪續章允准租賃碼頭棧房之例亦尙不虞滋弊其請募公債與部議興辦實業準備公債成案相符應准由官經理並令先將章程咨送部核至該處瀕江地畝曾經津浦鐵路采用路係國所有地爲路所需按照各國通例自應先儘國用現除已經采用之地此項地畝應照鐵路定章價購以足敷布置爲度均不得列於抵押公債之內將來鐵路如推廣用地並應仍儘照章價購以重公用抑臣等尙有言者浦口僻居江北本係荒洲輪軌交馳遂占形勝今雖未遑遠略僅議整頓市場而所爲度地居民興商訓工殖貨阜財悅

近來遠之道與夫募債用款昭信核實之方亦必賴任用經理之得人而非徒考訂規章所能奏績應請

敕下兩江督臣督飭所屬官吏認真興辦刻程期以促進行嚴賞罰以資懲勸總期事有實效帑無虛糜庶化行自近而遠來取法治修於內而外杜覬覦其有裨大局亦非淺鮮所有臣等遵旨會議緣由是否有當理合恭摺覆陳伏乞

皇上聖鑒訓示

奏懇收回 成命摺

奏爲國務重要實難勝任瀝情懇辭伏望

恩准恭摺仰祈

聖鑒事本月初十日內閣奉

硃諭慶親王奕劻著授爲內閣總理大臣大學士那桐徐世昌均

著授爲內閣協理大臣欽此跪聆之下惶悚莫名伏念
先朝明詔預備立憲我

皇上纘承繼述於宣統五年開設議院先期設立內閣定章試辦
而

命臣爲內閣協理大臣夫以中國數千年積習相仍之政治一旦
振厲奮迅欲有所發明而變更之其艱難困苦不知經幾許周折
始能仰副

聖明大同之治又况列強環伺庶政待興以

朝廷倚畀之重人民責望之殷時會之艱危機局之緊迫迭起循
生間不容髮而以微臣衰病孱弱之軀濫厠創始政樞之列悚惕
徬徨罔知所措竊恐無以弭憂患於目前而贊助
盛治於無窮也臣受

正書卷三十二
三三
恩深重不敢不據實陳請伏祈

俯鑒愚忱准辭內閣協理大臣差使另

簡賢能以肩重任倘以臣歷官中外粗有閱歷惟冀備位閒曹仰承

顧問如有尺寸可效自當殫竭駑庸日圖報稱尤願我

皇上破除常格擢用扶危濟變之才以收轉弱爲強之效不勝迫切屏營之至所有微臣難勝重要瀝情懇辭緣由謹繕摺具陳伏乞

皇上聖鑒

退耕堂政書卷三十二

退耕堂政書卷三十三目錄

說帖

經營東三省說帖

條議

上政府條議

東三省要政辦法條議

退耕堂政書卷三十三

天津徐世昌

說帖 條議

經營東三省說帖

東三省自遼金元明以來爲用兵必爭之地至

國朝龍興東土撫綏蒙古征服朝鮮之後勢雄力厚然後定鼎中原故東三省一隅之得失實關係於中原大陸之存亡此固歷史上已往之明鑒也近年以來中日甲午之役其後俄人仗策南下東三省首當其衝至日俄之戰東三省受禍尤烈邇者東三省領土之主權名雖暫歸實猶未至日俄二國雖亦訂立協約然其軍事上之經營實屬不遺餘力俄人現築黑龍江沿江鐵路以達於海參崴東清鐵路復欲加築雙軌且於黑龍江省沿邊之移民設

屯極力措置日人現正改築安奉鐵路由東京運兵以至奉天七日可達交通之利實可駭怖今又欲要求修造會甯至吉林軍用鐵路以爲包圍吉林南部之舉然則俄人不肯以一敗之故遽輟其經營遠東之壯圖日人以區區三島雖獲有朝鮮尙欲以東三省爲國力擴張之餘地固有識者所共知也則日俄一有戰禍必以東三省爲將來之戰場而日俄二國無論何國與中國啟釁東三省必首受其禍更無論矣東三省不保附近蒙古卽隨之而亡屏蔽盡失而關內無安枕之日矣今欲保全東三省之境土維持亞東之平和固當視國力之強弱而非東三省一隅之布置所可奏效爲今日之東三省計惟有振興商務發達利源集世界各國之貲本於東三省置世界各國人民之生命財產於東三省而中國主持商界之牛耳庶可變東三省將來之大戰場而爲世界將

來之大商場以享平和而消戰禍此辦理東三省政策之所當豫定者也今將其辦法略述於下

一爲發達東三省富源保存東三省疆土當從整理邊務蒙務入手計不外移民實邊墾荒通商開採鑛產採伐森林大興農業數大端然此數者皆非交通便利不爲功當以修造鐵道開通航路爲經營之始基

一自俄人修造西伯利亞鐵路之後歐亞陸路交通較海洋爲便利今宜利用此鐵道以發達東三省之商業而促進世界之交通宜修一錦齊鐵道由錦州繞洮南經內蒙古以至齊齊哈爾北與俄之西伯利亞鐵道相接如此則俄國貨物及東三省貨物之由海參崴出口及由大連灣出口者皆可分道而入我之軌轍且可握歐亞交通之樞紐則東清鐵道與南滿鐵道之利皆可爲我國

所奪而東三省及內蒙古實業與營口商務更可藉以振興矣

一錦州附近現已測勘一海口名爲葫蘆島冬可不凍較營口爲便既可作爲商港且可修築軍港與錦齊鐵路一氣銜接海陸交通至爲扼要現在創議興辦海軍此可爲北數省沿海海軍立一基礎

一奉天東部與吉林南部交通阻隔一切實業亦無從發達日人現於朝鮮鴨綠圖們二江沿邊之交通汲汲籌畫尤爲可虞今宜展造京奉鐵道由奉天東部經海龍興京濛江等處以達於吉林之琿春庶可以聯奉吉二省爲一氣且此路森林礦產極爲豐富獲利之厚當可預決而日人垂涎奉吉東南之謀亦可抵制解釋一東三省若修有錦齊鐵道與奉琿鐵道二大幹綫其距幹路稍近之林礦等項皆可接造支路辦理以興實業

一宜開一殖產銀行資本須在四千萬兩以上專辦三省開礦墾荒修路通航森林農業工藝商務等事各項實業振興中外商民自然聚集

一修造鐵路時沿路富源所在之處中國若資本乏絀可妥定章程與外人合辦以吸收各國之財產而藉以發達利源各國財產聚集日多而我之利益則日厚強鄰之覬覦則不戢而自消矣

一交通便利實業發達之後自可廣闢商埠以便外人之雜居營業而我國貨物之轉輸亦可日見暢旺

一東三省沿邊由呼倫貝爾瓊瑋興東三姓甯古塔琿春延吉濛江長白臨江安東西北東三面周迴幾及萬里非鄰俄卽鄰韓彼族不惜鉅金日夕經營進步不已重兵壓境眈眈虎視現已屢次調查測繪必須有實力以經營之如設官置兵開路築室移民通

商興學勸農缺一不可

一蒙古近二十年經日俄兩國極力煽誘不無攜貳之心而日俄隱以洮兒河以北爲俄人所範圍洮兒河以南爲日人所範圍如再用從前羈縻政策聽其自然必皆爲外人蠱惑其害不可勝言必須極力代爲經營使其服我政策日漸開通方可永固屏藩一東三省無內政不與外交有密切之關係宜注重外交人才以備折衝之用

總之東三省之大勢從前棄置未曾經營久入口俄掌握各國至爲不平近年

朝廷銳意整頓不惜變更舊法以振作之曰俄稍稍斂戢各國亦認爲中國領土矣而強鄰忌嫉貌似交好陰用其運動手段以破壞之使我一事不做聽其蠶食鯨吞計至烈矣禍至慘矣區區京

隅何以自保是必須合全國之精神才力注重於三省仰賴
朝廷主持於上庶司百執事合謀於下又必集合各國之財產生
命日謀發達三省之實業則各國之勢力均財產重而兩強之狡
謀戢將易兵戰而同謀商貨之利益則我之疆土保主權固而京
師東北之屏藩鞏固關以內方可無憂矣至軍備之籌悉賴中央
主持茲篇不具論

上政府條議

光緒三十三年八月

竊世昌在東受事三月有餘日夕兢兢迫欲爲遠大之圖冀收尺
寸之效顧心所欲爲尙百不一舉者良以宗旨未定則動作必涉
遲疑經費不充則百事無由展拓方

朝議改設三省推世昌總制自以才智短淺萬弗克承懇辭至於
再四嗣以

朝廷優加倚任假以便宜然後感激受

命私念三省之事散漫紛歧欲求氣脈之貫通必先事權之統一且禦外之道力分則薄氣聚則厚卽如黑龍江之軍事財政責其獨立以控窮邊此必不得之勢也於是定爲節制三省之局期於機關不滯調度適宜到東以來言者蠶起或謂爲權重或謂爲鋪張不知權者因事而生者也今三省之事過重則其權自不得輕且權重則責重不才日以責重爲懼而外人偏以權重爲疑眞進退維谷矣至於鋪張之言亦近似矣大抵謂其設官多用費廣不知兩強逼處客主相形前者俄設遠東總督今日又設關東都督府徧置僚屬設民政以下各官彼皆借我一隅之地而日圖擴張其勢力我領有全境而縮減其範圍可乎總之因辦事而設官欲辦事則官必多費必廣不辦事則官可不設費可不繁世昌雖至

愚亦解爲守約之說持重之言第以事機逼迫雖高掌遠蹠急起直追尙恐不足以濟若復拘攣錮蔽以數米量鹽之智爲刀筆繩墨之談瞻顧失時悠悠待盡此世昌之所大慮也今籌借外債議久未決重要待舉之事未敢發端苟且補苴深自惶愧近於三省事略有所籌恐面陳不盡爲條列於左

一計畫三省之交通

東省鐵路南幹屬日北幹屬俄直穿心腹而過護路兵丁車站巡警節節布置侵我主權平時往來已不啻假道鄰國受其控制一旦有事則氣脈梗塞聲息難通此乃至危極險之地位也欲求上策惟有贖回三省鐵路然非常之舉動外人不易就範財力亦所弗勝次則惟有速辦新民屯至齊齊哈爾一路尙可爲補救之法此路在遼河以西與東清路約所

載不得修並行綫之幹路不得修有礙幹路之支路兩層均無觸背外人無從干涉如得此路速成乃是死棋得生而三省之氣通矣

一統一三省之財政

凡舉辦大事皆以財政爲命脈前將軍趙整頓奉天財政歲入之款驟增多係剔除稅項中飽所得今改統捐而收數大減矣其餘如荒價如股票捐皆一時暫得之數非常年經久之款計今所入以充奉天養兵養官行政之費尙屬不敷何暇更謀遠大且今日所規畫乃東三省之事非一省之事也是以前經奏請籌借外債開設三省大銀行以爲財源總匯銀行既立然後三省之圖法可期畫一三省之鈔票可期暢行展轉生發挹注不窮其有築路開礦經營實業諸事均取

資於此俟生利日豐并可取爲練兵行政之用計無便於此者乃聞言者至謂借債可以亡國此非通論也埃及以借債亡日本則以借債興顧用之何如耳埃及以外債補內虧消耗於不返故至於亡日本以外債興實業生發於無窮故日以興今文明諸國未有以舉外債爲忌者俄築西伯利亞鐵路日築南滿洲鐵路卽如我築京漢鐵路皆屬借款未見害如是之巨也竊以爲宜斟酌借法若一切杜絕使辦事者無所措手敷衍因循終歸於不救而已

一 整齊三省之軍備

三省幅員遼廓兩強交伺鬪匪蟻聚蜂屯隨時竊發安內攘外全資兵力今八旗制兵久已有名無實吉黑之西丹馬隊亦燔焉殆盡所僅存者尺籍耳奉天八路馬步四十營新改

步隊一營礮隊一營新安軍四營盛軍二營吉林新立常備軍一協其捕盜隊有吉勝四營吉興四營吉強四營吉安四營吉甯四營吉新四營精銳左翼四營精銳右翼四營三姓四營阿勒楚喀四營黑龍江巡撫馬隊六營步隊七營護墾馬步隊各一營總計三省兵額除八旗制兵不計外奉天吉林各不及二萬名黑龍江不足四千名且其兵或收納降隊或抽撥旗營人類不齊營制餉章不一器械衣服淆雜欲以綏邊固圉建威消萌難矣竊度三省之地非實有精兵十餘萬不足以資防守今擬於奉天先編陸軍兩鎮吉林兩鎮黑龍江一鎮一切均照陸軍部新章先就各營挑選精壯年在二十五以下者充補不足再行募充各營老弱概行裁汰如果銀行能成餉項有所挹注奉吉黑三省每年逐漸增添兵

數期以五年後務令奉天吉林各有精兵三鎮黑龍江有精兵兩鎮庶可稍紓東陞之患不至爲強敵所陵若不籌借款不濬財源將北洋撥調之兩鎮明年由奉自行籌餉者且無法以贍之他更無論已

一經營三省之實業

今之籌東事者莫不曰鐵道也礦山也森林也農墾也漁業也工藝商運也外人之所眈眈逐逐者亦不外此數事今鐵道之權利已屬外人獨新齊一路尙可著手非速籌舉辦不可故欲修鐵路必籌巨款礦山森林多爲鐵路之附屬品照約均應合辦我不預籌股本則無以應客彼將獨專其利故欲爭林礦必籌巨款農墾之事最爲切要徒民實邊訖無長策富者招之不來貧者遠莫能致若由官給路費牛種廬舍

無論所費不貲北地早寒耕種惟在夏令若來不及時則一年坐耗墾未成而人敝矣宜設三省農墾公司官以巨股提倡併入商股由商承辦先試招數千人或萬人墾地若干嗣一切章程準照商律限以三年行之有效然後逐漸推廣十年之後地皆成熟人多土著而大利歸農矣故興農墾必籌巨款漁業部分較小措置尙易至於工藝則非設一學堂立一傳習所已也必須建築工廠製造物品大之如織布製革鍊鋼鑄礮小之如胰燭鍼紙之類遠法歐美近師湖北庶可抵制外貨消納游民故興工藝必籌巨款松花江乾涸而吉林之航運滯遼河淤淺而營口之商業衰非急謀疏濬則交通阻隔商務難望發生故欲濟商運必籌巨款今以三省之貧瘠而應行舉辦之事至繁且要既不能募集民債勢且借

助外款此議不決則雖苦心經營終成空言畫餅矣

以上四端僅就其最急要者言之其餘吏治民政旗務蒙務應行措注之事尙多三省重大關係全國盡人皆知挽回已失之利權保全不完之領土斷非拘文牽義委蛇瞻顧可以集事伏望集政府之全神以注之合中國之全力以圖之若視同內地習慣以一省委之督撫聽其盈虛消長不爲襄扶則非庸鶩之所能任矣冒昧上言唯垂鑒焉

東三省要政辦法條議

一 內地財政

三省原有人款名目淆雜額征無幾而各項新政待用孔殷入不敷出卽如奉天一省約計每年入款不到五百萬兩而約計出款將及一千四百餘萬兩今各省協解已成無著之

正書卷三十三
款而報銷牽混早爲具文部中據空文以爲准駁甚無謂也
今擬將三省出入各款統列一表分爲經常特別視不敷若
干一面分別國家稅地方稅兩項將從前奏銷之案奏明概
行作廢其國家稅某款作某用按實用報部請銷其地方稅
某款作某用亦核實報部無庸請銷不敷之款本應由部指
撥但現在庫儲支絀如能就地籌有的款隨時報部立案必
使三省之財足供三省之用如此則既無空文挑剔之煩又
無外銷騰挪之弊各清各款一目瞭然先由東省設立審計
局以監督三省財政俟設有會計檢查院則應由該院糾督
之財政既清新政可次第而理也

二聘用洋員

兩強協約謀我愈亟非聘用洋員不足以伸公理而籌抵制

日本已至富強然尙用德尼孫以當交涉顧問其明證也然能借外債方能利用外人蓋有錢便有事做有事方有交涉內地以無交涉爲自存若三省地方各國不與交涉日俄窮年累月以圖進步則東事危矣今擬交涉法律之屬皆聘用洋員以爲顧問其餘森林路礦亦皆用洋人以經理之此中操縱實有妙用請無以太阿倒持爲慮也

三交涉宜分責任

中國習慣以某省之事責成於某省督撫然施之於內政則可斷不宜施之於外交蓋其國際交涉皆本於政府之訓條而我之督撫無以難也是必有我外部之命令督撫承而行之無失其措施之準斯爲正當之對待如今之界務稅則皆是其地方交涉則可由督撫直接辦理擬請政府明定責任

庶臨時有所依據

四實業

凡開礦及各項實業應准各國人皆來合股惟必須有完全部章俾資遵守自不失權且可生利此係各國通例擬請商部詳議訂定各項規則頒行其中日條約奉天境內沿鐵路礦產有不能收回者應以何款與之合辦亦應先事妥籌

五軍政

三省防營名目錯雜餉項紛歧現經各處抽調以資剿匪之用此等防營擬俟匪黨大股戡平地方綏靖後亟應分別教練按新練陸軍一切規制暫編爲巡防隊至旗兵廢弛已久亦應統練俟規畫旗丁生計卽擬嚴加汰除使之散爲農商工藝各項生理騰出月餉酌留壯丁併入訓練現三省已設

督練處選擇熟習兵學人員督練新軍以資表率至陸軍部所定三鎮斷不足以資鎮攝且三省外交最難陸軍者外交之後援也每省必須兩鎮方敷調遣但目前未籌的款卽現有之兵尙難騰飽擬請俟農業發達地利開闢後使退伍之兵有所歸宿尙擬多練數鎮或用徵兵或仿屯田臨時察看情形奏明辦理

六邊務

三省沿邊數千里皆與日俄接壤若不及早防維他人必將侵佔延吉之案其前車也今擬分派人員親行詳細履勘繪具圖說勘定界址將來或設重鎮或設治或設兵備道以監理之容察看後奏明辦理

七農荒

三省所屬蒙荒周圍數千里前經奏明會同察哈爾熱河都統會勘蓋因日俄越墾鼓惑蒙民其間山川道路礦產彼已纖悉無遺若不及早圖維將棄地利失外援三省之屏藩撤矣今擬奏派大員督辦三省蒙荒先由公家集款若干由近而遠以次興辦先辦一處使之成部落築廬舍嚴守望通有無行之數年不但大利歸農且與蒙情相洽得其地足以固守備用其人足以聯聲勢非徒爲籌款而已遇有與蒙人來往之事擬請理藩部不拘成例得假以便宜行事之權

八用人

三省用人固可不拘常格然普通之人才尙易調用而專門之人才爲最難得三省強鄰偪處外交財政窮困已極倘准放手大辦則須有無數外交財政法律之專門家方足敷用

其餘如礦務林鹽種植畜牧農墾製造何一不需專門但此項人才本少往往一學生回國並無官職限於成格不獲大用今擬請如有以上人員准由督撫奏明破格錄用不計有無實官吏部不得援例爲准駁其餘應用人員擬由三省酌定官吏任用法奏請試行但須咨報吏部以憑考核

九地方自治

三省官紳錮蔽已極前將軍會設自治局以養成調查員資格然恐取效甚遲今擬先編輯白話報凡極淺之理極明之事使之易曉又多派宣講員散於各處爲之解說以啟其知識如巡警衛生之類凡地方公益而取資於民者悉令本地紳耆入會使之觀聽並漸仍民間堡防之法用其習慣而漸啟其文明一面由省城設立自治研究所證之以實業曉之

以公理使民間稍有明悟再行選舉之法

十旗民生計

三省旗民名爲兵籍而養地則取租私典俸餉則刻扣朋分
疲困極矣今擬將旗民之伍田悉數清丈而使之務農裁撤
旗兵之老弱者一面廣興工廠以安插之凡士農工商皆與
漢民一律相待尙擬破除滿漢界限令皆受治於地方官吏
其旗官亦擬酌量裁撤統俟酌定辦法奏明請

旨

退耕堂政書卷三十四目錄

條議

上監國攝政王條議

退耕堂政書卷三十四

天津徐世昌

條議

上監國攝政王條議

籌辦東三省重要事宜條列如左

甲吏治

一官制組織 東省改設行省奏定官制與內地省分不同同署辦公則無承轉之煩混猜嫌之見遇有要事卽時取決督撫以下各有權限各有責任無推諉之習用人行政公諸眾論而取決於長官無私託之事收發繕稿皆用委員廓除吏胥積習司法官制則別爲一部分以改良審判推廣各廳爲主總督駐節奉省原因交通之便僅及瀋陽若俟吉長鐵

路通行擬請移駐三省適中之地則惟長春爲宜蓋其地爲日俄分勢之區集三省中權之紐最得形勢移總督於此而以左右參贊改爲東三省參贊受欽差大臣節制暨關於三省之局處亦均駐於長春凡外交軍政財權悉歸總督籌畫仍以時巡行三省他事則三省巡撫分治之如此則指臂相聯同條共貫日俄之相競利於分三省之集權利於合至地方官制奉省民官較多然未盡合宜已隨時奏請增改并區定權限吉江則荒曠太多故地利不能闡商民不能聚終無治理可言江省已奏准添設民官正在籌辦吉省亦奏請添設尙未議覆蓋東省與內地異內地責在撫字故有民而後設官東省責在守土故設官而後有民也然官多則承轉太煩輾轉積壓候批請示甚無謂也故新設之缺府不轄縣均

使直接公署將來尙擬將府州縣區爲一等而以道員監督之東省實業宏富紳商既無力興辦亦斷非普通之委員所能提倡謂宜速設各項實業學堂學成則俾以官使董其事現已奏准添設農官此外如森林如礦產亦須設官而理斯固周官司徒之所掌亦與各國之制相合此組織官制之概略也

二官吏職務 公署各官分科分職各有責成省中各局所

則以類分隸於各司道條理秩然各有所統如內地之善後釐捐等局皆別

設員管領之雖以布政使領銜而未嘗問事於東省則以司

道爲綱以局所爲附如稅捐局統於度支司礦政局統於勸業道諮議局籌辦處統於民政司之類

其有事近複冗者悉裁撤之如舊日財政局商其有關於三

省之局所如鹽務局銅元局官銀號支應處督則皆直接公

練處糧餉局軍械局文報局等類

二

署遇事稟承督撫辦理權限明而後責任副亦大小相維之意也至地方官吏從前無分府之員故辦事官仍不免門丁積弊自經整頓改用委員由省派往而革陋規裁房吏除會帳禁攤派訴訟不受枉法之贓接替從無辦差之事其瘠苦缺分則由公家津貼之尙擬將各缺出入款項通盤開列以爲均俸之計畫佐雜各缺亦酌予津貼從無內地按戶斂錢收受陋規之事學官事本清簡間有選擇明達學務之人兼充視學員者其各項差使如稅務如鹽務皆月有比較嚴定考成故東省吏治日見起色較之從前賄缺賣差侵吞公款視爲分內者已抉除淨盡矣

三用人方法 三省本無掣籤分發人員投効之人流品淆雜誠所不免從前視爲利藪往往虛銜來投捆載以去今優

拔考職已有籤分而投効者又爲之多方限制旣考試以驗其學復送入法政學堂不取者概不試用於是自好者悉呈請考驗而求差自私及不中繩墨者且自行求去矣竊謂人之賢否全在用人者之轉移苟使廓清舊習使蠅營之輩無所取盈而綱舉目張雖薄技片長皆思自效以優容之術待英才以嚴刻之典繩俗吏則投効者必非當日闡茸之徒四方之彥自有聞風而至者固愈於照例籤分也且東省之用
人與內地異兩強相較對待稍疏害且立見則外交之才難
邊境延長空虛無備而適當俄日經營并力之時則籌邊之
才難哲里木十旗據形勢之要害而攜貳渙散匿庇外人禍
且未艾則馭蒙之才難新舊軍隊教練整齊非深造陸軍之
學不足以統治非實知鬪匪之性不足以剷除則治軍之才

難商埠繁要之區外人雜處無內政非外交而荒遠之地又無款不足辦新政則地方官之才難財政困難額費不支既不忍加捐而困民生復不能籌貲以興地利則理財之才難其他若工程若商務若工藝若林礦若漁鹽外人皆有專門之學而我乃求之普通之官優劣相形利權日溢則各項專門之才難前經歷次奏調留奉各員或以爲用人太濫然於各項事實亦不過粗有門徑每遇重大之事尙有乏才之歎乃或矯投効之弊而欲如內地之照例籤發及處處求合於部章庸有濟乎

四民俗習慣 東省民俗樸厚尙無奇袤之習然其特別之習慣有足異者其對於官吏以賄託爲固有之成規無論事之當否皆有賄託訴訟亦然原被告皆以賄進官吏收受民

心乃安否則訟勝亦竊竊然以爲不足恃官吏拒絕之則將持原賄爲種種之運動或京控或託人言事必欲用罄而后快而於其事翻案與否則又不暇計也又好聚眾或因墾價警學諸款輒抵阻不交牌召各村作抗拒勢其實祇二三狡黠之徒爲之良民未嘗不交款也閒嘗反覆推求其故乃知其始官吏以受賄爲固然民間卽以用賄爲習慣苟不收受則疑官之與己爲難也卽別求受賄之人以羅織其官之罪狀且如聚眾或京控有各項之用度卽可斂錢以便已圖於是刁狡之徒慣用其伎倆而又不暇計其事之果濟與否但求有一紙之公牘而所斂之錢已入私囊出錢者固已無辭矣自經嚴飭整頓設審判廳地方明定訟費自開庭至判決宣布周知民間始知便利自悔當日之非而地方官拒絕太

嚴及辦事認真者尙不免有以前之舉動此等劣俗若不挽回於選舉前途大有窒礙於地方行政亦受影響自應淨絕根株莠去而良民始安未可參以姑息之見也

五剿匪事實 東省之有鬍匪非有勇悍謀略之異也其始民間皆有槍馬以自衛強很者遂變而爲匪繼則以所掠之財先購利器民間之槍械不敵遂勾結竄擾愈聚愈多又因村屯零落無守望之助官兵恇怯不敢與匪爲仇於是兵民與匪通同一氣且恃有蒙地空虛以資剽忽恃有鐵路左近以爲隱藏與蒙匪俄匪遙爲聯絡遂蔓延於三省之地歷任將軍皆不能制自經嚴飭各軍隊分途兜剿四面窮追東盡蒙部北入俄疆將歷年著名之大頭目及屢犯官軍之悍黨剿除殆盡歷將辦理情形奏聞在案於是羽黨解散地方又

安仍分飭駐防軍隊及地方巡警嚴密防剿毋稍大意卽有零星嘯聚亦不敢明肆劫掠目前兵力已足以制之然此輩以游惰之性無恆業可靠偶值年歲不登則迫脅良懦相聚以逞及其爲匪而剿之非治本之道也亟宜普施教養使皆知治生之術則工藝廠習藝所在所必設一切工作之事日見發達若輩治生有具始可以弭隱患此則清匪之源當局者亟應經意者也

乙財政

一出入相虧之比較 東省本爲受協省分而各省歷年欠解之款已積至四百餘萬從前將軍分省而治各項稅捐名目淆雜漫無稽考侵漁過半上下文征又以行政機關多未完備故用款亦較內地爲少奉省自將軍趙爾巽改設統捐

立財政局以究其事於是剔除中飽出入各款乃可稽核江
省自將軍程德全推廣荒政於是行政經費多取資於荒價
今則竭矣吉省則仍其舊弊無有整理之者自改設行省分
立度支司以管理財政去繁瑣苛細之捐悉心整理其從前
私入在官者均提出以供正用又整飭鹽政推廣官銀號以
補助之兩年以來積弊漸除收數亦漸旺惟是行政費用日
益增多蓋以兩強逼處其經營東省者垂二十年我之內政
勢不能再如從前之單簡其官俸練餉旗餉之額支及工程
電線郵賞川資測繪調查外賓應酬之屬皆爲萬不可少之
款今以三十四年約計奉省入款共五百三十餘萬兩出款
共七百八十餘萬兩吉省入款共二百七十餘萬兩出款共
五百餘萬兩江省入款共八十餘萬兩出款共一百九十餘

萬兩出入相抵不敷甚鉅其可望推廣者則爲鹽務之溢收
墾荒之大利而已此皆就東省之額支而言若特別費用幸
有磅餘一項陸續動支邊防蒙務勢甚岌岌斷難延緩惟有
另請巨款以圖興舉又如新政之屬學堂巡警東省最爲普
及然需款大率取之於地方及各項公益捐官所補助者僅
十之二三已苦不及若推廣審判各廳調查統計選舉均已
次第籌辦則用款更鉅又如添設民官開辦實業亦均非款
不可誠以內政未備外患滋深非銳意經營難以自立但辦
事多則用款鉅區區就地之款尙不足經常之用與其省事
惜費而爲人攫取毋甯設法籌措而冀以圖存此三省財政
困難之情形也

二需款急迫之情形 自來言理財者必曰量入以爲出東

省則不然地在兩強範圍之內已據之權利無可挽回又從而推廣之若不急起直追挾實力以與之抗則坐以待亡雖求如內地之照例辦事而不可得前文所述多係內政需款之概略至於競爭之事關係內政外交之用款決非東省所能自籌而又爲刻不容緩之舉今試言其大者東清鐵路橫貫三省利權主權種種失敗則幹路之築亟應另舉也歐西商務已爲日俄所束縛卽欲輸入巨資我無吸收之能力且無大資本實業卒不能興則銀行之設不容疑阻也振興商業必有完全自闢之口岸其次則疏濬遼河開通松嫩兩江之航業又如林礦之屬日俄占領已多尤應籌款速辦沿邊數千里外人之所注意延吉之事可爲前車蒙情離貳皆由外惑主權一失全局動搖非厚集財力以圖之則名存實亡

何堪設想凡此之類殆難殫述應辦之事既如此其多且迫也故應需之款不能不合全國之財力以相籌畫外債之借國債之籌鉅商大賈之所招徠歐西公司之所輸入皆應議定辦法不可後時固非就地籌款之恆言所能了事亦非減員司節經費罷工程如內地照例支用之所爲遂能自存於兩大之間也果如前說實力經營則東省地利之厚物產之饒俱畢獻於地球之上向之籌借之款自不難如數取償並可闢無窮之利益又非如內地一借他債無可抵還重以爲累也

丙外交

一日俄近事之對待 東省爲日俄競爭之場名曰收回領土實則長春南北已成分據之勢蓋鐵路所至卽勢力所充

其大者則至侵佔疆土干預主權而細者或較及於日用飲食之事非如內地之交涉起一教案判一商務遂苦窮於因應也自東清鐵路爲俄所攝以釀成今日無窮之干涉馴以商務之權闖入政界日人師其說而又加厲焉今與日人所交涉如安奉路綫如撫順煤礦如遼東鹽灘如金州隙地皆俄之遺累也其甚者則俄於哈爾濱倡自治會之議將以勒索華捐強封商戶迭經嚴詞抗拒近始稍有轉機夫以鐵路附近之區我無收稅權無警察權無搜逮罪犯剿捕盜匪權而彼轉得自集社會捐款以自治直以我之土地供彼殖民萬國公司無此辦法是以贖路之說爲正本清源之計苟能辦到則一切非理行爲不解而自滅近與俄使提議及此聞亦未嘗顯拒彼蓋旦夕經營於黑龍江沿岸之鐵路徒以款

項未充未能併力營建又以南滿之路歲有虧損且與日軌相接已失其完全之利用所不便者海參崴一旦阻隔新路未成運用不靈及公司之俄員尤不願坐失其利耳誠能乘此機會急起直圖許其海參崴之路可以由我接軌通行並酌允以仍舊之利益急借外債估價而償心腹之患可除卽南滿亦勢孤而無效尤之事其次亦亟應照約派東清鐵路督辦或遇事可以維持然仍非經久之策也俄人勢力闊大雖經挫敗未嘗須臾稍忘東省故移民實邊不惜鉅費近又調集軍隊廣運軍火以爲海參崴之後援此其大力包舉將有非常之謀日人則急於改修安奉路綫並造鴨綠江之橋其意蓋爲一旦有事則駐日駐韓之軍隊由南滿大連兩路不數日而集於東省顧此國防殆岌岌不可終日矣延吉事

起抗阻經年近忽有設官之舉動俄領因派人至洮南以查事爲名隱起干涉又經嚴拒令其撤回但空言固不足保存而宗旨尤不能屢變若非充實內力明定主義終必爲外人爭戰之場而絕無對待之法其他交涉紛繁未遑殫舉若我有自治之能力內外一心合財力人力以圖之則外人始以忌我必起而阻撓之不爲所阻則必改爲和平以驗我之實力倘宗旨無定事來姑應事過輒忘而以儕於內地之交涉事變之來卽在眉睫兩強再有戰事更無中立之地矣

二開放主義 東省約開商埠凡十六處強半在東清鐵路範圍之內鐵路所用地畝寬廣無限如另闢商場則交通不便雖強定區域必爲各國所不願若在鐵路界內則均爲日俄所攫取決不肯再讓他人是以各商埠迄未規定且東省

爲日俄分據之場若不借歐美以爲抵制則雖開商埠各國斷無挾巨貲爭商務之思想是仍爲兩強專利而已且商埠之說原以別乎內地雜居也今東省非通商之地日俄之私爲營業及小販工醫之流到處皆是否則請一游歷護照蒙邊要塞聽其往還是與雜居無異今欲破相持之局本開放主義召集歐西工商人等皆得在東省營業無論會否通商之處皆可任便居處守我法律受我保護出我公益捐服我警察權如是則雜居之禁既弛西人之來營業者乃有插足之地而鐵路附屬地不得居奇壟斷其便一集各國之貲本而從事商務乃得平均其勢而日俄勢利漸減若行非禮他國必起而干涉其便二我立審判廳以來規制漸備近來日人多有在我法庭起訴者若准其雜居則民刑訴訟可以漸

就範圍將來法律改良必於東省先收效果其便三東省稅捐華洋輕重懸絕故不免有冒充洋貨之事今收公益捐則華洋一律地方一切公益之事皆將次第推行其便四東省警察遍及鄉鎮若以保護雜居爲詞使之從我命令則警察權可以推廣而日人之派出所俄人之巴釐司皆得逐漸減之其便五有此五便與其守內地雜居之禁而有名無實似不如明爲開放轉可得種種之利益日人以雜居易回領事裁判權其已事也否則商埠終不能開各國觀望而利權仍爲兩強吞略殆盡非計之得也

三聯合政策 國與國交未有孤立無援而能自立者往者歐西各國互約聯盟而我若熟視無覩日人於戰勝之後尙兢兢不敢自恃於是日俄協約日英協約且倡立共保中國

之和平噫嘻伐國之謀固若是之深且遠也我當國勢積弱之際固不宜有所偏重以生間隙然於節文之隆殺利益之互換自應審慎而出以爲睦鄰之實據卽以東省論非聯合歐美不足以抵制日俄然或爲商務之發生或爲債務之關係或牢籠其富商大賈予以相當之利益使其投大貲本於東省或利用其專門學術使備顧問而藉保主權此第就一方面而言若聯絡邦交則尤在國際上之交涉必先破各國疑我無定旨及謂我不足爲之心開誠布公與之相見小利不必爭主權不可失勿聽刺探間諜之說勿畏要挾呵喝之詞堅守勿移平日能取信於各國乃有修改條約時之進步然各國能否與我協睦尤以我之內容爲準是又在全國一心除舊習以力行新政如改訂法律實行選舉禁絕鴉片皆

爲各國最爲注目之事又清理財政必以分別國家稅地方
稅爲始斯加稅免釐可以實行蓋法律政教必與各國有相
通之關係斯會盟條約乃與各國享同等之利益日人用此
術而崛起三島往事可師若株守舊規必至扞格不入而聯
絡終歸失效也

丁邊務

一移民屯墾之計畫 今之論實邊者皆曰移民然以東省
邊荒之地以面積計之蓋不止數十萬方里若由公家之力
招之使來則自遷移輸送及廬舍籽種耕具牛馬之屬以萬
戶計所費已鉅而此萬戶者零星散處於廣漠之鄉交通不
便守望無聞無官吏之督察撫綏則亦相率逃亡流爲盜匪
耳俄之移民於伯力也歲有額額有表所費無算我固無此

財力也今所計畫亦惟漸次推廣以期普及嫩江沿岸地盡膏腴爰飭退伍兵從事開墾每人分授田畝以火犁輔之更翻推廣期以九年每年所需定列一表以次遞減至九年則官款收回餘利甚溥延吉屯防營亦飭退伍之兵興辦墾務而官爲督率之蜂蜜山沃野千里從前所辦墾務積弊叢滋且爲鬍匪嘯聚無敢深入者旣飭軍隊刈平諸匪又設蜂蜜山府治以資鎮撫現正派員整頓墾務已放者清丈以斷糾葛未放者編列等則或由商集股或由官輔助變通內地放荒收價辦法以期地利漸闢人民易聚其爲移民以前之布置則必去其害民者沿邊之匪搜剿殆盡而不惜集合軍營終年搜捕又必有撫民者因於三省邊荒添設郡縣謀設治之基礎爲招集之預備然此第一時一事之措置若欲爲移民

實邊根本之計畫則必有大枝幹路以通三省之運輸又於水路交衝之地林礦最富之區皆別築枝路以達之廣開礦場經治林業設工藝諸廠使人民有生計之益物產有輸出之便則各省之農商工藝及游惰無業之民皆願出於其途不召自來繁庶立致以視斤斤於移民之說費繁而事不集其收效爲何如也

二籌邊敷設之次第 東省奉與韓接江與俄鄰而吉則介於韓俄之間黑龍江沿岸赤地無垠道路不通人民絕跡而俄則列戍置屯已成重鎮木植羊草資其取攜因飭呼倫貝爾愛琿興東於沿邊扼要分設卡屯藉以鞏固國防保衛行旅鴨綠江以上圖們江而東昔爲屬境今界強鄰咸鏡則置兵屯會甯則修鐵軌因奏設長白府以通臨江之路調查韓

民戶口生業以安其居多派巡警駐紮處所以聯其勢延吉
事起則爲之請經費派專員悉意經營多方抗拒琿春爲俄
人必爭之地未雨綢繆預飭布置凡伐木通道遣隊布防視
財方之所及昕夕圖之滿洲里一帶鄂博盡失因派員詳細
履勘測繪成圖以備將來會勘之證據沿邊重要最貴有靈
敏之機關今別築幹路之謀畫旣以款巨事大尙未定議因
分飭於要路添設電綫計新設之區共長六千餘里收回日
人電綫共計三千餘里於是三省要區信息便利軍政民政
之籌備皆可集權於中央而迅赴事機毋或延誤矣其他如
調查區域開通道路詳測林礦之方里分設要塞之民官偵
探外情以識其謀畫皆籌邊之要圖第以經費無著邊才綦
難庀所設施已爲勉竭綿薄而外人競進日謀未已優勝劣

敗捷於影響國防嶄然當出全力以維持或得隱弭事變此
又東省安危之大關鍵非獨守土者之責也

戊蒙務

一外人誘煽干涉情形 自東清鐵路周繞哲里木盟全境
俄人始垂涎其沃饒富厚而默窺我之政策猶是羈縻之旨
且道路未通聲息隔絕彼乃利用籠絡之手段以結蒙人之
心鐵路所到糜金錢以買其歡中部諸旗則派游歷專員賫
貨幣以謀交結復遣布里雅克之蒙旗挾同種之觀念以相
鼓煽一時西北諸蒙及庫倫喇嘛爭懷攜貳而哲里木王公
札薩克中至有爲虎作倀代致款曲者故借兵以平亂放債
以舒困俄人均有所不惜蒙旗愚妄墮其術中然亦由我馭
遠之疏遂任其私交往來而一無聞知也戰局一開兩強軍

壘假途蒙地兩年之間外人相處益習及戰事方終俄日均勢其表面則以鐵路定權限之所及長春南北界以此分而直線所趨則隱以洮南府之洮兒河爲限日人猝以優勝立於滿洲益進而窺蒙疆廣布地學會徒黨及陸軍少年測繪要塞研究物產詭言異服匿處蒙屯以醫藥小惠市恩交歡迨至高麗收爲內屬愈思拓境於東蒙乃強舉高麗蒙古歷史地理沿革上之關係傳會野史之傳聞造爲不經之故實以惑蒙民觀聽且倡爲民權平等之說思以移易其心志前者日人藉游歷爲名實行測繪徧於蒙地會請外務部照會禁止其後測繪行部近在遼源又並派員前往查禁甚至改蒙裝學蒙語無從辨別不亦重可慮乎俄人於哈爾濱設有專員爲經蒙機關富拉爾基則築有館舍接待蒙人句煽交

納均憑藉鐵路公司之勢力近又派實珀夫帶兵至洮聲稱分設領事辦理蒙俄交涉我據約力拒始悻悻而返彼兩國直視洮南爲均勢制勝之地狡計陰謀迭相爲用一隙可乘接踵俱進來軫方道是不可不密爲防範也

二蒙旗愚弱困累情形 東三省將軍所轄蒙旗爲哲里木盟全部屬於奉天者科爾沁六旗曰圖什業圖曰札薩克圖曰鎮國公曰達爾罕曰賓圖曰博多勒噶台屬於吉林者曰前郭爾羅斯屬於黑龍江者曰扎賚特曰杜爾伯特曰後郭爾羅斯地處漠南延袤千里當邊關之外蔽爲吉江之後援論形勢又與三省爲表裏者也科爾沁部諸王勳封最渥爲內扎薩克之首編旗列衛環拱長城當國家盛時休養綏馭等諸內屬久矣乃數百年藩政不修敝俗未改由錮蔽而安

愚昧由貧弱而增困累積至今日一蹶不振蒙民仍游牧之性離羣野處習於頹惰迷信宗教甘心牒度種族不繁卽畜牧一端亦不知講求孳息日就凋殘生計窘急其諸王公扎薩克不知自恤其眾恣意揮霍橫征暴斂苛虐無度而執政蒙員又復自營私利損上而培下黨見紛紜各立門戶又往往挾嫌搆爭馴至讐殺釀成鉅訟則又攤派取盈牽動全旗財政至於纏訟之風久成習慣但憑意氣不論事實其愚者胸縮懼訟黠者遂搆訟以困之一厘寸土之爭懸二三十年不結饋遺請託上下苞苴愚而倖求則掾吏困以文法貪而務得則姦商施以鉤餌旣因緣以爲姦復相資以爲利年班爲

朝覲之大典歲有常供而京邸之銷耗累萬襲爵爲崇報之

正言卷三十四
榮錫本有宗法而部文之輾轉類年甚至一充盟長一求署
印輒相爭競悉索賦稅以營其私而成否尙不可必內力既
殫計惟外借負債累累而全旗利權將歸外府矣夫國家優
待藩臣之恩禮屢世猶隆奉行之有司乃漸失其本心相隆
者轉以相困重以世變紛乘外漸日迫外人之抵隙蹈瑕將
不利於我者且反其道而行之蒙人心心覘覘於
朝廷政令則藉詞規避於外人行徑則曲意交歡雖其錮蔽
未開受人愚弄而歐魚歐爵蓋有使之然者遂使雄武忠樸
之風一變爲茶弱委靡之俗其結局乃至醉心於外人而以
債權相授起國際之交涉重可哀也

三籌蒙意見 今日籌蒙之策不在於張皇補苴而在於統
籌大舉不在於斂租徵稅而在於殖民固邊顧大漠窮荒措

施匪易入手之方非先貫通其脈絡利便其交通則凡百經營均形扞格哲里木一盟四部十旗之地延袤視三省而道路不通行旅裹足近歲放荒設治所有郡縣每因隔於絕域殖民固邊之效動與始願相違故規畫伊始卽奏設蒙務局實行調查注力於築路置驛諸大政視爲急切之圖鐵路大計首在新齊由新民踰法庫遼源經洮南以達齊齊哈爾乃甫一發端日人卽以並綫來阻持抗至今尙待解決於是乃出別策改新民一綫而西之就錦庫爲要點由錦州西北經直隸之朝陽趨小庫倫或出清和門就新秋煤礦直渡西遼河以指洮南然後循新齊原定路綫過嫩江以達齊齊哈爾此我內地外人不能干涉估工勘路亦已粗具端倪矣至於驛站之置固所以護鐵路尤爲築路之先聲蓋自遼源以北

至於洮南以及齊齊哈爾伯都訥之間向無官道商旅視爲畏途民墾因之不前放荒設治虛糜時日治蒙之計畫旣苦於運掉不捷成邊衛之空名內政之機關又困於郵遞稽遲失指臂之妙用故於鐵路未築之前急議通電綫設驛站以收近功擬於遼源迤北達爾罕王旗一帶計途畫段每五十里爲一站每站旁十里從事墾闢以謀生聚復配置弁兵以備緩急屢疏陳請得

旨允行現亦正在多方籌款逐漸興修然欲充實邊圉終以築路爲根本及今籌辦已覺後時餘如官吏軍隊之增置森林礦產之提倡猶其次焉者耳

己旗務

一廣籌生計宜先去積弊 東省本皆旗籍豐功偉烈開肇

王基底定中夏降至今日習於驕惰旗員以剋扣攤派爲固然旗丁坐領口糧有田而不願耕作當兵而不知訓練無商賈工藝之能力僅有小販營生以資餬口而已今爲之廣籌生計弛從前之禁令一曰習墾種於荒曠之區計口授田教之稼穡一曰設工廠工藝爲日用所必需分類教授使之各成一藝俾有治生之謀因於奉省設八旗工藝廠又於錦縣添設分廠而推及於吉省一曰興商業旗丁有設肆營業者官爲獎勵而保護之然根本之積弊不除則不能改換性質發達技能其在官者則爲將軍衙門三陵衙門內務府檔房以及各屬協佐下至於領催界官皆以把持舊日規費爲历年應得之款貢獻有費徵收有費凡辦一事必有循舊陋規不勝殫述其所取者大率取償於旗地而旗丁愈困稍予別

除則謂有意與旗屬爲難亟宜明定公費以除舊習除江省於旗務未設專員外奉省則有旗務司吉省則立旗務處已爲之釐定職掌權限公費去其太甚次第整理錦州自奏裁副都統後其協領以下亦爲之提取陋規更定辦公經費必使旗員化除舊日攤派之思念而旗丁生計乃可漸圖推廣三省本皆滿洲世僕先世效力行間厥功甚偉理應享受特別之利益乃不但困苦薄弱且生齒不繁稽之圖籍戶口較從前爲少是欲爲之謀生計必使儕於齊民而使之有農商工藝種種治生之技能乃得普通受同等之利益則化除畛域之意尤應見諸實行者也

二統籌出路宜先重教育 八旗子弟之所以貧弱者大都未嘗學問守其當兵之舊職無事則嗜好中之今欲爲之籌

出路則必以教育爲根本之計因擬徵兵之法其老弱者悉易以子弟而爲之教練仍其舊餉又以此法辦巡警亦所以廣其出路而使之略受教育耳農官之設以待用也先爲之設農業講習所庶學成致用地利可與旗員仕學館自併入法政學堂而科學更爲完備比者兩班卒業或爲練習員或爲調查員或分赴各屬而爲選舉之輔助事理明白頗有秩序此尤教育之明效大驗也維城學堂專爲宗室覺羅而設教之有序必可收效然此第就八旗而言若欲造就全境子弟而化其氣質則必爲普通之教育無論何項學堂亦無論滿蒙漢咸使受範毋稍歧異則將來八旗人才不可勝用且不必爲之籌出路而自能振起矣故謂廣籌出路必先注重八旗子弟之教育其多年當差積習已深及庸邁不能效力

者則不在此列彼第知注重教育之道而別其名曰某旗學堂則尙囿於一偏之見也

庚實業

一開設銀行 東省實業宏富棄利於地不可殫述外人之開爭戰謀交通擲金錢生命皆此物也我不竭力以圖終必爲人所攫而競爭之禍無已時然欲開闢利源非有絕大資本斯運轉不靈終不能保我未闢之利而吸收歐美商家之鉅款以畢集於我之士往者有見於此因有先借外債二千萬兩開設銀行之奏屢經協議卒以准而未行今試言銀行與東省之關係林礦之盛甲於全球枝節爲之非徒無益有銀行則可以次第伐採一林區一礦產所獲之利則還借債之本利而有餘且可以更番推廣其利一日俄不惜巨貲以

經營東省歐美各國見我之財力薄弱無地主權均在兩強區畫之內則雖欲集鉅貲營商務在東省別樹一幟而匯兌不便儲蓄無所雖商埠開至十六處之多卒無有挾大貲本而來者則東省終必爲日俄所據有銀行則可以召集各國之商家而我有匯兌儲蓄之便不爲正金道勝所壟斷各國必相率偕來外貲一集遂得破兩強相持之局而平均其勢力其利二理財之道貴在流通奉之官銀號吉之官帖局江之廣信公司皆以成本薄弱紙幣充盈爲慮有銀行則信用必深所發紙幣利必倍蓰可以出債票可以收稅權可以齊幣制其利三東省實業之未興實由於交通之不便有銀行則可出各種債券以經營鐵路再有紙幣以爲之助斯百廢俱舉其利四是故我之自營實業並欲借各國之財力以抵

制日俄皆必以開銀行爲至計否則坐視大利莫之能開幾何不爲外人所齒冷也

二籌辦實業之機關 將欲振興地利則必有籌辦之計畫且林礦農商皆有科學未可以執途八而相率從事也在奉省則有礦政調查局森林學堂種樹公所農業試驗場工藝傳習所植物研究所官牧場硝皮廠造紙廠官紙局等類在吉省則有礦政調查局農林局印刷局等類在江省則有礦政調查局勸工陳列所工藝學堂等類凡此皆官爲提倡或爲實地之調查或爲試辦之經驗或爲專科之預備亦籌辦實業之經始也東省幅員之大地產之豐以林礦占其多數其他則爲鹽務從前偷漏走私成效未著自金州鹽灘變爲交涉更有倒灌之虞乃爲之嚴緝私之罰定官運之制開拓

營海鹽灘以厚民生減運費禁重價公私交便乃得暢銷收
款盈溢而鹽務日有起色矣又若整頓漁業以保領海之主
權統一郵船以冀航業之發達奉省已開之礦有一百八十
五處未開者尙有三百八十處吉江稱是其最著者則爲奉
之尾明山杉松岡江之觀音山漠河呼嗎爾河甘河吉之

皆爲官所籌辦者也森林則鴨綠江與日合辦理春
左近如帽兒山等處皆以次調查惟須籌畫運路固不竭之
利也大抵資本大則取材宏實力充則外溢少是在當局者
之實地經營矣

三提倡農業 東省曠野平原號稱農國惜以天氣早寒祇
有一次之種穫從前以高粱豆爲大宗鮮有種小麥者民習
於惰不知講求土質改良種植之法蓋一由於內地交通不

便多種則艱於販運國積則價愈賤民無所利一由於禁米糧出口米麥之類向在禁例本地人素以高粱爲食故尤不願種麥於是美國麪粉每歲入口甚多遏農民之利而仰給外人非計之得也迭經勸導使民種小麥去歲耕種多處收穫頗豐因弛出口之禁而小麥一種日見發達近來各國之要求運售者甚多黃豆餅向祇運銷日本近則有運至英國者民間知大利所在頗動歆悟餘如瓜果菜蔬花木一切改良種植凡內地外洋之所有皆可效法其各國農具之精良者皆陳列於試驗場民之來觀者則爲之演說其用法民間亦頗有效用者足見地質之腴厚民俗之轉移苟能提倡成效昭然富國富民利源甚溥我國本以農事爲重而東省又爲天然農國因特紀其事以爲之勸云

辛司法

一推廣審判廳 東省自設提法司以來審定司法規制除江省民事僂陋尙未設審判廳外奉吉兩省皆於省城設立審判檢察各廳自高等至初級規模粗具奉之撫順吉之長春亦依次設立凡刑事民事案件詳定手續開庭則可觀審判詞則必公布上訴則定期限訟費有制傳逮有法有檢察官之搜查證據可代起訴相驗則參用醫官罰金拘留根本法律無任意高下之弊又改良監獄實停刑訊無私刑峻供之陋習仿懲勸場之意設習藝所養其廉恥授以技能於是訟獄一事乃一洗從前種種之弊端民間稱便司法之程度進民間之觀念亦進其商埠及繁盛之區皆要求設審判廳查推廣各廳本爲立憲期限所有惟法官難得款項亦未易

籌因擬擇要於營口新民等處先行設立其次如遼陽如鐵嶺亦正在籌辦若以地方官兼理司法則大非所宜且新政繁興如學堂如巡警如選舉及各項表式斷非一人精力所能及因循敷衍其勢也故東省未設審判廳之處亦擬另派發審委員以襄助之而不用昔日之所謂刑幕者蓋以造就法官剷除積弊也故各廳之推廣不獨東省宜亟圖之卽內地各省亦應及早布設一旦新律頒行庶有司法人才心知其意以躋實行之一日法律爲憲政始基非細故也

二規定新律 法律無久而不變之理蓋法律必視政體爲轉移欲改政體必先改法律今日者預備立憲之政體也則必有預備立憲之法律竊見修律大臣所定刑律總則分則草案仿歐美之良規仍不失中華之禮俗均合於立憲政體

間有應酌改者業經分別簽注在案就對於內者言之如現在組織社會辦理選舉等事則皆舊日之所無而法律之所不載也是豈可不專定條文以資取締就對於外者言之中國法律與各國異以致受種種之虧損今既欲立憲以躋於五洲同等之列若法律不改或改而不完備則終無收回領事裁判權之一日矣若僅就東省之關係言之外人各處居留已成雜居之勢時有訴訟之事且有審判廳地方一切取締規則均已日有進步故外人亦頗稱許而亦有願赴我之法庭起訴者徒以法律未改故收效亦僅及於一半若改定以後東省必易於實行而首先收法律之效果此可以斷言者至於強盜之不減刑叛逆之不可恕則法律大臣本有另定專條以爲暫時通行之準此亦過渡必需之條件也若新

定法律則必力求完全以免爲外人所譏侮而欲各省之漸次實行則尤以劃司法一部分而使之開立各廳且培植一般普通法政之人才始

王商務

一改良商會 東省物產富饒然皆生貨無製造之場其出口者僅糧食皮毛藥材爲大宗近年洋貨灌輸稅額輕重懸絕往往有華貨爲洋人承領運單希圖免稅者整齊勸導之方責在商會乃東省各處商會於商務盈虛之消息及提倡實業抵制利權之旨杳不講求惟包攬商民納稅定其規費仍不免時滋弊端一有不遂傳單各商抗不交納又復任意控訴羅列多名一紙公呈直達商部刁商借其勢燄亦起而與公家爲難初則傳單抗阻繼則刁狡之徒從中播弄甚且

激爲聚眾罷市之舉動夫商部定章商會有事可徑稟商部
原以通達商情維持公益且彼時各省尙無監督商務之官
今罔顧公益龐然自大公家所力爲提倡者商會得從而敗
壞之東省商務已爲外人營業之場而欲望其競爭貿易挽
回利權其可得乎卽如奉省商會卽舊日公益會所改會中
人本皆曰俄戰爭時接待供應之輩把持聯絡以至於今謂
宜澈底清釐從新組織別定投票選舉辦法必使之受勸業
道之監督範圍庶幾官商一氣力求振興保護之方亦廓清
商蠹之一端也

二自闢商場之規畫 東省無自闢商場之口岸營口一隅
已受大連之劫制加以約開商埠已在兩強勢力之中是陸
路之商務不能出東清鐵路一步非有自開不凍之口岸斷

不能吸收利益伸張商權爰勘得錦屬之葫蘆島地方飭工
程師實行測繪并囑招商局派輪行駛咸稱風迴水聚絕好
市場因詳細繪圖并估計工程一切用款倘能實地經營則
較日本鐵路轉運貨物路途爲近京奉商務當更暢旺且我
得自關口岸一切利權盡歸我之操縱誠爲莫大之利又勘
得甯遠州南之菊花島可作軍港之用查此島列於英國海
軍所備之遼東海岸圖內是早爲外人所測勘一切運築均
爲合宜亦飭工程師詳勘繪圖以爲他日建築之預備此皆
應籌款合謀以圖先事開辦者也

三疏濬遼河 遼河上游舟楫少通自遼源州三江口地方
三支匯流水勢乃大始有估舶之利三支者東西遼河及新
遼河也往者舟帆櫂比蒙地物產賴以輸入近則節節淤滯

營口商務日見減色固由於鐵路之奪利亦因無修濬之方故船舶稀少日益蕭條也前曾於通江地方發款修治工程甫竣但枝節爲之此暢則彼滯仍非一勞永逸之計復飭工程師前往履勘蓋以遼河之關鍵在雙台子疏通之法擬於雙台子河口建一水隄限定水量截流平分並距雙台子河口遠處築一水隄於水漲時可從下流順駛又設一水閘以資截流此隄須去河口較遠將近雙台子之河身淺灘挖深俾水勢得以疏通使可趨流遼河舊道並購挖河機器等切實估計洵屬必需之款擬由官商通力籌辦以期無誤要工至遼河灣曲之地計有一百六十二處疏鑿歲修所費不貲若圖大舉不如另挖新河河綫與通江至牛莊之河同一方向改取直綫便利良多然所費需一百數十萬元目前固無

正書卷三十四
三三
此財力今爲切近之謀則築隄一事當及時籌辦也

退耕堂政書卷三十四

退耕堂政書卷三十五目錄

函牘一

致紹侍郎

致瑞閣學

復岑宮保

致鐵尙書

上慶邸

致鹿中堂

致朱經帥二十一函

致程雪帥十一函

退耕堂政書卷三十五

天津徐世昌

函牘一

致紹侍郎

昨聞承准飭撥之鎊餘銀三百萬兩有按京平發給之說查滬道承解此項鎊餘銀兩係按庫平撥交向來大部發放餉銀雖有時按京平發給惟此款係指明請撥之款若於原平有所出入似有未便且東省財政困乏異常利源少裕一分卽公家多受一分之益惟有仰祈台端主持飭照庫平發給實深感荷至前懇設法兌撥大寶一節仍懇大力幹旋俾得酌撥若干尤所企盼想執事關懷桑梓無不樂爲成全也

致瑞閣學

日前趨詣未獲晤譚惠臨又復失迓悵阻奚似前懇爲貴總行墊撥鎊餘一項由庫酌撥大寶若干蒙允酌商曷勝感荷近聞庫存大寶現有數百萬兩皆留備貴總廠鑄幣之用既有定用之款自不敢冒昧陳請惟思貴總廠鑄造銀幣似未能一時遽用數百萬之多擬請設法暫爲挪撥若干將來各省解款由部飭多解現銀一轉移間於貴總廠鑄幣之需毫無妨損而敝處免多虧折已覺受賜無窮矣叨在至交冒昧屢瀆仍祈鑒諒

復岑宮保

頃展惠示敬悉一一田副將中玉弟調之赴東實以東省戎備廢弛經奏調一鎮兩協前往以固邊防所有軍隊一應事宜不能無諳習兵事之員爲之綜理今閣下以粵事孔亟奏調該副將隨同赴粵萬不敢不曲體公忠遵囑奉讓當飭其將經手應辦之事趕

爲拊擋卽令趨投麾下以副殷盼時局多艱人才消乏竊又不禁喟然

致鐵尙書

前承准撥第三鎮暨混成一協計奉

旨已久弟日內亦卽出關該隊急須開拔前已派員至奉天鐵嶺等處將第三鎮到奉駐紮處所妥爲預備昨接曹統制銀來電必須散放贍餉退伍後撥補新兵方能開拔務祈迅飭將贍餉退伍兩事早日辦竣俾利遄行至該鎮軍裝器械馬匹等項諒大部已飭預備周妥敝處前派田副將中玉充兵備處總辦旣爲雲帥奏調以去急切未得替人所有該鎮一切輸送事宜仍懇由尊處偏勞代爲籌辦實深感荷其運費奏定數目如有不敷當由敝處設法籌辦至敝處餉局已派王守荃本總辦各該鎮協現食軍米尊

處刻已籌備若干可供幾月之食務祈先示以便轉飭該總辦接
續籌備本年應用袂棉皮各軍衣想已製齊可由應撥餉內照扣
墊價至該鎮協開差以前如有具借餉項亦可俟到防後按月劃
扣歸墊弟行色匆匆諸務紛紜籌備萬難周洽統祈卓裁經畫逐
一詳示不勝企禱

上慶邸

違侍鈞顏傾心結轡緬懷匡濟彌切依馳章京前在京時仰承策
訓籌邊至計非籌借巨款亟圖補救恐無立足之地抵任以來瞬
將匝月承凋敝之餘值競爭之會材軫任重時切悚惶竊查東三
省地方久在俄日勢力範圍之內近復擴張權利各借外債鉅款
以爲力征經營之具意在綜握三省財政操縱商權壟斷實業而
我之商困於稅民苦於匪財棄於地前途至爲可危故欲治三省

必先整理財政欲整理財政必先開設銀行願欲開設銀行非有二三千萬成本不能流通貨產減免雜捐抵制灌輸廣籌生計章京通盤籌畫惟有息借國債二三千萬兩或三四千萬兩乃有措手之方謹將考查所及爲爵前約略陳之東省捐稅繁重名目甚多商民交困自試辦統捐以來收數短絀而商民轉謂不便自非酌量減免不足以蘇民困有銀行乃能補助行政之費而免捐可以實行此一原因也三省無現銀洋圓制錢市面所用第有小洋銅圓兩種官銀號虛幣過多不甚信用而日俄乃得以虛楮易我貨物操縱市價莫敢誰何有銀行乃得整齊圖法使歸一律商民知所信從外人無從壟斷此一原因也三省可辦實業實難俛指以數及今圖維尙可歸我興辦若無實幣以相維持恐將來漸入外人之手有銀行乃可吸收資本開拓利源此又一原因也章京

前次侍聞訓誨卽謂三省財力不敷必須籌借洋款碩謀盡畫欽仰無似現在體察情形益佩洞矚幾先舍此實無辦法伏希鈞座主持於上三省得有更新之望而章京亦知措手之方於大局或有裨益謹擬卽日將以上情形密陳具奏伏乞賜予維持原奏乞免發鈔至利息之多寡期限之遲速籌抵分還之辦法容與外國銀行妥商俟有端緒再隨時咨商度支部奏明辦理并將辦法詳細稟聞聽候裁度

致鹿中堂

前發蕪函藉伸悃愫諒邀鑒察姪到奉以來朏逾匝月承涓敝之餘值競爭之會事機至迫端緒紛繁任重材軫深虞隕越統觀東省捐稅煩重商民交困圍法錯雜財政不修致令貨棄於地無力興辦外人日肆覬覦動至釀成交涉故欲治三省必先整理財政

欲整理財政必先開設銀行惟東省財力支絀萬無此大宗巨款現擬奏請籌借國債二三千萬或三四千萬專備開設銀行之用蓋兵燹之後民困未蘇捐稅一繁地面愈敝有銀行則可以濟行政之費而雜捐可停其利一東省無現銀現洋所用皆虛楮圜法淆亂弊乃愈滋而日之軍用手票俄之盧布到處通行無從抵制有銀行則圜法可以整齊得操縱三省之市面其利二東省可辦實業甚多外人恢張權力漸入範圍口舌與爭其何能濟有銀行則生利之事可以及早興辦其利三此事前在京時已經面奏並與樞府籌議及之現在體察情形非此無以爲行政之樞紐卽日具摺密陳邸座前亦另行稟述長者蓋猷碩望尙求力爲主持至借款數目雖覺稍多然東省向無攤款與內地不同且三省地域甚廣分之則尙不見豐盈將來利息年限及分還籌抵各辦法必

視東省力所能及詳慎妥擬俟商有端緒再行奉聞

致朱經帥

奉書承示各節備極詳晰余豐前飭回吉刻想已到各事當已漸有端倪財政頭緒紛繁最滋流弊可否卽設度支司考核旣便事亦劃一官帖局弊竇尤多更宜澈查以資整頓派差名單秩序釐然分司辦事基礎已立文案總辦改委尤妥子明及薩道蔭圖均已到奉兩員赴任飭知擬卽在此辦理並附片陳明奏札各稿均會台銜其呈畫之稿卽可留吉備案哈爾濱道向兼交涉局總辦又有九釐捐及木石票費兩項均向歸管理擬卽照章會委該道接辦以杜道爲會辦幹臣已到擬卽籌定分司辦事之法俟諸事布置稍定卽改照新章試辦前任移交交涉案件尙有數十起現已開議奉省得雨尙不甚旱吉省如何便祈示及將軍印壹顆容

再奏咨繳銷嗣後來往函件較多可挨次列號以便考查自此函起卽列爲第一號餘續佈

又

現派行營翼長張勳前往吉林剿辦土匪業經札飭遵照所有該翼長應領津貼暨翼長處應設各員弁薪餉銀兩應統由吉林省照數支發以資辦公茲將原札並該翼長處加添員弁清單鈔錄寄呈察閱卽希查照辦理爲荷

又

前承見示吉林公署簡章規畫周詳無任傾佩吉省現未設承宣諮議兩廳凡不隸各司之件均歸文案核辦故章程稍有區別不揣固陋略以鄙意參訂一二茲特鈔稿寄呈仍請卓裁茲事甫經創辦以後應行損益之處尙可隨時釐訂也

又

屢奉電示藉悉旌節已過哈濱沿途宣布德恩諮詢疾苦望風逃聽士庶傾心曷勝佩仰長春一隅爲南北極要關鍵日人在彼極力擴張蹈瑕抵隙妄生事端所有交涉罔不困難該處地方官及辦理交涉人員稍不加慎卽墮術中非得深明法律洞悉外情膽識兼優者不足以相抵禦此次轎車所及祈詳加考察近日交涉情形如何日人舉動若何隨時見示目前添設道缺設治一切尤關緊要諸仗蓋籌

又

甯古塔迤北蜂蜜山一帶形勢扼要縱橫各數百里地產蕃富近年雖設局招墾而利未盡興馬賊滋熾亟須詳細調查妥籌整理茲派遼陽城守尉德裕前四川候補知縣陳玠並攜帶測繪員前

往調查川資已由三省支應處發銀一千兩如有不敷祈就近由吉撥付並飭知各該地方官妥爲保護照料俾利進行是爲至要

又

近派遼陽城守尉德裕等帶同測繪委員前赴蜂蜜山一帶調查墾務卽擬赴吉所帶一緘屆時當塵台察該處地利未開亟須設法籌辦以關利源惟馬賊滋事不無可慮德城守尉進山時務希派兵沿途護送並飭該處總理墾務田同知葆綬彼此接洽妥加保護並撥馬皮帳房以便入山隨地測繪是爲至要王道崇文吳監督祿貞派查間島夾皮溝礦務各節業已電聞總以分別查勘較爲妥速繪圖人卽由尊處酌派隨同王道前往務使另繪詳圖以備查考

又

昨交德城守尉帶上兩函業已詳陳一切蜂蜜山道途寫遠查勘頗爲不易發給川資銀一千兩深恐不敷應用已飭由三省支應處共發給銀二千兩俾利進行到時卽希接晤指示爲禱再成司官沂昨曾來稟並呈酌擬吉林巡警急切應辦事宜四條據稱已由台端轉飭巡警總局核議辦理該司官稍諳警務所擬各節似尙切實可行希酌核飭辦可也。

又

三省邊事現在漸次整頓惟經營各種事業必先謀交通便利故開通航路實不可緩查松花江黑龍江舊日本設水師爲我固有之航路日久廢弛外人因利乘便駸駸反客爲主若不速籌抵制不但三省脈絡不能貫通且江權盡失操縱在人長此不變豈能自立前與雪帥議興三省航業擬於江省設一總公司購置輪船

數艘行駛黑龍江松花江嫩江額爾古訥河等處載運客貨聯絡邊疆爲計至便惟造端宏大需款至鉅非吉江兩省合謀恐難有成尙希公力爲主持定兩省合辦之局俟有成議卽經始布置一切所有用人籌款設局購輪等事當無難和衷商辦也

又

昨據吉安軍哨官張永泰稟稱下城子穆稜河街孟知事廣鈞署內差役王立臣執該署外委崔作章名片設局誘賭任意苛罰後恐情節敗露又將各犯嚴懲等情當以德城守尉當在該處經過將原稟交令查覆茲據稟查得該役設局聚賭百計叢生該知事旣未將該役一同嚴辦竟欲借修署爲名勒罰各犯又恐事機不密被人覺察乃復飭傳各犯答責嚴押縱役殃民莫此爲甚等情前來該知事管領一邑當如何潔已奉公以安閭里竟敢請張爲

幻擾害地方種種情形殊堪痛恨茲將原稟寄上卽希卓裁飭查核辦以肅法紀而挽頹風

又

東三省鹽務總局自今年五月派陸宗輿爲總辦楊毓璋爲會辦前任舊票頒用未完九月以前所填皆係舊票至九月初一日起一律改用新票惟東省鹽課向章本係一稅不復再徵故票內有沿途局卡驗票放行等語奉省久經遵辦趙次帥爲防夾私起見曾於要地酌設補徵局但補徵煩瑣頗礙商銷此後仍擬裁撤惟聞吉省所設鹽釐各卡每擔六百斤僅收鹽釐五百文不問來自何地有無官票故日人運租界私鹽由海參歲鐵路下灌吉省獲利甚鉅鹽務總局曾已派員赴吉調查數次均言私鹽充斥異常今爲東三省整頓鹽政之計自無庸再分畛域擬先於吉界綏芬

河設關杜私所有吉黑之冬卡均應改爲緝私局常年設立不分時季又東省無引無商以致銷數漫無把握現已飭三省鹽務總局招奉商之殷實可靠者先開商銷總會再按各府州縣地段招本地之商承辦事已議有端倪吉省紳商來奉預議者亦多一俟商銷總會章程安定後再咨行台端飭吉商籌議如照此辦有端緒則東省鹽課似較從前略有把握惟現在商議試辦之初應奏應咨尙在未定俟弟到吉再行面商

又

張道抵到奉屢據面述商埠公司集股情形查購地開埠本無招商集股之理現商情既不踴躍似可趁此收回所有一切事宜併入交涉總局或附設商埠局便可經理無須另有公司名目該道現稟辭旋吉其人尙明白有用卽請察酌另派一差將此差裁併

可也

又

前接漾電商撥陸軍兵隊駐甯當飭曹統制派撥步一營馬二隊
山礮二尊前往策應昨經電陳諒邀台察查陸軍駐紮最忌形勢
渙散不相援應甯古塔一帶偏近俄疆實爲東邊重鎮將來擬撥
步隊一標馬隊一營山礮一隊開往該處扼要駐紮惟道途寫遠
地勢未諳軍隊運輸諸須計畫已飭由曹統制派員先行查看其
到防營舍尤關重要派往之員人地生疏仍請台端飭人預爲籌
備是爲至要至此次開去營隊隨營大車恐不敷用並請代備車
輛俾利進行

又

承示官帖局各弊至爲確晰商民旣信用此帖自應照常行用以

辦費萬金望卽發給買空賣空案黑龍江尙未查來俟查到卽擬覆奏子明所查之件亦祈屬其查明速報爲盼

又

聞吉省調查局編輯蒙話報一種現已出版奉省如昌圖洮南各屬從前均屬蒙荒新民之彰武鎮安以及法庫廳則與蒙疆犬牙相錯祇以語文隔闕遂致情誼難通行政機關諸形窒礙請飭知調查局按月照寄該報一百分擬交提學司分發各屬分別派銷亦擬通蒙漢之一道也至此項報冊每年需價若干並望開示以便飭屬照繳

又

松花江設關一事頃接稅務處來函以拉哈蘇蘇地勢適居松黑兩江匯流之區爲沿黑糊松第一門戶一經設關卽當開埠旣經

開埠卽當通商門戶旣開便不足據爲險要與要塞地點有無妨礙且該處照約不在應開商埠之列而在邊界百里之內無論往來貨稅能否不按陸路章程辦理尙須與俄使磋商卽使磋商就緒而得不償失亦覺非策擬請揀派通達兵事人員前往踏勘再行核議

又

接誦惠函並清摺三扣藉悉種切吉省剿匪保案張鎮所開原嫌太多現飭詳核其有實不合例者卽予酌減免干部駁巡官法芬佈一門忠義應予破格獎勵當查例核辦長春一席謝道旣已作罷應選才具優長者以當此任蓋此地當日俄之衝事繁責重稍一不慎動成交涉非勤敏廉潔明達中外之員未易勝任阮守前在延吉未能措置咸宜而長春迥非延吉之比尤未便稍事遷就

依蘭地接強俄亦極緊要前後兩守均不盡滿人意署新城守許元震官聲尙好於長春一缺當可勝任或升署或升補尙祈卓核且有戚守指日到吉亦須位置也事變日亟邊地需才自今三省局面非破除一切積習胸中稍有經緯者不克任地方之事與其事後懲罰不如事前矜慎區區之見尊意想以爲然

又

蜂蜜山議設府治不日當見施行前派往該處調查委員德裕陳玠二人業經回奉據開陳該處情形有亟應籌辦者茲特條列如左

一查疆界自咸豐十年立約後中俄交錯沿江沿湖有天然界綫惟與凱湖之西北角界綫不甚分明光緒十二年重勘琿春東界其條約地圖外間無可攷證據該處年老土人謂五色旗之

東河邊尙有中國卡倫其基可指南站地方蓋同治初年俄於興凱湖西岸紅土巖設官治理爾時航路未通以文報之故借地安站沿湖凡四處此事總理衙門有成案南站距俄境祇三十里俄借地之後遷民耕種迨後航路通行三站撤還惟南站不撤並竊移五色旗東河邊之喀字界碑於南站東小河之東岸移老黑白山之拉字界碑於三索通計佔地百五六十方里土人言之鑿鑿吉林衙門應有成案請查明光緒十二年重勘琿春案卷並合璧地圖以憑辦理一面並知照外部查取舊案一呢嗎口地方臨烏蘇里江西岸與穆稜河北岸相聯本係三姓副都統轄境前經長將軍奏請於蜂蜜山設局招墾自改設依蘭府歷任鄭守國僑王守嘉禾皆雇用俄人收稅百端苛索現署德守始派委員戴鶴齡開局收稅且大張放荒曉諭收回蜂

蜜山小票不少又聞呢嗎口下五六十里拉巴沁地方一帶林木賣給俄人砍伐四圍共百餘里凡沿江擋魚沙灘灑網以及一草一木有漏稅者苛罰押追動卽棍責自設局以來相沿如此辦理民怨沸騰現在雇用之俄人尙照常收稅請嚴飭查究一烏蘇里江東岸有呢嗎瓦口雞心撓頭蘇城等溝華民約四五百家自江東劃歸俄境華民安土重遷納俄租稅近有噠子頭目名富歌者能操俄語句串俄人多方欺壓且挈華民六人誣爲鬍匪置於俄之雙城監獄此事在濱關道衙門呈控有案現在各溝居民日不聊生情願拋棄房產攜帶牛馬什物移回西岸而俄人嚴守溝口不准渡江又穆稜河北岸黑嘴子地方柴姓長子因俄人槍斃羣猪出與理論亦被轟死冤慘情形無可告訴亟應設法援拯

一 招墾局有從前交清荒價小費領出小票而接替局員又誣領戶尙有滯欠者該領戶在吉省呈控有案今春委員復丈東西兩溝地畝所有丈出餘地一概不准原戶續領並將各戶開墾成熟之餘地排擠一處重價賣與新來之領戶以飽私囊其復丈之時每戶必索小費有多至數百吊而始開繩者且丈荒員役領有官費而車馬伙食仍派墾戶供給稍不如意多方刁難其狼狽爲姦無弊不作者莫甚於西溝委員李雲卿差官吳振東曩年居民私墾熟田已准原墾戶照生荒價一律報領該委員等竟敢違章私索倍價有收條可查該局原領續領冊籍祇有丈出餘地三十餘畝其原領續領數目并無冊籍可查請遴派幹員到彼澈底根究

一 招墾總局設在蜂蜜山荒界百餘里外穆稜河街原設精銳營

一營吉安軍三哨保護招墾事宜精銳營管帶李步彩縱兵擾民不堪縷述駐紮分局側之王哨官騷擾尤甚凌虐朝鮮墾戶尤無人理原所募之兵多係鬍匪稍不遂意動輒爲變以致居民日受荼毒不敢開罪亟應設治更換方足以資保護

一招墾之難易視鬍匪爲消長今年春夏鬍匪羣聚於青溝嶺故墾民一戶不來其來者亦被綁票而去下城地方宋姓之子夏間被綁至今仍未贖回入秋以後移於五站黃花窩集及太馬溝橫道河子等處今冬因鐵路有兵無處散布是以太馬溝內尙有匪黨一二百名趕造房屋以禦嚴寒明年春夏其燄更熾應請密籌預爲防範

一綏芬廳分防知事孟廣鈞以修衙署爲名往往藉案苛罰十月間派差赴下城地方拿獲賭博一案業已罰錢三四千吊尙未

取保釋放嗣因此事爲該委員查悉立傳賭犯到案不索罰款
笞責押卡并將各犯等住房封閉嚴寒時令使數家妻子飄流
失所以此舉動亦殊荒謬請併予查究

以上諸端於該處均極有關係尙祈卓奪飭查分別核辦俾邊境
獲保治安民間少紓困苦所有設治辦法容再就商一切以期完
備德城守尉原件並鈔呈台察

又

前奉外部寄交中俄合璧地圖共計五張特飭照繪一份寄呈台
覽其中遺失第三張卽前次向吉省覓補未得者闕此一段計自
啦字界碑起至瑚布圖河口止請遴派明白人員就地理事實上
詳細攷核另繪一帙庶將來勘界立碑方有把握此圖亦可期完
全也卽希卓核

又

前奉外部函以中俄界務不甚分明界碑年久遺失亟應詳細調查曾經詳達冰案所有合璧地圖第三張曾否覓得中俄約章及約章續編吉省有無此冊堪備考核卽希示覆爲盼

又

前據簡持函稱琿春開辦巡警因款項不敷議將車捐歸警局徵收每月提七百文撥歸餉捐局餘作爲巡警經費查吉省車捐章程驟馬馱捐卽在其內現琿春餉捐局雖將車捐移交而驟馬馱捐則仍照舊徵收琿春運貨用車者固多用驟馬者亦復不少一到夏季雨多之時沿途水積泥深車道阻滯盡用驟馬幾無車捐可收故去此一項車捐必大減色如照原議每車以七百文撥歸餉捐局則留充巡警經費者已屬無幾祈仍照吉省車捐章程將

騾馬馱捐統歸警局自辦核計馱捐收數以若干撥歸餉捐局似此辦理較有實濟云云瑋城經費本絀原函所陳尙係實在情形可否飭下餉捐局照吉省現章以歸劃一之處統祈卓裁指示遵行

又

頃接外部來函以中俄界務亟應詳加訂正所有界碑界圖吉省當可覓出確實證據茲將原函鈔呈冰案希飭詳細搜採照錄寄下以便轉達外部作將來勘界之助

致程雪帥

到奉浹旬凡四奉惠楸前交榮參領覆帶一函諒已早邀鑒及談道徐丞等先後抵瀋備述壹是承詢各節已囑該員等隨時轉陳前奏刊黑龍江省關防交榮參領恭賚回江想已到矣弟以瀋事

紛乘未克遽行我公惠然肯來至所殷盼一切事件既奉

諭就近會商擬於開用關防電文內附奏聲明昨曾代擬電稿寄奉台覽其餘各節另開詳覆仍希酌裁爲荷

一江省奏報各事自弟受事之日卽照新章辦理

一江省關防前已奏明由公先行開用並鈔錄原摺寄呈尊覽其將軍印信弟既奉

旨兼管三省將軍事務似應送交弟處奏明咨銷以昭慎重

一調用人員本所最亟惟前次單開各員如張元濟姚錫光徐致善諸人皆知其必不能來汪榮寶玉權孫培諸人皆弟在京舊屬言明不願來東陸宗輿黃維翰陶仁榮等已經奏調聲明三省皆可通用其餘各員尙須與公詳酌至擬調奉省知縣李鴻謨等四員容與唐少帥酌定後卽飭前往以資任使

一財政最關重要籌撥現銀一節鄙見亦同前在京與部籌撥三百萬兩現始解到百萬卽全數撥到亦爲款無幾尙須另籌辦法此事似須合三省統籌併計俟公抵奉當再參商辦法

一殖民一事本東省最要大政昨蓮帥亦來電商遷移辦法惟天寒路遠所移之民必出於情願方無窒礙已經電覆蓮帥俟其轉飭詢明復到再議設法安置

一新軍駐紮省城營房勢難猝辦暫仿俄式趕蓋窩棚期於冬夏皆宜軍隊撥駐數目刻尙難定擬請先按步隊一標馬隊一營礮隊一隊預備房屋俟有棲止再定開拔日期

一摺件秋審及于得水一案例限攸關可卽會銜逕奏其餘照例摺件可先繕齊仍請寄閱後卽由此間拜發免致往返稽延

一三省興辦要政均彼此互相輝照聲息較通自應仍照舊章辦

理

一廳司人才亟宜籌備弟甫經抵任三省人員均令暫行照常辦事一面籌調一面考驗查驗既真再商位置以免失才之慮

一文報稽遲極關緊要電報本宜徧設惟現歸督辦電政楊道管理且其中尙有交涉未曾磋商就緒文報局寄函亦須隨時考察飭其認真經理勿誤要公

又

昨日下午由徐丞呈到惠函並奏事摺片共五件閱畢卽飭包封交文報局賚送惟綽克大賚糾集多蒙阻撓荒務槍斃蒙員哈豐阿實屬窮凶極惡目無法紀此事關係極重縱之則恐難圖激之又慮生變鹵莽不得優容亦不得閣下批飭詳查並咨行該盟長自是老成持重之見一俟查覆到日果無啟衅別故務祈設法弋

獲治以應得之咎庶生者知威死者瞑目該旗荒務尙可措手否則各蒙旗效尤隱患方深不獨有礙荒務已也尊意以爲何如

又

昨連奉牋示四緘備詳種切其十號十二號所開巡警局呈請設立易俗報社藉開風氣事屬可行惟報例不可不嚴登載不可不實稍有不慎最易惑人聽聞卽希轉飭該局務須嚴定宗旨以開民智而期持久至黑水廳呈轉商會請撥現銀疏通地面各節旣屬實在情形自應照准擬批甚爲妥協可卽繕發附來鐵路交涉局暨提學司請發五品功牌共計稿批三件亦均閱悉現已遵囑判行以上各件均彙交徐丞賚呈餘容另覆

又

頃接呼倫貝爾蘇副都統來咨俄商設立製鹽公司兼製皮革請

咨部立案各節查製鹽爲國家專利品華商尙禁私運豈能授外人以製鹽之權檢閱原咨請以餘利三分交地方衙門呈請咨部立案實屬貪徇小利有乖政體卽製造皮革亦爲坐失利權萬難核准已經嚴行駁飭在案茲將原咨錄呈台察卽祈遴派委員密往呼倫貝爾地方詳查此案緣起如何該副都統何以遽行代請咨部其中有無他項情弊以及該處一切事宜查明據實聲覆爲要

又

頃奉手示並慮倅用章所呈手摺具悉種切此次俄人向該都統要求設立公司雖無別項情弊惟製鹽製皮關係蒙民生計而製皮尤爲大宗豈可將此利權授諸外人目前旣經拒絕特恐俄人覬覦之心終未肯息必多方運動以求達其目的仍望隨時稽查

先事防維俾該處吏民勿墮其愚弄之計至於開拓利源應興應辦之事諸祈規畫指示再行就商辦法

又

兩奉手書並奏稿圖說各件具悉壹是尊恙尙未健全深用馳係德醫士已允赴江當屬其從速就道蘇副都護咨請開缺該處關係綦重擬卽派宋道小濂往護其奏稿遵由此間繕就拜發以省周折江省財政竭蹶百廢待興賴公苦心支拄始具規模及今經營自當力求進步尊議設總銀行統一三省財政實爲目前最急之務惟握三省之機關以探縱金融振興實業斷非區區資本所能集事刻擬籌備鉅款專爲生利事業之用計亦從銀行入手以期呼應靈通聯爲一氣業經具奏請旨辦理俟規畫稍有端倪再當就公籌商佈置一切務祈秘密勿宣爲屬綽克大賚匿迹扎賚

特王府尊處檄飭嚴拿辦法甚善惟該犯既恃有逋逃之藪恐展轉藏匿不易就擒當設法聯絡該盟長扎薩克等俾彼有所震懾爲我所用庶不終致漏網扎薩克郡王烏泰前借俄債經奉省籌款墊還茲復積欠至二十萬之多既不能再爲賠墊亦不能聽其私相勾結馴至不可收拾擬請詳細查明情形迅速奏請辦理目前務飭宋道留心確查毋任別生枝節開埠十款籌畫極爲完密所有一切辦法已飭徐丞轉達矣

又

接奉惠函所論歸併鐵路交涉局一事宋道亦經具稟縷述爲難情形惟該局設立日久忽議更張公司必不承認且另設交涉局我之權力未擴張彼之要挾轉逾疇昔非籌一完全辦法不能抵制容弟到彼察看情形再行就商辦理至該道所請奏派督辦大

臣尤難做到此路性質與京漢京奉等路迥乎不同先既鑄錯今忽派一空名之大臣豈能有絲毫權利卽如鐵路合同明訂由中國選派總辦至今未能實行亦以形格勢禁不易挽回也木植合同前據經帥來電業已議定畫押呼蘭河一段該道力主爭回具見苦心未識能辦到否覆郵傳部稿一件已交徐丞寄達冰案矣

又

連奉惠書具聆壹是劉道函陳觀音山一帶大木被俄人砍伐無餘年來由近及遠入山漸深所慮甚是惟所籌抵制兩層均難辦到誠如尊論立約會無幾時復行政議彼必不從惟愛琿所訂條約俄人是否遵行查閱卷內僅叙大概應如何分設局所嚴密稽查之處均未籌及彼或竟不履行我亦無從防範恐一紙空文未必有效尊議嚴定森林警章按照稅則加意稽察實爲不易之策

卽請迅速籌辦鄙意尤宜設法限制畫分地段不使任便採伐藉以稍圖補救高明以爲何如倪道現已離江伊北洋有經手事件尙須回津一行俟其歸來再行赴江供差楊道在奉現充欽工局軍需局差使公如有事相屬當飭赴江聽候差遣江省艱窘情形弟所深悉數年以來賴公苦心經營始具規模正非易易現在三省旣不分畛域用人惟才是視公有所知卽希見告當不使任事者有所畏阻不得盡其才也現定二十一日入都如有應與政府商酌事件祈隨時開示以便商榷籌辦

又

再江省瘠苦甚於奉吉而薪津則遠不及奉吉該教員等舍而之他此人情之常本不足怪惟江省事事草創正資羣策羣力相與有成設非優給薪津不獨原有之人才無以繫屬其心卽未至者

亦將望而裹足江事更難措手公議三省統籌畫一辦法極是極是現正通盤籌畫以期一律目前應如何加給卽請尊處酌核俟弟到江再就商通行永久之法至議紳等呈請送學生赴京師大學堂留學製造標本及添購儀器均係切要之圖自應照辦卽請就近核定封汝諤梁兆璜二員本係江省所謂自應撥赴江省惟吉省薪津若干似難從減並因該二員而牽涉全體亦不可不爲慮及也

又

接書具悉種切尊恙經西醫調治漸見輕減不日當卜霍然惟冀息心節勞善自珍衛是所切禱弟定節後啟行周歷兩省承屬先到江省商榷一切弟亦至爲縈系惟延吉邊界現因日人交涉事機甚迫且內政紛紜亦須亟爲整理擬仍先赴吉省稍爲部署再

行赴江大約不過一月旬留把晤當復不遠也尊議擬將江省法政肄習所併歸奉天改設三省學堂用意極善此間亦在籌及惟經三省合謀則規模當較擴充組織尤須完善現飭學司暨該堂監督詳細規畫恐倉卒尙難定議江省肄習所暫將章程釐定仍舊辦理且緩具奏俟商酌就緒定有辦法再行入告前奉旨化除滿漢畛域令各抒所見此摺可不必會銜卽由尊處逕行具奏可也

又

前奉手書預籌抵制俄人各節具見苦心規畫力挽主權無任傾佩俄人經營此路出以全力從前所訂合同業經鑄錯一旦欲爭回已失之權殊非易易所議鐵路各站由華官添設巡警自屬善策惟俄人能承認與否尙未可必當商外部以毅力謀之又聞徐

丞言及已有數處鐵路由我設置巡警者未知辦法如何若巡警雖係華人而主權仍操之俄人不過供彼役使則所失滋大祈將詳情示覆爲盼至於款項一節旣據宋道籌議有盈無絀似此層尙不難辦但能握有設施之權斷不因惜費而中輟也兵房圖樣甚爲合宜目前就已築者趕令完工天氣已寒其餘暫從緩辦昨奉樞垣密電令迅速赴京有面商事件以此往返耽延又須多日恐到江之期不免稍遲矣

退耕堂政書卷三十五

退耕堂政書卷三十六目錄

函牘二

致程雪帥三十六函

致唐少帥三函

致陳督辦七函

吳幫辦

七函

退耕堂政書卷三十六目錄

退耕堂政書卷三十六

天津徐世昌

函牘二

覆程雪帥

昨接初九日不列號之函承示海林五站有大股賊匪盤踞初一日有槍斃俄官俄兵劫去押犯重案經帥亦來電知照當一面電商外部一面飭由吉派兵在界外防守至應定鐵路界內任保護一節此層問題甚大目下恐未易辦到惟有仍在界外駐兵設法防護以備不虞又聞鐵路公司照會鴨綠站有賊匪集聚五百餘名等語該處能否撥兵駐防統祈卓裁辦理

又

江省現銀祇存二十餘萬金自應存貯以備公用似此區區卽儘

數提賣恐亦無濟商困俟弟到江再與我兄通盤籌畫以謀補救之方伐木合同關係吉江兩省利權出入甚大一旦遽易生手譬之盲人瞎馬摸索以行安能有濟仍應責成宋道以竟其事崑軍駐紮處所應照該軍原數撥隊填紮蓋以江省地面寥闊不如此不足以資鎮懾已電飭張翼長迅飭吳統帶俊升督帶五營並撥淮軍數營前往填紮原電鈔呈吳丞已回據稱貴恙日漸痊可欣慰良深邊地嚴寒伏維珍重

又

接奉江字二十六號手教敬悉壹是薩道密稟利害昭然如弗設法挽回誠如尊論將來開埠利未見而害反隨之現由弟處據情函達外務部反覆開陳以冀轉圜有濟與否尙未可知因思交涉之難至今已極而東三省尤甚兩強逼處以全力經營稍一不慎

卽爲所愚不獨此一事已也慶道所籌辦法尙屬因地制宜均可照辦其在陀羅山修署東顧拉哈蘇蘇江口西接觀音山據圖而索尙踞形勝惟距科爾芬阿稍遠與原奏不符且經營科爾芬阿可與畢拉爾路協領聲勢相接並可推廣遜別拉荒段若在陀羅山建治勢必不能兼顧鄙見如此仍請卓裁但百聞不如一見該道旣身臨其境卽飭該道酌核辦理並繪圖呈閱以便查核瓊瑋商埠緩辦極是各該處分期開埠實屬無此財力况自開一節能否做到尙未可定自應慎以圖之吉統領請緩修訥謨爾河營房多守因病請假均應照准綏化一缺仍由尊處揀員接署廖守已飭赴江其餘詳細情形諭令徐丞稟陳洋醫想已到矣秋氣已深伏維珍重

又

接江字二十九號賜函讀悉壹是鐵路公司無理要挾殊出情理之外業據薩宋杜三道來稟函達外部在案詳釋蓋籌各節無一語不切中癥瘕公忠之忱溢於楮墨欽佩曷已然自庚子以來路權旁落久已反客為主彼既視爲固有安能輕以假人欲謀規復曷乎其難至鐵路大臣一說執事旣形之奏牘上年抵江又晤譚及之弟亦甚以揀派爲是及回奉後調查內容而條約所載華文與法文大不相侔已飭徐丞祕達冰案至於鐵路界外之稅自應力爭斷難稍涉遷就無論公司如何呵嚇我不爲動彼應無如我何萬不致以蠻橫手段出之爲全球所訕笑交涉之難不難在臨時因應而在預布先著譬之圍棋一著失則全局皆錯今日之事是也

又

連接江字三十二三並三十六號賜書一一讀悉札賚特梅楞綽克大賚槍斃蒙員凶橫已極該旗札薩克既不交案反以空文一紙爲該梅楞洗刷其情固屬可惡然未始非該梅楞要挾有以致之也尊處咨駁甚是甚是哈拉泡地方蒙古台吉聚眾行劫槍斃陳姓且係此次阻撓荒務案內之人似此野蠻舉動實屬法無可貸公派瑞統領督飭各營以勦匪爲名嚴緝首要各犯部署極合機宜仍當嚴飭該員申明紀律勿稍滋擾總期一鼓盪平消此隱患而綽克大賚一犯尤須設法誘致毋令漏網獲日從嚴懲辦不獨該旗有所畏懼而各蒙亦不致從而生心祈詳圖之興東道在陀羅山建署旣經詢明情形並擬於科爾芬左近添設民官專辦遜別拉荒務蓋籌洵屬周詳應卽飭其照辦綏化一缺尊意擬派廖守往署其人聞才品亦甚平常請足下詳加考覈如堪勝任卽

請就近檄委前往接替呼倫貝爾咨稱額爾古納河附近根河一帶俄人越境樵採建議遷民設法抵制自是要著能否作到殊難預必然其言不爲無見擬飭宋道通盤籌畫妥慎辦理以求有濟原咨交徐丞寄還奏事摺片七件均極妥協刻卽拜發摺稿六件俟閱畢再行奉繳

又

接奉江字三十八三十九號手書籌辦各事規畫周密皆可見諸施行惟移民實邊窒礙頗多費亦頗重恐難收實效俟到江時再行商定梅楞綽克大賚旣係要犯斷難任其漏網蒙古人人效尤將來關係尤非淺鮮該郡王及署札薩克旣無權力制此凶狡理應設法更換澈底澄究以期速了此案應請尊處斟酌情形查明此案前後情形擬稿會銜先行咨商理藩部有無辦過此等成案

商明後再行具奏一面務將該犯弋獲以伸國法而快人心庶蒙盟有所震懾以後經營他端較易措手也

又

接奉江字四十號來函具悉種切江省遵照部章改併營制具見擘畫精詳傾佩曷旣所慮裁併之後地廣兵單不敷分布極爲遠見目前暫就原有各營哨儘數改編不必裁減俟三省釐定劃一章程再行聯爲一氣方是經久之制惟兵額出缺不補以備裁兵加餉是爲要著宋道所擬設關辦法大致妥協海拉爾是否俄名抑係中國舊名請詳細查明再行酌核姚副都統勘修瓊瑋城署計需十萬金請尊處體察情形是否合宜卽行撥款迅祈賜覆爲盼弟現在籌商各事漸有端緒本月望後計可回奉屆時再定北行之期當先江後吉也

又

接奉四十四號手書具悉一一摺片九件均極妥協已交徐丞核對封發矣黑水廳遺缺關係綦重暫委李令代理甚善張中書到江未久正資臂助自應留江久於其事尊恙近見輕減否無任馳系旣已奉

旨賞假一月時局日艱尙望靜心調養相助爲理萬勿遽萌退志獨令弟以駑鈍之才謁蹶奔走於其間當亦高賢所不忍也

又

接奉江字四十五號賜書並附黑水廳呈文一件詳述商界困難暨銀根緊急情形宛然如繪自非設法補救不可近來商務之壞銀錢不敷周轉三省皆然而江省尤甚推原其故皆緣日俄事起俄以鉅萬金錢輸入三省江省又僻在北邊凡俄人應用之物均

就地採買各商無不獲利以致鋪張揚厲擴充門面加倍用人廣購貨物以期發達迨戰事一定物價頓跌商業亦因之頓衰而俄之現銀既不東來道勝銀行又隱握利權各商凡有大宗款項匯往內省者雖由票號轉兌然該票號大半以現銀赴該銀行兌換美帖調往各埠而現銀遂均歸俄人之手蓋以江省無外運之貨自無內入之款其勢然也似此情狀非籌有大宗款項妥謀抵制之方萬難濟事但戶部銀行不能卽設已飭倪道嗣冲徐守蘄霖前往該行面商據云至速亦須明年春季江省商力竭矣坐視固屬不可若再以現銀借貸杯水車薪其何能濟籌思至再不得不作急則治標之計卽如尊論先就現有之款提銀若干陸續出賣以濟燃眉至廣信公司借貸緩期則可免利則不可如一豁免則公司吃虧太甚將來恐無以自存未識尊意以爲何如弟不日赴

江到日再與我兄通盤籌畫以謀經久之計

再查江省進款除荒價外其餘均係錢款所有一切薪餉並辦公費均用銀款現在銀根既緊每月應放薪餉等項以五成按市行合錢發放亦疏通之一道鄙意如此是否可行仍候卓裁

又

接奉四十八號手書具悉壹是蘇都護既已交卸回省該處地方緊要末道宜迅速赴任以重職守所議伐木合同未識日內能否就緒如尙需耽延時日誠恐邊務久懸諸多未便祈酌籌辦理歸併交涉倉猝自難辦到尊議派杜道兼理兩局仍以干道爲會辦極爲妥協將來更張尙須費一番唇舌也鐵路兩旁荒務既於十月內報竣此後事務較簡派該局提調經理當能勝任尊恙近見輕減否懸念之至

又

疊奉五十號五十二號手書備悉一是尊論經營江省於政治風俗必先從事調查極爲確當不易昨准憲政編查館通行公文內開各省設立調查局一切辦法與尊指大致無異且各省派定總辦後該館尙須加劄派爲諮議員遇有事件該館得隨時劄飭該局查明申復是憲政館視該局以之爲一種補助機關鄙意該館旣頗有章程各省自須一律現應按照奏章設局試辦開辦之初奏報情形再分咨憲政館似不必另立章程也開設官報亦係要圖且令試辦再觀成績目前暫緩附奏蘭西壽令聲名旣劣卽可撤換弟擬

慈壽聖節後啟行約二十前後可以到江諸侯面罄

又

接奉江字五十一號惠書讀悉壹是謹將應覆各件條列於左

一綽克大賚一案該盟長果於一月內將該犯交出並派員督飭放荒固屬甚善否則斷難遷就仍請祕飭通習蒙語之員前往調查該旗台吉中稍明白者以備更換弟愚以爲該署札薩克如此昏庸眾台吉如何鼓惑恐未能遵我命令似非參革不能了局

一姚副都統請款十四萬興修各工我兄權其緩急先撥銀六萬兩建署修路城工暫勿置議甚是甚是但江省財政困難掘羅無術應囑該副都統嚴飭工員核實動用以節浮費

一江省地闊兵單自係實在情形原有防營萬難再減而老弱兵丁應卽大加裁汰卽請卓裁籌辦俟弟到江再與我兄熟商以期兵歸有用餉不虛糜

一崑軍現奉

旨調回關內呼蘭綏化一帶實屬空虛非有勁旅填紮不足以資鎮懾現擬仍酌撥奉軍並飭倪道酌帶陸軍刻日東上以慰綺系

一黑水廳一缺衝繁疲難非得心精力果長於肆應之才斷難勝任弟處亦無相當之員應彼此留意遴選俟弟到江面商酌補一人才難得各省皆然江省尤甚倪道不日前往卽如尊意責成辦理軍事楊道亦飭赴江至乞酌量委用弟赴江時亦必酌帶數員以資任使但邊才不多觀耳

一逃兵戕害官長聞之駭然該管統領實有應得之咎自應痛懲以爲軍紀不嚴者戒該逃兵等務乞設法弋獲勿令漏網是爲至要

一卞令調查吉拉林及沿邊各情極爲詳盡已面諭宋署副都統到任後體察情形或設官抑或設局稟明辦理

又

疊奉五十三五十四五十六號各書藉悉尊恙已見輕減精神漸旺至以爲慰但冀靜心調攝速占勿藥慶幸無似巡警總辦崇守瀚請假不歸自應委員接替其經手款項不實不盡尤當切實查究現既咨取該守回江將來卽請公斟酌核辦署興東道慶山已到奉晤談數次於該處情形略爲籌及俟到江時再就公商定江省擬設調查局一節昨已奉覆憲政館旣頒有定章似須一律爲妥計典緩至下屆辦理尊議極當奉省亦已請緩卽祈酌定疏稿挈銜會奏弟月半後卽擬起行定計先至江省籌商一切相晤匪遙諸容面罄

又

接奉江字第五十七號惠書並由徐丞呈閱摺片七件一一讀悉仰見籌措周詳已飭徐丞會同內文案詳核包封惟在花衣期內擬俟十六日再行拜發巡防隊改編四營附片奏明以便開支其餘各營俟弟到江再與閣下謀所以整頓之方試辦稅契一節雖著有成效不請獎敘甚得甯缺勿濫之義爲朝廷重名器卽示僚屬以勿邀功也

又

接奉五十九號手書開示各件規畫周詳至爲傾佩札賚特一案該盟長尙知畏懷卽應責成拏解首犯以後方易措手倪道所帶陸軍現已起行張翼長昨已有電飭吳統領先回籌撥奉軍卽行開往中軍統領漫無紀律已經台端另易統將或可整飭奉省法

政學員造詣較深者亦不多觀容當加意遴選以副雅屬前寄來附奏官報一片業經拜發如有未盡妥洽不妨隨時酌改弟現定十八日首途徑抵卜魁一切布置當可從容面罄也

又

連接賜書讀悉壹是旅京學堂經費既經認解千金即可塞責其常年經費以江省財政之困難學堂經費之奇絀安能舍已芸人直言辭謝甚是甚是來示又以三省銀圓未能畫一恐姦商暗中販運此等情弊在所不免但以吉省現在情形與銀圓成色兩兩比較恐難一律尙須通盤籌畫以謀萬全總之三省財政非籌統一辦法別無完善之策亦別無補救之方且日俄銀行分立利權外溢尤應妥謀抵制仍應與閣下熟計而兼權之

又

十九日接奉江字六十八號賜書並另啟讀悉壹是俄人無理取鬧是其慣技承示致外務部函稿措詞明辨以析有此一函部臣得所憑證據理以爭既可挽已失之主權自可消將來之隱患已飭徐守繕發矣信泰興洋行呈控王姓破壞合同英使出而干預意在索取王鴻猷尤出情理之外查立農具合同者爲王蓉第並非王鴻猷且王蓉第已認償數萬不能聽其要挾遂將王鴻猷釋放况王某因包攬大段控案甚多業經奏參歸案既經運動洋人橫干更難稍事姑容望嚴飭承審各員切實究辦不得含混了結也

又

接奉江字第七十一號賜書讀悉壹是我公關懷大局令人欽佩蒙古風氣不開最易煽惑可恨尤爲可憐僞示爲徐逆餘黨所爲

毫無疑議加以佛喇嘛傳單云云散布各旗其機甚微所關甚大何者蒙古佞佛自昔已然而迷信之深雖至捐軀破家而不悔其佛喇嘛之言崇信至極今果如此恐肇亂端尊意擬卽出示開導曉以大義爲未雨綢繆之計甚是甚是望速飭擬示稿寄閱繕發該喇嘛傳單一經調查屬實再行酌核擬稿挈銜奏參從嚴究辦綽科大賚與海元二犯亦祈設法弋獲一律重懲至鐵路界內俄人創設自治會殊出情理之外已據于道稟報咨請外務部照會俄使解散似可勿庸再咨事機環迫外患疊乘已有岌岌不可終日之勢吾輩惟有盡其心力之所可到者爲之成敗利鈍非所敢計也

又

接江字七十三號賜書藉悉壹是三省財政同一困難而江省尤

甚此項學費爲數甚多實難應命學部請

旨嚴催亦部中應辦之事且係屬通行之文並非僅爲三省而言我輩自顧不暇安能謀人卽諺所云雖有巧婦難爲無米之炊弟擬置之緩緩再先奏明公意以爲何如天氣極寒政躬想已霍然念甚

又

接奉江字七十四五六三號賜書並摺片一一聆悉濱江道修署奏稿甚妥惟吉款不知係從何項開支擬卽電詢並鈔稿寄閱一得電覆卽當會銜奏陳興東兵變情形聞之令人痛恨該匪等雖已就誅究由該委員等辦理不善旣經飭查俟稟到日再行核辦倪道現經奏派翼長辦理全省營務若仍兼三省行營營務處又有巡防營務處誠如尊論所云名目混淆事權恐致紛歧自應開

去三省營務處差使將巡防營務處歸伊兼領以專責成而資整頓片稿已飭徐道酌改另繕一併拜發至自請處分一節在足下引咎自責不失大臣風度極爲欽佩惟該匪業經勦滅地方救平弟意不願我公出此上瀆

聖聰亦諭徐道刪改具奏矣公意以爲何如吉林邊防餉款由度支部撥徐道日內解款回江一切詳情均由該道面稟不盡

又

昨奉手函敬悉種切三省鹽課聯絡辦法迄今未訂定章至爲惦念來示擬將兩省鹽捐劃清俟收一年後核定實數再由總局酌設分局並酌定劃撥江省之數具見盡籌碩畫欽佩莫名惟查江省抽收鹽釐稅率本輕誠以奉省已就灘收課到吉之後不加重徵所以體恤商艱不意近來自海參崴輸灌之外鹽反利吉江兩

省收釐之輕乘間而入以致外鹽充斥官鹽滯銷故此間總局爲求聯絡一氣抵制內外私販起見特令販商仍照向章一次完銀給以官票准其通運三省若係私販無論內外均無官票可憑沿途查驗不難立辨但是江省向設冬卡雖所收之數甚微而認真整理亦係稅源之一茲爲兩利之計而以臆見所及謹分兩策以質高明一則江省照舊設卡並仍照向章抽釐以應餉需惟遇無鹽務總局官票之鹽則一律沒收庶幾外私可杜所有稅捐及緝私局卡自宜擇要增設並宜與總局聯成一氣以便接洽堵私至緝私經費總局應如何分擔如何貼補之處當再從長計議此一策也一則江省派員自辦官運除奉鹽八四一五之課照章完繳外卽自行酌定官價運銷江省約所得之官利每年亦不下二三十萬兩此又一策也二策孰是尙祈卓裁至巴延察罕珠爾畢特

各處鹽泊聞其鹽味苦澀非再加泡製不可將來可否照奉鹽就灘徵稅設坵清私之法派員整頓辦理之處亦乞裁示再此次鹽商同義和運鹽至江業由總局完銀貴處驗放一俟辦法商定當卽改定運票式樣以免失信商民鄙見如是未識有無窒礙尙擬飭總局再行從長籌議總期聯絡一氣於官於民兩得其便而又以杜外鹽輸入爲至要尊見何如仍希見覆其他詳盡之處筆難盡述統俟到江後再行熟商

又

接誦江字八十一號手書藉悉種切江省邊境設卡撥隊經公規畫一切益臻周密此後蒙匪當不敢復肆鴟張白音大來一匪展轉逃匿蹤跡飄忽惟該匪已失所恃經飭各路密偵嚴拏諒不至於漏網奉省毗連蒙境之處亦均設法布置隨時勦捕或可冀盜

匪稍戢目前於蒙疆一面尙未遑放手辦理因人才款項兩俱缺乏此中情形想在洞鑒也

又

新正初旬接誦江字八十三號手書並劉道條陳金廠辦法一摺正擬肅函奉復又接徐道寄來四函計七十七號至八十號蓋係寄徐道轉交因徐道回江該局復行寄還遂致多一轉折承示足疾較前大愈入春和暖當卜霍然曷勝忻慰尙冀隨時珍攝日臻康復爲國家共任艱難也劉道所陳於邊疆情勢洞悉無遺惟現在款項支絀斷難同時並舉鄙意先從開通道路修復卡倫著手逐漸經營較有把握際此時艱惟有進一步算一步耳尊論幣制一節反覆詳盡具有權衡最後歸重信用一層尤爲扼要蓋無論制度若何美備信用不堅則效力全失此爲第一要義欲整齊圖

法舍此無由奉省近亦斟酌覆奏未卜當事者能毅然實行不爲積弊所牽制否耳江省邊防經費部中僅撥十萬實屬不敷吉省奏請每年撥給六十萬部中亦僅允撥一次同一艱難若再具疏申請亦不過空文往復且以煩瀆取厭容俟另籌辦法以期於事有裨楊道嘉辰既不願任稅局之事卽亦不必相強該道心地誠樸而木具稍短或亦懷知難而退之意卽使勉強留恐未必能有所整頓目前仍請尊處派員經理藉資熟手曉諭蒙民告示並杜道所擬稅關章程均已閱悉僞示一節尊議擬詳細調查再行辦理極爲得法否則無故自擾轉使羣蒙驚駭非計之得也尙希察看情形酌奪辦理前來摺稿弟略加改易於初六日拜發稿底另鈔呈覽晤面匪遙餘不多贅

又

接誦江字八十四號手書祇悉一是丹忱來奉談及江省艱窘情形深爲系念惟此刻內外同一拮据若待十分完全再行舉辦恐河清難俟祇得勉爲其難走一步說一步天下無不能辦之事願與公同任此艱難也各局所酌加薪津尊議恐難於支撐自係實情擬暫仍其舊而於得力人員隨時酌加津貼似此變通辦法甚爲妥善卽請照此辦理江省當此萬絀之際公先以儉率屬在事諸員當亦深諒苦衷也各司擬章已飭核校容交丹忱歸去面陳

又

頃准外務部咨開本年五月初一日准俄璞使交來節略內稱近有中國官輪船名齊齊哈爾行駛黑龍江該管帶不諳駛行渡江之章程恐不免有失事之虞擬請議訂暫行章程以資遵守等因查此案前接外務部來電當卽照轉冰案茲特鈔寄來咨卽乞查

照內開各節約奪情形詳細議訂章程從速示復以便會同覆部核定

又

接奉惠書囑撥隊排長及弁兵備爲教員一節茲特選派差遣委員李玉柱帶同步科正目靳其昌長惠鮑得魁李鳳鳴王玉堂甯敬中馬科勝得才周霧先尹敬熙杜連會等前來卽希量材委用餘俟抵江面商

又

接奉賜書木植合同旣已訂妥簽字甚好挽旣失之主權收將來之利益苦心經營良深欽佩摺已拜發請勿爲念擬改黑水廳衙署爲民政司署事尙可行但以公現居之署改作黑水廳署似不相宜仍須另籌辦法已告徐道先行稟陳矣至該司使酌定營務

處規章亦屬周備惟江省財政困難不能不力求擷節現飭督練處與徐道詳核力爲刪減另擬批示均交徐道寄還

又

呼倫貝爾經畫一切屢接宋道來函所籌交通機關如航路陸路電報皆係最要之著雖款項萬絀亦不能不設法興辦航路陸路卽飭宋道就近體察情形擬章寄閱電報現飭黃道酌核辦理惟航路一層宋道之意欲由省總其成而合龍江嫩江辦一航業公司似此自較靈活尙祈酌奪見示至該處添修衙署已飭該道因舊有房屋酌量修改不必過求完備當茲時艱款絀不能不收縮爲之想卓見亦必謂然尙都護咨送保案員數稍多尊函所云自係實情現擬暫緩入奏存候彙案酌核辦理以省煩瀆

又

前議江省金廠悉歸自辦由唐少帥晤商北洋現由蓮帥派袁道
祚廩前赴漠河查看情形並將歷年出入款目一爲清釐該廠本
隸北洋統俟袁道查悉之後再行另訂辦法劃清權限庶可從新
整頓馬丞於該廠情形頗爲熟悉袁道來此亦可藉詢一切也奉
省改編營制擬具章程尙屬周妥特飭鈔呈青鑒卽請查核飭營
務處斟酌仿辦以期穩妥

又

示悉滿洲里俄官被鬚匪槍斃俄人倡立自治會愈益急迫此事
迭經電達外部正在抗議忽又生此枝節俄人益有所藉口彼旣
各處宣布我以空言禁阻終屬無益前經函知宋都護屬其趕辦
鐵路巡警巡警成立則主權在我彼設此會自無效力交涉局一
面仍照會俄員絕不承認似此辦去或可挽回仍望尊處知照宋

都護從速開辦爲要尊函並潘牧來稟並鈔寄唐帥察核矣

又

接誦戊字十三號手書藉悉一一尊論航路一層宜合松花江統籌方能聯絡一氣辦法極是龍江松江本我固有之航路舊日曾設水師現在三省如輔車相依不宜稍有隔閼樸帥亦甚表同情當卽會商經帥通力合作以期保我江權呼倫添修衙署昨接友梅來函亦云舊有房屋實係無多無可修改擬添蓋平房一二十間以資辦公當飭令核實估計矣

又

昨奉戊字十六號賜函得悉旗員薪俸種種爲難情形現在瓊倫兩處副都統廉俸擬照分巡道開支墨城則酌改知府將來規定尙不難於實行惟旗屬舊制驟難更變若大加改革誠如尊論所

云與旗屬益無感情此亦不可不慮現在各城稅務所有其下之
一半尙仍其舊爲該旗員等津貼想尙不至失所其或另需籌款
以資調劑或應行裁併之處擬俟樸帥到江後體察情形再行酌
定大約去數百年之弊受之以漸或可少泯謠詠耳

又

接奉戊字十七號賜書敬悉種切摺片各件業由徐道呈閱日內
卽可拜發張中書前摺已經添入遵示撤出張朝墉一片應再詳
酌緣原參考語有貪鄙字樣且前經部駁又無切實勞績恐難邀
恩俟有異常保案再爲附片聲敘似覺妥善否則率行入奏一經
批駁更難挽回我公以爲何如樸帥約望日前後可以東行政躬
近想漸痊念念

又

接戊字二十號惠書並吉拉林設治委員卞令擬訂放畜打草稅章均已閱悉大致尙妥言明從權暫定將來察度情形尙可酌改惟所定稅則比諸卜魁瓊瑋加倍未免過重似宜改爲一律以免藉口仍請卓酌轉飭遵照

又

頃奉手示祇悉一切何道才品素所傾佩此次意欲來奉極愜鄙懷惟公交卸在邇左右未可無人何道經手事件較多正資料量請俟周帥到江後再行議及彼時隨侍旌麾同蒞瀋陽亦至便也昨閱宋副都護來咨有因前款不敷開支擬由稅款提用等情通省稅款正須切實整頓彼處稅款每年約收若干請飭度支司切實查核明確通盤籌計方得要領否則盈絀之數省城未能週知於該處情形必至多所隔膜非統一之辦法也

致唐少帥

昨接宋副都統函業將去冬至今俄匪在滿洲里劫掠各案詳細開陳據稱近日滿站地方俄匪愈肆搶劫交涉分局勇丁幾至夜不敢出近復出有劫案尙未查悉細情似此肆行無忌邊民何以聊生乞晤商外部詰問籌辦方法並可要求哈濱各處自辦警察也前宋副都統所稱在滿洲里設官所有入境俄人由我稽查給票一層未識能否辦到又吉林蜜山府設治委員范熾泰報告沿烏蘇里江一帶有俄人越界私墾多處經該委員查明就近與俄官交涉誠恐越墾俄人未易就範此事關係頗重並請詳達外部向俄使詰阻令其知照伯力俄總督東海濱省俄巡撫轉飭一律退出以符約章庶免多所軼葛

又

奉天華洋商人誤會海關專照免重徵三字省城新民遼陽鐵嶺等處凡有照洋土各貨抗不交納銷場稅捐數月以來稅務短收度支大受影響查稅務處章程載明運往內地各貨或完子口稅或逢關納稅遇卡抽釐聽商自便其運往東三省新開各埠之已完進口正稅之洋貨及完過復進口稅之土貨一律給予專照准免各項稅釐等語再三尋繹專照性質實與三聯單同其法仿自陸路通商其用極於運至指銷商埠而止與銷場稅項各不相涉蓋專照所載准免各項稅釐一語係指沿途關卡稅釐而言是以運貨抵埠之後專照卽行繳回海關若併銷場稅一律免抽則專照繳關之日卽係單貨相離之時更有何憑可免銷場之稅此專照不免銷場稅之實在證據也乃洋商影射華商依恃均以免重徵三字故作謬解妄相抵拒近日德領事以安東德商貨照不符

一案且以此提議亦意在不納銷場尤爲無理取鬧有此一重阻力或有謂改銷場爲攔櫃援照營口辦法之說不知銷場攔櫃名義實同稅之能抽與否在劈清准免各項稅釐之專指沿途關卡與落地銷售無涉如果能抽攔櫃卽亦能抽銷場否則卽仿照南省改名落地仍屬於事無補也現擬兩種辦法以爲抵制一則通飭各關於專照上加蓋紅戳載明此照專免沿途關卡各項稅釐抵埠後卽無效力字樣一則咨請稅務處修改章程申明以上辦法以資補救無論如何總期收回銷場稅項方爲有濟近爲此事迭飭廳司簽議所見略同究應何道之從是否可辦統乞卓奪示知

又

前奉來電敬諭勛履綏愉月內將由博桑西渡英蕩所蒞蠡鼓騰

歡破浪乘風曷勝健羨延吉日本憲兵因建造房屋不服阻止槍斃我巡警弁兵前經兩次電達幸賴我公就近交涉並籌畫一切商我外部籌謀懋密佩感莫名此案經外部一再照會日使據理嚴詰並要求其賠償懲究以及撤退憲兵從速提議中韓境界韓民保護各問題日使始以彼此報告不符各須派員覆查爲詞此間得外部來電當卽派邢道祖彝赴延詳查並由奉添派吳光新由吉添派李寶楚分道前往嗣又據日使照稱此事據調查實情決非日本憲兵先爲暴行且日兵負傷者亦有數名並有華兵之手槍武器存案爲證要求各件除界務應歸另案撤兵難於照允韓民管轄問題尙須再行協定餘應俟此案真情確定方能提出要求經外部一一電示當經分飭傅道邢道詳細覆查旋先由傅道電稱日使所稱手槍武器乃我受傷馬弁憲兵等所帶之護身

手槍及軍刀等件因當日該兵拾入日分遣所候醫調治卽被日人將各物留下業經平田認明係隨身應帶之件允卽交還我受傷巡警亦經驗明均係徒手至所稱日兵受傷據境野筱田奧村談判之時祇言有兵一名受石子傷齋藤直認開槍由其命令從未提出彼兵負傷等語亦已照轉外部以資辯論聞所造房屋業經拆毀旋又重建落成不諗何意現外部與伊集院卽將定期會議解決界務辦法囑派熟悉邊情之員赴部以備顧問遵派吳參領祿貞周隨員維楨先後前往迭接簡始來電於界務辦法研究甚詳其意不在爭開埠但在嚴定商埠之限制不在爭韓民保護權但在力辯越墾之非韓僑固亦深得要領又九月間鐘城韓民李輔詰以運糧爲詞取具限狀暫在圖們江搭造浮橋乃旣屆限期而日人出而干預不任拆毀經電部轉詰並由傅道就近交涉

現已將浮橋自行拆去辦理頗爲順手

覆

陳督辦
吳幫辦

接函具悉種切台從到延後凡百布置周密妥善深以爲慰惟彼族種種狡謀殊未肯息現一面以和平對我一面爲實際之進行又暗中嗾使韓民滋生事端希圖藉口蓋於該地證據毫無憑藉不得不出此手段以爲強賴惡索地步目前我於韓民務當結以恩信使之就我範圍至彼所經營一切亦當相機抵制萬勿過於異順一聽客之所爲想兩君壯猷傾畫成竹在胸必能措之裕如也胡殿甲在彼聞尙安靜守法吉強軍素無紀律品類太雜當飭陳守稟承指示隨時整頓不可疏略所有來函已擇要鈔寄外部以後情形尙希續示邊地苦寒惟以時珍衛勉任其難無任翹企

又

頃奉二十一日惠檄敬諭一一規畫邊務諸仗蓋謀累承電商均已察復吉軍稅習已深將來改編營制必須痛加甄汰庶可以盪除舊染簡練精兵郭管帶縱兵擾亂咎有應得當此整飭戎行之際自當量予處理以儆其餘現已解送來奉卽由此間察酌懲辦屯田營工程隊均爲籌邊要政所當及時實施已飭刊刻關防俟刊成再行頒發吉省疆域綿互港汊分歧執事派遣員生分別圖繪經時數月周歷三邊展覽之餘彌佩蓋勘現已轉飭付印並囑管參謀代爲監理矣

又

頃接許巡檢來稟並摹繪吉林朝鮮疆界東半圖一幅據稱康熙年間於長白山南第六峰之分水嶺豎立界碑載明以水爲界南爲韓域北爲我疆朝鮮全地原圖名爲大東輿地圖者繪明延吉

一帶地點在分界之江水北溟可爲我國疆土之鐵證故以朝鮮原圖爲本摹繪此圖圖中所繪地域乃土門豆滿江北至會甯分水嶺一帶弓式之地卽日韓意圖侵佔所強名爲間島者也茲將原函錄出並將原圖另摹一幅一併寄呈清覽又日人新刊之圖於分水嶺定界碑以及界堆界柵等處既不繪出亦不註明且於彼所欲佔之地不繪弓式而繪作參差橢圓之形該巡檢將日人新圖附寄一份前來以綠線畫出彼所圖佔之地點以朱書註明界碑界堆界柵等處尙爲明晰又稱查勘佔處已逾分水嶺以北恐界碑尙有北移之弊此須踏勘方能詳悉等語該圖係屬石印不便摹拓奉寄用特略述大概以備察核

又

接延字第五號惠函備論種切吉強改編營制業經實行所有餉

精自應按月發給以免蹈舊日積弊前得尊電已照轉經帥飭營務處迅速辦理巡防新章應發餉項衣銀均另訂有辦法請查核照辦其各營分防處所兵隊住處酌加修葺以壯國威卽應從速施行邊地警察前由奉吉挑派者本不敷用現議就地挑選學生施以教育爲將來增補警兵之用辦法極是所有添建房舍及籌備裝械等事均照尊議辦理屯田實邊法甚美而行之甚難量錯有言人情非有匹敵不能久於其處三省數百年來所以生齒不繁者皆由關內民人春來冬去窮邊之地裹足可知今擬由三鎮退伍兵隊擇年力尙强者派赴延地安置並籌及一切授地納課之法均甚妥協惟永久之計則必須爲謀室家以繫其身心而後生聚可得而言此亦重要問題將來尙希悉心籌及退伍一節已飭兵備處行知三鎮矣延琿兩處營房均應修建惟須切實估計

以免糜費東北沿邊一帶派學生補行詳測所需經費准由邊務項下提用至於提倡教育開通民智並以抵制外力實爲目前急務一進會舉動隱然與我對抗現旣興辦學堂必須妥訂章程俾韓民樂於從事方能就我範圍所需款項本地未能籌足自應公家補助卽希酌奪一切由邊務提款籌辦自今時勢日艱變局益厲每辦一事設施未竟而謗議叢生士大夫坐是恆以不辦事爲宗旨願兩君一雪此言認真整理實事求是苟有爲難鄙人必力爲擔任艱難創造邊事庶有起色耳日人交涉各節前已據情函達外部詰問林使續有舉動尙希見示

又

在奉接准外部函開光緒三十三年九月二十七日准日本阿部代理使照稱各節已經外部就現有成案及中東圖說分別參考

可證者六可駭者七並扼定十三年會勘成案爲立論之地茲特鈔錄原函奉寄查照函內事理詳細酌奪逐條分疏詳細具覆以便轉報外部

又

疊接一號二號來教藉諗判歲以來勛略益宏興居多勝至慰馳仰吉強軍欠餉已由尊處如數墊發敷宣德意綏服軍心具見措置適宜心佩之至吉林軍隊外籌邊備內戢匪氛所關至重非改編勁旅斷不足以建威銷萌承示吉強軍汰弱留強以及各營分駐方法舉凡邊要區域以及沿江緊要各地胥有重軍分布有事可資調遣呼應亦覺靈通實爲變通盡利仍祈將詳細辦法並建造營房各事隨時妥籌函示至屯田一事洵爲今日要圖移民旣難遽行則實邊之策莫便於此尊函所稱屯田利便各節洞燭情

勢言之極爲剴切三道灣哈瑪塘荒地旣於農業相宜卽請商定妥章就近試辦俟成效漸著再議擴充客臘所派巡官巡警聞已陸續到延延地邊務最爲重要來示擬將此項警兵專歸邊務調遣不屬總局節制原爲一時權宜之策自未可以通行之警章繩之至於劃定權限俾地方官亦得指揮裁撤舊區俾舊巡警隨同練習以及布置警兵分駐各地因利乘便規畫已極周詳此項費用旣歸邊務項下支發其民間原定警費卽照尊示仍舊徵收撥歸動用至教練警兵如彼處不便特立即由奉吉兩省城隨時教練調撥張維鏞控案全卷並曉諭吉強軍各條均已收到日人近雖較前安靜而采伐和龍峪一帶之森林收買六道溝一帶之房屋操心積慮險狡異常深賴槃才力籌抵制惟現在森林雖已封禁韓民田產雖已諭禁私售而彼耽視已久野心恐難猝戢仍請

台端察酌情勢設法維持至會甯等處輕便鐵道之設既在彼界
以內應先隨時確探設法阻止不令過江茲已將此節鈔寄外部
請其核奪仍祈派員查察隨時函示爲禱考選學兵專習測繪甄
培得當任使有資甚慰吉省所撥銀圓官帖五萬圓已解到否奉
省借撥現銀五萬兩已解交長春兵隊運往奉省挑選警兵八十
名派員分起改裝前往到後均望分別函覆爲盼

又

前得尊電吉強軍因譁餉鼓噪經執事妥籌安撫已就帖服無任
佩慰吉邊情形近想無甚變動頃據仁川坐探委員報告韓統監
府注意間島經議咸鏡北道會甯郡之清津港定期西歷四月一
日起開作外國通商口岸所有章程按照各口岸辦理已有來文
傳諭華商知悉又有怨慮韓老王赴日之說老王恐不敢往孔德

里大院君陵墓現遷至坡州在漢城迤北僅距十里未知將孔德里作何用八道義兵至今未息日人遭害不少紛紛逃回仁漢日人商務因之減色華商在各道貿易者尙稱安穩云云聞彼現在搜求該地證據以爲將來辯駁地步我所引據各條彼皆指爲不確此等強詞奪理原不足懼特事實上須布置完密防彼竟用強硬手段耳諸希隨時注意爲幸

退耕堂政書卷三十六

退耕堂政書卷三十七目錄

函牘三

致陳督辦

致吳幫辦

致陳都護四函

致陳簡帥八函

致周璞帥十二函

三十三

退耕堂政書卷三十七

天津徐世昌

函牘三

致陳督辦

頃接外部來函以中俄界務亟應詳加訂正琿春緊接俄壤有需將彼處情形互相考證者茲將原函鈔奉台覽卽希查核辦理示覆爲盼

致吳幫辦

頃奉惠榆具諭一切吉林歸旆何日抵延朔吹方嚴想征程康適至以爲念承示張局長擅細安分陸軍妄造通匪譏言以及抗傳不到潛行晉省各節殊堪駭詫現當整軍經武之際陸軍紀律固當嚴明而警察人員有保持秩序之責任尤應慎守職務恪循法

律以無罪之軍人擅行跪訊已屬不合况敢於捏造黑白敗壞軍中名譽耶茲事頗有關係亟宜澈底查明如果該局長講張爲幻畏罪潛逃一一屬實即可詳細具稟聽候澈究至於軍隊人眾品類不齊通匪夥劫雖涉誣讒而爲保全全體名譽計亦須慎密訪查嚴行約束務期軍人資格日臻完備庶不負朝廷尙武之意執事於軍旅之學研求有素當不河漢鄙言也另件亦經收到彼名爲保護實則騷擾種種行爲適多違法已將原件擇要摘錄寄部請其核辦至延吉地方屢受擾害亦必須設法阻遏應請簡始都護就近體察情形妥商辦理或卽據理詰問亦無不可

致陳都護

頃有人報告日人在韓情形特飭鈔呈台覽用備察核日人設渡

一節前據尊電與彼明訂權限分別稽查亦是一辦法已據達外部俟得覆再行奉聞

又

日人經營清津會甯等處不遺餘力其眼光全注間島將來聯絡兩地敷設鐵道爲事實上必有之著不可不預籌抵制業將各情電達外部請速定辦法以免耽延愈久愈形棘手仍希公隨時注意嚴密防範以伐其謀日人戰勝以後隱然囊括東三省爲殖民地近兩年來派赴蒙古調查者不絕於道昨有人談及日人在蒙境情形可危可懼茲將來往函電鈔呈台覽彼族經營之迹略見一斑邊事日亟百孔千瘡所望執事協力同心挽茲危局

又

前外部以琿春一帶中俄接壤所有界碑歷時既久恐有俄人竊

換之處屬爲詳細勘查曾經函達冰案茲據吉林交涉司鈔送沙草峰界址大略琿春城南中俄界址大略特飭鈔奉台覽其琿春界址據稱係三十三年由琿春副都統派員往查者爲時甚近與尊處前次函稱界碑十無一存情形不符祈再派幹員前往切實踏勘務得實在情形迅速報告以重界務俟查明後尙須一一補立也

又

琿春近接強俄界務關係重要沿邊界碑有經俄人竊換之處亟應詳細查明設法補立以正邊界茲寄上由外部交來中俄約章會要一部續編亦在其內用備考核卽希察存

又

前奉手書內開籌辦琿城十一條具仰鴻猷碩畫周悉無遺當卽

鈔寄樞垣並唐帥各一份茲得唐帥復函諸所商榷益臻周密特飭鈔呈台覽其餘未盡事宜並附鄙意統希酌核

一 琿春東界與俄接壤尊函所稱派員詳細探索界碑界記一無所存外部疑係因仍舊說與光緒十二年重勘後所記迥不相同外部原函前經鈔寄究竟現在情形若何祈切實探明速覆

一 琿境荒僻寥闊逼近強鄰防匪防邊均非重兵不可實係不易之論現擬派旗兵一標駐琿前尊電以琿春營房不足議留一營駐敦化爲兩處策應之兵辦法亦善卽希派員會同敦化令相度一切妥爲辦理

一 琿春財政向未整理現需振興百度支絀自在意中合計山海稅木植稅車捐出境照費等項每年共收若干除開支各項外約不敷若干開具細冊以便安定辦法車捐內之騾馬馱捐一

節當卽函致經帥統歸警局辦理

一東溝金礦暫先開辦亦可招集窮民惟用舊法淘取終無大效應派專門礦學之人察勘礦苗果有可採再議擴充辦法

一官鹽一節現已飭鹽局籌議惟道路艱遠運本旣重能否暢銷俄私如何查禁如驟事改革民未周知於民食有無窒礙此等情形亦須熟計現已飭吉省改辦官運琿境亦應籌辦也

一開放荒地總以實能墾地爲主如有情願開墾而不能領地者或酌減其價或稍寬其期均可量爲變通以收地闢民聚之效若專重收價雖一時不無小補而十年以後榛莽依然東省往事可覆案也亟應改變方鍼爲要

以上各節鄙見所及略爲陳述至開通紅旗河創立海口尤爲見遠思深之要著亟宜籌辦唐帥所論至爲詳明祈體察情形

詳細籌核見覆爲幸

致陳簡帥

吉省轄地遼闊民官最少允宜及時添設以重治理惟改治之始不厭求詳茲復由諮議廳擬具一稿視尊兩稍有異同其中如新城兵備道一缺葉赫拉林兩縣擬不必添設而於臨江州地方設一道缺以資控制惟臨江地廣人稀此時能否添設與現在情形能否合宜未便遽度茲將原稿鈔呈仍希卓核見覆此外如大通湯原本在江北今年奏定該兩縣劃歸江省則依蘭兵備道轄境亦宜及時規定其餘五常雙城賓州綏芬延吉五府舒蘭阿城穆稜旺清和龍五縣濱江東甯琿春三廳均關係緊要亟宜建置當照尊議辦理先行奏設大抵吉省地勢東北一帶最爲荒遠廣漠無官而且無民以致外人覬覦盜匪出沒此時設官似宜偏重東

北先其所急惟其人民稀少未經開化治以新法當較內地爲易所要者慎選守令耳大段既定再求周密當無難隨時增損也緩設之各府縣旣經先事區畫或仿奉省設治委員之意先派員經理其地招徠墾闢迨戶口蕃庶因而建置則已成之局自較易易拉林雙城二協領暫議不裁尊議極是非惟關係旗丁之餉亦恐羣情疑駭易生阻力所有佐領以下各旗缺亦無妨姑從緩議以安眾心至新設各缺多係荒寒瘠苦之區不能不給予經費合計道府廳縣應需經費若干亦希約略核計預爲籌及庶辦理易於措手也

又

頃接薩大臣來函探悉俄人經營遠東移民實邊現尙不遺餘力不以戰敗而少衰不因費重而輒止堅忍之概實可驚佩東方邊

備自去年方始著手已嫌後時然從此孜孜不已雖人一我百未始不可抵制於萬一尙希隨時察視沿邊一帶有應行措置之事仍當勉力以圖俄人在邊境有所舉動並希密探見示茲將原函鈔呈冰案用備密核

又

昨奉吉字四號惠書誦諭壹是吉省開埠伊始集費購地以及履勘繪圖具賴盡籌現在局中應辦事宜如建築警察均爲急務欲求組織盡善所貴佐理得人承商調翁委員輩一節該員於建築之事頗經歷練惟奉省民政司中亦僅此一人未便遽令留吉尙以吉省乏才暫留查勘事竣仍令回奉則尙屬可行昨奏調來東之曹編修典初頗通實業如派充勸業僉事之選辦理一切可期勝任俟該員到吉時應請公酌量委用至巡警一事尤須早爲籌

備內地各處以程度低下之人民濫充警兵輒易債事况商埠甫
闢交涉方殷尤非稍具法律思想諳悉國際關係者不足以備任
使奉省警察學規雖未敢遽謂完備而較之吉省或稍恢闕來函
擬附設兩班由吉籌給學費此在奉省亦屬順成之事而在吉省
可省改創之煩自當照辦當轉飭該學堂詳擬辦法再以奉聞吉
長鐵路既屬我國自辦所有鐵路巡警亟應預爲籌畫舉凡核定
警章培養警員以及一切預備事宜總期規準文明不留闕點維
持秩序鉅細必須兼籌保衛安全中外要無歧視所以杜絕干預
而鞏固國權者胥繫乎此公必有以闡攄偉抱紓茲疚棘無待鄙
人之貢言也蜂蜜山墾務前令張道抵順往調查曾經奉商台端
尊意因范委員辦理未善亦深以此舉爲然目下卽不能大舉興
辦亦當酌量情形先立基礎徐圖推擴陳委員玠條陳各節頗中

肯綮已寄交張道察核昨復據張道擬定章程呈寄前來想尊處亦已接洽惟籌此鉅款爲難卽希酌奪飭知張道遵照又琿春右翼協領貴慶本係吉省人員應由吉酌量差委茲飭其趨謁左右應如何量予一差俾供驅策之處並希酌察是幸

又

頃奉十一號惠書並李委員調查報告具論一是據該員報告所述各節頗爲詳晰核與祁道祖彝吳統領光新迭次調查情形大致亦均相符已飭擇要鈔寄外部以資參考張委員源瀚所購圖書各件均已查閱大略文獻備考於江源山脈及郡縣沿革記載綦詳與延吉所編邊務報告頗有足相證明者中東輿地圖於界碑石堆木柵舊址均經標明且界江以北不繪道里往來之迹亦可爲此疆彼界之確證聞日本帝室博物館中此圖亦有藏儲或

者歷史研究之資未始非界務談判之助擬俟詳細勘核再行酌量達部所有購置圖書各費前已飭督練處參議張部郎志潭具領轉交至張委員此次赴韓偵察日韓政策購覓各種證據不無微勞足錄惟所購文獻備考價亦甚昂已發訖矣所稱在韓被竊各情是否屬實究不可知如果確係旅資罄盡挪借應用自無聽其因公賠累之理或卽由邊務經費項下設法稍爲彌補之處統希察酌辦理

又

接誦吉字第十四號函藉悉壹是徐道曹編修會擬吉林官立造紙廠辦法四節並附呈機器價單及聘訂技師長合同底本各件閱悉均極周密原議擬三省合辦執事亦力主其說仰見碩畫蓋籌規模宏遠曷勝紉佩惟茲事體大如原議所指資本銷路及設

廠處所三者通盤籌算此中困難情形不一而足目前奉江兩省財政亦屬萬分支絀恐難辦到然吉省既已聘定技師長購定機器又斷無中道廢輟貽人口實之理鄙意擬由吉省勘定適宜設廠地方開廠一所先從小處試辦一面令該技師赴各處將出產各種原料調查明晰以爲入手第一著辦法並可查照原議仿各國辦法俾印刷製紙二部聯爲一氣如此辦去自能得其要領俟將來辦有成效再行徐圖擴充江省有姚委員明德精於造紙不妨暫調該員赴吉以資考查鄙見如此尙冀執事裁酌

又

接奉吉字十五號來書具悉壹是河西私造炸藥事日領因無別項證據欲借端爲之辯飾大連運槍一節交涉司據實指駁乃竟藉口國體狡詞來辯幸賴台端執理折衝使之無可置喙彼以私

心我以公理案情具在曲直昭然此時固應切實根究以期水落石出惟欲得種種佐證恐尙不易辦到該日人所造炸藥雖據稱爲獵獸之用然比較土製既有大小猛烈之懸殊則目爲妨害治安彼固無辭可措似可據此立論令其驅逐回國不再來華以杜後患至韓汝庚一員旣無通匪證據此事由其舉發亦無過失自毋庸解奉發落如該員能勝偵探之事應卽由公察看酌用唐鍾兩道手摺業經詳加核閱矣韓登舉酒後之言雖非無因而發然保官以爲羈縻編制以示抑制皆係正當辦法不能因其舛望稍涉徇縱但若過露追求之意又恐終爲日人所餌此等粗人無足過慮似不如陽示優厚陰施防抑較爲得宜質之高明以爲然否

又

頃據郭署副都統函稱琿埠情形前經尊處派員查勘擬定三法

惟開西歲子輕便鐵道最爲輕簡易舉其餘工程浩大經費繁多恐目前艱於期辦而其間停輪之處又惟陽關坪地方最爲適用等語查由琿春至西歲子計程僅三十餘里修路之費無多自可迅籌開邊至於停輪商棧據翁科員鞏調查報告謂西歲子圈兒河隴畦村三處地面高敞堪作大碼頭大肚川玻璃燈陽關坪三處江形扼要堪作小碼頭而江西山崗屬韓造山縣者亦屬善地吳參領祿貞則謂隴畦村屬俄造山縣屬韓租借交涉恐難辦到若以大肚川西歲子兩處開作大碼頭尙屬合宜之區執事於琿邊情形調查最稔尙希於以上各處詳細比較斟酌盡善以便商定籌辦至航行輪船前議先租借數隻試行開駛據郭署副都統述及琿春墾務公司經理人朱江會面稱琿地若開海口該公司能自製大輪一小輪二以供轉運究竟招商辦理是否可行統希

核酌定奪此時開辦經費必須數十萬金爲邊鎮大闢利源爲三省特開門戶自亦不能惜費卽後此常年經費亦當預爲籌畫當此財政困難應如何移緩就急用濟要需之處並望卓籌及之輪船出入海口俄韓有無阻議實爲此項問題之最要關鍵該署副都統謂約章分類輯要所載光緒十二年重勘界約第四條曾申明由土字界牌至圖們江與朝鮮連界之江面海口中國應有船隻通行之權又烏蘇里界廓米薩爾照會亦承認中國船隻出入不可攔阻昨閱錢念劬星使所著中俄條約輯要亦載有此照會係致琿春副都統者琿署已無存案吉署或尙有案可稽卽祈查明函示又據函稱琿春平曠之地開放將竣所餘半係山溝旣費資本復多盜賊非募兵屯田無所藉手聞延吉現已招募屯田一營卽將開辦可否令其推廣以一營分駐琿春等語此節亦祈台

端核奪如其尙可分撥卽請飭令照辦尙有窒礙則當俟籌定的款再由琿自行辦理琿函又稱該處款項無多以入抵出不敷甚鉅種種用項均須急籌擬請於邊務款內加撥二萬金以爲目前要公之用一俟籌發大宗款項或各種實業稍有眉目卽全數撥還等語查琿延財政前經批示准其通融辦理此次所稱需款各節亦屬實情應請察核籌撥以資挹注仍令其籌有款項如數撥還又該署副都統因琿春木材繁殖擬仿伯都訥之計在東溝以內建一鋸木工廠查此項工廠辦法前經派翁科員鞏詳細估計需款尙屬無多已准其妥籌試辦又因琿地警兵僅六十名不敷分布以致四鄉之內搶劫頻仍而代緝私鹽實行煙禁防範韓戶輔助營兵均必需巡警以資控制擬仿延吉辦法加徵地畝稅項爲添設警額之用惟琿土多瘠加稅仍屬無多請將原有甲兵挑

充巡警以爲變通籌補之計查巡警由甲兵挑選化無用爲有用誠爲善法此間旗務司亦有挑充陸軍巡警之議琿春亦可先行試辦時一併函達統希卓核是荷延吉邊務款項已奉部駁明歲如何籌辦甚躊躇也

又

頃奉惠箋並承示前致梁京卿電稿一通碩畫盡籌周詳切至迴環雒誦心佩莫名延吉境內韓民之營工商業者不乏其人旣難概令入籍只能認爲韓僑任其保護所幸爲數無幾限其分居埠內尙不至有損主權至越墾入籍一節尊意於光緒十六年奏案之外並援引通商條約表明吾國不許外人有土地權之實據證之以國權輔之以法理折衷至當使彼族無可置喙又因韓民佃戶傭工輒居多數擬限定賃地而耕者亦必一律入籍其春夏渡

江秋冬回國者卽時禁止清理邊界限制僑民戢彼覬覦鞏吾邊
圉用意至周且密循此行之庶免滋患若夫國際權利所當彼此
維均旣允其開埠通商則南岸互市之請增設稅關之議亦亟應
籌畫及之現在瓊瑋與俄交涉亦有彼此要求互換利益之事蓋
非此不足以振國權昭大公也邊事綦重賴我公洞燭時勢從容
而計畫之何都監之料敵李贊皇之籌邊昔所豔稱何以加此宜
乎嘉謨旣達而外部諸鉅公饜心動容行見尊俎折衝挾以制勝
雷池莫越汶陽復返豐功鴻烈勒旂常而垂來葉者未有艾也此
後中籌所及仍望隨時電達期操勝算實深企盼

致周璞帥

頃據宋副都統函稱滿洲里地方近日俄匪愈肆搶劫該處交涉
分局少數局勇幾至夜不敢出近據交涉專員潘牧呈報又出一

劫案似此橫行無忌邊民何以聊生已將此項情形轉達外部矣前請由省派防兵一營駐紮滿站省署以營制未定又無餉可撥至今兵餉兩未撥來滿站雖設邊墾局防衛無資徒手奮呼終恐無濟沿邊卡倫原議定三十人一卡現擬各卡暫派兵十名或十餘名分投安設先立基礎倫城至庫克多博路約二百四五十里係通沿邊孔道沿途鬍匪不能不防省兵旣未撥來擬暫將所招卡兵每卡抽撥十五名分駐三撥藉通邊防消息並保行旅往來俟將來省撥防營到倫再將卡兵撥歸各卡如此緩急相權或可兩免貽誤等語查該副都統請添撥省防一營自爲安輯邊疆起見惟江省情形目前能否分撥餉糈能否供給均希統爲籌定見示辦法再俄人越界割草牧放該副都統與俄官商酌擬具章程前來其中有無流弊亦祈卓核再行飭遵

又

雪帥瀕行交到姚副都統信一件言瓊瑋與東分界情形瞭如指掌自應照辦已飭徐道照繪瓊城全境圖呈閱查與東道所指分界之霍勒爾津屯之南東西山嶺圖中雖未註明該處實在遜河之北距瓊城僅一百餘里舊有旗屯數處江東交還無期歸來之戶尙須就近撥地安插誠有如該副都統所云者况該處距興東建署之托羅山遠在數百里外控馭較難以形勢論似應劃歸該副都統治理覺爲捷便且以遜河爲界疆理尤清將來漠河設治又須劃分該城轄境之半質之高明當以爲然該副都統津貼准由牲畜雜稅項下動用上年共收銀七千餘兩錢一萬餘吊或全數撥給抑或酌定限制仍候卓裁示知再由尊處備文咨覆至羊草等稅則照章解省以備應用

又

前接宋都護小濂來函以邊款奇絀請函商江省續撥二萬金以資應用當經專函奉商計已早塵冰案茲復接其來函謂倫城款項支絀現在通盤核計若屆年底非二萬金實屬不支請再函商速爲酌撥應請台端察酌俾其不誤邊需實所企盼該都護又稱滿站俄理事會派兵護送行旅之說雖未實行究屬可慮若不撥兵駐防實無別法抵制等語亦請我公就近轉飭江省營務處速行籌核辦理以保全疆圉杜絕覬覦

又

漠河金廠鑛務疊次與北洋商榷尙未定有辦法前奉尊函意主一律更始切實改良至爲妥善卽本此意函致蓮帥茲將函稿鈔呈台覽俟得覆再行佈聞滿站一案外部與俄使交涉未知辦到

如何地步前接尊電俄併欲將車站華人驅逐出界似此強橫無理實見我近日稍事整頓彼已起而相爭外人機警殊爲可畏此後交涉愈不敢放鬆一步也邊墾局收稅情形已據尊電及宋道來咨詳達外部實與條約所稱百里內免稅者截然不同當不難據理力爭再來道來函以前領經費四萬兩將次用罄邊地需款孔急擬派員至省請續領四萬兩藉資應用想尊處亦有咨呈祈公權衡其間飭司設法撥濟以維邊局無任企盼

又

前接雪帥來函寄來瓊瑋來咨一件係爲沿邊添設卡倫等事查瓊境兩面隣俄屯墾實邊較之呼倫貝爾尤爲切要敝處曾將宋副都統置辦沿邊卡倫章程函致姚副都統屬其相度仿辦雪帥以設卡三十需款甚鉅江省無此財力擬再請由部酌撥邊防經

正書卷三十一
三
費十萬兩以濟要需竊謂現時財政中外同一支絀具疏請款部
議未必允行且去歲一奏僅得十萬再行瀆告亦覺無聊希公統
籌全局應如何辦理俾東西兩邊得以兼顧抑或逐漸設法辦理
徐圖展拓卽請款籌款各節亦請公通盤籌畫後再定辦法

又

頃奉第五號手示並公署辦事簡章規畫一切甚屬妥協提法亦
暫同署辦公規模益覺閎大惟公署官制秘書官係專爲督撫辦
理秘密事件今旣與文案合而爲一其權限職掌如何分定尙希
便中賜示爲盼

又

昨奉江字三號四號手書祇悉一切環境緊接俄疆彼族百計經
營我之邊備空虛已極姚副都護籌議各節自應亟辦亦知江省

庫儲如洗而奉省目前亦未能協濟故請公通盤籌畫先其所急茲誦來函以先從江省所轄地面切實籌計認定何段木植何段礦產確有把握注重一二處著實下手然後推及他處誠爲扼要之論望逐條籤出後卽行見示航路一節已函商經帥俟得復後再行布達江省兵司擬仿吉林辦法改爲旗務處以便統一卽希轉飭照辦設官摺及煙釐各稅捐摺已由此封發兵司原稟仍附還乞察存再據丹忱來函以屯墾業經開辦需款孔亟而奉省現時無可籌撥請飭廣信公司按照換銀實價先行借墊俾資墾闢將來於札賚特荒價內逐漸歸還庶借款不至無著又該司衙署尙未修造程帥舊屋聞現無居人可否飭令該司暫行遷入爲辦公之地並希卓奪飭遵爲幸

又

齊瓊鐵路比領事殷殷探詢似非無意果能因而用之於江省開闢利源實有裨益前據尊電轉達唐帥嗣得復電以提議此事須由郵部與比公司直接會經電達冰案閱比領事原函彼於此路似亦尙在調查而未十分確實如先以朋友交際與之商榷看其情形如何再作計議亦似無妨唐帥熟悉外情能從中提挈比照蘆漢則利多害少當可行也統希卓裁再接宋副都統函稱前請由省准撥防兵駐紮滿站祇以營制未定撥來尙須時日該站及附近之處俄匪橫行華民苦若倒懸實屬聞不忍聞又防兵津貼前奉諭酌令加增查省署去秋片奏駐漢官兵津貼內聞每兵每月加津貼銀四兩五錢官長亦按照底餉遞加滿站駐兵與漢廠駐兵均係防隊清苦亦略相同惟滿站有鐵路通行究較便利現擬按照漠河駐兵加津章程減半每兵每月津貼二兩二錢五分

不日卽具公牘咨呈省署云云以上二節祈飭營務處度支司從速核定飭遵

又

疊奉江字七八九號手書祇悉種切愛琿呼倫兩處同爲江省重鎮經營一切同一需款尊論愛琿情形外之須遣利黑烏航綫內之須修造齊愛鐵路誠屬至當不易之論惟辦此兩事造端宏大非旦夕所能竟功彼族相逼而來卧榻之旁蹈瑕抵隙我若放任後愈難圖爲今之計只有得尺得寸步步爲營姚都護擬辦卡倫雖於備邊之術相去甚遠而沿邊一帶藉以聯絡稽查似亦不無裨益呼倫貝爾等處此項業經舉辦如有成效無妨仿行至款項奇絀本江省至難之問題部撥十萬亦屬無濟惟希通盤籌計移緩就急庶東西兩邊不致有所偏廢宋道請款頻煩亦因呼倫一

正書卷三十一
隅創辦各事前此所無故用款亦因之驟增宋道負才氣欲立功
名似尙能辦事者惟公察其辦事實際如何量爲劃撥滿洲里俄
匪橫行勢甚岌岌前議由江省撥防兵赴彼駐紮宋道屢以爲請
祈飭營務處速核施行

又

頃奉江字第十號手書並籤注姚都護節略藉悉一一江省庫儲
奇絀早在意中奉省同茲艱窘想亦公所洞鑒惟愛琿緊接強鄰
姚都護所陳各節若不及時與辦以後愈難措手若待籌定大宗
款項並力兼營目前實辦不到不得不爲節節進行之計故請公
權其緩急擇要舉辦江省有何應籌之款及應解應催之款請飭
詳細查明或可稍資挹注做處亦極力設法以期共舉尊議籌定
邊防經費勻撥各處限以定數自係正當不易之論惟現在創辦

各事多係前此所無或經始雖小而局面須加擴充或基礎已立而經費可以遞減情勢既有變遷張弛因而互用似可不必拘定數目較爲操縱在我也愛瑋擬設卡倫三十自係包舉全境而言如實有不逮或先試辦若干再行推廣均候蓋裁又宋友梅都護寄來咨呈一件係卞合調元調查吉拉林一帶俄人越界砍木獵取皮張應設法限制等事江省想亦有此公牘其中設卡稽查以開通道路爲第一義現據稱派員詳查里數若干需款若干再行呈請此事亦亟應舉辦卽希察核

又

宋道兩咨均已詳閱札蘭諾煤廠設立巡警公所尊論在可設可不設之間而沿邊辦法工程浩大需款甚鉅似應先事預籌况巡警之設係爲保我主權旣已載在合同此時不設儻日後該廠界

外繁盛再行舉辦彼族又將橫生阻力况該處現無地方官此項
巡警似不可緩沿邊開通道路多設卡倫爲今日必不可少之舉
用款雖多萬難中止若再因噎廢食彼之沿邊里井相望將來日
盛一日我之沿邊一片荒涼適以啟彼越畔之思至入境伐木剝
草打獵等事猶其小焉者也且卡倫一設各項稅務收數必多亦
可藉資補助一俟該道調查明確咨呈到日再行核辦並飭詳訂
章程每年需款若干以便通籌鄙意如此未知我公云何

又

接奉江字十三號賜書敬悉一切行營營務處需過款目自應奏
銷以免部詰趙胡窩堡經歷改爲州判歸巴彥州管轄因地制宜
以收大小相維之效甚是甚是福總管行爲如此殊堪痛恨惟據
徐道面稟該總管除欠荒價外尙有布特哈城官兵津貼銀十餘

萬兩亦經該總管發商生息儻一併追繳深恐牽動市面務請遴派精明強幹之員詳細調查分別追繳荒價一項如果萬分無力措還只好撤佃另行招放是否請卓裁摺片均甚妥協業已拜發矣

退耕堂政書卷三十七

退耕堂政書卷三十八目錄

函牘四

致周璞帥二十七函

致外務部七函

退耕堂政書卷三十八

天津徐世昌

函牘四

致周璞帥

與東地方業經設立道缺亟應劃清界限北洋派去各員踴勘金苗喧竇奪主自當另議辦法現袁道察看將竣俟其回奉面詢情形如何將來或歸江省自辦或與北洋合辦再向蓮帥商定一經整頓則此等問題可不煩言而解也公就近如查得有何情形祈隨時見示以便與蓮帥商酌爲盼齊愛鐵路先以箇人交際與此領談論最爲妥當已將各情函致唐帥俟商有端倪然後再由郵傳部與比使接洽較爲著實度支司呈文一件亦係實在情形已飭兵備處核減容再奉布

又

前接手書並抄送倪翼長所擬營制餉章原件暨度支司呈覆公文藉悉一切既云荒價罄盡無可籌措祇好將營數酌量裁減仍以暫敷分佈爲目前權宜辦法俟籌有的款再事擴充現已飭承議妥另摺送請台覽計裁去三營統領三部每年不過由江省另籌銀八萬兩之譜若將馬隊每匹發給官價之三十兩隨後再陸續扣還其節省又稍多矣

又

接奉江字十八號來函並韓經歷稟圖二紙藉悉一切江省邊防東西並重尊論統籌全局從切實處下手極爲確當宋道屢次來函亦均注重卡倫此外則邊墾局業經開辦所擬創立之官貨局亦因款絀尙未舉行如學堂審判巡警各節均未提及當飭其斟酌

酌緩急勿驚虛名以符實事求是之意愛璉與辦卡倫務當革除舊日面目或仿宋道辦法期於實際有裨前已將宋道所辦章程寄交姚都護矣宋道函稱自塔爾巴幹達呼山起至額爾古訥河口止所有邊界鄂博重新修理一節此事關係國界亟應舉辦請飭查明關於此路邊界從前有無案卷交涉情事以便咨部核辦現派于道親往該處周歷查看並繪細圖呈閱惟于道近擬添赴伯力議航路章程此兩事均非旦夕可竣應如何分別先後祈公酌核情形便飭遵辦現電飭于道來奉一行以便面商一切俄人地價一事昨接施道來函因公司佔地太廣前任所辦頗涉含糊尚須再加研究與彼磋商已飭施道一面與勘定界址一面催繳地價俟續議情形如何再行佈聞

又

頃奉江字十九號來函備悉一切愛瑋興東以遜河分界甚爲妥協愛瑋旣改道缺該處津貼應與興東呼倫貝爾等處另訂劃一章程或比省中各司或酌加視辦事繁簡臨時再行酌定札蘭諾爾湖煤廠巡警應何時添設卽祈隨時體察情形由我操縱爲要宋道此次來函所辦各政如學堂巡警審判等件已飭其量爲收縮勿事鋪張惟專注卡倫以收殖民實邊之效查沿邊各卡現已次第成立特自吉拉林以下道路不通假道俄邊斷非經久之計現宋道已派員調查俟其竣事報告再議籌款開通該道所請駐站兵丁照省防例不扣六分平鄙意因出入甚微滿站苦累亦係實情前已諾之祈尊處彙案報部時特予聲明當亦可行又該道請將倫城牲畜稅以一半歸公一半津貼員司前經雪帥照准又指撥鐵路地價及達賚爾湖煤稅爲邊墾局常年經費又請截留

羊草稅爲添設卡倫之用現在事事創始固非財不舉惟應權緩急庶可循序圖功均請酌奪情形分別飭遵且該處已改道缺將來通盤籌計何項劃歸該城何項應解省署均須另訂章程也

又

前據倪翼長轉據幫統陶景星查覆套匪結交阜得勝一案當經行知奉天巡防營務處行查去後茲據該處轉據洮南府孫守先後查明呈覆前來查阜得勝現在索倫包辦木植其子福海又在江省供差自其表面觀之固無不法實據究竟行爲如何不得而知阜得勝父子既係近在左右諒必早能鑒別茲特抄單呈覽希仍隨時嚴密查看俾得預爲防範免釀隱患是爲至要

又

頃奉江字二十一號來函誦悉一切江省利藏於地非大集資本

不能經營殊令人有臨淵之歎目前辦法先從切近處著手來論所舉數端皆切實可行如能經理得法歲入必可加增放荒一事東省舊習只重售地而不重墾地以故歷年放荒僅得荒價而地利仍未開闢湯原一帶土脈膏沃須設法勸民間開墾俾盡地力庶不蹈從前放荒之弊甘河煤質既佳惟轉運甚艱須籌出路尊議先造輕便鐵道或平底煤船極爲得法卽希規畫一切集款速辦燒鍋官鹽皆可操券之利公知人善任必能指揮裕如也齊愛鐵路俟唐帥到奉時細詢情形如何再行佈達前宋道寄來滿洲里草圖一紙此間賈科員耕熟於蒙部地理飭其詳加校正因就原圖爲簽注數則茲特寄呈台鑒又于道開呈節畧一紙一併鈔呈用備考證

又

頃奉江字二十二號來函誦悉一切礮價五萬兩前由吉省代墊請飭以四萬兩撥還吉林度支司以一萬兩撥寄奉天三省支應處亦仍屬吉省也其餘應歸應發各款希飭談司使分別勻撥可也拉哈蘇蘇撤關一節尙未得經帥覆信蓋此案俄已允撤而尙未實行如將來撤去俄關由中國自設已派稅務司往查宋道興辦卡倫屢以撥款爲請經費不敷實亦任事者之苦已飭其將學堂審判等件暫從緩辦而專注全力於屯墾惟每年需款亦復不少祈公酌奪情形於部撥十萬內能撥歸該處若干如羊草木植地價煤稅某項可撥歸該處徵收此外如有不足再行設法補助蓋目前既無大宗鉅款而邊事日亟經營萬難再緩不能不爲得尺得寸之計想公亦必謂然也

又

正書卷三十一
疊奉江字二十四二十六二十七二十九號來函祇悉一切俄商
葉梅爾雅諾夫踴勘金苗一案原合同本不能作據我有可持之
理由已照尊函指陳各節詳達外部請將此約作廢以免再生葛
藤滿站俄巴釐司撤毀國旗劫辱官弁誠如尊論非僅派員道歉
所能了事詳閱達聶爾問答之語亦並未十分認錯我若如此下
台以後交涉愈難措手已電達外部請向俄使嚴行交涉如照宋
道所云將該俄員懲辦方能稍復主權也江省今年雨澤霑足人
心安謐可卜有秋曷勝慶幸賑粵捐款已電達安帥海濱災黎當
共拜鴻施也鄂中水災湘皖同有此患亦殊切杞憂耳

又

奉江字二十八號來函藉悉漠廠代收木稅及庫瑪河金溝一切
詳情漠瓊分疆收稅本係一時權宜之計所有殖民籌邊諸事自

當另議辦法唐帥回奉云蓮帥之意擬以漠河觀音山兩廠歸東三省辦理北洋原出之三十萬作爲入股請公統盤籌計如以爲可行卽由江省派員接辦以後地方收稅等事劃歸瓊瑋管理則順而易舉矣姚都護前函本有親歷沿江上下擇要設卡之說用意甚善卽希轉飭照辦江省官缺昨已議准鄙意舊人未可盡棄如姚宋均尙能辦事擬合各署一缺其餘一缺如需幹才孟玉雙材器夙爲公所推重前次公來函亦論及似可合其試署統乞卓裁核定見覆

又

承示新官制已預籌進行具見規度閔遠羣策並舉甚盛甚盛江省地曠人稀財力困難添設民官意在開通榛莽安集流亡故規畫務求完備而創始不妨簡單詳審經費預算表實已綜覈詳盡

此書卷三十一
樽節萬分今姑於減無可減之中而求其可以省費者數事一承
辦處公費此項當係署中委員辦公之費惟道府廳縣用人宜有
繁簡等差公費數目似可不必限定一律如慮辦公不能無人可
以明定薪水酌設佐治員事繁者量增額外作爲委員蓋經歷巡
檢久無責任可言何如乘時裁改以期漸達新官制之目的是佐
治員與辦公委員可併爲一佐缺可裁而承辦處公費可省也一
壯役公食及捕盜薪餉津貼此兩項爲費亦復不貲鄙意不如徑
行創辦行政司法兩項巡警行政巡警兼司傳提司法巡警專管
緝捕歸地方官調遣教練養成警士之資格參以軍隊之性質如
遇大股鬍匪可商調防軍以爲之助平時則與練會聯絡以清盜
源是壯役捕盜併改巡警一費可作兩用也新建官署但須有辦
公處一區住房若干間規模不必備具也則建署費用可從簡矣

各項官缺亦不能不就財力緩急擇要敷設如瓊瑋呼倫兩道龍江海倫兩府或以副都統升或以廳升經費自較易籌可先設者也愛瑋呼倫既設道治則兩廳可暫緩設其府廳縣各缺均宜先派設治委員調查經營將來卽以戶口多寡田地荒熟爲施行之次序至於爲地擇人因材器使斟酌事體之繁簡破除用人之資格則公固優爲之矣夫創偉大之事業固宜有至厚之財力以爲之副西人經營殖民各地均運內地全力以專注於一區故不數年而榛莽頓化爲文明財集者效亦捷也東省彫敝已達極點內省又同一困難無能援助而殖民綏邊舍建治設官無從入手建治設官又在在需款巧匠豈眞能爲無木之室亦惟有量材就事於省無可省之中求其可省而已

又

頃接瓊瑋姚都護來函籌議瓊屬事宜如木植礦產開通航路創設火磨等件均關緊要特飭鈔呈冰鑒就中航路一節現已函商經帥擬組成吉江合辦之局所有籌款用人將來均仗碩畫木植礦產及火磨各節尙屬輕而易舉祈就近查核辦理再蘭西縣商民寄來公稟一件茲並附上其中情節虛實卽希選派妥員前往密查以期水落石出

又

尊籌設官辦法審量緩急秩序井然而改編警制增設佐治不獨於新建官廳蕩廓積習並將於舊設各治推行盡利宏規大啓氣象一新良用佩慰嫩江臚濱黑河等府旣據邊要應如尊指卽與愛呼兩道海龍兩郡一律先設其各州縣設治委員俟章程議妥請公擇要先派不必待弟到江也墾務辦法以戶口多寡田畝荒

熟爲地方官考成最爲扼要之論墾殖生聚本爲行政官專責以
勑辦伊始頭緒紛繁不得不別設局所以期速效從此墾局與地
方官乃遂判而爲二生殖大計地方官反不問不聞脫然事外因
之弊害雜出莫可究詰故非責成地方官墾務難望起色往常慮
及不意公已先事度之也

又

手書并鈔件均悉江省現銀奇窘若統按實銀折價則公家損耗
太鉅該司等所呈雖爲體恤員司兵丁起見然未將款項通盤熟
計語多空理無當實行至劑平市價自須現銀充足乃能由我操
縱究竟能否指出的款或另有騰挪之法旣飭由度支司及官銀
號廣信公司等議應俟籌有辦法再行核奪事關全省財政自應
並顧兼籌其營隊發餉一節亦應俟議商後再行核定

又

前奉來電具述齊齊哈爾商埠租建專章請示外部久未得覆一節當經電部催其核定茲接外部來函大致謂齊齊哈爾開埠亦係照約辦理一切章程仍須知照議約各國若由部核准照會各使恐諸多挑剔轉難施行不如由江省自定作為暫行試辦章程等語囑轉達尊處酌辦并敘及從前函覆雪帥因慮所劃租界外人未必允認有預將地界擬定俟洋商來設行棧再行酌定章程之說以洋商有無來議租地為詢茲特照鈔轉達竊思此項專章外部既為慎重邦交未允遽行核定則作為江省所定先行試辦亦無不可且既係試辦章程儘可預定施行不必俟洋商來此設棧再為察看計議惟商埠地界總須預為擬定以期適宜一切統希察奪籌示無任跂盼

又

頃接五十三號惠函具悉一一宋道赴省一切想均接洽該處牲畜皮張各稅原議爲擴充之用茲以邊款奇絀籌擘維艱挹彼注茲移緩就急目前應辦各事不至因乏款而致延誤其不足之數執事並允於省中籌撥應用籌邊碩畫體國公忠逖聞至佩惟據宋道來稟謂稅款挪用無餘邊卡春墾必有所需亦須預爲籌畫等語仍望隨時酌度俾其藉手有資不至鉤棘滿局事起交涉方殷增兵之舉在彼時自當從緩茲漸有解決消息由營務處籌撥屯紮邊隅荒僿藉資鎮懾補裨於疆事者良多租建專章卽照部函作爲試辦甚善所有辦法經尊處詳細參覈分別規定自必折衷至當一俟規章既定竊願先覩爲快承示陸軍部來咨以巡防營務處開支太鉅屬合核實裁減弟已將原咨詳加閱核似可據

江省情形酌量駁復蓋江省物價奇貴用人維艱本難與內地各省相提並論且名爲巡防營務處實則兼辦軍需軍械發審各事亦與內地各省不盡從同倪司使所陳甚切卽照此復部亦無不可仍望察酌定奪是幸再江省新設圖書館需用江南官刻各書前經函商午帥旋據復稱已飭編譯局按月各備一分交由滬道轉寄茲將原函鈔呈並希察閱

又

宋道來面呈地方應辦事宜節略三紙表一分詳加考核多屬當務之急謹分別條列於左

一溫河以下仍宜擇要添設二卡察漢敖拉再添一卡以期聯絡聲勢藉資防守揆諸情形自應照准

一未修齊並應添修之卡房明春應卽趕緊興修以資棲止原估

價銀如不敷用准由正款項下彌補但須由該副都統嚴飭承辦之員切實做去勿稍浮冒是爲至要

一募足卡兵以便墾地此時萬不可緩認真辦去邊境乃有充實之一日羊草稅款撥案提取二成津貼局卡自屬可行開路一節尤爲切要沿邊圖說務飭速辦以爲我疆我理之計

一滿洲里奏設府治自應預籌該道所稱車站劃界後該處邊墾局應移界外並籌款建造市房以便招商出租並一面招墾洵屬切要自應早爲籌及以免臨時拮据

一收籠鄂倫春辦法尙屬妥善應派各員卽由該道遴委至溫河總卡處所設官貨分局預備鄂倫春必須之物以便交易因勢利導無逾於此可速籌辦

一中俄國界以額爾古訥河正流爲界自是不易之論明年春暖

凍閉應卽辦理請挈銜咨商外務部照會俄使彼此派員會勘
一沿邊羊草俄民以爲生活若懸爲厲禁非華人不准放票必出
全力以爭恐釀重大交涉該道所云自係實在情形仍應照該
道本年辦法將章程一年一定權自我操萬無意外交涉此項
草稅票卽如該道所請來年由度支司承領以備稽核

一本年邊墾經費共需銀八萬餘兩除已領外虧銀二萬兩應卽
照發惟據該道面稱該城尙有征存羊草稅約計八千餘兩可
以就近留用應再撥一萬二千兩卽已足數並已咨呈省署請
領請飭度支司核發以應急需

一預算來年經費除活支外應需銀九萬五千餘兩年前請先撥
三萬兩籌備來春各事未雨之謀用意周備應卽照准亦請飭
司設法撥給

一各卡以邊墾爲重荒地撥卡兵耕種自足爲領戶之倡如有領戶准兩總卡官發票丈放事屬可行應飭該道妥慎將事庶將來地闢民聚邊境可望充實

一溫河距吉拉林設治局七八百里遇有詞訟暨交涉案件該局實苦鞭長莫及應准暫假溫河總卡官以行政權與吉拉林設治局分段治理至酌加薪水並加派書記均可照辦

一根河上游金礦應亟踴勘應用款項准由羊草稅項下動用察漢敖拉附近煤礦尤宜實力開挖以濬利源沿邊礦務卽由各卡就近採探呈明該道辦理

一請添馬撥軍衣局卡等項經費並邊墾總局各公牘該道以事不可緩隨咨隨辦並邊墾章程自應一律照准請由江省具文照覆

正書卷三十一
一溫河以下明年添設卡倫應准先添卡兵以資巡守

一購買輪船以便拖帶風船上下搭客以利交通此舉萬難再緩
愛琿興東亦應一律辦理惟須通盤籌畫共買輪船幾隻撥歸
該三處分管卽以搭載客貨入款開支經費其陸路亦應逐漸
開通以期聲息靈通

一邊塞總局公費不敷自係實在情形准照一百五十兩開支以
資辦公

一庫克多博總卡與溫河事同一律亦准添書記一名

一以參領銜道員管轄總管於名義上諸多不便裁總管則無所
統屬該道所論不爲無見瓊琿一道事同一律已飭諮議廳一
併核議

一該處旣改道員一切權限應照道員妥擬辦法惟該處邊遠與

內地情形不同應酌量稍事變通隨時更改

一該城各稅由該副都統派員徵收稅款可以儘數截留支抵該城行政各費惟度支部咨要統計調查所收各款按季呈報省屬以備考核稅局應卽歸併辦理其沿邊羊草皮張稅暫准由各卡帶征以節經費

一鐵路交涉處處與地方關連不可稍分畛域所見極是該城業已改道俟實行後本有辦理交涉之權至稱倫境鐵路交涉分局遇有交涉事件分報該衙門以便接洽事屬可行應卽照辦

一勉渡河設辦事公所稽征草木皮張各稅並就便招墾以爲將來舒都廳設治基礎事可照辦

一該城珠爾畢特鹽地所產之鹽收歸官賣附入官貨局兼辦此亦籌款之一端准其先行試辦將來銷數暢旺再行設局辦理

一該城僻在一隅百物昂貴薪費太薄實不足以維繫人心各局應准酌加薪水以資維繫

一該城既改道員現在副都統薪公應照道員薪公開支請由尊處早予酌定以便該城截清造報

一該城邊壘現已辦有端倪應將大概情形先行具奏以便將來報銷請公飭擬稿示閱挈銜入告

一車站畫界籌辦巡警並各站勦匪章程早爲議定業由該城咨呈省署應飭鐵路交涉局速核辦

以上各條均屬極不可緩之事鄙意均可照辦未知公以爲何如據該道面稟業將節略呈覽仍候卓裁轉飭遵辦

又

頃奉初八日惠書誦聆壹是宋道所遞節略多經卓核統籌兼顧

具佩盡籌惟創辦一切在在需款自必須詳細籌畫方能從容施措至續陳條議四條其中窒礙難行之處早已痛加指駁如所稱予副都統以專權用人理財兵事外交由其自主一節該道春間來函卽有此請當以三省政令貴在相通省署邊地不宜隔膜切實函覆俾自省悟若照該道辦法以一道而離省獨立不啻增設一省誠有如來函所云者况倫城地居邊僻所有用人籌款胥賴省署提挈方克有成若獨據一隅自爲風氣勢必求通反隔求速反遲一切益難就理方今三省實行新制從前隔閡之弊所當悉與盪除倫地旣改設道員卽應照內地道員之例於地方各事稟承省署妥籌辦理其副都統舊日制度豈尙可因仍不改耶又如所稱參領銜節制總管名義不便等語此次亦經函致該道指示其誤執事謂節制之事視實權與定制不盡在於虛銜卓見洵極

精到蓋參領銜之道員雖不能統轄總管而足以統轄各旗道員之設正以統轄蒙旗爲重至總管之屬其統轄與否於事實上毫無關繫試觀內地各省督撫將軍兩不相統而行政之權日偏重於督撫今道員既綜握行政之責苟能將地方各事逐漸改良遇有關係旗制之事與總管協商辦理斷不致反受其牽掣蓋道員本有參領銜足以統轄各旗又上有兼將軍之總督兼副都統之巡撫皆爲總管之切近上司層層節制已極周密尙何慮事權不集責任不專總之此時一切政策均當以統一主義行之不應循從前分任辦法渙散分歧徒滋流弊我公洞明時局盡慮所及正與鄙見相同邊事困難此後籌款經營均關重要尙望隨時籌示期臻周洽至所跋禱昨閱俾齊兩侍御奏草中有涉及東事之語特飭照鈔寄呈並希察閱是幸

又

前接五十四號賜函備悉壹是扎賚特旗請借銀十五萬兩現值整飭蒙務之際正擬收回權利該旗又尙有地租地價可指自可准借公家既代借款則還債一切均須代爲主持所有該旗欠債確數應先詳查而歸款辦法亦須預定當飭由蒙務局詳議茲據籌擬辦法三條尙屬周妥應請照派鍾秘書官帶同通曉蒙語人員前往按照單開各節詳細查明該旗所欠萬成號一項本息數目及尙有何項債目所稱欲借洋款語近要挾應嚴行申飭禁止其籌備續放荒段並請飭墾務局逐一簽覆至擬借之款江省能否籌撥若干此間現有代烏泰還債餘款一項俟赴扎旗查明後再行統籌分別議撥

又

手函並鈔件兩扣披讀再四具見盡籌深遠良用佩慰應覆各端
聊述鄙見仍希籌定

一設治一節前經函商大怡亦已粗定自應擇要辦理惟添設民
官想從原議擇要先設並先用設治委員試辦凡有墾局稅局
之處即可令該委員先行承辦但須察其才力如何其副都統
所改之道缺是否先行派員暫署抑將副都統改署須酌定辦
理尙須入奏能先以原官試署辦理較爲得手邊墾及呼倫設
卡各事亦宜具奏奏稿均請先行寄閱惟倪丹忱所辦屯墾因
被水決涸復甚少已與原定章程不符開辦時如未具奏現亦
不必奏咨俟辦有頭緒再議希查案辦理

一改編巡防制兵似毋庸全數調省緣外城巡防亦關緊要不能
以改編之故令全省兵隊空虛致疏巡防也其改防制換統帶

汰老弱一餉章及改制以後安插閒散兵丁辦法須由倪翼長與各統領會商籌辦奉省現已改編亦主此義故防勦調防之各軍隊尙無鬆懈之弊至東西布特哈兩總管及呼蘭通肯鐵山包東興鎮各協領等官誠於兵事吏治坐擁虛名徒多窒礙惟目前該處籌備未周似尙未可遽撤且俟兩城設治後粗具規模地方知所稟承再行酌核裁撤奏明辦理協領各缺誠如贅旒然在變通旗制之始但能裁撤各旗之長官如副都統使之受治於督撫命令之下若遽裁協領則以下旗官旗兵無所統承於吏治軍事似尙難十分接洽今宜併其事權如設治地方民事悉歸地方官管理卽一切旗地糧租亦可漸次設法歸地方經徵一面廣爲旗官統籌出路而尤以培植各旗子弟使能自立爲要旨庶各旗曉然以融洽爲保存而不至以終身廢

西書卷二十八
四
棄爲疑別生阻力也

一江省財政困難情形誠如來愒出入相抵聞每年約不敷四十萬兩儻創辦設治推擴邊防則所虧更鉅酒稅糧捐鹽釐清丈甫經試辦成效未彰擬懇飭部中設法接濟亦萬不得已之事自應瀝陳情形通盤計算切實陳奏惟請撥部款必須擬有辦法或指明何項支用或擬定指撥何款否則易於推託必致空文拒駁似宜預計數目籌定指項用項庶幾有濟尙希盡畫裁定如擬奏稿亦請酌定寄閱

一湯原荒務查包攬漁利乃東省放荒之通病但祇問其墾不墾不必論其包不包蓋初放之荒非有大宗包攬荒地之款則荒地必難盡放荒質遼廓之區亦非三五小民所能先往墾種承辦委員招攬屯種之人冀速了事果使轉賣居奇以致荒蕪不

治自應撤放另佃但共有三十餘萬响之多其中有無輦轉暨
改放能否卽辦須飭切實體察嚴定放荒規則以致實效
一沿邊安設卡倫據倪司使所陳辦法看似事簡費省然沿邊三
千數百里僅於百里內建一卡倫每卡倫僅用弁兵五名斷難
照料且卡倫之設原爲護衛民人安行旅固邊防起見若寥寥
數卡倫恐從此遂無發達之期卡倫尙穴地而成更安望其建
築房舍其所擬輪船巡弋事尙可行然亦僅祇半年封凍以後
改用扒犁來往但爲通消息之用又豈能巡固邊防衛我行旅
查署愛琿副都統姚福升曾有設卡條議並繪圖甚詳辦法亦
尙周密惟用款稍鉅亦請我公酌核辦理創辦一事必須爲將
來擴充計款絀難籌祇可循序漸進不宜過從簡陋也
以上各節俱爲目前應辦之事參以鄙見仍候酌定施行奉省

天氣和暖遙想龍沙千里風雪逼人諸希珍衛

再俛司使所辦屯墾今年應領之款急待撥用卽明年預計之款似亦應少爲籌備俾免失時惟江省財政支絀此項係特別之費勢難如數支付而奉省同一困難亦無專款可撥可否飭廣信公司暫撥紙幣數萬兩作爲商借之款將來陸續籌還惟合以江平銀價計算以免虧折統希卓核飭遵辦理再哈爾濱一埠爲南北樞紐而錢法紊亂商民交累道勝銀行遂爲金融機關之總匯現在擬於該處設立官銀分號遴選向在道勝充總稽查者孟範九卽玉雙之兄爲分號總辦渠於銀行極爲熟悉尤知俄之內容已擬定章程籌撥資本凡東省各號之匯兌及信用皆得推以紙幣請卽飭下江省官銀號一律照辦惟聞哈埠現有廣信公司及江省分號在彼以紙幣收買糧食意在以虛運實計亦良是惟聞盧布則

因之大漲今年收買事畢是否卽行回江並希示覆爲盼

又

接誦江字五十七號函藉悉屯墾籌款現在將來俱形艱窘然以邊務要政自不能不設法維持當日開辦旣經度支司由廣信公司暫借紙幣支墊目前需款甚急又無他處挪移仍請按照本年所需銀四萬餘兩速令度支司在廣信公司借發俛道以便趕辦墾種各事至明年用款擬由此間暫爲代借銀四萬兩卽祈派員來奉籌議領解以備支用此後容再商酌辦理營餉支絀邊防需款各情形自宜通盤計算切實陳奏應辦各事業經函復計達台覽日美協約之內容外表尊議極中肯綮外交現象與時變遷少川在美當更多一番籌度也

又

接江字六十一號惠書備論壹是前以哈埠俄幣充斥錢法久荒
金融機關亟待整理爰有籌設駐哈官銀分號之議案業承發交
江省銀號查照辦理諸叨公誼佩慰良深惟是江省財政向恃廣
信公司紙幣以資流轉來函以哈號紙幣通行之後該公司信用
減縮恐致阻滯爲慮洵屬實在情形容當從長籌維期臻周洽此
次收買糧石全以官帖圓票換收實貨自與盧布價值無涉原設
分莊分號在哈經營舊業與奉省推設之號原可並行不悖江省
財政之阻滯由於紙幣信用僅及本境匯兌機關種種不靈俄人
因得以羌帖壟斷其間擁財權而弋厚利商情所便趨勢隨之有
由然也尊意哈埠新設分號宜先注重匯兌以圖抵制洞燭時勢
允推至言統俟妥籌辦法隨時奉商以副盛意

又

昨讀正月十一日另箋所開據提法司詳請革員瑞祿親老丁單
援例懇奏請留養等因並鈔原件具悉惟軍營重案欽奉
特旨加重該革員瑞祿所犯罪名係在常赦不原之列雖逢
恩詔無可援引定干部駁所請奏懇留養之處礙難核辦

又

頃接東京秘密報告所述頗關緊要特飭鈔呈察閱尙祈尊處嚴
密查探隨時防遏如查有勾結暴動情形並希迅速密示爲要又
據宋署副都統函稱滿洲里邊墾局總理閩臣辦事穩妥於邊界
情形頗有閱歷現滿洲里已設臚濱府治該丞係同知班次銜缺
不符諒難邀補地方設治以後卽該局亦須歸併既有前次交涉
影響若遂令投閑置散恐勇於任事者益將觀望不前且啟彼族
輕易之念可否酌予錄用或於邊地各缺量爲補署等語查前次

滿站交涉該丞所爲並無不合且年富力強才亦可用應如何量才調用之處卽希察核辦理又劉監督炳奎前經齎領江省咨文仍回原部茲該員留奉另有差委所領咨部文件業據呈繳查銷併以附聞

又

查倪署司承辦屯墾所有本年撥銀十二萬兩明年撥銀九萬兩前經允准在案計自開辦至今僅領銀八萬餘所領紙幣以虛價合銀及扣京平計共虧一萬餘金以本年未領及補虧之款統行核算尙須江平銀四萬七千餘金應設法籌撥飭令趕辦並歸還商墊應付薪工至明年需用之款除建房費外應領江平銀七萬七百餘兩以上二項共江平銀十一萬餘兩須由度支司分別迅籌照撥以免有誤墾種江省度支奇絀籌撥艱難無米之炊同深

焦慮惟屯墾爲籌邊要政應撥各款從前既經允許明歲春墾在
邇亦實有不容延緩之勢應請察核轉飭籌發當此左支右絀之
時或亦不無移緩就急之處也又改編巡防軍隊一節現值冬防
吃緊各營因編制未定不免羣懷觀望改編防隊爲整軍之基礎
亦於安邊有裨卽請卓裁批定之後迅行宣布庶軍心既定邊防
益固愚慮所及統求察核

再頃奉來電詢及日美協約一事當經電復計達典籤此舉爲列
強觀聽所關尤繫東亞安危之局所有兩國彼此照會備載協約
全文業由外部鈔寄前來詳加核閱大要以主張平和維持現狀
保全公益爲詞而其內容之解釋實吾國所當注意而研究之茲
飭另鈔寄呈卽祈察閱是幸

頃奉十一日惠書并手摺一扣具諭一一宋道所具節畧間有空礙難行之處此間早經痛駁前承函示當卽詳覆計達典籤茲閱江署文案簽核各條均甚妥洽卽請照辦至該城道缺統轄總管稍有不便卽仍以參領銜奏明兼理蒙旗事務既有兼理之權則旗務一切亦必不至牽掣似較之僅加二品虛銜尤爲切當仍希察核辦理至設治各員缺想已核定是否先行派署抑分別具奏後再分飭遵辦統望卓裁

致外務部

頃據黑龍江鐵路交涉局提調張守壽增稟稱俄商葉梅爾雅諾夫持有二十七年前將軍薩保與俄官訂准俄人在江省開礦合同來局要求准其開採否則向中國索賠償踴勘費茲將來稟鈔呈鈞覽此項合同僅有前將軍簽押鈞部尙未批准俄人藉詞索

詐似無難據理斥駁奉省現無此案底稿除向江省咨取外恐該俄商赴京向部中饒舌合先密陳祈酌奪情形預籌應付爲幸

又

江省西邊滿洲里緊接俄疆自東清鐵路行車後交通頻煩屹爲重鎮茲據宋署副都統調查該處情形並地圖一紙鈔送前來於邊疆形勢具有關繫特飭鈔呈冰案該處國界雖久未經理而沿邊各鄂博宛然屹立俱有基址可考近聞俄人有以滿站東分界之說雖未昌言而其東悉比利亞車站修在該處已越界三十餘里歷時既久將遂據爲已有亟應預籌防範可否由鈞部商准俄使自塔爾巴幹達呼山起至額爾古訥河止所有邊界鄂博重新修理改立石柱鑄刻華俄兩國文字標明界線以免日久混淆實爲切要辦法又沿邊一帶俄人殖民屯兵至今經營不輟我境空

虛寥廓現甫著手興辦而款項奇絀在在掣肘祇好爲得尺得寸之計尙祈指示一切俾得有所遵循無任企禱

又

前以俄人在拉哈蘇蘇設關徵稅礙我主權疊飭署濱關道杜學瀛向俄領提議由我收回茲據杜道覆稱俄稅關係盤查違禁之物並未收稅俄官屢以爲言尙屬可信惟此案前經照會俄領劉巴旋准照覆應由北京外務部接議嗣於四月間吉省札派吳守文泰前往接辦俄領仍以未奉政府訓令不能開議爲詞再四磋商僅允電催其政府回示現閱旬餘屢向催詢迄無回電等語查拉哈蘇蘇係臨江州地面俄人於此設關實屬蔑我主權雖無收稅情事亦應要其撤去俄領屢次藉詞推宕應請鈞部照會俄使催其速飭撤去此處是我內地彼當亦無可辯論也

又

延吉近日交涉情形無甚大變動惟日人藉端滋擾時有不法行爲火狐狸溝一帶爲韓國會甯至六道溝之大道日員派李敏求金採榮等充當社長預立行政機關豎立木標擅改社名並派斂民財以爲社長月費又頭道溝憲兵派出所內之韓國書記金李二人有強姦民女之案其他如憲兵之拘押華民潘祥傳喚華民徐守山等日人皆飾詞庇護其於強姦民女則謂尙待調查李金等係韓之官吏不能歸我訊辦其於社長斂財則謂韓民呈請給以諭帖情願出貲供給種種狡展殊堪痛恨若木標一節當日拔去之時曾許以照樣立還惟將地名更正彼此據理辯明彼因詞窮而去又報告彼政府與我交涉尤爲無理至六道溝附近西岔溝韓民數百戶華民九戶被剃髮韓民黃用元朴允熙等四名聲

稱係統監府所派巡檢受日官命令徵收警費經陳督辦昭常等
調查一切情形並取具華韓人民被其禁押勒索刑毆等供結乃
日人力辯黃用元等非韓巡檢並無命令所捐之款係爲辦理學
堂其於華人並非勒捐係屬借用毆打雖有其事並不重大應得
之罪須由伊懲辦凡此數端皆日人近日無理之行爲彼反捏詞
妄報指陳督辦等爲不法可否由大部將以上種種情形照詰日
使亦使知彼之報告未足爲據或可戢其強橫免生無數軼葛如
何之處統候鈞裁

又

頃據杜道學瀛函稱俄人於哈爾濱創設自治會現在官場緘默
不言暗中仍在組織緣此係俄欽差什潑夫立意現與總董係開
火磨之俄商別列克每年此會需款五十萬元各商因款過鉅從

違各居其半其官場事在必行聞已請示政府俟覆准卽畫押實行又查俄人于烏蘇里江一帶極力布置去年約遷民四萬戶聞尙須補遷四十萬人其實邊備兵顯然可見等語查俄人在哈埠設立自治會歐美各國均不承認我可利用此機力與爭持否則日本效尤行之於奉天我將無詞以拒南北兩區域各施其行政權後患何堪設想應請大部向俄使嚴行詰阻並電致駐俄薩大臣與彼政府交涉以期挽回危局除飭杜道於沿鐵路一帶聯絡華民極力抵制外合行佈聞尙祈主持一切爲幸

再啟者據哈爾濱交涉局于道駟興稟稱俄人創辦自治並非聽伊國商民自辦仍係鐵路公司主持但令商民擔負經費故俄商亦多不願近日又在滿站宣立自治職局前已傳諭華商不准允附今探該會勢將成立一面告知俄巴釐司一面將俄商董邀請

來局告以此係中國地方未經中政府允准本局萬難認可但彼由哈爾濱海拉爾而推及於滿洲里正在極力擴張之際無論如何駁阻欲其自行停緩萬不可得而鐵路界內巡警一事去冬以來屢次催商非俟展地各站地界劃清不肯提議此時對待之法惟有一面堅持不認並諭華商不准入會一面就力所能及者爲之如華民宣講所華商研究會等項以期逐漸開通將來抵制較有把握等語合併縷陳統希鑒核

又

敬肅者頃據報告日人近頗注重韓國咸鏡北道元山清津各港現議派汽船三艘往來於大阪清津又派汽船一艘由日本舞鶴港通艘元山清津輸運貨物經營開島以期興旺日韓政府各補助航費金一萬五千元又聞統監府人員稱開島韓民現約十萬

華民二萬餘日人三百名中國壓力稍減韓人勢力漸伸韓國度支及農工商兩部近年陸續撥款補給該處居留韓民邇來日官不時徵兵就在韓之日本商民挑選丁壯派入軍營練習日韓兩國漁約現亦成立派軍艦魚雷艇各一艘專司保護又緝私船八隻沿海巡查從前中國漁船每歲赴韓采捕成爲習慣現因中國政府未與之互訂漁約不准我國漁船越界私采經統監府頒出訓令自本月十一日實行又咸鏡北境去歲牛疫盛行由日本獸醫永井氏前往防疫現在疫已止絕而延吉琿春方面往來牛隻仍須檢查韓王前擬北巡咸鏡道元山等港現又中止等語延吉界務近雖將次提議而日韓覬覦之心迄未稍戢卽如所稱隨時徵兵挑丁練習派汽船往來以恢商業撥重款補助以資僑民無非本其拓殖政策以爲實力進行之計用意實爲狡逞除飭延吉

隨時密察情形妥籌抵制外特將所稱各節覩陳鈞聽並祈密行
察核指示機宜無任企禱

又

敬肅者頃據報告齋藤大佐經二十二日已返間島又聞清津日
本理事官詳報自西四月一日開港以來招練日商約計千名卽
所轄境內鏡城會甯穩城鍾城富甯慶源慶興等處約有日人四
千名惟清津至會甯二十三里間用手押小鐵道現擬修改輕便
小汽車極力經營以期將來聯絡清津間島運送貨物又稱間島
東西二部地土肥沃將來農業出產必旺又聞日本將續派憲兵
五百名不日渡韓云云以上情形均爲經營間島張本合行佈聞
卽希鑒核

退耕堂政書卷三十八

退耕堂政書卷三十九目錄

函牘五

致外務部十九函

致陸軍部二函

致度支部

致農工商部

致軍機大臣

致薩道蔭圖五函

1996

11

1996

4

925

退耕堂政書卷三十九

天津徐世昌

函牘五

致外務部

前奉鈞函詢及孟克西里左近洲渚屬中屬俄有無圖記以及俄人抗不納稅始於何年抑或向不納稅囑令查明舊案以憑核辦當經轉飭宋署副都統詳查迅覆茲據覆稱倫邊中俄國界自阿巴哈依圖嶺以下至額爾古訥河口以額爾古訥河爲天然界限左岸屬俄右岸屬我徵之康熙二十八年黑龍江約雍正五年阿巴哈依圖約咸豐八年璦琿約十一年勘分東界約二百年來此界迄未改易惟因河道改流河身淤久港汊紛歧中間每有洲渚勢所不免然兩國旣以河爲界自應以現在河流之大者爲正流

卽以正流爲國界之定限此一定不易之理孟克西里卡倫在額爾古訥河右岸距大河十五華里而去大河右岸十餘里地方另有小河一道寬不過丈餘一經水落卽有旱乾之處卡倫現設小河之右自大河至小河中間洲渚寬十餘里長六七十里羊草豐茂卽俄人指爲彼界不肯納稅者證之舊約詳審河流該洲渚自應屬之中國俄使謂原係屬俄不知何據其所稱同治二年東西伯利亞總督曾經轉知中國邊界官員以該島實歸俄國版圖所謂該島者應卽指阿巴該圖卡倫附近洲渚而言該處河流二道中間洲渚計寬十餘里長至三四十里兩河孰爲正流上年因秋水盛漲未能詳細查勘然附近俄屯河流較右岸以右之河寬而深以形勢論仍應以附近俄屯爲正流其洲渚等處全歸我屬惟該洲渚屬中屬俄徧查舊檔迄無案據亦無圖記可考其納稅一

節則始於去年蓋從前俄人越界刈取草木視同已有向不納稅沿邊各處皆然自去年始定納稅章程而該處因河界未清應徵刈草等稅俄人迄未認納竊謂國界當以條約爲憑兩國界約既未修改卽無他項案據現今中俄交界自應以歷次舊約爲根據以會查形勢爲辦法事關界務關係至重卽使果有同治二年之事亦豈有由俄員轉知邊吏卽可據爲已有之理况詞出一面我國並無此案更難援以爲據各該洲渚僅生草木並無居民俄使謂自彼時起該處俄民踞爲已有又何所據而云然界務既有轉轄斷非憑空所能辯論必須會同詳查乃能確有把握現在尙未清查爲一時計祇可將沿額爾古訥河所有島嶼暫且置爲閒田兩國均不得在此煩擾以期共保治安上年已與駐海拉爾俄外部官議定各行知邊界官其島嶼在未經會勘以前各該島之樹

木柳條羊草及各項物產兩國軍民諸色人等均不得擅行伐取一俟會查明確究應歸於何國再行各照本國章程辦理當卽分別遵照在案現在卡倫逐漸擴充必有確定國界始能資以遵守且及此時會勘清楚我界人民日眾並可各自保守以免彼族侵越之虞仍乞轉達外部催俄使定議派員會查以免續生軃轉於兩國均有裨益等語竊思俄使照復各節既全係設詞朦混而該處地方除從前界約之外亦別無案據圖記可稽此時欲清理界務誠如該署副都統所稱應以歷次舊約爲根據以會查形勢爲辦法據其所述形勢又當以大河爲正流以正流爲國界之定限該洲渚旣在大河右岸自屬我國版圖無疑萬不能認該公使此次照會爲據仍須會勘明晰方能確定至於洲渚物產雖經該署副都統與俄官議定彼此不得伐取不過權宜之策事關界務

豈能久任含混應請鈞部察照各節轉達俄使仍催其定議會勘國界既定庶振興邊壑擴充卡倫一切乃可著手也

又

頃據探報韓王此次出巡後伊藤擬下月返國不復來韓仍兼統監銜繼其任者爲陸軍大臣寺內正毅凡駐韓師團均歸節制兼轄文武各員遇有要事仍與伊藤電商又韓太子聘定日本貴族之女伊藤返國爲韓太子主婚聞韓太子在韓時已聘定尹氏之女爲妃尙未迎娶今又聘日女不知其爲妃乎爲嬪嬙乎聞島地方從前因保護韓民設巡查所四處嗣又添設四處今又新添四所其經營此地不遺餘力概可想見特此轉佈用備察核

又

昨聞俄人將以鐵路公司改歸政府經營以便干涉政權昨經電

正書卷二十九
達鈞聰俄使在京必提議此事與鈞部交涉一經承認則東方自主之權非復我有日本於南滿洲亦起而效尤嗣後經營一切我愈無從措手此殆日俄協約以後合以謀我之現象關係甚爲重大應請鈞部預籌抵制杜彼狡謀並鈔呈節略二紙皆所探近日情形及密籌辦法以備參攷應如何應付之處恭候鈞裁並望秘密

又

前由奉派委遼陽城守尉德裕攜帶測繪員生前往查勘蜂蜜山一帶地方冰天雪地數月奔馳據報該處疆界頗有不甚分明之處亟應及早釐定以杜覬覦查咸豐十年立約後中俄境界交錯沿江沿湖有天然界線惟興凱湖之西北角界線不能明確據咸豐十年約所謂自白稜河口順山嶺者蓋自五色旗東之河溯至

上游河口計七八十里順老黑白山之嶺而至角桿頂子再西至黃花窩集而至綏芬之瑚圖布河如此畫界並無大曲折以現在白稜河觀之其河身不過十里上口盡處則一帶平岡並無山嶺可順據錢恂中俄界線簡明說觀之則現在所立界碑並未移動特界線曲折太甚蓋本光緒十二年重勘琿春界約而記之也錢恂未經親歷撰述本無足據現訪之該處土人則謂五色旗之東河邊尙有中國卡倫其基可指南站地方因同治初年俄於興凱湖西岸紅土巖設官治理爾時航路未通以文報之故借地安站沿湖凡四處此事鈞部應有案可稽俄人借地之後遷民耕種迨後航路通行三站撤還惟南站不撤並竊移五色旗東河邊之喀字碑於南站東小河之東岸移老黑白山之拉字碑於三索以相混淆共計佔地百五六十方里土人言之厯厯如此光緒十二年

重勘琿春界約及合璧地圖吉林不甚完全乞飭鈔寄一份以備
考核現擬整頓界務應自圖們江沿邊補立界碑以期完備又三
姓改設依蘭府後前任王守嘉禾雇用俄人曾給俄官照會收稅
以致百般苛索民怨沸騰呢嗎口下五六十里拉巴沁地方一帶
林木賣給俄人砍伐四圍共百餘里烏蘇里江東岸本有華民四
五百家自江東畫歸俄境華民安土重遷納俄租稅近因該處土
酋名富歌者能操俄語句串俄人多方欺壓誣華民爲鬍匪拏良
民六人置俄監獄永禁不釋穆稜河北岸黑嘴子地方柴姓長子
因俄人打獵槍斃羣猪出與理論亦爲轟死現在東岸居民日不
聊生情願拋棄房產移回江西而俄人嚴守溝口不准渡江以上
數端正飭分別查辦誠恐俄人無理取鬧或致向鈞部饒舌特此
陳明儻有交涉藉可據理斥駁不致爲其所蔽不勝大幸

又

頃聞伊藤十七日由仁川乘軍艦返國聞間島派出所建築廳舍費三萬八千圓業經興工約本年十月告竣又聞鴨綠江架橋工程估價二百萬圓擬明年三月或八月動工云云日人政策著著進行橋工若成往來益形便利彼於其地逐漸設施則一切管理行政權隨之以去我尙何從過問此案不速行解決彼強我弱恐未易相持到底及今尙未興作應如何預籌抵制祈鈞部速定辦法以伐其謀若待機發必有後時之悔除飭陳都護隨時防範外謹此肅陳

又

前奉鈞函以中俄合璧地圖遺失第三張屬向吉省檢查能否覓補遵卽函致吉撫屬爲詳查茲據覆稱此項地圖當日原只備兩

分一存政府一存俄國此外恐別無傳寫之本詢訪已久實無知者合璧地圖第三張此間實無從覓取等因又據吉林交涉司鈔送沙草峰中俄界址大略琿春城南中俄界址大略均於舊卷摘出關於吉邊一帶堪備攷證特飭鈔呈此外界碑界圖確實可據者頗少現該撫復派員前往實地調查以期與前次勘查者互相印證俟稟覆到日再行續聞

又

接奉鈞函並鈔稿祇悉壹是日使援引中俄通商條例擬將東三省小麥及其他穀類准其由海道輸出此事關係約章不能不詳加籌度且日使所稱小麥及其他穀類範圍甚廣一切詳細情形已囑少川中丞面晤商酌統候鈞裁核辦

又

頃據報告咸鏡北道清津港爲間島咽喉之地擬由日本敦賀港直通航路至清津以便往來運輸貨物接濟間島每年日政府允准補助航費金五萬圓邇來日本工兵步兵各一隊進發咸鏡北道駐防各處云云日人如此經營有進無已用特布塵卽祈鑒核

又

昨據仁川唐領事恩桐稟稱現在日本興業銀行向英法兩國借款二千萬圓撥一千萬圓整理韓國土地餘一千萬圓分撥爲植產興業與土木工事及創設鹽場曬鹽各經費之用近查統監府代韓國管理財政去年收入總結表所有地稅戶稅水產稅鹽稅航稅礦稅典當稅白葎稅及一切雜稅合計六百五十九萬零七百五十圓零六毫六先八釐另海關稅三百三十二萬六千四百四十八圓零四先云云事關延吉交涉日人如此經營我更無從

著手然不得不作爲借鏡之資用特奉告

又

延吉交涉一案前經分飭祁道祖彝吳統領光新等先後前往確切調查旋據祁道電陳大略情形業經鈔呈鈞鑒茲復由祁吳二員各將調查情節詳細繕摺呈報前來查該員等此次親往查勘調集各處文電報告面晤日本中尉平田等諮詢一切所查起事顛末交涉情形均尙詳晰按之延吉迭次電稟大致亦屬相符祁道復將建屋挖溝各處繪具詳圖以資考證茲飭照鈔原件寄呈鑒核並將所具詳圖摹繪一紙一併寄上伏祈鈞部察照核辦此案日人無理暴行又復捏詞狡飾以所查各節證之洵無遁情事實既有明徵公理安能久蔽竊冀折衝樽俎漸就範圍則邊事之幸也界務問題亟待解決比日鈞部已否開議所有提議情形尙

乞隨時寄示不勝跂禱

又

前據延吉廳陶丞稟陳奉派往晤齋藤並馳往火狐狸溝察視死傷弁兵大略情形當經鈔呈鑒核在案茲復據該丞詳細報告續行稟陳前來詳加核閱於晤見齋藤平田問答各語以及親赴肇事地方察看各節均經備載較之前稟爲詳且該員偕吳統領光新前往調查亦可與吳統領報告情形互資印證特飭照鈔寄呈卽祈鈞部查照前寄各件併行察核雖大致無甚異同或有類於複述而調查要當徵實原不厭於求詳經此迭次查詢庶幾可無遁飾耳

又

頃譯得俄人所著東省鐵路小說具述東清鐵路虛糜巨款以及

辦事各員種種弊端謂莫如將此項鐵路賣於中國最爲合宜等語細加核閱所述頗爲詳贍用特鈔呈以備鈞部察核又頃接駐韓領事唐恩桐來函所述日韓各事頗足以供參攷清津一港爲通行閒島之樞紐日人開埠振興不遺餘力近又於閒島增設警察特飭一併鈔呈統希察閱是幸

又

頃奉賜緘據海參崴商務委員桂芳稟稱東三省地方應行廣勸民間種麥飭令籌辦等因仰見注念邊陲振興實業至意莫名傾佩查三省地方地勢廣衍土脈膏腴雖近處寒帶一切牛租無不繁茂誠爲天然農產之地祇以地曠人稀土著之戶不事耕耘附近蒙古諸部落又多藉詞游牧未盡墾闢以故豐草平原所在皆有其已經墾種之地則又株守舊習耕作苟率然每年東省之元

豆紅糧尙爲出口貨物大宗可知地力之優勝聽其荒廢尤爲可惜也世昌到東以來卽有見於此非從振興農業著手無從辦起故招選直隸山西農林各學堂畢業生來奉分任調查演說諸務並編輯關於農事各種粗淺白話報紙頒發各屬廣爲勸導復擴充農業試驗場以資則倣本年已在各府廳州縣擇要添設分場十二處上年奏請設立農官亦卽此意此外如設立森林學堂種樹公所研究所皆籌辦農業一部分之事又延聘美國專門農業教習二人德國專門種樹技師一人化分土質研究土宜以求辦法底於完全祇以款項支絀未能放手辦理竭蹶經營思爲得寸得尺之計僅及二年一切規模亦已粗備由此逐漸擴張切實做去東省農業自可蒸蒸日上盛第目前效力尙未大著此正如農家子終歲勤動所獲極微而立國者恆倚之以爲富強遠大之圖若

或以爲不急之務議其糜費則未諒區區籌備之苦心語云雖有智慧不如乘勢雖有鎡基不如待時誠有味乎其言也大部籌議及此實爲邊氓之幸至小麥一種東省以海龍暨松花江流域爲最盛以供哈爾濱火磨之用並運銷於俄國東海濱阿穆爾一帶此外各屬所產僅供本地食用尙無大宗運輸出口者查上年營關小麥出口之數僅二千九百餘石卽可概見奉省歷來所種僅祇春麥其秋麥一種據省城農業總場暨新民分場報告試種均屬相宜惟奉吉麥種不佳並經採購美國麥種試種極有效驗現正擬將此項籽種散之民間廣爲種植與桂委員所陳攷究歐美麵粉性質辦法正復相同現在荒地實行墾闢者漸多業經轉飭所司竭力勸導數年以後東省麥產一項當可冀日有起色因奉明詢特將東省辦理農業情形詳細縷陳以紓廛念

又

頃探聞今春以來朝鮮都城雖無震驚而各處義兵與日憲兵屢次爭鬪無日無之伊藤長谷川等已歸日本目下一進仍以宋秉峻爲首領而李容九副之秉峻於御車前拔刀斫侍從官致動眾怒疏劾免官旋即避居日本然宋李雖皆在日而各處一進會黨仍爲民患韓人之充補憲兵以及爲日兵通譯者又皆倚勢凌民恣其魚肉橫行甚於日兵蓋因地方官皆有日員爲監可以庇護渠輩也韓廷集議延吉一帶地方旣已歸還中國而僑居該處之韓民須由日員管理佐以韓員並擬逐年增加韓員一二名陸續前往襄事實於我國大有不利等語查所稱各節於延吉邊事頗有關係用特摘陳鈞部卽祈鑒核是幸

又

頃據呼倫貝爾宋副都統函稱滿洲里站緊接俄境自興修東清鐵路又開商埠俄商既日全集俄匪亦遂潛滋魚肉蒙民以致搶劫命案層見疊出自十一月二十四日據滿站交涉分局呈報俄匪戕斃蒙民二命並劫去銀錢甚鉅十二月初二據報華商劉永德被害以上兩案兇手俱逃十二日據報入俄籍之蒙人搶劫蒙民馬匹十八日據報二案一爲俄匪搶劫華商十五家一爲俄匪搶劫第巴呼圖克圖喇嘛銀錢緞匹等件幾有二萬盧布之多屈指不出一月滿站遠近出搶劫重案五起俄匪如此肆擾蒙民何以聊生等語查滿洲里近徧俄界往來甚便鐵路界內尤爲藏匪之區我無緝捕之權彼有藏身之固似此劫奪橫行何堪終日擬請鈞部詰問俄使並與磋商辦法蓋鐵路本商業性質非殖民主義嗣後必須安分商工人等俄官方准給照來華在入華境兩頭

之第一車站如滿洲里及波格拉尼赤那牙卽小綏芬之交界驛均由華官查驗無照者不准放行仍令回國其餘無業游民不得給照來華如俄國遷赴東海濱之民有由中東鐵路前往者亦由華官驗明護照電致交界驛之華官以後沿途不得隨意下車逗留到交界驛仍由華官查驗如人數短少卽向公司查問沿道各車站均由中國巡警會同俄巡警隨時稽查如有無照及無業游民限三日內驅逐回國鐵路界內居留各外國人應由華巡會同俄巡查明不准私藏軍械以保治安至俄國護路軍隊時常換班應先知照第一站華官查驗以上數端果能辦到實邊境生民之福第恐俄使有意刁難未必遂如我願請鈞部力與爭持反覆開示設竟任匪黨橫行非惟我之不利卽於彼之商務所損亦大總期訂一妥善辦法俾邊民得以安枕蒙疆幸甚大局幸甚

又

頃據延吉函報六道溝本街包攬車頭華民郎福順向以包攬車輛爲生因金城商會日商包雇車輛載運貨物欠有車費尾數三十餘圓屢討不給本月十八日復往索取該日商不但不給竟將郎福順毆打重傷該處派辦委員當卽率同劉委員親往察看其時華民及車夫等聚集該店門首均以拘拿店主爲詞經該委員再三開導飭退華民隨卽進內看視郎福順受傷甚重該委員一面往齋藤處告知各情齋藤卽派憲兵前來會同察驗日人情願將受傷者移於他處調治該委員祇許仍在金城店內醫養未允移至他處因該店尙在修理並未開市日人亦不能以有礙商務爲詞也現由陳督辦等詰問齋藤並要其懲辦凶手若將來釀成命案必尙大費交涉用特先將此案情形詳細上陳向日使議及

時當可據理折之也

又

頃聞咸鏡北道清津會甯所有居留日人議將兩處輕便小鐵軌
改造汽車鐵道延長通至局子街其清津一港擇日本海方面適
當之處以敦賀爲最日本北海島直通航路聯絡清津往來商民貨物
卽乘汽車直達間島則北韓北滿交通爲第一要衝可助輸運上
之速力該處可期發達已舉代議士三浦民向日本眾議院提議
伊藤回國擬就近教育韓世子有不復回韓之說足見彼之經營
間島實力進行殊可危慮用特奉達卽希密爲籌核以圖抵制

又

竊查俄人近二十年以來於悉畢利及遠東等處移民闢地不遺
餘力比自日俄罷戰經營尤亟卽如伊馬河一帶向多華民寄居

本年因遷民漸眾遂將華民悉數驅逐窺其用意實將從容布置
漸圖推擴我國疆域與之接壤若不早爲抵制將有蠶食之虞茲
將調查俄國經營悉畢利及遠東各處遷民表鈔呈鈞鑒伏祈察
核籌示俾有遵循無任跂禱

又

查中日會議東三省善後事宜條約第六款載中國政府允將由
安東縣至奉天省城所築造之行軍鐵路仍由日本國政府接續

經管改爲轉運各國工商貨物自此路改良竣工之日起

原註除因運兵

回國航延十二箇月不計外
限以二年爲改良竣工之期

以十五年爲限卽至光緒四十九年

止屆期彼此公請一他國公估人按該路建置各物件估價售與
中國等語按此約訂於光緒三十一年十一月由此算起至三十
二年十一月已滿運兵回國十二箇月之期又自三十二年十二

月起至三十四年十一月已滿改良竣工之期今該路並未開工何得有竣工之日且約文末款載本約自簽名蓋印之日起即當施行今日人於此款並不履行條約應如何向日本使臣提議籌度之處伏乞鈞部酌奪施行

致陸軍部

前以俄人託辭護路連運大批槍彈用意叵測宜加限制等情電達大部仰承錄送稅務處知照核辦至爲紉佩嗣聞總稅務司報告俄擬運兵二十五萬人至海參崴一帶以抵制日人間島之舉動當以事關重要派員至海參崴偵察情形茲經詳查稟覆據云俄國鎮守該處總司令官爲米司尼果夫將軍統帶海陸諸軍筭理各處礮臺以籌備防務戎政爲責任沿海一帶礮臺林立如彼得大帝灣阿穆爾灣烏蘇里灣諸海峽以及港口港內大小礮臺

計三十五處每處礮臺大者八門小者六門其礮則有重礮機關礮兩種礮臺守兵近皆改用手雷重量大者二十斤小者六斤短兵難於近接復有水雷錯雜密布水面蓋自日俄戰後海參崴一埠實爲俄人經營遠東之命脈故防衛頗極嚴密其形勢險阨不亞於旅順或更過之就海軍情形而論十年以前本港有義勇艦隊八艘西伯利亞艦隊十二艘東洋分遣艦隊五艘迨黃海一役海軍燬焉本港僅存水雷艇數艘運送艦一艘而已而此運送艦亦係戰時輸送人馬自旅順遁逃於此者現有之水兵共七千人查俄國地跨歐亞全國海軍分爲數處所謂波羅的海芬蘭拉伯裏海以及西伯利亞與太平洋岸是也而各處海軍遇有戰事各自爲戰不能相援故近年俄國對於海參崴悉力謀海軍之擴張現已有海軍製船廠水雷魚雷製造廠聞四月後尙擬將製船廠

推廣數處以資應用就陸軍情形而論其在遠東之根據地初爲哈爾濱蓋哈爾濱居三省中權其地爲一大平原對海參崴旅順成丁角形誠戰略之樞要也日俄罷戰旅順旣失復移其根據地於哈巴羅夫黑龍江沿岸鐵路告成則哈巴羅夫挾高屋建瓴之勢足爲海參崴之後援且襟江帶海四塞以爲固東北可出混同以援庫頁島西南可涉松花以援哈爾濱兼之軌道縱橫四通八達水陸利便亦軍爭之地也外此則雙城子居鐵軌輻湊之所爲哈巴羅夫之障亦爲海參崴之側防現計哈巴羅夫雙城子海參崴三處共駐西伯利亞步隊十八萬人卽步隊九十標每標二千人戰時倍增其數可得三十六萬人而海參崴一埠則駐三十四標卽六萬八千人標分十隊隊二百人第十隊爲機關礮隊有礮六尊此皆戰後新編之軍制復有西伯利亞礮隊七營營五百人

正言卷之二十一
三三
統計三千五百人每營山礮十八尊計一百二十尊又烏蘇里馬
隊黑龍江馬隊各二千人總步礮馬隊計之凡七萬五千五百人
有營務處以資統轄憲兵隊以任巡查比來傳聞俄國將於哈巴
羅夫雙城子海參崴等處增兵四十萬人自雙城子哈瑪塘以下
俄國兵營絡繹不絕現方籌備工事木材延訂華人包攬鐵路左
近所在有之間開工約在四月以後俟營房建築就緒然後派隊
來駐等語竊維日俄經營東陲已非一日近復改變其外交上之
方鍼各爲軍事上之計畫恣野心而圖侵越挾實力以謀進行卽
私運軍火一端已可以微窺其隱况據該委員所報告者推廣船
廠以期擴充海軍籌建兵營以備添駐隊伍兼營並進不遺餘力
後患深爲可慮疆吏肩茲艱鉅自當慎爲籌維妥爲對待惟茲事
關係綦重旣經偵查屬實不能不將詳細情形布陳鑒察夙荷大

部經畫全局燭照邊陲儻承詳核密籌指示方略以資因應實爲至幸

又

前者調東各鎮協支用火車民車鋪草等款開單報部咨請核銷嗣奉大咨囑分晰火車人數等級車價路程並將旱路轉運車價切實刪減另行咨報具徵大部綜覈軍政慎重籌維莫名佩仰事關會計自應詳細晰列以昭核實惟此間實在情形亦有不得不瀆陳清聽者查此次開支火車價銀雖祇列總數而事前業將各處火車文據鈔咨立案一一可稽卽如南滿鐵路所開價值數目均係照單應付實無從逐細開列若此時責令補造清冊勢必勉強牽合期於適符原數究亦悉屬具文况當時收付車價具可查悉一切原存文據亦可調驗印證委無浮冒等情應請大部俯

賜察核准照原冊銷案又旱路雇用車價一節查從前都將軍奏
定車價四千文係屬制錢此次冊開以銀易錢卽係按制錢計算
制錢亦稱老錢每一文卽實作一文核計而東省市價之錢名曰
中錢係內地京錢之變稱是以每一文應作爲二文核計似未可
相提並論數目相懸職是之故且近年銀價日漲以三十三年分
市價計之尙不至如此之昂來咨謂市價原有漲落省鄉或有不
同洵已洞燭及此若令强行刪減實恐徒滋賠累亦祈大部查照
原開數目一併核銷至若各營鋪草銀兩例應歸度支部銷案自
當遵照另行咨送惟此項款目爲數無多且實係沿途所需與運
費情事相類可否由予變通並由大部一律照銷凡此軍需消滴
皆關國帑此間亦經再四覆核竊敢據以咨陳統祈察奪核行實
紉公誼

致度支部

吉林延吉廳一帶地方邊務重要前經奏派專員前往辦理會於上年奏請

賜撥常年經費六十萬兩奉

硃批著照所請該部知道欽此嗣經大部議准指撥一次當准陸續解到一年以來藉資撥用籌辦一切得以略有端緒匡助之誼實深寅感惟該處地方外人覬覦已久不惜金錢肆意擴張籌備稍疏政權卽失近雖經營佈置粗具端倪然此後應行舉辦之事尙多各項費用日益加增且該處幅幘遼廓地利未闢卽界務問題解決以後外人眈眈相視必益思乘間抵隙爭先下手抵制之方尤難稍緩其常年用款如開實業興屯墾暨測繪地面清查戶口添備軍餉平治道塗創辦警察建立學堂以及用人行政在在

正書卷三十四
需款常年經費爲數甚鉅上年承撥之款轉瞬用罄而吉省度支
匱乏實屬無款可籌思維再四惟有奏請按年

賜撥常年經費六十萬兩以應要需此摺現已拜發尙祈大部鼎力維持照數撥發明知當此庫款支絀之際固應統籌全局樽節支用惟邊防吃緊時機萬不可失亦不敢顧惜貲財坐使前功盡棄此項撥款專供籌邊一項之用切實核計已屬有絀無盈務希大部格外關垂俾巖疆重要有所措注無任感禱之至

致農工商部

奉省請設農官以宗室覺羅滿蒙漢八旗子弟等充選一摺此事關繫民生至爲切近而在東省尤爲急要之圖敬將籌措情形爲大部詳晰陳之上年奉

旨爰籌八旗生計東省爲根本重地所宜首先計畫世昌自奉

諭後日夕圖維竊謂他省人溢於地難在於爲旗丁籌生計東省
官多於民並難爲旗官籌生計東省旗官平居閒散無所事事習
爲安逸不講學問不務生業卽欲提拔每苦於無法安置是以責
令入各項學堂研習實學將來入法政學堂者可改爲民官學陸
軍者可爲陸軍官長學巡警者可爲巡警官長學教育者可爲視
學官至於專習農務者擬卽用爲農官以資董勸而且彼都人士
於本地人情風俗類能言之瞭然蓋少小卽習吏事備悉官中之
掌故見聞不出里閭獨識鄉閭之利病此其特質良有可取况以
農事論土宜物產尤惟久於斯土者爲能周知而熟計之今若增
設農官因材器使廣爲造就用專門之學爲專門之官旣可徵諸
實驗以本地之官教本地之人亦倍易於感孚也上年五月直隸
保定設立農務總會經大部奏准並飭各省一律仿辦九月間復

奏定農會章程頒發各省一律遵守並聲明各省情形不同准其因地制宜大部之提倡農業可謂不遺餘力夫設農會以收脈絡貫通之效實爲整理農業之樞紐惟東省民間情形與內地不同內地民智日啟農學亦漸知研究一經提倡卽能互結團體共圖公益東省程度幼稚招農尙猶不至何以言會識字並慮乏人罔論乎學故非董以專官則趨向不能專壹非糜以好爵則觀聽莫由興起此次所奏農官章程擬於農官署內設農務總會實欲使官紳農畯互相聯絡以期有所主宰不至渙散蓋內地各省農會能自成立自不必官爲組織東省則非設農官無以有農會揆諸大部因地制宜之意亦實相爲發明也且農官之設周制不具論前漢十三州刺史每州設農丞是爲特設專官之始至魏武帝時置典農中郎將典農謁者南北朝因之間置勸農使至南宋復有

勸農使之設大抵皆承兵燹之後安集撫綏視之爲尤重而其利效亦較著東省草萊甫闢一疲於庚子之變再燿於日俄之役戶口本稀兼以流亡若非特設專官勞農勸甦何以平瘡痍而復元氣是則援古證今農官之設固特宜於東省矣夫以東省幅員之廣地脈之厚良爲農業天然隩區徒以地利未闢致天府神皋等於磽瘠

國初以來籌八旗生計者未嘗不注意於此溯自雍正末年以八旗生齒日繁籌思生計至乾隆初年御史舒赫德已有墾東省荒地安置旗人之奏嘉慶末年吉林將軍富俊始擬實行奏開雙城堡荒地道光初將軍恩筠繼成其事後稍寢廢矣至光緒二年盛京將軍崇實奏開東邊荒地七年銘安爲吉林將軍奏請開荒特命吳大澂爲督辦練兵屯墾大臣可謂剏舉而效亦不大著者

則以未設專官徒責州縣無職任可言故無功效可見也農事與民生最爲親切非多設小官和易近民斷不足以資勸導現既重籌八旗生計豈可復循前軫不思良圖於東省而籌旗民生計惟振興農業爲天然之利源於東省而求農業振興亦惟增設農官爲當前之急務勸農之術亦阜民之基也不特此也中國爲農業國而大部實有整理全國農業之責故大部前令各省設商會近復令各省設農會凡所以集羣力資諏度也然農與商異商會中尙有才智之士足與共謀公益農則吾國素未講求亦毫無勢力強迫設會其勢仍散而不舉此次請設農官定章並由大部監督在本省啟上行下效之漸在大部亦收提綱挈領之功誠爲一舉兩得而且現奉

明詔預備立憲立憲基礎要在自治自治制度首立鄉官旗官不

避本籍故東省本係鄉官制度特其治事則在城而不在鄉今以之爲農官治其鄉民是真鄉官矣地方自治以鄉官立之基而天下之有鄉官又自大部發其端樹厥風聲永茲媿懿亦盛事也卽就旗民言之東省本多旗地無所謂旗丁旗丁卽凡民也故爲凡民籌生計卽爲旗丁籌生計今選八旗子弟造成農官以教導其鄉民並選各省農學優長者參用之增長知識互呈功能三省農業發達必速地利旣免於埃蕪民情各遂其樂利利用厚生之道固莫便於此矣况農官雖用八旗子弟仍以農學畢業者爲中選有職業可資歷練旣遠勝於惰游於實學曲予優崇亦隱勵其志嚮俾向之狃於逸樂習於固陋者亦各從事學業勉爲成材庶幾民氣奮興國維自固凡茲計畫蓋皆於未具奏時熟思環顧審慎而後出之者也現已具疏奏陳由大部核議用特詳述三省農事

關係之重必設農官以振興之伏望公誼主持東省幸甚八旗幸甚

致軍機大臣

東三省爲留都之扼塞行省之衝要畿輔之筦鑰而又處日俄財力競爭之場視爲權勢已成之局者也戰事甫熄南北遂分各挾鉅貲以謀拓殖統之以鐵路輔之以銀行強弱相形主客異勢今則協約已定事機更迫而我乃官絀於權民失其利凋敝餘生救死不贍蓋不待兩軍相見卽以財力角逐已足制我之死命矣朝廷顧念東陲改設行省不以世昌爲不肖畀以專任而董治之然自前歲赴東考查政事卽以東省大勢敝窳拘攣非充實內力無以振綱領而救危亡視事以來調查頻數聞見較真是以屢有息借外債之奏往返籌議至再至三疆吏合謀於外樞臣部臣主

持於內

天子鑒其愚忱特命其請此固三省由剝而復之機爲全球之所最注目者也雖然由前之說第爲三省財政之樞紐用以流通幣制發達商權而行政之費不與焉行政之費則僅恃地方之所入與協濟鎊餘而已總計盈虛負數至鉅挪移支絀困難萬端然苟爲可緩之圖不急之務則廉吏鎮靜之所爲固易見諒於天下世昌不敏豈不能爲得尺得寸之說姑就吾力以爲補苴遠略經營俟諸異日惟默念三省之形勢其不爲兩強所干預者幾希我力所不及者而彼亟圖之敲膚吸髓實力去而名隨以亡屏藩空虛根本失據形勢所趨豈獨東省之關係哉今請言其犖犖大者三省沿邊與俄韓接壤者殆數千里彼則兵屯相望我則曠土無垠俄取羊草木植以肆其侵吞日爲越壑韓僑以行其拓殖延吉設

官且有聞島之事何論曠土愛瑾重鎮且有增兵之謠何論窮邊
且東邊一帶以迄長白韓民雜居不服制止日人且藉義勇起釁
以炫其兵威因應偶疏將爲間島之續設官殖民置屯開路預計
所需動須億萬若不亟籌經費視爲後圖則國界失矣三省蒙旗
雜處從前所辦蒙荒僅爲籌款而不知本計於是流弊叢生蒙情
渙散加以日俄之誘惑或以借款之故而私押土地或以游歷爲
名而測繪輿圖蒙疆與三省犬牙相錯遼源以北行旅不通鬍匪
之所窟穴外人之所覬覦而我則政令阻滯情勢隔閡禍機所伏
至爲隱憂世昌屢飭調查曾有籌辦蒙旗之奏然欲開通榛莽增
拓利權規畫形勢以代爲保存灌輸貨幣以暗圖抵制則必合全
國之財力以謀之非如昔日之僅收荒價而已三省幅員遼闊土
質膏腴無民以實之猶石田耳移民之說朝野一辭然移民必以

交通爲先國路之築道阻且長他若輸送之費廬舍之資耕種之具不有鉅款措手何從任其蕪穢藏富於地終爲敵資勉強招徠不爲逃亡卽入匪黨昔日人之經營北海道也輸款億萬寬其章程厚其利益故成效如此今江省札賚特荒地分割千頃試辦屯田寓農於兵小引其緒而其他荒地亟應預籌特別之款以爲拓殖之計畫此尤不容緩者也森林礦產富甲全球已半爲鐵路附屬品矣其未經開採者公私交困無暇圖謀卽要我合辦者並不能集資以從事坐失利權爲列邦所騰笑商業敗壞資本不充銷場愈滯而日貨陳列本輕價廉下至妓館酒肆無利不搜則我之生計絕矣關東漁業無保護之資金復私鹽無吸收之本他若新軍餉項雖仰給於部臣而軍械衣裝工程學堂之屬用款不貲新政推行凡部議飭立之各局所與夫審判檢察之分立增設民官

量加俸糈頭緒繁曠費用滋多總此數端非爲特別之取求卽係舊政所增益一事之需動逾鉅萬三省民物凋敝豈能擔負重任或者謂吉省官場猶多中飽江省荒價收數亦多而奉省則前將軍遺留之款不下數百萬兩挹彼注茲何有窮困準此籌備豈遂無方不知吉林乘積弊之餘貪吏皆捆載而去莫可究詰荒價所集祇在一時銷費殆盡奉省移交之款實銀不過二百六十萬兩其餘皆墊借蒂欠無著之虛數卽以籌款論實官捐輸則昔有而今無矣墾荒清丈則前盈而後絀矣加以煙土減種期糧禁絕統捐改辦收數頓稀然籌於稅捐鹽釐者上年所入不下三百萬兩較之前任所籌三百餘萬之數猶不甚相遠也且以籌款之道在生利不在分利東省物產富饒地利未闢要在推廣實業開通貨產爲公家濬利源卽爲商民裕生計但所籌之數必視挾持款項

之多寡爲衡若夫革一陋規加一捐款設局以收地價而不責墾荒節用以示廉潔而罔識國體則必利弊相循公私交困勢將以有限之資財取之於商民者盡趨於漏卮而莫之能救此世昌所不願出此者也世昌待罪三邊忽忽一載其間籌辦要政或以財力不及而姑植其基或以事機甚迫而勉籌以應惟恃移交之款及鎊餘三百萬兩挹注至今自茲以往額費不敷遑論特款將墮已竟之緒而成中輟之憂全局所關至爲扼腕然必事事求諸協濟則度支告匱全國皆然是就地籌款之說世昌豈敢自諉但東省應行整理者曰稅曰鹽曰賦行將銳意改革釐定根本正供所入商民稱便以應輸之款振興庶政其有市儈姦民藉端煽惑爲種種阻撓者則將恩威互用志在必行罔所顧恤此又謀定後動應請鈞座代爲力持去春因東省財力薄弱奉

命與樞部諸臣集議僉以顧全根本必須中外合謀或由部撥或由外借以集成一千萬或八百萬之數爲東省一切行政之需救困起蘇言猶在耳乃除鑄餘項下未能有所增益事因勢迫力與願違際此庫帑奇艱內外一致則部撥之說固未敢求踐前言或於外借一層由世昌零星籌借以興要政則亦萬不得已之所爲不能不籌商審定於鈞座者也至於邊務蒙務扼三省之重要關全國之樞機而銷費無形擲資最鉅斷非區區之數所能籌辦應如何寬爲措備源源接濟設法預籌毋使竭蹶蓋以存亡安危此爲機括儻布置偶疏非特三省之事無可措手其影響且及於全國卽所謂就地籌款者亦徒爲外人之取攜而罔或有濟此尤日夜焦思其責任固不專在世昌而必須出全力以圖謀者也其餘愛我之言督察而糾正之亦世昌所樂聞然此重大之端款項之

細則固以爲區區之數猶未能及其萬一耳縷縷愚忱敢布心腹
惟圖之

致薩道蔭圖

昨接來函請籌撥銀二萬兩當已致函經帥就近借撥卽希派人
赴吉備文具領核實動用是爲至要該處交涉總局旣由執事總
辦所有一切交涉至爲繁重諒能悉心籌畫和衷商辦關防亦已
函達經帥請其在吉刊發文曰哈爾濱交涉總局之關防俟發交
到後可卽查收啟用衛隊一節究竟如何駐紮望卓裁見覆以便
核辦

又

接誦來函具悉張翼長在七道河剿匪大勝忻慰之至前接來電
以該營需款甚急當經電覆請由尊處先撥三千元以資接應續

由吉林撥還想均照辦俄總辦霍爾瓦特格外通融力敦睦誼情殊可感請執事一詣彼處道達謝忱以期彼我感情益臻融洽現派陳守友璋帶銀三千兩併食物等前往張營慰勞將弁拊循士卒可先由尊處傳知俾麾下士卒樂於用命昨准日領事函近有日人圖根分班緒方青木兩員在長廣財嶺爲鬍匪擄去希轉知張翼長留心探悉將該日人救回藉以固全邦交而於該軍聲名亦益增重又外部來電該軍在一面坡有砍斃鐵路工人並與巡兵開槍互擊情事望就近密爲一查前途情形並希隨時見示

又

屢誦惠書具悉種切吉江鐵路交涉局立有專章於萬不獲已之中藉以挽回一二今議裁撤另設中外交涉局以一事權意非不善惟驟然更一局而該公司必不承認未免徒費口舌且領事之

跋扈無以異於公司我既與領事交涉遇有關鐵路之事件彼仍展轉推卸其弊維均目前宜暫仍其舊惟辦事權限當極力堅持以圖保我主權公司送局之津貼載在合同應收作局用不必退卻關稅一事關係大局應切實磋商彼欲將允給之辦公房間火車等項全數收回意在要挾當徐圖因應不可爲其所動張翼長在橫河子一帶剿匪大勝極爲忻慰尊處籌撥三千盧布以應軍需實屬力顧大局已函致吉省如數繳還日來情形如何尙希隨時見示

又

前誦惠函論濱江開埠各節維持籌畫具見苦心無任佩慰惟俄人佔地旣廣圈兒河一段雖在路綫之外而距鐵道甚遠各國商民不願前往自係實情且孰肯舍減稅之區而就重稅之地即使

另開馬路竭力經營形勢既有不便彼亦必多方破壞現在美日領事願租俄界而先商之華官是不欲受俄範圍儻能利用此機於該地收回警察權則目前關稅雖覺減征尙得兩害取輕之策蓋自開商埠當爭我權力之及不及不必計關稅之衰旺已據此函達外部未識俄人能就範否耳惟未經商定以前各領事欲在俄界建署我自不能承認至車站畫地十里一節恐難與爭蓋新章明言四面各距十華里今忽翻此案彼決不肯放棄也事機日棘尙希勉爲其難

又

俄界藏匿匪類時出騷擾實爲地方巨患惟該處爲我權力所不及僅能與俄人協商辦法當曉以擾害治安非獨我所不利抑亦彼之隱憂至如稽查防範與彼嚴訂章程執事相機因應務當勉

爲其難鐵路交涉局辦事爲難自係實情惟更張局面必須握有勝著另訂一完善條件方能將合同作廢此事非旦夕所能辦到目前暫仍其舊惟於舊合同所載我應有之權利竭力爭持勿致全行放棄亦可稍資補救至於設立哈爾濱巡撫一節則我決不能承認此事尙係風傳我亦可藉報紙輿論之力以解散之又哈埠地面俄人屢議自治必當與之爭執現各國亦不以爲然似不難阻其成立也近接樞垣密電須入京一行大約到哈之期須稍遲矣

退耕堂政書卷四十四目錄

函牘六

覆薩欽使二函

覆施道肇基五函

致杜道學瀛七函

致楊蓮帥

復齊侍御

復張翼長

致朱督辦二函

致陶司使三函

致倪司使十三函

致郭都護二函

退耕堂政書卷四十

天津徐世昌

函牘六

覆薩欽使

接誦手書藉悉一是此次後藤到俄京情形報紙傳說紛紜不一
執事身在彼都見聞自較真切哈濱至長春鐵路俄既無售日之
意亦未必肯售與中國誠如尊論俄經營海參歲多歷年所而哈
埠爲緊要咽喉未肯甘心退讓也惟無論屬俄屬日我實介居兩
大路權操諸外人動輒受制兩強外示親睦內實相忌加以戰後
元氣俱傷我於此時急起直追正好機會惟人材款項兩俱缺乏
凡所經營不逮彼十分之一奈何奈何現擬開拓實業從商務屯
墾兩端著手俾地利漸闢民力漸充積以歲月或有效果外交情

態瞬息千變仍希隨時注意秘密見示是所企禱

又

俄人經營遠東移民實邊不遺餘力尊函所稱各節具見彼族所定政策著著進行雖經戰敗而精神不爲少衰阿穆爾省東海濱省之地緊接我邊界人進我止人實我虛可慮孰甚現正擬於瓊瑋瑋春一帶著手經營惟款項奇絀應辦之事千緒萬端卽移民實邊一節規畫經年卒以鉅款難籌未及實行相去之數奚啻倍蓰目前僅就力所能及者切實籌辦我之勢力增進一分卽彼可稍減一分似此逐漸辦去或可隱謀抵制終須大加擴充方能固吾圍耳哈埠自治會始終未允撤銷疊經外部抗議僅允改爲公共議事會就中參用華官數人現在我尙未承認而德美各國亦甚不愜大約僅恃口舌終難收效當以實力相持或冀就範

覆施道肇基

接展來函藉悉種切哈濱交涉日繁外人伺隙攫我利權全賴相機應付防患未萌俄鐵路公司其權力實在領事之上交涉事件亦惟公司最多執事此次稍示區別用意甚善自治會一案至今尙未解決俄人亦未能實行美領雖與我表同情然不過作旁觀公論仍恃我有實力以相抵制庶可保此主權務希極力堅持聯合商民開辦巡警我之權力既因彼所設施將歸無效若僅以空言相往復未必遽能就範執事洞悉外情不難措置裕如也滿洲里呼倫貝爾等處已函達宋都護矣

又

頃奉來函並問答節略藉悉一切公司拓地太廣已成鑄錯現及未簽押之時設法挽回尊論極當公司購地雖載合同抑豈能漫

無限制但能爭回一分利益卽將來少一番輻葛諸希執事隨機應付毋爲所搖至與公司代辦聲明刻下各事爲一時權宜辦理參此活筆尤爲得法日後稍有變更不難據此以爭蓋慮周密曷勝紉佩昨周帥來電言及催繳地價彼以劃界後再交爲詞諸祈斟酌辦理

又

前由杜道寄來木石稅費章程繙閱一過其中尙多疏略因飭諮議廳度支司詳加核議又以徐道彙霖張守壽增於哈埠情形較爲熟悉屬其悉心參訂茲將屢次所議者彙鈔成冊寄奉台覽現今木植合同已定稅章允宜斟酌完善以便施行其關於華俄商人互有參差之處尤應詳加釐正毋使偏枯希執事酌核情形妥爲訂正如有應行增改之處亦希隨時見告爲幸

又

頃接朱副都護函稱東清鐵路公司自行車後應納中國地價及木稅煤稅兩項自二十九年未算結約計不下百餘萬盧布現值江省款項奇絀若收回此款於地方不無小補惟爲時既久頭緒紛繁非明幹之才不能就理專恃執事履任與公司直接核算催提此外哈埠交涉待理尙多諸仗盡籌卽希從速出關以慰懸系

又

昨接惠書得悉俄商果列立克被綁情形遂卽電告孟提督嚴飭張么兩統領立懸重賞購募得力線民深入匪巢相機妥辦總期先救後剿不致傷害俄商性命爲主頃復接東電卽將大略辦法電達冰案並查張翼長稟報云有朱雙六者已被擊斃來函所謂

雙六傻子未知是否此人業已電飭詳查矣從前俄人卽有要求出款贖綁票之事均未允准此刻若官允發款令贖則此後再有此等事彼必援例請求而別國人亦必藉爲口實故在我祇能懸賞覓線設法購救方爲正辦所需款項自應作正撥給執事未將仗助之言向俄領宣布足徵卓識北滿一帶爲匪者不獨華人俄匪尤多華商被害之案時有所聞我尙未向俄領要求大可以此抵制俄人舉動向以先發制人我欲在界內剿匪彼未承認彼反以界外派兵剿匪爲請用心叵測故此等事不可不審慎出之如果俄領確能設法自行贖出則由尊處籌付數千圓作爲箇人私交事尙可行相機應變是在執事之善爲處置也

覆杜道學瀛

昨奉手書備悉種切哈埠俄自治會迭經磋商未能就範近又推

及海拉爾滿洲里等處沿鐵道一帶將全歸彼勢力範圍關係至鉅已據情詳達外部請向俄使力爭此事歐美各國多不承認卽俄商亦不甚樂從我若始終堅持一面將鐵路巡警趕緊籌辦未嘗不可挽回日英美商人在傳家甸販賣紙煙不肯輸納租稅俄商旣已認捐有案卽可以此折之將來稅捐自有定章當再從長籌議長春俄商有火磨出售前已有電請執事派員前往查驗機器並查出銷麪粉之數是否適用再行定奪哈埠俄盧布日見漲價我之利權爲彼操縱深爲可慮現正籌議三省財政擬通盤合計聯絡一氣各處周轉庶可靈通目前款項支絀傳家甸一帶能否行銷銅圓卽希查看情形從速見覆以便設法協濟

又

兩奉手書藉悉一是俄人自治一案執事屢與會譚暗用抵制深

得操縱之術渠既不認自治又有將章程容緩斟酌之說似可因利乘便要其更改內容此事本發起於哈埠俄員執事以私交與之磋商較易轉圜至日領出示承認其包藏野心欲圖效尤顯然可見卽東清鐵路原訂續訂合同亦祇許該公司於建造房屋安設電綫等事自由經理並無許以行政權之語日領強詞奪理別有用意當另設法抵制預戢其謀所有俄人一面仍望竭力籌策迎機以導俾能漸就範圍無任企盼

又

俄自治會改爲公共議事會並可派華官數員會同商辦此係俄領在奉面商之言在我尙未承認蓋此事關係在爭其實不爭其名若僅改換名目而一切實權仍操之俄人雖派華官數員不過具位於實際毫無裨益非計之得也此專以爭回自辦爲是惟

鐵路巡警屢據宋都護來函推與交涉局主辦然海拉爾滿洲里一帶距離較遠交涉局是否可以兼顧卽望會商于道應如何統籌辦理之處體察情形見覆爲荷傳家甸稅務全係日人狡抗尊論洞悉機宜卽希堅持到底水利會所擬暫行章程大致尙屬妥協尤望將來履行毋自放棄也拉哈蘇蘇俄關亟應催其速撤以保主權而便商旅事變日亟交涉日繁一切均仗盡籌

又

頃奉手書藉悉一一哈埠諸事均已清釐就緒具見規畫井井曷勝佩慰吉安阿軍現旣裁撤地面空虛可慮所擬速募步勇八十八名以資彈壓並將阿軍原有駐哈軍械暫行借留均照所議辦理俄自治會華商始終堅持並未附入尙覺團體之堅此後力圖抵制或可有所轉圜也交涉各件尙賴盡籌無任馳系施道前數日

抱恙聞不日可來奉也

又

據璦琿姚副都護函稱上年璦城各商由哈埠等處購運糧貨雇俄輪載璦經過拉哈蘇蘇俄關往往勒令納稅否則到璦不准卸載必運至海蘭泡俄城納稅後方准運回璦城商民受累無窮等語查俄人在拉哈蘇蘇設關收稅礙我主權前經抗議收回由吉省派員接辦現在如何情形俄人是否尙行干預商民是否稱便卽希確切查明迅速見覆爲幸

又

頃據俄總領事古樂詩呈送俄使致外部函件大致爲張鎮剿匪與公司交涉各節此事彼此爭執迄未就範據張鎮面陳俄員頗有退讓之意究竟要求各件能否辦到執事與俄員迭次會議必

已洞悉情形希就近妥籌因應以免意外衝突鐵路界內匪徒瀾迹本不易辦今該使函內有彼此議設中國巡警鐵路公司決不干預其事等語正可由此著手應如何訂定章程挽回主權卽希酌奪見覆以便再與俄使磋商

又

日前接展公牘並冊報三十三年冬、季十冬臘三箇月征收華俄商散賣木植票費及灰頭木炭等項稅捐與夫收支各款詳核總細各數均屬相符且較秋季收款亦有起色惟每票應收若干有無一定數目抑係按照貨物多寡填寫除以上四項之外尙有何項捐稅由貴關征收抑由交涉局派員征收此項收款均從何開支有無報解之款向來章程如何尙希詳細分別開送並將現行章程以及歷來收捐辦法鈔錄清摺從速寄來以備查攷

致楊蓮帥

漠河觀音山兩廠礦務地處極邊交涉又極繁重管理本非易事聞尊意擬歸東三省辦理在尊處既可免鞭長莫及耳目難周之慮東省亦可就近稽查切實整頓誠爲一舉兩得之計頃接少帥來函北洋原出三十萬作爲入股一層須公同派員點驗所有房屋器具一切餘存之件切實估計擬定數目算作股本方爲允協鄙意亦以該廠歷年以來旣不免有所虧累累能公同點驗亦未始非核實之道江省財力困難已極少帥切實估計作爲股本之說亦係迫於經濟力求撙節之意惟北洋自開辦以來旣用去三十萬鉅資未便一概擲諸虛牝擬俟兩省派員點驗以後再由敝處與吉江兩省通力合作冀可易於集事庶尊處前出三十萬作爲股本之說可以承認至瑚馬爾河礦務事非漠河區域該員等

自由開採無益北洋祇擾江省似宜明室之制俟將來協商再行分晰奏明辦理現已派仇超干前往該廠妥爲經理矣

復齊侍御

承示各節關懷鄉事蒿目時艱攻錯有資佩韋無斃竊維羣強垂味時局鉤棘而東省之危偪也特甚日俄挾其實力駸駸進行牖戶縲繆動關至計此時急起力追已有著著落後之勢若更以清靜無爲之治行之任其陵轍不爲籌維則千金之隄且有潰於蟻穴者大可憇也弟以菲才渥受

恩知膺茲重寄悽悽愚衷所以上答

聖明者亦惟安內攘外以實心行實政而已莅事以來珂鄉耄俊頗能鑒其誠素而曲亮之曩因創同署辦公之制而改修公署公署之設將使一切文牘無淹滯之患一切要務無隔閡之弊蠲堂

屬之節目集羣策以勸勦爲實行新政計誠莫便於此也又因改定行省制度而創設新官新官之設大略本籌議官制草案參酌而變通之仰奉

明詔令東省先行試辦以爲各省模範所設參贊司道以下各官或爲司法制度或爲行政機關皆經審慎籌維而後定議比來如交涉司巡警勸業兩道各省均且陸續增設東省而不實行整頓則已如欲實行整頓斷不能不從改定官制入手此在識時之士類能洞燭而詳言之若夫審判之改良巡警之推廣

詔章具在中外遵行豈東省所能獨異卽就東省而論曩者大小政令皆以賄成訟無曲直金多者勝自審判各廳成立以後不敢謂遽臻完備而準情酌理固已弊絕風清於茲而不改良審判將仍從前晦盲否塞之爲愈乎曩者匪氛充斥城市居戶且攫其斂

巡警既設閤井晏然所憾限於經費未能一律推廣苟其不設巡警將任匪類肆行劫掠之爲愈乎斯二者權其得失尤易瞭然至房捐爲家屋稅鋪捐爲營業稅東西各國成例具存吾國各省創辦警政者亦罔不取資于此蓋自國家而言集地方之公款謀地方之公益固屬事理所當然自人民而言盡納稅之義務卽得享保安之權利亦符公平之原則奉省警察規行已久茲始創收房捐又復曲爲寬減固所以體

皇仁紓民力也卽公園之設亦以鼓舞人民之志趣輔助地方之發達各國習慣往往於一都邑之間分建公園數處以資游騁夫豈徒爲游騁之娛哉東省所設估費無多財政盈虛初不繫此而且如奉省江省兩處公園其地點均久經外人佔據借此公益名義始得設法收回煞費苦心尤非得已以上數端事理至晰無待

詳陳辱承來函述及用敢就實在情形爲執事觀縷言之抑弟更有進者東省風氣閉塞埃蕪未除神皋隩區淪爲甌脫強鄰因得乘虛而入肆其鯨吞蹙境前車爲鑒不遠弟盱衡時勢深懷不敢自逸之意敵伺方亟邊防爲重爰于三省邊要各處先後創設電線並擬開闢軌路冀交通旣便一切易於抵制復因界務不修時有侵越迭次派遣員司赴邊界各處詳細調查先後印證藉識概略此外邊防所在要政所關靡不殫竭愚慮隨時布置其事旣無可緩其費卽無可省方以財政支絀人才消乏不獲悉力措施爲憾若徒省事省費苟且補苴一旦邊圉有事孰職其咎近數年來俄韓邊境講求墾殖事業整理交通機關得步進步不遺餘力卽於我國商埠各處亦且不惜重費整頓而經營之國帑所輸動逾千萬以東省用款較之曾何足方其毫末一切限於財力亦遂難

於周洽有忝高位無補清時耿耿此心實深疚歉執事何以教之
旋渦世事舊軫已非物競糾紛來日不易台端清標卓識爲時宗
仰當不河漢鄙言也

覆張翼長

頃接來牘並另箋知已派令奉軍後路前營步隊一營拔隊赴江
藉資鎮懾無任欣慰八面城地方緊要爲奉省北路門戶自日俄
戰後降兵潰卒蹂躪不堪誠不可一日無兵駐守惟新安軍自移
駐彰武以來佈置防緝頗有成效當此盛夏樹木森茂伏莽生心
防務尤爲喫緊似未便遽有更易致啟盜匪覬覦之隙仍希執事
酌撥淮軍前往擇要駐紮較爲妥協至添募馬隊一營業經批准
諒已達覽惟聞瑞祿所統三營近與吉祥所統兩營屢起衝突望
轉飭該統領等嚴加約束勿令再滋事端是爲至要

復朱督辦

昨奉手書備論賢勞鞅掌厯險陟幽道塗所需凡百艱苦至爲系念蒙情蔽塞垂數百年執事此番親厯其境見聞所及默識於心將來見諸施行決不同於鑿空此可爲深幸者也遼源居住日人各處測繪暗與蒙旗勾結居心叵測亦由我地方有司放棄責任絕不過問遂致聽客之所爲蒙境情形日益危迫及今籌防萬難再緩目前請密查日人舉動陸續見示一面屬地方官妥籌辦理在游厯則應保護在測繪則應禁阻俾彼稍知顧忌至於聯絡蒙旗抵制外力仍視我勢力之所到非空言所能爲功執事成竹在胸不難措之裕如也

又

頃展固里本包頭寄來手書藉悉日人在彼境種種情形可危可

懼蒙藩各部素守羈縻政策絕不干預其內政及今情變勢遷他族蹈瑕抵隙非變易宗旨決不足以固我藩籬執事此次周歷遐荒採訪所及必已預籌應付之策及今蒙心未去逐漸經營猶可爲力前據尊函已電達外部昨得覆電云現經切照日本代使轉飭阻止並通告各國駐使嗣後游歷人員凡關乎形勢險要處所概不得任意測繪卽偶有可以測繪之處亦應報由地方官轉報該省大吏咨部核辦希飭該處委員於此次測繪日人隨時詰阻並嚴諭各蒙旗毋得與外人私通書信以杜隱患希卽察核辦理所有續抵各處情形尙希隨時見示無任企盼

致陶司使

送別以來時榮懷想接奉電音並接惠函知已蒙召見矣欣慰無量前據傅道良佐報告延吉迤西捧灣子地方發

見古碑碑文略可辨認足證爲中國領土等語當經函達外部在案茲由該道搨印碑文並繪具圖說稟寄前來查碑文鑄太宗年月碑邊又有弘治字樣雖未能確定年代而其爲華人所立之碑固可斷言特將碑文圖說一併寄上卽希轉呈外部留備察核未始非界務之一證也又駐韓領事唐恩桐函述日本兵民分住韓國各道情形以及增設間島統監府派出所各節足見日人經營拓殖不遺餘力特飭一併鈔寄卽希察閱並於謁晤外部諸公時遇便談及以期接洽實爲至禱

又

疊接初七十四來函承示與日使提議各節惟有堅持到底倘稍疏失後患甚大實難允從現安奉勘路一節彼已逾限我旣予以通融派員會勘伊允於他項交涉通融辦理應有互換之利益則

此次擬收回安東被勒之地段及京奉鐵路瀋站移至城根之舉應不致堅拒延吉一案彼已承認朝鮮內府之圖外雖強辯內實未嘗不可讓步以期速結撫順煙台煤礦利益非細目下亦祇能爭到合辦地步新法鐵路一時恐難歸束延吉日兵槍斃我兵士一案要求五款誠爲至當彼雖不允我實有詞終當堅持以全國體日內會否訂期續議尙希隨時詳示郵部所派會勘安奉之工程司何日可到希電示以便先與日領接洽也

又

得正月二十六惠示具佩蓋籌前後裁復各電計均澈覽延吉一案日使既認爲中國領土足見彼強詞奪理難與我爭特欲藉此難題冀獲他項利益今允我徵韓民之稅而靳我裁判之權是徒予我以領土空名而彼藉保護爲詞勢必事事歸其管轄日後巧

立名曰橫徵厚斂何者不可爲先啖我以小利繼行彼之姦術終必至握其全權而屏我於勢力範圍之外方且謂韓民願歸彼而不願歸我我將何辭以解何法以拒之至謂以後仍允不阻韓民入籍查韓民越墾以來繳租納稅薙髮易服供我使役服我政教二十年如一日從無異言非我相強與人何尤彼爲是言是不欲居阻之名乃欲行阻之實阻與不阻從何而辨卽彼欲得有裁判權是如彼不認爲我之領土猶可言也旣已認之則裁判實爲領土之本職領土方有裁判之專權非彼可得而代也我許以擇地開埠設領事已是極敦睦誼乃予特別利益仍當嚴定限制畫定區域毋使蔓延斯爲當耳至會甯一路彼實爲將來包舉吉林之計明知目前未遽建築恐淡淡著筆於此次會議求列一款後患將不可勝言當日俄訂約第七條明載彼此在東三省經營鐵路

專爲商務不作行軍鐵案不移詎能易口今日使悍然不顧竟以
軍用爲言背以尤甚果爾則吉林南部奉天東路掃地盡矣兩省
紳民起而詰責我將何辭以對乎若天寶礦產係程光第串通日
政府復句結美商人已潛逃我方嚴緝合同私立詎得爲憑合辦
之說適從何來且允日何以對美亟宜堅拒以正罪人卽所以謝
兩國也節略內南滿沿路礦產一節忽加入枝路二字爲害甚大
昨已詳電應卽刪去爲要至撫順煤礦現認定商人產業與之力
爭卽歸彼辦除償還該商歷年經營損失所有數目外我應享地
主應得利益所收之利當以七成歸營產三成歸地主若煤釐稅
捐及一切應納之款宜照開平臨城并陞辦法允我派員稽查仍
須與商人王承堯商定方能如此辦理未便以官勢強迫也至煙
台仍應分別核辦此乃不得已之末著如能堅持合辦則失之東

正三書卷四十一
隅尙可收之桑榆也奉天車站移至城根正可越出日本佔據地段爲日後擴充地步若一合辦終久牽制現彼不甚注意宜趁此時與之劃清仍以造橋架過南滿路直達奉天城根另設一站庶免後累前電未盡用再陳之

致倪司使

昨接初四日來函調查事件執事擬事竣親往尤妙所論江省全局洞中肯綮佩甚邊地苦瘠除振興農業一事實難再有第二辦法惟人人皆知墾荒迄少盡善之策尊擬各節切實精密當可實行卽請詳細核議辦法列表寄閱惟開辦伊始大宗墊款必須設法另籌軍隊腐敗暨放青一事亦亟宜整頓另摺所言可以籌辦特是除弊之事尤難於興利凡興一利但實力做去必可有效除弊則非詳查而周慮之不能必其果無弊

又

頃奉來函備悉種切江省地廣匪多兵力單薄改編防營不敷分布自係實在情形前因執事來信以款項無著故議裁減二三營爲目前節省計今既諸多窒礙所需餉項江省如能籌撥卽仍照原數改編奉省現時財力亦實難兼顧務望酌核稟商周帥墾務辦理漸有成效將來逐漸推廣大利可興現值開創之初仍不能不輔以兵力以執事幹略及任事之勇鄙人向所深佩尙望力爲其難勿致中輟無任企盼

又

昨奉手書藉悉一一議併馬衛隊各章程均甚妥協已飭核辦木蘭縣潘令荒謬異常此間亦有所聞茲據黃守稟揭前來未便稍從遷就雪帥擬卽以馬丞六舟請補是缺覆以暫緩現仍令該丞

署理以試其才如何再行酌定

又

江省百端待理目前所最爲鉤棘者無如財政海倫清丈一事前派談署司同墾務局辦理原爲妥籌整頓起見若曠日持久視同具文不獨坐失利源抑亦非實事求是之初意現值隆冬地凍履畝施丈正宜趁此舉行已電請樸帥轉飭派人前往責令從速程功勿得仍前延宕廣信公司基金無多專恃紙幣以資周轉究於市面諸多不便是以前令該公司會同官銀號多以紙幣購買糧石售換現銀此舉不但有裨於目前之市面抑且有關於將來之財政既據來函述及承辦不力購糧無多亦已電商樸帥催令趕買聞哈爾濱因廣信公司買糧價漲商人未能爭買退有後言又聞有價高明年出糶不易之說應卽飭人詳細調查呈報爲囑

總之三省現既改設行省又值強鄰迫處眈眈窺伺於一切應辦之事亟宜通盤籌畫併日經營其從前因循廢弛之習悉當盪除而廓清之鑒於往軫咸與維新顧此邊荒庶乎有豸至於財政支絀亟待籌維開源節流未容偏廢各省協餉延欠已久擬由此會樸帥銜分別電催儻能陸續籌解亦可以稍濟要需也執事承辦屯墾需款孔亟自屬實情所有本年應撥之數尙未領齊以及虛價虧耗暨預領來年之款統候函商樸帥轉飭籌發以期不誤春舉改編軍隊爲整軍經武之要圖值此冬防喫緊自應及早宣布以安士心亦當函達江署迅行批准承示秋冬以來各屬萑苻漸戢閭閻又安爲數十年所僅見具徵盡籌周洽鎮懾得宜此後仍望督飭各軍隨時嚴密巡緝安良詰暴益靖邊疆此外應行籌辦整理各端並望卓見所及隨時籌示匡所不逮共濟艱屯曷勝企

盼

又

昨奉手書屯墾一事已著手開辦甚善甚善開放扎賚特荒地蒙眾不免驚疑一經剴切曉諭卽已帖然可見辦事貴於得人出以平心靜氣未始不可從容就理始基旣立一年以後地利漸闢成效漸著繼長增高較易爲力仍希隨時督飭在事人員不憚煩瑣期底於成則邊疆莫大之利也民政司署擬就營務處房屋修蓋自屬便利惟建築須費若干江省一時能否撥出希與周帥熟商以便定局白匪脫逃一案瑞祿有無賄縱情弊俟張提督查覆再行酌辦以積年巨匪幸而就獲宜如何加意嚴防乃竟任其兔脫該統領豈能辭咎執事綜理軍事亦應先事籌維今竟有此疏失捫心何以自安江省軍事敗壞已極非大加整頓不足以挽澆風

也瓊瑋俄匪漸已平靖雙管帶兵隊卽暫駐墨爾根以資策應所有辦理屯墾改編軍隊情形尙希陸續見示

又

頃奉來函備悉種切屯墾開辦已有頭緒執事擬親自赴荒察看情形具見實心任事勤懇如此何功不集甚佩甚佩綽克大賚久逃法網近又有煽惑蒙衆之舉殊堪痛恨此次台旆到彼能設法弋獲尤爲快事運江之礮種種窒礙亦係實情已飭兵備處詳議妥籌位置周帥所論宋副都統各節甚爲的當向來該處每有陳請無不函商江撫以期呼應靈通兩歧之事似可無慮財政一節三省均屬困難現欲謀溝通劃一之策故於茲事不厭求詳雖吉江情形間有不同然欲使之漸歸一律不能不通盤籌計如江省有特別情形儘可隨時見商不致有隔閡也匪首天滅洋等肆行

正書卷四十一
三
擾害務嚴飭各路軍隊認真剿辦以靖地方江省王榮和吳子明
先後呈控大賚廳捕盜營兵姦淫搶掠各節似此毫無法紀與匪
何殊希卽澈底查明嚴行懲辦此等惡習必須大加整頓執事當
不畏難也

又

接展來函備悉種切開辦兵屯一節宜趁天氣和暖速行布置擬
購火犁二架馬犁三十架及招募土夫一切雜項共計銀十四萬
兩均可照辦雪帥現已起程回江諸希就近稟商至指撥地段目
前初辦自以近省爲宜望哈達遜必拉等處如果實係不便亦可
與雪帥另行酌定所有用人用款均希隨時加意察核庶收實事
求是之效徐道回江已屬其晤面籌商矣撥款一節當仍用廣信
公司紙票較易騰挪統望酌核寄知

又

接誦手書備悉種切江省因今歲歉收入冬以後旗民生計維艱凍餒情形殊堪憫惻亟應設法惠此遺黎惟擬催各省協餉以爲買糧平糶之計似不甚可靠近來協款已成弩末屢催罔應卽以振荒爲詞文移往返展轉需時亦恐緩不濟急刻已電致雪帥先行設法由廣信公司籌撥款項辦理平糶俾資接濟俟交春以後再行妥籌長策庶可稍資補救執事關心民瘼希就近與雪帥熟商先其所急俾旗民毋致失所此次災區不廣想尙易辦到也江省民政經營伊始諸賴盡籌勉爲其難無任企仰

又

頃奉望日來函並仇委員調查原稟具悉一一江省礦務爲籌邊興利之資正宜迅行籌辦以期日就發達前此礦廠各員措理不

善百弊滋生如劉文鳳之私行收金徵稅並句通外人來廠貿易恣其谿壑罔知忌憚總由北洋相隔遼遠恃考察必不能及故敢爾爾茲既與北洋商定原費三十萬金作爲股分此後專歸江省派員經理權限既明得以從容布置見聞較近亦可嚴密稽查較之前此辦法當能順手應卽責成新派之員悉心籌維實力調查務將營私中飽等弊掃除淨盡庶礦務可期起色而邊疆繁富之機亦基於此卓見所及仍希隨時籌示是幸除由此另派熟悉礦務之員前往漠觀瑚三廠切實調查外先此布復

又

此次江流漫溢爲數十年來僅見之灾被淹各處居民攫茲困阨深爲可憫現在米銀已經給發范守關心民瘼當能妥爲散放哈拉霍碩之地屯墾甫興淪於水患雖高地幸免被水而窪地被淹

情形恐亦不輕北望邊疆愁焉在念不諗比日水勢已否全退民情能否安輯執事綜司民政實羣黎所託命仍請督飭各員妥爲綏撫以善其後偏灾原亦恆事補救胥賴人爲翹跂鴻猷必有以蘇茲民困也

又

江水驟漲汎濫爲灾北望邊荒正深軫系得書知己涸之地祇有四百餘晌水深之處尙多其水淺一二尺因凍未能退盡之一千數百晌明歲春融能否漸涸無誤耕耘甚以爲念前經議定本年開地五百頃建房五百所明年退兵五百名乃因火犁到遲開地較少復遭水患致誤前功天時人事適值連遭自不能繩以原議所請退兵二百名分兩期到荒督耕之處自可照行俟來春籌辦既定再當奏咨立案至常年經費待用孔殷今年應領補虧各款

均當亟撥應用卽明年預計之款亦應早爲籌備庶免失時惟此項係特別之費在江省度支奇絀勢難如數支付而奉省同一困難亦無專款可撥茲特函致樸帥請其轉飭廣信公司暫借撥紙幣數萬兩以資應用所領紙幣仍以江平銀價合算以免虧折計可核定施行所有本年用過各款以及被水冲失馬匹房屋柴草等應卽於火犁節餘款內彌補統希造具清冊詳細開示是幸

又

兩接函電備悉種切墾務需款擬由道勝銀行息借一節當已電復計必先此寄到江省墾務經費艱窘前復少帥函中亦曾籌及鄙意以爲當日開辦經費旣由度支司向廣信公司借墊本年所需四萬餘兩仍應再由該公司暫行借撥以應急需至於明年用款擬於此間設法代借四萬兩屆時由江省派員來奉籌議領解

以後用費容再隨時商酌籌辦再此時江省諸種要政亟待舉行閣下肩任重差正資臂助萬不可遽萌退志致誤事機况當此財政困難之際尤當振刷精神力任勞怨以濟時艱尙望常守此意勉爲其難至所切盼

又

頃奉惠楮承示各項要政整頓情形雜誦之餘莫名佩慰屯墾一事去歲開辦稍晚繼以水災原非初料所及今歲因馬匹倒斃太多改用牛犁所需較鉅除由上年未用火犁節餘項下彌補外餘悉經台端自行認繳益見劬心職務公爾忘私本年應建房屋可減少一千所之數節款已多其餘應需各款當此春夏布耕所需最緊自應迅行設法籌撥以期諸事應手惟江省財政積困所有補領用費三萬九千餘兩能否卽時籌撥此事本極鉤棘執事力

任其難復事事撙節不令稍滋糜費苦心經畫漸就端緒裨補邊荒良非淺尠一切仍望持以堅定勿懈初志任事者能多盡一分心力自必多收一分效果執事夙負偉略幸終始勉之弟雖去此而樸帥銳意圖治自必能力與主持備邊殖民事關要計卽後之來者亦必將有資盡畫果能按照咨部原議辦有成績邊事之幸抑亦鄙人未竟之緒而不能不重望於執事者耳

致郭都護

前承電詢祇悉暹春商埠已於去年宣布開放遇有外商入境貿易不應拒絕惟租建專章尙未奉部核定部文所謂議有專章方可開辦者係專指租界建築而言並非謂開放以後尙可不允通商也倘有租地構屋等事可告以俟有定章再爲通知至貿易則不可阻止統希詳審辦理爲要

又

頃接臘月七日來書備聆壹是東溝一帶於原駐陸軍之外復加撥新募獵戶以爲嚮導巡防之用黑頂子一處亦經酌加隊伍用厚兵力修明邊備措置均極周洽繙繹貴廉私藏軍火復兼私販所犯情節甚重既經派解赴省卽由省研訊定奪瑣眷軍隊表甚爲明晰已留備察核矣

退耕堂政書卷四十

正皇先代

二

退耕堂政書卷四十一目錄

函牘七

致宋都護三十四函

退耕堂政書卷四十一

天津徐世昌

函牘七

覆宋都護

迭接十六十八兩日來函藉諭壹是孟克西里卡倫叛兵滋事經
執事督飭勦捕爲時不久悉數就擒現已訊明正法並將被脅工
人另行核辦蓋猷所布諸協機宜曷勝心佩乃雜誦來函猶以辦
理不善深自引咎益見公忠體國矧矧如畏之忱定知鉏強析愿
宣德通情藍華經營日臻周洽謙德彌光於茲券之
兩宮先後升遐

詔告迭見電鈔溥海臣民同深哀戚此間已於今昨兩日率領官
員紳耆先後舉哀成服除已電達外倫城應行禮節想亦由江省

轉行知照矣承惠樺梳營蘼業經收到蒙旗工藝季圻方新銀工鑲嵌之技似此已不易得若得實業家倡導而獎進之或亦阜民之基也此間地方一切安謐倫城轄境得執事坐鎮蒙民必安靜如常也

又

頃據海拉爾鐵路界內華商中和成等號執事面稱俄自治會頭目告知路界內華商凡作買賣均向會上起一年票照其照費頭等三百吊二等二百吊三等一百五十吊至出牀子亦要起照納費等語並聞有另設巡警之事凡商會事件皆由自理不歸於官旋聞海拉爾俄自治會前令華商起票納費一事暫時未經提及近又開具華商字號清單經會首挨門親持囑令掌事人畫押並囑每星期赴會講論商情當經各該號向會首辯論以華商在華

境不能入於俄會抗阻過去又聞俄人在滿洲里亦設自治會云云此事迭據濱江道報告正由外部與俄使交涉該會何得遽令華商起票納費滿洲里海拉爾一帶均將設會直以爲彼勢力範圍之地斷難默視執事在倫耳目較近務希隨時詳查設法抵制以保主權又聞俄人雖倡此會至今未能實行是目前尙可挽回也所有該會目下情形並續有何等舉動卽望隨時見示爲盼鐵路巡警應速籌辦勿再延誤

又

屢奉來函備悉種切茲將商辦各件條覆如左

一 邊墾局一案屢據尊處電咨各情形詳達外部與俄使交涉俄使頗以納稅一節不肯承認業將倫城收稅情形分別詳細達部現辦到如何地步尙未奉有部覆此事必須內外堅持以全

力與爭前已飭哈局一面向公司抗議俄外務官曾否圖倫亦由尊處就近與之交涉近彼並欲將車站華人驅逐出外強橫無理至此已極萬勿稍存退讓以致愈難措手

一倫境僻處邊荒創辦各政在在需款故籌款爲唯一要義倫屬舊有之款以辦各項新政原覺不足而副都統暨各公司各局薪水當可就此支給現在既改道缺一切應添應併者亦須另行編定不能不通盤籌計俟省署酌定章程再行分別辦理

一邊款將次用罄現須續領四萬兩已函達周帥請酌撥發

一查勘邊境之員現在已否竣事開通道路入手辦法希詳細籌及

一沿邊陸路界址干道往查現抵何處有無報告情形

一現因公費未定辦公需款甚急所擬由稅款項下每月暫提八

百兩藉資應用之處卽准照辦

一滿站俄匪近稍斂迹仍希隨時嚴密稽查至俄兵持槍護送行旅之說雖未實行仍須加意察看以上各節均勞措注其有未盡事宜尙希隨時見商鄙人當力與維持也

又

前奉來函並咨文底稿暨俞委員調查各件均悉一切吉拉林沿邊一帶木植羊草皮張等項經俄人採取無人過問所失甚大現雖牧畜割草與俄人新定章程惟木植皮張尙未籌辦殊不足保我權利西北邊境未經開闢道路艱阻一切設施均未完備誠如來咨所云由我自行砍運目下萬辦不到惟有先行稽察使彼不得越界私取並定章收稅尙屬可行所擬開通道路添設卡倫自係握要之著已函達周帥查核施行俟尊處派員查明里數若干

需款若干詳覆到日再行酌定

又

接倫字第二號手書並鈔稿四件具悉種切呼倫一隅昔等荒漠今成重鎮經營草昧所望以實心毅力勉爲其難而已蒙民錮蔽已久然樸質堅勁是其特性若能逐漸化導數年以後當必改觀惟語言隔閼情意不孚最爲一大阻力計欲施教化當先謀語言之統一應於該地創設漢文學堂招徠蒙民子弟肄業其中規模不必闕大課程不必繁重但使辦理得法俾蒙民樂於從事將來造就有粗通漢文之人才於邊事卽有裨益尙希體察情形量爲舉辦延吉近況彼此仍在相持俄人於琿春尙無何等之舉動吉省諸務大致就緒現定二十六日起程旋奉年關在邇尙須料量一切也

又

疊奉第三第四兩號惠函備詳邊事呼倫貝爾僻居甌脫接壤強鄰謁蹶經營未容刻緩惟是蒙旗樸僿財政困難邊徼情形迥殊腹地操之過激或轉至阻礙事機足下於勤勞踔厲之中仍寓審慎圖維之意佩慰莫名司法行政機關爲整頓地方之綱領現既創設文案會計調查審判各局處以期逐漸推行原有蒙旗各官及向日例行事件自可暫仍其舊惟邊境寥闊仍當擇要設官以資鎮撫吉拉林額爾古訥河口及免渡河一帶旣經尊處察酌情形緩行議辦滿洲里迺阨塞之地稽察外商董勸實業當有專司仍當酌核設官分理其餘要地不能悉設民官則變通卡倫酌增官弁俾地利漸闢疆圉不虛亦屬利便之策惟沿邊物產似宜專由卡兵采售量徵其稅若遽定發照一任俄人采伐究恐易滋流

弊卓見以爲然否東省物產蕃殖采運寥寥固由民智之自封亦緣交通之不便來示擬創辦輪舟仿備各卡冰橇將以招徠墾戶濬闢利源此舉於邊事極有關係尙冀賢勞孳畫早底於成至屯墾之利昔人言之綦詳耕牧並興尤爲不易之宏規兩全之善法果能蠲免押荒優予獎勸勅設墾牧銀行墊給墾戶資本進步之捷必越尋常所有邊防經費各項鉅款即可作爲該銀行資本藉資周轉台端久蒞邊疆洞觀時勢必能妥籌辦法用樹初基至倫境幅邇強俄鐵路商埠每多交涉緬想折衝樽俎諸費盡籌省垣相距較遠一切胥仗大力主持庶幾因應敏捷其滿洲里海拉爾博克圖各鐵路交涉分局亦可由尊處就近節制應由江省公署札該局遵行此外添募馬隊雜用滿蒙俾可漸聯情愫勅辦巡警簡定規則務期便於遵循以及措理民政調查實業規畫諸臻周

備建設小學以牖進蒙民文化與弟前函所論極相符合蒙民閉塞已久但期智識稍擴不涉歧途固未足侈語精深之科學也邊務紛繁百端待舉得執事同舟共濟宏此遠謨實深欣幸以公幹濟之才適膺盤錯正當屏除節目相見以誠一切行政用人均望力任仔肩統籌全局惟是要政敷施廣需經費比來俸餉欠減稅項亦復減收羅掘艱難深爲馳系苟有可以爲力之處必當設法籌助期於邊事有裨至省函所稱各節江省度支奇絀或非得已而邊地經營伊始車薪杯水斷難程功容當函商雪帥從長籌畫牲畜稅項提歸公用足徵涓滴靡私尊處公費自當另行籌備亦俟商之雪帥當可望有成議也

又

前日詳覆一函計邀青覽頃接倫字五號手書並張丞問答節略

一件具悉種切伐木一案俄人已退讓呼蘭河半年來所斷斷爭執者今竟稍有轉機向非執事成竹在胸堅持到底曷克臻此目下允給火燎溝一段俄人似無異言惟尙欲爭得河路耳卽由尊處酌核飭張丞力與磋商當易就範馭蒙之道今昔勢殊昔欲其愚今欲其智昔僅冀其不爲我患今並利其資爲我用振廢起衰事誠不易愚意威惠之外尤須以一誠字爲徹始徹終之主義果能情意相孚何事不舉執事洞悉邊情當不河漢斯言也

又

臘杪接倫字第六號手書具悉一一滿洲里與俄接壤俄匪任便來往肆行劫掠實爲邊境巨害況此後源源不絕若非設法清除爲患伊於胡底尊議辦法各條從根本上清查具見規畫精密防維周至已據情詳達外部請向俄使極力磋商俟如何定議再行

函佈該處添設官治並駐防軍實爲不可緩之圖否則僅恃空言毫無實力卽定有極完善之約章恐亦未能遵守尙希酌奪情形切實舉辦以期保安邊境固我主權邊防經費部中合江省前奏僅撥十萬萬難敷用容與雪帥再行籌商就現撥之數應如何分用之處或先訂購船隻或先擇地分布兵卡並目前應如何設法以防俄匪肆擾之處統望盡籌示復

又

接倫字第七號手書並圖二紙藉悉台從親赴滿洲里相度一切冰雪關山不辭况瘁賢勞鞅掌傾佩奚如滿洲里設治以鐵路西面爲適當旣可固我門戶而與車站距離甚近亦便稽查形勢利便當無逾於此將來詳加勘定卽可照此經營東北距吉拉林亦不甚遠尙可遙爲犄角惟沿邊地方寥闊屏蔽太疏誠如尊論所

云僅在二處設治照顧仍屬難周非多設卡倫不易收功應就沿邊一帶詳細察看規復舊有酌量增設以期漸臻完密目前作補牢之計雖未能力爭上游而步步爲營彼族尙有所顧忌不致如前此之聽客所爲也俄匪肆擾實爲邊患前已將尊擬辦法各節詳達外部請與俄使交涉現在防勦之計尙希隨時籌策以保治安札賴諾爾煤礦俄人開採出煤甚富自應按章收稅應由駐哈交涉局向鐵路公司結算至修造房屋所用地段亦當明訂限制以免任意展拓均照飭交涉局併案辦理所有邊地布置一切希隨時見示以慰馳系

又

接倫字第九號手書具見規畫沿邊苦心孤詣曷勝佩慰當茲款項奇絀一切措置未能應手而他族橫厲之勢又已相逼而來不

能不於萬分艱窘之中求極力支拄之策東事全局同此情形倫邊經營伊始尤爲急迫今擬將部撥十萬兩全數撥給呼倫一帶邊務支用所有增設卡倫招徠墾戶應如何布置之處卽希悉心籌奪開具辦法見示以便迅速舉辦來函議及沿邊荒地俄人越墾亟應設法防維吉拉林至呼倫荒莽千餘里自不能不酌設卡倫以資聯絡惟現在辦法須痛除舊日積弊不可如前之有名無實執事毅力當能辦此滿洲里設官一節萬不可緩此處爲入界第一站僅設一局事權較輕不足以資控禦應仍照前議速行籌設爲幸江內船隻亦須購置以期往來便捷與陸路聲息相通諸希一併妥籌邊事萬棘所望宏材幹略共任艱難積以歲月或有起色耳

又

疊奉倫字十號十一號手書並咨稿及開辦設卡簡章均已展悉沿邊千餘里祇設二十卡倫尙覺單薄然目前款項奇絀姑就此數先行舉辦再圖擴充亦可收循序漸進之效惟此番整頓務須一新面目事事著實做去力祛舊日積弊庶不致徒有其名所望隨時留意悉心稽察至爲盼禱滿洲里地居衝要非設官不足控制現因款絀先行設局卽希從速開辦所擬將鐵路交涉局歸併邊墾局又倫城鐵路交涉歸併稅務局以歸併爲節省辦法極是一俟籌款稍有眉目滿站仍須設官以期鞏固所有倫城設邊墾總局滿站設邊墾局及沿邊分設卡倫所需經費已與雪帥籌商先在十萬兩內量爲撥發卽請先行舉辦其有不敷容俟續行籌撥邊事萬棘及今經營尙可爲力萬不因款絀而中止且不令執事獨任其難也沿邊物產尊議以卡兵數少勢難兼顧擬指定地

段給票收稅此節尙應詳籌蓋外人攘我權利一經染指視爲固有此時旣與指定地段將來爭回必費唇舌現設卡兵雖少任採伐則不足任稽察尙有餘即使偶有偷竊而地方屬我主權不難隨時禁絕以後增設卡兵需用日繁似不可不預爲之地至於新募卡兵均須挑選教練然後給與槍械方資得力卡官卡弁尤須詳加揀擇設一卡須收一卡之效選一兵須獲一兵之用此則望執事再三加意者也呼倫貝爾境內地價及札賴諾爾煤礦稅項當飭哈局與俄人清理滿洲里俄匪出沒遇有劫殺之案希卽從速詳報以便知照外部與俄使交涉添練防軍所需餉項已飭營務處通盤合計再行勻撥邊地辦事各員將來自應酌獎以資鼓勵俟布置定後再行奏請立案

又

接倫字十二號十三號手書並咨稿一件具悉種切蒙民蔽塞已久一聞招墾開埠及興辦各項實業輒復驚疑不定要在善爲勸導俾之樂於從事而緝捕匪徒綏靖地方尤爲第一要義所擬添練馬隊三營擇要駐守均可照辦至於交通機關電綫文報自應及早籌辦以期消息靈通沿邊新設局卡所定員司弁兵薪餉並擬在木植羊草稅款項下酌提二成作爲津貼已屬徐道稟商雪帥再爲核定詳閱咨稿有將來新設地方各官一切用人行政均由副都統主持咨商省署辦理所有應行公牘省城無庸逕札本處本處地方官暨各局所亦不逕報省署均由副都統核轉等語尊意在刪削繁文爲統一事權起見惟似此辦法則省署與邊地轉不免隔膜之弊如遇有文件必俟由副都統核轉是求速而反遲求通而反隔行之日久邊境一帶自成風氣與省署不相關涉

行政機關反多窒礙且一切用人籌款亦須省署互相提挈方克有成否則倫城一隅恐亦難於措手今只可仿行省外州縣之例遇事歸副都統監督仍呈報省署地方各局卡責成副都統隨時察核庶幾呼吸靈通可收使臂使指之效副都統亦不慮無權不能辦事也總之副都統之能否放手辦事全視省署之能否協助若獨據一隅空有虛名必無濟也且三省大端政令均應相通况一省乎况一隅乎執事智珠在握必恍然也來函謂思想日進則新理日出嗣後所行各事無論已未定章均當隨時體察咨呈省署酌量變通具見虛懷若谷不自滿假倫城諸凡草創所有應興應革諸端如有未盡合宜原可隨時見示量爲更改大約不外實事求是命令可行二語願執事始終勉之而已

又

正書卷四十一
九
接倫字十四號書並鈔件讀悉一是叔林河火燉溝木植辦法極是希飭張丞堅持此議切實磋商議結否則拖延日久彼族享利愈多殊非勝算

又

接倫字十五號手書並鈔稿二件具悉一一執事於沿邊各事籌畫精詳亟應擇要興辦第一交通不便則呼應不靈所擬航路陸路及電綫辦法均屬切要呼倫署內安設電機當飭黃道斟酌辦理至應設電綫及與俄綫聯接亦須詳籌舉辦開通陸路航路均萬無可緩尊議購置輪船帆船由省另派專員亦是一辦法容與周帥核商再行定奪沿邊添置卡倫邊綫延長自宜分辦呼倫及黑龍江城分任地段於省城總其成提挈較爲靈活已將執事所擬章程知照興東瓊瑋籌度一切矣新募卡兵以力農安邊爲主

軍事祇略知大概惟紀律要緊但求樸質耐勞不滋事端邊境粗
安再謀擴充惟籌款一節部撥實不可恃只好另行設法以資挹
注副都統一缺彼處既已相習執事到彼撫綏輯柔蒙民亦甚帖
服將來治理日上再當斟酌時勢以爲損益此刻不必亟亟奏明
也

再者頃接于道駟興來稟據海拉爾分局專員佐領恩麟函稱路
界內華商中和成等號執事人面稱俄自治會頭目告知路界內
華商凡作買賣均向會上起一年票照其照費分爲三等至出牀
子亦要起照納費其用意特以抗官爲宗旨現在不獨華商未經
領照納費該處俄商亦多不願入會以上各節亟應相機挽回除
函覆于道續行詳查外茲特飭鈔原稟一份寄塵台端卽希察核
派員密查隨時報告是爲盼切

又

接倫字十七號手書具悉一一茲將復商各事條列如左

一沿邊重地改設卡倫卽應從速開辦

一邊地草木繁盛從前俄人往往越界砍伐旣設卡倫以後應飭認真稽查嚴行禁止彼族旣恃此爲生此後如有要求誠如尊論當由我酌定章程操縱在我

一木植合同現已簽押細閱鈔稿大致尙屬妥協張丞壽增頗著勤勞當酌予獎勵業已具奏

一倫屬鐵路交涉局前擬歸併旣一事權又節糜費辦法極善于道此番辨論未免稍有意氣容飭哈局詳細籌議總期消息靈通事權統一如倫境所有交涉副都統不得與聞亦非法也

一倫屬新設地方官暨各局所有應行公牘卽照尊議一面呈

報省署一面分報副都統似此辦理至爲妥協

一江奉兩省人員如需調用當隨時派往

一寄去電報密碼一本將來要件以此通用

一倫城添設官貨局爲益甚多亟應舉辦前電請加撥四萬金實因目前萬分支絀兩省均難籌措請就現有之款勻撥先行籌辦再設法協濟

一俄設自治會聞海拉爾滿洲里亦均舉辦此案現經外部與俄使交涉而俄人至今亦未能實行我若堅持尙可挽回刻已催施道從速到任以便籌辦鐵路巡警俄人續有如何情形尙希隨時見示

一漠礦分局發給俄人木票實屬不合尊議令其收回以後此等事改歸局卡經理辦法甚妥應卽照行以上各種經營諸多困

難然事機所迫欲罷不能加以款絀在在棘手所望持以堅定
共任艱難邊務或當有起色耳

又

接倫字十八號手書具悉種切沿邊卡倫現擬先招卡兵十餘名
量力開地先試種苡麥辦法極有次第惟事經創辦人係新招總
須時時察看以樸實耐勞爲主邊地未染習氣只須認真考覈尙
易見效也倫城舊有官房旣屬無多勢非添蓋數處不足以資辦
公卽照尊議添修平房一二十間祈核實辦理電報一節已飭黃
道從速興辦此後消息當較靈通昨接江省報告滿洲里有鬍匪
槍斃俄官之事俄人謀立自治會愈益急迫此事以空言與爭終
屬無益執事議設鐵路巡警以保主權實係確論卽希籌畫一切
及早成立藉資抵制沿邊卡倫開辦後如何情形尙祈隨時見示

又

慶奉十九號二十號二十一號手書藉悉一一咨稿及卞令所擬章程亦均收到倫屬添練防兵三營前經覆請照辦現擬加撥步隊一哨以厚兵力係爲防護本城起見惟所需餉械應飭度支司營務處酌核籌計再行布達俄人越界墾地必須禁絕以免蹈聞島覆轍至伐木刈草旣已相沿日久勢難禁止若由我定章收稅尙可不失主權前電商外部亦經認可已屬江省電達尊處詳閱卞令所擬章程尙屬妥協經執事簽定益覺周密旣能保我主權卽希量爲允許吉拉林金廠現尙未能遽議擴充尊論屬卞令從小處辦起極有見地招墾一節不重售地而重實邊所擬由官補助借給農具尙屬切實可行卽責成卞令妥爲經理漠河金廠委員擅出洋文告示擅放木植羊草等票種種荒謬北洋派查漠河

之袁道業經啟行當電袁道將該委員先行撤回所出洋文告示可揭一二張寄奉散放各票從速掣回漠河局廠俟袁道查覆後當另定辦法也沿邊卡倫業經開辦所招農民有攜室家者否欲其人居而有恆心非有室家不爲功且亦謀生聚之第一要事將來均須次第籌及滿站槍斃俄官一案查係俄匪似此橫行大爲可慮應將詳細情形查報以便達部所有俄人不法情事卽希隨時詳細見示倫署辦公向恃稅務一項惟省署爲財政總匯應司稽核動用之款亦當隨時報省查核牧畜一項本蒙旗絕大生計祇以牧政不修未能日見蕃息天然牧場廢棄可惜現擬辦模範牧場講求孳生牧養改種防疫等法用意極善倘能從此振興各屬漸次仿辦富庶之基不難立俟卽希悉心籌畫從速興辦海拉爾電綫尊議先通吉拉林自吉拉林以下至額爾古訥河酌看情

形再行籌設自係爲控制窮邊起見當飭黃道相度情勢妥爲籌設也

又

得二十二號手書藉悉一一滿站附近又有俄匪戕斃華人之案前經電達請將歷次劫殺之案電示大概情形以便由外部與俄使提議所有各案詳節仍希續行寄示彼處俄匪橫行無忌擾害治安當亦俄人所不願惟由我稽察一層未識能否辦到如外部核有辦法再行布聞滿站地處窮邊百物騰貴防兵津貼卽希酌擬加增以示體恤俄人越界牧羊割草前經外部認可卞令所擬章程經執事核定尙屬妥協望卽飭遵辦理

又

疊接二十三二十四二十五二十六號手書茲將商辦各件條列

如左

一滿站煤礦華俄雜處盜匪潛滋所擬添設巡警二十名歸邊墾局管轄每兵每月酌加津貼銀二兩邊墾局巡警亦一律照加此事關係地方治安即准照辦

一鐵路巡警尊論仍歸交涉局辦理即飭于道籌議一切惟海拉爾滿洲里等處副都統耳目較近仍希隨時稽查相助爲理

一江省林木經鐵路公司取用砍伐無算尊議及早設法護養所見極是詳閱章程亦頗簡明俟商定實行

一俄人越界割草牧畜核閱章程尙屬周妥先予試辦一年前經電達即希照辦

一滿站會議勦匪事宜閩丞前往會議如何希速將辦法見示

一俄自治會經外部與俄使抗議彼允改爲公共議事會並派華

官數員參預其事惟改換名目而章程不改亦何必多此一舉業將內容詳達外部仍請力爭以免爲其所愚現在彼會舉動若何希隨時見示

一前議由省派兵一營駐紮滿站已函商周帥酌核辦理

一滿站俄匪橫肆劫掠已將前後各案彙達外部俟定有辦法再行奉佈目前仍希竭力維持就現有兵力嚴爲防勦

又

接誦手書藉悉種切倫城要政次第興辦精心毅力紉佩實深滿站俄匪橫行防兵單薄已屢函周帥請其速籌酌派省兵前往駐紮近日地面稍稍安靖否劉春和一案是否俄匪所戕希查明見示海拉爾電綫已飭黃道從速籌議卡兵月餉擬照省防定章不扣六分減平卽准照辦倫署稅務現擬以一半歸公餘歸倫城動

用究竟此項所入年共若干據周帥函云除今年領款外如木植地價煤稅等項尊處均請指撥江省財力祇有此數應通盤核計定一常年經費較爲合宜希執事籌計一切除開辦各項外以後常年經費約需若干開單見示三省局面同一支絀實銀尤屬難辦倫城與江省指臂相聯不能不賴省署之補助已函商周帥酌量劃撥當茲羅掘艱難只好枝枝節節爲之耳

又

接誦手書並咨稿藉悉一切倫屬添練防兵三營前經覆請照辦現擬加撥步隊一哨以厚兵力係爲防護本城起見事屬可行所需餉械應飭度支司營務處酌核籌計再行布達吉拉林金廠業經北洋派員前往查看俟稟覆後再定辦法目前所有礦丁可飭卞令設法羈縻勿遽遣散招墾一節卞令所擬辦法尙爲切實卽

飭妥爲經理至俄人越墾斷難允許將來久假不歸反客爲主聞
島往事可爲前車務希極力斥駁以防其漸若越界砍木刈草屢
據函稱相沿日久勢難禁絕再四籌度此事與越墾情形較有輕
重旣由我定章程收稅尙可不失主權前經電商外部亦已認可不
妨妥定章程量爲允許海拉爾吉拉林等處安設電綫當飭黃道
籌辦倫署辦公向恃稅務一項自可隨時提用前令省署核計亦
酌盈劑虛之意且省署旣悉底蘊將來倫城辦事互相提挈庶不
隔膜耳牧畜一項本蒙旗絕大生計祇以牧政不修未能日見蕃
息誠爲可惜興辦模範牧場講求孳生牧養改種防疫等法用意
極善儻能從此振興各屬漸次仿辦富庶之基不難立俟卽希悉
心籌畫循序舉行爲幸

又

吉拉林沿邊一帶木植羊草皮張等項經俄人採取無人過問所失甚大現雖牧畜割草與俄人新定章程惟木植皮張尙未籌辦殊不足保我利權西北邊界未經開闢道路艱阻一切設施均未完備由我自行砍運目下萬辦不到惟有先行稽查使彼不得越界私取並定章收稅尙屬可行所擬開通道路添設卡倫自係握要之著已函達周帥查核施行俟尊處派員查明里數若干需款若干詳覆到日再行酌定

又

疊奉倫字三十二三四號來函備悉種切倫城孤懸絕塞偏處強鄰開始經營固非易易執事宏才偉略獨任其難曷勝傾佩所陳三端自係實情籌款一層尤居首要刻正與周帥悉心籌畫將每年應撥倫城經費若干某稅劃歸倫城徵收通盤核計其有不足

再另行設法補助總不使任邊事者無所措手萬望堅持定見實力進行已設各卡倫必須切實經營此後力謀擴充裁卡裁兵之計萬不可行也所擬各卡試辦章程及預算經費表均甚妥協卽希照辦倫屬地廣人稀學堂審判等件似不妨暫行緩設而用全力以辦屯墾亦節省經費之一策希酌之滿站俄匪仍前肆擾近與俄員會議緝匪事有端倪否前俄使向外部要求欲於鐵路界外准俄兵持槍護送行旅此事斷難應許曾經電達冰案仍祈隨時稽察如有此等情事務當極力禁阻以保主權卡兵月餉擬照巡防定章不扣六分減平已函達周帥照辦矣吉拉林沿邊一帶開通道路自應照辦否則邊卡將同虛設本年旣趕辦不及可趁入秋以後詳細查勘當從何處著手順將沿邊形勢繪圖寄示以便設法興辦滿洲里國界猶沿雍正訂約之舊地僻年久各處鄂

博不免殘廢現派于道親赴該處履勘勘畢再行修理附寄中俄國界說略一紙于道開呈節略一紙察閱便資攷證

又

接誦三十五六號來函備悉種切吉拉林沿邊一帶木植羊草應行酌定稅章以免利權外溢現羊草一項既經省署定章發給照辦木植一項倫屬每年所放約計若干可由尊處咨報省署仍由省署定章以歸劃一或與倫屬情形稍有參差者無妨由尊處商定管帶興順帶隊勦匪受傷奮勇可嘉希加意勞撫其受傷之隊兵亦一律優撫以作士氣滿站俄巴釐司撤毀國旗擄辱局員無理已極公司自知理屈派達聶爾赴江省道歉此事虧辱國體所關甚鉅誠如尊論應令將該總管迅速撤任於國體邦交方無損失現已達外部與俄使嚴行交涉尊處現在辦理情形如何至

稅務一層係另一問題將來必須另訂專章不能以邊界百里內概行免稅遂援以藉口俄自治會現無甚動靜否滿站俄匪近稍戢否均用馳系

又

接誦三十九號來函並咨呈底稿一件章程一扣藉悉種切現議出放呼倫貝爾所屬各荒自係實邊要圖茲將應行商推者詳覆如左

一呼倫貝爾各屬荒地延袤頗廣今既劃段開墾宜切實從墾地入手放完一段然後再及一段不可同時並舉以致虛糜經費

一放荒故事向有豪家包領領去後以善價零星出售累年之後曠廢依然是售地非實邊也尊議撥地後責以六年一律開墾成熟違者撤佃用意甚善然頗不易辦到不如將各段荒地劃

清之後估計經費若干凡領地者令其酌交經費至次年則估計該地畝所出令繳稅十分之一或二十分之一五年以後給該戶永遠管業較之先發小照五年後升科者雖稍繁密然可杜大戶居奇領地不種之弊且一年中估計該地畝所出取其十分之一或二十分之一亦不爲苛也

一 招戶及墾地獎章均應以職銜爲止實官一節應毋庸議又湯旺河獎章放荒七萬二千晌准獎異常一員三萬晌准獎尋常一員所擬創辦墾務公司開地至五千晌以上准獎尋常二員一萬晌以上准獎異常二員未免過優應查照湯旺河獎章核辦然放必以墾爲實據

一 民間無力開墾由官借給牛力籽種分年帶還公家經費支絀此層尙須詳酌

一湯旺河荒地爲江省通省膏腴前以賤價放出坐失大利失策殊甚倫屬雖處極邊然附近車站附近河流之地可墾者當亦不少應詳細踏勘分別辦理以上各節希卽體察情形量加增改酌核示知其有未盡事宜仍希隨時見商以臻妥洽

又

頃接望日惠書藉諭在奉籌商各節於旋省後面陳樸帥均已照准惟因財政困難僅允撥銀六萬爲明年邊墾全部之用雖按之前此預算邊墾經費尙虧三分之一而在樸帥已煞費苦心矣現只得於原籌辦法酌量減縮雖開地較少而果能一律實行屯墾亦可以有裨邊局擬有妥章尙望先行寄閱沿邊草木皮張各稅現在省款支絀仍應統籌並計核實樽節動用卡倫墾兵必須於年內招募方免誤事俄人勒捐封鋪一案經施于兩道極力磋商

現已一律啟封辦理尙爲得手此間亦經屢次電達外部請其切實提議務宜從速解決庶免再生枝節一得部復卽當布達以紓厘系俄人向多蠻狡比來稍趨和平趁此妥爲轉圜冀可挽回權利千鈞一髮所係綦重未可忽也來示謂果能外患不生正可修我內政擬卽一意經營邊墾以求進步具見盡籌碩畫力任艱屯至用心佩牖戶綢繆動關至計諸賴悉心擘理以期日起有功也

又

前承函示孟克西里左近一帶卡倫河流歧出其中間洲渚形勢的屬華界而俄人謂係彼境不肯納刈草等稅恐他處洲渚類此者多亟宜派員會勘以杜侵越等因當經函達外部並將塔爾巴幹達呼山至額爾古納河所有陸路邊界應行會修鄂博改立石柱暨護路駐兵以外俄人另駐兵隊應令移出界外各節請其一

併照商俄使茲准外部覆函鈔示俄使照覆各語並將邊界情形
詳細詢商前來特飭照鈔寄呈卽希察核查孟克西里在額爾古
訥河右岸屬我版圖毫無疑義至其中間洲渚屬中屬俄從前有
無圖記案據俄人不納刈草等稅始於何年抑或向不納稅旣據
部函詢及卽請執事迅速查明舊案詳細核覆俾得據以達部以
爲辯論之資較之空談形勢似更可據也會修鄂博改立石柱一
節于道所查各處鄂博悉屬俄國版圖乃俄使照覆旣云該島應
隸俄國又云該處俄民踞爲已有顯圖佔越迴出意表事屬國界
關係至爲嚴重卽使果有同治二年之事亦豈有由俄員轉知邊
吏卽可據爲俄有之理况沿邊界綫載在舊約照覆中不加分晰
而渾言之曰該島其設詞牽混具可概見部函所開中俄舊約尙
足爲考查界務之根據已函達樸帥並飭于道迅查詳覆執事於

邊界情形調查最稔卓見所及一併核示至俄人另駐兵隊有逾定數部函囑查明駐兵幾隊駐紮何地卽由地方官就近磋商應請飭令該地方官並鐵路交涉局遵照辦理儻其未克就緒仍當咨行外部請其據理交涉也

又

接倫字四十五號賜書敬悉一切倫屬招墾務在殖民實邊不規近利尊論極是茲將應覆各條列左

一倫地邊遠若無大戶提倡認墾小戶必不肯往此自然之理仍以不拘地數爲是惟須嚴訂開墾章程逾限不墾者卽行撤佃以杜包攬待售之弊

一清丈畫界需款浩繁似可毋庸置議如有領戶先行指段以次丈放所需經費按晌擬訂庶領戶易於遵循其附近河流之地

一律辦理不收租價以廣招徠

一原稟創辦墾務保獎章程按之政務處原定獎章固屬優異惟
倫地寒苦招墾綦難果有實行墾殖者自不能不優予獎叙以
資激勸卽以放荒之例相衡亦爲允洽似可照辦一俟辦有成
效再行奏明立案總之辦事之要不外因地制宜四字再能行
之以漸持之以恆自有收效之一日

又

承示各節具論一一海拉爾驅逐華商一節經尊處始終堅持前
由哈局向公司交涉彼已漸就範圍至深佩慰俟外部與俄使如
何定議再當奉聞海局交涉協力堅持具紉盡畫此事原由於俄
人反對納稅我外部既令籌擬歸宿辦法亦惟有於邊界納稅一
層設法變通除羊草木植等稅另有定章不必按百里外征稅之

例其餘統須調查條約詳細酌核以期折衷至當一時未能遽定辦法也現外務部另有專函查詢一切已鈔案請卓核詳覆爲盼滿站俄人理事會派兵持械護送行旅之說雖經查係子虛而爲鞏固邊防起見自當隨時密查以昭慎重另咨所述壽甯寺暨喀爾喀各蒙部商務情形詳贍精密瞭如指掌其中如壽甯寺集場占新巴爾虎左右兩翼之中心點京張奉黑之貿易綜集於此尤極繁盛加以整頓必成一絕大市場應請執事於調查完備之後速籌辦法力爲整頓維持該處商務使之日就發達庶幾利源濬關而稅課亦可漸充除另咨奉商外先此附陳

又

邊務創辦無例可循自宜隨時改良以期折衷至當凡邊疆增改各事纖微者隨咨隨行重要者先咨准而後行固屬從來通例但

若咨逾數月久未照覆果屬勢不容緩則審度其際從權先辦益足徵黽勉國事之盛懷如來函所稱軍衣馬撥各節邊地寒苦月餉至微自應按季發給軍衣用資體恤現此項既經購發應需價目當函商樸帥飭度支司營務處酌核籌撥庫卡爲沿邊往來要道馬撥之設可使文報靈捷而經營邊務易於措手亦亟宜先行籌設他若酌添墾局員司護兵添設局卡公費以及添置馬鞍農器大車房屋既經盡籌自屬當務之急卽應從速布置以期周洽總而言之邊地百端待理雖事煩費絀諸多牽制然爲大局計所當切實籌維努力興辦以期無誤事機舉凡卓見所及目前財力尙可設法應付者卽當毅然行之苟其事屬要著而需款較鉅難於籌撥者則請隨時核示當商之樸帥酌量設法籌濟也此次省署所發之二萬金方茲邊務紛繁左支右絀區區之數知必不敷

前接來函卽已函商樸帥續撥應用尙未得覆滿局需款喫緊尊處財政困迫難於兼顧洵屬實在情形但細閱江省兩次照覆均以庫款萬分奇絀實係無可籌撥爲言並謂一俟籌有的款再行酌撥等語究竟已否設法籌挪能否籌得的款無從懸揣茲局關係交涉總當力與維持現將設治尤須切實籌辦以立基礎統俟函致樸帥請其通盤籌畫於無可設法之中酌量設法以濟要需至孟克西里左近一帶中流洲渚向隸皇輿而密邇強俄浸敢窺伺侵越之弊界務關係綦重豈容棄同甌脫延吉前軫至爲寒心亟宜派員會勘確分界限庶免轉轄當俟函達外部轉商俄使察覆核辦至俄人之不納草稅亦由國界不清而起國界旣清則收稅問題無難迎刃而解矣

又

調查中俄邊界百里外設卡收稅各事係因滿站俄人辱毀稅局
事起乃變計而爲百里界外之建置國際攸關耳目俱在我本援
約以圖轉圜人益得計而思威逞後慮方長竊有更進一解在查
敵處八月文電所擬百里界外設卡不過暫爲調停之計旣思遽
行退出界外設卡是無異自行承認滿站本非我可設局之地則
後者滿站開埠設官一切事權益多阻礙誠如周帥迭次來電謂
宜力請外部與俄使商改陸路通商條約爲握要辦法並宜從緩
宣布出界設卡之事以免俄人藉詞狡脫所持理由甚堅想閣下
應以爲是也更念外交多重權變而例案取便解釋查前轉尊處
外部八月二十七日來電云俄使照覆內稱前宋道與俄外部官
商訂刈草及牧放牲畜收稅章程並未訂有牲畜毛皮張各類之
稅等語是按其辭氣俄使業經承認前類訂定收稅章程卽仍在

滿站照章收取刈草各稅竭力堅持總易辦到又准尊處十月庚
電內開華墾務局仍在該站界內租房居住等語若仍以該局兼
收俄使已經默認之刈草各稅查驗商民取其嚴征收稅項取其
寬俾俄官民習而安焉以爲他日逐漸擴張根本似較遽然退出
界外設卡略勝一籌依此辦去仍賴大力維持慎擇長於肆應者
充局員之選本陽急陰緩之規成明退暗進之局至於尊處此次
派員宜在大楚莫古設卡應俟函商周帥定否出界設卡再行酌
核並擬由江省先撥馬隊一哨往往大楚莫古卽不防護稅卡亦
應厚備兵隊保衛邊蒙以免俄匪肆行騷擾請卽商承周帥迅爲
派撥可也

又

頃奉五十六號惠言並籌辦邊墾節略鈔底具悉一一前次執事

不遺在遠惠然肯來倒屣而迎固所至願惟以邊防綦重正賴使君清望坐鎮其間是以商請暫緩南行今執事既至江省與樸帥籌商一切想均接洽邊用綦殷幸倫城有羊草稅款可以騰挪挹彼注茲移緩就急甚爲妥洽其餘不敷之款省中旣允籌撥自必無誤至稅款本以備擴充邊卡之用來歲春墾在邇亦須預爲籌畫已函請樸帥酌度辦理總期經營邊務不至棘手惟樸帥來函謂牲畜皮張各稅係一萬二千餘金而來函僅稱八千金究竟確數若干何以彼此不符尙望函示不勝盼禱邊墾節略所示各節容俟詳加核閱再行裁覆

又

滿站稅款一事能照張守壽增來電辦理此案即可平和了結尙屬妥善逃潰卡兵遺額旣已另行募補惟有一律嚴飭各卡官弁

妥爲撫輯勿令再蹈覆轍爲要邊地辦事之難不可擬議加以交涉牽掣動多齟齬非得執事毅然不爲所撓幾於一事不能舉辦至於應行酌改增添之事儘可於國服二十七日後來奉面商籌畫一切業已先行電達左右相見不遠統俟晤談

又

尊論以參領銜道員不能統轄總管道員加參領銜已屬越級且三省巡撫亦祇副都統銜則副都統銜決不能加之於道員呼倫貝爾旣經奏設道缺則副都統決須裁撤該處純屬旗制旗無總管猶兵無統領現地方制度一切未備若遽裁總管誠如所云蒙旗將捆載毡廬而去則總管又決不宜裁此問題似難解決然實不足慮也參領銜道員雖不能統轄總管而足以統轄各旗道員之設正以統轄蒙旗爲重至總管之受統轄與否於事實上毫無

關繫可以內地將軍之於督撫例之督撫與將軍兩不相統行政之權自偏重於督撫現設道員期於改成行省制度一切行政省中所責成者惟道員一人則道員自處於優勝之地位苟能將地方制度步步經營以期漸變旗制遇有關涉旗事者與總管協商辦理斷不致反受其牽制蓋道員本有參領銜足以統轄各旗也又上有兼將軍之總督兼副都統之巡撫皆管轄各蒙旗總管之切近上司而該道又有旗銜層層節制已甚周密總之此時應籌統一之政策不應如從前之分任辦法渙散分歧其滋流弊至於今日也愚慮如是高明諒以爲然

退耕堂政書卷四十一

退耕堂政書卷四十二目錄

函牘八

復姚都護五函

致黃守維翰四函

致于道駟興二函

致孟守憲舜三函

致曹學使四函

復陳司使

復鄧司使

致慶道山二函

復桂道芳

復顏道世清

政書卷四十五
致徐道鼎康四函

復談司使

致張守鳳臺三函

復李令廷玉

致周道長齡

致上海招商局

復傅道良佐

復張季直殿撰

致軍機大臣

退耕堂政書卷四十二

天津徐世昌

函牘八

復姚都護福升

昨奉手書縱論邊事塞上情形瞭如指掌無任傾佩瓊倫兩處自今著手經營各有難易惟卡倫爲防邊而設必須一律興辦以期沿邊聲勢與倫境互相聯絡所有情形不同之處無妨酌量變通總以沿邊一帶一律籌備完密爲主瓊屬經亂以後流離失所生聚尤急於教訓尊函所開興利四條具有條理可見施行就中航利一節已與吉江兩帥籌議合黑龍江松花江嫩江牡丹江等處併力經營組織兩省合辦之局庶幾轉輸便利呼吸靈通木植礦產輕而易舉卽希擬章試辦惟由腹地運至江干道路難易亦應

籌及瓊城倡設火磨公司商股能集若干由公家助款是否確有把握卽希詳細調查再行舉辦瓊城通漢語者多教育尙易爲力擬設學堂約需經費若干亦希從實核計就商江省籌撥現在款項奇絀所撥十萬之數用修城署江省能否卽時籌給似應先修衙署暫緩築城騰出餘款以應別項要需時會艱難不得不權其緩急高明想必謂然

又

得書具悉種切俞委員任事以來種種辦理不善已難辭咎乃復敢侵肥至二千餘金之多如果屬實卽應懲究現已與北洋商定將該處金礦專歸江省自辦業由江省另行委員接續辦理仍俟江署來咨情形如何再行核奪

又

瓊瑋自經兵燹城郭爲墟瘡痍滿目得大君子締造經營起災黎而撫育之使芸芸黎庶如解倒懸可佩可佩海蘭泡隔江相望彼則市廛雲連商賈輻輳久成重鎮我則一片荒涼人煙寥落未免相形見絀足下於大小黑河屯勘放街基洵屬扼要之圖將來商業發達地方自然繁盛不謀抵制而抵制自寓其中也購糧以備平糶展緩歸還舊欠並緩辦商埠各節亦頗見斟酌至謂官民相視官商相洽方能近悅遠來自是洞達治體之言語曰非知之艱行之惟艱願與足下共勉之也財政困難江省爲最農林航礦漁業諸大端亦均宜切實提倡以開利源尙望次第圖之

又

接誦惠函藉悉一一商埠一節賴執事始終堅持做處屢據各情詳達外部迄未允彼要求將來或易就範瓊屬地面漸見安謐復

業者多要當休養生息以復其元氣清丈地畝招墾勸農亟應舉辦惟委辦務須得人尙希隨時察看毋任滋生弊端該處旗籍酌量撥給地畝俾有恆產事屬可行惟給地之後卽應責令耕種時加勸導毋蹈舊日偷安之病因循日久荒土依然積習如斯不能不大爲湔除也至沿江樹木俄人越界砍伐亟應設法禁止卽祈就近籌度嚴清界址以保主權無任企禱沿邊各界均應詳查籌畫布置設卡招民逐漸興辦屯墾宋友梅處現已籌度舉辦也

又

接誦惠函並條列各節及試辦金溝稅捐章程火磨預算清單各一件具見規畫周詳惟所擬各端尙有擬加斟酌者如倡建火磨並設釀酒公司等事洵爲生利之計然必須先事詳籌始免流弊查火磨公司純爲商業之事似應官爲提倡不可附入官股致於

抽捐有礙若既專由商辦卽當華商集股不必拘定中俄合辦緣此事與黑河擺渡關係兩國地界必須合辦者情形迥不相同既爲提倡商業維持利權若事事牽引俄商致應得之利與人平分究屬失算但該處與內地情形不同亦有不得不變通辦理者專招華商商力若形不足可酌借官款若干不必作爲股本訂定妥善借約按期提還若係中俄商人合辦則斷不宜附入官股以免牽掣且此種公司成立以前購機建廠在在需款成立以後購麥貨本尤爲急需數亦最鉅今既擬用日出淨麩四萬五千斤之機器則每日須用麥六萬斤上下開辦之始至少須備兩三個月應用之麥始敷周轉約應購存麥四五百萬斤卽需銀十數萬兩今擬集股本十五萬兩而購機建廠已用去十五萬盧布除用之外所餘有幾以何購麥當爲先事之圖此無論合股經辦之人是官

是商是中是俄皆宜另訂詳細章程妥爲核定俾開辦後不至臨時竭蹶也建修火磨應用機器預算清單內所開機器鍋以下十一項原價外加運費差錢七千五百吊其他機器未開運費而開有採辦機器及一切雜費一萬五千吊連前開運費共二萬二千五百吊查所購機器等件原價全數係差錢九萬九千八百餘吊此項機器係從何處採運到瓊未經申明川資運費之多寡卽無由核計且除川資運費外亦更無他項費用今所開採買機器運費及一切雜費殊覺過多究係如何開支所謂雜費是否卽指川資運費而言尙希詳核至酒爲尋常食物之一種釀酒卽無專利之理縱使官准專利而他處皆有釀造其利仍難獨專且所云釀造俄酒其於中國燒鍋有無侵損亦須切實研求如果不礙本國釀造該公司可用特別商標由官實力保護不准他家冒造尙屬

正辦所稱每年報効羗錢四萬盧布爲數甚屬不貲旣云該廠較火磨貲本尤鉅則將來規模奚若尙不可知每年究能出酒若干比之抽收酒稅是否合算似亦無憑預計是此項報効不過爲該商請求專利之空言若遽指實以一半解繳以一半用之新政將來設或無著何以爲辭應先俟該商等議定合股辦法如無流弊再行由官設法保護之若報効一節現在旣無貲本數目及獲利數目將來能否歲出四萬實難預斷似不如官爲保護抽收出廠酒捐較爲妥協然亦須果真開辦始能議及此事也總之創辦實業以寬籌貲本爲立事之始基華商張小廉旣爲瓊城富商何以擺渡股本之四千餘盧布無力擔任而火磨貲本較多數倍釀酒較火磨所需尤鉅何以又能倡辦且事事皆引俄商恐或爲俄商所利用究竟該商財力厚薄是否殷實可信尤須審慎雖該處提

倡商業適因官商交困未嘗不可利用外貨以突開本地之利惟
開辦之始一切皆須妥爲籌計否則利益不屬外人便歸壟斷甚
或貽累公家皆非計之得者也庫瑪爾河金溝前江省公署轉咨
文內與尊處函稱情形大致相同所指漠廠委員俞錫麟種種情
弊如果屬實自應究辦現在江省已派仇委員前往該處接辦應
俟江省來咨情形如何再行酌核辦理漠廠徵收木稅已出礦局
權限之外雖曾經批准有案將來與北洋改議章程時應將此案
撤消或卽先行咨明北洋俟咨送稅票到日斟酌辦理其餘各節
統希隨時經畫俾益邊陲是所企盼

再所擬瓊瑋試辦金溝捐稅暫行章程大致尙妥原不必以體例
相繩茲將原定四則內所有辦法分別剔出縷列章節眉目較清
間有斟改之處另飭附於按語並望酌之

覆黃守維翰

十九日接展手書具悉一切呼蘭密邇哈埠日人絡繹前往其意實欲破內地雜居之例儼然以三省爲其殖民地惟究非條約所許遇地方官有權力者彼亦不能不退讓故常視辦理其事者爲伸縮執事按定約章力固主權杜漸防微地方實受其福巡警軍隊尤宜格外注意總以紀律嚴明保衛治安爲要義入夏以後林葉漸生匪徒往來得所憑依須飭各路嚴加防勦俾民不爲匪所苦乃可議教養生息也

又

接誦手書精悉極切呼蘭設治未久地僻民僿凡百措施罔不棘手想見賢勞規畫力任艱難曷勝佩慰大抵邊荒樸陋之地有較內地難辦者亦有較內地易辦者法制不甚完全則便於改革弊

習不甚深固則易與湔除所望以實心毅力漸與切劘循序而進
必有可觀承示蘭郡銀票不敷周轉議籌補救之法該地行用廣
信公司錢票相習既久計惟仍由廣信公司設法發票前往較易
辦到容與雪帥酌商辦理巡警一節該處徒孳形式勉強充數程
度不足自在意中現擬整頓改良仍非物色專門斯學者不可奉
省此項人材亦尙不多如有需員襄助之處卽希示知或可代爲
羅致至添造辦公房舍修改監獄均亟應籌辦之事惟須切實估
計以免糜費現在崑軍漸次撤退奉軍到彼能否得力兵丁滋事
此風斷不可長以啟驕橫玩肆之漸務與該統領等詳明告誡萬
勿姑息從事以隳軍律至於規畫地形調和諸將尤賴執事之運
籌一心矣東事頽廢垂三百年及今改絃已覺後時一綫可爲均
當努力願與執事共勉之

又

日人到蘭郡賣貨持有護照援據中日通商條約侵入內地本應禁絕惟條約第六款載明日本臣民准聽持照前往中國內地各處游歷通商執照由日本領事發給由中國地方官蓋印等語是游歷通商一節在我無以難之惟此種護照不能作爲買賣貨物之據洋商人內地買土貨以運照及三聯單爲憑賣洋貨以稅單爲憑如無此三項應行逢關納稅遇卡抽釐此係載在條約各國通行之例嗣後如有此等日商卽據此條與之辯駁茲飭交涉司詳釋數條附奉台覽諸希妥慎辦理毋使釀成事端

又

接誦手書藉悉種切巨匪趙泳年罪惡昭著現經拿獲正法實足大快人心蘭郡地方僻遠此等匪徒所在皆有若不嚴加搜捕無

以保衛治安所有在逃之四勝占北兩匪仍希切飭嚴密查拿以靖地方執事身任巖疆不辭勞瘁他日政成爲邊疆賢太守不使龔黃擅美於前欣慰何似該處情形尙希隨時見示爲幸

覆于道駟興

頃奉惠楸具悉一一調查六旗員生先後回哈所有報告清圖各件俟編訂既竣尙望速行寄奉以資核閱該員生等共有幾人分任測繪調查跋涉長途不無微勞足錄自當擇尤另派差使其餘於應領薪水之外酌發川資藉以獎其勞動卽由執事分別辦理其應行發給川資者酌給若干統希核定廖裕賢楊萱遇匪搶掠旅况蕭條尤爲可憫應卽於加發川資外給銀百兩用示體恤

又

前聞俄人有添兵來滿洲里並欲以滿站東爲國界之說特函友

梅都護派員密查茲據報告前來並繪寄地圖一紙特飭鈔送台覽俄人目前雖無添兵之舉而沿邊一帶移民實邊經營不輟其未能忘情遠東自在意中至滿洲里邊境界久未經理而沿邊各鄂博宛然屹立尙有基址可考若不及此時詳細勘明將來恐別生枝節卽希選帶幹員親往滿站邊地周歷查勘將分界之處詳細繪圖貼說國界關係重要萬不可稍爲疏忽含混並查從前案卷與俄人交涉原委現在應如何釐訂之處詳晰見示以期次第布置固我邊陲至俄人在該處舉動希隨時留意爲企

復孟守憲彝

承示籌辦路政巡警學務以及對待外人各節具極妥洽至裁改審判廳一節該廳辦理不得法委任不得人經紳士稟揭有案自可重行組織酌量改良以副

朝廷慎重裁判之意惟司法獨立制度現已奉

旨實行各處地方均應設廳審判以劃清司法行政之權限來函謂該廳向無底款難於支持似當一面設法籌款一面從速另定規則酌度改辦現既奉法司電飭靜候查辦一切弊竇無難察見將來應如何組織改良之處應卽迅速籌定稟商法司期臻周妥至司法行政界限宜嚴該廳專司審判無端停止殊爲不合現一切詞訟案件暫歸府署審判原不過權宜辦法亦應從速籌擬劃歸該廳以清權限而符定制執事綜握郡符責任綦重來示以不計毀譽不辭勞怨自任具徵黽勉圖治之盛懷一切仍望詳慎籌維從容敷措力抒疚棘益宏謨猷實所企盼

又

來函具悉章守創辦地方審判廳其名譽如何弟處具有所聞前

於該守呈報設立審判廳暨用人情形批由執事候吉林行省衙門核辦正以吉林距長春較近考查較易核實閱提法司沁電云已派員前往查辦自更易接洽是非不難立判執事應靜候簡帥及吳法司秉公核辦可也此次吳法司據章守電稟卽電詰執事亦爲慎重司法機關起見旣經執事詳晰稟復吳法司自然渙釋務望盡心整飭毋用意氣自生荆棘致誤事機長春大郡旣倚畀賢能弟與簡帥豈能漫無權衡一聽悠悠之口執事盡其在我無所謂事事棘手無所謂見惡於人也

又

接閱來牘具悉壹是該府審判廳辦理失當經提法司派員查明亟宜從速整頓現在該守暫代經理具見辦事熱心不分畛域惟各省司法機關正籌獨立非地方行政官所宜兼理所有該廳推

事自應由提法司遴選專員接充辦理勸學所已照奉省辦法改由地方公正紳士自辦既可節省經費且可免去隔閡於振興學務爲益非鮮應卽稟明提學司查核立案遵照辦理王道崇文辦事向來認真惟該處巡警局積弊太深勢難一旦悉予革除自應逐漸清釐力圖改良現該道另有差委已飭接辦唐道續行整頓該守遇事仍應和衷共濟相助爲理俟唐道到長再令交替禁煙局暨李得勝復叛等事該守旣知章前守辦理之不善則必思切實整飭以善其後庶期有補救之實益而非改良之虛語蓋言之非艱行之維艱不必競尙虛文但當力求實際此則所願與該守共勉之者也

致曹學使

吉省學校大都創辦不久成績未彰學生知識程度雖遜內地而

賦質樸愿亦無內地學生耽習教育之法自宜從淺近切實處入手以期循序漸進蔚爲全才來示注意實際以不求速效不尙形式爲宗旨洵已洞見癥結至佐理一切必須得人吉省學務人員請假兼差居其多數而在署者又不甚得力正宜一面慎密甄核一面酌量調用冀收指臂之效各學校從前辦法多屬草創欲求折衷至當則考核不妨求詳其有辦理未盡適宜者卽當隨時改正務臻完善監督教員爲執行教育機關苟非其人則因循粉飾百弊滋生不惟無以助其進步或轉爲學界之阻力尤應隨時甄察嚴定考成至若小學教科書各國爲教育統一起見多用國定主義然在吾國各省程度不齊若專用學部所頒定本恐於膺民之方轉多鑿柄茲由吉省自編國文地理歷史三種課本先取吉林之事實形勢以激發其腦力爲開化邊域計誠爲一定不易之

法惟稽於古訓蒙養爲先證諸泰西德育攸重似乎國文課本尙當闡述先正矩範表襮道德秩序本公忠之宗旨示學者以步趨庶民志旣端不至旁鶩執事以爲何如令姪俶黼編修已就勸業議員之席從茲本其所學發爲讜謨俾實業大興而豐鎬人民同躋樂利欣幸奚如弟二十後卽將定期北行先往龍江再行赴吉良覲在邇不盡翫縷

又

接誦手書具悉種切吉省學務公所房舍不敷辦公衙署可以另建所擬圖樣亦尙合格惟辦公房屋以堅緻耐久爲主不必過求閎麗帑項支絀建築費能否再從核減近年各衙署工程大致可稽當不難切實估計希就近稟商簡帥酌度一切再將經始情形見示爲幸

又

接讀華翰承示籌辦學務各事極見碩畫惟擬先開小學教育研究會聚集各學堂職教各員詳細討論管理教授方法一節誠恐小學教員程度不齊難收實效鄙意仍以照章設立教育官練習所選聘講師按期講演小學教員一律附入聽講爲是至教育官報因辦理不善飭令暫停應卽妥擬章程接續刊報勿令間斷勸學所已飭吉林守遵章改訂甚爲妥善其餘農業實習學堂及製造博物標本等項可於明春次第開辦農業應與勸業道會核仍希將籌辦情形及各項章程隨時見告來書所云學務的款無多不敷甚鉅當候簡帥通盤籌畫再行指撥應由執事呈明吉林公署核辦至科員加薪現在經濟困難此端一開處處效尤甚難爲繼閣下又擬將科員奏請定爲五六七品實官按東三省奏定官

制各廳司道一二三等科員均作實缺現奉省尙未實行奏補將來三省自應一律辦理至房屋不敷辦公之用卽將勸學所地基繪圖估定改建衙署俟詳請到日再行酌辦

又

此次檢驗教員編配學科規則漸臻完全成績自易優美又復考試各項學生就其程度年齡分定班級一經變通辦理可以節省經費增加學額辦法具極周洽教育官練習所所以整齊各教員之程度現雖已開辦小學教育研究會仍宜設法選聘講師照章改設以期易於策效教育官報及農業學堂籌商既有成議卽宜妥定規章迅行開辦教育行政關係綦重必須籌定的款用圖實力振興惟吉省度支困難應如何移緩就急之處仍希與陳署司詳細籌商呈候簡帥核奪吉省學務方在句萌啟淪新機胥資籌

孽曷勝心企

復陳司使

承示籌辦各節具見盡畫佩慰交深吉省財政事項昔分隸於十二局所今綜屬於度支一司責任聿專措施靡易非通盤籌擘不足以策全功非實力整頓不足以清積習戶司設立最久頭緒紛繁整理尤爲難事商鋪執帖必須一律收回方足以資周轉現在未經收回之三十七萬餘吊責之原收庫官當可設法追繳至奏報不符此盈彼縮從前稅習比比皆然當此改革舊制咸與維新帑項所關亟當澈究清理交代處之設將以切實清查詳慎核對洵屬正辦惟審計之事貴於精密創辦之始要在得人足下必能悉心籌畫紓茲疚棘上以昭國家帑儲之重下以破官場蒙飾之私宥裨疆事良非淺尠吉省進款向極困難開源節流胥爲急務

現在包徵之稅改爲儘徵儘解收額因以銳增而又提銀元局之分肥蠲寶吉局之虧累餉捐局糧餉處亦分別減費裁員節流之道已得要領此外應行改定之處仍望詳慎籌維隨時核辦總期於財政有裨至吉省利源所在林礦墾牧胥待經營而將來美利之基亦有資於鹽課茲既粗定章程各分局亦次第設立經費有措銷數漸多辦理極爲得手仍賴槃才切實整頓以期逐漸進步官帖局所發紙幣原以便市面之流通用意非不甚善其所以漸歸失敗者誠由於日久積弊而信用因之薄弱也此次得經帥一番整頓足下又能殫心經理並附設發行銀票處以爲將來收回官帖之基礎智慮極爲周匝惟紙幣之性質本屬無價流通其行使之多寡當視夫市面之情形此全在任局事者隨時體察商情維持信用庶可以流行久遠卓見以爲然否銀元局裁撤員司經

費漸省方茲現銀缺乏固以無力多鑄爲憾而祖模改良之後所鑄銀元自較便於流通至於禁止收發規費詳訂盤查章程是胥賴賢者之從容措理也

覆鄧司使

接誦來函以吉省交涉屢經失敗懲前毖後預作綢繆深識遠慮曷勝傾佩哈埠公司已成積重之勢我方規復尺寸人已擴及尋丈固由國勢抑亦人謀然及今尙可爲力者日俄戰後智勇俱困兩強旣未肯相下列國亦環而相持若能利用此機逐漸布置東方危局尙可支持執事此次到哈與施道籌議一切諒已曾有成竹從前喪失權利放棄責任當不難一一糾正長春一埠日固自視爲勢力範圍而財力遠不逮俄故不能大有經營我若從商務上實業上著手以相抵制彼斷不能干涉而伺瑕尋釁恃強蔑理

頗爲日人之長技又在地方官之應付得宜該處創設道缺事繁責重誠如尊論云云杜道在哈現有經手事件須待清理一時尙難履任也公司請派督辦一節本爲合同所有惟一時甚難其選且於日本一面亦須兼顧既派督辦則我須干涉公司之事處處爭持我之權利方有裨益不得其人則反爲所利用故茲事籌商多日尙未定議俟唐帥旋奉時再行酌定至督署移駐長春蒙古修築鐵路皆係極要之著當徐圖措置耳

復慶道山

興東設治未久諸待經營執事此番周歷各處查勘情形一切布置必已成竹在胸所有添設局卡修造營房開通道路招徠商民均目前亟待舉辦者惟希事事核實認真經理日積月漸成效必有可觀入秋以後雨水較少工程當可併營並希嚴查所屬勿蹈

鋪張敷衍之弊拉哈蘇蘇俄關久爲行旅之梗前由外部與俄使交涉彼已允許撤退迄未實行現據尊函即將詳細各情電催外部從速辦理矣

又

頃奉惠函備悉種切邊地工程雖較內地稍費然亦必事事核實方不至虛糜鉅款畢拉爾牲丁向恃獵獸爲生現在生計日蹙當從開墾林業等項導之別謀生業若僅恃公家散放糧食暫濟目前斷非長策此皆須預爲規畫者也至該處地隣俄疆匪徒出沒極爲可慮所請嗣後搶劫盜案審得供證確鑿者擬卽就地正法爲除暴安良計卽准照辦但仍須詳慎研訊錄供詳報呈候省批以憑考核治邊之道文法固不必盡拘要在以堅強之力行慈惠之心庶邊氓悅服而外人亦不致輕侮執事洞悉邊情當能措置

裕如也

復桂道芳

得書知解辦鬍匪各事已與施道妥商就緒吉江鹽斤亦經陸續分運甚善甚善俄人夙具野心比來經營悉畢利及遼東各處不遺餘力其注目所在實將從容布置隱圖蠶食不早抵制必滋後患伊馬河一帶華民橫被驅逐流離情況尤堪軫念執事所造詳表至爲清晰已另鈔寄呈外部以資籌核歲卑鬍匪一律解哈訊辦有所忌憚匪氛諒可漸戢商情困苦挽救無從顧此艱屯同深慨歎發審委員如擬定卽可照辦卓見所及仍望隨時惠示爲幸

復顏道世清

頃奉惠楸備諭豈是私立自治會解散之後士紳安靜如常具見卓籌碩畫措注咸孚曷勝欣慰現改設吉林府自治局並附自治

研究所簡帥倚重長才以公董理其事洵爲得人諭知台端才望卓著於士紳亦極殷洽從容展布自必措理裕如當此創辦之初諸待擘畫又須兼顧兩局想亦頗費蓋勞前由簡帥商調周羅二員本應飭其前往以資臂助惟羅永紹現有要差未能赴吉周大烈現充諮議局科長兼自治研究所教務長亦甚重要如吉省必需法政人員擬先覓替人令周大烈赴吉至吉省官場秕習甚深自非痛加懲創難望剷除淨盡來函洞見癥結至用心佩析津之行何時返旆弟早擬北赴吉江適以萬壽聖節在邇又值

玉牒來奉因之稍展行期月望後卽當就道良覲靡遙不盡馳溯

覆徐道鼎康

東土物產豐饒邊境一帶森林礦產封閉數百年久爲外族所覬

正言卷之二
覬及今興辦猶可保我利權惟目前款項奇絀大舉不易而官場積習類視此爲利藪以故每辦一事開支極鉅而收效卒鮮此近日官辦實業之大病執事夙負偉望要當先除此弊然後博考詳稽擇一二確有把握用款較少者切實興辦俟著有成效逐漸推廣以後風氣漸開則集貲漸易規模益宏此實吉省強弱存亡之問題不能不望執事肩此重任也附近鐵路林礦尤爲外人垂涎前此無人過問儼有予取予攜之勢亟須隨時稽查以杜隱患磐石銅礦苗質旣佳現在辦理情形如何林業局荒務局均希極力整頓毋避嫌怨農場工廠所費無多尙易爲力惟均以核實爲要執事研求有素於用人用財之際尤希三致意也

又

接誦來函備悉種切長春商會得執事剴切曉諭和平辦結無任

欣慰嗣後官商若能聯絡一氣可卜逐漸發達仍希隨時提挈爲之先導哈埠商家道內道外分爲兩總會無論與部章不合而相距咫尺儼分畛域亦殊非合羣之義執事擬將道外總會名目取消改爲分會以冀聯合用意至善惟道內道外久已分立今勉使道外商人附隸於道內誠恐商情不服意見益深將來轉不免衝突不如仍就前設之總會變通辦理合道內道外眾商平均分舉會董若干員又各舉協理一員以爲代表合內外眾商公舉總理一員以爲總代表兩協理分任其事一總理綜挈其綱於部章既不相背商情亦可浹洽更須切實開導曉以合羣之義華商習慣自分畛域務當各蠲私見結合團體庶於商戰場中可以立足望執事體察情形善爲籌策也並與施道隨時商酌以便接洽俄人伐木從前漫無限制現已定有專章指定地段自應遵守希檢查

今年所訂伐木章程如有仍前越界砍伐情事卽當照章禁阻勿稍寬假航路爲吉江兩省命脈亟須籌辦現以經費支絀姑從小處著手辦理甚爲得法卽祈悉心規畫以爲異日推廣之基不勝企盼

又

此次台從到哈調查所及農漁林礦必皆得有端倪應如何著手之處卽希悉心規畫一一開示以便核辦惟事經創始人非素習款項之難籌交通之不便在在胥勞賢者措注願勉爲其難也長春商會各節工程衛生業經歸併辦事自有頭緒王道入尙明白當不至有所煩擾仍希隨時體察不吝見示爲幸

又

接讀華翰並吉林官立造紙廠辦法暨機器價單聘定技師長合

同底本各件均極周密原議擬三省合辦簡帥亦力主此說惟茲事體大如原議所指資本銷路及設廠處所三者通盤籌算此中困難甚多目前奉江兩省財政亦屬萬分支絀恐難辦到吉省既已聘定技師長購定機器又斷無中道廢輟貽人笑柄之理鄙意擬由吉省勘定適宜設廠地方開廠先從小處試辦一面令該技師赴各處將出產各種原料調查明晰以爲入手第一著辦法並可查照原議仿各國辦法俾印刷製紙二部聯爲一氣如此辦去自能得其要領俟將來辦有成效再行徐圖擴充循序漸進庶不至有務廣而荒之虞也

覆談司使

頃奉來函備悉種切江省財政困難早在意計之中近今新政迭興需款尤復浩繁任事之難至深繫念蓋經費寬紓則辦事較易

中材類優爲之目今三省局面皆在艱難盤錯之中龍江利源未
闢諸務待興不能不賴賢者勞心焦思經畫其間也與東瓊瑋呼
倫貝爾等處事關邊計今甫著手興辦無論如何爲難不可令其
中輟否則前此經營均歸泡影甚非計也木植地價尙不致於無
著本年籌辦酒稅糧稅約計可收若干尙希量爲挹注以維大局
籌邊固需大宗鉅款然未易籌而事機相迫時不我待豈能置邊
局於不問願與識者一商推之

致張守鳳臺

長臨洽所相距五百餘里山路崎嶇來往一次爲日甚久恆有顧
此失彼之虞現在籌辦一切情形如何久未得來書至爲繫念台
從已否到長查勘相度務望趁此夏令易施工作之時常駐塔甸
規畫建署等事兼籌辦外交邊務遇有急需面商之事仍飭李令

輕裝趨赴稟承一切是否卽希酌行

又

頃奉惠榆藉悉壹是長臨路綫有關邊防亟應從速籌辦惟現值隆冬封凍只得緩至來春山中林木繁蕪若能及此暇時鳩工而芟夷之將來開山通道自有事半功倍之效謝巡長不憚煩勞責以斬木當可著效旣經執事躬親履勘復經該巡長確實探查今冬準可斬伐應卽派令招募木把編列工隊迅速開辦此路關繫重要尊意儘明年八九月間開抵長白具徵力肩艱鉅併日而營總望如期告成庶此後整理邊陲有所措手所有籌定章程併開辦情形統望隨時見示爲要

又

兩接來函一一均悉李令廷玉所呈報告圖說業經飭廳詳加研

核自未便輕言排印散布作爲案據致多妨礙至由臨赴長一帶
路綫秋間未經勘定此時冰雪滿山不能不俟明歲春融再行趕
辦所擬先修蕩平嶺東西河橋亦係緊要工程應卽及時勘定詳
細稟候核奪飭遵辦理刻下長臨界務旣已竣事李令幫辦名目
業經裁撤事權旣一所有路工署工一切事宜責無旁貸務須妥
速籌辦以重要公力戒虛糜以求核實是爲至要至爲勘界測繪
各員請獎一節應俟設治各事一律告竣方可稟請分別核辦此
時實不能遽予獎勵致涉冒濫李令勒令韓民剃髮易服一事已
另派人查辦矣

復李令廷玉

頃接兩次手書並小島告示具悉一一邇來日人進步愈急我之
布置勢難稍緩所盼良有司精心實力冀圖抵制庶不致處處喫

虧攔阻木簞一事現派司道與日領議訂合辦木植細章以後卽易辦理公司合同及外部奏稿茲特各鈔一分寄去卽希察閱遇事便有依據僑居境內韓民選能通中語者爲之編查戶口格外保護均認爲定約以前來居之民任其備墾以爲勸導之方吳統帶光新稟函亦接到已由下游考查回省面詢一切矣

致周道長齡

上月道出營口與執事暨營埠商董面談疏濬遼河以保商務一事回省後卽委工程司英人秀思親赴遼河一帶逐處審察茲據報稱遼河淤塞實因年久失修所致且雙台子河道出水每杪鐘有百分之五五遼河水道只出百分之四五由此觀之雙台子河口須先整頓現已擬有整頓之法四條一將雙台子河口封塞二將雙台子河口修築水隄三將雙台子河口改窄四將雙台子河

口設立水閘四者之中該工程可以第二法之修築水隄爲最便但改理該處河道似宜營口商會邀同雙台子紳董商量籌畫以免誤會致生枝節茲將該工程司稟復所查各節鈔寄一分以備查閱尙有水隄圖式工料價值各件俟其繪成並預算確實後再行送去再遼河由通江子至營口沿途一帶淺灘甚多亦宜疏通其河道太寬水勢分散之處並當改窄蓄水方便行船至於鐵嶺附近地方水勢又分二道中有淤灘須將一道堵塞方免患礙惟興辦工程必須妥籌的款尤當視其款之多少按款辦事免致中廢營口通江子往來船隻能否設法加捐每年捐款約計可得若干除船捐外有無別款可籌其數約有若干須與商會詳細酌量呈報一經報到擬將該款作押向銀行籌借鉅資分年攤還由總督擔保以昭信實但如何籌借如何攤還及繳息若干均俟尊處

造報到後再行審酌定奪倘船捐等項爲數有限或可少移公款以成之望執事速爲籌畫除與營口商會妥爲接洽卽行見復外如通江子鐵嶺等處商會亦宜知會通力合作以輔公益是爲至盼

致上海招商局

敬啟者查奉天濱海地方雖多港口但每屆冬令鮮有不凝冰者以致交通仍不利便會飭工程司英人秀思前往榆營沿海地方逐細查看有無不冰港口據實稟報茲經查得秦皇島迤西相距六十英里之葫蘆島詢據該處土人僉謂冬令不冰似可建築碼頭修爲港口且水量深淺亦足容輪船進口往來請由貴局遣派堅大輪船一艘向該島試駛三次查勘實在情形其駛往之期擬定於西曆明年正月第一星期內五號又西正月第二星期內十五號

號前又西二月五六號前後每次抵島均停泊六點鐘船到時由該島工程處晝則懸旗夜則懸燈指示接船之處至貴局派何船前來由煙台或由秦皇島順駛該島並預計何日何時可到均望詳細見覆以便轉飭該島工程處接洽相助爲理所有三次輪船應需煤艸並保險以及船上日費等項自應由敝處繳償惟是應繳若干尙祈從儉核計緣公益攸關非同商賈想執事必能有所贊助也

復傅道良佐

頃接十一日惠楡並陶丞條議一件具論一一邊務問題漸將解決適遭

國郵想外部開議又當展期韓僑定名商埠劃界實爲籌議要端亟宜詳細討論以爲談判之豫備陶丞所擬各節逐條詳閱洵有

見地已飭鈔呈外部察核並寄示吳綬卿參領矣

兩宮升遐薄海臣民同深哀痛此間已定二十五二十六兩日先後舉哀成服中外安謐如常延吉應行禮節業已電達強鄰迫處邊事未定一切尤望鎮靜籌維以綏疆圉爲要邇來體中如何至念

復張季直殿撰

前准華函以美國華盛頓將開第四次萬國漁業會囑將東省漁業何者注重海界所在若何預籌逐條開送以便赴會提議等因當經分飭各該司道陸續呈覆前來查吉黑兩省漁業尙未推廣卽奉省之鴨綠江水產亦未興旺惟營口沿海各島漁品繁多撈捕亦頗稱盛上年設有漁業公司近因旅大租借外人各海島捕魚之處互相爭論我以向來漁船所至爲領海彼則未能見允然

正書卷四十二
各處漁圈約在距海口三四十華里之外按之西人新定礮彈所及之地爲度尙屬吻合若仍照前此以三英海里爲領海界限我之水利將爲外人所奪而海權亦不可問此則奉省所不能應允者也務望貴代表員赴會妥爲提議庶使海權可保漁業因之繁昌茲將覆到各件錄呈執事惟希查核設法代辦不勝感禱之至
致軍機大臣

世昌少年孤露氣體素虧時多疾病而性耐堅苦不敢言勞不肯言病遇事皆勉力支撐今行年五十有五矣精力日衰氣血日耗百病叢生五中焦灼前歲蒙

恩渥膺重寄會東省改制伊始時勢多艱事機危迫爰督同參贊司道等悉心規畫不敢一日稍懈邊地苦寒風雪多厲舊恙因之屢作觸發痔疾時復便血行臥維艱而事務全集無從靜攝去年

秋冬之際痔又大作復得怔忡之症夜不能寐病象愈深顧以受恩深重且行省初設頭緒紛繁不敢以病軀請假致誤事機力疾從公勉強支柱擬俟經理稍有就緒再行具疏乞休不意十月內迭遭

國家大故人心震驚浮言俶擾東省地當邊要尤宜加意鎮撫勉與參贊等昕夕籌謀預防隱患幸得屬境又安民心綏靜而驚痛之餘加以勞頓心力益復不支諸病交作精力驟減徹夜不寐遇事健忘心氣虧損痔疾又發醫家咸謂氣血交虧非靜心調養趕緊醫治萬難奏效伏念東三省爲我國根本重地值疲敝之後當外交之衝近十餘年來外人權力擴充已極兩強逼處各國注目實一大交涉競爭之場與內地情形迥乎不同兩年以來竭盡心力雖已稍有挽回而無實力以繼之近看外人又將改變方鍼對

待我矣設以衰病之軀濫厠其間精力智慮不能貫注稍有疏虞貽誤實非淺鮮豈敢強爲擔負致誤大局焦愁至極病益增劇再四思維惟有據實入告籲懇

天恩開缺調理迅

簡大員肩此重任務希鈞座格外關垂俾得仰邀

恩准以後有生之日皆爲戴德之年此間時機至迫一應公事不可稍有稽壓斷非假期內所能料理摺已拜發諸希俯鑒下情代爲申請無任迫切感荷之至

退耕堂政書卷四十二

退耕堂政書卷四十三目錄

電文一

哈爾濱自治會案

退耕堂政書卷四十三

天津徐世昌

電文一 哈爾濱自治會案

復朱中丞 光緒三十三年七月二十八日

沁電悉鐵路交涉局前經薩道等稟請裁撤另立中外交涉局當
諭以暫仍其舊此事須籌一完全辦法驟然更張該公司必不承
認俟到彼查看情形再行商辦

附朱中丞來電

據薩道杜道稟鐵路交涉總局俄領事藉口原訂合同把持
裁判權擬請裁去鐵路交涉局將原合同作廢另設中外交
涉局歸關道管轄等語查該道所陳各節首在劃清鐵路公
司與領事之權限而代理權及裁判權亦不致旁落且不貽

他國口實自屬正辦似應據情會咨外部照會俄使切實磋商以杜葛藤祈電復

復朱中丞

光緒三十三年十二月十七日

銑電悉俄人在哈爾濱等處設立自治會一事前據鐵路交涉局于道稟報當經咨呈外部阻止在案准電前因已會銜明晰又電外部并電飭杜道于道分別照會俄領及達聶爾聲明此項章程不能承認

附朱中丞來電

前據濱關道杜道稟報鐵路公司在哈爾濱鐵路界內組織地方自治會當經飭將該治理向章及現在辦法詳細聲覆茲據復稱哈爾濱設立鐵路交涉局鐵路公司訂有專案合同凡關於鐵路事件及牽涉鐵路人員工匠命盜詞訟各案

均須會同鐵路公司和衷商辦緝捕人犯隨時知會公司派
巴釐差協拏華犯歸交涉局押俄犯歸巴釐司押至於鐵路
界內等商貿易均聽華官之命令是鐵路界內治理權華俄
尚各得其半此向章也自上年四月設置關道俄亦設總領
事所有辦事權限凡鐵路界內華俄訟案不關鐵路者歸關
道與俄領事會審關於鐵路者歸交涉局與鐵路俄員會審
此現章也茲由公司代辦達聶爾將新訂自治章程送來核
其命意範圍甚廣幾將鐵路界內治理權悉歸於自治會關
繫誠非淺鮮云云查俄人欲於中國領土行使自治權實屬
創聞爲公法所不容檢閱原訂合同十條所損主權不過司
法一部分而用人行政尚能權自我操現在俄所訂公共地
方治理會章計五十五條其治理權之廣如抽收各項稅捐

管理地方產業以及衛生善舉商業工場事事皆被干涉至語其組織則儼以公司爲總攬機關而以代表會議所當議事會地方參議處當董事會純乎自治團體之性質其尤堪駭異者名爲鐵路界內自治而曰以鐵路總公司批准之地圖內所指地址爲限則自治區域隨時可以推廣名爲公司選舉而曰地方參議處總董必須俄國籍貫方可充選則一切實權均落俄人掌握總之鐵路之設心在據有該處全部之行政權而借選舉爲名以排斥中國所派官吏得以任所欲爲尤其注意之處此事不獨虧損司法與行政之主權抑且牽涉領土主權況該處係自開商埠各國領事之意欲於界內設埠而不認俄有自治權聞此項章程瞬將實行儻他國羣起責備轉苦無辭以對或亦援例以請又將若何似應

據情電達外部向俄使切實磋商仍照原訂合同辦理將此
項章程取消以維大局公如以爲可行卽請挈銜電達外務
部日領島川今日回國聞病勢甚重已不可治中野十二已
到吉林礦事尙未開議邊防經費已蒙允准明春稍可布置
度支部原餉今尙欠六十萬擬再具摺籲懇續發否則實難
支持矣

致杜道學瀛

光緒三十三年十二月二十一日

來呈暨照會稿閱悉俄人在哈埠設立自治會前已電飭迅速照
會俄領事暨鐵路公司抗議在案查閱執事致俄領照會措辭未
盡妥協希速再行照會該領暨鐵路公司與駐哈各國領事聲明
東清鐵路係商業性質祇能按照合同保護公司產業無管理地
方之權今擬設立自治會殊屬不合中國政府斷難承認至於地

方自治各事中國地方官現正設法籌辦等語並希將已照會各領事文稿卽行電覆爲盼

附朱中丞來電

據濱關道杜學瀛呈稱俄在哈爾濱鐵路界內設自治會現聞十二月二十五日舉會員卽屬組織成會各國領事均預選舉之權會一成立爭之實難關係主權甚大至鐵路展地應訂附件條款已經俄璞使允准職道屢催開議該公司一味延宕其意蓋欲俟自治會成立始行開議現已照會該公司詰阻但恐延擱不復時勢急迫特此具文呈請鑒核云云查此案前准篠電知公已電致外部力爭暨電飭杜道于道照會俄領聲明不能承認據呈前情爲期已迫各國領事均有選舉權一語似俄人將以選舉權餌各領事協以謀我若

果團結一氣更難著手請公再電外部從速阻止爲要

致杜道學瀛

光緒三十四年正月初十日

呈悉查東清鐵路合同係中國政府允許該公司建設鐵路之辦法自與兩國政府訂立條約者不同其合同內稱該公司有鐵路購地界內治理專權一語係專指關於鐵路事務而言如材料廠車站之範圍在公司以內之事自有治理之權若在附屬地內如裁判巡警衛生各事則管理之權仍應在中國國家蓋其地既非租界其事屬於政治與該公司之經營商務者無涉政府與公司訂立合同萬無將地方行政權給與該公司之理公司承辦一事亦不能侵及公司以外之權此爲合同治理二字之解釋甚明今該公司擬設之公共理事會布置地面庶務是於合同內治理二字有所誤會中國政府實難承認仰卽將此意照會達聶爾弁將

此照會原文暨達聶爾來文一併照會各國領事及知照交涉局于道

致外務部

光緒三十四年正月二十三日

據杜道學瀛電稱昨日俄總領事來局會議公事出示璞使電謂自治會業已函達王爺內敘鐵路係遵照第六條原約且係讓權於界內居住中外人民享受平等利益現在法日領事均入選舉惟英國與華商均未到場將來董事六十名舉畢三年後方能另選其不到場者難免受虧等語職道答以時勢不同主權應盡力保護伊云此事既有前約我政府勢難退讓又據鐵路伊代辦來告俄自治會現經璞使來文正與外務部會商哈埠仍照常選舉等語足見其不肯停止此事乞大部力向俄使阻止示復爲要

致外務部

光緒三十四年正月二十七日

據哈爾濱杜道電稱訪聞俄自治會二十九定議以四十人爲議董已舉二十二人並無華商特聞

附外務部來電

俄設自治會事前經本部照會璞使飭禁准復照稱按照東清鐵路合同第六款該公司得於所佔地段內專歸一手經理並無限制之權鐵路界內應議附條約華官巡警各關新展之地段哈爾濱不在其內復經本部以第六款所云一手經理者係專爲鐵路之用至保護地方第五款特爲聲明歸華官自行經理自治會侵礙中國主權斷難允認照駁去後各駐使多來部詢問已將與俄使往來照會撮要通行知照現俄使復照稱鐵路招徠人民在地段內居住經理該人民應按照鐵路利權爲主第五款係防範鐵路外所出之擾害

又該公司於中國官員在地段內有司法之權並不辯駁設立自治會並不逾合同所得之權利等語除再照駁並將往來照會鈔咨外特先電達

致薩大臣

光緒三十四年四月十二日

感電悉俄設自治會勒令鐵路界內華商凡作買賣均向會上起一年票照其照費頭等三百吊二等二百吊三等一百五十吊至出牀子亦要起照納費所納卽係領照之費現華商均未承認正在抗議希極力維持

致外務部

光緒三十四年四月十四日

頃據駐俄薩星使電稱哈埠自治會事疊次詳詢俄鐵路副總辦據稱擬將自治會改名共理會已在北京商議至華商營業領照納費係該會章程第五款內九種捐項之一究竟所收若干尙未

擬定須俟北京議妥方可實行此事在京商議情形無從詳悉若
向俄政府開議事出兩歧恐多鑿柄乞向外部接洽并候示遵行
又電稱江東旗屯事密探未得要領查近來俄方注重移民遠東
揆諸情形似與傳聞之說相歧俟有確聞再電云云均此轉佈查
俄設自治會爲干涉地權之漸日本贊成意將於南滿仿行俄日
移民實力競爭日進不已并希鈞核示遵

致宋中丞

光緒三十四年五月初六日

支電悉哈埠俄設公共理事會其內容與自治會無異前已咨請
外部詰阻至購回鐵路用地一節容函商唐帥與外部密籌辦法
若何後告

附來電

前准外部咨稱俄自治會改公共理事名目係遵守鐵路法

文合同辦理法文合同與華文性質迥別其侵我政權處仍復不少陽爲遵守實則實行不知外部能知其內容否似仍不可輕認已飭杜道將公共理事會章程探明鈔寄又杜道與德美領事論及哈濱開埠中國應守主權將鐵路界地購回作商租建地云云前電議爭購回長哈鐵道一時未能做到若能購回此項界地則收回之權利甚大一切問題自易解決現在哈濱市面正壞若能與之議購宜若可行應否與外部密商辦法請卓裁示復

致外務部

光緒三十四年九月初八日

聞俄政府擬派東清鐵路總辦霍提督爲俄總領事此事我如承認將來交涉更難措手在我抱定哈爾濱爲各國通商口岸東清鐵路乃兩國合辦商務性質不能以公司人兼辦領事事如俄使

來大部提議乞力阻駁細情詳函

致外務部

光緒三十四年十一月十一日

據于道駟與電稱迭據昂昂溪專員電俄理事會董及巴釐司勒令華商起賣貨票每家一二百圓至少三十圓歲分三期交款限五日先交頭期否則實行封門海拉爾站亦畧同惟專由俄官經手並云華商既不願人自治會此係官辦非自治會款爲醫院路燈修道之用既屬路界不能不納職道聞信趕與俄員霍爾瓦特磋商始允展限兩禮拜竊思界內華商多係自造之房無可遷移萬一被其封門恐釀事端又生枝節請爲迅商外部酌定辦法等情前來查哈爾濱一帶俄人以鐵路用地藉口頗多無理舉動實於公司原訂合同宗旨大相違背現正堅持力爭尙未結局茲俄員竟用強硬手段勒逼華民起賣貨票實出情理之外應請大部

正書卷四十三
趕緊商之駐京俄使電飭該處俄理事會董幸勿勒逼華商起票
免生事端大局幸甚

致哈爾濱施道

光緒三十四年十一月十二日

准周少帥電開聞俄公司現於鐵路各站自行挖溝立界節經阻
止無效等語該公司究係如何舉動如何挖溝立界望密將實在
情形調查詳細至鐵路展地劃界一事現在辦理如何情形均希
迅爲電復以憑核辦

致哈爾濱交涉局于道

光緒三十四年十二月初二日

現據呼倫貝爾交涉局致宋都護電該處華商業被俄理事會封
門查俄人理事會之設實屬違背合同前曾電請外部商之俄使
阻止尙未回電今竟出此強橫手段公然封門殊出情理之外仰
向鐵路公司切商力阻并將如何情形電覆以便轉達外部

復于道

光緒三十四年十二月初三日

冬電悉希卽赴公司見霍總辦告以據宋都統施道面稟情形并據該道來電不勝詫異自治會一事霍總辦既許候商在先何遽有此舉動請霍總辦卽速飭各處俄員先行啟封以安商業聽候外部與俄使妥議再定辦法現南滿一切均主和平並允退讓北滿事同一律不宜操切從事等語若轉圜之法執事可俟數日後再與霍面議捐款若仍照從前數目由商家逕交公司交涉局作爲不知執事仍察看情形切實辦理至被封各商家希速電局員妥爲照料并婉諭各商靜候辦法萬勿暴動以礙大局一切隨時電稟

致外務部

光緒三十四年十二月初三日

據哈爾濱施道肇基來奉稟稱該道接任以來迭經勸諭路界華

商切勿擅入俄人自治會并勿輕繳捐款致彼執爲允認之據各
華商尙能齊心堅拒乃上月十五六兩日俄人遽議實行逼勒哈
埠華商領票已將瀛海居等酒館十餘家封閉致該處華商紛紛
赴道呈請設法保護施道與俄力爭特來奉稟商辦法又據呼倫
貝爾宋都統來奉面呈海拉爾局員電稟該處俄人於上月二十
九日亦勒令新街一帶華商停閉事同一律當電飭于道駟興詳
查海埠情形據復電與施道所稟哈爾濱情形相符擬請大部一
并向俄使切實議阻并令轉飭哈埠海埠俄員速將所封店鋪一
律啟封俾可照常安業凡兩國未經議結以前該埠俄員不得先
有舉動以敦睦誼一面當飭該道將被封之鋪分別妥爲安置伏
乞大部商議後電示祇遵

致唐星使

光緒三十四年十二月初四日

北滿俄人近頗強橫先逼勒華商承認自治會捐款眾商尙能齊心拒俄今哈爾濱海拉爾昂昂溪間有被封閉華鋪勒令繳款尙無辦法公會與美政府談及北滿事否

致周中丞

光緒三十四年十二月初五日

江電悉接于道東電蕭電已先後詳達外部請速向俄使切實磋商凡兩國未經議妥之前北滿俄員不能先有舉動并請轉俄員速將各鋪一律啟封俾照常安業又請電薩使詰問俄政府俟得部覆再行電聞一面已電飭于道往見霍總辦告以霍既許候商在先何遽有此舉動現南滿一切均主和平并允退讓北滿事同一律不宜操切從事應請速飭各處俄員先行啟封聽候外部與俄使妥議再定辦法并諭轉圖之法可俟數日後再與霍面議捐款若照從前數目由商家逕交公司交涉局作爲不知暫可允從

此事仍須察看情形相機辦理至被封商家飭局員妥爲照料并
婉諭各商靜候辦法萬勿暴動仍希尊處就近隨時設法安撫商
家弗令失所至禱

致外務部

光緒三十四年十二月初六日

前將哈海兩埠華鋪封閉情形暨昂俄董勒令交款各節先後電
陳在案頃據于道支電稟稱霍總辦前屢推病未便急尋徒增氣
餒業經照會去訖據昂站專員電云華商不納俄稅初四午刻俄
巴釐司帶差同俄會董將俄新街華商挨門印封各商情急如焚
當經切諭靜候辦法萬勿暴動又據歌電稟據昂站商會增福等
公呈俄會董白達自開貨鋪本自貨多又發賣比窩私兌洋酒幫
會董古士那了爲亦係巨鋪常由火車運大宗比窩在昂售賣照
俄賣酒規章該兩家每年各應納費六百圓乃均只納稅九十圓

迫令華商加倍交納又據昂站專員稱此時封門實因俄節在邇與華商爭利等情已經照會霍總辦據理詰責請其速查啟封又另照會云海站并未劃界何以分界內界外該處華商所佔街基安知不在退地之列竟予封門尤乖情理各等語查北滿鐵路原係中俄合辦乃俄人挾其勢力肆行蠻橫我愈和平彼愈驕逞侵害主權至此已極若不切實詰責以後交涉益難辦理設或人民激憤致有暴動更屬難於收拾此時公司既罔顧公理霍爾瓦特又託病不見應請鈞部向俄使切實阻止令其速飭啟封俾各商均得安業諸望大力主持邊事幸甚

致農工商部

光緒三十四年十二月初十日

東清各處俄人設自治會本屬違背合同屢經阻止終未就範乃各處俄理事會董等勒令華商起賣貨票每家一二百圓至少三

十圓歲分三期交款限五日先交頭期否則實行封門如哈爾濱海拉爾呼倫貝爾昂昂溪等處均大畧相同華商雖受逼勒抗不交納俄人竟將倫哈海昂各處華鋪先後封閉各商情急如焚現屢與霍總辦磋商催令啟封尙無成議查哈埠對於俄人設會一事全賴各商力拒近來體察商情實心愛國者固不乏人懷疑誤會者亦所不免平日官與商之聯絡自不如商與商之自爲聯絡現值哈埠創設商會商情心之一振擬請大部電飭該商會隨時勸導各商共保主權勿懷疑貳縱有逼勒橫加仍當力籌應付該商會克盡商界之義務再輔以官權之所及其爲裨益實非淺鮮惟由貴部電飭商會時係出於大部體念哈商不必敘明由東省代達更較周洽卽請卓裁核辦示覆爲禱

致外務部

光緒三十四年十二月十二日

頃據施道等電稱職道等昨日下午往晤霍總辦達亦在坐當經詰以此次各站俄員多有非禮之舉動自治會事既允候商再定何得遽行勒捐封鋪實屬有礙邦交務將勒閉華鋪啟封安業仍照原議靜候俄使與我外部妥商辦法并述及憲諭現議自治會關繫國際卽有是閣商民擅自繳捐領票非由官府主持亦不得以爲承認之據蓋凡關乎國際之事商民本無允認之權此意亦應聲明彼此辯論至四小時之久霍一再誘飾繼乃允將各處被封華鋪准予啟封安業俄使與我外部未經商妥以前自治會暫不舉辦并承認哈埠封鋪一事雖一月前通知各商然未經知會關道洵有失禮之處職道等又詰以昂哈二處封鋪當時聞係自治會員眼同辦理霍云此因各商不遵領地合同不聽公司抽捐故飭巴釐司封禁至自治會員曾否眼同封鋪一節公司并未令

其與聞霍又謂往年各商均赴公司領票今年自應照舊以符原
訂合同并使地方經費有著職道等答以如今各商暫照舊數目
向公司繳費領票可呈請督撫憲暫行允准仍俟復議如欲援照
領地合同聽公司任意抽捐未便請示霍又堅持至再職道答以
俟北京商妥自治會事公司如何抽捐當另有辦法不必急切霍
允候至中正月底因卽罷議而散等語謹此電陳

致外務部

宣統元年正月十二日

哈昂海各站俄人勒捐封鋪一事前已迭次將棘手情形電達大
部請商俄使阻止在案旋接電文准薩使復電令路界華商照舊
營業等因當經電飭施道等查照辦理頃據施道等稟稱於臘月
十五日遵與霍達晤談告以薩使電文既稱俄外部未知此事並
已允飭啟封現在公司自必遵守靜候京議不必再以華正月底

爲限霍稱並未奉電且云恐薩使有誤會之處俟電詢後再覆等語嗣霍達來局面交照文內云薩使與俄外部商允寬緩征收至京議決後爲止等情本總辦現接本國來文以此事實屬不確仍以緩至華歷二月初一爲止各商號如不按期交款卽隨時封閉職道等復與再三磋商謂當此京議未決之時亦須有暫行遵守規條免致意外卽擬四條交霍第一條謂路界以內無論自治會或公共理事會等名目均不得干預華商種種利權損害種種利益第二條謂界內華人仍聽其暫赴公司換票按照往年數目交款第三條謂彼此靜候北京會議辦法於未經議結以前不得遽有強迫之舉動第四條謂施總辦于會辦聲明現准華人暫赴公司照舊領票但不得以爲交涉局承認公司有任意收捐之權利而霍提督亦聲明此次允許華商照舊年數目換票並不加納分

文交涉局亦不得以爲公司不得加捐之證據彼此均勿誤會霍謂第一條難以照允餘亦須酌俟回寓熟思再商迄今數日尙未得復遂於本月初九日復至公司會議霍達依均在座詢及議單霍頓改前說謂第一條可照辦餘俱翻變狡執不允職道等謂此係暫章力與剖辨霍謂暫章有害將來詰以第一條旣允照辦何以遠東報載有庶務會傳交房捐告示霍謂前以交涉合同關涉華民之事應商明交涉局該會未先商明可暫歸公司辦不合該會干預此予一人之私意也至自治會係出政府之意詢其能照此給一照會否霍謂捐歸公司照章抽收貴道台如能照會承認予亦照會聲明自治會決不干預職道等磋商再四霍總以爲鐵路抽捐係本道勝銀行合同第六條應有權利北京會議只能議自治會問題若鐵路抽捐係已得利權斷難再議予若允候京議

暫不舉動是我自棄其權利並稱鐵路名曰商辦實是國家資本且糜帑甚鉅華人均盡知之中國必欲違背合同自求進步事關國家權利俄政府勢難退讓談笑之中異常銳厲時已昏暮答以前議既無可行請將貴總辦之意亦開節畧俟下禮拜二再議而散查月杪中期轉駒卽屆此間會議別國領事又無力干預不稍退讓斷難轉圜若稍退讓南滿又接而要求關係甚大思維再四實非外間所能獨力爭持似應請由部早與開議或照應付日本辦法將要事歸京議其可外結者由職道等磋商且京中實行開議職道借以商令聽候或可免期滿又有封門情事各等語查上次部准薩使電覆明言曾與俄外部商允乃霍達竟不承認竊恐限期屆再有意外舉動應請鈞部一面迅電薩使轉商俄外部電飭俄公司霍達遵照靜候京議辦法勿准擅行封舖以免滋事

一面早與俄使熟商妥辦詳情容函達是否有當統乞鈞裁

致施道

宣統元年正月十三日

真文電均悉照會及函稿辯駁詳明措詞得當甚慰京議尙需時日務與霍切實磋商飭令先行啟封顧全兩國睦誼庶不失商民感情日後各事方可和衷共濟希以此告之

附施道電

十二日午後赴霍總辦寓所會議霍君語氣仍前銳厲雖多方詰勸伊終執定道勝銀行合同第六條謂所有舉動係已得權利內應有之事既不稍讓亦不肯緩伊之節畧因病未赴公事房未經繕出然大概辦法第一條華商捐款可由公可與交涉局辦理第二條可將各站本年一年應辦公益需費數目開出斟酌此項節畧三四日後交來職道等擬明晚

赴江十五晚回再向磋商

致施道

宣統元年正月十三日

文電悉霍總辦既執道勝銀行合同第六款爲憑證自應按照該款之宗旨辦理查該款祇准承購鐵路所必需之地不得多購餘地今既圈佔廣闊地段招租抽捐與該款意義大相違背既未依該款從事焉能指該款爲憑證仍應堅駁未便任其自由行事至於霍總辦所擬之節畧一經繕出早爲具報以便酌核爲盼

致外務部

宣統元年正月十六日

頃接江撫電稱霍達堅執緩行封舖二月初一爲止轉瞬屆期外部若及早開議尙可藉議延緩仍望電催外部速與俄使開議並請俄使電飭公司未經定議前不得再有妄動爲要至征收合同第六條法文以爲公司應有權利已得不能復棄爲言不知東清

鐵路乃係中俄合辦其合同第一條明載此鐵路曰中國東省鐵路公司該公司總辦由中國選派查察公司于中國委辦之事是否實力奉行是該公司本爲中俄合辦併須受中國委任豈有於征收捐款擅自主張不合中國過問之理現擬飭施于兩道此次旋哈將此節詳與辨明俾知合同具在權限分明不得偏執第六條任意爭辯再外部合同法文並無遇有爭論以法文爲準字樣更可及時解釋以杜要挾似應將此意電達外部以爲磋議之據等語鈞部開議在卽謹達察照是否祈鈞裁

致外務部

宣統元年正月二十一日

頃據施道于道電稟昨接霍總辦送到議單內開一華人參預鐵路界內大小居留處所庶務事宜因華官府與公司意見未洽致啟駁詰故此項問題未經議決以前凡關於庶務事宜所定章程

例須推及華民者應照向章仍由鐵路總辦核奪指示遵行二辦理庶務事宜所需款項應由公司秉公核計分別勻攤華俄及各國人民一律辦理不得稍涉偏倚三第一條所開限期以前應由公司按照建修鐵路合同所載經理權限及華人與公司所訂租地合同暨經商甘結向華人收取應納公費等因先是美領事云中國如允俄人要求恐將來各國援照此例紛紛要請自闢租界勢將不了等語其說不爲無見職道等復赴公司會議聲明三條全不能認且貴總辦前言有商量之意茲係一人主持尤與前言不符第二條各國一律辦理一語亦未便代各國承認反復辯駁霍云伊奉北京俄使訓條二月初一不交捐實行封門彼實無權在北京商以彼此仍候北京會議目下暫照去年數目交款領票彼先不允後允電北京請示以上情形請速電外部接洽等情

正書卷四十三
前來查公司議單宗旨祇須華民出資不准華民過問如何收法如何支用盡由公司獨攬其權實於中西公理大有不合且公司營業係商務性質凡庶務事宜類歸政治公司不應干預以免越俎其第二條各國一律辦理一語施道等聲明不認所辦尙是但彼此駁辯無濟於事二月初一爲期甚迫合將前情電聞務祈鈞部鼎力維持迅與磋商辦法見示爲荷

致外務部

宣統元年正月二十四日

今晨據施道于道來奉面稟情形當經指示一切旋於下午呈到交涉局電云接東清公司照稱本總辦業已按照會議時公司允可情形准各華舖將公益庶務經費緩至華二月朔繳納現在期限將滿除本公司將諭單分送各華商外相應連單照會等因外附華洋文諭單式一紙單內有捐費錢款應在公司交納或交與

經理地畝處派往各站之委員如屆期不繳卽由巴釐司飭令封閉等語復經飭令照復云前此面議情形俱經面稟欽帥欽帥以貴公司如此舉動非僅中國一方面之不利飭令仍向貴總辦詳商務請和平辦理正遵照轉達間頃接局電云云查二十日下午貴總辦已允將彼此仍候北京會議華商暫照舊數向公司交款領票各節電稟貴欽差請示乃此次來照又與貴總辦前言不同應請貴總辦始終和平靜候北京會議敝局一面飭令各華商速照舊數交款領票作爲暫時辦法將來北京議定以後如另有辦法自當遵照等語惟時促事迫斷非外間所能挽回敬希大部切向俄使磋商暫照舊數其餘統候京議不得有強迫之舉動再薩使前電俄外部語公司均不承認應請大部再電薩使向其外部切商並向俄京總公司切商統以暫照舊數聽候京議爲言以期

暫緩是否之處祇候鈞裁

致外務部

宣統元年正月二十六日

有電敬悉俄人勒限抽捐事已由施道等向霍提督磋商再四前途堅持幾成決裂限期已迫又將寔行封閉非特貽人口實失商人信用且他日任意勒捐後患甚大如蒙大部向俄使妥議辦法通融辦理彼必顧全大局冀可挽回萬一一面當飭施道等就近商議展緩日期未知俄員能否遷就仍乞大部始終維持是所至禱

致呼倫貝爾宋都護

宣統元年正月二十六日

敬電悉已據交涉局稟陳詳情當飭該局速向公司磋商暫照去年舊數交款領票餘候北京會議並電請外務部照此情形一面速商俄使一面電飭薩使與俄外部及總公司直接仍請執事就

近慰諭華商和平抵拒始終堅持是所至盼

復哈爾濱東清鐵路霍爾瓦特

宣統元年正月二十八日

昨接三二七號來電拜悉查各國公益款項問題如何收法如何支用須向捐資者妥商然後施行方昭公允此次收納公益款項由鐵路自行擅便於公理有所不允且勒定二月初一日不繳卽行封閉本大臣決不能承認前經照會聲明在案現在施于兩道台已旋哈明後日當可面會熟商務望一切格外通融了結以敦睦誼哈海昂等處本我疆土居住之外人究屬客籍主客之間理應遇事和衷共濟彼此方見利益想貴總辦亦以爲然也

附霍爾瓦特來電

昨准施于二道各在奉定稿由哈局繕發二千一百零三號公文大旨以本總辦於本月二十日面議時已允北京會議

未定以前暫緩收取公益款項二月初一後如各華商不繳捐款亦允不予封閉等因查本總辦於末次會議時不特未經面允上節且曾將此次所送諭單先行呈閱本總辦前與施于二道各一再磋商始允緩期五十日各情形業經照會貴督部堂在案其歷次會議本總辦所可允洽者亦經開具節畧照送吉江兩局此次施于二道各文意失實致使本總辦疑其於日後交道不願彼此誠意相存實心將事用特電達實情卽乞察照

致外務部

宣統元年二月初三日

據哈爾濱施道等豔電稱本日赴公司會議霍總辦託病不到惟達伊在座職道等當將憲台面諭與飭商情形以及電諭各節向伊磋商伊稱哈埠新章應攤捐數現在尙未算出可以暫緩其餘

小站亦可暫照舊數此外大中站必須立按新章交納職道等堅不承認辯駁再三達云伊係遵照訓條辦理未便通融時已日暮職道等仍請面見霍總辦再議達允將今日所議轉稟並訂會期惟謂卽晤霍總辦亦恐難肯俄京訓條云云除俟晤霍再商外職道等稟等情當經復以小站數日本無甚出入大中站關係甚大旣稱新章捐數尙未算出可以暫緩我正可趁此時先行調查該會每年衛生巡警馬路工程三者實用究需若干款並與商人通盤籌算再行核奪仍應由外部主持等語頃又據施道電稱滿洲里博克圖兩處已有封門之勢昂溪一埠俄巴釐司甚至有毀壞華商匾額情事如此無理舉動旣非商務公司所應爲卽世界和平公理亦所不容各國均不以爲然惟日領事並未齟齬蓋東清行之於前南滿卽可以之於後南北數千里橫亘直貫於中而任

正言卷四一三
一五
人有治理權三省尙可問乎是以年來於自治會一端竭力抵制
今俄展地殖民政策已行日亦設立拓殖會擬以三省爲殖民地
且於以後抽捐徵釐種種得步進步之計甚多此時若不出全力
抵禦視爲無關緊要後患何堪設想一切承大部指示稟承辦理
亦萬不致因此與俄人決裂果能堅持到底各國出而公議自有
轉圜辦法頃聞京師消息英美公使爲哈埠自治會事業經先後
往見俄使告以俄國近日在北滿各處舉動本國深爲注意欲與
俄使聲明本國雖不願與俄國爲難惟本國政府不能承認俄國
在滿洲各處商埠有地方自治之權及設會納捐等事若俄果欲
實行則本國政府亦未便置若罔聞云云英美如果有此議我若
聽俄自治各國皆將視我爲何如似可趁此時盡力堅持以待轉
圜此係權宜應付伏乞鈞部密探英美公使口氣是否確實並統

一辦法默運機宜電示祇遵

復施道 宣統元年二月初四日

江電悉復博滿昂溪等電均甚妥洽商家結團任封深明大義殊堪嘉許其私繳祇有數家不足重輕我政府尙未允准商人斷無承認之權希飭各局分別傳諭知之昨日晤霍會議情形速復

附施道來電

今日午後赴公司會議霍達依均在坐職道等詰以前奉欽帥面諭各節正在約期面達何以不候見面輒將昂博海滿各站一律封門且將昂商匾額毀壞各商門口均派俄兵持槍監守不准往外運貨舊街慶順棧各屋均封不准搬運行李只留廚房一間東夥無處棲宿海站因華商自行開門幾將劉委員看押以上種種強暴是否出自貴總辦命令霍稱

此事奉有政府暨廓使訓條屆期礙難再緩至各站俄員辦理之不善聞之實深抱歉語次一再認錯允卽派員會查匾額毀壞賠償苛禁蠲除施強暴者何人查明重辦伊先言派廓克沙羅夫職道等反對伊改派地畝處幫辦某俄員至商請開封伊詢辦法職道等告以暫照舊數俟新督帥到任再定否則不能禁阻各商搬出界外伊云捐可分期交納第一期登時但付三分之一答云不知總數若干如何付三分之一第一期款應俟新督帥到任議定後再付磋商再四時已日暮只好俟查辦回時再議該俄員於明晚會同江局委員前往並於今晚先派委員馳赴各站撫慰華商

致外務部

宣統元年二月初五日

昨發支電並轉施道等原電當蒙鑒察頃又連得周樸帥宋都護

施于兩道各處告急等電備述滿洲里博克圖海拉爾昂昂溪各站商民被封後棲宿失所種種困難情形並俄人限華商七日不交悉予驅逐不准住於鐵路界內施道等向霍詰責彼堅稱此事奉伊政府及廓使訓條礙難展緩雖派員會查巴釐司逞蠻情事仍是空語並未允開封現商民如此受困實難支撐七日限期瞬息若寔行驅逐眾情激烈恐釀事端伏乞大部速向俄使切寔理論告以鐵路係商務性質並無干涉地方治理之權設會勒捐非特我國未便承允卽英美各國亦不能公認查此會創立伊始彼此尙未議妥一切舉動已如此強橫他日行爲更何堪設想實於主權大有關係務請收回訓條迅飭該公司和平辦理以敦睦誼而洽公論不獨紓商民一時之困已也用再電陳無任迫切待命之至

致施道

宣統元年二月初七日

魚兩電均悉霍允各站啟封足徵堅持定力至慰彼照會各節惟有抱定我政府尙未允認宗旨俟彼將款項數目估定仍令先行知照彼此商定方可酌核辦理布告商民一切希相機辦理仍候外部主裁

附施道復電

昨日達聶爾由電話迭催會議告以督撫憲尙無覆示達稱今午十二鐘無回信仍須封門當經婉詞諷拒弁允稟催今日又由電話迭詢隨遣張守壽增前往詰勸達旋偕依親至吉局職道等詰以初六之議彼此商明電省候示弁未允准初八准有回信霍亦未言初八無回信仍須封門何以遽變前轍達稱霍允啟封實盼望初八可得回信此封係霍私啟

今日若無回信礙難久候有違政府訓條職道等磋磨至再
達稱祇能等候今日一日過此定再封門等語隨散除電飭
各站預備如再封門仍妥爲安撫各商靜候辦法各自和平
堅持勿暴動外謹電聞

致施道

宣統元年二月初八日

虞兩電均悉公司注重在款如各站估出數目不致漫無限制商
家力尙能勝可允暫時酌加來電稱作爲加收地租並作爲庶務
之需極是總之我須抱定不能承認俄人擅自設會勒捐宗旨以
保主權且免日後貽外人口實否則東清開其端南滿繼於後將
何以應之日下但能先與磋商加捐數目希察看各站情形並與
俄商所出數目是否一律分別細核若議及立會務宜慎重堅拒
總須日後各國無異言而於我主權毫無損失庶不背此次堅持

之意仍候隨時電商

致外務部

宣統元年二月初九日

庚電祇悉華鋪被封事擬協商公共辦法各舉董事以不失主權
爲轉圜地步佩慰查此案相持已久彼此各執一是終難結局如
能趁此機會妥商了結甚妙幸俄使亦有此議諒可協商就緒但
與磋商一切誠如鈞部所云總以保護主權爲最要關鍵必須事
事隄防以禦後患且三省沿路均開商埠須各國均無異言認我
爲地主是最要緊機括英美各國甚持公論查東清南滿兩路幹
綫綿長商埠頗多哈爾濱等處一經商定尤慮日人於南滿路援
案要求是以與俄磋商不得不格外慎重查此案枝節均由合同
第六款講解不明所致然合同內亦曾註明係指鐵路必需之地
而言該公司隨意圈佔鐵路餘地實與合同宗旨有背現在旣議

公共辦法應按照合同凡鐵路必需之地允由公司一手經理但不准轉租於他人其餘地段應作爲公共租界界內華洋董事應分別納捐人數公舉界內之事由董事公同管理但凡界內稅契仍由中國地方官主持並須遵章輸納一切賦稅以示共視中國爲地主之意如此庶冀不失主權然此係專指按約所開口岸地方而言他站不得援以爲例仍應區別辦理以示限制是否尙祈鈞部蓋籌現已電飭施道令速入京

致霍爾瓦特

宣統元年二月初十日

庚四三三號電已悉昂博海滿交款事既允協商辦結自應彼此遵守靜候妥議豈可於未妥議以前竟爲此事而失友誼乎況我兩國向稱輯睦有如貴國於東省經營鐵路租用遼東地段爾時我政府以友誼之故竟予允諾實深信貴國於事後必能持平辦

理以維邦交也今忽爲鐵路題目發起昂博海滿枝節貴總辦不肯遷就勒令初八交款否則封鋪使本大臣與華籍士商大失所望如堅持力行不但本大臣難於承認且於兩國交誼不無損傷況施于兩道台旣與貴總辦熟商辦法早晚必能妥議葢事儻中途決裂轉使了結難期豈不深可惜乎還祈貴總辦與施于兩道台和衷共濟總期協商妥結俾大局享受裨益想貴總辦亦必以爲然也

退耕堂政書卷四十三

退耕堂政書卷四十四目錄

電文二

哈爾濱自治會案

小正堂

退耕堂政書卷四十四

天津徐世昌

電文二 哈爾濱自治會案

致外務部

宣統元年二月十一日

各站初八已啟封初九又被封閉實屬不成事體頃據施道等電稱霍總辦出廓使親筆簽字公文有中國二月初一日不交款應卽封門一條足見廓使前稱公司係奉政府命令不便阻止全係推諉之辭務乞鈞部向俄使詰責請其收回訓條一律先行啟封聽候京議是所切禱施道約兩禮拜到京當添派江省交涉局于道同行以便接洽一切

致外務部

宣統元年二月十七日

寒電諒蒙鑒察頃施道到奉稱十四日瀕行時接公司霍總辦照

會云哈埠界內收捐章程已經釐定日內卽當宣布並限於俄三月初十日以前繳付倘商民居期不將應繳納捐款繳付本公司惟有飭將各項商舖封閉各商有爲貴道臺諭禁繳捐者必處爲難境界現值貴道臺赴奉本總辦又聞商民願納捐費做處深信貴道臺到省時必爲稟懇總督部堂准令商民繳納所定捐費以免受此虧損且將來本總辦亦可免出有違意願之舉動等語當飭施道復以華商赴會繳捐本部堂萬難承認况外部業與廓使定期開議在卽貴總辦非特不將各站啟封又欲在哈埠有此舉動實非和好辦法云云查此事施道磋商再四彼竟堅持無可理喻非大部迅速切實力爭恐哈埠實行封閉更難轉圜施道等准廿一到京已飭將地方詳情據實面陳至應如何對付廓使及會議方法事關主權非施道權力所能挽回仍請鈞部大力主持大

局幸甚

致陳中丞

宣統元年二月十七日

江省博滿海各站商家被封已久該商等深明大義殊堪嘉尙現會議尙未定局商民無以爲生如到局求賑未便漠視當飭施道等在關款內提銀壹萬兩留作各站商民養贍之資隨後據實報銷特此佈聞

致劉守鏡人

宣統元年二月十八日

茲擬復霍總辦來照希面告如下昨接准第四百二十九號照會內開東清公司斷無損害中國主權之意本督部堂聞之不勝欣慰深盼日後一切辦事切實按照此意而行庶免誤會再來照稱屢次會議時本總辦曾一再商請施于兩道酌議交款數目並收款辦法而施于兩道以未奉全權始終辭絕等語而施于二道稟

內則云款項數目貴總辦曾言送閱始終迄未送到且該道等上年臘月議論收款辦法之不公允貴總辦曾復以不公允之款項可以刪去該道等甚謂公司極有和衷協商之意不意開年以來貴總辦忽云本年數目已定無從更改是以該道等辦理此事更形棘手即昂站暫時酌加地租一層該道等因准貴總辦所請言明全站本年總數不過盧布七百五十元特請示前來可否暫行不意甫去覆電又據該道等稟稱先日會議昂站全年之數又增加三倍之多由此看來並非該道等不願和衷協商實因貴公司宗旨不時改變礙難措手總之事關重要本督部堂屢次飭知施于二道辦事應以誠信相孚願全睦誼好在此刻施于二道奉部調入都開議在卽解決各種問題想亦不遠應請貴公司速將各封閉華鋪先行啟封靜候會議至他站當不致再有舉動是所厚

望此復如霍索此電可抄送一分並希錄稿送吉局存案晤霍如何口氣仍盼詳覆

致外務部

宣統元年二月二十四日

施于二道到京奉上詳函諒蒙鑒察滿海兩站迄未啟封前據施于道向霍磋商霍稱係遵公司命令並非自治會主意今據劉守來電又稱霍答以會董主持伊無權啟封等語查霍答詞前後不符究竟是何用意本日又據劉守電稱接昂電知富拉爾基又有封鋪之事趕赴車站詰霍匆匆數語車已開行遂與依代辦磋商依稱博站亦未飭知仍發電至前站請霍示得霍復電始將博富兩站次第啟封惟依仍執定現啟封及未封各站統以俄三月十號爲限而霍實已允將哈埠原定限期到京懇廓展緩與依語不接洽今霍達到京務請鈞部轉請俄使詰霍俾無遁詞昨據施道

稟稱大部之意以公共爲宗旨由我領袖具徵定議務求達此目的而後已且必須先令一律啟封除去十號之限然後開議是所切禱

致外務部

宣統元年二月二十六日

霍達到京度開議在卽甚爲懸系頃傳聞公司新定數目先令華商照繳暫交華官存儲一面由霍卽電啟封此說是否確實未敢懸揣而鄙意以爲堅持到此地步商民尙能深明大義彼一日不啟封我一日不開議曲在彼而不在我若令華商照繳非特無以對商民且何以對各國萬一華商抗拒我詎能再用壓力是徒示外人以弱將來俄人着着爭先更難措置我願安撫商民決不願遷就以希冀啟封也愚昧之見是否有當伏乞鈞部堅持到底以保主權而孚眾望無任禱切

致外務部

宣統元年二月二十七日

頃發急電務請從緩互換照會一層定蒙俯允鈞示華鋪捐款飭照現在所收數目由中國地方官經收暫存自是轉圜辦法然昌愚昧謬見礙難承認請爲鈞部痛陳之查俄人在哈海昂各站種種舉動令人髮指勒捐華商並不先與我說妥其曲一封閉各站甚至打毀牌匾羈留委員其曲二經昌屢次飭施于二道苦口磋商不憚再四旣已啟閉旋又被封今各站尙未啟封而哈濱又將勒限其曲三且霍達與廓使互相推諉忽稱公司命令忽稱會董主持忽稱政府訓條忽稱戶部籌議從不向我商及動輒逞其強橫無理之尤蔑我太甚而華商尙能深明大義蓄忿雖深未敢暴動計封閉以至今日雪地冰天缺食露宿行將一月矣此等困苦情形已屢次電陳在案所爲何事爲捐款耳若早繳款業已解決

何至被封又何至今日提議今鈞部若承認繳款適墮俄人狡謀
非特無以服商民之心且激商民之憤繳捐款事小失主權事大
且商民不察反疑其以俄人之勢力猶爲未足而假官力以壓之
則萬萬不可况商人久停貿易損傷實多我方欲向俄人索賠償
彼卽不允我則有詞曷念及小民生計維艱業已籌款萬金爲撫
恤之費尙恐不濟詎可再勒令繳款乎無論何人一再加款卽如
前定昂站全年七百盧布後忽指爲每年三分之一商民萬難如
數籌繳卽商民力所能及亦詎可於未曾議結以前勒令遵繳抑
華民之義憤而張俄人之勢焰乎况彼未開議先向我政府要求
令照公司清冊將某舖某人所繳捐款逐一註明交還公司雖由
華官經收暫存仍與交公司無異以彼一公司而要挾我政府如
此殊堪憤恨恐各國聞之亦必目我爲首尾兩端官力尙不敵民

氣日後事事接例處處要求挾官以凌民後患尚可問耶務懇鈞部始終堅持決不致因此細故有損邦交且我正可以商情激烈爲言政府未便強迫俟日後章程議妥視商民能力所任自當電令遵繳事關大局不敢緘默幸恕慙直伏候卓裁

附外務部復電

兩宥電均悉本部宥電計達必啟封方可開議自是一定宗旨惟施道等前擬暫行條規四條已允換票交捐只爭數目俄使現執此說必認捐始啟封爭到盡頭始議中國地方官經收以便啟封提議並聲明不得藉口爲例似較原議爲善不得謂遷就示弱現本部正與施于兩道就尊處歷次節略所開之意擬定大綱條目以備商議尊處如有卓見仍希先期電知爲盼

復外務部

宣統元年二月二十九日

沁勘兩電敬悉商民受困誠如鈞諭今已互換照會恐亦未便作
 廢惟繳捐送冊昌於未經議結以前實無面目對商民下此命令
 且返之我心良有不忍如能早日開議妥定會章日後亦當量力
 商之從實核減且須與洋商一律方可飭令遵繳前施道等與約
 四條一只能作為扣收地租一作為暫時辦法一須查明華俄是
 否公允一各站數目必須量華商之力原係未曾開議以前辦法
 今已移京提議此四條早經作廢况當時彼未承認以至迄未啟
 封復何得援此為例倘今日彼以我未先繳捐款為詞是彼仍爭
 權限又爭數目收捐出之彼意並非出之我意我之主權不能謂
 不失好在照會聲明不得藉口為例彼詎能因此停議請將昌屢
 次函電節畧層層與之辯駁彼前次既互相推諉鈞部雖已換照

仍可諉以昌未承認爲言爭到盡頭各國亦必有公論也切實辦法已詳前函並擬有公益會大綱五條上供採擇還求大力轉圜以孚眾望大局幸甚

附外務部來電

兩沁電均悉俄人在海博昂等站勒捐封鋪強橫無理已甚爭至逾年之久不特未能解釋且日益加厲以至商民失所一月以來雪地冰天缺食露宿爲民上者坐視其困苦情形束手無策能勿盡然本部亟圖挽回是以電請尊處派施于兩道來京諮詢商辦施道等前擬四條允照舊換票由公司收捐其權仍在俄人本部以爲商民捐款辦地方公益中外皆同此例惟公司無收捐之權我所爭者不在數目而在權限俄使借霍達來議時欲將捐項暫存道勝銀行經我駁復

始允定由中國地方官收存將來或交何處或多或少俟議竣後再定仍聲明不得藉口爲例中國官自向商民收捐辦地方公益自非有失主權此事斟酌再三若不就此轉圜則啟封無期商民酷困更無從與之提議現聞彼已啟封事權稍鬆正可從容磋商至來電所論俄人舉動其曲有三亦可於啟封後與之理論商民如以數爲多現係暫存並未作准將來尙可核減現雖已互換照會然操縱在我如尊處必不以爲然祇可將前議作廢事關大局不厭推求執事思慮周詳尙希籌定切實辦法速電復

致施道

宣統元年二月二十九日

兩感電均悉我發宥沁長電想都接洽外部不商於我遽與換照並令繳捐送册我甚不謂然昨外部電稱施道等前擬暫行條規

四條已允換票繳捐祇爭數目爲詞此四條惟其不承認所以迄未啟封何曾換票何曾繳捐詎能援以爲例頃又得外部勘電當經復以商民受困已極還求大力轉圜劉守已復以我不承認先繳捐款令商民靜候命令尙未知日內各站是否啟封如俄人要求太甚可告以外部雖換照而本督實未承認尙須妥議日後祇好相機應付亦未能預定辦法惟設會名目似以公共字樣爲妥自治治理等名斷不可用

附施道復電

昨奉沁電當赴部謁見梁尙書是時帥座兩電均已到部伊云照會已換奈何奈何職道又見鄒堂請伊設法並切陳東省辦理此事始末之苦心今早職道等又赴梁堂私宅伊云帥電部已去復等語職道等告以照新數繳捐商民未必肯

從伊云俄使曾言全年捐款分三期納並現交華官似可保
全主權去年臘月廿八職道等所擬暫行辦法四條雖係按
照前年舊數惟係交付公司收款云云職道等告以臘月暫
行辦法未經互換實無效力伊又云款係由我收存我處將
來或多或少再聽會議商家若實在無力我想一通融辦法
等語送出門時伊云其私見若斯俟東省覆到再行商量辦
理

致劉守

宣統元年閏二月初二日

鑒電悉各站已於廿七日啟封而彼欲我先繳捐款清冊一層本
督體卹商艱已電陳外部辯駁現外部與俄使開議在卽希協同
商會曉諭各站華商此捐爲辦地方公益並非交與俄人務從速
酌核各商家照俄現在所定數目究須核減若干方能公允希分

別詳核速電

覆外務部

宣統元年閏二月初二日

東電敬悉駁復俄使照會理直氣壯挽回主權不少良深敬佩俄使復照所指二條一因華官此次承辦款項欲憑此冊爲實行之據而我前予照會已聲明不得藉此爲例我現在祇能飭交涉局協同商會曉諭商民量力輸捐目前尙未議結並未能作爲實行經收之據二因該清冊交還公司以資勸諭俄商比照勻攤而公可於俄商一面足見尙未議定捐數先欲向華商勒繳殊欠公允可請將俄商繳捐清冊先送交涉局閱看以便我再勸諭華商想俄使辦事公正亦斷不能偏袒俄商而苛待華民也除飭交涉局協同各商會曉諭商民酌核認定捐數再行呈報外特此先復

附來電

豔電悉執事於繳捐一事以保主權體恤商民爲重與本部用意相同惟辦法宗旨彼此或未盡合事關交涉必須內外一心期於有濟特再電商尙希詳察查鐵路勒捐一事實由從前地方官坐失權利有以致之一誤於任聽鐵路購地太廣再誤於讓人倡收捐辦理地方公益之議至不出於我而出於彼本國商民無異寄人籬下迨封鋪勒捐日肆逼迫雖迭經筆舌與爭迄無效力幸而各國不認公司有收捐之權謂各埠係中國地方與中國各有條約應得利益助我與爭然所爭者亦係地方權限並非捐數多寡地方公益如巡警衛生工程一切皆應辦之事我不辦而彼先辦已落後着辦事必須捐款是錯不在收捐而在公司勒收若僅與爭數目而不與爭權限則是視我商民如僑居彼境者然斤斤於此

恐所得者少而所失者多矣前日與俄使會議之前施道將所擬四條呈部謂來京曾與俄使面議俄使到部亦先提數目並非早經作廢可知現在鐵路界內早歸公司管業俄人勢力久張又居多數我欲有自治全權良非易言惟議立公共章程就人數或捐數與各國商人公舉議員而華官爲之長如能辦到則主權有屬尙可藉圖補救然不先籌應付卽磋商亦無從措手是以互換照會改由中國地方官經收捐款旣係暫存不妨陸續交納中國自行攬回不由公司收捐是權不在彼而在我章程定後捐數多少應華洋一律歸諸公議自能平允來電謂彼旣互相推諉部雖換照仍可諉之尊處未認等語俄人推諉我方加以詰責各國亦不直之我若效尤彼卽反唇相稽無辭以難俄使讓我收捐我反推拒

政府諉之疆吏疆吏諉之商民不惟放棄主權貽譏鄰國且鐵路公司更得肆其強橫舉動苛虐商民於大局亦復何補恐各國將笑我之非計而惟俄言之是聽公論亦未可恃也本部並無成見但恐有所隔閡不得不詳晰言之執事深維至計洞燭事機願勿予俄人以口實致難結束至公益會辦法仍當參酌尊處函電節畧切實與商仍盼電覆

致外務部

宣統元年閏二月初三日

昨復申冬電諒蒙鑒察嗣奉盛東電並冬電敬悉俄政府允將霍開去領事兼差以示和衷之據足徵鈞部一言九鼎俄自轉圜可勝欽仰昌前電言詞激切定荷曲原來電云云似與此中原委尙不免稍有隔閡請畢其說鐵路購地勒捐誠如鈞示一誤再誤此皆從前地方官以不與洋人辦事爲高放棄權利而彼時尙有督

辦大臣在也往事無可復說全賴鈞部此次提議力矯昔之所爲冀可挽回萬一方霍達第一日到部尙非開議之期各站無不引領以待各國亦正屬耳於垣况昌經年抗議切望更不待言而俄人竟以現定捐數令代爲經理飭商民遵繳並須逐一註冊送還公司鈞部或不暇商之於昌施于二道奉調到京似應下採芻蕘未可慨然遽許如鈞部駁復俄使照會振振有詞甚佩卓識何以未駁復以前先飭昌轉諭商民繳捐送册萬一商民拒抗詎能繩之以法况各國咸不認俄公司有收捐之權助我與爭我更未便允俄公司有代收捐之據助彼之勒明知我爲代收權操之我而數爲彼定權仍操之彼彼定捐數商民不繳一再被封我尙不能爲商民乞減我允代收彼定捐數若商民仍不繳我惟有步其後塵封閉各舖方可以制商民方可以謝俄人恐紓商民一時之困

轉貽他日無窮之累也。施道去臘所擬四條係未定議以前權宜之應付。彼時俄不承認，便與作廢無異。故昌屢次函電迄未提及。另擬五款以供採擇。乃照會已換無可奈何。昌願受不韙之名，欲藉一人之推諉，留鈞部轉圜地步。至稱俄人推諉我方加以詰責，不應效尤。不知俄人勾通一氣，全是遁詞。如謂昌並未承認，自是實情。若稱彼讓我收捐，我反推拒政府諉之疆吏，疆吏諉之商民，不惟放棄主權貽譏鄰國，且鐵路公司更得肆其強橫苛虐等語。昌經理此事已久，或商或拒，此中情形亦稍有閱歷。俄人手段到此已窮，更有舉動將犯眾怒。彼若甘心肯讓，既允由我收捐，何不並允由我定數？若仍照現議，恐各國將笑以俄人強迫政府。政府強迫疆吏，疆吏強迫商民，我將何辭以自解？雖疆吏不敢不承政府之命令，而當立憲時代，商會未必盡遵疆吏之命令。况鈞部詎

肯受俄人之強迫乎承示內外一心昌始終仰賴大部主持事事預爲詳報請求指示以期內外接洽而大部亦當諒疆吏之爲難暨遇事不敢敷衍塞責初無他也且非僅爲一時之各站計實有關乎東省之全局與各省之大局者存也今日一俄誠不易與如他日十俄何現各站啟封領事更置雖爭先著仍不足恃昌詎不知現已下令飭商會核實認捐惟俄商尙未預定華商萬無先納之理伏求鈞部爭到盡頭未必於事無濟庶足以慰商民之心而杜各國之口目下開議已定期否大力轉圜在此一舉屢貢愚直幸鑒區區

致施道

宣統元年閏二月初五日

江講電均悉外部駁復俄使第二次照會義正詞嚴極合我宗旨方不負經年抗議之苦心爲之一快贖路一事居然提議廓既有

不得將俄人驅逐及俄人經營事業盡行停辦之言足見彼政府並非無意正可告以我終久必欲達此目的現擬公議會章程不過暫時辦法務必留我地步保全主權庶免貽他國口實俄復我照會如何語氣盼電告

附施道來兩電

爲交還捐冊一事俄使復部仍請飭交涉局照辦今日正將該照復全文譯碼接奉冬電知部已電達憲台矣今日赴部又得部爲捐冊事第二次照復俄使之文內開本部查東清鐵路在中國境內勒收華民捐款中國政府以主權所關不能允認現經貴大臣與本部商定暫由中國地方官收取華民捐款以便將設立公共理事會辦法和平提議是從前所爭執者已略有端倪若皆能虛衷商訂自不難從容解決此

時辦法未定捐款或多或寡又言明不得爲例則註冊交查一節實非所宜緣本部既允地方官收捐即可爲實行承辦之據自不必再尋憑證理事會辦法一定華俄商民自應公議比照攤捐亦必預爲均勻中國地方官收捐係認辦地方公益所需由商民捐款並非爲公司收捐若轉將捐冊註明交還該公司是不啻中國地方官爲鐵路公司承辦捐項與該公司自行收捐無異本部固不能照允也至派捕向華商索取捐證是跡涉強迫與勒封同一行徑公司既無收捐之權卽無索取捐證之權貴大臣以和平了事爲宗旨當能體諒不任公司再生枝節也

本日俄使偕霍達到部梁聯鄒三堂飭職道等同見先譚贖路一事廓云尙未奉有俄政府訓條准予開議此事霍云須

請日本一同會議梁云無須會同日本廓商贖路辦法梁云
俟我政府商允再議然後再開辦法廓云伊可請俄政府速
覆惟事關重要或須由俄內閣合開會議決定恐復電不能
甚速並請部預爲允許如中國將路贖回不得同時將俄人
全行驅逐或請將俄人經營之事業盡行停辦至自治會事
我云每百人公舉一人立一議事會中國地方官爲會長至
公司之權限亦可按其人數舉人入會廓霍聞之均反對我
云亦可按捐數舉人入會公司派一人爲幫會長霍仍力爭
謂公司須與地方官平權彼此相持良久各不相讓後俄使
調停請部將辦法開一節畧送去伊亦開一節畧答復下禮
拜一再來部會議親自帶來部許之

致施道

宣統元年閏二月初六日

歌電悉外部駁復俄使第二次照會去後已否得覆我於未曾議結以前不能問各商收捐其故有三一該公司未將捐冊送局無從知其擬收數目二前向公司索閱之各站公益收捐如何用法如何勻攤各項捐冊未據送到三因俄商捐冊應先送交涉局查核希稟商外部如俄使允此三事照辦我方核定捐數是否公允酌量飭繳

附施道來電

初四日霍達來拜詢及公司業飭啟門何以華官未向各商收捐答以公司未將捐冊送局無從知其擬收數目又前向公司所索閱之各站辦法公益收捐如何用法各項表冊亦迄未據送到且捐冊送還公司一節貴總辦前此與梁尙書並未議及乃廓使照會忽添此語未免自生枝節以上皆未

能遽行收捐之原因咎不在華官也彼此辯駁良久職道等告以華商收捐原冊須留交涉局存案即使送交公司亦祇能另鈔一份霍堅不允又商以公司如欲交涉局將華商捐冊送還公司公司亦應將俄商捐冊送交涉局備查霍允照辦並允將各站抽捐辦法公益詳細用款表冊卽行送局職道等又約以貴總辦旣可見允當電欽帥請示云云霍遂遂去將來該公司如必須將捐冊送還可否卽飭將俄商捐冊亦送交涉局一份俟彼於何時送來我再於何時交去作爲彼此互換藉以抵制之處伏候鈞裁如可照行職道等再當稟商外部也

致劉守

宣統元年閏二月初六日

前電飭協同商會令商民自認捐數有無眉目俄冊雖未送局然

告商民新定捐數究較舊時捐數加多若干商民能認繳若干希將三種數目速爲詳細查明分晰電告目下各站如何情形商會如何籌議並盼速復

附劉守復電

連奉冬魚電敬悉各站商民於俄人新舊捐數未能分晰清楚前據各分局呈報亦係展轉查詢未足爲據仍須有俄定確數方可集詢眾商量力核計連日探問公司中人知細數清單尙未齊備日內可以定出俟得到此項清單當卽協同商會分別詳數電陳憲奪謹先稟聞

致

施道 宣統元年閏二月初八日

初三會議節畧閱悉梁尙書辯詞正當至爲慰佩廓稱俄人實肯退讓和衷解決此事仍係表面說話其內容無非俄人欲掌全權

不但喧賓奪主其用意甚爲叵測現雖許華官合辦他日勢必至
華官不配過問而後已查公司爲商務性質斷無干涉地方之權
今辦地方公益事由公舉代表籌議最爲公允華官爲之長萬國
公認我今允該公司爲副卽是予公司特別利益之確據萬不能
再有讓步彼卽請中國派督辦大臣未嘗不可無論贖路遲早我
如有督辦大臣駐紮自可範圍俄人之權限且可熟察鐵路之利
弊未知部意如何希稟商梁尙書熟籌之今日會議情形盼電告
大概

致施道

宣統元年閏二月初九日

齊電悉俄復二次照會仍復固執惟有堅不承認昨接劉守電稱
各站商民於俄人新舊捐數未能分晰清楚探問公司中人亦云
細數清單尙未齊備等語足見俄人尙未定出確數而先向外部

要求電飭地方官收捐尤爲不合宜稟商外部嚴詞拒絕告以公益款項捐數可飭商會代表籌擬先將清冊呈部核定方可作准至俄人現定數目究交於何人之手本部無從查閱更不能承認矣外部添派曾司員與該道等先與俄開議較有轉圜地步極好

附施道來電

魚庚電均敬悉廓使第二次照會外部文如下查貴部詳論此事益於該公司所應徵之總原因未能注意而該公司必須按照各該清冊傳令俄商交納款項使彼不得以華商藉口不自出捐又查按照通行章程應將納捐之人暨辦地方公益捐項之數宣布周知此次若行改變特恐人心疑惑不免議論紛紛相應照會貴部電飭中國各該地方官捐訖各款後或將原冊逐一註明或轉飭各交涉局繕具花名清冊

註明納捐之各華商將該冊或交鐵路公司或交理事會查
收爲要等語至公共議事會章程十條梁尙書現已核定大
致與前擬同惟諭飭職道等先行與議俟議有頭緒再由部
核奪今日職道等赴部面請添派人員已派定丞參上行走
曾司員述榮會議矣

致外務部

宣統元年閏二月初十日

佳電。敬悉俄使初六初八等日照稱各節本在意料之中前日據
交涉局劉守稟稱各站商民於俄人新舊捐數未能分晰清楚探
問公司中人知細數清單尙未齊備云云查俄人尙未定出確數
先向我政府要求電飭地方官收捐尤爲不合其清冊究於何日
交何人之手我並未知何從索閱更何從承認今尙無暇與辯鄙
見擬正當之應付可直告以該公司係商務性質須切實解決從

前合同第六條祇有經理鐵道字樣至一切行政權與彼無干當中國開放哈爾濱爲商埠之時各國均得享受利益早已宣佈彼時我政府並無異言何以今日專擅若此如俄人今日辦法直欲我政府將哈爾濱各埠全行割與一切由其治理一埠如此他埠可知綜計沿鐵道之埠站數十處無論中國萬無拱手相讓之理卽各國亦詎有安心承認之理當未曾開議以前所以畧示通融者冀免商民受困原待今日決議今已到此地步無論彼如何強蠻卽將華人盡行驅逐而地終爲我有封閉尤屬小事耳如俄竟不與我開議彼卽顯然居強占之名而我並未有承認之實據亦當爲各國所共諒地球上之小國多矣倘弱者盡爲強食何能至今存立况爲四萬萬人之大國耶若彼肯轉圜我卽照上次會議所有地方公益事按照人數或捐數選舉代表籌議而華官爲之

長最爲公允凡有捐數須由商會主持呈我政府及東督核定方可作准至許俄人爲副理已算給以特別之利益彼更有何說可以斥我之不是彼卽不允而各國認我之主權自若我尙可用之相持彼亦不能自辦也昌殫慮竭思冀欲保全東省之地且免將來各國無窮之口實施道等與之磋商會章未必力能抗拒還求鈞部主持孰籌爲禱

致施道

宣統元年閏二月十一日

蒸電悉昨發外部蒸電想已接洽我宗旨已定現旣到此地步任憑再封或停議仍非堅持不可俄人於封閉停議之後必自轉圜卽顯然占據各國必咸斥其非俄亦不能擅自辦理何畏之有以後益宜力與之抗萬勿氣餒天下事置之危地而後存是之謂也再前電呈俄營運運大批軍火從前如何特別辦法及此次稅務

處如何核示是否驗收希詳告

致施道

宣統元年閏二月十二日

初十函並節畧二件及致參贊真電均悉俄第二次照會囑我照冊收捐我非不允而劉守電稱清冊尙未齊備我實無從下手當復以務請彼速將華俄商民捐冊及各站辦法公益詳細用款表冊一併先送部核議是爲開章第一義所擬會章十條甚妥初八既送去彼卽不能全認亦當有以復我看磋商何等地步方可轉圜前歌電互換抵制辦法亦可照行但亦係開議之發端仍非結局今我誠心與之商議並未曾將前次俄人虐待華商情形稍加責備原冀留霍達在京及早和衷解決今彼若不與我議驟欲回哈我苦無法挽留倘彼到哈復行強蠻封閉手段將來難免起華商公憤犯各國眾怒咎在彼而不在我我爲地主被俄人如此虐

待自不能不撫恤華民他日華民遷徙一空於彼有何益處彼欲擅自立會詎能有成我卽欲偏袒俄人如各國反對何我不能不爲華民着想更不能不爲各國多數人着想固欲保全中國之主權未始非保全俄人之名譽我之虛衷我之讓步已到極處而尙不滿俄人之意我更有何法可以遷就耶我始終不願與俄人起釁我惟有力求保護華商將來此事之原委及辦法之辯論各國知之宣布全球是非曲直具有公論我國雖弱人能諒之近來日俄兩國對待中國政策漸變方針我詎不知一波未平一波又起得寸思尺甯有已時非慎之於始終難爲繼耳希婉達外部熟籌之

致周中丞

宣統元年閏二月十三日

文電具悉俄金商申辯稟件逐款駁斥甚紉卓識至江東六十四

屯當時爲互換碼頭轆轤尙未解決自應據理力爭以爲抵制之一助正與鄙見相同惟去臘俄使致聯侍郎節畧七條係施道抄件外部尙未宣布恐不能作准現外部正在提議公共理事會一條遽允換照代收捐款弟爭到盡頭尙無端倪難免廓使停議聞霍達卽欲回哈復行強蠻封閉手段我惟有撫恤商民始終不承認俄人設會收捐一事以保主權其餘六條一時更議不到此收回屯事容日後議有眉目再詳請外部併案提議日來與外部往復電文已飭徐道抄錄寄呈卓核

致劉守

宣統元年閏二月十五日

文電悉滿昂海博分等捐數單及哈埠華商細數捐冊旣經送到希飭各商核實量力認定捐數先詳電告知再行分期飭繳又據施于二道稟稱已商該公司如欲交涉局將華商捐冊註數送還

公司公司亦應將俄商捐冊送交涉局備查霍允照辦俟彼於何時送來我再於何時交去作爲彼此互換等語又聞霍達等已定十七晚車回哈

致外務部

宣統元年閏二月十六日

頃據施于二道電稟霍達擬日內回哈然據劉守電稟華商捐冊甫於前日交局日內即可譯寄審核細數况彼已允將俄人捐冊一併送核自應俟華俄捐冊一齊送到彼此商定如果公允我卽發令飭華商遵繳似仍與鈞部初議未曾違背今霍達驟然欲行顯係彼不與我和衷商議咎不在我此意務請鈞部聲明在先昌之愚見彼以公司商務性質而欲干預我東省行政權允一埠卽無以挽回各埠允俄國卽無以對待各國他日轉轄恐將十倍今日今霍達回哈難免更行強橫舉動我無實力抗拒或俄人不直

於各國轉圜亦在意中鄙見目下惟有堅持仍須酌定適中辦法
免受萬國責備未知鈞意如何及應否詢問霍達不應遽去之處
伏候卓裁

致于道

宣統元年閏二月十六日

刪電及致參贊電均悉霍達欲回哈我實無法挽回如欲挽留非
改我宗旨就彼範圍不可如何能允彼回哈如復行強橫手段只
好聽其所爲惟有私自安撫商民暫令遷徙隱爲限制以觀後效
刻已電部措詞過激日後當能相諒否則萬國責備如更逆耳何
此事關係太大萬難遷就亦正留外部日後地步也

致外務部

宣統元年閏二月十七日

前奉鈞電屢催交涉局稟報俄定捐數頃據劉守銑電稟稱頃甫
接公司照會云前奉霍電按照廓使與外務部彼此商定凡鐵路

界內華商鋪應由哈交涉局飭照公司捐冊收款暫存局中其公
司捐冊註明某鋪捐數若干仍交公司收回等因爲此照送捐冊
並列總單數後本年第一期三分之一江北站二百四十一盧零
孟圖及小嶺大嶺等站一百三十四盧滿站二百五十四盧零海
站一百六十八盧零博站五百零五盧零富站八十八盧去年第
三期滿站四百七十五盧零海站五百十八盧零博站四十五盧
零共二千四百三十一盧零請分飭照單收款見覆等語現擬遵
照憲諭將霍允華俄商註數捐冊彼此同時互換一節備文照復
如何情形當隨時電稟再吉局同時接公司照同前因其總單內
開本年第一期三分之一香房一帶二百十七盧零密門老少溝
寬城子六百二十八盧零細鱗河二十九盧海林一百七十九盧
零五站二百五十一盧零石頭城一面坡一帶一百五十七盧零

橫道河子一百十六盧傳家甸左近一帶一百六十盧共一千七百二十八盧零哈爾濱全年四萬餘盧云云應俟兩局分別查譯清楚會同遵諭辦理合併附陳等語查俄定華商捐冊近日始送到而俄商捐冊迄未交來尙無從比較昌一面令各站商民公舉每站二三名速到哈集議並與哈埠商會參酌情形量力認繳在我辦法惟有從此入手庶商民尙可安心伏望鈞部先與廓使定期續議今既有華商捐數我詎有不擔任之理况先聲明此數並非作准彼似不能藉口以我不承辦爲辭至捐數是否公允還乞鈞部面諭施于二道細加審定總之會由公立捐由公議鈞部力爭華爲正俄爲副方可無礙主權現在尙未決議只好俟磋商到何等地步再相機辯駁昌於俄使語氣及各國公使意見無從懸揣全賴鈞部大力主持至爲禱幸

致施道

宣統元年閏二月十九日

巧電悉議准各條均甚妥協閱之甚慰三五兩條雖稍吃虧幸有
四六兩條補救該道等既奉外部命續議別款務希加意勿有罅
漏外部尙未見告故暫不去電然外部此番費盡苦心對付乞先
代達佩忱

附施道來電

十七午後廓使霍達均赴部梁堂先留霍霍允多住一禮拜
旋開議議准各條如下一俄國承認中國在鐵路界內主權
二界內各國居民享平等權利三議事會會長兼任辦事處
總理歸公舉四哈爾濱道有監察議事會辦事處之權五辦
事員五人道台與公司各派一員餘由公舉六道台與公司
總辦加意見不合其關主權者請示督憲關款項者飭會公

議七除公益事件外議事會辦事處概不與聞此項節畧今日互換其別款卽由職道等會同會司員接議詳細節畧另行鈔呈

致劉守

宣統元年閏二月二十日

皓電悉部議會事已有大綱應諭商民此捐專辦地方公益事且款暫存交涉局日後公舉代表經理無傷中國主權俟二十二眾商會議先行量力認捐速飭遵繳存局目前數目尙不能作准俟日後議定自有辦法也至華商捐冊須俟俄冊送到再行交去

附劉守來電

昨接京電知公議會已議有大綱曷勝欣慰惟部允暫照收款一層公司於送到捐冊後一再催問雖經復以互換華俄捐冊一節但彼謂繳冊一事本在收捐之後仍請速照部議

辦理卑府難以應答姑與支吾所望京議既有頭緒或能將收款一層熟商辦法此間庶不至再受催迫至電飭核議等因已於本日會同吉局先邀哈商告以憲意並示各電囑其直陳意見該商會因現值俄節約於二十二開會詢商眾量力認捐俟其議復當即電聞江站各商尙未到哈餘容續稟致劉守

宣統元年閏二月二十五日

敬電悉現商會議暫交一萬元存局作押日後再由該會核派辦法甚是已轉外部現外部已議有立會大綱力爭主權尙未議及款項當將來電廢棄舊章舊人一節又轉達施道與外部聲明力爭矣

附劉守等來電

發皓電稟後接施于二道京效電分晰兩層辦法囑向商申

說明白又奉憲台號電飭速遵繳存局等因均經傳示商會
念二念三商會連次開議各商以先按新章繳款恐彼作爲
承認各項章程均不洽意於本日隨同卑府往公司磋商欲
由商會擔保不必收款公司不允繼暫交一萬圓存局作押
公司謂非有各舖捐數清單不可商會謂某舖暫交若干亦
應由商會核派卑府並與公司力爭現既由局暫收候議所
有公司捐票收條概不必用一再磋商始允暫爲照辦仍俟
施道霍總辦回哈再議竊思現在辦法係由商會另行核派
並不作爲按照公司章程似更別無流弊惟各商謂從前俄
人創設自治會因不洽輿情改爲公共理事會名雖改而一
切內容未變無非以商民之脂膏供會員之糜費現經外部
主持定議所有俄人自治會公共會舊章及先已舉定之人

自當一切廢棄概與廓使另照部議大綱詳訂新章庶可以
公款辦公益商民自無異議誠恐此中底蘊上憲未及周知
將來或仍墮其牢籠之內此事不可不防擬懇督憲咨請外
部與俄使申明公益等事現既議有大綱從前舊章舊人概
行作廢將來另有妥章宣布商等始可放心卑府等答以此
論甚是允卽電稟除由吉江兩局照復公司宣布本日議定
收捐辦法並聲明暫收暫存以符原案其吉江各分站捐數
有限均以哈商爲准卽當分別曉諭遵行並電施于二道

致

施于道 宣統元年閏二月二十五日

敬電悉前日所議各節似不如十七日所議之切實前議第一條
俄國承認中國在鐵路界內主權第六條道台與公司總辦如意
見不合其關於主權者請示督憲第七條除公益事件外議事會

辦事處概不與聞此三條萬不可少非我加增仍請力從前議又地方公益事由議事局議定稟報交涉局鐵路局會同批准由辦事處出告白應改由議事局議定稟報交涉局鐵路局核定後由道台出告示方可無礙主權會同批准字樣萬不可用彼事事不願東督干預然鐵路在東省界內東督詎能不干預希請外部與之聲明故前議第六條不可刪去又提出凡關繫鐵路界內款項重大之事將來由中國督辦大臣與俄京總公司和衷商辦此條尙好我將來總須派督辦大臣駐哈也頃接劉守電知商會已議交一萬圓存局作押日後再由該會核派惟從前舊章舊人請一概作廢似不能以商民之脂膏供會員之糜費說頗可探請外部與俄使將公益事件用費議定爲要

附施道來電

十七廓霍等在部所議各節梁堂派職道等會同曾司員於
次日與俄校核問答節畧以便互換業於巧電陳明在案乃
達於廓霍未說之話每欲增入職道等已一再駁之不允其
增其在我一面者說過之話達又欲改輕減少諸如此類以
至連日校核迄未清楚職道等昨與力辯始終堅持並告如
此不符應由廓霍再赴部面議云云職道等隨稟梁堂梁堂
謂當面詰廓霍決不能絲毫退讓也

致施道

宣統元年閏二月二十九日

宥儉兩電均悉第一條承認界內中國主權具徵梁尙書磋商之
力佩慰莫名餘款尙平穩似可允認惟地方大吏不能無干預權
務希增入一條已詳前電至由會出告白不能由道台出告示則
哈道無權未免缺點徵收地丁必須辦到方算承認中國主權之

實據至裁撤巴釐司彼雖橫生阻力亦須設法辦到於我主權方可完全無缺我惟有加添警察亦可抵制一切宜稟承梁尙書卓裁

附施道來電

廿六廓霍達等到部與梁堂復議各節梁堂始終不許俄人收回已允條款今日下午職道等隨梁堂赴俄館會議四小時之久現在所訂各條大致如下除第一條字句已商定外餘款下禮拜彼此仍須商酌一承認界內中國主權此節較十七所議尤爲切實另由文報局寄呈二各埠按照就地情形選舉議事及辦事人或僅舉辦事人中外人民享平等權利擔平等義務三議事會專歸公舉不分中外均可被舉四一切公益歸議事會議訂五辦事處除議會會長兼任領袖

外交涉局與鐵路局各派一人餘三人由議事員公舉六交涉局及鐵路局總辦均有監察議事會權並可隨時到會稽察凡議事會所議事件由交涉局總辦與鐵路局總辦會同核奪施行後由會出告白七交涉局總辦與路局總辦可飭議事會復議已定事件如復議時有會員四分之三認可卽爲決定八凡關公益款項重要事件由督辦大臣與總公司和衷核奪施行再地丁與裁撤巴釐司兩事霍須請示總公司因訂此節嗣後與詳細章程另議察看現時情形地丁事將來尤易就範我已允其凡公司未用之地及未經出租者暫免地丁惟一經租出卽歸公議會經理並照繳地丁撤巴釐司事俄必生極大阻力再新章未定妥之前霍允交涉局有監察董事會之權並允哈埠由商會公舉三人入董事會

參預其事海滿各舉二人入董事會他埠僅有議事會者中國商人可以與俄人一律與議辦事以上各條梁堂諭電商帥座並請指示不妥之處

致施道

宣統元年三月初四日

江電悉前發復電後次日始接函陳廿七日議定大綱五款具臻妥洽足徵梁尙書磋商再四始能收回主權無任佩慰內凡添入關乎中國主權政治法令兩條由中國主持公議會不得干預及中國官員出示尤臻完善似可簽押至納地丁一事既有成議撤巴釐司一節續議詳章時希妥爲籌議一切還望梁尙書酌定並詳稟錫清帥就近核定爲是

附施道來電

艷電敬悉當稟明梁尙書廿九日交文報局遞呈前已議定

之承認中國主權各節計已邀覽職道等連日與俄員互校廿八會議條款至今午後始核准與儉電所陳條款大致相同惟字句稍有更易鈞諭地方大吏不能無干預權限由會出告白不能由道出示則哈道無權等因查已定主權大綱內聲明凡關乎中國主權法令政治者由中國官員主持自行出示既有主持二字是督撫憲於鐵路界內不至不能干預又鐵路界內該公司始終堅持只認交涉局出示不認哈道出示嗣磋商至再改爲中國官員字樣既不指明交涉局似哈道亦可以漸著手再地丁一項已於大綱聲明除未租出地段及公司自用房屋外均應公納俟議詳章再定數目等語除將核准條款另鈔明日由文報局遞呈並裁撤巴釐司一事應於議詳章時磋商外此項大綱卽須簽押梁尙書

諭再電帥請帥指示有無不妥之處伏求迅賜鈞示以便轉

稟作定

致

施道宣統元年三月初五日

昨覆電計已接洽撤巴釐司一層若不趁此時設法與其議定恐將來必多方推諉以後更難著手一面由我先籌定添設巡警若干藉以抵制一面即與議定撤退之期是否相當希稟商梁尙書妥議並請示錫清帥酌奪盼覆

致

施道宣統元年三月初十日

前日接到議定大綱十八條具悉均甚妥洽可即簽押俾免日久翻悔此次由梁尙書力爭到此地步已無餘憾爲之欣慰惟要求裁撤巴釐司一事所關甚巨我頗有意合兩省全力變通兵制改設巡警一面就各站酌籌津貼儻巡警歸我自辦將來擴充兩省

權力正復不少日後議詳章時務須達此目的應如何籌備如何措詞希先稟請梁尙書錫清帥酌奪爲要

附施道來電

大綱條款係備漢俄法三國文字繕寫各四分彼此各存各文二份遇有辯解之時以法文爲准現已核校妥協於今午後在外部簽字惟內有彼此稍加增改之處如第十三條位置在公議會會長之上有監察之權等語查公議會無會長漢洋文均改爲位置在議事會長及辦事領袖之上有監察之權第十六條梁尙書以爲未妥遵諭再四磋商甫經就緒蓋公司得以自行經理一語法文於自行二字仍本造路合同譯作專權字樣茲法文改爲自由之義漢文仍作自行及公司自用房屋一語擬法文均添爲及專爲公司自用房屋

按照繪圖不歸公議會者一語漢洋文均添爲按照商定繪圖不歸公議會者仍應歸公司自行經理一語漢洋文均改爲仍暫歸公司自行經理第十七條應迅速商定公議會及巡警詳細章程等語洋文無迅速二字以本條下有不得過一箇月一語也漢文遂亦刪去迅速二字第十八條暫就現行章程酌量辦理等語法文於酌量二字取義極輕所用之字在彼一面係說明辦理在我一面遇事亦可說話而實非彼此酌量之意似彼以此條旣已云暫就現行章程若再加以酌量字樣各國必皆抗拒目下之事不能辦矣云云因係暫時之事且漢字照舊故姑置之此外俄使與外部在換照會聲明中國與各國所立條約各國在中國應享利益一律尊重以免誤會該照會亦於今早互換矣

退耕堂政書卷四十四

退耕堂政書卷四十五目錄

電文三

哈爾濱交涉局案

設關征稅案

拉哈蘇蘇臨江州關務案

夾皮溝金鑛案

正德癸巳四月十五日

退耕堂政書卷四十五

天津徐世昌

電文三

哈爾濱交涉局案

設關征稅案

拉哈蘇蘇臨江州

夾皮溝金鑛案

致薩道蔭圖

光緒三十三年六月二十二日

頃接霍爾窪特電新任濱江關道薩道台已知會任事薩君人甚
聰明兼諳外交夙爲敝處所深悉擬請貴督部堂派委接充吉林
哈爾濱鐵路交涉總局總辦緣該局前任總辦係方道台充當迄
今離吉年餘聞有不復回任之信故特專電奉懇務乞照允經覆
以哈爾濱關道薩道本外交官該處鐵路交涉局總辦自應歸其
接充以專責成已札派該道接辦在案來電所請足徵貴提督輯
和之意殊深感慰該道久任交涉將來遇事必能與貴提督和衷
協商以期共濟等語特飭知

致外務部

光緒三十三年七月初六日

頃接哈爾濱薩道等電稱前奉鈞覆詞意明顯當即面告會議員劉總領事等據稱璞使前電寔係按照鐵路原合同辦理現查外務部指示核與原約不符恐係誤會未便遵照續議經職道等再三婉商終未肯允聞其又電請璞使在京交涉等語特此轉陳以備鈞部卓核與該使磋商

致杜道學瀛

光緒三十四年三月二十七日

聞南滿會社總裁後藤不日赴哈爾濱向東清公司要各處地段文據請速密告依萬年克撫順一段契據萬不可與日本務請先還中國爲要如要奉天照會電告即寄

致外務部

光緒三十四年四月十四日

據杜道稟稱後藤初三日在哈初四日乘快車赴俄京撫順地段

文契據鐵路霍總辦依代辦僉稱並未交付惟稱日員於此地段極爲注念恐將來難免重大交涉務須預爲防範等語聞霍依已電告俄政府如果俄不交給將自向東省交涉云云特此佈聞卽希預籌抵制密示遵行

致曹統制銀

杜道學瀛

光緒三十四年四月二十二日

聞近日俄國屢往滿洲增加兵隊旬日以前有人調查俄國駐防軍隊見其寬城子馬兵已較前加至數倍近又得最確之消息聞駐哈俄將軍日前請俄政府趕派精銳之步兵四連赴滿洲以便分布各處保護旅居遠東之俄僑實爲擴充俄人在滿洲之勢力範圍並聞俄本年移民東來甚多等語不知確否仰該道鎮就近遴派委員不動聲色密偵卽電復

附杜道學瀛復電

哈碼電敬悉訪查俄無於北滿添兵情事及長春軍隊亦係互相調換惟近年由西北利亞遷兵於烏蘇里江海參歲一帶俄界內屯居者甚衆並撥有紅牌兵隊約三四萬人俟續訪別有變動再行密陳

復周中丞

光緒三十四年六月十七日

銑電悉鐵路購地現據施道函稱公司指地太廣催迫簽字其中尙有情形尙待磋商俄或借此延緩交價或借此迫令定界應如尊論一面速勘一面催價從前哈埠交涉未可盡信現飭施道設法逐漸清理亦有甚難著手之處也祈密鑒

復施道肇基

光緒三十四年六月十八日

霰電悉俄人郭列立被鬍匪拏去索款勒贖該地是否在鐵路界外係何月日是否進屋強拏抑在行路且吉黑鬍匪不盡華人卽

應詳晰查明電告至俄領求我資助我有保護之責自應承諾惟鎗彈決難助給必須另籌妥法從前俄人被劫事所常有故此次辦理不得不格外審慎方免援以爲例乞電復

致施道肇基

光緒三十四年六月二十五日

頃由哈埠遞到鐵路公司照會一件其中詞意以杜道前充交涉局會辦現奉調他往所遺會辦一差請另派員接充等情此事未據執事報告其中是何情形應否派員希卽酌核迅速見覆

復施道肇基

光緒三十四年六月二十八日

感電悉公司催派會辦一節現既有總辦似可無庸再派會辦以一事權執事以爲何如查從前初定章時總辦住吉會辦住哈至派薩道時已改爲總辦住哈矣惟公司現有何意見如窺測所得望卽密電示

復施道肇基

光緒三十四年七月初二日

東電悉杜道所虧省局官帖五萬餘串應歸自行清理已電飭該道在哈將此項欠款迅速了結商埠事宜即由執事接辦

致杜道學瀛

光緒三十四年七月初二日

前哈埠開辦商埠公司虧欠省局官帖五萬餘串係執事經手事件欠款過鉅仍希執事在哈將此項欠項自行迅速設法清理未便列入交代以致要款虛懸所有商埠事宜已飭施道接辦即希查照

復施道肇基

光緒三十四年八月二十五日

有電悉江局未便歸併執事所論甚為切當現定不派兼充容另設法目前于道尙未交卸張守在哈即由該守與公司接洽以資熟手執事前保劉參贊鏡人現在南方何省並希電復以便電調

致陳中丞

光緒三十四年八月二十六日

頃聞有職商程鶴年在哈爾濱傅家甸設立永吉彩票公司分局已由濱江廳上詳此事爲害滋大未便准其開設俟該廳詳到希公卽予批駁長春亦設有該公司并請查明何時設立以憑核辦

復周中丞

光緒三十四年九月初二日

東電悉于道行時未經知會究屬疏忽江局總辦以現在交涉情形未便歸併哈道現擬另選幹員派充已電外部商調俟得復再奉聞至現在應辦各事仍應責成于道籌辦統祈卓裁轉飭是幸

復陳中丞

光緒三十四年九月二十八日

施道所擬公費津貼兩項由兩省攤撥卽照綏滿兩關收數勻攤亦屬允洽可以照辦卽請核定轉飭遵照此間轉知璞帥矣

復周中丞

光緒三十四年十一月十五日

前奉真電以北滿交涉日急由於不與劃界當經電詢施道茲據復稱職道任事之初公司即請派員會同劃界當答以須俟查明酌辦因各站界圖已由杜道簽字蓋印者應即勘劃其未經簽印者應由職道派員按圖查明再行劃分竊冀稍遲時日於他事或有牽制藉收交換利益之效日前已將阿什河站一處派員劃竣其餘陸續議劃承辦此事只委員銘文一員不能同時共與至公同司於各站挖溝圈地迭經交涉局照會阻止旋允旋翻等語所陳諒係實情現擬飭該道來奉面商一切再行奉達

致外務部

光緒三十三年六月初八日
設關征稅案

南北滿洲新設各關應定關名除安東大連滿洲里各關已有定名外齊齊哈爾擬名曰卜奎關愛琿即名曰愛琿關呼倫貝爾擬作爲滿洲里分關綏芬即名曰綏芬關可否照定統祈鈞裁其呼

倫貝爾作爲滿洲里分關能否由滿洲里稅務司兼顧仍請飭赫
總稅務司酌核呈明辦理

致外務部

光緒三十三年六月二十四日

據哈爾濱薩道蔭圖等電稱會議關稅俄員以第二條內載貨物
運出所定各界限外應補足正稅並按照運貨入內地章程辦理
一節誤爲只補正稅三分之一卽不認納子稅爭之不信彼已電
請璞使示請轉達鈞部俾期接洽等語查章程原文第二條詞意
甚明所謂內地章程卽包括子稅在內俄員實屬誤會請照會俄
使轉飭遵照

致朱中丞

光緒三十三年六月二十八日

頃准外務部電開東敬電悉北滿洲原定稅章載明貨物運出界
綫以外均屬內地應補足正稅並按照運貨入內地章程辦理領

單完子口稅卽運貨入內地章程義本明顯譯並字則補足正稅外尙有子口稅無疑但由本部照會俄使恐反起疑希仍由尊處轉飭執定章程與俄員磋商倘俄使來署辯論必當堅持希查照等因特轉達請卽飭薩道等遵照

致外務部

光緒三十三年七月初三日

東電敬悉安奉鐵路日人逐日行車改良一事未來商及查亦未有開工舉動至免稅一層中日會議條約並無明文第六款所言係專指派員查察經理一節應援照東省合同恐未能包括免稅在內否則此後辦理一切均可藉口援照合同直與東清鐵路無異將來商議改良之時必多窒碍似應轉飭稅務司於該鐵路進口物料應納稅項若干暫行登記並特爲聲明俟該路改良合同經兩國訂定後再作辦法預留地步似與商議有裨是否之處仍

請鈞部核定

復外務部

光緒三十三年七月初九日

支魚兩電均誦悉查此次新章係專爲鐵路運貨納稅訂定自是更正合同所未備俄使既已允認在先自應遵照新章不能再援舊日合同爲詞卽子口半稅亦係稅則所載正稅之半若謂等於已徵入口稅之半是子稅亦減三分之一核計全數直與免釐無異足見舊日合同顯有未明尤不能不實行新章以杜流弊況章程所在如百里免稅及減稅範圍此項權力均爲合同所無者皆可作廢矣昌等非固爲爭執誠以俄議結果實爲滿洲全局所關現時日人於稅務尙未提議其意卽在觀望俄人舉動以爲進止此事關係甚鉅仍請鈞部與俄使磋商酌覆以便轉飭遵行

附外務部來電

北滿洲稅章第二條末段俄不認補足正稅後再完子稅一事迭經本部與俄使磋商迄未允認稅務處以滿洲里綏芬河兩稅關俄並因此不允征稅於稅項大有關碍會商本部重將該末段解釋如下查該第二條其貨物運出各地段界綫外均應補足正稅並按照運貨入內地章程辦理等語以上語意應作爲其貨物運出各地段界綫外應補足未完三分之一之稅作爲子口稅准領照在東三省內往來無此照者逢關納稅過卡抽釐倘此貨欲出東三省界外復入關內各省之界則應照稅則所載正稅之數再完以半稅作爲他省子口稅方准領照前往並免重征無此照者仍逢關納稅過卡抽釐云云仍聲明係試辦章程俟一年後再行商定等因照會俄使去後茲准照復稱本國政府於所擬增一節並

不阻碍已電飭駐哈本國會議員再與華員會議妥定詳細章程請一併電飭各員遵照等情是此事業已了結希即電飭各該員照章征稅辦理並再妥議細章爲要餘函詳

致稅務處

光緒三十三年九月二十二日

奉天全省商埠界址未定於稅務大有窒碍各領事皆以通商口岸不應收稅爲辭究應如何辦理祈速酌定示悉

致朱中丞

光緒三十四年三月初七日

據陳簡墀電稱琿春出口木植稅向由吉省木植公司發出稅票歸本署代爲經理每年解省之數約中錢五六百吊不等歷辦有案而每年省城津貼琿城交涉經費四百餘吊爲數亦相差無幾現在琿城興辦一切籌款爲艱正當加意整頓隨時與日俄交接需費亦復不少若將琿屬出口木植稅一款截留本地以與由省

津貼之款相抵無甚出入昭常復酌量情形變通辦法收數或稍見起色於交涉經費不無小補等語查此項稅款與津貼一項所差有限若改歸該副都統經理似可操縱自如而省局亦免往返撥兌之勞於地方亦有裨益卽所察酌當可照准見覆

致朱中丞

光緒三十四年三月二十六日

漾電祇悉呢嗎稅局據范丞稟稱各節足見認真整頓殊堪嘉尙惟其中有與中俄約章不符尙須斟酌者一中俄陸路通商章程第一款兩國邊界之內准中俄兩國人民任便貿易均不納稅該處是否百里以外須查清一稅則無論進出口貨均按百抽五今欲按十抽一能否遵照其餘查禁伐木不准運石出口居留華民詞訟歸交涉局管轄及收出口人票各節旣與俄官商允可照辦惟照會俄使以總督存案照行一層恐有窒碍反多周折不如先

行試辦暫緩照會以留後步是否仍請裁酌

附朱中丞復電

宥東兩電均悉范丞整頓呢嗎局辦法有與中俄條約不符之處當飭查明核辦其餘該丞已與俄官商允各節尊意先行試辦暫緩照會盡籌審慎具表同情再查范丞前稟所稱收回俄人執照係指漁獵割草等項執照緣前委員戴鶴齡於本年正月開辦大穆稜河暨月牙泡魚掠子放給俄人史妙落脫金執照兩紙收稅錢一百吊從前俄人既得執照即不准華人捕魚割草並禁止船隻行駛把持利權反客為主流弊無窮故飭戴委員退還稅款收回稅票以清轉轄實與伐木無異除飭知該丞外特此電覆

致外務部

光緒三十四年四月十五日

日商在傅家甸不認納稅前經電達在案茲據杜道函稱日領現正唆動各領事不認傅家甸稅捐俄領已被煽惑不日定有一番辯論至美領則云當日宣佈開埠本係哈爾濱並無傅家甸之說則該處自屬內地俄商既經交納稅捐我美商亦照章辦理惟領事有保護商民責任如果將來中國政府允許日人在傅家甸營業不納稅捐則美商已交納之稅捐宜全數退還其措詞尙屬公允又滿洲日日新聞載東京電報柏林電傳日本政府所派之代表者目下在露都協議關於東清鐵路之買收其協議日有進步云以上美使日報所言日本收買哈爾濱鐵路事頗似確實俄放棄此段權利而經營黑龍江一段以固其北部之勢力殊於我大有窒碍應請鈞部速籌抵制早定辦法示遵

復陳中丞

光緒三十四年十二月二十日

巧電悉長春開關一事自宜及早舉行陳道到奉已飭回稅務司籌商惟開關經費約須十餘萬兩亦希飭預籌爲禱

附陳中丞來電

長春開關一事現應速飭陳道趕緊籌辦近來餉捐日絀日貨充溢均不納稅屢與餉捐委員爲難若不開關必至餉源盡失所損甚鉅約計開關後該關稅入必較哈埠暢旺且明春正當雜貨出口之時早開一日可早收一日之益又聞日人於車站開八大棧凡出口糧食逕運至彼屯儲若不開關則鐵路界內征稅尤難著手利害較然必宜速辦將來長春修築馬路各款固恃此取資卽省城開埠經費亦可藉以挹注現在陳道正在奉省應請飭與稅務司就近籌商卽日設關愈速愈妙此事所關甚大於吉省財政尤有裨益祈盡籌

速辦至禱

致朱中丞

光緒三十四年正月初七日
拉哈蘇蘇臨江州關務案

外部魚電想已鑒悉拉哈蘇蘇俄官設關收稅經部照會詰問現允將扣留之貨放行惟稅關尙未卽撤請速向俄領事磋商將該關撤回俄境以保主權現在如何情形卽電復

附外務部來電

拉哈蘇蘇俄官設關收稅事經本部照會俄使立將該關撤銷並轉飭速將扣留各物如數發還去後茲准復稱本國戶部已轉飭將該關扣留之貨放行至將該稅關撤回俄境一節現正開議一俟商訂之後隨卽照知再該稅關已接此次嚴飭訓條於此事未經商妥之先不扣留運往華境之華貨等因查俄官越境在拉哈蘇蘇設關收稅實屬損我主權急

應向俄領極力磋商將該關撤回俄境此事現在商議情形若何希隨時電達

致朱中丞

光緒三十四年三月二十二日

箇電悉臨江州俄既撤關在我設關接辦自是正辦惟設關尙須斟酌者如設洋關則該處非通商口岸如設釐局則恐洋輪往來不服稽查且設關必須兩江滙合之處使俄人不能藉口往黑河方妥此事似應請公電飭濱江道會同稅務司察奪情形詳細籌議爲妥如何祈卓裁

附朱中丞來電

頃據臨江州吳牧電稟俄稅關有撤回之說似應設關接辦或先派員稽查出入口違禁貨物以保主權等語鄙意俄關果撤我處自應派員先行稽查已飭該牧酌擬辦法章程呈

核俟派員時再當電商辦理先此奉達

致外務部

光緒三十四年五月十一日

頃據杜道學瀛電稱本日俄領言及現接政府回電拉哈蘇蘇稅關允撤惟須先行定約刻已備辦照會矣等語特聞

致稅務處

光緒三十四年五月十三日

哈爾濱議設江關未知尊處有無議准照覆總稅務司此關一立不但俄稅關無稽查之擾卽大江水力會亦可裁去關係主權甚大乞速核復

致朱中丞

光緒三十四年五月十六日

接外務部電開拉哈蘇蘇設關事元電悉該處原屬華城設關與否自有主權俄不應干預現彼尙未來部聲明如來提議當以此駁之惟查該處爲松花黑龍兩江會流要口亦關形勢俄人已在

彼經商應否自行設關於稅項有無裨益希卽詳審情形電復本部以備籌議再設關尙須開埠權度現時情勢究竟利少害多該處距三姓略近抑或作爲三姓分關之處統希妥籌電復等語愚意三姓旣已通商應可設關若哈爾濱旣在江邊設卡則上下遊往來卽可稽查拉哈蘇蘇似可無庸再設然凡事不厭精詳仰杜道會同稅務司派員往查詳細情形妥籌電復以便再復外部

致朱中丞

光緒三十四年六月初九日

拉哈蘇蘇俄人設關迄未撤退該關以查私貨爲名苛待中國船隻中國人民乘船東去者勒驗票據如無票據卽指赴臨江州買票再由該關蓋戳放行約需費俄錢四吊餘甚至興東道所帶員司暨工人亦索票據其赴興東荒戶多被留難而臨江州希圖分劈票費公然聽之將來人人裹足不敢東向實於招墾實邊開礦

興利各要政大有關碍據興東道稟報前來查該處稅關現准外務部咨俄國政府允爲撤退尙未實行應再咨催外務部速爲商訂以便撤關而臨江州如此荒謬似難姑容公節麾巡歷該處應請就近澈查統希卓裁核辦月函詳

致外務部

光緒三十四年八月十四日

頃據濱關施道電稱拉哈蘇蘇撤退俄關一事近據稅司篤諾篤面稱俄郭使前過哈埠曾探其口氣似拉哈蘇蘇俄關可望早日撤退職道查撤關原案須俟政府議妥飭遵故近未照催俄領現在郭使抵京應否由憲座咨明外部儘先提議以期速撤至前奉吉省札發吳委員所擬稽查章程已抄送稅司核議尙未准復俟復到妥商具呈等語該道所陳不過僅探俄使口氣尙無切實辦法應請由鈞部將此案與俄使儘先提議以期早日撤退爲幸

致外務部

光緒三十四年八月二十五日

拉哈蘇蘇俄人所設之關至今尙未撤退頃據興東道慶山稟稱此次派員赴哈招工就便購貨內有燒酒水酒等項於六月二十八日行至拉哈蘇蘇地方被該關截留等情查此關不撤則行旅不安應請鈞部速卽照會俄使據約撤退爲要然黑龍江係公共之江俄人旣允撤回彼岸尙難任不再有稽查截留情事請議訂俄約時慎加籌度妥定章程以免後患

附外務部來電

拉哈蘇蘇稅關一事有電悉此事業據來咨照會俄使並咨達尊處茲准該使照復所請發還貨物各節已轉達本國外部查照辦理聞貴國擬於該處設置海關請將有無此事並該關所管之權限如何符合約章照知本處以便轉飭將撤

正書卷四十五
十三
遷俄關之事辦結等情業經咨行稅務處核復在案查前准稅務處咨以該地方若設分關不應仍照陸路通商章程征稅應否先與俄使提議請卽酌核又准咨以據東三省督撫查明該地方商務尙未興旺應從緩設關各等因准俄使照詢各節我若緩辦恐彼卽延宕撤關仍希由尊處察酌情形將應否設關並如何擬定章程與俄使提議之處從速籌定見復以憑核辦

致外務部

光緒三十四年九月初二日

二十九日鈞電祇悉拉哈蘇蘇設關與撤關應分爲二事俄人在我境內設關顯違約章理應先令撤去至我之設關借以防護不必重在征稅亦是一策或設原處或在松花江口請飭總稅務司察覈情形妥擬章程能否不照陸路通商章程辦理併卽核議呈

復再與俄使提議似較妥當是否仍候鈞裁

致施道肇基

光緒三十四年九月初十日

前由客稅務司派司梅梯赴拉哈蘇蘇調查一切究竟該地距俄
交界是否在百里外有無貿易應否設關其地是否要害有險可
守希卽詳查電復

致稅務處

光緒三十四年九月十二日

佳電祇悉查拉哈蘇蘇無險可守該處居民不多貿易亦少不能
作通商口岸我之擬設關者非爲收稅計因我不設則俄不撤我
之行旅貨物爲俄稽查刁難扣留種種窒碍三姓係通商口岸最
好三姓設關由該關派一洋人至彼作爲分卡既可抵制俄人亦
可節省經費若何乞卓裁八月初三日尊函因行查吉省故稽答
稍遲俟吉省復到卽行詳達

附稅務處來電

拉哈蘇蘇設關一事現准外務部將貴督電復各節知照本處前以拉哈蘇蘇地居要害設關恐與守險有妨隨於八月初三日具函奉商尙未見復究竟該處設關通商於松花江要塞地點有無妨碍務希查照前函迅速電復以憑核辦

致朱中丞

光緒三十四年十月初三日

冬電祇悉臨江設關可速派吳文泰前往接辦章程姑照俄國現行辦理俟杜道與稅務司妥訂送核再行飭遵蓋籌甚善

致

外務部
稅務處

光緒三十四年十二月十六日

據哈爾濱施道電稟拉哈蘇蘇俄關迭經催令撤遷昨據俄領事照稱奉伊外部札諭已飭該關撤閉等語所有該關房屋原議由稅務司派人接收茲以歲暮江凍稅司無法派人前往職道現飭

臨江州吳牧親自赴關暫行接收除電稟吉林公署暨電飭吳牧遵照一面知照俄領外謹以電聞等情用特據情電陳乞鑒察是荷

附外務部來電

盛銑電悉昨俄使來照亦謂該稅關撤去特聞

復朱中丞

光緒三十三年六月十二日
夾皮溝金礦案

真電悉夾皮溝金礦應以奉部駁爲憑仍望查照部議堅拒臨江州佔地一案草約既有奉

旨方爲定論之文嗣經部駁則此約卽爲無效可知該處俄人自不應再起房屋此事似易措詞如磋商盡頭只可略給房價以了轉轉

附朱中丞來電

俄領事索濶甫甯日來提議前案內有兩件猶相持未決一
爲夾皮溝金礦查二十六年十二月經長將軍與劉巴立有
合同十四條二十七年奉

硃批著照所請二十八年經外部議駁是年復經長將軍發
給俄礦照一紙一年爲限二十九年六月繳銷是年六月又
發諾爾撒護照一紙內云只准擇勘不准開辦如無金苗將
照繳回逾限作廢日俄停戰以後屢來換照均未允許今復
執長將軍會奉

硃批著照所請照會來署相商晚隨檢卷詳核派宋道往復
仍不准其開採彼有將來由俄使與外部商議等語又有臨
江州拉哈蘇蘇佔地一事曾經長將軍派員將地放給寬長
三百沙申每沙申六尺六寸先立草約俟奉

旨允准方爲定論嗣經奏奉部駁經達將軍照請遷徙今復以索地爲詞兩次磋商俄領事又稱該處俄人居住已有五年修造房屋約用羌錢萬餘千設使遷回則此錢無著答以多年未給地租租價卽抵作房價彼猶未允索地不獲轉而索費似此件尙不甚難結先此電聞統候卓裁示知

退耕堂政書卷四十六目錄

電文四

滿站剿匪案

俄人越境刈草案

調查中俄分界案

煤鑛暨展地伐木合同案

哈埠水利會案

愛琿開埠案

古今圖書集成

退耕堂政書卷四十六

天津徐世昌

電文四

滿站剿匪案 俄人越境刈草案 調查中俄分界案
煤鑛暨展地伐木案 哈埠水利會案 愛琿開埠案

復杜道學瀛

光緒三十四年四月三十日

勘電悉拏獲私設押封綁勒財物人犯亟宜嚴訊究辦惟關旨充
淮軍已據情電囑張紹軒軍門路過濱江會晤查究矣

致唐中丞

光緒三十四年五月初一日

滿洲里俄匪肆行劫殺前經函達頃接宋都護電近又出有劫案
似此橫行無忌若不亟為設法邊民何以聊生請就商外部速籌
辦法又吉林密山設治委員稟稱烏蘇里沿江一帶亦有俄人越
墾并請告外部極力詰阻為幸

致杜道學瀛

光緒三十四年五月初二日

頃接張軍門電覆彼軍隊兵并無留在哈埠惟上年收有眼線數十名早已開除等語是所獲各犯其爲冒充淮軍無疑如係彼軍開除眼線人等所爲更宜切實嚴訊從重究辦張軍門現在昌圖聞初六七便可到哈接晤

復杜道學瀛

光緒三十四年五月二十日

效電悉王文斗等一案一千人證全行在濱紛紛傳送來轅恐滋拖累稽延現已札委范守貴良馳往會訊一俟范守到濱該道遵卽會同審訊明確分別核辦除電張軍門將陳德修等暫行撤差送案備訊外仰卽知照

致張翼長勳

光緒三十四年五月二十日

據濱江杜道電稱哈鐵路公司前獲淮軍王文斗等一案株連妄

拏私押非刑各情僉供均係聽從淮軍哨官陳德修趙汝楫等主使應卽派員會訊明確分別核辦除札派幹員赴濱會訊并電杜道知照外希將陳德修趙汝楫等迅速暫行撤差送交濱江道備訊務期水落石出

復施道肇基

光緒三十四年六月二十二日

號電悉哈埠盜匪橫行實爲地方巨患所擬酌撥新兵駐防該處辦法甚好惟撥去兵隊能否駐鐵路界內或雖不入界內而遇拏匪時可以任便入界此項須預先籌酌議定至該埠地面須駐兵若干向來道署能籌的餉若干能騰出餉若干贍給新兵希卽一核計見示

復外務部

光緒三十四年六月二十五日

漾電敬悉前奉大咨飭照原定規條磋商一節已飭杜道于道會

向公司續議仍未允洽然此係鐵路各站普通剿匪章程且注重者在華匪也至滿站之匪多係俄人卽鐵路界內俄人搶害華人之案不一而足均經咨報前經于道及呼倫貝爾宋道派員會同公司所派俄員在滿開議大致以鐵路界內華匪俄匪彼此均可緝拏各交各國究辦并清查界內商民不准私存槍械良民自衛各由各國烙印給照無正業者彼此隨時密查辦理以上各節俄未允認俄欲議界外之緝捕華員亦未允認今俄使專提界外彼明知我不能允挾此以相抵制俾遂界內深閉固拒之謀耳荷蒙鈞部鼎力主持照案駁復洞悉隱情良深欽佩除電達江撫反飭宋道務將該處界外兵警認真整頓并查俄人如有于界外派兵情事立即堅阻一面電飭施道會同于道將鐵路各站普通剿匪章程與滿站剿匪專章分別遞向公司磋商外先此覆陳

附外務部來電

俄阿署使照稱蒙地屢有搶殺土人之案歸咎俄人所爲本國政府擬由滿洲車站隨時分派五名一隊之巡邏馬兵往鐵路公司佔地界外迎護前往本國交界販運牲畜之蒙華商民及回蒙攜資之人此辦法若不謂然則北滿不靖惟中政府是問等語滿站遠近迭出劫案本部前將尊擬辦法五條照商俄使該使照復不認經咨請照原定磋商已否商有頭緒迄未准復查華兵入鐵路界內剿匪該使屢次駁阻乃欲於鐵路界外分派馬兵迎護蒙商人等不但顯違定約并與前璞使節略之第一條亦屬不符除由本部照案駁復請仍照東省所擬辦法辦理并咨達外如俄人有於鐵路界外派兵情事希卽飭隨時阻止仍將界外兵警認真整頓以免

藉口卽電復

致周中丞

光緒三十四年六月二十五日

准外部電開云云現飭宋道將界外兵警認真整頓並查俄人如有派兵界外情事立即堅阻一面電飭施道會同于道將鐵路各站普通剿匪章程與滿站剿匪專章分別迅向公司磋商

附周中丞來電

有電悉前于道電據公司照稱雅魯站外俄匪擬派俄隊往捕當飭以該處在鐵路界外非俄隊所應闖入應由華隊往捕捕獲後再行照約辦理嗣據于道電復俄隊未曾前往已知會公司告以業派華隊往捕無庸俄隊再往矣是俄人欲於界外派兵江省業經阻止茲據外部電俄政府擬派馬隊往界外迎護交界販運之人此辦法若不謂然則北滿不靖

惟中國政府是問等語查界外俄匪擾亂治安乃俄人應自認咎之事乃彼先既不肯承認剿匪章程轉欲於此責問中國政府希圖於界外派兵實屬無理要求如果派兵自當堅阻仍一面飭各站整頓界外兵警先事防維尊處已飭施道于道磋商剿匪事宜務令從速定議毋涉延宕致生枝節爲要

致施道肇基

光緒三十四年七月初二日

勘電悉滿站剿匪章程從前公司謂不悉該處情形必須派員前往就地會議乃既議之後條款各執彼此互未認可俄議員旋卽離滿此宋道前稟所以請飭于道迅向公司提議也事歸公司主持自須在哈提議方能訂定仍希執事會同于道迅速磋商并將各站普通剿匪章程一律會同速議是所至盼

致施道肇基

光緒三十四年七月初三日

東電悉匪擄俄商一稟昨日接覽當卽電知張孟兩提督立懸重賞轉飭張么兩統領購募眼線授以機宜深入匪巢嚴密誘贖爲先救後剿之計至俄領事云張翼長獲匪雙六是否卽係朱雙六抑或另是一人查朱雙六已在克道岔地方接仗爲張軍擊斃并非被禽應再探詢明確見覆納贖欸項公家決不可認此係盜匪所爲與商人傷害外人性命之案不同我若援助使反得所借口嗣後此等案件又將如何辦理資助一層旣未宣佈甚善此時可告俄領我督撫已嚴飭張么兩統領設法購救諒可得手况華人爲俄匪被害之案亦時有之俄領又將如何辦法我於此等事更宜審慎出之

致宋副都統小濂

光緒三十四年七月初四日

滿站剿匪章程現今施于兩道在哈與公司訂期接議并將各站
普通章程一律議定執事係原議在事之人且於滿站情形最悉
惟目前斷難因此赴哈希遴派明白曉事之員赴哈會議以便接
洽

復周中丞

光緒三十四年十一月二十九日

勘電悉博克圖附近華俄匪人勾結搶掠經尊處派隊往剿并知
會俄隊會剿極其周洽仍望轉飭嚴密剿捕毋任竄匿以靖邊氛
實所企盼

致外務部

光緒三十四年四月初一日
俄人越境刈草案

俄人沿邊越墾前經江撫行文禁阻准俄赤塔巡撫照覆不認有
越墾之事昨俄領事馬納金往謁宋道以倫屬邊境仍准俄人墾
地相求當經力駁未允該領事云已具報俄使逕向外部磋商茲

准經江撫電達前來除飭宋道隨時稽查外務請鈞部主持於俄使要求預籌抵制

致外務部

光緒三十四年四月初三日

准江撫電稱吉拉林沿邊一帶俄人越界割草已非一日前奉大部覆示務須照約妥商遣回現雖屢經設法驅令回國咨部有案而過境刈草等事相沿過久勢難遽行禁絕應否暫准俄人刈草由我定章收稅等語查俄人越界刈草與越墾不同萬難一概禁絕如定章收稅主權在我尚可操縱自如利權不至全失可否准行卽祈鈞裁示遵

致外務部

光緒三十四年四月初五日

東電祇悉茲據江撫電稱木植羊草係俄人入我界伐木刈草並非經商貿易本年宋道曾與俄外部官訂立徵稅合同在案俄商

亦經遵守其牲畜皮張等稅前准宋道來咨據稱業經商允俄官照章納稅亦不宜無端翻異等因旋即電詢江撫宋道與俄外部官商准牲畜皮張等稅一節彼此有無往來照會抑係面商俟覆到再行奉聞又據江撫電稱度支司昨接于道來電謂公司不認我昂昂溪站暨各站收稅已給各站巴厘司知照等語此事既非在邊界百里以內又非原訂陸路合同所有將來欲詰我以違約收稅則彼之違背合同侵我稅權自應一併抗議預遏其萌請與俄使嚴重交涉勿稍放鬆大局幸甚

致程中丞

光緒三十四年四月初六日

頃准外部電覆俄人越境刈草勢難禁絕即照尊擬定章收稅以保利權希即轉電宋都護遵照辦理

致周中丞

光緒三十四年五月初二日

頃據宋副都統開送俄人越界刈草牧畜章程候核定即與俄人定議即請卓核就近面商示覆

附周中丞復電

冬電悉俄人刈草事前經外部准行宋道所擬章程大致周妥已面允照辦一年如尊處核閱無異即可批准飭遵宋道已回倫並聞

致庫倫延大臣

光緒三十四年六月二十八日
派于道調查中俄分界案

黑龍江省西境中俄分界鄂博年久有毀壞者亟宜派員往查以清國界惟該處與喀爾喀東路車臣汗部錯壤既查江屬鄂博不得不將蒙屬附近鄂博一併清查茲派于道駟興往查敬希飭查該部中前旗中左前旗左翼左旗俟該道到時一體妥為保護並派員導引是所至禱

致于道駟興 光緒三十四年七月初三日

頃接延大臣先電云查國界鄂博庫倫所屬係在卡倫之外所指各旗係在卡倫之內雖亦有鄂博係爲旗卡分界非國界也茲旣將附近之江省蒙屬國界鄂博一併清查計庫倫屬卡倫十五處自應札飭管庫倫東路卡倫官派員妥爲照料導引除分行並由本處加派委員往會勘外于觀察何時由何處啟程並是否如此辦理希電知以便派員往候等語望卽酌定並何時由何處啟程到何處與庫倫委員接晤會勘速覆以便轉電延大臣知照

附于道駟興復電

職道今晨回哈奉江電敬悉此役原係查勘國界鄂博與旗卡分界鄂博無涉先因不知有東路卡倫官可以派員引護是以指請各旗耳茲旣經延大臣飭卡引護並派員會勘自

更妥善職道擬自呼倫貝爾所屬之阿巴海圖起循國界西
行查至格子蓋止阿巴海圖爲庫以東第六十三鄂博格子
蓋爲第五十鄂博也江省與庫倫所屬地方何處分界職道
不甚詳悉有謂在五十九鄂博察罕煊魯者有謂在五十八
鄂博塔爾巴執達固者擬請庫倫委員在庫屬交界之鄂博
卡倫等候以便接晤會勘惟今年北地雨水極大道路泥深
沒膝聞卜魁以西雨亦甚大且此時蚊蟲甚熾大約須過七
月半後方可前往頃已電詢海拉爾滿洲里等處雨水是否
碍路容俟得覆定准起行日期再行電陳

復于道駟興

光緒三十四年九月十六日

元電悉執事馳驅絕徼勤勞可佩所擬輕裝減從隨商人前往調
查尤徵實心任事所有國界邊線務希詳細履勘一一萃成圖說

以昭核實爲要

附于道駟興來電

職道十一日勘界畢回滿洲里因念俄之拜喀爾省會赤塔城暨毀爾臣斯克卽尼布楚城皆彼東方重鎮又斯特列田斯克爲悉彼利亞原修鐵路盡頭之處以上三處皆距滿洲里火車一兩日程現輕裝減從隨各商人一往調查大約十日內可回滿

附周中丞來電

頃據于道念一日自斯特列田斯克函稱自滿啟程後六夜抵毀爾臣斯克卽尼布楚城十九將行忽被俄員見疑派人搜查又留兩日始獲就道二十夜抵斯特列田斯克查前在滿站所攜護照係託名赴黑河至是恐有人伺不得不實行

東駛現附輪船于念二日開行約念六七抵愛前派調查行
輪事宜可否順流逕赴伯力抑卽由愛遵路旋省等語曾以
哈局諸務亟須清理行輪事現屆封凍調查暫可從緩已電
宋都護處轉知該道遵陸旋省矣特此奉聞

致程中丞

光緒三十三年六月十九日
煤礦暨展地伐木合同案

咸電悉尊恙漸次向愈無任欣慰頃接外務部電俄使面交節略
內稱煤礦合同增添一條已電知東省鐵路公司據復稱此條尙
有不便之處如辨巡警管理華人之語應行刪去其餘均可照允
等語如添此層勢必禁用華人詞頗堅執可否照刪等因礦廠不
歸巡警管理未嘗不可但礦廠必須指定地段或圈一圍牆則圍
牆以內可不必巡警闖入若但言礦廠毫無限制則平地或村落
均可指爲礦產範圍之內而巡警皆不能設矣已將此意電復外

部請再與俄使磋商尊旨如何再期糧一事卽須會銜入奏望速查明詳示爲要

致外務部

光緒三十三年六月二十四日

前電所議或仿唐山成案或係指保護地面並非保護礦廠現既不援此案仍請查照前陳辦法指定地段或圈一圍牆以免漫無限制希懇鈞部再與磋商核示

附外務部復電

煤礦合同事准上月敬電當致俄使節略內開巡警管理華人一節如須刪去應聲明礦廠必須指定地段或圈一圍牆圍牆以內巡警可不闌入倘有犯事華人逃匿礦地界內應隨時由地方官知照廠員派人協同中國巡警前往拘拏云云現准復稱按照所擬卽可照允應請將此節添入末條並

將各條核准卽希轉飭從速將三項合同簽名蓋印以結此舉等因除由本部照復作爲核准外希卽轉飭照繕煤礦合同暨展地伐木各合同一併速行簽印並電復

致朱中丞

光緒三十三年七月初十日

東頃准外部電開煤廠合同事准上月敬電當致俄使節略內開巡警管理華人一節如須刪去應聲明礦產必須指定地段或圍一圍牆圍牆以內巡警可不闌入倘有犯事華人逃匿礦地界內應隨時由地方官知照廠員派人協同中國巡警前往拘拏云云現准復稱按照所擬卽可照允應請將此節添入末條并將各條核准卽希轉飭從速將三項合同簽名蓋印以結此舉等因除由本部照復作爲核准外希卽轉飭照繕煤礦合同暨展地伐木各合同一併速行簽印并卽復等因除電薩杜宋三道外合希卽轉

飭遵辦速電復以便轉達

附朱中丞來電

吉省展地伐木煤礦三事均經外務部與俄使議定現由吉林委員杜道學瀛東清鐵路公司總辦霍爾瓦特總辦之全權代辦達聶爾將三項合同彼此會議簽押并據杜道達聶爾親送合同呈請蓋印前來竇查此事已經外務部核准無可再議商查各合同均照部議當即分蓋關防仍交杜道達聶爾帶哈俟彼蓋印後一存東省鐵路公司一寄來省另飭杜道照繕一分咨部惟合同內未載之事如歷年積欠木植票費并開採煤數日應繳稅項俟算明照償并有民人前開煤礦被俄人佔據者須一律退回竇已向達聶爾言明隨飭杜道再補照會達聶爾均已承認即請由尊處挈銜先行電

達外務部延吉廳已飭吉林道牌示委陶令彬署理請飭該
令速來吳監督摺開阮丞各苛政不致如是之甚阮丞人尙
明白如正月兵變一事幸阮丞辦理尙速否則不可收拾而
吳監督謂由阮丞激成或係胡殿甲一面之詞胡辦學堂統
防營均屬腐敗惟聞與日人交涉尙能應付現在延吉事急
人少可否暫緩胡赴奉吳監督來函擬赴和龍峪查勘後隨
到夾皮溝卽行回奉邊務吃緊似仍令吳往延吉較妥統候
卓示

附薩道蔭圖來電

此次伐木合同呼蘭萬難撥給宋道力爭擬以汧濃二河酌
劃彼此兩便意謂必可乃俄人堅執初意須俟其稍有轉機
因勢利導倘彼終不肯讓再由職道設法維持方覺退有餘

步未知鈞意以爲然否仍祈訓示

附程中丞來電

濛電悉江省伐木合同因地段稍有未妥尙須略緩再畫展地煤礦二合同已於今日鈐印

附程中丞第二電

歌電敬悉伐木合同江省只允三處一爲白河長不過三十里寬不過十里一爲火燎溝寬長亦如之以上兩處均在興安嶺鐵路附近一爲岔林河自河口起溯河而上長五十里寬河東二十里河西十五里其餘條款均如吉林合同容抄寄

復朱中丞

光緒三十三年九月二十七日

宥電悉鐵路合同江省因伐木一節正在磋商吉省旣經畫押卽

請先將合同送奉爲盼

附朱中丞來電

公司佔地伐木煤礦三合同關涉吉江兩省應俟兩省合同彙齊後由公領銜會奏現吉省已由杜道學瀛會同公司總理畫押呈送前來江省未識已否辦妥所有吉省合同應否先行賚送尊處乞電示

致程中丞
宋副都統

光緒三十四年三月十二日

前日來電木植合同已畫押惟據張丞迭次爭執及友梅來函謂允給火燎溝卽不給河路若給河路卽不給火燎溝何以此次合同兩處均經列入又火燎溝雖議明里數此溝長百餘里現給地段是否由溝頭算起會否聲明岔林河一段里數過寬過長張丞前議祇給河之一岸何以東西兩岸均包在內所有各段里數與

友梅前次來函所言均已加多并會否聲明按中國里計算以上諸節均應詳加核奪希卽見覆合同稿望速寄示

附程中丞復電

文電敬悉木植合同原擬祇給陸路不給河路倘到萬不得已時酌給一河以爲下台地步水路各段均須定明里數不得過多當經友梅於上年十二月倫字第五第七兩號本年倫字第十四號稟內將辦法陳明後因公司多方狡展屢議未協復經友梅稟奉公貝字七號函諭飭張丞堅持此議磋商議結否則拖延日久彼族享利愈多殊非勝算等因又以公司總辦霍爾瓦特不日請假回國公司另易生手勢必大延時日且陸路爭回長十之九寬十之八有奇河路則呼蘭諾敏濃濃等河全退出此外公司堅不退讓事機所在稍縱

正書卷四十一
十三
卽逝倘再遷延誠如公議彼族享利愈多殊非勝算故經德全飭友梅轉飭張丞所給地段均以華里計算妥速議結以免中變幸得繕定簽印昨已將合同附函抄稿并具摺奏報均於十一日交徐道賚呈鑒察周道前定合同卽抄呈以備參核

致程中丞電

光緒三十四年三月十六日

元電悉上月接友梅最後十四號信言杈林河長不過三十里寬不過十里卽照該丞所擬寬五里長四十里必須從溝之上下或上頭或下頭不令從中擇取致碍採伐之路云云嗣後與前議未符又未見合同底稿是以電詢昨由徐道送閱所訂條款大致尙屬妥協應卽照此議結疏亦拜發

致唐中丞

光緒三十四年四月初三日
哈埠水利會案

據杜道電稱哈埠鐵路公司請設水利會仍亟求商定暫行章程
出示華俄一律收捐并云日後我政府接辦亦可照行如過此機
會則又將虧累均乞裁核電示遵辦撫順文契依萬年克云遵示
決不交出又祈道電稱前派會勘安奉鐵道楊委員等現已勘畢
安現正督飭繪圖貼說再行呈報等語併以奉聞祈鑒核電示

附唐中丞復電

江電悉哈埠水利會是否卽救火會如係防穰火災關於地
方公益與內政無碍自不妨華俄合辦又收捐名目如係義
捐則機會亦不宜失統希核定飭遵安奉鐵路事已與林使
提議容再奉達

致唐中丞

光緒三十四年四月初四日

支電悉哈埠水利會據俄霍提督照會稱係辦哈爾濱至拉哈蘇

蘇之間航路各事江心各種插標浮筒前因鐵路運料故一切經費由鐵路公司籌付歲需五萬盧布現鐵路無料可運而商輪仍有故請於華俄應訂行輪章程未定以前暫設水利會會員有華官代表鐵路代表商會代表暫行經理經費由各貨抽收除開支外如有盈餘送關道收存東三省總督雖派員查勘佈置然開辦需時而現在保護航路勢難中止務請今年暫允設立水利會并非永遠作爲成案等語此事係從前俄修此項航路收捐今年爭回自辦現已派員勘修擬自收而目下船已行公尙未辦故霍有此請也

致杜道學瀛

光緒三十四年四月初六日

松花江保護航路各事可與公司商歸我接辦凡公司前設江心標筒由我接收輪航向俄租用并僱用威勃爾經理如商議不允

然後再允暫設水利會惟須聲明中國開辦後此會卽應撤銷若何電復

復施道肇基

光緒三十四年六月十三日

文電悉公共水利會需欸自應由我墊發執事能見其大先墊千元辦理甚是如再不敷應准照付將來收欸不足可以作正開銷候咨稅務處札飭總稅務司預備接收

附施道肇基來電

公共水利會一事迭經派員接議現因該會急需用欸公議由中國先墊差錢千元此欸俟該會收有成數除支用外有餘則歸墊不敷則攤派竊思中國入會原爲收回自辦地步此時如不允墊欸另由外人籌墊將來收回時恐又多一藉口大局所關不能不顧該會急催復音不及請示只得擅允

照墊一面電聞將來或收欸不足竟不歸墊或歸而不齊所短若干應請作正開銷至嗣後如再請墊欸應否照允并乞示遵一面請咨稅務大臣札飭總稅司早爲預備接收

復施道肇基

光緒三十四年十月十八日

銑電悉水利會捐欸既交我收儲卽是收回之據明年便可歸我自辦辦理甚是卽照行

附施道肇基來電

水利會一事迭與公司提議收回本係查照原案辦理乃該會一再游移始以欸難清結爲詞繼復以航路尙未竣工無非藉端延宕經職道屢次函催霍總辦並囑葛稅司往來查探襄助霍總辦始允將所收船捐除酌留付欸外餘於俄十月十五卽中國十月初四日送交華官收儲以爲下屆航路

之用嗣於是日欸未收到但准霍總辦照會詢問欸交何處
職道復以欸交稅司並聲明十月初四日卽爲中國接收自
辦之期以清界限除葛稅司收到前欸再行呈報外先此電
陳

致程中丞

光緒三十四年十二月初八日
愛琿開埠案

准外部咨俄使照稱愛琿距俄邊境甚近關係俄商貿易較他國
頗重應留商民居住地界從速訂定可由俄開米薩爾會同愛琿
梅楞章京就近商定當經照覆所留地段有碍城基應另行擇地
等因查該處與俄海蘭泡僅隔一江部意擬於開埠界內劃出一
區爲俄商貿易處所此外不准濫設行棧以示限制抑或另有辦
法希卓裁示覆。

致程中丞

光緒三十三年十二月十二日

青電悉愛理商埠俄員改指之地僅退一里餘且係華商已設市之處自未便照允至於海蘭泡俄城欲爭華商之利益及俄員許華人在黑河有互換相當之利益亟應向其從速提議姑看能否和平商定互換利益之處方可許定地段尊見如以爲然請知照姚都護酌核辦理

復外務部

光緒三十三年十二月二十五日

前接敬電當卽電達江省轉愛理副都統茲准前署撫電開姚副都統復電俄使所稱古思敏自指地段該處卽舊日商賈輻輳并輪船碼頭地方且我所劃商埠亦卽在此北面緊靠江沿俄員偏欲奪我碼頭萬難允許刻已將古思敏折服於二十五日籌待各情稟請鑒核到日請酌奪示遵等語查俄人所指地段旣屬舊日碼頭最足扼我之吭前於二十四日會將城基商埠并繪一紙咨

送鈞閱卽屬了然緣俄使旣允另指地段又明索泊船之區其意固欲奪我要地自設碼頭卽爲彼族所據而華商轉無以自立全意非不撥地沿江地段甚多不如卽就俄人所指之北月給地段亦可泊船該使諒無異詞俟姚都護文到究係如何籌待另行電達等因謹轉達

附外務部來電

篠電悉愛琿已宣佈開埠俄租界勢難推宕不給劃地俄使來署面稱如指劃之處或有窒碍可另擇一地或嫌地太大可稍減小惟必須在沿江方爲合用又來照亦注重劃定地段內必須江岸以便俄商泊輪除由本部照覆請將保護俄境內華商由俄員與華官一併妥商外來往照會另抄寄希轉達江撫暨姚副都統酌核辦理

致外務部

光緒三十四年正月初十日

江撫來電頃復接受瑋電開初四古思敏來議索地事答以百十
一號燈照距城切近萬不能行彼云養病房一帶亦可復答以我
若給俄商以相宜碼頭爾亦應在海蘭泡給華商以相宜碼頭方
謂互換利益渠語塞與訂開印後赴俄城再商等語俄人之意已
有轉圜不定索百十一號燈照之地姚都護堅持互換利益自是
力爭上游如索碼頭作不到或另索華商在彼優待并索還江東
六十四屯總之此界不能白給人且祇能給以無礙我城治居戶
地方渠原索之百十一號燈照地方萬不可許也合行佈聞

致外務部

光緒三十四年正月十九日

頃接姚副都統電開初四日古思敏來此當告以璞使許互換相
當利益彼伴爲不知彼所堅持欲得者不過養病院地段及聞索

彼商埠碼頭彼竟語塞訂期後會而退十四日准古思敏照稱貴外部已允指撥地段請由一百十一號燈照起至沿江病院止撥予碼頭及如何租價年限務請允許等情查燈照至病院地面長一里餘其北乃昔之龍王廟一帶皆我商市街多附近江濱爲此間第一衝要碼頭附城切近并未劃入俄商埠界內俄之無理要求實與我之城治居民大有窒碍萬難照辦至養病院地段雖劃入商埠界內然與古思敏尙未道破蓋深悉其欲壑難滿故留此作結局地步應請外務部堅持另行擇地初議現擬赴彼先索江東并索俄太子門以上爲商埠停輪碼頭設華領事於彼保護華僑能達到目的姑許養病院房地作商埠碼頭又接程撫來電謂准大部咨開據俄使照稱江省督撫已許照辦惟姚都統未得巡撫訓條推諉飭速開議未議定以前勿再造屋查一百十一號燈

照一帶爲愛城要衝且皆有主之地該業主等聞有俄人索作商埠之議迭次來省懇求足見此舉深拂輿情至於蓋屋一節應由業主自便官府何能阻攔等語請大部速告俄使請其飭知古思敏仍踐該使所許互換利益之言與姚副都統妥商辦理至地段務請另擇一處爲要

致程中丞

光緒三十四年正月十九日

諫篠兩電均悉已轉達外部查海蘭泡係中國地面所索海蘭泡商埠碼頭是否索海蘭泡對岸黑河之地江東百數十屯照約華民在彼有隨便居住貿易之權俄領事謂保護與俄民無異其言不足信似亦宜申明條約與爭請屬姚副都統相機酌議租章核定卽寄閱海蘭泡形勢界址並繪圖詳示

致程中丞

光緒三十四年正月二十四日

頃俄領出視璞使來電謂執事擬撥地段在頭道溝迤北實難安設碼頭必須在頭道溝迤南並云原指地現已讓出二里請速續議等語頭道溝是否卽養病房統希酌核並詢姚副都統近議如何速電示

致外務部

光緒三十四年正月二十七日

據江撫來電俄領事以商埠一事燈照以北之地華政府已許撥給姚都護有意推諉欲與江撫在省商議經該撫辯駁以姚都護祇奉政府飭令商辦并無徑許撥給之語且璞使所謂互換利益姚都護與古思敏屢次提議均置不理現在江東六十四屯華民尙流離失所反在江西人煙輻輳之地令原業主退讓實屬無此辦法因索還江東六十四屯以爲抵制該領事無詞惟始終欲在頭道溝以南撥地該撫以頭道溝以北係前駐省之林達所索仍

就此撥地該領事爲古思敏所使自知理屈願將以上情節轉達
公使再行商量云云特此佈聞請鈞部始終堅持當可就緒

致外務部

光緒三十四年二月初一日

勘電敬悉俄使所稱地段一節詢之雪樓云俄領事堅求劃給距
燈照以北二華里之地當以燈照北至頭道溝計二里有七分僅
展二里適當要害斷難允許已由奉轉達大部在案茲又稱距燈
照以北僅華里十分之八較前地段更近窒碍愈多大部覆以查
明再核仰見慎重邊疆之意頃接姚副都統電稱屢照會古思敏
索還江東并求相當利益迄未照覆查愛琿係我宣佈開埠之地
各國自應一律辦理三十二年俄索北瑛地一大部尙未允許今
迭欲要求我城基有主之地商議愈久術益狡譎微論我商民無
地遷讓且一經照撥則愛琿原有生計亦勢將掃地淨盡仍祈大

部力商璞使轉飭俄員務須求彼此相宜之地并商互換相當利益仍由大部始終主持冀彼就我範圍是所切禱

附姚副都護來電二

查百十一號燈照至養病房共四百八十八丈五尺計華二里七分此燈照適當東北隅距商埠界線尙有二百八十一丈五尺實在商埠界外爲華商設市要害之區前呈城基商埠兩圖因燈照非中國所立故未詳查繪入其圖中碼頭基址原擬自築備華洋各國公共租用實在華商已設市江沿萬難許俄獨占養病房雖劃入商埠與俄員說係由頭道溝起前已聲明升初八赴海蘭泡磋商容再電陳

昨午一點與俄撫晤言及江東難戶泣請歸業事渠惻然曰此事非我故意推諉緣事關重大未奉我政府贊成碍難主

議貴副都統照會爲難情形我已盡知業請伯力總督轉我政府仍望請貴督撫轉政府聽兩政府從長議定以便我等遵行等語當答以業將照會各情請我督撫轉我政府矣因其言婉而駭不便重費詞與之欵洽而散復至廓米薩爾署告以前照會貴署互換利益事乃璞使之意我政府行知我督撫轉飭敝署遵照今特來商定辦法彼答云我并未奉璞使互換利益之訓條前接貴照會始知此說我不能據此商辦復問云旣不以我一面之詞爲據應將未奉璞使互換利益之意照復彼云此事已請我伯力總督示此時不便照復除將問答詳情另咨呈外先此電聞

致唐中丞

光緒三十四年三月初一日

自璞使故後霍爾瓦特回哈所有哈埠自治會愛琿索地事似稍

有轉圜之意或皆從前璞使主持所爲且璞使本春間擬回國故
急於催成愛琿索地事見好於本國亦未可知近日公晤俄代使
否情形如何當可略得底蘊

退耕堂政書卷四十七目錄

電文五

俄人擅捕邊懇局員案

正徳元年丁丑金

退耕堂政書卷四十七

天津徐世昌

電文五

俄人擅拘邊墾局員案

致周中丞

光緒三十四年七月十一日

滿站事昨據施于兩道電稱以俄員誤認鬍匪遂擅自劫拏華官現已將閩丞送回原局辦事然據宋道來電該局設立多日又經與俄官接洽豈有誤認鬍匪之理已據情電達外部向俄使嚴行交涉一面由交涉局與公司理論至撤毀國旗一層尙未見宋道電報唐帥今日到奉知念並陳

致外務部

光緒三十四年七月十一日

據呼倫貝爾宋副都統哈爾濱施道于道先後電稱滿洲里設立邊墾局派閩丞前往辦理曾經照會駐漠俄外部官該站剿匪並

正續卷四十一
派閩丞會議亦經函知鐵路交涉總局照會公司均經接洽無異
乃初七日早九鐘巴釐司總管帶兵二百名圍局立將閩丞並局
勇帶赴該公司未悉何事當就近與俄外部官交涉並由哈局查
明情形隨時呈報等語此事俄人無理已極且聞有撤我國旗情
事事關國際交涉非局員所能了應請大部向俄使嚴行詰問以
重主權

附周中丞來電

滿站一事昨已派員前往確查並據于道電稱哈局向公司
詰問閩丞已於札蘭屯放回矣頃霍總辦派代辦達聶爾來
省道歉亦已派人往查實在情形查明後自應彼此協商定
以相當處分模當逐條辯論彼無異詞除函詳外特先電聞
附周中丞第二電

前電滿站俄人擅劫華官事連日未奉覆示不審已指示宋道辦法否茲據宋道來咨有撤毀國旗等語殊傷國體此事應如何交涉應否達外部統祈酌奪見覆

附施肇基道駟興來電

自初七日職道駟興接宋道電後卽向公司詰問據稱滿站俄員報云有人在該處橫行強力以爲鬚匪故解送哈不知是官當與霍總辦電飭放回旋接札蘭屯電已由該分局簽押放回矣頃又接宋道陽電稱閩丞已回倫當經面詢並證以委員所查實無橫行之處滿洲里設局會照會外務官並飭閩丞與該站委員商明設局月餘與俄官往來接洽並會照會送犯俄官亦收押恭值萬壽聖節該俄官亦同各官往局道賀豈得諉爲不知當俄官赴局劫拏時閩丞向問因

正書卷四十一
二二
何該俄官堅不肯言但逼起身似此捏報妄拏華官殊與國體及彼此邦交有礙應請詰令公司從嚴懲辦並先送閩丞回局辦事等語此事前已照詰現職道駟興連日病痢俟稍可支持卽當會同職道肇基親向公司交涉一切情形再行續稟

附道

施肇基駟興第二電

滿洲里俄兵圍擄邊墾局事兩次照詢未覆今日職道肇基適有事職道駟興自赴公司向霍總辦詰問霍謂邊墾局設局未准知照不知是官以致誤會並以爲中國現於鐵道界內每欲越權而行彼愈退讓中國愈進如張軍門等事動用強力擠逼太甚今日所以至此職道駟興云無論宋都護於滿站設局業照會貴外務官閩丞設局後亦與該站俄員往來

無間不得諉爲不知卽使不知貴公司亦應先行照會本交涉局詢問且邊墾局係我內政本可不必知會滿站尙未劃界亦無所謂界內界外卽謂該局係在界內而鐵路合同亦無鐵路界內不准中國設立別項局所之條公司亦無治理地面權能擅拏人之事至張軍門事無論無所用強且與滿里無涉今無端以俄兵二百餘名圍我局所下我國旗擄我委員五洲各國除開戰外不聞有此駭人之交涉敝道並無權辦理此事因奉督撫憲迭飭查詢特來面問貴總辦是何用意請明以示我以便呈覆霍謂總須查查方知底細其餘辯論甚多大率遁詞再今晚具電間接該公司照會謂已派守備那達羅夫赴滿查辦卽日回哈稟覆等語職道刻亦派滿局專員熊丞冕章會同該俄員查辦以免偏執

致宋副都統小濂

光緒三十四年七月十五日

前接江電因俄人圍擄邊墾局業飭于道向公司理論嗣江省來電稱貴處咨報有撤毀國旗等語此事關係國體應早電知何以前次電文並無此語敝處非得江省電則此事並無所聞現已電達外部與俄使嚴行交涉尊處現在辦理如何情形望卽電覆嗣後遇有交涉事件務須迅速詳電毋得僅憑咨報以免延誤

附宋副都統小濂復電

刪電敬悉初次電因未查明不知有撤旗一節故無此語嗣經查明咨呈續報陽電漏未言及實屬疏忽蒙憲台電達外部與俄使交涉甚感現正與俄外部官理論伊昨已赴哈卽爲此事並咨請省署暨哈局向公司嚴行詰責無論此事將來如何解決總以先令公司將閩丞送回滿局辦事並由俄

官赴局懸掛國旗該丞承辦邊墾稅務遲則有所損失均責
公司賠償除業將咨稿抄呈外嗣後交涉事件遵當電詳以
免延誤

致外務部

光緒三十四年七月十六日

俄人在滿站撤毀國旗一事頃據江撫來電俄公司自知理屈派
達聶爾來省道歉惟此事所關甚鉅非僅派人道歉便可了事祈
鈞部與俄使嚴重交涉以重國體

致宋副都統小濂

光緒三十四年七月十八日

銑電悉此案前達外部尙未得覆現將尊電各節飭于施兩道在
哈向公司理論並迫彼撤去巴釐司總管尙能辦到庶不損失主
權俟續報情形如何再奉聞

附外務部復電

俄官在滿站圍局撤旗一事佳元諫三電均悉正辦照會間
接俄使照稱據東省鐵路公司總辦電稱自本年正月有
中國兵隊至哈爾濱未與俄官商明竟拘捕華人拷問逐出
哈境旋有中國官兵十二名被公司拏獲中國地方官不認
爲中國之兵稱係冒充官兵又本年六月杪穆林地方墾務
局委員派兵拘捕穆林車站鐵路公司會館之華役夜間闖
入該會館拆毀窗戶將華人及銀錢抄襲而去由公司委員
向該局員理論該局員覆稱與該局並無干涉又現於滿洲
里車站市街有不知何項人自稱中國官員設局徵收俄人
所購牲畜及鬃毛之稅並未知照亦未與公司商定俄商不
肯認稅被局兵擅入俄人房內拏獲送交局官當經轉飭將
冒充華官之中國人及兵丁押送哈爾濱等情請轉飭該地

方官嚴行查明懲辦冒充華官及違背兩國睦誼之人並與
申明確遵條章辦理等因查俄使所稱各節實在情形如何
其押送中國人及兵丁一節與來電圍局擄官之案究竟是
一是二除先據來電照詰該使令其轉飭該公司俟會查詳
實後須有相當之處置外希即按照該使來照各節轉飭查
明詳細電示以憑另覆

致

周中丞

宋副都統小濂

干

施道 紹基 光緒三十四年七月十九日

頃准外部電開云云俄使多所牽引意欲爲脫卸地步希即分別
詳查迅速電知以便轉覆外部

附周中丞復電

效電悉俄使所稱三事其前兩事與此次滿站一案全無關
涉至第三事所稱滿站有人冒充華官抽稅一節即係此次

擄劫閩丞一事查此事前據宋道先後電咨滿站派員設局
各節均與俄外務官先行知照閩丞與俄官往來接洽會議
公事該處巴里司何得誘爲不知認爲匪類致有圍局劫官
撤毀國旗之舉殊屬野蠻已極昨經將宋道來函暨胡委員
查覆節略寄呈鈞察俄使此次所稱各節實係藉詞狡執誠
如尊電所云預爲脫卸地步應請我公查照前寄函件電達
外部迅向俄使嚴重交涉務令撤去各站巴里司緣本非條
約所許並議該站巴里司以相當處分一面速令該公司將
閩丞送回滿局辦事懸挂國旗以全國體收稅事除進口稅
外所有牲畜羊草木業等稅仍應一律抽收以符條約無任
阻抗是否統望卓奪

致

周中丞 于道 肇基 光緒三十四年七月二十三日

宋副都統小濂施 馴興

滿洲里交涉大致情形已據前後電文覆達外部惟閩丞在彼抽稅如何情形與俄人有何齟齬希詳查見覆

復外務部

光緒三十四年七月二十三日

養電祇悉前奉巧電正飭確查茲准江撫覆稱俄使所稱前兩事與滿站一案全無干涉至滿站肇事俄員始稱有人冒充華官因而誤會全係遁詞據江省委員查覆俄人因邊墾局員閩丞在彼抽收牲畜羊草等稅捏報鐵路公司指爲匪類公司電令拏解赴哈因派兵圍局將閩丞及局勇全行擄去是俄人實因不肯納稅出此野蠻之舉動彼亦自知理屈故派達聶爾赴江道歉惟撤旗擄官大辱國體非僅僅道歉所能了事應請嚴詰俄使令彼與我懸掛國旗送閩丞回局辦事並將該站巴里司撤退庶全國體至閩丞抽收牲畜羊草等稅係我境固有主權非進口貨物可比卽

使有所辯論將來另訂辦法總以先結此事爲主免彼藉詞狡卸
至閩丞在彼抽稅如何情形是否橫行用強俟宋都護查覆再行
電聞

致周中丞

光緒三十四年七月二十三日

號電悉胡委員查覆節略亦寄到公司派達聶爾赴江道歉彼以
爲此事已了國權所係萬難稍事退讓已照尊電詳達外部令彼
懸掛國旗送該丞回局辦事並處分該站巴里司至收稅一節將
來無論如何辦法不能置此事於不問也

附外務部來電

俄官在滿站圍局撤旗事巧電計達茲俄使復稱已電詢駐
哈總領及公司總辦俟貴國委員及該公司派守備那達羅
夫並本署大臣添派駐海俄外務官查辦此事後始可於干

預之人分別懲辦至閩丞於百道界內違理徵俄貨稅並橫行用強若係事實仍應論駁等語查俄使前照已謂華官設局徵稅茲更指出閩丞則與滿站之案恐係一事究竟該使前照各節實在如何情形希按照前電詳查從速電覆以憑辯論

附周中丞來電

兩電均悉俄人拘官撤旗事關國體未便輕於了結尊見極是閩丞在滿站徵稅情形與俄人有無齟齬既經尊處電詢宋道應請責成該道詳細查覆至俄商在倫境納稅辦法本年正月曾經咨行外部稅務大臣有案容卽鈔呈鈞察

致宋副都統小瀛

光緒三十四年七月二十五日

滿站一案俄使向外部照稱閩丞在彼抽稅橫行用強等情前據

正書卷四十一
胡委員查覆亦以邊局抽收牲畜羊草等稅俄人不肯照納因而起釁是此案實因抽稅而起俄商在倫境納稅本訂有辦法閱丞在彼是否用強因何齟齬情形希並前電詳查速覆以便轉達外部與俄使辯論

致外務部

光緒三十四年七月二十六日

滿站一案頃據宋副都統查覆滿洲里於六月初設立邊墾局兼收牲畜羊草等稅曾經照會俄外務官並與俄官商明租房暫住閩丞到局曾與巴里司會議剿匪送交犯事俄人亦經俄官接收萬壽聖節闔站俄官暨巴里司均到局慶賀該丞與俄官相處尙覺浹洽突於七月初三日俄巴里司總管帶兵二百名圍住邊墾局立逼閩丞及局勇等上車聲稱即日須解哈埠將國旗崗樓一併撤去詢以何故彼不肯告但言奉上峰公事無可如何旋於

初五日閩丞等行至札蘭屯該站俄員奉到公司之電將該丞及局勇等釋回此當時起釁之大略也至此事之原因迭據查事委員報稱該局在滿站收稅有俄人開設牛羊店三家與蒙民交易蒙民均照章納稅俄人抗不遵納並唆使自治會董事捏報公司致有派兵圍局之事又俄商額羅木西二名買蒙民牛二頭羊九隻該局令其納稅俄商堅不肯納以未奉傳諭爲詞當經照會俄巴里司請其轉飭該商遵照納稅並無強進俄人屋內拏人之事因俄人額羅木西與該巴里司甚爲密切該巴里司電致公司捏稱有人冒充華官勒收捐款以致牛肉舖罷市駐站俄兵無所得食等語該公司覆電飭圍局拏送赴哈此委員查得起釁情形之大略也前奉鈞電接俄使照會亦有牽及稅務之語是此案原因實係俄人不服抽稅而起至稅務問題該丞所收係牲畜羊草等

正書卷四十一
稅爲我國有主權與進口貨不同俄人援邊境百里內免稅之例殊不適用現在界址未定不能卽指爲鐵路界內且該丞並無橫行用強情事卽使彼不承認亦應與我官吏交涉何得擅自派兵圍局撤旗種種無理事後復多方狡賴若不據理力爭將來邊事益難著手此次派交涉委員熊冕章與鐵路公司委員那達諾夫會同查明實係俄兵撤我國旗該巴里司總管但認喝令華入下旗意在避重就輕望勿爲其所惑至俄使所稱哈爾濱穆稜河兩案與此事全無干涉無非意圖脫卸尙祈始終堅持勿稍放鬆爲幸

附宋副都統小濂復電

漾電敬悉閩丞所收係牲畜皮毛土貨稅並未違理徵及俄貨亦無橫行用強及齟齬之事前電並稟抄各咨稿均已詳

陳又經省署及哈局派員會同鐵路公司查明與原咨無異
乞查核電咨外部與俄使力爭爲叩餘由閩丞到奉面稟

致外務部

光緒三十四年七月二十八日

前奉鈞電飭查俄使所稱哈爾濱穆稜河兩案茲據濱關道覆稱
本年四月公司會同吉局在路界內拏獲私押勒詐之王文斗等
十四名迭經研訊該犯等供於近時報入淮軍半未補餉王文斗
等供認誣拏私押逼勒槍械等事內有霍金才許鳳山係積匪投
誠專事擾害奉憲批將王文斗霍金才許鳳山就地正法餘犯分
別驅逐遞解回籍完案業經照會公司均稱拏獲淮軍並未作爲
冒充此公司所稱拏獲官兵之案也又六月二十晚間穆稜交涉
分局委員于德潤出外查事未回局勇二人同該處捕盜營什長
在俄國花園管圍華人董仁屋內當場拏獲賭犯魯嘉成孫勤劉

正
隆奎暨賭具多件美錢三十元餘犯由窗戶撞逃于德潤回局訊
據魯嘉成等供認聚賭呈報總局而公司亦以華兵搶劫鐵路總
會照稱當飭將全案解哈二十四五會訊兩次俄員曲袒賭犯翻
供不認局勇並無搶劫之事本可以擅拏革責局勇藉爲了案之
地無如公司專爲滿站一案騰挪意在坐實局勇搶劫乃可藉口
現尙彼此相持須另期再訊俟訊結隨時具報此公司所稱搶劫
會館之案也以上二案據該道所陳全與滿站無涉俄使意欲牽
連爲一以冀將就了事萬望勿爲所動始終堅持以伸國權爲幸

致外務部

光緒三十四年七月三十日

滿站俄人圍局一案前將詳細情形電達在案頃據宋副都統感
電稱聞丞所收係牲畜皮毛土貨稅並未違理徵及俄貨亦無橫
行用強及齟齬之事乞速電鈞部主持等情查此案於國體主權

關係甚鉅敬乞鈞部速與俄使交涉務須據理詰駁堅持到底勿稍退步東省幸甚

附于道肇基復電

滿站邊墾局被俄拘官下旗一案前因公司派員那達羅夫往查職道亦派該處交涉委員熊丞冕章會查業於真電陳明在案昨據熊丞將彼此簽押之會查華洋文節略送到雖洋文多委曲諉卸之語而大致情形尙相符合頃已分別鈔錄呈報矣又奉憲台漾電飭查聞丞在彼抽稅如何情形與俄人有何齟齬查此節亦經熊丞會查頃始稟到容將洋文譯出卽行續呈先此稟聞

附外務部來電

滿站一案前後四電均悉本部據漾宥兩電照覆俄使令其

與我懸挂國旗照謝過正式辦理並懲革該巴里司不得回
東省當差仍當眾宣明送閩丞回局辦事且將該公司一併
查辦其哈爾濱穆稜河兩處亦據勘電另文照駁惟滿站案
因俄商不肯納稅而起查中俄陸路通商章程載明邊界百
里內准兩國人民任便貿易均不納稅等語泛言貿易並不
專指進口俄貨該局向俄商徵稅按之約章本不符合不便
藉土稅爲詞與之爭辯現本部只能以俄人派兵圍局撤旗
辱官關於國體主權向之詰責至徵稅一節恐該使仍執約
論駁須預籌變通辦法除得覆再達外希查照

附周中丞來電

冬電悉查滿站抽稅一節除木植羊草係俄人入我界內伐
木刈草並非經商貿易應照合同徵稅外其牲畜皮張等稅

前准宋道來咨據稱業經商允俄官照章納稅亦不宜無端
翻異惟查中俄陸路通商章程載明邊界百里內貿易均不
納稅應俟俄使將懸挂國旗各節覆允照辦後再由我將滿
站抽稅情形詳查如有稅及百里內貿易者猶可變通辦理
但昨據于道電達度支司謂公司不認我昂站暨各站收稅
已給各站巴里司知照等語業經電達冰案此事既非在邊
界百里以內又非原訂陸路合同所有將來彼若詰我以違
約收稅則彼之違背合同侵我稅權自應一併抗議預遏其
萌請由我公據情速達外部宋道商定稅章業經抄寄想已
登鑒于道派員會同查覆情形一稟想不日亦邀電察再滿
站現仍開作商埠與從前邊境情形不同不日又將設治如
仍遵舊章百里免稅將來巡警學務一切地方公益之事費

無所出且陸路通商章程專屬俄國開埠則各國公共似宜就此立言要求改正條約於主權利權兩有裨益妥否望轉達外部酌辦統祈尊裁

附周中丞第二電

頃據度支司呈閱于道電稱據昂站錫專員稟昨俄巴里司稱奉公司飭知鐵路界內不准華官徵收捐稅請轉昂站稅局停收並云三五日有照會等語當已飛囑該專員以鐵路合同無鐵路界內不准華官徵收捐稅之條向俄員力駁嗣又傳聞公司實有通行各站公文凡住界內華俄各商一概不准華官收稅殊悖情理適昨駐北京欽使過境與以是告該使亦不知謂當問公司等語查滿站一案俄以非理相加至今未結今忽違背合同謂鐵路界內不當由我抽稅不知

昂站由我抽稅已逾三年何至今乃始提議揣其用意無非欲證彼在滿擅劫華官亦因我抽稅使然藉圖掩覆前失兼以阻抗稅權狡橫殊甚應請我公據情速電外部以占先著是爲至要

附宋副都統小濂來電

有電敬悉前電已由感電詳覆滿局一事屢查與抄呈咨稿無異閩丞實無用強齟齬情事所收之稅係土貨牲畜皮毛等物華俄人一律不得與進口洋貨同援邊界百里內不納稅之條咨稿亦經抄呈倫城早經照辦俄官商均已允認滿站何得獨異乞查核前電並稟與咨稿電咨外部與俄使力辯務令早送閩丞回滿任事俾免延誤

附宋副都統來電

初七奉冬電敬悉百里內不納稅既係泛言貿易約章所訂自未便再行爭執但滿洲里地處衝繁恐中俄商民貿易希圖免稅從此競趨該處失利甚大預籌變通辦法惟在百里界綫以外擇要設立稅卡凡各旗趕運牲畜皮毛赴邊與俄人交易先由該卡照章完稅方准前往既不致權利外溢又不與約章有違較爲握要惟地方遼濶稽徵恐難周密如果可行應再詳查地勢酌擬辦法至沿邊牲畜羊草及各旗牲畜皮毛等稅經與俄外部兩次分別訂明章程各處均經遵辦尙無異言邊墾局祇徵牲畜羊草等稅並無他項再兩奉撫帥電詢倫境牲畜皮張收稅與俄官有無往來公文並飭將設局徵稅各公文抄送憲轅等因查倫境收稅與俄外部官訂定章程咨省有案並無滿洲里設局公文一切另稟抄

正書卷四十一
三三
所購牲畜送至該局各語俄商木心貝木二名被局勇扭送
到局勒令納稅始行開釋又設局勇攜帶軍械往俄商貝木
房屋內及牀下各處搜查種種強橫因是公司不得不將閩
丞揪送四俄巴里司官指引撤邊墾局之旗華勇即將該旗
撤下查以上各節第一二三節內均係華官辦理不合亦應
請以相當之處置挽回違背約章及俄人所受勒令之辱卽
行懲革閩丞不得再回黑省當差並將向俄人所徵之稅繳
還惟貴政府若不堅持懲革巴里司及查辦公司等情本大
臣於懲革閩丞各節亦不要求至下旗一節該巴里司總管
因未見公文故不認邊墾局政治之性質此處並無辱中國
國體之處等語查此案俄人明知撤旗擄官之無理而終執
違章收稅以爲抵制本部前電卽慮及此事關主權國體固

應堅持惟收稅一節必須實與俄官商妥有案可藉爲辯駁之據希再轉行黑省將俄使所稱各節飭查詳確參酌地方情形與俄外部官先行妥商權衡此案得失輕重籌擬歸宿辦法電覆以憑核辦

致周中丞
宋副都統小瀛

光緒三十四年八月二十九日

查俄使所稱諸多狡賴彼堅持違章收稅爲抵制非徹底解決則此案雖占勝著將來亦愈棘手希飭詳查倫城稅章及歷來收稅之根據以憑覆部至部電所稱參酌地方情形與俄外部官先行妥商等語卽希察奪核辦再從前開局時是否知照俄巴里司抑係空文知照未經提明收稅之事均希詳覆據前宋都護來電似僅海拉爾知照至滿站設局收稅並未知照也統望核辦速覆

致外務部

光緒三十四年九月初六日

前奉二十七日鈞電敬悉薩大臣電覆及俄使照覆各節當經轉電江撫據覆倫境稅章係由宋道商允俄外部官訂定牲畜皮毛一切稅章共十二款其第十款載明到海拉爾或滿洲里稅局交納等語嗣因滿站設立邊墾局卽由該局帶徵至滿站邊墾局之設亦曾經照會俄官嗣因俄商抗稅屢經該局與俄員往來照會何得諉爲不知又華商入俄商屋內搜索各情前經委員會同該公司查明並無其事以上各節華官辦理均無不合詳查此案始末收稅曾經商訂不得謂違背約章邊局實行稅章不得勒令受辱閩丞係遵章辦理自不能予以處分前徵之稅係照章徵收自不能再議發還撤旗一節前經查明有華人趙升親見俄人撤下卽謂由俄巴里司指引亦屬用強不得謂無辱國體惟宋道與俄官議定皮毛稅章或係面商或彼此均有照會未經聲敘明晰滿

聞務乞鈞部始終據理辯駁毋任以違章收稅強詞抵制俟得宋道覆電再行轉達

致外務部

光緒三十四年十月初九日

滿站一案頃據宋副都統覆稱俄使所稱本國外部官及鐵路公司查明各文與華官所報不同藉詞抵制等情謹查明分條列覆一查職道前與俄外部官議定收稅章程除刈草牲畜外尚有俄商收買牲畜皮毛稅章十二條當經照會外務官並咨呈省憲嗣後鈔呈欽憲其第一條內即載明俄人前往呼倫貝爾所屬各旗購買牲畜等物又九條內聲明如俄人因呼倫貝爾境外如喀爾喀等處買貨則不納稅捐凡係倫局均應一律納稅甚爲明顯自照會外部官後海拉俄商業由外部官飭令遵章完納毫無異說滿洲里查在倫屬各旗之內自無庸另行照會且收稅係我內政

外部官既飭俄商遵辦亦勿庸候其照覆二查滿站設局曾照會外部官收稅一節係照章辦理無須另行照會至公司係辦鐵路之事地方交涉向不直接辦理故未分行知照三查閩丞照會俄巴里司索俄商上稅查閱原文並無若不納稅即將該商看押之語俄商木心卽木西貝木卽額罷木二名僅傳局令其納稅亦並非扭局納稅始行開釋及往木貝房屋牀下各處抄查種種強橫之事四查下旗一節據滿局報稱實係俄人所下而華俄官會查所報則巴里司自認飭令華兵所下當時該巴里司帶兵二百將局圍住勿論旗係巴里司所下卽係巴里司飭令下旗華兵亦安敢違抗此節顯係巴里司強迫安得飾詞諉卸況閩丞在滿站設局業由倫署照會外部官 萬壽聖節該丞設筵慶祝該巴里司總管暨滿站俄官均來道賀是已認爲華官安得謂不認邊墾局

政治性質卽是閩丞有不是處亦應照會該管上司懲處安得妄
行拏解以上種種俄使不過欲藉懲辦閩丞爲詞希圖牽掣了事
詞意顯然早在洞鑒惟查此事若過遷就將來交涉益難辦理倫
城稅貢前已抄呈照俄官承認實行之件卽是收稅根據再此間
交涉向與外部官直接辦理從前滿站設局旣照會外部官自無
庸再知照巴里司至參酌地方情形與俄外部官先行妥商一節
此事旣歸外部與俄使交涉職道屢向該外部官提及渠總以不
敢自主爲言茲奉前因遵當酌核仍與切實商辦然終恐不得要
領其歸宿辦法愚擬仍令公司先送閩丞回局懸旗辦事撤退巴
里司總管稅務一節另行磋商倘俄使堅持條約爲言卽照職道
前籌辦法在邊界百里外擇要設卡徵收以免俄人藉口等語查
此案俄使藉收稅爲詞有意狡賴應請鈞部極力堅持務將下旗

擄官一節先行辦結以全國體統希鈞裁

附周中丞來電

頃據宋道函開酌擬百里界外設卡收稅辦法等情不日想登鈞鑒惟滿埠今昔情形不同前經迭次電陳請由外部與俄使商改舊約已蒙照允如遽退出界外設卡是自行承認讓步無可復爭似宜從緩宣布仍先與外部力持改約前議如何統希酌奪

附宋副都統小濂來電

支陽電敬悉滿站收稅一節屢與外部官切商渠總以不能作主爲言前與商之辦法本將稅務另作一事現擬將此條改爲應歸我外部與俄使另議解決再行酌辦邊墾局暫不徵收從前收過俄人之稅應否發還俟稅務解決後再定其

在本站界內租房一條擬改爲華墾局仍暫在車站內租房
居住刪去不過一年一語以顧主權現因該外部官感冒臥
病須緩二三日再商俟商定後再電請示

附宋副都統小濂來電

滿站交涉第六條前收俄人牲畜稅已商俄外部官電請俄
公使照允暫交存該外部官處俟我外部與俄使議決再行
照辦餘五條仍舊如屬可行祈速電覆遵辦

復宋副都統小濂

光緒三十四年十一月十二日

盛電悉滿站交涉第六條暫存俟我外部與俄使議決再辦其餘
五條仍舊俱極妥洽卽請妥商前途分別辦理是幸

復周中丞

光緒三十四年十一月十三日

文電悉宋電滿局收稅暫存俄外部官俟議再定應可照准已電

覆宋仍希卓裁

一
二
三
四
五
六
七
八
九
十

一

退耕堂政書卷四十八目錄

電文六

延吉交涉案

退耕堂政書卷四十八

天津徐世昌

電文六 延吉交涉案

致外務部

光緒三十三年六月十九日

韓王被脅讓位全境騷其關係於東事者甚鉅中韓邊界久未勘定交涉必多此間無案可稽臨事必無依據擬請飭朝鮮總領事馬道選擇熟悉邊情人員到奉並攜帶界圖擇抄要卷俾得細詢一切是爲至要

再致外務部

同日

前聞韓王被脅讓位擾攘情形於東省實有關係當經電達樞臣在案嗣譯本月十八日路透電報內載日本外部大臣林董云此次韓國經理之事可作爲中國戒勿復蹈此轍否則必有一强大

國替其整理國政等語閱之殊勝憤駭此等論說居然騰諸報紙傳佈全球在我彌切強鄰逼處之虞在彼實有陵蔑中夏之勢擬請飭下外務部王大臣轉向日使詰問林董究竟有無此言抑爲該報所捏造但一經宣佈於中國前途大有關係也乞代奏

致朱中丞

光緒三十三年六月二十一日

吉韓界務前派王道崇文往查茲復派吳監督祿貞前往祕密測繪到吉祈接晤指示並飭知延吉廳照料保護爲要

附朱中丞來電

吉省二十五日夜又得雨五寸有餘現尙時晴時雨此後似不致再旱收成總可望五成以上吳監督祿貞已到吉省王道崇文亦尙未起程此事連日探訪延吉一帶情形與各報所載及外部來電迥異聞延吉與韓國以圖們江爲界圖江

以南屬韓圖江以北屬延延吉向無專名間島者卽外人強立此名侵佔我地亦祇能於延吉邊界謀之夾皮溝距延吉約五百里不能混入間島內韓登舉係邊外之孫在夾皮溝一帶採金前任派爲練總毫無違犯其家眷現住省城登舉昨已來省有人保其剿辦馬賊擬晤談後再定更無所謂草王及獨立國之說中韓交涉案卷已飭交涉局員詳細檢查一俟檢齊交王監督閱後卽行送奉委提濛江魁福渠聞信已來吉此案詳情不知若何該員平日名譽尙好前在延吉辦理墾務多年於該處情形最爲熟習到奉請垂詢之

附朱中丞第二電

辦理濛江墾務魁丞福前在延吉辦墾歷四五年之久於該廳情形極爲熟習並聞有日記甚詳昨令吳監督祿貞與之

晤談頃接吳監督稟稱魁丞於延吉情形莫不瞭如指掌此行若承襄助不但祿貞之幸亦國家之福懇致電欽憲准其暫緩歸案俟差竣帶同至奉等語晚查魁丞樸實有學問前案細情未能懸揣決無有逃匿情事可令周弁家泳先赴濛江詳細調查稟候卓裁現在延吉界務緊要非魁丞莫知其詳如令與吳監督往勘差竣一同赴奉尙無違誤如承允准於界務實有裨益至王道崇文已與韓登舉約同赴夾皮溝一帶查勘礦務各情當派熟悉礦產之張通判祖策同往緣夾皮溝至間島有謂五六百里者有謂近千里者若吳王兩君兩處俱到不但耽延時日且由夾皮溝至間島山路實有不通之處自不若分往查勘較爲迅便據魁丞言延吉南界有光霽峪和龍峪者山水明秀局面開朗地勢頗擅形勝現

聞彼族以光霽峪捏名東間島和龍峪捏名西間島然此地
舊隸金之海蘭路史鑑可徵中韓以圖們江爲界毫無疑義
前韓人以延吉北境有土門子河因土門與圖們音相近遂
藉土門爲界並延吉城亦指在韓界以內然鴨綠圖們爲吉
奉兩省界江二水則同出長白今奉天旣認鴨綠爲界吉林
自應認圖們爲界可據長白以爭合併電陳

復朱中丞

光緒三十三年七月初一日

電悉魁丞希仍令先行來奉俟查詢明確如無過再令回吉當差
王崇文韓登舉往夾皮溝並派熟悉之員同往甚善吳王分道亦
可但相距里數必須詳考實驗其新舊地名混淆之處尤須詳爲
考究並細勘界址以備辯論至土門圖們中國舊書所載亦各不
同此實譯音之異尊擬定界各語切當之至卓識老謀固此疆圉

初佩無似

致朱中丞

光緒三十三年七月初六日

東間島夾皮溝王道吳監督分別查勘較爲妥速請另派繪圖人
隨王同往責成王道另繪詳圖爲要

復外務部

光緒三十三年七月十四日

元電敬悉間島交涉前已經疊派道員王崇文監督吳祿貞分往
查勘先行據報大概情形此地隸屬延吉廳確係中國領土在該
地韓民均係從前越界私墾不能因韓民居留之多寡遂指爲未
經解決日使請由統監派員保護斷難認可務請大部力持嚴行
拒絕至所稱韓民受馬賊無賴凌虐等語現在併無此等情事彼
係藉詞意欲侵佔我領土地方之治安仍應由我設法保護東省
刻卽添派幹員前往妥籌辦法以免有所藉口王吳兩員現尙未

歸所有詳細情形辦法再行續呈

附外務部來電

日阿部代使照稱日政府訓開間島爲中國領土抑爲韓國領土久未解決該處韓民十餘萬受馬賊及無賴凌虐擬卽由統監派員至間島保護請速電該處華官免生誤會等因該處界務日政府亦謂未經解決若不速籌會勘此後辦理交涉恐多膠轕日員保護韓民所駐地界總以各不侵越爲要義韓繕圖卷到尙需時希將吉省舊案詳加稽核並查照本部六月密函迅卽遴派妥員前往佈置仍將日員在該處舉動隨時查察相機因應事關界務統望盡籌會商妥辦卽電覆餘函詳

附朱中丞復電

寒電及外務部元電均悉日藉韓民爲名意圖侵佔公電部力持盡籌深佩延吉廳阮丞適因公來省詢及近來該處實無鬍匪擾亂情事且和龍峪一帶據該處經歷報單華戶只二百餘戶韓民有二千餘戶越墾韓民多於土著何憂爲無賴凌虐卷查中韓邊務自二十六年以來韓視察官李範允屢來騷擾中間復有令其薙髮一案轆轤至近年而諸案皆結更可杜日人之口惟彼既蓄意出此恐非口舌可爭晚與阮丞商之不如卽藉薙鬍匪爲名速派新練重兵駐防彈壓隱爲抵制或亦將計就計之一法至於現在辦理邊務勘界之外似當從分土設官入手查延吉轄境遼濶祇設有同知一缺和龍峪經歷一缺經理邊務殊不足以保衛治安嚴杜窺伺細察形勢參諸輿論擬將延吉廳升爲府治改和龍峪

爲縣益以敦化縣隸於該府過敦化而西劃濛江夾皮溝樺樹東等處設一府治分立廳縣兩府之上設一兵備道缺扼要駐紮以資鎮懾該處地廣兵單又當添調防營分段駐守然後將招民實邊諸事次第規畫從前招墾但圖收得荒價不論民人墾否每多富戶包領待價轉售多年不墾殊失殖民本意如蜂蜜山已放地二十餘萬晌現墾熟升科者只三千餘晌是其明證此後若實力開墾應令其隨領隨開或一年後繳荒價三年後升科鄰省貧民間有如此利益來墾者必多然似此辦法非官家籌大資本不可總之無民不能設官無兵不能安民均連類而及我如隱有設備彼或漸絕覬覦事關籌邊重要急待公來定奪以便迅速佈置前外務部密函做處已擬就復稿吉韓界務卷冊亦已檢齊如節鉞緩

臨擬送祈卓裁會同函復如何余道屢次展緩意欲俟胡殿
甲到省接洽始行赴延現據吳道祿貞自額木索函稱途遇
胡殿甲因阮丞已進省彼等人地生疎邀同赴延余道當卽
赴延德城守尉所帶之函尙未接到劍池前有電來因有清
恙稍緩赴吉近想痊愈速來爲盼

致朱中丞

光緒三十三年七月十五日

胡殿甲遲延多日未來請嚴飭限其十日內到奉余道已否赴防
接替現因間島交涉又加札派其迅往會同吳監督祿貞速籌佈
置事關重要刻不容緩應請飭其速往並將防營如何先行佈置
前進會商辦理情形先行稟復核奪統希卓裁施行

致朱中丞

同日

昨外務部來電稱日使以間島韓民受馬賊無賴凌虐擬派員保

護等語已覆請外部嚴予拒絕並轉達冰案矣查日人於和龍峪光霽峪等地意圖侵佔蓄謀已久該處中韓雜處難保不滋生事端令彼有所藉口惟保護地方係我主權希就近札飭余道濬酌帶軍隊向和龍峪一帶進紮以資彈壓吳祿貞想已到彼並加札派令會同辦理目下若何佈置該處日人有何舉動均令隨時詳報因應一切仍仗盡籌

致外務部

光緒三十三年七月十五日

韓吉邊務轉轄昌等到東卽經留意旋派吳監督祿貞前往查勘據報大概情形並地圖一紙另行抄呈查日人所稱間島卽延吉廳屬和龍峪光霽峪等地在圖們江北境確係中國領土從前韓民越界耕種歷經北洋大臣吉林將軍辦理有案卽日人從前繪圖亦以圖們江爲中韓分界自日俄戰後日人始蓄狡謀以圖們

正書卷四十一
土門譯音相近公然劃入韓界實則土門河發源長白山爲圖江之支流豈得據以相混夾皮溝屬吉林府距省城僅二百餘里與和龍峪光霽峪相距約八百里更屬無從牽涉日人強立間島名目又將夾皮溝混入間島區域內種種陰謀欺我已甚今阿使來文稱屬中屬韓未經解決亦知此地不能公然據爲韓界而伏此一著以爲將來狡賴地步若目下聽其派員保護彼謂我已承認卽已得所藉口務希嚴行拒絕俾息覬覦現已派幹員前往籌辦並飭延吉軍隊向前進紮以資鎮懾祇須圖們江一帶界務劃清則夾皮溝之事不煩言而解希查核辦理無任企禱

附外務部來電

問島係日人強立名目其地旣爲延吉廳所屬在圖們江北確爲中國領土斷無任日人派員前往保護之理尊處電稱

各節與本部看法正同業經據以駁復阿部代使矣惟界務
輻輳日人又蓄志侵越恐非一照所能了事仍希密飭派去
之員詳細查勘並妥爲佈置以備將來分界時較有憑藉一
切統望蓋籌

附朱中丞來電

頃晤島川探詢延吉廳事據云已由伊藤侯派齋藤中佐約
帶兵二十於十二日到彼處保護韓民渠初擬與東省督撫
商允再行派員伊藤不聽渠現亦不管寶云現在彼處甚安
靜何庸貴國派員保護且韓民較多中國民決不能凌虐島
川云韓民雖多於中國然彼實畏懼中國民故派員保護特
此電聞

致外務部

光緒三十三年七月十七日

據吉撫電稱日本以延吉韓民爲中國凌虐遂以保護爲名派兵前往但該處甚屬平靜韓民亦無在地方官控告之案卽有凌虐情事亦應中國認保護之責何得由日本派兵前往名爲保護深恐別有覬覦應請鈞部詰問阿代使囑令將兵速行撤回並告其已由我派員帶隊前往查看如有應行保護之事必當相機妥辦也統希鈞核電覆

致朱中丞

光緒三十三年七月十七日

邊事規畫精詳所議設官招墾諸條洞中肯綮敝處前擬設缺底稿卽希酌核以備商定實行放荒注重殖民確當不易俟到吉後詳議舉辦目前派兵駐紮延吉先杜彼派員保護之計仍應就吉軍調派陸軍駐省勢不宜分若將馬步零星抽派殊難得力如就近兵隊太少請知照張翼長抽回一營速行派駐延吉較爲合宜

尤須先派妥人詳查赴吉軍路繪圖呈報核奪爲要余道應飭速行會同吳祿貞妥籌辦理昌本擬日內來吉因大島來奉屢次愆期現與定期大約二十日外可到俟會晤後卽啟行和龍峪一帶情形已據尊電函達外部吉韓界務卷冊請飭卽送來爲盼胡殿甲魁福請并飭從速來奉均勿再延切勿令胡同吳赴延爲屬劍池恙愈後卽屬其速行吉省官缺未定擬先派伊督辦交涉事務如何

致朱中丞

光緒三十三年七月二十五日

日人派兵越界一事前已據尊電轉達外部尙未得復乃頃據吳祿貞十三日報告日兵越界約四十人已抵和龍峪當由延吉廳朱巡檢將情形飛報尊處此次日人不遵公法顯背約章並詭事已得我政府允許種種不法行爲無禮已極而我前派之兵隊已

否由余道帶往會同吳祿貞辦理殊深懸念現已電達外部仍請嚴詰阿代使令其撤兵一面尤宜不動聲色相機因應該處向多馬賊應厚集兵力嚴防亂匪以免日人藉口至籌備邊防應否移紮兵隊於額木索銅佛寺一帶以剿匪爲名藉資鎮壓該處舊日界碑尤應速行派兵防守以免移動此爲最要吉林至琿春及延吉之電綫聞廢桿尙多亦宜速爲修接俾通消息延吉廳甚關緊要阮丞恐難勝任現擇派陶令彬馳往接辦該員精於東文素諳交涉且甚穩練現署西豐已令其卽日交卸赴吉趨叩台端面求指示希將以後辦理情形隨時電示至要至盼

致吳監督祿貞

光緒三十三年七月二十五日

接十三日報告均悉日人越界駐兵不顧公法顯違約章無禮已極幸閣下已至延吉代爲佈置閱致齋藤函及與胡統領所商地

方官應行辦法各條諸臻妥協足見才畧勝人勇於任事稍紓鄙意惟日人自越界後近日不知作何舉動吉林所派兵隊已否到防余道何時到延吉均在念中已電致外部詰問阿代使令其撤兵免生意外轆轤所需測繪生已酌選卽令往延吉相助繪圖該處甚關緊要自應速擇幹員前往其預防馬賊籌備邊防已電告吉撫速爲籌辦由吉林至琿春及延吉之電綫亦應急爲修理以通消息最要者舊有界碑應速飭人看守倘有挪移將來更形轆轤此事在我祇有請外部與之詰問迫令撤兵一面厚集兵力相機因應以絕其覬覦之念並繪圖證明國界以備談判之根據閣下旣在延吉尙希悉心籌畫與余道妥爲佈置素悉槃才正可出其所學以資歷練惟此事關係重要尙希慎密圖維立於不敗之地並將詳細情形隨時報告至要至盼

致外務部

光緒三十三年七月二十五日

前發洽電以日本藉保護韓民爲詞派員越界請詰問阿代使速令將兵撤回未知所議如何殊深懸系頃據派往之員監督吳祿貞報告該員於七月十二日抵延吉廳卽聞日本軍隊駐紮於會寧鍾城兩府有二三千人聲言不日渡江居民恐懼卽有日本通譯官村井到駐紮該處統領胡殿甲處面稱日人派兵渡江囑伊不必干預復至延吉廳署內出日本統監府派出所齋藤季五郎致阮丞信且云中國政府已允日本派兵渡江駐紮准於十五日進兵延吉街請告諭人民無須驚恐等語適阮丞進省未歸由朱巡檢將情形飛報吉林巡撫一面將胡統領所統隊伍暗調至沿江布置以重邊界乃日人於次日八鐘由齋藤季五郎憲兵少佐境野竹之進率兵渡江並云奉有中國政府公文允其越江駐兵

防江幫帶胡安邦以未奉中國命令阻之日本聲言此次越江進兵事在必成萬無退卻之理卽無中國公文亦須前進胡幫帶無力阻止日人渡江者約四十人均帶武器及朝鮮巡警二十餘人快槍四十餘枝韓國牛車約五十輛所載皆軍需品晚住和龍峪地方僅距延吉廳七十里已越界六十里等語查此事早由倣處先後派員往該處查勘情形後接吉林巡撫東電復加派余道濬會同吳祿貞酌帶兵隊前往駐紮並電請鈞部詰問阿代使在案乃日本不候商酌亦不照會督撫一意進兵越界並詭稱中國政府允許不服阻止其欺詐地方官吏蠻橫無禮不遵公法顯背約章實屬不法行爲是藉保護爲詞陰欲破壞中韓舊界而窺伺和龍光靈兩峪東南一帶之地跡已彰著應請鈞部嚴詰阿代使飭令卽日將兵隊撤回韓民在我境內由我自行保護一面仍令派

正書卷四十一
出之兵隊相機因應舊日界碑已電朱中丞派人嚴守倘耽延不
決必至枝節橫生將於界務大有妨碍務乞鈞部力爲主持毋令
延宕並將詰問以後情形隨時電復至要至盼

附朱中丞來電

有電敬悉延吉界務重要自應早爲佈置十九日寄上包封
一箇內延吉韓邊界務卷二十三束延吉廳專人送省稟二
件言日人十三事較詳及寶所擬復外務部信稿各件接尊
電至今尙未接到殊深焦灼已電飭長春府嚴查派兵一事
寶前因省中防營不到百人經張翼長又將各處防軍酌調
赴剿就近難再抽撥曾致電擬由省中撥陸軍馬步隊由余
道帶赴和龍峪彈壓隱爲抵制嗣奉尊電以陸軍勢不宜分
零星抽撥難期得力只有電商張翼長抽回吉軍馬步二營

赴延昨得復電已由每統領下抽調二三百名交吳監督余道設法調遣幸延吉一帶近尙安靜日前再三面詢阮丞據云現在該處實無大股賊匪不勞屢念寶終以吉省地廣兵單剿匪防邊勢難兼顧現張翼長橫道河子已獲全勝可就此整軍一力翦滅免外人有所藉口仍望增派陸軍赴延駐各要隘阻其狡謀惟延吉電綫不設交通多滯額木索驛站及各防營有關於遞送公文者業已嚴飭速遞卽專人前往須五六月始至往返卽須十餘日邊事瞬息變幻消息不靈徒勞焦急此間電桿電綫尙多求飭黃道早日安設爲盼阮丞已捐俸滿再三求交卸赴引寶已批准本擬俟節鉞蒞吉商酌委署現委陶令往代甚善請卽飭速來余道亦恐難勝任前函求派劍池往辦何如子明查件昨已寄奉子明以密

查之件初未與商及稟辦好始恣恣一閱卽封其稟內似尙有未盡之處昨日晤島川從旁探問延吉近況據云現在外務部與阿使商令撤兵伊等不肯撤須候勘界現在該處官兵尙求延吉廳保護等語此次日人種種無禮惟有請外部嚴詰迫令撤兵再查銅佛寺距延較近似須駐兵彈壓額木索距延尙有四五百里似無須再添兵致吳祿貞電已由寶加函專人送往矣

附外務部來電

有電悉前准篠電已於十九日照會日使撤回日兵並於昨日抄稿附入密函計已邀覽昨日阿部代使照復日政府訓開康熙五十一年白頭山分水嶺界碑自土門江以南至豆滿江之間卽韓國所稱之間島前年中國向韓政府提議勘

界今未解決是以豆滿江爲中韓國土韓尙未認中國在爭論之時自設延吉廳近在六七年韓亦未認並以該廳對於韓民行爲曾經抗議更自設間島管理官配置兵丁以保護韓民嗣該地爲俄所佔俄兵退後秩序大紊匪賊橫行韓民來請保護決派齋藤中佐前往乃省撫謂地方平靜與事實相反日人在該處被馬賊虜殺且近十人齋藤攜帶少數憲兵專爲保衛巡察地方官勿生誤會等因查康熙年間穆克登碑文有東爲土門之說並無分界字樣日政府意在侵越諸多牽混至謂韓在該處自設兵官卽指李範允而言屢經本部照會韓使並咨行駐韓許使切商韓廷將李範允撤回有案該處亦並未被俄人佔據來函所附吳祿貞圖說載明十處界碑極爲清晰尊處飭將界碑嚴守所辦甚是本部卽

發按照函電參考成案再行切實辯駁此次日人率兵越界中國並未允許彼已强行闖入殊屬無理若僅恃筆舌爭衡不籌實在辦法勢必枝節橫生漫無結束前次本部迭次函致許使往商韓外部派員會勘以中俄戰事中止現在日政府提及此語擬仍商由日政府轉致統監先將兵隊撤回一面各派委員前往勘辦以期各守各界希迅卽會商吉撫妥爲籌議至該處日人有無被馬賊虜殺情事並希嚴飭查拏實力保護免致藉口卽電復

附朱中丞來電

近日派員查明琿春一帶中俄接界處原設之銅柱石碑損壞一處遺失八處自應修整惟事關兩國界務未便獨行擬先照會駐吉俄領事轉行俄國邊吏派員會同勘就仍於原

處補立以清界限是否如此辦理望卓裁張軍奪回之日人
二名已同島川言明就近交哈領事島川卽電告東京矣十
九所寄中韓界卷等件曾電查長春文報局於二十三日交
奉文報局想已收到各處地方官有不能勝任者擬俟公來
面商替人惟磐石縣李洞心地糊塗諸事廢弛勢難再延擬
撤省察看委候補知縣劉贊棠署理劉令係福建舉人辦事
結實人尙開通卽吉省候補中出色之員公如緩來望卽覆
示

復朱中丞

光緒三十三年七月二十八日

沁電敬悉琿春中俄界碑既有損失自應修整補立惟當先行詳
細查明原立基址所在並現存碑柱尙有若干可以援爲證據派
人考訂明確繪圖立說方可與人開議公意以爲何如請先飭查

至會勘界務自屬正辦但宜電請外部與俄使商訂方可派員繪勘似未便遽與駐吉俄領直接統希卓裁中韓界卷收到昨經電復磐石李令既不勝任請卽先行撤省察看並照尊電委劉令贊棠卽行往署以資整頓

復外務部

光緒三十三年七月二十八日

宥電敬悉日人私在吉林境內徧地繪圖不下數百人前將軍以爲游歷人員照章給與護照保護日人既分往各處任意闖入時有騷擾情事其有兵駐紮地方尙可隨時巡察知其所爲至無兵之處被匪戕斃間或不免昌等蒞任以來以彼私入內地繪測輿圖不允承認彼亦自知有悖公理故以前雖間遭戕害並不敢與地方交涉爭論福島來奉時曾談及此亦告以日人不應在我境內擅自繪圖惟昨有日匪古川清勾串馬賊綁擄日人二名意在

恫喝訛索陰挾狡謀然其計固未得逞現經張鎮勳將該二日人奪回由薩道送交駐哈日副領事接收並經商同吉撫飭令乘勝進兵實力查剿以免外人藉口來示仍商由日政府轉致統監先將兵隊撤回一面各派委員勘辦以期各守各界自係實在辦法盡籌深堪欽佩遵卽電商吉撫會同妥議籌辦俟議定後再行電陳督核

致朱中丞

光緒三十三年七月二十八日

宥電敬悉尊處包封寄來各件均經照收派兵一事現正飭查軍路再行酌辦張翼長擬由每統領下抽撥二三百名交吳余設法調遣辦法甚合請飭速往該翼長橫道河子一捷尊意欲乘勝進兵實爲要著延吉交通多滯自應早日安設電綫已分電外郵兩部並飭黃道照辦阮丞急求交卸業催署任陶令速往簡始現正

閱看案卷隨後卽來外部與阿代使商議撤兵事頃已得復當將原電另達冰案銅佛寺額木索駐兵事容緩再商

致外務部

光緒三十三年八月初二日

間島界務業將近情迭電鈞部茲復據吳委員祿貞胡都司殿甲先後稟稱日人齋藤駐紮六道溝現有日本兵隊及朝鮮巡警約三百人乘馬百餘匹尙有兵隊陸續渡江由會甯運來之軍需軍械每日車輛多至五六十乘並預備建造房屋且有令韓民免納中國斗稅之說一切舉動大有永遠駐紮實行保護韓民之勢復譯齋藤復胡都司函有萬難承認此地全係中國領土等語狡謀叵測後患方長當飭該員等相機因應堅忍以待又吳祿貞稟稱吉林所呈地圖多有謬誤切不可出示日人至圖上之士門河該處並無其名實卽布爾哈通河土門之名本係捏造云云該員考

證確實當無疑義合并轉電鈞部核辦

致朱中丞

光緒三十三年八月初一日

東電悉展地伐木煤礦合同附議各節已會尊銜照轉外部延吉
近日情形如何現飭陶令彬卽日前往余道抵延吉後卽飭胡殿
甲速行來奉尊議令吳祿貞夾皮溝事竣仍往延吉辦理界務甚
善當飭遵照惟陳吳手無實權未免運掉不靈擬派劍池督辦吉
林邊務兼充吉林各軍翼長祿貞幫辦吉林邊務兼會辦營務處
以一事權而期得力已會尊銜辦照會札文寄請核畫仍望蓋籌

附外務部來電

吉韓界務來函所論三項規畫周詳切中事理良深欽佩圖
們江爲吉韓天然界限日人所稱間島卽我和龍光霽二峪
在圖們江以北茂山以東界限本極分明非如茂山以西之

江源尙有爭執核與本部歷來考證均屬相同申明鴨綠圖們二江同出長白山西南流爲鴨綠以界奉韓正東流爲圖們以界吉韓據此辨論自是確當不易夾皮溝尤與間島無涉日人私議用意叵測不可不防練總韓登舉置產輸租歷有年所既能保障一方自應加以獎勵本日奏奉

諭旨韓登舉著賞給參將銜欽此希卽轉飭欽遵酌量任用至沿邊應辦事宜如設官練兵移民實邊諸要政統望次第經營妥籌辦理另函布置一切均甚妥協甯古塔一帶設電已咨郵傳部查照嗣後如何情形隨時電達爲要

附朱中丞來電

頃接胡殿甲前月二十七由延吉來呈據偵探員報告日人在各處購買木料擬由六道溝口通鍾城安設電綫又韓人

之改爲日本服色者搖惑人心太甚韓民因之離散者多現
在韓人由北往南華人由南往北紛紛遷移吳監督於二十
四日赴和龍峪鍾城察看再赴長白山余道已到約二十八
九可以抵營云云寶度察該處情形似有荒亂之象昨奉惠
示日使已允撤兵勘界目下似應將各情電達外務部與日
使磋商速令撤兵以免民心驚疑致生枝節陳吳兩君辦理
邊務自應假以事權照會札文寄到卽照畫子明查件因飭
密查初未與寶商及繕發時恩閱一徧不暇更改茲將來電
令其明白查復容再詳酌電陳前岑雲帥奏請預備立憲各
節奉

旨着各省督撫妥議具奏此等摺件似未便會銜尊處已覆
奏否卽請示知

復外務部

光緒三十三年八月初四日

江電敬悉日韓界限既與鈞部歷來考證相同當飭界務各員據此辯論韓登舉奉

旨賞給參將銜遵卽轉飭欽遵使之感戴

皇仁自必樂爲我用頃接吉撫電據吉強軍統領胡殿甲派出偵探員報告日人在各處購買木料擬由六道溝口通鍾城安設電綫現在韓人由北往南華人由南往北紛紛遷徙察度該處情形似有荒亂之象請將各情電達鈞部與日使磋商速令撤兵以免民心驚疑致生枝節吳監督祿貞現赴和龍峪鍾城察看再赴長白山等語日人無端越界該處華韓民庶不免疑懼自在意中前已飭胡殿甲等相機因應堅忍以待但日人侵我主權遽行駐兵設電殊出情理之外日使前復鈞部有允撤兵勘界之意似應速

爲開議庶可徐圖補救仰候鈞裁再已派陳京堂昭常督辦吉林邊務卽行前往延吉一帶親歷考察並派吳祿貞幫同辦理加派測繪員生尅期前往先將各界履勘明晰將來勘界庶有把握容卽專摺密奏

附外務部來電

支電悉吉韓界務日阿部使照復僅敘及中韓議勘成案並無允我撤兵勘界之說頃阿部面稱日政府派兵保護該處韓民並無他意本部仍催令撤兵並將勘界一節面與提議該使稱卽當轉達日政府等語希卽派定勘界大員先將銜名電達本部以便照會該使切實商辦

致外務部

光緒三十三年八月初七日

魚電祇悉延吉邊事近接吳祿貞報告該處現有日兵及朝鮮巡

兵約三百人乘馬百餘匹尙有兵隊陸續渡江每日運軍需軍械車輛多至五六十乘並預備建造房屋大有用強硬手段佔據其地之意並聞俄人在琿春將窺伺日本舉動乘機並進若不善籌因應恐大局潰決不可收拾仍請鈞部催彼撤兵認我主權爲要現已派前郵傳部右丞陳昭常督辦吉林邊務俟日本派有勘界專員即可派爲勘界大員會同辦理練兵處監督吳祿貞周厯測繪情形熟習卽派幫同辦理張兵在橫道河鐵路滋事現派員往查再行電聞

致朱中丞

光緒三十三年八月初八日

吉韓邊事外部電屬派定勘界大員擬卽派劍池辦理吳祿貞副之現由敝處具奏延吉邊情並帶敘此節又張鎮剿匪情形亦應奏聞均擬會尊銜入告摺稿容再寄畫特聞

致外務部

光緒三十三年八月初十日

日領事荻原來問間島中國何以派兵因告以該處延吉廳本有四營近彼以韓人被擾藉口進兵保護是以酌加兵隊前往駐紮彈壓迭據該處報告地方甚屬安靜恐阿部來問特告

附外務部來電

勘界撤兵兩事本部已電達駐日本楊使切商日外部得復再達頃准阿部照稱該處祇有日本憲兵三十名韓國巡警二十名爲保護韓民護衛日官起見無煩過慮等語究竟情形如何希飭迅查電復

致外務部

光緒三十三年八月十四日

文電敬悉吳祿貞適由延吉回奉據稱七月十二日齋藤渡江所帶憲兵四十餘名韓國警兵二三十名憲兵少佐一員二十二日

又來憲兵大尉一名憲兵三十餘名其住處附近有乘馬百三十匹又會甯兵隊時來時往僅隔一江難以確查兵數必不在二百名以下此八月初一以前情形以後有無變動雖不得知但以兵越境多少均違約章應請鈞部轉告阿使此後凡屬兵卒均禁武裝越界以肅邊防而便稽查等語合先電復容再探近日情形隨時電聞

致外務部

光緒三十三年八月十六日

頃間荻原領事來署談及延吉事務詢派官帶兵前往是何用意當答以現派大員督辦邊務並爲勘界大員以備將來貴國派員會同勘界此次帶步兵兩隊馬兵一隊爲督幫辦等護衛之用並因阿部代使告我外務部云該處馬賊充斥故不能不稍厚兵力以保治安荻原復詢以添派軍隊必須兩國商議爲宜答以延爲

我國疆土主權所在非貴國所得干預復告以齋藤帶兵越境擅
出告示曉諭韓民擾我地方行政種種無禮情形且阿部云祇有
憲兵二三十名惟據我員報告此次過江日兵多於阿部所告者
不啻十倍總之兵隊帶械入我境內無論多寡總犯約章應速撤
回齋藤及一切軍人並宜迅速派員勘界免致有傷交際荻原允
爲報告其政府籌辦云又陳吳兩員日間起程赴延如阿部到鈞
署詢問派官派兵情事望乞照此裁答爲盼

致朱中丞

光緒三十三年八月十七日

齋藤外示和平內懷狡詐自在意中惟據阮丞稟稱六道溝駐憲
兵三十廳街駐兵十餘證以調查員報告兵數實不止此是否近
有撤移抑或分駐各處仍請飭令詳細調查隨時稟報日官既不
過於多事在我亦宜暫爲羈縻俟陳吳到吉時再請公指授方略

正書卷四十一
十一
前往相度機宜預籌因應昨日總領事萩原到署詢及陳吳前赴延吉事業將現往督辦邊務及預備將來勘界大意告知渠允電致其政府籌辦此間亦將問答情形電知外務部矣知念並聞

致朱中丞

光緒三十三年八月二十日

皓電均悉吉強軍派陳守麟璽接統已飭趨叩台端請指示機宜並催令前往吉省森林已據宋道擬定章程切實可行尊議逕用官本極是卽請試行籌辦吳祿貞今日起行到後請吩咐速行延吉近當安靜陳京堂明日行到吉再請指教一切

致朱中丞

光緒三十三年八月二十五日

漾電悉頃萩原來稱尊處告島村云陳京堂擬帶馬步隊各一營與日前所云步兵二隊馬兵一隊實在加多當答以陳京堂共帶護衛步馬兵共三隊至島村所謂兩營之說想是誤聽彼又出視

其接東京外部電稱齋藤所帶憲兵二十名韓國巡查十名此外係兵員隨從之人從前不但毫無出兵之事實則以後亦非萬不得已之時不再增加憲兵云謹奉聞

致唐中丞

光緒三十三年八月二十六日

濛電悉日領所稱種種無禮意在挑釁該地既尙待勘定彼突派憲兵巡警越界駐紮我所派兵隊目前尙未到延吉可見自彼發端將來如有意外之變動中政府不能擔其責任現外部正與日使交涉並電達駐日楊使與日外務部商酌總期彼先撤兵然後勘界庶可和平解決

附唐中丞來電

此次日本提出間島問題鄙見首要不認有此地名迭經向荻原聲明此層現在簡始所帶之護衛隊無論多寡均係在

自己境內我並未越入韓地彼不應作爲一著要的問題設使我酌減少數乃彼意在越境侵犯挑釁勢必加增兵數屆時難免衝突殊屬可慮若不趕緊向日政府聲明中朝版輿無間島名目彼以延吉廳之境屬作爲間島者其錯在彼就論日本有保護在我國內韓民之責蓋該等韓民當初如何受我制治均有文據可憑若日人任接保護應俟中日重定新章方可廢棄前文此係兩國之限免資藉口

致唐中丞

光緒三十三年八月二十七日

外部復日本阿部代使節略錄寄鑒核如下前准節略稱日本政府爲保護在間島韓民起見派遣吏員帶同極少數之憲兵及巡檢以便行警察護衛之目的今中國派遣多數兵隊於該地未免欠穩萬一因此致起意外事變則其責實在中國政府請中止出

兵等語查節略內所稱間島卽中國稱爲和龍峪光霽峪等處其地向隸於延吉廳中國在該地方一帶本有兵隊分段駐防此次陳京堂擬酌帶衛兵百餘名前往無非因貴署大臣屢言該處有馬賊滋擾專爲隨行護衛起見別無他意何至遽起意外事變節略內所稱中國派遣多數兵隊於該地未免失據且該地方向屬中國則居住該處之中韓人民自然由中國一律保護今貴國派遣憲兵巡檢越界駐紮無論數目多寡均屬不當之舉動總之該處之爲中國土地成案具在歷歷可考卽如節略所稱原來歷史複雜尙須研究亦不應先行派遣憲兵巡檢今貴國對於此事不待研究解決輒派憲兵巡檢前往未免過當萬一因此致生意外事變則其責自應仍在貴國政府尙希貴大臣查照轉達貴國政府迅速將憲兵巡檢撤回是爲至要云云另有電致駐日楊大臣

亦同前因統望卓裁籌辦

附陳督辦昭常
吳幫辦祿貞來電

昭常抵吉晉謁經帥得讀欽帥二電知日人於派兵赴延一節頗有微言現已減少數日分班赴防經帥已向日領事言明陳吳帶隊前往蓋因胡殿甲方撤去恐其軍隊照前滋事僅帶兵百餘名以資鎮懾並無別意昭常等將於日內往拜其領事當面解說一切聞殿甲已知被參尙屬安靜昭常已陳明經帥暫留胡在防効力以安軍心俟新軍隊編定後再令其回奉庶無他慮昭常等在吉略爲布置卽行分班前往祿貞擬於四五日後啟行昭常擬於二十七日起行餘容續電

附陳督辦來電

前電想蒙賜覽旋於二十八日往拜日領事島川島川問昭常等行期並云此去延吉聞馬賊頗多昭常等隨將問島情形與之略爲解說晚至交涉局見有日領事與局公文亦以昭常等隨帶多人赴延是何舉動爲問本日島川來答拜因告以所帶步兵兩隊僅百六十餘名護弁四十名並書記各員不足三百人蓋以邊地荒濶恐有馬賊伏處且吉強軍統領胡殿甲方被撤去亦恐軍心搖動不得不少帶衛兵以資鎮懾請伊政府無庸疑慮島川亦允將此意轉達其政府諒以後於此似當無更有爭論也連日秋雨擬自初二分班陸續起行餘容函陳

附朱中丞來電

徑電均悉今晨島川來署聲明前准外務大臣之電係據荻

原領事自奉電告故有是電渠於此間情形不熟未能接洽
茲又得其外務大臣電稱接最近報告云間島僅有憲兵二
十名韓國巡檢十名向無派兵赴該處之事嗣後非遇有不
得已之處不再添增憲兵請將此意向巡撫陳明備案可也
伊似有以此次日外務部來電責荻原多事之意特此電達
附錄二十五日照覆島川文如下本月二十三日准貴領事
照會內開貴國外務大臣來電關於間島之事囑爲中止添
兵並聲明間島問題已在北京討議以及派兵之責任所歸
各等因准此查派兵一節係爲彈壓地方保護百姓起見若
如來文解爲示威運動恫喝韓民未免誤會念中日兩國睦
誼素敦貴領事迭次來轅亦深以駐韓統監不待界務議定
遽行派兵越江之辦法爲不合屢屢向本部院言之具見公

理所在具有同情此次來文所慮各節自是慎重邦交本部
院體察斯意已電督部堂與外務部協議矣現在界務問題
既由政府開議兩國邊吏惟當約束所部兵民各守紀律庶
能主客相安不生事變度亦爲貴領事所認可乃近日迭據
延吉廳同知阮忠植統領胡殿甲稟稱貴國兵官齋藤季治
郎在廳屬六道溝縱兵四出強佔民房派韓民李義英等爲
都社長清查頭道溝及和龍峪光霽峪等韓地戶口甚至逼
勒華鄉約查及華民戶口並在東古城子三四道口等處查
戶編號入山伐木備設電桿及於各韓屯廣貼告示言延吉
間島亦在戰綫以內本係戰地等語各等情稟報前來查界
務問題尙待兩國政府討議裁決行政主權尤不能兩國行
於一地曠南岡一帶韓民越墾有年光緒初年韓王屢請送

還終未實行遂於光緒十六年設堡分社編戶升科久與土著人民視同一律共受治於我國官吏之下從無異議乃齋藤輒藉保護韓民爲名帶兵越界辦理警察實已出自專裁自到延以來種種強橫如強佔民房威逼鄉約以日官查及華民戶口顯於中國主權有碍況兩國交涉首重和平而無端張貼告示加入戰綫戰地等字以煽惑聽聞鄉愚無知設有暴動實自齋藤有以激成也中國決不認咎相應縷述前因陳諸左右請卽轉達貴國外務省存案先此聲明並請速飭令該處憲兵撤回靜候勘界和平辦理爲要爲此照覆貴領事請煩查照施行今晨並將齋藤各種無禮面告島川渠亦不以爲然正擬譯發間陳京堂適來王道昨已到吉當將減少兵數一節告知照辦約兩三日內渠等卽起程矣

致唐中丞

光緒三十三年八月二十九日

據阮忠植稟稱日人現擬自韓之會甯府至廳界之六道溝設立電綫德律風並擬於圖們江上建橋以通陸路江中修船以通航路又風聞另有日兵一支於韓之三水軍甲山城等處渡鴨綠江而西入我吉林府界窺視該處頭道溝之鑛帽兒山之森林卽俗名南山裏爲韓登舉所住之區與卑廳界內之頭道溝帽兒山迴不相涉該處地方極大周圍二千餘里向未設官亦無防兵駐紮與奉省之臨江縣接壤事如果真岌岌可危與廳界情事無異等語日人在該處是否有此舉動希密派妥員往勘預籌應付以免另起波瀾總期先事布置爲要並請經帥飭抄一份送陳京堂

退耕堂政書卷四十九目錄

電文七

延吉交涉案

退耕堂政書卷四十九

天津徐世昌

電文七 延吉交涉案

致唐中丞

光緒三十三年九月初一日

邇來日政府語甚和平而日人在延吉格外干預進步陶彬刻已到任此後如齋藤等干預韓民各事不守理法應飭由陶令先行函達而一切受成於簡始並將各情形隨時報告多此轉折諸事皆留案據以爲將來簡始爭論地步尊意如以爲可卽請轉達簡始統乞卓核

附朱中丞來電

吉省所有吉韓界務及韓民越境各案據自光緒十三年起至本年止共二十二卷外圖三張已於七月間檢齊賚送奉

省在案至日外部有電稱中國兵民毆打韓人各節已用排
單飭延吉廳查復矣陳京堂於初八日赴延吳監督於初六
日先行弁聞

附唐中丞來電

頃接經帥來電稱據阮丞忠植初五日稟稱日人自韓之會
甯至六道溝設立電桿已於前月二十四日竣工現派社長
查戶禁韓人納華官租稅不應差徭二十五日有日官帶兵
至甯遠堡點放鄉甲令韓民勿聽華官管轄逼令舊鄉約退
差初一日又據勇智社鄉約稟報日官令韓民之租稅華地
者不給地東分糧並插牌山坡禁止華民打柴且憲兵在帽
山前查戶丁口房地將六道溝荒地編號插標放給韓民領
墾所有吉強軍右營稽查處防隊應需柴草日官嚴禁韓民

出售勢將斷炊其外六道溝有日兵盤踞二千餘名等情據此查日兵舉動著著逼緊而於我國遣使派隊卽致駁詰又以華民虐待韓民等事故爲藉口觀彼近日行爲恐林外相允諾電達統監轉飭齋藤靜候辦理之言終不可恃譯日本報紙論間島事謂統監府對間島之經營費昔猶出以機密今則公然發表又統監府派出川技師調查間島地質是其蓄謀已露顯悖公法我僅以口舌相爭彼竟以強意佔領耽延時日勢將滋蔓可否聯絡友邦居中談判仍從勘界入手申明調回韓民前議各管其民永斷鞶轄乞核示

附朱中丞電

荻原領事交到伊外務大臣電稱華兵虐待韓民各節已由四百里排遞札飭延吉統領及廳丞查明稟復頃日領島川

來署面稱荻原函告尊處允於七日內可將此事查復等語
查自延至吉官電尙未裝設即使加緊馬遞迅即查復往返
總須十五六日可以接洽乞將此情轉告荻原

致唐中丞

光緒三十三年九月十三日

經帥電陳各節均悉日政府語頗和平而事實上著著進行我若
靜候終恐受給聯絡友邦之策似覺迂遠應如何因應祈酌定辦
法見示並將以上日人在延吉情形面詢荻原以答其前日之言
何如

致唐中丞

光緒三十三年九月十三日

華兵向韓人捐錢不遂及向韓人強索食品打傷韓人又拘韓人
至局子街監獄等事阿部據齋藤來電告知外部請嚴辦以免生
事外部以中國本無間島之名韓人越境者應由中國切實保護

無庸日人過問力與辯駁惟所稱各節是否屬實抑係捏詞干預
函囑查復前來特用電達祈卽迅查見復爲要

附朱中丞來電

琿春副都統奏委簡始署理籌辦邊防甚善卽擬稿送核延
吉近無信來簡始等計日當早到均尙無信來想彼處近稍
安靜韓登舉已率會勇回夾皮溝近有信言日人帶兵到延
夾皮溝應早爲防備一俟派人往延查探確實卽來省籌商
一切約月底可到前已將韓剿匪情形會銜電奏俟韓來省
面商後再行電達

致陳督辦

光緒三十三年九月二十四日

頃接外務部漾電稱駐韓馬總領電稱晤統監據云前因韓民受
虐故派齋藤帶憲兵五十名韓巡二十名往間島保護並無侵略

意乃該處地方官報告政府多有誤會兩國均派軍隊在滿洲若因此衝突實非統監所願特續派員前往嚴戒齋藤切勿出于範圍之外至劃界事宜由彼此政府辦理請將此意詳告政府飭地方官幸勿誤會今早復派員申說等語伊藤統監既一再陳說並有派員嚴戒齋藤勿出範圍之語除由本部電復馬總領婉達統監轉飭齋藤先行退出和龍峪聽候彼此和衷商辦外卽希尊處密飭該處文武嚴明約束等因特轉達希查照轉飭該處文武各員妥慎籌商辦理現在如何情形望卽復

附陳督辦來電
吳幫辦

祿貞寒到延昭常嘯到延毫真電諭均已聆悉吉韓界務各卷此處必留底案刻日抄畢遵諭派弁賚呈日外務大臣所稱延吉華民凌虐韓民各節並無大事該統領廳官等已往

確查日內當可稟復諭令將齋藤等不守理法干預韓民各事一切受成於昭常任重力薄曷勝惶悚現駐光霽峪軍隊因收買柴草等事爲韓奸民金海龍所阻撓小有爭論日人又將據爲交際問題刻已派查如無大事卽當就近了結頃擬派員往各要區分駐令調查韓民保護地面偵察日人舉動以便隨時報告另函詳

致外務部

光緒三十三年九月二十八日

頃接吉林朱中丞電稱日領島川來署交到伊外務大臣來電云茲接前途報告清國官憲對中野次郎與清國人程光第在間島天寶山合同開掘銀礦事命其中止有卽使借用暴力亦必遂行其命令而後已之勢查清國在所屬未定之地方對日本人與清國權利者訂立合同而後著手之事業爲欲命其中止而用暴力

事其所爲未免甚不穩當此種問題應俟境界決定後而後解決故對中野已著令該管命其惟可維持現狀勿爲急利之擴張而在清國亦不可有擅用暴力之事務卽對巡撫妥爲注意可也等語擬備文照覆文曰查程光第前因辦理天寶山銀礦虧蝕官項於光緒三十一年冬間奏參在案嗣雖設法彌補開復原官而並無札委續辦礦務之明文是程光第已無開礦之權利昭然明甚本部院到任之初程光第雖曾稟請續辦天寶山銀礦當經面斥不准繼以其違諭私開故特札飭封禁旋據程光第稟稱天寶山各礦硿早被水淹並未招工採鑿現卽前赴安東縣與東益昌號華商李長城暨日商中野二郎等商退礦師等語聲復前來是該礦之現狀及程光第之自行退出不由暴力情形甚悉至於中野且未調查程光第有無辦礦之權限輒與訂立合同按之法律上

契約之性質應行取消且彼合同之內容如何程光第迭次來稟從無一字涉及亦未呈由本部院批准更應無效據以上種種理由應請貴領事轉電貴外務大臣諭令中野停止開採離去天寶山方爲妥協辦法云云案查程光第係候選通判自光緒十三年已承辦天寶山銀礦於三十一年冬因虧蝕官項奏參嗣雖繳款開復未命續辦晚初到任渠請試辦當以其言詞閃爍又無詳細章程嚴飭不准旋吳綬卿自延回省述及程倅在彼私採當卽札飭胡殿甲查明封禁旋得程倅稟復以礦硿被淹未蒙憲台批准未敢開採爲辭稟尾有前赴安東與日商中野等商退礦師之語亦未涉及訂立合同一字並據胡殿甲復稱親赴天寶山勘驗現實尙未動工採掘有工人八名看守昔年損壞機器日人三名一名杉村色礦師徵手程倅約來探看礦苗一名橋本一名達谷係

隨合杉村之人當卽遵札飭將此色人等一齊辭退程倅已允遵辦此刻實無興工情事既未開辦似無所用其封禁該處離吉強軍銅佛寺駐隊相近如有動作聲息較靈不妨隨時封禁等語綜合各節天寶山銀礦現在雖未開採而程光第勾通日人覬覦礦產難免不私訂合同憑藉外援牽掣內政此等喪心病狂之人亟應盡法嚴辦以免彼族藉口其日人一面如何應付祈轉電外部妥籌禁阻電示爲盼

附朱中丞來電

頃據阮守忠植回省面稟日官齋藤季治郎現在延界六道溝修蓋衙署及各項韓民房屋大小約有七十餘間修道設電日夜工作不休惟自九月初旬以後辦事漸就和平不似從前專恃強迫手段所有應徵韓民捐稅亦能照常完納本

年大租可望開徵或不致有阻撓陳督辦吳幫辦先後到延
齋藤均派員郊迎並於二十日盛裝趨謁雅意聯絡惟韓國
向有一進會名曰入該會者多爲正人所不齒自經齋藤到
後專意籠絡該會之人而重用之所以該會會長竟有刊刻
圖記曉諭韓民遵從日本因之入會者日益加多此節最易
煽惑再吉強軍素稱不靖前蒙密飭查看該軍情形妥爲預
防務令陳守麟璽到防接統冀免意外之虞曾遵飭密傳該
軍營官幫帶暨各哨官長等設法勸導喻以大義曉以利害
嚴東所部靜候新舊統領平安交接迨陳守抵防後定十月
初一日接統該軍由督辦幫辦商飭胡革員殿甲清算交代
初一以前由胡殿甲報銷初一以後方由陳守經理界限如
此劃清或不至再似從前轆轤揆諸兵心尙稱安謐惟該軍

正言卷四十一
素無紀律雖係胡革員一手招募而成奈數年以來併未深得兵心不過專事縱容見好弁勇若得陳守斟酌淘汰改良軍律將來或可望成勁旅無如駐紮延界年久人地過熟流弊亦多總宜調防他處另易一軍較爲妥善胡革員暫爲督辦幫辦留充邊防委員藉圖羈縻至琿春一帶據云現尙安靜未聞有俄兵佔據之事云云以上所述情形與陳吳來函大致相符所擬安置吉強軍亦有見地然目前似宜處以鎮靜以安民心未便遽行更調特此電達敬候卓裁

致朱中丞

光緒三十三年十月初五日

日人近來舉動雖漸和平然暗嗾韓民就彼範圍且修衙署設電綫反客爲主手段極爲敏活請飭陳吳加意對待務阻其實力上之進行勿受其愚陳守接統吉強軍辦理尙妥該軍旣尙安靜目

前應如尊指暫緩更調餘容晤籌

附陳督辦
吳幫辦來電

頃奉經帥轉到敬電領悉壹是近來境內日人舉動已不似前時猖獗彼統監所云派員嚴責齋藤一節想非虛語惟韓奸民所立之一進會依附齋藤擅作威福廣布謠言搖惑人心各地越墾韓民非惑其言則畏其勢爲彼脅從者甚多其所出之廣告告示等件前已抄呈一二續當將所搜得者擇要包封寄呈大抵日人自知理曲乃縱令彼等煽惑生事而隱爲庇護希冀地方多故彼得有所藉口此或爲日人之陰柔手段亦未可知現已於邊務緊要之地選派專員駐紮令隨時調查華韓情形日人舉動並就近保護地方治安一則隱抗日人進取之勢一則安撫韓民外向之心至所設各派

辦處區域及所擬派辦處規則統由續函附呈鑒核昭常等
到防後所籌布置無非爲對付日韓保衛地方之計決不敢
於責任之外稍用意氣致起釁端所有地方文武各官及隨
來委員軍隊自當力爲約束並隨時以欽帥訓語常加警戒
以防別生事端現陳統領已接事兵心尙覺安靜陶丞對待
日人亦頗得體請紓廬注餘函詳

復

陳督辦
吳幫辦

光緒三十三年十月初六日

東電悉籌防一切深慰馳系日人陰縱韓民滋生事端冀有藉口
所慮甚是務希加意對待於實際上減其勢力至於韓民一面尤
應亟意撫綏以免外向若能設法除去金海龍解散彼之陰謀較
易措手諸賴盡籌

致外務部

光緒三十三年十月初七日

吉林朱中丞電據探員報告駐韓統監府來翰間島地方由七月已派各專門家調查該島利源視察中韓兩國早訂之界碑諸事大有進步一經查明即與中國外務部開始交涉並計畫修蓋營盤等語日人近日外示和平內仍步步進行祈預籌抵制爲幸

外務部

光緒三十三年十月十六日

延吉廳陶丞電稱九月二十九日附近六道溝之關門陀子地方有華民黃明廷夜間被人在室擊斃驗明後稟報在案旋於本月初七日訪明兇手爲韓民金漢國干光謾李成海三名當將干光謾李成海在六道溝集上拏獲金漢國亦同在集上被日本憲兵聞信帶去是晚提訊干李兩犯供係金犯起意謀殺初八日即向日人索取金犯未予十一日齋藤派該事務官篠田來署面索干李二犯並引中韓條約第五款爲據經卑職嚴切駁詰謂此地實

非通商口岸該韓民等皆係種我土地歸我地方官管轄裁判從來無異並未奉到適用中韓條約明文未敢援引篠田詞窮乃云必請示政府方能判決悻悻而去查卑廳土著多係韓民我此次稍形退讓則以後司法權必將盡失卽行政事件亦必爲所挾制務請兩帥達外部與日使交涉令齋藤速將金犯交出並令嗣後勿再侵犯卑廳行政司法權限實爲公便等語統希鑒核

致外務部

光緒三十三年十月十七日

頃接陳督辦吳幫辦電稱近據各派辦處報告日韓無理事件均遵諭切實辦理不稍退讓 萬壽節齋藤率員來賀留住廳街翌午來謁提議昭常等所出告示指摘多端意欲大開談判先擇示內圖們江北一帶爲我朝根本重地邊圉要衝數句謂正當兩國交涉之際不應遽認爲貴國領土要求更改當答以圖們江北爲

做國疆土不僅各國所共知日俄戰前貴國亦無異議貴中佐來此並未經我政府許可卽我外務部轉據伊藤統監電報貴中佐亦僅有保護韓民之責不得干涉界務齋藤復稱此處實係韓地前因屈於貴國權力未得恢復此時尙屬懸案未定貴督辦等不得爲過分之語復答以我政府確認此處爲我國領土故派我等來此辦理邊務保護地方所出告示已報督撫轉達政府決難更改齋藤又詢告示所云是政府及督撫之意抑貴督辦等之意復答以我等卽政府及督撫之代表責任所在未敢放棄如以爲過分請報告貴國政府貴中佐無過問之權齋藤不便更提別條悻悻而去此事應否預告外務部統候憲裁復因派辦處扣留日人私運天寶山礦砂之事要求放行及六道溝附近一進會韓民謀殺華民命案要求交犯均與極力辯駁斷不爲其所愚除六道溝

命案由陶丞電稟外餘容函詳等語統希鑒核

復外務部

光緒三十三年十月二十一日

號電敬悉已電知陳京卿等轉飭地方官妥善因應聽候政府商辦惟韓人如係曾經剃髮自應由華官裁判且齋藤前出告示尤爲不合似可據以駁斥仍候奉到寄示日使函會商妥酌再行上復

附外務部來電

銑篠電均悉頃准日本林使函稱界務尙未解決兩政府尙在討議之際陳京卿所出告示甚不妥當示內謂華官亦得處分韓人按之約章韓人不能由華官裁判管轄請將告示撤回並面稱華官應將所拏韓犯交付日員各等因查韓犯應歸何處裁判本部現正揀查約案與日使磋商希電知陳

京卿等轉飭地方官妥善因應聽候政府商辦此時暫勿多
事日使來函卽錄飛寄到後請會商妥酌詳覆本部並一面
電飭地方官遵照

致唐中丞

光緒三十三年十月二十二日

外部號電想已鑒及現在界務旣未議決在延吉之韓人卽不啻
入我版圖應照撤使前條約辦理告示不爲多事此層公當主持
宜向外部揭明至如何籌辦及電外部應請俟日使函到時挈賤
名逕行裁覆昨於途中接陳吳寄到章程告示今日寄呈台覽外
部電亦由敝處轉告簡堦矣

復朱中丞

光緒三十三年十月二十四日

漾電悉天寶山事已轉電外部請其主持堅拒或仍推與外辦興
東叛兵敝處昨已得德都統電云經傅管帶會同姓隊界官在榆

樹泡剿獲十四名槍三十六桿事已大定電綫工趕辦好極

附朱中丞來電

簡電敬悉近來日領因天寶山礦務屢來要求寶均力拒以中野離去天寶山方爲正辦渠以間島所屬未定彼政府前來電有維持現狀不再擴張之語現中野開採之地宜仍令開採寶言程光第前稟並未開採無所用其維持天寶山原係中國領土各國皆知豈有不令程光第開採反令中野開採者彼此相持數日今晚又來言接中野電前三日有中國兵到天寶山驅逐日人離開日人不肯讓恐起衝突釀出重大交涉屬寶電止中國兵驅逐日人俾中野照舊開採寶仍拒未允辯駁至再寶謂中野暫不離開亦須卽時停工日領仍前要挾謂此事在吉說不好只有向北京政府交涉寶答

以既向政府交涉專候政府命令可也以上各情應否電達政府請卓裁至省城電綫僅通至額木索緊要文件仍須專差至延統查電綫二工已過薩奇庫站約距琿春三百里現在三工前往併作將來頭工抵延擬卽折回合作以期工程迅速簡始原擬一律添設馬撥由省至延專差往返仍須十餘日再接三姓德都統來電興東叛兵經德魁帶隊追至楚山擊斃一名生擒六名得槍六桿馬二十匹羌帖九百餘張特此電聞

附唐中丞來電

覆外務部函敬錄如下頃奉十月二十日鈞函並抄示日使照會一件均悉一是案查延吉廳所屬地方韓民越懇已歷有年其已經薙髮納租者卽與本國人民無異自應在我法

政書卷四十九
律管理之下歷經辦理從無異言蓋此等韓人既與在各埠
居留營業者不同實與清韓條約無所違背現在韓國人民
雖由日本保護惟該處越墾韓民向受中國法律兩國政府
未訂新約以前自不能不循舊辦理由是觀之陳京卿等所
出告示自無不合卽不得謂其措置不當該照會所請撤回
告示之處礙難照准卽希大部轉致云云希鑒察

附唐中丞來電

東頃日領事加藤面示所抄林使致伊之電云在間島之中
國官吏於西歷十一月六日發有告示聲明豆滿江以北一
帶之地乃中國領土在該地之韓國人須照中國人一律服
從中國法律等語查間島問題係目下中日兩國政府交涉
之案今不待解決地方官如此行動甚爲不妥本使奉政府

訓令須將此管束之意請清國政府注意各據吉林領事電報本月二十五日上午中國兵十六名至天寶山令日本人退去將日本所用中國苦力驅逐命本使再向外務部請其注意若猶置之不理我帝國政府亦祇有用對抗手段無可奈何也故速將該處地方官管束宗旨勸告中國政府請閣下往見唐中丞告以友人忠告請其以東三省總督之名將派間島之中國官吏若斯行動務須極力管束也等語當答以林使熱心忠告感謝惟本部院未奉有政府命令談判間島問題所囑以總督之名管束該地方官吏一層實屬無此權力未便照辦惟有代將來電之意轉達欽差核奪希將鄙意代復林使云云特電奉聞

附唐中丞來電

沁電悉覆外部函未寄簡始昨接外部函稱韓人裁判權一事業將日本林使來函分別函電在案計達籤掌吉韓界務日政府不願派員會勘先經本部照錄馬總領事電述伊藤改換口氣各節於十月十一日函致尊處茲復抄錄與阿部代使來往照會各一件卽希查照備案正在辦理間復准林使於十九日面遞節略一件除由本部另函商定辦法外相應一併錄送冰案迅卽酌核併案聲復爲要等語又附抄九月二十七日給阿部代使照會爲照會事本年九月二十五日據駐韓總領事電稟伊藤統監面稱甚望彼此政府從速派員商議界務等語查東三省總督等已派陳京卿昭常督辦吉林邊務俟日本派有勘界專員卽擬派爲勘界大員並派監督吳祿貞幫同辦理等因本部已於八月初十日照會

貴代理大臣在案茲准前因伊藤統監既願彼此政府從速派員商議界務吉省擬派陳京卿等爲界務大員如有應商事件自可由該京卿等和衷商議相應照會貴代理大臣查照卽將統監之意轉電貴國政府迅卽派員以便與陳京卿等會同商辦並希照復爲盼須至照會者十月初五日阿部代使照覆爲照覆事准貴厯九月二十七日照稱據駐韓總領事稟稱晤伊藤統監面談日清兩國可速派員商議境界事件等語希將統監之意轉達日本政府迅速派員以便會同督辦吉林邊務陳昭常商議等因本代理大臣業經閱悉惟日本政府之所見業經上月三十一日第八十三號詳述間島所屬問題欲論清韓兩國境界之基礎非經日清兩國政府研究討議決定之後不能派員從事實地測勘伊藤統

監不應有所異見必爲貴國總領事或有所誤解本大臣雖作是想然當卽將來照轉達本國政府茲准回電果以不出本大臣之所料統監對於貴國總領事之言乃謂決定國境必由兩國政府將應以何爲基礎而議決定之事先行協定然後彼此派員實地調查等語故中國政府如欲開議境界問題日本政府亦無不應議惟須先行協定境內之基礎而後派員實地調查之事始能應命一切已於上月三十一日第八十三號照內詳述日本政府之所見仍無所異相應照覆貴部查照可也須至照覆者十月十九日林使面遞節略內稱中韓兩國境界問題迄未解決中國政府亦所認知前次提議日中兩國會同勘界一事日本國政府固無異議惟非預爲協商無從確定勘界之基礎現兩國政府來往交涉

實出於此意日本國政府對於韓國爲有保護權之宗主權
國政府以故先允韓國之請派官往間島維時嚴諭該官須
以維持現狀爲宗旨專事保護韓民詎駐該地之華官不待
兩國商妥率行斷定謂豆滿江以北係屬中國疆域或知照
日官或出示宣布查約章韓民不在中國法權之下此固不
論境界問題如何解決也乃該地方華官揚言凡韓民犯法
應按中國律例治罪並將此意知照日官毫無忌憚頗爲可
異華官又言豆滿江以北作爲中國疆域此係中國政府之
意見在該地方施行政事此係政府之命令等語日官則止
令遵守政府訓令祇以保護韓民爲任對於華官未曾有所
爭執惟如華官屢次專擅妄爲藐視日官則本國政府亦不
能緘默遂致不得不設法對抗亦未可知今本大臣奉本國

政府之訓令敢問下開二事是否貴國政府斷定豆滿江以北係屬中國疆域如間島華官所言已否棄去與日本國政府商議中韓境界問題之意思務望貴國政府明確答覆以便轉達可也再者中國政府如果棄去上開意思則日本國政府亦當任意行動如仍欲商議界事則請電諭間島華官嗣後與日官遇事和衷商辦勿再有違約之舉並嚴飭勿得將該地方斷定作爲中國疆土是爲切盼

致唐中丞

光緒三十三年十一月初二日

東頃接簡始詳函想尊處亦必接到所辦均極切當扼要才長心細深可佩服此信似可摘要錄寄政府一閱伊所請發空白功牌二百張備獎賞韓民可否照辦並此執照內如何措詞均祈核定飭辦所論爭界各語及韓民逐漸歸誠尤應早報告政府也至簡

始前請添警一節統望卓裁

復唐中丞

同日

勘電具悉日使一面推宕一面急進又欲我不確認間島爲華土
彼得任意佈置務請公詳細籌復外部鄙意間島歸延吉廳管轄
現辦各事乃分內應行義務與彼之借詞保護暗中布置者不同
至境界問題亟願早日解決乃彼有意延宕應請政府與日使詰
問究於何日何地與何人開議未議決之前我必遵守命令和平
辦理彼不得先派警兵組織民政致令與我政令有礙如名爲保
護而陰與我抗設有爭執曲不在我耳應研究討議之事我已早
經預備必先定兩國政府開議之日方有辦法以上各層似可並
告政府核辦簡始來電請撥警兵四五百名以相抵制已答俟回
奉後籌商設法天寶山拘傳該山管事之中國人日內解吉並聞

有順天府問糧米價銀事請飭查明逕復爲禱

附陳督辦
吳幫辦來電

日前所陳函電想均蒙賜覽本月初十日夜間有韓警兵三十人陸續來六道溝駐紮數日來徧布廣告日夜巡邏頗有實行警務之事其所出廣告大書警務課則爲齋藤所屬無疑經該處派辦事務員傳到爲首三四人其所持名片自書有總巡李庚在巡弁元炳喜等字樣彼雖稱由該國派來而在此自必受命於齋藤昭常等現竭力與相抗但只能以口舌爭辯未便逕用強力迫其退出且聞彼尙續有巡警長官及地方官吏來我延吉地方組織行政機關之說如此荒謬無理萬難稍讓以遺後患請鈞座將此情形電達政府速與力爭務令撤去該警兵以阻其得寸進尺之謀前蒙轉示伊

藤與齋藤電文及答馬總領各語齋藤在此無行政權彼已自認今竟公然越分日謀進步實屬無賴萬望兩帥及政府竭力設法撤去齋藤以免後患不勝盼禱再天寶山私運礦砂一節已經前面陳明茲查日人尙在山中招聚工人另闢新洞開採不服禁阻前日已委員將該山管事之中國人傳到詢明收押昨又派員前往解散工役切實查辦矣以上所陳如何處置候示遵行

附陳督辦來電吳幫辦

寄電想蒙賜覽昭常等現雖極力與齋藤交涉令將韓警兵退出然揆其勢非借欽帥及政府之力難以撤退前電所陳諒已轉達政府竊思日人旣以保護韓人爲名則我於各地方必先有完全警察布置十分周密方足塞彼之口能令其

無可藉詞保護則彼將不退自退欲求抵制莫急於此方擬將此意電陳適奉到十三日賜函有彼以民事爲攬權之進步我亦當以民事應之最好竭力籌辦警察等語仰見運籌帷幄於邊務應辦事件莫不籌畫周至已無俟昭常等之詳陳曷勝欽佩來諭又云或以兵改辦或寓兵於警其法簡而易行自當遵辦昭常等亦曾思及於此故到防後卽於各緊要地方分設派辦處其所帶者卽皆營兵所擬章程亦卽寓有警察性質原欲舍難就易不必有警察之名而可收警察之實益近來地方安靜一進會亦稍斂迹未始非設派辦處之效足見尊諭所授機宜實爲法良意美然究係兵丁全無巡警資格至吉強軍之兵尤難任用早在洞鑿稍有疏防轉致生事且於地方查辦事件及日夜巡邏皆用軍人亦非平

和辦法今各派辦處所帶兵丁不過數人已貽外人以口實
有此數端恐非善策反覆思維惟有仰懇欽帥於奉省或北
洋之警兵內選撥四五百人到此以便實行舉辦保地方之
安甯而免外人之進步昭常等深知經費維艱然欲固全疆
土豈能更惜小費想欽帥或亦不以爲冒昧也是否有當務
懇速示施行爲禱再天寶山不服封禁一節現已委員帶護
兵前往將其工人解散並留護兵數名在彼看守所傳到該
山管事之中國人擬訊明後卽解送吉垣聽候訊辦緣程光
第旣已違颺齋藤又暗中運動拘留日多恐生枝節必由督
撫憲審斷方能結案也

附唐中丞來電

間島問題久未解決前據加藤轉交林使電文及林使面遞

外部節略隱挾陰謀狡焉思逞其節略所謂答復二事與甲午以前對付韓國手段同出一轍我雖極力堅持然延緩一日則彼之實地經營卽已進步一日持之過蹙一有衝突立啟釁端視之稍輕則土地將非我有損失國體莫此爲甚陳吳所帶軍隊爲數無多餉薄兵單倉猝不足應付卽添撥兵勇仍屬於事無濟再四籌維辦法必以從速交涉爲主鄙意擬致電外部請卽照會林使將日人所謂我恃強國欺負韓人一層卽行折駁試問延吉設廳以來韓人相安無事未聞韓國有所爭抗其地爲我有並非欺負韓國可知今忽捏造間島之名謬謂延吉地方非我國疆域究竟有何證據務令切實指出以憑駁辯如不獲已亦可微露公舉第三國公正人出爲評判之意冀可早日了結總之此事以從速解決爲

宜否則空文往復各執一詞我稍觀望徘徊彼已根深蒂固
恐非計之得也公意何如如以爲可請會賤名電達外部核
辦

致外務部

光緒三十三年十一月初三日

接陳京堂電稱馬電謹悉遵將外部電示已飭地方官妥善因應
矣昭常等到防後將籌辦各事分別緩急舉行已於先後各電陳
明其大旨不外保護人民以免日人藉口力籌抵制以保國家主
權至齋藤之無理舉動昭常等能善言挽回者卽隨時了結力不
能阻止者則當將情形詳報請示辦法甚至一進會之擾害地方
確有實據例應拏辦仍隱忍未發惟恐別生交涉致令政府爲難
其他明知應辦因難中止者尙多又何敢多生事端以啟外人爭
論所出告示諒蒙閱悉皆係安撫華韓人心決無過分之語況齋

藤來此出告示在昭常等未到之先尤爲不合若允其撤回無異將昭常等撤回且已自認於延吉無主權也應否力爭伏候鈞裁至陶署丞彬行事最爲小心謹慎每與外人問答無不極意斟酌更不致有冒昧之虞日使所稱按之約章韓人不能由華官裁判管轄各語當指中韓條約第五款而言查此約乃係通商條約延吉地方未宣布爲通商口岸而韓民越界墾種並非商民決不能適用此約況延吉舊案自定中韓條約以後韓民關於刑事由我地方官判決定罪者不一而足查二十九年方成化等六人夥劫一案三十一年朴正日等四人搶劫一案皆是越墾韓民均由我地方官審明稟請就地正法中韓條約於此地之不適用卽此可見惟三十一年韓民崔濱孫殺害華民常升一案曾送交韓慶興府審判雖屬前趙丞不諳公法一時糊塗然查崔犯本居家韓境

偶爾越界滋事非越墾者可比故尙可格外通融照中韓條約辦理此次六道溝謀殺之案凶犯三人實係越墾韓民久成土著自應查照方成化朴正日二案拘辦齋藤擅將首犯拏去反欲令我交犯殊屬無理已極前齋藤面談此案援引中韓約章並以崔犯一案爲例當經昭常據案力駁無詞而退務懇速將所陳各節電達外部俾與日使交涉方有證據此時若不能與之力爭則一進會之聲勢必至日盛而安分韓民俱將歸附該會不僅華人之生命財產岌岌可危而此地方司法權必統非我有矣所示覆外部電有韓人如係曾剃髮者自應由華官裁判一語仰見顧念邊務力爲主持之至意然此地雖經久納我租稅受我管轄而剃髮易服者實百中不過一二人若外部卽以此語回答日使恐司法行政權轉將盡失蓋二十六年以前越墾韓民大半剃髮自李範允

作亂人心搖動旋加以日人煽惑多存觀望大都返其本裝還請速電外部極力辯明此語爲要昭常等並未將此情節陳明未免疏忽咎實難辭又自齋藤入境韓民關於民事呈訴於我地方官者頗少現經各派辦處多方勸諭力任保護韓民遇有口角鬪毆等事就近投訴於派辦處請求審理者已日有所聞至來訴以日人及一進會之無理並陳請自願剃髮入籍者更紛紜不絕可見韓人亦易感化但得抵制日人不稍退讓自能漸次解散其陰謀萬一聽其所爲全無抗力該韓民等知我不足恃皆將反而趨日與我爲難日人得此憑藉自當所行無忌後雖再用權力無可爲矣再前有日人數名盤踞天寶山不服封禁只得派員前往將其開礦諸器及所收得之炸藥槍械等件悉行封貯並留護兵數人看守雖皆攜有防身軍械實非陸軍日人情知理由亦自退出並

未稍假強力所有查禁情形業經屢次詳報前日已將所傳到該山管事之中國人三名解送吉垣聽候審斷想齋藤及日領於此事未能如願必又將造作誣詞由該公使向我政府交涉總之昭常等奉諭所封禁者乃程光第不應開採之礦山有無日人在內不得過問斷不能任外人犯我禁令亦斷非外人所能干涉昭常等在此一日總期伸我主權保我礦山決不致爲外人虛聲所懾也務請將昭常等前次所陳詳情速達外部以便預籌抵制之策不勝盼禱至此地爲我

奏明

特簡親貴重臣主持其事昭常等仍當竭盡愚忱襄助萬一不敢置身事外自避勞怨等語謹特電呈鈞核

致外務部

光緒三十三年十一月初四日

頃接陳督辦吳幫辦等來函摘要呈鑒其文如下日人舉動外觀雖稍和平手段實爲敏活牢籠韓民力圖進步誠如尊諭昭常等初到時本擬不與齋藤往還而齋藤來拜不能不一接見自後日日以華韓人民口角細故來函糾纏所稱我兵民欺虐韓民事件悉心考查大都無據之謬說想彼隨時報告統監亦當如是其意蓋欲多捏造華韓不睦之事方足證明保護韓民之非無故而派出所庶可長設於此伸張其權力前蒙轉示外部電文伊藤答馬總領事未允撤去齋藤有虐待韓民尙日有所聞之語則齋藤之嗾使一進會無端生事廣布浮詞其用意蓋可知也昭常於其無故要求力爲謝卻語以地方行政有廳官約束兵丁有統領無煩外人代爲過慮現在雖稍覺安靜然彼報告統監如何捏詞無從

禁止是可憂也電諭有云若能設法除去金海龍解散彼之隱謀較易措手查齋藤旣倚金海龍爲其爪牙又已自認爲其書記課員其保護之必力非得有實據徒憑訪聞究辦轉令有所藉口現令各派辦處於金海龍舉動多方搜求已稍稍得有確據其最可惡者本月初四五六等日公然在霽霞霽晴月朗各社傳集本地鄉民指稱總鄉約元德勝詐取民財韓民元德勝係由我廳官派充總鄉約其人忠厚老成不附和一進會故爲所忌倡言我兵民恃勢騷擾逼令各處韓民捏詞誣告有不附和者則辱罵之其在月朗社時有二韓民因傳未到卽夜至其家加以掌責此事眾目共睹已由該處派辦處傳到被打韓民錄有供詞擬俟憑證確實卽行密拏到案昨已知照齋藤令其不必干預雖能否拏獲尙未可知但能逐其出境亦可爲地方除害而稍令齋藤斂迹也至韓

民之感情並非皆真心向日其能知恩感德而願易華裝者亦正不少不過韓人性極柔弱當齋藤初來未免疑中國無保護之力而又迫於日人及一進會之勢非強被脅從卽多存觀望自昭常等到此民情大爲感動嗣經兩次示諭韓民頗爲歡慰雖尙不敢與一進會爲難而來我派辦處及廳署稟告欲求見昭常等泣訴苦衷並隱告日人及一進會之舉動者已不乏人是韓民非無天良惟視感化之術如何耳昭常等現時對於日人旣不能以威力阻止其進行惟有一面維持主權一面要結韓人因令派辦處各員於巡視時凡遇韓人務必善爲勸導詳細解說近來日人雖百計牢籠亦不大見進步卽先之歸附者除一進會外亦漸解散是以欲與齋藤爭衡當以要結韓人爲要務彼之一進會卽爲牢籠韓人之爪牙我之派辦處亦卽爲收服韓人之機關我則正正堂

堂彼則爲鬼爲蜮勝負之機當可決也然要結之法固不一端而獎勵之事似尤不可稍緩彼金海龍等甘爲日人驅使亦由日人以不足重之祿位誘之故耳可否頒發空白功牌二百張准昭常等以後查有韓民實能化導地方及爲我國効力者酌賞給六品以下功牌便宜填給隨時呈報使之光耀鄉里而待遇以特異於常人如此獎勵諒不僅身受者心悅誠服而甘爲我用者必多矣十一日齋藤來謁出所錄昭常等前出告示內摘多條加以標識意欲借此大開談判以增進其勢力首提出圖們江北一帶地方爲我 國家根本重地邊圉要衝數句謂圖們江北應否屬清屬韓兩國政府正在交涉不應遽爲此決斷之語務請更改當答以圖們江北爲清韓天然國界有兩國歷史及舊時志書圖說可證各國無不周知日俄戰爭以前貴國之滿韓地圖地志及韓國之

國圖亦皆以圖們江爲界歷歷可考數百年來從未更變卽清韓之屢次勘界亦在圖們江源一帶於此地向無異議至今日之交涉乃貴國無端生事非國界真有不明也督撫之奏派我等來此原爲保護地方清理疆界何得因有交涉而先自棄其地從前督辦幫辦吉林邊務大臣所出告示皆有如是之語貴國及韓國並無異議何至今日獨有未當況今日旣生交涉則我等負此邊務責任對於人民措詞更不可稍涉含糊齋藤又謂曩時非韓國不爭此土乃爲貴國之權力所屈今旣起界務交涉則不得自信太過仍以更改爲是又答以圖們江北之地國初以來並無韓民光緒年間我

朝廷因韓民生計窘迫以優遇鄰邦之心乃允其越江耕種納我大租何嘗凌虐以權力至李範允等之作亂我以兵力征服乃爲

保護地方治安又何得謂屈於權力至此地之爲我國疆土貴國
韓國亦皆信之我何獨不能自信也齋藤又云我之以善意勸告
無非望彼此爲和平之交際似不宜爲過分之語復答以君之美
意我所深感然斷不能因彼此私交而亂國家之疆土我有土地
我自認之何謂過分況無論我出示之過分與否皆非貴中佐所
得干預君之來此我政府並未承認卽據我外務部轉示伊藤統
監之電亦僅謂貴中佐有保護韓民之責界務之事非君權力所
及似無煩多此要求齋藤又詢貴督辦等所出告示係己意抑係
督撫及政府之意復答以督撫奏派我等辦理此地邊務我等卽
督撫之代表亦卽政府之代表我等所言卽與政府所言無異且
此告示已呈督撫轉達政府我等已不能擅自更改貴中佐必謂
未當請貴國政府與敝國政府交涉可也齋藤語塞情知再提他

條亦不能得爭勝之結果始無言而退至若天寶山銀礦之事程倅現時究在何處尙未訪知惟山中尙有日人數輩盤踞未去本月初八日有日人吉見圓藏運礦五大車私載出境在稽查地方經該處派辦委員拏獲將其車輛礦砂扣留專弁來報當飭令放車留礦非有昭常等公文不得擅自發給逾日齋藤親來面稱吉見所運者乃日人中野之礦砂極力要求放行當答以督撫所封禁者爲程倅違例私採之礦山此時扣留者亦扣留程倅已封禁之礦砂日之爲自抑代程倅私運皆在所不問齋藤又云該礦封禁之後實未開採此時所運者乃未封禁時所存之物復答云卽爲前所存留旣已封禁卽不能私自販運齋藤再三懇求代爲謝過乃答之曰姑念貴中佐私交令將所存者報明數目予以護照准此次儘數運出若以後再查有私運事件不但扣留定必照章

處罰翌日齋藤來函謂尙存四十墩當卽如數填寫護照令其盡行運出亦除絕根株之一法想以後日人或不致更萌開採之妄念也等語敬請鑒核

致唐中丞

光緒三十三年十一月初四日

冬電悉尊論延吉事甚是當卽會尊銜電達外部昨簡始有長電已摘要轉部電底均另抄呈閱昨聞美人言西國各地圖均認間島爲中國地獨日本新造之圖畫入韓界不足取信於天下亦言或請公斷或入海牙和平判斷又天寶山礦西人已考驗煤質甚佳全球皆知萬不可爲人攘去等語愈佩公持論遠大非速催政府力爭不可

附外務部來電

東兩江電支電均悉昨晤林使談判界務至兩時之久示以

各種證據彼無辭但言轉達日政府及我向索韓國證據則謂尙未寄到而與陳京卿告示及交犯礦產各節爭執甚堅本部扼定十三年成案揭明該處爲中國領土向歸華官管轄韓國並無異言嚴詞駁拒前復該使節略亦未稍鬆勁至華官裁判韓民一節並未專指薙髮者而言希轉行知照仍飭妥籌因應至酌撥警卒尙可暫從緩議尊處有西圖證據並望迅卽譯寄餘函達

復外務部

光緒三十三年十一月初八日

魚電悉已轉電陳京卿等知照林使經大部嚴駁彼已無辭其所云轉達政府者仍係藉詞延宕而已查庚子以後俄人於延吉地方設立軍政署嗣經訂定公約卽將該署裁撤交延吉地方官管理此爲鄰國認延吉爲中國領土最近之證據該處旣爲我國疆

域日人卽以保護韓民爲詞亦不應干涉交犯礦產各節明矣敝處現無西圖曾見俄德英所繪東省地圖日人所稱間島均在中國界內容卽設法訪購再行函送

附外務部來電

准日本林使照稱據統監報鍾城對岸江北地方韓人所謂之鍾城間島韓人有一學校學徒數十名清國官憲強制辮髮不遵卽交官署逼除二三名外盡皆辮髮又該處附近地方有私塾生徒十餘名清國官憲忽喚房主令其呈訴係韓官金海龍強佔該房主因之逃亡清韓兩國爭議之地屢爲不法因而境界根本有難決之勢實爲遺憾請迅飭勿再出此等因該處界務本部示以各項證據彼已無辭乃藉口於境界難決殊屬強詞奪理所稱兩節均係如何情形希電致

陳都護等確查聲覆仍隨時妥善因應以免生事再日使文稱華民亦有赴韓越墾者有無其事併希查明電復

致唐中丞

光緒三十三年十一月二十三日

頃致外部電文如下接陳都護電稱昨有日兵百人到六道溝地方旋往調查六道溝現只有日兵三名過和龍峪卽分往各處已派人追蹤往查聞所來各兵均未帶有戰備諒無他意等語特先奉聞

退耕堂政書卷五十一目錄

電文八

延吉交涉案

退耕堂政書卷五十

天津徐世昌

電文八

延吉交涉案

致朱中丞

光緒三十三年十二月二十日

頃據陳吳來電吉強軍因舊日欠餉未發頗有鼓噪情形應消患未萌現飭陳吳先將欠餉墊發以安軍心再嚴追欠餉各員如數繳還並嚴懲爲首之人以肅軍紀又陳吳擬調吉甯軍到彼改編一節已屬其只可就地改編不可調至延吉至續調陸軍兩隊赴延已飭曹統制酌核辦理只能作爲換防將來吉強軍即可就此裁改該處距吉較近一切情形希就近策籌爲幸

附

陳督辦
吳幫辦

來電

吉強軍各營胡殿甲原有兩月欠餉未發而前左兩營楊郭

兩管帶復欠餉一月現經陳統領放餉前左兩營兵丁要求欠餉頗爲鼓噪昭常極力維持雖未致如前暴動而亦不能不爲預防前由三鎮十二標第二營調來新軍僅兩隊兵力單弱殊爲可慮該營向有兩隊駐紮長春曹統制曾向祿貞言及一營分紮數處破壞編制於教育指揮給餉等事皆有妨碍擬請續調來延以資鎮攝當以換防爲名當不致使人藉口請卽電曹統制飭令該營前左兩隊刻日拔隊速來限年內准到俾可消患未萌不勝禱盼至吉強軍欠餉請先設法墊發而後嚴追欠餉各員如數繳還方無他虞現已將郭楊兩管帶撤差虧餉終無著落時值年底需錢之際若非從權加恩辦理軍心斷難安服可否之處聽候鈞裁前祿貞在吉曾奉面諭改編防營蒙允調吉甯軍來延一節後稟商經

帥數次皆含混推諉究無可說又請集營務處諸員會議雖承面允終不實行延吉地面遼濶轉瞬林葉叢生伏莽可虞如不增兵加餉改編營制斷難收防匪之效且易資外人之口實究竟如何辦理候示遵行祿貞歸頒發賞銀宣布欽帥恩威駐延新軍異常感激軍心極爲堅固萬一吉強軍稍有變動想不足虞祈抒厘念

復

陳督辦
吳幫辦

光緒三十三年十二月二十日

效電悉吉強軍欠餉未發兵丁鼓噪極爲可恨尊意從權辦理以安軍心卽准照辦先將欠餉墊發再嚴追欠餉各員如數繳還惟爲首鼓噪者必須查出嚴懲以肅軍紀郭楊兩管帶先行撤差應將欠餉嚴行追出至擬調長春陸軍兩隊已電知經帥並面告曹統制飭令該隊趕速開拔前行年內未必能全數到吉已飭其先

到若干續調往陸軍不可駐紮一處總以不露形迹爲要外人問
可告以換防舊軍壞者或裁或革設法遣回內地務須不動聲色
逐漸淘汰目下雖調有新軍仍須消息未萌毋使激成變端不獨
資外人口實於軍界所損亦大吉甯軍亦只可就地編練不可調
至延吉爲屬

附 陳督辦
吳幫辦 復電

號電敬悉吉強軍欠餉卽先由邊務墊發擬派員分往各防
地宣布兩帥威德查實發放至淘汰一節擬先由官長著手
次及兵卒加意慎重不敢稍漏聲色請派新軍前來鎮壓正
爲欲消隱患萬不令激成變端有壞大局請抒厘念調來新
軍擬一隊駐琿春一帶以控郭營分一隊駐銅佛寺一帶以
制楊營再將該兩處舊軍或調或裁或併實行換防外人亦

難干預

附陳督辦
吳幫辦來電

沁電敬悉吉強軍空額已飭各營止補查現有兵額不足七
成正擬嚴加淘汰只留六成以備遵照奏定巡防營制改編
並已將新軍各隊隊官升充吉強軍各營管帶以便認真整
頓惟改編既定可否案實銀發餉候示遵行孫占魁清山昨
已到延吉林所撥警兵日內亦可陸續到齊惟新舊巡警編
制不同事權不一急須細心釐定俟擬定章程後再詳函請
示謝武剛已到延聞過吉省尙敢干謁經帥沿途亦復訛索
清山等供給已飭交延吉廳看管當遵前電備文遞解內地
以免滋生事端惟或解到奉或解回籍請速電復陶丞津貼
復據經帥來電以陶丞隨同辦理邊務交涉應由邊務專欵

項下按月發給公費銀五百兩現此款既由邊務發給應卽另籌百金作爲津貼以符原定之數業遵諭札飭陶丞知照孫占魁暫委營務處提調兼邊務總稽查月給薪津二百金清山委巡警局總理月給薪津一百金合併聲明

附陳督辦來電

綏卿前遵面諭改編防營本擬在省卽遵示籌畫因憲節行後卽多阻力故先回延與昭常會商辦法所有爲難之處前已略陳想蒙洞鑒現在此間交涉稍鬆而日人在圖們南岸於軍事及一切預備日進未艾已極周密我帥前電亦曾深以爲慮且查俄人在琿春邊界駐兵甚眾以潛窺我與日之舉動意甚叵測觀此則我之準備豈能再緩今於吉強軍雖定力加整頓然積習太深收效不易若按照防營新章改編

將各營均裁爲六成隊則所存防兵僅七八百人以之改編一路兵額太少亦於吉省定制不合就綬卿原議與他軍合編一路則又碍於阻力未能實行以縱橫且二千里之區域布以區區兵隊於防匪尙不能確有把握遑問其他且吉省各軍向來惡習此疆彼界各不相關兼以重重節制呼應更爲不靈此實爲軍事所大忌其影響於邊務不少轉瞬林葉叢生伏莽潛滋此拏彼竄擾害治安若不趁此時統籌全局改編營制確定職守事權有屬將來愈難收保護地面之效卽易啟外人窺伺之心昭常等於全省防營必使稍無隔閡方能消患未萌現如吉甯軍近在咫尺稍覺聲息不通其他可以想見似此因循一旦稍有變動邊務何堪設想聞我帥於改編防營一事屢屬綬卿專意措辦仰見運籌帷幄已念

及此然昭常雖有翼長之名愧於新軍學識未能自信且兼有琿春軍民事件更難專力防營綬卿雖有營務處會辦之名遠處邊地既無關防而吉省營務處習慣全權皆在總理復上受制於撫帥以邊員而兼此虛名萬難行其職務綬卿深慚未能有所展布以副期望竊意我帥果欲吉省營制改觀邊防足恃似宜使綬卿能盡其責擬請特加札委予以專任名目以施其會辦營務處之權知照經帥轉飭省中營務處以免掣肘俾得責有專歸徐圖奏效實邊務之大幸昭常受我帥特別知遇決不敢置身事外極望借綬卿共竭駭力挈此千里之疆土還我無缺之金甌如辦有一分未到卽有一分未盡之責用敢不避嫌怨爲思出其位之謀再此電係昭常一人私見未與綬卿相商故未會銜合併聲明

復陳督辦

光緒三十四年正月初三日

儉電悉延吉改編軍隊一切爲難情形深爲繫念目前外拒強敵
內靖伏莽尤非大加整頓不克穩固所議改編營制確定職守自
係不易辦法惟吉軍習氣之壞素所深知將來改編尙不知出何
情形不願公與綬卿受此過故宜稍用鬆活之筆使其漸就範圍
然後步步前進較爲穩妥改編與分防畫界雖是一事應作兩層
辦理蓋吉軍各紮一處盤踞甚深均不願調動現著手改編軍中
之蠹已不免疑惑再加調動恐易生他故應先以遵照部章改編
營制曉諭各軍一面辦理一面細察軍情俟改編既定再派人切
實點驗考察壞人漸少然後分別調動歸併或可省無窮波折尊
議將右營均裁爲六成隊則吉強軍所存防兵僅七八百人改編
一路兵額太少所慮極是弟前在吉省時本議定吉甯軍歸併東

路並有調旗兵一標之議希統核酌定示知吉軍此疆彼界呼應不靈實兵家之大忌日內當辦公牘責成公與綬卿改編調遣東路之隊分防各要隘並知照經帥飭營務處遵辦以一事權公苦心經營支柱巖疆弟與少帥必竭力籌謀以爲後勁萬不使公爲難綬卿勇敢有爲熱誠報國第恐有未盡周密之處尙望公維持之轉瞬春和伏莽潛滋日人亦恐有意外舉動諸希格外注意勿稍鬆勁爲盼

致朱中丞

光緒三十四年正月初四日

江電悉濛江與韓錯壤旅居韓民甚眾該國亂事未靖自應嚴防邊界以免別生枝節請飭張丞格外留意毋令日兵藉端越境並約束居住韓民勿使妄動致遺邊患爲幸

致朱中丞

光緒三十四年正月初十日

據陳吳電稱現因改編吉強軍修造各處營房開辦屯田及製備器具並測量儀器各事皆須趁此時預備在在需款舊存款項除墊發吉強軍欠餉外僅餘二萬餘金萬難舉辦一切務懇速撥兌十萬金以應要需等語查吉省邊防款前經奏准由部撥六十萬現該處需用甚急請由吉先籌撥十萬金以資接應或派員解延或由延派員請領並希酌定示復

附朱中丞復電

去冬奏請指撥邊務常年經費六十萬兩現准部咨原奏以現在款項內外同一艱窘東三省改建行省由部撥濟現款及籌撥移駐兵隊等款爲數已五百餘萬兩其由部領餉移駐吉省之武衛右軍歲需百萬尙不在內實已疲於供億此次邊務用款本屬無可騰挪惟因邊防緊要業經奉

旨允准自應竭力搜集如數撥給一次擬請在東海關洋稅
項下撥銀四萬兩津海關洋稅項下撥銀十萬兩宜昌關洋
稅項下撥銀十萬兩鎮江關洋稅項下撥銀十萬兩蕪湖關
藥厘項下撥銀六萬兩江海關藥厘項下撥銀二十萬兩以
上共銀六十萬兩皆係各關歷年存積的款如蒙俯允卽由
部行知各省督撫轉飭各海關監督遵照分批徑解吉林等
因業經奉

旨依議頃接陳簡始吳綬卿電以改編吉強軍築營屯田等
事亟須預備舉辦請撥銀十萬金以濟急需寶思邊務用款
雖經奏准如俟領到應用本屬緩不濟急吉省現銀刻又十
分支絀只得勉爲設法先墊解官帖二十萬吊再飭吉省商
號赴各洋關往領部撥款項以資彌補再邊防用款部內僅

撥一次而邊務爲日甚長何以籌備且此次撥欸分攤各洋關能否如數領獲尙無把握查吉省三十二年並三十三年共應領部餉八十萬至今僅領到二十一萬餘兩所欠之欸業於去臘奏請全數補發並請按年分季撥領現奉

硃批着照所請該部知道欽此當派專員赴部請領擬請公再函託撥欸各省督撫並度支部俾可速領撥濟否則今年邊費軍餉實無法支持專此電聞敬希酌示

復宋中丞

光緒三十四年正月十三日

眞電悉邊防經費部議僅撥一次只得俟下半年再設法至前奏催部發歷年欠餉以資彌補擬由敝處酌量函催此後部中發欸可飭天津轉運局劉道尙文承領由奉撥兌到吉似較便捷省費不必由吉派專員赴部也此次指撥洋關各欸業經分電各省迅

速撥解或由轉運局經理或由商號滙兌當隨時商酌以期簡捷
延吉先解官帖等項已知照陳吳矣

致外務部

光緒三十四年正月十五日

東頃據延吉陳都護吳參領電稱齊藤已於前數日回國未知何
故現以名篠田者代理其事初十日有日本駐六道溝之憲兵曹
長平野吾次平憲兵上等兵中村助松往勇智社擅拘華民徐守
山帶往六道溝訊辦行至帽兒山前經我派辦處事務員支令將
被拘華民扣留不令帶往該憲兵等復與支令強辯一點鐘之久
始去日人於越墾地面新放鄉約牌甲多名且擅易各處地名並
訂立木椿標識新名有意混亂愚民耳目已飭火狐狸溝稽查員
就近將所立之椿全行拔去並已援引國際法及約章專函詰問
日官矣再聞自會甯至六道溝之間日人擬修輕便鐵路已將舉

辦等語卽希鈞部卓核詰問日使謹此電聞

致朱中丞

光緒三十四年正月十五日

頃接延吉陳吳電稱接公電先由吉解廿萬串以應邊務急需自是格外體諒但此間銀元極缺官帖過多實於市面周轉有碍且邊務經費以前皆發實銀此次改發官帖則銀帖參差頗於報銷不便至現時所撥銀數如能籌足十萬兩諸事方易著手並請半發大小銀元半發官帖蓋邊務各款大都用於本地如建築屯田各事於市面尤有關係故非統籌兼顧不可云所陳各節自係實在情形卽請查酌照擬撥發並示復爲盼

致朱中丞

同日

元電悉日韓交關濛江一帶旅居韓民甚夥自應嚴加防範以免牽起邊境問題尊議嚴防外來之韓兵清查旅濛之韓民辦法極

善並可派唐道前往察看卽飭妥爲部署以期周密奉省亦已派人嚴密查勘統希蓋籌隨時電示

附陳督辦來電

延元電計達覽現時著手改編巡防營自宜先選官長邊地既無他軍只得由所帶新軍三隊中拔充前日電稟我帥在案已蒙俞允故特選派駐延陸軍三鎮馬隊隊長王廷瑞試充吉強軍馬隊管帶右隊隊長郭緒榮試充吉強軍前營管帶復以督隊官段立德係山東人熟於農事因此地多係山東移民特請試充屯軍管帶後隊隊官李文藻熟於工程特派試充工程隊隊長陸軍所遺各缺此時暫由昭常等選員代理一俟試辦得力再行咨會各該管官稟請扎派蓋邊地遼遠非如此稍從權宜往返咨商緩不濟急且不能鼓勵將

士伏乞俯允電復備案以便咨會各處

附朱中丞復電

頃據羅道國瑞鍾道穆生勘路回省稟稱於舊臘十九日會
同日技師谷直諒等由長春測勘起本日抵吉擬將車站各
事布置後再勘北路以爲比較此次鍾道照料尙屬妥洽所
有一切情形俟北路勘畢令鍾道赴奉面稟郵傳部昨有電
來囑借銀三千交羅道收用已如數借撥延吉邊防經費現
在糧餉處實無存款前擬解二十萬串之數祇以邊務緊要
不得不東挪西湊勉爲應付且現銀實在缺乏購買不易現
准陳吳來電卽照銀元官帖各半先解五萬金之數餘卽陸
續籌寄至日人近來擅拘華民釘立標識各節尊處想已電
外務部矣再外務部電令與俄領磋商將拉哈蘇蘇稅關撤

回俄境昨飭交涉局商之駐吉俄領據云渠不能管當向總領事交涉已將外務部來電知照杜道飭與俄總領磋商先此電達

致朱中丞

光緒三十四年正月十八日

東銑電悉羅道勘路布置一切尙屬妥協郵傳囑借銀三千卽請照撥延吉邊費吉省既萬分拮据該處又需用甚急現擬由奉撥借五萬兩交長春兵隊運往以足十萬之數吉省所撥五萬亦祈迅速解延爲盼日人擅拘華民釘立標識各節已電達外部俄稅關撤回一節杜道與俄總領近日磋商情形如何希隨時見示

附陳督辦
吳幫辦來電

篠巧兩電敬悉邊務經費蒙兩帥垂念邊用緊急由奉撥借五萬兩由長春來延兵隊解來仰見軫念邊陲實深銘感至

駐延陸軍各隊官提升管帶除由各隊排長司務長擇尤推升外所遺司務長各缺遵以營學生張世盛等四員頂補俟到延時自應分別派充再行稟報去春吉強軍兵變一案據前統領劉忠樑所呈各節並參諸輿論左營管帶郭鵬揚平日既漫無紀律臨時又不加約束玩法縱亂雖處以極刑以肅軍紀亦屬咎有應得惟查該軍向無法紀如郭管帶之罪不容誅者實繁有徒且該管帶以寬縱之故甚得兵心自昭常等到延以來亦頗知改悔此時若再按律懲辦恐兵心搖動於軍事之前途有碍茲當改編裁汰之際更宜處以鎮靜擬將該管帶解送鈴轅聽候發落可否之處候示遵行邊務添招工兵開通道路一節已蒙俯允並蒙扎曹統制代招工兵製備器具在案轉瞬春融正宜工作昨已派工程隊長李

文藻赴長春稟明曹統制招兵編隊率帶來延惟工程隊屯田營皆係新設撥請各發木質關防一顆俾該營官等遵用卽由李文藻賚文來奉請領應否頒發伏候鈞裁昨有韓民崔永瑞等聯民訴稱現有剃髮韓員李求敏在茂功社憲兵分遣所縱令統監府派出之日官告示附近各社設立都社長名目月給洋二十圓都所任七元社長十元都牌頭七元牌頭五元村長五元勒令總鄉約朴成祿速向韓民攤派自去歲十一月起每月須繳洋一百三十餘元又稱韓民流入華夏僅保殘生豈非華夏之惠澤今受其額外苛刻困苦何堪懇請禁止前來詞意極切已一面飭稽查處孫事務員設法阻止並密派委員前往該社調查證據以便詰問應否先行電達外部之處伏乞鈞裁再昭常於十八日到瑣十九日

接印所有應辦事件俟清有頭緒再行陳請指示一切

附陳督辦來電

號電敬悉吉省所派警兵百名已於去年底到齊祿貞去歲隨節到長春時晤王總辦治馨云兩帥有允由奉挑選警兵百名來延之說如蒙命景春帶來不勝盼禱日人刻頗就範我若添派警兵保護地方決不至別生議論前吉省所來警兵餉甚大而程度極低賴素山等諄諄訓誡現時亦頗得用現據外六道溝派辦處梁委員中同稟稱該處向無官房亦無華民今駐兵一哨長雜居韓民之家實多未便請建營房廿餘間約估價銀三千兩前來昭常等查外六道溝逼近茂山乃韓吉交通孔道聚居韓民不下數千戶且係匪徒出沒之所該處向歸和龍峪經歷管轄距署三百餘里鞭長莫及

視同化外自設派辦處以來韓民頗知歸順交涉亦極衝繁
自非長駐兵營不足以資鎮攝惟事關鉅款未便擅專可否
之處伏乞電示祇遵如蒙俯允當由昭常等核實動用不使
稍有虛糜也

致

陳督辦
吳幫辦

光緒三十四年正月二十五日

敬電悉郭鵬揚既經起解當調劉忠樑來奉面訊一切謝武剛本
無足輕重惟其人既發交看管何以逃逸且既在逃或入日入韓
亟應確切查明奉省警兵僅挑出程度稍優八十名擬卽令前往
延吉佈置一切須通盤核計現既辦三百名用款甚鉅延吉廳巡
警歸併款項當亦先行核併支用六道溝建造兵房卽希妥籌經
理張忠揚已起程矣函二件已接到容另覆大致均可照辦

附

陳督辦
吳幫辦

來電

箇養電敬悉郭鵬揚已派測繪科長李恩榮工程隊長李文藻於昨日率兵起解並將前統領劉忠樑節略暨該犯親供已備好緣該軍變後卽由胡殿甲接統旣無控告亦不查辦昭常到吉始接劉忠樑所呈各節而爲時未久延吉商民目擊該軍變亂之人尙多節略所言不盡挾嫌誣控請飭傳劉胡兩人與郭對質定能氷落石出欠餉有無干係須俟陳守麟重查覆到日再行錄送憲轅附案追究惟該犯素稱强悍恐長途散行難免疏虞已飭加刑具如途中有變准其格殺前有學生謝武剛者經發延吉廳交捕盜營外委看管因其腦病善爲羈縻不甚拘禁該外委疎於防範竟於正月二十夜乘隙脫逃該丞四面緝拏無獲可否邀恩免予深究之處伏候鈞奪

附陳督辦來電

敬電計遠覽蒙由奉撥警兵百名交景春等率帶來延不勝
幸慰延吉地方遼濶僅緊要區域至少亦非警兵三百人不
敷分佈除由奉吉各撥百名前來外尙欲就地選募百名設
學教練以備充補至所有餉項局每月約計三千兩前電請
建營房係外六道溝距齋藤所居之六道溝甚遠遵卽選派
委員前往估勘動工核實報銷工程委員張忠揚乞飭速來
至盼

附陳督辦來電

有電謹悉警兵旣蒙挑選程度稍優者八十名自敷分配卽
請飭令速來至擬辦足三百名需費甚鉅須統籌核計一節
茲與陶丞商辦每年可由延吉地方認籌一萬兩之譜警兵

三百名每月餉項衣裝局用合計月需三千兩已是萬分樽節合本地所籌之數每年尙欠二萬六千兩擬由邊務動用可否之處伏候裁奪謝武剛交延吉廳看管疏於防範以致逃逸其入日人韓當派員確查明白再行稟覆至其逃逸情形已由陶丞另稟矣

附陳督辦
吳幫辦來電

有電想蒙俯察查日本議院提議間島問題反對此問題之政黨舉有代表來延考查情形其繙譯名伊藤者昨已抵延云自齋藤返國後在延各日員深恐此問題終輟竭力維持今因有人前來調查更加注意連日藉端滋擾妄肆要挾欲我稍示退讓希圖保存祿貞察知情情形所來公牘無不義正詞嚴痛加駁詰今擇要稟聞望乞轉達外部竭力向日使

交涉不勝盼禱日人在我延吉地面由圖們江沿起至六道溝止沿途釘立木椿標識地名將我固有之地名擅行更改其椿上大書曰會甯驛間島某某社會甯在江南乃韓國與我接壤之一府以江爲界江北屬我延吉該日人等擅將我國土拓入韓界無理取鬧實所不解已派員將所有木椿盡行拔去日人屢來狡辯必至詞窮而退然其謀未遂不肯善休今探知其隱衷乃爲將來修造鐵道地步彼因經營間島特由漢城經釜山至清津直開航道清津至會甯間約華里百四十里擬修鐵道輕便鐵道早已通行現正預備改造此路且欲由會甯直達我六道溝蓄意已久未敢遽然提議今特釘立此椿欲一探我之對付手段何如耳日人稱火車站曰某驛書曰會甯驛有深心也彼旣未提議及此我亦不便

先行詰問然擅立標識擅改地名並將我延吉擅行拓入韓境主權所繫疆界攸關擬請外部詰問者一據韓民崔永瑞訴稱日人在白雲對越茂賞茂功等社委派社長苛斂民財一節蒙電諭調查實據以便外部向日使交涉遵卽派員前往密查取回李享俊趙永三社長執照各一張均係本年由統監派出所給發又齋藤斂取民財之諭及韓人李求敏苛派韓民指令書金採榮斂錢原牒各一張證據昭然毫無疑義查去秋齋藤加派社長預立行政機關害我主權比經請外部向日使詰問後由吉林領事島川交出齋藤致統監府電內稱加派社長雖係實事并非充行政機關不過使人民聯絡其未辦畢之處應卽停止帶派等語不料事隔未久死灰復燃且苛斂民財變本加厲實與政權有碍照錄各據另

函具呈請將前電之詳細情形一併轉達外部擬先請外部
詰問者二正月二十日有華民潘金之佃戶韓民全蓋有隨
租應交薪柴屢向討取抗不交納十九日其兄潘祥因家無
燒柴再向討取不但不給反行兇毆被全姓父子將潘祥衣
服撕破經潘金瞥見前往勸解了事而全姓父子因與頭道
溝憲兵所之書記郎李段永金連澤等相識仗勢逞刁誣控
潘祥該處憲兵特務會長市川貫吾竟派李段永等及無賴
韓人多名恃強傳訊擅行禁押後又傳全姓父子對質經我
派辦處察知將全姓父子截留向該憲兵要回潘祥該憲兵
擅押不放而且出言無狀後經祿貞函責篠田略云貴憲兵
擅押華民害我主權實屬無理已極請速釋潘祥嚴戒憲兵
當將潘祥釋放復函云於此所屬未定之地方我憲兵保護

韓民受韓民之呈訴有聽取之必要頃面詢潘祥非扭傳乃承諾同行並責我事務員截留全姓父子妨害其憲兵之職務執行當經駁詰云貴官既無裁判權不得擅收人民之呈訴則無聽取之必要卽對韓人亦不得侵我地方官司法行政權去年曾經齋藤大佐認可既背前約且敢將我國人民拘禁數日之久實出情理之外貴憲兵對於潘祥無理情形卽借承諾同行亦不足以自圓其說以上所陳與司法行政及人民之權利大有妨害萬不能稍示退讓擬請外部嚴行詰問者三東古城子華民凌貴於去秋九月間忽被頭道溝憲兵所派薙髮韓人李段永金連澤率同韓民多人扭拏到所無端加刑且予禁押凌貴不堪其苦乃於當夜偷逃因懼憲兵之暴亂不敢歸家至今不知去向而韓人李段永金連

澤等自稱爲憲兵所書記郎自凌貴脫逃後常至其家以要
凌貴爲名而調戲其女伊妻凌王氏出爲保護屢被毆打於
正月十三日該韓民李金等夤夜又到其家向女逼姦未遂
怒毆其母凌王氏並打毀器物多件強擄女去聲稱往大河
坑尋覓其父行至中途逼姦不從強行污辱二十一日經凌
王氏控訴前來復查無異憲兵擅肆強權刑押華人韓人李
段永金連澤等依憲兵爲護符喪盡天良陷害凌貴以遂其
強姦之願函告篠田令交李金兩犯弁處罰憲兵而篠田又
曲爲袒護助桀爲虐似此橫行無理擾害地方萬難姑容擬
請外部嚴行詰問者四杉松背一帶森林乃官家所有因關
交涉去年曾經電稟遵示封禁勿論華韓人民有私行斫伐
者罰令將所斫之木充公去臘有韓人南允賢盜斫被獲自

知故犯情願受罰將所斫之木板三百塊充公自具甘結在案二十三日和龍峪傳事務員因修造學堂前往搬運百餘塊篠田察知逼合韓人南允賢等至彼控告允爲爭回所斫之木欲破壞我封山之禁令因之韓民咸往呈訴篠田乃派憲兵會長平野吾次率同憲兵四名並韓民多人至和龍峪向傳事務員談判始而尙以要求發還木料爲詞傳云此罰料前經稟明上憲若要發還非奉上憲之命不可後又請以所運回之百餘塊充公餘均賞還傳因以交情相懇乃允請命翌日該憲兵又到派辦處狡辯傳云旣經請示須待命令該憲兵云我今日出去卽將山中之木命他兵全數運回委憲兵來劫擋便是兵的事體我萬不能等貴上憲批准說罷昂撤而去竟敢命人搬運罰木篠田愆憲兵擅干政事現

在延吉之憲兵散紮各處如果均依照該憲兵無理行爲後患何堪設想擬請外部嚴行詰問者五去年十月間曾有韓國巡警三十名潛行來延盤距六道溝張貼告白察巡街道當經昭常等函致齋藤往返交涉該警兵等漸次消滅茲據該處事務員報告復有韓國警察事務所寄宿舍大書特書標示門外內外警察課軍務課等名目且有警兵一二人時出巡查體察情形顯欲復萌故智巡警爲司法行政之機關該日人等何得擅設而韓國警察權又何得施行於我國如令安置妥帖主權何在況近來憲兵舉動擅受韓民詞訟大有害於我行政司法之權若不竭力交涉勢必日求進步無所底止擬請外部嚴行詰問者六正月初十日華民徐守山飛跑至帽兒山前派辦處哭訴韓民在日官處呈控被日本

憲兵前來捉拏適過此處懇請作主憲兵亦隨後飛追而至
闖入該處詢以何故答云奉上官之命特來拏他經支事務
員將徐截留報告前來其後詰問篠田竟藉口允諾同行支
吾答復華民既經允諾中途何至奔訴其爲逼迫可想而知
篠田不守公法殊屬無理憲兵舉動尤爲可惡擬請外部嚴
行詰問者七齋藤回國篠田代理其事故意爲難成則居功
敗則恃有退步當此日本提議之際我若竭力交涉以示不
讓使其爽然自失未始非計至篠田等之違約舉動若能令
撤退出境固屬大幸否則亦必得警其將來除將一切事宜
隨時電商昭常就近極力維持外用特縷陳伏乞鈞裁

致

陳督辦
吳幫辦

光緒三十四年二月初二日

前接來電云日人在會甯修輕便鐵路目下有無舉動是何實在

情形並會甯對岸我國所轄地方是何村鎮名目均望詳查確實
電示爲盼

附 陳督辦
吳幫辦 來電

長電想蒙賜覽日人擅立木標改我延吉地名一節頃據日
人辯明前來所釘木標爲記里數以便行人非書會甯驛乃
書自會甯驛至某處之程途刻查邊務所存拔來木標實係
自會甯驛之字樣居多既經自行聲辯似可寬予詰問惟稱
我延吉爲大韓國北間島及擅改社名等事尤非請外部力
爭不可又杉松背木植一節當派王管帶前往理阻該憲兵
未得肆行搬運篠田干我行政憲兵出言無狀已致函責問
矣知關屢念用特奉聞

致外務部 光緒三十四年二月初六日

前奉卅電當經電詢延吉茲據復稱日人由韓清津海口至會甯計日里二十二里輕便鐵道久已通行自會甯至六道溝去秋徵調韓民修築土道經昭常等詰責中止至輕便鐵道刻下尙未遽然舉辦聞已招集華工六十餘名前往會甯從事工程前日工兵一營在江上破冰搭橋經祿貞詰問卽時撤去現仍派員隨時查訪會甯對岸大抵爲越墾韓民之部落並無著名村鎮惟正對會甯之江邊向有駐防營半哨以資稽查故名稽查處彼擬修輕便鐵道之路綫卽由此處過江經火狐狸溝及和龍峪到六道溝至所改我國之地名甚多彙齊函報又日人派第四十九聯隊第三大隊約於月半後到會甯是否換防抑係增隊探實再報等語謹以奉聞

致

陳督辦
吳幫辦

光緒三十四年二月初十日

陽庚電均悉匪徒嘯聚老松嶺駱駝拉子綏芬一帶經尊處派兵分道前進協力痛剿布置周密極爲佩慰甯古塔一帶仍防其潛往爲害已電飭凌統領嚴加防範並派兵向綏芬策應至邊地兵單不敷調遣自應添兵加防仍應將吉甯軍調歸執事調遣請預行相度地勢以便將來分紮所擬就吉省各軍中抽撥營隊前往仍應照前議調旗兵一標分駐琿延統希察奪覆示爲盼

致陳督辦

光緒三十四年二月十三日

真電悉下車伊始敷布新猷蓋畫周詳至深佩慰邊地兵單昨已電撥吉甯軍並旗兵一標歸公調遣分地駐紮琿春左近荒地旣與俄韓交界又有匪徒潛蹤自應悉行放荒招懇以杜隱患卽請迅速籌辦近日韓人延吉訟案日人皆送交我地方官辦理固已隱將裁判權相讓此時保護韓民對待日人仍當格外注意彼族

深心未可測也陳統領麟璽來電催發吉強軍春季餉項卽請尊處就近轉飭理餉局速行撥發以重邊防

附陳督辦來電

蒸電敬悉綏芬汪清間之匪亂頃據北路進剿隊來報各處匪徒將欲齊集因進兵甚速未獲完聚不敢相抗均潛蹤逃匿多向綏芬而竄昭常等原命各路兵隊進逼綏芬鋤其巢穴如該匪欲往綏芬再行結夥是自投羅網不難剿除矣旣蒙加派吉甯軍來延聽調仰見我帥垂念邊防運籌在握曷勝欽感昭常等旣有兵力可用更當趕急剿辦以免屢念至應行添兵加防之處於延字第二號函中已陳大略想邀洞察現擬於吉甯軍到延後卽令駐紮東北一帶及與俄人接界之處因該軍凌統領維琪曾設防於此情形素悉所有防

務命其擔任以資熟手至吉強軍使專任西北一帶之剿防俾得各守區埠以專責成則自不至有顧此失彼之虞查凌統領所部共步隊三營馬隊一營擬令將馬隊分配各營用作探哨並傳遞公文以速交通其步隊三營以一營駐哈爾巴嶺接防吉強軍前營以一營駐琿春接防吉強軍左營以一營駐綏芬甸子老松嶺駱駝拉子等處查此一帶向爲匪巢恐兵隊太單反爲匪徒所害特於百草溝汪清之間辦屯田一營以爲後援當能鎮壓至前駐琿春之左營擬調防頭道溝一帶以爲西北各防所之策應原駐頭道溝之右營移駐三道江古洞河乳頭山以扼西北要區原駐哈爾巴嶺之前營擬調回邊務公所留爲各路之援助以便不時之調遣而圖們江沿岸與韓國一水相隔日人旣於對江各鎮駐有

重兵我於沿江一帶亦不能不稍加留意擬以三鎮所來之陸軍一營擇要駐紮以壯聲色至旗兵一標將來到延統令駐琿以其一營防守各處交界餘兩營留營教練輪班換防俾得操防無缺此各軍隊部署之大概情形也查俄人於各交界處皆派有精兵把守兵舍亦皆整齊我之守界兵隊則均清苦異常所居茅舍漸就倒塌相形之下實與我國體有關昭常等擬稍加整頓凡與俄人交界之處必建與相等之營舍且派有教育之兵卒以壯國威而固邊圉是否有當統候鈞裁琿春兵營已採就基趾卽當籌辦延吉各工程木料磚瓦皆已確有準備張工程師昨已到延已飭籌畫動工知關係念特以奉聞

復

陳督辦
吳幫辦

光緒三十四年二月十九日

正書卷之二十一
三二
瑋春推廣巡警籌款困難自可就地徵收車捐以爲巡警常年經費卽希安定章程辦理將來延吉巡警亦可照辦左右兩司向司審判積弊太甚亟應撤其審判之權除例行案件應歸廳詳報外請另選派發審一員專司審判延吉司獄巡檢卽無庸移駐恐該員未必有裁判才宜另選爲宜瑋春放荒招懇事現已切實查勘并須添兵保護卽請妥籌辦法隨時電示統監府派出所屬之韓國巡警在六道溝一帶勒索民財擾害地方實屬違法行爲現已摘錄各節寄呈少帥面達外部仍望尊處妥籌抵制以維主權韓人李段永金連澤強姦凌貴之女一案日人謂爲韓官抗不送交仍當據理力爭勿任袒庇日本憲兵曹長平野凌茂事務員擅拘華民現旣將該鄉長免職並來謝罪華韓詞訟各事皆送交我地方官辦理具賴折衝得法故彼族亦漸就範圍日人所釘木椿近

又重行樹立極應悉數拔去至另用華民詳記里數抵制之方自亦不可少也

致陳督辦

光緒三十四年二月二十一日

頃接經帥電云車捐作巡警經費自是正辦惟吉省係前任奏定指撥捕盜營餉現飭度支司清查通省收數再爲設法變通等語鄙意如琿春車捐改歸自辦應除從前額收撥歸營餉若干仍行照撥外其餘作爲巡警經費於舊章無碍於新政有裨似爲兩全之策已電覆經帥矣至琿春另設發審專員司獄巡檢不必移駐一節經帥亦意見相同卽請尊處遴選派充務期得力

附陳督辦
吳幫辦來電

漾電敬悉諸蒙蓋籌謹當遵命惟刻下用兵在卽至盼速來至第一標俟化凍後再行開拔則泥濘在道更難行走矣如

蒙先飭一營來延以備調遣不勝盼禱北山一帶之匪漸形
斂迹派辦各隊均跟蹤追趕直入老黑山匪巢搜捕數日來
未接來報想無他慮去年由邊務派三等參謀官柏文蔚往
韓坐探一切曾經祿貞面稟帥座連接該員報告各節頗於
邊事有益潛踪居彼隱與士大夫接交用費浩繁由邊滙寄
恐露痕跡且輾轉不便查該員所來各報皆由安東鹽釐局
轉寄懇請我帥密飭該局每月接濟一二百兩俾得旅費無
缺安心供職至所撥接濟各款將來由邊務算還以清公款
可否之處統候鈞裁

致吳幫辦

光緒三十四年二月二十六日

前寄來調查吉韓界務報告第一本現已核定抄出請將其餘三
本迅卽編輯抄錄寄來爲盼

致陳督辦 同日

敬電悉從前瓊春車捐按運貨次數赴局領票正稅所入無幾而
每次領票驗票又多留難亟當酌量變通所擬編號給牌按月收
稅之法於公家既省周章卽商旅亦多利便誠爲折衷至當卽請
從速籌辦至車捐旣歸自辦自應由巡警局經理每月核其收數
按每車七百文撥歸餉局餘作爲巡警經費其籌辦詳細情形仍
希隨時見示爲盼

致 陳督辦
吳幫辦

光緒三十四年二月二十七日

頃奉外部電據日使照稱吳祿貞用兵力將江北里程標木全行
拔去照復日官故意挑撥以釀事端舉動益行無理可謂不謹慎
已極日政府不能默視等語查日人插椿之地旣在中國界內自
應一律拔去惟彼此問答及文牘往還儘可據理直言不必太形

激烈致令藉口等因特此轉達卽希尊處審酌情形妥爲因應隨時電示是盼

附吳幫辦來電

延前據駐韓探訪三等參謀官柏文蔚報稱職商王化成向在奉天安東爲日人主持一切聞將到延爲日人運動購買民地務請防範等情前來查王化成係山東人從前投効奉天曾經增帥委辦稅務因事被撤日俄交戰之時遂爲安東軍政官大原武慶所羅致彼時在安強種民地推廣市場種種抑勒助紂爲虐情弊甚多迨改設領事後又准其在新市場設賭斂財以酬其勞前年冬欽帥東來時派員前往調查曾有多數人民控告在案現查此人已到六道溝浮寓客店改換名姓查實係日人招來自助者因恐爲邊務公所覺察

故其表面未逕附日人而託言擬謀在日商處管帳若不趁此時翦除後更難圖聞該商頗有才華張金波司使曾竭力籠絡收爲門生而未能入彀者請詢之便知其劣迹祿貞擬趁此日人不得干預之時設法除之

復吳幫辦

光緒三十四年二月二十九日

感電悉查該職商前勒買民地一案已經次帥加價贖回其他所爲類皆宵小之行不足法辦彼旣內怯改名易姓而來必有蓄謀似宜因僞行僞設法羈縻如利我用未嘗於事無濟倘竟背我向彼實跡昭著確有把握則舉手圖之中外自無間言時會所乘使奸用詐全賴措施合宜也

											TEMPERATURE

退耕堂政書卷五十一目錄

電文九

延吉交涉案

延吉交涉案

退耕堂政書卷五十一

天津徐世昌

電文九

延吉交涉案

致朱中丞

光緒三十四年三月初六日

支電悉駐吉日領如果親赴間島卽請派唐道家楨同往惟天寶山礦產不可與日領同看以免藉端干涉郵傳部留施道一節此間亦接部電當以哈爾濱地方重要施道熟諳交涉人地最宜未便另易他員據實電復郵部並請其轉飭施道迅速來東矣查覆王昌熾案內所有內閣會議政務處咨文八件刷印原奏一件請卽彙齊寄來俾資查閱

附朱中丞來電

欽奉 幸蒙俞允間島交涉聞已議有端倪兩國均從退讓處

辦東事或新有生機駐吉日領聞請命於彼政府擬親往問
島查看如日領果往擬派唐道家楨同往就便令勘視天寶
山礦產如何郵傳部電商留施道總辦路差現在哈事迫切
杜道遇事敷衍亟盼施道早到藉資整頓想我公亦同此情
請卽由尊處挈銜電復查復王昌熾稟件昨已寄呈惟信內
載內閣會議政務處咨文八件刷印原奏一本漏未封入如
尊處無此文件示知卽寄

附陳督辦來電

查琿春出口木植稅向由吉省木植公司發來稅票歸本署
代爲經理每年解省之數約中錢五六百吊不等歷辦有案
竊以此欸解歸省城交涉局既屬有限而每年向由省城津
貼琿城交涉經費四百餘吊爲數亦相差無幾現在此間興

辦一切籌欸爲艱且邊務事件從前因陋就簡諸不完備頗爲外人恥笑茲當加意整頓隨時與俄日交接需費亦復不貲若能將琿屬出口木植稅一欸截留本地以與每年由省津貼之欸相抵則於省城交涉局所入旣無大虧損而昭常復得酌量情形變通辦法此稅收數或可稍見起色於琿春交涉經費不無小補萬一未能如此辦法亦擬酌設一常年解欸歸本署包辦否則省局所入有限則其間中飽偷漏實有不免徒妨公務兩無所益究以何法爲當務請核示遵行再此間部署略定卽擬於十二日回延餘函詳

致陳督辦

光緒三十四年三月初七日

歌電悉琿城出口木植稅擬扣留本地解欸與省城津貼一項相抵旣所差無多卽可照辦已電達經帥矣惟吉省稅局向稱弊藪

歸公經理有裨地方尙希認真整頓剔除中飽則收數必可增加也唐道與日領同赴間島勿令日領同勘鑛山以免藉端干涉公久離延琿事料理就緒望卽回邊防爲盼念

致唐中丞

光緒三十四年三月初八日

陽電悉已轉電經帥請其督核設法阻止頃另接經帥來電云日領赴延查看係其自請前往並非由政府命令想俟彼政府回電方能決定行止該領對唐道言齋藤在延與中國官吏常有衝突究竟孰是孰非伊親往查訪可以明白并未言及天寶山礦產寶意在奉既有令唐道辦天寶礦稅之說故令其同往就便設法獨自查勘並不令日領知之其對於日領但言同往遊歷別無他說查林領事近來辦事尙屬和平從前島川要求賠償之命案現仍按中律擬辦已經照會了結並未賠償又中野前來吉索償天

寶礦務損失該領謂係無端要求不能代辦中野遂赴京交涉等語查吉日領所言與公詰問林使之言正相符合當可阻其不往候得吉電再達先此奉聞統希督核

致朱中丞

光緒三十四年三月初八日

陽電悉已摘要轉達少帥頃另接少帥來電云昨晤林使詢以日領赴延所查何事此案問題未決不應派日官前往請其阻止林亦以不去爲然謂該領并未報告允卽電詢其去意希轉電經帥核辦總以勿使其去爲要等語卽請尊處督奪設法阻止隨時電示爲盼

致陳督辦

光緒三十四年三月十三日

據陳統領麟璽陶丞彬電稱匪首草扒子等竄入俄界管帶楊得勝現退紮綏芬甸扼其回竄之路佈置尙妥此外有無餘孽仍宜

嚴密搜捕務絕根株希轉飭遵照

復外務部

光緒三十四年三月十七日

銑電敬悉林使照稱有派常備軍一標赴延之說及任意行動用對抗手段等語大部覆以舊有各營裁汰老弱補調新兵瓜代換防等因具見蓋籌周密此處亦實係如此辦理查遵章改編巡防隊兵額減少邊務重要樹葉封門鬚匪將起到處皆慮兵少曾派吉林原練步隊一標分起陸續撥往琿春一帶駐紮並非開赴延吉亦非富氏統率前往該使所聞當係傳聞錯誤尊論就地挑補空額加以訓練不必檄調已成之旅用意尤極周匝謹當遵辦惟三省地方遼闊兵隊僅有此數調東則西少調西則東少而鄰界則強兵勁旅籌備完密並聞日人擬派遣憲兵千二百名分駐間島等處並在東京組織拓殖社會募集資金專爲遷徙日韓兩國

人民之用實力經營藉詞延宕隱圖佔據而我力不能與人相抗
彼亦無事藉詞恫嚇兩國邦交敦睦邊疆官吏人人皆知所有調
換軍隊裁汰老弱不過爲彈壓地方保護治安起見亦各國軍隊
應辦之事並非特別增加兵隊也界務未定深願兩國各保和平
勿生疑慮伏望鈞部主持設法對待應如何回答之處敬祈鈞裁

復

陳督辦
吳幫辦

光緒三十四年三月二十日

篠巧兩電悉延吉擬設學堂推廣教育爲抵制外力之計辦法極
是卽希籌畫一切從速開辦所需經費暫由邊務動用工程管帶
李文藻由三鎮借撥三千兩當飭支應處先行撥還將來並前五
千兩統由邊務項下扣還均飭照辦

附

陳督辦
吳幫辦

來電

前函陳議於延吉廳推廣教育早蒙鈞鑒因經費難籌故尙

未定辦法現日人頗欲用此策以要結人心令一進會在各處斂財勸學設立學校義塾等名目意欲韓民識字者暫入其範圍手段極爲陰柔惟彼既用韓民出名創辦事近文明未便阻止然若任其進步則日人勢力將亦鞏固故此時欲求抵制惟有自行推廣教育之一法現擬由我地方官於延吉境內擇定地段設初等小學堂八所高等小學堂四所大

致照定章辦法無論華韓人民居此土者皆准入學約計每年常年經費需二萬餘兩開辦經費需一萬餘兩如蒙允准卽由邊務暫行籌辦可否之處請速電示爲禱

附 陳督辦 來電
吳幫辦

前派工程管帶李文藻往長春招募工程隊及購置一切工程器具已蒙由奉省糧餉處撥借五千兩茲接李管帶來電

各事均已辦齊惟所置各物及發二三月兵餉并川資各項
尙須銀三千兩因無欸未能撥隊等語已電請曹統制先由
三鎮借三千兩交李管帶令速開隊前來惟三鎮借欸未便
久懸懇仍飭奉省糧餉處借撥三千兩交還曹統制如蒙核
准卽請并前撥五千兩統由應解邊務項下扣還糧餉處爲

禱

致外務部

光緒三十四年三月二十日

頃接延吉電稱近聞日人經營間島新定本處官制立敏活之機
關並添派憲兵五百人前來以資管理之說昭常等前僅據駐韓
領事及柏參謀所報猶恐不確復經派員渡韓密查果有其事齋
藤已於陽曆四月三號由日來韓現抵韓京正在籌議經營間島
辦法并聞統監府准齋藤便宜行事云頃又接六道溝派辦處會

事務員來報日人近日於當地經營兵舍併在各鄉徵收馬草勒令韓人每戶出草四捆每捆發價韓錢二百文以備增兵之用准於本月二十一日律送齊由是徵之彼憲兵越界入我境之期當在數日內也前接欽帥函命昭常等就近抵制奉命後再四籌思所謂抵制之法當以阻其入境爲第一義竊思憲兵奉彼政府之命而來昭常等卽以理阻該憲兵等決不肯違彼政府之命而退若以強力阻之又恐開釁非由政府與之交涉不能有益等語事機危迫請速向日使詰問阻止大局幸甚再前彼藉詞言我添兵實爲彼自添兵張本現我未添一兵彼若竟派多兵越境應如何對付祈示遵

附陳督辦
吳幫辦來電

效電想蒙鈞察頃據六道溝派辦處會事務員來報日人所

居門牌近有大書大韓國北間島龍井府字樣者日人新定間島官制其內容雖不能知觀其門牌所書或卽擅改我延吉廳爲龍井府因該地韓民俗稱六道溝爲龍井村也現已函詰日官與彼力爭尙未得彼答覆日人自去年來在六道溝所建房屋甚多近已立有統監府統字號門牌者約有一百十餘所尙有新建樓房數十間刻正日夜興工其布置誠難預測前因阻彼建築封禁山林不准任意採伐此事屢經交涉早蒙洞鑒今彼於此地已定官制並增派五百名憲兵故建築甚速欲加阻止實別無良策昭常等於去年到延卽有無論華韓人民之土地禁其暫時不准貸賣租借以防日人私購故彼建置基址皆係強佔民地前曾詰責力阻彼乃變計以重利相誘當地韓民爲利所動爲勢所迫多不敢有

異言惟與彼派出所附近者乃係華民申子寅之地已被日人強佔者約有九晌之多前經我派辦處密諭該民不准典賣田地及租借與外人故尙未爲日人之利所惑近因春耕在卽而日人復求地正殷亦頗有遷地爲良之意現仍欲設法勸導買結其心令其始終堅持然地方甚廣小民無知貪利恐終非持久之道但又碍難詰問日人明阻其買地租地之舉動蓋我僅陰行抵制彼無從知我底蘊故亦僅隱爲圖謀我若竟題及此問題與之交涉彼見民地之不租賣果出我意其陰謀已無可秘密必將仍以地方所屬未定爲詞照齋藤初來時任意立派出之例強佔民地則我旣不能以強力阻止亦必將無如之何然我卽暫時不明與交涉陽作不知彼於此求地甚急之時人民縱能堅持恐將來終不免

出此強佔之策總之關此租賣土地房產事件我若稍爲退讓再求挽回頗非易易其後患更難深言然欲終爲抵制實無善法務懇將此情形電轉外部此間土地可否聽外人租賃亦或別有抵制良策請速示辦法以便遵行不勝盼禱

附外務部復電

號電悉日增憲兵事當經面詰林使據稱並無其事不過報紙有此說查陳京卿致唐中丞皓電日人佔地建屋及釘牌購草各節確係實力經營該使所言當係掩飾延宕之詞除分別照會詰阻外近日有無實在增兵舉動希並轉飭密探隨時電聞

附朱丞來電

陳吳兩君效電所云日人近來舉動自是意中事與東報所

載組織間島官制議決出張所經費之說相符日對我外部
解決之事所以濡緩者只是以退爲進惟我派軍隊則彼時
來詰問彼乃顯派憲兵至五百人之多且派六道溝爲龍井
府有實力經營之說鄙意此時我旣不能以兵力禁阻又不
能置而不問舍確定界務速行勘界更無辦法惟日人之恃
延宕主義未必卽能辦到可先詰問現在設官增兵及新立
龍井府名目是何用意凡國際境界問題除勘界外別無二
法倘不言勘界而祇事增兵是與強佔土地無異我不得已
惟有實行宣佈請外人干涉評隲此事日人或可有所顧忌
並將我處調查證據譯登外報使各國皆能憑以研究爲將
來提交和平會張本公與唐帥本素持此說現在唐帥在京
擬請公挈銜電達外部並請電告唐帥請其力爲主持至龍

井一說彼未宣佈之前似暫可不理倘果設官行政請部向其取銷斷不承認憲兵早入延境現只多寡之分仍請陳吳隨時臨機應付其租買田房一層部中未必卽有辦法現亦惟有仍用前法暗中密爲勸禁蓋意如何并求開示

致唐中丞

光緒三十四年三月二十三日

據臨江縣文武稟報韓境甲山道河城等處有韓民聚衆四五百人號稱義師與日軍爲難有韓民四人越我界搜查韓人槍械情事已飭該處文武嚴堵過江並飭交涉司往告加藤轉告在韓日軍勿得追剿侵入我界加藤已允卽電達伊藤禁止除飭知東邊道知照外特電告以便接洽

致

陳督辦
吳幫辦

光緒三十四年三月二十四日

頃接外部電開碼電悉養電計達昨准駐日李使函送派出所官

制有所長事務官等員本部已照會駁阻並將擅改地名釘列門牌及建舍購草等情一併照詰延屬並非通商口岸碍難准外人買地如果日人在該地實行佔購應由地方官妥爲理阻仍聲明彼此訂明專章之後自可酌定辦法此時實未便任意行動等語卽希查照理阻惟其種種行動恐未必卽肯中止仍希隨時設法力爲禁阻相機因應以臻妥協并將前籌各項抵制辦法切實施行隨時電聞近日奉境臨江對岸韓地又起義兵數百人與日人爲難已飭嚴防不准渡江不知韓會甯一帶如何請查防

致朱中丞

光緒三十四年三月二十四日

養電悉日人經營間島日進不已尊議預籌抵制辦法甚妥已將原電轉達唐帥請其向外部酌定辦法見示昨唐帥電云林使答復外部謂絕無派兵之事恐仍係掩飾延宕之詞未可因彼一言

遂不籌備陳吳處仍希隨時指示俾有遵循至禱

附陳督辦來電

養漾兩電敬悉日本於延吉廳增兵設官事林使既不承認復蒙外部詰問阻止昭常等當可設法抵制惟就各處探訪報告及日人舉動觀之似非無其事者現又委員切實密探矣近日韓國義兵在其本國與日兵及一進會衝突鬪殺時有所聞昭常前在琿時韓逃官李範允在俄界遣員來署並攜有俄官介紹書自稱爲義兵之首欲索還前所繳存琿署之槍械并求假道攻日昭常以有違公法卻之茲據琿屬巡警及該處分防隊報告東溝一帶有李範允遣派之頭目數人欲在其地之寄居各韓民家招募義兵三千人有日本密探者已爲其黨所獲現業有數十人云昭常等恐其聚衆難

散或擾害我地方治安且慮別有交涉已飭巡警將其頭目
三人驅逐出境未聚者嚴行禁阻已聚者力爲解散復由延
吉挑選警兵十名前往阻其嚴查或尙不至釀成事端俟得
續報再行奉聞再探得齋藤鈴木早抵韓京會議後鈴木回
六道溝齋藤卽往北京運動其意極爲詭譎可否電知外部
預籌抵制亦祈核奪

致朱中丞

光緒三十四年四月初四日

前准洽電稱第一標已預備一營聽信擬繞道甯古塔赴琿不必
經過延吉以免外人疑阻等因所見極是當已電復惟由吉省到
甯古塔與由塔到琿春沿途共有若干站軍隊由吉開拔可幾日
到甯再由甯開拔可幾日到琿務請密飭田參議等切實查清將
一營隊伍酌分若干起於本月初間開行嗣再次第籌酌將全標

漸次開行然表面不能不借題發揮掩人耳目故一營分起初次開拔時可託詞慶都護前次電稱吉甯軍人數過少不敷分佈請酌撥陸軍赴塔填紮爲名或指爲與三鎮馬砲步隊換防爲名因而撥隊前往均無不可俟該營到塔後向琿春進發是名赴塔實赴琿蓋吉省現當改編巡防各營調隊換防勢所必至其先赴塔或接連赴琿皆在內地行動是我應有之主權外人無所藉口全仗鼎力密飭田參議等勿將此計畫輕易宣洩非帶隊開拔之長官一概不得預聞特佈俟定有開拔准期卽電知爲盼

附朱中丞復電

支電敬悉隨密飭田參議等詳查妥籌勿洩計畫茲據稱預備一營擬分四起於十三日開拔由省至甯古塔八百里沿途山路村店零稀攜帶糧草約十六站到甯稍駐相機前往

由甯至琿六百餘里向係官站約行九天沿途村店更少尙有
百餘里杳無煙火行人露宿商民多由俄國火車繞道海參崴
往琿而庚子亂後沿途村店焚燒將盡尙未重修有碍行程擬
請電飭駐甯九標管帶周茂東速往琿春偵查一俟查復沿途
情形再飭旅兵由甯往琿庶可穩洽並擬按慶都護來電所云
因防軍改編裁汰塔城地濶兵單撥隊駐甯保護地面之詞宣
示官兵使一營到甯稍停時日再託詞續往以全標到琿爲目
的似此辦法較爲慎重是否可行祈酌定電示飭遵

致陳督辦

光緒三十四年四月初七日

微電備悉管帶王長齡旣資得力自未便遽易生手本日已照電
朱經帥請飭劉燮松暫緩到差并另電孟督辦如劉已赴延仍卽
調回另候差委至吉林防剿事宜旣責成該提督辦理似不能不

將後左右三路暫歸節制以期調度通靈無誤戎機其實中路統領是其專責卽如貴督辦經理延吉邊務倘非假以全省各軍翼長又恐遇事諸多窒碍所有翼長關防卽希勿庸繳銷總之軍事緊要全賴大家公同維持遇事均可互相咨調幸勿稍存歧視致涉客氣本日又將此情節電該提督查照並非除前路外一概不令邊務預聞也統希鑒照

致陳督辦
吳幫辦

光緒三十四年四月初八日

奉外部電准日使稱接伊藤電稱近有韓民若干到頭道溝日憲兵分遣所訴稱上月十七日以來中國派兵往九道墟娘娘庫等處勒令韓民一律薙髮易服如違驅逐並取具甘結韓民爲勢所迫曲從者多伊等不願薙髮逃來訴明等情此舉與條約公理均有不合中國執此手段以圖韓民入籍恐問題發生困難切盼速

電匡正等語該使所稱有無其事究竟是何情節卽希查明電復特達希卽確查詳復

附陳督辦復電

陽庚電均悉王管帶長齡事當遵辦二道江娘娘庫等處屬敦化縣治原有越墾地界因土曠人稀華人向招韓民耕種久住之韓民亦遂領有田產惟該處實爲由韓茂山入夾皮溝之要道若日人在彼處著手經營復如延吉故事其後患不堪勝言去冬因特添設派辦處一所並分撥兵隊在彼駐紮冀杜狡謀以防患未然復密札敦化縣嚴飭華民以後不許僱用韓人已僱用者設法遣散出境有產業者則援光緒十六年成案准其薙髮入籍以免野心不定致招外患並諭令妥爲勸導逐漸試辦不可過於激切自去年來韓民漸次

被遣散者亦頗不少而有產業者見我實能保護俱已安心歸服前月接到該處事務員報告謂其地有韓民二百八十餘戶同時到派辦處情願自具甘結剃髮歸服卽一律照辦以示懷柔此舉於邊務不無利益而預杜日人陰謀最爲彼所深忌其實該處並非越墾地卽使實行驅遣日人亦不能過問况入籍者乃經我多方勸導實係出自情願決無逼勒情事務懇將實情轉達外部卽請照此意駁復日使勿得藉端造詞干涉我內地主權是所至禱又日前有日本憲兵三十名攜帶武裝由會甯來六道溝次日卽已分遣各處經我兵再三詰問則含糊以換防爲詞蓋彼增兵事實已定議經我外部提與該使交涉彼則變計不用強蠻而用漸進我如查問則可藉口換防似此陰謀誠不可測倘再查有陸續增

兵情事究應如何阻止仍望示遵又探得日人於六道溝將
大興土木只派出所一處已估價五萬餘日元其餘房屋甚
多俟齋藤回卽行興工又譯日人各報紙所載間島派出所
官制多有一年後再定之語觀其舉動於界務顯係有意拖
延以便實地力求進步清津輕便鐵路若成則商貨轉輸便
利我卽竭力招徠似難與彼競勝卽如現在商場交易吉林
龍元只值日元六角官帖價值尤低百方設法無可挽回若
非界務從速解決確定主權此等暗中虧損皆非筆舌所能
爭論惟在我帥與外部之設法主持而已又綏卿此次奉調
回奉邊務各事藉可面授機宜曷勝感幸昭常與其同事數
月剛柔相濟實屬合之爲美離之兩傷早在洞鑒且教練佈
置軍隊各事自問不如綏卿敢懇於各事商定後催令早日

回邊俾資襄助爲禱

致陳督辦

光緒三十四年四月十二日

奉外部電准日使稱接外部大臣電開韓國亡命者李範允近在
中俄韓交界地方將有結集黨羽串通韓匪之勢查李向在琿春
地方韓民中最有勢力者倘或潛至中韓所屬紛爭地界內釀事
致使日本政府不得不分撥軍隊前往豆滿江左地方之舉難免
紛糾事端實有碍邦交應請中國政府特爲留意設法彈壓以防
致有上開情形並稱如中國設法交出決不置之重典或驅出境
不准逗留中國亦可等語李範允現在何處日使所稱結黨串通
韓匪各節究竟是何情形希卽確實查明妥籌辦法毋爲籍口並
電復等因特達希確查詳覆

致朱中丞

光緒三十四年四月十四日

綬卿電稱延邊需款甚急吉省有解奉鹽本銀十萬兩擬就近撥歸延用將來在奉存邊防經費項下提還等語似此辦法較爲便捷請飭司照撥所有運費由綬卿面稟定奪統希卓裁

附陳督辦復電

文電敬悉李範允事曾於前月敬電上陳茲承外部特詢謹將前後情形統陳一切查李範允現居俄界之岩杵河隱恃俄人保護雖去琿僅九十里並未入中國境內前昭常在琿時有李黨二人持俄官介紹書來署求見云欲假道攻日當以有違公法卻之是時昭常念李範允係間島問題發生之首惡爲我國之叛黨今日交涉困難大都因彼而起意欲誘之入境因而擒之復與該黨人好言令李親來面商乃李終有所懼未敢入境嗣該黨人又來索取前繳存琿署之棒械

復力卻之後訪聞該黨人有在琿屬東溝一帶招兵情事當飭巡警前往嚴行禁阻力爲解散後經警兵將其黨首三人防護卽已驅逐出境復恐琿春警力過弱並由延吉挑選警兵前往鎮壓近據各派辦處及巡警報告韓民之欲應李黨招募潛行逃歸者實已不少然無聚衆滋事情形無從查拏茲並調前路巡防營管帶門振中駐紮東溝就近彈壓並飭各處巡警防兵於各緊要通過地方嚴加防範以防意外日內亦未聞於我境內別有舉動惟李範允旣經我處禁阻其進境招兵並將其黨人驅逐彼更不敢入境至彼在俄界所爲我則未能詳知也卽懇將此情形轉達外部以後如查有別項情節當再續聞再昨接李柳溪星使來書附寄日本留學生宋練所著間島問題一卷是書詳於知彼頗足補邊務

政書卷五十一
報告所不及該生既於間島事實悉心考究李使亦稱其學
行尙優似可調來邊務藉資襄助但昭常與李使未約密電
可否請我帥用官密電與李使商調俾收得人之效伏候鈞
裁

復陳督辦

光緒三十四年四月十六日

寒電悉北山一帶匪擾賴公部署防剿疊擒渠魁照章正法弁兵
進剿時并將匪首草扒子當場擊斃奮勇可嘉白景玉應准酌量
委用以示激勵再據仁川委員唐恩桐報告日副統監曾彌游歷
安東回漢昨初八日返東京約一月復回韓城齋藤前赴北京現
復折回漢城聞即日遄返間島併以奉聞

致陳督辦

光緒三十四年四月十七日

前飭籌撥軍隊赴瑋茲據田總參議稟稱吉省旗標第三營前隊

於十三日由省開赴寧古塔其左右後三隊卽於十四五六三日
接續前往該營到寧後稍停三五日卽開赴琿春次第一二兩營
卽以第三營由寧赴琿起程之日爲始仍如法分起繞寧赴琿惟
琿春營房准公前議只能安插兩營茲該標全到未識琿春地面
能否再籌地方安插如琿地實不能安插三營可令該標第二三
兩營往琿第一營留寧暫駐俟將來籌有地方再令前往無妨希
卽籌奪電復至撥隊赴延駐銅佛寺之事可暫緩辦

附陳督辦復電

篠電敬悉赴琿軍隊早已籌備兩營駐所若駐三營卽須分
紮各鄉恐割裂編制不便查該軍繞道寧古塔必經額木索
而與敦化縣相距不遠近已將敦化縣一帶劃歸前路地廣
匪多尙恐兵力難於分佈據富統領面稱前曾親到敦化縣

查勘城外原有營房尙堅固齊整街面甚濶店房亦大足養
一營有餘該縣本不在境界問題之內若以一營駐紮其間
與駐甯古塔無異日人無可藉口且北路一帶本屬空虛以
此鎮壓亦可補巡防兵力之不足萬一延吉境內有必需添
兵之時調遣亦較便易如蒙允准請卽電知田總參議照辦
此間卽派員前往會同敦化縣預備一切立候示遵

附陳督辦復電

銑電敬悉查齋藤現尙未回昨日其代理篠田偕譯員來署
爲二道江一帶韓民歸化各事及境界問題談判竟日彼所
持論極淺薄反覆辯駁無詞始退然其言論雖屢爲我屈而
實事仍不免逐漸進行近聞欲藉李範允亂黨起事爲名添
兵越境經我力阻現正嚴飭各軍隊因防亂黨絕其窺伺或

無他慮再邊地寒暄失時現尙雨雪關內軍民來此入春得病者頗多而此間向無醫藥殊堪憫念前承黃道世珍贈送廣東丸藥數箱雖尙有效終非良策因擬設立醫院電商天津軍醫學堂總辦徐道華清代遣醫官茲據復稱已選得醫官一員並代草議章程皆就至簡辦法尙屬妥善惟先需開辦經費二千金以便購辦器具藥料等物徐道辦事結實早在洞鑒敢請由奉墊撥二千元匯交徐道代辦俾邊務醫院早日成立軍民受賜實深又前電所稱留學生湘人宋練昭常素昧平生但就李柳使薦書及所著間島問題而論學識尙優立論純實似不類浮囂一派去年到奉被人指摘不知是否此人仍請我帥密電李使詳查該生平日品行會否來奉游歷當能水落石出人材難得用敢瀆陳

致陳督辦

光緒三十四年四月三十日

李星使推薦湘學生宋練一節昨又代電詢柳溪據云該生近日頗悔悟前非接見尙靜默故行推薦跡弛之士誠在駕馭等語惟邊務關係交涉必須性情和平兼有經驗者方能得力宋練到彼恐不甚相宜應請緩用如公與李星使通函暫作罷論如何

致陳督辦

光緒三十四年四月二十一日

嘯電悉日人欲借名勘亂派兵過江公極力駁阻辦理極當現雖無甚舉動仍希嚴密防範延吉擬設醫院已由奉撥發二千金電徐道派遣醫官速往開辦矣金相弼干預我行政權公飭巡警傳訊辦法正當日人強橫殊堪痛恨仍希堅持到底嚴與交涉爲幸

致朱中丞

光緒三十四年四月二十四日

頃據陳都護電稱工程營管帶李文藻由長春運送工程器具回

延本月十七晚在黃土窰地方住宿不意是夜兩點鐘有鬍匪多人先搶該地張姓雜貨店後搶鮑家油坊持械塗面勢頗猖獗該管帶之馬夫寄寓油坊亦被捆住搶去戰刀一把餘物未失查黃土窰係由吉赴延往來大道原有精銳營分防現已劃歸中路將舊勇撤回又未分隊填紮以致鬍匪橫行商旅受害等語查黃土窰舊有兵隊既經撤回現歸中路亟應派兵填紮請飭孟提督暨中路統領速行佈置以資保衛毋再延緩並將此案匪犯嚴密查拏務獲究辦切切

致外務部

光緒三十四年五月初三日

頃據陳副都統電稱日本駐紮慶源守備隊長池上井一擬派將弁帶兵二十名來瓊探訪李範允舉動請代覓地方駐紮等語日人險詐久欲借李範允爲名派兵越境況瓊春原與境界問題無

涉向未許日人駐兵更非延吉可比事關國際萬難將就已飭照約立阻並加紮營伍嚴密防範但彼既敢與我明言雖故爲嘗試而野心勃勃不可不慮應否先電外部詰問日使以防後害等情查日人欲派兵越境實屬蔑我主權斷難允許應請鈞部向日使詰阻免生轆轤是爲至幸

致陳督辦

光緒三十四年五月初三日

敦化房舍足敷一營駐紮甚好頃准朱大帥來電崇海隊伍於初四日由甯往琿其第二營訂於初八日赴甯隨卽轉琿至第一營前已於四月念六日由吉赴敦化特一併佈聞

致陳督辦

光緒三十四年五月初三日

頃據仁川唐領事報告齋藤大佐經二十二日已返間島又聞清津日本領事官詳報自西四月一日開港以來招徠日商約計千

名卽所轄境內鏡城會甯穩城鍾城富甯慶源慶興等處約有日人四千名惟清津至會甯二十三里間用手押小鐵道現擬修改輕便小汽車竭力經營以期將來聯絡清津間島運送貨物又稱間島東西二部地土肥沃將來農業出產必旺又聞日本將續派憲兵五百名不日渡韓云云以上情形業經函達外部特此電佈希卽確查妥籌應付爲盼

致陳督辦

光緒三十四年五月初五日

據陶丞來稟以日本輕便鐵路將次造成日貨輸運延境日見增多宜籌徵收貨捐以期抵制等情此事頗有關係目前舉辦如日人干涉能否有把握與爭卽希酌奪情形見復爲荷

致朱中丞

光緒三十四年五月初五日

文電悉簡始所稱各節已照電外部並覆簡始屬其始終堅拒與

尊指略同日貨輸入延吉陶丞擬籌徵收貨捐現屬簡始斟酌情形妥爲籌核示覆以憑辦理

附陳督辦來電

日人近日在圖們江沿岸各處添設渡口經我力阻彼始稍停時日齋藤特提此事經我辯論力言設渡係謀人民便利不應阻其交通當答以我向設有渡船往來甚便何得謂有碍交通彼復言境界未定彼此均有設渡之權復答以現當維持現狀有者不廢無者自不得添彼復言中國主張圖們江北爲領土則圖們江自在境界問題外故與維持現狀無關復答以我言以圖們江爲界並非言圖們江非我屬也彼復言據國際法言以江爲界者大都以江心分界復答以以江心分界或以水深處分界不過法律如此而實際係依條

約所定以前中韓並未有此條約至據實例而言圖們江全權或盡屬中國也彼復言南岸自屬韓國中國渡船何以能抵彼岸復答以此乃我之先有權向例如此韓國素無異言至韓人設渡向未許其有此權故當此維持現狀之時不能認其新有且以此觀之我船能抵彼岸彼船向未允渡我岸則圖們江主權全屬中國可知彼復言水中無論如何分界暫時不論若定不允韓人添渡中國渡船亦將不能達於南岸復答以日韓中倘不添渡我人民亦無須到南岸彼此以江爲限暫不往來實所深願彼一時窘迫無計乃強言無論如何我必自由設渡復答以彼此交涉無非論理爾若必自由行之我惟有自由阻之但恐與兩國政府所約維持現狀之意大相違背耳彼始無言而退雖然觀彼之意其理雖彰

其志恐仍未厭也查彼之添設渡口雖非緊要問題然我若稍自退讓則江流數百里彼皆可任意通過我實無法再爲稽查防範况交通機關爲彼所持則損失主權將不止此且彼與我此時之極力爭渡權者實欲聯絡其清津鐵路其意極爲詭譎現彼清津輕便鐵路已通至南岸江邊聞齋藤此次回六道溝卽將有越境鋪設鐵軌之舉故我不僅當阻其修路而於自由設渡亦必以極力抵制爲宗旨但我只能以口舌爭彼若於修路設渡兩事果以強力行之究竟如何對付務乞鈞示遵行再天寶山銀礦事彼仍常來糾纏聞其現正與政府交涉務懇終持前議毋稍變步致彼得肆狡謀不

勝盼禱

復陳督辦

光緒三十四年五月十四日

元電悉已電轉達外部並請外部與日使交涉不得於境界問題未決以前無理取鬧違兩國維持現狀之約今日又據吳幫辦所陳中國設立渡舟始末及此事將來關係電達外部請外部向日使轉詰齋藤停止新設渡舟並不得擅派憲兵阻止行人由官渡往來俟外部覆電到後卽當轉達左右惟此次日人添設渡舟關係極大誠如所言日人旣濫用職權若遂其志願則此後交涉必專以強力相向事事皆將失敗務望竭力維持嚴爭此渡口權利若彼終不稍事退讓則我可於境界問題未決以前下斷絕韓民來往之禁令並加派得力憲兵梭巡我岸韓民如恃強不遵卽送廳究辦請以此事先告齋藤然後實行再其他渡口尤望加意防範爲預行抵制之策可也

附陳督辦來電

稽查處日人添設渡口事已蒙達外部在案近日人屢來力爭我皆嚴詞推絕彼見我意已決乃以強力逕行設渡我既不能以兵力強阻只得飭巡警嚴禁行人不准乘日人渡船彼竟稍不知退乃派憲兵阻止行人不准由我官渡口通過而彼船由北岸渡來我則禁其人登岸與彼以理相爭彼竟明言必用強力似此相持不下終恐激成事端現在其清津鐵道已抵南岸而六道溝大興土木已成街市南北交通稍滯者僅恃此江之隔若此渡權爲彼所得則六道溝以至江岸一帶皆入其勢力範圍彼之實力將日益充足而無可抵制故設渡之事雖小而所關繫實大彼之必以強力行者蓋於彼實有大利也今彼既不論理實無他法可以抵制而又不敢稍爲放鬆致得乘機進步此時實處進退兩難究應如

何因應請速電商外部指示機宜現當彼此爭持急待決定若再緩數日彼船已來往多次益難挽回矣懇速電復爲禱吳綬卿聞已由京回奉何日事畢返延甚念蓋此間向來交涉每先由綬卿抗爭者昭常隨後商議了結之法最爲合拍此時一人直接談判每難轉圜故望其歸極切也

致外務部

光緒三十四年五月十四日

元電想蒙洞察茲據邊務幫辦吳祿貞稟稱圖們江北原屬封禁重地韓民渡江懸爲厲禁自光緒初年韓民始漸私渡後因越墾日衆難以禁止乃於光緒十三年設立中韓通商局卡於圖們沿岸由通商局設稽查處光霽峪西歲江渡口三處每處各設渡船一隻操渡業者皆係華人以通往來且便嚴密稽查自通商局裁

撤後各渡口皆歸和龍峪分防廳管理廳官從中漁利韓民因而包攬承領租稅遂將華民之操舟者裁撤每渡口韓民約歲納二三百金於經歷衙門朝鮮官吏私徵所得者亦約相等然渡舟由中國設立而渡權亦操於中國官吏之手二十年來毫無異議今日人忽於稽查處添設渡舟並派憲兵阻止行人由中國官渡來往此事關係極大蓋稽查處爲圖江南北兩岸適中之地且由朝鮮會甯至齋藤所駐之六道溝必以稽查處爲交通樞紐若渡權爲彼所得則自六道溝至江岸一帶皆入其勢力範圍我則退處無權於日人之一切舉動絲毫不能干預矣且日人自清津至會甯之鐵路已成今忽出而爭此非僅欲添設渡舟勢必爲修圖們北岸鐵路之張本履霜堅冰後患不可不預慮也等情查稽查處渡舟向係中國設立渡權亦久由中國管理齋藤今忽添設渡舟

且專以強力相向殊屬無理已極望大部援例與日使力爭並請日使轉詰齋藤宜將新設渡舟停止並不得擅派憲兵阻止行人由中國官渡來往以符公法而保和平是爲切盼

附朱中丞來電

頃簡始電稱日人近以強力逕行設渡其清津鐵路已抵南岸而六道溝已成街市南北僅恃此江之隔若渡權爲彼所得則六道溝以至江岸皆其勢力範圍請速電商外部指示機宜若緩數日彼船已來往多次益難挽回等語查林使本有維持現狀之說現在舉動輒用強力以圖進步似非痛切詰責俾彼此謹守現狀不可否則派兵脅阻既有不能空言爭持亦屬無益尙祈盡籌卽挈銜與部切商爲禱

復朱中丞

光緒三十四年五月十五日

寒電悉據簡始電日人恃強設渡殊堪痛恨已據情電外部請向日使力爭并電致簡使嚴行禁阻加派憲兵梭巡如彼仍用強力我將下斷絕韓人來往之禁令以相抵制俟外部復到再行佈聞

致陳督辦

光緒三十四年五月十五日

頃接保定段督辦芝泉電云上月廿四日曲監督同豐由日旋國道經門司海口見一聯隊開赴緬山聞共係兩師團此乃末一隊也藉彈壓韓之土匪爲名實爲間島而往究未知是否等語雖屬日人虛張聲勢之舉然日兵藉詞越境亦在意中急宜嚴加防備目下維持之策一則勿令朝鮮義兵越境務於沿江各處嚴密稽查二則飭各防營嚴防馬賊蠢動免致日人藉口一切事宜均應相機因應隨時電示爲盼綬卿事畢約一星期卽令飛速回

致外務部

光緒三十四年五月十六日

寒電祇悉遵卽轉電陳都統遵照辦理惟查日代使所稱中政府前旣聲明約束李範允嗣後更宜嚴加約束免兩國間致生不測之變等語查李範允并未在我境內無從約束惟有嚴防入境此意務乞先向日使聲明以免他日藉口

附外務部來電

日員擬添兵駐琿事准江電當卽照詰日本代使茲准復稱接政府電帝國陸軍早發有命令禁止此等行爲萬一守備隊中有此事端更由陸軍發令嚴飭請放心惟中政府前旣聲明約束李範允嗣後更宜嚴加約束免兩國間致生不測之變等語希查照

附陳督辦來電

寒刪電均敬悉渡口事日人以我堅持其稽查處所設私渡

已暫行停擺所有止官渡之日憲兵韓巡檢亦已撤退惟聞涼水泉子黑頂子兩處均有韓人私設擺渡已飭陶丞許經歷切實查明遵照電示辦理日人派兵駐琿春經我嚴詞駁詰後絕未提議惟增兵至韓之舉早有所聞其野心勃勃註重間島亦在意中承示外部已得日使切實照復或不至妄有舉動查李範允實在俄境巖杆河陰恃俄人爲阻前派李寶楚易服過境探訪已在客寓與彼晤談黨羽不少韓義兵亦各處響應但其人詭詐必乘隙而動此時日兵佈置極密該黨斷不敢暴發昭常仍當遵諭加意嚴防免彼藉口請紆鈞厘美總領偕武參贊十四早到延彼此談論頗形欸洽並詳詢日人舉動及境界問題昭常擇要密告并贈以邊界輿圖伊極表同情日人派憲兵長接其到六道溝伊未答應初

意住延一日卽行因感冒展緩稍愈卽往琿春已早飭琿春預備優待合併奉聞

致外務部

光緒三十四年五月二十四日

頃據陳督辦昭常電稱稽查處渡口事曾蒙轉電外部請示在案此事雖小關係匪輕前經竭力抵制示以決無挽回彼雖不屈然尙不敢絕對強蠻遂允暫停新設擺渡以俟政府命令近來不知我外部曾否與日使提議此事前日齋藤忽派其憲兵長來署重提前案謂已奉彼統監府命令新設渡船必以強力通行不得再爲禁阻我復竭力與辯數鐘之久彼皆不答但云他來不過通知非求允許語畢卽去昨日昭常因派交涉科長偕譯繹官往六道溝面晤齋藤申論此事彼語強硬無理亦如彼憲兵長所云並謂彼所奉者確係統監府之命而我所爭者決非中國政府之意且

彼命令已出決無可挽既已通知且渡船定本月二十五星期一
日即可開辦其船中岸邊皆以憲兵保護決不容我禁阻昭常不得
已只得仍派憲兵巡警前往渡口邀阻然又不敢竟用武力致生
釁端但觀此情形彼既決用強力我以口舌腕力攔阻決不濟事
卽如前電所云永絕往來亦恐難辦到只能禁我不往不能禁彼
不來船已到岸非武力斷難令其退回究竟是否可用武力抑或
別有辦法伏乞迅速電商外部立候訓示施行等語事機已迫究
竟如何對待希鈞裁示遵

附外務部復電

日人設渡事敬電悉此事前准元寒兩電卽經本部以圖們
江北係中國領地光霽峪等處渡船向歸中國官吏管理何
得任該處日官强行干預侵犯主權等語照會日本阿部代

使轉電統監飭齋藤等勿得在該處設渡並將阻止行人之
憲兵速行撤退在案尙未接彼照復茲准前因已再由本部
照催該代使查照前照所稱各節迅速轉電停止設渡並撤
回憲兵除得復再達外希查照

致外務部

光緒三十四年五月二十八日

據陳督辦電稱日人設渡事初尙觀望現於廿六日彼所派渡口
憲兵已試令開渡韓人見我憲兵巡警攔阻甚嚴多不敢從其過
渡彼憲兵竟敢用強力驅逼韓民登船我以理論彼仍以奉命爲
辭詰問齋藤則推諸統監府命令斷難更改現正相持不下似此
情形非得我外部照會日使電飭停止斷難以口舌解決也再調
查韓民新設輕便鐵路往來甚盛日人陸續添兵經營駐紮兵隊
處所甚形周密俄人亦新添馬隊三千步隊二千現已開至巖杆

河因營舍不敷暫駐帳棚操練甚勤俄親王亦於本月到海參崴
巖杆河巡閱我黑頂子派辦處事務員借事往晤俄員詢其何故
添兵彼亦言日人對我境疆問題無理已極不可不防並警告我
國亦必嚴密籌備切勿鬆勁云云合并奉聞等情此事日使一味
延宕彼憲兵竟以強力從事究應如何應付事機危迫可否卽乞
轉照日使電飭停止伏候鈞裁示遵

附外務部復電

日人設渡事勘電悉前兩照日使均未答復茲復照催並分
電駐日李使駐韓馬領事向日政府統監切商轉飭停止設
渡並撤回憲兵除得復再達外希查照

退耕堂政書卷五十二目錄

電文十

延吉交涉案

退耕堂政書卷五十二

天津徐世昌

電文十

延吉交涉案

致陳督辦

光緒三十四年六月初七日

據施道電稱司戴德囑代稟知伊在密江站至東涼水泉子查得一牆係唐朝所築爲中韓分界請飭查明以爲間島辯論材料等語卽希派員前往詳細履勘以期獲有確證爲幸

致陳督辦

光緒三十四年六月初十日

奉外務部電准駐日本李大臣覆電亦稱外務省於停渡撤兵各節不允照辦云云齋藤電稱渡船係屬應辦華官用強力阻止故以憲兵保護覆書詞甚堅決等語此事內外堅持許久彼仍不肯讓步我旣無完全之理由自應早謀結束之法以免激成事故損

失更多陳副都統所稱與彼協商一限制稽察之約彼或當允云云如能於江北領地主權無礙復能限彼不得肆意自由亦維持現狀保護利權之道希斟酌電知該副都統妥商辦理並電覆等因此案雖據外部稍允退讓惟日人得寸進尺正復可慮希執事仍予堅持俟萬不獲已留此爲下台地步一切如何因應希卓裁

附陳督辦來電

渡口事連日相持不下華韓人民已無敢從民船過渡惟日憲兵韓巡檢等故意糾率一進會人每日自渡數次以示不停然我憲兵必極力攔阻不聽其自由不免小有衝突昨日彼此憲兵相爭激烈互用腕力推挽以致各員微傷今早齋藤復親來面議此事彼始則以國際法力爭欲我稍讓繼見我決無讓意復欲迫我承認先用兵力謂禁阻結果終必至

此當答以我自有法能阻止決無用兵力之意如爾先用兵力我則更有辦法談判數鐘之久仍未能決我乃令彼姑待政府命令彼則仍不允停僅求暫時和平而去昭常熟籌此事彼若得此渡權卽思聯絡江北鐵道以後稽查更屬無法故我必極意禁止以防其漸就我方利害而言自必應如此然按之國際公法圖們江雖爲分界江彼此渡船交通似難專允我而禁彼以強對弱或能強行今則時勢非昔比矣且江流甚長沿岸原有韓渡口者尙自不少我亦無法能禁不過稽查處最爲會甯至六道溝之衝要幸昭常等到此時尙未見有韓國渡船今彼新設此渡於我大有利害關係故欲以維持現狀之說竭力阻之原冀彼知難而退乃彼欲以強力逕行不肯中止窺其所持亦不得謂絕無理由今我雖

確認圖們江爲分界江流而於此事終難持完全法理僅據維持現狀一語多方解釋辯護仍未能令彼心折徒彼此爭持不下倘因而激成事變於江北主權反慮多所損失亦非邊務之福反覆思之如能與彼協商一如何限制如何稽查之約專以維持圖們江之彼此權利現狀但求不礙江北領地主權復限彼不得任意自由此事亦遂可和平了結今彼見我抵制極力雖未肯讓不無稍卻倘與商限制稽查之法彼或當允從萬一彼仍恃蠻不服協議難成再行緊對禁阻亦未爲不可鄙見如此仍懇電商外部指示辦法無任禱切綬卿何日回延並盼

致外務部

光緒三十四年六月十五日

據陳副都統電稱中俄界碑據前時所查存者十無二三上月復

派測繪員前往詳勘並令繪瑋俄交界略圖尙未竣事近派員密往韓國查探日人情實多爲日兵所阻冒險得達者僅二三人據查清津者報告距清津五里有日兵屯糧三處每處房二十間存儲皆暗距清津數十里近鏡城之羅南地方現正修築營舍規模宏闊標曰第二十四師團建築地聞營舍成後有大軍到此又有清津口外新來兵輪二艘運有造火車頭機器其自清津至富甯及自清津至羅南已加工改修火車道惟富甯至會甯之輕便鐵道尙未動工又欲修鐵道以通溫貴云據查溫貴者報告溫貴海口距圖們江十餘里韓名雄基渺海灣大而三面皆高地北岸有大山綿亘卽是緞山實爲東方最好軍港東越江口卽俄界東北距瑋春二百餘里西北距延吉亦二百餘里其意以清津鏡城屯陸軍之所以溫貴爲軍港不僅足以防俄一旦江北有事旣以清

津之兵向延吉又分兵繞向琿春其佈置頗爲周密海灣東北有
吉城卽韓之造山鎮有日兵數百住此廢城內運來大小礮十餘
尊架於城基上聞尙有多數日兵陸續來此彼對於境界問題已
爲最後之預備我亦不可不爲自衛地步究應如何防範懇祈指
示等語以上探得日人布置實情合行佈陳卽祈鈞裁示遵爲禱

致外務部

光緒三十四年六月十五日

據陳副都統電稱渡口事仍遵諭嚴禁惟齋藤知彼政府及統監
府於此事頗爲堅持故益覺強硬且在對岸新築管渡房舍有進
無退我若稍鬆必致失敗現一面仍飭憲兵禁阻一面與彼談判
仍言政府之意決無挽回陰則別用手段令彼轉而求我而後與
彼逐漸開議或得達我目的請轉達政府如前力爭昭常在此方
可漸謀下台之法是否有當仍請鈞酌等語特此佈陳卽希鈞裁

示遵

附陳督辦來電

施道電據美總領事電稱於密江路東涼水泉子之間見有唐朝一牆承電飭確查在案查密江路在琿春西北三十里東涼水泉子在密江路西六十里兩地在近江岸爲延琿相通要道其相距之間兩岸峻嶺壁立中夾一江江北大道卽盤旋於山腰行路頗爲艱險今春昭常到琿時過此見江南岸似有古牆數處卽以遠鏡沿路窺察其牆基或在山頂或在山腰雖多毀壞而斷續相接約三四十里確爲古時邊牆詢之韓民有云爲唐人所築者徵諸現有之地誌史乘均未詳考唐時東南諸部落除長白山附近及松花江牡丹江諸流域爲靺鞨所據外其最著者則有三國一高句麗一百

濟一新羅當時三國互相侵略雖難確知其疆域大抵高句麗係據今奉省北部以達今朝鮮西部及其咸境北道百濟乃據今奉省南部新羅則據今朝鮮南部唐高宗時百濟高句麗相繼爲唐所滅但唐兵僅至平壤未及圖們江流域高句麗滅後新羅似已據有今咸境北道及吉林省是以唐龍朔以後新羅王眸雞林州大都督之稱後渤海大興新羅復僅保故土圖們江南北之領地全失後唐時今高麗始併新羅而有其地如謂此邊牆築於唐時或係高句麗防靺鞨所築亦或係新羅與渤海相爭時所築均不能知總之唐之邊界初未至此殊與中韓境界全無關繫至今高麗則至遼金及元初猶未有今咸境北道元以降其疆域始及於圖們江南岸若以此牆爲中韓邊牆則必非唐當築於元明之間彼

韓地官民古時震於唐朝兵威每通稱漢人爲唐人或相沿
誤爲唐朝所築亦未可知然無指證終難以爲憑據每欲派
員實地查勘屢以越境不便而止且自涼泉子以東國初卽
轄於琿春境界交涉從未及此縱無別項證據日人亦未敢
遂冒言在間島之內故雖知有此牆前此竟未奉聞自接電
示當卽派員過江密探有無碑記等物可證乃爲日人所阻
未得窮究現所查得者仍與前在江北遙望者無異若先電
復後如查有確據再行詳陳至中俄界碑據前時所查存者
現已十無二三上月復派測繪員前往詳勘並令繪琿俄交
界略圖俟歸報卽電聞

致陳督辦

光緒三十四年六月十八日

篠電悉韓亂黨與日開釁沿邊一帶亟應嚴密防範以免日兵藉

端侵入尊議調遣各軍分防光霽峪凉水泉子等處布置甚妥惟邊境延長處處可越兵力尙單希酌奪情形隨時措注綬卿卽飭速行並另電經帥籌助

附陳督辦來電

李範允黨在韓慶源慶興一帶與日兵開戰情節前日電達吳綬卿想已呈覽日內據各處密探飛報或云慶源府已失日人連戰皆敗死傷甚眾或云韓黨已趨鐘城並有欲越江攻六道溝之信確否雖尙未詳而韓黨勃發其勢頗盛日兵初戰實有損敗各處添兵運礮車駛不絕現江北居民殊形惶恐日人亦皆有懼色前已電飭原駐黑頂子之兵近紮江岸昨日復將駐懷慶街等處之陸軍調紮稽查處光霽峪一帶江邊防堵鐘城會甯等之韓黨北竄並調駐瑋之旗標分

駐涼水泉子東西一帶江岸瑋城仍留兩隊駐紮以防韓黨由俄界竄入現巡防營分駐各處或剿匪或防匪皆不能撤敦化一營又難調來只好就現有陸軍如此布置究竟如何防範仍請電示並請飭綬卿速回爲禱韓黨消息俟續得確報隨時奉聞

附唐中丞來電

盛巧兩電悉韓黨日兵越界萬不可以武力從事應飭簡始於韓黨日兵入境時務須極力攔阻令其出境倘逗留境內卽須勒令卸去軍械如不服從應分別日韓相機辦理是否乞卓核飭遵

致陳督辦

光緒三十四年六月二十三日

奉外部電准日使照稱陽歷七月十三日晚有李範允黨暴徒五

名攜帶銃器徘徊於契滿洞地方涼水泉子附近亦有稍多數之暴徒出沒此際中國地方官對於該暴徒等若怠於檢查並萬一有煽動利用情事在日本自不得不行適當之處置希十分設法實行防範以免變生意外等語除照覆盡力防範外希查照密飭留意等因希速詳查現在是何情形嚴密防範並望電覆以便覆部

致沈道承俊

光緒三十四年六月二十五日

准經帥電開韓李範允在溫貴海口與日人開仗又慶興府及新邑二處業經開仗三次其駐六道溝統監府日兵更調回大半僅餘數人有韓民由溫貴回者言萬戶城西面有日本礮車二十餘輛並有柴草數堆凡存物之地均有日兵站崗不准外人窺探已飛飭該統領嚴密防範等語此次日韓交關東邊一帶密邇韓境

難保日韓兩黨無越境滋事之舉希飭沿邊將吏實力嚴防以免別生軼轍並希分派密探實力查探務祈消息靈通爲要

附陳督辦來電

馮漾電均敬悉李黨舉動及我境防範各節已於寒篠電達諒蒙鈞察近據各處密報李黨初在慶源慶興一帶與日兵相接各有死傷後聞日兵益增彼黨已竄入山中或由他途竄去今尙未知究竟日間會甯附近實有李黨二三百人出沒無常城內十分戒嚴俟探得確情再奉聞前因沿江緊要之區恐一旦有事動關國際須派程度稍高之將弁駐紮或不至臨事冒昧故飭陸軍及旗標分紮嚴防並通飭各駐守軍隊略言韓黨有逃入境者須極力攔阻如已棄武裝或願繳武裝者以該國之國事犯論亦可容納萬一彼黨必以武

力入境始得以武力對待之蓋我爲自衛計不得不如此耳
至日兵倘有無故越境情事不聽攔阻卽應飛報便與日官
交涉不得逕以武力從事云云昨蒙轉唐帥電示機宜昭常
極爲欽佩前所通飭各語大意似尙未相背如有不當之處
仍懇隨時指示辦理再現因謠言日緊馬牌一帶尙覺空虛
而新軍已不足分布只得抽調原派緝匪之巡防隊一哨駐
紮該處江岸並調馬隊一哨晝夜於沿江巡邏部電所開日
使照會語皆無徵則我沿江數百里並未有李黨繞越可知
至涼水泉子一帶我處防守尤嚴安有暴徒出沒而我不知
者其言不實更可想見請將以上情節分別電覆外部唐帥
爲禱

致陳督辦

光緒三十四年六月二十五日

准經帥電據田鎮面稱南崗地廣兵單每欲增加兵隊限於間島問題此刻韓亂黨已與日人開釁中韓接壤我軍亟宜嚴防勿任竄避查第三鎮十二標第二營現駐延吉藉此若將該標第一三兩營全數移至南崗稍厚兵力想日人亦難疑阻實查該鎮所籌各節不爲無見用特電商請卓奪覆示等因希卽酌籌辦理

致朱中丞
陳督辦

光緒三十四年六月二十八日

奉外部電開宥電悉防範李黨事已由本部照覆阿部代使略云自當盡力設法防範斷無藉此有煽動利用情事萬一該黨徒或有竄入中國界內之事中國自當極力處置等語來電稱該處布置各節我旣嚴行防範諒無竄入我境之虞萬一有此情事自當按照公法將竄來黨徒一律繳械拘留再候核辦希密飭遵照等因希查照

致外務部

光緒三十四年七月初一日

准陳督辦電稱以邊地亢旱糧價陡漲軍民紛紛以食貴爲言韓商由火狐狸溝一帶載運小米出境每日韓車有數十輛之多不得已保我民食出示禁止米糧出境近日稍得微雨尙未沾透乃齋藤無故出而干涉日昨因賀

萬壽之便又來糾纏強以兩足爲詞要求撤銷禁令並引善後章程彼此交易之說再三辯論數鐘之久中韓條約本絕對禁止米糧出口卽善後章程雖暫時准其交易亦有荒旱禁運一層答以撤銷禁令有礙主權萬不能行如一禮拜內再得大雨由延吉地方官查明無礙收成當念交易另籌通融之法乃齋藤反覆狡辯聲言必向政府交涉故談判數次未得結果竊思此地本難適用中韓通商條約此時亦難適用光緒三十年兩界官吏所定之維

持當時現狀章程而因早禁止米糧出境實爲地方官之全權原無須援照條約章程所言故意以強蠻之語辯論必欲消除命令窺其意並非注重此事蓋欲趁此時藉一事突用強蠻言語圖占優著以便後此邊務事件及吉林全省交涉皆可因此得漸占優勝地步其用意誠爲叵測萬不宜稍爲退讓特將始末陳明伏乞電達外部以資對待並祈酌示辦法以便遵循再前日奉有電敬悉所有富統領呈報韓黨情形各節此間每日所得各處報告如此類者不下數十通大都外間謠傳未敢電聞至近日實在情形又沿江防範各事已詳前上諸電日來尙未聞別有動靜並聞等語特此轉佈如日使向鈞部饒舌務請極力拒駁以保主權爲幸

復陳中丞

光緒三十四年七月初一日

勘電悉禁止糧食出境係我固有主權齋藤無故干涉誠如尊論

正書卷五十一
其用意圖佔優著陰撓我行政權萬難遷就已據情轉電外部預防日使干涉希公始終堅持卽將來弛禁亦須由我爲政庶不失主權也

致外務部

光緒三十四年七月初十日

據陳督辦電據火狐狸溝李稽查員報告本月初六日日本憲兵二十名各帶槍刀子母又武裝步兵五名隨同憲兵等均由會甯渡江入境比經該員向日本憲兵分遣所理阻答言不知從何而來至下午三時由齋藤調赴六道溝去訖正由昭常向齋藤詰問間本日寅刻又據該稽查急報初八日下午日人用韓車四輛裝載槍枝三箱子母十一箱有韓巡警押運經過經該員將車阻留至下午三時日本憲兵長森川亨帶領憲兵五名到所意欲強奪當由我憲兵阻止未被奪去等情前來查載運軍火入境本爲國

際公法所不容且彼此正當維持現狀自不得不先行扣留以待交涉除特派憲兵長親往查視禁阻外並派員責問齋藤矣惟日人昨既加兵今又載運大宗軍火再前日銅佛寺派辦處報告亦查有日人於米車內暗藏槍械之事不知其意何居應請速達外部先向日使詰問俟齋藤如何回答並能和平令其送出再行電聞等語特此佈聞請速詰問日使轉飭禁阻退出爲幸

復陳中丞

光緒三十四年七月初十日

佳電悉日增憲兵及載運軍火入境已據情轉電外部請詰日使日人屢以維持現狀爲詞乃復自背其言悍然不顧請向齋藤嚴行交涉以保主權各稽查處仍飭嚴密防範爲要與齋藤交涉如何情形仍望電告

附田總參議中玉來電

頃接邊務陳中丞江電云我國對於韓義兵及日兵越境之舉動不須增加戰鬪力但依國際交誼不過藉少數兵力保境內治安延琿沿江一帶邊務業經時派偵探分軍嚴防並將辦法通飭富統領劉統帶在案諒無他虞至吉林迤東敦化以西距戰地尙遠俟查有戰敗越境情事自當電告云云現已陳明經帥派第一標第一營管帶徵泉速派諳練官長二三員分途前往延敦接壤與韓界較近處扼要偵探迅速報告相機辦理以慰憲廑

致陳中丞

吳幫辦

光緒三十四七月初十日

前議延吉屯墾辦法作何規定現有第三鎮退伍兵五百零七名情願實邊若卽飭令前往可能安插望速電覆

致陳中丞

光緒三十四年七月十一日

蒸電悉撥款已飭照辦唐帥今早抵奉未能在此久住邊務重要
祈公從速料理卽來奉詳審籌酌副都統印請先隨帶來奉俟奏
派接署有人再行交替爲妥

附陳中丞來電

青佳電均悉邊務自四月間由吉林撥發十萬金除邊務本
處各項應用外因數月內興辦工程需款稍多計現在延吉
興修邊務公署一座營房三座琿春營房三座五道溝外六
道溝娘娘廟等處新修派辦處各一座其餘銅佛寺哈爾巴
嶺光霽峪頭道溝等處或購買民房或重修舊壘延地偏僻
工料皆極昂貴所費均屬不貲又屯田工程各營餉學堂巡
警各經費均由邊務按月支發而且均屬創辦需款較繁前
屬綬卿此次回防卽便請款帶來旋聞改道海參崴故電稟

請我帥委員另解頃蒙再撥五萬金目前儘可敷衍來日方
長仍懇源源接濟不勝盼禱昭常俟綬卿到後約一星期卽
可起身回奉亦急欲與唐帥一晤惟琿春副都統印親帶來
延應如何交代請卽示遵

致外務部

光緒三十四年七月十三日

據陳督辦電稱日增憲兵及私運軍火事昭常據報一面飭六道
溝派辦處事務員責問齋藤一面派憲兵長馳往稽查處與日憲
兵交涉先於憲兵長未到時齋藤得信卽派憲兵緝譯前往堅以
防範李範允爲辭與我稽查員糾纏其勢洶洶相持不下適工程
營李管帶文藻因驗工到稽查處見彼此不休恐致決裂開釁遂
爲和解先將扣留之軍火交還日人取回收條聽候長官命令詎
日人得回軍械後立即裝車率憲兵多人仍繞道往六道溝前去

維時我憲兵長尙未到彼處稽查員不敢運用武力致彼以強濟詐竟行通過現在派員責問齋藤必令交出或退去彼乃再三強辯始言境界未定繼至無詞乃云此時因防李黨爲自穩計實不得已以後斷不至再有此事彼語固不能信然已無他法惟有嚴詞詰責以杜將來而已至彼憲兵之來彼始云全係換防當卽迫其將舊來者退出繼復云半係換防半爲防李黨新增事平卽退其詞反覆狡詐決難爲憑然此地旣歸境界交涉守邊者難于用武雖如何強硬抵制不過能稍阻彼之自由彼以狡詐手段隨時乘機漸進實所難防惟有懇達外部一面將此事責問日使一面令彼承認再不至有此舉動庶彼在此者不敢任意行爲而我守邊者亦得有詞以爲抵制也究應如何辦理並預防後患仍請示遵等語特此布聞祈照詰日使以免將來效尤并指示辦法爲幸

附陳中丞來電

真電敬悉祿貞今晚抵延與昭常諸事接洽約一星期後即可起程回奉延吉屯墾辦法祿貞在奉時曾與兵備處傅道提議大略容再函詳屯田兵丁此間正苦難招承示三鎮退伍兵百零七名請飭來延為幸

致陳中丞

光緒三十四年七月十八日

奉外部電開前據蒸電當即照詰日使除軍火業由尊處轉飭禁阻外希即電政府飭齋藤毋得任意添兵運械以符維持現狀之旨去後尙未准復茲據元電該項軍火已經和解交還日人等語查防範李黨前已照會日使由我竭力設法嚴防日人更不應藉為口實希圖進步除由本部再照日使仍請轉飭齋藤所有增派兵械應即撤回並嗣後毋得再有此等舉動外仍希尊處密飭嚴

防如日人再有此等情事自當據理力爭不宜通融以杜後患等因希卽查照辦理

附陳中丞來電

巧兩電均敬悉日人增添兵械業經嚴詰齋藤責令撤回尙未得覆邊款承撥四萬五千兩深感現在吉省銀旣缺乏而延吉洋價過小不便錢洋搭解且支發工程各項零款需錢甚多似統在吉按行市以銀易錢解延爲宜請卽轉商經帥爲禱昭常現候琿春各員來延將交替各事先行趕緊料理定於二十三日起程約八月初二三卽可到奉面請訓示先電聞

附朱中丞來電

延吉邊務重要簡帥辦理妥協自未便再易生手傳道諳悉

日本情形接充邊務幫辦定能得力卽請擊銜入告謹此奉復

致外務部

光緒三十四年七月二十五日

據延吉報稱有駐紮會甯日本工兵一隊忽於二十二日由輕便鐵道運到鐵船二十隻木船二隻藍木板二百餘塊在圖們江架搭浮橋將至江心當卽派員前往極力禁止始行停止似此強蠻舉動將來如何結局尙難逆料然總不得使彼過我江心一步致傷主權又接六道溝鄭稽查報稱日官齋藤歸後又在各處加派鄉約現時更命一進會在各社舉十家長百家長等多名勒令韓民每戶出錢一百文作爲該鄉約等公費且命十家長按五日報告地方情形一次於百家長轉報齋藤如逾期不報卽行鎖拏等情鄉約家長原爲組織地方行政而設日人駐此旣無行政權何

得有此越分之舉當卽函詰齋藤並通飭各派辦處如遇有日人
添派鄉約家長並勒派公費等事均須嚴禁查日人派鄉約一節
曾經電稟我帥轉達政府與日使交涉日使已諭齋藤勿得再行
委派在案乃竟不遵本國公使之訓擅違維持現狀之約若不從
嚴抵制則恐得寸進尺後患不堪設想應如何辦理之處統候鈞
裁等語祈鈞部詰問日使迫令轉飭禁阻若因此致生衝突中國
不能任其責該公使前已諭禁齋藤當不難就範也

致外務部

光緒三十四年七月二十八日

據延吉報稱日工兵在圖們江搭橋事當經祿貞派參謀官帶同
憲兵前往竭力理阻與會甯守備隊聯隊長三原中佐辯論甚久
理屈詞窮始將搭至江心之半截橋拆去並約以後於兩國交界
之處不得再有此等舉動又齋藤添派十家長百家長一節除函

詰外派員前往面與交涉彼藉防李範允黨羽爲狡賴之計不肯
停派但韓民因我抵制甚嚴漸形解體而日人野心不死時以壓
力從事事關政權萬難讓步懇請我帥指示機宜俾祿貞得就近
盡力維持仍乞轉達外部援去年日使命齋藤停辦鄉約成案向
日使交涉無任禱盼等情特此佈聞祈照詰日使轉飭停止爲幸

致外務部

光緒三十四年八月初三日

據延吉報稱得駐韓張參謀電日人前月增間島憲兵本月又增
憲兵一小隊隨帶礮六尊斷非徒防義兵必別有舉動請早爲防
範並告外部詰問等語據該參謀所陳未始無因惟現時尙未見
有礮隊越境果有此舉必當以全力抵制祿貞已派員赴韓密探
並飭沿江一帶嚴查矣又有日官村田明石兩少將帶參謀四人
來延游歷於經過地方發給日本國旂命韓民挨戶懸掛以示歡

迎兩少將到時祿貞設筵招待詰其來意稱爲調查義兵來者祿貞責以自由入境不先函知我境內有無義兵非貴國所得隨意調查似此行爲頗傷兩國交際等語祈轉達外部函告日使以後不得再有此舉等語特此佈聞敬希鑒察

致外務部

光緒三十四年八月初七日

頃據延吉密報確探得日人經營間島將用強橫手段一增憲兵千名設間島憲兵司令官一員以大佐充之總管韓民民事刑事一改憲兵爲憲兵員凡屬韓民村落均派憲兵常川駐紮實行壓制並監督韓民勿令服我法權一擴張間島之範圍如敦化之二道江各洞琿春之東溝黑頂子並百草溝一帶均派憲兵前往設立分駐所一移民前往所稱爲間島區域內之荒地彼將以絕大資本遷移韓民前來開墾現正在六道溝開辦農業試驗場一定

修輕便鐵路過江其路線已抵江沿以上各節聞係統監府派村田明石二少將前來議決者現正準備實行其憲兵礮隊已到韓北未敢明目張膽過境將設法陸續改裝前來等語查日人在彼自由布置絕無顧忌久已蔑我國權其意蓋俟各種機關安設完善或卽徑用強硬一舉而實行侵佔其地日久相持強弱不敵恐終難操勝算現在事機已兆伏冀大部早定辦法速行解決以免猝起變端倘彼竟用強硬應如何對待之處并希指示機宜爲幸

復吳幫辦

光緒三十四年八月初八日

虞電悉義兵潛入延境最足爲日人藉口務希嚴飭各路切實稽查以免別生枝節日人添設憲兵分遣所處處陰用侵略主義我如嚴行抵制彼亦未敢肆行無忌仍希實力防範以固邊圉勿以交卸在卽稍行鬆懈是所厚望

附吳幫辦來電

魚電敬悉承派傅道趕緊來邊俾祿貞趁此天氣尙煥攜眷回奉至以爲盼邊務一切情形暨前後辦法自當詳告後任以便預謀抵制請抒厘念頃聞光霽峪一帶潛入義兵百餘名當派馬隊分路前往詳加搜索如果實有其事必迫令出境不使擾害地方又初六日日人於八道溝子百草溝東京台傑滿洞等處設立憲兵分遣所每所以憲兵四五人巡警二三人前往駐紮當卽嚴飭附近派辦處及防軍竭力阻止除與齋藤嚴行交涉外用特稟聞究應如何辦理之處伏候示遵

致外務部

光緒三十四年八月初十日

據延吉報稱聞光霽峪一帶義兵百餘人攜帶槍械潛行入境

已由吳幫辦分派馬隊前往稽查迫令出境又日人在六道溝建
拘押所欲乘邊務人員交替之際奪我裁判權已飭傳道預爲設
法抵制矣特此佈聞

致吳幫辦

光緒三十四年八月十一日

頃奉外部電開延吉界務及日人增兵各節本部屢照日使不覆
茲准前因除仍照該使請其迅報政府專飭停止外一面電令胡
大臣向日政府詰問請其電達統監轉飭禁阻俟得覆再電達等
情特此轉佈現當邊務交替之際日人思乘此擴張勢力惟希益
加嚴防俾不得逞接誦蒸電深自謙抑所養彌深執事天資高邁
進德復勇所至正何可量願益加淬厲爲擔任艱難之基是所厚
望

致吳幫辦

光緒三十四年八月二十三日

奉外務部電開日使照稱統監府派出所附屬之韓國巡查因拘
拏韓國匪徒嫌疑者前往會甯對岸江北地方忽有中國巡警數
名將已拏獲之嫌疑者奪去復將巡查帶往中國兵營由隊長李
榮成訊問後奪其佩劍制帽加以拘縛當由憲兵向該兵營交涉
旋將巡查釋放一面由派出所長派員向吳祿貞君請其說明此
次不法行爲及懲辦官吏迄今未得回答茲奉政府命令請將妄
行拘縛親交國之官吏者加以應當之懲罰並求以後勿有此等
行爲等語此事究竟情形如何希飭查詳晰電復等因望卽詳晰
查明電告以便轉復外部

附傳幫辦來電

吳幫辦祿貞此次巡視帶回被日兵捕獲之韓民二名當於
本月二十二日會同職道良佐研訊此案日憲兵本不應在

我境內捕拏韓民以破壞我司法行政之權如韓民犯罪自應歸我捕拏歸我裁判決非他人所能干涉齋藤堅持此地爲未定之界辯論至一小時嗣齋藤要求和平辦法謂彼此皆有憲兵若時常因小事衝突恐非持久之道嗣後如我國捕拏犯罪之韓民彼決不絲毫干預如彼拏捕犯罪之韓民倘有未當之處准我照會向其追問等語良佐謂此事能否允准尙須稟明我政府作主現與私約十日爲期聽候核辦敢請憲裁轉電外部請示辦法此事關係重大一旦允准恐人民土地兩者俱失無法補救究應如何辦理之處請速賜電示以便遵照爲叩

附吳幫辦來電

日前巡視沿邊接讀銑電敬悉一切事竣回署業經電聞惟

途次考查日人事跡暨現時舉動再爲我帥陳之自李黨蠢動後日人在我延吉境內藉防韓亂爲名隱謀擴張勢力凡韓民有不入其範圍者卽目爲李黨任意凌虐沿邊韓民不堪其擾二十日經過和龍峪地方遇日憲兵二人鎖解韓民兩人許經歷前往盤詰據稱奉齋藤命解往會甯他無所知該經歷以韓民隸我版圖無論如何應歸我國官憲管理日兵擅自押解出境竟不過問未免有失主權遂商之押解之憲兵請假一鐘之久將二韓人帶回衙署問明情由以爲將來與日官交涉之張本訊係一名方澤龍手帶重刑一名梁德鳳身負重傷皆有犯罪實據正在詳細推審突有伍長島田率憲兵五人闖入該署大肆強暴聲稱非奪回該犯不可與之理論並敢命所部把守衙門勢將用武因該伍長不可

理喻故將方龍澤等兩名解送來延齋藤聞知來署要求交還當經祿貞嚴行駁詰謂在我境內卽日人亦不得擅行逮捕而況韓人貴官旣無裁判韓人之權卽無逮捕權竟用嚴刑尤爲非分并責伍長等如此橫強應請重辦齋藤多方狡辯反以妨害憲兵職務爲詞不稍退讓祿貞答以妨害憲兵之職務卽是盡本幫辦之職務齋藤乃懷恨而去日憲兵在我境內肆行無忌已屬侵我主權衙署爲國家行政之所竟敢衝入任意喧鬧更與國體有傷再越墾十社鄉約甲長等聯名呈稱日本所派總社長李義英社長李永伯金世希等迫令每韓戶出錢一吊八百文不出者卽當爲義兵拏辦不堪其苦請爲究辦等語查日人派充社長一節早經日使聲明停止委派乃故違約言擾累韓民自應出爲保護當派憲

兵四名前往該處理阻不料日憲兵率韓巡檢十餘人持械抵抗並用手械擊我憲兵幸未受傷即將手械奪來並帶回李義英金聖千二名訊得金聖千雖著韓國便服確係巡警未便遽行處置當卽送交齋藤懲辦矣此次祿貞出巡韓民甚爲歡迎所過村莊挨戶懸掛龍旂致敬齋藤竟敢嚴命禁止韓民中有不服禁止者卽派憲兵前往取下且來署大開談判謂我威逼韓人懸掛龍旂查韓人越墾來此領照納租服我法權歷有年所本與華民無異且命掛我國旂亦不爲過而齋藤竟敢藉端挑釁實屬蔑視我國主權當經祿貞面詰何以出此無理之事彼雖知理屈仍以我迫令爲辭展轉狡辯似此種種無理萬難姑容懇請我帥轉達外部詰問日使不勝禱盼之至

致傳幫辦

光緒三十四年八月二十五日

日兵捕拏韓民齋藤要求和平辦法實欲藉此侵我裁判權我如
允許以後漸謀進步更形棘手希卽極力拒絕始終堅持卽照陳
帥電辦理不必候部示

復陳中丞

光緒三十四年八月二十五日

有電悉日人捕拏韓民實欲侵我裁判權尊處電飭傳道始終堅
持極力抵制辦理極是已照尊電轉達外部向日使嚴行詰問并
吳續來之電亦摘要彙電外部矣

附陳中丞來電

頃接延吉傳幫辦電稱日人拏捕韓民經前幫辦爭回一案
齋藤堅報此地爲未定之界嗣齋藤要求和平辦法良佐謂
此事能否應允尙須稟明我政府作主現與私約十日爲期

敢請轉電外部請示辦法等語茲已先行電復略謂日人屢欲爭該地裁判權皆經我抵制而止此次正當交替之初自未便稍示以弱至齋藤所謂和平辦法實欲於該地共行裁判如我依此與彼定約卽無異自任無完全主權從此各事彼益將漸謀進步更形棘手仍請始終堅持極力抵制云云究竟如何辦法懇卽電達外部並求指示機宜俾傳幫辦有所遵循免至失策無任盼禱

附吳傳幫辦來電

漾電敬悉昨日使照會外務部稱我稽查員李榮成妄行拘縛韓國巡查各節月之十四日已經齋藤派憲兵大尉前來交涉面述情形與彼稽查之報告頗多相反乃答以事實未明礙難處置明日卽親往巡邊道經該處當詳查答復去訖

祿貞巡邊於十九日親到該處詳細調查乃因八月初八日有茂官社金鄉約等到所呈訴日本憲兵所派來韓巡查金秉玉到該社二屯地方提捕良民林德春指爲義兵懇請保護前來李稽查榮成因派警察一名韓語通譯一名前往詢問金巡查何故在我境內擅捕良民該巡查答以奉日本憲兵之命我警察卽迎金巡查至所一敘金不肯來我警察乃將彼所捕韓民林德春帶回時該巡查亦跟踉而至出言無狀辱我官長且云若不還我所捕之韓民必不甘休我李稽查乃請其前來所中告以林德春平素安分並非義兵並告以民眾懇求保護各節該巡查不惟不聽更加凶橫略與爭論卽行拔刀用武李稽查因其不可以理喻又恐其持刀傷人致生交涉一面親去其佩刀一面派人往請日本憲兵軍

曹關山來所說明情由即將巡查金秉玉交關山帶去矣再
三調查並無拘縛及去制帽情事祿貞巡閱竣事於二十二
日回署擬答復齋藤適奉電諭詢及此案因將始末緣由詳
陳至日使照稱將韓國巡查帶往兵營由李隊長榮成訊問
等語情形尤不相符李榮成乃警察學生駐紮火狐狸溝口
稽查所充稽查員此處有警兵八名並無兵隊合併聲明

附吳幫辦來電

祿貞此次巡邊於八月十六日至二十日沿途接據泉水坪
甯遠堡十社鄉甲王德勝金化俊等呈訴有無業韓民李義
英金聖千李永伯等藉端訛詐科斂民財種種不法情事當
飭隨帶憲兵及所在巡警分別往拏去後茲據憲兵報告二
十一日下午七點行抵光霽峪附近距我派辦所八百密達

地方警見李義英在一大樹下與多人會議李義英令各韓民席地而坐聽其宣佈係飭各韓民每戶出韓錢一吊八百文作爲公費未聲明作何用處僅說以後如有公用隨時再行抽收遂大聲高呼願從者立起當時起立者僅六七十人李義英見不附從者居多數乃宣言不從者一定是義兵卽以義兵辨爾等於是韓人大驚乃起立我憲兵卽乘機前往捕之彼見勢狂奔旋被拏獲猶死力抗拒並喊日憲兵前來奪取維時我巡警二人亦趕至日憲兵出手槍對我擊放幸未過火卽被我憲兵等將槍奪取當彼此相持之際又突來日憲兵多名將我憲兵程則著扭至伊分遣所我憲兵等又將程則著奪回適案內應捕拏之被告金聖干亦持刀趕至向我憲兵等亂砍被我憲兵及巡警登時拏獲一同送案同日

又據報告我憲兵等在霽晴峪地方經該社鄉約導至此案應拏之金世希家見其家中有一進會韓人二十餘名正聚在一處會議從旁竊聽亦係議斂韓民錢財之事經鄉約將金世希誘出門外被我憲兵等所獲行約八九里尙有一進會等多人在後尾追旋即散去各等情前來并押解各犯到署聽候審訊及祿貞回防後一日齋藤來署交涉渠堅稱金聖千係韓國巡檢查捕拏時金聖千身著便服且據本社告發謂係無業游民姑無論如何其科斂民財自當按律捕治況明明持刀行凶實屬不法因齋藤一再要求經查明金聖千雖著便服實係巡檢交其帶回懲治至捕到韓犯李義英金世希二名均被控有案擬訊問明確發交延吉廳監禁期滿釋放惟此案日憲兵因我國捕拏犯罪各韓民竟出攔阻

且用手槍威嚇我憲兵一節是顯欲侵我司法行政之權無理已極應請憲台轉達外部向日使交涉嗣後不得再有此非法之舉動凡我司法行政決不許有絲毫干涉邊務幸甚

附傳幫辦來電

前吳幫辦電稟日人持強橫行增加憲兵入境擬在敦化縣之二道江並百草溝等處添派憲兵前往設立分遣所意欲壓制韓民干涉政權一節早在洞鑒之中現查馬牌暨八道溝兩處日人分遣所早已設立業經吳幫辦分遣憲兵前往抵制並一面與齋藤交涉欲令撤回伊答以我有保護韓民之責認定某處設立分遣所卽不能撤回等語茲據密探確報除馬牌八道溝外百草溝二道江綏芬甸子三處伊又續

添分遣所每所憲兵二名曹長一名韓巡檢一名通譯一名
合計五處通譯五人安德榮李德俊李早甫崔敏涉崔甫日
查此事既不可以理喻祇好趁伊尙未添設之時行先發制
人之計嚴行抵制免落後著現已選定妥員隨帶憲兵數名
卽分赴百草溝綏芬甸子兩處各設派辦所曉諭居民禁止
一切以杜後患二道江已有派辦所業專函告知防範矣再
風聞韓皇族李範允帶有千名義兵擬在韓境畏山屯陣日
會甯守備隊已撥三百兵向該處備戰未知確否已飭密探
細探并密飭沿江駐防軍隊留心防禦請抒厘念本日接稽
查報二十四日午後二鐘有日本兵七名曹長屈內菊松帶
領隨身槍七根另有警務長二名一同入境詢其情由答赴
六道溝換防稽查禁止不住祇得放行等語此事可否電達

外部轉詰日使之處敬請鈞裁吳幫辦已於本日上午起行
合併呈明

退耕堂政書卷五十三目錄

電文十一

延吉交涉案

三十一

退耕堂政書卷五十三

天津徐世昌

電文十一 延古交涉案

致陳中丞

光緒三十四年九月初一日

勘兩電悉吳傅兩電所稱與日兵力爭捕拏韓犯事前已電外部照詰日使矣尊電八道溝等處添設派辦處及限制日憲兵換防辦法已飭傅道切實照辦至傅道所出告示日人能不干預否能否辦到亦須慮及希卓核電延遵辦

復外務部

光緒三十四年九月初一日

盛前奉宥電當卽電傅道詳查頃據電盛沁電敬悉日部照覆均未承認我外部照詰各節承飭詳查電覆等因茲查得間島日本兵前共百二十六名本月二十四日據報告日本增添憲兵七名曹

長屈內菊松帶領入境外另有警察長二名是增加憲兵之事亦屬不誣東景德地方日地圖改名爲東景台該處於本月內又新添日憲兵四名租韓民房屋一所月納日票七元八道溝子於上月二十七日有日憲兵四名內一人爲分遣所長號伊藤養藏租韓民金顯一房每月租費帖子四元現於本月內因金顯一與華民口角該日憲兵等無故捕拏華民王會宅經我派辦處與之交涉該憲兵等竟敢於夜半率領多人打開派辦處門戶立索華民王會宅勢甚洶洶經派辦處力與理論始行散去現正與齋藤交涉又馬牌附近之樞榆溝子本月初一日有日憲兵梅原同憲兵數名先到該溝崔重訓家住初五晚七鐘有日官木下加平亦到崔重訓家初七日卽在門首懸挂日本國旗共佔民房七處崔重訓家房屋全佔其餘均佔客屋一間設立分遣所經我該處事務

員成友禮禁止據木下加平云係奉齋藤派無齋藤命令決不退
回現百草溝亦派定通事齋藤卽擬於月內添設分遣所計曹長
一名憲兵二名韓語通譯一名韓巡檢一名以上各節俱查係實
在情形并經吳幫辦前與齋藤反覆交涉齋藤答云我看定某處
應添設分遣所卽欲設立云云至日外部所稱統監府派出之憲
兵係臨時派遣並非常川駐紮一節核與所查事實不符六道溝
開辦農事試驗場查係確在該處強佔民地一所內種植各種糧
食惟砲隊至韓北一帶向係得諸密探現正飭查俟有確據再覆
等語謹此電復

致陳中丞

光緒三十四年九月初四日

疊據傳道電稱本月間渡口韓民溺斃一案又韓民在江口插籬
取魚一案又華人王會宅與韓人金賢爭毆日兵強欲干涉一案

又帽兒山派辦處截回日兵所拏韓民一案均經電稟尊處日人種種越分無理取鬧均請卓核飭傳道斟酌辦理

致傅幫辦良佐

光緒三十四年九月初六日

支電悉承示各節日人巧爲嘗試狡詐已極盡籌碩畫極力抵制不稍假借至深佩慰百草溝二道江綏芬甸子旣在問題之外日憲兵藉口調查自當申明禁令嚴行阻止驅逐至日人增加憲兵託辭換防經尊處詰責齋藤答詞閃爍仍當隨時密查實行禁阻日人僱用韓民私設漁獵場一節現在木牌籬笆板屋雖經拆毀仍當一律嚴禁奧村中尉所云令韓民另向旁處安設實屬萬不可行一切統希察核辦理並隨時電示爲盼

致陳中丞

光緒三十四年九月初六日

頃據傅幫辦電稟日人擬在百草溝二道綏芬甸子等處設分遣

所事以及增加憲兵借口換防并僱用韓民設筮取魚各節該幫辦極力抵制不稍退讓對待日人辦法頗得要領於尊處已有電稟想當督閱現仍電飭其遇有日憲兵調查轄境及加增憲兵等事隨時據理禁阻勿任狡肆至日人僱用韓民所私設之漁獵場雖經拆毀訊辦而日憲兵中尉奧村所云令韓人另向旁處安設者亦屬萬不可行茲并飭其一律嚴禁日人狡詐多端全賴因應得宜庶可戢其窺伺希公卓核隨時指示

致外務部

光緒三十四年九月初六日

頃據傅幫辦良佐電稱日人擬在百草溝二道江綏芬甸子等處設分遣所該處均遠在延吉西北與間島問題無涉當經詰責齋藤據云并無分遣所之說不過因百草溝綏芬甸子有貴國軍隊勒令韓民薙髮易服之事特令憲兵前往調查至二道江等語當

卽責以我國轄境何容貴憲兵調查如不撤回我自應付禁止
 之辦法渠惟一味敷衍現已飛劄百草溝歐事務員囑以該處與
 間島問題無涉如有日憲兵到彼調查卽據理阻止勿稍假借并
 飛劄綏芬甸子門管帶遇有日憲兵卽按照異國軍隊私犯入我
 國內地及入我駐防境內之禁令嚴行阻止驅逐本日據娘娘庫
 寶事務員來署面稱六道溝派出之憲兵前在二道江調查已被
 該員禁止折回矣至日人增加憲兵借口換防一節亦已責問齋
 藤渠先以憲兵有病換防爲詞繼又云現在憲兵祇有九十餘名
 當告以如再增加我卽實行禁止之法再日前韓民設立攔魚籬
 笆業經撤去不料初二日韓民復於原處設立岸頭復插一木牌
 上書田淵茂莊漁獵場字樣兼有日憲兵二名在水次照料詢係
 日人僱用韓民當派憲兵率工程隊前往拔去木牌立將未搭成

之籬笆及岸上已成之板屋一同拆毀爲首之韓民帶署交延吉廳訊辦勒限本日午前令將所拆木料卽刻移去過時必付之一炬另派員責問駐局子街憲兵中尉奧村伊答以並不知此事惟頃據憲兵報告係韓民無知借用日商田淵茂莊錢帖四五元自行僱工設笆取魚遂私寫漁獵場字樣我憲兵實無此不法如貴總辦有何吩示或令韓人另向旁處安設概與我無干據此見日人狡詐異常嗣後自當極力抵制不稍退讓等語現仍電飭該幫辦於日憲兵調查轄境及借口換防增加兵額等事隨時據理禁阻勿任狡肆并於韓民設笆取魚一節實行嚴禁不得另向旁處安設謹將原電轉陳

附陳中丞來電

支電敬悉傳道本月疊電與日韓人交涉各案已隨時電覆

指授機宜藉資因應惟邊務當交替之始日人狡詐無事不故爲嘗試本爲彼之慣技據該道現時辦理各節尙爲合法總之界務一日不定則日人如此無理取鬧之事雖如何抵制終不可免前聞日外部小村有吉韓界務當由兩國派員會勘之議務望轉告外部趁此時機催日政府速行派定專員與我國會勘以解決此案問題庶能各守範圍不相侵越前日命擬辦理情形奏稟末段卽以應速定界爲言未知已否入奏又擬附片奏調各員現諸事待舉需才孔急亦甚望早日奏准也再據傅幫辦電稱駐延之三鎮陸軍步隊缺副兵額七十一名馬隊缺正副額十名請設法酌撥等語可否由三鎮或由吉林陸軍酌撥懇電示爲禱

致外務部

光緒三十四年九月初八日

據延吉報稱前日人因韓民懸挂龍旂與我巡警爭毆一節吳幫辦與齋藤約定共同派員赴爭毆處調查事實再行交涉當派科員石春熹繙譯王鶴皋齋藤派憲兵中尉平田鐵次郎漢語繙譯阪東末三韓語日人繙譯糟谷龍三郎同赴茂功社調查至韓人禹至明家詢以八月十九日有甚麼人在此打架禹云八月十九日因歡迎吳幫辦在屋外展掛龍旂日巡警將龍旂拔去被清巡警看見與之口角轉瞬韓巡查卽將清巡警毆打在地語畢科員命通事譯成漢語係清巡警與韓巡查毆打據實記載平田命伊通事譯爲日語王繙譯從旁聽得譯爲清兵與巡查毆打詰以何故改巡警爲清兵阪東云並未譯錯平田又欲轉問他人阪東則強詞支吾以爲韓民於清兵巡警之分未甚明了一味含糊爲日後談判佔勝地步嗣齋藤又要求派員再查當卽拒絕以此事毫

無疑義無庸再查覆之查日人狡詐殊甚若以此事向鈞部饒舌
祈卽據此情形斥其非是特此佈聞以資辯論

致傅幫辦良佐

光緒三十四年九月初九日

據曹統制電稱延防缺額已由九標提補新馬遠來疲憊擬在礮
馬隊挑撥壯大口輕者六十四匹派員送延又退伍兵有願實邊者
前已宣布每兵給地一頃令飭改裝密送未示以實邊好處未免
懷疑請明示辦法以便密諭送往等情除補兵撥馬均已電准照
辦外其退伍實邊江省所擬章程每兵給地一頃延吉能否一律
辦理仰卽體察情形妥籌電稟以便飭遵

復傅幫辦良佐

光緒三十四年九月初十日

庚電悉匪首劉芳勤高長勝等率眾騷擾已電請陳中丞迅速派
兵剿捕並望執事卽督飭駐邊各隊嚴加防剿勿令蔓延縱逸仍

就剿捕情形隨時電稟切切

附傅幫辦良佐來電

頃據巡警總理清山報稱本月初六日晚十二點鐘據駐瑋春東溝第七區巡弁楊奎山呈稱現據探報突有匪首劉芳勤率賊百餘名持連珠槍七十桿快抬槍二十桿又匪首高長勝領賊三十餘名俱用連珠槍陸續入境騷擾同日又據第七區報告八月二十七日據土門子地方華民姜鳳報稱於二十三日晚十二點鐘突有鬍匪五名各持小槍踹門進屋搶去俄錢一百弔煙土五六十兩金子五兩並槍傷伊胞兄姜成德登時斃命當經該區派隊追捕未獲各等情前來除電飭駐瑋步一標劉統帶之潔卽刻酌派隊伍馳赴東溝土門子一帶鎮壓搜捕相機辦理外謹專電稟聞

附傳幫辦良佐復電

蒸電敬悉承允由三鎮撥兵補額撥馬應用至深寅感退伍兵實邊一節目前辦法擬到延未授田以前仍照吳總辦屯田營章程暫令入營開荒每名各給月餉四兩一應服裝衣帽由公家給與陸軍同俟明春授田以後削去兵籍改爲屯墾每名給地一頃其辦法與江省大致相同請轉三鎮宣示退伍兵只有優待決不吃虧乞密飭速來爲叩

復傳幫辦良佐

光緒三十四年九月十三日

眞蒸電悉日人私設鄉約亟須查禁已電外部與日使交涉仍希隨時嚴行稽查防範琿春土匪滋擾該處兵力足敷分布務飭該管帶等迅速剿除以保治安爲要

致陳中丞

光緒三十四年九月十三日

眞電悉協統緩派暫飭兵備處就近照料甚妥傳道電陳日人私設鄉約各節已轉達外部與日使交涉仍希隨時指示機宜飭傳道切實辦理

致外務部

光緒三十四年九月十三日

頃據延吉報稱日人前在智勇社私設鄉約五名八道河子陳錫俊樸英俊菩營溝趙長印華尖子地方朱勝龍東盛湧街金先立達等苛斂韓民錢財陳樸二名尤爲凶橫當派憲兵六名班長一名馳赴八道河子將陳錫俊樸英俊拏獲交延吉廳訊辦又查得勾引日兵騷擾韓民之樸希龍私將中界房屋售與日人之白文極均派憲兵前往捕拏白文極業經拏獲擬枷號示儆樸希龍尙在逃未獲日人私設鄉約前經申請外部援去歲約定不准私設鄉約之成案與日政府交涉乃近查各處報告如已獲之李希英金

世希未獲之金錫洪及現獲之陳錫俊樸英俊等查訊均係早已設立此外尙恐有私設情事請電部再與日使交涉等語查日人私設鄉約實係侵我行政權前此由鈞部與日使曾經約定不准再設日人種種侵擾陰圖進行請鈞部再行照會日使嚴飭禁阻勿得再有此等舉動除飭該幫辦隨時嚴密稽查外特此佈聞

致傅幫辦良佐

光緒三十四年九月十四日

文電悉日人運送軍械前往會甯沿江一帶亟應嚴防務飭該處將弁隨時稽查勿稍疏虞所請酌派憲兵四十名學員四名已飭照派矣

復傅幫辦良佐

光緒三十四年九月十四日

擬將馬巡撤回專防平陸並酌留中路什兵常川駐紮張廣才嶺上以資鎮懾俾前路防軍專重沿江一帶以防偷渡所籌甚爲妥

協應准照辦其零星匪徒暨琿春東溝土門子等處鬍匪暴動仍望督飭各防營嚴加防範勿任匪蹤攔入爲要

復傅幫辦良佐

光緒三十四年九月十四日

元電悉所籌邊務各節重外輕內辦法極是所需加派憲兵六十名已飭選派卽速起程只能作爲補額換防免又他生枝節延境酌添派辦處多設巡警均係扼要之著卽希認真籌辦邊欵五萬兩准卽照撥希派妥員來領邊地苦寒望加意調攝節勞保身以慰馳系

復傅幫辦良佐

光緒三十四年九月十七日

頃接簡帥電論延邊事以該處軍隊複雜非有完備機關不足謀軍事之統一今歲八月始設參謀運籌籌備三科分理各事以專責成又延吉西北一帶日人尙未敢指爲間島故前此亦未添設

派辦處現在體察情形亦可因時制宜等語業經電達尊處味其語意頗似遷就執事前電惟邊疆之事以動協機宜迅赴事機爲要究竟運籌等科應否裁併西北一帶應否添設派辦處總以有裨於邊事爲斷仍希斟酌情形隨時電知並卽於簡帥往復電商亦無妨明白剖析現值邊事日急總期艱難共濟固不可有意見亦不必彼此遷就也

復傅幫辦良佐

光緒三十四年九月十九日

霰電悉日人恃強情事已照達外部與日使交涉尊處仍須極力堅拒勿稍退讓并可先向齋藤聲明彼兵如先開槍我不能不用正當之防禦倘有決裂其曲在彼中國不任其咎仍將近日如何情形隨時飛報並已電簡帥就近指示卽望相機酌核辦理

復傅幫辦良佐

光緒三十四年九月二十一日

效電悉已照轉外部請其與日使交涉並請電胡大臣詰問日外部此案日人恃強不顧公理然在我卻不宜遽用武力祇可任其先發再爲理論仍望執事相機因應實力防範併將如何情形隨時飛示日人無理暴行已非一端空言抵制難期有濟其主要關鍵全在界務之未明此次傷我巡警卽遣醫診視是自知理屈亟宜乘此機會由外部與日使交涉先責其舉動之野蠻再迫令速派專員會同勘界以期早日解決頃已另電外部請其早定籌策并由奉逕電唐帥胡星使就近商辦

致唐專使
胡星使

光緒三十四年九月二十一日

連日據延吉電稱日本憲兵中尉平田鐵次郎及韓官李求敏在茂功社修造房屋經李稽查詢其情由據云係六道溝憲兵少佐津野所造再三阻止彼輒言出不遜並今日憲兵將稽查及委員

等衣履拉壞我雖派警兵看守彼仍連夜修造分遣所並挾暴力打我巡警平田中尉聲稱統監府命令若有清人妨害修造以槍擊斃此係正當防衛等語遂命憲兵舉步槍挖濠溝以備戰鬥經傳道派巡警憲兵前往相機辦理巡警坐大車先到並未扒房卽被槍傷多名有極重者日人所持皆步馬快槍所挖溝壘多處係三面坡形皆有伏兵且有距修房處甚遠者其爲蓄意開釁扼要防拒已可概見此案日人在我境內私蓋房屋意欲安設分遣所律以國際公法及維持現狀均應禁阻且所派去之巡警憲兵均係徒手巡警乘坐大車顯非備戰旣未全至修房之處亦未拆其一椽一木在彼似難援正當防衛之說以爲搪塞現受傷警兵由平田中尉邀至日人分遣所派醫診治此間得電後已電請外部與日使交涉並電囑傳道飭知事務員等任其先發再爲理論勿

遽決裂竊思日人在彼藉延宕爲進行近更施行強硬手段徒以空言抵制實屬無裨於事除已電請外務部詰問日使先請各派員詳查此案外其主要關鍵全在界務界務一日未明則無理暴行之事一日不免此次日人用強其機已兆變而加厲何以應之當時傷我巡警卽派醫診視似亦自知理曲亟宜乘此機會責其舉動之違理迫令速派專員會同勘界以期早日解決頃已電部密陳此節仍望就近會商向彼外部交涉并籌示一切是幸

致郭副都統宗熙

光緒三十四年九月二十二日

頃據延吉電云黑頂子派辦處邵事務員報稱十九日下午見一華服日人當經盤詰初言商人繼言係慶興叛兵某隊官之弟毫無憑據實係偵探現已扣留就近押送琿春審訊等語此案似應作爲日人未領護照在內地閒游按照條約辦理卽希核辦見示

是幸

復傅幫辦良佐

光緒三十四年九月二十二日

盛號兩電均悉吳徐二弁竟至殞生殊爲惻然應照章從優撫卹來電所述各節頗足爲辯論之據已照轉外部請嚴詰日使並速催其決定辦法仍望尊處察酌情勢極力維持固不能任其肆行亦未可遽示決裂所有對待情形希隨時飛示爲盼至另電所稱黑頂子邵事務員扣留日人偵探一節無論是否偵探可作爲日人未領護照擅在內地閒游按照條約辦理此間亦已另電郭都護矣

致傅幫辦良佐

光緒三十四年九月二十三日

奉外務部電開效電已據照阿部轉電禁止並將在中國境憲兵撤回頃阿部來言十八日在禹跡洞約有中國巡警六十名以暴

力妨害日本憲兵分遣所屋之修造遂與平田憲兵大尉以下十七名衝突互相開槍等語旋接號電日憲兵竟開槍傷我巡弁等多名暴橫已極復經照會日代使轉電政府迅飭齋藤將分遣所卽行停工以免再生事端並彼此派員前往鬧事地方詳細核辦一面電達胡使向日外部理論日人於勘界事延宕不復在延吉日圖進步自當隨時禁阻但操之過急逕用強硬辦法轉恐難於收束現旣出事端仍希轉飭加意防範並宜處以鎮靜聽候兩國交涉以免別生枝節是爲切要阿部人稱十七日在局子街有清兵二十餘名奪一日本人護身用之手杖回擊並對於日本憲兵亦加暴行致相互鬪云云正發電間接准箇電當又據照日使矣等因查阿部所述各節係自知理曲捏詞掩飾狡橫已極此間電復外部已據實析陳並將延吉和平對待情形約略聲敘至阿部

所稱十七日局子街我兵與日憲兵互毆等情未據尊處電示是
否卽係十六日槍傷工兵郭振清之事傳譯日期稍有訛誤應請
迅速詳查分別電覆以便覆部至部示勿用強硬手段加意防範
處以鎮靜聽候交涉各節卽望遵照辦理爲要

復傅幫辦良佐

光緒三十四年九月二十四日

漾電悉該犯沈有婁寶德二名旣據供認投幫迭次持槍搶劫綁
捐得贓不諱准卽照章正法仍錄供補報備案

致傅幫辦良佐

光緒三十四年九月二十四日

盛頃接簡帥來電述及日人槍斃我巡警憲兵一事必須攻瑕抵
隙使無可狡辯庶易就範並擬數條以備詰問之資籌畫極爲周
摯已會銜電達外部並電簡帥就近轉達執事遵行期操勝算日
來延吉日人有何舉動仍希妥爲防範隨時籌示爲盼

附陳中丞來電

箇電敬悉傅道電請緩派憲兵及三鎮退伍兵以免日人藉口諒蒙照辦昭常熟思傅道對付日人不激不隨已得要領但閱疊次來電於日人槍斃我巡警憲兵一事皆爲自己辯護之詞不足爲攻日之具謹擬數條寄呈鈞鑒如有可採請擊銜轉達外部以備詰問之資一凡兩國未曾宣戰彼此政府斷未有縱令兵丁擅殺外國人者卽兩國戰鬥之時敵人軍隊有棄械者亦不能再行攻擊未攜軍械者卽不認爲軍人任意損傷况現當平時巡警憲兵旣乘大車可決其無用武之意未攜器械可見其無戰鬥之力而日憲兵乃挖溝埋伏卽用槍連擊不止如此野蠻舉動卽不得認其有國家兵丁之資格殺人者例應抵命受傷者例應賠償然縱令憲兵

在外如此橫行日政府亦不能自卸其責應責速行裁答二
日憲兵挖溝時我稽查員往詢彼答以受派出所齋藤命令
有人阻止者即以槍斃之云云日政府現並未有宣戰之舉
而齋藤以一大佐竟發此野蠻命令縱令兵丁任意放槍傷
人不僅有傷我國主權於日本外交名譽實亦大有損失倘
齋藤仍居此間則兩國國交必爲彼一人所決裂請速由日
政府撤齋藤並責其擅發違背公法命令全兩國交誼三自
日本提起吉韓界務問題以來我但主維持現狀無不力求
和平乃日憲兵在此間驕橫無狀蔑視我主權日憲兵少佐
津野憲兵大尉奧村等猶復暗縱其部下任意橫行不守法
紀我則屢誠憲兵巡警遇有不得已之事但當據理以爭不
可稍用武力故往往日憲兵持槍欲擊我憲兵巡警等則徒

手相向力主和平是以多未生事此次日憲兵任意以槍擊人雖爲齋藤命令實津野等有以縱之以此野蠻憲兵官長及憲兵居此交涉之地嗣後必至隨時激生事端兩國交誼之固豈能長保况境界解決全在證據非在強力現提及交涉已及七年非各出詳據勘明境界不足以了此事日政府專以佈置憲兵爲事究屬何意請速由日政府撤退津野少佐等憲兵官長及延境所有憲兵速派專員會勘界址以定國界而固邦交四延吉南部雖以日人一面之詞稱爲境界未定然素爲我行政主權之地齋藤有事並不與我相商任意動作隨地建築實爲無理已極此次日憲兵在火狐狸溝修建房館之所實爲強佔民地未給地價凡越墾者納我地租卽我子民我不能不保護其生命財產况地主旣來控訴

自不得不派人往阻乃強佔人地者有人干涉卽以槍擊之不知今日世界中何國有此公理也前此日人強佔民地之事實不一而足此次齋藤津野等竟縱其部下任意強佔如此行爲實世界所罕聞請由日政府訂立專條凡嗣後延境越墾韓民所有財產權當一律重視不得以強力佔之蔑視人民權力也以上數條是否有當統希卓核再據傅道禡電云二十日下午六鐘日人將火狐狸溝修造未成之房屋自行拆毀想係自知理曲欲藉此以爲抵賴之具併請轉告外部爲禱

附唐星使來電

昨晤小村詳談延吉事據云邇來又得韓國文據此事我以界務爲重彼以保護韓民爲重各執一見以致日久不能議

決我尙能認彼在延吉有保護韓民之權彼亦認我在延吉有地主之權至延吉所有韓民但求爲通商口岸之韓僑民應歸日本保護此外別無他望其韓民之已入華籍及願入華籍者均聽其便伊亦絕不過問亦斷不蔑我主權倘彼此能照此辦理則此事可以早決等語儀窺其意所援口岸比例顯欲設日官駐紮保護現查該處韓民較華人多數倍伊斷不肯放棄保護之權若以彼此宗旨不合曠日持久事變愈多莫如在延吉擇出一二處開放作爲商埠工巡衛生一切由我自辦並與其磋商所有越墾韓民應明定年限准其領地並應納地方各項稅捐與華人倘若彼索設警權可駁以自開商埠並非租界向不准他國另立巡警據小村言伊集院覲見後卽向外部提議此事應如何辦理統乞核奪至

新法路事小村林使末次照會尙未得復儀恐伊所言瀋陽
以北接通南滿鐵路一節若能商量在二十里內似無不可
倘其多索里數及爲伊增添支路斷無此辦法不過彼旣說
到此看其口氣如何與之酌商爲妥又京奉路瀋陽車站伊
可允我經過南滿移近城根但此事係爲我便利而設南滿
一路藉此亦應得利便盼我和平商辦再吉長路由我擇定
彼不抗議此次伊集院到京已將各事分援訓條飭向外部
和平商議甚望早日議決以固交誼各等語以上三項路事
應請外部與郵部接洽伊使現已到京恐其不日與外部開
議謹此電陳以備因應餘函詳再延吉事馨使意見相同謹
聞

致陳中丞

光緒三十四年九月二十八日

盛頃傅道電稱日人嗾使韓民在圖們江邊築架浮橋一節想尊處亦已接洽江防關係重要本當格外慎重韓民李輔喆所稱暫運秋糧寬限兩日各節顯係藉詞蒙混當時卽應駁斥責令立時拆毀見不及此致滋轉轉似難辭疏失之咎現旣由日人出而干預若堅令拆毀恐又釀成交涉更難措手似宜一面飭派憲兵巡查嚴防其匿運軍械等事一面嚴詰齋藤責令轉飭拆毀以符維持現狀之宗旨現已轉達外部詰責日使並催其速定辦法所有此案對待方法仍希卓籌詳示並就近指示傅道遵照是幸

附陳中丞復電

宥電敬悉已將部電轉飭傅道查照辦理頃據傅道來電日韓人在圖們江鐘城地方修搭浮橋派兵監守請轉達外部一案諒邀鈞鑒惟查此次辦理情形未免失著已電復傅道

云此次韓民李輔喆架橋之時既來取具甘結執求依限兩天拆毀是日人並未出而干涉不過暗地嗾使故來嘗試當時將韓民扣留立將橋梁拆毀日人當無所藉口及至違限之後日人反派憲兵巡警多名監守若欲再行拆毀勢必至動手用武日人若濫施強力我又不能不力主和平則此次光霽峪派辦處未於韓民具結修橋之時立行拆毀已墮日人之狡謀以後凡日人一切交涉當預防於未發之前不可圖補救於已失之後云云用特奉聞

致陳中丞

光緒三十四年九月二十九日

頃據傳道電稱六道溝事務員向齋藤交涉情形已轉達外部想尊處亦已接洽查七月間日工兵在圖們江搭橋經公同吳幫辦派員竭力理阻始行拆去並約以後兩國交界之處不得再有此

等舉動此次日人嗾使韓民託詞蒙混以致墮其詭計據理詰責
彼當亦無可置辯目下能否卽令拆去或我代拆卸抑尙有如何
補救禁阻之法卽請詳酌指示傳道遵辦爲要

致傅幫辦良佐

光緒三十四年九月二十九日

日人嗾使韓民築造浮橋一案迭接各電均悉江防關係緊要前
此陳吳駐延屢經堅持七月間日工兵在圖們江搭橋經吳幫辦
竭力理阻將搭至江心之半截橋拆去並約以後交界之處不得
有此等舉動此次韓民以暫運秋糧寬限兩日來請純係藉詞嘗
試顯而易見當時不卽駁斥拘留飭令拆毀致墮日人詭謀辦理
實爲失算派辦處各員其允許韓民搭橋者究係何人卽希查明
示覆目下能否卽令拆去或我代拆卸抑尙有如何補救禁阻之
法望卽詳酌辦理嗣後辦一切交涉務須詳察情形格外慎重甯

防範於事先勿徒挽救於事後至交涉事件因應貴於敏捷若事事請示函電往還需時或致有誤事機應由執事權衡緩急相機因應隨時見示並一面電稟簡帥請其籌示邊情萬急狡伺多端審慎防維以紓危局實所跂望

致陳中丞

光緒三十四年九月三十日

唐帥致外部電昨已轉達台覽頃接外部來電謂所擬各節似極妥協詢及意見若何令熟籌詳復以便核擬辦法與伊集院磋商詳閱唐帥原電有云所援口岸比例顯係欲設日官駐紮保護查該處韓民數倍於華民伊斷不肯放棄保護之權若以彼此宗旨不合曠日持久事變愈急等語洵已洞見癥結惟所擬辦法謂就延吉擇出一二處開放作爲商埠者以多數韓人酌劃一二處商埠能否做到並以何處爲宜又謂工巡衛生一切由我自辦並與

其磋商所有越墾韓民應明定年限准其領地云云其一切詳細辦法究應如何核定又謂韓民應納地租各稅與華人同倘彼索設警權駁以自開商埠並非租界向不准他國另立巡警云云日人狡詐多端究竟肯否就範台端蒞延較久於邊圉情勢彼族性質知之最稔尙希詳細籌核妥定辦法見示以便轉達外部據此磋商實所企盼總之自延吉下至安東沿江接界到處皆有韓民越界目下立言最要慎重必扼定延吉地面劃出一二處立論較有限制統望速籌詳示爲禱

復郭副都統宗熙

光緒三十四年九月三十日

豔電悉高塚武一既據日商具保應卽釋放琿春各處通商業於去年十二月初一日開放由外務部照會各國使臣在案祈留意

附傳幫辦良佐來電

盛頃據憲兵報告鍾城韓民李輔喆前在圖們江所架之浮橋現於初二日早八點鐘時自行拆去其江岔另一小橋已先於初一日上午十一鐘亦自行拆毀查所拆一切木料刻正向鐘城搬運等情前來特電稟聞請抒厘系

致外務部

光緒三十四年十月初四日

勘電敬悉延吉交涉鈞部以唐專使所擬各節似極妥協垂詢意見並令熟籌詳覆以憑核商具見鈞部慎重邊務亟擬解決此項問題無任仰佩查延吉相持一年有餘亟應趁此早與開議以冀結束免生枝節世昌意見與鈞部及唐使均相同惟默揣時局知彼知己就令開議不知費幾許唇舌幾許心血方能就範惟有層累遞進逐節疎通但能由鈞部與日駐使先定大綱若干條兩國再各派大員遵照部定條約逐細查勘籌辦呈候核定彼利遷延

我利速結就此次所論各節惟保護二字亟應切實辯明但目下彼以保護韓民爲言是已認明我有地主之權惟保護字義內卽兼有審判警察行政司法之權彼若實行其保護則我之主權仍有名而無實彼旣要求保護權以韓民在此不肯放棄保護朝鮮之責任儻我力駁此案終無了期若漫然允之無所限制流弊無窮交涉更多於大局更有損害韓僑之在延吉者七萬多人加於中國之民數倍散布甚廣日官有裁判權卽有行政司法權遇有案件或韓民或華韓民或洋韓民或人命或田產如在擬設商埠之內尙可按條約辦理若在商埠外或數十里或數百里旣認其有保護權則不能禁其施行應有之權推行內地散處之韓民則我地方之權治與其混雜我之主權保無失乎是認之患其侵犯內地主權不認之彼必力駁不能就範惟有設法限制仰祈鈞核

妥籌良策唐使擬擇延吉一二處開放工巡衛生由我自辦明定
韓民領地年限亦已早見及此此事關係繁要昨已電商陳署撫
另擬辦法電達並令吳祿貞條陳意見另函錄呈卽乞鈞部與伊
集院速開談判如有垂詢之處並有管見隨時電陳吳祿貞現在
奉省如開議時令其赴京備顧問候示卽行開議後如何辯論仍
望隨時電示以便有所陳說用備採擇北京開議應由兩國政府
各飭兩國官吏實力維持現狀不得再有競進免生枝節統希鈞
核主持以維大局幸甚盼甚

致外務部

光緒三十四年十月初四日

前奉勅電囑將唐使所擬各節熟籌詳覆經世昌轉電昭常敬悉
一一竊思唐使所擬解決吉韓界務辦法果能明定條約認圖們
江北爲我完全領土僅於延吉境內開一商埠於我國尙無大損

如此早日了結免滋後患似尙可行惟果依此訂約則尙有數條須先與約明者謹列於下一定明自紅丹水源或石乙水源以下凡屬圖們江北江東土地皆爲中國完全領土以後日韓兩國不得更有異言如云尙須勘界卽請其刻日派員會勘一雖允於圖們江北開一商埠然在我國領土之內商埠須由我開僅爲彼此通商不得誤認有租借性質一所開商埠地方須由我國指定僅可於六道溝市街附近劃中里五方里地方作爲商埠區域尙可於稽查處附近劃中里半里長之江岸作爲日本商船停泊碼頭但旣經指定卽不得任意擴充一可允日本在延吉通商地方設一領事官以保護日韓之商工僑民惟韓人必在江北江東無不動產者方可認爲韓僑至越墾者在此安居樂業享有中國之不動產權納我租稅服我統治中國待之亦無不與本國人民一

律卽是久已歸化中國則日韓政府及其臣民不得仍視該民等
爲韓僑倘日本派有駐延之領事官更不得藉口歸日官保護如
見韓民在延吉廳境雖無不動產而欲歸化中國日韓政府不得
攔止如越墾者自願賣售其不動產仍歸韓籍中國亦不禁止一
原駐延廳境內之日本文武大小官吏及日憲兵韓巡檢等應刻
期一律撤退一圖們江北江東之行政司法警務軍政各事皆是
中國主權日本不得過問一圖們江北江東之森林礦產若無特
別條約日本國家及其人民不得希圖採取一所指定之商埠及
商船碼頭本是中國領土中國自應維持定保護外人之責日本
不得自駐兵卒及巡警一江北江東地方若中日兩國無特別條
約日本不得修造鐵道及輕便鐵道一圖們江北江東爲中國領
土江南爲韓國領土例應以江心分界日韓國家及其人民不得

以已意修橋及設浮橋無論中日韓三國有欲修橋者須中日兩國以特約訂明方可一日韓國家及其僑民不得於商埠區域外建築房屋以上各條昭常在延年餘情形稍稔寄由世昌閱過應電呈以備採擇是否有當統希鈞部鑒核裁奪再唐使此行日人最爲注意或極欲見好中國故彼外部特創此議尙乞鈞部察核速與商訂早爲了結以免日久又生枝節鈞意若何並請密察無任跂仰

復陳中丞

光緒三十四年十月初四日

東電悉延吉交涉遷延已久疊生枝節不早解決後患安窮果能照唐帥所擬各節訂立條約於我尙無大損鄙意亦似可行尊擬條約數端明定限制用杜後患洵極允洽至爲心佩日人忽出此議或出於見好中國之意亦未可知自宜乘此時機早爲了結已

會尊街詳電外部請其察核定奪至日韓人修造浮橋一節現既
有日憲兵監守若前往拆毀恐又釀成重大交涉卽請按照尊論
轉飭傳道辦理冀可就範寔所跂盼

致陳中丞

光緒三十四年十月初五日

盛頃接外部電稱新任日使將於初十後提議間島界務辦法請
電商吉省慎選熟習間島情形之委員一二人迅卽來京以備顧
問等語吳參領祿貞在延較久調查詳悉擬卽派其赴京此外如
有熟習延吉情形堪膺是選者並請公選派速卽電示以便彙達
外部至盼

附陳中丞來電

兩歌電均敬悉頃接傳道來電經我帥慰問病狀及昭常專
電慰留該道已暫不辭差但尙有請預覓替人之意祁道日

內想可抵吉承示由吉另派明幹之員星夜往查速覆以備印證一節盡慮至爲周密惟調查此事關係極重非熟悉該地邊情及兼明軍事者恐難勝任現擬派李寶楚與祁道分道前往確查合先奉聞昨接梁燕孫京卿函云外部將開議吉韓界務亦頗以韓民如何安置爲慮茲將覆燕孫電附呈如下前閱唐大使自日本來電後卽私擬數條件由欽帥轉電外部諒已入覽茲不更贅惟保護韓僑民一事竊意尤須先自解釋明白力與爭辯妥爲定明庶界務問題方能真正解決否則我先誤認韓僑彼更得所要挾非一時難於決議卽將仍留無窮後患茲欲與彼開議保護韓民辦法似當以分別是否韓僑爲第一義查光緒七年經銘將軍吳督辦奏准將越墾韓民查明戶籍分歸琿春敦化管轄嗣因韓國王

政書卷五十三
墾請自行收還奉

旨以 年爲限乃越墾者不願還國遂造出種種謬說以混國界經光緒十一年十三年兩次會勘已彼此認定圖們江爲天然國界惟江源之小水相爭未決十年總理衙門奏准遵前奉

諭旨飭令越墾者領照納租歸我版籍吉林將軍當卽派員將越墾地方一律量丈升科令願入我中國籍者概易華裝領照納租歸我地方官管轄不願者聽其回國當時辦者雖經多方困難而皆已照章實行是今日之領我地照納我租稅歸我管轄者實久已入我國籍矣存案尙在想公等莫不知之至二十六年俄人佔據延吉越墾者大半逃回本國復易韓裝後俄兵退彼等歸來依舊種地納租我地方官恐

多滋擾遂未重究其易裝之事故至今仍服韓裝者竟居多數然雖衣裝未改而當領地照時卽早入我國籍今則納租稅服管轄一切照舊辦理此固未能變易者也安得更以韓僑目之卽令無此存案考之東西各國亦未有旣許與本國人民享同等權利而猶認其爲未經歸化之僑民者此誠顯然易見尙何待煩言而解果據此與日人力爭僅認留寓此間無田產者爲韓僑聽其保護其墾田住房已領我地照者卽是業經歸化照舊完全歸我地方官管轄彼不得私毫干預倘能如此辦到庶幾雖開商埠於我國權尙無損失不然延吉境內之越墾者現已不下七萬戶如一律認爲韓僑允其保護則一切訴訟卽應歸彼領事裁判而我之地方官原有之管轄權亦將盡失是我空有領地一虛名而轉受喪失

主權之實害况彼韓人之墾我境內荒地買我境內產業者必將源源而來既有我土地又得終爲僑民不入我國版圖不歸我國統治則吉省之東南半部將直爲日韓之殖民地矣且今日韓民在我國境內之有田產者不僅延吉琿春南部且越墾地面而延吉北部及敦化綏芬轄地越墾者亦復不少倘日人竟得此保護權其勢力之伸張豈復尙可限制恐後日之糾纏轉較現今界務未決時爲尤甚至謂爲便於日人保護計將彼越墾盡遷入商埠之內此實斷不能行無論所劃商埠少僅數十里多亦不過二三十里斷難容留多人而越墾者係在所住地皆有田地房產相距或數十里或數百里安能有強其移居一地之理如云迫令彼等皆棄其田產不願留者回國願留者遷入商埠此則不但必至激

成事端而亦萬難辦到之事是以欲分別是否韓僑當援引光緒十六年按據以領地照未領地照爲斷雖日人藉詞狡賴辯論至爲困難似亦宜始終力爭蓋除此別無善法以解決保護韓民問題而得使領地主權兩無損失也云云是否有當尙乞鑒核並請將此電及前擬達外部數條件之電檢交綬卿一閱以便接洽爲禱正譯電間接讀魚電周維楨經手事件太多准於初十後就道決不延誤

附陳中丞來電

盛函敬悉詳閱綬卿界務條陳所言利害深合邊務情形其主張亦具特見惟欲拘泥宗旨不欲將延吉開放及許日人以保護韓民權似尙少權變於實際定不能行茲有與綬卿一電逐條詳辯以冀補救以期接洽但恐綬卿已經起程又

不知彼曾否攜有密電碼本特先電陳鈞鑒電云頃奉欽帥函抄寄公條陳小村所言利害各節於日人狡謀洞見癥結善後辦法極有見地無任欽佩反覆細譯與鄙意大致相合惟微有出入之處不得不互相參考茲特述鄙見如下尊議第一第二節皆極言不可許日人以保護韓民權非深悉該地邊情者不能言之如此痛切然公所據者係現在邊務情形此時日人倡言界務未定故藉保護韓民之名駐官設兵意欲漸充實力陰行侵佔果界務既經解決則當明定條約且有公法以爲根據所謂保護之權未能與現在情形一律而論至延吉主權本我固有原不待日人認可但既提議交涉界務一日不決則我領地一日不明固當以定國界爲第一義惟欲解決此問題而定我國完全領土以我國勢竟不

予日人以絲毫利益豈彼所甘但能於領土全無損失僅於延吉開一商埠允彼設一領事官而保護在我境內無田產之韓僑似於主權尙無所損而於公法亦合至謂彼有保護權卽將有軍隊警察種種機關實不盡然蓋今日彼之藉口保護乃係實行強權既無條約以爲限制又少強力足以抵禦故至聽其所爲尙已認明爲我領地僅依公法認其領事有保護僑民之權何至更有駐官及設軍隊警察之事例如日本在我國內有領事者不一其處係皆爲保護該地僑民而設並未聞有違公法而設軍隊警察者但於解決問題時另定特別條約或更與定明權限則僅許以設領事而保護韓僑諒不至有碍主權也第三節所謂以延吉爲通商口岸則越墾韓民難於安置尊慮極是但通商與越墾當視爲兩

事延吉果定明爲我領地則僅於境內六道溝等處開一商埠少則十餘里多則二十里僅爲彼此通商而設商埠須由我開不得認有租借性質並約明商埠本我國領土我自有維持治安之責彼除設領事外不得更駐他項官吏及巡警兵卒如此辦理似尙無遺患况吉省如省城長春甯古塔及琿春等處皆已訂有條約認開商埠日人旣於清津開港終必謀於延吉境內設法通商此時不允後必允之不若乘此時機劃定商埠地面藉此又可解決界務問題未始非策况開商埠通商爲各國通例並非有損主權之事果能明定條約嚴加限制則亦何憚而不可爲至越墾者久已納我租稅服我管轄考之公法證之光緒十六年成案皆當視爲歸化不得復目爲韓僑此公所深悉者旣非韓僑卽不能受日領

事之保護自應照舊服我地方官管轄與我國人享同等權利隨地雜居何所不可與開埠絕無關係所謂恐他國人欲援利益均霑之說極無可慮第四節言越墾者皆當認爲歸化實爲卓見鄙意亦極相同蓋界務既定以公法言決不能不予日人以保護韓僑之權倘不先爲辨別誤認越墾者皆爲韓僑一概允其保護則凡有韓民之區彼皆得行其領事裁判權而我地方官原有之管轄權轉將盡失是我虛有領地之名反實受喪失主權之害且不僅延吉南部越墾者多如琿春綏芬敦化濛江密山以及鴨綠江沿岸亦復不少若不嚴爲辯明則日人勢力豈復尙有限制誠如尊論所云界務雖清其周折必較今尤甚故鄙意不在爭開埠但在嚴定商埠之限制不在爭韓民保護權但在力辯越墾之非韓僑

蓋此時解決界務欲并商埠而不允開韓僑而不允保護勢必難于轉圜且于公法亦無根據日人決不甘心恐終難望和平了結所慮者未能明定限制分別韓僑即將墮日人陰謀而轉受無窮之患故前呈外務部各條件及覆梁燕孫電均於辯明越墾者非韓僑一事極爲解釋與尊意可謂不謀而合但能於此點力爲辯明謹防日人狡謀則解決延吉問題自無他患大抵談判之能佔優勝專在所提條件嚴守權限若但欲收回領地而於彼所要求不問條件如何概不允許則此次界務無可提議者矣尙有平和歸結之望哉再此節所云固極明晰惟云薙髮易裝差可作爲明證一語似尙未洽蓋越墾者現雖納我租稅服我管轄而易華裝者實少若以此爲證恐轉予日人以隙似當援光緒十六年成案其

已否入我版籍但當視其已領地照與未領地照不得以易服不易服爲證持此立論尙覺無瑕可擊也至所列條款第一條似可一心主張理由詳前不贅第二第三兩條則無妨主張第四第五兩條則應極力主持第六條前半所論極當惟購地者與越墾者皆同享有我國不動產權自應同認爲已經歸化不兩歧視如地方官有不公允情事統應上訴我國本管長官及督撫凡事皆與華民一律尙准其赴訴日領事則又未免自失主權矣第七條延吉雖開商埠亦自應照尊議辦理第八條按東三省情形不允日韓人在我境內開設商店似難辦到固不如自開商埠指定地方之爲愈也以
上所述鄙見並非與公故爲辯駁以事關大局不能不詳加討論是否可採仍祈酌覆爲盼等語卽祈酌核轉電吳參領

是爲至盼

退耕堂政書卷五十四目錄

電文十二

延吉交涉案

退耕堂政書卷五十四

天津徐世昌

電文十二 延吉交涉案

致陳中丞

光緒三十四年十月初十日

庚電悉承示傳道暫不辭差並派李寶楚與祁道分赴延吉確查各節均極妥洽尊處覆燕孫電函謂提議保護韓民辦法以分別是否韓僑爲第一義洵屬扼要之論越墾韓民領照納租歸我版籍久經奏准有案按之國際法規人民續得他國之籍者則原有之國藉自然消滅是此等歸化韓民自當視同本國人民一體享有權利擔負義務而不得更以韓僑例之其應歸我管轄毫無疑義况保護之意至廣若一律認爲韓僑允其保護流弊所極不至盡失主權不止查韓民越墾各地亦不僅延吉北部及敦化綏芬

如奉省臨江等處類此者正復不少亟應趁此嚴定限制以遏其
勢卓見欲分別是否韓僑當援引光緒十六年成案以領地照未
領地照爲斷持義洵極正當總當據此堅持務達目的庶可保我
主權前電達外部數條件已檢示綬卿茲電到奉綬卿已行當照
鈔寄京以期接洽周維楨到奉卽令續往已函告外部矣

致傅幫辦良佐

光緒三十四年十月十六日

該標統所稱分住店房照章給租毫無騷擾以及該商會電控情
節同係一面之詞均應查明酌辦現旣電郭都護就近派查并飭
趕造營房以便安插籌擬甚屬妥協總當從公辦理以期軍民兩
便除電簡帥查核外特達

致梁燕孫京卿

光緒三十四年十月十七日

日前簡帥以電覆足下原稿見示所陳各節具有見地茲經孟亭

參贊詳細籌核據云日本要求保護延吉韓僑一節如按萬國公法並中國向來與各國所訂條約而論似可拒絕查萬國通例非有特別之允許外國人民不得在本國購置地土並享地土之利益以示本國外國人民之區別中國自開禁以來所訂條約均指明除教會准在內地永租產業專爲傳教之用外他人不得購租產業以免混雜而保治安此卽前後條約之宗旨也韓國向屬中國韓民本是屬民國界毘連時有越墾者旣歸我管轄原無歧視故准其與我民享同等之利且證以光緒十六年之成案凡韓民領地者均作歸化我籍之民雖韓國現歸日本保護前往之事理應甘認不得反背查臺灣一島自乙未年中日和約劃歸日版凡我人民於該島內經營受業者限以兩年變價遷居逾限卽視爲日民等語其意以疆土已歸日本若庶民不歸其管轄有礙政治

且慮主權不無損失既日本視疆土人民相連不可偏棄今我延吉韓僑與臺灣事同一律若祇認延吉爲我疆土散處之韓僑歸其管轄豈我之政治主權獨無損失乎總之延吉旣認爲我疆土歷來之韓僑領地種植向視爲歸化者仍歸我管轄于公法條約均無違背且有光緒十六年之證案延吉領地之韓僑應歸我管轄其義無疑倘日員不聽理論強索保護韓僑之權祇可援臺灣之辦法韓僑於兩年內務將其產業變價遷去逾限仍住內地領地種植卽作歸化甘受我管轄者也至於延吉毘連朝鮮向來不無商務奉吉江三省旣開十餘處之商埠今於延吉擇開一二埠事屬可行但劃出埠界祇須敷商務之用不必過廣倘日後商務振興應行推廣埠界亦可隨時酌辦也云云用特一併電達以備參考並希查酌回堂鑒核以備採擇是幸

附吳統領光新來電

學生昨夜二鐘由火狐狸溝回延調查各節均與邊務報告相符並無虛偽齋籐承認開槍實係伊之命令平田承認我巡警實係徒手未帶武器且云對我巡警等共發槍十七響其扣留受傷馬弁之護身手槍一桿及受傷憲兵無鞘刀一把彼等欲據爲武器憑證並謂槍有餘殼料是放過等語生初向齋籐要求當面查看彼推在平田處及見平田又云手槍紛失正在檢查中其子及殼已送至境野處彼等始終託詞未肯現出窺其意因此案彼挖溝開槍自知處置失當不週欲藉我之武器誣認發槍強詞抵賴作爲疑案地步其實真偽顯然可見所有詳細形容俟面稟一切至受傷兵四名暨此案出力之憲兵巡警等已遵諭犒賞有差學生擬卽

明早起程回奉請抒憲厘

附沈道承俊來電

東初二電謹悉安東水路交通日韓匪人隨處可以內渡前
已多派偵探並得力員弁早晚更番赴輪路嚴密稽查並密
商三菱領事協緝茲奉前因再當嚴密防範並告以小村伊
集院關照之意彼知伊國政府不分畛域共保治安當更能
盡力也旬日來民情安謐商務如故堪慰憲厘餘容續稟

復傅幫辦良佐

光緒三十四年十一月初八日

電悉黑頂子一帶韓民結夥持槍行臘以持有都署槍票爲詞並
擬俟冰堅渡江與日人爲難經尊處電達郭都護停發槍票並示
禁韓民行獵一面由劉統帶按照軍隊預防重申禁令籌畫俱極
周洽槍票一節務須卽行停發以免日人藉口致起國際交涉至

出示禁阻行獵措理不用武力辦法亦合惟韓黨渡江與日爲難之說告示內切不可提統希密商郭都護妥籌力阻以弭事端實爲至要仍隨時電示

致沈道承俊

光緒三十四年十一月初八日

刻日領事來告云尊處強令韓人入籍薙髮韓人不服於前月二十四五日聚眾抗違執事令其隻身回韓若果如此則在韓之中國人亦照此辦理豈非彼此失利等語此事務須審慎不可強迫貽人口實如何情形請電告

致陳中丞

光緒三十四年十一月十一日

盛蒸電悉李黨盤據岩杵河左近黨羽散布頗眾雖沈道所稱聚眾三千人之說尙難全信而河冰旣堅隨處可渡亟宜嚴防偷越以免滋生釁端前傳道欲增憲兵此時尙可派往否請酌奪見示

至韓民在黑頂子附近持槍行獵一節此間亦已據傅道電稟彼以都署發給槍照爲詞已由傅道商之郭都護一律停給槍票並一面出示禁阻具臻妥洽惟韓民欲渡江與日爲難之說告示內似未可提明昨已將此節電覆傅道並飭其嚴爲防守以杜侵越頃接尊電具諭轉飭妥派軍隊巡警憲兵防守偵察蓋籌周密與鄙見正復相同刻下邊境安謐先事預防仍不可稍有疎懈尙望卓見所及隨時指示各該員等遵照並密籌電示至所盼禱

附陳中丞復電

昨日爲

嗣皇帝登極大典昭常於清晨遵例率各屬在萬壽宮舉行典禮日俄兩國領事皆來公署致賀電已挈銜會奏感甚承示沈道所查源渠河韓義兵事當卽譯密電轉致郭都護傳

幫辦嚴密防範矣查源渠河卽俄境之岩杵河距琿春城及黑頂子一帶皆僅數十里李黨實倚之爲巢穴昭常在邊務時屢遣人至該處查防並曾與李範允晤面以探其舉動知其勢力雖尙薄弱而在其本國及俄界者黨羽誠屬不少沈道所稱不爲無因然李黨在岩杵河左近其數雖眾而皆散處於街鄉之間前經多方密查實無從知其確數俄人固以放任爲主義想亦不能聽彼明聚數千人以擾害其地方治安卽本地傳言亦難全信但現當封凍沿江數百里彼黨皆可偷渡實屬防不勝防殊爲可慮日昨傳幫辦來電云有韓民多名在黑頂子附近持槍行獵伊已電告郭都護劉標統設法禁止昭常復電略謂當此韓黨急思蠢動之際韓民在我境內任意持槍行獵不無形跡可疑自應極力禁阻惟現

在江冰已堅上下江流到處皆可通過務請嚴飭沿江駐紮
軍隊無分晝夜嚴加防守並委派巡警憲兵多人隨時於江
岸各處及黑頂子一帶密爲偵察以防韓黨乘機偷越至生
釁端或起交涉等語其致郭都護電亦是此意郭昨電覆稱
李範允謀聚眾蠢動此間亦有謠言會與劉標統密商飭黑
頂子所駐各軍隊嚴爲防範日前又派巡弁攜帶馬巡駐二
道溝稽查探訪總期先事預防刻下尙如常安謐云云再近
日邊務所來報告皆稱外間雖有謠傳地方頗爲安靜請抒
廛念昭常仍必隨時飭該員等設法嚴防以免稍有疏虞尙
乞指示機宜俾有遵循不勝盼禱

附陳中丞來電

真電敬悉承電飭傳道令告示內未可提明韓民欲渡江與

日爲難之說仰見蓋慮極爲周密增派憲兵一節前經傳道
電請已蒙照准繼以邊務衝突事起中止此時冰堅隨處可
渡防兵不足分布兼顧甚難而各處又無電報電話等機關
傳達信息亦頗不易惟有多派憲兵巡警沿江流上下及緊
要地方晝夜巡察遇有事故或可疑情形得以卽時報告及
相機禁阻庶可稍免疏虞且自昭常去後軍心不無稍懈各
隊伍分散駐紮紀律殊難嚴整聞近日陸軍兵丁亦間有驕
縱情事偶遇小有不法未能服巡警干涉深慮或至釀生事
端能得多有憲兵到處巡邏藉以監察兵卒行爲於約束軍
隊亦不爲無益現值邊務尙平卽增加少數憲兵或不致更
遭外人疑忌但似仍宜照前所議飭所派憲兵攜帶隨身軍
械易服陸續前往以免動人耳目並請飭該管遴選程度稍

高者以充斯役方能望其盡職否則稍不守法不但於事無補更恐轉爲多事亦可慮也再邊防地廣專恃偵察報告消息敏捷則馬匹斷不可少原有之馬所存無幾極不敷用可否飭由第三鎮暫先借撥馬三四十匹令此次所派憲兵帶往以備分配統希酌核至此時實在情形已有憲兵是否足供分遣如欲增派憲兵能否不惹日人猜疑並至少實須增派若干名方可足用已電知傅道飭其妥籌速覆矣並聞附傳幫辦良佐來電

距延吉廳迤西十三里摔灣子地方原係博爾哈通河經流處因入冬水落忽於上月二十七日河中央發現古碑一座爲附近韓民一進會人創見遂通知駐延日官移置河畔其碑長二百六十五生的密達寬七十六生的密達厚三十九

生的密達係四面有字惟石刻模糊亦多殘缺自係歲久水齧所致文中略可辨識者碑左側面有議事情裨帥窮遠洞幽從住僧三百餘人及太宗十年九月戊申三十餘字碑正面又有度僧涵前後二百餘數修理塔廟舊新五百餘等語其爲古刹礎碣無疑且此碑刻有太宗字樣此地由來爲中國領土愈可深信是又爲將來界務上添一佐證除飭員再仔細搨印成幅另函呈閱外特先電聞

傅幫辦良佐來電

光緒三十四年十一月十七日

刪電悉牛馬車輛購運到邊分別應用實邊護兵亦卽派入屯營辦法甚是又前與簡帥電商邊務添派憲兵一節言之甚爲審慎刻下邊務憲兵是否須添派馬匹應否派撥統應妥爲籌畫沿江

正書卷五十一
十一
各處渡口尤宜相機注意惟添派憲兵能否令外人不啟猜疑無礙交涉該幫辦身任邊務必能完密綢繆除由陳大帥電飭核覆外仰卽妥籌速覆

附傳幫辦良佐來電 光緒三十四年十一月十八日

盛接奉吉撫憲元電知沿江冬防喫緊有勞我帥廛係殷殷垂詢又前請增派憲兵一節可否照撥飭查情形奉覆等因除電覆撫帥外所有邊務現時情形若何敢再爲我帥陳之一李範允亂黨前有謠傳義兵於封江後擬由源渠河取道綏芬甸子百草溝等處南下至馬牌偷渡向韓鐘城進發之風說當經一面飭查確耗一面暗地設法布置遂先將白哨官景玉所帶之屯田兵計五十人調赴綏芬甸子填紮嗣後接瑋春東溝鬚匪平靜報告卽飭門管帶將原撥去剿匪之

隊調回原防計分紮綏芬蛤蟆塘百草溝汪清四處共巡防一營以期嚴密此防範李亂黨隱匿內地假道滋擾之處置沿江各派辦處暨原紮軍隊已一再傳諭日夜必派人在江岸巡邏如有義兵由韓偷渡卽遵照前此督幫辦通飭辦理倘敢明目張膽不服理阻卽以兵力驅逐決不令其稍有騷擾致貽外人口實並於馬牌暨嘎呀河等處加派憲兵駐紮沿江稽查以期與光霽峪稽察處各派憲兵連絡至涼水泉子以東至黑頂子一帶已一再密飭該沿江岸駐紮旗標之軍隊切實查放矣此防範李亂黨由韓偷渡侵入我界騷擾之處置再准由前路領發之毛瑟槍五百餘桿原爲分撥工程營趁此時停工回防趕爲練習裝放又前路庫存舊過山砲二尊於前月已飭王幫統茂元挑步兵多名逐日操練聊

備不時之需並飭富統領由前路遺缺招補獵戶八十人編爲一哨專爲入山擣穴搜索鬚匪義兵以上三事不過係未雨綢繆爲臨時藉補兵力不足之處置至李範允蠢動謠傳或言二三千人千數百人甚或言於十月某日率領七八十人抵源渠河者又言按韓戶抽練二萬餘人紛紛議論報告不一及責問虛實報告者謂聞諸韓民韓民言聞諸他人終無實據除於各處並源渠河加派密探切實查訪外良佐只有持以鎮靜先時嚴加防範臨時因事驅除此外別無良策至邊防兵力雖形單薄無可恃亦無可怕一邊務交涉日人刻尙和平無甚不法之舉動但良佐仍照常防範暗中抵制無敢荒疏惟前請增派憲兵原爲實行強硬抵制起見遇有小小交涉藉資遣派用收先發之利現兩國旣主持和平似

亦無庸多設但增添憲兵與軍隊上實大有裨益且到處偵察消息較爲靈通又似非多設不可此事頗爲躊躇日昨由三鎮撥來實邊護兵二十名卽順便運送耕牛到屯田營適同工程隊因年終停工先後由琿暨敦化撤回齋籐便派奧村來問爲何進兵比曉以內中情由方爲釋然若此刻再驟添兵又恐出無味之交涉或將原撥第一起截留到長之憲兵一二十名飭其改裝前來至應用軍服手槍等項邊務現已預備無庸攜帶想不致起外人疑忌是否可派或多派之處仍請鈞裁施行良佐本以病餘之軀適逢

國恤邊事自未便因一身去留再行嘵瀆惟有殫盡血誠維持現狀卽以仰答高厚事之成敗利鈍非所敢知但日夜祝禱者界務早爲解決則萬端就理矣

復傳幫辦

光緒三十四年十一月十九日

篠電悉所陳各處防範情形並能持以鎮靜甚足抒懷前次所派憲兵行抵長春刻已折回奉省暫不派往免致外人誤會嗣後若須添用再行稟候照派

復郭副都統宗熙

光緒三十四年十二月初三日

江電悉近邊一帶現在天寒河凍應卽體察情形加意防範毋令韓國義兵潛入爲患如有需兵防守之處儘可隨時商同傳幫辦暨駐琿統帶酌量辦理

附郭副都統宗熙來電

韓國義兵迭次探查實可指名者不過數百人其黨號稱數千至萬人不等現聞槍械僅有千餘財力亦窘迫且有黨魁崔在衡另立一會與李範允意見不合故刻下未敢蠢動然

將來實屬可慮。瓊地近巖杵河一帶最爲重要。曾商請駐瓊劉標統之潔添兵防範。據稱該處村屯太小。駐紮不便。祇好以兩隊分巡職道。以派馬巡隨地查探。但天寒地凍。到處可來近俄各邊。似應增兵防守。已電商傅幫辦斟酌辦理。其餘要政前月已備文詳呈一切。知關憲厘謹此附陳。

致傅幫辦

良佐光緒三十四年十二月初八日

虞電悉義兵槍械業已扣留。應令解存邊務備案。既經驅逐出境。辦理頗合機宜。甚爲嘉慰。冬寒江凍。所在宜防。仰督飭各軍隊隨時嚴密稽查。毋稍疎懈。鎮靜從事。是爲至盼。王幫統帶兵十餘名。砲兩尊。演習一節。恐招耳目。無裨實際。如尙未行。望卽停止。

致傅幫辦良佐

光緒三十四年十二月十三日

蒸電悉王幫統在百草溝練習山砲。既係暗中功效甚多。又不致

招耳目外泯猜疑內嚴防範閱之甚爲欣慰惟砲二尊兵十名人數未免過少該幫辦熟悉情形仰卽相機酌辦

致外務部

光緒三十四年十二月二十三日

頃據延吉傳幫辦良佐電稱近日連接各派辦處報告謂日人現有調查韓民戶口之舉動並於樞榆溝子地方令韓民每家門首訂一門牌上寫南憲第幾番第幾號字樣等情當飭該事務員等就近詰阻並一面派陶丞彬於廿日赴六道溝面問齋籐適齋籐已回東京遂與小田交涉據云去歲齋籐初到便已調查韓民戶口茲不過核對確數又藉此以查訪義兵並無別意經陶丞再三駁詰渠終言詞閃爍堅云無甚妨礙調查一節不肯遽止惟承認韓民如挂有日人調查之門牌卽令一律撤去各等語現由良佐先飭馬牌事務員派憲兵赴樞榆溝子暫令韓民將已挂南憲字

樣門牌卽行撤去又通飭各派辦處如遇有日人再向韓民調查戶口仍派人跟踪查探有無別項思想及非禮之舉動相機阻止隨時報告請轉電外部與日使交涉齋籐現已回國據云約六星期始能遄返等語除仍飭妥爲因應外特此電聞卽祈據理詰商日使請其轉飭禁阻勿使侵我主權實爲至幸

附傳幫辦良佐來電

邊務冬防甚關緊要前經飭派富統領德於上月廿六日酌帶什兵由防起程前往百草溝蛤蟆塘大荒溝及綏芬甸子各分防處所查點軍隊又恐伏莽潛匿遂裹糧進山搜緝至琿春東溝黑頂子沿江一帶查看一週茲於本月廿二日回防據該統領面稱每到一處必聚集華韓人民爲之開導勸諭並嚴申軍令不准稍有騷擾現防務尙稱安謐又該統領

正書卷三十一
巡至綏芬甸子會遇淮軍第九營及巡防左路各隊亦在該處稽查合併陳明請抒憲厘

致傅幫辦良佐

宣統元年正月初十日

邊務用款前曾開單函達詳復以便奏咨立案查自開辦業經年餘亟應清釐款項報冊聞已造齊執事無須自來望即將前項各件從速寄奉事關銷案勿遲勿漏爲要

附傅幫辦良佐來電

前奉鈞電謂延吉如有事可暫緩赴省現邊防軍尙屬靜謐自齋籐回國後亦無甚交涉各派辦處均照常至應辦奏銷年內外加緊趕造現已清理妥當惟係報部之件關係緊要內有多端非面稟不可茲擬准於十二日由延起程親帶赴省稟陳一切至此間事件暫委邊務襄辦陶丞彬代行代折

除飭駐琿表統帶其勲加意照料防務無稍疏懈外另飭富
統領德移駐公署照料附近軍隊大約往返不過三星期特
電稟聞

致傅幫辦良佐

宣統元年正月十一日

蒸電悉邊事既部署妥貼可來小住速歸

致陳中丞

宣統元年正月二十一日

頃據傅幫辦面稱邊款用罄請籌撥接濟等情當已面准由東三
省支應處撥借瀋平銀五萬兩惟由奉解延多需時日請尊處飭
由度支司先爲如數合成官帖就近派員解延以應急需款銀卽
由支應處兌還是爲至禱

附陳中丞來電

頃接延吉陶丞彬電稱本月十七日有鍾城韓民皮炳德等

函邀總鄉約立德勝過江會議租種夾江官地事突被韓巡
查日憲兵將該鄉約在皮姓家拘去刑訊責其不應爲我供
差等情據和龍峪光齊峪各事務員報告前來當飭施藩譯
會同龔科長赴六道溝向篠田交涉據云事在韓國應歸統
監府主持再三磋商終藉詞推諉云云已電飭陶丞務與力
爭勿稍退讓矣惟查立德勝雖原係韓籍而薙髮易服從我
政教多年充我官差日人不先知照我處竟無端自行拘捕
實屬欺我太甚昭常去歲在邊頗知此人當差勤奮曾予以
六品功牌而日人因其爲我出力恨之最深去夏卽爲彼憲
兵所拘經我設法阻止極力交涉始得當差如故若從我之
原籍韓民卽任彼加以欺虐我竟不能保護則境內墾民皆
將畏彼而不敢從我矣殊於前途大有影響惟此次彼係將

該鄉約誘至韓境拘去本預爲推諉之地現陶丞與篠田等直接交涉彼自不肯承認再四維思惟有電告馬領事與該統監交涉及電達外部與日使理論之二法我帥如以爲可行卽乞就近飭知傳幫辦示以辦法並一面分電外部及馬領事請其照辦究應如何應付仍祈酌核示遵又接探訪員來電日人現在沿圖們江北一帶已實行查韓戶口釘立門牌查此事前經外部與日使交涉僅含糊答覆了事若我不再力爭則日人在該處勢力卽將不可限制以後交涉殊更棘手務懇切電外部必始終力持以保現狀是所盼禱又邊務需款孔急蒙我帥准先由吉撥銀五萬兩接濟當飭吉省度支司設法借撥並與東三省支應處比對矣並聞

附陳中丞來電

盛箇電敬悉囑撥邊款五萬兩遵卽飭司如數合成官帖解
延備用此款由吉林官運局墊解該局係將應解東三省鹽
課銀兩撥解請飭支應處將此款就近撥交東三省鹽務總
局作爲吉林官運局解奉鹽課無庸解吉以免往返除飭吉
省官運另備公牘外特先電覆前接來電邊防經費擬再頂
奏仍望於我公任內出奏以維大局而濟要需

致陳中丞

宣統元年正月二十四日

尊處暨傳幫辦漾電均悉內言頂奏一節本應照辦並擬入都面
與部中商酌當可有濟刻下情形不同奏入亦必待後任到再議
定而邊務應需之款刻不能待愚見擬陸軍一協餉先由奉籌延
吉邊餉由吉省承認可否由我公飭吉省度支司妥爲籌畫無論
由何正款項下能先行指定數目若干劃歸邊務接前辦去俾大

局不致有誤至邊務範圍目下不可縮小所見均同惟內容有可
緩辦者統乞卓裁示知餘已詳告傅幫辦轉電矣

附陳中丞來電

敬電謹悉陸軍邊務兩款蓋慮周詳極爲感佩陸軍協餉由
奉承認仰見成算偉籌邊款本吉省義不容辭亟應遵籌認
辦惟通盤合計歲虧不貲邊要急需又難稍緩惟有遵電於
無法中暫籌抵付以濟燃眉查昨奉箇電由吉省官運局墊
解官款官帖合銀五萬兩應可稍爲支持俟此次解款用完
屆時再爲籌畫接濟但此時籌指的款勢處萬難可否仍祈
我公設法奏陳以爲挽救實爲大局之幸無任叩禱至邊務
內容量減緩辦經費容商傅幫辦詳細核定再爲電慰屢懷
附陳中丞來電

電謹悉前墊邊防銀五萬兩因邊務需款甚殷而司庫空虛亦難籌辦特飭官運局於解奉鹽課先行挪墊現在奉省鹽局迭次電催如此款作爲第一批邊防款項則官運局解款必致無着或懇尊處將此款卽作爲支應處借用奉省鹽局之款俟指定的款再行撥還在邊務旣應急需而鹽課亦有着落以後之款仍俟前款用罄自當遵示接續籌解惟邊務吃緊勢難中止如頂奏後部仍不允再當力籌接濟但去年係屬開辦用度較繁本年旣無的款只有縮小辦法若以六十萬鉅款責之吉省實在無此財力仍乞公籌之至吉省部報三千三合銀之案係從前銀價本小是以酌中定價現在銀價奇漲相去懸殊如有需用實銀之處報部仍按時價折算順以奉聞

致外務部

宣統元年二月初二日

頃據延吉電稱上月二十六日六道溝龔事務員來署報稱本日
上午有華人丁銅匠之盟姪某在六道溝街向韓人李姓雜貨店
填貨及去後店主查失官帖四十吊疑爲銅匠盟姪盜去當邀韓
人六七名將銅匠及伊盟姪一併扭獲報知日憲兵韓巡查擬帶
往日分遣所訊問時我警兵二名巡邏到此不讓拘去彼此爭奪
日憲兵竟施放手槍我警兵不懼卒將該銅匠及伊盟姪帶回派
辦處訊辦不意韓巡查膽敢鳴笛糾眾約有韓人六七十名各持
棍棒日憲兵韓巡查各十數名均帶軍器不由理論闖入派辦處
搜查又出手槍向龔委員恐嚇又將陳繙繹推跌在地毆打傷及
頭部脊背龔事務員及繙繹隨到篠田處嚴詞詰問篠田謝過令
醫診治又本街華人五名亦被毆打次日彬赴六道溝與篠田交

涉彼雖認過然於憲兵闖鬧毆打陳繙繹等事仍一味推諉此事
日人持強動輒放槍無理已極又擾我派辦處毆我委員欺藐實
甚現在延邊界務兩國正開談判豈容有此不法行爲致傷睦誼
祈電請外部向日使嚴行交涉等語又電稱日兵近來動輒以手
槍恫嚇其意以前火狐狸溝案情未結卽傷人亦無關緊要懇請
外部速向日使提議結清前案并要日使轉飭後田嚴束部下勿
得妄動手槍致生變故等語特此電陳希卽與日使嚴重交涉切
令懲辦不法各兵嚴加約束不得再有此等繆戾之事是所叩禱

致陳中丞

宣統元年二月初三日

東電敬悉日兵動輒放槍并率多人滋擾我派辦處及毆傷我繙
繹實屬不法之至已照陶丞來電摘要達部請向日使交涉欲令
嚴責篠田懲辦不法各兵并要求應令篠田從嚴約束部下不得

再有此等暴行致傷兩國和睦至丁銅匠是否被日兵搶去尊處
既電飭查覆并指示辦法一切所見甚是

復陳中丞

宣統元年二月初三日

豔電悉邊防經費若徒以一紙空文再請恐亦難邀允准而款既
無着就令縮小辦法總非三四十萬不能支持是以前電商由本
省竭力籌措以應急需至於此次所撥五萬擬作爲支應處借用
奉省鹽局之款查鹽局倘非待款孔殷卽吉省應解之款亦可暫
緩現在支應處除各關欠解之款及傳道回延領款所存不敷撥
還鹽局仍希吾公力任其難設法撥解是爲至盼

致陳中丞

宣統元年二月初四日

昨接尊電云邊務辦法只得縮小若以六十萬鉅款責吉萬難籌
措一節亦係實情但邊務究不能不辦現擬將陶丞奏請補實延

吉所有邊務督辦一律撤銷改爲總辦延吉邊務名目責成該丞辦理遇事稟承督撫憲再該丞在邊二年一切情形熟習尙堪勝任且延吉問題刻下正在談判不難解決將來設治添官勢必就本地方官提升藉資熟手而易調停此次如以陶丞改充似甚合宜至邊務巡警軍隊學堂暨各派辦處均宜仍舊不必更動惟工程未經告竣者可從緩辦屯田營照章授田之辦法可暫收小公署原定之人員可酌減裁總之內容縮小而外表依然不著痕迹不碍大局邊務常年經費統計三十萬金足可敷用但奏時仍宜作爲一年費用由吉省籌撥至後來如何擴充屆時另奏可也再邊務款項就實在支絀而論此時卽不變通將來亦必更改不如就此籌定卽行具奏惟此款三十萬應卽由吉籌撥俾大局得賴維持而始終亦臻完善愚意如是敢祈酌裁電復以便附奏

附陳中丞復電

支電敬悉邊務縮小辦法不便設督幫辦卽以陶丞總辦邊務藉資熟手於實際既可收小於外觀原無變更仰見籌慮周詳惟就現時實情觀之尙有數難須待研究一日本於該處已定明人員職務指定辦事經費力謀進步與我相抗自可想見今見我不設督幫辦卽以地方官兼理必以我爲玩視邊務其舉動之無理交涉之強硬勢將較前爲甚一日本因齋藤職分太輕已將彼升爲少將今僅以幫辦與之對待尙覺勢不能敵且陶丞向皆受督辦命令而行外人未免有輕視之心一但予以專責恐遇重大事件難於應付一邊務交涉日出不窮惟皆設有專任大員彼此權力相當故遇隨時事出卽可就近辯議了結若必事事待督撫命令催政府

交涉不僅事緩生變且實情懸隔遙度不易解決尤難今如以陶丞總辦其事權力相懸勢必難於獨斷恐遇事動生枝節一交涉之事苟非職位足以相當卽須爲外人畏服之人亦或不敢輕視陶丞辦理交涉心思細密見事明確於該處情形頗熟外人亦素信之惟辦事手段及聲望未必爲齋藤等所畏服獨任此事恐多棘手此對外之難也一駐吉兵隊將士多驕紀律亟須嚴整若無知兵大員以督率之恐內患外侮從此而生更示外人以隙一邊務辦事各員及各派辦處若全用舊人則皆向與陶丞比肩共事且陶丞素性謙和每存退讓今遽身臨其上未必俯從聽命倘總辦不能節制各員凡事皆多窒礙若全易新人則邊地才難而日韓情形亦非稍有閱歷者不能臨時因應且亦無因一總辦而盡易

人員之理此將來之難也可否仍請速飭傳幫辦回防如傳道病實不支擬請令陶丞卽以襄辦名目暫行照舊辦理則督幫辦之名義仍在外觀全無變更邊務各員自可如常安心辦事而外人或不至卽有異常舉動况現時外部正開議此項問題想不至卽可解決似宜暫如此支持現狀俟界務解決再定辦法至邊務酌裁人員擬令陶丞切實查核由照常商承我帥飭裁則各員庶不致或有異議未完之工卽遵示暫行飭停今年如無特別用項又將人員酌裁諸事飭令但求實際不可鋪張想三十萬兩亦足敷用鄙意如此仍候鈞裁示遵再此時先將陶丞奏補以爲異日升改府治坐鎮該處對待外人地步原無不可並請核示遵辦

致陳中丞

宣統元年二月初七日

歌電悉日人於邊務設員升級進行未已抵制之力萬不可疏現
因節省經費於辦法雖稍縮小而應付仍須協宜承示陶丞熟悉
情形心思細密惟位望稍輕恐啟外人輕視之心及滋生各種枝
節思慮精詳籌畫周妥非親歷此中甘苦者曷克知此欽佩莫名
惟傳道在此辦理報銷頭緒紛繁清釐需時擬俟稍有就緒卽令
同延供差并俟選有人員接替再令交卸以資接洽吉省有無升
任人員請先行選擇預爲之備現署琿春副都統郭宗熙是否相
宜希隨時查核示知爲幸

復陳中丞

宣統元年二月十一日

齊電悉幫辦一差尊意擬調馬總領事接充亦甚相宜惟該領事
今春任滿後是否再留原任已電詢外部見覆再定至內容應若
何縮小請卽先電陶丞查覆酌辦可也

致陳中丞

宣統元年二月十一日

頃據支應處稟稱前由吉省墊撥邊務五萬兩現准官運局來咨屬由職處撥還鹽局查邊務經費除各關欠解及傳道領款外所存實屬不敷撥用應請轉商吉省另行籌撥等情查該處所稟俱屬實情前復豔電曾經詳布該處既無可籌撥而鹽局又需款孔急惟有仍請吾公力任其難查照前電將前項撥款作爲吉省本年籌撥邊務之款其鹽款望卽另行設法撥解是爲至禱

致陶司使

宣統元年閏二月初二日

前立德勝一案日使已允釋回茲據陶丞函稱至今尙未釋放希告外部轉催日使從速電致韓統監將該鄉約早日釋回免傷彼此感情又火狐狸溝日人槍斃我巡警一案並前派祁道及吳標統赴該處調查此案之詳細情節均已早達外部未識外部如何

政書卷五十一
提議查此案確係日人野蠻無理達於極點倘我放鬆聽其延擱非特邊務前途可危且與國體有傷並卽轉商外部應如何與日使提議爭論之處卽望酌核

致陳中丞

宣統元年閏二月十三日

頃據傅道面稟據陶丞彬電稱支應分處現存款銀約能支撐至本月廿日左右而邊務前欠各處之款爲數不貲迭經催索擬請此次續撥款銀十萬兩尅日解延以應急需等語查支應總處現存部撥邊款無幾該丞所請續撥款目十萬兩擬仍飭由該處提撥五萬兩餘五萬兩卽請由吉飭度支司卽日撥給派員解延歸入吉林擔任本年邊務經費三十萬兩之數是爲至盼

致陳中丞

宣統元年閏二月二十一日

奉外部電據胡使電稱日本駐韓統監府現改正臨時間島派出

所官制增設事務官一人技師一人奏任通譯官二人屬技師通譯生五人共增官九人昨已飭令公布等語查此案現正開議未經判決彼忽有此舉動實屬無理希隨時察視仍飭陶丞相機抵制並飭詳查情形電覆爲要

致外務部

宣統元年閏二月二十二日

皓電敬悉日人以所據報告與祁吳調查情形不符屬再飭詳查以憑與日使爭論等因自當轉飭再將確情查明報告惟是各執一詞此案終無歸束可否由鈞部商之日使彼此派員同到鬧事地方確切調查人證俱在即可水落石出如何酌辦祈鈞部核奪

致外務部

宣統元年閏二月二十九日

頃據陶丞電稱日政府增派間島臨時派出所人員一案顯違現狀已向詰問據云員額雖增而補充之人卽曾在所任差有年者

正言卷五十一
事務官爲鈴木法學士技師爲太田農學士高等通譯二員一爲
中文繙繹山本貞清一爲韓文繙繹糟谷龍三郎其屬官譯生等
卽坂東山崎之類不過爲位置各該員起見等語又據唐領事恩
桐報告所稱新增職員姓氏與陶丞電稟相同惟所設各員均由
日本內部簡任前往就職歸統監府臨時間島派出所長指揮監
督各員一切處分由該所長專斷已於本月二十二日公布施行
統監府整理韓國財政現抽煙酒及家屋稅韓人敢怒不敢言云
云用特彙陳鈞部統希鑒核

致陳中丞

宣統元年三月初三日

吉林邊務經費擬請與部中各分籌一半已專摺會奏傳道請假
同奉附奏派吳祿貞督辦邊務並請升授協都統加副都統銜另
片請獎傳道存記已會台銜一併入奏又調東陸軍三十四年分

餉雜報銷暨添製禦冬裝服用款亦同日會我公與少帥台銜具奏矣除將會稟咨送外特聞

復陶丞彬

宣統元年三月十五日

兩元電悉日人擅准韓民在稽查處火狐狸溝兩處覆設渡船隨時收費並有韓巡查爲之攬載分我主權又令白字四社人民抗納船糧等情經該丞提出三款往與篠田交涉辦理甚是惟一二兩款既經通過其第三款篠田只口認爲公允託辭延宕不肯卽時答覆並僅允爲查禁巡查攬載聽民自便顯係狡賴已照電吳督辦矣惟現時各渡口岸仍宜酌派憲兵隨時稽查保護我國船戶利權其一二兩款既經通過應令各船夫照常收糧不准日人干預至由火狐狸溝嶺到稽查處爲延吉赴韓會甯大道計長六十華里擬請修理工路建築木橋需款兩三千金之譜一節應准

照辦

致郭副都統宗熙

宣統元年三月十六日

咸電悉韓義兵金昌翼等三人至三道溝南鄉約家持李範允傳單向越壑韓戶募集錢糧實屬膽大非特易啟外人口實且與境內治安有害望卽轉裴統帶速飭駐紮三道溝軍隊查明嚴阻立將該義兵等驅逐出境勿令逗留致生事端倘金昌翼等違抗不服可卽查照邊務通飭查拏義兵條例辦理爲要

致陶丞彬

宣統元年三月十六日

電悉金昌翼等在三道溝向越壑韓戶募集錢糧各節昨已據郭都護來電轉達望仍照前電立將該義兵等驅逐出境勿令逗留致生事端是要

附陶丞彬來電

頃據駐琿陸軍一標裴統帶其勲電稱據卑標三營崇管帶報稱東溝土門子一帶有韓黨倡義所金昌翼等七人在我境內各韓民家按戶勒捐糧米以備攻打日人之用並聲稱伊等現在充隊官目下李範允爲首一千餘人分在源渠河毛口歲寶都稅三處駐紮且言俄界二毛子均有助李範允攻打日人以伸國恥等語查金昌翼現住三道溝南鄉約家佈有勒捐文係伊等七人具名各等情由該管帶呈報前來當卽飭嚴行阻止等情除電飭該統帶卽轉飭崇管帶嚴行阻止並加意防範外特電稟聞

復陳中丞

宣統元年三月十七日

寒電悉稽查處及火狐狸溝設渡事我退則彼進誠未可稍有讓步公覆陶丞辦法極中肯綮仍希就近指授機宜俾資遵守

正言名目一
三
附陳中丞來電

頃據延吉陶丞兩元電係請示稽查處及火狐狸溝設渡與
修路事原電諒達覽當以鄙意電覆略謂稽查處火狐狸溝
渡口向來屬我主權茲當維持現狀稍有讓步利害關係極
大執事與篠田所提三款係主和平尙屬允協惟此事去歲
曾以憲兵極力阻攔彼雖未肯明讓其氣已餒彼時蓋欲爭
回全江渡權故爭議終未能決今既允各渡各岸依通行公
法各守半江權限是我已稍退讓彼雖不能不認爲公允而
仍藉詞延宕用意殊爲叵測亟須一面嚴與篠田交涉一面
設法阻止外觀雖不可遽失和平而抵制之法務必盡力所
能及卽希抱定宗旨竭力堅持爲禱再自稽查處至火狐狸
溝大道日人既有包商消息路權一失所損滋多自應力圖

抵制先發爲自治之策爭回自修辦法甚是現既估定建築木橋修理土路必需兩三千金事關主權斷難惜費卽希選派妥員前往僱工速修切實報銷可也云云是否有當尙乞酌奪示遵

致陳中丞

宣統元年三月二十四日

頃有人密稟聞某國人心懷叵測擬在安東布置一切欲與我官民爲難意在彼此死傷數人藉爲口實以圖交涉等語請飭預爲防範並云或在延吉以邊務韓僑礦務等事藉口挑釁查所稟是否確實姑不具論但不能不預爲防範免致彼族尋釁致釀交涉現已密電各處電文如下安東沈道延吉傅道長白府張守延吉廳陶直牧鳳凰廳程牧莊河廳陳牧安東鄒令輯安朱令臨江熊令寬甸姚令岫巖賀令現屆春末均已開凍沿江水排陸續下運

各國商民絡繹到內地游歷我國商賈亦多趁時負販且墾荒窮民麴集各處良莠不齊惟恐不無匪徒藉端滋事擾害治安況中外雜處地方亦虞輕啟釁端致有交涉務宜認真隨時訪查彈壓和平辦理極力防範以免生事該道廳縣等各有地方之責切勿稍有疎忽是所諄諄誥誠倘有意外事端通電之處自宜從速電稟請示其不能通電者務宜飛稟候示核辦等語此電如此措辭因未便明抉其隱想公當以爲然尙祈查照密飭防範爲幸

致陳中丞

宣統元年三月二十四日

頃致敬電諒已閱悉現復據密稟探聞係間島非安東並云有一某國武官扮華裝冒稱華人混入鬍匪之內煽惑與某國人起釁藉圖交涉等語擬請分別揀派幹員潛赴間島一帶不動聲色秘密訪察有何情形仍由電密知以便應付公以爲何如尙祈卓裁

退耕堂政書卷五十五目錄

電文十三

會議幣制案

退耕堂政書卷五十五

天津徐世昌

電文十三

會議幣制案

致袁宮保

光緒三十三年六月初一日

宥電敬悉部奏試鑄通用銀幣流弊甚大中國用銀向以兩計如能廢兩不用則部鑄銀幣尙可通行倘不能廢兩則部鑄七錢二分之幣終歸兩歧非久制也蓋嘗論中國不能廢兩之故一則由於進款以關稅爲大宗每年約四千餘萬兩進口貨完稅皆以兩計今若改用七錢二分之銀幣則必更張商約轉相折合更增漏卮一則由於出款以賠款爲大宗以銀合鎊價已有虧累之時若再以七錢二分合算則恐更有虧折且部議先鑄一千萬兩銀幣區區之數何能周轉勢必市面仍不見新幣兩湖曾鑄一兩銀幣

正書卷五十五
而不能通行者乃國家無信用之效力非新幣之咎也故欲劃定幣制重量宜以一兩爲準成色應以九八爲宜鄙見與尊指正復相同但以一兩爲銀本位更宜多鑄半兩以補助之則攜帶較七錢二分爲尤便即請主稿會敝銜入奏以上所陳可否於摺中聲明并望卓裁 印

附袁宮保來電

武昌張中堂南京端制台盛京徐制台鑒洪部奏試鑄通用銀幣一摺諒已咨達冰案茲事關係各省財政甚鉅不審尊見以爲何如鄙意行用七錢二分銀幣弊害滋多試縷述之各國貨幣自有制度如英之先零俄之盧布德之馬克法之佛郎美之託臘日之金銀圓皆各適其宜不相沿襲中國向用生銀本無幣制今欲釐正圖法制定國幣乃務爲苟簡沿

用外人之程式坐昧經國之遠圖如政體何如國計何害一
中國用銀向以兩計今制爲七錢二分之銀幣將廢兩不用
耶其勢萬辦不到將用元而仍存兩耶是圓法終不劃一徒
滋人疑莫定民志而將來實行商約仍難免於更張害二既
名國幣各庫自應收放如仍按兩折合則畸輕畸重弊混叢
生勢難一律而胥吏駟僮益得因緣爲奸是謂病民如逕按
元收納則丁征鹽課貨釐關稅及一切官項公家喫虧甚鉅
是謂病國害三中國惟無幣制故墨元得以侵入今鑄造銀
幣而分量輕重悉準墨元非惟無以示抵制且不啻招其浸
灌而助之推行也害四綜而言之圓法者一國之內政不必
強同權量者百代之大法不容輕易若以七錢二分定爲幣
制則是破壞律度放棄主權外增漏卮內滋紛擾全局通籌

未見其可而部議方謂規仿墨幣主正流通而便民殊不知墨元所以能行者以我國初無銀幣自易輸入並非因輕重之適宜也卽如俄之盧布行於東三省印度之羅批行於西藏其分量又各不同是其明證况墨元僅行於通商口岸並不過行於腹省內地恐不抵生銀十分之一又烏得執一隅以概全局哉民烏乎便法烏乎通若部議所謂大小輕重易於攜帶之說則自兩以下有五錢二錢一錢其重量皆較七錢二分輕便竊以爲中國不劃定幣制則已如劃定幣制則重量宜以一兩爲準成色應以九八爲宜蓋先以銀爲本位不可不抬高其質若以九成銀爲之鼓鑄之初雖贏厚利而將來收納暗虧必多慮其虧而另外加色卽又不足示信且銀元初行生銀驟難盡廢若銀元成色太低勢必不敵銷必

不暢又未可強用壓力使人甘受其虧惟按九八成鑄造則與現在通行寶銀約足相埒又無挑剔平色之弊民自樂從而國家收款亦不至暗中受虧卽將來更革鑄燬都可無慮不過按此鑄造工本稍大難免稍有折耗然鑄造宗旨原爲上正圜法下適民用內以杜絕中飽外以抵過洋元無形之中大利自普固非斤斤然權子母逐什一也况折耗斷不至太鉅并可參鑄各種小元以補助之凱不諳計學竊謂規定幣制道不外此若如部議特未嘗統籌而熟計耳三帥公忠體國考求有素如不以鄙言爲謬擬會名銜合詞疏爭其或言之不當亦祈糾而正之幸甚

附張中堂來電

天津袁宮保

南盛端制台

京盛

徐制台洪津宥東兩電悉慰帥崇論

閱議佩服萬分鬱悶經旬讀之霍然病已中國國幣豈有用
墨銀重量七錢二分之理做處光緒三十年八月奏內已詳
乃度支忽創此議真愚蒙所不解慰帥來電所言損失國體
貨幣兩歧折合病民引銷墨元四害透澈無遺第度支部咨
文所言陳尙書璧在鄂詢知鄂鑄一兩銀幣不能行已收回
銷燬一節殊非事實鄂鑄一兩銀幣本省通行已發出七十
餘萬不惟藩庫商民卽江漢關稅亦按庫平足紋一律收用
此爲行銷明徵嗣因部文改鑄一兩零六分者不得不將舊
鑄者陸續收回然至今尙有十餘萬散在民間事乃迫於部
章並非鄂省自願銷燬當日陳尙書在鄂與鄙人並未言及
僅隨帶司員向局員談及局員告以部章旣另定新式現已
遵改將舊鑄收回聽候頒發新模並無一兩之幣不能行銷

之語可質天日不知隨員何以誤會菊帥電鄂鑄一兩不能
通行之語務請酌量更正惟津電成色用九八一節似乎尙
未完備此次創定國幣自須毫髮無憾無往不宜無施不可
方爲盡善若色止九八本國商民流通自屬可行上下出納
已稍有不便至於買鎊還債洋人必仍以九八色計算斷不
認爲足銀中國今日以銀爲本位則所鑄國幣必宜使中外
同認毫無貼補則以後凡一切有關幣制本位等事方能推
行盡利竊謂銀色必以十足爲宜考日本鑄造金元表凡值
銀十元者其金色重二錢二分二厘其中足金實有二錢蓋
將其銅料雜質二成剋除不許仍作足金二錢計算故能通
行無滯聞英國官商言英國金鎊亦是只算足金之數并云
他國皆然各國金幣辦法旣皆如此我斷不能不一律照辦

近日詳加化驗試造若每一枚用足銀一兩加入雜質三分共重庫平一兩零三分銀質並不嫌軟聲音亦甚清亮至於工火虧耗一節計每幣一萬兩須折耗二百兩零外省銀幣局因生銀漸少銀條漸貴每一局每日僅能鑄銀二萬兩通年鑄銀六百萬兩統計中國造幣分局不過五六處虧耗約共七十二萬兩儘可參鑄各種小圓借爲補助惟小元須制爲足銀九成限定鑄數不得登大元十分之一方能通行價值照小元一律不准壓價小元一萬兩可有盈餘四五百兩約可抵補十之二三卽鄂再有折耗一省所攤無幾爲數甚微保國權利民用自有大利大利豈如市僧專計盈餘哉且銀幣信紙幣行其大利豈爭此區區哉慰帥擬聯銜疏爭此萬不可少之舉洞願附驥但成色必宜慎重鄙說有無可采

統請裁酌速示管見總以足色爲宜全括大局無處可擊且與各國一律中外誠信相存其利大矣鵠候示覆

附袁宮保第二電

武昌張中堂南京端制台盛京徐制台洪鄂號箇兩電悉探本立論至理名言令人五體投地五年前凱亦嘗以先立銀本位宜鑄十足一兩銀元爲說而部員謂中國寶銀本非足色祇在九八九之間苟鑄十足受虧太鉅且恐洋商收我十足而以寶銀抵換盤剝或鎔化牟利迄不能奪乃降爲九八之議而部員仍不愜意前年定爲九六五因其同非十足相去無多不復與爭中堂主持十足自是大處落墨亦爲不易之理擬於疏內切實發揮請鑄十足而折帶一筆云至少亦不可出九八以下以略符凱九八之議是否有當統祈卓裁

示復遵辦

致張中堂
袁宮保
端制軍

光緒三十三年六月十五日

箇文兩電均悉籌議精當欽佩無既一兩銀幣改用足色洵至當
不易之辦法慰帥擬請鑄十足折帶九八一筆亦甚周密鄙見以
多鑄半兩之幣與一兩之幣成色相同將來行用愈覺合宜則本
位益形鞏固是否有當仍候卓裁 印

附張中堂來電

天津袁宮保南端制台京盛徐制台洪津文電讀悉具見盡畫調

停之深意惟從前部員所慮中國寶銀本無足色祇在九八
九之間苟鑄十足恐洋商以寶銀抵換盤剝鎔化牟利一節
似未盡確查中國寶銀向有庫寶市寶之分庫寶即上藩庫
解京餉之寶均係庫平足色各省皆同雖中國化驗未精大

致無甚歧異市寶卽各埠行用之寶成色不一無論何省如遇兌交庫款均係按照各省市寶向來行用成色補足庫寶成色然後作算卽以湖北例寶而論武漢通用作爲九九二成色如解藩庫以之折合庫寶每百兩仍須加補成色銀八錢如解部庫則須聽部庫官吏飭補絲毫不能含糊此京外各省現行事例之明證也今者擬鑄庫平庫色一兩銀幣卽現在之庫平庫色一兩足銀除官鑄庫寶始准與新鑄一兩十足銀幣平均兌換外如各埠市面行用寶銀以及生銀錠塊均須按照成色申補卽外洋來之銀條華商亦不能卽作爲十足每一千兩亦須分別酌補數錢數分是新鑄一兩銀幣與各省市面行用寶銀判然兩途各不相混旣不能抵換盤剝更不能鎔化牟利此理不辨自明部員於庫寶市寶成

色未加辨明是以稍存過慮今承慰帥主持挈銜剴切電達
當必豁然蓋中國市面寶銀本無足色然其交庫本不能作
足色計算市面亦並未照足色行使至中國庫寶向係十足
成色今擬鑄之一兩新幣其成色卽向來之十足庫寶名異
實同無所謂受虧太鉅也果使國幣暢行則其間工火雜質
稍有些微虧耗之處以紙幣匯票乃大利補之此區區之數
不足計矣至慰帥前電雖有九八之說乃是未定初稿並非
定議如果足色之說可采似無妨折衷歸於一途查前年鄂
省原奏仍係九成紋銀亦未議及足色此次奏內似可聲敘
鄂省前年所奏色係九成此次直省初稿擬用九八今經公
同商酌反覆研究考諸商論揆之詳情今以足色爲最善是
以擇善而從均不敢拘泥前說目前於便商民行紙幣之利

將來卽爲銀幣定本位之基云云蓋集議雖采三省裁斷仍係慰帥也或奏尾稍參活筆暫請試辦一年抑或另行設法措詞稍作斡旋之處統請慰帥卓裁核定惟出奏時應請慰帥領銜至要不惟各省憲綱次序應然且此議實慰帥發之也萬勿客氣至禱至感卽候電示洞效印

附端制軍來電

武昌張中堂盛京徐制台鑒洪鄂號箇盛刪電均悉幣制事尊議均體大思精欽佩之至已請慰帥挈銜同奏矣

附袁宮保來電

武昌張中堂南京端制台盛京徐制台洪鄂效電悉具見蓋籌精密佩服曷勝謹當照辦惟幣制一定便不可易似無須參用活筆作試辦一年之請疏稿擬成後仍當電達請三帥

斧政凱簡印

致袁宮保

光緒三十三年七月十四日

真電誦悉疏稿剖析詳盡精當不易深佩蓋籌鄙意尙有數處略待商酌縷陳如下一疏中苟且補苴塗飾目前二語承上部議而言似覺太重應請酌易二日金一圓約抵美之半弗想是筆誤應改託臘德之半馬克應改三馬克祈再詳考三各種小幣係補助貨本可減成惟目前財政機關未備先以商民信用爲主若明定九成恐民間行用仍不免折扣抑壓之弊馴至搖動本位不無可慮似應仍用足色以便通行四令擬鑄庫平庫色一兩銀幣准與前之官鑄庫寶平均兌換恐公家吃虧過甚按照庫鑄最高之寶銀不過九八九九若准均平兌換市儈必取巧終日以庫寶兌換庫圓查中國寶銀既無十足從前各省解款雖有補成之說不過

胥吏緣以爲奸實則官鑄寶銀亦非十成足色鄙意宜與各埠通行寶銀以及生銀塊錠外來銀條按照市價分別申補成色且旣鑄新幣卽當禁絕舊式若官鑄寶銀與新幣平均兌換是仍得通行無滯於新幣大有阻碍此中總宜稍示區別方可維持不做區區之見是否有當仍候卓裁

附袁宮保來電

盛京徐制台洪會奏銀幣稿擬就如下 奏爲部議試鑄通用銀幣不無窒礙擬請飭下度支部從長計議另定分量成色以昭幣制而正圖法恭摺會陳仰祈 聖鑒事竊_臣等

前准度支部咨開本部奏請試鑄通用銀幣一摺於光緒三十三年三月二十八日具奏奉 旨依議欽此相應刷印原奏恭錄 諭旨咨行欽遵查照等因前來_臣等查閱原奏

互相籌商迭加討論竊以爲法必規諸遠大事無憚其繁難
偏見者取便一時而苟簡適以滋後患深識者綜籌全局而
得失乃有所折衷卽如此次部議試鑄銀幣其重量主用七
錢二分臣等詎不知此項幣式中國商埠沿用稍久習慣不
驚仿而行之自易爲力願於事雖較易而爲法則已非且其
弊又甚鉅何以言之蓋旣制爲國幣必當熟權統計有昭示
中外之宏規而未可苟且補苴爲塗飾目前之政策已也夫
創修幣制本爲一國自有之特權而審定分量之重輕與夫
成色之高下須適合乎至當不易之準則而不必有依附摹
擬之見存中國向係用銀之國從前幣制未立僅用生銀官
民出納皆以兩錢分釐計算海通以來墨西哥之鷹洋乘閒
流入自通商口岸逐漸灌輸於內地以彼低潮之成色易我

純足之寶銀虧耗無形歲糜千萬近年各省自造龍元藉爲抵制而仍以墨元七錢二分之重量爲準此僅可謂今造洋元而不得爲制定國幣

臣世凱臣之洞

向主造一兩重銀幣

之議前年財政處會同戶部奏定鑄造重庫平一兩銀幣定爲本位更鑄五錢二錢一錢三種銀幣與現鑄之銅圓舊有之制錢相輔而行公私收發款項一律行用洵足以垂定制而昭大信茲准部議酌定銀幣分量仍改從前七錢二分之制在部臣不憚遲回審慎一再改良按原奏所稱係爲利推行而期劃一起見其用意固未可厚非然臣等總總慮竊恐推行未必盡利而幣害已伏其中劃一更屬難期而紛擾且因而起有不得不縷晰陳之者查各國貨幣自有制度如英之先令俄之盧布德之馬克法之佛郎美之託臘日本之

金銀圓並適其宜各不相襲中國制定國幣乃務爲簡易沿用外人之程式坐昧經國之遠圖如幣制何如政體何害一中國用銀向以兩計今制爲七錢二分之銀幣將廢兩不用耶勢必不能將用圓而仍存兩耶何名劃一徒滋人疑莫定民志而將來實行商約仍難免於更張害二旣名國幣各庫自應收放如仍按兩折合則畸輕畸重弊混叢生斷難一律而胥吏駟僮益得因緣爲奸是謂病民如逕按圓收納則一切應收官項公家喫虧甚鉅是謂病國害三中國惟無幣制故墨圓得以侵入今鑄造銀幣而分量輕重悉視墨圓非特無以示抵制且不啻招其浸灌而助之推廣也害四有此四害則七錢二分之幣是遷就之法而絕非久遠之謨是沿襲之爲而並非規定之制上損國體下失民信內便中飽外長

漏卮全局通籌未見其可竊謂宜仍用前年財政處戶部奏定一兩重量庶以正圓法而昭幣制顧主七錢二分之議者每謂一兩之未易行其論多端大要不外二者一謂七錢二分便於商民而一兩不便於商民一謂七錢二分便於與外國交涉而一兩不便於與外國交涉臣等請再陳之查墨圓之所以能行於中國者以我國初無銀幣自易輸入非因其輕重之適宜也卽如俄之盧布行於東三省印度之羅批行於西藏分量又各不同是其明證况墨圓僅行於通商口岸及東南各省其內地及西北各省率皆習用生銀恐墨圓不敵生銀百分之一烏得執一隅以概全局且民間應納丁漕釐稅定例悉以兩計與其用畸零之圓而折合兌交何如用整齊之兩而簡捷完解其不及一兩者卽有找補亦較省事

此一兩之便於商民者也中國與外國款項交涉進款以洋稅爲大宗而海關歲收三四千萬皆以兩計况釐定國幣訂在商約外國商民悉應遵用今定爲庫平一兩之銀幣其餘各平將來必應盡廢雖納關稅者一時尙用關平核計然以庫平一兩之幣折合關平之銀較之以七錢二分之圓折合關平之銀亦爲合十五枚再等而下之一分應合制錢十五文一釐應合制錢一文半夫一文有半似近破碎矣然勢非得已也若必有整無碎則部奏所謂均以十進位者其小銀幣一角當以十分計算而不當用七分二釐其大銀幣一元當以十錢計算而不當用七錢二分是破碎之咎此僅屬找付之細彼且占正位之中果孰得而孰失也况中國用銀之地究較多於用圓之地若如部議則向係專用銀兩未通銀

元之處其於銅幣制錢遂無折合之時耶卽謂折合多不劃一試問通行銀圓各省其折合果已劃一否耶且制爲一兩銀幣正因其數目分明可免挑剔平色之弊固自爲整頓劃一計也部議又謂東西國幣形式重量大半相類墨國新幣值當美幣一託臘之半今中國從七錢二分之制重適相等將來與各國比例固易折算不知各國幣制重量實多懸殊姑就日本言之日金一圓約可抵美之半弗德之半馬克俄之一盧布尙屬相類也然以例法之佛郎則僅抵十之四矣以合英鎊且僅抵十之一矣重量參差如此尙謂之大便利出款以賠款爲大宗而公約所定四百五十兆亦以兩計且以銀合金磅價已有虧累之時若再以七錢二分合算則恐更有虧折此一兩之便於與外國交涉者也以彼四害形此

兩便則國幣宜用一兩之制自無疑義若部議所謂大小輕重易於攜帶之語則自兩以下有五錢二錢一錢其重量皆較七錢二分輕便蓋有一兩以爲本位之幣又有五錢二錢一錢以爲輔助之幣自可暢行無阻部議又謂七錢二分之銀元用以折合銅幣制錢易於操縱如大銀幣一元折合七分二釐之小銀幣十角小銀幣一角折合十文之銅幣十枚銅幣一枚折合制錢十文均以十進位而一兩銀幣重量不同多以爲不便行用等語其說甚辯不知銀幣無論如何制定皆不能舉銅幣制錢而廢去之銀幣以一兩爲主達於一錢爲止猶之小元達於一角爲止自錢而下仍有銅幣制錢交資並濟又何不便之有今試以一兩新幣姑照制錢一千五百文定價實合十文之銅幣一百五十枚其五錢者合七

十五枚二錢者合三十枚一錢者半相類耶故隨人步趨良
可不必至於一兩之視七錢二分折算孰爲難易更無俟煩
言而解部議又謂鄂鑄一兩銀幣未甚行用已收回鎔燬所
言實未盡符合臣之洞查鄂鑄一兩銀幣本省通行前已發
出七十餘萬不惟藩庫收發商民信用卽江漢關稅亦按庫
平足紋一律收納此爲行銷明徵嗣因部文改鑄一兩零六
分者不得不將舊鑄陸續收回然至今尙有十餘萬散在民
間此乃迫於部章並非鄂省自願銷燬部臣原奏未免誤會
夫重量旣審則成色宜定竊謂此次創定國幣必須力求完
備毫髮無憾無往不宜無施不可方爲盡美前年部定成色
係用九六或謂宜用九八然皆非足色旣非足色則本國上
下出納已有不便若買鎊還債洋人必仍按其成色計算不

肯認爲足銀既以銀爲本位則所鑄國幣必使中外同認毫
無貼補以後一切有關幣制本位等事方能措施罄宜故重
量必以一兩爲歸成色尤必以十足爲準然足色純銀質軟
易做考日本鑄造金元表凡值銀十元者其金元重二錢二
分二厘其中足金實有二錢蓋將其銅料雜質二成扣除不
計仍作足金二錢計算故能通行無滯美人言英國金磅亦
僅計足金之數他國亦然各國鑄幣辦法既大略相同我斷
不能不一律照辦近由鄂省詳加化驗試造若每一枚用足
銀一兩加入雜質三分共重庫平一兩零三分銀質並不嫌
軟聲音亦甚清亮至於工火虧耗計每銀幣一萬兩須折耗
二百兩零儘可參鑄各種小幣以爲補助惟小幣須定爲足
銀九成限定鑄數不得過大幣十分之一方能通行價值照

大幣一律遞算不准抑壓小幣一萬兩可得盈餘四五百兩約可抵補十之二三再有折耗爲數無多而保國權利民用自有無形大利固不若市儈之操奇贏逐什一也且銀幣保紙幣行中外誠信相孚其大利所在尤不爭此區區之盈絀或者謂中國寶銀本無足色祇在九八九之間苟鑄十足受虧太鉅且恐洋商收我十足而以寶銀抵換盤剝或鎔化牟利此說似是而實不盡然查中國寶銀向有庫寶市寶之分庫寶卽兌藩庫解京餉之寶均係庫平庫色各省皆同雖中國化驗未精大致無甚歧異市寶卽各埠行用之寶成色不一如遇兌交庫款均須按各埠行用成色補足庫寶成色今擬鑄庫平庫色一兩銀幣卽現在之庫平庫色一兩足銀除官鑄庫寶始准與新鑄一兩十足銀幣平均兌換外其各埠

市面行用寶銀以及生銀錠塊並外來銀條均須按照成色
申補各不相混既不能抵換盤剝更不能鎔化牟利此理較
然甚明無所謂受虧太鉅也幣制關係重大不厭詳求臣等
往返電商約主一兩之議臣端方前此詢謀南省紳商曾以

七錢二分爲便茲准臣世凱臣之洞所議統鑄辦法意見相

同至十足之議查前年鄂省奏鑄仍係九成紋銀未與議及
足色此次臣世凱初電亦擬用九八成色今與公同商酌反

復研究考諸商論揆諸法情仍以足色爲最善是以擇善而
從均不敢拘泥前說所有鑄造銀幣宜用一兩重量十足成
色臣等爲昭幣制正圜法起見究應如何折衷至當之處應
請

旨飭下度支部核議施行謹合詞恭摺陳伏乞

皇太后

皇上聖鑒訓示再此摺係由

臣世凱

主稿合併陳明謹

奏

祈斧政示覆以便繕奏

致袁宮保

光緒三十三年七月二十二日

竒電悉改正疏稿權衡利弊斟酌盡善佩甚鄙意此次新鑄庫圓首以取信於民爲要義若以九成之一錢二錢抵補一兩半兩之虧耗必多流弊似非完美辦法總之新圓不過定爲國幣之本位一經信用自然暢銷紙幣不必盡用銀圓此項目前耗虧不足計較且市面有銅元相輔而行一錢二錢者不宜多或只鑄百分之一以爲輔助之貨然成色仍須用十足方昭大信且免私鑄尤省折扣兌換統希卓裁定稿卽挈敝銜會奏

附袁宮保來電

盛京徐制台鑒洪鈺電想早達頃接午帥復電深佩尊論兩節爲體大思精屬照核改茲將原擬摺稿聲音亦甚清亮之下幣制關繫重大之上酌易一段其文如下至於工火虧耗計每銀幣一萬兩須折耗二百兩零其數不爲不鉅然臣等聞東西洋商之善於懋遷精於會計者率多深謀遠慮不務小利近功雖營業之初屢經折閱糜財無算而彼明知大利在後輒不憚投擲資本甘心受虧久之成效昭然非但恢母金並且增益鉅產由所見大而所持堅也貿易者尙如此况於謀國計乎此次宗旨專爲創定幣制改正圜法齊一民聽保存國權大利自在無形之中固不若尋常市儈之徒操奇贏而逐什一雖極知其虧耗猶毅然而爲之且銀幣信則紙

幣行中外誠信相孚其大利所存收效尤遠何爭此一時之
盈絀或謂須參鑄各種小幣均定爲足銀九成藉資補助此
已將小幣成色變通用意至爲矜慎然按此計之小幣一萬
兩約可得盈餘四五百兩而大幣每萬兩須虧至二百兩有
奇且小幣尙須限定鑄數恒不得過大幣十分之一則此區
區盈餘不過僅能抵補十之二三此外折耗尙多仍難彌補
似不如均用足色則絲毫不失信用而遐邇更易流通今日
固屬便民異日正以利國迨民信旣久將來酌劑盈虛之道
操縱仍在國家尙何復折耗之足患查各國補助幣皆無用
足色者以其行用有限制國庫包兌換故舉國皆信從而遵
行之中國地大權分政令未一而財政機關尤屬未備此事
首以取信商民爲主若小幣減成民不見信恐仍不免折扣

抑壓之弊卽不能無動搖本位之慮故無論大小各幣均以一律足色爲宜如慮小幣工本復鉅非但無盈餘可得而且有虧折堪虞則萬不得已或於二錢一錢之幣參用九成而由公家包爲兌換至五錢之幣較一兩爲輕便於行用必須十足成色且須多爲鑄造俾與一兩並行庶可相維不敝或又謂國力未裕鑄本尙難籌措折耗更復何堪不知規遠大之圖者卽不應憚繁難之舉臣等固已言之矣合全力以經營或眾擎而易舉卽謂現在財政困難然部議試鑄之幣似必須迅速停罷則此等正當幣制以後尙有推行之時若必仿造七錢二分之洋元究於幣制名義無涉且於推行阻礙甚多恐如所謂非徒無益而又害之者也或又謂中國寶銀本無足色祇在九八九之間苟鑄十足損失必多且恐洋商

收我新幣而以寶銀抵換盤剝或鎔化牟利此說亦不爲無見查中國寶銀原有庫寶市寶之分庫寶卽兌藩庫解京餉之寶市寶卽各埠行用之寶庫寶雖名爲庫平庫色而已非真正十足市寶尤成色不一如遇兌交庫款向皆以庫平庫色爲衡其非庫寶者均須按各埠行用成色補足庫寶成色實則吏胥高下其手頗滋弊竇今擬鑄庫平庫色一兩銀幣確係真正十足除將來專行新幣凡各項紋銀均須逐漸禁絕外現在兌換新鑄十足之銀幣無論官鑄庫寶及各埠市面行用寶銀以逮生銀錠塊及外來銀條均須按照真正十足成色分別申補各不相混旣不能抵換盤剝更不能鎔化牟利此理較然甚明固無庸慮其損失也云云祈速核復以便繕定奏稿卽日會銜拜發立盼立盼

附張中堂來電

天津袁宮保南京端制台盛京徐制台洪津眞電悉承示銀幣奏稿精密顯豁佩服之至請俟端徐兩帥復到卽繕發再列銜請慰帥居首鄙人列第二務懇俯允蓋鄂居首則此摺必駁矣洞

附袁宮保來電

盛京徐制台鑒洪寒電悉承示四節周詳可佩一塗飾目前擬改僅便目前語意已輕二日金一圓約抵美之半託臘德之二馬克日人謂圓爲弗前稿係從日本名詞而稱爲半弗今已改爲半託臘至半馬克係二馬克之筆誤已更正三四兩節已電商香帥午帥核復俟復到再達凱銑印

附袁宮保來電

盛京徐制台鑒洪禡電悉茲事體大研求討論不厭精詳現
香帥不日來京擬與面商妥協後再電達尊處會奏凱樣印
致唐中丞

光緒二十二年九月初七日

歌電悉新銀元不敷市用尊意添鑄二百萬極是請卽飭接續籌
鑄銀本位摺不具奏項城南皮會議時已提及但通行之期尙遠
三省先救市面不妨姑用我法先行辦理仍請卓裁

